


YAUBADA YANA  
VONA'AWAUFAUFA  
IVAUNA



The New Testament in the Iamalele Language of Papua New  
Guinea

**Yaubada Yana Vona'awaufaufa 'Ivauna**  
**The New Testament in the Iamalele Language of Papua**  
**New Guinea**  
**Nupela Testamen long tokples Iamalele long Niugini**

copyright © 1984, 1988 Wycliffe Bible Translators, Inc.

Language: Iamalele

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 11 Nov 2022 from source files dated 9 Oct 2020

db771331-f438-5051-a7d5-80ea6197c078

## Contents

MADIU . . . . .	1
MALIKA . . . . .	87
LUKE . . . . .	136
IONI . . . . .	224
FOLOVA . . . . .	290
LOMA . . . . .	372
1 KOLINITA . . . . .	419
2 KOLINITA . . . . .	468
GALETIA . . . . .	497
EFESO . . . . .	516
FILIFAI . . . . .	532
KOLOSE . . . . .	544
1 TESALONAIKA . . . . .	556
2 TESALONAIKA . . . . .	565
1 TIMOTI . . . . .	571
2 TIMOTI . . . . .	584
TAITO . . . . .	593
FILIMONI . . . . .	599
IBELIU . . . . .	602
IEMESA . . . . .	638
1 FITA . . . . .	649
2 FITA . . . . .	662
1 IONI . . . . .	670
2 IONI . . . . .	681
3 IONI . . . . .	683
IUDE . . . . .	685
VE . . . . .	689

## **MADIU** **Iesu Valana 'Atumaina Madiu 'ana** **kilukiluma.**

Madiu tamu Iesu yana tovetutuyamavo 12 'adi 'aila'a 'wainega, we'e tamu 'ana wagava Livai. Yana folova takesi 'ana tolaugogona i folofolova Loma gabemani faifaidi. Muli-eta Iesu i venua'ivineni i vetovetutuyama 'waineye.

Madiu de'e buki i kilumiga taunina yana 'aila'avo me Diu faifaidi. Me Diu i nuani i vo sai'afoga Yaubada 'ana Venua'ivina i na mai bega taunina yadi kini. Ibeliu bonad-iega i goleni Mesaia we'e bona Guliki 'wainega, Keliso. Diu to'edakumetavo Iesu yana 'eba mai lamuna i bavuyeni wata tomotoga fue di nuadi i voganidi Madiu nuanuana i na ve 'waidie Iesu taunina mogitana Keliso me Diu yadi kini, begaidi i veifufu Iesu yana souyagi bani'odi kini. Wata 'ifwaidi vona i 'inanadi Vona'awaufaufa Nagami 'wainega, Yaubada 'ana Venua'ivina faifaina vonanidi 'adi mogitana i souyedi Keliso 'wainega. Tamu nani faifaina i kilumaga, Iesu yana ve, luvetubama Yaubada yana 'Aila'a nageneye faifaina, wata yana vona-awatabai fue di givagivadi tomotoga yadi luku Yaubada yana 'Eba Veimea nageneye faifaina i kiluma, bega tutuya de'e Yaubada i veveimea tomotoga 'waideye.

### *Iesu tubunavo tubulelegidi.*

<sup>1</sup> Iesu Keliso tubunavo side bani'odi i tubugedi, taunina Kini Devida 'ana wauma 'wainega i souyeni we'e Devida Ebelamo 'ana wauma 'wainega i souyeni.

<sup>2</sup> Begaidi side bani'odi,

Ebelamo natuna Aisake,

We'e Aisake natuna Iakobo,

we'e Iakobo natunavo Iuda ma tainavo,

<sup>3</sup> we'e Iuda natunavo Felesi wata Dela, inadi Temali,

we'e Felesi natuna Esiloni,

we'e Esiloni natuna Lami,

<sup>4</sup> we'e Lami natuna Aminadaba,

we'e Aminadaba natuna Nasoni,

we'e Nasoni natuna Salimoni,

<sup>5</sup> we'e Salimoni ma yana vavine Leabi natudi Bwasa,

We'e Bwasa ma yana vavine Ludi natudi Obedi,

we'e Obedi natuna Iese,

<sup>6</sup> we'e Iese natuna Kini Devida.

We'e Devida 'wainega i velamuga side bani'odi,

Devida natuna Solomoni, we'e inana nagami Ulaia yana vavine,

<sup>7</sup> we'e Solomoni natuna Lioboama,  
 we'e Lioboama natuna Ebaya,  
 we'e Ebaya natuna Esa,  
<sup>8</sup> we'e Esa natuna Iosefata,  
 we'e Iosefata natuna Dielome,  
 we'e Dielome natuna Usaia,  
<sup>9</sup> we'e Usaia natuna Iotama,  
 we'e Iotama natuna Easi,  
 we'e Easi natuna Esekaia,  
<sup>10</sup> we'e Esekaia natuna Manasa,  
 we'e Manasa natuna Emoni,  
 we'e Emoni natuna Iosia,  
<sup>11</sup> we'e Iosia natuna Iekonaia ma tainavo i tubuga  
 i miamiani, tutuyanina 'waineye me Babiloni i maia me  
 Isileli i 'ive'avinidi i nawedi yadi 'awalaweye.

<sup>12</sup> We'e i nawediga Babiloni, 'wainega i velamuga side  
 bani'odi,

Iekonaia natuna Salatiela,  
 we'e Salatiela natuna Selubabela,  
<sup>13</sup> we'e Selubabela natuna Abiuda,  
 we'e Abiuda natuna Eliakimu,  
 we'e Eliakimu natuna Asodi,  
<sup>14</sup> We'e Asodi natuna Sadoki,  
 we'e Sadoki natuna Ekimu,  
 we'e Ekimu natuna Eliuda,  
<sup>15</sup> we'e Eliuda natuna Eleasa,  
 we'e Eleasa natuna Mateni,  
 we'e Mateni natuna Iakobo,  
<sup>16</sup> we'e Iakobo natuna Iosefa.

Iosefanina kumanina yana vavine Meli, we'e Melinidi Iesu  
 kumanina i golegoleniga Keliso, Yaubada 'ana Venua'ivina,  
 inana.

<sup>17</sup> Bega 'ai'edi ta na lu'iawawaga Ebelamo 'wainega i na  
 nago Kini Devida 'waineye 'aila'a 14. We'e Kini Devida  
 'wainega i na nago tutuyanina me Babiloni i maia me Isileli  
 i nawedi yadi 'awalaweye 'adi 'aila'a 14. Wata tutuyanina  
 'wainega i na nagoga nika Keliso i tubuga wata 'aila'a 14,  
 bega matatabudi ta na luvetubamidi tubudelidelidi wauma  
 'aitamogana.

*Iesu Keliso yana tubuga.*

<sup>18</sup> ✧ Iesu Keliso yana tubuga side bani'odi. Meli, ku-  
 manidi Iesu inana, wata vavinenidi veveakutagonidi Iosefa  
 faifaina, bola kebu i da nagiga 'aiseotogineye i miamia,  
 siwe 'akonadi i 'aseti i miana 'Anu'anunu 'Atumaina yana  
 toketokena 'wainega. <sup>19</sup> Iosefa kumanina toveakutagona  
 i nuavita bwaikina Meli yadi miana faifaina, siwe fai

yana sauluva tonovi'avadi bega kebu nuanuana Meli i na 'ivebunumayagidi nuanuana givagivayega i na bailedi.

<sup>20</sup> Igodi yana nuanuananina i da 'idewaiga, lovane i 'eno'eno nika i 'enoneganega anelose i souyeni i voneni i vo, Iosefa, 'omu Kini Devida tubuna, kebu 'u na venuanaluga Meli 'adi nagi faifaina, we'e i mianaga 'Anu'anunu 'Atumaina yana toketokena 'wainega, 'asa'aiana 'u na nagidimo.

<sup>21</sup> ✧Mulieta i na venatuna, kwamana tamu iavetana i na tubuga 'u na goleni Iesu, 'ana saivila To'ita'ita'i, fai yana tomotoga i na 'ita'ita'iedi yadi sakona 'waidiega.

<sup>22-23</sup> ✧Bega Meli yadi miana wata Iesu yana tubuga faifaidi, basenadiotoga 'Auvea Yaubada i vona yana tolu'ivona 'wainega 'ana mogitana i souyeni i vo,

Vavine ne'e'elina siwe i na miana,

Kwamana iavetana i na tubuga,

I na goleni Imanueli, 'ana saivila 'ida Yaubada taiadi.”

<sup>24</sup> Mulieta Iosefa i tovoi, 'Auvea Yaubada yana anelose yana vona i vematayakeyakeni, Meli i nagidi, i nawedi yana vanuge. <sup>25</sup> Siwe kebu tamu tutuya taiadi i da veluaga i nagoga nika i venatuna, kwamananina Iosefa i goleni Iesu.

## 2

*To'aseta bwaikidi i nagoi Iesu 'waineye.*

<sup>1</sup> Elodi i ve-kini 'awalawa Iudia, yana tutuye Iesu i tubuga 'awalawanina nageneye 'atamana Bedeliema 'waineye. Kebu tutuya manamanawenaga nika tomotoga 'ifwaidi i le'wai Ielusalema. Tomotoganidi i maiaga inala yana 'eba lakayega yadi 'aseta bwaikina 'ubwana faifaidi. <sup>2</sup> I le'wai i velutoli i vo, Ava'aibe bei kwamana i tubuga 'omi me Diu yami Kini? 'A 'asetai tamu Kini i tubuga fai no'o bega tamu 'ubwana 'a 'iseni i laka, Kininina 'ana tugusa, bega 'a maia ma yama ve'ililibu 'a na 'odu 'waineye.”

<sup>3</sup> Tutuyanina Kini Elodi yadi vonanina i nogai i venuafou-viga bwaikina wata me Ielusalema matatabudi i kololo i vo, Bola Elodi wata Kini 'ivauna taiadi i na vetalaga, 'ida vita ta na veluagai.” <sup>4</sup> Mulieta tovelomu 'adi to'edakumetavo wata ve'etoboda 'adi tovevo i goleva'augidi 'waidie i velutoli i vo, Ava'aibe bei Keliso, Yaubada 'ana Venua'ivina i na tubuga?”

<sup>5</sup> ✧Yana velutoli i tutuli i vo, 'Atamana Bedeliema 'awalawa de'e Iudia nageneye. Basenadiotoga Yaubada yana Vona yana Buki nageneye tamu yana tolu'ivona Keliso yana tubuga faifaina side bani'odi i kilumi i vo,

<sup>6</sup> ✧'Omi me Bedeliema 'awalawa Iudia nageneye 'wa mi-  
amianiga,

Yami 'atamana siaina siwe 'ana wagava bwaikina 'awalawanina nageneye.

Fai 'waimiega tamu to'edakumeta bwaikina i na souyeni.

To'edakumetanina yaku tomotoga me Isileli i na 'i'isave'avinidi.”

<sup>7</sup> Vonanina Elodi i noganogaiga bega to'asetanidi i goledi i nagoi 'waineye 'aise'avadi i veifufu-giva. I velutoliedi nu-anuana i na 'asetai ma'avia 'ubwananina i souyeni i 'iseni.

<sup>8</sup> I velutoliedi i 'a'avana mulieta i vetunedi side bani'odi i voneyedi i vo, 'Wa na nagoi Bedeliema kwamana 'wa na luala-deweni, tutuyanina 'wa na velugaiga 'wa na maia 'wa na voneku wata yau a na nago, 'waineye a na 'odu'odu.”

<sup>9</sup> Elodi i vona'a'avana nika tomotoganidi i tauya. I nunagoi wata 'ubwananina i 'iseni debanagodiega, i 'edakumesedi i nagoga nika 'ubwana i 'ailove kwamana yana 'eba tubuga tabwaneye. <sup>10</sup> We'e tutuyanina to'asetanidi 'ubwana

'iseniga yadi sosoana kebu ta na vonaga 'adi vebae 'waidie. <sup>11</sup> ✧Tutuyanina i le'wai i luku vanuge, kwamana wata inana Meli i 'isedi i miamia i 'odu kwamana 'waineye, ma yadi ve'ililibu i subiai, mulieta yadi venuanayega yadi nuakalikali i 'ewadi kwamana mataneye i yatodi. Nuakalikalinidi kukuafou, golida tutulina bwaikina, vane 'ailuga magaidi 'atumaidi, tamu Mulo we'e tamu Falanikisenisi, vanenidi wata tutulidi bwaikidi.

<sup>12</sup> We'e Yaubada 'enoneganegayega tomotoganidi i vonedi kebu wata i na vilaviladi Elodi 'waineye, bega i viladi mali 'edeamo i nagoi yadi 'atamane.

### *Iesu i degeni.*

<sup>13</sup> Tutuyanina to'asetanidi i tauya i nunagoi, lovane Iosefa i 'enoneganega. 'Auvea yana anelose i souyeni 'waineye i voneni i vo, 'U na tovoi kwamana inana taiadi 'wa na dega 'wa na nagoi 'awalawa Itifita. Bei 'wa na miamia fai Kini Elodi kwamana i na lualeni nuanuana i na luvewafai, mulieta yau a na vonana 'awalawanina 'wa na 'iaweni.”

<sup>14-15</sup> ✧Bega Iosefa i tovoi kwamana inana taiadi lovane i dega i nago Itifita, bei i mianaga Kini Elodi i wafa. Yadi mia Itifita faifaina basenadiotoga Yaubada i vona yana Buki nageneye i vo,

Natuku Itifitayega a goleni i mai.”

Vonanina nagami tamu yana tolu'ivona i voneyeni, mulieta 'ana mogitana i souyeni.

### *Kini Elodi kwakwama Siasiaidi i luvewafadi.*

16 We'e Elodi i lukamata-wayoga i 'asetai 'ubwana 'adi to'aseti i vekalieni begaidi i nuasako bwaikina. Yana tolu-gaviavo i vonedi i luku 'atamana matatabuna 'waidie, Bedeliema wata 'atamana siaidi 'waidie, kwakwama iavetadi 'adi malamala 'ailuga wata 'ifwaidi kebu 'adi malamala 'ailuga i da veluagadiga matatabudi i luvewafadi. I luvewafadiga fai 'ubwana 'adi to'aseti yadi vona 'wainega Elodi i 'asetai Iesu 'ana malamala 'ana vetonu bola kebu i da veluagaiga. 17 Kwakwama siaidi i leodiga faifaina basenadiotoga tolu'ivona 'ana wagava Ielemaia i vona-vagata. Tutuyanina i leodiga 'ana mogitana i souyeni i vo,

18 ✧ 'Atamana Lema\* 'wainega vevine bonadi i nogai, 'we'wela wata taivonavona. Litieli 'adi wauma natudiavo faifaiddi i taivonavona, kebu tamu aitoi 'ana fata nuadi i na 'iveagiagidi, fai matatabudi i wafa.”

### *Itifitayega i nagoi Nasaledi.*

19-20 I miamia Itifita nika Elodi i wafa, mulieta 'Auvea yana anelose i souyeni Iosefa 'waineye 'enoneganegayega i voneni i vo, Itifitayega 'u na tovoi, kwamana inana taiadi 'wa na vilami 'wa na nagoi 'awalawa Isileli. Elodi 'akonadi i wafa bega kebu tamu aitoi nuanuana kwamana i na luvewafai.”

21 Bega Iosefa i tovoi kwamana inana taiadi i vagavaiddi i viladi i nagoi 'awalawa Isileli. 22 I viladi i nunagoi Iosefa ma yana kololo fai vala i nogai Akeleasi, tamana Elodi tutulina, i ve-kini 'awalawa Iudia 'waineye. Iosefa kebu nuanuana bei i na mia, nika wata anelose 'enoneganegayega i voneni bega i nago 'atamana Nasaledi 'awalawa Galili bei yadi vanuga i 'iyogona i mia. 23 ✧ Nasaledi bei i 'aiyogona i miaga, tamu Yaubada yana tolu'ivona yana vona-vagata Iesu faifaina 'ana mogitana i souyeni i vo,

I na golegoleni taunina tomogo Nasaledi.”

## 3

### *Ioni Tobafitaiso yana lau'age.*

1-2 ✧ Tutuyanina Iesu i miamia Nasaledi, Ioni Tobafitaiso i velamu i lalau'age Iudia sali'avu'avuye i vo, Sai'afoga Yaubada yana veimea i na souyeni 'waimie begaidi yami sauluva sakoidi 'wa na vedumwe'ubu'ubusedi.” 3 Ioni kumanina basenadiotoga Yaubada yana tolu'ivona 'ana wagava Aisea i voneyeni i vo,

Sali'avu'avuye tamu tomogo i vegolegole i vo, 'Auvea yana 'eda 'wa na vusia,

✧ 2:18: Iel 31:15; Nag 35:19

✧ 2:23: Luk 2:39; Ion 1:45-46

\* 2:18: 'Atamananina Bedeliema lilivaneye.

✧ 3:1-2: Ais 40:3



Wata 'wa na sivetonovi yana 'eba nago.”

<sup>4</sup> Ioni 'ana kaleko sakoidi 'aisaya kameli vutuvutudiega i 'idewadi we'e bulumakau bunudi 'ana wa'ila, 'ana'ana limwana wata mai'awa. <sup>5-6</sup> Tomotoga Ielusalemega, Iudia yana 'eba veimea matatabuna 'wainega wata 'awalawa fuedi Ufa Iolidani lilivaneye, matatabudi Ioni bonana i nogai i maia, bega 'aitamogana 'aitamogana yadi sakona i lu'ivona i 'a'avana Ioni i bafitaisodi Ufa Iolidani 'waineye.

<sup>7</sup> Ioni i 'isanawedi totafalolo Falisi wata Sadusi i mimaiia 'waineye bafitaiso faifaina, i vonedi i vo, 'Omi tosakona, 'o'olo bani'odi. Igodi 'wa vo, 'A na dega Yaubada yana nuasako wata yana vematavuloga 'waidiega.” Begaidi yami vaiseba 'wa vo, 'Akonadi 'a nuavilama 'u da bafitaisoma,” siwe kebu nu-anuami yami sauluva sakoidi 'wa na vedumwe'ubu'ubusedi.

<sup>8</sup> ✨Nagami yami sauluva i na tonova 'ami 'eba 'isa 'akonadi 'wa nuavilami 'wa da vo bani'odi welavi 'atumaina vuagina, mulieta a na bafitaisomi. <sup>9</sup> ✨Wata kebu 'wa na vo, 'Ima Ebelamo tubuma bega 'ima Yaubada yana tomotoga kebu i na vematavulogima.” Siwe a na vonemi, kebu 'aivaita 'wa na velugai. Kebu nani bwaikina Yaubada mataneye 'omi Ebelamo tubunavo. Yaubada 'ana fata tutulimi Ebelamo tubunavo i na 'idewadi kileu we'e 'waidiega. <sup>10</sup> Sai'afoga Yaubada i na vematavulogimi yami sauluva sakoidi faifaidi 'wa da vo 'akonadi yana tamuyoko i da yadali bega welavi 'aitamogana 'aitamogana kebu vuagidi 'atumaidiga i na tagidigi i na tawedi 'ai-'ala'alase.

<sup>11</sup> ✨We'e yau, 'wa na nuavilamiga 'ana tugusa a na bafitaisomi ufayega, kumanina mulikuye i mimaiiga i na bafitaisomi 'Anu'anunu 'Atumainega wata 'ai-'ala'alata 'wainega bani'odi yami sakona i na 'ala-lekoadi. Wata tomogonina toketokeotogina, yau kebu bani'odiga, kebu i da lubwaineku 'waineye a na vetofolova fai taunina bwaikina a bunumayaga. <sup>12</sup> Tutuyanina Kelisonina i na maiga, tomia fwayafwaya matatabudi i na vonayavuga mataneye wata i na veimeyedi 'wa da vo bani'odi waifei 'ana tolaukadi, waifei wata 'ani'aninidi i na yato'edi mulieta i na vedodogidi yana bubuwakeye, we'e yogo i na tunuya 'ainina kebu yana 'weuga 'waineye.

### *Iesu yana bafitaiso.*

<sup>13</sup> Tutuyanina Ioni tomotoga i kikiavebafitaisodi, Iesu Galilega i tauya i nago Ufa Iolidani bei i na bafitaiso 'waineye.

<sup>14</sup> Ioni nuanuana i na talaboda begaidi i vo, Awale igodi yau a na bafitaisomu, yau i lubwaineku 'u da bafitaisoku.” <sup>15</sup> Iesu Ioni yana vona i tutuli i vo, Kebu 'u na nuanuaga, 'asa'aiana

'u na bafitaisokumo. I lubwaineda Yaubada yana nuanua tonovidi matatabuna ta na 'idewadi," nika Ioni i nogaya i vo, 'Atumaina."

<sup>16</sup> Iesu i bafitaiso i 'a'avana i lakama 'avale nika abama i 'anikililia Yaubada 'Anu'anununa yana yaveobu bani'odi bunebune i 'iseni i obuma 'waineye. <sup>17</sup> \*Mulieta bona i nogai abamega i vo, De'e natuku nuafouku a nuakalikalieni, faifaina a sosoana bwaikina."

## 4

### *Seitani Iesu i silubuya.*

<sup>1-2</sup> \*Ufa Iolidani 'waineye Iesu i bafitaiso i 'a'avana, Yaubada 'Anu'anununa i vagavaia i naweni sali'avu'avuye bega yaiaina 'adi to'edakumeta Seitani i na silubuya. Sali'avu'avuye Iesu i miamia 'aiata 40, 'aiatanidi nagedie i na velu'ui faifaina siwe kebu tamu sai'afo 'ani'ani i da 'alatonovi, mulieta i lase. <sup>3</sup> Tutuyanina Iesu i lase nika bei Seitani i souyeni 'waineye, nuanuana Iesu i na be'u sakona 'waineye bega i silubuya i vo, 'Ai'edi 'omu mogitana Yaubada Natuna, 'u na vona de'e kileunidi i na ve'ani'ani." <sup>4</sup> \*Iesu Seitani yana vona i tutuli i vo, Kebu. Basenadi i kilumi Yaubada yana Buki nageneye i vo,

Tomotoga yadi mia 'ana 'atumaina wata yawaidi kebu 'ani'ani'ava 'wainega i da veveluagadi.

We'e mogitana Yaubada yana Vona i voneyediga, 'waidiega tomotoga yadi mia 'ana 'atumaina wata yawaidi i na veluagadi."

<sup>5</sup> I 'a'avana wata Seitani Iesu i vagavaia i naweni Ielusalema, vanuga 'eba velu'ui tabwaotogineye i lakaveni. <sup>6</sup> \*Bei wata i voneni i vo, 'Ai'edi mogitana 'omu Yaubada Natuna de'e bega 'u na souga, veviga kebu 'u na veluagai fai Yaubada yana Buki nageneye i vo,

Yau Yaubada yaku anelose a na vonedi i na 'i'isave'avinimu,

Nimadiega i na 'i'ivaisemu bega kebu tamu sai'afo 'agemu 'u na nikeyedi."

<sup>7</sup> \*Iesu Seitani yana vona i tutuli i vo, Kebu, fai wata Yaubada yana Buki nageneye i vo,

'Ai'edi taunimi 'wa na tauyemi 'eba ilagi 'waidie, kebu i da lubwaineni 'wa na taidaida Yaubada 'waineye 'aivaita faifaina."

<sup>8</sup> Bega wata Seitani Iesu i vagavaia i naweni i lakaveni 'oya manamanaweotogina tabwaneye 'eba veimea wata 'ai'aiwabu matatabuna fwayafwaya 'waineye i veni. <sup>9</sup> I

veni i 'a'avana i voneni i vo, 'Ai'edi ma yamu subia 'u na 'odu 'waikuye, de'e 'eba veimeanidi wata 'ai'aiwabunidi matatabuna a na velemu, fai yau yaku 'eba veimea.”  
<sup>10</sup> ✧Seitani i vonavonaga nika Iesu i vo, Seitani 'asa'aiana 'u 'ailove 'u nago. We'e Yaubada yana Buki nageneye i vonaga i vo,

Yami 'Auvea Yaubada 'waineye 'wa na 'odu'odu,  
 'Aiseotogina faifaina 'wa na folofolova.”

<sup>11</sup> ✧Seitani i tauya i nunago, anelose i souyeni Iesu i 'ivaiseni.

*Iesu yana folova i velamu Galili 'waineye.*

<sup>12</sup> Tutuyanina Iesu vala i nogai Ioni 'akonadi vanuga 'eba yogona 'waineye i yatoi, Kini Elodi i lumataniga faifaina, bega i tovoi i nago 'awalawa Galili. <sup>13</sup> Iesu yana 'atamana Nasaledi, siwe i nagoga kebu bei i da miaga, i nagoga 'atamana Kafaneomi bei i miabui. 'Atamananina Kafaneomi Lavu Galili lilivaneye, 'awalawa Sebuloni wata Nafitalai nagedie. <sup>14</sup> 'Awalawanidi nagedie i nagoga, fai basenadiotoga Yaubada yana tolu'ivona Aisea i vona-vagata bega 'ana mogitana 'akonadi i souyeni i vo,

<sup>15</sup> ✧'Awalawa Sebuloni wata Nafitalai, balabala weyaginega, Ufa Iolidani vi'ainega, wata Lavu Galili 'ununa bei mali tomotoga taunidi kebu Diu yadi 'awalawa. <sup>16</sup> Tomotoga 'awalawanidi 'waidie i miamianiga nuadi kebu magemagetadiga 'wa da vo dudubala 'ana tomia,

Siwe mageta bwaikina i na 'iseni.

Fwayafwaya 'ana nuanua nuadi i 'ewadi bega 'anu'anunudi wafawafadi,

Siwe magetanina nuadi i na kiavemagetadi.”

<sup>17</sup> Tutuyanina Iesu i vilai i mai Galili i miamia bei yana lau'age i velamu i vo, Yami sakona 'wa na vedumwe'ubu'ubusedi, sai'afoga Yaubada Yana veimea i na souyeni 'waimie.”

*Toyaubani 'adi 4 Iesu i goledi.*

<sup>18</sup> Tamu 'aiata Iesu i balabalaga Lavu Galili balebaleamo tomotoga 'adi 'ailuga i 'isedi, Saimoni tamu 'ana wagava Fita wata taina Anidulu, vuatayega igana i 'ona'onadi fai taunidi toyaubani. <sup>19</sup> Iesu i vonedi i vo, We'e yaubandinina 'wa baileni, 'wa na maia 'wa na vetovetutuyama 'waikuye, yau yaubani tamu a na vemi bega tomotoga 'wa na 'ona'onadi 'wa na mimaiiedi Yaubada 'waineye.” <sup>20</sup> Nika Saimoni wata Anidulu vualalalakana i 'iawedi Iesu i yogo'waili.

<sup>21-22</sup> Sai'afu i vaganago wata Sebedi ma natunavo i 'isedi, Iemesa wata Ioni yadi wakeye yadi vuata i agiagilidi. Ma

taina Iesu i vonedi i vo, 'Wa maia," nika tamadi ma wakana i 'iaweni Iesu taiadi i nagoi.

*Iesu i ve, i lau'age wata i 'ive'atumai.*

<sup>23</sup> Iesu toyaubani i goledi i 'a'avana i nago 'awalawa Galili matatabuna 'waineye, yadi 'eba miava'auta 'waidie i veve, i lalau'age wata i 'i'ive'atumai. I ve 'eba miava'auta 'waidie, i lau'age Vala 'Atumaina Yaubada i na veimeyedaga faifaina, wata i 'ive'atumai, tomotoga 'adi viga tulina tulina 'waidie. <sup>24</sup> We'e 'awalawa Silia matatabuna Iesu valana i nogai bega yadi toviga 'adi viga tulina tulina i miedi 'waineye. 'Ifwaidi tomotoga i veveviga bwaikina, 'ifwaidi yaiaina sakoidi i agedi, 'ifwaidi viga tamu 'wainega i alala wata 'ifwaidi bwalobwalokodi, matatabudi Iesu i 'ive'atumaide. <sup>25</sup> Tomotoga 'aila'a bwaikina i va'auta Iesu 'waineye Galiliega, 'atamana 10 waga luvetubama Dekafolisi, Ielusalemega, Iudiayega wata Ufa Iolidani vi'ainega i damanama.

## 5

*Iesu yana lau'age 'oya 'waineye sosoana mogitana faifaina.*

<sup>1</sup> 'Aila'a bwaikina i maiaga Iesu i 'isedi begaidi i laka 'oyeye bei i miabui. <sup>2</sup> I miabuina wata yana tovetutuyamavo i maia lilivaneye i miabui mulieta i velamu i ve 'waidie i vo,

<sup>3</sup> Egavo i 'asetadi 'anu'anunudi yadi toketokena siaidi bega taunidi i tauyedi Yaubada 'waineye,

'Eba sosoana 'waidie fai 'akonadi Yaubada i veveimeyedi yana 'Aila'a nageneye.

<sup>4</sup> \*We'e egavo 'asiau ma yadi nuavita i 'we'we'welaga,

'Eba sosoana 'waidie fai Yaubada nuadi i na 'iveololodi i na sosoana.

<sup>5</sup> \*Egavo i nunuaobuga yadi sauluva bikadi,

'Eba sosoana 'waidie fai Yaubada i vona'awaufaufa fwayafwaya matatabuna i na veledi.

<sup>6</sup> We'e egavo nuanuadi bwaikina sauluva 'atumaina wata tonovina,

'Eba sosoana 'waidie, bega nuanuananina Yaubada i na veledi nika 'adi fata.

<sup>7</sup> \*Egavo mali tomotoga i 'i'isanuakalikaliadi,

'Eba sosoana 'waidie fai wata Yaubada i na 'isanuakalikaliadi.

<sup>8</sup> \*We'e egavo yadi nuanua wata yadi sauluva tonoviotogidi,

'Eba sosoana 'waidie fai 'awaie i na luku Yaubada 'waineye.

<sup>9</sup> Egavo i na vevelu'ase'ase tonuasako 'waidie mia sosoana faifaina,

'Eba sosoana 'waidie fai Yaubada i na goledi taunidi natu-  
navo.

<sup>10</sup> ☆We'e egavo Yaubada yana nuanua i veve-  
matayakeyakedi bega vita i veveluagadi mali tomotoga  
'waidiega,

'Eba sosoana 'waidie fai 'akonadi Yaubada i veveimeyedi  
yana 'Aila'a nageneye.

<sup>11</sup> ☆Fai 'omi yaku tovetutuyamavo begaidi faifaiku mali  
tomotoga i na yagayagaimi, vita i na vevelelele, wata nani  
tulidi tulidi faifaiki i na awavesakoyemiga, 'eba sosoana  
'waimie. <sup>12</sup> ☆'Wa na nuani, basenadiotoga tovedumwe'ai'ai  
Yaubada yana tolu'ivonavo vita i veledi, wata 'omi bani'odi  
vita 'wa na veluagai tosakona 'waidiega, siwe 'wa na sosoana  
bwaikina fai 'ami tutula bwaikina Yaubada i yatoi i luluka-  
mata abame.

*Iesu 'ana tovetumaganavo bani'odi eyaga wata mageta.*

<sup>13</sup> 'Omi bani'odi eyaga tomia-fwayafwaya 'awasasadie.  
Eyaga, nani kibwana 'ana to'ive'iwana, 'omi wata bani'odi  
yami ve 'waidiega tosakona 'wa na 'ive'atumaidi. Eyaga nani  
'atumaina, siwe 'ai'edi i na ve'ulaufaga kebu 'ana fata i na  
vegola-vaitugana bega ta na taweni tomotoga i na vagave-  
dobwadobwani, wata 'omi bani'odi 'ai'edi yaku vona 'wa na  
vedumwe'ai'aieniga kebu 'ana fata tamu ava'ai 'atumaina  
'waimiega i na souyeniga.

<sup>14</sup> ☆Wata 'omi bani'odi mageta, Yaubada yana 'eda'eda  
'ana tokiavemageta tomia fwayafwaya 'awasasadie. 'Ai'edi  
tamu 'atamana i na 'idewai 'oya deba'aiotogineye ava'ai i  
na velubabaleni? Kebu. Wata 'omi yaku mageta, tomotoga  
yadi 'eba 'isa. <sup>15</sup> ☆Kebu tamu aitoi mageta i da kabukabun-  
ina 'aivoeyega i da tatalafwaseni. Mageta 'ana 'eba yato  
'waineye i lulutalauleni bega tomotoga vanuganina nagen-  
eye matatabudi i magemagesedi. <sup>16</sup> ☆'Omi wata bani'odi yami  
sauluva i na tonova tomotoga matadie bega yami sauluvanidi  
'atumaidi i na 'isedina Tamami abame i miamaia i na subiai.

*Veimeanidi Mosese 'wainega i maiga, Iesu faifaiki i ve.*

<sup>17</sup> ☆Yami nuanua kebu 'wa na vo, Yau a mai veimeanidi  
Mosese 'wainega wata venidi Yaubada yana tolu'ivonavo  
'waidiega a na geudi.” Kebu, yau a maiga veimeanidi  
wata venidi 'adi mogitana wata 'adi tonovina a na  
sivemagese'a'avedi. <sup>18</sup> ☆A vona mogitana 'waimie, bola  
abama wata fwayafwaya i na 'a'ava kebu bei i na 'eno-  
vagata. We'e de'e veimeanidi 'adi nuanua bei i na 'eno'eno,

☆ 5:10: 1 Fit 3:14 ☆ 5:11: 1 Fit 4:14 ☆ 5:12: Iem 1:2 ☆ 5:14: Ion 8:12

☆ 5:15: Mak 4:21 ☆ 5:16: Efe 5:8-9; Ion 3:21; 1 Fit 2:12 ☆ 5:17: Lom 3:31

☆ 5:18: Luk 21:33

veimeanidi bwaikidi wata saiotogidi siwe i na 'eno'eno i na nagoga nagami Yaubada yana nuanua i na ve'a'avai. <sup>19</sup> ✧ Begaidi 'ai'edi aitoi veimeanidi siwe tamu saiotogina kebu i na vematayakeyakeniga wata mali tomotoga 'waidie i na veve bega veimeanina kebu i na vematayakeyakeniga, Yaubada yana 'Aila'a nageneye 'ana wagava siaina i na venani-'avo'avovo. We'e 'ai'edi aitoi veimeanidi i na vematayakeyakediga wata mali tomotoga i na veve 'waidie bega veimeanidi i na vematayakeyakedi, Yaubada yana 'Aila'a nageneye taunina 'ana wagava bwaikina. <sup>20</sup> ✧ A na vonemi, ve'etoboda 'adi tovevo wata totafalolo Falisi igodi i vo, Ve'etoboda matatabuna 'a vevematayakeyakedi bega yama sauluva tonovidi.” We'e 'ai'edi 'omi 'wa na vo, 'A na luku Yaubada yana 'Aila'a 'waineye,” nagami yami sauluva i na tonova-'afo'afo, we'e Falisi kebu 'wa na saladiga.

*Iesu yana ve nuasako faifaina.*

<sup>21</sup> ✧ De'e veimeanina tuatuaina 'akonadi 'wa 'asetai i vo, Kebu 'wa na luwewafaga,” wata tamu i vo, 'Ai'edi aitoi i na luwewafaga 'eba vonayavuga 'waineye i na nago.” <sup>22</sup> ✧ I vonaga mogitana, we'e yau a na vonemi. 'Ai'edi aitoi i na nuasakomo iana 'waineye, tomogonina i na nago 'eba vonayavuga 'waineye. 'Ai'edi aitoi iana i na awavesakoyeni i na vo, 'Omu kebu tamu sai'afo ava'ai 'atumaina 'waimuyega i na souyeni,” tomogonina wata 'eba vonayavuga bwaikina 'waineye i na vonayavuga. We'e aitoi iana i na fali'wave'waveniga, voke Yaubada i na veimea 'ai-'ala'alata kebu yana 'weuga 'waineye i na nago.

<sup>23-24</sup> ✧ Begaidi 'ai'edi 'u na nago vanuga 'eba velu'ui 'waineye nuanuamu yamu 'anivelena-maimaiga 'u na velomuyeni Yaubada mataneyeye nika iamu yana nuasako 'waimuye 'u na nuani, 'u baileni i na 'eno'eno nagami 'u vilamu iamunina taiadi 'wa na veiana mulieta 'u na vilamuga yamu 'anivelena-maimaiga 'u na velomuyeni Yaubada mataneyeye.

<sup>25</sup> 'Ai'edi aitoi nuanuana i na yatomu 'eba vonayavuga 'waineye, bola kebu 'wa na lukuga tomogonina 'u na veianeni bega yana nuanuananina i na baileni. 'Ai'edi kebu 'wa na veveiana-matayo'oga, tovevonayavuga 'waineye i na yatomu bega filisimani nimadie i na 'anivelenemu, vanuga 'eba yogona 'waineye i na silukuvemu. <sup>26</sup> A vona mogitana, kebu i na 'etoyavu-matayo'omu bei 'u na miamia nagami tutula 'u na yato'a'avai mulieta i na 'etoyavumu.

*Iesu yana ve bunu 'ana sakona faifaina.*

27 ✨De'e veimeanina 'akonadi 'wa 'asetai i vo, Kebu tamu aitoi yana vavine 'u na luobuyedi.” 28 We'e yau a na vonemi, 'ai'edi aitoi tamu vavine i na 'isenimo nuana i na vevona, siwe 'asa'aiana 'akonadi nuanega taiadi i sakona. 29 'Ai'edi matamunina nuanuamu bwaikina, sai'afoga i da kiavebe'umu 'u da sakona, 'u kiamwanuya 'u taweni. 'U na kiamwanuyaga veviga sai'afo nika kebu 'u na sakonaga, mulieta 'amu fata 'aitamoganega 'u na luku abame. We'e 'ai'edi matamu 'ailugana 'waidiega 'u na sakosakonaga, mulieta 'u na wafa Yaubada i na tawe-mwadodouyemu 'ai-'ala'alase, veviga bwaikaotogina 'u na veluagai. 30 'Ai'edi nimamunina nuanuamu bwaikina sai'afoga i da kiavebe'umu 'u da sakona, 'u boboi 'u taweni. 'U na boboiga veviga sai'afo nika kebu 'u na sakonaga, mulieta 'amu fata 'aitamoganega 'u na luku abame. We'e 'ai'edi nimamu 'ailugana 'waidiega 'u na sakosakonaga, mulieta 'u na wafa tomogomu matatabuna 'u na lukuveni 'ai-'ala'alase, veviga bwaikaotogina 'u na veluagai.

*Iesu i ve sa'ila faifaina.*

31 ✨De'e veimeanina 'akonadi 'wa 'asetai i vo, 'Ai'edi aitoi nuanuana yana vavine i na vesa'ilidi tamu lubulubu 'waineye sa'ila vonana i na kilumi vavine i na veledi i na vo, 'Omi 'akonadi 'wa 'a'ava 'waikuyega.” 32 We'e yau a na vonemi, 'ai'edi aitoi yana vavine kebu sauluva sakoina i na 'idewaiga siwe i na vesa'ilidi, bani'odi i 'a'anivelenedi sakona 'waineye. We'e 'ai'edi i na nagiga mali tomogo taiadi tomogonina i nagidiga wata i sakona.

*Iesu i ve vona'awaufaufa faifaidi.*

33 ✨Wata veimeanina tuatuaina 'akonadi 'wa 'asetai i vo, 'Ai'edi aitoi i na vona'awaufaufa Yaubada mataneye, kebu i da lubwaineni yana vona'awaufaufanina i na geuya.” 34 ✨We'e yau a na vonemi, 'ai'edi 'wa na vona'awaufaufaga kebu tamu ava'ai 'ana wagava 'wa na 'inanai bega 'wa na vo, Yama vona'awaufaufanina toketokena.” Kebu 'wa na vo, 'A vona'awaufaufa abama mataneye,” fai abamanina Yaubada yana 'eba miabui 'ai'aiwabuna. 35 Wata kebu 'wa na vo, 'A vona'awaufaufa fwayafwaya mataneye,” fai fwayafwayanina Yaubada yana 'eba ba.” Wata kebu 'wa na vo, 'A vona'awaufaufa Ielusalema mataneye,” fai Ielusalemanina Kini bwaikina yana 'atamana. 36 Wata kebu 'wa na vo, 'A vona'awaufaufa 'unu'unuma 'waidiega,” fai 'ai'edi 'akonadi i na buduliga kebu 'ana fata 'wa na vona i na ve'wau'wauuga, we'e 'ai'edi 'wau'waugina kebu 'ana fata 'wa na vona i na

buduli. <sup>37</sup> 'Ai'edi naninina mogitana 'wa na 'idewaiga 'wa na vo, E'e," we'e 'ai'edi tamu nani kebu 'wa da 'idewaiga 'wa na vonamo 'wa na vo, Kebu," we'e 'ai'edi yami vona i na vefuega bani'odi 'wa na vo, Tamada," vonanina i mai Seitani 'wainega.

*Kebu sakona 'wa na tutuliga.*

<sup>38</sup> \*De'e veimeanina 'akonadi 'wa 'asetai i vo, 'Ai'edi tamu aitoi matamu i na 'etomwanuya, wata matana 'u 'etomwanuya, we'e aitoi nigomu i na tutukadiaga, wata nigona 'u tutukadia." <sup>39</sup> \*We'e yau a na vonemi. 'Ai'edi aitoi ava'ai sauluvaga sakoina i na 'idewai 'waimuye, kebu nimana 'u na tutuliga. 'Ai'edi tamu tomogo 'ae'aemuye i na 'ainikega, wata tamu 'ae'aemu 'u 'iyoyoeni i na niki. <sup>40</sup> \*'Ai'edi tamu aitoi i na nuasako 'waimuye tamu sauluva faifaina bega i na nawemu 'eba vonayavuga 'waineye, mulieta toveimea i na vonemu 'amu kalekoyega yamu sauluvanina faifaina 'u na tutula, siwe wata 'amu talauma 'u veleni. <sup>41</sup> 'Ai'edi tamu tomogo bani'odi gabemani i na lukakademu i na vo, Yaku kukua 'u na 'ewa ta na nago tamu 'atamana 'waineye, siwe kebu a na tutulimuga," kebu faifaina 'u na nuavita, ma yamu sosoana wata 'u na vaganago tamu 'atamana 'waineye. <sup>42</sup> We'e 'ai'edi aitoi tamu ava'ai nuanuana i na velu'ui 'waimuye, kebu 'u na veumokaiga, 'u veleni. We'e 'ai'edi aitoi i na vo, Side naninina 'u veleku bola a na vevilai," kebu 'u na ve'o'oleniga 'u tauyeni.

*Egavo i na vesauluva sakoina 'waimie 'wa na nuakalikaliedi.*

<sup>43</sup> \*Tomotoga 'ifwaidi yadi nuanua 'akonadi 'wa 'asetai i vo, Emiavo 'aisedi 'wa na nuakalikaliedi, we'e egavo i vesauluva sakoina 'waimie 'wa vedumwe'ai'aiedi." <sup>44</sup> \*We'e yau a na vonemi. Egavo i vevesauluva sakoina 'waimie 'wa na nunuakalikaliedi wata egavo vita i vevelemiga faifaidi 'wa na vevelu'ui. <sup>45</sup> \*Bani'odi 'wa na vesauluvediga i lubwainemi 'omi Tamami abame natunavo. To'atumaina wata tosakona 'adi nuakalicali i vesala Yaubada 'wainega fai yana inala i kabukabu matatabumi faifaimi wata yana 'wei matatabumi i vevelemi. 'Omi wata bani'odi, egavo i vesauluva sakoina 'waimie, 'wa na nuakalikaliedi. <sup>46</sup> 'Ai'edi egavo i nuakalikalieemiga 'aisedi 'waidie 'wa na nunuakalicali, yami nuakalikalininina Yaubada kebu i na tutuliga, tomotoga fue di wata tosakona taiadi ediavo 'aise'avadi i nunuakalikaliedi. <sup>47</sup> Emiavo 'aisedi 'waidie 'wa na vekaiwaga kebu nani bwaikinaga, tomotoga fue di wata Yaubada 'ana tobavu taiadi

\* 5:38: Sou 21:24 \* 5:39: Lom 12:19 \* 5:40: 1 Kol 6:7 \* 5:43: Vei 19:18

\* 5:44: Fol 7:60; Lom 12:14,20 \* 5:45: Efe 5:1



yadi sauluva, ediavo 'aisedi 'waidie i vevekaiwa. <sup>48</sup> ✧We'e 'omi i lubwainemi yami sauluva matatabuna 'atumai'avadi, bani'odi Tamami abame yana sauluva.

## 6

### *Iesu yana ve 'anivelena-maimaiga faifaina.*

<sup>1</sup> ✧Wa na 'i'isave'avinimi kebu tomotoga matadie 'wa na 'a'anivelena wekowekoma 'waidie 'ami subia faifaina. 'Ai'edi 'wa na 'a'anivelena tomotoga matadie, Tamami abame kebu 'ana tutula i na velemiga.

<sup>2</sup> ✧We'e mogitana i lubwainemi givagivayega 'wa na 'a'anivelena tomotoganidi nuanuadi 'aivaita 'waidie. Tovekali yadi 'anivelena ma 'ana evulega 'atamanafouye wata 'eba miava'auta nagedie, nuanuadi tomotoga fue di i na 'isedi i na subiadi. Siwe a na vonemi, subianina 'asa'aiana 'adi tutulanina i 'e'ewa-vagaseni. <sup>3-4</sup> ✧We'e 'omi, givagivayega wekowekoma 'wa na 'i'iva'isedi siwe kebu emiavo 'waidie 'wa na lu'ivonaga. Ava'ai givagivayega 'wa 'i'idewadiga 'akonadi Tamami i 'isemi wata i na tutulimi.”

### *Iesu yana ve velu'ui faifaina.*

<sup>5</sup> ✧Wata Iesu i vo, 'Ai'edi 'wa na velu'uiga kebu tovekali 'wa na saladiga. Nuanuadi bwaikina i na tovoi i na vevelu'ui 'atamanafouye wata 'eba miava'auta nagedie 'adi subia faifaina. Siwe a na vonemi, subianina 'asa'aiana 'adi tutula i 'e'ewa-vagaseni. <sup>6</sup> We'e 'omi, 'wa na vevelu'uiga, 'wa na luku 'wa na saiboda mulieta 'wa na velu'ui Tamami 'waineye taunina to'isagiva. Yami sauluva givagivadi matatabuna i 'asetadi bega i na tutulimi.

<sup>7-8</sup> ✧Egavo i 'odu'odu yaubada-vekavekali 'waidie kebu 'wa na saladu yami velu'ui 'wa na lumanamanawedi. Yadi nu-anua i vo 'ako, Yama velu'ui manamanawedi yama yaubadavo i na nogaidi.” We'e Tamami 'akonadi 'ami vita i 'asetadi mulieta faifaiddi 'wa vevelu'ui. <sup>9</sup> 'Wa na velu'uiga, side bani'odi 'wa na velu'uiedi. 'Wa na vo,

Tamama,

'U miamia abame,

'Omu magemagetamu,

Nuanuama tomotoga fuema 'a na ve'ililibuyemu.

<sup>10</sup> Nuanuama 'u na veveimeyema,

Nuanuama tomia fwayafwaya yamu nuanua 'a na 'i'idewadi, bani'odi tomia abama yamu nuanua i 'i'idewadi.

<sup>11</sup> Nuanuama 'ama'ama 'asiau 'u na velema.

<sup>12</sup> ✧Mali tomotoga i vesauluva sakoina 'waimeye 'a nu-  
atavunidi,

'Omu wata bani'odi yama sakona 'u da nuatavunidi.

<sup>13</sup> ✧Eba sailubu 'waidie kebu 'u na tauyema,

Siwe 'u na 'ita'ita'iema Seitani taunina Tosakona 'wainega.”

[Yamu veimea, yamu toketokena, wata yamu 'ai'aiwabu,

Kebu i na 'a'avaga, i na 'eno-vagata.

Vona mogitana, yama nuanua bani'odi.]

<sup>14</sup> Side bani'odi 'wa na vevelu'uedi, fai 'ai'edi mali tomotoga sakona i na 'idewai 'waimie 'wa na nuatavunidiga, wata Tamami abame yami sakona i na nuatavunidi. <sup>15</sup> ✧We'e 'ai'edi kebu, wata kebu Tamami i na nuatavunimiga.”

*Iesu yana ve ve'udigana faifaina.*

<sup>16</sup> ✧Tutuyanina 'wa na ve'udigana 'ani bega yami velu'ui i na vetoketoke Yaubada 'waineye, kebu 'wa na vemaigisivilavila tovekali bani'odi. Nuanuadi maigidi i na lu'ufafedi bega mali tomotoga i na 'asetadi i veve'udigana nika i na subyadi. Siwe a na vonemi, subianina 'asa'aiana 'adi tutula i 'e'ewa-vagaseni. <sup>17-18</sup> We'e 'omi, 'wa na ve'udigana 'ani 'wa na velu'ui faifaina, maigimi 'wa na luvunagidi wata 'wa na veinata bega kebu tamu aitoi i na 'i'isa'inanamiga. Tamami, kumanina kebu 'wa da 'ise'iseniga i na 'asetami, fai yami sauluva givagivadi matatabuna i 'asetadi bega i na tutulimi.”

*Iesu yana ve abama 'ana ve'ai'aiwabu faifaina.*

<sup>19</sup> ✧Wata Iesu i vonedi i vo, Side bei fwayefwayeye kebu kukua fuedi 'wa na luvea'wedi fai bola 'walu'walu i na 'ivesakodi wata i na lu'wanabudulidi 'alo tovainago vanuga i na baia i na luku i na vinagodi. <sup>20</sup> ✧We'e mogitana i lubwainemi nani 'atumaidi 'wa na luvea'wedi abame, bei kebu tamu 'walu'walu 'alo i na lu'wanabudulidi 'alo wata tovainago i na vinagodi. <sup>21</sup> 'Wa na nuani, ava'aibe bei yami 'ai'aiwabu i na 'eno'enoviga, bei tutuya fuedi yami nuanua i na nunagu.

<sup>22-23</sup> Side bani'odi. Matami bani'odi nuami 'ana mageta. 'Ai'edi nani 'atumaidi 'wa 'ise'isediga, nuami matatabuna magemagetadi, we'e 'ai'edi nani sakoidi 'wa na 'ise'isediga, nuami matatabuna i na dudubalidi. I na dudubaliga, kebu tamu sai'afo mageta, dudubala mogitana.

<sup>24</sup> Kebu tamu aitoi 'ana fata i na vetofolova toveimea 'adi 'ailuga 'waidie fai bola tamu i na nuakalikaliene we'e tamu i na vedumwe'ai'aieni, wata, tamu i na ve'ililibuyeni we'e tamu i na awavesakoyeni. Kebu 'ami fata 'wa na vetofolova Yaubada wata kukua 'waidie.

*Iesu i vonaga Tamadayana 'isave'avina ta na vetumaganenimo.*

✧ **6:13:** Luk 22:40; Ion 17:15; 2 Tes 3:3  
58:5-9 ✧ **6:19:** Iem 5:1-6; 1 Tim 6:9-10

✧ **6:15:** Mak 11:25-26 ✧ **6:16:** Ais  
✧ **6:20:** Luk 18:22; Kolos 3:1-2

25 ✧Fai kebu 'ami fata 'wa na vetofolova Yaubada wata kukua 'waidie, begaidi a na vonemi. Kebu 'wa na venuafouviga 'ami'ami wata alu'ai yami mia fwayefwayeye faifaina wata kaleko tomogomi faifaidi. 'Wa da nuani, ava'ai naniga bwaikina, 'ami'ami 'alo yami mia? Wata talauma 'alo tomogomi? A na vonemi, yami mia wata tomogomi nani bwaikidi. 26 ✧'Wa na nuanidi manuga. Kebu i da bakubakulaga, kebu i da 'a'aile'waga, wata kebu yadi bubuwakaga, siwe Tamami abame i 'i'isave'avinidi. Ava'ai naniga bwaikina? Manuga 'alo 'omi? 27 Begaidi kebu tamu nani faifaina 'wa na venuafouviga. Kebu tamu aitoi 'ana fata yana mia fwayefwayeye i na kiavemanawei yana venuafouviga 'wainega.

28 Awale talauma faifaina 'wa vevenuafouviga? 'Wa na nuani makavuvula yadi tabo. Kebu i da folofolova wata kebu 'adi kaleko i da 'i'idewadi siwe ma 'adi vaigavu 'atumaidi. 29 ✧A na vonemi. Kini Solomoni tomogo 'ai'aiwabuna 'ana vaigavu 'atumaidi, we'e makavuvula 'atumaiotogidi. 30 Mosomoso matatabuna nani-'avo'avovo, 'asiau ta 'ise'isedi we'e 'awa'awai i na tunudi i na 'alaidi siwe Yaubada i veve'wesenidi. We'e 'omi tamu nani bwaikina mataneye, mogitana ma 'ami nuanuana i veve'wesenimi. Awale yami vetumagana Yaubada 'waineye mweadi? 31 Begaidi kebu nuafoumi i na veviga 'wa na vo, Ava'ai 'ani'aniga 'a na 'ani, ava'ai alu'aiga 'a na yemu, 'alo wata ava'ai 'wainega tomogoma 'a na talaumadi? 32 Yaubada 'ana tobavu naninidi nuanuadi bwaikina faifaidi i vevenuafouviga. We'e 'omi naninidi nuanuami, Tamami abame 'akonadi yami nuanua i 'asetadi. 33 ✧We'e 'wa vevenuafouviga 'asa'aiadi, i lubwainemi nagami taunimi 'wa na tauyemi Yaubada i na veveimeyemi wata yana nuanua tonovidi 'wa na 'i'idewadi, mulieta naninidi matatabuna i na vevelelele. 34 Begaidi kebu ma yami venuafouviga 'wa na vo, 'Awa'awai ava'ai vitaga i na souyedi?" fai 'aiatanina 'waineye wata Yaubada i na 'ivaisemi. Kebu 'asiau 'ana vita wata 'awa'awai 'ana vita taiadi 'wa na nualuvetubamidi.

## 7

*Iesu yana ve 'amalakibu wata awavesako faifaidi.*

1 Wata Iesu i vonedi i vo, Kebu mali tomotoga 'wa na 'amalakibuyedi i na nunago wata Yaubada i na 'amalakibuyemi. 2 Mali tomotoga 'wa na awavesakoyediga wata 'ami awavesako 'wa na veluagai yami awavesakonina 'ana 'isa'isa bani'odi.

✧ 6:25: Fil 4:6; Ibu 13:5; 1 Fit 5:7 ✧ 6:26: Luk 12:6-7 ✧ 6:29: 1 Kin 10:23

✧ 6:33: Same 37:4,25; Luk 18:29-30

<sup>3</sup> Awale iamu mataneye fwayafwaya nani siaina 'u 'iseni faifaina 'u vonavona, we'e kebu 'u da nuaniga 'omu 'ibwalobwalo'u bwaikina matamuye? <sup>4</sup> Kebu 'ana nogaya 'atumaina 'u vo, Iaku, nuanuaku matamu i lufwaluya a na 'ewai," we'e, 'omu taunimu matamuye 'ibwalobwalo'u bwaikina. <sup>5</sup> 'Omu tovekali, 'u awavesako siwe wata sauluvanidi 'u 'i'idewadi. Nagami taunimu matamuyega 'ibwalobwalo'u 'u na 'ewai bega 'u na 'isadewa nika 'ana fata fwayafwaya nani siaina 'u na 'ewai iamu matanega.

<sup>6</sup> 'Ai'edi nani 'atumaidi 'ou'ou ta na veledi, bola i na 'ivekokovidi wata i na ovada, wata bani'odi Yaubada yana Vona 'Atumaina kebu 'wa na 'aniveleneni 'ana tovedumwe'ai'ai 'waidie bola vita i na velemini. We'e 'ami fwasalu 'wa na tawediga bawe 'waidie bola i na vatuveyokeyokedi, wata bani'odi Yaubada yana nani 'atumaidi kebu 'wa na 'anivelenedi 'ana tovedumwe'ai'ai 'waidie fai 'waidie i na venani-'avo'avovo.

*Iesu yana ve velu'ui toketokena faifaina.*

<sup>7</sup> ☆'Wa na vevelu'ui bega Yaubada i na velemini, 'wa na lalualaga 'wa na veluagai, 'wa na velutolitoliga i na nogayemi saiboda i na sibaleni. <sup>8</sup> ☆Vona mogitana, egavo i na vevelu'ui Yaubada i na veledi, egavo i lalualaga i na veluagai, egavo i na velutolitoliga i na nogayedi saiboda i na sibaleni.

<sup>9-10</sup> 'Ifwaimi ma natumiavo, kebu 'ana fata natumiavo 'ani'ani i na velu'uiemi we'e kileu 'wa na veledi, 'alo igana we'e dinigala 'wa na veledi. <sup>11</sup> ☆'Omi tosakona siwe tuya fue di ava'ai natumiavo nuanuadi nani 'atumaidi 'wa veveledi. 'Omi yami nuakalikali natumiavo 'waidie sai'afo bwaikina, we'e Tamada abame yana nuakalikali bwaikao-togina 'waimie, 'ai'edi 'wa na velu'uieni nani 'atumaidi i na velemini.

<sup>12</sup> ☆Ava'ai nuanuami mali tomotoga i na 'i'idewai 'waimie 'omi wata bani'odi 'wa na vesauluvedi. Vona de'e 'aitamogana Yaubada yana veimea matatabuna i mai Mosese 'wainega wata yana tolu'ivonavo yadi vona 'adi 'aseta mogitana."

*Iesu yana ve 'eda 'ailuga faifaidi.*

<sup>13-14</sup> ☆Wata Iesu i vonedi i vo, 'Edanina i nago abame siaina wata 'ana 'awa welilina begaidi kebu tomotoga fue di beidimo i da luku mia-vagata i da veluagai. We'e 'edanina i nago 'ai-'ala'alase bwaikina wata 'ana 'awa bababana, beidimo tomotoga fue di lukuluku. Begaidi i lubwainemi 'wa na luku 'awa welilineamo.

☆ 7:7: Mak 11:24; Ion 14:13-14    ☆ 7:8: Iem 1:5; 1 Ion 5:14-15    ☆ 7:11: Iem 1:17    ☆ 7:12: Luk 6:31; Lom 13:8-10    ☆ 7:13-14: Ion 10:9; Fol 14:22

*Iesu i matakia tolu'ivona-vekavekali faifaidi.*

15 ✨'Wa na 'isa'isa i na nunago tolu'ivona-vekavekali i na vekaliemi. 'Awasasamie bani'odi emiavo wata 'wa da vo 'aisaya tauvanuga we'e mogitana 'aisaya kasikasisidi bani'odi. 16 ✨Vuagidi 'waidiega 'wa na 'isa'inanadi tomotoga 'atumaidi 'alo sakoidi. 'Adi 'isa'isa side bani'odi. Kebu 'ana fata kalibo ta na kadia ulaulawa 'wainega wata kebu 'ana fata 'ala'ai vuagina ta na kadia 'uwe 'wainega. 17 'Ai'edi welavi 'atumaina wata vuagina 'atumaina, we'e welavi sakoina wata vuagina sakoina. 18 Kebu 'ana fata welavi 'atumaina we'e vuagina sakoina, wata kebu 'ana fata welavi sakoina we'e vuagina 'atumaina. 19 ✨We'e welavinidi kebu i da vuavuaga-'atumai matatabuna i na talagidi i na valo'udi i na 'alaidi. 20 Begaidi 'ami fata tolu'ivonanidi 'wa na 'asetadi yadi sauluva 'waidiega.

*Tovematayakayaka 'aisedi i na luku abame.*

21 ✨Wata kebu 'wa na vo 'ako, Tomotoganidi i ve'awa-'Auvea 'waikuye matatabudi i na luku abame, Yaubada yana 'Eba Veimea 'waineye. Kebu, we'e mogitana egavo Tamaku abame yana nuanua i na vevematayakeyakedi, taunidi i na luku. 22 'Awaie Vonayavuga 'ana 'Aiata 'waineye fuedi i na mai 'waikuye i na vo, 'Auvea, 'Auvea, 'amu wagavayega Yaubada yana Vona 'a lu'ivona mali tomotoga 'waidie, wata 'amu wagavayega 'a vona yaiaina i 'awa'a'idi we'e 'ifwaidi tomotoga matadie 'eba nuavogana wata 'eba nua'ewa fuedi 'a 'idewadi." 23 ✨Siwe yau a na vo, 'Omi tosakona, 'wa vaganago, kebu tamu sai'afo a da 'asetat-tonovimi."

*To'aiyogona vanuga 'adi 'ailuga.*

24 Wata Iesu i vonedi i vo, Vonanidi 'akonadi a veifufuyedigaga egavo i na nogaidi i na vematayakeyakediga taunidi bani'odi to'aiyogona vanuga ma yana 'asetat. To'aiyogonanina nagami kabutu'u 'atumaina i venuma'ivineni, 'ogola fa'alidi i 'ewadi wata ovu manamanawedi i aladi bega yana vanuga matatabuna i yogoni. 25 Tutuyanina 'wei i 'wei, weyagata i obu, kaukau bwaikina i nunuga vanuganina kebu i da 'etofioia fai vanuga fa'alina i yogoni 'ogola 'atumaidi 'waidiega. 26 We'e egavo yaku vona i na nogaidi siwe kebu i na vematayakeyakediga taunidi bani'odi tamu to'aiyogona sakoina. To'aiyogonanina kabutu'u sakoina i venuma'ivineni nidule i 'aiyogona. 27 Tutuyanina 'wei i 'wei, weyagata i obu, kaukau bwaikina i nunuga vanuganina i 'etofioia. I foiaga matatabuna i 'ivesakoi."

28-29 ✧Tutuyanina Iesu yana venidi i ve'a'avadi, 'aila'a bwaikina nuadi i voganidi fai ma yana veimea i veve 'waidie, kebu bani'odi yadi ve'etoboda 'adi tovevo.

## 8

### *Iesu tomogo waiwaiseselina i 'ive'atumaia.*

<sup>1</sup> Iesu yana ve i 'a'avana, 'oyayega i obuma wata 'aila'a bwaikina mulineye i nagoi. <sup>2</sup> We'e tamu tomogo waiwaiseselina i mai ma yana ve'ililibu i 'odu Iesu mataneyeye i vo, 'Auvea, 'ai'edi nuanuamu 'amu fata 'u na 'ive'atumaiku.” <sup>3</sup> Iesu toviganina i 'abitonovi i vo, Fai bani'odi, nuanuaku, 'u ve'atumai.” Nika tomogonina i ve'atumai 'ana viga i 'a'ava. <sup>4</sup> ✧Bega Iesu i voneni i vo, Kebu tamu aitoi 'waineyeye 'u na lu'ivonaga, nuanuaku tonovimu 'u na nago tovelomu 'waineyeye, nagami i na 'isemu. 'Aisaya 'u na veleni i na kabuni Yaubada 'waineyeye faifaimu, bani'odi basenadiotoga Mosese i voneyeniga Yaubada yana Buki 'waineyeye towaiwais-esela i ve'atumaiga faifaina. Tovelomunina i na 'isemu i na ve'awamogitana 'akonadi 'u ve'atumai wata bani'odi mali tomotoga i na 'asetai.”

### *Tolugavia i velu'ui Iesu 'waineyeye 'aivaita faifaina.*

<sup>5</sup> Iesu i nago 'atamana Kafaneomi, bei tamu Loma tolugavia bwaikina i veluagai, tolugavianina i velu'ui Iesu 'waineyeye 'aivaita faifaina. <sup>6</sup> I vo, 'Auvea, yaku tofolova i miamia vanuge, 'asa'aiana 'ivie i 'eno'enomo i veveviga bwaikina.” <sup>7</sup> Iesu i vo, Ta na nago a na 'ive'atumaia.” <sup>8</sup> Siwe tolugavianina Iesu yana vona i tutuli i vo, Kebu, 'Auvea, yau tomogo siaiku, 'ai'edi 'u na luku yaku vanuge, kebu 'ana 'isa 'atumainaga. 'U na vonamo we'e yaku tofolova i na ve'atumai. <sup>9</sup> A 'asetamu ma yamu veimea bega 'amu fata 'u na 'ive'atumaia. Yau wata ma yaku veimea yaku tolugavia 'waidie 'aku fata a na vo, 'U nago,” nika i na nago, wata a na vo, 'U mai,” nika i na mai, wata yaku tofolova a na voneni a na vo, Side 'u 'idewai,” nika i na 'idewai. Wata yau bani'odi, yaku to'edakumetavo yadi veimea a vevematayakeyakedi. 'Omu wata ma yamu veimea 'u na vonamo nika viga i na 'a'ava.”

<sup>10</sup> ✧Tutuyanina Iesu i nogai yana vonanina, nuana i vogani 'aila'a i vonedi i vo, De'e Loma 'ana tomotoga siwe yana vetumagana kasikasisina, we'e 'omi me Isileli Yaubada yana tomotoga, siwe kebu bani'odi vetumagananina a da veluagai 'waimie. <sup>11</sup> ✧A na vonemi, 'awaie tomotoga fuedi i na va'auta 'awalawa tulina tulina 'waidiega i na luku abame Yaubada yana 'Eba Veimea 'waineyeye bega Ebelamo, Aisake,

✧ 7:28-29: Luk 4:32; Ion 7:46 ✧ 8:4: Vei 14:1-4; Mak 7:36 ✧ 8:10: Mad 15:28

✧ 8:11: Luk 13:28-29

wata Iakobo taiadi i na 'aniluvetubama. <sup>12</sup> ✨We'e taunidi igodi i vo, 'Ima Yaubada natunavo," i na tawedi tanotanoge dudubala 'waineye, bei i na 'we'we'wela wata maigidi i na yuyuyudi fai veviga bwaikina."

<sup>13</sup> Mulieta Iesu i vona tolugavianina 'waineye i vo, 'U na nago yamu vanuge, naninina faifaina 'u vetumagana, mogitana i na souyeni 'u na 'iseni." Iesu i vona'a'ava nika 'awasasanina nageneye tofolovanina i ve'atumai.

*Toviga fuedi Iesu i 'ive'atumaiddi.*

<sup>14</sup> Tamu tutuya Iesu i nago Fita yana vanuge. Bei Fita yana vavine inadi i 'isedi 'ivie i 'eno'eno tomogodi i luyauyauta. <sup>15</sup> Iesu nimadie i 'abi, yauyautanina i 'awalililia i tovoi Iesu 'ana'ana i 'idewadewa.

<sup>16</sup> I lavia tomotoga ediavo yaiaina i agediga i miedi Iesu 'waineye. Iesu i vona yaiaina i 'awa'a'idi wata tovigata matatabuna i 'ive'atumaiddi. <sup>17</sup> ✨Yana 'ive'atumai tovigata 'waidie Aisea yana vona 'ana mogitana i souyeni. Taunina tamu Yaubada yana Vona 'ana tolu'ivona basenadiotoga i kilumi i vo,

Taunina 'aiseotogina 'ada viga i 'ewadi wata yada veviga i 'ewayavuledi."

*Tomotoga 'ifwaidi nuanuadi igodi Iesu 'waineye i na vetovetutuyama.*

<sup>18</sup> Iesu lilivaneye 'aila'a bwaikina i 'isedi i vona yana tovetutuyamavo 'waidie i vo, Ta na nagoi no'o bega lavu vi'ainega."

<sup>19</sup> Nika bei tamu me Diu yadi ve'etoboda 'ana tove i mai Iesu 'waineye i vo, Tove, yau 'akonadi a tauyeku 'waimuye 'ai'edi ava'aibe 'u na nunagoga yau taiadi." <sup>20</sup> ✨Iesu tomogonina yana vona i tutuli i vo, 'U na nuani 'ou'ou walawala'ai ma 'adi ovu, manuga ma 'adi giuva, we'e yau a vetomotogaotoga, kebu yaku vanuga bei a na 'eno 'alo a na veawai. 'Ai'edi 'omu yau taiadi ta na nagoga vita 'u na veluagadi."

<sup>21</sup> Wata tamu tomogo, taunina tovetutuyama i mai i vona Iesu 'waineye i vo, 'Auvea taiadi ta da nago, siwe nuanuaku a na miamia nagami tamaku a na tavunina mulieta a na mai a na vetutuyamemu. <sup>22</sup> Siwe Iesu i vo, 'Asiauna ta na nago we'e 'u baileni, egavo kebu nuanuadi i na vetutuyameku, taunidi 'anu'anunudi wafawafadi, yami towafa i na vevetavuna."

*Iesu yagina bwaikina i 'iveniwalovi.*

<sup>23</sup> Iesu yana tovetutuyamavo taiadi i dodoga wakeye i tauya. <sup>24</sup> I nunagoi nika kaukau bwaikina i nunuga yagina waka i ludododogi, we'e Iesu i 'eno'eno. <sup>25</sup> Iesu yana tovetutuyamavo i luvagovagoni i vo, 'U 'ita'ita'ieda 'Auvea,

sai'afoga ta na wafa.”<sup>26</sup> ✧ Iesu i 'isa i vonedi i vo, Awale 'wa kololo? 'Omi yami vetumagana mweadi.” Bega i tovoi kaukau wata yagina i talabodedi nika yagina wata kaukau i 'awatagonidi i niwalova bwaikina.<sup>27</sup> We'e yana tovetu-tuyamavo matatabudi nuadi i voganidi i vo, Ava'ai tomogoga de'e? Nani matatabuna wata yagina kaukau taiadi bonana i vematayakeyakeni.”

*Tomotoga 'ailuga yaiaina i agediga Iesu i 'ive'atumaidi.*

<sup>28</sup> Iesu ma enavo i damana lavu vi'ainega 'awalawa Gegesa. Bei tomotoga 'adi 'ailuga i veluagadi taumatayega i mimai. Basenadi yaiaina i agedi bega toketokedi, faifainanina tomotoga matatabudi i koloyedi 'edanina 'waineamo kebu i da nunagoi.<sup>29</sup> ✧ Tutuyanina Iesu i 'iseni i vebwaubwau i vo, 'Omu Yaubada Natuna, ava'ai 'u na vaima? Vematavuloga 'ana tutuya bola, we'e voke 'u mai 'ama vematavuloga faifaina.”

<sup>30-31</sup> Sai'afu lilivadie bawe fatala bwaikina i luluduaduala bega yaiainanidi tomotoga 'waidie i velu'ui Iesu 'waineye i vo, 'Ai'edi nuanuamu 'u na vona 'a na 'awa'a'imagi, 'u na tauyema no'o bawenidi 'a na agedi.”<sup>32</sup> Iesu i vonedi i vo, 'Asa'aiana 'wa souyemi 'wa nagoi.” Iesu yana voneye yaiainanidi i 'awa'a'idi i nagoi bawe i agedina fatala matatabuna i dega, 'oyeamo i obu i sou lavuye i ve'alamonumu.

<sup>33</sup> We'e bawe 'adi to'isave'avinavo i 'iseni i dega i nagoi 'atamane, bei nani matatabuna i veifufuyedi wata Iesu tomotoganidi i 'ive'atumaidiga faifaina i veifufu.<sup>34</sup> 'Atamananina 'ana tomotoga i nogai bega i nagoi Iesu 'waineye, i 'iseni wata i veugeugeni kebu i na miamia yadi 'awalaweye.

## 9

*Tomogo bwalobwalokona Iesu i 'ive'atumaia.*

<sup>1</sup> Me Gegesa Iesu i veugeugeni begaidi Iesu ma enavo i dodoga wakeye i viladi i damana Kafaneomi, taunina yana 'atamane.<sup>2</sup> ✧ We'e tomotoga 'ifwaidi iadi tamu i vebwalokoga ma 'evo'evona i evai i mieni bega Iesu i na 'ive'atumaia. Iesu i 'isedi i 'asetai ma yadi vetumagana bega tomogonina i voneni i vo, Natuku, kebu 'u na kolologa, yamu sakona 'akonadi a nuatavunidi.”

<sup>3</sup> We'e 'ifwaidi ve'etoboda 'adi tovevo yadi nuanua i vo, De'e tomogo awale Yaubada i vona-uvi'agali, Yaubada 'aiseotogina 'ana fata sakona i na nuatavunidi.”<sup>4</sup> Iesu yadi nuanua i 'asetadi bega i vonedi i vo, Awale nuanua sakoidi nuamie i 'eno'enovi?<sup>5-6</sup> ✧ Yau a vetomotogaotoga ma yaku

✧ 8:26: Mad 14:31; Same 89:9 ✧ 8:29: Luk 4:34,41; Kolos 2:15 ✧ 9:2: Luk 7:48-49 ✧ 9:5-6: Ion 17:2, 5:8



veimea fwayefwayeye bega 'aku fata tomotoga yadi sakona a na nuatavunidi. Tomotoga 'adi 'ive'atumai vitana fai 'ai'edi a na vona siwe kebu i na ve'atumaiga, 'wa na 'asetai a vekali, kebu ma yaku veimea a vona-'avo'avovo. Siwe tovigga de'e a na 'ive'atumaia 'wa na 'iseni bega 'wa na 'asetai kebu a da vona-'avo'avovo 'aku fata sakona a na nuatavunidi.” Bega Iesu tomogo bwalobwalokona i voneni i vo, 'U tovoi, 'amu 'evo'evo 'u evai 'u nago yamu vanuge.” <sup>7</sup> Iesu yana voneye tomogonina i tovoi i nago yana vanuge. <sup>8</sup> Tutuyanina 'aila'a i 'iseni i kololo i 'asetai Yaubada toketokena begaidi i subiai i vo, Vona mogitana, Yaubada veimea bwaikina i 'aniveleneni tomotoga 'waideye bani'odi sakona 'ana nuatavuna.”

*Iesu Madiu i goleni, 'waineye i na vetovetutuyama.*

<sup>9</sup> Bei tomogo i 'ive'atumaiaga Iesu i 'iaweni, i nunagoga nika takesi 'ana tolaugogona 'ana wagava Madiu\* i 'iseni yana 'eba folova 'waineye i miamia. Bega i voneni i vo, 'U mai taiadi ta na nago yaku tovetutuyama,” nika Madiu i tovoi Iesu taiadi i nago.

<sup>10</sup> Mulieta Iesu ma yana tovetutuyamavo i 'ani'ani Madiu yana vanuge nika takesi 'ana tolaugogona fuedi wata 'ifwaidi tosakona i mai ma fuedie i 'ani'ani. <sup>11</sup> \*We'e 'ifwaidi me Diu totafalolo Falisi i 'isedi i nagoi Iesu yana tovetutuyamavo i velutoliedi i vo, Ava'ai faifaina yami Tove tolaugogona vivinagodi wata 'ifwaidi tosakona taiadi i 'ani'ani?” <sup>12</sup> Iesu yadi vona i nogai i vona-awatabai 'waidie i vo, Egavo 'atumaide kebu nuanuadi viga 'adi to'ive'atumai, 'aisedi tovigga mogitana. <sup>13</sup> \*We'e 'omi 'wa na nagoi tamu Yaubada yana Vona yana Buki nageneye 'wa na 'iseni 'ana 'asetai 'wa na venua'ivineni. Vonanina side bani'odi,

'Aisaya 'wa nikenikedi 'wa vevelomuyediga 'waikuye, kebu nuanuaku.

Nuanuaku tomotoga 'wa na 'i'isanuakalikali.

Yau a maiga kebu taunidi i awave'atumaiediga faifaide, a mai wata tosakona a na 'ita'ita'iedi.”

*Velutoli ve'udigana 'ana 'asetai faifaina.*

<sup>14</sup> \*Mulieta Ioni Tobafitaiso yana tovetutuyamavo i maia Iesu 'waineye i velutolieni i vo, 'Ima wata totafalolo Falisi tutuya fuedi 'a veve'udigana 'ani bega yama velu'ui i na vetoketoke Yaubada 'waineye, we'e yamu tovetutuyamavo awale kebu i da ve'udiganaga?” <sup>15</sup> \*Iesu yadi vona i tutuli, taunina faifaina i vona-awatabai i vo, Tonagi yana sosoana 'waineye kebu tamu aitoi 'ana fata enavo i na talabodedi bega 'ani'ani i na baileni. We'e tamu 'aiata tomotoga 'ifwaidi i

\* 9:9: Tomogonina buki de'e 'ana tokiluma.    ✨ 9:11: Luk 15:2, 19:7    ✨ 9:13: Mad 12:7; 1 Tim 1:15    ✨ 9:14: Luk 18:11-12    ✨ 9:15: Ion 3:29

na maia tonaginina i na 'ive'avini i na naweni i lubwainedi enavonidi ma yadi nuavita i na ve'udigana.”

16 ✨Wata Iesu i awatalatutula 'waidie yana ve sauluva 'ivauna faifaina wata me Diu yadi sauluva tuatuaina 'adi luwanawana faifaidi i vo, Kaleko tuatuaina i na 'anilabu'i we'e 'ivaunega ta na bwadia kebu i da lubwaineniga. Fai bola ta na lekoai bwadi 'ivauna i na vesiai bega i na vefato'ai'ai tuatuaina i na 'ivesakoi.” 17 Wata bani'odi oine 'ana 'eba iwaga 'aisaya bunudiega faifaina Iesu i vona i vo, 'Ai'edi oine 'ivauna 'eba iwaga tuatuaina 'waineye i na iwagi i na yuveduai, i na iwaga 'ana ve'amubwadodo fai totolina wata 'eba iwaga 'akonadi i sako. We'e 'ai'edi oine 'ivauna wata 'eba iwaga 'ivauna nika bikabikana i na lubwaineni kebu i na yuveduai 'ailugana 'atumaidi.”

*To'edakumeta natuna vevinena wata tamu vavine Iesu i 'abitonoviga ifufudi.*

18 Tutuyanina Iesu i veve tomotoga 'waidie, nika tamu me Diu yadi to'edakumeta i le'wa. I mai ma yana ve'ililibu Iesu mataneye i 'odu i voneni i vo, Natuku vevinena 'asiauotoga yawaina i 'a'ava, nuanuaku ta na nago nimamu 'u na yatoi 'waineye i na yawasa.” 19 Iesu i nogai, bega i tovoi i nunagoga yana tovetutuyamavo wata mulineye i nagoi.

20-22 ✨I nunagoiga, tamu vavine wata mulidie i nago. Vavinenidi vevine 'adi viga i 'ewadi, malamala 12 nagedie kebu i da 'a'ailove viganina i 'eno'eno. Yadi nuanua 'waineye i vo, 'Ai'edi 'ana kaleko'ava 'a na 'abitonovimo 'a 'asetai 'a na ve'atumai.” Bega i vaganago Iesu muliotogineye 'ana kaleko mataifwana i 'abitonovi, nika i sivilai i 'isedi i vonedi i vo, Natuku, kebu 'wa na kolologa, yami vetumagana 'waikuye i 'ive'atumaimi.” Iesu yana voneye nika i ve'atumai.

23 We'e Iesu i nago i luku to'edakumetanina yana vanuge. Tomotoga fuedi i 'isedi bonadi bwaikina i vevemogai we'e 'ifwaidi i 'umo'umo yadi sauluva bani'odi. 24 ✨Bega Iesu i vonedi i vo, Matatabumi 'wa souyemi, de'e kwamana vevinena kebu i da wafaga, i 'eno'enomo.” 'Aila'a i 'asetai kwamananina mogitana i wafa begaidi Iesu i sidibidibieni. 25 Siwe tutuyanina tomotoga i yavula Iesu i luku kwamananina yana tududaba 'waineye, nimaneye i 'abi nika i tovoi. 26 Tovemogainidi i 'iseni, i nagoi kwamana yana yawasavaitugana i veifufuyeni yadi 'awalawanina nageneye bega tomotoga matatabudi i 'asetai.

*Iesu tomatasako 'adi 'ailuga i 'ive'atumaidi.*

✨ 9:16: 1 Kol 10:21; 2 Kol 6:16

✨ 9:20-22: Mad 14:36; Mak 10:52; Luk 17:19

✨ 9:24: Ion 11:11

27 ✨Bei kwamana i 'ive'atumaiaga Iesu i 'iaweni i nunagoga tomatasako 'adi 'ailuga mulineye i nagoi i vevegolegole i vo, 'Omu Yaubada 'ana Venua'ivina, Kini Devida tubuna, 'u da 'isanuakalikiema.” 28 Iesu i mai i luku vanuge nika wata 'adi 'ailuga i mai i luku 'waineye bega Iesu i velutoliedi i vo, 'Wa vetumaganekuna a na 'ive'atumaimi 'alo kebu?” 29-30 ✨Tomatasakonidi i vo, E'e 'Auvea,” bega Iesu matadi i 'abitonovidina i vonedi i vo, Yami vetumagana 'wainega matami i na ve'atumai,” nika i 'isadewa. Iesu i toke i vonedi i vo, Matami a 'ive'atumaidiga kebu tamu aitoi 'wa na voneniga.” 31 Siwe i tauya i nagoi i lu'ivo'ivona yadi 'awalawanina matatabuna nageneye.

*Tomogo 'awana 'ebo'ebona Iesu i 'ive'atumaia.*

32 ✨Tomotoganidi matadi i sakoga i tauya i nunagoi, tomotoga 'ifwaidi tamu iadi i mieni, tomogonina basenadi yaiaina i agei 'awana i ve'ebo'ebo bega kebu 'ana fata i na welava. 33 Iesu i vona yaiaina i 'awa'a'ia nika tomogo i welava. Tomotoga i 'iseni, nuadi i voganidi i vo, Kebu tamu tutuya nani de'e bani'odi ta da 'iseniga yada 'awalawa de'e Isileli nageneye.” 34 ✨We'e totafalolo Falisi i vo, Kebu, we'e yaiaina yadi to'edakumeta Seitani i agei yana toketokena i veleni bega i vonavona yaiaina i 'a'awa'a'idi.”

*Iesu tomotoga i 'isanuakalikaliedi.*

35 Iesu i lauvivila i nago 'atamana bwaikidi wata siaidi 'waidie i veve 'eba miava'auta nagedie wata Vala 'Atumaina Yaubada nuanuana tomotoga i na veimeyedi yana 'Aila'a nageneye faifaina i lalau'age, we'e tomotoga fuedi, 'adi viga tulina tulina i 'ive'atumaidi. 36 ✨'Aila'a i 'isedi nuana i vita faifaidi fai 'adi vita fuedi, kebu i da 'asetadi bani'odi i na munega 'alo ava'aiega 'aivaita i na veluagai. Taunidi bani'odi 'aisaya sifi kebu 'adi to'isave'avinaga i veyogo-'avo'avovo. 37 ✨Fai bani'odi i 'isediga yana tovetutuyamavo i vonedi i vo, 'Akonadi tomotoga fuedi i lalauala nuanuadi yadi mia i na ve'atumai, bega i na vetumaganeku i na luku Yaubada yana 'Aila'a 'waineye, siwe 'omi tofolova kebu fuemiga bega yaku vona 'wa na lu'ivoneyeni. 38 Begaidi Yaubada taunina bani'odi tonibakula 'waineye 'wa na velu'ui bega tofolova fuedi i na vetunedi i na 'ivaisemi 'wa da vo vuaganidi 'wa na mimaiiedi Yaubada yana bubuwaka 'waineye.”

## 10

*Iesu yana tomata'aulelevo 12 'adi wagava.*

<sup>1</sup> ✨ Iesu yana tovetutuyamavo 12 i va'augidi, veimea i veledi bega 'adi fata i na vonamo yaiaina i na 'awa'a'idi wata tovinga 'adi viga tulidi tulidi i na 'ive'atumaidd. <sup>2</sup> Tomata'aulelenidi 12 side 'adi wagava, nagami,

Saimoni, tamu 'ana wagava Fita,  
Anidulu, Saimoni taina,  
Iemesa ma taina Ioni, taunidi Sebedi natunavo,

<sup>3</sup> Filifi,  
Batolomiu,

Tomasi,  
Madiu, taunina takesi 'ana tolaugogona,  
Iemesa, Alefasi natuna,

Tadiusa,

<sup>4</sup> Saimoni, toawa'idi'idi kebu nuanuana Loma gabemani i na veveimeyedi,

Iudasa Isakaliota, taunina Iesu 'ana to'etogiluva.

*Iesu yana tomata'aulelevo yadi folova i veledi.*

<sup>5</sup> Iesu yana tomata'aulelevo 12 i vetunedi yana vona i na lau'age-vuvueni bega i velu'ase'asedi i vo, Mali tomotoga taunidi kebu Diu wata me Samelia 'waidie kebu 'wa na nagoiga. <sup>6</sup> ✨ Nuanuaku 'wa na nagoi me Isileli 'aisedi 'waidie, taunidi vuyovuyodi 'wa da vo 'aisaya sifi. <sup>7</sup> 'Wa na lau'age 'waidie 'wa na vo, Yaubada yana veimea fwayefwayeye 'ana tutuya sai'afoga i na souyeni." <sup>8</sup> Toviga 'wa na 'ive'atumaidd, towafa 'wa na sivetovoidi, waiwaiselidi 'wa na 'ive'atumaidd, wata egavo yaiaina i agediga, 'wa na vona i na 'awa'a'idi. Veimea ma yana toketokena a velemini kebu ma 'ana tutulaga, 'wainega 'wa na 'aivaita kebu tutula 'alo fu'e faifaidi 'wa na nuanua." <sup>9-10</sup> ✨ Wata a na vonemi, 'Wa na nunagoiga side naninidi kebu 'wa na 'ewadi 'wa na nawedi, mani lubulubu 'alo kileu, venuana, 'ageyafayafa 'alo talauma 'adi veluga, 'alo wautogana. Naninidi faifaidi kebu 'wa na nuanua, fai tofolova i lubwainedi ma 'adi 'aivaita.

<sup>11</sup> 'Ai'edi 'wa na le'wai 'atamana bwaikidi 'alo siaidi 'waidie, 'wa na lau'ala tamu tomogo yana nuanua 'atumaidd 'waineye 'wa na nagoi, bei yana vanuge 'wa na miamia mulieta 'wa na tauya, kebu 'wa na miayaba-vuvua mali vanuga 'waidie.

<sup>12</sup> Tutuyanina vanuganina 'waineye 'wa na lukuga 'wa na vekaiwa tonivanuga 'waineye wata 'wa na vo, Yaubada i na nuakalikaliemi." <sup>13</sup> 'Ai'edi vanuganina 'ana tomotoga ma yadi sosoana i na lu'uma'umaiemi Yaubada i na vesauluva-'atumaidd, we'e 'ai'edi kebu nuanuadi 'wa na lukuga 'waidie 'omi Yaubada i na vesauluva-'atumaidd

we'e tomotoganidi kebu. <sup>14</sup> ✨ 'Ai'edi ava'ai vanugaga 'alo

✨ **10:1:** Mak 6:7; Luk 9:1 ✨ **10:6:** Iel 50:6; Mad 15:24 ✨ **10:9-10:** 1 Kol 9:14; 1 Tim 5:18 ✨ **10:14:** Fol 13:51, 18:6

'atamanaga 'adi tomotoga i na vedumwe'ubu'ubusemi wata yami vona kebu i na nogaidiga, 'wa na 'iawedi 'wa na nagoi wata 'agemiega fwayafwaya 'wa na lubutubutuya, yadi 'eba 'isa bei wata kebu 'wa na lalau'age, wata bola vematavuloga i na veluagai Yaubada 'wainega. <sup>15</sup> ✧A vona mogitana 'waimie, 'awaie Vonayavuga 'ana 'Aiata 'waineye tosakona basenadiotoga i miamiani 'atamana Sodoma wata Gomola 'adi vematavuloga i na veluagai Yaubada 'wainega siwe sai'afo i na 'isanuakalikali, we'e tomotoganidi i na vedumwe'ai'aiemiga vematavuloga bwaikaotogina i na veluagai 'aiananina 'waineye.”

*Tosakona Iesu yana tofolovavo vita i na veledi.*

<sup>16</sup> ✧A na vonemi, 'ou'ou walawala'ai 'aisaya sifi i ovaovadi, wata bani'odi a vevetunemi tomotoga kasikasisidi 'waidie vita i na vevelemi. Begaidi i lubwainemi ma yami 'aseta taunimi 'wa na 'isave'avinimi we'e yami sauluva i na bika bunebune bani'odi. <sup>17-18</sup> ✧'Wa na 'isa'isa, fai 'omi yaku tomotoga bega 'ifwaidi tomotoga i na 'ive'avinimi i na nawemi 'eba vonayavuga 'waineye, wata yadi 'eba miava'auta 'waidie i na toke i na fitalimi. Toveimea bwaikidi wata kini matadie 'wa na vonayavuga, bei 'ami fata Vala 'Atumaina faifaiku 'wa na lu'ivoneyeni 'waidie wata mali tomotoga 'waidie taunidi kebu me Diu. <sup>19-20</sup> ✧Tutuyanina i na 'ive'avinimiga kebu nuafoumi i na veviga 'wa na vo, Ava'ai a na voneyeni, 'alo bani'odi a na voneyedi,” fai tutuyanina 'waineye Yaubada i na awave'ede'edemi. Bega vonanidi 'waidiega 'wa na vonavona kebu taunimi yami vona, Tamami 'Anu'anununa 'waimiega i na vonavona.

<sup>21</sup> Tomotoga fuedi yaku tomotoga i na vedumwe'ai'aiemi, 'ifwaidi tomotoga taidiavo 'alo tatadiavo i na 'anivelenedi 'aku tovedumwe'ai'ai 'waidie i na luvewafadi, we'e iaveta tulaidi 'ifwaidi natudiavo iavetadi i na 'anivelenedi i na wafa, wata yavayavava tamadiavo inadiavo taiadi i na vegaviedi bega i na wafa. <sup>22</sup> ✧Fai 'wa vetumagana 'waikuye begaidi tomotoga fuedi i na vedumwe'ai'aiemi, siwe egavo i na tokemaigedi i na nagoga tutuya 'eba ve'a'ava 'waineye 'ita'ita'i i na veluagai. <sup>23</sup> 'Ai'edi tamu 'atamana 'waineye vita i na vevelemiga 'wa na dega 'wa na nagoi tamu 'atamana 'waineye. Siwe a vona mogitana 'waimie, yami folovanina bola kebu 'wa na sigoiaga, bola 'wa na lalauvivila me Isileli yadi 'atamana 'waidie, yau a vetomotogaotoga a na mai.

<sup>24</sup> ✧Kwamana yana 'aseta kebu yana tove yana 'aseta i da vebwaika-'iaweni, wata tofolova 'ana toveimea kebu i da

✧ **10:15:** Nag 19:24-28; Iud 1:7 ✧ **10:16:** Ion 10:12; Fol 20:29 ✧ **10:17-18:** Fol 25:23 ✧ **10:19-20:** Ion 14:26 ✧ **10:22:** Mad 24:9,13; Ion 15:18-21 ✧ **10:24:** Ion 13:16

vebwaika-'iaweni. <sup>25</sup> ✧ Begaidi 'ai'edi tove 'alo toveimea vita i na veluagadi, mogitana wata yadi kwakwamavo vitanidi i na veluagadi. 'Aila'anina 'waineye ta miamiani yau 'ana to'edakumeta siwe 'aku tovedumwe'ai'ai i awavesakoyeku i vo, 'Omu Seitani, yaiaina 'adi to'edakumeta.” Yau i awavesakoyeku we'e 'omi yaku 'aila'a i na awavesako-otogemi.

*Kebu tomotoga 'wa na kololoyediga.*

<sup>26</sup> ✧ Vita i na velemini, siwe kebu 'wa na kololoyediga. Ava'ai tomotoga i na giveniga, matatabuna Yaubada i na sivemagesedi. Ava'ai i na nuagivediga Yaubada i na lu'ivoneyedi. <sup>27</sup> 'Aise'avami 'waimie a veveifufuga 'wa da vo dudubale, we'e 'omi 'wa na sivemagesedi 'aila'a 'waidie. Ava'ai ve'awayaya 'wainega 'wa nogaiga, 'atamanafouye 'wa na vetuleleyeni. <sup>28</sup> ✧ Egavo nuanuadi i na luvewafamiga kebu 'wa na kololoyedi, tomogo'avami i na luvewafadi, we'e 'anu'anunumi kebu. We'e mogitana ma yami ve'ililibu Yaubada 'wa na kololoyeni, 'ana fata tomogomi wata 'anu'anunumi taiadi i na luvewafadi 'ai-'ala'alase. <sup>29</sup> 'Ai'edi manudanidani 'ailuga ta na kimwanedi 'adi tutula siaina, bani'odi toea 'aitamogana. We'e Yaubada mataneye manudanidani 'aitamogana 'aitamogana kebu nuana i da fani, kebu 'ana fata tamu i na wafa nagami Tamami i na tauyeni. <sup>30</sup> We'e 'omi mataneye nani bwaikina i 'aseta'a'avami bani'odi nava'au matatabuna 'adi 'aila'a i 'asetadi. <sup>31</sup> ✧ Begaidi kebu 'wa na kolologa, 'omi kebu nani-'avo'avovo manudanidani bani'odi, 'omi nani bwaikina Yaubada mataneye i na 'i'isave'avinimi.

<sup>32</sup> 'Ai'edi aitoi i na lu'ivona tomotoga matadie faifaiku i na vo, Yau a tauyeku Iesu 'waineye taunina 'aku Toveimea,” wata 'awaie abame bani'odi Tamaku mataneye a na vo, No'o tomotoganina yaku tomotoga.” <sup>33</sup> ✧ We'e 'ai'edi aitoi i na ve'eweku tomotoga matadie i na vo, Yau kebu Iesu 'aku Toveimeaga,” wata 'awaie abame Tamaku mataneye a na ve'eweni a na vo, No'o tomotoganina kebu yaku 'aila'aga.”

*Yada nuanua 'waidie, aitoi i kumeta?*

<sup>34</sup> Wata Iesu i vonedi i vo, Kebu 'wa na vo, Iesu i mai bega tomia fwayafwaya matatabuda ta na veiana.” Kebu, yau a maiga 'wainega tomotoga tauni'avadi i na ve'alamagi'ai ve'idi'idi i na souyeni. <sup>35-36</sup> 'Ifwaidi yaku vona i na vetu-maganeni, 'ifwaidi kebu, bani'odi tulaidi wata natudiavo iavetadi taiadi i na ve'ikwayekwayega faifaiku, vevine tulaidi

✧ 10:25: Mad 12:24 ✧ 10:26: Mak 4:22 ✧ 10:28: Iem 4:12 ✧ 10:31: Mad 6:26 ✧ 10:33: Mak 8:38; 2 Tim 2:12

wata natudiavo vevinedi taiadi. We'e vevine wata lawadi-avo vevinedi taiadi i na ve'ikwayekwayega faifaiku, wata tomotoga 'adi gaviavo mogitana tauniotogidi yadi 'aila'a 'waidiega.

<sup>37</sup> 'Ai'edi aitoi tamana 'alo inana 'adi nuanua 'waineye i na kumeta, we'e yau 'aku nuanua i na vesiai kebu 'ana fata i na vetutuyamekuga. Wata 'ai'edi aitoi natuna iave-tana 'alo vevinena 'adi nuanua 'waineye i na kumeta, we'e yau 'aku nuanua i na vesiai, kebu 'ana fata i na vetutuyamekuga. <sup>38</sup> \*'Ai'edi aitoi nuanuana mogitana i na mai 'waikuye, nagami taunina yana nuanua i na bailedi. Fai i na vematayakeyakeku veviga bwaikina i na veluagai yau bani'odi a na veluagai. Voke i na wafa faifaiku yau bani'odi a na wafa 'ai lagalagana 'waineye. 'Ai'edi aitoi kebu bani'odi i na vesauluvediga, taunina kebu 'aku tovetutuyama. <sup>39</sup> 'Ai'edi aitoi yana mia 'ana 'atumaina i na ve'o'oleni, kebu nuanuana yawaina i na tauyeni faifaiku, taunina i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku mia 'atumaina wata miamia-vagaina i na veluagai.”

*Iesu yana ve tutula 'atumaina faifaina.*

<sup>40</sup> \*Wata Iesu i vonedi i vo, 'Omi yaku tovetutuyamavo 'ai'edi aitoi ma yana nuakalikali i na 'ivaisemi siwe 'asa'aiana yau i 'ivaiseku, we'e 'ai'edi ma yana nuakalikali yau i na 'ivaiseku, siwe 'asa'aiana Yaubada, taunina 'aku tovetune i 'ivaiseni. <sup>41</sup> 'Ai'edi aitoi Yaubada yana Vona 'ana tolu'ivona ma yana nuakalikali i na 'ivaiseni fai taunina Yaubada yana tofolova, 'awaie ma fuedie 'adi tutula i na vesala. Wata 'ai'edi aitoi tamu tomotoga i na 'ivaiseni fai yana sauluva 'atumaina, 'awaie ma fuedie 'adi tutula i na vesala. <sup>42</sup> \*A vona mogitana 'waimie yaku tofolovavo 'adi to'aivaita matatabudi 'adi tutula i na veluagai. 'Ai'edi tamu tomogo yaku tofolova siaina i na 'ivaiseni, avinodi yana 'aivaita siaina bani'odi ufa i na veleni i na yemu, siwe wata tutula i na veluagai yana 'aivaitanina faifaina.” Side bani'odi Iesu i ve yana tovetutuyamavo 'waidie.

## 11

*Ioni tomotoga 'ifwaidi i vetunedi Iesu 'waineye.*

<sup>1</sup> Tutuyanina Iesu yana ve i 'a'ava yana tovetutuyamavo 12 'waidie, 'atamananina i 'iaweni i nago 'atamana 'ifwaidi 'waidie 'awalawa Galili nageneye, bei i na ve wata i na lau'age.

\* 10:38: Mad 16:24-25; Mak 8:34-35; Ion 12:25

\* 10:40: Mak 9:37; Gal 4:14

\* 10:42: Mad 25:40

<sup>2</sup> Tutuyanina 'waineye Ioni Tobafitaiso i miamia vanuga 'eba yogona 'waineye. 'Wainega Iesu yana folova valana i nogai begaidi 'ifwaidi yana tovetutuyamavo i vetunedi i na velutolieni. <sup>3</sup> \*Bega i maia Iesu 'waineye i vo, Ioni Tobafitaiso nuanuana i na 'asetai 'omu kumanimu faifaimu me Diu ta lulukamata ta vo, 'Awaie 'ada To'ita'ita'i i na mai Yaubada 'wainega," 'alo tulina faifaina ta na lukamata." <sup>4</sup> Iesu yadi velutoli i tutuli i vo, 'Wa na vilami 'wa na nagoi Ioni 'waineye, ava'ai a veveifufuyedi 'wa nogaidiga wata a 'i'idewadi 'wa 'isediga faifaidi 'wa na voneni. <sup>5</sup> \*Side bani'odi 'wa na voneyedi 'wa na vo, Tomatasako i 'isadewa, tubusakosako i tubuoga, waiwaisesela i ve'atumai. Tanigadi 'uludi 'adi fata i na nogaya, towafa wafayega a sivetovoidi, wata Vala 'Atumaina 'ita'ita'i Yaubada 'wainega faifaina a lalau'age wekowekoma 'waidie." <sup>6</sup> Wata 'wa na voneni 'wa na vo, 'Ai'edi aitoi kebu i da venuanaluga, i vetumaganamo 'waikuye, 'eba sosoana 'waineye."

*Iesu Ioni i awa'ai'aia.*

<sup>7</sup> Ioni yana tovetutuyamavo i tauya i nunagoi, Iesu 'aila'a 'waidie i veifufu Ioni faifaina i vo, Basenadi 'wa nagoi sali'avu'avuye Ioni 'waineye, ava'ai nuanuami 'wa da 'iseni? Tamu tomogo umaumana yana sauluva bikana bani'odi 'ayalele kaukau siaina i nunuga i 'anino'uya? Kebu. <sup>8</sup> 'Alo ava'ai 'wa da 'iseni? Tamu tomogo i vaigavu kaleko 'atumaidiega? Wata kebu. Tomotoganidi i vaigavuga bani'odi, yadi vanuga 'ai'aiwabudi 'waidie i miamiani. <sup>9</sup> Nuanuaku a na 'asetai 'wa nagoga ava'ai 'wa da 'iseni? Tamu Yaubada yana tolu'ivona? E'e. Mogitana tolu'ivona. Siwe 'ifwaidi tolu'ivona sai'afo va'egai, we'e tomogonina 'wa 'iseniga bwaikaotogina. <sup>10</sup> \*Vona mogitana tomogo bwaikina fai basenadiotoga faifaina i kilumi Yaubada yana Buki nageneye. Yaubada i vona 'ana Venua'ivina 'waineye i vo,

Taunina yaku tomata'aulele, a na vetunei i na kumeta yamu 'eda i na vusia."

<sup>11</sup> A vona mogitana 'waimie tomia fwayafwaya matatabudi sai'afo va'egai, we'e Ioninina bwaikaotogina. Siwe tomotoganidi bwaikidi wata siaidi 'akonadi i lukuga Yaubada yana 'Eba Veimea nageneye i vagalaka, Ioni ma'itufa i obu fai bola kebu i da lukuga. <sup>12-13</sup> Basenadiotoga Yaubada veimea i yatodi bega tomotoga i na vematayakeyakedi, bani'odi ve'etoboda Mosese 'wainega wata tolu'ivonavo 'adi kiluk-iluma. Veimeanidi i 'eno'eno nika Ioni Tobafitaiso i souyeni. Tutuyanina i velamu i maiga 'asiau, tomotoga fue di ma



yadi toketokena i ve'edaeloelo wata i vevetunufelagi nuanuadi bwaikina i na luku Yaubada yana 'eba veimea nageneye. <sup>14</sup> ✧ Wata basenadiotoga Yaubada yana tolu'ivonavo nagami i vona-vagata tamu tolu'ivona i na maiga faifaina. Tolu'ivonanina bwaikina, yana sauluva bani'odi Ilaitia kumanina basenadiotoga ma yawaina i nagomo abame. 'Ai'edi nuanuami yaku vona 'wa na vetumaganeni tolu'ivonanina bani'odi Ilaitia, 'asa'aiana Ioni. <sup>15</sup> 'Akonadi yaku vona 'wa nogai, siwe 'wa na venua'ivineni nika 'wa na 'asetai."

<sup>16-17</sup> Wata Iesu i vona 'aila'a 'waidie i vo, Tutuya de'e 'ana tomotoga ava'ai 'wainega a na awatalatutulemi? Yami sauluva ava'ai bani'odi? Tomotoganimi bani'odi yavayavava to'wava, nuanuadi i na vetutuyama 'atamanafouye. Tamu 'aila'a i vegole ediavo 'waidie i vo, Nuanuama tamu nani ta da 'idewai siwe 'wa baila. 'A lauinava siwe kebu 'wa da suya, 'a tailauwawa siwe kebu 'wa da vemogai. Kebu nuanuami yama nuanua 'wa na fali'atumaiedi." <sup>18</sup> ✧ 'Omi yavayavavanidi bani'odi, kebu nuanuami Ioni Tobafitaiso wata yau yama nuanua 'wa na fali'atumaiedi. Ioni i mai i veve'udigana 'ani bega yana velu'ui Yaubada 'waineye i na vetoketoke, wata kebu oine i da yemuga 'wa vona 'wa vo, Tomogo no'o, yaiaina i agei." <sup>19</sup> ✧ We'e yau a vetomotogaotoga a mai kebu a da ve'udiganaga, a 'ani'ani wata a yemuyemu siwe 'wa vo, 'Wa 'iseni, tomogo no'o. 'Awana bwalabwalaina, yana 'ani wata oine yana yemu 'afoina, takesi 'ana tolau-gogona vivinagodi wata tovedumwe'ai'ai i veianedi." Egavo Yaubada yana nuanua 'ase'asetadi i vevematayakeyakedi, i nuani Yaubada ma yana 'aseta mogitana."

*'Atamana 'ifwaidi bola vita i na veluagadi.*

<sup>20</sup> Basenadi 'atamana 'ifwaidi 'waidie Iesu 'eba nuavogana wata 'eba nua'ewa sai'afo matatabuna i 'idewadi, siwe tomotoganidi kebu i da nuaviladi yadi sakona 'waidiega. Begaidi Iesu 'atamananidi 'adi tomia i awavesakoyedi. <sup>21</sup> I vo, Ieu, 'omi me Kolesini nuakalikalimi wata me Bedasaida nuakalikalimi, 'waimie vita bwaikidi i na souyedi. We'e basenadiotoga me Taia wata me Saidoni yadi sakona bwaikidi faifaidi Yaubada i leodi. 'Ai'edi 'eba nuavogananidi wata 'eba nua'ewanidi a 'idewadiga matamie a da 'idewadi matadie 'ako i da vemwakula wata kaleko sakoidi i ve'wesena, 'adi 'eba 'isa ma yadi nuavita i nuaviladi. <sup>22</sup> ✧ A na vonemi, 'awaie Vonayavuga 'ana 'Aiata 'waineye me Taia wata me Saidoni 'adi vematavuloga i na veluagai Yaubada 'wainega, siwe sai'afo i na 'isanuakalikaliedi, we'e 'omi yaku vona 'wa baila

✧ 11:14: Mad 17:10-13 ✧ 11:18: Mad 3:4 ✧ 11:19: Luk 15:1-2 ✧ 11:22: Emo 1:9-10

kebu 'wa da nuavilamiga vita bwaikaotogina 'wa na veluagai. <sup>23</sup> ☆We'e 'omi me Kafaneomi taunimi 'wa awa'ai'aيمي igodi 'wa vo, 'Ima 'atumaima, abame 'a na luku,” siwe mogitana Yaubada i na veimea 'wa na obu Vatu'ai Manamanawena 'waineye. Basenadiotoga Yaubada me Sodoma i leodi yadi sakona faifaidi, siwe 'ai'edi yaku folovanidi toketokedi a 'idewadiga matamie a da 'idewadi matadie, i da nuaviladi 'atamananidi bola i da miamia. <sup>24</sup> ☆A na vonemi, 'awaie Vonayavuga 'ana 'Aiata 'waineye Yaubada me Sodoma sai'afo i na 'isanuakalikaliadi wata 'adi vematavuloga i na velediga sai'afo, we'e 'omi kebu'a'ava.”

*Mia 'atumaina Iesu i na veleda.*

<sup>25</sup> ☆Tutuyanina 'waineye Iesu i vona Yaubada 'waineye i vo, 'Omu abama wata fwayafwaya 'adi Toveimea, a vekaiwa 'waimuye fai yaku ve 'adi 'aseta 'u givedi taunidi 'ase'asetadi wata i awa'ai'aidiga 'waidiega bega i bavuyedi, we'e egavo i nunuaobuga yavayavava bani'odi, yaku ve 'ana 'aseta 'u kiavemagetadi 'waidie. <sup>26</sup> Tamaku, vona mogitana ava'ai yamu nuanua i lubwaineniga 'akonadi 'u 'idewai 'amu kiavesosoana.”

<sup>27</sup> ☆Iesu i velu'ui i 'a'avana tomotoga i vonedi i vo, Nani matatabuna Tamaku i 'anivelenedi 'waikuye a veveimeyedi. Kebu tamu aitoi yau Yaubada Natuna i da 'asetaku, Tamaku 'aiseotogina 'aku to'aseta. Wata kebu tamu aitoi Tamaku i da 'asetai, yau Natuna 'aiseotogiku 'ana to'aseta wata 'ai'edi egavo nuanuaku, 'waidie Tamaku a na sivemageseni.

<sup>28</sup> 'Omi matatabumi 'wa 'abiawaga wata 'ami vita faifaidi 'wa vevenuafouviga 'wa na maia 'waikuye a na 'ivesafailidi bega yami mia i na ve'atumai. <sup>29</sup> Yaku ve bani'odi 'aifafula. Bega yaku 'aifafulanina 'wa na 'ewai taiadi venuana ta na 'ifafuli. Yau tonuaobu yaku sauluva bikadi bega 'waikuyega 'aseta 'wa na 'ewai wata 'ami vita a na ve'ewalovemi. <sup>30</sup> ☆Yaku ve wata folova a na velemiga bani'odi ta 'aifafula kebu vitanaga.

## 12

*Iesu i ve 'Aiata Veawai faifaina.*

<sup>1</sup> ☆Mulieta tamu 'Aiata Veawai 'waineye, Iesu ma yana tovetutuyamavo i nunagoi bakula 'waineamo, yana tovetutuyamavo i lase bega vuaga i kadidi i 'ani, fai 'akonadi tonibakula i tauyedi. <sup>2</sup> We'e 'ifwaidi Diu totafalolo Falisi i 'isedi Iesu i voneni i vo, Awale? Me Diu yada ve'etoboda yamu tovetutuyamavo i geugeuya vuaga i kadikadi bani'odi

☆ **11:23:** Nag 19:24-28; Iud 1:7 ☆ **11:24:** Mad 10:15 ☆ **11:25:** 1 Kol 1:26-29

☆ **11:27:** Mad 28:18; Ion 1:18, 3:35 ☆ **11:30:** 1 Ion 5:3 ☆ **12:1:** VeL 23:25

folova yada 'Aiata Veawai 'waineye.”<sup>3</sup> ✧ Iesu Falisi yadi vona i tutuli i vo, 'Wa da vo kebu bani'odi Yaubada yana Buki 'wa da lu'iwawaiga, basenadiotoga Kini Devida ma enavo i lase faifaina.<sup>4</sup> I luku Yaubada yana vanuga 'eba velu'ui nageneye, beledi tamu Yaubada 'ana 'anivelena tovelomu i veledi ma enavo i 'ani. De'e wata yada ve'etoboda kebu tamu aitoi 'ana fata beledinina i na 'ania tovelomu 'aisedi faifaide, i 'ania siwe kebu i da sakona fai i lase.<sup>5</sup> ✧ Wata 'wa na nuani veimea i mai Mosese 'wainega, tovelomu i tauyedi i folofolova 'Aiata Veawai 'waineye vanuga 'eba velu'ui nageneye. Mogitana 'Aiata Veawai i geugeuya siwe kebu sakonaga.<sup>6</sup> A na vonemi, yada vanuga 'eba velu'ui nani bwaikina, siwe matamie tamu tomogo i tovofovo bwaikaotogina.<sup>7</sup> ✧ Basenadiotoga i kilumi Yaubada yana Buki 'waineye i vo,

'Aisaya 'wa nikenikedi 'waikuye 'wa vevelomuyedi, siwe kebu nuanuaku.

Nuanuaku tomotoga 'wa na 'isanuakalikaliedi.”

Vona de'e 'ai'edi 'wa da 'asetaga, 'ako kebu yaku tovetu-tuyamavo 'wa da vonediga igodina i da sakona, i lubwaineni 'wa da 'isanuakalikaliedi.<sup>8</sup> Yau a vetomotogaotoga 'Aiata Veawai 'ana Toveimea, 'aku fata 'aiananina 'waineye tomotoga yadi sauluva faifaide a na veimeyedi.”

*Iesu i 'ive'atumai 'Aiata Veawai 'waineye.*

<sup>9</sup> Iesu i vona'a'ava i tauya i nago me Diu yadi 'eba miava'auta 'waineye.<sup>10</sup> 'Eba miava'autanina nageneye tamu tomogo nimana 'okana i miamia. We'e 'ifwaidi tomotoga i maia, igodi nuanuadi Iesu i na lumatani tamu sauluva sakoina faifaina bega i velutolieni i vo, Yada ve'etoboda bani'odi i voneyedi? 'Ai'edi ta na 'ive'atumai yada 'Aiata Veawai 'waineye, i lubwaineni 'alo kebu?”<sup>11</sup> Iesu yadi vona i tutuli i vo, 'Ai'edi aitoi 'waimiega yana 'aisaya i na be'u kulie 'Aiata Veawai 'waineye, 'u na 'ivaiseni 'u na silakai 'alo kebu? Fai, a nuani mogitana bani'odi.<sup>12</sup> Siwe 'aisaya sai'afonani-'avo'avo we'e tomotoga nani bwaikina. Bega yada ve'etoboda siwe tautauyina ta na 'aivaita 'Aiata Veawai 'waineye.”

<sup>13</sup> Mulieta Iesu tomogo i voneni i vo, Nimamu 'u si'otoi.” Tomogonina nimana i sisi'otoiga nika i ve'atumai, nimana vi'ainega bani'odi.<sup>14</sup> Falisi i 'iseni i tauya i nagoi, 'eda'eda i lauala bani'odi i na munega Iesu i na luvewafai.

*Yaubada yana Tofolova vevenua'ivinina.*

<sup>15-16</sup> Tutuyanina Iesu i 'asetai Falisi nuanuadi i na luvewafai bega 'atamananina 'waineye i miamiaga i

'iaweni i tauya i nago mali 'awalaweeye siwe tomotoga fuedi i veyogo'waila, mulineye i nagoi. Toviga matatabudi i 'ive'atumaidi siwe wata i talabodebodedi kebu i na lulu'ivoneyeniga Iesu aitoi. <sup>17</sup> I talabodediga nika Yaubada yana tolu'ivona 'ana wagava Aisea yana vona 'ana mogitana i souyeni. Basenadiotoga Yaubada yana Vona 'ana Venua'ivina faifaina i kilumi i vo,

<sup>18</sup> ✧De'e yaku Tofolova, kumanina a venua'ivinini.

Taunina a nuakalikalienu, faifaina a sosoana.

'Anu'anunuku a na tauyeni i na agei,

Bega yaku veimeea tonovidi i na lu'ivona tomotoga 'aila'a tulina tulina 'waidie.

<sup>19</sup> ✧Kebu i na ve'ikwayekwayega wata kebu i na ve'ita'ata'ala.

Wata 'atamanafouye kebu bonana bwaikina i na noganogai.

<sup>20</sup> Egavo mweadi 'wa da vo 'ayalele 'anino'una kebu i na kiadabadi i na 'ivaisedimo.

Egavo yadi vetumagana mweadi 'wa da vo mageta i da taulovolovogi kebu i na luve'weudi i na 'ivaisedimo.

Yana folova 'waineye i na tokemaiga i na nagoga nika Yaubada yana nuanua tonovidi i na vebwaika tomotoga 'waidie.

<sup>21</sup> Bega tomotoga 'aila'a tulina tulina yadi vetumagana i na yato-vagasedi 'aku Venua'ivina 'waineye i na lulukamaseni.”

### *Falisi Iesu i awavesakoyeni.*

<sup>22</sup> Mulieta tamu tomogo, basenadi yaiaina i agei bega matana i sako wata kebu 'ana fata i na welava, enavo i mieni Iesu 'waineye. Iesu tomogonina i 'ive'atumaia nika i welava wata i 'isa. <sup>23</sup> ✧Tomotoga fuedi i 'iseni nuadi i voganidi i vo, Voke 'asa'aiana kumanina Yaubada 'ana Venua'ivina, Kini Devida tubuna.”

<sup>24</sup> ✧We'e tutuyanina me Diu totafalolo Falisi i nogai, i vona i vo, Seitani,\* taunina yaiaina yadi to'edakumeta Iesu i agei yana toketokena 'wainega i vonavona yaiaina i 'a'awa'a'idi.”

<sup>25</sup> Iesu 'akonadi i 'asetai Falisi yadi nuanua begaidi i vonedi i vo, 'Ai'edi 'eba veimeea 'aise'avadi i na 'idia i na vetalaga 'eba veimeanina i na velovi. Wata 'ai'edi 'atamana 'alo vanuga 'ana tomia 'aise'avadi i na vetalaga, i na yavulaiwagi. <sup>26-27</sup> 'Wa vonaga yau Seitani yana toketokena 'wainega a vona tamu yana tomotoga i 'awa'a'ia. 'Ai'edi mogitana a da folofolova Seitani yana toketokena 'wainega, 'wa da 'asetai Seitani yana 'aila'a 'aise'avadi i 'idia i vevetalaga bola i na 'a'ava. We'e

✧ **12:18:** Ais 42:1-4; Mad 3:17 ✧ **12:19:** 2 Tim 2:24 ✧ **12:23:** Ion 7:31

✧ **12:24:** Mad 9:34 \* **12:24:** 'Ana mogitana Bielisisabi, Seitani tamu 'ana wagava.

'ifwaidi yami tomotoga i vonavona yaiaina i 'a'awa'a'idi, nika 'wa velutoliedi ava'aiega yadi toketokena i veluagadi. Bola i na vo, Kebu Seitani 'wainega," nika 'wa na 'asetai 'omi 'wa vekali. <sup>28</sup> ✧ We'e mogitana Yaubada 'Anu'anununa yana toketokena 'wainega yaiaina a vonevoned i 'a'awa'a'idi, 'wa 'iseniga 'wa da 'asetai 'akonadi Yaubada yana veimea i mai 'waimie."

<sup>29</sup> ✧ Wata Iesu i vona-awatabai 'waidie i vo, Kebu tamu aitoi 'ana fata i na luku tamu tomogo toketokena yana vanuge i na vainago. We'e 'ai'edi nuanuana vainago nagami tomogonina i na 'iyogoyogoni, mulieta i na vainago.

<sup>30</sup> 'Ai'edi aitoi kebu taiadi 'a na folofolovaga, taunina 'aku gavia, we'e 'ai'edi aitoi kebu i na 'ivaiseku bega tomotoga i na vagavaidi i na mimaiedi 'waikuye, 'wa da vo tomotoga i da sogisogiedi, taunina yaku folova 'ana to'ivesako.

<sup>31</sup> ✧ Begaidi a na vonemi, tomotoga i sakosakonaga wata i vona-awadamana Yaubada 'waineye 'adi fata nuatavuna i na veluagai. We'e egavo i na vona-awadamana 'Anu'anunu 'Atumaina 'waineye, kebu tamu sai'afo Yaubada i na nuatavunidi. <sup>32</sup> 'Ai'edi aitoi yau a vetomotogaotoga i na awavesakoyekuga, 'ana fata nuatavuna i na veluagai, we'e 'ai'edi aitoi 'Anu'anunu 'Atumaina i na awavesakoyeniga kebu tamu sai'afo Yaubada i na nuatavuniga, i na 'eno-vagata.

<sup>33</sup> Wata bani'odi 'ai'edi welavi 'atumaina tutuya fuedi vuagina 'atumaina, we'e welavi sakoina tutuya fuedi vuagina sakoina. Welavi 'aitamogana 'aitamogana vuagidiega ta na 'asetadi ava'ai welaviga, wata bani'odi tomotoga yadi sauluva ta na 'isedi ta na 'asetadi tomotoga 'atumaidi 'alo sakoidi. <sup>34</sup> ✧ Omi 'o'olo sakoimi, kebu 'ami fata nani 'atumaidi 'wa na 'inanadi. Vonanidi sakoidi 'wa 'inanadiga fai nuamie i 'eno'enovi. <sup>35</sup> Tomogonina nuanua 'atumaidi 'waineye i 'eno'enoviga, taunina tomogo 'atumaina, we'e tomogonina nuanua sakoidi 'waineye i 'eno'enoviga taunina tomogo sakoina."

<sup>36</sup> Wata a na vonemi, 'Ai'atanina 'waineye tomotoga matatabumi 'wa na vonayavuga Yaubada mataneye, yami vona-'avo'avovo 'aitamogana 'aitamogana 'wa na lu'ivoneyedi. <sup>37</sup> 'Ai'edi yami vona tonovidi i na awave'atumaie, 'ai'edi yami vona vekali Yaubada i na veimea vematavuloga 'wa na veluagai.

*Iesu yana veimea ma 'ana 'eba 'isa.*

<sup>38</sup> ✧ Mulieta 'ifwaidi ve'etoboda 'adi tove wata totafalolo Falisi Iesu i voneni i vo, Tove, nuanuama tamu 'eba nuavogana

wata 'eba nua'ewa 'u na 'idewai, 'a na 'iseni 'a na 'asetamu 'omu ma yamu veimea Yaubada 'wainega 'alo kebu.”<sup>39</sup> Iesu i vonedi i vo, 'Omi tutuya de'e 'ana tomotoga yami sauluva sakoidi wata kebu nuanuami Yaubada yana nuanua. 'Wa vonavona nuanuami 'eba nuavogana wata 'eba nua'ewa a na 'idewai siwe a nuani kebu tamu a na 'idewaiga.<sup>40</sup> ✧ Siwe tamu nani a na veifufuyeni yami 'eba 'isa. Basenadiotoga Yaubada yana tolu'ivona 'ana wagava Iona igodi i da dega Yaubada 'wainega nika tamu igana bwaikina i tononi bega kamoneye i miamia 'aiata wata lovana 'aitonu. Wata bani'odi yau a vetomotogaotoga 'awaie a na miamia fwayafwaya nageneye mulieta 'aiata 'ana vetonu 'waineye a na tovoi, 'asa'aiana kumanina yami 'eba 'isa. Tutuyanina igana Iona i 'alaiwageni i nago me Ninive 'waidie i lau'age, nika i nuaviladi yadi sakona 'waidiega.<sup>41</sup> ✧ We'e Vonayavuga 'ana 'Aiata 'waineye me Ninivenidi taiadi 'wa na tovoi Yaubada mataneye i na matawa'ulimi i na vo, Basenadi Iona i lau'age 'waimeye 'a nuavilama we'e 'omi kebu nuanuami.” Wata Iesu i vo, A na vonemi, Iona tomogo bwaikina we'e tomogonina matamie i tovtovoi bwaikaotogina.<sup>42</sup> ✧ Wata bani'odi basenadiotoga me Siba yadi toveimea bwaikina Kwini† Siba 'ani'ieyega i mai Kini Solomoni yana 'aseta 'ana 'isa faifaina. Bega Vonayavuga 'ana 'Aiata 'waineye kwininina taiadi 'wa na tovoi Yaubada mataneye i na matawa'ulimi i na vo, Basenadi 'ani'ieyega a mai 'aseta 'ana 'isa faifaina wata a 'ewai, we'e 'omi kebu nuanuami 'wa na 'asetai bega 'wa na nuavilami.” Wata Iesu i vo, A na vonemi Kini Solomoni tomogo bwaikina we'e tomogonina matamie i tovtovoi bwaikaotogina siwe 'wa baila, kebu nuanuami 'wa na 'asetai.”

*Yaiaina yana 'eba mia 'ana lauvai faifaina.*

43-44 Wata Iesu i vonedi vona-awatabaiega i vo. 'Ai'edi yaiaina i na 'awa'a'ia tamu tomogo 'wainega i na nago 'awalawa sakoineye bei i na lalauala-vuvua tamu yana 'eba mia. We'e 'ai'edi kebu i na veluugaiga i na vo, A na vilaku yaku 'eba mianina basenadi a 'iaweniga 'waineye.” Bega i na vilai, i na mai 'eba mianina i na 'iseni 'akonadi i 'idewai 'atumaina wata vunavunagina i 'eno'eno, siwe nage'avana.†<sup>45</sup> ✧ Fai kebu 'ana veluvaiga i na souyeni i na nago wata yaiaina sakoiotogidi 7 i na vagavaidi i na miedi i na luku 'eba miananina 'waineye. Tomotoganina i na 'ivesakotogi mogitana, basenadi kebu bani'odiga. 'Omi tutuya de'e 'ana tomotoga wata bani'odi,

✧ 12:40: Ioa 1:17 ✧ 12:41: Ioa 3:5 ✧ 12:42: 1 Kin 10:1-10 † 12:42: 'Ana mogitana, Kwini i mai bolimanayega. † 12:43-44: 'Anu'anunu 'Atumaina kebu tomogonina i da agei. ✧ 12:45: 2 Fit 2:20

'wa vo, 'A na nuavilama yama sakona 'waidiega," siwe 'awaie 'wa na sakotoga."

*Iesu inana wata tainavo i maia 'waineye.*

<sup>46</sup> ✧ Iesu bola i veveifufu tomotoga 'waidie nika inana tainavo taiadi i le'wai. Tanotanoge i tovoi i vo, 'Ima nuanuama 'a na veifufu Iesu 'waineye." <sup>47</sup> Tamu tomogo i nago Iesu 'waineye i voneni i vo, Inamu taimwavo taiadi sino'o, nuanuadi taiadi 'wa na veifufu." <sup>48-49</sup> Iesu tomotoga i vonedi i vo, 'Wa vonaga 'wa vo, Inamu wata taimwavo sino'o," siwe a na vonemi. Side, yaku tovetutuyamavo, taunidi inaku, wata taikwavo. <sup>50</sup> ✧ Aitoi Tamaku abame yana nuania 'ana todumwebika, taunina taiku, novuku, 'alo inaku."

## 13

*Luyavuyavulagi 'ana vona-awatabai.*

<sup>1</sup> Mulieta 'aiananina 'waineye Iesu vanuga i 'iaweni i nago balebaleye, bei i miabui i na ve. <sup>2</sup> 'Aila'a bwaikina i maia i tovififineni begaidi wakayega i talalaka we'e tomotoga lelege i tovoi. <sup>3</sup> Nani fuedi faifaidi i ve 'waidie vona-awatabaiega, i vo,

Tamu tomogo i nago bakule yana witi\* waifeidi i na baku-lidi, we'e yadi sauluva luyavuyavulagi. <sup>4</sup> Yana luyavuyavulagi 'waineye witi 'ifwaidi i ve'anita'idi 'eda balebaleye tomotoga yadi 'eba nago 'waineye, mulieta manuga i mai i 'anidi. <sup>5-6</sup> 'Ifwaidi i ve'anita'idi bwakebwakeye, nagami i tabo-matayo'o fai fwayafwaya kebu badubadunaga siwe mulieta inala i kabu i 'awagi'adi fai 'walamidi kebu i da vagaobuga. <sup>7</sup> 'Ifwaidi i ve'anita'idi 'awanavenaveye kebu 'adi 'oiga, i ugawegawedi. <sup>8</sup> We'e 'ifwaidi i ve'anita'idi inageye fwayafwaya 'atumaina 'waineye i tabo i vuaga, 'ifwaidi 100, 'ifwaidi 60 wata 'ifwaidi 30." <sup>9</sup> Wata Iesu i vo, 'Akonadi yaku vona 'wa nogai, siwe 'wa na vena'ivinini nika 'wa na 'asetai."

*Vona-awatabai lamuna.*

<sup>10</sup> Mulieta Iesu yana tovetutuyamavo i maia 'waineye i velutolieni i vo, Awale 'u veve tomotoga 'waidie vona-awatabaiega?" <sup>11</sup> ✧ Bega Iesu i vonedi i vo, 'Akonadi Yaubada i tauyemi nani fuedi givagivadi 'wa 'asetadi yana veimea tomotoga 'waidie faifaina, we'e de'e tomotoganidi kebu. <sup>12</sup> ✧ 'Ai'edi aitoi sai'afo ma yana 'asetai Yaubada yana veimea tomotoga 'waidie faifaina, bega 'asetanina i na 'i'isave'aviniga, 'imoso'i Yaubada i na veleni nika yana 'asetai

✧ 12:46: Mad 13:55 ✧ 12:50: Ion 15:14 \* 13:3: 'Ana 'isa'isa bani'odi laisi.

✧ 13:11: 1 Kol 2:10 ✧ 13:12: Mad 25:29; Luk 8:18

bwaikina. We'e aitoi kebu tamu yana 'asetaga siwe igodi i vo, Yau yaku 'aseta bwaikina," 'asetanina Yaubada i na eloi. <sup>13</sup> Tomotoganidi i 'ise'iseni siwe kebu i da 'isa'inanaiga, wata i noganogai siwe kebu i da nogayadewai 'alo i da 'asetai begaidi a veve 'waidie vona-awatabaiega. <sup>14-15</sup> ✧Nika base-nadiotoga Yaubada yana tolu'ivona 'ana wagava Aisea yana vona-vagata 'ana mogitana i souyeni, Yaubada i vo,

Tomotoga de'e nuadi tabodadi,

Tanigadi i 'ibodadi

Bega kebu i na nogai.

Matadi i 'uludi

Bega kebu i na 'iseni.

'Ai'edi nuadi i da magetaiga

I da nuaviladi 'waikuye

A da 'ive'atumaidi.

Begaidi i na nogaya-wayoga, kebu nuadi i na magetadi.

Wata i na 'isa-wayoga siwe kebu i na 'isa'inanaiga."

<sup>16</sup> Aisea yana vonanina tomotoganidi faifaiddi, we'e 'omi 'eba sosoana 'waimie fai taunimi matamiega 'wa 'ise'iseni wata taunimi tanigamiega 'wa noganogai. <sup>17</sup> ✧A vona mogitana 'waimie basenadiotoga Yaubada yana tolu'ivonavo fuedi wata tomotoganidi yadi sauluva tonovidi, nuanuadi bwaikina yaku folovanidi 'wa 'ise'isediga i da 'isedi wata yaku ve 'wa noganogaiga i da nogai, siwe kebu."

*Vona-awatabainina Iesu i kiavemagetai.*

<sup>18</sup> Wata Iesu yana tovetutuyamavo i vonedi i vo, A na vonemi, luyavuyavulagi 'ana vona-awatabai 'ana kiavemageta side bani'odi. <sup>19</sup> Waifei i ve'anita'idi 'eda balebal-eye 'ana nuanua, bani'odi tomotoga vona i nogai Yaubada i na veimeyedaga faifaina, siwe kebu i da 'asetai. Bega Seitani, taunina Tosakona i mai tolau'age i bakuli i nuanuaniga i elodi. <sup>20</sup> Waifei i ve'anita'idi bwakebwakeye 'ana nuanua, bani'odi tomotoga ma yadi sosoana Yaubada yana Vona i nogai siwe yadi nuanua 'waidie kebu mogitana i da lukuga. <sup>21</sup> ✧I vetumagana siwe tutuya 'ale'usana. Tutuyanina vita 'alo ve'isakololo i na souyedi Vonanina faifaina i na baila-matayo'oyeni. <sup>22</sup> ✧Waifei i ve'anita'idi gawe'ye 'ana nuanua, bani'odi tomotoga Yaubada yana Vona i nogai siwe yadi mia faifaiddi i vevenuafouviga wata 'ai'aiwabu 'adi nuanua 'waidie bwaikina 'wa da vo i da ugawegawedi kebu i da vuaga. <sup>23</sup> We'e waifei i ve'anita'idi inageye fwayafwaya 'atumaina 'waineye 'ana nuanua, bani'odi tomotoga Yaubada yana Vona i nogai wata i 'asetai mulieta yadi folova Yaubada

✧ 13:14-15: Ais 6:9-10; Ion 12:40 ✧ 13:17: 1 Fit 1:10-12 ✧ 13:21: Kolos 2:7

✧ 13:22: Luk 12:16-21; 1 Tim 6:9-10



faifaina bani'odi i vuaga, 'ifwaidi 100, 'ifwaidi 60, wata 'ifwaidi 30.”

*'Atumaidi wata sakoidi taiadi i tabowanawana.*

<sup>24</sup> Wata Iesu i ve tomotoga 'waidie tamu vona-awatabai 'wainega tomotoga 'atumaidi wata sakoidi faifaidi i vo, Yaubada yana veimea tomotoga 'waidie side bani'odi. Tamu tomogo witi waifeidi 'atumaidi i bakulidi. <sup>25</sup> Tamu lovana, tomotoga matatabudi i 'eno'enovi 'ana gavia i mai matagawagawa, witi 'ana 'isa'isa i luyavuyavuleni nika i tauya.

<sup>26-27</sup> Tutuyanina witi i vebwaika i adaga matagawagawa i vemageta bega tonibakulanina yana tofolovavo i 'iseni i mai i voneni i vo, 'Auvea, nagami waifei 'atumaidi ta bakulidi we'e tamu gawa ava'aiega i mai?” <sup>28</sup> Tomogo i vo, Tamu 'aku gavia i 'idewai.” Bega yana tofolovavo i velutolieni i vo, Bani'odi yamu nuanua, 'a na luabuabudi?” <sup>29</sup> Yadi 'auvea i vo, 'Asa'aiana, 'ai'edi 'wa na luabuabudiga, bola witiotoga 'wa na siabuyedi. <sup>30</sup> \*'Wa bailedi, i na tabowanawana, bola 'aiala 'ana tutuye to'aiala a na vonedi a na vo, Nagami matagawagawa 'wa na luabuabudi 'wa na 'itavidi 'wa na tawedi 'aie i na 'alaidi, we'e witiotoga 'wa na vedodogidi yaku bubuwakeye.”

*Yaubada yana veimea tomotoga 'waidie yana vebwaika 'ana vona-awatabai.*

<sup>31</sup> Wata Iesu i ve 'waidie vona-awatabaiega i vo, Yaubada yana veimea tomotoga 'waidie yana vebwaika side bani'odi. Tamu tomogo 'ayawana bilana i 'ewai i bakuli mulieta i vebwaika. <sup>32</sup> Bilanina saiotogina siwe tutuyanina i vebwaika welavi bwaikaotogina bega manuga i mimai didineye i vevegiuva.”

*Yaubada yana veimea tomotoga 'waidie yana susula 'ana vona-awatabai.*

<sup>33</sup> Wata Iesu i ve 'waidie vona-awatabaiega i vo, Yaubada yana veimea tomotoga 'waidie yana susula side bani'odi. Tamu vavine falawa bwaikina i vilai mulieta isita i yatoi, i susula falawa matatabuna 'waineye nika i vebwaika.”

*Awale Iesu vona-awatabaiega i ve.*

<sup>34</sup> Tutuya fuedi Iesu i veve tomotoga 'waidie vona-awatabaiega, kebu tamu tutuya i da vonaotoga. <sup>35</sup> \*De'e bani'odi i vevega nika tamu Yaubada yana tolu'ivona yana vona 'ana mogitana i souyeni. Basenadiotoga i vona-vagata Yaubada 'ana Venua'ivina yana vona faifaina i vo,

Vona-awatabaiega a na veifufu 'waidie.

Nani fuedi givagivadi fwayafwaya 'ana 'idewavau 'wainega

i maiga 'asiau, a na lu'ivoneyedi 'waidie.”

*Matagawagawa 'ana vona-awatabai Iesu i kiavemagetai.*

<sup>36</sup> Yana ve i 'a'avana, Iesu 'aila'a i 'iawedi i nago vanuge. Mulieta yana tovetutuyamavo i maia i luku 'waineye i voneni i vo, Nuanuama 'a na 'asetai matagawagawa i taboga bakule 'ana nuanua.”

<sup>37-38</sup> ✧ Iesu i vo, Tomogonina waifei 'atumaidi i bakulidiga 'ana 'asetai yau, kumaniku a vetomotogaotoga. We'e tanoga, fwayafwaya matatabuna. Waifei 'atumaidi 'adi 'asetai tomotoganidi 'akonadi taunidi i tauyedi Yaubada 'waineye i veveimeyedi, we'e matagawagawa, tomotoganidi Yaubada i baila bega Seitani i veveimeyedi. <sup>39</sup> Tomogonina matagawagawa 'ana toluyavuyavulagi taunina Seitani, tutuya 'aiala 'ana 'asetai Vonayavuga 'ana tutuya, we'e to'aiala taunidi anelose.

<sup>40-41</sup> ✧ Matagawagawa i luabuabudiga i tunudi i 'alaidiga 'ana 'asetai side bani'odi. Fwayafwaya 'ana 'eba ve'a'ava 'waineye, yau a vetomotogaotoga yaku anelose a na vetunedi, tovetalaimimila wata 'ifwaidi tosakona i na va'augidi i na nawedi 'ai-'ala'alase bega kebu wata i na miamia Yaubada mataneyeye. <sup>42</sup> I na nawediga i na tawedi, bei i na 'we'we'wela wata maigidi i na yuyuyudi fai veviga bwaikina. <sup>43</sup> ✧ We'e mulieta Yaubada yana tomotoga yadi sauluva tonovidi Tamadi yana 'Eba Veimea nageneye 'adi 'isa magemage-tadi, 'wa da vo inala i da vulaoga.

'Akonadi yaku vona 'wa nogai, siwe 'wa na venua'ivineni nika 'wa na 'asetai.”

*Yaubada yana veimea tomotoga 'waidie 'ana 'atumaina 'adi vona-awatabai.*

<sup>44</sup> Wata Iesu i ve 'waidie i vo, Yaubada yana veimea tomotoga 'waidie 'ana 'atumaina side bani'odi. Basenadi tamu aitoi mani wata 'ai'aiwabu bwaikina i tavuni fwayefwayeye i 'eno'eno. Mulieta tamu tomogo i veluagai, i 'isenina wata i tavu-vaitugani. I sosoana bwaikina, i nago yana kukua matatabuna i vekimwaneyedi tutulidi i 'ewadi fwayafwayanina i kimwanei bega yana fwayafwaya fai 'ana 'atumaina nageneye i 'eno'eno.”

<sup>45</sup> Wata Iesu i vo, Egavo taunidi i tauyedi bega Yaubada i na veveimeyedi yadi sauluva side bani'odi. Tamu tomotoga i lalauala nuanuana mwali bwaikina wata 'atumaiotogina. <sup>46</sup> I na veluagaiga yana kukua matatabuna i na 'anivelenedi bega mwalinina i na tuveobuya.”

*Tutuya 'eba ve'a'ava 'ana vona-awatabai.*

47-48 Wata Iesu i ve 'waidie vona-awatabaiega i vo, Yaubada yana veimea tomotoga 'waidie tutuya 'eba ve'a'ava faifaina side bani'odi. Tovuata igana tulina tulina i 'onadi, tutuyanina yadi vuata i adaga i yo'ei 'avale bei i lauvisi igana 'atumaidi yadi venuane i obu, sakoidi i tawedi. 49-50 Wata bani'odi, bola tutuya 'eba ve'a'ava 'waineye, anelose i na nagoi tomotoga sakoidi i na va'augidi tomotoga 'atumaidi 'awasasadiega i na tawedi 'ai-'ala'alase, bei i na 'we'we'wela wata maigidi i na yuyuyudi fai veviga bwaikina.”

51 Tutuyanina Iesu yana ve i 'a'avana, yana tovetutuya-mavo i velutoliedi i vo, De'e vona-awatabainidi matatabuna 'wa 'asetadi 'alo kebu?” I vo, E'e 'a 'asetadi.” 52 Bega Iesu i vo, 'Ai'edi aitoi ve'etoboda i maia Mosese 'wainega i 'asetadiga, wata taunina i tauyeni bega Yaubada i veveimeyeni, taunina bani'odi tomogo 'ai'aiwabuna. Fai Yaubada yana Vona tuatua-aidi wata yaku ve 'ivaudi i 'asetadi, 'ana fata mali tomotoga i na veve 'waidie.”

### *Me Nasaledi kebu nuanuadi Iesu.*

53-54 ✧ Iesu i vevega vona-awatabaiega i 'a'avana, i tauya i nago taunina yana 'atamane Nasaledi. Bei i ve tomotoga 'waidie yadi 'eba miava'auta nageneye siwe nuadi i voganidi yana ve faifaina. I vo, Ava'ai tomotoga de'e? Ava'aiega yana 'asetadi i 'ewai, bani'odi i munega 'eba nuavogana wata 'eba nua'ewa i 'i'idewadi?” 55-56 ✧ Tomogo no'o kebu tuli-naga, tamana kamuda, inana Meli wata tainavo ta 'asetadi, Iemesa, Iosefa, Saimoni wata Iudasa, wata novunavo taiadi ta miamiani. We'e yana 'asetanidi wata yana toketokenanina ava'aiega i veluagadi?” 57 I bavuyeni begaidi kebu nuanuadi Iesu i baila. Bega Iesu i vonedi i vo, Yaubada yana tolu'ivonavo ma 'adi ve'ililibu tomotoga tulidi 'waidie, we'e yadi 'atamana tomotogidi wata yadi 'aila'a kebu i da ve'ililibuyediga.” 58 Fai kebu i da vetumagana 'waineye, begaidi kebu bei 'eba nuavogana wata 'eba nua'ewa fuedi i da 'idewadiga.

## 14

### *Ioni Tobafitaiso yana wafa.*

1-2 Tutuyanina 'waineye, Loma gabemani yadi to'edakumeta 'ana wagava Kini Elodi 'awalawa Galili nageneye i veveimea. Iesu yana folova toketokena valana Elodi i nogai yana tofolovavo 'ifwaidi i vonedi i vo, No'o Iesu, 'asa'aiana mogitana taunina Ioni Tobafitaiso, ma yana toketokena i yawasa-vaitugana i ve-Iesu, begaidi 'eba nuavogana wata 'eba nua'ewa i 'i'idewadi.

<sup>3</sup> Elodi bani'odi i voneyediga fai yana veimea 'wainega Ioninina i yogoni i yatoi vanuga 'eba yogona 'waineye. We'e Elodi basenadi taina Filifi tamu vavine i nagidi 'adi wagava Elodiasa mulieta Elodi i luobuyedi. <sup>4</sup> Ioni Tobafitaiso vala i nogai bega tutuya fuedi i lulumatana-vebogia i vo, Awale taimu yana vavine 'u nagidi, yada ve'etoboda 'u geuya.” <sup>5</sup> Ioni yana vonanina faifaina Elodi i veimea vanuga 'eba yogona 'waineye i luku, nuanuana i na wafa siwe me Diu i kololoyedi fai i vo, Taunina tamu Yaubada yana tolu'ivona.”

<sup>6-7</sup> We'e Elodi yana tubuga 'ana 'aiata 'waineye sakali bwaikina i 'idewai, Elodiasa natudi i voneni matadie i kayama. Elodi i 'iseni nuana i 'ewai bega i vona'awaufaufa 'waineye i vo, 'Ai'edi ava'ai nuanuamu 'u na velu'uiga, vona mogitana a na velemu.” <sup>8</sup> Inana i nogai natudi i tolivetovoni bega vavinenina ne'e'elina i nago Elodi 'waineye i vo, Nuanuaku Ioni Tobafitaiso i na wafa, 'unu'ununa 'aivoeye 'u na dodogi 'u na mieni 'waikuye, a na 'iseni a na 'asetai 'akonadi i wafa.” <sup>9</sup> Kini Elodi i nogai nuana i vita siwe kebu 'ana fata yana vona'awaufaufa i na lugeuya fai 'ana wakawaka matadie i vona, bega yana tolugaviavo i vonedi i nagoi Elodi yana nuana i 'idewai. <sup>10-11</sup> Vanuga 'eba yogona 'waineye Ioni 'odona i boboi, 'aivoeye i dodogi i mieni vavine i veleni. I 'ewai i nago inana i veledi. <sup>12</sup> Tutuyanina Ioni yana tovetutuyamavo vala i nogai, i maia tomogo'avana i 'ewai i ve'ufai, mulieta i nagoi Iesu i voneni.

*Iesu tomotoga 5000 i ve'anidi.*

<sup>13</sup> Tutuyanina Iesu i 'asetai Ioni 'akonadi i wafa, bega 'atamananina i 'iaweni i dodoga 'aiseneye i nago kebu tamu aitoi bei i da miamiaga 'waineye. Tomotoga yana tauya i 'asetai bega yadi 'atamana i 'iawedi i veyogo'waila i nagoi 'agediamo. <sup>14</sup> ✧ Tutuyanina Iesu i le'wa balebaleye tomotoganidi i 'isedi 'aila'a bwaikina i miamiani, nuana i vita bwaikina faifaidi bega yadi toviga i 'ive'atumaidi.

<sup>15</sup> 'Akonadi lavilavi sai'afoga i na sidudubali tovetutuyamavo i maia Iesu 'waineye i voneni i vo, 'Akonadi tutuya i ve'ale'usa wata de'e bei kebu tomotoginaga, bega 'aila'anidi 'u na vonedi i na nagoi 'atamana 'waidie taunidi 'adi'adi i na kimwane.” <sup>16</sup> Iesu i vonedi i vo, 'Asa'aiana i na miamiani, siwe 'omi 'ai'edi ava'ai 'wa na veledi i na 'ani.” <sup>17</sup> Tovevutuyamavo i vo, 'Waimeye 'ani'ani mwadodoudi 5 wata igana 'ailuga, 'asa'aiana bani'odi, kebu fuediga.” <sup>18</sup> Iesu i vo, 'Wa miedi 'waikuye.”

<sup>19</sup> Tomotoga i vonedi mosomoso tabwadie i miabui, mulieta Iesu 'ani'aninidi i 'ewadi, i 'isalaka abame i

vekaiwa Yaubada 'waineye. I vekaiwa i 'a'avana, 'ani'ani i 'ivividi tovetutuyamavo i veledi bega tomotoga i veutadi.<sup>20</sup> 'Aila'anidi matatabudi i 'ani, kamodi i aidi, mulieta tovetutuyamavo tomotoga nikilidi i va'augidi bayawa 12 i veadagidi.<sup>21</sup> ✧To'aninidi iaveta tulai'avadi i lu'iawawadi 'adi 'aila'a 5000, we'e vevine tulaidi wata yavayavava matatabudi kebu taiadi i da lu'iawawadiga.

*Iesu ufa tabwaneamo i nago.*

<sup>22</sup> Tomotoga i ve'anidi i 'a'avana, yana tovetutuyamavo i vonedi i vo, 'Wa na dodoga wakeye, ta na viwaia lavu vi'ainega, yau tomotoga a na vonedi i na nunagoi mulieta yau a na vemuli.<sup>23-24</sup> ✧Tomotoga i tauya i nunagoi, Iesu i laka 'oyeye, 'aiseneye i na velu'ui. 'Akonadi i laviotogi Iesu 'aiseotogina bei i miamia, we'e yana tovetutuyamavo i yogokamwana lavunina bwaikina 'waineye, kaukau bwaikina i nunuga wata yagina i veveviladi.

<sup>25</sup> Sai'afoga tutuya i na kililia, Iesu i le'wa 'waidie, ufa tabwaneamo i mai.<sup>26</sup> ✧Tutuyanina yana tovetutuyamavo i 'iseni ufa tabwaneamo i mimai i kololoyeni i bwau i vo, 'Wa 'isanaweni, yalua.”<sup>27</sup> Nika Iesu i vonedi i vo, Kebu 'wa na kolologa, yau taunida.”<sup>28</sup> Fita i vona-matayo'o i vo, Vetuma 'omu'e, 'u da vona ufa tabwaneamo a da wai 'waimuye.”<sup>29-30</sup> Bega Iesu i vo, 'U mai.” Yana voneye Fita i obu i nunago Iesu 'waineye nika i 'isadaba kaukau wata yagina i 'isedi i kololo igodi be'ama i monumonu i bwau i vo, 'Auvea, 'u da 'ita'ita'ieku.”<sup>31</sup> Iesu nimana i 'otoi Fita i 'ive'avini i voneni i vo, Awale 'u venuanaluga, yamu vetumagana 'waikuye siaina.”<sup>32</sup> I silakai i 'a'avana 'adi 'ailuga i dodoga, nika yagina i 'awatagoni.<sup>33</sup> ✧Yana tovetutuyamavo i 'iseni i subiai i vo, Vona mogitana, 'omu Yaubada Natuna.”

*Iesu toviga i 'ive'atumaidi 'atamana Genesaleta.*

<sup>34</sup> I duduna Genesaleta balebaleye bei yadi waka i yo'ei.<sup>35</sup> Tomotoga Iesu i 'isa'inanai bega vala i vetunedi 'awalawanina matatabuna 'waidie bega toviga i miedi Iesu 'waineye.<sup>36</sup> ✧I velu'ui 'waineye, nuanuadi tovigani i na 'abitonovidi, we'e 'ai'edi kebu, 'ana kaleko mataifwa'avana i na 'abitonovi. Egavo i 'abitonovaga matatabudi i ve'atumai.

## 15

*Me Diu tubudiavo yadi ve faifaina.*

<sup>1-2</sup> Mulieta 'ifwaidi me Diu totafalolo Falisi wata ve'etoboda 'adi tovevo i maia Ielusalemega Iesu i velutolieni i vo,

✧ 14:21: Mad 15:38 ✧ 14:23-24: Luk 6:12, 9:28 ✧ 14:26: Luk 24:36-37

✧ 14:33: Mad 27:54 ✧ 14:36: Mad 9:20-21

Ve'etobodanidi i maiga tubudavo 'waidiega, awale yamu tovetutuyamavo kebu i da ve'ililibuyediga i geugeudi? 'Ani 'ana tutuye kebu nimadi i da lekoa-dewadi we'e i lulu-'avo'avovo." De'e bani'odi i voneyediga fai yadi nuanua i vo, 'Ai'edi nimada ta na lekoa-dewadi wata ta na tafalolo, Yaubada i na 'asetada yada nuanua vunavunagidi." <sup>3</sup> Iesu yadi velutoli i tutuli i vo, Siwe 'omi wata awale Yaubada yana veimea kebu 'wa da ve'ililibuyediga 'wa geugeudi we'e taunimi yami nuanua 'waidie 'wa vematayakayaka. <sup>4</sup> \*Yaubada i vonaga i vo, Tamamu wata inamu 'u na ve'ililibuyedi," wata i vo, 'Ai'edi aitoi tamana 'alo inana i na awavesakoyediga i lubwaineni 'wa na luvewafai." <sup>5-6</sup> Veimeanidi 'wa geugeudi fai 'wa veve 'wa vo, 'Ai'edi aitoi ma yana mani, siwe kebu nu-anuana tamana wata inana i na 'ivaisediga, 'omi 'wa tauyeni bega i na vonedimo i na vo, Mani de'e a na 'aniveleneni Yaubada faifaina," vonanina 'wa fali'atumaieni. We'e mogitana i lubwaineni tamana wata inana maninina 'wainega i da 'ivaisedi. De'e bani'odi Yaubada yana Vona 'wa lulu-'avo'avovoi, ma'itufa yami nuanua 'wa vevematayakeyakedi. <sup>7</sup> \*'Omi mogitana tovekali. 'Awami i tatalaboda nani fuedi faifaidi siwe wata 'wa 'i'idewadi. Basenadiotoga Yaubada yana tolu'ivona Aisea, Yaubada yana Vona 'wainega i vonavagata faifaimi. I vonaga mogitana i vo,

<sup>8</sup> De'e 'aila'anidi 'awakebuladiega i ve'ililibuyeku,  
We'e kebu mogitana i da nuakalikalieku.

<sup>9</sup> Fai tomotoga yadi nuanua i veve i vo 'ako, Yaubada 'wainega,"  
Begaidi 'waikuye i 'o'odu-maimaiga."

*Naninidi tomotoga i na 'ivesakodi.*

<sup>10</sup> Iesu 'aila'a i goledi i nagoi 'waineye i vonedi i vo, A na vonemiga 'wa na vena'ivineni nika 'wa na 'asetai. <sup>11</sup> \*Falisi nuanuadi nima-'ilekoa siwe ava'ai i na luku tomotoga 'awadiamo kebu 'ana fata tomotoganidi i na 'iveyokedi, we'e mogitana vona 'alo nuanua sakoidi tomotoga 'waidiega i na souyediga, 'ana fata tomotoga i na 'iveyokedi."

<sup>12</sup> Mulieta Iesu yana tovetutuyamavo i maia i voneni i vo, Yamu vona 'wainega Falisi i kamogala, 'u 'asetai?" <sup>13</sup> Iesu i vonedi i vo, Welavinidi Tamaku abame kebu 'ana bakubakulaga, matatabuna i na siabudi. <sup>14</sup> \*Falisinidi kebu faifaidi 'wa na nuanua. Avinodi taunidi tomotoga 'ada to'edakumeta, siwe bani'odi tomatasako fai Yaubada yana Vona kebu i da 'isa'inanadiga. Kebu 'ana fata tamu tomatasako iana

tomatasako i na siveikani fai bola 'adi 'ailuga i na be'uluga vakavakale.”

<sup>15</sup> Fita i voneni i vo, Nuanuaku vona-awatabainina 'u da kiavemagetai 'waimeye.” <sup>16</sup> Iesu i vo, 'Alo 'omi wata bola 'wa bavubavu? <sup>17</sup> I lubwainemi 'wa da 'asetai naninidi i na luku tomotoga 'awadiamo i na nago kamodie mulieta i na wala'aieni. <sup>18</sup> We'e naninidi sakoidi 'awadiega i na souyediga, 'ana fata tomotoga i na 'iveyokedi Yaubada mataneye, fai yadi nuanua 'waidiega i mai.

<sup>19</sup> ✧ I na 'iveyokediga fai nuanuananidi i na 'ivesakodi nika luwewafa, lauobu, ve'avula-'avo'avovo, vainago, vekali, ve-bonaivo. <sup>20</sup> Side naninidi 'ana fata tomotoga i na 'iveyokedi Yaubada mataneye, we'e 'ai'edi 'wa na 'ani, siwe kebu nagami nimami 'wa na lekoa-dewadiga Falisi yadi nuanua bani'odi, kebu 'ana fata i na 'iveyokemiga.”

### *Vavine yadi vetumagana.*

<sup>21</sup> Mulieta Iesu ma enavo bei i miamiaga i 'iaweni, i nagoi tamu 'awalawa 'waineye, 'atamana Taia wata Saidoni lili-vadie. <sup>22</sup> I miamiani nika tamu vavine Keinana i le'wa, vavinenidi 'awalawanina 'waineye i miamia. Taunidi kebu vavine Diu siwe i mai i toke i velu'ui Iesu 'waineye i vo, 'Auvea, 'omu Yaubada 'ana Venua'ivina, Kini Devida tubuna 'u da 'isanuakalikaliema. Natuku vevinena yaiaina i agei bega i veveviga bwaikina.” <sup>23</sup> Siwe kebu tamu ava'ai Iesu i da voneyeni 'waidie. Mulieta yana tovetutuyamavo i maia 'waineye i lukakadeni i vo, 'U veugeugedi, mulideye i mimai i vevetaniga-logilogi.”

<sup>24</sup> Tovetutuyamavo i vonavonaga begaidi Iesu vavine i vonedi i vo, Yaubada i vetunekuga me Isileli 'aise'avadi 'waidie, taunidi vuyovuyodi 'wa da vo 'aisaya sifi, we'e 'omi mali tomotoga kebu.” <sup>25</sup> Siwe vavine i nogai Iesu yana vona i mai ma yadi ve'ililibu i 'odu 'ageneye, i vo, 'Auvea 'u da 'ivaisema.” <sup>26</sup> Iesu i vo, Kebu i da lubwaineku kwakwama 'adi'adi a na elodi a na 'anivelenedi 'ou'ou 'waidie.” <sup>27</sup> Vavine i 'asetai Iesu i vonavona nagami i na folova taunina yana 'aila'a me Diu 'waidie, faifainanina i voneni i vo, 'Auvea we'e mogitana. Siwe tutuyanina kwakwama i na 'ani'ani, 'ou'ou siaidi mukumuku i na luluyamuyamu. Faifainanina sai'afo 'u da 'ivaisema.” <sup>28</sup> ✧ Iesu yadi vona i nogai i vonedi i vo, Yami vetumagana toketokena, ava'ai nuanuami 'ana mogitana i na souyeni 'waimie,” nika mogitana natudi i ve'atumai.

### *Toviga fuedi Iesu i 'ive'atumaidi.*

<sup>29</sup> Iesu ma enavo 'awalawanina i 'iaweni, Lavu Galili bale-baleamo i nagoi, mulieta i laka tamu 'oya siaina 'waineye i

miabui. <sup>30</sup> 'Aila'a bwaikina i maia, yadi tovinga fuedi i miedi, tovinganidi 'ifwaidi 'agedi sakoidi, tomatasako, tubusakosako, tomotoganidi kebu 'adi fata i na welavaga, wata 'ifwaidi tovingaotoga. Tovinganidi i miedi Iesu 'waineye matatabudi i 'ive'atumaidi. <sup>31</sup> \*Tomotoga i 'iseni nuadi i voganidi fai egavo kebu i da welawelavaga siwe i welava, tubusakosako wata 'agedi i sako i yogodewa, wata tomatasako i 'isa-vaitugana. Me Isileli toketokenanina i 'iseni yadi Yaubada i subiai.

### *Tomotoga 4000 Iesu i ve'anidi.*

<sup>32</sup> \*Iesu yana tovetutuyamavo i goledi i nagoi 'waineye i vonedi i vo, Tomotoga de'e faifaidi a nuavita fai 'akonadi 'aiata 'aitonu taiadi ta miamiani siwe kebu 'adi'adiga. Kebu nuanuaku ma 'adi lase a na vetunedi i na nagoi yadi vanuge fai bola 'edeje i na mwea.” <sup>33</sup> Yana tovetutuyamavo i velutolien i vo, De'e kebu tomotoginaga, ava'aibe bei 'ani'ani ta na veluagai tomotoga de'e ta na ve'anidi?” <sup>34</sup> Wata Iesu i velutoli yana tovetutuyamavo 'waidie i vo, We'e 'omi, 'aivia 'ani'ani 'waimie?” I vo, Kebu fuediga, 'ani'ani mwadodoudi 7 wata igana siaidi.” <sup>35</sup> Bega Iesu 'aila'a i vonedi i miabui. <sup>36</sup> Mulieta 'ani'aninidi 7 igana taiadi i 'ewadi, i vekaiwa Yaubada 'waineye, i 'a'avana i 'ivividi wata i baidi tovetutuyamavo i veledi i veusedi 'aila'a 'waidie. <sup>37</sup> Matatabudi i 'ani, 'adi fata, mulieta yana tovetutuyamavo tomotoga nikilidi i va'augidi bayawa bwaikidi 7 i veadagidi. <sup>38</sup> To'aninidi iaveta tulai'avadi i lu'iawawadi 'adi 'aila'a 4000, we'e vevine tulaidi wata yavayavava matatabudi kebu taiadi i da lu'iawawadiga.

<sup>39</sup> 'Ani i 'a'avana, Iesu tomotoga i vonedi i nagoi, we'e i dodoga wakeye i nago 'awalawa Magadani.

## 16

### *Tomotoga nuanuadi 'eba 'isa toketokena.*

<sup>1</sup> \*Tamu tutuya me Diu to'edakumetavo 'ifwaidi i maia Iesu 'waineye, taunidi totafalolo 'adi wagava Falisi wata Sadusi. Nuanuadi i na silubuya bega i voneni i vo, Nuanuama 'eba nuavogana wata 'eba nua'ewa 'u na 'idewai 'a na 'iseni 'a na 'asetai 'omu 'u mai Yaubada 'wainega 'alo kebu.” <sup>2-3</sup> Siwe Iesu yadi vona i tutuli i vo, 'Ai'edi 'wa na 'iseni Malayaubani i na laka 'wa na 'asetai tutuya kumaga, wata 'ai'edi 'wa na 'iseni waowa i na vetovotovoia 'wa na 'asetai 'ako i na 'wei. Tugusanidi i na vemi bega 'ami fata 'wa na 'asetai ava'ai i na souyedi, we'e 'eba 'isa toketokedi Yaubada i 'i'idewadi matamie tutuya mulina faifaina kebu 'wa da 'isa'inanadiga. <sup>4</sup> \*'Omi tutuya de'e 'ana tomotoga yami sauluva sakoidi wata



kebu nuanuami Yaubada yana nuanua. 'Wa vonavona nu-anuami 'eba nuavogana wata 'eba nua'ewa, a na 'idewai siwe a nuani kebu tamu a na 'idewaiga. Siwe tamu nani a na veifufuyeni yami 'eba 'isa. 'Eba 'isanina bani'odi Iona, taunina Yaubada yana tolu'ivona, igana bwaikina kamoneye i miamia 'aiata 'aitonu, mulieta i souyeni." Iesu i vona'a'ava, i 'iawedi i nago tulineye.

*Iesu i vona-awatabai Falisi wata Sadusi faifaidi.*

<sup>5</sup> Mulieta Iesu ma yana tovetutuyamavo i damana lavu vi'ainega, siwe tovetutuyamavo nuadi i fani, kebu tamu 'ani'ani i da 'ewaiga. <sup>6</sup> ✧Bega Iesu vona-awatabaiega i velu'ase'asedi tomotoga sakoidi yadi sauluva kebu i na damana 'waidie i vo, 'Wa na 'i'isave'avinimi Falisi wata Sadusi yadi isita i na nunago i na vedamanimi."

<sup>7</sup> 'Aise'avadi i veifufu i vo, Isita\* beledi 'ana 'eba 'ivebwaika, bani'odi i voneyediga fai 'ida beledi kebu ta da 'ewadiga." <sup>8</sup> Iesu yadi vona i 'asetai bega i velutoliedi i vo, Awale nu-afoumi i veviga 'wa veveifufu beledi faifaina? Yami vetumagana mweana. <sup>9</sup> ✧Bola kebu 'wa da 'asetakuga yau 'aku fata 'ani'ani a na velemini. Bega 'wa na nuani basenadi 'ani'ani 5 a 'ivividi, tomotoga 5000 i 'ani, mulieta i 'ani-wayogeni bayawa fuedi 'wa veadagidi. <sup>10</sup> ✧Wata 'wa na nuani basenadi 'ani'ani 7 'waidiega tomotoga 4000 a ve'anidi, wata bayawa fuedi 'wa veadagidi. <sup>11</sup> Awale yaku vona kebu 'wa da 'asetai. 'Omi 'wa vo 'ako, Yau a vonavona beledi faifaina," siwe kebu. Taunimi 'wa na 'i'isave'avinimi Falisi wata Sadusi yadi isita 'wainega." <sup>12</sup> Mulieta tovetutuyamavo i 'asetai Iesu kebu i da vonavona isitanina beledi 'ana 'eba 'ivebwaika faifaina, we'e mogitana i vonavona Falisi wata Sadusi yadi ve-vekavekali kebu i na vedamanidiga.

*Fita yana 'asetai Iesu faifaina i sivemageseni.*

<sup>13</sup> Iesu ma enavo i nagoi tamu 'awalawa 'waineye 'atamana Sisalia Filifai lilivaneye, bei yana tovetutuyamavo i velutoliedi i vo, 'Wa da nogaiga tomotoga yadi nuanua yau a vetomotogaotoga aitoi?" <sup>14</sup> ✧Tovetutuyamavo yana velutoli i tutuli i vo, 'Ifwaidi tomotoga i vonaga 'omu Ioni Tobafitaiso i yawasa-vaitugana, 'ifwaidi i vonaga 'omu Ilaitia abamega i obuma, wata 'ifwaidi i vonaga 'omu Ielemaia 'alo tamu Yaubada yana tolu'ivona wafayega i tovoi." <sup>15</sup> Iesu yana tovetutuyamavo i velutoliedi i vo, We'e 'omi, 'wa da nuaniga yau aitoi?" <sup>16</sup> ✧Saimoni Fita i vo, 'Omu Keliso, Yaubada

✧ 16:6: Luk 12:1 \* 16:7: Isita falawa matatabuna 'waineye i na susula, bani'odi walabo 'aluna, 'ai'edi i na 'anibiai 'aisayanina matatabuna i na 'ivesakoi.

✧ 16:9: Mad 14:17-21 ✧ 16:10: Mad 15:34-38 ✧ 16:14: Mak 6:14-15

✧ 16:16: Ion 6:69

Miamia-vagaina Natuna wata 'ana Venua'ivina.”<sup>17</sup> ✨Iesu i voneni i vo, Saimoni, 'omu Iona natuna, Yaubada i vesauluva 'atumaina 'waimuye fai 'aku 'aseta kebu tomotogaotoga i da vemu, yamu 'asetanina tonovina i mai abamega Tamaku 'wainega.<sup>18</sup> ✨Fai 'u 'asetakuga begaidi a na vonemu. 'Omu Fita, 'amu wagava 'ana saivila kileu. Yamu 'aseta faifaiku 'u sivemageseniga bani'odi kileu bwaikina, tabwaneye yaku 'Aila'a a na va'augimi. Yaku 'Aila'aniami 'wa na mia-vagata, Vatu'ai Manamanawena† 'ana tomia toketokedi kebu 'adi fata i na vetoketoke 'waimie.<sup>19</sup> ✨Veimea a na velemu, tomotoga yadi luku Yaubada yana 'Eba Veimea 'waineye faifaina. Ava'ai 'u na talabodeni fwayefwayeye, wata abame Yaubada i na talabodeni, ava'ai 'u na tauyeni fwayefwayeye, wata abame Yaubada i na tauyeni.”

<sup>20</sup> Mulieta Iesu yana tovetutuyamavo i talabodebodedi i vo, Kebu tamu aitoi 'wa na voneni yau Keliso, Yaubada 'ana Venua'ivina.”

*Iesu yana veviga wata yana wafa i veifufuyedi.*

<sup>21</sup> Tutuya de'e 'wainega i nagoga Iesu i velamu i kikiavemageta yana tovetutuyamavo 'waidie ava'ai i na souyediga 'waineye faifaidi. I vo, I lubwaineku a na nago Ielusalema, bei veviga bwaikina a na veluagai me Diu yada to'edakumetavo 'au'auveadi, tovelomu 'adi to'edakumetavo, wata ve'etoboda 'adi tovevo 'waidiega. I na veimea a na wafa siwe 'aiata 'ana vetonu 'waineye Yaubada i na sivetovoiku.”

<sup>22</sup> Fita Iesu i voneni i nagoi tulidie bega i talabodeni i vo, 'Auvea, kebu bani'odi 'u na voneyediga. Veviga wata wafa 'u veifufuyediga Yaubada i da talabodedi bega kebu i da sousouyedi 'waimuye.”<sup>23</sup> Iesu i sivilai Fita i voneni i vo, 'U vaganago, yamu nuanuananina Seitani yana nuanua. Yaku 'eda 'u velubodabodai, yamu nuanuananina tomia fwayafwaya yadi nuanua, kebu Yaubada 'wainega.”

<sup>24</sup> ✨Wata Iesu i vona yana tovetutuyamavo 'waidie i vo, 'Ai'edi aitoi nuanuana mogitana i na mai 'waikuye taiadi 'a na nagoga, nagami taunina yana nuanua i na bailedi. Fai i na vematayakeyakeku veviga bwaikina i na veluagai yau bani'odi a na veluagai. Voke i na wafa faifaiku yau bani'odi a na wafa 'ai lagalagana 'waineye.<sup>25</sup> 'Ai'edi aitoi yana mia 'ana 'atumaina i na ve'o'oleni, kebu nuanuana yawaina i na tauyeni faifaiku, taunina i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku, mia 'atumaina wata miamia-vagaina i na veluagai.<sup>26</sup> 'Ai'edi tamu aitoi fwayafwaya matatabuna 'ana kukua i na

✨ **16:17:** Mad 17:5 ✨ **16:18:** 1 Kol 3:11; Fol 4:10-12; Efe 2:20 † **16:18:** Me Guliki bonadi Edesi. ✨ **16:19:** Ion 20:23 ✨ **16:24:** Luk 14:27

'ewadi mulieta yawaina i na 'a'ava, ava'ai 'ana 'atumaina? Kebu 'ana fata tamu nani 'wainega yawaina i na kimwanei. <sup>27</sup> ✧Fai 'awaie yau a vetomotogaotoga a na souyeku Tamaku yana mageta mataududulina 'wainega, yaku anelose taiadi, mulieta tomotoga matatabudi a na tutulidi yadi sauluva 'aitamogana 'aitamogana 'adi 'isa'isa bani'odi. <sup>28</sup> A vona mogitana 'waimie, 'omi 'ifwaimi bola ma yawaimi 'wa na miamiani, yau a vetomotogaotoga 'wa na 'iseku a na mai tomotoga matatabumi a na veimeyemi.”

## 17

### *Iesu i vemaigisivilavila.*

<sup>1</sup> 'Aiata 6 i 'a'ava, mulieta Fita, Iemesa ma taina Ioni, Iesu i 'edakumesedi, 'aise'avadi i laka 'oyeye. <sup>2</sup> ✧I miamiani nika matadie Iesu 'ana 'isa i vetuli, maigina i magetai inala bani'odi wata 'ana kaleko 'ana lau'avu mataududulina. <sup>3</sup> I 'ise'iseni nika tomotoga 'adi 'ailuga i souyedi Iesu taiadi i veveifufu. Tomotoganidi abamega i obuma, Mosese wata Ilaitia, taunidi basenadiotoga Yaubada yana tolu'ivonavo. <sup>4</sup> Nika Fita i vona Iesu 'waineye i vo, 'Auvea, 'ima taiadi ta maia i lubwaineni, 'ai'edi nuanuamu lau'weta 'aitonu a na 'idewadi, tamu 'omu faifaimu, tamu Mosese, tamu Ilaitia.”

<sup>5</sup> ✧Fita bola i veveifufu waowa mataududulina i mai i tavunidi, waowanina 'wainega bona i souyeni i vo, De'e Natuku nuafouku faifaina a sosoana bwaikina. Nuanuaku bonana 'wa na nogai.” <sup>6</sup> Tovetutuyamavo 'adi 'aitonu bonananina i nogaiga i kololo-'afo'afo i lumata'afufu. <sup>7</sup> Iesu i mai i 'abitonovidi i vonedi i vo, Kebu 'wa na kolologa, 'wa tovoi.” <sup>8</sup> Tutuyanina i dadaga-lakata kebu tamu aitoi i da 'iseniga, Iesu 'aiseotogina.

<sup>9</sup> 'Oyayega i obuobuma Iesu i toke i vonedi i vo, Naninidi 'wa 'isediga kebu tamu aitoi 'wa na voneniga, nagami yau a vetomotogaotoga wafayega a na tovoi, mulieta 'wa na lu'ivona.”

<sup>10</sup> ✧Yana tovetutuyamavo i velutolieni i vo, Awale ve'etoboda 'adi tovevo i vonaga i vo, Nagami Ilaitia i na mai, mulieta Yaubada 'ana Venua'ivina i na souyeni?” <sup>11</sup> Iesu yadi velutoli i tutuli i vo, We'e i vonaga mogitana, nagami Ilaitia i na mai Yaubada 'wainega, nani matatabuna i na 'ivenonogidi. <sup>12</sup> ✧Siwe a na vonemi, Ilaitia tutulina 'akonadi i mai siwe tomotoga kebu i da 'isa'inanaiga, begaidi vitanidi nuanuadi i na veleniga mogitana i veleni. Wata bani'odi yau a vetomotogaotoga vita i na veleku.” <sup>13</sup> ✧Nika tovetutuyamavo i nuani, i 'asetai Ioni Tobafitaiso faifaina i vonavona.

✧ 16:27: Lom 2:6; Ve 22:12 ✧ 17:2: 2Fit 1:16-18 ✧ 17:5: Mad 3:17 ✧ 17:10: Mal 4:5 ✧ 17:12: Mad 11:14 ✧ 17:13: Luk 1:17

*Kwamana yaiaina i ageiga, Iesu i 'ive'atumaia.*

<sup>14</sup> Tutuyanina Iesu ma enavo i le'wai laube'uye 'aila'a 'waidie, tamu tomogo i mai ma yana ve'ililibu i 'odu Iesu mataneye. <sup>15</sup> I voneni i vo, 'Auvea, natuku iavetana 'u da 'isanuakalikali. Yaiaina i agei tutuya fuedi i vevekadia i vavatu'oga wata i alala. Wata tutuya fuedi i be'ube'u 'ai-'ala'alase wata ufeye. <sup>16</sup> A mieni yamu tovetutuyamavo 'waidie siwe kebu 'adi fata i na 'ive'atumaia." <sup>17</sup> Iesu tomotoga i vonedi i vo, 'Omi tovekali. Awale Yaubada yana toketokena kebu 'wa da vetumaganeniga? Tutuya manamanawena taiadi ta miamia wata a totokemaigeku bwaikina siwe kebu 'wa da vetumaganeku mogitana. Kwamananina 'wa mieni ta na 'iseni." <sup>18</sup> Iesu yaiaina i voneni i 'awa'a'ia kwamana 'wainega nika i ve'atumai.

<sup>19</sup> Mulieta 'aise'avadie tovetutuyamavo Iesu i velutolieni i vo, Awale 'ima 'a vona yaiaina kebu i da 'awa'a'ia?" <sup>20</sup> ✧ Iesu yadi vona i tutuli i vo, Fai bola yami vetumagana siaidi. A vona mogitana 'waimie, 'ai'edi yami vetumagana 'ana vebwaika bani'odi 'ayawana bilana, siaina siwe mulieta welavi bwaikina, 'ami fata 'wa da vona 'oya de'e 'waineye 'wa da vo, 'U tovoi 'u nago sino bei," nika i da nago. De'e bani'odi yami vetumagana i na vevebwaikaga, nani matatabuna 'ami fata. [<sup>21</sup> 'Ai'edi 'aiata 'ifwaidi nagedie 'wa na veve'udigana 'ani bega yami velu'ui Yaubada 'waineye i na vetoketoke, 'ami fata 'wa na vona yaiaina de'e bani'odi i na 'awa'a'idi, wata kebu tamu ava'ai 'wainega."]

*Iesu i veifufu-vaitugana yana wafa faifaina.*

<sup>22-23</sup> ✧ Tutuyanina Iesu yana tovetutuyamavo i luvetubama 'awalawa Galili 'waineye Iesu i vonedi i vo, Yau a vetomotogaotoga sai'afoga i na 'aniveleneku tomotoga 'waidie, i na luvewafaku, siwe 'aiata 'ana vetonu 'waineye ma yawaiku Yaubada i na sivetovoiku." Tovetutuyamavo i nogai, nuadi i vita bwaikina.

*Vanuga 'eba velu'ui 'ana takesi.*

<sup>24</sup> ✧ Iesu ma yana tovetutuyamavo i maia 'atamana Kafa-neomi, bei takesi vanuga 'eba velu'ui faifaina 'ana tolaugogona i maia Fita 'waineye i velutolieni i vo, Yamu Tove, takesi vanuga 'eba velu'ui faifaina, i yatoyato?" <sup>25</sup> Fita i vo, E'e, i yatoyato."

Mulieta Fita i luku vanuge, bola kebu i da veifufuga, Iesu i vona-matayo'o i vo, Saimoni, 'u da nuani, fwayafwaya 'ana toveimea bwaikidi, nuanuadi egavo i na takesi? Taunidi natudiavo 'alo mali tomotoga?" <sup>26</sup> Fita i vo, Mali tomotoga

i na takesi.” Iesu i voneni i vo, Vetuma yau fai Yaubada Natuna, yana vanuga 'eba velu'ui faifaina a na takesiga, kebu 'atumainaga. <sup>27</sup> Siwe 'ai'edi takesinina yato a na bailaga, tolaugogonanidi a na 'ivebunumayagidi bega 'asa'aiana ta na yato. Nuanuaku 'u na nago lavuye, igananina nagami 'u na 'onaiga 'awanega mani 'u na 'ewai. Maninina 'omu wata yau yada yato 'ana fata bani'odi.”

## 18

### *Aitoi bwaikaotogina Yaubada mataneyeye.*

<sup>1</sup> ✨Tutuyanina 'waineyeye tovetutuyamavo i nagoi Iesu 'waineyeye i velutolieni i vo, Aitoi bwaikaotogina Yaubada yana 'Eba Veimea nageneyeye?” <sup>2-3</sup> ✨Iesu tamu kwamana i golemi i mai matadie i tovoi, mulieta Iesu i vonedi i vo, A vona mogitana 'waimie 'ai'edi nuanuami 'wa na luku Yaubada yana 'Eba Veimea 'waineyeye, i lubwainemi 'wa na nuavilami 'wa na nuaobu yavayavava bani'odi. We'e 'ai'edi kebu nuanuami, kebu tamu sai'afo 'ami fata 'wa na lukuga. <sup>4</sup> ✨Aitoi i na nuaobuga kwamana de'e bani'odi taunina bwaikaotogina Yaubada yana 'Eba Veimea nageneyeye. <sup>5</sup> ✨De'e kwamananina 'wa 'ise'iseniga, 'ai'edi aitoi ma yana nuakalikali tamu kwamana de'e bani'odi i na 'ivaiseni faifaiku, siwe 'asa'aiana yau i 'ivaiseku.

### *Vetalaimimila 'wainega sakona i na souyeni*

<sup>6</sup> 'Ai'edi aitoi i na vetumagana 'waikuye de'e kwakwama bani'odi, siwe tamu tomotoga i na vetalaimimili i na sakonaga, bola tomotoganina veviga bwaikaotogina i na veluagai Yaubada 'wainega. Siwe nagami tomotoganina kebu i da vetalaimimilaga, bei tomotoga 'ifwaidi kileu vitana i da yogonamatayo'oi'odoneye i da taweni malaveseye, veviga siaina i da veluagai. I da wafa-matayo'oga i lubwaineni, nika kebu i da vetalaimimilaga wata kebu veviga bwaikaotogina i da veluagai Yaubada 'wainega. <sup>7</sup> Tomia fwayafwaya nuakalikalimi, fai 'awasasamie nani fuedi 'waidiega tomotoga i be'ube'u i sakosakona. 'Eba be'unidi mogitana i na sousouyedi 'waimie, siwe 'ai'edi aitoi tamu tomotoga i na kiavebe'uya bega i na sakonaga, nuakalikalina fai veviga bwaikina i na veluagai.

<sup>8</sup> 'Ai'edi nimamu 'alo 'agemu sai'afoga i da kiavebe'umu 'u da sakona, 'u boboi 'u taweni. 'U na boboiga veviga sai'afo nika kebu 'u na sakonaga, mulieta 'amu fata 'aitamoganega 'u na luku abame. We'e nimamu 'alo 'agemu 'ailugana 'waidiega 'u na sakosakonaga, mulieta 'u na wafa 'u na luku 'ai-'ala'alase, veviga bwaikaotogina 'u na veluagai. <sup>9</sup> 'Ai'edi

matamu vi'aina sai'afoga i da kiavebe'umu 'u da sakona, 'u kiamwanuya 'u taweni. 'U na kiamwanuyaga veviga sai'afo, nika kebu 'u na sakonaga, mulieta 'amu fata 'aitamoganega 'u na luku abame. We'e 'ai'edi matamu 'ailugana 'waidiega 'u na sakosakonaga, mulieta 'u na wafa 'u na luku 'ai-'ala'alase, veviga bwaikaotogina 'u na veluagai.

*Vona-awatabai 'aisaya sifi vuyovuyona faifaina.*

10 'Wa na 'isa'isa i na nunago kwakwama de'e bani'odi kebu 'wa na awaobuobuyediga. A vona mogitana 'waimie yadi anelose abame tutuya matatabuna Yaubada mataneye i 'i'isave'avinidi.

[<sup>11</sup> \*Yau a vetomotogaotoga a maiga, egavo Yaubada yana 'eda'eda i bavuyeni bani'odi i vuyo, a na 'ita'ita'iedi.] <sup>12</sup> 'Wa da nuani. 'Ai'edi tamu tomogo ma yana 'aisaya sifi 100, we'e tamu i na vuyoga bani'odi i na munegi? Yana sifi 99 i na yatodi i na miamiani 'oya 'ifineye we'e i na nago sifinina i vuyoga i na lualeni. <sup>13</sup> A vona mogitana 'waimie, tutuyanina i na veluagaiga yana sosoana bwaikaotogina sifinina faifaina, we'e yana sifi 99 kebu i da vuyoga, faifaidi sai'afo. <sup>14</sup> Wata bani'odi, Tamada abame kebu nuanuana tamu yaku kwamana i na vuyovuyo i na nunago vita i na veluagai.

*Sakona 'ana kiavetonova faifaina.*

15 \*'Ai'edi iamu sakona i na 'idewai 'waimuye, 'u na nago 'waineye 'aise'avami yana sakonanina 'u na lu'ivona 'waineye. 'Ai'edi bonamu i na nogai i na ve'awamogitana siwe 'akonadi 'wa veiana. <sup>16</sup> \*We'e 'ai'edi bonamu kebu i na nogaiga, tomotoga 'adi 'ailuga 'alo 'adi 'aitonu 'u na nawedi matadie 'u na vewavawava 'u na sivetovetonovi. <sup>17</sup> 'Ai'edi taiadi kebu bonami na nogaiga, 'u na sivemageseni tovetumaganavo matatabudi 'waidie. Mulieta 'ai'edi i na fa'ala-'afo'afoi 'wa na bailenimo fai taunina bani'odi tosakona.

<sup>18</sup> \*'Omi yaku tovetutuyamavo a na vonemi, ava'ai 'wa na talabodeni fwayefwayeye, wata abame Yaubada i na talabodeni, ava'ai 'wa na tauyeni fwayefwayeye, wata abame Yaubada i na tauyeni.

<sup>19</sup> \*Wata a na vonemi, de'e bei fwayefwayeye 'ai'edi 'ami 'ailuga yami nuanua 'aitamoganega 'wa na velu'ui, Tamaku abame naninina nuanuami i na 'idewai. <sup>20</sup> 'Ana fata i na 'idewai fai 'ai'edi tomotoga 'adi 'ailuga 'alo 'adi 'aitonu i na va'auta 'aku wagavayega, yau taiadi lilivadie.

*Nuatavuna faifaina.*

<sup>21</sup> Mulieta Fita i mai Iesu 'waineye i velutolieni i vo, 'Auvea, 'ai'edi iaku tutuya fuedi sauluva sakoina i na 'idewaiga

\* 18:11: Luk 19:10    \* 18:15: Luk 17:3; Gal 6:1    \* 18:16: Ion 8:17    \* 18:18: Ion 20:23    \* 18:19: Ion 15:7

'waikuye, 'aivia yaku nuatavuna? Yana sakonanidi a na nuatavunidiga tutuya 7 'alo bani'odi?" <sup>22</sup> Iesu i vo, Kebu 7-'ava, bei 'u na nunuatavuna. <sup>23</sup> 'Wa na nunuatavunaga fai tomotoga Yaubada yana 'Aila'a nageneye side bani'odi. Tamu toveimea bwaikina, basenadi yana tofолоvavo nani 'ifwaidi i 'ewa-maimaigidi 'wainega, nuanuana i na tutulidi. <sup>24</sup> Tofolovanidi 'aitamogana 'aitamogana i vonevoned i mi-maia 'waineye we'e tamu i luku 'waineye i na tutula basenadi i 'ewai mani bwaikaotogina bani'odi 10 milioni Kina. <sup>25</sup> Tofolovanina kebu 'ana fata i na tutuli bega yana toveimea i vona i vo, Tomogo de'e taunina, yana vavine, natunavo wata yana kukua matatabuna 'wa na nawedi tamu tomotoga i na kimwanedi yana tofолоva-maimaiga, tutulidi 'wa na miedi bega maninina i 'ewaiga i na taobwai. <sup>26</sup> Tofolovanina ma yana ve'ililibu i be'u yana toveimea mataneye i voneni i vo, 'U ve'wada 'u na lulukamata, nani matatabuna bola a na tutulidi." <sup>27</sup> Yana toveimea i nuavita faifaina bega i vo, 'Asa'aiana a nuatavuni, 'u nago, kebu 'u na tutulaga."

<sup>28</sup> Tofolovanina i sousouyeni nika tamu iana tofолоva i veluagai, kumanina basenadi mani sai'afo siaina bani'odi 100 Kina i veleni. 'Odoneye i 'abi sai'afoga i da kiami'ai i voneni i vo, Maninina basenadi a velemuga, 'asiauotoga 'u na tutuli." <sup>29</sup> Iana i be'u mataneye i voneni i vo, 'U ve'wada 'u na lulukamata, bola a na tutuli." <sup>30</sup> Siwe kebu bonana i da nogaiga, nuanuana i na tutuli bega yana veimea 'wainega i silukuveni vanuga 'eba yogona 'waineye, bei i na miamia i na tutulina i na souyeni." <sup>31</sup> 'Ifwaidi tofолоvavo iadi yana sauluva i 'iseni nuadi i vita bwaikina, bega i nagoi yadi toveimea 'waineye i lu'ivona.

<sup>32</sup> Mulieta yana tofолоva, kumanina igodi i da tutula 10 milioni Kina i goleni i mai i voneni i vo, 'Omu tofолоva sakoimu, 'u velu'ui-nuakalikali 'waikuye maninina igodi 'u da tutuliga a nuatavuni. <sup>33</sup> I lubwainemu 'omu wata iamu 'u da 'isanuakalikalienu, yau bani'odi a 'isanuakalikalienu." <sup>34</sup> Yana toveimea ma yana nuasako i silukuveni vanuga 'eba yogona 'waineye, bei vematavuloga i na veluagai 'ai'edi i na tutulagana i na souyeni."

<sup>35</sup> ✧ Vona-awatabainina i 'a'avana Iesu i vo, 'Ai'edi tofолоvanina sakoina 'wa na salaiga, kebu ma yami nuakalikali emiavo yadi sakona 'wa na nunuatavunidiga, wata bani'odi Tamaku abame 'aitamogana 'aitamogana vita bwaikina i na velemini."

## 19

*Iesu i ve sa'ila faifaina.*

<sup>1</sup> Iesu yana ve nuatavuna faifaina i 'a'ava, 'awalawa Galili i 'iaweni, i vilai i nago Ufa Iolidani i damani i nago 'awalawa Iudia. <sup>2</sup> 'Aila'a bwaikina i yogo'waili i nagoi, bei toviga i 'ive'atumaidi.

<sup>3</sup> Me Diu totafalolo Falisi nuanuadi tomotoga i na nuasako Iesu 'waineye begaidi 'aila'a matadie i velutolieni i vo, 'Ana fata tamu tomogo yana vavine i na vesa'ila-maimaigidi, kebu tamu lamunaga?" <sup>4</sup> \*Iesu yadi velutoli i tutuli i vo, Yaubada yana Buki nageneye de'e vonanina nagi faifaina 'wa da vo kebu 'wa da lu'iawawaiga. I vo,

Tutuya 'eba velamu 'waineye Yaubada tomotoga i 'idewadi, Iavetana wata vevinena."

<sup>5</sup> \*Wata Yaubada i vo,

Faifainanina 'ai'edi tomogo i na nagiga, 'akonadi i 'awa'idia tamana wata inana 'waidiega, yana vavine taiadi i luve-tubama.

'Adi 'ailuga siwe 'wa da vo tomotoga 'aitamogana."

<sup>6</sup> Kebu 'ana fata ta na vo, 'Adi 'ailuga," fai taiadi i luve-tubama ta na vo, 'Aitamogana." Bega Yaubada 'akonadi i luvetubamidiga, kebu 'ana fata mali tomotoga 'alo taunidi i na vemia'idiedi." <sup>7</sup> \*Falisi Iesu i velutolieni i vo, Vetuma ava'ai faifaina basenadiotoga Mosese i tauyeda tamu lubu-lubu 'waineye sa'ila vonana ta na kilumi vavine ta na veledi ta na vo, 'Omi 'akonadi 'wa 'a'ava 'waikuyega?" <sup>8</sup> Iesu i vonedi i vo, Mosese i tauyemiga fai sauluva 'atumaina 'wa baila, we'e tutuya 'eba velamu 'wainega i maiga 'asiau Yaubada kebu bani'odi i da voneyediga. <sup>9</sup> \*Siwe a na vonemi, 'ai'edi aitoi yana vavine kebu sauluva sakoina i da 'idewaiga siwe i na vesa'ilidi mulieta tamu vavine i na nagidi 'akonadi i sakona Yaubada mataneye."

<sup>10</sup> \*Yana tovetutuyamavo i voneni i vo, 'Ai'edi sakona 'aisena faifaina Yaubada i tauyeni sa'ila, vetuma nagi 'asa'aiana." <sup>11</sup> Iesu i vo, Tomotoga matatabudi kebu 'adi fata taunidi i na tauyedi venina 'waineye, egavo Yaubada i na 'ivaisedi 'aisedi 'adi fata. <sup>12</sup> Egavo kebu i na nagiga yadi lamu tulina tulina. Side bani'odi, tomotoga 'ifwaidi fai i vetubusakosako, 'ifwaidi fai daba i 'ewai bega kebu 'adi fata 'waidiega kwakwama i na souyedi, we'e 'ifwaidi nuanuadi Yaubada i na veimeyedi wata 'aisena 'waineye i na folofolova bega kebu i da nagiga. Egavo yaku vonanina



i nuani 'waidie 'atumaina, i lubwainedi yaku vonanina i na vematayakeyakeni.”

*Iesu nuanuana yavayavava.*

<sup>13</sup> Tomotoga 'ifwaidi natudiavo i miedi nuanuadi Iesu i na 'abitonovidi i na velu'ui faifaidi, siwe yana tovetutuyamavo i talabodebodedi. <sup>14</sup> \*Nika Iesu i vo, Kwakwama 'wa bailedi i na maia 'waikuye, fai egavo taunidi tonuaobu yavayavava de'e bani'odi 'adi fata taunidi i na tauyedi bega Yaubada i na veveimeyedi yana 'Aila'a nageneye.” <sup>15</sup> Nimana i yatoi 'aitamogana 'aitamogana 'waidie, i velu'ui mulieta i tauya.

*Tamu tubuvauvau 'ai'aiwabuna.*

<sup>16</sup> Tamu tutuya tamu tomogo i mai Iesu 'waineye i velutolieni i vo, Tove, nuanuaku 'u na voneku bega tamu nani 'atumaina a na 'idewai bega mia 'atumaina wata miamia-vagaina a na veluagai.” <sup>17</sup> Iesu yana velutoli i tutuli i vo, Ava'ai faifaina 'u velutolieku nani 'atumaina faifaina. Tomotoga tamu, 'aiseotogina 'atumaina. 'Ai'edi nuanuamu mia 'atumaina wata miamia-vagaina 'u na veluagaiga, tomotoganina, taunina Yaubada, yana veimea 'u na vevematayakeyakedi.” <sup>18-19</sup> \*Tubuvauvaunina i vo, Ava'ai veimeaga?” Bega Iesu i voneni i vo, Kebu 'u na luvewafaga, kebu tamu aitoi yana vavine 'u na luobuyediga, kebu 'u na vainagoga, kebu 'u na vekali tamu tomogo yana sauluva faifaina, tamamu wata inamu 'u na ve'ililibuyedi, we'e iamu 'u na nuakalikali, taunimu 'amu nuakalikali bani'odi.”

<sup>20</sup> Tubuvauvaunina Iesu yana vona i tutuli i vo, Veimeanidi 'u voneyediga matatabuna a vematayakeyakedi. Siwe wata ava'ai nuanuamu a na 'idewai?” <sup>21</sup> \*Iesu i voneni i vo, 'Ai'edi nuanuamu yamu sauluva 'atumai'avana 'u na vilamu 'u na nago, yamu kukua wata nani matatabuna 'waimuye i 'eno'enoviga 'u na vekimwaneyedi, tutulidi 'u na 'ewadi, bega egavo i vewekowekomaga 'u na 'ivaisedi. 'U na veledina, nika 'omu 'akonadi 'u ve'ai'aiwabu abame, mulieta 'u na mai 'u na vetutuyameku.” <sup>22</sup> Tubuvauvaunina Iesu yana vona i nogai nuana i vita i tauya fai yana kukua bwaikina nuana i loloi.

<sup>23</sup> Tomogonina i tauya i nunago, Iesu yana tovetutuyamavo i vonedi i vo, A vona mogitana 'waimie, 'ai'aiwabudi yadi luku Yaubada yana 'Eba Veimea 'waineye vitana. <sup>24</sup> Wata a na vonemi, bawe yadi luku aima mataneamo vitana, we'e 'ai'aiwabudi yadi luku abame, 'waidie vitaotogina.” <sup>25</sup> Yana tovetutuyamavo i nogaiga, nuadi i voganidi i velutolieni i vo, Vetuma aitoi 'ana fata Yaubada i na 'ita'ita'ieni bega mia 'atumaina wata miamia-vagaina i na veluagai?” <sup>26</sup> Iesu

i 'isanago 'waidie i vo, Tomotoga tauni'avadi kebu 'adi fata 'ita'ita'i i na veluugaiga, we'e Yaubada 'waineye nani matatabuna 'ana fata.”

<sup>27</sup> ✧Nika Fita i vona i vo, Maide 'ima nani matatabuna 'a bailedi 'a maia 'a vetutuyamemu. 'Awaie ava'ai 'a na veluagai Yaubada 'wainega?” <sup>28</sup> ✧Iesu i vonedi i vo, A vona mogitana 'waimie, 'awaie Yaubada nani matatabuna i na 'ive'ivaudi, tutuyanina 'waineye yau a vetomotogaotoga ma yaku veimea abame a na miabui 'eba miabui mataududulina 'waineye. We'e 'omi yaku tovetutuyamavo 12 veimea a na velemini bega waumanidi 12 tubuda bwaikina Isileli 'wainega i souyediga matamie i na vonayavuga, 'wa na veimeyedi. <sup>29</sup> Egavo yadi vanuga i 'iawedi faifaiku, 'alo tamadiavo, inadiavo, novudiavo, ediavo, natudiavo, 'alo yadi tanoga i 'iawedi faifaiku, 'awaie naninidi 'adi tutula bwaikaotogina i na veluagadi ma 'adi 'imoso'i, bani'odi 100 nani 'aitamogana i baileniga faifaina, wata mia 'atumaina miamia-vagaina taiadi i na veluagai. <sup>30</sup> We'e tomotoga fuei 'asiau i kumetaga, 'awaie i na vemuli, we'e fuei 'asiau i vemuliga, ma'itufa i na kumeta.”

## 20

### *Vona-awatabai tofolova 'adi tutula faifaina.*

<sup>1</sup> Wata vona-awatabaiega Iesu i vonedi i vo, Yaubada yana 'Aila'a 'adi tutula 'ana 'ewa side bani'odi. Tamu tomogo ma yana bakula 'awa'awaiogose i tovoi i nago i lauuala yana tofolova i na 'ewadi. <sup>2</sup> Tomotoga 'ifwaidi i veluagadi i vonedi i nogaya wata 'adi tutula i lu'ivona-vagaseni 'waidie i vo, 'Aiata 'aitamogana 'ami tutula lubulubu 'aitamogana,” mulieta i vetunedi i nagoi i na folova. <sup>3-4</sup> Inala i vagalakama wata i nago 'atamanafouye tomotoga 'ifwaidi i veluagadi i mia-maimaiga bega i vonedi i vo, 'Omi wata 'wa na nagoi 'wa na folova yaku bakule, i na 'a'ava a na tutulimi tutula mogitana bani'odi. <sup>5</sup> I nagoi i folofolova, mulieta 'aiata 'ana utukamwane wata lavilavie 'ifwaidi i veluagadi i 'ewadi. <sup>6</sup> Lavilaviogose wata i nago 'atamanafouye, 'ifwaidi i veluagadi i tovi-maimaiga bega i velutoliedi i vo, Awale 'wa mia-maimaiga, kebu tamu ava'ai 'asiau 'wa da 'i'idewaiga?” <sup>7</sup> Tomotoganidi i vo, Tamu aitoi i da 'ewamana, 'waineye 'a da folova, fai kebu, bega 'a miamiani.” Tonibakula i vonedi i vo, A nuani 'omi wata 'wa na nagoi 'wa na folova yaku bakule.”

<sup>8</sup> 'Akonadi sai'afoga i na dudubali, tonibakula tofolova 'adi to'isave'avina i voneni i vo, Tofolova 'u na goledi 'u na tutulidi, nagami egavo i vemuli 'u na tutulidi, i na nagoga egavo

nagami a 'ewadiga i na vemuli.”<sup>9</sup> Tofolovanidi lavilaviogose i 'ewadiga 'adi tutula i veledi, lubulubu 'aitamogana.<sup>10</sup> We'e kumanidiavo 'awa'awaiogose i 'ewadiga i 'iseni yadi nu-anua i vo, Tovemuli i folova tutuya 'ale'usana siwe lubulubu 'aitamogana i 'ewai, we'e 'ima 'aiata matatabuna 'a folovaga 'ako bwaikina 'a na 'ewai.” Siwe wata i tutulidi lubulubu 'aitamogana 'aitamogana.<sup>11-12</sup> 'Adi tutula i 'ewa'a'avana, i ve-bonavoluvolu tonibakula 'waineye i vo, Vevemulidi i folova 'awasasa 'aitamogana, we'e 'ima 'aiata matatabuna a folova inala bwaikina 'waineye, awale taiadi 'ama tutula i vesala?”<sup>13</sup> Tonibakula tamu iadi i voneni i vo, Iaku, 'u ve'wada a na vonemu. Kebu a da vekaliemiga, 'asiau ta veifufuga 'u nuanuani a vo, Lubulubu 'aitamogana a na velemi,” 'wa nogaya.<sup>14</sup> 'Akonadi a velemiga 'asa'aiana 'wa 'ewadi 'wa nagoi yami vanuge. Nuanuaku vevemulidi 'adi tutula wata 'omi 'ami tutula taiadi i na vesala.<sup>15</sup> Yau tauniku yaku mani, yaku 'eba veimea. Kebu yaku nuakalikali mali tomotoga 'waidie faifaina 'wa na ve'unumagigi.”<sup>16</sup> Wata Iesu yana vona i luvaitugani i vo, Egavo 'asiau i vemuliga, 'awaie i na kumeta, we'e egavo 'asiau i kumetaga ma'itufa i na vemuli.”

*Iesu yana vona 'ana vetonu yana wafa faifaina.*

<sup>17-18</sup> \*Tutuyanina Iesu i nunago Ielusalema yana tovetu-tuyamavo 12 i vonedi taiadi tulidie i nagoi i vonedi i vo, A na vonemi, ta nunagoiga Ielusalema bei yau a vetomotogaotoga i na 'etogiluveku tovelomu 'adi to'edakumetavo wata ve'etoboda 'adi tovevo 'waidie i na veimea a na wafa.<sup>19</sup> Mulieta i na 'aniveleneku mali tomotoga taunidi kebu Diu 'waidie, i na sidibidibieku, i na toke i na fitaliku wata i na tutufwaseku 'ai lagalagana 'waineye. 'Aiata 'ana vetonu 'waineye, Yaubada i na sivetovoiku.”

*Iemesa ma taina Ioni inadi yadi velu'ui Iesu 'waineye.*

<sup>20</sup> Mulieta Sebedi yana vavine ma natudiavo i maia Iesu 'waineye, inadi ma yadi ve'ililibu i 'odu Iesu mataneye i velu'ui Iesu 'waineye natudiavo Iemesa wata Ioni faifaidi.<sup>21</sup> Iesu i velutoliedi i vo, Ava'ai nuanuami?” Vavinenidi i vo, Tutuyanina 'u na ve-Kini nuanuama de'e natukwavonidi 'u na tauyedi tamu 'amu 'atagiega i na miabui, tamu 'amu wamayega i na miabui.”<sup>22</sup> \*Iesu i vonedi i vo, 'Omi kebu 'wa da venua'ivinaga 'wa vevelu'ui 'waikuye.” I 'a'avana, natudiavo 'waidie i vona-awatabai yana veviga wata yana wafa faifaidi i vo, Sai'afoga veviga 'ana vedi a na yemuyeni, we'e 'omi 'ami 'ailuga 'ami fata vedinina 'wa na yemuyeni?” Yana vona i tutuli i vo, E'e, 'ama fata.”<sup>23</sup> Iesu i vo, 'Wa vonaga mogitana, 'aku vediega 'wa na yemu, siwe miabui 'aku

'atagiega wata 'aku wamayega yau kebu a da veveimeyediga, 'eba miabuinidi egavo Tamaku i venuma'ivinediga faifaidi.”

<sup>24</sup> Tutuyanina ediavo tovetutuyamavo 'adi 10 Iemesa ma taina inadi yadi velu'ui i 'asetai, 'waidie i kamogala. <sup>25</sup> ✱ Begaidi Iesu matatabudi i va'augidi i vonedi i vo, 'Akonadi 'wa 'asetai toveimea bwaikaotogidi wata to'edakumetavo yadi veimea toketokedi 'waidiega tomotoga i veveimeyedi. <sup>26</sup> We'e 'omi kebu bani'odi 'wa na munega. 'Ai'edi aitoi 'waimiega nuanuana i na vetomogo-bwaika, nagami i na vetofolova enavo 'waidie bani'odi tamu kwamana. <sup>27</sup> We'e 'ai'edi aitoi nuanuana i na veto'edakumeta 'waimie nagami i na vetofolova-maimaiga 'waimie. <sup>28</sup> ✱ Yau a vetomotogaotoga 'wa na vetutuyameku. Yau a maiga, kebu a da vo, Tomotoga 'wa na foloveku,” we'e mogitana a mai a na vetofolova tomotoga faifaimi, wata yawaiku a na tauyeni tomotoga fuemi a na tuveobumi sakona 'waidiega.”

*Tomatasako 'adi 'ailuga Iesu i 'ive'atumaidi.*

<sup>29</sup> Iesu ma enavo 'atamana Ieliko 'wainega i tautauya, 'aila'a bwaikina mulineye i nagoi. <sup>30</sup> ✱ We'e tomatasako 'adi 'ailuga 'edeye i miamiani nika i nogai i le'wa i nunago, bega i vegolegole i vo, 'Auvea, 'omu Yaubada 'ana Venuma'ivina Kini Devida tubuna, 'u da 'isanuakalikaliema.” <sup>31</sup> 'Aila'a i nogai i yagaidi i vo, 'Wa ve'wada,” nika tomatasakonidi i toke i vegolegole i vo, 'Auvea, 'omu Yaubada 'ana Venuma'ivina Kini Devida tubuna, 'u da 'isanuakalikaliema.” <sup>32</sup> Iesu i tovoi i goledi i maia i velutoliedi i vo, Ava'ai nuanuami a na 'idewai?” <sup>33</sup> I vo, 'Auvea, nuanuama matama 'u na siayegidi.” <sup>34</sup> Iesu i 'isanuakalikaliEDI matadi i 'abitonovidi, nika i 'aniayegidi Iesu mulineye i nagoi.

## 21

*Iesu i luku Ielusalema.*

<sup>1-2</sup> Iesu ma yana tovetutuyamavo i nunagoi Ielusalema i le'wai 'atamana Bedifegi, 'Oya Olive 'waineye. 'Atamananina kebu 'ani'iega Ielusalema 'wainega. Bei Iesu tovetutuyamavo 'adi 'ailuga i vonedi i na kumeta wata i vo, 'Atamana debanagomiega 'waineye 'wa na nagoi, tutuyanina 'wa na sousouyemi 'aisaya doniki ma natudi 'wa na 'isedi tamu vanuga 'waineye i luifwedi i tovtovoi. 'Wa na yavudi 'wa na miedi 'waikuye. <sup>3</sup> 'Ai'edi tamu aitoi i na vo, Awale 'wa yavuyavudi,” side bani'odi 'wa na voneyedi 'wa na vo, 'Auvea nuanuana,” nika i na tauyedi.” <sup>4</sup> Iesu nuanuana doniki ma natudi i na miedi 'waineye nika tamu Yaubada yana

tolu'ivona yana vona-vagata 'ana mogitana i na souyeni. Basenadiotoga i kilumi Yaubada 'ana Venua'ivina faifaina i vo,

<sup>5</sup> \*Ielusalema\* 'ana tomotoga 'wa na vonedi 'wa na vo,  
'Akonadi yami Kini i viwai 'waimie,  
Taunina tonuaobu, doniki kwavuneye i laka,  
E'e, mogitana ma yana nuaobu doniki tubuvauvauna 'waineye i dodoga.”

<sup>6-7</sup> Bega tovetutuyamavo 'adi 'ailuga i kumeta Iesu yana nuanua i 'idewai, donikinidi ma natudi i miedi 'adi kalekoyega kwavudie i yatodi bega Iesu i laka doniki tubuvauvauna kwavuneye. <sup>8</sup> 'Aila'a bwaikina ma yadi ve'ililibu yana 'eda i 'ivivigavuya 'adi kalekoyega wata welavi lukudiega. <sup>9</sup> \*Tokumeta wata tovemuli i vegolegole i vo,

Kaiwa, kaiwa,†  
Yaubada 'ana Venua'ivina Kini Devida tubuna 'waineye ta na vekaiwa.

'Auvea 'ana wagavayega i mimai,  
Wata ma yana nuakalikali i na vevesauluva 'atumaina 'waineye,

Bega Yaubada tabwaotogineye ta na subisubiai.”

<sup>10</sup> Tutuyanina Iesu i luku Ielusalema fuedi i gagali i vo, Aitoi tomotogaga?” <sup>11</sup> Ediavo 'ifwaidi i vo, Taunina tamu Yaubada yana tolu'ivona 'ana wagava Iesu, Nasalediega 'awalawa Galili nageneye.

*Iesu i luku vanuga 'eba velu'ui 'waineye.*

<sup>12</sup> Iesu i luku vanuga 'eba velu'ui nageneye i 'isedi tokimwane wata tovekimwane matatabudi i sogiedi i obu, mani tulina tulina 'adi tosivedavedamana‡ yadi talalia i tutuviladi we'e bunebune 'eba velomu faifaidi 'adi tovekimwane yadi 'eba miabui i tutufelegeledi. <sup>13</sup> \*I vonedi i vo, Basenadiotoga i kilumi Yaubada yana Buki 'waineye, Yaubada i vo,

Yaku vanuga 'ana wagava vanuga 'eba velu'ui tomotoga faifaidi,”

We'e 'omi 'wa sivilai, tovainago yadi 'eba giva.”

<sup>14</sup> I 'a'avana, mulieta tomatasako wata 'agedi sinunumidi i maia vanuga 'eba velu'ui nageneye, Iesu i 'ive'atumaidi. <sup>15-16</sup> \*Tovelomu 'adi to'edakumetavo wata ve'etoboda 'adi tovevo 'eba nua'ewa toketokedi Iesu i 'i'idewadi i 'isedi, wata i nogai vanuga 'eba velu'ui nageneye yavayavava i vegolegole

\* 21:5: Sek 9:9 \* 21:5: 'Ana mogitana Saioni, Ielusalema tamu 'ana wagava.

\* 21:9: Same 118:26 † 21:9: 'Ana mogitana Osana, me Diu bonadiega.

‡ 21:12: Me Loma yadi mani kebu 'ana fata 'wainega i na 'anivelena-maima ga, bega i sisivedamana nuanuadi me Diu yadi mani. \* 21:13: Ais 56:7

\* 21:15-16: Same 8:2

i vo, Yaubada 'ana Venua'ivina, Kini Devida tubuna ta na subiai.” Naninidi i 'isedi wata i nogaidi begaidi ma yadi kamogala i velutolieni i vo, Yavayavavanidi bonadi 'u nogai?” Iesu i vo, E'e, mogitana a nogai. We'e 'omi Yaubada yana Buki nageneye vona de'e 'wa da vo kebu 'wa da lu'iawawaiga i vona Yaubada 'waineye i vo,

Yavayavava tulaidi, wata mwedamwedaldidi 'u 'alaveveledi,

'Waidiega 'amu subia 'u veveluagai.”

17 Iesu i vona'a'ava, i 'iawedi i nago 'atamana Bedani, bei i 'eno.

*Iesu yana voneye 'ala'ai i bwavu-matayo'o.*

18 I 'atai Bedaniega i vilai i mimai Iesu i lase. 19 'Ala'ai i 'iseni 'eda lilivaneye i vo 'ako, Ma vuagina,” siwe i nago i 'iseni tolobwa'avana. Welavinina 'waineye i vona i vo, 'Omu 'asa'aiana, kebu wata 'u na vuavuaga,” nika 'ala'ai i bwavu-matayo'o.

20 Tovetutuyamavo i 'iseni nuadi i voganidi i vo, Bani'odi i munega i bwavu-matayo'o?” 21 ✨Iesu yadi velutoli i tutuli i vo, A vona mogitana 'waimie, 'ai'edi kebu ma yami venuanaluga 'wa na vetumaganamo, yau 'ala'ai 'waineye a 'idewaiga, 'omi wata bani'odi 'wa na 'idewai. Kebu de'e bani'odi 'aisena, siwe wata 'ami fata de'e 'Oya Olive 'wa na voneni 'wa na vo, 'U tovoi, 'u obu eyage,” nika i na obu. 22 ✨Ai'edi ma yami vetumagana 'wa na vevelu'uiga, 'ana fata naninidi nuanuami 'wa na veluagadi.”

*I velutolieni Iesu yana veimea lamuna.*

23 ✨Iesu i maiga Ielusalema, i luku vanuga 'eba velu'ui nageneye, tomotoga 'waidie i ve. Tovelomu 'adi to'edakumetavo wata me Diu to'edakumetavo 'au'auveadi i maia Iesu i velutolieni i vo, Nuanuama 'a na 'asetai aitoi i vetunemu bega naninidi 'u 'i'idewadi 'alo aitoi veimea i velemu?” 24 Iesu i vo, Nuanuaku tamu velutoli a na velemi, 'ai'edi yaku velutoli 'wa na tutula-'atumaiaga a na vonemi yau aitoi veimea i veleku nani de'e a 'i'idewadi. 25 'Wa da nuani, Ioni Tobafitaiso aitoi veimea i veleni bega tomotoga i bafitaisodi? Yaubada 'alo tomotoga?”

To'edakumetanidi 'aise'avadi i veifufu i vo, Bani'odi ta na voneyedi? 'Ai'edi ta na vo, Yaubada veimea Ioni i veleni,” 'ako i na vo, Vetuma awale kebu Ioni yana vona 'wa da vetumaganani?” 26 ✨Wata 'ai'edi ta na vo, Tomotoga veimea Ioni i veleni,” bola vita ta na veluagai 'aila'a 'waidiega fai i nuani Ioni taunina tamu Yaubada yana tolu'ivona.” 27 Begaidi Iesu

✨ 21:21: Luk 17:6 ✨ 21:22: Mad 7:7; Ion 14:13-14 ✨ 21:23: Ion 2:18

✨ 21:26: Mad 21:46

yana velutoli i tutuli i vo, 'Ima kebu 'a da 'asetaigna aitoi veimea i veleni Ioni.” Iesu i vonedi i vo, Yau wata kebu a na vonemiga aitoi veimea i veleku bega naninidi a 'i'idewadi.”

*Tovematayakayaka yadi luku Yaubada yana 'Aila'a 'waineye 'ana vona-awatabai.*

<sup>28</sup> Wata to'edakumetanidi i vonedi i vo, 'Omi 'wa na nuani, tamu tomogo natunavo iavetadi 'adi 'ailuga. Tulaina i voneni i vo, Natuku, nuanuaku 'asiau bakule 'u na folova.” <sup>29</sup> Siwe natuna i vo, Yau a baila,” mulieta i nuanua kebu'ega i nago i folova.

<sup>30</sup> Wata tamadi i nago natuna bwasiona i voneni i vo, 'Omu nuanuaku 'u na nago bakule 'u na folova. Natunanina i nogayeni i vo, 'Atumaina 'auvea, a na nago,” siwe kebu i da nagoga.

<sup>31</sup> Bega Iesu to'edakumetanidi i velutoliedi i vo, Aitoi mogitana tamadi yana nuanua i 'idewai?” Yana velutoli i tutuli i vo, Tulaina.” Iesu i vonedi i vo, A vona mogitana 'waimie, takesi 'ana tolaugogona vivinagodi wata vevine tolagogona ma'itufa i lukuluku Yaubada yana 'Aila'a 'waineye we'e 'omi voke kebu. <sup>32</sup> \*Tomotoganidi nagami tosakona siwe i nuaviladi kwamananina tulaina bani'odi, Tamada yana nuanua i 'idewadi, we'e 'omi kwamana bwasiona yana sauluva 'wa salai. Ioni Tobafitaiso i mai Yaubada yana 'eda'eda tonovidi i vemiga, 'wa nogayenimo siwe kebu 'wa da 'idewadi. Tomotoganidi yadi sauluva sakoidi ma yadi vetumagana i nuaviladi Yaubada yana nuanua i 'i'idewadi, we'e 'omi yadi nuavilana 'wa 'iseni siwe kebu 'wa da vo, 'A na nuavilama.”

*Tofolova sakoidi 'adi vona-awatabai.*

<sup>33</sup> Wata to'edakumetanidi 'waidie Iesu i vona i vo, De'e tamu vona-awatabai. Tamu tomogo kalefa talagina i yatoi wata i kaliene. Vuagina 'ana 'eba vatanitani i 'idewai wata kileu i didigi, tabwaneye 'eba 'atu'ai i yogoni. Mulietta tomotoga 'ifwaidi nimadie i yatoi i na 'isave'avinini, i 'a'avana nika i tauya i nago 'ani'ie.

<sup>34</sup> Tutuyanina i kumaga, tonibakula 'ifwaidi yana tofolovavo i vonedi i nago yana bakula 'ana to'isave'avinavo 'waidiega vuaga 'ifwaidi i na miedi faifaina.

<sup>35</sup> To'isave'avinanidi yana tofolova i 'ive'avinidi, tamu i nikeimo, tamu i nikei i wafa, wata tamu i lukileuya i wafa.

<sup>36</sup> Mulietta tonibakulanina tofolovavo fuedi i vetunedi wata bani'odi i munegidi.

<sup>37</sup> 'Eba ve'a'avaotoga taunina natuna i vetunei i vona i vo, De'e natuku, i na ve'ililibuyeni.” <sup>38</sup> Siwe tutuyanina to'isave'avinanidi i 'iseni i mimai 'aise'avadi i vo, Natunanina

'awaie de'e bakula i na veimeyeni, bega 'wa maia ta na luwewafai matatabuna ta na 'ewai.”<sup>39</sup> ✨Bega i 'ive'avini i taweni i obu kalimulie, bei i luwewafai.”<sup>40</sup> Mulieta Iesu me Diu to'edakumetavo i velutoliedi i vo, 'Wa da nuani, tutuyanina tonibakula i na maiga, to'isave'avinanidi bani'odi i na munegidi?”<sup>41</sup> Yana velutoli i tutuli i vo, 'A nuani tosakonanidi i na nikedi i na wafa, mulieta tomotoga 'ifwaidi i na vonedi i na veto'isave'avina bega tutuyanina i na kumakumaga vuaga i na 'a'anivelenedi 'waineye.”

<sup>42-43</sup> ✨Wata Iesu i vonedi i vo, 'Omi me Diu yama to'edakumetavo, siwe yami veto'isave'avina Yaubada yana 'Aila'a 'waineye i na elomi mali tomotoga i na veledi. Taunidi i na veto'isave'avina Yaubada yana 'Aila'a 'waineye, yadi sauluva 'atumaidi bani'odi vuaga.” Wata Iesu Yaubada yana Vona i sivemageseni tomotoga i vedumwe'ai'aieniga faifaina i vo,

To'aiyogona folova tamu i 'iseni siwe i baileni,  
Folovanina taunina 'unututu.

Yada 'Auvea Yaubada folovanina i vetovoi-vaitugani,  
'Ana 'isa 'waideye 'eba nua'ewa.”

[<sup>44</sup> Egavo i na tayaidi i na be'u folovanina tabwaneye i na tudabedabedi, wata 'ai'edi folovanina i na 'anifoia tomotoga tabwadie i na tukudakudadi i na vefwayafwaya.”]

<sup>45</sup> Tovelomu 'adi to'edakumetavo wata Diu totafalolo Falisi Iesu yana vona i nogai i 'asetai 'adi vona-awatabai, taunidi bani'odi to'aiyogonanidi wata to'isave'avinavo sakoidi.

<sup>46</sup> Igodi nuanuadi i da 'ive'avini siwe tomotoga i kololoyedi fai i vo, Taunina tamu Yaubada yana tolu'ivona.”

## 22

### *Vona-awatabai taunidi Yaubada i tayegidiga faifaidi.*

<sup>1-2</sup> Wata Iesu i ve tomotoga 'waidie vona-awatabaiega i vo, Tomotoga yadi luku Yaubada yana 'Aila'a 'waineye side bani'odi. Tamu toveimea bwaikina natuna iavetana yana nagi 'ana sakali i 'idewai. <sup>3</sup> I 'idewadewa i 'a'avana yana tofolovavo i vonedi i vo, 'Wa na nagoi tomotoganidi a tayegidiga, 'wa na vonedi i na maia.” I nagoi i vonevonediga nika i baila. <sup>4</sup> Mulieta toveimeanina yana tofolovavo 'ifwaidi i vonedi i vo, Tomotoganidi a vonedi i bailaga, wata 'wa na vonedi 'wa na vo, Bulumakau veve'anidi wata 'ifwaidi 'aisaya 'akonadi i lalamidi wata nani matatabuna i 'idewadi i lulukamata. 'Wa na maia sakalinina 'waineye.”<sup>5-6</sup> Siwe wata i baila i nagoi taunidi yadi nuanua 'waidie. Tamu i nago yana bakule, tamu i nago yana sitoa 'waineye, we'e



'ifwaidi toveimea yana tofолоvavo i 'ive'avinidi i nikedi i wafa. <sup>7</sup> Toveimeanina vala i nogai i nuasako bwaikina, bega yana tolugaviavo i vonedi i nagoi to'ainikenidi i luwewafadi wata yadi 'atamana i kabuni.

<sup>8</sup> I 'a'avana toveimeanina yana tofолоvavo i goleva'augidi i vonedi i vo, 'Ani'ani 'akonadi a 'idewadewa i lulukamata, siwe tomotoganidi a vonediga i baila, taunidi yadi nuanua i ve'etobodedi. <sup>9</sup> Tutuya de'e 'wa na nagoiga 'atamana bwaikina 'waineye bei egavo 'wa na veluagadiga 'wa na vonedi i na maia yaku sakali 'waineye i na 'ani.” <sup>10</sup> Bega tofолоvavo i nagoi 'atamane tomotoga fuedi i veluagadi, yadi sauluva 'atumaidi 'alo sakoidi matatabudi i vonedi i maia bega toveimeanina yana vanuga bwaikina i veadagi.

<sup>11-12</sup> Tomotoganidi i lukulukuga vanuge, nagi 'ana kaleko i veveledi bega i vavaigavu, mulieta toveimeanina i mai i na 'isedi. Tamu tomogo i 'iseni, nagi 'ana kaleko kebu i da vigavuyeni bega i velutolieni i vo, Iaku, 'omu kebu nagi 'ana kaleko 'u da vigavuyeni, awale 'u lukuma?” Tomogonina kebu tamu ava'ai i da voneyeniga.

<sup>13</sup> \*Bega toveimeanina yana tofолоvavo i vonedi i vo, Nimana wata 'agena 'wa yogonidi 'wa taweni i na obu dudubale, bei i na 'we'we'wela wata maigina i na yuyuyuya fai veviga bwaikina.”

<sup>14</sup> Iesu yana vona i ve'a'avai i vo, Yaubada tomotoga fuedi i goledi, nagediega 'adi 'aivia bani'odi i venuma'ivinedi we'e fuedi i baila.”

*Takesi 'ana yato faifaina Iesu i velutolieni.*

<sup>15</sup> Totafalolo Falisi Iesu yana vona i nogai bega i nagoi 'aise'avadi i veifufu, nuanuadi i na velutolieni bonana i na nogai 'ai'edi i na vekali 'adi fata i na 'ive'avini. <sup>16</sup> Bega yadi tomotoga wata 'ifwaidi Elodi yana tomotoga i vetunedi i maia Iesu 'waineye i velutoli i vo, Tove, yamu sauluva tonovidi, kebu 'u da vevekaliga. 'A 'asetamu tomotoga toketokedi kebu 'u da kololoyediga 'u lulumatanidi, we'e tomotoga sakoidi kebu 'u da vivieyediga, siwe 'u veve mogitana Yaubada yana nuanua tomotoga 'waimeye. <sup>17</sup> 'U da nuani, i lubwaineda 'ida me Diu ta na takesi Loma yadi toveimea bwaikina Sisa 'waineye 'alo kebu? Nuanuama 'a na 'asetai.”

<sup>18</sup> Iesu yadi nuanua sakoina i 'asetai begaidi i vonedi i vo, 'Omi tovekali, awale igodi 'wa sisiloloku. <sup>19-20</sup> Maninina 'wainega ta yatoyato takesi, 'wa na mieni ta na 'iseni.” Maninina i mieni i 'iseni i velutoliedi i vo, De'e mani 'waineye, aitoi 'anununa wata 'ana wagava?” <sup>21</sup> \*I vo, Sisa.” Bega Iesu i vonedi i vo, Vetuma 'ai'edi ava'ai Sisa faifaina, 'wa na

'aniveleneni 'waineye, we'e ava'ai Yaubada faifaina, wata 'wa na 'aniveleneni 'waineye.”<sup>22</sup> Iesu yana vona i nogai, nuadi i voganidi 'asa'aiana i 'iawenimo.

*Yawasa-vaitugana 'ana velutoli.*

<sup>23</sup> ✧ Aiatanina 'waineye, 'ifwaidi Diu totafalolo 'adi wagava Sadusi i maia Iesu 'waineye. Taunidi tovana igodina tomotoga kebu i na yawasa-vaitugana. <sup>24</sup> ✧ Tomotoganidi Iesu i velutolieni i vo, Tove, basenadiotoga Mosese yada veimea i kilumi i vo, 'Ai'edi tamu tomogo i na wafaga siwe kebu natunavoga, 'wabulina taina i na nagidi bega kwakwama i na vetubugidi tatana 'ana wagava wata 'ana wauma faifaiddi.”<sup>25</sup> We'e 'ima basenadi yama 'atamana 'waineye tamu tomogo ma tainavo 'adi 'aila'a 7, tulaiotogina i nagi kebu tamu natunaga i wafa. 'Wabula yadi bwa i nagia. <sup>26</sup> Wata i wafa, 'adi vetonu yadi bwa i nagidi, i nagoga taidiavo matatabudi 'wabulanidi taiadi i nagi. <sup>27</sup> Mulieta 'eba ve'a'ava 'waineye vavine yawaidi i 'a'ava. <sup>28</sup> 'Omi 'wa vonaga 'awaie towafa matatabudi i na yawasa-vaitugana, 'aiatanina 'waineye aitoi mogitana yana vavine fai matatabudi taiadi i nagi?”

<sup>29</sup> Iesu yadi velutoli i tutuli i vo, 'Omi 'wa vekali mogitana fai Yaubada yana Buki wata yana toketokena 'wa bavuyedi. <sup>30</sup> Tutuyanina towafa i na yawasa-vaitugana, yadi sauluva bani'odi anelose, nagi kebu. <sup>31-32</sup> ✧ 'Omi yami vona 'ana nogaya 'wa vo, Towafa kebu i na tovoi-vaitugana,” siwe a na vonemi. 'Ai'edi Mosese 'ana kilukiluma 'wa da lu'iawawadewai 'wa da 'iseni Yaubada i vonavona 'waimie yawasa-vaitugana faifaina i vo, Yau Ebelamo, Aisake, wata Iakobo yadi Yaubada.” De'e bani'odi Yaubada i voneyediga fai tomotoganidi basenadiotoga i wafa siwe 'asiau ma yawaidi taiadi i miamiani. Begaidi ta na 'asetai egavo 'akonadi i wafa 'asiau ma yawaidi i miamiani, kebu tamu aitoi wafawafanaga Yaubada mataneye.”<sup>33</sup> Tutuyanina 'aila'a Iesu yana ve i nogai nuadi i voganidi.

*Veimea bwaikaotogina.*

<sup>34-35</sup> Totafalolo Sadusi yadi velutoli Iesu i tutula-'atumaia bega kebu nuanuadi wata i na veifufu. Tutuyanina totafalolo Falisi i nogai, i va'auta iadi tamu i venua'ivineni, taunina ve'etoboda 'adi tove, i vetunei Iesu 'waineye. Nuanuadi i na velutolieni bonana i na nogai 'ai'edi i na vekali 'adi fata i na 'ive'avini. <sup>36</sup> I velutolieni i vo, Tove, veimeanidi Mosese 'wainega i maiga, ava'ai veimeaga bwaikaotogina?”<sup>37</sup> ✧ Yana velutoli Iesu i tutuli i vo, 'Auvea yami Yaubada 'wa na nuakalikalieni mogitana nuamiega, 'anu'anunumiega,

wata yami nuanua 'waidiega.”<sup>38</sup> 'Asa'aina veimeanina bwaikaotogina wata kumekumetana.<sup>39</sup> ☆We'e 'ana veluga wata bwaikaotogina, emiavo 'wa na nuakalikali taunimi 'ami nuakalikali bani'odi.<sup>40</sup> Veimea matatabuna i maiga Mosese 'wainega, wata Yaubada yana tolu'ivonavo yadi vona matatabuna, lamudi side veimeanidi 'ailuga.”

*Velutoli Yaubada 'ana Venua'ivina faifaina.*

<sup>41-42</sup> Mulieta totafalolo Falisi i maia Iesu 'waineye i velutoliedi i vo, 'Omi 'wa da nuaniga, Keliso kumanina Yaubada 'ana Venua'ivina tubuna aitoi?” Yana velutoli i tutuli i vo, Kini Devida.”<sup>43</sup> Iesu i vo, Tubunamona siwe awale 'Anu'anunu 'Atumaina Devida i tolivetovoni bega i ve'awa-Toveimea 'waineye? Basenadiotoga i vo,

<sup>44</sup> ☆Yaubada i vona 'aku Toveimea 'waineye, i vo,

Veimea a velemuga bega 'u na miabui 'aku 'atagiega,

I na nagoga 'amu gaviavo a na leodi bega 'u na veveimeyedi.”

<sup>45</sup> Keliso mogitana Devida 'ana wauma 'wainega i souyeni, siwe i vebwaika-'iaweni Devida, faifainanina Devida i ve'awa-Toveimea Keliso 'waineye.”<sup>46</sup> Kebu tamu aitoi 'ana fata Iesu yana vona i na tutuli, i ve'wadamo, wata 'awaie kebu i na vevelutolieniga fai i kololoyeni.

## 23

*Iesu i matakia ve'etoboda 'adi tove wata Falisi faifaidi.*

<sup>1</sup> Mulieta Iesu i veifufu 'aila'a wata yana tovetutuyamavo 'waidie.<sup>2-3</sup> I vo, Ve'etoboda 'adi tovevo wata totafalolo Falisi veimeanidi i maiga Mosese 'wainega 'adi tokiavemageta. Fai taunidi Mosese tutulina bonadi matatabuna 'wa na no-gaidi wata 'wa na vevematayakayaka, siwe yadi sauluva kebu 'wa na vetutuyamediga fai nani fuedi i tatalabodedi siwe wata i 'i'idewadi.<sup>4</sup> Yadi ve wata ve'etoboda vitadi, 'wa da vo venuana vitadi i da veve'ewami, siwe kebu tamu sai'afo i da 'ivaisemi bega veimeanidi 'wa na 'idewadi.

<sup>5</sup> ☆Nani fuedi i 'i'idewadi tomotoga matadie, nuanuadi i na 'ise'isedi 'adi subia faifaina. Tamu veimea i ve'ililibuyeniga side. Yaubada yana Vona 'ifwaidi i kilukilumidi i dodogidi didiwaka 'waidie, debadie wata nimadie i yogoyogoned i yabeyabedi. Nuanuadi didiwaka bwaikidi bega fuedi i na 'ise'isedi. Wata 'adi kaleko i lulumanamanawedi velu'ui faifaina nuanuadi tomotoga i na subisubiadi.<sup>6</sup> Sakali 'waidie nuanuadi i na mimiabui ma 'adi wagava taiadi, wata me Diu yada 'eba miava'auta 'waidie i mimiabui to'edakumetavo

☆ **22:39:** Vei 19:18; Lom 13:9-10; Gal 5:14    ☆ **22:44:** Same 110:1; Fol 2:34-35

☆ **23:5:** Mad 6:1; Sou 13:9

taiadi. <sup>7</sup>Yadi nuanua bwaikina tomotoga ma yadi ve'ililibu i na vevekaiwa 'waidie 'atamanafouye, wata i na ve'awa-tove 'waidie.

<sup>8</sup>Kebu i da lubwainemi tomotoga i na ve'awa-tove 'waimie fai ma fuemie Yaubada natunavo wata yami 'Auvea 'aitamogana. <sup>9</sup>Tamami 'aiseotogina abame i miamia, begaidi kebu tamu aitoi 'ana wagava 'wa na silakai 'waineye 'wa na vonavona 'wa na vo, Tamada.” <sup>10</sup>Wata kebu i da lubwainemi tamu aitoi ma yana subia i na golegolemi i na vo, Tove,” fai yami Tove 'aitamogana Keliso, kumaniku Yaubada 'ana Venua'ivina. <sup>11</sup>✧Aitoi 'ana wagava bwaikina 'waimiega, i lubwaineni ma yana nuaobu i na vetofolova 'waimie. <sup>12</sup>✧Aitoi taunina i na awa'ai'aiaga, 'awaie Yaubada i na kiaobuyeni, we'e aitoi taunina tonuaobu 'awaie Yaubada i na kialakai.

*Me Diu to'edakumetavo Iesu i awavesakoyedi.*

<sup>13</sup>'Omi ve'etoboda 'adi tovevo wata totafalolo Falisi, nuakalikalimi. 'Omi tovekali. Egavo nuanuadi i na luku Yaubada yana 'Aila'a 'waineye bega i na veveimeyedi, siwe 'omi yadi 'eda 'wa ve'etobodai. 'Omi kebu nuanuami 'wa na lukuga 'wa baila, we'e egavo nuanuadi i na luku siwe 'wa tovibodedi. [<sup>14</sup>'Omi ve'etoboda 'adi tovevo wata totafalolo Falisi, nuakalikalimi. 'Omi tovekali. Vekaliega 'wabu'wabulavo yadi vanuga 'wa eloelodi wata 'wa vevelu'ui manamanawedi 'ami subia faifaina. Yami sauluvanidi sakoidi faifaiddi vematavuloga bwaikaotogina 'wa na veluagai.]

<sup>15</sup>'Omi ve'etoboda 'adi tovevo wata totafalolo Falisi, nuakalikalimi. 'Omi tovekali. Fwayefwayeamo wata eyageamo 'wa nunagoi 'ani'ie bega 'ai'edi tamu tomotoga 'wa na veluagai 'wa 'ewa'ewai i na vetovetutuyama 'waimie wata yami sauluva i na vetutuyamedii. 'Wa veve 'waineye mulieta yana sakona 'omi yami sakona i na vebwaika-'iawedi. Ma fuemie vita 'wa na veluagai 'ai-'ala'alase, siwe yami tovetutuyamavo 'adi vita 'wa da vo i da luvelugai.”

<sup>16</sup>Wata Iesu to'edakumetanidi i awavesakoyedi fai nani 'atumaidi wata bwaikidi i baila, nuanuadi nani-'avo'avovo bega i vonedi i vo, 'Omi to'edakumetanimi matami 'uludi, nuakalikalimi. Fai 'wa veve 'wa vo, 'Ai'edi aitoi nuanuana yana vona'awaufaufa i na kiavetoketokei bega i na vo, A vona'awaufaufa Yaubada yana vanuga 'eba velu'ui 'wainega,” 'omi 'wa vo, 'Ana fata yana vona'awaufaufanina i na geuya.” We'e 'ai'edi i na vo, A vona'awaufaufa vanuga 'eba velu'ui 'ana vaigavu 'waidiega,” 'omi 'wa vo, Yana vona'awaufaufanina fa'alina, kebu 'ana fata i na geuya.”

17 'Omi 'wava'wavami, matami 'uludi. Ava'ai bwaikina? Vaigavu 'alo Yaubada yana vanuga 'eba velu'ui, kumanina vaigavunina i 'ivetabuya.” 18 Wata 'wa veve 'wa vo, 'Ai'edi aitoi nuanuana yana vona'awaufaufa i na kiave-toketokei bega i na vo, A vona'awaufaufa 'eba velomu 'wainega,” 'omi 'wa vo, 'Ana fata yana vona'awaufaufanina i na geuya.” We'e 'ai'edi i na vo, Yaubada 'ana 'anivelena 'eba velomu tabwaneye, 'wainega a vona'awaufaufa,” 'omi 'wa vo, Yana vona'awaufaufanina fa'alina, kebu 'ana fata i na geuya.” 19 'Omi mogitana matami 'uludi. Ava'ai bwaikina? Yaubada 'ana 'anivelena 'alo 'eba velomu, kumanina nuakalikalina i 'ivetabuya? 20 Bega 'ai'edi tamu tomogo i na vona'awaufaufa 'eba velomu 'wainega, bega 'akonadi nuakalikalina 'eba velomu tabwaneye taiadi i awavetubamidi. 21 Wata 'ai'edi tamu tomogo i na vona'awaufaufa vanuga 'eba velu'ui 'wainega, 'akonadi Yaubada taiadi i awavetubamidi fai yana 'eba mia. 22 ✨Wata bani'odi 'ai'edi tamu tomogo i na vona'awaufaufa abama 'wainega, 'akonadi Yaubada yana 'eba miabui wata taunina bei i miamiaga taiadi i awavetubamidi.

23 'Omi to'edakumetanimi, nuakalikalimi. 'Omi tovekali. Veimea siaidi 'wa veve'ililibuyedi we'e veimea bwaikidi 'wa baibailedi. 'Ai'edi 'ani'ani 10 'waimie, 'aitamogana 'wainega 'wa na 'anivelena-maimaiga Yaubada 'waineye. Wata nani saiotogidi bani'odi matasilisilili 10, 'aitamogana 'wainega 'wa na 'anivelena-maimaiga Yaubada 'waineye. Bani'odi 'wa na vevesauluvediga 'atumaina, siwe wata veimea bwaikidi 'wa da vematayakeyakedi, bani'odi sauluva tonovidi, 'isanuakaliki wata tutuya fuedi taunimi 'wa da tautauyemi Yaubada 'waineye. Naninidi bwaikidi 'wa da 'i'idewadi wata siaidi taiadi. 24 'Omi to'edakumetanimi, matami 'uludi. Nani siaidi faifaidi 'wa nuanua, we'e nani bwaikidi 'wa vevenuafanidi, yami sauluva bani'odi tamu tomogo 'ana alu'aie nawagala i na obu i na iwayavuleni, we'e maidoga i na yemuyamo.

25 'Omi to'edakumetanimi, nuakalikalimi. 'Omi tovekali. Tomogomi 'wa 'ivivigavudi we'e inagemi vainago 'ana ve'isakololo wata veumokai, yami sauluva bani'odi vedi wata 'aivo, dumwedi 'wa tamatamadi we'e inagedi yoke 'anikudana. 26 'Omi Falisi, matami 'uludi. Nagami vedi inageneye yoke 'wa na tamai, nika bega wata tomogona vunavunagina.

27 'Omi to'edakumetanimi, nuakalikalimi. 'Omi tovekali. 'Omi bani'odi taumata, tabwana i 'ivivigavuya we'e inagena bokana.

28 ✧ 'Ami 'isa 'wainega 'wa da vo 'atumaimi, we'e inagemi vekali wata sakona i veadagimi.

*Iesu i vona-vagata to'edakumeta 'adi vematavuloga faifaina.*

29 'Omi to'edakumetanimi, nuakalikalimi. 'Omi tovekali. Basenadiotoga tubumiavo Yaubada yana tolu'ivonavo i lu-vewafadi. We'e 'omi taumata 'atumaidi 'wa 'idewadi matumatu 'waidie tolu'ivonanidi luludi faifaidi, wata Yaubada yana tomotoga 'atumaidi i wafaga 'adi 'eba nuave'avina 'wa 'ivivigavudi. 30 Wata 'omi 'wa vonavona 'wa vo, 'Ima 'ako basenadi tubumavo taiadi 'a da miamiaga, ava'ai i 'idewaiga 'ako 'aisedi i da 'idewai, bani'odi Yaubada yana tolu'ivonavo i nikedi i wafa." 31 ✧ De'e bani'odi 'wa voneyediga, taunimi 'wa lu'ivoneyemi 'omi to'ainikenidi tubudiavo. 32 Vetuma tubumiavo 'wa na saladiga 'wa 'idewai, Yaubada yana tolu'ivonavo matatabudi 'wa na luwewafadi.

33 ✧ 'Omi tosakona 'adi 'aila'a, 'o'olo bani'odi. Yami sakananidi faifaidi Yaubada i na veimea 'wa na luku Vatu'ai Manamanawena 'waineye, siwe kebu 'ami fata 'wainega 'wa na dega. 34 ✧ Bega a na vonemi, tolu'ivonavo, to'asetavo wata tovevo a na vevetunedi 'waimie, 'ifwaidi 'wa na nikedi i na wafa, 'ifwaidi 'wa na tutufwasedi 'ai lagalagana 'waidie, 'ifwaidi 'wa na toke 'wa na fitalidi yami 'eba miava'auta 'waidie wata 'wa na lusogi-vuvuedi 'atamana 'aitamogana 'aitamogana 'waidiamo. 35 ✧ Begaidi Yaubada yana tomotoga 'atumaidi i luwewafadiga faifaidi, wata taunimi yami sauluvanidi sakoidi faifaidi, 'adi vita matatabuna 'omi 'wa na tovoiedi. Basenadiotoga Keni taina Ebeli kebu yana sakonaga i luwewafai. Bei tubumiavo 'ainike i velamuya i maiga Sekalaia 'waineye, kumanina Belekaia natuna, yami 'aila'a i luwewafai vanuga 'eba velu'ui nageneye, 'eba velomu lilivaneye. 36 A vona mogitana 'waimie, 'adi vematavuloga matatabuna i na mai 'asiau tomotoganimi 'waimie."

*Me Ielusalema faifaidi Iesu i taivonavona.*

37 ✧ Iesu i taivonavona i vo, Ieu, me Ielusalema, me Ielusalema, Yaubada yana tolu'ivonavo 'wa luwewafadi wata yana tomata'aulelevo i vetunediga 'waimie, 'wa tutuwefadi kileuyega. Kamukamu natudiavo fafedie i vevedogodi, wata bani'odi yau, tutuya fuedi igodi a da 'avalamaigimi siwe 'wa baibaileku. 38-39 ✧ Tutuya de'e i na nagoga yami 'atamana i na velovi, we'e yau kebu wata 'wa na 'ise'isekuga i na nagoga mulieta 'wa na vo, Taunina i mai

'Auvea 'ana wagavayega ta na subiai,” nika bei wata 'wa na 'iseku.”

## 24

*Iesu i veifufu vanuga 'eba velu'ui 'ana geu faifaina.*

1 Iesu i vona'a'avana i tautauya vanuga 'eba velu'ui 'wainega yana tovetutuyamavo i mai nani 'ifwaidi i 'isediga vanuga 'eba velu'ui 'waineye nuanuadi i na veni. 2 ✨Iesu i vonedi i vo, Vanuganina 'wa 'ise'iseniga mogitana 'ana 'isa 'atumaina, siwe 'awaie 'ami gaviavo i na maia matatabuna i na geuya, wata kileunidi bega i bibinaga i na tutuwealidi, matatabuna i na tubakabakaledi.”

*Tutuya vitadi faifaidi Iesu i vona-vagata.*

3 Mulieta Iesu i nago i laka 'Oya Olive tabwaneye i miabui. Yana tovetutuyamavo i maia 'aise'avadi i velutolieni i vo, Nuanuama 'a na 'asetai no'o vanuga 'eba velu'ui 'ana geu faifaina 'u vonaga, ma'avia, wata ava'ai tugusaga i na vema bega 'a na 'asetai sai'afoga 'u na vilamu 'u na mai, wata fwayafwaya 'ana 'eba ve'a'ava.”

4-5 ✨Iesu i vonedi i vo, 'Wa na 'isa'isa bega kebu tamu aitoi i na vekaliemiga, fai tomotoga fueidi i na mai 'aku wagavayega igodi i na vo, Yau 'asa'aiana Keliso, Yaubada 'ana Venua'ivina.” Yadi vonayega fueidi i na vevekaliedi. 6 Lilivamie vetalaga butu'aidi 'wa na noganogaidiga wata 'ani'ieyega vala'avadi, siwe a vovona-vagasemi, kebu nu-afoumi i na veviga. Naninidi mogitana i na souyedi we'e fwayafwaya 'ana 'eba ve'a'ava bola. 7 'Eba veimea bwaikidi wata 'eba veimea bwaikidi 'ifwaidi taiadi i na vevetalaga, we'e 'awalawa wata 'awalawa 'ifwaidi taiadi i na vevetalaga. 'Awalawa fueidi 'waidie yoyoyo i na yueyue wata i na loka. 8 Tutuyanina vavine i na vebutudiga veviga bwaikina i na vebaedi, wata bani'odi naninidi a veifufuyediga tutuyanina i na souyediga veviga wata 'we'wela i na velamu.

9 ✨Tomotoga 'aila'a tulina tulina faifaiku i na vedumwe'ai'aiemi, i na 'ive'avinimi i na 'anivelenemi vita 'wa na veveluagadi, mulieta i na luvewafami. 10 Fai vita 'wa na veveluagadiga fueidi yadi vetumagana i na mwea i na baileku, ediavo i na vedumwe'ai'aiiedi wata i na 'etogiluedi wafa 'waineye. 11 ✨Wata tolu'ivona-vekavekali fueidi i na souyedi tomotoga fueidi i na vekaliedi. 12 Sakona i na vebwaika-'afo'afo ma'itufa tomotoga fueidi yadi nuakalikali i na vesiai. 13 Siwe egavo i na vetoketoke i na tovoivoi

✨ 24:2: Luk 19:44 ✨ 24:4-5: Mad 24:23-24; 1 Ion 2:18 ✨ 24:9: Mad 10:22; Ion 16:2 ✨ 24:11: 1 Ion 4:1

fa'alina i na nagoga tutuya 'eba ve'a'ava 'waineye 'ita'ita'i i na veluagai Yaubada 'wainega.

<sup>14</sup> ✨Yaku tomotoga Vala 'Atumaina i na lulu'age-vuvueni 'aila'a tulina tulina 'waidie, i na lu'ivona 'waidie Yaubada nu-anuana tomotoga fuedi i na luku yana 'Aila'a nageneye bega i na veveimeyedi. De'e Valanina nagami tomotoga matatabudi i na 'asetai, mulieta fwayafwaya 'ana 'eba ve'a'ava.

*Tamu nani maigikokololona.*

<sup>15</sup> ✨(Buki tokiluma bonaku, Iesu yana vona de'e 'wa na lu'iawawaiga 'wa na venua'ivineni nika 'wa na 'asetai.) Wata Iesu i vonedi i vo, Bola tamu nani 'wa na 'iseni maigikokololona vanuga 'eba velu'ui nageneye i na tovo-tovoi. Naninina faifaina basenadiotoga Yaubada yana tolu'ivona 'ana wagava Daniela i vona-vagata, vonanina Yaubada yana Buki 'waineye i 'eno'eno. <sup>16</sup> Tutuyanina tugusanina i na souyeni, egavo i miamiani 'awalawa Iudia nageneye, i lubwainedi i na dega i na nagoi 'oyeye. <sup>17-18</sup> 'Ai'edi aitoi masi'edeye i na miamia, kebu 'ana fata i na luku vanuge yana kukua i na 'ewadi i na dega-matayo'o, wata aitoi i nagoga bakule, kebu 'ana fata i na vilai i na mai vanuge 'ana kaleko 'ana 'ewa faifaina. <sup>19</sup> Toveinainage wata vauvau nuakalikalidi fai kebu 'adi fata i na dega-matayo'o veviga bwaikina i na veluagai. <sup>20</sup> Yaubada 'waineye 'wa na velu'ui bega naninina kebu i na sousouyeni toalu'uye 'wei bwaikina 'ana tutuye 'alo 'Aiata Veawai 'waineye. <sup>21</sup> ✨Yaubada fwayafwaya i 'idewavauyeni i maiga 'asiau veviga i sousouyedi siwe sai'afu, we'e 'aiatanina 'waineye veviga bwaikaotogina i na souyeni, i na 'a'avana kebu wata bani'odi i na sousouyeni. <sup>22</sup> Vitanina de'e 'ana tutuya Yaubada i na 'ive'ale'usai, 'ai'edi kebu, tomotoga i na 'a'ava. Tomotoganidi Yaubada i venua'ivinediga faifaiddi i na 'ive'ale'usai bega yadi mia i na ve'atumai.

*Keliso-vekavekali i na souyedi.*

<sup>23-24</sup> ✨Tutuyanina 'waineye 'ai'edi aitoi i na vonemi i na vo, Sino'o, Keliso i le'wa," 'alo i na vo, Side taunina," kebu bonana 'wa na nogai 'wa na vo 'ako, Mogitana," fai keliso-vekavekali wata tolu'ivona-vekavekali i na sousouyedi. I na souyediga 'eba nuavogana wata 'eba nua'ewa i na 'i'idewadi, igodi nuanuadi tomotoganidi Yaubada i venua'ivinediga vekaliega nuadi i na 'ewadi. <sup>25</sup> Naninidi 'awaie i na souyediga 'akonadi 'wa nogai, a vovona-vagasemi.



<sup>26</sup> Begaidi 'ai'edi aitoi i na vo, Keliso sino'o, wala'aie," kebu bei 'wa na nagoga, 'ai'edi i na vo, Keliso side vanuga nageneye," bonana kebu 'wa na nogaiga. <sup>27</sup> Kebu bonadi 'wa na nogaiga fai yau a vetomotogaotoga yaku souyagi 'wa da vo tomuyoana i da kianamali abama matatabuna i da magetai, tomotoga matatabumi 'wa na 'isa'a'avaku.

<sup>28</sup> 'Ai'edi manusibosibo 'wa na 'isedi i na vava'auta bei mogitana tamu nani wafana i 'eno'eno.

*Iesu yana vila-vaitugana faifaina.*

<sup>29</sup> ✧ Tutuyanina vitanina i na 'a'avana nika inala i na lu'waugi, weta'i yana mageta i na 'a'ava, 'ubwana i na avuta abamega, wata nani matatabuna toketokedi abame i na yue. <sup>30</sup> ✧ Tutuyanina 'waineye tugusa yau a vetomotogaotoga faifaiku i na souyeni abame, we'e fwayefwayeye 'aila'a tulina tulina ma yadi venuafouviga i na 'we'wela fai i na 'iseku yau a vetomotogaotoga abamega a na mimai waowa 'wainega ma yaku toketokena wata ma magetaku mataududulina. <sup>31</sup> ✧ Evulega butu'aina bwaikina i na yuvei, mulieta yaku anelose a na vetunedi yaku tomotoga vevenua'ivinidi i na va'augidi i na miedi. Tomotoganidi i na miediga fwayafwaya matatabuna 'wainega, inala yana 'eba lakayega wata yana 'eba inivayega, bolimanayega wata yavalatayega.

<sup>32</sup> Modawa 'wa na nuani. Tutuyanina i na idiaga ta 'asetai 'aisaya i veyafa. <sup>33</sup> Wata bani'odi 'ai'edi tugusanidi a voneyediga 'wa na 'isedi, 'wa na 'asetai yaku souyagi 'akonadi i le'wale'wa. <sup>34</sup> A vona mogitana 'waimie, tutuya de'e 'ana tomotoga bola i na miamiani naninidi matatabuna i na souyedi. <sup>35</sup> Abama wata fwayafwaya 'awaie i na 'a'ava, we'e yaku vona kebu tamu sai'afo i na 'a'ava, i na 'eno-vagata."

*Iesu yana mai-vaitugana 'ana tutuya kebu tamu aitoi i da 'asetai.*

<sup>36</sup> ✧ Wata Iesu i vonedi i vo, Yaku mai-vaitugana kebu tamu aitoi i da 'asetai, ava'ai 'aiataga 'alo ava'ai 'awasasaga 'waineye a na vilaku. Anelose abame kebu i da 'asetai, 'alo yau, kumaniku a vetomotogaotoga, Tamaku 'aiseotogina i 'asetai. <sup>37</sup> ✧ Yaku mai-vaitugana 'waineye tomotoga yadi sauluva bani'odi Noa yana tutuye tomotoganidi. <sup>38-39</sup> ✧ Basenadiotoga Noa yana tutuye tomotoga i nunuatahutavuna, 'ani'ava, yemu'ava, nagi'ava, ava'ai i sousouyediga tomotoganidi kebu i da 'asetai, nika Noa i dodoga yana wakeye mwai bwaikina i ula tomotoganidi matatabudi i ve'alawafawafa. Yau a vetomotogaotoga

✧ 24:29: 2 Fit 3:10; Ve 6:12-13 ✧ 24:30: Ve 1:7; Mad 26:64 ✧ 24:31: 1 Kol 15:52; 1 Tes 4:16 ✧ 24:36: Fol 1:7; 1 Tes 5:1-2 ✧ 24:37: Nag 6:5-8 ✧ 24:38-39: Nag 7:6-23

yaku mai-vaitugana wata bani'odi. <sup>40</sup> Tutuyanina 'waineye tomotoga 'adi 'ailuga i na folofolova bakule, tamu i na 'ewai i na naweni, we'e tamu i na baileni. <sup>41</sup> Vevine 'adi 'ailuga 'ani'ani i na 'i'idewadewa, tamu i na 'ewadi i na nawedi, we'e tamu i na baileli.

<sup>42</sup> ✧ Begaidi 'wa na miamia 'wa na 'isa'isa fai yau 'ami Toveimea yaku souyagi 'ana tutuya kebu 'wa da 'asetaiğa. <sup>43</sup> ✧ Wa na nuani. Tamu tomogo tovainago yana mai 'ana tutuya i da 'asetaiğa, i da 'isa'isa bega tovainagonina kebu 'ana fata i na luku yana vanuge. <sup>44</sup> 'Omi wata bani'odi 'wa na 'isa'isa fai 'aiatanina 'waineye 'wa na vo, Kebu i na maiga," yau a vetomotogaotoga bei a na le'wa.

*Vona-awatabai Iesu yana mai wata tofolova 'adi tutula 'ana 'ewa faifaidi.*

<sup>45</sup> A na vonemi tofolova 'atumaina, kumanina ma yana 'asete wata ma 'ana vetumagana. 'Ana toveimea i voneni yana tofolovavo 'ifwaidi i na 'i'isave'avinidi wata 'adi'adi i na veleveledi 'aiata 'aitamogana 'aitamogana mulieta i tauya. <sup>46</sup> Tutuyanina 'ana toveimea i na vilai i na mai, 'ai'edi i na vematayakayaka folovanidi i na folofolovidi 'eba sosoana bwaikina tofolovanina 'waineye. <sup>47</sup> ✧ A vona mogitana 'waimie, 'ana toveimea i na voneni yana vanuga wata yana kukua matatabuna 'adi to'isave'avina.

<sup>48-49</sup> We'e 'ai'edi tofolova sakoina, bola yana nuanua i na vo, 'Aku toveimea bola, kebu i na mai-matayo'oga," bega enavo tofolova i na nikenikedi we'e mali tomotoga sakoidi taiadi i na 'ani'ani wata ufa toketokena i na yemuyemu bega ma fuedie nuadi i na lugaugaudi. <sup>50</sup> Bani'odi i na vevesauluvediga tamu tutuya tofolovanina kebu i da 'asetaiğa yana toveimea i na mai yawaina i na velovogi. <sup>51</sup> I na toke i na nikei yana sauluvanina sakoina faifaina mulieta 'eba veviga bwaikina 'waineye i na yatoi, tovekali taiadi i na 'we'we'wela wata maigidi i na yuyuyudi."

## 25

*Tomotoga yadi luku Yaubada yana 'Aila'a 'waineye 'ana vona-awatabai.*

<sup>1</sup> ✧ Wata Iesu i vonedi i vo, 'Aiatanina a na vilaku a na mai, tomotoga yadi luku Yaubada yana 'Aila'a 'waineye side bani'odi. Tamu vavine i na nagi bega enavo ne'e'ela 10 ma yadi mageta i nagoi tomogo 'ana lukamata faifaina. <sup>2</sup> 'Adi 5 ma yadi 'asete, wata 5 nuadi 'anigaugaudi. <sup>3-4</sup> Nuadi 'anigaugaudi yadi mageta ma ufadi we'e i na 'a'avaga faifaina

kebu tamu i da 'ewaiga, we'e 'adi 5 ma yadi 'aseta yadi mageta i iwagidi wata yadi ufa i 'ewadi. <sup>5</sup> Tonaginina i 'ivogavogana bega vevinenidi 'adi 10 matadi i duduna i 'eno-mataiva.

<sup>6</sup> 'Akonadi 'eno-waube'u nika vegole i nogai i vo, Side tonagi i mimai. 'Wa maia, 'wa na yogobodebodeni." <sup>7-8</sup> Vevinenidi 10 i 'isa yadi mageta i kialakaidi nika vevine nuadi 'anigaugaudi i vona ediavo 'waidie i vo, Yama mageta i 'weu'weu, yami ufayega 'wa da iwagama." <sup>9</sup> Vevine ma yadi 'aseta ediavo yadi vona i tutuli i vo, Kebu, ufa de'e 'omi wata 'ima kebu 'ada fataga. 'Wa nagoi 'eba kimwane 'waineye bei yami ufa 'wa na 'ewadi." <sup>10</sup> Ne'e'elanidi nuadi 'anigaugaudi i tauya i nunagoi kimwane faifaina, nika tonagi i le'wa. Ne'e'elanidi 'adi 5 i 'idewadewa i lulukamata taiadi i luku nagi 'ana 'ani 'waineye, 'awa i sibodai."

<sup>11</sup> ✨I saiboda mulieta vevinenidi kimwane faifaina i nagoiga i le'wai, i vegole i vo, 'Aueva, 'Aueva, 'a da lukuwa."

<sup>12</sup> Tonaginina i vo, Aigodi 'omi kebu a da 'asetamiga."

<sup>13</sup> ✨Iesu yana vonanina 'ana 'eba ve'a'ava 'waineye i vo, Begaidi 'omi 'wa na 'isa'isa fai yaku mai-vaitugana 'ana 'aiata 'alo 'ana 'awasasa kebu 'wa da 'asetauga."

*Tomotoga yadi folova 'ana tutula Yaubada 'wainega 'ana vona-awatabai.*

<sup>14</sup> Wata Iesu i vona-awatabai yana mai faifaina i vo, Tamu tomogo i tautauya 'ani'ie yana tofolovavo i goleva'augidi yana kukua matatabuna i veledi i na 'isave'avinidi. <sup>15</sup> ✨Tamu i veleni lubulubu 5000, tamu lubulubu 2000, we'e tamu lubulubu 1000, nika i tauya. 'Aitamogana 'aitamogana i velediga yadi 'aseta wata yadi toketokena 'ana 'etowava 'wainega.

<sup>16</sup> Tofolovanina lubulubu 5000 i 'ewaiga i nago kebu i da mia-maimaiga maninina i vefoloveni, wata 'wainega 'imoso'i i veluagai lubulubu 5000. <sup>17</sup> Wata bani'odi tofolovanina lubulubu 2000 i 'ewaiga i vefoloveni, wata lubulubu 2000 i 'ewai. <sup>18</sup> We'e tofolovanina 'adi vetonu, kumanina lubulubu 1000 i 'ewaiga, i nago fwayafwaya i alai 'ana toveimea yana mani i tavuni.

<sup>19</sup> Toveimeanina i nagoga tutuya manamanawena i mia, mulieta i vilai i mai yana tofolovavo i vonedi i maia nuanuana i na 'asetai yana mani i 'imoso'iedi 'alo kebu. <sup>20</sup> Tofolovanina lubulubu 5000 i 'ewaiga i luku maninina ma 'ana 'imoso'i lubulubu 5000 i veleni i vo, 'Aueva, basenadi lubulubu 5000 'u velekuga a vefoloveni, side wata lubulubu 5000 a veluagai."

<sup>21</sup> ✨Ana toveimea i voneni i vo, Mogitana 'omu todumwebika, yamu folova 'atumaiotogina. Mani sai'afo siaina 'waineye 'u dumwebika, bega a na yatomu 'u na veto'isave'avina mani

bwaikina 'waineye. 'Waikuye taiadi ta na miamia ta na sososoana.”

<sup>22</sup> Mulieta tofolovanina lubulubu 2000 i 'ewaiga i luku i vona 'ana toveimea 'waineye i vo, 'Auvea, basenadi lubulubu 2000 'u veleku a vefoloveni, side wata lubulubu 2000 a veluagai.” <sup>23</sup> Yana toveimea i voneni i vo, Mogitana, 'omu todumwebika, yamu folova 'atumaiotogina. Mani sai'afosiaina 'waineye 'u dumwebika, bega a na yatomu 'u na veto'isave'avina mani bwaikina 'waineye. 'Waikuye taiadi ta na miamia ta na sososoana.”

<sup>24</sup> Mulieta tofolovanina lubulubu 1000 i 'ewaiga i luku i vona 'ana toveimea 'waineye i vo, 'Auvea a 'asetamu, 'omu tomogo fa'alimu. Kebu 'u da bakubakulaga, 'u 'a'aialamo, tofolova i folofolova we'e 'omu tutula'ava 'u 'ewa'ewamo. <sup>25</sup> Yau a kololo 'ai'edi yamu mani a da vevuyoi bega a nago a giveni fwayafwaya nageneye. Side yamu maninina, 'asa'aiana 'u 'ewai.” <sup>26</sup> 'Ana toveimea i yagaia i vo, 'Omu tofolova sakoimu, dumwemu 'aina. 'Omu yamu nuanua igodina yau kebu a da bakubakulaga, a 'a'aialamo wata tofolova i folofolova faifaiku, we'e yau tutula'ava a 'ewa'ewamo. <sup>27</sup> Bega 'u nuani yaku mani 'u da naweni banika 'waineye. A vilaku a mai yaku maninina ma 'ana 'imoso'i a da 'ewai.”

<sup>28</sup> Bega yana tofolovavo 'ifwaidi i vonedi i vo, Lubulubu 1000 'wa eloi taunina tofolova sakoina, kumanina ma yana lubulubu 10,000 'wa na veleni. <sup>29</sup> ✨'Wa na eloiga fai 'ai'edi aitoi 'ana veuveuta 'wainega i na folova-'atumai, wata 'ana 'imoso'i i na veluagai bwaikaotogina, we'e 'ai'edi aitoi 'ana veuveuta kebu i na folova-'atumaieniga veuveutanina siaina i na elo'a'avai. <sup>30</sup> We'e de'e tofolovanina dumwena 'aina ava'ai 'ana 'atumaina? 'Wa naweni 'wa taweni i na obu dudubale bei i na 'we'we'wela wata maigina i na yuyuyuya.”

### *Tomotoga i na vonayavuga Iesu mataney.*

<sup>31-32</sup> ✨Wata Iesu i vonedi i vo, 'Awaie yau a vetomotogao-toga ma yaku mageta mataududulina a na mai abamega anelose matatabudi taiadi. Ma yaku veimea a na miabui 'eba miabui 'ai'aiwabuna 'waineye, mulieta tomotoga 'adi 'aila'a tulina tulina fwayafwaya matatabuna 'wainega i na maia i na vonayavuga matakuye. I na 'a'ava a na 'ivisidi bani'odi 'aisaya 'adi to'isave'avina sifi wata goti i yayato'edi. <sup>33</sup> Yaku tomotoga a na yatodi 'aku 'atagiege we'e 'ifwaidi tomotoga 'aku wamayega.

<sup>34</sup> ✨I na 'a'avana mulieta yau yadi Kini tomotoganidi 'aku 'atagiege a na vonedi a na vo, 'Omi 'akonadi Tamaku i vesauluva 'atumaina 'waimie, 'wa maia 'wa na luku yana

'Eba Veimea 'waineye. Bola fwayafwaya kebu i da 'idewaiga, Yaubada 'eba veimeanina i 'idewa-vagaseni faifaimi.

<sup>35</sup> 'Wa na lukuga fai basenadi a lase, 'wa ve'aniku, 'anigoku i lala, ufa 'wa veleku, tuliku siwe 'wa goleku a laka yami vanuge. <sup>36</sup> Kebu 'aku kalekoga, 'wa ve'weseniku, a viga, 'wa lukebeku, a luku vanuga 'eba yogona 'waineye, 'wa fofogofeku." <sup>37</sup> Yaku tomotoganidi yadi sauluva 'atumaidi i na velutolieku i na vo, 'Auvea, ma'avia 'a 'isemu 'u lase 'a ve'animu, 'alo 'anigomu i lala ufa 'a velemu? <sup>38</sup> Ava'ai tutuyaga 'a 'isemu kebu a da 'isa'innanamuga 'a golemu 'u laka yama vanuge, 'alo kebu 'amu kalekoga a ve'wesenimu? <sup>39</sup> Wata ma'avia 'u viga 'alo 'u luku vanuga 'eba yogona 'waineye 'a fofogofemu?" <sup>40</sup> \*Yau yadi Kini yadi velutoli a na tutuli a na vo, A vona mogitana 'waimie, tutuyanina tamu iaku tomogo-'avo'avovo 'wa 'ivaiseniga siwe 'asa'aiana yau 'wa 'ivaiseku."

<sup>41</sup> \*We'e tomotoganidi 'aku wamayega a na vonedi a na vo, 'Omi 'akonadi Yaubada i veimea vematavuloga 'wa na veluagai, 'wa nagoi 'ai-'ala'alata kebu yana 'weuga 'waineye, 'ainina Yaubada i 'idewa-vagaseni Seitani enavo yaiaina ta-iadi faifaiddi. <sup>42-43</sup> 'Wa na nagoiga fai basenadi a lase siwe kebu 'wa da ve'anikuga, 'anigoku i lala ufa 'wa bodaku, yau tuliku 'wa 'iseku siwe kebu 'wa da goleku a da wai yami vanuge. Kebu 'aku kalekoga 'asa'aiana 'wa 'isekumo, a viga wata vanuga 'eba yogona 'waineye a luku siwe kebu 'wa da 'isave'avinikuga." <sup>44</sup> Tovedumwe'ai'ainidi i na velutolieku i na vo, 'Auvea, ma'avia 'a 'isemu, 'u lase, 'anigomu i lala, wata kebu 'amu kalekoga 'a bodamu. We'e 'omu tomogo tulimu, 'u viga, 'alo vanuga 'eba yogona 'waineye 'u luku 'a dumwe'aiemu kebu 'a da 'ivaisemuga?" <sup>45</sup> Yau yadi Kini yadi velutoli a na tutuli a na vo, A vona mogitana 'waimie, tutuyanina tamu iaku tomogo-'avo'avovo 'wa bodaiga 'alo kebu 'wa da 'ivaiseniga, siwe 'asa'aiana yau 'wa bodaku wata kebu 'wa da 'ivaisekuga." <sup>46</sup> Mulieta a na veimea tovedumwe'ai'ainidi i na nago vematavuloga kebu yana 'a'avaga 'waineye, we'e tomotoganidi yadi sauluva 'atumaidi mia 'atumaina wata miamia-vagaina i na veluagai."

## 26

*I lauala Iesu 'ana laugiva faifaina.*

<sup>1-2</sup> \*Iesu yana mai-vaitugana faifaina i ve i 'a'avana, mulieta yana tovetutuyamavo i vonedi i vo, 'Akonadi 'wa 'asetai 'aiata

'ailuga i na 'a'avana Sakali Uvi'agalatagona i na velamu. Tutuyanina 'waineye yau a vetomotogaotoga i na 'aniveleneku i na tutufwaseku 'ai lagalagana 'waineye.”

<sup>3</sup>Tutuyanina 'waineye tovelomu 'adi to'edakumetavo wata me Diu to'edakumetavo 'au'auveadi i va'auta tovelomu 'adi to'edakumeta bwaikina 'ana wagava Kaiafa yana vanuga bwaikina 'waineye. <sup>4</sup>Bei i veifufu bani'odi i na munega givagivayega Iesu i na 'ive'avini i na luvewafai. <sup>5</sup>Siwe wata i vo, Kebu sakalie ta na 'ive'aviniga i na nunago tomotoga fuei i na daba fai nuanuadi Iesu.”

*Iesu 'ana iwaga 'atamana Bedani 'waineye.*

<sup>6</sup>Iesu bola i miamia 'atamana Bedani, Saimoni kumanina basenadi i vewaiwaiseselaga yana vanuge. <sup>7</sup>I 'ani'ani nika tamu vavine bunama i mieni, magaina 'atumaina wata 'ana tutula bwaikina Iesu nava'auna i iwagi. Bei i koiaga kileu i 'idewai 'ana 'isa 'atumaotogina, 'ana wagava alibasita.

<sup>8</sup>Iesu yana tovetutuyamavo i 'iseni ma yadi luvulewa i manini i vo, Awale bunama i ve'amubwadodoyeni? <sup>9</sup>Bunamanina i lubwaineni i da vekimwaneyeni mani bwaikina i da veluagai 'wainega wekowekoma i da 'ivaisedi.” <sup>10</sup>Iesu yadi nuanua i 'asetai bega i vonedi i vo, Vavine kebu 'wa na 'ivebunumayagi. Naninina i 'idewaiga 'atumaotogina 'waikuye i lubwaineni. <sup>11</sup>Wekowekoma tutuya fuei taiadi 'wa na miamia we'e yau kebu. <sup>12</sup>✧I iwagikuga tomogoku i 'idewa-vagaseni 'aku ve'ufa faifaina, me Diu yada sauluva bani'odi. <sup>13</sup>A vona mogitana 'waimie, bola Valaku 'Atumaina i na lulu'ageyeni fwayafwaya matatabuna 'waineye, vavinenina yana folova 'waikuye wata i na lulu'ivoneyeni 'ana 'eba nuave'avina.”

*Iudasa nuanuana Iesu i na 'etogiluvani.*

<sup>14-15</sup>Mulieta Iesu yana tovetutuyamavo <sup>12</sup>'waidiega tamu iadi 'ana wagava Iudasa Isakaliota i nago tovelomu 'adi to'edakumetavo 'waidie i vonedi i vo, 'Ai'edi Iesu a na 'aniveleneniga 'waimie ava'ai 'wa na veleku?” Yana vona i noganogaiga kileu siliba matatabuna <sup>30</sup>i veleni. <sup>16</sup>Tutuyanina 'wainega i nagoga Iudasa i velamu i lalauala 'eda'eda 'atumaidi Iesu 'ana 'etogiluva faifaina.

*Iesu ma yana tovetutuyamavo i 'ani.*

<sup>17</sup>✧Me Diu Sakali Uvi'agalatagona 'ana 'aiata 'eba velamu 'waineye beledi kebu 'ana 'ivebwaika i 'ani'ani, 'adi 'eba tolinuata'i basenadiotoga Yaubada tubudiavo i 'ita'ita'iedi 'awalawa Itifita 'wainega faifaina. 'Aiatanina 'waineye Iesu yana tovetutuyamavo i maia i velutolieni i vo, Ava'aibe bei

nuanuamu Uvi'agalatagona 'ana 'ani'ani 'a na 'idewadewa?"  
 18 Iesu yadi velutoli i tutuli i vo, 'Wa na nagoi Ielusalema, tomogonina 'akonadi 'wa 'asetai, 'wa na voneni 'wa na vo, Yama Tove i vonaga yana tutuya 'akonadi i le'wa nuanuana 'ima yana tovetutuyamavo taiadi Uvi'agalatagona faifaina 'a na 'ani yamu vanuge." 19 Yana tovetutuyamavo i tauya i nagoi, ava'ai Iesu i vonediga Uvi'agalatagona faifaina i 'idewadewa.

20 'Akonadi i lavia, bega Iesu ma yana tovetutuyamavo 12 i maia i miabui i na 'ani. 21 I 'ani'ani Iesu i vonedi i vo, A vona mogitana 'waimie, 'waimiega tamu i na 'etogiluveku. 22 Tovetutuyamavo yana vona i nogai nuafoudi i veviga bega 'aitamogana 'aitamogana i vevelutolieni i vo, 'Auvea, voke yau, siwe a nuani kebu." 23 \*Iesu i vo, 'Ama 'ailugana 'ama beledi 'a lulu'utuva 'aivoeye, kumanina." 24 Basenadiotoga i kilumi Yaubada yana Buki 'waineye yau a vetomotogaotoga i na nikeku a na wafa, i vonaga mogitana, we'e yau a vetomotogaotoga 'aku to'etogiluva nuakalikalina. 'Ako kebu i da tubugaga 'atumaina, siwe fai i tubuga yana sakananina faifaina veviga bwaikina i na veluagai." 25 Iudasa, taunina to'etogiluva i vona i vo, Tove, voke yau, siwe a nuani kebu." Iesu i vo, 'U vonaga, 'asa'aiana 'omu."

### *Iesu yana 'ani.*

26 \*Bola i 'ani'ani, Iesu 'ani'ani i 'ewai, i vekaiwa Yaubada 'waineye mulieta i 'ivivia i 'a'avana yana tovetutuyamavo i veledi. I vonedi i vo, 'Ani'ani de'e 'asa'aiana tomogoku, 'wa na 'ewai 'wa na 'ania."

27-28 \*Mulieta oine ma vedina i 'ewai, i vekaiwa Yaubada 'waineye i 'a'avana i veledi i vo, Matatabumi 'wa na yemu. Oine de'e 'asa'aiana dayagiku, i na ilolo fuemi faifaimi bega Yaubada yami sakona i na nuatavunidi. Yaku wafanina 'wainega Yaubada yana Veakutagona 'Ivauna basenadi faifaina i vona'awaufaufa i na velamu 'waimie. 29 A vona mogitana 'waimie, oine de'e kebu wata a na yemuga, i na nagoga mulieta oine 'ivauna taiadi ta na yemu Tamaku yana 'Eba Veimea nageneye." 30 Iesu i vona'a'ava lei subisubia tamu i silakai i lei mulieta i nago i laka 'Oya Olive.

### *Iesu i vona-vagata Fita i na ve'eweniga faifaina.*

31 \*Iesu i vona yana tovetutuyamavo 'waidie i vo, 'Ako lo-vananina matatabumi 'wa na degaloveku fai basenadiotoga Yaubada yana Buki 'waineye i kilumi faifaimi i vo, Yaubada to'isave'avina i na nikei i na wafa, we'e 'aisaya sifi i na ve'aladegadega."

\* 26:23: Same 41:9    \* 26:26: Ion 6:54-56    \* 26:27-28: Sou 24:8; 1 Kol 10:16

\* 26:31: Ion 16:32; Sek 13:7

32 ✨ Vonanina i kilumiga i na nikeku faifaina mogitana, siwe tutuyanina Yaubada i na sivetovoiku a na kumeta a na nago Galili bei ta na veluaga.”

33 Fita i vona-matayo'o i vo, 'Ai'edi tomotoga matatabudi i na degalovemu, we'e yau kebu tamu sai'afo a na degalove-muga.” 34 ✨ Iesu Fita i voneni i vo, A vona mogitana 'waimuye 'ako lovane bola kamukamu kebu i na kwagega nagami tutuya 'aitonu 'u na bavusebeku.” 35 Fita i vo, 'Ai'edi taiadi ta na wafaga i lubwaineku, siwe kebu a na vo, Yau Iesu kebu a da 'asetaiaga.” Ava'ai Fita i voneyeniga, enavo 'ifwaidi wata bani'odi i vona.

*Iesu i nago Gedesemani bei i velu'ui.*

36 Mulieta Iesu ma yana tovetutuyamavo i nagoi tamu wala'ai 'atumaina 'waineye 'ana wagava Gedesemani, bei yana tovetutuyamavo i vonedi i vo, Side bei 'wa na miabui 'wa na miamiani, yau sino bei a na nago a na velu'ui.” 37-38 ✨ Tomotoga 'adi 'aitonu i vonedi taiadi i nagoi, Fita, wata Sebedi natunavo 'adi 'ailuga Iemesa wata Ioni. Venuafouviga wata nuavita bwaikina Iesu i vebaeni i vonedi i vo, Yaku nuavita bwaikaotogina 'wa da vo nuafouku i da 'e'etokadia wata 'wainega sai'afoa a na wafa. Side bei 'wa na miamia kebu 'wa na 'enoga ta na 'isa'isa.”

39 ✨ I vaganago i lumata'afufu i velu'ui i vo, Tamaku, 'ai'edi yamu nuanua i na lubwaineniga vita de'e wata wafa 'u da 'ewadi 'waikuyega. Siwe 'asa'aiana, de'e kebu yau yaku nuanuaga, 'omu yamu nuanua bega a na vematayakeyakenimo.”

40 I velu'ui i 'a'avana i vilai i nago yana tovetutuyamavo i 'isedi i 'eno'enovi. I luvagonidi Fita i voneni i vo, Awale 'wa 'eno'enovi, ta da 'isa'isa 'awasasa 'aitamogana. 41 'Wa na 'isa'isa wata 'wa na vevelu'ui nika kebu vetalaimimila 'waineye 'wa na be'uga. Nuanuami 'wa na 'ivaiseku siwe yami toketokena i mwea.”

42 ✨ Wata 'ana veluga Iesu i vaganago i velu'ui i vo, Tamaku, 'ai'edi kebu 'ana fata 'aku vita wata wafa 'u na 'ewadiga, 'asa'aiana a tauyeku 'waidie, yamu nuanua a na 'idewai.” 43 Wata i vilai i mai yana tovetutuyamavo i 'isedi i 'eno'enovi fai matadi i duduna-'afo'afo. 44 Wata i 'iawedi i vilai i nago 'ana vetonu i velu'ui, yana velu'uinidi i luvaituganidi.

45-46 Mulieta i vilai i mai yana tovetutuyamavo i vonedi i vo, 'Omi 'alo 'wa 'eno'enovi. 'Wa 'isanaweni, 'aku to'etogiluva i le'wa. Yau a vetomotogaotoga yaku tutuya 'akonadi i le'wa



bega i na 'aniveleneku tosakona yadi toketokena 'waineye. 'Wa tovoi ta na nagoi 'waidie.”

*Iesu 'ana 'ive'avina.*

<sup>47</sup> Bola Iesu i veveifufu nika Iudasa i mai, kumanina tamu Iesu yana tovetutuyamavo 12 'waidiega. 'Aila'a bwaikina taiadi i maia, ma yadi kefata wata fulumai, tovelomu 'adi to'edakumetavo wata me Diu to'edakumetavo 'au'auveadi 'waidiega i vetunedi i maia. <sup>48</sup> To'etogiluvanina 'akonadi 'aila'a i vona-vagasedi yana tugusa i vo, Tomogonina a na 'avalamaigiga, kumanina nuanuami, 'wa na 'ive'avini.” <sup>49</sup> Tutuyanina i le'wai, Iudasa tonovina i nago Iesu i 'avalamaigina i voneni i vo, Tove, kaiwa.”

<sup>50</sup> Iesu i voneni i vo, Iaku, ava'ai nuanuamu 'u 'idewamatayo'oi.” Mulieta Iudasa enavo i maia Iesu i toke i 'ive'avini. <sup>51</sup> \*Tamu Iesu yana tovetutuyama i 'isedi, yana kefata i yo'ei tovelomu bwaikina yana tofolova igodi i da nikei taniga'avana i tutuomuya. <sup>52</sup> Iesu tovetutuyamanina i voneni i vo, 'U 'ailove, yamu kefata 'ana 'eba 'aidodoga 'waineye 'u dodogi, egavo kefatayega i na vetalagaga wata mali tomotoga kefatayega i na luvewafadi. <sup>53</sup> 'Wa da nuani, 'ai'edi nuanuaku a da velu'ui Tamaku 'waineye, anelose 'aila'a 12 'alo 'aivia bani'odi i da vetunedi i da 'ita'ita'iekua. <sup>54</sup> I da 'ita'ita'iekuga, ava'ai basenadiotoga i kilumiga Yaubada yana Buki nageneye naninidi i lubwainedi i na souyedi, 'ako kebu 'adi mogitana i da souyedi.”

<sup>55</sup> Tomotoganidi i maia Iesu 'ana 'ive'avina faifaina i vonedi i vo, Yau 'wa da vo to'ainike bega 'wa maia ma yami kefata wata fulumai 'aku 'ive'avina faifaina. 'Aiata 'aitamogana 'aitamogana a mimiabui vanuga 'eba velu'ui nageneye a veve siwe kebu bei 'wa da 'ive'avinikuga. <sup>56</sup> \*We'e naninidi 'wa 'idewadiga 'waikuye nika ava'ai basenadi Yaubada yana tolu'ivonavo i kilumidi faifaiku yana Buki 'waineye, 'adi mogitana i souyedi.”

Iesu i vona'a'avana yana tovetutuyamavo matatabudi i degalovei.

*Iesu i tovoi Diu Kaniselo matadie.*

<sup>57</sup> Lovananina 'waineye ve'etoboda 'adi tovevo wata me Diu to'edakumeta 'au'auveadi i va'auta tovelomu bwaikina yana vanuge 'ana wagava Kaiafa. To'ive'avinanidi Iesu i 'ewai i mieni 'waidie. <sup>58</sup> Fita i yogo'waila siwe 'ani'ieogose kebu lilivadie, i nago i luku vanuganina 'ana kali nageneye, tanotanoge i miabui tolugaviavo taiadi, Iesu i vemata'i'i'ieni.

<sup>59</sup> Vanuganina nageneye tovelomu 'adi to'edakumetavo wata 'ifwaidi Diu Kaniselo Iesu yana vonayavuga i

noganogai nuanuadi vekaliega i na 'ivewafai, siwe kebu tamu yana sakona i da veluagaiga. <sup>60-61</sup> ☆Tomotoga fue di i tovoi i lu'ivona-vekavekali siwe kebu mogitanaga. Mulieta 'eba ve'a'ava 'waineye tomotoga 'adi 'ailuga i tovoi i vona i vo, Tamu tutuya 'a nogai de'e kumanina i vo, Yau vanuga 'eba velu'ui a da geuyaga, 'aku fata 'aiata 'aitonu nagedie a da vetovoi-vaitugani.” <sup>62</sup> Tovelomu bwaikina i tovoi i voneni i vo, I vevitamuga, bonadi 'u tutuli, i vona mogitana 'alo kebu?”

<sup>63</sup> ☆Siwe Iesu kebu tamu ava'ai i da voneyeniga i veve'wada. Wata tovelomu bwaikina i velutoli-vaitugana Iesu 'waineye i vo, Yaubada miamia-vagaina mataneyeye 'u na vona mogitana kebu 'u na vekaliga, mogitana 'omu Keliso, Yaubada 'ana Venua'ivina wata Natuna 'alo kebu?” <sup>64</sup> ☆Tovelomu bwaikina yana velutoli Iesu i tutuli i vo, 'U vonaga, 'asa'aiana bani'odi. Siwe matatabumi a na vonemi. 'Awaie yau a vetomotogotoga 'wa na 'iseku ma yaku veimea Yaubada Bwaikaotogina 'ana 'atategie a na miabui, wata abamega a na obuobuma waowa 'wainega.”

<sup>65</sup> ☆Iesu yana vona faifaina tovelomunina ma yana kamogala 'ana talauma i silabu'i i vo, 'Wa nogai? I vona-awadamana Yaubada 'waineye. 'Akonadi yana sakona 'wa nogai, tovevita 'ifwaidi 'asa'aiana, kebu i na vonavonaga. <sup>66</sup> ☆We'e 'omi 'wa da nuani i na wafa 'alo kebu?” Kaniselovo yana vona i tutuli i vo, Yana vonanina 'ana nogaya i lub-waineni wafa.”

<sup>67-68</sup> ☆Mulieta i kiwakiwala maigineye, nimadi i nunumidi i nikenikei, i 'a'avana matana i umadina nimadiega i nikenikei wata i sidibidibieni i vo, 'Omu igodi Yaubada 'ana Venua'ivina, yama fio, 'u da nuaniga aitoi i nikemu?”

### *Fita i ve'eweni Iesu.*

<sup>69</sup> We'e Fita i miabui i miamia tanotanoge, i miamiaga nika tamu vavine, tovelomu bwaikina yana tofolova, i mai i voneni i vo, Iesu tomogo Galili, 'omu wata taiadi 'wa yabayaba.”

<sup>70-71</sup> Siwe tomotoga fue di matadie i ve'ewa i vo, 'Omu ava'ai 'u vonevoneyeni.”

Mulieta i vaganago kali 'ana 'eba luku 'waineye, wata tamu tofolova vevinena Fita i 'iseni tomotoga i vonedi i vo, Tomogo de'e Iesu tomogo Nasaledi taiadi i yabayaba.” <sup>72</sup> Nika wata Fita i ve'ewa i vo, Tamada, kebu tamu sai'afo a da 'asetai tomogonina.”

☆ **26:60-61:** Ion 2:19-21 ☆ **26:63:** Ais 53:7 ☆ **26:64:** Dan 7:13; Mad 24:30

☆ **26:65:** Ion 10:33 ☆ **26:66:** Ion 19:7; Vei 24:16 ☆ **26:67-68:** Ais 53:5

<sup>73</sup> Kebu tutuya manamanawenaga, nika tomotoganidi bei i miamianiga i nagoi Fita 'waineye i voneni i vo, Vona mogitana, 'omu tamu Iesu iana, yamu itu 'ana nogaya 'omu wata Iesu ma fuemie me Galili.” <sup>74</sup> Nika Fita i ve'awafatafata i vo, 'Ai'edi a da vevekaliga, Yaubada i da nikeku, we'e aigodi, tomogonina kebu a da 'asetat-tonovi.” Fita i vona'a'ava nika kamukamu i kwage. <sup>75</sup> ✨I nogai, i nuani Iesu yana vona i voneniga i vo, 'Ako lovane bola kamukamu kebu i na kwagega nagami tutuya 'aitonu 'u na bavusebeku.” Fita vonanina i nuani i souyeni 'atamane i taibwaubwau.

## 27

### *Iesu i naweni Failato 'waineye.*

<sup>1</sup> I 'atai 'awa'awaiogose tovelomu 'adi to'edakumetavo, wata me Diu to'edakumetavo 'au'auveadi Iesu yana wafa 'ana 'eda tonovina faifaina i vena'ivina. <sup>2</sup> I veifufu i 'a'avana bulava kainumu 'wainega i yogoni i naweni i 'aniveleneni Failato 'waineye, taunina gabemani, toveimea bwaikina Loma 'wainega.

### *Iudasa yana wafa ifufuna.*

<sup>3</sup> ✨Tutuyanina Iudasa, taunina to'etogiluva i 'asetai to'edakumetanidi yadi veimea Iesu i na wafa, i nuavilai, maninina siliba 30 i naweni nuanuana i na vevilai tovelomu 'adi to'edakumetavo wata me Diu to'edakumetavo 'au'auveadi 'waidie. <sup>4</sup> I vonedi i vo, Yau a sakona, tomogonina a 'etogiluneniga yana sauluva tonovidi, siwe 'wa veimea i na wafa.” I voneni i vo, 'Omu taunimu, awale 'u vonevonema?” <sup>5</sup> Bega Iudasa maninina i taweni i nago vanuga 'eba velu'ui 'ana 'efe'efeye, mulieta i obu i nago taunina i 'eto'imeni.

<sup>6</sup> Tovelomu 'adi to'edakumetavo maninina i 'ewai i vona i vo, De'e maninina tamu tomogo yana wafa tutulina, 'ai'edi ta na yatoi vanuga 'eba velu'ui 'ana mani taiadi yada veimea ta na geuya.” <sup>7</sup> I veifufu i 'a'avana taunidi yadi nuanua i fali'atumaieni bega maninina 'wainega tamu tanoga i kimwanei. Tanoganina nagami nau 'ana to'abi yadi fwayafwaya dekudekuna 'wainega i 'abi'abidi nau, siwe tutuya de'e i kimwanei i na vetaumata mali tomotoga faifaiddi. <sup>8</sup> Fai maninina 'wainega i kimwaneiga bega i velamu i maiga 'asiau i gologoleni Tanoga Dayadayagina.

<sup>9-10</sup> ✨Tanoganina i kimwaneiga, Yaubada yana tolu'ivona 'ana wagava Ielemaia yana vona-vagata 'ana mogitana i souyeni. Basenadiotoga i vona i vo,

Me Isileli taunidi yadi nuanua i fali'atumaieni,

tomogo tutulina i yatoiga mani siliba 30, 'wainega nau 'ana to'abi yadi tanoga i kimwanei. 'Ana kimwane faifaina yau nagami 'Auvea Yaubada i voneku.”

*Iesu i vonayavuga Failato mataneye.*

<sup>11</sup> We'e Iesu i tovtovoi Failato mataneye, taunina gabemani Loma 'wainega, i velutolieni i vo, 'Omu me Diu yadi kini?” Iesu i vo, 'Asa'aiana 'u vona bani'odi.” <sup>12</sup> ✧Siwe tutuyanina tovelomu 'adi to'edakumetavo wata me Diu to'edakumetavo 'au'auveadi i vevevita-maimaigiga Iesu kebu i da vonavona i veve'wadamo. <sup>13</sup> Begaidi Failato i voneni i vo, I vevevitamuga nani tulina tulina 'waidiega 'u noganogai 'alo kebu?” <sup>14</sup> Siwe Iesu i baila kebu nuanuana vonanidi i na tutulidi begaidi Failato nuana i vogani.

*Failato i veimea Iesu i na wafa.*

<sup>15</sup> Malamala 'aitamogana 'aitamogana me Diu i sakasakali Uvi'agalatagona faifaina. Sakalinina 'waineye me Diu fue di tamu iadi yogoyogonina i vevenua'ivineni bega gabemani i 'e'etoyavuya vanuga 'eba yogona 'wainega. <sup>16</sup> Tutuyanina 'waineye tamu tomogo 'ana wagava Balaba i miamia vanuga 'eba yogona nageneye, taunina to'ainike tomotoga fue di i 'asetai. <sup>17-18</sup> ✧Me Diu to'edakumetavo yadi nuanua Failato i 'asetai, fai Iesu i ve'unumagigieni begaidi i 'aniveleneni. Bega tutuyanina tomotoga fue di i va'auta Failato i velutoliedi i vo, Aitoi tomotogaga nuanuami a na 'etoyavuya, Balaba, 'alo Iesu, kumanina i golegoleni Keliso?”

<sup>19</sup> Failato i miabuiga vonayavuga 'ana 'eba miabui 'waineye, bola i vevelutolitolu nika tamu tomogo vala i mieni Failato yana vavine 'waidiega i vo, Tomogo we'e kebu i da sakonaga. Kebu tamu ava'ai 'u na 'idewai 'waineye fai lovane 'a 'enoneganega 'a 'iseni 'a kololo wata nuafouma i veviga.”

<sup>20</sup> Failato yana vavine 'adi 'enoneganega bola i veveifufuyeni, tovelomu 'adi to'edakumetavo wata me Diu to'edakumetavo 'au'auveadi 'aila'a nuadi i 'ani'anidi bega Failato i na voneni Balaba i na 'etoyavuya we'e Iesu i na luyewafai.

<sup>21</sup> ✧Mulieta Failato i velutoli-vaitugana 'waidie i vo, Aitoi tomotogaga nuanuami a na 'etoyavuya?” 'Aila'a i vo, Nu-anuama Balaba.” <sup>22</sup> Wata Failato i velutoliedi i vo, We'e Iesu, kumanina i golegoleni Keliso, bani'odi a na munegi?” I vo, 'U tutufwaseni 'ai lagalagana 'waineye.” <sup>23</sup> Nika Failato i velutoli-vaituganedi i vo, Yana sakona ava'ai?” Siwe to-motoga i toke i vegolegole i vo, 'U tutufwaseni 'ai lagala-gana 'waineye.” <sup>24</sup> Tutuyanina Failato i 'asetai tomotoga

kebu nuanuadi yana nuanua, 'aise'avadi i veve'alamagi'ai sai'afoga vetalaga i da souyeni, bega ufa i mieni matadie nimana i lekoadi. I vonedi i vo, De'e yami 'eba 'isa, tomogo de'e yana wafa 'ana vita yau kebu a na tovoieni, 'omi 'ami vita.”<sup>25</sup> 'Aila'a matatabudi yana vona i tutuli i vo, 'Asa'aiana yana wafa 'ana vita 'ima natumavo taiadi 'a na tovoieni.”<sup>26</sup> Fai tomotoga nuanuadi Balaba, Failato i 'etoyavuya we'e ma'itufa i veimea Iesu i toke i fitali i 'a'avana i 'aniveleneni me Loma tolugaviavo 'waidie i na tutufwaseni 'ai lagalagana 'waineye.

*Tolugaviavo Iesu i 'ivekokovi.*

<sup>27</sup> Mulieta Failato yana tolugaviavo Iesu i naweni gabe-mani yadi vanuga bwaikina 'waineye. Bei tolugaviavo 'aila'anidi matatabudi i maia i tovififineni i na sidibidibieni.<sup>28</sup> 'Ana kaleko i yavudi mali kaleko yamoyamoina 'wainega i vekalekoi.<sup>29</sup> I vekalekoi i 'a'avana fisili ma yana 'ibadi i 'etofifini 'unu'ununeye i biuleni wata wautogana i 'ewai i vekia'umia 'ana 'atagiega. Vaigavunidi kini 'adi vaigavu bani'odi, igodi i 'odu'odu mataneye i sidibidibieni, i vo, Kaiwa, 'omu me Diu yadi kini.”<sup>30</sup> ✧ I kiwakiwali wata wautogananina 'wainega 'unu'ununeye i 'a'ainike.<sup>31</sup> Naninidi i 'idewadi i 'a'avana, kalekonina yamoyamoina i yavuya taunina 'ana kaleko 'wainega i vekalekoi, mulieta i vagavaia i naweni i na tutufwaseni 'ai lagalagana 'waineye.

*Iesu 'ana tutufwatagi.*

<sup>32</sup> I souyedi i nunagoi tamu tomogo Sailini 'ana wagava Saimoni i veluagai i lukakadeni Iesu 'ana 'ai lagalagana i eva.<sup>33</sup> I 'ewa i nagoi i le'wa tamu 'awalawa 'waineye 'ana wagava Goligota, 'ana saivila 'Unu'unu Lulu'ava.<sup>34</sup> ✧ Bei oine i 'idewai tamu konini golana taiadi i veleni i na yemu bega 'ana kini'ona kebu i na veviga, siwe i baila veviganina faifaina i tauyeni.

<sup>35</sup> ✧ Mulieta i tutufwaseni 'ai lagalagana 'waineye, i 'a'avana tolugaviavo nuanuadi Iesu 'ana kaleko i na veusedi begaidi tamu 'wava i 'waveni bani'odi kate. 'Ai'edi aitoi i na kumetaga ava'ai kalekoga nuanuana i na 'ewai.<sup>36</sup> I 'a'avana mulieta i miabui i 'isa'isamo.<sup>37</sup> 'Ana 'ai lagalagana tabwan-eye vonanina 'wainega i vevitaiga i kilumi i tutufwaseni i vo,  
TOMOGO DE'E IESU, ME DIU YADI KINI.

<sup>38</sup> ✧ Wata tovainago 'adi 'ailuga i tutufwasedi, tamu Iesu 'ana 'atagiega, tamu 'ana wamayega.

<sup>39-40</sup> ✧ Tomotoga 'ai lagalagana lilivaneamo i nunagoi, i veugalewalewa wata Iesu i yagayagaia i vo, 'Omu igodi vanuga

✧ 27:30: Ais 50:6 ✧ 27:34: Same 69:21 ✧ 27:35: Same 22:18 ✧ 27:38: Ais 53:12 ✧ 27:39-40: Same 22:7; Ion 2:19

'eba velu'ui 'u da sigeuya wata 'aiata 'aitonu nagedie 'u da vetovoia. 'Ai'edi 'omu Yaubada natuna, nika taunimu 'u 'ita'ita'iemu, 'u obuma 'ai lagalagana 'wainega.”

41-42 Wata bani'odi tovelomu 'adi to'edakumetavo, ve'etoboda 'adi tovevo, wata me Diu to'edakumetavo 'au'auveadi i sidibidibieni i vo, Tomotoga 'ifwaidi i 'ita'ita'iedi, we'e taunina kebu 'ana fata. Igodi me Isileli yada Kini. 'Ai'edi 'asiauotoga i da obuma 'ai lagalagana 'wainega ta da ve'awamogitana. 43 ✧I vetumagana Yaubada 'waineye wata i vo, Yau Natuna,” nika ta na 'iseni 'ai'edi mogitana Yaubada nuanuana i na 'ita'ita'ieni.” 44 Wata bani'odi tovainagonidi i tutufwasediga ma fuedie i manini.

### *Iesu i wafa.*

45 'Aiata 'ana utukamwana 'waineye fwayafwaya matatabuna i dudubali, dudubalanina i 'eno'eno 'awasasa 'aitonu. 46 ✧Lavilavie bani'odi 3 kiloki Iesu i toke i vegole me Diu bonadiega i vo, Iloi, Iloi, lema sabakitani,” 'ana saivila, Yaku Yaubada, yaku Yaubada, awale 'u bailaotogeku?” 47 'Ifwaidi tomotoga i tovoivoiga bonana i nogai i vo, Ilaitia, kumanina basenadiotoga i nago abame, i golegoleni nuanuana i na mai i na 'ivaiseni.” 48 Tamu tomogo i lilide i nago kikifa i lu'utuvi oine yuyuna 'waineye, tamu 'ai 'waineye i velugaganeni i 'iyoyoeni Iesu 'waineye nuanuana i na yemu. 49 Nika 'ifwaidi i vo, 'U ve'wada, nagami ta na 'iseni voke Ilaitia i mimai i na 'ita'ita'ieni.”

50 Wata Iesu i toke i vegole, 'anu'anununa i tauyeni nika yawaina i 'awatagoni.

51-52 ✧Vanuga 'eba velu'ui nageneye tamu kaleko bwaikina Yaubada yana tutudaba tabutabuotogina i sisibodeni. Tutuyanina Iesu yawaina i 'a'avaga kalekonina i 'anilabu'alugedi, tabwanega i obu dibuneye, nika bani'odi i sibaleni 'eba luku Yaubada 'waineye. Yoyoyo i yue, kileu i 'anifuadi, wata taumata 'ifwaidi i si'ididi, Yaubada yana tomotoga 'atumaidi basenadi i wafaga, fuedi i yawasa. 53 'Adi taumata i 'iawedi, mulieta tutuyanina Iesu wafayega i tovoi tomotoganidi i nagoi Ielusalema, bei tomotoga fuedi i 'isedi.

54 We'e tolugaviavo ma yadi to'edakumeta 'ai lagalagana lilivaneye i tovoi i 'ise'iseni, nika yoyoyo i yue, dudubala wata nani 'ifwaidi i 'isedi i kololo bwaikina i ve'awamogitana i vo, Vona mogitana, taunina Yaubada Natuna.”

55 ✧Wata vevine fuedi 'ani'ieyega i tovoi i 'isanago 'ai lagalagana 'waineye, kumanidiavo Iesu taiadi Galiliega i maia 'ana to'aivaita. 56 Vevinenidi 'waidiega 'adi 'aitonu side

✧ 27:43: Same 22:8; Ion 5:18 ✧ 27:46: Same 22:1 ✧ 27:51-52: Sou 26:31-33; Ibu 10:19-20 ✧ 27:55: Luk 8:2-3

'adi wagava, Meli 'atamana Magidala 'wainega, Meli Iemesa ma taina Iosefa inadi, wata Sebedi yana vavine, kumanidi Iemesa ma taina Ioni inadi.

*Iesu 'ana ve'ufa.*

<sup>57</sup> 'Akonadi i laviotogi tamu tomogo 'atamana Alimadia 'wainega i mai 'ana wagava Iosefa, taunina tamu Iesu yana tovetutuyama wata 'ai'aiwabuna. <sup>58</sup> ✧ I nago Failato 'waineye i velu'ui Iesu tomogona faifaina. Bega Failato yana tolu-gaviavo i vonedi Iesu tomogona i na ta'ia Iosefa i na veleni. <sup>59-60</sup> ✧ Iosefa Iesu tomogona i naweni kaleko 'ivauna wata 'avu'avuna 'wainega i fania, mulieta taunina 'ana taumata bogiotoga i ala-vagaseniga matumatu 'waineye, bei i ve'ufai. I ve'ufaina kileu bababana i ketoi i mieni taumata 'awana i vetovibodai mulieta i tauya. <sup>61</sup> Meli 'atamana Magidala 'wainega ma wagavina Meli i miabui taumata matanega i 'ise'iseni.

*Iesu 'ana taumata i ve'isabodeni.*

<sup>62-63</sup> ✧ Iesu i tutufwaseniga me Diu yadi 'Aiata 'Idewadewa 'waineye, bega i 'atai tovelomu 'adi to'edakumetavo wata totafalolo Falisi i nagoi Failato 'waineye i voneni i vo, 'Auvea, tamu vona a nuanuani Iesu kumanina tovekali basenadi ma yawaineye i vona i vo, A na wafa siwe 'aiata 'ana vetonu 'waineye wata a na tovoi.” <sup>64</sup> Fai bani'odi i voneyedi nuanuama 'u na veimea taumata i na ve'isabodeni i na nagoga 'aiata 'aitonu i na 'a'avana mulieta i na 'iaweni. I na ve'isabodeniga nika yana tovetutuyamavo kebu 'adi fata i na nago tomogona i na vinagoi i na yatovai'edeni, we'e tomotoga i na vekaliedi i na vo, 'Akonadi i tovoi wafayega.” Nika vekalinina i na vebwaika-'afo'afo nagami yana vekali sai'afo siaina.” <sup>65</sup> Bega Failato i vonedi i vo, Tolugaviavo a tauyedi, 'wa nawedi taumata i na 'isave'avini, 'akonadi i 'asetai siwe 'wa na ve'isaboda-'atumaieni.” <sup>66</sup> Failato i vonedi i 'a'avana, i tauya i nagoi, taumatanina 'ana saiboda 'waineye yadi tugusa i yatoi bega kebu tamu aitoi 'ana fata i na luku, wata tolu-gavianidi i vonedi i na ve'isabodeni nika i tauya.

## 28

*Iesu i tovoi-vaitugana wafayega.*

<sup>1</sup> Me Diu yadi 'Aiata Veawai i 'a'avana, Tafalolo 'awa'awaiogose, Meli 'atamana Magidala 'wainega ma wagavina Meli i tovoi i nagoi taumata i na 'iseni.

<sup>2</sup> Yoyoyo bwaikina i yuega 'Auvea yana anelose abamega i obuma kileu bababana bega taumata i sibodaiga i bifeleni i laka tabwaneye i miabui. <sup>3</sup> Anelosenina 'ana 'isa 'wa da

vo tomuyoana i da kianamali we'e 'ana kaleko 'adi lau'avu mataududulidi. <sup>4</sup> Tolugavianidi i 'iseni i kololo bwaikina i tatava nika i 'anifoidi 'adi 'isa 'wa da vo i da wafa.

<sup>5</sup> Anelosenina vevine i vonedi i vo, We'e 'omi kebu 'wa na kolologa. A 'asetami Iesu kumanina i tutufwaseniga 'ai lagalagana 'waineye 'wa lulualeni. <sup>6</sup> \*De'e kebu, 'akonadi i tovoi wafayega bani'odi basenadi i vona. 'Wa maia 'wa na 'iseni 'ana 'ivi'ava."

<sup>7</sup> \*Mulieta wata i vonedi i vo, Tutuya de'e 'wa na vila-matayo'omi 'wa na nagoi yana tovetutuyamavo 'wa na vonedi 'wa na vo, Iesu 'akonadi wafayega i tovoi, i kumekumeta 'awalawa Galili, 'wa na nagoi bei taiadi 'wa na veluaga. Side bani'odi."

<sup>8</sup> Vevinenidi yana vona i nogai nika i tauya ma yadi kololo wata ma yadi sosoana i lilide i nunagoi tovetutuyamavo i na vonedi. <sup>9</sup> I nunagoiga nika Iesu i veluagai i vonedi i vo, Ekwavo, kaiwa." I vaganagoi 'waineye ma yadi ve'ililibu i be'u mataneye, 'ageneye i 'abi i subiai." <sup>10</sup> \*Wata Iesu i vonedi i vo, Kebu 'wa na kolologa, 'wa na nagoi taikwavo 'wa na vonedi i na nagoi Galili bei taiadi 'a na veluaga."

*Taumata 'ana tove'isaboda yadi lu'ivona.*

<sup>11</sup> Iesu i vona'a'avana vevine i tauya i nunagoi, wata tolugaviavo 'ifwaidi, kumanidiavo taumata i 'iveve'isabodeniga i nagoi Ielusalema naninidi i souyediga matatabuna i lu'ivoneyedi tovelomu 'adi to'edakumetavo 'waidie. <sup>12-13</sup> \*Mulieta tovelomu 'adi to'edakumetavonidi wata me Diu to'edakumetavo 'au'auveadi i va'auta i veifufu yadi nuanua i 'idewai. I 'a'avana, tolugavianidi i vonedi i mai mani bwaikina i veledi wata i vonedi i vo, 'Wa na nagoi 'wa na vonavona 'wa na vo, Lovane 'a 'eno'enovi yana tovetutuyamavo i maia Iesu tomogona i vinagoi."

<sup>14</sup> 'Ai'edi de'e bani'odi 'wa na vonevoneyedi toveimea bwaikina gabemani i na nogai i na nuasakoga 'waimie, 'ima nuana 'a na 'ive'atumaia nika kebu vita i na velevelemi."

<sup>15</sup> Tolugavianidi mani i 'ewai i nago i veveifufu tomotoga 'waidiamo i vo, Lovane 'a 'eno'enovi, yana tovetutuyamavo i maia tomogona i vinagoi." Bega vonanina me Diu fuedi i nogai i vo, Mogitana," i maiga 'asiau wata bani'odi i vonevoneyedi.

*Iesu yana tovetutuyamavo yadi folova i veledi.*

<sup>16</sup> Iesu yana tovetutuyamavo matatabudi 11 i nagoi 'awalawa Galili i laka 'oyanina Iesu i voneyeniga 'waineye. <sup>17</sup> Tutuyanina i 'iseni i 'odu mataneye i subiai, we'e 'ifwaidi



ma yadi venuanaluga i vo, Mogitana Iesu 'alo tulina?" <sup>18</sup> ✧ Iesu i vaganago 'waidie i vonedi i vo, Yaubada veimea i veleku i tauyeku nani matatabuna abame wata fwayefwayeye a na veveimeyedi. <sup>19</sup> ✧ Bega 'wa na nagoi tomotoga matatabudi 'aila'a tulina tulina 'waidie, 'wa na lau'age 'waidie bega taunidi 'aku tovetutuyamavo. Wata 'wa na bafitaisodi Tamada 'ana wagavayega, Natuna 'ana wagavayega, wata 'Anu'anunu 'Atumaina 'ana wagavayega. <sup>20</sup> ✧ Veimea matatabudi a velemiga 'wa na ve tovetutuyamavonidi 'ivaudi 'waidie bega i na vematayakeyakedi. A vona mogitana 'waimie yau tutuya fuedi lilivamie taiadi ta na miamia i na nagoga fwayafwaya 'ana 'eba ve'a'ava 'waineye."

---

✧ **28:18:** Mad 11:27; Ion 13:3; Efe 1:21-22    ✧ **28:19:** Fol 1:8    ✧ **28:20:** Ion 14:23; Ibu 13:8

## MALIKA Iesu Valana 'Atumaina Malika 'ana kilukiluma.

Malikanina tamu 'ana wagava Ioni, kumanina nagamidiotoga Vala 'Atumaina faifaina i kiluma. Malika kebu Iesu yana tovetutuyama 12 'adi 'aila'a 'wainega, bega to'asetai 'ifwaidi i vo, Iesu ifufuna Malika i nogaya-'ewai Fita yana lau'age 'wainega bega i kiluma.” Siwe fai Malika Ielusalema nageneye i taulai bega tauniotogina Iesu yana folova matatabuna i 'isedi. We'e Malika 14:51-52 ta na lu'iawawaiga ta na 'iseni voke 'asa'aiana taunina Malika. Mulieta i veto'aivaita Faulo wata Banabasa yadi folova 'waidie.

Malika nuanuana me Loma kumanidiavo 'awalawa fueḍi i veveimeyediga Iesu valana i na 'asetai. We'e me Lomanidi fai nani toketokedi wata 'ai'aiwabu nuadi i 'ewadi, Malika yana buki nageneye i vo, Iesu 'aiseotogina toketokena ma yana veimea bega me Loma wata tomotoga fueda ta na 'asetai taunina mogitana Yaubada Natuna.” Iesu 'eba nuavogana wata 'eba nua'ewa fueḍi i 'idewadi faifaidi Malika i toke i veifufu we'e yana ve faifaidi sai'afo. We'e tamu nani faifaina i veifufuga, Iesu Seitani i vetoketoke'iaweni faifaina wata taunina tomotoga 'ada to'ita'ita'i.

Buki 'ana 'eba ve'a'ava 'waineye side [] tugusanina i 'eno'eno. Tomotoga 'ifwaidi i vo, Tamu tomogo Malika 'ana kilukiluma i lusaweni.”

### *Ioni i veifufu Iesu yana mai faifaina.*

1-2 ✧ Iesu Keliso, Yaubada Natuna Valana 'Atumaina. Base-nadi Yaubada yana tolu'ivona 'ana wagava Aisea i kilumi Yaubada yana Vona Natuna faifaina. Yaubada Natuna i voneni i vo,

A na vonemu. Yaku tomata'aulele a na vetunei i na kumeta yamu 'eda i na vusia.”

3 ✧ Sali'avu'avuye tamu tomogo i vegolegole i vo, 'Auvea yana 'eda 'wa na vusia wata 'wa na sivetonovi yana 'eba nago.”

4 ✧ Ifufunina 'Atumaina side bani'odi i velamuyedi. Tutuyanina Ioni i le'wa vonanina Aisea i kilumiga 'ana mogitana i souyeni. Sali'avu'avuye Ioni tomotoga i lulu'ageyedi wata i bafitaisodi i vo, 'Wa na nuavilami yami sakona 'wa na vedumwe'ubu'ubusedi bega a na bafitaisomi, wata Yaubada yami sakona i na nuatavunidi.” 5 'Awalawa Iudia

matatabuna 'wainega wata Ielusalemayega tomotoga fueidi Ioni valana i nogai bega i nagoi 'waineye. Tutuyanina Ioni bonana i nogai, 'aitamogana 'aitamogana yadi sakona i lu'ivona i 'a'avana Ioni i bafitaisodi Ufa Iolidani 'waineye.

<sup>6</sup> Ioni 'ana kaleko sakoidi 'aisaya kameli vutuvutudiega i 'idewadi, we'e bulumakau bunudi 'ana wa'ila, sali'avu'avuye i 'ani'ani limwana wata mai'awa. <sup>7</sup> Ioni i lau'age tomotoga 'waidie i vo, Kumanina mulikuye i mimaiga toketokeotogina yau kebu bani'odiga, kebu i da lubwaineku 'waineye a na vetofolova, fai taunina bwaikina bega a bunumayaga. <sup>8</sup> ✧Yau ufayega a bafitaisomi we'e taunina i na bafitaisomi 'Anu'anunu 'Atumainega.”

### *Iesyana souyagi.*

<sup>9</sup> Tutuyanina 'waineye Iesu i tauya 'atamana Nasalediega, 'awalawa Galili nageneye i nago Ioni 'waineye i na bafitaiso Ufa Iolidani 'waineye. <sup>10</sup> ✧Tutuyanina ufayega Iesu i lakalakama i 'iseni abama i 'anikililia Yaubada 'Anu'anununa yana yaveobu Iesu 'waineye bani'odi bunebune. <sup>11</sup> ✧Bona i nogai abamega i vo, 'Omu natuku nuafouku a nuakalaliemu, faifaimu a sosoana bwaikina.”

<sup>12</sup> Iesu i bafitaiso i 'a'avana nika Yaubada 'Anu'anununa i voneni i nago sali'avu'avuye. <sup>13</sup> ✧Bei 'aiata 40 nagedie i miamia, yaiaina yadi to'edakumeta Seitani, i mai i vevetalaimimili nuanuana Iesu i na sakona. 'Aisaya walawala'ai taiadi i miamia siwe anelose i 'i'isave'avini.

### *Iesu nuanuana toyaubani.*

<sup>14-15</sup> ✧Kini Elodi Ioni Tobafitaiso i 'ive'avini vanuga 'eba yogona 'waineye i yatoi, mulieta Iesu i vilai i nago 'awalawa Galili. Yaubada Valana 'Atumaina i lulu'ageyeni i vo, Yaubada yana tutuya i le'wa sai'afoga yana veimea i na souyeni 'waimie. Yami sakona 'wa na bailedi, Vala 'Atumaina 'wa na vetumaganeni.”

<sup>16</sup> Tamu 'aiata Iesu i balabalaga Lavu Galili balebaleamo tomotoga 'adi 'ailuga i 'isedi, Saimoni ma taina Anidulu vu-atayega igana i 'ona'onadi fai taunidi toyaubani. <sup>17</sup> Iesu i vonedi i vo, We'e yaubaninina 'wa na baileni 'wa na maia 'wa na vetovetutuyama 'waikuye, yau yaubani tamu a na vemi bega tomotoga 'wa na 'ona'onadi 'wa na mimaiedi Yaubada 'waineye.” <sup>18</sup> ✧Nika Saimoni wata Anidulu vualalalakana i 'iawedi Iesu i yogo'waili.

<sup>19</sup> Sai'afo i vaganago wata Sebedi ma natunavo i 'isedi Iemesa wata Ioni yadi wakeye yadi vuata i agiagilidi.

<sup>20</sup> Tutuyanina Iesu i 'isedi i goledi i vo, 'Wa maia," nika tamadi ma yana tofолоvavo i 'iawedi Iesu taiadi i nagoi Kafaneomi.

*Tomogo yaiaina i ageiga i ve'atumai.*

<sup>21</sup> Iesu ma enavo i miamiani Kafaneomi, mulieta me Diu yadi 'Aiata Veawai\* 'waineye Iesu i luku 'eba miava'auta 'waineye, bei i ve. <sup>22</sup> ✧Tomotoga nuadi i voganidi fai ma yana veimea i veve 'waidie kebu bani'odi yadi ve'etoboda 'adi tovevo.

<sup>23</sup> Tutuyanina Iesu i veve, tamu tomogo yaiaina sakoina i ageiga i mai 'eba miava'auta 'waineye, Iesu yana vona i noganogaya. <sup>24</sup> ✧Bei ma 'ana labilabina i vevebwaubwau i vo, Iesu tomogo Nasaledi, 'u bailema 'ima kebu nuanuama 'omu. Voke nuanuamu 'u na leoma? A 'asetamu, 'omu Yaubada Natuna Magemagetamu." <sup>25</sup> Iesu yaiaina i talabodeni i vo, 'U ve'wada, 'u 'awa'a'imu tomogo 'wainega." <sup>26</sup> Yaiainanina tomogo i toke i fetoi i vebwaubwau nika i 'awa'a'ia.

<sup>27</sup> Tomotoga i 'iseni nuadi i 'ewai i veveakutolieni i vo, Emavo, ava'ai tomogoga? Yana ve 'ivauna wata ma yana veimea yaiaina i tatalabodedi i vevematayakayaka."

<sup>28</sup> Tomotoga fuedi i lu'ivoneyeni bega valana 'awalawa Galili matatabuna i 'aseta.

*Iesu i 'ive'atumaiddi tovinga.*

<sup>29</sup> 'Eba miava'auta 'wainega Iesu ma enavo i souyedi tonovidi i nagoi Saimoni wata Anidulu yadi vanuge. Iemesa wata Ioni taiadi i nagoi. <sup>30</sup> Saimoni yana vavine inadi i viga tomogodi i luyauyauta i 'eno'eno 'ivie. Tutuyanina Iesu i le'wa i veifufu 'waineye yadi viga faifaina. <sup>31</sup> Iesu i luku, nimadie i 'abi i sivetovoidi nika 'adi viga i 'a'ava, ma fuedie 'adi'adi i 'idewadewa.

<sup>32-33</sup> ✧Inala 'akonadi i obu i lavilavia tomotoga ediavo yaiaina i agediga wata tovinga i miedi Iesu 'waineye, wata tomotoga matatabudi i maia 'atamana bwaikinega i va'auta vanuga 'awaneye. <sup>34</sup> ✧Toviga 'adi viga tulina tulina Iesu i 'ive'atumaiddi wata i vona yaiaina fuedi i 'awa'a'idi. Yaiainanidi i talabodedi kebu i na lu'ivona fai 'akonadi i 'asetai Iesu taunina Yaubada Natuna.

*Iesu 'aiseneye i velu'ui.*

<sup>35</sup> ✧'Awa'awaiogose bola kebu i da magetaiga Iesu i tovoi vanugayega i souyeni i nago tamu 'awasasa kebu tomotoginaga 'waineye, 'aiseneye i velu'ui. <sup>36</sup> Mulieta Saimoni ma enavo i 'isa Iesu i 'isa'avai i nagoi i lualeni. <sup>37</sup> Tutuyanina i veluagai i voneni i vo, Tomotoga fuedi i lulualemu nuanuadi

\* **1:21:** 'Ana wagava Sabati, bonada Kaiwekesi. ✧ **1:22:** Mad 7:28 ✧ **1:24:** Mak 5:7; Ion 6:69 ✧ **1:32-33:** Mad 4:24 ✧ **1:34:** Mak 3:11-12; Fol 16:17-18

✧ **1:35:** Mad 14:23; Luk 5:16

'omu.”<sup>38</sup> Iesu i vonedi i vo, Ta na nagoi mali 'atamana 'waidie bei wata a na lau'age, faifainanina a mai.”<sup>39</sup> ✧Bega i nagoi 'awalawa Galili matatabuna 'waineye i lalau'age yadi 'eba miava'auta nagedie wata i vonavona yaiaina tomotoga i agediga i 'a'awa'a'idi.

*Iesu tomogo waiwaiseselina i 'ive'atumaia.*

<sup>40</sup> Tamu tomogo waiwaiseselina i mai Iesu 'waineye ma yana ve'ililibu i 'odu i velu'ui 'aivaita faifaina i vo, 'Ai'edi nuanuamu, 'amu fata 'u na 'ive'atumaiku.”<sup>41</sup> Iesu i nuavita tomogonina faifaina bega i 'abitonovi i voneni i vo, Fai bani'odi, nuanuaku, 'u ve'atumai.”<sup>42</sup> Nika tomogonina 'ana viga i 'a'ava i ve'atumai.

<sup>43-44</sup> ✧Bega Iesu i toke i voneni i vo, Kebu tamu aitoi 'waineye 'u na lu'ivonaga, nuanuaku tonovimu 'u na nago tovelomu 'waineye, nagami i na 'isemu. 'Aisaya 'u na veleni i na kabuni Yaubada 'waineye faifaimu, bani'odi basena-diotoga Mosese i voneyeniga Yaubada yana Buki 'waineye towaiwaisesela i ve'atumaiga faifaina. Tovelomunina i na 'isemu i na ve'awamogitana 'akonadi 'u ve'atumai wata bani'odi mali tomotoga i na 'asetai.”<sup>45</sup> ✧Siwe tomogonina i nago 'atamana 'waidie i lu'ivo'ivona bega 'aila'a i maia Iesu 'waineye kebu 'ana fata i na folova, begaidi 'atamana bwaikidi i bailedi i nago 'awasasa 'ifwaidi kebu tomotogidi 'waidie. Siwe wata tomotoga i nagoi 'waineye 'awalawa fueidi 'waidiega.

## 2

*Iesu tomogo bwalobwalokona i 'ive'atumaia.*

<sup>1-2</sup> 'Aiata 'ifwaidi i 'a'ava, mulieta Iesu i vilai i nago Kafaneomi i luku vanuge. Tomotoga fueidi valana i nogai bega i va'auta vanuga i veadagi kebu tamu 'awasasaga wata bani'odi vanuga 'awana, mulieta Iesu Yaubada yana Vona i lu'ageyeni 'waidie. <sup>3</sup> Tutuyanina Iesu i lalau'age, tomotoga 'ifwaidi i maia 'adi 4 iadi bwalobwalokona ma 'evo'evona i mieni Iesu 'waineye. <sup>4</sup> I le'weni 'aila'a bwaikina i 'isedi kebu 'adi fata i na lukuga, begaidi i laka vanuga 'ubunega ava'aibe bei Iesu i tovtovoi, 'ana saila'a 'ifwaidi i 'ewadi bega 'anibwekaneamo ma 'evo'evona i ve'ioyoi i obu. <sup>5</sup> ✧Iesu i 'iseni i 'asetai ma yadi vetumagana bega tomogo bwalobwalokona i voneni i vo, Natuku, yamu sakona a nuatavunidi.”

<sup>6-7</sup> ✧'Ifwaidi ve'etoboda 'adi tovevo i nogai Iesu yana vona nuadiega i vo, Iesu awale Yaubada i vona-uvi'agali? Kebu tamu aitoi 'ana fata sakona i na nuatavunidi, Yaubada 'aisena

✧ 1:39: Mad 4:23-25 ✧ 1:43-44: Vei 14:1-4 ✧ 1:45: Mak 7:36 ✧ 2:5: Luk 7:48 ✧ 2:6-7: 1 Ion 1:9; Ais 43:25

'ana fata.”<sup>8</sup> Iesu 'akonadi i 'asetai yadi nuanua begaidi i vonedi i vo, Awale bani'odi 'wa nuanuayedi?<sup>9-10</sup> Yau a vetomotogaotoga ma yaku veimea fwayefwayeye bega 'aku fata tomotoga yadi sakona a na nuatavunidi. Tomotoga 'adi 'ive'atumai vitana fai 'ai'edi a na vona siwe kebu i na ve'atumaiga, 'wa na 'asetai kebu ma yaku veimea a vona-'avo'avovo. Siwe toviga de'e a na 'ive'atumaia 'wa na 'iseni bega 'wa na 'asetai kebu a da vona-'avo'avovo 'aku fata sakona a na nuatavunidi.”<sup>11</sup> Bega Iesu tomogo bwalob-walokona i voneni i vo, 'U tovoi, 'amu 'evo'evo 'u evai 'u nago yamu vanuge.”<sup>12</sup> \*I tovoi fuedi i 'iseni yana sita i 'ewai i tauya. Matatabudi nuadi i voganidi bega Yaubada i subiai i vo, Kebu tamu tutuya bani'odi ta da 'iseniga.”

### *Iesu Livai i goleni.*

<sup>13</sup> Iesu wata i vila-vaitugani i nago lavuye. 'Aila'a bwaikina i maia 'waineye, bei wata i ve. <sup>14</sup> 'Akonadi yana ve i 'a'ava, i nunagoga takesi 'ana tolaugogona i 'iseni 'eba takesi 'waineye i miamia, 'ana wagava Livai, Alefasi natuna. Iesu i voneni i vo, Taiadi ta na nago, yaku tovetutuyama.” Nika Livai i tovoi Iesu mulineye i nago.

<sup>15</sup> Mulieta Iesu ma yana tovetutuyamavo i 'ani'ani Livai yana vanuge, 'ifwaidi tolaugogona wata 'ifwaidi tosakona taiadi i 'ani'ani. Tomotoganidi Iesu i yoyogo'wai'waili. <sup>16</sup> \*Ifwaidi ve'etoboda 'adi tovevo siwe taunidi Diu totafalolo Falisi i 'iseni i nagoi Iesu yana tove tutuyamavo 'waidie i velutoliedi i vo, Awale tolaugogona vivinagodi wata tosakona taiadi i 'ani'ani, kebu 'ana 'isa 'atumainaga.”

<sup>17</sup> \*Iesu i nogai i vona-awatabai 'waidie i vo, Egavo 'atumaide kebu nuanuadi viga 'adi to'ive'atumai, 'aisedi toviga mogitana. Wata bani'odi, yau a maiga kebu taunidi i awave'atumaiediga faifaidi, a maiga wata tosakona a na 'ita'ita'iedi.”

### *Ve'udigana 'ana 'asetai.*

<sup>18</sup> Ioni Tobafitaiso yana tovetutuyamavo wata totafalolo Falisi i veve'udigana 'ani matatabuna bega yadi velu'ui Yaubada 'waineye i na vetoketoke. Tomotoga 'ifwaidi i maia Iesu i velutolieni i vo, Awale Ioni yana tovetutuyamavo wata Falisi i veve'udigana i na velu'ui faifaina, we'e yamu tovetutuyamavo kebu i da ve'udiganaga?”<sup>19</sup> \*Iesu yadi vona i tutuli, taunina faifaina i vona-awatabai i vo, Tonagi yana sosoana 'waineye kebu tamu aitai 'ana fata i na talabodedi bega enavo 'ani'ani i na baileni. <sup>20</sup> We'e tamu 'aiata tomotoga

\* 2:12: Mad 9:33    \* 2:16: Mad 11:19; Luk 15:1-2    \* 2:17: Luk 19:10; 1 Tim 1:15    \* 2:19: Ion 3:29

'ifwaidi i na maia tonaginina i na 'ive'avini i na naweni i lubwainedi enavonidi ma yadi nuavita i na ve'udigana.”

*Sauluva tuatuaina wata Iesu yana ve 'ivauna 'adi luwanawana faifaina.*

<sup>21</sup> ✧Wata Iesu i awatalatutula 'waidie yana ve sauluva 'ivauna faifaina wata me Diu yadi sauluva tuatuaina 'adi luwanawana faifaidi i vo, Kaleko tuatuaina i na 'anilabu'i we'e 'ivaunega ta na bwadia kebu i da lubwaineniga. Fai bola ta na lekoai bwadi 'ivauna i na vesiai bega i na vefato'ai'ai tuatuaina i na 'ivesakoi.”

<sup>22</sup> Wata bani'odi oine 'ana 'eba iwaga 'aisaya bunudiega faifaina Iesu i vona i vo, 'Ai'edi oine 'ivauna 'eba iwaga tuatuaina 'waineye i na iwagi i na yuvefuai, i na iwaga 'ana ve'amubwadodo fai totolina wata 'eba iwaga 'akonadi i sako. We'e 'ai'edi oine 'ivauna wata 'eba iwaga 'ivauna nika bikabikana i na lubwaineni kebu i na yuvefuai 'ailugana 'atumaidi.”

*Iesu i ve 'Aiata Veawai faifaina.*

<sup>23</sup> ✧Tamu 'Aiata Veawai 'waineye, Iesu ma yana tovetutuyamavo i nunagoi bakula 'waineamo, yana tovetutuyamavo i lase bega vuaga i kadidi i 'ani, fai 'akonadi tonibakula i tauyedi. <sup>24</sup> We'e 'ifwaidi Diu totafalolo Falisi i 'isedi Iesu i voneni i vo, Awale? Me Diu yada ve'etoboda yamu tovetutuyamavo i geugeuya vuaga i kadikadidi bani'odi folova yada 'Aiata Veawai 'waineye. <sup>25</sup> ✧Iesu Falisi yadi vona i tutuli i vo, 'Wa da vo kebu bani'odi Yaubada yana Buki 'wa da lu'iawawaiga, basenadiotoga Kini Devida ma enavo i lase faifaina. <sup>26</sup> I luku Yaubada yana vanuga 'eba velu'ui nageneye, beledi tamu Yaubada 'ana 'anivelena Abiada tovelomu bwaikina i veledi ma enavo i 'ani. De'e wata yada ve'etoboda kebu tamu aitoi 'ana fata beledinina i na 'ania tovelomu 'aisedi faifaidi, i 'ania kebu i da sakona fai i lase. <sup>27</sup> ✧Yaubada 'Aiata Veawai i yatoi tomotoga 'ada 'aivaita ta na veawai faifaina, kebu i da yatoi bega 'aiatanina i na veimeyeda. <sup>28</sup> Yau a vetomotogaotoga tomia fwayafwaya matatabuna 'adi To'isave'avina, wata 'Aiata Veawai 'ana Toveimea, 'aku fata 'aiatanina 'waineye tomotoga yadi sauluva faifaidi a na veimeyedi.”

### 3

*Tomogo nimana 'okana.*

<sup>1</sup> Iesu i vilai i nago 'eba miava'auta 'waineye bei tamu tomogo ma nima'okana i miamiana. <sup>2</sup> ✧Diu totafalolo 'ifwaidi i

✧ 2:21: 1 Kol 10:21; 2 Kol 6:16 ✧ 2:23: VeL 23:25 ✧ 2:25: 1 Sam 21:1-6

✧ 2:27: VeL 5:14 ✧ 3:2: Luk 13:14

maia Iesu i vemata'i'i'ieni nuanuadi i na vevitai tamu sakona faifaina i vo, 'Ai'edi tamu aitoi 'Aiata Veawai 'waineye i na 'ive'atumaiga yada ve'etoboda i na geuya ta na yatoi 'eba vonayavuga 'waineye.”<sup>3</sup> Iesu i vona tomogo ma nima'okana 'waineye i vo, 'U mai side bei 'aila'a matadie.”<sup>4</sup> Mulieta Iesu i vona tomotoganidi 'waidie i vo, 'Wa da nuani yada ve'etoboda 'Aiata Veawai 'waineye 'ada fata tomotoga ta na 'ivaisedi 'alo ta na vesauluva sakoina 'waidie, 'ai'edi tamu tomogo sai'afoga i na wafa ta na 'ivaiseni 'alo ta na luve-wafaimo?” Nika kebu bonana i da tutuliga.

<sup>5</sup> \*Iesu i nuavita fai taunidi kebu nuanuadi tomogo ma nima'okana i na 'ivaiseni, ma yana nuasako 'aitamogana 'aitamogana i 'isadewadi. Tomogo ma nima'okana i voneni i vo, Nimamu 'u si'otoi.” I si'otoi nika i ve'atumaioletoga. <sup>6</sup>\*Falisi i 'iseni i souyedi i nagoi i veifufu Kini Elodi yana 'aila'a taiadi bani'odi i na munega Iesu i na 'ivewafai.

*'Aila'a lavu lilivaneye.*

<sup>7</sup> Iesu ma yana tovetutuyamavo i nagoi lavuye, siwe 'aila'a bwaikina i yogo'waili, tomotoganidi i maia 'awalawa Galili wata Iudia 'waidiega. <sup>8</sup> Ifwaidi i maia Ielusalemega, 'awalawa Idumeayega, Ufa Iolidaniega i damana, 'atamana Taia wata Saidoni lilivadiega. Iesu yana folova valana i nogai i maia. <sup>9-10</sup> Tomotoga fuedi i 'i'ive'atumaidei faifainanina tovinga i vevetunufelagieni nuanuadi i na 'abitonovi bega i na ve'atumai. 'Aila'a bwaikina bega Iesu yana tovetutuyamavo i vonedi i vo, Waka 'wa na mieni 'ai'edi i na velubabalekuga bega a na laka a na lau'age.” <sup>11</sup> Wata tomotoganidi yaiaina i agediga Iesu i 'iseni i maia ma yadi ve'ililibu i be'u mataneye i vebwaubwau i vo, 'Omu Yaubada Natuna.” <sup>12</sup> Siwe Iesu yaiaina i talabodebodedi kebu i na lulu'ivoneyeniga Iesu aitoi.

*Iesu yana tovetutuyamavo 12 i venua'ivinedi.*

<sup>13</sup> Tamu tutuya Iesu ma enavo i laka 'oyeye, tomotoganidi Iesu yana nuana i goledi 'ana to'aivaita, i nagoi 'waineye. <sup>14-15</sup> \*Tomotoganidi 'waidiega 'adi 12 Iesu i venua'ivinedi wata i vonedi i vo, 'Omi 'ami 12, a venua'ivinemiga yaku tomata'aulelevo. 'Waikuye 'wa na miamiani, mulieta a na vetunemi 'wa na lau'age tomotoga 'waidie. Wata veimea a na veleemi bega 'wa na vona yaiaina tomotoga i agediga i na 'awa'a'idi.”

<sup>16</sup>\*Tomotoganidi 12 i venua'ivinediga side 'adi wagava.

Saimoni, kumanina Iesu i goleni Fita,



17 ✨Iemesa ma taina Ioni, Sebedi natunavo. Wata Iesu i goledi Boenati, 'ana saivila Tomuyoana Natunavo.

18 Anidulu,  
Filifi,  
Batolomiu,  
Madiu,  
Tomasi,  
Iemesa, Alefasi natuna,  
Tadiusa,  
Saimoni, toawa'idi'idi kebu nuanuana Loma gabemani i na veveimeyedi,

19 Iudasa Isakaliota, taunina Iesu 'ana to'etogiluva.

*Tomotoga yadi nuanua i vo 'ako, Yaiaina Iesu i agei."*

20 ✨Iesu ma enavo i viladi i nagoi vanuge, wata 'aila'a bwaikina i maia 'waineye begaidi kebu 'adi fata i na 'ani.

21 ✨Tomotoga 'ifwaidi i vonavona i vo, Iesu i ve'wawa'wawa," yana 'aila'avo i nogai i maia i na vagavaia.

22 ✨Ve'etoboda 'adi tovevo Ielusalemega i maiaga i vona i vo, Seitani,\* yaiaina yadi to'edakumeta, Iesu i agei yana toketokena i veleni bega i vonavona yaiaina i 'a'awa'a'idi."

23 Bega Iesu i goledi i maia 'waineye i vona-awatabai 'waidie i vo, Yaku folovanina kebu Seitani yana toketokena 'wainega fai Seitani kebu nuanuana enavo i na sogiedi. 24 'Ai'edi 'eba veimea 'aise'avadi i na 'idia i na vevetalaga bola 'eba veimeanina i na velovi. 25 'Ai'edi 'atamana 'aise'avadi i na 'idia i na vevetalaga, 'atamananina i na yavulaiwagi. 26 Wata bani'odi 'ai'edi Seitani yana 'eba veimea 'aise'avadi i na 'idia i na vevetalaga i na 'a'avaotoga."

27 ✨Wata Iesu i vona-awatabai 'waidie i vo, Kebu tamu aitoi 'ana fata i na luku tamu tomogo toketokena yana vanuge i na vainago, we'e 'ai'edi nuanuana, nagami tomogonina i na yogoni, mulieta i na vainago. 28-29 ✨A na vonemi, tomotoga i sakosakonga wata i vona-awadamana Yaubada 'waineye 'adi fata nuatavuna i na veluagai, we'e egavo i na vona-awadamana 'Anu'anunu 'Atumaina 'waineye, kebu 'ana fata Yaubada i na nuatavunidi, yadi sakona i na 'eno-vagata."

30 Iesu i vonaga fai tomotoga 'ifwaidi i vo, Taunina yaiaina i agei," we'e mogitana 'Anu'anunu 'Atumaina 'wainega i vona yaiaina i 'awa'a'idi.

*Iesu tainavo ma inadi i nagoi Iesu 'waineye.*

31 ✨Iesu tainavo ma inadi i maia Iesu 'waineye. I tovoi 'atamanega i velutoli Iesu faifaina. 32 'Aila'a Iesu taiadi i

✨ 3:17: Luk 9:54 ✨ 3:20: Mak 6:31 ✨ 3:21: Ion 10:20 ✨ 3:22: Mad 9:34

\* 3:22: 'Ana mogitana Bielisibabi, Seitani tamu 'ana wagava. ✨ 3:27: 1 Ion

3:8 ✨ 3:28-29: Ibu 6:4-6 ✨ 3:31: Mak 6:3

miamianiga i voneni i vo, Taimwavo wata inamu siva'e i lulualemu.”<sup>33</sup> Iesu i vona i vo, 'Wa da nuani, egavo taikwavoga wata inaku? <sup>34</sup> Tomotoganidi i miaffineniga 'aitamogana 'aitamogana Iesu i 'isedi i vonedi i vo, 'Wa vonaga 'wa vo, Taimwavo wata inamu i lulualemu,” 'wa vona mogitana siwe wata 'omi inakwavo wata taikwavo. <sup>35</sup> \*Aitoi Yaubada yana nuanua 'ana todumwebika, taunina inaku, novuku, 'alo taiku.”

## 4

### *Luyavuyavulagi 'ana vona-awatabai.*

<sup>1</sup> Tamu tutuya wata Iesu i vilai i mai Galili i ve lavu lilivaneye. 'Aila'a bwaikina i sififineni faifainanina Iesu i dodoga wakeye i miabui we'e tomotoga matatabudi i tovoi balebaleye 'waidie i lau'age. <sup>2-3</sup> Nani fueidi i ve 'waidie vona-awatabaiega. Yana ve 'waineye i vo, A na vonemi. Tamu tomogo i nago bakule yana witi waifeidi i na bakulidi, yadi sauluva luyavuyavulagi. <sup>4</sup> Yana luyavuyavulagi 'waineye witi 'ifwaidi i ve'anita'idi 'eda balebaleye, manuga i mai i 'anidi. <sup>5</sup> 'Ifwaidi i ve'anita'idi bwakebwakeye, inala i kufuadi i tabo-matayo'o fai fwayafwaya kebu badubadunaga. <sup>6</sup> 'Aiata-'wane'waneye inala i toke i luyauyauta i 'awagi'adi fai 'walamidi siaidi kebu i da toke i da obuga. <sup>7</sup> 'Ifwaidi i ve'anita'idi 'awanavenaveye kebu 'adi 'oiga, tutuyanina i ugawegawedi bega kebu vuagidiga. <sup>8</sup> 'Ifwaidi i ve'anita'idi inageye fwayafwaya 'atumaina 'waineye i tabo i vuaga. Witi 'ifwaidi vuagidi 30, 'ifwaidi 60, 'ifwaidi 100. <sup>9</sup> 'Akonadi yaku vona 'wa nogai, siwe 'wa na vena'ivineni nika 'wa na 'asetai.”

### *Vona-awatabai lamuna.*

<sup>10</sup> Mulieta Iesu 'aiseneye 'ifwaidi tomotoga toyogo'waila, wata yana tovetutuyamavo 12 i maia 'waineye i voneni i vo, Nuanuama yamu vona-awatabai 'u na kiavemagetadi. <sup>11</sup> \*Iesu i vonedi i vo, 'Akonadi Yaubada i tauyemi nani fueidi givagivadi 'wa 'asetadi yana veimea tomotoga 'waideye faifaina. Siwe egavo Yaubada yana veimea i bavuyeni, vona-awatabai 'waidiega Yaubada yana Vona i noganogai. <sup>12</sup> \*Basenadiotoga tobavunidi faifaidi i kilumi Yaubada yana Buki nageneye i vo,

Tomotoganidi i na 'isa'isa siwe kebu i na 'isa'inanaiga. Wata i na noganogai siwe nuadi kebu i na magetadi.

'Ai'edi mogitana i da 'isa'inanai wata nuadi i da magetadi i da nuaviladi nika Yaubada yadi sakona i da nuatavunidi.”

*Vona-awatabai Iesu i kiavemagetai.*

<sup>13</sup> Mulieta Iesu i vonedi i vo, Vona-awatabainina safailina, siwe 'omi kebu 'wa da 'asetaigna, bani'odi 'wa na munega wata 'ifwaidi vona-awatabai 'wa na 'asetadi? <sup>14</sup> Tomogo tobakula taunina Yaubada yana Vona 'ana toluyavuyavulagi. <sup>15</sup> Waifei 'ifwaidi i ve'anita'idi 'edeye 'ana nuanua, bani'odi tomotoga Yaubada yana Vona i nogai nika Seitani i yogo-matayo'o Vonanina i elodi. <sup>16-17</sup> ☆Waifei i ve'anita'idi bwakebwakeye 'ana nuanua, bani'odi tomotoga ma yadi sosoana Yaubada yana Vona i nogai siwe yadi nuanua 'waidie kebu mogitana i da lukuga. I vetumagana siwe tutuya 'ale'usana. Tutuyanina vita 'alo ve'isakololo i na souyedi Vonanina faifaina i na baila-matayo'oyeni. <sup>18-19</sup> ☆Waifei i ve'anita'idi gawe'ye 'ana nuanua, bani'odi tomotoga Yaubada yana Vona i nogai siwe yadi mia faifaidi i vevenuafouviga, 'ai'aiwabu nuadi i 'ewa'ewadi wata kukua 'adi nuanua 'waidie bwaikina 'wa da vo Yaubada yana Vona i da ugawegaweni kebu i da vuaga. <sup>20</sup> We'e waifei i ve'anita'idi inageye fwayafwaya 'atumaina 'waineye 'ana nuanua, bani'odi tomotoga Yaubada yana Vona i nogai nika taunidi i tauyedi 'waineye mulieta yadi folova Yaubada faifaina bani'odi i vuaga. 'ifwaidi 30, 'ifwaidi 60, wata 'ifwaidi 100.”

*Mageta 'aivoe dibuneye.*

<sup>21</sup> Iesu i velutoliedi i vo, Lovane mageta ta na kabuni, mulieta bani'odi ta na munegi? 'Aivoeyega ta na talafwaseni 'alo talalia 'ayaneye ta na yatoi? Kebu, mageta ta na lulauleni bega i na magemagetai. <sup>22</sup> Wata de'e bani'odi, ava'ai tomotoga i giveniga Yaubada i na sivemageseni wata ava'ai i nuagiveniga Yaubada i na lu'ivoneyeni. <sup>23</sup> 'Akonadi yaku vona 'wa nogai, siwe 'wa na venua'ivineni nika 'wa na 'asetai.

<sup>24</sup> ☆Ava'ai 'wa na nogaiga 'wa na venua'ivineni. 'Ai'edi 'wa na 'anivelena-maimaiga siaina, wata 'anivelena-maimaiga siaina 'wa na veluagai. We'e 'ai'edi 'wa na 'anivelena-maimaiga bwaikina, wata 'anivelena-maimaiga bwaikina ma 'ana 'imoso'i 'wa na veluagai. <sup>25</sup> 'Ai'edi aitoi sai'afoma yana 'asetai Yaubada faifaina, bega 'asetanina i na 'i'isave'aviniga, 'imoso'i Yaubada i na veleni, we'e aitoi kebu tamu yana 'asetai siwe igodi i vo, Yau yaku 'asetai bwaikina,” 'asetanina Yaubada i na eloi.”

*Vona-awatabai waifei yadi tabo faifaidi.*

<sup>26</sup> Yaubada yana veimea tomotoga 'waidie yana vebwaika faifaina Iesu i vona-awatabai i vo, Yaubada yana veimea bani'odi tamu tomogo waifei i bakulidi. <sup>27</sup> Tofolovanina

☆ 4:16-17: Kolos 2:7 ☆ 4:18-19: Mak 10:21-22; 1 Tim 6:9-10 ☆ 4:24: Luk 6:38

'aiaseye i folofolova, lovane i 'eno'eno we'e waifei yadi tabo wata yadi vebwaika kebu i da 'asetadiga. <sup>28</sup> Fwayafwaya taunina 'ani'ani i 'ivetabodi, nagami i tautaula mulieta 'ani'aninidi i sousouyedi. <sup>29</sup> ✧Tutuyanina i luludabadaba i 'a'aiala fai tutuya kumaga.”

*Iesu i awatalatutula 'ayawana bilana 'wainega.*

<sup>30</sup> Wata Iesu i vona-awatabai i vo, Bani'odi ta na voneyedi Yaubada yana veimea yana vebwaika faifaina 'alo ava'ai 'wainega ta na awatalatutula? <sup>31-32</sup> Yana vebwaika bani'odi 'ayawana, bilana saiotogina siwe 'ai'edi i na tabo, i na vebwaika welavi bwaikaotogina. Didina bwaikidi bega manuga i na mimai 'waineye i na veve'i'wa'u i na vevegiuva.”

<sup>33-34</sup> ✧Iesu tomotoga i lu'ageyedi vona-awatabai fuedi 'waidiega bega 'adi fata i na 'aseta. Kebu tamu tutuya vona-awatabai i da baileni, siwe yana tovetutuyamavo taiadi 'aisedie naninidi matatabuna i kikiavemagetadi.

*Iesu yagina i 'iveniwalovi.*

<sup>35</sup> Inala 'akonadi i obu, 'aiatanina 'waineye Iesu yana tovetutuyamavo i vonedi i vo, Ta na damana no'o bega lavu vi'ainega.” <sup>36</sup> Iesu 'akonadi i dodoga wakeye, bega yana tovetutuyamavo wata i dodoga taiadi i nagoi 'aila'a i 'iawedi, we'e 'ifwaidi waka taiadi i nagoi. <sup>37</sup> I nunagoi kaukau bwaikina i nunuga wata yagina waka i ludododogi sai'afoga i da veadagi. <sup>38</sup> Iesu i 'unugalo i 'eno'eno waka mulineye. Tovetutuyamavo i luvagoni i vo, Tove 'u tovoi, i na vileda ta na wafa kebu faifaina 'u da nuanua.”

<sup>39</sup> I tovoi kaukau i talabodeni i vo, 'U 'ailove,” wata yagina i voneni i vo, 'U niwalova,” nika kaukau i 'awatagoni i niwalova bwaikina.

<sup>40</sup> ✧Iesu yana tovetutuyamavo i vonedi i vo, Awale 'wa kololo? 'Omi bola kebu 'wa da vetumaganeku.”

<sup>41</sup> ✧Tovetutuyamavo 'akonadi kaukau wata yagina yadi 'ailove i 'isedi i kololo bwaikina Iesu yana toketokena faifaina. 'Aise'avadi i veifufu i vo, Ava'ai tomotogaga de'e? Nani matatabuna kaukau wata yagina taiadi bonana i noganogai i vevematayakayaka.”

## 5

*Iesu tomogo yaiaina i ageiga i 'ive'atumaia.*

<sup>1</sup> Iesu ma enavo i maia lavu vi'ainega me Gelasine yadi 'awalaweje. <sup>2</sup> ✧Tutuyanina i le'wai wakayega i obuma tamu tomogo yaiaina i ageiga i veluagai taumatayega i mimai. <sup>3-4</sup> Tomogonina yana 'eba mia taumatanidi 'waidie. Tutuya

fuedi tomotoga 'agena wata nimana i yogoyogonidi bulava kainumu 'waidiega siwe i dabadabadi, kebu wata aitoi 'ana fata i na vetoketoke bega i na 'ive'avini i na yogoni. <sup>5</sup> 'Aiata lovana 'aitamogana 'aitamogana taumaseye wata 'oyeye i vevebwaubwau taunina i nikenikei kileuyega.

<sup>6</sup> Tomogonina 'ani'ieyega Iesu i 'isanaweni, i lilide i nago ma yana ve'ililibu i 'odu mataneye. <sup>7-8</sup> \*Iesu yaiaina tomogo nageneye i voneni i vo, 'U 'awa'a'imu 'omu yaiaina sakoimu." Yaiaina i vegole bonana bwaikinega i vo, Iesu, 'omu Yaubada Tabwaotogineye Natuna, ava'ai nuanuamu 'u na 'idewai 'waikuye? Yaubada 'ana wagavayega 'u na vona mogitana kebu 'u na luvematavulogiku." <sup>9</sup> Wata Iesu i velutolieni i vo, Aitoi 'amu wagava?" I vo, 'Aku wagava 'Aila'a, fai ma 'aku labilabina fuedi." <sup>10</sup> Wata i toke i vevelu'ui 'waineye i vo, Kebu nuanuama 'u na veugeugema de'e 'awalawanina 'wainega."

<sup>11</sup> Fatala bwaikina bawe 'oya lilivaneye i luluduaduala. <sup>12</sup> Yaiaina i velu'ui-vaitugana Iesu 'waineye i vo, 'U da vetunema bawenidi 'waidie 'a da agedi." <sup>13</sup> I tauyedi, yaiaina i 'awa'a'idi i nagoi bawe i agedi. Bawenidi fatala 2000 i ve'ililide i obu 'oyeamo, i sou bwagale i ve'alamonumonu lavuye.

<sup>14</sup> Bawe 'adi to'isave'avinavo i 'iseni i dega i nagoi 'atamane wata bakule i veifufuyeni, bega tomotoga fuedi i nagoi i na 'iseni ava'ai i vonevoneyeni. <sup>15</sup> Tomotoganidi i maia Iesu 'waineye, tomogo basenadi yaiaina fuedi i ageiga siwe 'akonadi i ve'atumai i 'iseni i ve'wesena, 'atumaina i mi-amia begaidi i kololo. <sup>16</sup> Tomotoganidi matadie tomogo i ve'atumaiga wata bawe yadi monu, faifaidi tomotoga i le'wai 'waidie i veifufu. <sup>17</sup> 'Atamananina 'ana tomotoga Iesu i voneni i vo, Nuanuama 'u na tauya yama 'awalawa 'u na 'iaweni."

<sup>18</sup> Mulieta Iesu i dododoga tomogonina yaiaina i ageiga i vona i vo, Iesu yau nuanuaku taiadi ta da nago." <sup>19</sup> Siwe Iesu i talabodeni i vo, 'Auvea i 'isanuakalikalitemu i 'ive'atumaimu, bega 'u na nago yamu 'aila'a 'waidie 'u na lu'ivona." <sup>20</sup> Bega tomogo i nago naninidi matatabuna Iesu i 'idewadiga 'waineye i lu'ivona 'awalawa Dekafolisi matatabuna 'waineye. Tomotoga fuedi i nogaiga nuadi i voganidi.

*Yailo natuna yana ve'atumai wata vavine tamu Iesu 'ana kaleko i 'abitonovi.*

<sup>21</sup> Iesu ma enavo wata i vila-vaituganidi i damanama de'e bega lavu lilivaneye 'aila'a bwaikina i sififineni. <sup>22-23</sup> \*Me Diu yadi 'eba miava'auta 'ana to'edakumeta tamu, 'ana wagava

Yailo Iesu i 'iseni i nago 'waineye ma yana ve'ililibu 'ageneye i be'u i lukakadeni i vo, Natuku vevinena sai'afoga yawaina i na 'a'ava. 'U da mai ta da nago nimamu 'u da yatoi 'waineye bega i da ve'atumai.”<sup>24</sup> Iesu Yailo taiadi i nunago wata 'aila'a bwaikina i vevetunufelagieni nuanuadi Iesu taiadi i na nagoi.

<sup>25</sup> 'Aila'anina nagedie tamu vavine, vevine 'adi viga i 'ewadi, malamala 12 nagedie kebu i da 'a'ailove viganina i 'eno'eno. <sup>26</sup> Tutuya fueidi i nunago tokweli fueidi 'waidie igodi i na ve'atumai siwe wata veviga i veveluagai kebu i da veve'atumai i sakotoga, we'e yadi kukua i ve'a'avadi fu'eyega. <sup>27-28</sup> \*Iesu valana i nogai bega 'aila'a taiadi i nunagoi, yadi nuanua i vo, 'Ai'edi Iesu 'a na 'abitonoviga 'a na ve'atumai siwe wata 'ai'edi 'ako 'ana kaleko'ava 'a na 'abitonovimo 'a 'asetai 'a na ve'atumai.”<sup>29</sup> Tutuyanina i 'abitonovi 'adi viga i 'a'ava i vebaedi 'akonadi i ve'atumai.

<sup>30</sup> \*Nika Iesu i 'asetai yana toketokena i damana vavine 'waidie bega i sivilai i velutoli i vo, Aitoi 'aku kaleko i 'abitonovi?”<sup>31</sup> Yana tovetutuyamavo i vo, Kebu 'u da 'asetai 'aila'a taiadi ta nunagoiga, awale 'u vo, Aitoi i 'abitonoviku?”<sup>32</sup> Siwe Iesu i 'i'isadaba nuanuana i na 'asetai aitoi i 'abitonovi. <sup>33</sup> Vavine i 'asetai i lulualeidi begaidi i kololo, ma yadi tatava wata ma yadi ve'ililibu i be'u Iesu 'ageneye i lu'ivona mogitana taunidi faifaidi. <sup>34</sup> \*Iesu i vonedi i vo, Natuku, yami vetumagana 'waikuye i 'ive'atumaimi. Ma yami sosoana 'wa na nago, yami viga i 'a'ava-vagata.”

<sup>35</sup> Tutuyanina Iesu vavine 'waidie i vonavona 'ifwaidi tomotoga i le'wai Yailo yana vanugayega i voneni i vo, Natumu 'akonadi yawaina i 'a'ava. Kebu wata Tove 'u na vevekadia.”<sup>36</sup> Iesu i nogaiga Yailo i voneni i vo, Kebu bonadi 'u na nogaiga, wata kebu nuafoumu i na veviga 'u na vetumaganamo bega a na 'ivaisemu.”<sup>37</sup> Fueidi i talabodedi tomotoga 'adi 'aitonu taiadi i nagoi, Fita, Iemesa wata taina Ioni. <sup>38</sup> Tutuyanina i le'wai Yailo yana vanuge, Iesu i 'isedi 'aila'a wata vemogai bwaikina. <sup>39</sup> \*Bega i luku vanuga nageneye i velutoliedi i vo, Awale 'aila'a wata 'wa vevemogai? Kwamana kebu i da wafaga, i 'eno'eno.”<sup>40</sup> 'Aila'a Iesu i sidibidibieni wata i namageni fai i 'asetai kwamananina mogitana i wafa.

Iesu i vonedi matatabudi i souyedi, mulieta enavonidi, kwamana tamana wata inana taiadi i luku kwamananina yana tutudaba 'waineye. <sup>41-42</sup> \*Kwamana nimaneye i 'abi i sivetovoia bonanega i voneni i vo, Talaida kumi,” 'ana saivila, Kwamana a vonemu, 'u tovoi,” nika vavine i tovoi i yaba. Vavinenina ne'e'elina 'ana malamala 12. Tomotoga i 'iseni

\* 5:27-28: Mak 6:56    \* 5:30: Luk 6:19    \* 5:34: Mak 10:52; Luk 7:50; 17:19

\* 5:39: Ion 11:11    \* 5:41-42: Luk 7:14

nuadi i voganidi. <sup>43</sup> Iesu i talabodedi i vo, Kebu 'wa na lu'ivonaga siwe 'ani'ani 'wa na veleni i na 'ani.”

## 6

### *Me Nasaledi Iesu i baileni.*

<sup>1</sup> Iesu Yailo yana 'atamana i 'iaweni yana tovetutuyamavo taiadi i nagoi 'ana tuvadeye. <sup>2-3</sup> ✧ Bei i miamiani 'Aiata Veawai i veluagai i velamu i ve 'eba miava'auta 'waineye. Tomotoga fuedi yana vona i nogai nuadi i voganidi i vo, Tomogo no'o ta 'asetai taunina kamuda, inana Meli, tainavo Iemesa, Iosese, Iudasa wata Saimoni we'e novunavo taiadi ta miamiani. Siwe yana 'aseti wata yana toketokena ava'aiega i veluagadi bega 'eba nuavogana wata 'eba nua'ewa i 'i'idewadi?" Faifainanina i vedumwe'ai'aieni kebu i da vetumaganeni.

<sup>4</sup> Begaidi Iesu i vonedi i vo, Yaubada yana tolu'ivona ma 'adi ve'ililibu tomotoga tulidi 'waidie, we'e yana 'atamana tomotogidi wata yana 'aila'a kebu.” <sup>5-6</sup> Begaidi Iesu nuana i vogani yana 'atamana tomotogidi kebu i da vetumaganeni. Begaidi kebu 'ana fata 'eba nuavogana wata 'eba nua'ewa i da 'idewadiga siwe 'ifwaidi tomotoga Iesu i 'abitonovidi 'adi viga i 'a'ava i ve'atumai.

### *Iesu i vetunedi yana tovetutuyamavo.*

Iesu i nago i veve 'atamana 'aitamogana 'aitamogana 'waidiamo. <sup>7</sup> ✧ Yana folova i 'a'ava Iesu i vilai i mai yana tovetutuyamavo i goledi i nagoi 'waineye bega 'adi 'ailuga 'adi 'ailuga i na vetunedi. Wata veimea i veledi bega 'adi fata i na vonamo yaiaina i na 'awa'a'idi.

<sup>8-9</sup> Iesu i velu'ase'asedi i vo, Yami wautogana wata 'ami 'ageyafayafa 'wa na 'ewadi we'e kebu wata tamu ava'ai 'wa na 'ewadi. 'Ani'ani kebu, venuana kebu, mani kebu, wata kebu tamu kaleko vunavunagina 'wa na 'ewai. <sup>10</sup> Tutuyanina 'wa na nagoi tamu 'atamana 'waineye, aitoi i na vonemi 'wa na luku yana vanuge bei 'wa na miamia. 'Atamananina 'waineye 'wa na lalau'age, mulieta yami folova i na 'a'ava vanuganina 'wa na 'iaweni. <sup>11</sup> ✧ Ai'edi ava'ai 'atamanaga 'ana tomotoga i na vedumwe'ubu'ubusemiga, wata yami vona kebu i na nogaiga, 'wa na 'iawedi 'wa na nagoi siwe 'agemiega fwayafwaya 'wa na lubutubutuya yadi 'eba 'isa kebu wata bei 'wa na lalau'age wata bola vematavuloga i na veluagai Yaubada 'wainega.”

<sup>12</sup> Bega tovetutuyamavo i nagoi i lau'age i vo, 'Wa na nuavilami yami sakona 'waidiega.” <sup>13</sup> ✧ Wata tomotoganidi yaiaina

✧ **6:2-3:** Ion 7:15; Ion 6:42 ✧ **6:7:** Luk 10:1 ✧ **6:11:** Fol 13:51, 18:6 ✧ **6:13:** Iem 5:14

i agediga i 'ive'atumaidi wata toviga fue di bunamayega i iwagidi 'unu'unudie wata i 'ive'atumaidi.

*Kini Elodi Ioni i niki.*

<sup>14</sup> ✱Tutuyanina 'waineye 'awalawa Isileli nageneye Loma gabemani yadi to'edakumeta bwaikina 'ana wagava Kini Elodi. Iesu yana folova toketokena valana i nogai fai tomotoga fue di i veveifufu Iesu faifaina. 'Ifwaidi i vo, No'o Iesu, 'asa'aiana taunina Ioni Tobafitaiso, ma yana toketokena i yawasa-vaitugana i ve-Iesu, begaidi 'eba nuavogana wata 'eba nua'ewa i 'i'idewadi." <sup>15</sup> Tomotoga 'ifwaidi i vo, Taunina Ilaitia, Yaubada yana tolu'ivona abamega i mai," we'e 'ifwaidi i vo, Taunina tamu Yaubada yana tolu'ivona yana sauluva bani'odi tolu'ivonanidi basenadiotoga.

<sup>16</sup> We'e Kini Elodi Iesu valana i nogai i vo, Mogitana Ioni Tobafitaiso, basenadi 'odona a boboi, wata i yawasa-vaitugana." <sup>17-18</sup> Elodi bani'odi i voneyediga fai yana veimea 'wainega Ioninina i yogoni i yatoi vanuga 'eba yogona 'waineye mulieta i luwewafai. We'e Elodi, basenadi taina Filifi tamu vavine i nagidi 'adi wagava Elodiasa mulieta Elodi i luobuyedi. Tutuyanina Ioni Tobafitaiso i nogai i nago Elodi 'waineye i voneni i vo, Awale taimu 'u eloi, yada ve'etoboda 'u geuya." Begaidi Elodi yana tolugavia i vetunedi Ioni i yogoni i yatoi vanuga 'eba yogona 'waineye. <sup>19</sup> We'e Elodiasa i nuasako nuanuadi Ioni i da wafa siwe kebu 'adi fataga. <sup>20</sup> Elodi ma yana kololo Ioni i 'ita'ita'ieni fai i 'asetai tomogo 'atumaina Yaubada 'wainega. Nuanuana Ioni yana vona i na noganogai, siwe i venuanaluga fai kebu i da 'asetai, mogitana 'alo i vekali.

<sup>21</sup> Mulieta Elodiasa tamu 'eda i veluagai bega 'adi fata Ioni i na niki. Elodi yana tubuga 'ana 'aiata 'waineye sakali bwaikina i 'idewai. Tomotoga bwaikidi i goledi i maia sakalinina 'waineye, 'ifwaidi gabemani, 'ifwaidi tolugavia yadi to'edakumetavo wata 'ifwaidi toveimea 'awalawa Galili 'wainega. <sup>22</sup> Sakalinina 'waineye Elodiasa natudi vevinena i mai i kayama matadie bega Elodi wata 'ana wakawakavo taiadi i 'ivesosoanidi. Elodi vavine 'waineye i vo, 'Ai'edi ava'ai nuanuamu 'u na velu'uioku 'ana fata a na velemu. <sup>23</sup> A vona'awaufaufa 'ai'edi ava'ai nuanuamu a na velemu, 'ai'edi 'u na vo, Yamu 'eba veimea sai'afo 'u na veleku," 'aku fata a na velemu."

<sup>24</sup> Bega vavinenina i nago inana 'waidie i velutoli i vo, Ava'ai a na velu'uieni?" Inana i vo, Nuanuama Ioni i na wafa bega 'u na voneni 'unu'ununa i na velemu." <sup>25</sup> Vavine i vilamatayo'oi Elodi 'waineye i vo, Nuanuaku 'asiauotoga Ioni 'u na niki 'unu'ununa 'aivoeye 'u na dodogi 'u na veleku 'eba



'isa 'akonadi i wafa.”<sup>26</sup> Vonanina i nogai nuana i vita bwaikina siwe kebu 'ana fata i na bailaga fai i vona'awaufaufa 'ana wakawakavo matadie.<sup>27-28</sup> Bega Elodi tamu tolugavia i vetunei i nago vanuga 'eba yogona 'waineye Ioni 'odona i boboi, 'aivoeye i dodogi i mieni vavine i veleni. I 'ewai i nago inana i veledi.<sup>29</sup> Tutuyanina Ioni yana tovetutuyamavo i nogai, i maia tomogona i 'ewai matumatuye i silukuveni.

*Iesu 'aila'a bwaikina i ve'anidi.*

<sup>30</sup> ✨ Tutuyanina tomata'aulele i viladi Iesu 'waineye i lu'ivona yadi ve wata ava'ai i 'idewadiga faifaidi.<sup>31</sup> Fai 'aila'a bwaikaotogina i mimaiia wata i nunagoi, Iesu wata yana tovetutuyamavo kebu tamu 'awasasa 'waidie bega i na veawai wata i na 'ani. Faifainanina Iesu i vo, Ta na nagoi tulideye, tamu 'awasasa kebu tomotoginaga 'waineye, ta na veawai.”<sup>32</sup> Bega tulidie i nagoi wakayega i damana ava'aibe bei kebu tamu aitoi i da miamia 'waineye.

<sup>33</sup> Tomotoga fuedi Iesu ma enavo yadi tauya i 'asetai wata 'akonadi i 'isedi, faifainanina 'agediamo i bala 'atamana 'aitamogana 'aitamogana 'waidiamo nagami i le'wai ava'aibe bei Iesu i nunagoga 'waineye.<sup>34</sup> ✨ Tutuyanina Iesu ma enavo i duduna 'aila'a bwaikina i 'isedi nuana i vita faifaidi wata i 'isanuakalikaliedi fai 'wa da vo bani'odi 'aisaya sifi kebu 'adi to'isave'avinaga. Begaidi i velamu nani fuedi faifaidi i ve 'waidie.

<sup>35</sup> ✨ Akonadi lavilavi sai'afoga i na lovani tovetutuyamavo i maia Iesu i voneni i vo, De'e bei 'ani'ani kebu, wata 'akonadi tutuya i ve'ale'usa.<sup>36</sup> Tomotoga 'u na vetuned i na nagoi taunidi 'adi'adi i na kimwane 'atamana wata kweda 'waidie.”<sup>37</sup> Iesu i vonedi i vo, 'Omi taunimi 'ai'edi ava'ai 'wa veledi i na 'ani.” Tovetutuyamavo i vo, Vetuma nuanuamu 'a na nago 'ani'ani bwaikaotogina bani'odi 'ana tutula lubulubu 200\* 'a na 'ewadi.”<sup>38</sup> Iesu i velutoliedi i vo, 'Aivia 'ani'ani 'waimie. 'Wa nagoi 'wa 'iseni.” 'Akonadi i 'iseni i maia i voneni i vo, 'Ani'ani mwadodoudi 5 wata igana 'ailuga 'a veluagadi.”

<sup>39</sup> Mulieta Iesu yana tovetutuyamavo i vonedi i vo, 'Wa na vonedi tomotoga i na veiwakukuna mosomoso 'waidie.”<sup>40</sup> I veiwakukuna, kukuna 'ifwaidi bani'odi tomotoga 100, 'ifwaidi bani'odi 50.<sup>41</sup> Bega Iesu 'ani'ani i 'ewai i 'isalaka abame Yaubada 'waineye i vekaiwa i 'a'avana mwadodoudi i 'ewadi i 'ivividi. Yana tovetutuyamavo i veledi i veuseni tomotoga 'waidie. Wata igana bani'odi.<sup>42</sup> Matatabudi i 'ani kamodi i aidi.<sup>43</sup> Tovetutuyamavo tomotoga nikilidi i va'augidi bayawa 12 i veadagidi.<sup>44</sup> 'Aila'anidi i 'aniga iaveta

✨ 6:30: Luk 10:17 ✨ 6:34: Mad 9:36 ✨ 6:35: Mak 8:1-9 \* 6:37: Diu yadi mani Denali 200. Denali 'aitamogana, 'aiata 'aitamogana 'ana folova tutulina.

tulai'avadi 5000, we'e vevine wata kwakwama kebu i da lu'iawawadiga.

*Iesu ufa tabwaneamo i nago.*

<sup>45</sup> Tomotoga i ve'anidi i 'a'avana, Iesu yana tovetutuyamavo i lukakadedi i vo, 'Wa na dodoga wakeye 'wa na kumeta 'wa na nagoi Bedasaida, yau 'aila'a a na vonedi i na nagoi.”

<sup>46</sup> ☆Tomotoga i tauya i nunagoi Iesu i laka 'oyeye bei i velu'ui.

<sup>47</sup> 'Akonadi i laviotogi we'e waka lavu kamwaneye Iesu 'aiseotogina 'avale. <sup>48-50</sup> ☆Yana tovetutuyamavo i 'isa'anunuyedi ma yadi tokemaiga i voivoi fai kaukau i veveviladi. Sai'afoga tutuya i na fuai nika Iesu i le'wa lilivadiamo i nago ufa tabwaneamo. Tutuyanina Iesu i nunago 'waidie fuedi 'isanaweni ma yadi kololo i 'we'weleni i vo 'ako, Yalua.” Bega Iesu i vona-matayo'oyedi i vo, Kebu 'wa na kolologa, yau taunida.” <sup>51</sup> I nago i dodoga wakeye yana tovetutuyamavo 'waidie nika kaukau i 'awatagoni. Faifainanina tovetutuyamavo nuadi i voganidi. <sup>52</sup> ☆We'e bagase Iesu 'aila'a bwaikina i ve'anidi yana tovetutuyamavo nuadi kebu i da magetadi yana toketokena faifaina, Iesu i 'iseni ufa tabwaneamo i nunago, nuadi i voganidi, bola kebu i da 'asetaiqa.

*Iesu tovinga i 'ive'atumaidi Genesaleta 'waineye.*

<sup>53</sup> I duduna Genesaleta balebaleye bei yadi waka i lomuyeni. <sup>54</sup> Tutuyanina wakayega i obuobu tomotoga fuedi Iesu i 'isa'inanai. <sup>55</sup> Tomotoganidi i lilide i nagoi 'awalawanina matatabuna 'waineye yadi tovinga i miendi ava'aibe bei Iesu i miamia 'waineye. <sup>56</sup> ☆Iesu i nago 'atamana siaidi, bwaikidi, wata kweda 'waidie, tomotoga yadi tovinga i miendi 'atamanafouye i yatodi i velu'ui Iesu 'waineye nuadi i na 'abitonovidi we'e 'ai'edi kebu, 'ana kaleko mataifwa'avana i na 'abitonovi. Matatabudi Iesu i 'abitonovi i ve'atumai.

## 7

*Diu tubudiavo yadi ve.*

<sup>1-4</sup> Diu matatabudi siwe mogitana totafalolo Falisi, ve'etoboda tubudiavo 'waidiega i maiga i veve'ililibuyedi. Nimadi i na lekoadewadi bani'odi yadi ve'etoboda mulieta i na 'ani, fai yadi nuanua igodi i vo, Nimada ta na lekoadewadi wata ta na tafalolo bega Yaubada i na 'asetada yada nuanua vunavunagidi.” Yadi sauluva 'ai'edi 'eba sivedavedamana 'wainega i na maia, nagami nimadi i na lekoadewadi, mulieta i na 'ani. Wata 'ifwaidi ve'etoboda

☆ 6:46: Mak 1:35; Luk 5:16, 6:12 ☆ 6:48-50: Luk 24:36-37 ☆ 6:52: Mak 8:17

☆ 6:56: Mak 5:27-28

tubudiavo 'waidiega i veve'ililibuyedi, nau, vedi, 'aivoe, wata sita i lelekoa-dewadi.

Tamu 'aiata 'waineye Diu totafalolo Falisi wata 'ifwaidi ve'etoboda 'adi tovevo i maia Ielusalemega Iesu 'waineye i va'auta. I 'isedi yana tovetutuyamavo i 'ani'animo kebu i da 'ilekoa yadi ve'etoboda bani'odi.

5 Begaidi Falisi wata ve'etoboda 'adi tovevo Iesu i velu-tolieni i vo, Awale yamu tovetutuyamavo yada sauluva tubu-davo 'waidiega kebu i da ve'ililibuyedi we'e i 'ani'animo kebu i da 'ilekoa?" 6 ✨Iesu i vonedi i vo, 'Omi tovekali. 'Awami i tatalaboda nani fuefi faifaidi siwe wata 'wa 'i'idewadi. Basenadiotoga Yaubada yana tolu'ivona Aisea Yaubada yana Vona 'wainega i vona-vagata faifaimi. I vonaga mogitana i vo, De'e 'aila'anidi 'awakebuladiega i ve'ililibuyeku, We'e kebu mogitana i da nuakalikalieku.

7 Fai tomotoga yadi nuanua i veve i vo 'ako, Yaubada 'wainega, Begaidi 'waikuye i 'o'odu-maimaiga."

8 Wata Iesu i vo, Aisea i kilumi mogitana, Yaubada yana veimea 'wa bailedi we'e tomotoga yadi ve 'wa veve-matayakeyakedi."

9 Wata i vonedi i vo, Yaubada yana veimea 'wa baibailedi we'e taunimi yami ve'etoboda 'wa veve'ililibuyedi 'wa nuani 'wa vo 'ako, 'Atumaidi." 10 ✨Basenadiotoga Mosese Yaubada yana veimea i veleda i vo, Tamamiavo wata inamiavo 'wa na ve'ililibuyedi." Wata i vo, 'Ai'edi aitoi tamana wata inana i na vebonaivoyedi 'alo i na yagayagaidi 'wa na nikei i na wafa." 11-12 Veimeanidi 'wa geugeudi fai 'wa veve 'wa vo, 'Ai'edi aitoi ma yana mani, siwe kebu nuanuana tamana wata inana i na 'ivaisediga, 'omi 'wa tauyeni bega i na vonedimo i na vo, Mani de'e a da velemini siwe a na 'aniveleneni Yaubada faifaina," vonanina 'wa fali'atumaieni. We'e mogitana i lubwaineni tamana wata inana maninina 'wainega i da 'ivaisedi. 13 De'e bani'odi Yaubada yana Vona 'wa lulu'avo'avovoi, ma'itufa ve'etoboda tubumiavo 'waidiega 'wa vevematayakeyakedi. Wata nani fuefi bani'odi 'wa 'i'idewadi."

### *Naninidi tomotoga i na 'ivesakodi.*

14 Wata Iesu tomotoga i goledi i nagoi 'waineye, i vonedi i vo, 'Wa na nogaya fuemi, nika 'wa na 'asetai. 15 ✨Tamu ava'ai i na luku tomotoga nagedie, kebu 'ana fata tomotoganidi i na 'iveyokedi. Siwe mogitana vona 'alo nuanua sakoidi tomotoga 'waidiega i na souyediga, naninidi tomotoga i na

'iveyokedi. [16 'Akonadi yaku vona 'wa nogai, siwe 'wa na venua'ivineni nika 'wa na 'asetai.]”

17 Iesu tomotoga i 'iawedi i nago vanuge, mulieta yana tovetutuyamavo i velutolieni yana ve faifaina. 18-19 Iesu i vonedi i vo, 'Omi bola kebu ma yami 'asetaga. 'Wa da 'asetai 'ai'edi 'ani'ani ta na 'ania kebu 'ana fata i na 'ivesakoda, fai kebu i na nago yada nuanua 'waidie, kamod-eye i na luku bega yogo yana 'edeye i na nago.” Iesu bani'odi i vonaga 'ani'ani matatabuna 'atumaidi ta na 'anidi, kebu tamu sakona 'wainega i na souyeni. 20 Wata i vo, Ava'ai tomotoga nagediega i na souyedi naninidi tomotoga i na 'iveyokedi. 21 ✧Tomotoga nagediega nuanua sakoidi i sousouyedi bega i vevesauluva sakoina bani'odi ve'avula-avo'avovo, vainago, luvewafa, wata lauobu. 22 Wata 'ifwaidi sauluva sakoidi, bani'odi veumokai, veviga 'ana tolive'eda, vekali, sakona 'ana vebaisa, ve'unumagigi, ve-bonaivo, taunidi i na awa'ai'aidiga, wata venua'ivina-sako. 23 Naninidi i souyedi tomotoga nagediega, bega tomotoganidi i 'ivesakodi.”

*Vavine yadi vetumagana.*

24 'Atamananina 'waineye i veveifufu, Iesu i 'iaweni i nago tamu 'awalawa 'waineye, 'atamana Taia lilivaneye. I le'wa i luku vanuge, kebu nuanuana tomotoga i na 'asetai yana 'eba mia fai nuanuana i na veawai, siwe kebu 'ana fata i na giva. 25 ✧We'e vavine tamu natudi vevinena yaiaina sakoina i ageiga, Iesu valana i nogai i mai ma yadi ve'ililibu i be'u 'ageneye. 26 Vavinenidi kebu vavine Isileliga taunidi i tubuga 'atamana Finisia, 'awalawa Silia nageneye, siwe Iesu i velu'uieni nuanuaotogidi natudi i na 'ive'atumaia.

27 Iesu vavine i vonedi i vo, Nagami kwakwama a na ve'anidi. Kebu i da lubwaineku kwakwama 'adi'adi a na elodi a na 'anivelenedi 'ou'ou 'waidie.” 28 Vavine i 'asetai Iesu i vonavona nagami i na folova taunina yana 'aila'a Diu 'waidie, faifainanina i voneni i vo, 'Auvea, we'e mogitana. Siwe tutuyanina kwakwama i na 'ani'ani, 'ou'ou siadi mukumuku i na luluyamuyamu. Faifainanina sai'afo 'u da 'ivaisema.” 29 ✧Iesu i vonedi i vo, Fai yami vona 'ana nogaya 'atumaina 'wa na nago, natumi 'akonadi i ve'atumi yaiaina i 'awa'a'ia.” 30 I nago i le'wa yadi vanuge natudi i 'iseni 'ivie i 'eno'eno 'akonadi viga i 'a'ava.

*Tomogo tanigana 'uluna wata meana tafilina Iesu i 'ive'atumaia.*

31 Iesu i tauya Taia 'wainega i nago 'atamana Saidoni, bega 'awalawa Dekafolisi 'waidiamo i nago i le'wa Lavu Galili.

<sup>32</sup> ✧Tomotoga 'ifwaidi tamu toviga i mieni Iesu 'waineye i velu'ui nuanuadi nimana i na yatoi iadi 'waineye bega i na ve'atumai. Toviganina tanigana 'uluna wata meana tafilina. <sup>33</sup> Iesu tomogo 'aila'a 'waidiega i 'ewai 'aiseneye i naweni nimadidina i 'etouyedi tomogonina tanigana 'waidie wata ni-maneye i kiwala bega tomogo meana i 'abitonovi. <sup>34</sup> Mulieta abame i 'isalaka i veyawaitunatunagi i 'a'avana bonanega i vona i vo, Efada," 'ana saivila, 'Wa 'ani'inimi." <sup>35</sup> Yana voneye tomogo tanigana i 'ani'inidi wata meana i tonova nika i welava.

<sup>36</sup> Wata i viladi i mai 'aila'a 'waidie Iesu i velu'ase'asedi kebu i na lu'ivona tomogo i 'ive'atumaiaiga faifaina siwe fuedi i lu'ivo'ivona. <sup>37</sup> Egavo i 'iseni nuadi i voganidi bwaikina, i vo, Nani i 'i'idewadiga 'atumai'avadi. 'Eba nuavogana wata 'eba nua'ewa i 'i'idewadi siwe wata tomotoga tanigadi i kia'inidi i nogaya wata meadi i kiavetonovidi i welava."

## 8

### *Iesu tomotoga 4000 i ve'anidi.*

<sup>1-2</sup> Tomogo i 'ive'atumaia i 'a'avana, kebu 'aiata fuediga tamu 'aiata 'waineye, wata 'aila'a bwaikina i va'auta. 'Adi'adi kebu, begaidi Iesu yana tovetutuyamavo i goledi i nagoi 'waineye i vonedi i vo, Tomotoga de'e faifaidi a nuavita fai 'akonadi 'aiata 'aitonu taiadi ta miamiani siwe 'ani'ani kebu tamu faifaidiga bega i na 'ani. <sup>3</sup> 'Ai'edi ma 'adi lase a na vetunedi yadi 'atamane bola 'edeye laseyega i na mwea fai 'ifwaidi 'ani'ieyega i maia." <sup>4</sup> Yana tovetutuyamavo i vo, De'e kebu tomotoginaga, kebu tamu aitoi 'ana fata 'ani'ani i na veluagai bega 'aila'a de'e ta na ve'anidi." <sup>5</sup> Iesu yana tovetutuyamavo i velutoliedi i vo, 'Aivia 'ani'ani 'waimie?" I vo, 'Ani'ani mwadodoudi 7 'waimeye."

<sup>6</sup> 'Aila'a i vonedi fwayefwayeye i vemiamiabui. Mulieta 'ani'aninidi 7 i 'ewadi, i vekaiwa Yaubada 'waineye, i 'a'avana i 'ivividi bega yana tovetutuyamavo i veledi 'aila'a i veutadi. <sup>7</sup> Wata 'adi igana siaidi 'ifwaidi faifaidi Iesu i vekaiwa i 'a'avana yana tovetutuyamavo i veledi wata bani'odi tomotoga i veutadi. <sup>8</sup> Matatabudi i 'ani, 'adi fata. To'aninidi iaveta tulai'avadi i lu'iawawadi 'adi 'aila'a bani'odi 4000, we'e vevine tulaidi wata yavayavava matatabuna kebu taiadi i da lu'iawawadiga. <sup>9</sup> ✧Tovetutuyamavo tomotoga nikilidi i va'augidi, bayawa 7 i veadagidi. Mulieta Iesu tomotoga i vonedi i nagoi yadi vanuge. <sup>10</sup> We'e Iesu ma yana tovetutuyamavo i dodoga wakeye i nagoi 'awalawa Dalimanuda 'waineye.

*Falisi nuanuadi Iesu i na silubuya.*

11 ✨Diu totafalolo 'ifwaidi Falisi i maia Iesu 'waineye taiadi i ve'ikwayekwayega. Nuanuadi i na silubuya i vo, Tamu 'eba 'isa toketokena 'u na 'idewai bani'odi Yaubada 'aisena 'ana fata i na 'idewai, bega 'a na 'asetai mogitana taunina i vetunemu.” 12 Iesu i veyawaitunatunagi i 'a'avana i vo, 'Omi tutuya de'e 'ana tomotoga, awale nuanuami 'eba nuavogana wata 'eba nua'ewa a na 'idewai? A vona mogitana kebu tamu 'eba 'isa a na vevemi.” 13 Bega i 'iawedi i dodoga wakeye yana tovetutuyamavo taiadi i damana lavu vi'ainega.

*Vona-awatabai isita faifaina, naninina beledi i 'ivebwaiki.*

14 Toveutuyamavo nuadi i fani kebu tamu 'ani'ani i da 'ewai, beledi 'aitamogana wakeye. 15 ✨Iesu vona-awatabaiega i velu'ase'asedi bega tomotoga sakoidi yadi sauluva kebu i na damana 'waidie. I vo, 'Wa na 'isave'avinimi totafalolo Falisi yadi isita wata Kini Elodi yana isita i na nunago i na vedamanimi.” 16 'Aise'avadi i veifufu i vo, Isita\* beledi 'ana 'eba 'ivebwaika, bani'odi i voneyediga fai 'ida beledi kebu ta da 'ewadiga.”

17 ✨Yadi vonanina Iesu 'akonadi i 'asetai faifainanina i vo, Awale 'wa ve'ivonavona 'ani'ani kebu ta da 'ewadiga faifaina? We'e nuami tabodadi. Voke yami nuanua bola kebu i da magetaiga wata kebu 'wa da 'asetai. 18 Ma matami siwe kebu 'wa da 'iseni wata ma tanigami siwe kebu 'wa da nogai. Yau ma yaku toketokena we'e voke nuami i fani.” 19 ✨Tutuyanina 'ani'ani 5 a 'ivividi tomotoga 5000 faifaidi, nikila 'wa va'augidiga 'aivia bayawa 'wa veadagidi?” I vo, 12.” 20 ✨Wata i vo, 'Ani'ani 7 a 'ivividi tomotoga 4000 faifaidi, 'aivia bayawa 'wa veadagidi nikilayega?” Toveutuyamavo i vo, 7.” 21 Iesu i vo, Voke bola kebu 'wa da 'asetai. We'e 'omi 'wa nuaniga, igodina yau nuafouku i da veveviga fai kebu 'ada'adaga.”

*Iesu tomatasako i 'ive'atumaia Bedasaida 'waineye.*

22 Iesu ma yana tovetutuyamavo i maia Bedasaida 'waineye tomotoga tamu tomatasako i mieni Iesu 'waineye, i velu'ui 'waineye nuanuadi i na 'abitonovi bega i na ve'atumai. 23 Iesu tomogo nimaneye i 'abi 'atamanayega i naweni tulineye. Mulieta Iesu tomogo matana i kiwalidi i 'a'avana nimana i yatoi tomogoneye i voneni i vo, 'Amu fata ava'ai 'u na 'isedi?” 24 Tomogo 'isanago i vona i vo, 'Aku fata tomotoga a 'ise'isedi, siwe 'adi 'isa 'wa da vo welavi i

✨ 8:11: Mad 12:38; Ion 6:30 ✨ 8:15: Luk 12:1 \* 8:16: Isita falawa matatabuna 'waineye i na susula, bani'odi walabo 'aluna, 'ai'edi i na 'anibiai 'aisayanina matatabuna i na 'ivesakoi. ✨ 8:17: Mak 6:52 ✨ 8:19: Mak 6:41-44 ✨ 8:20: Mak 8:6-9

da yabayaba.”<sup>25</sup> Iesu nimana i yato-vaitugani tomogonina mataneyeye nika matana i ve'atumai i 'isadewa.<sup>26</sup> Iesu i voneni bega i na nago yana vanuge wata i vo, Kebu 'u na lu'ivona 'atamane.”

*Fita Iesu i 'asetai.*

<sup>27</sup> Mulieta Iesu ma yana tovetutuyamavo i tauya i nagoi 'awalawa Sisalia Filifai. I nunagoi 'edeeye i velutoliedi i vo, 'Wa da nogaiga tomotoga yadi nuanua yau aitoi?”

<sup>28</sup> Tovetutuyamavo i vo, Tomotoga 'ifwaidi i vonaga 'omu Ioni Tobafitaiso wafayega i mai, 'ifwaidi i vonaga 'omu Ilaitia abamega i obuma, we'e 'ifwaidi i vonaga 'omu tamu Yaubada yana tolu'ivona i tovoi-vaitugana.”

<sup>29</sup> ✧ Iesu i vonedi i vo, We'e 'omi, 'wa da nuani yau aitoi?” Fita i vo, 'Omu Keliso, Yaubada 'ana Venua'ivina.”

<sup>30</sup> Bega Iesu yana tovetutuyamavo i vonedi i vo, Kebu tamu aitoi 'waineye 'wa na lu'ivonaga yau Keliso, Yaubada 'ana Venua'ivina.”

*Iesu yana wafa i veifufuyeni.*

<sup>31</sup> Iesu i veve yana tovetutuyamavo 'waidie i vo, Yau a vetomotogaotoga i lubwaineku veviga fueidi a na veluagadi. Me Diu yadi to'edakumetavo 'au'auveadi, tovelomu 'adi to'edakumetavo wata ve'etoboda 'adi tovevo i na vedumwe'ai'aieku mulieta i na veimea a na wafa, 'aiata 'ana vetonu 'waineye wata a na yawasa-vaitugana.”<sup>32</sup> De'e bani'odi Iesu i voneyediga i vonaotoga. Fita Iesu i voneni i vaganago 'aisedie, i toke i talabodebodeni i vo, Kebu bani'odi taunimu 'u na faliwafewafemu.”<sup>33</sup> Iesu i sivilai yana tovetutuyamavo i 'isedi bega Fita i talabodeni i vo, 'U vaganago, yamu nuanuananina Seitani yana nuanua. Bani'odi tomia fwayafwaya yadi nuanua, kebu Yaubada 'wainega.”

<sup>34</sup> Mulieta Iesu 'aila'a wata yana tovetutuyamavo i goledi i nagoi 'waineye i vonedi i vo, 'Ai'edi aitoi nuanuana mogitana i na mai 'waikuye taiadi 'a na nagoga, nagami taunina yana nuanua i na bailedi. Fai i na vematayakeyakeku veviga bwaikina i na veluagai yau bani'odi a na veluagai. Voke i na wafa faifaiku yau bani'odi a na wafa 'ai lagalagana 'waineye.

<sup>35</sup> 'Ai'edi aitoi yana mia 'ana 'atumaina i na ve'o'oleni, kebu nuanuana yawaina i na tauyeni faifaiku, taunina i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku wata Valaku 'Atumaina faifaina, mia 'atumaina wata miamia-vagaina i na veluagai.

<sup>36</sup> 'Ai'edi tamu aitoi fwayafwaya matatabuna 'ana kukua i na 'ewadi mulieta yawaina i na 'a'ava, ava'ai 'ana 'atumaina?

<sup>37</sup> Kebu 'ana fata tamu nani 'wainega yawaina i na kimwanei.

<sup>38</sup> 'Asiau tomotoganidi yadi sauluva sakoidi, wata Yaubada i vedumwe'ai'aieni. We'e 'ai'edi aitoi yau faifaiku wata Valaku 'ana lu'ivona faifaina i na bunumayaga, yau a vetomotogao-toga bola a na vila-vaitugana, wata a na bunumayageni. Yaku vila-vaitugana 'waineye, anelose magemagetadi taiadi 'a na maia, Tamaku yana mageta mataududulina nageneye.

## 9

<sup>1</sup> Wata Iesu i vo, A vona mogitana 'waimie, 'ifwaimi bola ma yawaimi 'wa na miamia nagami Yaubada yana veimea toketokena tomotoga 'waidie 'wa na 'iseni mulieta 'wa na wafa.”

### *Iesu i vemaigisivilavila.*

<sup>2</sup> ✧ Aiata 6 i 'a'ava mulieta Iesu i vonedi Fita, Iemesa, wata Ioni i 'edakumesedi, 'aise'avadi i laka 'oya bwaikineye. I mi-amiani nika tovetutuyamavo matadie Iesu 'ana 'isa i vetuli. <sup>3</sup> 'Ana kaleko 'adi lau'avu mataududulina, kebu tamu aitoi fwayefwayeye 'ana fata bani'odi i na 'ilekoediga. <sup>4</sup> I 'ise'iseni nika tomotoga 'adi 'ailuga i souyedi Iesu taiadi i veveifufu. Tomotoganidi abamega i obuma, Mosese wata Ilaitia, taunidi basenadiotoga Yaubada yana tolu'ivonavo.

<sup>5</sup> Nika Fita i vona-matayo'o Iesu 'waineye i vo, Tove, 'ima taiadi ta maia i lubwaineni. Lau'weta 'aitonu 'a na 'idewadi, tamu 'omu faifaimu, tamu Ilaitia faifaina wata tamu Mosese faifaina.” <sup>6</sup> Fita kebu 'ana fata ava'ai i na voneyeni fai ma enavo i kololo bwaikina. <sup>7</sup> ✧ Waowa i mai i tavunidi bona i souyeni waowayega i vona i vo, De'e Natuku nuafouku, ava'ai i na voneyeniga, bonana 'wa na nogai.” <sup>8</sup> I vona'a'ava nika tovetutuyamavo i 'isadaba kebu tamu aitoi i da 'iseni, Iesu 'aise'avana.

<sup>9</sup> 'Oyayega i obuobuma i velu'ase'asedi i vo, Ava'ai 'wa 'isediga, kebu tamu aitoi 'wa na voneniga, nagami yau a vetomotogaotoga wafayega a na yawasa-vaitugana, mulieta 'wa na lu'ivona.” <sup>10</sup> I talabodedi, kebu i da lu'ivona, siwe 'aise'avadi i veifufu i vo, Yawasa-vaitugana wafayega ava'ai?”

<sup>11</sup> Mulieta yana tovetutuyamavo i velutolieni i vo, Awale ve'etoboda 'adi tovevo i vonaga i vo, Ilaitia nagami Yaubada 'wainega i na mai, mulieta Yaubada 'ana Venua'ivina i na souyeni?” <sup>12</sup> ✧ Iesu yadi vona i tutuli i vo, Ilaitia mogitana nagami i na mai Yaubada 'wainega, nani matatabuna i na 'ivenonogidi, we'e 'wa nuanuani Yaubada yana tolu'ivona basenadiotoga i kilumi yau a vetomotogaotoga faifaiku? I kilumi veviga bwaikina a na veluagai wata tomotoga i na



vedumwe'ai'aieku. <sup>13</sup> Siwe a na vonemi, Ilaitia tutulina\* 'akonadi i mai siwe tomotoga kebu i da 'isa'inanaiga, begaidi vitanidi nuanuadi i na veleniga mogitana i veleni, bani'odi basenadiotoga Yaubada yana tolu'ivona i kilumi.”

*Iesu kwamana i 'ive'atumaia.*

<sup>14</sup> Tutuyanina Iesu ma enavo i viladi 'oyayega 'ifwaidi tove-tutuyamavo i 'isedi i veve'ikwayekwayega ve'etoboda 'adi tovevo taiadi, we'e 'aila'a bwaikina i tovifinedi. <sup>15</sup> 'Aila'anidi Iesu i 'iseni nuadi i voganidi bega i lilide i nagoi nuanuadi taiadi i na veluaga. <sup>16</sup> Iesu i velutoliedi i vo, Ava'ai faifaina 'wa veve'ikwayekwayega?” <sup>17</sup> Tamu tomogo 'aila'a nagediega i vo, Tove, natuku a mieni fai yaiaina i agei kebu 'ana fata i na welava. <sup>18</sup> Tutuyanina yaiaina i vevekadia i tawetaweni i obuobu tanotanoge, 'awanega buobuo, nigona i lovelovenedi wata tomogona i tototola. Yamu tovetutuyamavo a vonedi a vo, 'Wa da 'ive'atumaia,” siwe kebu 'adi fataga.”

<sup>19</sup> Iesu tomotoga i vonedi i vo, Awale 'omi tomotoganimi Yaubada yana toketokena kebu 'wa da vetumaganeniga? Tutuya manamanawena taiadi ta miamia wata a totoke-maigeke bwaikina siwe kebu 'wa da vetumaganeku mogitana. Kwamananina 'wa mieni ta na 'iseni.” <sup>20</sup> Kwamana Iesu 'waineye i mieni, siwe tutuyanina yaiaina Iesu i 'iseni kwamana i vekadia i be'u i lui'oi'o'o 'awana buobuo i tubodai. <sup>21</sup> Bega Iesu kwamana tamana i velutolieni i vo, Ava'ai tutuyaga de'e i souyeni 'waineye?” Tamana i vo, Basenadi siaineye. <sup>22</sup> Yaiaina tutuya fuedi i vevekadia i be'ube'u 'ai-'ala'alase wata ufeye, igodi nuanuana kwamana i na 'ivewafai. 'Ai'edi 'amu fata 'u da 'isanuakalikalie ma bega 'u da 'ivaisema.” <sup>23</sup> ✧ Iesu i vo, Awale 'u vo, 'Ai'edi 'amu fata?” We'e egavo Yaubada i na vetumaganeni nani matatabuna safailidi 'waidie. <sup>24</sup> ✧ Kwamana tamana i vo, Yau wata ma yaku vetumagana, siwe nuanuaku 'u na 'imoso'i.” <sup>25</sup> Iesu i 'isedi tomotoga fuedi i lilide i mimaiia, yaiaina sakoina i ta'ali i vo, 'Omu kwamana 'awana 'u 'ibodai wata tanigana 'u 'ive'uluya a na vonemu. 'U 'awa'a'imu kebu wata 'u na age-vaitugani.” <sup>26</sup> Yaiaina i vebwaubwau wata kwamana i vekadia i tufa'o'oga nika i 'awa'a'ia. Kwamananina 'ana 'isa 'wa da vo i da wafa, fuedi i vo, Yawaina i 'a'ava.” <sup>27</sup> Siwe Iesu kwamana nimaneye i 'abi i sivetovoia nika i tovoi.

<sup>28</sup> Mulieta i nagoi vanuge, 'aisedie yana tovetutuyamavo i velutolieni i vo, Awale 'ima 'a vona yaiaina kebu i da 'awa'a'iaga?” <sup>29</sup> Iesu i vo, Nagami Yaubada 'waineye 'wa na velu'ui mulieta 'wa na vona 'ana fata yaiaina de'e bani'odi i na 'awa'a'ia, kebu tamu wata ava'ai 'wainega.

\* 9:13: Ilaitia tutulina siwe 'asa'aiana Ioni Tobafitaiso. ✧ 9:23: Mak 11:23

✧ 9:24: Luk 17:5

*Iesu i veifufu-vaitugana yana wafa faifaina.*

<sup>30-31</sup> ✧ Kwamana bei i 'ive'atumaiaga 'atamananina i 'iaweni i nagoi 'awalawa Galili 'waineamo. Iesu yana nago kebu nuanuana tamu aitoi i na 'asetai, fai i veve yana tovetutuyamavo 'waidie. I vonedi i vo, Yau a vetomotogaotoga tamu tomogo i na 'etogiluveku, bega mali tomotoga i na luvewafaku, mulieta 'aiata 'ana vetonu 'waineye a na yawasa-vaitugana.”  
<sup>32</sup> ✧ Vonanina Iesu i voneyeniga enavo kebu i da 'asetai, siwe i kololo kebu nuanuadi i na velutolieni.

*Aitoi bwaikaotogina?*

<sup>33</sup> Tutuyanina Iesu ma yana tovetutuyamavo i maia Kafaneomi, vanuge i luku i vonedi i vo, 'Edeye ava'ai faifaina 'wa ve'ikwayekwayega?”  
<sup>34</sup> Siwe kebu nuanuadi i na lu'ivona fai i bunumayaga, we'e yadi ve'ikwayekwayeganina i vo, 'Waidega aitoi bwaikaotogina?”

<sup>35</sup> ✧ Iesu i miabui mulieta yana tovetutuyamavo i goledi i nagoi 'waineye i vonedi i vo, 'Ai'edi aitoi nuanuana i na vebwaika, nagami i na vekwamana bega tomotoga i na folovedi.”  
<sup>36-37</sup> ✧ Mulieta Iesu tamu kwamana i mieni 'waidie i olia bega i vonedi i vo, 'Ai'edi aitoi ma yana nuakalikali tamu kwamana de'e bani'odi i na 'ivaiseni faifaiku siwe 'asa'aiana yau i 'ivaiseku. Wata 'ai'edi aitoi ma yana nuakalikali i na 'ivaiseku, siwe 'asa'aiana Yaubada taunina 'aku tovetune i 'ivaiseni.

*Tamu tomogo i vona yaiaina i 'awa'a'ia.*

<sup>38</sup> ✧ Ioni Iesu i voneni i vo, Tove, 'a 'iseni tamu tomogo 'amu wagavayega i vonavona yaiaina i 'a'awa'a'idi, 'a talabodeni fai taunina kebu 'ada 'aila'a.”  
<sup>39</sup> Iesu i vo, Kebu 'wa na tala-bodeniga, aitoi 'aku wagavayega 'eba nuavogana wata 'eba nua'ewa i na 'i'idewadiga mulieta kebu i na awavesakoyeku.  
<sup>40</sup> ✧ 'Ai'edi aitoi kebu i na vedumwe'ai'aiedaga, ma fueda ta folofolova.  
<sup>41</sup> 'Ai'edi aitoi 'aku wagavayega ufa i na velemini 'wa na yemu fai 'omi yau Keliso yana tomotoga, a vona mogitana yana 'aivaitanina 'ana tutula bola i na veluagai Yaubada 'wainega.”

*Vetalaimimila 'wainega sakona i na souyeni.*

<sup>42</sup> Wata Iesu i vonedi i vo, 'Ai'edi aitoi i na vetumaganeku de'e kwamana bani'odi siwe tamu tomogo i na vetalaimimili i na sakonaga, bola tomogonina veviga bwaikaotogina i na veluagai Yaubada 'wainega. Siwe nagami tomogonina kebu i da vetalaimimilaga, bei tomotoga 'ifwaidi kileu vitana i da yogona-matayo'oi 'odoneye i da taweni malaveseye, veviga

✧ 9:30-31: Mak 8:31 ✧ 9:32: Luk 18:34 ✧ 9:35: Mak 10:43-44; Luk 22:24

✧ 9:36-37: Ion 13:20 ✧ 9:38: Mad 10:33; Num 11:27-29 ✧ 9:40: Luk 11:23

siaina i da veluagai. I da wafa-matayo'oga i lubwaineni nika kebu i da vetalaimimilaga wata kebu veviga bwaikaotogina i da veluagai Yaubada 'wainega. <sup>43</sup> 'Ai'edi nimamu tamu sai'afoga i da kiavebe'umu 'u da sakona, 'u boboi 'u taweni. 'U na boboiga veviga sai'afo nika kebu 'u na sakonaga, mulieta nima'ea'eamu 'u na luku Yaubada 'waineye 'u na mia-vagata. We'e 'ai'edi kebu 'u na boboiga, nimamu 'ailugana 'waidiega 'u na sakosakona, mulieta 'u na wafa 'u na luku 'ai-'ala'alase kebu yana 'weuga 'waineye. <sup>44</sup> Bei mwatamwata tomogomu i na 'e'etokudai, we'e 'ai-'ala'alatanina kebu i na 'weuga. <sup>45</sup> 'Ai'edi 'agemu tamu sai'afoga i da kiavebe'umu 'u da sakona, 'u boboi 'u taweni. 'U na boboiga veviga sai'afo nika kebu 'u na sakonaga, mulieta 'age'ea'eamu 'u na luku Yaubada 'waineye 'u na mia-vagata. We'e 'ai'edi kebu 'u na boboiga, 'agemu 'ailugana 'waidiega 'u na sakosakona, mulieta 'u na wafa i na tawemu 'u na obu 'ai-'ala'alase. <sup>46</sup> Bei mwatamwata tomogomu i na 'e'etokudai, we'e 'ai-'ala'alatanina kebu i na 'weuga. <sup>47</sup> 'Ai'edi matamu vi'aina sai'afoga i da kiavebe'umu 'u da sakona, 'u kiamwanuya 'u taweni. 'U na kiamwanuyaga veviga sai'afo, nika kebu 'u na sakonaga, mulieta 'amu fata 'aitamoganega 'u na luku Yaubada yana 'Eba Veimea nageneye. We'e 'ai'edi kebu 'u na kiamwanuyaga, matamu 'ailugana 'waidiega 'u na sakosakonaga mulieta 'u na wafa i na tawemu 'u na obu 'ai-'ala'alase. <sup>48</sup> Bei mwatamwata tomogomu i na 'e'etokudai, we'e 'ai-'ala'alatanina kebu i na 'weuga.

<sup>49</sup> Wata Iesu i vona-awatabaiedi i vo, Yaubada tomotoga matatabumi i na silubumi 'ai-'ala'alainega bega 'wa na vetoketoke bani'odi eyaga 'ani'ani i 'ive'iwani. <sup>50</sup> \*Eyaga nani 'atumaina, siwe 'ai'edi i na ve'ulaufa kebu 'ana fata i na vegola-vaitugana. 'Ani'ani ta na vetagovi eyaga taiadi i na 'ive'iwani. Wata 'omi bani'odi, yami sauluva 'waidiega tosakona 'wa na 'ive'atumaidei wata ma fuemie 'wa na veiana.”

## 10

### *Iesu i ve sa'ila faifaina.*

<sup>1</sup> 'Atamana Kafaneomiega Iesu ma enavo i tovoi i nagoi 'awalawa Iudia 'waineye i damana Iolidani no'o bega. Wata 'aila'a bei i maia Iesu 'waineye i ve 'waidie, bani'odi tutuya fuedi i veve. <sup>2</sup> Diu totafalolo Falisi 'ifwaidi nuanuadi tomotoga i na nuasako Iesu 'waineye bega i maia 'aila'a matadie i velutolieni i vo, Tomogo i lubwaineni yana vavine i na vesa'ilidi 'alo kebu?” <sup>3</sup> Iesu yadi velutoli i tutuli i vo,

Basenadiotoga Mosese bani'odi i voneyedi bega vonanina i kilumi sa'ila faifaina?" <sup>4</sup> ✧Falisi i vo, Mosese i tauyeda tamu lubulubu 'waineye sa'ila vonana ta na kilumi vavine ta na veledi ta na vo, 'Omi 'akonadi 'wa 'a'ava 'waikuyega." <sup>5</sup> Iesu i vonedi i vo, Mosese bani'odi i kilumiga fai sauluva 'atumaina 'wa baila.

<sup>6</sup> ✧We'e tutuya 'eba velamu 'waineye Yaubada tomotoga i 'idewadi,

Iavetana wata vevinena.

<sup>7-8</sup> ✧Faifainanina 'ai'edi tomogo i na nagiga, 'akonadi i 'awa'idia tamana wata inana 'waidiega, yana vavine taiadi i luvetubama.

'Adi 'ailuga siwe 'wa da vo tomotoga 'aitamogana."

Kebu 'ana fata ta na vo, 'Adi 'ailuga," fai taiadi i luvetubamaga ta na vo, 'Aitamogana." <sup>9</sup> Bega Yaubada 'akonadi i luvetubamidiga, kebu 'ana fata mali tomotoga 'alo taunidi i na vemia'idiedi."

<sup>10</sup> Mulieta Iesu ma yana tovetutuyamavo i nagoi vanuge i velutolieni sa'ila faifaina. <sup>11</sup> ✧Iesu i vonedi i vo, Tomogo yana vavine i na vesa'ilidi wata mali vavine i na nagidi, 'akonadi i sakona Yaubada mataneyeye, wata vavinenidi bunumayaga bwaikina i 'ewai. <sup>12</sup> We'e 'ai'edi vavine yadi lamoga i na sa'ileni, tamu tomogo i na nagia i sakona Yaubada mataneyeye."

*Iesu nuanuana yavayavava.*

<sup>13-14</sup> ✧Tomotoga 'ifwaidi yavayavava i mimaiedi bega Iesu i na 'abitonovidi i na vona-nuakalikaliedi, siwe tovetutuyamavo i talabodebodedi. Iesu i 'isedi i nuasako, bega i vonedi i vo, Kwakwama 'wa bailedi i na maia 'waikuye, fai egavo taunidi tonuaobu yavayavava de'e bani'odi 'adi fata taunidi i na tauyedi bega Yaubada i na veveimeyedi." <sup>15</sup> A vona mogitana 'waimie, aitoi Yaubada i na vetumaganeni bani'odi de'e yavayavavanidi i vetumaganeku, Yaubada i na veimeyeni yana 'Aila'a nageneye, we'e 'ai'edi kebu, kebu 'adi fata i na luku." <sup>16</sup> Bega kwakwama i olidi nimana i yatoi 'aitamogana 'aitamogana 'waidie i vona-nuakalikaliedi.

*Tomogo 'ai'aiwabuna.*

<sup>17</sup> Iesu vanuga i 'iaweni i nunago 'edeye tamu tomogo i mai ma yana ve'ililibu 'agena i vetufano'uyedi mataneyeye i velutolieni i vo, Tove 'atumaimu, nuanuaku a na 'asetai'ava'ai a na 'idewai bega mia 'atumaina wata miamia-vagaina a na veluagai? <sup>18</sup> Iesu i vo, Awale 'u awave'atumaieku? Kebu tamu aitoi 'atumainaga, Yaubada 'aiseotogina 'atumaina. <sup>19</sup> ✧Ve'etoboda 'akonadi 'u 'asetadi basenadi Yaubada Mosese

✧ **10:4:** VeL 24:1 ✧ **10:6:** Nag 1:27 ✧ **10:7-8:** Nag 2:22-24; Efe 5:31 ✧ **10:11:** 1 Kol 7:10-11 ✧ **10:13-14:** Mad 18:2-3 ✧ **10:19:** Sou 20:12-17

i veleni faifaيدا, kebu 'u na luvewafaga, kebu mali tomogo yana vavine 'u na luobuyedi, kebu 'u na vainagoga, kebu 'u na vekali tamu tomogo yana sauluva faifaina, kebu 'u na 'ewa-maimaiga, tamamu wata inamu 'u na ve'ililibuyedi.”

<sup>20</sup> Tomogo i vo, Tove basenadi siaikuyega ve'etobodanidi a ve'ililibuyedi.” <sup>21</sup> \*Iesu tomogo i 'iseni i nuakalikaliени i voneni i vo, 'Waimuye nani 'aitamogana kebu 'u da 'idewaiga. 'U na nago yamu kukua wata nani matatabuna 'waimuye 'u na vekimwaneyedi, tutulidi 'u na 'ewadi bega egavo i vewekowekomaga 'u na 'ivaisedi nika 'akonadi 'u ve'ai'aiwabu abame. 'U na 'anivelenedi i na 'a'avana, mulieta 'u na mai 'u na vetutuyameku.” <sup>22</sup> Tomogo i nogai i luvulewa ma yana nuavita i vilai i nago, fai yana 'ai'aiwabu fuedi, nuana i loloi kebu nuanuana i na 'anivelenedi.

<sup>23</sup> Iesu i sivilai yana tovetutuyamavo i vonedi i vo, To'ai'aiwabu yadi luku vitana Yaubada yana 'Aila'a 'waineye.” <sup>24</sup> Iesu yana tovetutuyamavo nuadi i voganidi yana vona faifaيدا, wata i vona-vaitugana 'waidie i vo, Ekwavo a na vonemi, taunidi i ve'ai'aiwabu yadi luku Yaubada yana 'Eba Veimea 'waineye vitaotogina. <sup>25</sup> Bawe yana luku aima mataneamo vitana, we'e tomotoga 'ai'aiwabudi yadi luku abame vitaotogina.”

<sup>26</sup> Tovetutuyamavo i venuavogana bwaikina bega 'aise'avadi i vona i vo, Vetuma aitoi 'ana fata Yaubada i na 'ita'ita'ieni bega mia 'atumaina wata miamia-vagaina i na veluagai?” <sup>27</sup> \*Iesu i 'isanago 'waidie i vonedi i vo, Tomotoga tauni'avadi kebu 'adi fata. Yaubada 'aisena 'ana fata i na 'ivaisedi. Wata nani matatabuna Yaubada 'ana fata.”

<sup>28</sup> \*Fita Iesu i voneni i vo, Maide, 'ima nani matatabuna 'a bailedi 'a maia 'waimuye 'a vevetutuyamemu.” <sup>29</sup> Iesu i vo, A vona mogitana 'waimie, egavo yadi vanuga i 'iawedi faifaiku wata Valaku 'ana lu'ivona faifaina, wata tamadiavo, inadiavo, ediavo, novudiavo, natudiavo wata yadi tanoga i 'iawedi faifaiku, 'awaie naninidi 'adi tutula bwaikaotogina Yaubada i na veledi. <sup>30</sup> Tutuya de'e 'waineye wata tutuya mulina 'waineye naninidi 'adi tutula bwaikaotogina i na veluagadi ma 'adi 'imoso'i, bani'odi 100 nani 'aitamogana i baileniga faifaina. Side bani'odi, i na veluagadiga, vanuga fuedi, inadiavo fuedi, enavo fuedi, novunavo, natunavo wata tanoga fuedi. Siwe wata fai i vevetutuyameku veviga bwaikina i na veluagai 'aku tovedumwe'ai'ai 'waidiega, we'e tutuya mulina 'waineye mia 'atumaina wata miamia-vagaina i na veluagai. <sup>31</sup> We'e tomotoga fuedi 'asiau i kumetaga, 'awaie i na vemuli, we'e egavo 'asiau i vemuliga, ma'itufa i na kumeta.”

\* 10:21: Mak 8:34; Mak 4:18-19    \* 10:27: Luk 1:37    \* 10:28: Mak 1:16-20; Luk 5:28

*Iesu yana vona 'ana vetonu yana wafa faifaina.*

<sup>32</sup> ✨I tauya i nunagoi Ielusalema Iesu i 'edakumeta 'aisena, yana tovetutuyamavo mulineye i maia nuadi i voganidi, we'e egavo 'ana toyogo'waila i kololo fai i nuani nani sakoina i na souyeni. Iesu yana tovetutuyamavo i vonedi i nagoi tulidie i kiavemageta ava'ai i na souyedi 'waineye Ielusalema nageneye faifaina. <sup>33</sup> I vonedi i vo, Ta na lakaga Ielusalema yau a vetomotogaotoga 'aku gaviavo i na 'etogiluveku tovelomu yadi to'edakumetavo wata ve'etoboda 'adi tovevo 'waidie. Mulieta wafa faifaina i na veimeyeku i na 'a'avana i na 'aniveleneku tomotoga taunidi kebu Diu 'waidie. <sup>34</sup> I na sidibidibieku i na kiwaliku wata i na toke i na fitaliku, mulieta i na luvewafaku. 'Aiata 'ana vetonu 'waineye wata a na yawasa-vaitugana.”

*Iemesa wata Ioni yadi velu'ui.*

<sup>35</sup> Iemesa wata Ioni, Sebedi natunavo, i maia Iesu 'waineye i voneni i vo, Tove, nuanuama tamu nani 'u na 'idewai faifaima.” <sup>36</sup> Iesu i vo, Ava'ai naniga a na 'idewai faifaimi?” <sup>37</sup> Iemesa wata Ioni i vo, Nuanuama bola yamu veimea toketokena i na souyeniga, 'u na silakaima bega 'a na miabui lilivamuye, tamu 'amu 'atagiega, tamu 'amu wamayega.” <sup>38</sup> ✨Iesu i vona-awatabai 'waidie bola yana veviga wata yana wafa faifaiddi i vo, 'Omi kebu 'wa da venua'ivinaga 'wa vevelu'ui 'waikuye. Sai'afoga veviga 'ana vedi a na yemuyeni, we'e 'omi 'ami fata vedinina 'wa na yemuyeni? I na bafitaisoku vevigayega, 'ami fata 'omi wata bani'odi?” <sup>39-40</sup> ✨Iemesa ma taina i vo, 'Ama fata.” Iesu i vonedi i vo, Mogitana 'aku vediega 'wa na yemu wata 'wa na bafitaiso vevigayega yau bani'odi, siwe miabui 'aku 'atagiega wata 'aku wamayega kebu a na 'anivelenediga fai yau kebu yaku 'eba veimea. 'Eba miabuini Yaubada i 'idewadi taunidi i venua'ivinediga faifaiddi.”

<sup>41</sup> Ediavo 10 'adi ailuga yadi vona i nogai, faifainanina i kamogala 'waidie. <sup>42</sup> Begaidi Iesu matatabudi i va'augidi i vonedi i vo, 'Akonadi 'wa 'asetai toveimea bwaikaotogidi wata to'edakumetavo yadi veimea toketokedi 'waidiega tomotoga i veveimeyedi. <sup>43</sup> ✨We'e 'omi kebu bani'odi 'wa na munega. 'Ai'edi aitoi nuanuana i na vetomogo-bwaika, nagami i na vetofolova enavo 'waidie bani'odi tamu kwamana. <sup>44</sup> We'e 'ai'edi aitoi nuanuana i na veto'edakumeta 'waimie nagami i na vetofolova-maimaiga matatabumi 'waimie. <sup>45</sup> ✨Yau a vetomotogaotoga 'wa na vetutuyameku. Yau a maiga, kebu a da vo, Tomotoga 'wa na

✨ 10:32: Mak 8:31, 9:31 ✨ 10:38: Mak 14:36 ✨ 10:39-40: Fol 12:2; Ve 1:9

✨ 10:43: Mak 9:35 ✨ 10:45: 1 Tim 2:5-6

foloveku,” we'e mogitana a maiga a na vetofolova tomotoga faifaimi, wata yawaiku a na tauyeni tomotoga fuemi a na tuveobumi sakona 'waidiega.”

*Iesu tomatasako i 'ive'atumaia.*

<sup>46</sup> Iesu ma enavo i maia Ieliko, mulieta i tautauya tovetutuyamavo wata 'aila'a bwaikina taiadi. Timio natuna, 'ana wagava Batimio i miamiana 'edeje, taunina tomatasako kebu 'ana fata i na folova, i vevelu'ui mani. <sup>47</sup> ✧ I nogai Iesu tomogo Nasaledi valana i vegolegole i vo, Iesu 'omu Kini Devida tubuna, 'u da 'isanuakalikalieku.” <sup>48</sup> Tomotoga fue di i talaboda i vo, 'U ve'wada.” Nika i toke i vegolegole i vo, 'Omu Kini Devida tubuna, 'u da 'isanuakalikalieku.” <sup>49</sup> Iesu i tovoi i vona i vo, 'Wa goleni i na mai.” Tomatasako i goleni i vo, 'U sosoana, 'u tovoi 'u nago i golegolemu.” <sup>50</sup> Yana velu'uva i taweni, i tovoi-matayo'o i nago Iesu 'waineye. <sup>51</sup> Iesu i velutolieni i vo, Ava'ai nuanuamu a na 'idewai faifaimu?” Tomatasako i vo, Tove, nuanuaku a da 'isala.” <sup>52</sup> ✧ Iesu tomatasako i voneni i vo, 'Asa'aiana, fai 'u vetumaganeku 'akonadi 'u ve'atumai, 'u na nago.” I vona'a'ava nika matana i ve'atumai, i 'isadewa, Iesu taiadi i nago.

## 11

*Iesu i luku Ielusalema.*

<sup>1</sup> 'Akonadi sai'afo Ielusalema lilivaneye i le'wai 'atamana 'ailuga 'waidie Bedifegi wata Bedani. Bei 'Oya Olive 'waineye, Iesu tovetutuyamavo 'adi 'ailuga i vonedi bega i na kumeta. <sup>2</sup> Wata i vonedi i vo, 'Atamana debanagomiega 'waineye 'wa na nagoi. Tutuyanina 'wa na le'wai 'wa na 'iseni 'aisaya doniki natudi i luifweni i tovo tovoi tamu vanuga 'waineye, kebu aitoi kwavuneye i da lakaga. 'Wa na yavuya 'wa na mieni 'waikuye. <sup>3</sup> 'Ai'edi tamu aitoi i na vo, Awale 'wa 'ewa'ewai?” 'wa na vo, 'Auvea nuanuana, bola wata i na vevila-matayo'oi.”

<sup>4-5</sup> Tove tutuyamavo 'adi 'ailuga i nagoi doniki i veluagai vanuga 'awana lilivaneye bei basenadi i luifweni. Tutuyanina i yavuyavuya, 'ifwaidi tomotoga i tovo tovoiga i vo, Awale 'wa yavuyavuya?” <sup>6</sup> Tove tutuyamavo i vona bani'odi Iesu i vonedi bega doniki i tauyeni. <sup>7</sup> Doniki natudi i mieni Iesu 'waineye, 'adi talauma kwavuneye i yatodi Iesu 'ana 'ivi bei i miabui. <sup>8</sup> Tomotoga fue di ma yadi ve'ililibu yana 'eda i 'ivivigavuya 'adi kalekoyega, we'e 'ifwaidi welavi matoutoudi i kinidabadi i ta'ulidi 'edeje. <sup>9</sup> ✧ Bega fue di bonadi bwaikinega i vegolegole tokumeta wata tovemuli i vo,

Kaiwa, kaiwa,\*

'Auvea 'ana wagavayega i mimai,

Wata ma yana nuakalikali i na vevesauluva 'atumaina 'waineye.

<sup>10</sup> I na veveimeyeda tubuda Kini Devida yana veimea bani'odi,

Yaubada i na vevesauluva 'atumaina yana 'Eba Veimeanina 'waineye.

Bega Yaubada tabwaotogineye ta na subisubiai.”

<sup>11</sup> Iesu i nago Ielusalema i luku vanuga 'eba velu'ui nageneye i vai'ala siwe 'akonadi tutuya i ve'ale'usa fai i lavia bega i souyeni ma yana tovetutuyamavo i maia Bedani, kebu 'ani'ie Ielusalema 'wainega.

*Iesu yana voneye 'ala'ai i bwavu-matayo'o.*

<sup>12</sup> I 'atai Bedaniga i viladi i mimai Iesu i lase. <sup>13</sup> 'Ani'ieyega i 'isanago 'ala'ai i 'iseni bega i nago lilivaneye nuanuana i na 'iseni ma vuagina 'alo kebu. Siwe tutuyanina i mai lilivaneye i 'iseni luku'avana fai kebu mogitana 'ala'ai 'ana tutuya. <sup>14</sup> ✧ Iesu 'ala'ai 'waineye i vona i vo, 'Asiau wata tutuya i mimai kebu tamu aitoi vuagimu i na 'ani'ania,” we'e yana tovetutuyamavo yana vonanina 'ala'ai 'waineye i nogai.

*Iesu i nago vanuga 'eba velu'ui 'waineye.*

<sup>15</sup> Tutuyanina i le'wai Ielusalema, Iesu i luku vanuga 'eba velu'ui nageneye i 'isedi tokimwane wata tovekimwane, matatabudi i sogiedi i obu. Wata mani tulina tulina 'adi tosivedavedamana† yadi talalia i tutuviladi wata bunebune 'eba velomu faifaidi 'adi tosivedavedamana yadi 'eba miabui i tutufelegeledi. <sup>16</sup> Kebu tamu aitoi i da tauyeni bega tamu kukua i na lukuveni vanuga 'eba velu'ui 'waineye. <sup>17</sup> ✧ Iesu yana ve 'waineye i vonedi i vo, Basenadiotoga Yaubada yana Buki 'waineye i kilumi, Yaubada i vo,

Yaku vanuga 'ana wagava vanuga 'eba velu'ui tomotoga 'aila'a tulina tulina faifaidi,”

siwe 'omi 'wa sivilai, tovainago yadi 'eba giva.”

<sup>18</sup> ✧ Tovelomu 'adi to'edakumetavo wata ve'etoboda 'adi tovevo 'akonadi i nogai i kololo bega 'aise'avadi i veifufu bani'odi i na munega Iesu i na luvewafai. I kolologa fai tomotoga matatabudi nuanuadi Iesu we'e yana ve faifaina nuadi i voganidi. <sup>19</sup> 'Akonadi inala i simwanuya, bega Iesu ma yana tovetutuyamavo Ielusalema i 'iaweni i viladi i nagoi Bedani.

\* **11:9:** 'Ana mogitana Osana me Diu bonadiega. ✧ **11:14:** Mak 11:20

† **11:15:** Me Loma yadi mani kebu 'ana fata 'wainega i na 'anivelena-maimaiga bega i sisivedamana nuanuadi me Diu yadi mani. ✧ **11:17:** Ais 56:7 ✧ **11:18:** Mak 14:1



*Iesu i ve 'ala'ai 'wainega.*

20 ✨Awa'awaie Iesu ma enavo i nunagoi i 'iseni 'ala'ai matatabuna i 'awagi'ai. 21 Fita nuana i 'anita'ia bega Iesu i voneni i vo, Tove, 'ala'ai 'u voneniga 'akonadi matatabuna i 'awagi'ai." 22-23 ✨Iesu yana tovetutuyamavo i vonedi i vo, A vona mogitana, 'ai'edi tamu tomotoga ma yana vetumagana Yaubada 'waineye, 'ana fata de'e 'Oya Olive i na voneni i na obu eyage. 'Ai'edi kebu ma yana venuanaluga, i na vona ma yana vetumagana, naninina faifaina i vonaga i na souyeni. 24 ✨Faifainana a na vonemi 'wa na velu'uiga Yaubada 'waineye 'wa na voneni ava'ai nuanuami. 'Ai'edi 'wa na vetumagana naninina nuanuami 'akonadi 'wa velu-agaiga, mogitana Yaubada i na velemini. 25 ✨Tutuyanina 'wa na vevelu'ui, 'ai'edi ma yami nuasako tamu tomogo 'waineye, nagami 'wa nuatavuni, bega Tamada abame yami sakona i na nuatavunidi. 26 We'e kebu 'wa na nuatavuniga, wata Tamada abame yami sakona kebu i na nuatavunidi."

*I velutolieni Iesu yana veimea lamuna.*

27-28 ✨Wata i viladi i maia Ielusalema. Tutuyanina Iesu i nunago vanuga 'eba velu'ui nagenemo, tovelomu 'adi to'edakumetavo, ve'etoboda 'adi tovevo wata to'edakumeta 'au'auveadi i maia Iesu 'waineye i velutolieni i vo, Nuanuama 'a na 'asetai aitoi i vetunemu bega naninidi 'u 'i'idewadi, 'alo aitoi veimea i velemini?" 29 Iesu i vo, Nuanuaku tamu velutoli a na velemini, 'ai'edi yaku velutoli 'wa na tutuliga, a na vonemi aitoi veimea i veleku bega nani de'e a 'i'idewadi. 30 'Wa na voneku Ioni Tobafitaiso aitoi veimea i veleni bega tomotoga i bafitaisodi? Yaubada 'alo tomotoga?"

31 To'edakumetanidi 'aise'avadi i veifufu i vo, Bani'odi ta na voneyedi? 'Ai'edi ta na vo, Yaubada veimea Ioni i veleni," 'ako i na vo, Vetuma awale kebu Ioni yana vona 'wa da vetumaganeni?" 32 ✨Wata kebu 'ada fata ta na vo, Tomotoga veimea Ioni i veleni." To'edakumetavonidi 'aila'a i kololoyedi, kebu nuanuadi Ioni i na awaobuobuyeni fai 'aila'a matatabudi i ve'awamogitana Ioni Yaubada yana Vona 'ana tolu'ivona. 33 Begaidi yadi tutula Iesu 'waineye i vo, Kebu 'a da 'asetai." Iesu i vo, Vetuma kebu a na vonemiga aitoi veimea i veleku bega nani de'e a 'i'idewadi."

## 12

*Tofolova sakoidi 'adi vona-awatabai.*

✨ 11:20: Mak 11:14 ✨ 11:22-23: Luk 17:6 ✨ 11:24: Mad 7:7; Ion 14:13-14  
 ✨ 11:25: Mad 6:14-15 ✨ 11:27-28: Ion 2:18 ✨ 11:32: Mad 21:46

<sup>1</sup> Mulieta Iesu i vona-awatabai 'waidie i vo, Tamu tomogo kalefa talagina i yatoi wata i kaliene. Vuagina 'ana 'eba vatanitani i 'idewai kileuyega, wata kileu i didigi tabwan-eye 'eba 'atu'ai i yogoni. I 'a'avana, tofolovavo i vonedi i na 'isave'avini, we'e i tauya i nago mali 'awalaweye. <sup>2</sup> Kalefa yana kumaga 'ana tutuya i le'wa, tonibakula tamu yana tofolova i voneni i nago yana bakula 'ana to'isave'avinavo 'waidie, vuaga 'ifwaidi i na miedi faifaina. <sup>3</sup> To'isave'avinanidi tofolova i 'ive'avini i nikei i vevilai nima'ava'avana.

<sup>4</sup> Mulieta wata tamu tofolova i vetunei. Tofolovanina 'unu'ununeye i 'aitalaga wata i 'ivekokovaotogi. <sup>5</sup> Wata tamu i vetuneiga i luwewafaotogi. Wata fuedi i vetunedi, 'ifwaidi i nikedimo we'e 'ifwaidi i luwewafadi.

<sup>6</sup> 'Aitamogana i miamia bega 'eba ve'a'avaotoga i vetunei taunina natuna nuafounda i vo, De'e natuku i na ve'ililibuyeni." <sup>7</sup> Siwe to'isave'avinanidi i 'iseni i mimai 'aise'avadi i veifufu i vo, No'o tonibakula natuna, bola nani matatabuna i na 'ewadi i na veimeyedi. 'Wa maia ta na luwewafai bega naninidi ta na 'ewadi." <sup>8</sup> ✧ I 'ive'avini, i luwewafai i taweni kalimulie." <sup>9</sup> Mulieta Iesu me Diu to'edakumeta i velutoliedi i vo, Tonibakula, yana to'isave'avinavo bani'odi i na munegidi? I na vilai to'isave'avinanidi matatabudi i na leodi mulieta tomotoga 'ifwaidi i na vonedi i na veto'isave'avina." <sup>10</sup> ✧ Mulieta Iesu tamu vona-vagata Yaubada yana Buki 'wainega i voneyeni 'waidie to'edakumetanidi i na baileniga faifaina. I vo, 'Omi 'wa da vo de'e vonanina kebu 'wa da lu'iawawaiga i vo,

To'aiyogona folova tamu i 'iseni siwe i baileni.

Folovanina taunina 'unututu.

<sup>11</sup> Yada 'Auvea folovanina i vetovoi-vaitugani,

'Ana 'isa 'waideye 'eba nua'ewa."

<sup>12</sup> Me Diu yadi to'edakumetavo i 'asetai Iesu i vona-awatabaiedi taunidi bani'odi to'aiyogonanidi wata to'isave'avinavo sakoidi, igodi i da 'ive'avini, siwe kebu 'adi fata fai 'aila'a nuanuadi Iesu begaidi i kololo i baileni.

### *Velutoli takesi faifaina.*

<sup>13</sup> Mulieta me Diu yadi to'edakumetavo Diu totafalolo Falisi wata 'ifwaidi Kini Elodi 'ana 'aila'avo i vetunedi i nagoi Iesu 'waineye nuanuadi i na velutolieni bonana na nogai, 'ai'edi i na vekali 'adi fata i na 'ive'avini. <sup>14</sup> I maia Iesu i voneni i vo, Tove, yamu sauluva tonovidi, kebu 'u da vevekaliga. 'A 'asetamu tomotoga toketokedi kebu 'u da kololoyediga 'u lulumatanidi we'e tomotoga sakoidi kebu 'u da vivieyediga, siwe 'u veve mogitana Yaubada yana nuanua

tomotoga 'waimeye. <sup>15</sup> 'U da nuani, i lubwaineda 'ida me Diu ta na takesi Loma yadi toveimea bwaikina Sisa 'waineye 'alo kebu? Nuanuama 'a na 'asetai.”

Iesu yadi bavuseba 'akonadi i 'asetai begaidi i vonedi i vo, 'Omi tovekali, igodi 'wa sisiloloku. Maninina 'wainega ta yato-yato takesi, 'wa na mieni ta na 'iseni.” <sup>16</sup> Maninina i mieni i 'iseni i velutoliedi i vo, De'e mani 'waineye, aitoi 'anununa wata 'ana wagava?” I vo, Sisa.” <sup>17</sup> \*Bega Iesu i vonedi i vo, Vetuma 'ai'edi ava'ai Sisa faifaina, 'wa na 'aniveleneni 'waineye, we'e ava'ai Yaubada faifaina, 'wa na 'aniveleneni 'waineye.” Iesu yana vona i nogai, nuadi i voganidi.

### *Yawasa-vaitugana 'ana velutoli.*

<sup>18</sup> \*Ifwaidi Diu totafalolo 'adi wagava Sadusi i maia Iesu 'waineye, taunidi tovana igodina towafa kebu i na yawasa-vaitugana. <sup>19</sup> \*Tomotoganidi Iesu i velutolieni i vo, Tove, basenadiotoga Mosese yada veimea i kilumi i vo, 'Ai'edi tamu tomogo i na wafaga siwe kebu natunavoga, 'wabulina taina i na nagidi bega kwakwama i na vetubugidi tatana 'ana wagava wata 'ana wauma faifaidi.” <sup>20</sup> We'e tamu tomogo ma tainavo 'adi 'aila'a 7, tulaiotogina i nagi kebu tamu natunaga i wafa. <sup>21-22</sup> 'Wabula yadi bwa i nagia, kebu tamu natuna wata i wafa. 'Adi vetonu yadi bwa i nagidi, i nagoga taidiavo matatabudi 'wabulanidi taiadi i nagi. Mulieta 'eba ve'a'ava 'waineye vavine yawaidi i 'a'ava. <sup>23</sup> 'Omi 'wa vonaga 'awaie towafa matatabudi i na yawasa-vaitugana, 'aiatanina 'waineye aitoi mogitana yana vavine fai matatabudi taiadi i nagi?”

<sup>24</sup> Iesu yadi velutoli i tutuli i vo, 'Omi 'wa vekali mogitana fai Yaubada yana Buki wata yana toketokena 'wa bavuyedi. <sup>25</sup> Tutuyanina towafa i na yawasa-vaitugana nagi kebu, yadi sauluva bani'odi anelose abame. <sup>26</sup> \*'Omi yami vona 'ana nogaya 'wa vo, Towafa kebu i na tovoi-vaitugana,” siwe a na vonemi. 'Ai'edi Mosese 'ana kilukiluma 'wa da lu'iwawadewai 'wa da 'iseni Yaubada i vonavona 'waimie yawasa-vaitugana faifaina. Yaubada i veifufu Mosese 'waineye 'ai-'ala'alata 'wainega. I vo, Yau Ebelamo, Aisake, wata Iakobo yadi Yaubada.” <sup>27</sup> De'e bani'odi Yaubada i voneyediga fai tomotoganidi basenadiotoga i wafa siwe 'asiau ma yawaidi taiadi i miamiani. Begaidi egavo 'akonadi i wafaga 'asiau ma yawaidi i miamiani, kebu tamu aitoi wafawafanaga Yaubada mataneye. 'Omi 'wa vekaliotoga.”

### *Veimea bwaikaotogina.*

28 Tamu ve'etoboda 'adi tove taiadi, i nogai veifufunina. I 'iseni Iesu Sadusi yadi velutoli i tutula-'atumaia, bega i velutolieni i vo, Veimeanidi Mosese 'wainega i maiga, ava'ai veimeaga mogitana bwaikina?" 29 ✨Iesu i vo, Side veimeanina bwaikina, i vo,

Me Isileli 'wa ve'wada a na vonemi,  
'Auvea yada Yaubada, 'Auvea 'aitamogaotogina.

30 'Auvea yami Yaubada 'wa na nuakalikalieni mogitana nuamiega, 'anu'anunumiega, yami nuanua 'waidiega wata tutuya fuedi yami toketokena 'wa na tauyedi 'waineye."

31 ✨Veimea bwaikina 'ana veluga side bani'odi, i vo,

Emiavo 'wa na nuakalikaliEDI taunimi 'ami nuakalikali bani'odi."

De'e veimeanidi 'ailuga bwaikidi, kebu wata tamu bani'odiga." 32 Ve'etoboda 'adi tove Iesu i voneni i vo, Tove, 'u vonaga 'atumai'avana. Mogitana 'aiseotogina Yaubada, kebu tamu wata'e. 33 ✨U vona mogitana Yaubada ta na nuakalikalieni nuadega, 'anu'anunuda 'waidiega, yada nuanua 'waidiega wata yada toketokena ta na tautauyedi 'waineye. Edavo ta na nuakalikaliEDI taunida 'ada nuakalikali bani'odi. Velomu wata 'anivelena-maimaiga mogitana nani bwaikidi Yaubada 'waineye, siwe veimeanidi 'ailuga bwaikaotogidi."

34 Iesu i nogai tomogonina i vona mogitana, faifainanina i voneni i vo, 'Omu 'akonadi taunimu 'u tautauyemu Yaubada 'waineye bega sai'afoga i na veimeyemu."

Iesu i vona'a'ava mulieta kebu tamu aitoi i da vetoketoke bega i na velutolieni.

*Velutoli Yaubada 'ana Venua'ivina faifaina.*

35 Iesu vanuga 'eba velu'ui 'waineye i veve i velutoliedi i vo, Ve'etoboda 'adi tovevo i vonaga Keliso, taunina Yaubada 'ana Venua'ivina, Kini Devida tubuna. Awale bani'odi i voneyedi? 36 ✨Basenadi 'Anu'anunu 'Atumaina yana ven-uayato 'wainega Devida i kilumi Yaubada 'ana Venua'ivina faifaina i vo,

Yaubada i vona 'aku Toveimea 'waineye, i vo,

Veimea a velemuga bega 'u na miabui 'aku 'atagiega.

I na nagoga 'amu gaviavo a na leodi bega 'u na veveimeyedi."

37 Keliso mogitana Devida 'ana wauma 'wainega i souyeni, siwe i vebwaika-'iaweni Devida, faifainanina Devida i ve'awa-Toveimea Keliso 'waineye." 'Aila'a bwaikina Iesu yana vonanina i nogai sosoana.

*Iesu i matakia ve'etoboda 'adi tovevo faifaidi.*

<sup>38</sup> Iesu i veve 'waidie i vona i vo, 'Wa na 'isa'isa ve'etoboda 'adi tovevo, nuanuadi yaba kaleko manamanawedi i veve'wesenedi bega 'aila'a bwaikina ma yadi ve'ililibu i na vevekaiwa 'waidie. <sup>39</sup> Nuanuadi to'edakumeta bwaikidi taiadi i na mimiabui 'eba miava'auta 'waidie wata sakali 'waidie nuanuadi i na mimiabui ma 'adi wagava taiadi. <sup>40</sup> We'e 'wabu'wabulavo i vevekaliedi yadi vanuga i eloelodi wata yadi velu'ui i lulumanamanawedi bega tomotoga i na subiadi, i na vo 'ako, Yaubada yana tofolovavo 'atumaidi." Siwe bola 'adi vematavuloga bwaikaotogina i na veluagai Yaubada 'wainega."

*'Wabula yadi 'anivelenamaimaiga.*

<sup>41-42</sup> Iesu i miabui vanuga 'eba velu'ui nageneye 'eba yato lilivaneye, 'aila'a i 'ise'isedi mani i yatoyato 'eba yato 'waineye. 'Ai'aiwabu fuedi mani bwaikina i yato, we'e tamu 'wabula i vewekowekomaga mani 'ailuga 'wau'wau'gidi i yatodi. <sup>43</sup> ✧Yana tovetutuyamavo i goledi i maia 'waineye i vonedi i vo, A vona mogitana tomotoga i yatoga 'eba yato 'waineye, 'wabulanidi bwaikaotogina i yato. <sup>44</sup> 'Ifwaidi i yatoga siwe wata yadi mani bwaikina i 'eno'enov, we'e 'wabulanidi yadi mani i lusaweni. Kebu wata tamu mani 'waidie i da 'eno'eno 'adi'adi faifaina."

## 13

*Iesu i vona vanuga 'eba velu'ui 'ana geu faifaina.*

<sup>1</sup> Iesu wata yana tovetutuyamavo taiadi i sousouyedi vanuga 'eba velu'ui'ega tamu yana tovetutuyama i voneni i vo, Tove, 'u 'iseni vanuga 'eba velu'ui, kileu bwaikaotogidi 'waidiega i yogoni, 'ana 'isa 'atumaiotogina." <sup>2</sup> ✧Iesu i vo, Vanuganina 'u 'ise'iseniga mogitana 'atumaina, siwe 'awaie 'ami gaviavo i na maia i na geuya, wata kileunidi bega i bibinaga i na tutuweali, matatabuna i na tubakabakaledi."

*Iesu i vona-vagata tutuya vitana faifaina.*

<sup>3-4</sup> Mulieta Iesu ma enavo i laka 'Oya Olive, bei i miabui i miamiani vanuga 'eba velu'ui we'e no'o bega kebu 'ani'ie Ielusalema 'wainega. Fita, Iemesa, Ioni wata Anidulu 'aisedie Iesu i voneni i vo, 'U na vonema ava'ai tutuyaga vanuga 'eba velu'ui i na geuya wata ava'ai tugusaga ta na 'iseni bega ta na 'asetai naninidi sai'afoga i na souyedi." <sup>5-6</sup> ✧Bega Iesu i vonedi i vo, 'wa na 'isa'isa bega kebu tamu aitoi i na vekaliemiga, fai tomotoga fuedi i na mai 'aku wagavayega igodi i na vo, Yau 'asa'aiana Keliso, Yaubada 'ana Venua'ivina." Yadi vonayega

fuedi i na vekaliedi. <sup>7</sup> Lilivamie vetalaga butu'aidi 'wa na noganogaidiga wata 'ani'ieyega vala'avadi, siwe a vovona-vagasemi, kebu nuafoumi i na veviga. Naninidi mogitana i na souyedi we'e fwayafwaya 'ana 'eba ve'a'ava bola. <sup>8</sup> 'Eba veimea bwaikidi wata 'eba veimea bwaikidi 'ifwaidi i na vevetalaga, we'e 'awalawa wata 'awalawa 'ifwaidi taiadi i na vevetalaga. We'e 'awalawa fuedi 'waidie yoyoyo i na yueyue wata i na loka. Tutuyanina vavine i na vebutudiga veviga bwaikina i na vebaedi, wata bani'odi naninidi a veifufuyediga tutuyanina i na souyediga veviga wata 'we'wela i na velamu.

<sup>9</sup> \*Wa na 'isa'isa, fai 'omi 'wa na vetolu'ivona faifaiku, tomotoga 'ifwaidi i na 'ive'avinimi i na nawemi yadi toveimea 'waidie. 'Eba miava'auta 'waidie i na toke i na fitalimi, toveimea bwaikidi wata kini matadie 'wa na tovoi 'wa na vonayavuga, bega 'ami fata Vala 'Atumaina faifaiku 'wa na lu'ivona. <sup>10</sup> \*Siwe nagami Valanina 'Atumaina yaku tomotoga i na lu'ageyeni tomotoga 'adi 'aila'a tulina tulina 'waidie, mulieta fwayafwaya 'ana 'eba ve'a'ava. <sup>11</sup> We'e i na 'ive'avinimi i na nawemi vanuga 'eba yogona 'waineye, kebu nuafoumi i na veviga 'wa na vo, Bani'odi 'a na voneyedi?" Tutuyanina 'wa na vovonayavuga, ava'ai Yaubada i na vonemi, bani'odi 'wa na voneyedi. Vonanina 'omi kebu yami vona, 'Anu'anunu 'Atumaina 'wainega.

<sup>12</sup> Tomotoga fuedi yaku tomotoga i na vedumwe'ai'aiedi bani'odi 'ifwaidi tomotoga taidiavo 'alo tatadiavo i na 'anivelenedi 'aku tovedumwe'ai'ai 'waidie i na luvewafadi, we'e iaveta tulaidi 'ifwaidi natudiavo iavetadi i na 'anivelenedi i na wafa, wata yavayavava tamadiavo inadiavo taiadi i na vegaviedi bega i na wafa. <sup>13</sup> \*Fai 'wa vetumagana 'waikuye begaidi tomotoga fuedi i na vedumwe'ai'aiemi, siwe egavo i na tokemaigedi i na nagoga tutuya 'eba ve'a'ava 'waineye 'ita'ita'i i na veluagai.

*Tamu nani maigikokololona.*

<sup>14</sup> \*(Buki tokiluma bonaku, Iesu yana vona de'e 'wa na lu'iawawaiga 'wa na venua'ivineni nika 'wa na 'asetai.) Wata Iesu i vonedi i vo, Bola tamu nani 'wa na 'iseni maigikokololona vanuga 'eba velu'ui nageneye i na tovo-tovoi. Tutuyanina tugusanina i na souyeni, egavo i miami-ani 'awalawa Iudia nageneye, i lubwainedi i na dega i na nagoi 'oyeye. <sup>15-16</sup> 'Ai'edi aitoi masi'edeye i na miamia, kebu 'ana fata i na luku vanuge yana kukua i na 'ewadi i na dega-matayo'o, wata aitoi i nagoga bakule, kebu 'ana fata i na vilai i na mai vanuge 'ana kaleko 'ana 'ewa faifaina.

\* 13:9: Mad 10:17-22 \* 13:10: Mad 28:19 \* 13:13: Ion 15:18-21 \* 13:14: Dan 11:31

17<sup>1</sup> Aiatanidi 'waidie toveinainage wata vauvau, nuakalikalidi fai kebu 'adi fata i na dega-matayo'o veviga bwaikina i na veluagai. 18<sup>1</sup> Yaubada 'waineye 'wa na vevelu'ui bega naninidi kebu i na sousouyeni toalu'uye 'wei bwaikina 'ana tutuye. 19<sup>1</sup> \*Yaubada fwayafwaya i 'idewavauyeni i maiga 'asiau veviga i sousouyedi siwe sai'afo, we'e 'aiatanidi 'waidie veviga bwaikaotogina i na souyeni, i na 'a'avana kebu wata bani'odi i na sousouyeni. 20<sup>1</sup> Vitanidi de'e 'ana tutuya Yaubada i na 'ive'ale'usai, 'ai'edi kebu, tomotoga i na 'a'ava. Tomotoganidi Yaubada i venum'ivinediga faifaiddi i na 'ive'ale'usai bega yadi mia i na ve'atumai.

*Keliso-vekavekali i na souyedi.*

21-22<sup>1</sup> \*Tutuyanina 'waineye 'ai'edi aitoi i na vonemi i na vo, Sino'o, Keliso i le'wa," 'alo i na vo, Side taunina," kebu bonana 'wa na nogai 'wa na vo 'ako, Mogitana," fai keliso-vekavekali wata tolu'ivona-vekavekali i na sousouyedi. I na souyediga 'eba nuavogana wata 'eba nua'ewa i na 'i'idewadi, igodi nuanuadi tomotoganidi Yaubada i venum'ivinediga vekaliega nuadi i na 'ewadi. 23<sup>1</sup> Naninidi 'awaie i na souyediga 'akonadi 'wa nogai, a vovona-vagasemi bega 'wa na 'isa'isa.

*Iesu yana mai-vaitugana.*

24-25<sup>1</sup> \*Tutuyanina vitanina i na 'a'avana nika inala i na lu'waugi, weta'i yana mageta i na 'a'ava, 'ubwana i na avuta abamega, wata nani matatabuna toketokedi abame i na yue. 26<sup>1</sup> \*Tutuyanina 'waineye tomia fwayafwaya matatabudi i na 'iseku yau a vetomotogaotoga abamega a na mimai waowa 'wainega ma yaku toketokena wata ma magetaku mataududulina. 27<sup>1</sup> \*Bega yaku anelose a na vetunedu yaku tomotoga venum'ivinidi i na va'augidi bega i na luku Yaubada yana 'Aila'a 'waineye. Tomotoganidi i na miediga fwayafwaya matatabuna 'wainega, inala yana 'eba lakayega wata yana 'eba inivayega, bolimanayega wata yavalatayega.

28<sup>1</sup> Modawa 'wa na nuani. Tutuyanina i na idiaga ta 'asetai 'aisaya i veyafa. 29<sup>1</sup> Wata bani'odi 'ai'edi tugusanidi a voneyediga 'wa na 'isedi, 'wa na 'asetai yaku souyagi 'akonadi i le'wale'wa. 30<sup>1</sup> A vona mogitana 'waimie, tutuya de'e 'ana tomotoga bola i na miamiani naninidi matatabuna i na souyedi. 31<sup>1</sup> Abama wata fwayafwaya 'awaie i na 'a'ava, we'e yaku vona kebu tamu sai'afo i na 'a'ava, i na 'eno-vagata."

*Iesu yana mai-vaitugana 'ana tutuya kebu tamu aitoi i da 'asetai.*

\* 13:19: Dan 12:1    \* 13:21-22: 2 Tes 2:9; Ve 13:13    \* 13:24-25: 2 Fit 3:10; Ve 6:12-13    \* 13:26: Mad 26:64    \* 13:27: 1 Tes 4:16-17

<sup>32</sup> ✨Wata Iesu i vonedi i vo, Yaku mai-vaitugana kebu tamu aitoi i da 'asetai, ava'ai 'aiataga 'alo ava'ai 'awasasaga 'waineye a na vilaku. Anelose abame kebu i da 'asetai, 'alo yau Yaubada Natuna, Tamaku 'aiseotogina i 'asetai. <sup>33</sup> ✨Fai 'omi kebu 'wa da 'asetai ma'avia nani de'e i na souyeni, 'wa na 'isave'avinimi wata 'wa na 'isa'isa. <sup>34</sup> Yaku le'wa side bani'odi. Tamu tomogo i na nago 'ani'ie bega yana tofolovavo 'aitamogana 'aitamogana yadi folova i veledi, wata vanuga 'ana to'isave'avina i voneni i vo, 'U na 'isa'isa wata 'u na lulukamata.” <sup>35</sup> ✨Wata 'omi bani'odi 'wa na 'isa'isa fai kebu 'wa da 'asetai ma'avia yau tonivanuga a na le'wa. Lavilavie, lovana 'ana utukamwana, tu'wa'wale, 'alo 'awa'awaie. <sup>36</sup> Kebu nuanuaku a na le'wa a na 'isemi 'wa na 'eno'eno a na veyawailovogimi. <sup>37</sup> Ava'ai a voneyeni 'waimie, wata bani'odi tomotoga matatabudi a vonedi, 'wa na 'isa'isa.”

## 14

### *I luala Iesu 'ana laugiva faifaina.*

<sup>1</sup> ✨Aiata 'ailuga i na 'a'ava, mulieta Uvi'agalatagona 'ana sakali i na 'idewai. Sakalinina 'waineye me Diu beledi kebu 'ana 'ivebwaika i 'ani'ani, 'adi 'eba tolinuata'i base-nadiotoga Yaubada tubudiavo i 'ita'ita'iedi 'awalawa Itifita 'wainega. Tutuyanina 'waineye me Diu yadi tovelomu 'adi to'edakumetavo wata ve'etoboda 'adi tovevo i veifufu bani'odi i na munega givagivayega Iesu i na 'ive'avini i na luvewafai. <sup>2</sup> Siwe wata i vo, Kebu sakalie ta na 'ive'aviniga i na nunago egavo nuanuadi Iesu, i na nuasako i na daba.”

### *Iesu 'ana iwaga.*

<sup>3</sup> Iesu bola i miamia 'atamana Bedani, Saimoni yana vanuge, taunina basenadi waiwaiseselina. I 'ani'ani nika tamu vavine bunama i mieni, magaina 'atumaina wata 'ana tutula bwaikina. Bunamanina 'ana wagava Nadi, we'e bei i koiaga kileu i 'idewai 'ana 'isa 'atumaiotogina, 'ana wagava alibasita. Bega bunamanina 'odona i tutubaia Iesu nava'auna i iwagi.

<sup>4</sup> Tomotoga 'ifwaidi i 'iseni, ma yadi nuasako i luvulewa i vo, Awale bunama i ve'amubwadodoyeni? <sup>5</sup> I lub-waineni i da vekimwaneyeni bega mani bwaikina i da velu-agai bani'odi lubulubu 300,\* 'wainega wekowekoma i da 'ivaisedi.” Faifainanina vavine i yagaia.

<sup>6-7</sup> Iesu i vonedi i vo, 'Asa'aiana, 'wa 'ailove, vavine kebu 'wa na 'ivebunumayagi. Naninina i 'idewaiga 'waikuye

✨ **13:32:** Fol 1:7 ✨ **13:33:** Mad 25:13 ✨ **13:35:** Luk 12:37-38 ✨ **14:1:** Sou 12:1-27; Mak 10:33-34 \* **14:5:** 'Ana mogitana me Diu yadi mani Denali 300, bani'odi malamala 'aitamogana 'ana folova tutulina.



'atumaiotogina i lubwaineni, we'e wekówekoma tutuya fue di taiadi 'wa na miamiani, tutuyanina nuanuami 'ami fata 'wa na 'ivaisedi. We'e yau kebu tutuya manamanawena taiadi ta na miamia. <sup>8</sup> \*Vavine de'e yana 'aivaita 'waikuye bwaikina siwe kebu wata tamu ava'ai bega i na 'idewai 'waikuye. Bunama i iwagi tomogoku i 'idewa-vagaseni 'aku ve'ufa faifaina me Diu yada sauluva bani'odi. <sup>9</sup> A vona mogitana, bola Valaku 'Atumaina i na lulu'ageyeni fwayafwaya matatabuna 'waineye vavine de'e yana folova 'waikuye wata i na lulu'ivoneyeni 'ana 'eba nuave'avina.”

*Iudasa nuanuana Iesu i na 'etogiluvuni.*

<sup>10</sup> Iesu i iwagi i 'a'avana, mulieta tamu yana tovetutuyama 'ana wagava Iudasa Isakaliota i nago tovelomu 'adi to'edakumetavo 'waidie nuanuana Iesu i na 'etogiluvuni 'waidie bega i na luvewafai. <sup>11</sup> Iudasa yana vonanina i nogai i sosoana i vona'awaufaufa 'waineye tutula i na veleni. Bega Iudasa i luala 'eda'eda 'atumaina 'wainega Iesu i na 'aniveleneni.

*Iesu ma yana tovetutuyamavo i 'ani.*

<sup>12</sup> \*Sakali Uvi'agalatagona 'ana 'aiata 'eba velamu 'waineye, beledi kebu 'ana 'ivebwaika i 'ani'ani, wata 'aisaya sifi natudiavo i nikenikedi i vevelomuyedi sakalinina faifaina. 'Aiatanina 'waineye, tovetutuyamavo Iesu i velutolieni i vo, Ava'aibe bei nuanuamu yada sakali 'ani'aninina 'a na 'idewadewa?” <sup>13</sup> Bega Iesu yana tovetutuyamavo 'adi 'ailuga i vonedi i vo, 'Wa na nagoi Ielusalema nageneye, tamu tomogo ma yana 'eba koi ufa i veadagi 'wa na veluagai i na nunago tamu vanuga 'waineye 'wa na yogo'waili. <sup>14</sup> Vanuganina 'waineye i na lukuga tonivanuga 'wa na velutolieni side bani'odi 'wa na voneyedi, Yama Tove i vo, Ava'aibe yaku tutudaba bei yaku tovetutuyamavo taiadi 'a na 'ani Uvi'agalatagona faifaina?” <sup>15</sup> Bei tonivanuga i na vemi tamu tutudaba bwaikina tabwaneye 'akonadi i 'idewai faifaida. Bei 'ada'ada 'wa na 'idewadewa.” <sup>16</sup> Tovetutuyamavo 'adi 'ailuga i nagoi 'atamana bwaikineye naninidi Iesu i voneyediga matatabuna i veluagadi nika bei sakali i 'idewadewa.

<sup>17-18</sup> \*Inala i simwanuya Iesu ma yana tovetutuyamavo 12 taiadi i maia, i luku vanuge i na 'ani. Yadi 'aninina 'waineye Iesu i vo, A na vonemi, tamu 'waimiega i na 'etogiluveku, taunina ma fueda ta 'ani'ani.” <sup>19</sup> Tovetutuyamavo yana vona i nogai nuafoudi i veviga 'aitamogana 'aitamogana i vevelutoli i vo, 'Auvea, voke yau, siwe a nuani kebu.”

<sup>20</sup> Iesu i vo, 'Ami 12 nagemiega 'aitamogana i na 'etogiluveku. Taunina 'ama 'ailugana 'ama beledi 'a lulu'utuva 'aivoeye siwe kumanina. <sup>21</sup> Basenadiotoga i kilumi Yaubada yana Buki 'waineye yau a vetomotogaotoga i na nikeku a na wafa, i vonaga mogitana, we'e yau a vetomotogaotoga 'aku to'etogiluva nuakalikalina. 'Ako kebu i da tubugaga 'atumaina, siwe fai i tubuga yana sakonanina faifaina veviga bwaikina i na veluagai.”

*Iesuyana 'ani.*

<sup>22</sup> Tutuyanina i 'ani'ani Iesu 'ani'ani i 'ewai i vekaiwa Yaubada 'waineye mulieta i 'ivivia i 'a'avana yana tovetutuyamavo i veledi. I vonedi i vo, 'Ani'ani de'e 'asa'aiana tomogoku. 'Wa na 'ewai 'wa na 'ania.”

<sup>23</sup> Mulieta oine ma vedina i 'ewai, Yaubada 'waineye i vekaiwa, i veledi matatabudi i yemu. <sup>24</sup> \*Bega Iesu i vona i vo, Oine de'e 'asa'aiana dayagiku, i na ilolo fuemi faifaimi. Yaku wafanina 'wainega Yaubada yana Veakutagona 'Ivauna basenadi faifaina i vona'awaufaufa i na velamu 'waimie. <sup>25</sup> A vona mogitana 'waimie, oine de'e kebu wata a na yemuga, i na nagoga mulieta oine 'ivauna a na yemu Yaubada yana 'Eba Veimea nageneye.” <sup>26</sup> Iesu i vona'a'ava lei subisubia tamu i silakai i lei mulieta i nago i laka 'Oya Olive.

*Iesu i vona-vagata Fita i na ve'eweniga faifaina.*

<sup>27</sup> \*Iesu i vona yana tovetutuyamavo 'waidie i vo, 'Ako matatabumi 'wa na degaloveku fai basenadiotoga Yaubada yana Buki 'waineye i kilumi faifaimi i vo,

Yaubada to'isave'avina i na nikei i na wafa, we'e 'aisaya sifi i na ve'aladegadega.”

<sup>28</sup> \*Vonanina i kilumiga i na nikeku faifaina mogitana, siwe tutuyanina Yaubada i na sivetovoiku a na kumeta a na nago Galili bei ta na veluaga.” <sup>29</sup> Fita i vona-matayo'o i vo, 'Ai'edi tomotoga matatabudi i na degalovemu, we'e yau kebu a na degalovemuga.” <sup>30</sup> \*Iesu Fita i voneni i vo, A vona mogitana 'waimuye 'ako lovane tutuya 'aitonu 'u na bavusebeku mulieta kamukamu 'ana veluga i na kwage.” <sup>31</sup> Nika Fita i ve'awafatafata i vo, 'Ai'edi taiadi ta na wafaga i lubwaineku, siwe kebu a na vo, Yau Iesu kebu a da 'asetaiğa.” Ava'ai Fita i voneyeniga, enavo matatabudi wata bani'odi i vona.

*Iesu i nago Gedesemani bei i velu'ui.*

<sup>32</sup> Mulieta Iesu ma yana tovetutuyamavo i nagoi tamu wala'ai 'atumaina 'waineye 'ana wagava Gedesemani, bei

\* 14:24: Sou 24:8; 1 Kol 10:16; Ion 6:54-56

\* 14:27: Ion 16:32; Sek 13:7

\* 14:28: Mak 16:7 \* 14:30: Mak 14:66-72

yana tovetutuyamavo i vonedi i vo, Side bei 'wa na miabui 'wa na miamiani, yau sino bei a na nago a na velu'ui.”  
 33-34 ✧Tomotoga 'adi 'aitonu i vonedi taiadi i nagoi, Fita, Iemesa wata Ioni. Venuafouviga wata nuavita bwaikina Iesu i vebaeni i vonedi i vo, Yaku nuavita bwaikaotogina 'wa da vo nuafouku i da 'e'etokadia wata 'wainega sai'afoga a na wafa. Side bei 'wa na miamia kebu 'wa na 'enoga 'wa na 'isa'isa.”

35 I vaganago i lumata'afufu i velu'ui Tamana 'waineye 'ai'edi i na lubwaineniga 'ana vitanina i da 'ewai 'wainega.  
 36 ✧I vo, Ie Tamaku, nani matatabuna 'waimuye safailidi, ve-  
 viganina wata wafa 'u da 'ewadi 'waikuyega. Siwe 'asa'aiana, de'e kebu yau yaku nuanuaga, 'omu yamu nuanua bega a na vematayakeyakenimo.”

37 I velu'ui i 'a'avana i vilai i nago yana tovetutuyamavo i 'isedi i 'eno'enovi. I luvagonidi Fita i voneni i vo, Saimoni, awale 'u 'eno'eno, 'u da 'isa'isa 'awasasa 'aitamogana. 38 'Wa na 'isa'isa wata 'wa na vevelu'ui nika kebu vetalaimimila 'waineye 'wa na be'uga. Nuanuami 'wa na 'ivaiseku siwe yami toketokena i mwea.”

39 Wata 'ana veluga Iesu i vaganago yana velu'uinina i luvaitugani. 40 Wata i vilai i mai yana tovetutuyamavo i 'isedi i 'eno'enovi fai matadi i duduna-'afo'afo. I luvagona-vaituganidi siwe kebu tamu ava'ai i da voneyeniga fai i bunumayaga. 41-42 Wata i 'iawedi i vilai i nago i velu'ui, mulieta yana vila 'ana vetonu 'waineye i mai yana tovetutuyamavo i luvagonidi i vonedi i vo, 'Omi 'alo 'wa 'eno'enovi. 'Asa'aiana, siwe 'wa 'isanaweni, 'aku to'etogiluva i le'wa. Yau a vetomotogaotoga yaku tutuya 'akonadi i le'wa bega i na 'aniveleneku tosakona yadi toketokena 'waineye. 'Wa tovoi ta na nagoi 'waidie.”

### *Iesu 'ana 'ive'avina.*

43 Bola Iesu i veveifufu nika Iudasa i mai, kumanina tamu Iesu yana tovetutuyamavo 12 'waidiega. 'Aila'a bwaikina taiadi i maia, ma yadi kefata wata fulumai, tovelomu 'adi to'edakumetavo, ve'etoboda 'adi tovevo wata me Diu yadi to'edakumetavo 'au'auveadi 'waidiega i vetunedi i maia.

44 To'etogiluvanina 'akonadi 'aila'a i vona-vagasedi yana tugusa i vo, Tomogonina a na 'avalamaigiga, kumanina nuanuami, 'wa na 'ive'avini 'wa na naweni.” 45-46 Tutuyanina i le'wai Iudasa tonovina i nago Iesu 'waineye, i vo, Tove, kaiwa,” nika i 'avalamaigi, bega 'aila'a Iesu i tovfifineni i 'ive'avini. 47 Iesu yana 'aila'a 'wainega tamu tomogo yana kefata i yo'ei tovelomu bwaikina yana tofolova igodi i da niki, taniga'avana i tutuomuya. 48 ✧Tomotoganidi i maia Iesu

'ana 'ive'avina faifaina i vonedi i vo, Yau 'wa da vo to'ainike bega 'wa maia ma yami kefata wata fulumai 'aku 'ive'avina faifaina. <sup>49</sup> 'Aiata 'aitamogana 'aitamogana a mimiabui vanuga 'eba velu'ui nageneye a veve siwe kebu bei 'wa da 'ive'avinikuga. Siwe de'e naninidi 'wa 'i'idewadiga 'waikuye nika ava'ai basenadiotoga Yaubada yana tolu'ivonavo i kilumi faifaiku yana Buki 'waineye, 'ana mogitana i souyeni.” <sup>50</sup> \*Iesu i vona'a'avana yana tovetutuyamavo matatabudi i degalovei.

<sup>51-52</sup> Tamu tubuau ma 'ana kaleko sulu Iesu i yogo'waili, Iudasa yana 'aila'avo i 'iseni nuanuadi i na 'ive'avini nika i yaibamui 'ana kaleko'ava i 'ewai, we'e konekonena i dega.

*Iesu i tovoi Diu Kaniselo matadie.*

<sup>53</sup> Mulieta Iesu i mieni tovelomu bwaikina yana vanuge. Vanuganina 'waineye Diu yadi to'edakumetavo 'au'auveadi, tovelomu 'adi to'edakumetavo, wata ve'etoboda 'adi tovevo i va'auta Iesu yana vonayavuga i na nogai. <sup>54</sup> Fita i yogo'waila siwe 'ani'ieogose kebu lilivadie, i nago i luku vanuganina 'ana kali nageneye, tanotanoge i miabui tolugaviavo taiadi, 'ai'ala'alata 'waineye i vevevala.

<sup>55</sup> Vanuganina nageneye tovelomu 'adi to'edakumetavo wata 'ifwaidi Diu yadi Kaniselo Iesu yana vonayavuga i noganogai nuanuadi vekaliega i na luvewafai, siwe kebu tamu yana sakona i da velugaiga. <sup>56</sup> Bega tomotoga fuedi i lu'ivona-vekavekali siwe yadi vonanidi kebu i da vesala.

<sup>57-58</sup> \*Mulieta 'ifwaidi i tovoi i vekali i vo, Tamu tutuya 'a nogai Iesu i vo, Vanuga 'eba velu'ui tomotoga i yogoniga a na geuya, wata 'aiata 'aitonu nagedie tamu a na yogoni, siwe kebu tomotoga 'adi 'a'aiyogona.” <sup>59</sup> Siwe wata tomotoganidi yadi vonanidi tulina tulina, kebu i da vesala.

<sup>60</sup> Tovelomu bwaikina i tovoi matadie Iesu i voneni i vo, I vevitamuga, bonadi 'u tutuli, i vona mogitana 'alo kebu?”

<sup>61</sup> \*Siwe Iesu kebu tamu ava'ai i da voneyeniga i veve'wada. Wata tovelomu bwaikina i velutoli-vaitugana Iesu 'waineye i vo, Mogitana 'omu Keliso, Yaubada 'ana Venua'ivina wata Natuna 'alo kebu?” <sup>62</sup> \*Tovelomu bwaikina yana velutoli Iesu i tutuli i vo, E'e. 'Awaie yau a vetomotogaotoga 'wa na 'iseku ma yaku veimea Yaubada Bwaikaotogina 'ana 'atagie a na miabui, wata abamega a na obuobuma waowa 'wainega.”

<sup>63-64</sup> \*Iesu yana vona faifaina tovelomunina ma yana kamogala 'ana talauma i silabu'i i vo, 'Wa nogai? I vona-awadamana Yaubada 'waineye, tovevita 'ifwaimi 'asa'aiana, kebu 'wa na vonavonaga. We'e 'omi 'wa da nuani, i na wafa

\* 14:50: Mad 26:31; Ion 16:32 \* 14:57-58: Ion 2:19-21 \* 14:61: Mak 15:5; Ais 53:7 \* 14:62: Mak 13:26; Dan 7:13 \* 14:63-64: Ion 19:7; Vei 24:16

'alo kebu?" Kaniselo matatabudi yana vona i tutuli i vo, Yana vonanina 'ana nogaya i lubwaineni wafa." <sup>65</sup> ✧Mulieta 'ifwaidi i kiwakiwali i 'a'avana matana i umadina nimadi i nunumidi i nikei wata i sidibidibieni i vo, 'Omu igodi Yaubada yana tolu'ivona, yama fio, 'u da nuaniga aitoi i nikemu?" I 'a'avana tolugaviavo i vagavaia i nunaweni i nikenikei.

*Fita i ve'eweni Iesu.*

<sup>66-67</sup> We'e Fita i miamia tanotanoge, tamu vavine tovelomu bwaikina yana tofolova i souyeni, Fita i 'iseni i vevevala i 'i'isadewai i 'a'avana i voneni i vo, 'Omu wata Iesu Nasaledgea yana 'aila'a." <sup>68</sup> Siwe Fita i ve'ewa i vo, Yau kebu. Ava'ai 'u vonevoneyeniga kebu a da 'asetaiiga." Bega Fita i vaganago kali 'awaneye nika i nogai kamukamu i kwage.

<sup>69</sup> Wata tofolovanina i 'iseni Fita i tovofovoi, 'ifwaidi tomotoga 'waidie i vo, Sino tomogonina, Iesu yana 'aila'a tamu." <sup>70</sup> Siwe Fita i nogai i ve'ewa-vaitugana i vo, Yau kebu." Tutuya siaina i 'a'ava wata 'ifwaidi tomotoga lilivaneye i tovofovoiga i voneni i vo, Mogitana, 'omu tamu Iesu yana 'aila'a fai 'u mai 'awalawa Galili 'wainega." <sup>71</sup> Nika Fita i ve'awafatafata i vo, 'Ai'edi a da vevekaliga, Yaubada i da nikeku, we'e aigodi, tomogonina kebu a da 'asetatoni."

<sup>72</sup> ✧Fita i vona'a'ava nika kamukamu 'ana veluga i kwage. I nogai, i nuani Iesu yana vona i voneniga i vo, 'Ako lovane tutuya 'aitonu 'u na bavusebuku mulieta kamukamu 'ana veluga i na kwage." Fita vonanina i nuani i taibwaubwau.

## 15

*Iesu i vona-yavuga Failato mataneyeye.*

<sup>1</sup> 'Awa'awaiogose Diu yadi Kaniselo i va'auta tovelomu 'adi to'edakumetavo, to'edakumeta 'au'auveadi wata ve'etoboda 'adi tovevo taiadi. Matatabudi i veifufu bega yadi nuanua 'aitamogana Iesu i yogoni i naweni i 'aniveleneni Loma gabe-mani yadi toveimea Failato 'waineyeye.

<sup>2</sup> Bega Failato Iesu i velutolieni i vo, 'Omu me Diu yadi kini?" Iesu i vo, 'Asa'aiana 'u vona bani'odi." <sup>3</sup> Siwe tutuyanina tovelomu 'adi to'edakumetavo i vevevita-maimaigiga Iesu kebu i da vonavona i veve'wadamo. <sup>4</sup> Begaidi Failato i voneni i vo, I vevevitamuga nani tulina tulina 'waidiega 'u noganogai 'alo kebu?" <sup>5</sup> ✧Siwe Iesu i baila kebu nuanuana vonanidi i na tutulidi begaidi Failato nuana i vogani.

*Failato i veimea Iesu i na wafa.*

<sup>6</sup> Malamala 'aitamogana 'aitamogana me Diu i sakasakali Uvi'agalatagona faifaina. Sakalinina 'waineyeye me Diu fueidi

tamu iadi yogoyogonina i vevenua'ivineni bega gabemani i 'e'etoyavuya vanuga 'eba yogona 'wainega. <sup>7</sup> Tutuyanina 'waineye tamu tomogo 'ana wagava Balaba i miamia vanuga 'eba yogona nageneye, taunina to'ainike ma enavo Loma gabemani taiadi i vetalaga. <sup>8</sup> Tutuyanina Iesu i tovo-tovoi Failato mataneye, tomotoga fueidi i nagoi Failato 'waineye i velu'ui nuanuadi tamu tomogo i na 'etoyavuya Uvi'agalatagona 'ana sauluva bani'odi. <sup>9-10</sup> ✧ Failato i 'asetai tovelomu 'adi to'edakumetavo Iesu i ve'unumagigieni i 'aniveleneni 'waineye begaidi i vonedi i vo, Nuanuami me Diu yami kini a na 'etoyavuya?" <sup>11</sup> ✧ Siwe tovelomu 'adi to'edakumetavo tomotoga nuadi i 'anidi bega Failato i na voneni Balaba i na 'etoyavuya we'e Iesu kebu.

<sup>12</sup> Failato i velutoli 'waidie i vo, Kumanina 'wa golegoleni me Diu yami kini, bani'odi a na munegi?" <sup>13</sup> Nika 'aila'a bwaikina i vegole i vo, 'U tutufwaseni 'ai lagalagana 'waineye bei i na wafa." <sup>14</sup> Wata Failato i velutoliedi i vo, Yana sakona ava'ai?" Siwe 'aila'anidi i toke i vegolegole i vo, 'U tutufwaseni 'ai lagalagana 'waineye." <sup>15</sup> Failato nuanuana tomotoga i na 'ivenua-agiagidi begaidi Balaba i 'etoyavuya, we'e i veimea tolugaviavo Iesu i na toke i na fitali mulieta i na naweni i na tutufwaseni 'ai lagalagana 'waineye, bega bei i na wafa.

### *Tolugavia Iesu i sidibidibieni.*

<sup>16</sup> Vona-yavuga i 'a'avana, Iesu i lukuveni tamu tud-aba bwaikina 'waineye Failato yana vanuga nageneye, bei tolugavia matatabudi i va'auta. <sup>17</sup> ✧ Tolugavianidi kaleko yamoyamoinega Iesu i ve'weseni wata fisili ma yana 'ibadi i 'etofifini 'unu'ununeye i biuleni. Vaigavunidi kini 'adi vaigavu bani'odi siwe 'waidiega Iesu i sidibidibieni. <sup>18</sup> Bei i ve'ililibu-vekavekali i vo, Kaiwa, 'omu me Diu yadi kini." <sup>19</sup> ✧ 'Uwe 'wainega 'unu'ununa i nikenikei, i kiwakiwali, wata igodi ma yadi subia i 'odu'odu mataneye. <sup>20</sup> Yadi sidibidibi i 'a'avana, kalekonina i ve'weseniga i yavuya wata taunina 'ana kalekoyega i ve'weseni. Bega vanugayega i souyedi i naweni i na tutufwaseni 'ai lagalagana 'waineye.

### *Iesu 'ana tutufwatagi.*

<sup>21</sup> Tutuyanina Iesu i nunaweni 'edeye, tamu tomogo i veluagai 'ana wagava Saimoni kwedayega i tauya i mimai Ielusalema. Saimoni tomogo Sailini, natunavo 'adi 'ailuga iavetadi Alekisana, wata Lufusa. Tolugaviavo Saimoni i lukakadeni Iesu 'ana 'ai lagalagana i eva. <sup>22</sup> Bega i nagoi i le'wa tamu 'awalawa 'waineye 'ana wagava Goligota, 'ana

✧ 15:9-10: Ion 11:47-48, 12:19 ✧ 15:11: Fol 3:14 ✧ 15:17: Luk 23:11

✧ 15:19: Ais 50:6

saivila 'Unu'unu Lulu'ava. <sup>23</sup> Bei oine i 'idewai tamu konini 'ana wagava Mulo taiadi i veleni i na yemu bega 'ana kini'ona kebu i na veviga, siwe i baila veviganina faifaina i tauyeni. <sup>24</sup> ✧Mulieta i tutufwaseni 'ai lagalagana 'waineye, i 'a'avana tolugaviavo nuanuadi Iesu 'ana kaleko i na veusedi begaidi tamu 'wava i 'waveni bani'odi kate. 'Ai'edi aitoti i na kumetaga ava'ai kalekoga nuanuana i na 'ewai.

<sup>25</sup> Tutuyanina Iesu i tutufwaseniga 'awa'awaie, 9 kiloki 'waineye. <sup>26</sup> 'Ana 'ai lagalagana tabwaneye vonanina 'wainega i vevitaiga i kilumi i tutufwaseni i vo,

TOMOGO DE'E ME DIU YADI KINI.

<sup>27</sup> Wata tovainago 'adi 'ailuga i tutufwasedi, tamu Iesu 'ana 'atagiega, tamu 'ana wamayega. [<sup>28</sup> ✧Nika 'ana mogitana i souyeni basenadi Yaubada yana Buki 'waineye i kilumi vonanina i vo, Taunina ma fuedie tosakona.”] <sup>29-30</sup> ✧Tomotoga 'ai lagalagana lilivaneamo i nunagoi i veveugalewalewa wata i yagayagaia i vo, 'Amu 'isa, 'u vonaga igodi vanuga 'eba velu'ui 'u da geuya wata 'aiata 'aitonu nagedie 'u da yogona-vaitugani. 'Ai'edi vonanina mogitana, nika taunimu 'u 'ita'ita'iemu 'ai lagalaganega 'u obuma.”

<sup>31-32</sup> Wata bani'odi tovelomu 'adi to'edakumetavo, wata ve'etoboda 'adi tovevo 'aise'avadi i sidibidibieni i vo, Tomotoga 'ifwaidi i 'ita'ita'iedi siwe kebu 'ana fata taunina i na 'ita'ita'ieni. Taunina igodi Yaubada 'ana Venua'ivina wata me Isileli yada Kini, siwe 'ai'edi 'asiauotoga i na obuma 'ai lagalaganega ta na 'iseni ta na ve'awamogitana. Wata tovainagonidi taiadi i tutufwasediga i manini Iesu 'waineye.

### *Iesu i wafa.*

<sup>33</sup> 'Aiata 'ana utukamwana 'waineye fwayafwaya matatabuna i dudubali, mulieta lavilavie bani'odi 3 kiloki i magetai. <sup>34</sup> ✧'Awasasanina 'waineye Iesu i toke i vegole me Diu bonadiega i vo, Iloi, Iloi, lema sabakitani,” 'ana saivila, Yaku Yaubada, yaku Yaubada, awale 'u bailaotogeku?”

<sup>35</sup> 'Ifwaidi tomotoga i tovofovoiga bonana i nogai i vo, 'wa nogai? Ilaitia i golegoleni, nuanuana abamega i na mai i na 'ivaiseni.” <sup>36</sup> ✧Tamu tomogo i lilide i nago kikifa i lu'utuvi oine yuyuna 'waineye, tamu 'ai 'waineye i velugaganeni i 'iyoyoeni Iesu 'waineye nuanuana i na yemu. Nika 'ifwaidi i vo, 'U ve'wada, nagami ta na 'iseni voke Ilaitia i mimai i na 'ita'ita'ieni.”

<sup>37</sup> Mulieta Iesu i toke i vegole nika yawaina i 'awatagoni.

<sup>38</sup> ✧Vanuga 'eba velu'ui nageneye tamu kaleko bwaikina Yaubada yana tududaba tabutabuotogina i sisibodeni.

✧ 15:24: Same 22:18 ✧ 15:28: Ais 53:12 ✧ 15:29-30: Same 22:7; Ion 2:19

✧ 15:34: Same 22:1 ✧ 15:36: Same 69:21 ✧ 15:38: Sou 26:31-33; Ibu

Tutuyanina Iesu yawaina i 'a'avaga kalekonina i 'anilabu'alugedi, tabwanega i obu dibuneye, nika bani'odi i sibaleni 'eba luku Yaubada 'waineye.

<sup>39</sup> Tolugavia 'adi to'edakumeta Iesu 'ana 'ai lagalagana lilivaneye i tovtovoi, i nogai Iesu yana vegole wata i 'iseni bani'odi i munega i wafa nika i ve'awamogitana i vo, Vona mogitana, taunina Yaubada Natuna.”

<sup>40</sup> ✧ Wata 'ifwaidi vevine 'ani'ieyega i 'isanago 'ai lagalagana 'waineye. Vevinenidi 'waidiega, Meli 'atamana Magidala 'wainega wata tamu Meli, Iosese ma taina Iemesa Siaina inadi, wata Salome. <sup>41</sup> Vevinenidi 'adi 'aitonu Iesu 'ana to'aivaita tutuyanina i folofolova Galili. Wata 'ifwaidi vevine Iesu taiadi i maia Ielusalema 'waineye, taunidi wata ma fueidi i 'isanago.

### *Iesu 'ana ve'ufa.*

<sup>42-43</sup> 'Akonadi i lavia Iosefa tomogo Alimadia i le'wa. Taunina tamu me Diu yadi Kaniselo, tomotoga fueidi i ve'ililibuyeni, wata Yaubada yana veimea yana mai fwayefwayeye i lulukamaseni. 'Aiatanina 'waineye Iesu i wafaga Diu yadi 'Aiata 'Idewadewa, we'e 'awa'awai yadi tafalolo. Faifainanina Iosefa ma yana venuafoufa'ala i nago Failato 'waineye Iesu tomogona faifaina i velu'ui. <sup>44</sup> Tutuyanina Iosefa yana velu'ui i nogai Failato nuana i vogani i vo, 'Akonadi i wafa?” Begaidi vona i vetunei tolugavia 'adi to'edakumeta 'waineye i mai i velutolieni i vo, Iesu 'akonadi i wafa?” <sup>45</sup> Tutuyanina Failato i 'asetai 'akonadi Iesu i wafa i tauyeni Iesu i na ta'ia. <sup>46</sup> Bega Iosefa i nago kaleko 'avu'avuna i kimwanei mulieta Iesu tomogona i ta'ia kalekonina 'wainega i fania, i 'a'avana taumata 'waineye i silukuveni. Taumatanina basenadi i ala-vagaseni matumatu 'waineye bei Iesu i silukuveni, kileu bababanega i vetubodai. <sup>47</sup> Vevine 'adi 'ailuga matadie Iesu i ve'ufai, Meli 'atamana Magidala 'wainega, wata tamu Meli Iosese inana.

## 16

### *Iesu i tovoi-vaitugana wafayega.*

<sup>1</sup> Inala i simwanuya nika me Diu yadi 'Aiata Veawai i 'a'ava, begaidi vevine 'adi 'aitonu i nagoi bunama magaina 'atumaina i kimwanei Iesu tomogona faifaina. Vevinenidi Meli 'atamana Magidala 'wainega, wata tamu Meli Iemesa inana, wata Salome. <sup>2</sup> Tafalolo wiki 'ana 'aiata 'eba velamu 'waineye, i 'atai 'awa'awaiogose inala be'ama i vulaoga, vevinenidi i tovoi i nagoi taumaseye. <sup>3-4</sup> I nunagoi 'edeye 'aise'avadi i vonavona i vo, Aitoi kileu bwaikaotogina i na



ketoi taumata 'awanega?" Siwe i 'isanago i 'iseni kileu ketoketona. <sup>5</sup> Vevinenidi i maia i luku taumata nageneye tamu tubuau i 'iseni ma 'ana talauma 'avu'avuna 'atagiega i miabui nika i kololo-'afo'afo. <sup>6-7</sup> ✧Tubuaunina i vonedi i vo, Kebu 'wa na kolologa, a 'asetami Iesu tomogo Nasaledi bagase i tutufwaseniga 'ai lagalagana 'waineye 'wa lulualeni siwe 'akonadi i tovoi-vaitugana. De'e bei kebu i da miami-aga. 'Wa 'iseni 'ana 'ivi'ava. We'e 'omi 'wa na nagoi yana tovetutuyamavo wata Fita taiadi 'wa na vonedi 'wa na vo, Iesu i kumekumeta 'awalawa Galili, 'omi bei 'wa na nagoi 'wa na veluagai, basenadi i vonemiga bani'odi." <sup>8</sup> Vevinenidi i nogayeni taumatayega i souyedi i dega ma yadi tatava wata ma yadi nuavogana. Kebu tamu aitoi 'waineye i da lu'ivonaga fai i kololo.

*Iesu yana souyagi Meli 'waineye.*

<sup>9</sup> ✧Tutuyanina Iesu i tovoi-vaitugana 'awa'awaiogose wiki 'ana 'aiata 'eba velamu 'waineye nagami i souyeni Meli 'atamana Magidala 'wainega 'waineye. Vavinenina basenadi yaiaina 7 i agei siwe Iesu i vona i 'awa'a'ia. <sup>10-11</sup> I 'iseni i 'a'avana, i mimai enavo i na vonedi siwe i le'wa i 'isedi i vevemogai. I vonedi i vo, 'Wa ve'wada, Iesu 'akonadi i tovoi-vaitugana, yau taiadi a veluaga." I nogai siwe kebu i da ve'awamogitana.

*Iesu yana tovetutuyamavo 'adi 'ailuga taiadi i veluaga.*

<sup>12</sup> Mulieta Iesu yana tovetutuyamavo 'adi 'ailuga i nunagoi wala'aiamo, 'edeye Iesu i souyeni 'ana 'isa tulina. <sup>13</sup> I 'iseni wata taiadi i veifufu, mulieta i viladi 'ifwaidi ediavo 'waidie i lu'ivona siwe taunidi wata kebu i da vetumaganediga.

*Iesu yana tovetutuyamavo yadi folova i veledi.*

<sup>14</sup> Tamu 'aiata Iesu yana tovetutuyamavo 11 i 'ani'ani 'awasasadie Iesu i souyeni i vonedi i vo, Awale nuami i 'amalakibu? Egavo i 'iseku a tovoi-vaitugana siwe yadi vona kebu 'wa da vetumaganedi."

<sup>15-16</sup> ✧Wata i vonedi i vo, 'Wa na nagoi tomia fwayafwaya matatabuna 'waidie, Vala 'Atumaina faifaiku 'wa na lu'ivona 'waidie. 'Ai'edi aitoi ma yana vetumagana taunina i na tauyeni 'waikuye i na bafitaiso, Yaubada i na 'ita'ita'ieni. We'e 'ai'edi aitoi kebu i na vetumaganeku, Yaubada i na veimea vematavuloga i na veluagai. <sup>17-18</sup> ✧Ai'edi egavo i na vetumaganeku veimea a na veledi, bega 'eba 'isa toketokedi i na 'i'idewadi tomotoga fuedi i na 'isedi nika Valaku i na vetumaganeni. 'Aku wagavayega tovetumagananidi i na vona

✧ 16:6-7: Mak 14:28 ✧ 16:9: Luk 8:2 ✧ 16:15-16: Fol 1:8; Fol 2:38, 16:31-33

✧ 16:17-18: Fol 2:4, 8:7, 28:3-6; Luk 10:19

yaiaina 'waidie i na 'awa'a'idi wata 'adi fata i na vonavona bonanidi basenadi kebu i da 'asetadiga 'waidiega. Wata 'ai'edi 'o'olo kasikasisidi i na 'abitonovidi, kebu i na ovdiga, wata 'ai'edi aitoi ufa kasikasisidi\* i na veyemudi, kebu i na wafaga. We'e tovigā i na 'abitonovidi i na ve'atumai.”

*Iesu i laka abame.*

<sup>19</sup>☆ Iesu yana veifufu i 'a'ava tovetutuyamavo 'waidie, mulieta Yaubada i vagavaia i laka abame ma yana veimea 'ana 'atagiega i miabui.

<sup>20</sup> ☆ 'Akonadi Iesu i 'iawedi tovetutuyamavo i yavula 'atamana matatabuna 'waidie i lau'age. Yadi 'Auea yana toketokena 'wainega i folofolova bega yadi folova ma 'adi 'eba 'isa toketokedi, tomotoga fuedi i 'isedi i ve'awamogitana yadi lau'age faifaidi.]

---

\* **16:17-18:** Ufa kasikasisidi bani'odi tuva.

☆ **16:19:** Fol 2:33-34; Efe 1:20

☆ **16:20:** Fol 14:3; Ibu 2:3-4

## LUKE

### Iesu Valana 'Atumaina Luke 'ana kilukiluma.

Luke kebu Iesu yana tovetutuyamavo 12 'adi 'aila'a 'wainega wata kebu tomogo Diu, taunina tomogo Guliki. We'e yana 'atamana voke Anitioki 'awalawa Silia nageneye. Nagami yana folova doketa, viga 'adi to'ive'atumai we'e bona Guliki i 'asetai mogitana bega i kilumaga 'wa da vo tamu to'asetai mogitana bani'odi.

Buki Luke, Luke 'ana kilukiluma kumekumetana, bukinina i kilumi bega me Guliki Iesu ifufuna i na 'asetai wata i na nua'ewa ifufunina 'wainega. Bega yana veifufu 'waidie mali tomotoga taunidi kebu Diu i veifufuyedi, nika ta 'asetai Iesu i mai fwayefwayeye tomotoga matatabuda 'ada 'ita'ita'i faifaina. Iesu yana vetomotogaotoga matana matana i veifufuyedi wata yana nuakalikali i veifufuyeni. Yana nuakalalinina kebu luvetubama 'aisena faifaina, wata tomotoga 'aitamogana 'aitamogana faifaida. Wata side naninidiavo faifaide i veifufu, Yaubada 'ana subia, 'Anu'anunu 'Atumaina yana toketokena, velu'ui, wekowekoma wata 'ai'aiwabu.

Luke kebu taunina matanega Iesu yana folova i da 'isedi, siwe i lauala-dewa bega yana 'asetai i 'ewai Iesu 'ana to'isa 'waidiega. 'Ana kilukiluma ta na lu'iawawai nika Toveimea 'ana 'asetai mogitana ta na 'ewai.

<sup>1-2</sup> Ie iaku Tiofilo, 'omu toveimea bwaikimu.

'Akonadi 'u 'asetadi nani 'ifwaidi i souyediga 'waideye tutuyanina Iesu i miamia fwayefwayeye. Tomotoga fuei naninidi 'eba velamuyega i 'isedi i nagoga 'eba ve'a'ava 'waineye, 'akonadi i lu'ivoneyedi. 'Ifwaidi tomotoga nuanuadi ifufunina Iesu faifaina i na kilumi, bega i nagoi i veifufu tomotoganidi basenadi Iesu taiadi i folofolovaga 'waidie, bega ma yadi 'asetai 'adi fata i na kiluma-'atumaia. <sup>3</sup> Yau basenadi 'asiau tomotoganidi 'adi kilukiluma a lulu'iawawa-vebogiedi bega nani fuei Iesu faifaina a 'asetai-'atumaide. Faifainanina a nuani Iesu Valana matatabuna a na kiluma-vedulei 'u na lu'iawawai. <sup>4</sup> Basenadi vala'avadi 'u nogaidi, we'e 'aku kilukiluma de'e 'u na lu'iawawaiga 'u na 'asetai-'atumaia wata 'u na ve'awamogitana.

*Elisabeti yadi miana.*

<sup>5</sup> Side bani'odi. Tutuyanina Kini Elodi 'awalawa Iudia 'waineye i veveimea, tamu me Diu yadi tovelomu i miamia 'ana wagava Sekalaia. Taunina Ebaya yana 'aila'a taiadi i folofolova vanuga 'eba velu'ui 'waineye. Yana vavine 'adi

wagava Elisabeti, 'adi 'ailuga Eloni 'ana wauma 'wainega. <sup>6</sup> Sekalaia wata Elisabeti yadi sauluva tonoviotogidi Yaubada mataneyeye, yana ve'etoboda wata yana veimea matatabuna i vevematayakeyakedi. <sup>7</sup> Elisabeti kakalidi i vemo'ai wata Sekalaia i ve'auvea begaidi kebu tamu natudiga.

<sup>8</sup> \*Tamu wiki Sekalaia ma yana 'aila'a yadi tutuya i veluagai i nagoi i na folova vanuga 'eba velu'ui 'waineye Yaubada mataneyeye. <sup>9</sup> Tovelomu yadi sauluva, 'aitamogana 'aitamogana 'adi wagava i kilumidi kileu 'waidie i dodogidi vedie, mulieta tamu tovelomu ma mata'uluna kileu 'aitamogana i 'ewai. 'Aiatanina 'waineye kileunina bei Sekalaia 'ana wagava i kilumiga i 'ewai bega i luku tutudaba tabutabuna 'waineye, vane bani'odi i na kabuni bega magaina 'atumaina Yaubada 'waineye. <sup>10</sup> Tutuyanina i kabukabuni, 'aila'a bwaikina me Diu 'akonadi i va'auta tanotanoge i vevelu'ui. <sup>11</sup> We'e tamu 'Auvea yana anelose i souyeni i tovoi 'eba velomu 'ana 'atagiega. <sup>12</sup> Tutuyanina Sekalaia i 'iseni nuana i vogani i kololo bwaikina. <sup>13-14</sup> Siwe anelosenina i vo, Sekalaia, kebu 'u na kolologa. Yaubada 'akonadi yamu velu'ui i nogai. Yamu vavine natumu iavetana i na venatuneni 'u na goleni Ioni bega 'omu ma yamu vavine wata tomotoga fuedi taiadi 'wa na sosoana bwaikina yana tubuga faifaina. <sup>15</sup> \*'Wa na sosoanaga fai natumunina bola taunina tamu tomogo Yaubada mataneyeye. We'e 'eba nualugaugau bani'odi oine kebu i na yemudiga. Tutuyanina i na tubuga bei 'Anu'anunu 'Atumaina i na agevagaseni. <sup>16</sup> Wata taunina Isileli tomotoga 'adi tovagavai, i na kiavenuaviladi 'Auvea yadi Yaubada 'waineye. <sup>17</sup> \*Taunina 'awaie kebu i na kolologa, toketokeotogina i na vetomata'aulele 'Auvea faifaina, yana toketokena wata yana nuanua bani'odi tamu Yaubada yana tolu'ivona basenadi i wafa 'ana wagava Ilaitia. Yana lau'age 'wainega kwakwama tamadiavo yadi nuanua i na siviladi bega natudiavo i na nuakalikaliEDI. We'e tovedumwe'ai'ai i na kiavenuaviladi sakona 'waidiega i na vematayakayaka sauluva tonovidi 'waidie. Side bani'odi natumu tomotoga i na 'idewadi 'Auvea yana mai faifaina.”

<sup>18</sup> Sekalaia anelose i velutolieni i vo, Bani'odi a na munega bega a na 'asetai, 'u vona mogitana 'alo 'u vevekali? Yau a ve'auvea wata yaku vavine i vemo'ai. Tamu 'eba 'isa 'u da veleku.” <sup>19</sup> Anelosenina i vo, Yau Gabalieli, Yaubada yana tofolova, tutuya fuedi mataneyeye a tovofovoi. I vetuneku vala 'atumaina a mieni a lulu'ivoneyeni 'waimuye. <sup>20</sup> Siwe fai kebu bonaku 'u da vetumaganeniga, 'awamu i na 'ulu, kebu

'u na welava natumu i na tubugana bei 'u na vona-vaitugana. Valanina a vonemuga 'ana mogitana i na souyeni tutuyanina Yaubada nuanuana.”

<sup>21</sup> We'e tomotoga matatabudi tanotanoge i lulukamata tutuya manamanawena, nuadi i voganidi i vo, Awale Sekalaia yana mia i vemanawe vanuga 'eba velu'ui nageneye?”

<sup>22</sup> Tutuyanina Sekalaia i souyeni kebu 'ana fata i na welava fai 'awana i ve'u'u'u bega tomotoga i nuani i vo, Tamu nani i 'iseni 'wa da vo bani'odi i da 'enoneganega.” Begaidi nimanega i veifufu 'waidie.

<sup>23</sup> Mulieta Sekalaia yana folova 'adi 'aiata i ve'a'avadi i vilai i nago yana vanuge. <sup>24</sup> 'Aiata 'ifwaidi i 'a'ava, mulieta Elisabeti i miana begaidi kebu i da yabayaba i miamiamo yadi vanuge weta'i 5. <sup>25</sup> Begaidi Elisabeti i vo, Tutuya de'e Yaubada i nuakalikiema bwaikina. I 'ivaisema bega 'a miana, kakala 'ana bunumayaga 'waimega i 'ewai.”

*Iesu yana tubuga i lu'ivoneyeni.*

<sup>26</sup> Elisabeti yadi miana 'ana weta'i 6 'waineye Yaubada yana anelose Gabalieli i vetunei abamega i mai 'atamana Nasaledi 'awalawa Galili nageneye. <sup>27</sup> ✨I maiga tamu vavine ne'e'elina 'ana wagava Meli 'waineye 'akonadi i veakutagoni tamu tomogo 'ana wagava Iosefa faifaina. Tomogonina Kini Devida 'ana wauma 'wainega i souyeni. <sup>28</sup> Anelose i mai i vo, Kaiwa Meli, 'Auvea 'amu 'weabu i nuakalikiemu bwaikina.” <sup>29</sup> Meli nuana i vogani bega nuana i 'ivina vonanina 'ana 'aseti bani'odi. <sup>30</sup> Anelosenina i vo, Meli, kebu 'u na kolologa, Yaubada yana nuakaliki bwaikaotogina 'waimuye i 'eno'eno. <sup>31</sup> ✨Bega a na vonemu, sai'afoga 'u na miana mulieta natumu iavetana 'u na venatuneni 'ana wagava 'u na goleni Iesu. <sup>32-33</sup> ✨Taanina tomogo bwaikaotogina, tomotoga i na 'ina'inanai i na vo, Yaubada Tabwaotogineye Natuna.” We'e 'Auvea yada Yaubada i na silakai i na ve-kini tubuna Devida bani'odi, wata Iakobo 'ana wauma taunidi me Isileli i na veveimea-vagata 'waidie we'e yana 'Eba Veimea kebu 'ana 'eba ve'a'avaga.” <sup>34</sup> ✨Meli anelose i voneni i vo, Bani'odi i na munega a na miana, yau ne'e'eliku wata kebu yaku lamoga?”

<sup>35</sup> Anelose Meli yana vona i tutuli i vo, 'Anu'anunu 'Atumaina i na agemu wata Yaubada yana toketokena i na ve'i'wa'uyemu. Faifainanina kwamana 'u na venatuneni magemagetana, kebu tamu sakona 'waineye wata tomotoga i na 'ina'inanai i na vo, Yaubada Natuna.” <sup>36</sup> 'U na nuani nibaimu Elisabeti i vo, 'A kakala wata 'a vemo'ai, kebu 'ama

✨ 1:27: Mad 1:18 ✨ 1:31: Mad 1:21 ✨ 1:32-33: 2 Sam 7:16-17; Ais 9:7

✨ 1:34: Mad 1:20

fata 'a na venatunaga.” Siwe 'akonadi yadi miana 'ana weta'i 6 i veluagai. <sup>37</sup> Fai nani matatabuna Yaubada 'ana fata.”

<sup>38</sup> Meli i vo, Yau Yaubada yana tofolova, ava'ai 'u voneyeniga bani'odi i da souyeni 'waikuye.” Mulieta anelose Meli i 'iaweni.

*Meli i nago Elisabeti 'waidie i fogedi.*

<sup>39-40</sup> 'Aiata 'ifwaidi i 'a'ava mulieta Meli i 'idewadewa, i 'a'ava i tovoi tonovina i nago 'oya 'waidie 'awalawa Iudia nageneye Elisabeti i na fogedi. I le'wa 'atamananina bei Sekalaia i miamia i luku yana vanuge Elisabeti 'waidie i vekaiwa. <sup>41-42</sup> Tutuyanina Elisabeti Meli yana vekaiwa i nogai kamodie kwamana i fetu bwaikina. 'Anu'anunu 'Atumaina Elisabeti i agedi mogitana begaidi bonadi bwaikinega i vo, Nibai, Yaubada i nuakalikaliemu bwaikina, vevine matatabuda 'waidega kebu tamu aitoi bani'odi 'omu'e. Natumunina 'u na venatuneniga Yaubada ma yana nuakalikali i na vesauluva 'atumaina 'waineye.” <sup>43</sup> Wata Elisabeti i vo, Nani 'atumaiotogina 'waimeye fai yama 'Aueva inana 'u mai 'ama foge faifaina. <sup>44</sup> Tutuyanina yamu vekaiwa 'a nogai, kamomeye kwamana ma yana sosoana i fetu bwaikina. <sup>45</sup> We'e 'omu, 'Aueva yana vona 'u vetumaganeni 'ana mogitana i na souyeni, 'eba sosoana 'waimuye.”

*Meli yana lei-subisubia.*

<sup>46</sup> ☆Meli i vo,

Nuakuyega 'Aueva a subisubiai.

<sup>47</sup> Yaubada taunina 'aku To'ita'ita'i, faifaina 'anu'anunuku i sosoana bwaikina.

<sup>48-49</sup> ☆Yau kwamana siaiku ma yaku nuaobu a vetofolova-maimaiga 'waineye, siwe i nunuave'aviniku. 'Asiau wata tutuya mulina 'aila'a 'aitamogana 'aitamogana faifaiku i na vo, Mogitana Yaubada i vesauluva 'atumaina 'waineye bega 'eba sosoana 'waineye.” I na vonaga fai Yaubada Toketokena nani bwaikidi i 'idewadi faifaiku.

Taunina magemagetana, kebu tamu yana sakonaga.

<sup>50</sup> ☆Tutuya matatabuna 'aila'a 'aitamogana 'aitamogana 'waidiega egavo Yaubada i veve'ililibuyeniga i vevesauluva 'atumaina 'waidie.

<sup>51</sup> We'e tomotoganidi i nunualakaga wata taunidi i subisubiadiga, nimana toketokenega i tuobuobuyedi.

<sup>52</sup> ☆Taunidi toveimea toketokedi yadi 'eba mia 'ai'aiwabudi 'waidiega i siobuyedi, we'e tonuaobu i silakaidi.

☆ **1:46:** 1 Sam 2:1; Ais 61:10 ☆ **1:48-49:** Luk 11:27 ☆ **1:50:** Same 103:17

☆ **1:52:** 1 Sam 2:7

53 ✨Wata wekówekoma, nani 'atumaidi i veledi bega i sososoana, we'e 'ai'aiwabudi i veviladi nima'ava'avadi, kebu tamu ava'ai i da veledi.

54-55 ✨Yaubada i vona'awaufaufa tubudavo 'waidie kebu i na bailedi. Vona'awaufaufanina Ebelamo 'waineye wata 'ana wauma 'waideye kebu i na 'a'avaga i na 'eno-vagata. Begaidi 'ida me Isileli yana tofolovavo i 'ivaiseda, kebu i da venuafanida.”

56 Meli yana vona i 'a'ava, bei Elisabeti taiadi i miamia bani'odi weta'i 'aitonu, mulieta i vilai i nago.

### *Ioni Tobafitaiso yana tubuga.*

57 Meli i nago mulieta Elisabeti i vebutudi fai yadi tutuya i veluagai, i venatuna natudi iavetana i tubuga. 58 Tutuyanina ediavo wata yadi 'aila'avo valadi i nogai 'Auvea i nuakalikaliediga, ma fuedi i sosoana.

59 ✨Mulietta kwamana 'ana 'aiata 8 i veluagai, ediavo wata yadi 'aila'avo i va'auta bununa i na boboi me Diu yadi sauluva bani'odi, wata i na goleni tamana wagavina Sekalaia. 60 Nika inana i vo, Kebu, ta na goleni Ioni.” 61 Siwe ediavo i vo, We'e wagavanina kebu tamu aitoi yami 'aila'a nageneye 'ana wagava.” 62 Begaidi nimadiega Sekalaia i velutolieni ava'ai wagavaga nuanuana i na goleni.

63 Sekalaia nimanega i vonedi nuanuana lubulubu bei wagava i na kilumi. Lubulubu i 'ewai i kilumi i vo, 'Ana wagava Ioni.” Fuedi i 'iseni nuadi i voganidi. 64 Tutuyanina kwamana 'ana wagava i kiluma'a'avai, nika Sekalaia meana i tonova wata i welava-vaitugana, Yaubada i subiai. 65 Begaidi enavonidi i 'iseniga i kololo, bega valana i lulu'ivoneyeni 'oya 'ana tomia 'waidie 'awalawa Iudia nageneye. 66 Tomotoganidi kwamana valana i nogaiga nuadi i 'ivina wata tauni'avadi i velutoli i vo, Bola kwamana yana folova ava'ai?” Bani'odi i voneyediga fai 'Auvea yana nuanua wata yana toketokena 'waineye i 'eno'eno.

### *Sekalaia yana lei-subisubia*

67-68 'Anu'anunu 'Atumaina Ioni tamana Sekalaia i agei mogitana begaidi i vona-vagata tutuya mulina faifaina i vo, 'Auvea ta na subisubiai, taunina me Isileli yada Yaubada fai 'akonadi i 'ivaiseda wata i 'ita'ita'ieda.

69 'Ada To'ita'ita'i Toketokena Yaubada i silakai faifaida yana tofolova Kini Devida 'ana wauma 'wainega.

70-71 ✨Basenadiotoga nagami bani'odi Yaubada i vona'awaufaufa yana tolu'ivona magemagetadi 'waidie

✨ 1:53: Same 107:9 ✨ 1:54-55: Ais 41:8-10; Mai 7:20; Nag 17:7 ✨ 1:59: Nag 17:10-12; Luk 1:13 ✨ 1:70-71: Same 106:10

i na 'ita'ita'ieda 'ada gaviavo 'waidiega wata taunidi i vedumwe'ai'aiedaga yadi toketokena 'waidiega.

<sup>72</sup> ✧ Wata i vona-vagata tubudavo i na 'isanuakalikali wata i na 'ivaisedi, yana vona'awaufaufanina kebu i da ven-uafania.

<sup>73-75</sup> Vona'awaufaufanina Yaubada tubuda Ebelamo i veni, I na 'ita'ita'ieda 'ada gaviavo nimadiega bega kebu tamu ava'ai ta na kololoyeni.

Wata yana 'aivaitanina 'wainega 'ada fata ta na vetofolova faifaina,

Tutuya matatabuna yada sauluva tonovidi wata magemagetadi mataneyeye.”

<sup>76</sup> ✧ Wata Sekalaia i vona-vagata natuna faifaina i vo,

We'e natuku 'omu, i na golemu Yaubada Tabwaotogineye yana tolu'ivona,

Fai 'omu nagami 'u na kumeta 'u na vusi 'Auvea yana 'eda.

<sup>77</sup> Yana tomotoga 'waidie 'u na mata'aulele yadi sakona i na vedumwe'ubu'ubusedi bega Yaubada i na nuatavunidi nika 'ita'ita'i i na veluagai.

<sup>78-79</sup> ✧ Nani de'e matatabuna i na souyeni fai yada Yaubada i 'isanuakalikali bwaikina wata 'ita'ita'i sai'afoga i na mai abamega bani'odi mageta,

Bega egavo wafa faifaina i kolokolologa wata dudubala 'waineye i miamianiga i na magesedi.

Magetanina i na kumeseda bega yada mia i na ve'atumai.”

<sup>80</sup> ✧ Kwamananina i tulai toketokena wata yana nuanua matatabuna i tauyedi Yaubada 'waineye. Sali'avu'avuye i miamia, tutuyanina i souyeni yana folova i velamu me Isileli 'waidie.

## 2

### *Iesu yana tubuga.*

<sup>1</sup> Tutuyanina Ioni siaineye me Loma i veveimea me Diu yadi 'awalaweye. Yadi toveimea bwaikaotogina 'ana wagava Sisa Agosito, i veimea nuanuana 'atamana 'aitamogana 'aitamogana 'adi tomotogavo 'adi wagava i na kilumidi senisifi faifaina. <sup>2-3</sup> De'e veimeanina i velamu-vauvau tutuyanina Kwilinio 'awalawa Silia 'ana toveimea yana tutuye, bega tomotoga matatabudi i nagoi 'adi wagava i na kilumidi 'adi tuvada 'waidie.

<sup>4-5</sup> Iosefa i souyeni Kini Devida 'ana wauma 'wainega bega 'atamana Nasaledi, 'awalawa Galili nageneye 'wainega i tovoi i nago Devida 'ana tuvadeye 'ana wagava Bedeliema,

✧ **1:72:** Nag 17:7, 22:16-17 ✧ **1:76:** Mad 3:3, 11:10; Ais 40:3 ✧ **1:78-79:** Ais 9:2, 60:1-2; Mad 4:16; Ion 8:12 ✧ **1:80:** Mad 3:1-6



'awalawa Iudia nageneye. Meli kumanidi basenadi i veaku-tagonidi siwe bola kebu Iosefa taiadi i da vemialuga ma vitavitadie wata taiadi i nago 'adi wagava i na kiluma.

<sup>6</sup> Tutuyanina Bedeliema i miamiani Meli i vebutudi, fai yadi tutuya 'akonadi i le'wa. <sup>7</sup> Fai vanuga wakawaka i adagidi kebu tamu 'awasasa bei i na luku, i nagoi 'aisaya yadi vanuge bei i venatuna, yadi akavau iavetana i tubuga. Kwamana i velu'uvai mwedamwedalidi 'adi kalekoyega, wata i ve'enovi 'aisaya bulumakau 'adi ta'ule.

*To'isave'avina sifi i nagoi Iesu i 'iseni.*

<sup>8-9</sup> We'e Bedeliema lilivaneye to'isave'avinavo 'aisaya lo-vane yadi sifi i lulumadu'aiedi gidegideye, nika tamu 'Auvea yana anelose i souyeni 'waidie, wata 'Auvea yana mageta mataududulina i magesedi begaidi i kololo bwaikina. <sup>10</sup> Nika anelosenina i vo, Kebu 'wa na kolologa, yau a maiga vala 'atumaina a mieni 'waimie, bega tomotoga fuemi 'wa na sosoana bwaikina. <sup>11</sup> 'Asiau 'ami To'ita'ita'i Bedeliema\* 'waineye i tubuga, taunina Toveimea Keliso, Yaubada 'ana Venua'ivina. <sup>12</sup> Yami tugusa 'wa na 'iseni mwedamwedalidi 'adi kalekoyega i velu'uvai i ve'enovi 'aisaya 'adi ta'ule, bega 'wa na 'asetai taunina kwamananina."

<sup>13</sup> Tutuyanina i vona'a'ava, nika enavo 'aila'a bwaikina i souyedi 'waineye ma fuedie Yaubada 'waineye i lei-subisubia i vo,

<sup>14</sup> Abama tabwaotogineye Yaubada ta na subisubiai,

Fwayefwayeye tomotoganidi faifaidi Yaubada i sososoana i na mia-'atumai."

<sup>15</sup> Tutuyanina anelosenidi i viladi abame, 'aisaya 'adi to'isave'avinavo 'aise'avadi i veifufu i vo, Ta na nagoi 'atamana Bedeliema, naninina 'akonadi i souyeni faifaina 'Auvea i vonedaga ta na 'iseni." <sup>16</sup> Bega i tovoi i lilide i nagoi Iosefa ma yana vavine i veluagadi wata kwamana i 'iseni 'aisaya 'adi ta'ule i ve'enovi i 'eno'eno. <sup>17</sup> Kwamana i 'iseni tamana wata inana 'waidie i veifufu ava'ai anelose i vonediga kwamananina faifaina. <sup>18</sup> We'e 'ifwaidi tomotoga valanina i nogaiga nuadi i voganidi 'aisaya 'adi to'isave'avinavo yadi vona faifaina. <sup>19</sup> We'e Meli vonanidi matatabuna i nuave'avinidi faifaidi nuadi i 'ivi'ivina. <sup>20</sup> To'isave'avinavo sifi i viladi yadi 'aisaya 'waidie Yaubada i subisubiai wata i awa'ai'aia ava'ai i 'isediga wata i nogaidiga faifaidi, fai anelose yana vona 'waidie 'ana mogitana i 'iseni.

*Iesu 'ana wagava i goleni.*

\* 2:11: 'Ana mogitana Kini Devida 'ana tuvada 'waineye.

<sup>21</sup> Kwamana yana tubuga 'wainega i maiga 'ana 'aiata 8 'waineye bununa i boboi, wata 'ana wagava i goleni Iesu. Basenadi bola Meli kebu i da mianaga, anelose wagavanina i veleni.

*Iesu i naweni vanuga 'eba velu'ui 'waineye.*

<sup>22-24</sup> ✧ Mulieta Meli wata Iosefa Iesu i naweni Ielusalema bega i na 'aniveleneni Yaubada 'waineye wata i na velomu. I nagoiga fai basenadiotoga Mosese 'Auvea yana veimea i kilumi i vo, Kwakwama iavetadi yami akavau 'aitamogana 'aitamogana 'wa na 'anivelenedi 'Auvea 'waineye.” Wata i vo, Bunebune 'ailuga 'alo kabututula siaidi 'ailuga 'wa na nikedi 'wa na velomuyedi Yaubada 'waineye kwamana wata inana taiadi faifaidi.” Meli vauvaudi begaidi yadi tutuya i veluagai Iosefa taiadi i laka vanuga 'eba velu'ui 'waineye i na tafalolo bega i na vevunavunaga Yaubada mataneyeye.

*Simioni yana vona.*

<sup>25</sup> Tutuyanina 'waineye tamu tomogo 'au'auveana i mi-  
amia Ielusalema, 'ana wagava Simioni. Taunina tomogo  
'atumaina wata tove'ililibu Yaubada 'waineye, ma yana toke-  
maiga i lulukamata Yaubada 'ana Venua'ivina yana mai  
faifaina bega me Isileli i na 'ita'ita'iedi. <sup>26</sup> 'Anu'anunu  
'Atumaina 'ana 'weabu bega i veni nagami 'Auvea 'ana  
Venua'ivina Keliso i na 'iseni mulieta i na wafa. <sup>27</sup> 'Aiatanina  
'waineye 'Anu'anunu 'Atumaina Simioni i voneni i luku  
vanuga 'eba velu'ui 'waineye, we'e kwamana Iesu inana  
wata tamana i mieni vanuga 'eba velu'ui 'waineye bei Iesu  
i na 'aniveleneni 'Auvea 'waineye bani'odi yadi veimea 'ana  
sauluva. <sup>28</sup> Simioni kwamana i olia Yaubada 'waineye i  
vekaiwa i vo,

<sup>29-31</sup> ✧ 'Auvea, 'asiau 'u na tauyeku ma yaku sosoana  
a na wafa, fai yamu vona'awaufaufa 'waikuye 'akonadi  
matakuyega a 'iseni.

Kwamananina 'ama To'ita'ita'i 'u vetunei fwayefwayeye  
tomotoga fuema matameye.

<sup>32</sup> ✧ Taunina bani'odi mageta mali tomotoga taunidi kebu  
Diu 'waidie bega yamu nuanua i na 'asetadi,

We'e 'ima yamu tomotoga me Isileli 'ama subia 'a na  
veluagai kwamananina faifaina, fai yama 'aila'a 'wainega i  
souyeni.”

<sup>33</sup> We'e Meli wata Iosefa nuadi i voganidi Simioni yana  
vona kwamana 'waineye faifaina. <sup>34-35</sup> ✧ Mulieta Simioni i  
velu'ui bega Yaubada Meli wata Iosefa i na nuakalikaliedi, i  
'a'avana Meli i vonedi i vo,

✧ **2:22-24:** Vei 12:1-4; Sou 13:2,12,15 Vei 12:8 ✧ **2:29-31:** Ais 52:10 ✧ **2:32:**  
Ais 42:6; Ion 8:12 ✧ **2:34-35:** Ais 8:14,15; 1 Kol 1:23; 1 Fit 2:6-8

Kwamana de'e Yaubada i venua'ivineni bega 'wainega me Isileli fuedi 'ita'ita'i i na veluagai we'e 'ana tovedumwe'ai'ai fuedi vita i na veluagai 'wainega.

Taunina 'eba 'isa Yaubada 'wainega siwe fuedi i na awavesakoyeni nika bei yadi nuagiva i na sivemagesedi. We'e 'omi Meli, yadi vedumwe'ai'ai faifaina 'wa na nuavita bwaikina 'wa da vo nuafoumi i da 'e'etokadia kefatayega.

*Ana yadi vona.*

36-37 ✨Wata tutuyanina 'waineye tamu Yaubada yana tolu'ivona vevinedi i miamia vanuga 'eba velu'ui nageneye, 'adi wagava Ana. Tamadi Fenueli, Asali 'ana wauma 'wainega. Ne'e'elidie i nagi i miamia malamala 7, nika yadi lamoga i wafa i 'wabula siwe yadi miayega malamala 84 i veluagai i vemo'ai mogitana. 'Wabulanidi kebu vanuga 'eba velu'ui i da 'ia'iaweniga, 'aiata wata lovana Yaubada i subisubiai, i vevelu'ui 'waineye wata i veve'udigana 'ani bega yadi velu'ui 'waineye i na vetoketoke. <sup>38</sup> Tutuyanina Simioni i veveifufu Iosefa Meli taiadi 'waidie, Ana i mai Yaubada 'waineye i vekaiwa, wata 'ifwaidi me Ielusalema 'waidie i veifufu kwamananina faifaina i vo, Kwamana de'e 'ada To'ita'ita'i kumanina ta 'e'edaveyaieni."

39 ✨Veimeanidi Yaubada 'wainega i maiga, 'akonadi Iosefa wata Meli i 'idewa'a'avadi, mulieta i viladi yadi 'atamane Nasaledi 'awalawa Galili nageneye. <sup>40</sup> Kwamananina i taulai ma yana toketokena, ma yana 'aseta bwaikina wata Yaubada ma yana nuakalikali i vevesauluva 'atumaina 'waineye.

*Iesu i veifufu vanuga 'eba velu'ui nageneye.*

41-42 ✨Malamala 'aitamogana 'aitamogana Iesu inana wata tamana yadi sauluva i lakalaka Ielusalema, me Diu yadi Sakali Uvi'agalatagona† faifaina. Tutuyanina Iesu 'ana malamala 12 'waineye taiadi i laka sakalinina 'waineye. <sup>43</sup> 'Aiata 'ifwaidi i miamiani Ielusalema 'waineye, mulieta tutuyanina sakali i 'a'ava tomotoga matatabudi i vilaviladi yadi 'atamane, we'e Iesu Ielusalema bei i miamia. <sup>44</sup> Tamana inana taiadi kebu i da 'asetaga, yadi nuanua i vo, Voke yada 'aila'avo taiadi i nunagoi." I nunagoi 'aiata 'aitamogana mulieta i lovani nika Iesu kebu i da veluagaiga, bega yadi 'aila'avo wata ediavo 'waidie i luala. <sup>45-46</sup> Nika kebu'a, wata i viladi Ielusalema bei i luala, mulieta 'aiata 'aitonu i 'a'avana i veluagai vanuga 'eba velu'ui nageneye, Diu yadi ve'etoboda 'adi tovevo taiadi i miamiani. Ma fuedie i veveifufu yadi

✨ **2:36-37:** 1 Tim 5:5 ✨ **2:39:** Mad 2:23 ✨ **2:41-42:** Sou 12:1-14,24-27

† **2:41-42:** Me Diu yadi 'eba tolinuata'i basenadiotoga Yaubada tubudiavo i 'ita'ita'iedi Itifita 'wainega, anelose me Diu i uvi'agalatagonidi we'e me Itifita i nikedi.

vona i noganogaidi wata i velutolitoliedi. <sup>47</sup> Fuedi i 'iseni yana 'asetai bwaikina wata i nogai Iesu yana tutula 'atumaidi wata tonovidi begaidi nuadi i voganidi. <sup>48</sup> Wata inana tamana taiadi i 'iseni nuadi i voganidi, bega inana i vo, Natuku awale we'e bani'odi yamu sauluva, bega ma yama venuafouviga tamamu taiadi 'a lulualemu?"

<sup>49</sup> Iesu i vo, Awale mali vanuga 'waidie 'wa lualamaimaiga? 'Wa da 'asetai yau Tamaku yana vanuge i lubwaineku bei a na miamia." <sup>50</sup> Siwe inana tamana taiadi yana vona faifaina kebu nuadi i da magetai.

<sup>51</sup> Nika Iesu inana tamana taiadi i souyedi i nagoi Nasaledi, bei yadi vona i vematayakeyakedi. We'e inana nuadi i 'ivi'ivina naninidi faifaidi. <sup>52</sup> Bei Iesu i taulai, ma tomogona wata yana 'asetai taiadi, ma 'ana nuakalikali Yaubada 'wainega wata tomotoga 'waidiega.

### 3

#### *Ioni Tobafitaiso i lau'age tomotoga 'waidie.*

<sup>1-2</sup> Me Loma yadi toveimeia bwaikaotogina tamu, 'ana wagava Sisa Taibilio, yana vetoveimeia 'ana malamala 15 'akonadi i veluagai, Yaubada yana vona i mai Ioni Tobafitaiso 'waineye, i miamia sali'avu'avuye. Tutuyanina 'waineye Fonitio Failato 'awalawa Iudia 'ana toveimeia, we'e Elodi Galili i veveimeyeni, taina Filifi 'awalawa Itulia wata Tilakoniti i veveimeyedi, we'e Lisania 'awalawa Abilini i veveimeyeni, Anasa wata Kaiafa me Diu yadi tovelomu bwaikidi. <sup>3</sup> \*Tutuyanina Ioni Yaubada yana vona i nogai, i tovoi i nago 'awalawa fuedi 'waidie Ufa Iolidani lilivaneye i lau'age tomotoga 'waidie i vo, Yami sakona 'wa na vedumwe'ubu'ubusedi bega a na bafitaisomi wata Yaubada yami sakananidi i na nuatavunidi." <sup>4</sup> \*Basenadiotoga Yaubada yana tolu'ivona 'ana wagava Aisea i kilumi Yaubada yana Buki 'waineye, Ioni yana folova wata yana vona faifaidi i vo,

Tamu tovegolegole sali'avu'avuyega i vo,  
'Auvea yana 'eda 'wa na vusia, wata 'wa na sivetonovidi yana 'eba nago.

<sup>5</sup> 'Oya 'wa na aladi i na vetano'atuga we'e 'awa'awakovadi 'wa na veivudi.

'Eda 'oka'okadi 'wa na vusivetonovidi, wata 'eda bwakabwakadi 'wa na 'idewadi i na ve'atumai.

<sup>6</sup> Bega tomia fwayafwaya matatabudi Yaubada yana 'ita'ita'i i na 'iseni."

<sup>7</sup> Tomotoga fuedi Ioni valana i 'asetai i nagoi 'waineye igodi i na bafitaisodi nika i vonedi i vo, 'Omi tosakona, 'o'olo

bani'odi. Igodi 'wa vo, 'A na dega Yaubada yana nuasako wata yana vematavuloga 'waidiega.” Begaidi yami vaiseba 'wa vo, 'Akonadi 'a nuavilama 'u da bafitaisoma,” siwe kebu nu-anuami yami sauluva sakoidi 'wa na vedumwe'ubu'ubusedi. <sup>8-9</sup> ✱Nagami yami sauluva i na tonova 'ami 'eba 'isa 'akonadi 'wa nuavilami 'wa da vo bani'odi welavi 'atumaina vuagina, mulieta a na bafitaisomi. Wata kebu 'wa na vo, Ebelamo tubuma bega 'ima Yaubada yana tomotoga kebu i na vematavulogima.” Siwe a na vonemi, kebu 'aivaita 'wa na veluagai. Kebu nani bwaikina Yaubada mataneyeye 'omi Ebelamo tubunavo. Yaubada 'ana fata tutulimi Ebelamo tubunavo i na 'idewadi kileu we'e 'waidiega. Sai'afoga Yaubada i na vematavulogimi yami sauluva sakoidi faifaidi 'wa da vo 'akonadi yana tamuyoko i da yadali bega welavi 'aitamogana 'aitamogana kebu vuagidi 'atumaidiga i na talagidi i na tawedi 'ai-'ala'alase.”

<sup>10</sup> 'Aila'anidi Ioni yana vona i nogai begaidi i velutolieni i vo, Vetuma, bani'odi 'a na munega?” <sup>11</sup> Ioni i vo, 'Ai'edi egavo 'ami kaleko sulu 'ailuga, we'e 'ifwaidi kebu 'adi kalekoga, tamu 'wa na veledi. Wata bani'odi, 'ai'edi ma 'ami'ami, we'e egavo kebu 'adi'adiga 'ifwaidi 'wa na veledi.”

<sup>12</sup> ✱Wata 'ifwaidi takesi 'ana tolaugogona i maia bafitaiso faifaina Ioni i velutolieni i vo, Tove, 'ima bani'odi?” <sup>13</sup> Ioni i vo, Me Loma yadi veimea 'ana tonovina 'wainega takesi 'wa na lalaugogona, kebu vekaliega 'imoso'i 'wa na 'ewa'ewadi taunimi faifaimi.”

<sup>14</sup> Wata bani'odi tolugaviavo i velutoli i vo, We'e 'ima bani'odi? Ava'ai 'a na vai?” Ioni i vonedi i vo, 'Omi yami folova 'ana tutula 'asa'aiana 'ana fata i lubwainemi, we'e kebu 'ami tutula 'ana 'imoso'i faifaina ve'isakololoyega 'wa na vekali wata kebu tomotoga 'wa na vevita-maimaigidi bega yadi mani 'wa na 'ewa'ewadi.”

### *Ioni i veifufu Keliso 'ada Toveimefa faifaina.*

<sup>15</sup> ✱Tomotoga matatabudi i nuanua bwaikina Yaubada 'ana Venua'ivina Keliso yana mai faifaina, bega Ioni i 'iseni i venuanaluga i vo, Voke taunina Yaubada 'ana Venua'ivina 'alo tulina.” <sup>16</sup> Begaidi Ioni matatabudi i vonedi i vo, Yau ufayega a na bafitaisomi, we'e kumanina mulikuye i mimaiga i na bafitaisomi 'Anu'anunu 'Atumainega wata 'ai-'ala'alata 'wainega bani'odi yami sakona i na 'ala-lekoadi. Wata tomogonina toketokeotogina, yau kebu bani'odiga, kebu i da lubwaineku 'waineye a na vetofolova fai taunina bwaikina a bunumayaga.

✱ **3:8-9:** Fol 26:20; Ion 8:39; Mad 7:15-20 ✱ **3:12:** Luk 7:29 ✱ **3:15:** Ion 3:28; Fol 1:5, 13:25

17 Tutuyanina Kelisonina i na maiga, tomia fwayafwaya matatabudi i na vonayavuga mataneyeye wata i na veimeyedi 'wa da vo bani'odi waifei 'ana tolaukadi, waifei wata 'ani'aninidi i na yato'edi mulieta i na vedodogidi yana bubuwakeye, we'e yogo i na tunuya 'ainina kebu yana 'weuga 'waineyeye."

18 Vona fuedi 'waidiega Ioni tomotoga i velu'ase'asedi wata Vala 'Atumaina i lu'ageyeni 'waidie. 19 \*We'e Ioni tamu toveimea 'ana wagava Kini Elodi i awavesakoyeni taina yana vavine i luobuyediga faifaina, 'adi wagava Elodiasa. Wata 'ifwaidi Elodi yana sauluva sakoidi Ioni i lu'ivoneyedi. 20 Begaidi Elodi i nuasako nani sakoiotogina i 'idewai, Ioni i yatoi vanuga 'eba yogona 'waineyeye.

### *Ioni Iesu i bafitaisoi.*

21-22 \*Ioni bola kebu i da luku vanuga 'eba yogona 'waineyeye, tomotoga i bafitaisodi i 'a'avana, wata Iesu i bafitaisoi. Tutuyanina Iesu i vevelu'ui abama i 'anikililia, 'Anu'anunu 'Atumaina i obu Iesu 'waineyeye 'ana 'isa'isa bani'odi bunebune, nika bona'ava abamega i souyeni i vo, 'Omu Natuku nuafouku. A sosoana bwaikina faifaimu."

### *Iesu tubunavo.*

23 Tutuyanina Iesu 'ana malamala bani'odi 30 i veluagai yana folova i velamu tomotoga 'waidie. Bega tomotoga i nuaniga i vo

Iesu tamana Iosefa,  
 we'e Iosefa tamana Ilai,  
 24 we'e Ilai tamana Madati,  
 we'e Madati tamana Livai,  
 we'e Livai tamana Meliki,  
 we'e Meliki tamana Yanai,  
 we'e Yanai tamana Iosefa,  
 25 we'e Iosefa tamana Matadaya,  
 we'e Matadaya tamana Emosi,  
 we'e Emosi tamana Neumi,  
 we'e Neumi tamana Esili,  
 we'e Esili tamana Nakai,  
 26 we'e Nakai tamana Meati,  
 we'e Meati tamana Matadaya,  
 we'e Matadaya tamana Semiai,  
 we'e Semiai tamana Ioseki,  
 we'e Ioseki tamana Dioda,  
 27 we'e Dioda tamana Diowane,  
 we'e Diowane tamana Lisa,  
 we'e Lisa tamana Selubabela,

we'e Selubabela tamana Salatiela,  
we'e Salatiela tamana Nelai,  
<sup>28</sup> we'e Nelai tamana Meliki,  
we'e Meliki tamana Edai,  
we'e Edai tamana Kosami,  
we'e Kosami tamana Elimadami,  
we'e Elimadami tamana Eli.  
<sup>29</sup> we'e Eli tamana Iosua,  
we'e Iosua tamana Eliesa,  
we'e Eliesa tamana Yolima,  
we'e Yolima tamana Madati,  
we'e Madati tamana Livai,  
<sup>30</sup> we'e Livai tamana Simioni,  
we'e Simioni tamana Iuda,  
we'e Iuda tamana Iosefa,  
we'e Iosefa tamana Yonami,  
we'e Yonami tamana Eliakimu,  
<sup>31</sup> we'e Eliakimu tamana Melia,  
we'e Melia tamana Mena,  
we'e Mena tamana Matati,  
we'e Matati tamana Nedani,  
we'e Nedani tamana Devida,  
<sup>32</sup> we'e Devida tamana Iese,  
we'e Iese tamana Obedi,  
we'e Obedi tamana Bwasa,  
we'e Bwasa tamana Salimoni,  
we'e Salimoni tamana Nasoni,  
<sup>33</sup> we'e Nasoni tamana Aminadaba,  
we'e Aminadaba tamana Adamina,  
we'e Adamina tamana Anai,  
we'e Anai tamana Esiloni,  
we'e Esiloni tamana Felesi,  
we'e Felesi tamana Iuda,  
<sup>34</sup> we'e Iuda tamana Iakobo,  
we'e Iakobo tamana Aisake,  
we'e Aisake tamana Ebelamo,  
we'e Ebelamo tamana Tela,  
we'e Tela tamana Naoli,  
<sup>35</sup> we'e Naoli tamana Seluki,  
we'e Seluki tamana Leu,  
we'e Leu tamana Feliki,  
we'e Feliki tamana Iba,  
we'e Iba tamana Sila,  
<sup>36</sup> we'e Sila tamana Keinana,  
we'e Kenani tamana Afakisadi,  
we'e Afakisadi tamana Semi,  
we'e Semi tamana Noa,  
we'e Noa tamana Lemeki,  
<sup>37</sup> we'e Lemeki tamana Metusela,

we'e Metusela tamana Inoki,  
 we'e Inoki tamana Ieledi,  
 we'e Ieledi tamana Malaleli,  
 we'e Malaleli tamana Keinana,  
 38 we'e Kenani tamana Inosi,  
 we'e Inosi tamana Seti,  
 we'e Seti tamana Adama,  
 we'e Adama tamana Yaubada.

## 4

### *Seitani Iesu i silubuya.*

1 Iesu i bafitaiso Ufa Iolidani i 'a'avana, 'akonadi 'Anu'anunu 'Atumaina i agei mogitana bega 'Anu'anununina Iesu i vagavaia i naweni sali'avu'avuye. 2 Seitani nuanuana Iesu i na sakona begaidi bei i silubuya 'aiata 40 nagedie, 'aiatanidi 'waidie Iesu kebu tamu 'ani'ani i da 'alatonovi, mulieta 'aiatanidi i 'a'avana i lase.

3 Tutuyanina Iesu i lase nika bei Seitani i souyeni 'waineye, nuanuana Iesu i na be'u sakona 'waineye bega i silubuya i vo, 'Ai'edi 'omu mogitana Yaubada Natuna, 'u na vona de'e kileunidi i na ve'ani'ani." 4 ✧Iesu Seitani yana vona i tutuli i vo, Kebu. Basenadi i kilumi Yaubada yana Buki nageneye i vo,

Tomotoga yadi mia 'ana 'atumaina wata yawaidi kebu 'ani'ani'ava 'wainega i da veveluagadi."

5-7 ✧Wata 'ana veluga Seitani Iesu i vagavaia i lakaveni 'oyeye fwayafwaya yana 'eba veimea matatabuna i veni tutuya 'ale'usana nageneye bega Seitani i vo, 'Ai'edi 'u na 'oduga 'waikuye wata yaku vona 'u na vematayakeyakediga de'e 'eba veimeanidi wata 'ai'aiwabunidi a na velemu yamu 'eba veimea. Fai matatabuna i 'anivelenedi 'waikuye yau yaku 'eba veimea, 'ai'edi nuanuaku 'aku fata a na 'anivelenedi 'waimuye fai ma yaku veimea." 8 ✧Nika wata Iesu i vo, We'e Yaubada yana Buki nageneye i vonaga i vo,

Yami 'Auvea Yaubada 'waineye 'wa na 'odu'odu,  
 'Aiseotogina faifaina 'wa na folofolova."

9-10 ✧I 'a'avana wata Seitani Iesu i vagavaia i naweni Ielusalema, vanuga 'eba velu'ui tabwaotogineye i lakaveni. Bei wata i voneni i vo, 'Ai'edi mogitana 'omu Yaubada Natuna de'e bega 'u na souga, veviga kebu 'u na veluagai fai Yaubada yana Buki nageneye i vo,

Yau Yaubada yaku anelose a na vonedi i na 'i'isave'avinimu,

11 Nimadiega i na 'i'ivaisemu bega kebu tamu sai'afo 'agemu 'u na nikeyedi."



12 ✨Iesu Seitani yana vona i tutuli i vo, Kebu, fai wata Yaubada yana Buki nageneye i vo,

'Ai'edi taunimi 'wa na tauyemi 'eba ilagi 'waidie, kebu i da lubwaineni 'wa na taidaida Yaubada 'waineye 'aivaita faifaina.”

13 ✨Tutuyanina Seitani yana sailubu matatabuna i ve'a'avadi Iesu 'waineye, mulieta i 'iaweni i nago tulineye bega bola tamu tutuya nuanuana i na vilai.

*Iesu yana folova i velamu Galili 'waineye.*

14-15 'Anu'anunu 'Atumaina yana toketokena Iesu 'waineye i 'eno'eno, bega i vilai sali'avu'avuyega i nago Galili. Me Diu yadi 'eba miava'auta 'waidie Iesu Yaubada yana Vona i ve fuedi i subiai bega tomotoga matatabudi i miamiani 'awalawanina 'waineye valana i 'asetai.

*Nasaledi 'waineye Iesu i vedumwe'ai'aieni.*

16 Mulieta Iesu i nago Nasaledi yana 'atamane bei i taulaiga 'waineye. Tamu 'Aiata Veawai i veluagai Iesu i luku me Diu yadi 'eba miava'auta 'waineye, yana sauluva bani'odi. Yadi tafalolo 'waineye i tovoi tomotoga matadie i na lu'iawawa Yaubada yana Buki 'wainega. 17 Bega tamu tomogo Buki i 'ewai Iesu i veleni, Bukinina tamu Yaubada yana tolu'ivona Aisea 'ana kilukiluma. I luyawagi nika vonanina i veluagai 'ana nogaya side bani'odi.

18 ✨'Auvea 'Anu'anununa 'waikuye i 'eno'enoga fai i venum'ivineku Vala 'Atumaina a na lu'ageyeni wekowekoma 'waidie.

I vetuneku bega tomotoga yogoyogonidi 'adi 'etoyavu faifaina a na lu'ivona 'waidie, we'e tomatasako matadi yadi ve'atumai-vaitugana faifaina.

Wata i vetunekuga tomotoganidi i mia vitana 'adi gaviavo nimadie, a na 'etoyavudi.

19 Wata 'ami 'ita'ita'i 'Auvea 'wainega 'ana tutuya a na lu'ivoneyeni.”

20 Vonanina Iesu i lu'iawawai i 'a'avana Buki i vetalabodai 'ana to'isave'avina i veleni mulieta i miabui bega i na ve 'waidie. We'e tomotoganidi matatabudi vanuga 'eba miava'auta nageneye nuadi i 'ewai, Iesu 'waineye i 'isavalavalalai. 21 Iesu i veifufu 'waidie i vo, Vonanina 'wa nogaiga, tutuyanina a lulu'iawawai 'ana mogitana 'asiau i souyeni.” 22 Tomotoganidi i noganogaya Iesu i subiai fai nuadi i voganidi yana vona 'atumaidi faifaidi wata i vo, Tomogo no'o kebu tulinaga, ta 'asetai Iosefa natuna we'e bani'odi i munega?” 23 Begaidi Iesu i vonedi i vo, A

'asetai bola voke yada vona-awatabai tamu 'wa na voneyeni 'waikuye 'wa na vo, 'Omu to'ive'atumai bega taunimu 'u na 'ive'atumaimu.” Wata 'wa na vo, Naninidi 'eba nuavogana Kafaneomi 'waineye 'u 'idewadiga wata bani'odi yada 'atamana Nasaledi 'waineye 'u na 'idewadi.” <sup>24</sup> Siwe a na vonemi, Yaubada yana tolu'ivonavo taunidi yadi 'atamane yadi tomotoga kebu i da veve'ililibuyediga, fue di i baibaila.

<sup>25</sup> \*Side bani'odi. 'Wa na nuani basenadiotoga Yaubada yana tolu'ivona Ilaitia yana tutuye, malamala 'aitonu wata weta'i 6 nagedie 'wei kebu bega loka bwaikina. <sup>26</sup> Tutuyanina 'waineye me Diu yadi 'wabu'wabulavo fue di nuanuadi 'aivaita, siwe Yaubada kebu Ilaitia i da tauyeni i da 'ivaisedi fai yana 'awalawa 'ana tomotoga i vedumwe'ai'aieni begaidi i vetunei tamu 'wabula 'waidie taunidi kebu Diu i miamia Salefati, 'awalawa Saidoni nageneye. <sup>27</sup> \*Wata bani'odi tamu tolu'ivona 'ana wagava Ilaisa yana tutuye tomotoga wai-waiseselidi fue di yana 'awalawe ye nuanuadi 'aivaita siwe kebu i da 'ivaisedi fai yana 'awalawa 'ana tomotoga i vedumwe'ai'aieni begaidi i nago mali tomotoga taunidi kebu Diu 'waidie, tamu tomogo waiwaiseselina Silia nageneye 'ana wagava Nemani i 'ive'atumaia.”

<sup>28-30</sup> Tomotoga matatabudi i miamiani 'eba miava'auta 'waineye Iesu bonana i nogaidi i 'asetai 'adi vona, taunidi bani'odi tovedumwe'ai'ainidi begaidi ma yadi nuasako Iesu i tovifinini i 'ive'avini i yo'ei i naweni mwalilige. 'Atamananina 'oya tabwaneye bega igodi bwagale i da bifeleni, siwe Iesu bani'odi i munega 'aila'a kamwadiamo i souyeni i nago.

*Tomogo yaiaina i ageiga i ve'atumai.*

<sup>31</sup> Mulieta Iesu Nasalediega i nago 'atamana Kafaneomi 'awalawa Galili nageneye, bei i ve tomotoga 'waidie 'Aiata Veawai 'waineye. <sup>32</sup> Tomotoga fue di nuadi i voganidi yana ve faifaina, fai ma yana veimea i veve 'waidie.

<sup>33-34</sup> \*Eba miava'auta nageneye tamu tomogo yaiaina sakoina i ageiga, bonana bwaikinega i vebwauwau i vo, 'Omu Iesu tomogo Nasaledi, ava'ai 'u na vaima? Voke nu-anuamu 'u na leoma. A 'asetamu, 'omu Yaubada Natuna Magemagetamu.” <sup>35</sup> Iesu yaiaina i talabodeni i vo, 'U ve'wada, tomogo 'wainega 'u 'awa'a'imu.” Yaiaina tomogo i bifeleni i be'u 'aila'a matadie mulieta i 'awa'a'ia siwe kebu wata tomogo veviga i da veluagai yaiainanina 'wainega.

<sup>36</sup> Fue di nuadi i voganidi i velutolitoli i vo, Bani'odi de'e i munega? Vona'ava siwe toketokena wata ma yana veimea

yaiaina i vonevoned i 'a'awa'a'idi.” <sup>37</sup> Iesu valana i vebwaika i nago 'awalawa matatabuna 'waidie Kafaneomi lilivaneye.

*Toviga fuedi Iesu i 'ive'atumaidi.*

<sup>38</sup> Tutuyanina Iesu 'eba miava'auta i 'iaweni i nago Saimoni Fita yana vanuge. Saimoni yana vavine inadi i viga tomogodi i luyauyauta bwaikina bega Iesu 'waineye i velu'ui i na 'ive'atumaidi. <sup>39</sup> Iesu i luku 'adi 'ivi lilivaneye i tovoi 'adi viganina i talabodeni nika yauyautanina i 'awatagoni i tovoi 'ani'ani i 'idewadewa Iesu ma enavo faifaidi.

<sup>40</sup> 'Akonadi inala i simwanuya, yadi 'Aiata Veawai i 'a'ava, tomotoga yadi toviga 'adi viga tulidi tulidi i miedi Iesu 'waineye. 'Aitamogana 'aitamogana i 'abitonovidi 'adi viga i 'a'ava i ve'atumai. <sup>41</sup> \*Wata tomotoga fuedi 'waidiega yaiaina i 'awa'a'idi ma yadi vebwaubwau i vo, Vona mogitana 'omu Yaubada Natuna.” Siwe Iesu i toke i talabodebodedi kebu i na lulu'ivonaga fai 'akonadi i 'asetai taunina Keliso, Yaubada 'ana Venua'ivina.

*Iesu i lau'age 'eba miava'auta 'waidie.*

<sup>42</sup> Bola kebu i da mageta'a'avaiga Iesu 'atamananina 'waineye i miamiaga i 'iaweni 'aiseneye i nago tamu 'awasasa kebu tomotoginaga 'waineye bei i velu'ui. Begaidi tomotoga i lualeni i nago bei i veluagai i talabodebodeni i vo, Kebu 'u na nagoga mali 'awalawa 'waidie, side bei Kafaneomi ta na miamia.” <sup>43</sup> Nika Iesu i vo, 'Atamana 'ifwaidi wata 'waidie a na nago Vala 'Atumaina Yaubada tomotoga i na veimeyemiga faifaina a na lau'age, folovanina faifaina Yaubada i vetuneku.” <sup>44</sup> Bega i nago me Diu yadi 'awalawa matatabuna 'waidie i lau'age-vuvua 'eba miava'auta 'waidie.

## 5

*Iesu yana tovetutuyamavo i goledi.*

<sup>1</sup> Tamu 'aiata 'waineye Iesu i tovoivoi Lavu Galili balebaleye, 'aila'a i maia i vevetunufelagieni nuuanuadi Yaubada yana vona i na nogaya Iesu 'wainega. <sup>2</sup> Iesu toyaubani yadi waka 'ailuga i 'isedi 'akonadi i yo'edi, we'e taunidi i obu yadi vualalalakana i lekolekoadi. <sup>3</sup> Tamu waka 'waineye Iesu i dodoga, wakanina Saimoni yana waka, bega i voneni sai'afo i talalaka malavetayega mulieta Iesu i miabui i ve 'aila'a 'waidie.

<sup>4</sup> \*Yana ve i 'a'avana Saimoni i voneni i vo, Sai'afo malaves-eye 'u na sese bei ma emwavo vualalalakana 'wa na lelegedi igana 'wa na 'onadi.” <sup>5</sup> Nika Saimoni i vo, 'Auvea, lovana 'a vuata i 'asema kebu tamu igana 'a da 'onaiga. Siwe fai 'u vonaga, ta na laka vualalalakana a na lelegedi.” <sup>6</sup> Bega

ma fuedie i laka i lelegedi igana fueotogidi i 'onadi sai'afoga vualalalakana i da bwekadi. <sup>7</sup> Bega ediavo tamu waka 'waineye i lu'waiedi 'aivaita faifaina. I maia waka 'ailugana i veadagidi sai'afoga i da monu.

<sup>8</sup> Tutuyanina Saimoni Fita igana fuedi i 'isedi ma yana ve'ililibu 'agena i vetufano'uyedi i 'odu Iesu 'waineye i vo, 'Auvea, 'u na 'iaweku fai yau tosakona.” <sup>9</sup> Saimoni Fita wata 'ifwaidi tomotoga yana wakeye nuadi i voganidi fai igana fueotogidi i 'onadi. <sup>10</sup> Wata bani'odi enavo tamu waka 'waineye Saimoni taiadi i folofolova nuadi i voganidi, enavonidi 'adi wagava Iemesa wata Ioni, Sebedi natunavo. Iesu Saimoni i voneni i vo, Kebu 'u na kolologa. Basenadi igana 'u 'ona'onadi, we'e yau yaubani tamu a na vemu bega tomotoga 'u na 'ona'onadi 'u na mimaiedi Yaubada 'waineye.” <sup>11</sup> Bega yadi waka i yo'edi 'avale nani matatabuna i 'iawedi Iesu taiadi i nagoi yana tovetutuyamavo.

*Iesu tomogo waiwaiseselina i 'ive'atumaia.*

<sup>12</sup> Tamu tutuya Iesu i miamia tamu 'atamana bwaikina 'waineye, 'atamananina 'waineye tamu tomogo i miamia tomogona matatabuna waiwaiseselina. Tomogonina Iesu i 'iseni i mai ma yana ve'ililibu i lumata'afufu mataneye i velu'ui i vo, 'Auvea, 'ai'edi nuanuamu 'amu fata 'u na 'ive'atumaiku.” <sup>13</sup> Iesu nimana i 'otoi tomogoneye i 'abi i voneni i vo, Fai bani'odi, nuanuaku, 'u ve'atumai.” Nika tomogonina i ve'atumai 'ana viga i 'a'ava. <sup>14</sup> ✧Akonadi tomogo i ve'atumai Iesu i toke i velu'ase'asei i vo, Kebu tamu aitoi 'waineye 'u na lu'ivonaga, nuanuaku tonovimu 'u na nago tovelomu 'waineye nagami i na 'isemu. 'Aisaya 'u na veleni i na kabuni Yaubada 'waineye faifaumu, bani'odi basenadiotoga Mosesa i voneyeniga Yaubada yana Buki 'waineye towaiwaisesela i ve'atumaiga faifaina. Tovelomunina i na 'isemu i na ve'awamogitana 'akonadi 'u ve'atumai, wata bani'odi mali tomotoga i na 'asetai.”

<sup>15</sup> Iesu i talaboda siwe valana i vebwaika-'afo'afo, bega 'aila'a bwaikina i deli i maia yana vona i na nogai wata 'adi viga 'waidiega i 'ive'atumaide. <sup>16</sup> ✧Siwe Iesu yana sauluva tutuya fuedi 'aila'a 'waidiega i nunago tamu 'awasasa kebu tomotoginaga 'waineye, bei 'aiseneye i vevelu'ui Yaubada 'waineye.

*Iesu tamu tomogo bwalobwalokona i 'ive'atumaia.*

<sup>17</sup> Tamu 'aiata 'waineye Iesu i veve tomotoga 'waidie, 'aila'anina 'wainega 'ifwaidi Diu totafalolo 'adi wagava Falisi wata 'ifwaidi ve'etoboda 'adi tovevo. Taunidi i

maia 'atamana fuedi 'waidiega, 'awalawa Galili wata Iudia 'waidiega, wata Ielusalemega, ma fuedie i noganogaya. Yadi miava'autanina nageneye Yaubada yana toketokena i 'eno'eno bega 'wainega Iesu toviga i 'ive'atumaidi. <sup>18</sup> We'e 'ifwaidi tomotoga tamu iadi i vebwalokoga ma 'evo'evona i evai i mieni, nuanuadi i na lukuveni Iesu 'waineye. <sup>19</sup> 'Aila'a bwaikaotogina kebu 'adi fata i na lukuveni, bega i lakaveni vanuga tabwana bababana 'waineye. Vanuga 'ana saila'a i 'ewadi bega 'anibwekaneamo ma 'evo'evona i ve'ioyoi i obu Iesu manawaneye tomotoga 'awasasadio. <sup>20</sup> ✧ Iesu tomotoganidi i 'isedi i 'asetadi ma yadi vetumagana, bega tomogo bwalobwalokona i voneni i vo, Iaku yamu sakona 'akonadi a nuatavunidi.”

<sup>21</sup> We'e ve'etoboda 'adi tovevo wata Falisi nuadiega i vo, Ava'ai tomogoga de'e? Awale Yaubada 'waineye i vona-uvigala? Kebu tamu aitoi 'ana fata sakona i na nuatavunidi, Yaubada 'aiseotogina 'ana fata.” <sup>22</sup> Iesu 'akonadi yadi nuanua i 'asetadi begaidi i vo, Awale nuamiega 'wa vo yau a vona-uvigala Yaubada 'waineye? <sup>23-24</sup> Yau a vetomotogaotoga ma yaku veimea fwayefwayeye bega 'aku fata tomotoga yadi sakona a na nuatavunidi. Tomotoga 'adi 'ive'atumaia vitana fai 'ai'edi a na vona siwe kebu i na ve'atumaiga, 'wa na 'asetai a vekali, kebu ma yaku veimea, a vona-'avo'avovo. Siwe toviga de'e a na 'ive'atumaia 'wa na 'iseni bega 'wa na 'asetai kebu a da vona-'avo'avovo 'aku fata sakona a na nuatavuna.” Bega Iesu tomogo bwalobwalokona i voneni i vo, 'U tovoi, 'amu 'evo'evo 'u evai 'u nago yamu vanuge.” <sup>25</sup> Nika 'aila'a matatabudi matadie tomogonina i tovoi-matayo'o 'ana 'evo'evo i evai ma yana sosoana i tauya, i nunago yana vanuge Yaubada i subisubiai. <sup>26</sup> Tomotoga matatabudi i 'iseni nuadi i voganidi bwaikina wata i kololo begaidi Yaubada i subiai i vo, 'Asiauna nani 'eba nuavogana wata toketokena ta 'iseni.”

*Iesu Livai i venua'ivinini.*

<sup>27</sup> Iesu tomogo bwalobwalokona i 'ive'atumaia, mulieta i nunagoga takesi 'ana tolaugogona 'ana wagava Livai i 'iseni yana 'eba folova 'waineye i miamia. Iesu i voneni i vo, 'U mai taiadi ta na nago yaku tovetutuyama.” <sup>28</sup> Livai i tovoi nani matatabuna i 'iawedi Iesu taiadi i nago.

<sup>29</sup> Mulieta Livainina 'ani'ani bwaikina i 'idewai yana vanuge Iesu faifaina. Matatabudi bei i luku i 'ani'ani, Iesu ma yana tovetutuyamavo, 'ifwaidi takesi 'ana tolaugogona wata tomotoga fuedi. <sup>30</sup> We'e 'ifwaidi Diu totafalolo Falisi, wata 'adi 'aila'avo ve'etoboda 'adi tovevo ma yadi nuasako

tovetutuyamavo 'waidie i vona i vo, Awale tolaugogona viv-inagodi wata tosakona taiadi 'wa 'ani'ani? Kebu 'ana 'isa 'atumainaga.” <sup>31</sup> Iesu i nogai yadi vona, vona-awatabaiega i vonedi i vo, Egavo 'atumaiddi kebu nuanuadi viga 'adi to'ive'atumai, 'aisedi tovinga mogitana. <sup>32</sup> Wata bani'odi, yau a maiga kebu taunidi i awave'atumaiediga faifaiddi, a maiga wata tosakona a na 'ita'ita'iedi.”

*Ve'udigana 'ana 'asete.*

<sup>33</sup> We'e 'ifwaidi Falisi wata ve'etoboda 'adi tovevo Iesu i voneni i vo, Ioni Tobafitaiso yana tovetutuyamavo tutuya fuedi i veve'udigana 'ani bega yadi velu'ui i na vetoketoke Yaubada 'waineye. Wata bani'odi Falisi yadi tovetutuyamavo i veve'udigana we'e 'omu yamu tovetutuyamavo kebu i da ve'udigana, i 'ani'ani wata i yemuyemu. Awale bani'odi i munemunega?” <sup>34</sup> Iesu yadi vona i tutuli taunina faifaina i vona-awatabai i vo, Tonagi yana sosoana 'waineye, kebu tamu aitoi 'ana fata enavo i na talabodedi bega 'ani'ani i na baileni. <sup>35</sup> We'e tamu 'aiata tomotoga 'ifwaidi i na maia tonaginina i na 'ive'avini i na naweni, i lubwainedi ma yadi nuavita i na ve'udigana.”

<sup>36</sup> Wata Iesu i awatalatutula 'waidie yana ve sauluva 'ivauna faifaina wata me Diu yadi sauluva tuatuaina 'adi luwanawana faifaiddi i vo, Kebu i da lubwaineni 'ai'edi aitoi tamu kaleko 'ivauna i na silabu'i bega kalekonina 'wainega tamu kaleko tuatuaina i da bwadia. 'Ai'edi i na bwadi-eniga 'ana 'isa sakoina kebu i da vesala wata kaleko 'ivauna 'akonadi i silabu'i i sako.” <sup>37</sup> Wata bani'odi oine 'ana 'eba iwaga 'aisaya bunudiega faifaina Iesu i vona i vo, 'Ai'edi oine 'ivauna 'eba iwaga tuatuaina 'waineye i na iwagiga i na yuvefuai i na iwaga 'ana ve'amubwadodo fai totolina wata 'eba iwaga 'akonadi i sako. <sup>38</sup> Oine 'ivauna wata 'eba iwaga 'ivauna nika bikabikana i na lubwaineni kebu i na yuvefuai.” <sup>39</sup> Wata Iesu i vo, 'Ai'edi aitoi oine tuatuaina i na yemuyaga, kebu nuanuana 'ivauna i na yemu, i na vo, Tuatuaina a da yemu 'ana lautonova 'atumaillotogina.” De'e bani'odi Iesu i vonaga fai tomotoga fuedi yadi nuanua i vo, Yada sauluva tuatuaiddi 'atumaillotogidi.”

## 6

*Iesu i veifufu 'Aiata Veawai faifaina.*

<sup>1</sup> ✧ Tamu 'Aiata Veawai 'waineye, Iesu ma yana tovetutuyamavo i nunagoi bakula 'waineamo, yana tovetutuyamavo i lase bega vuaga i kadidi i 'ani fai 'akonadi tonibakula i tauyedi. <sup>2</sup> ✧ We'e 'ifwaidi Diu totafalolo Falisi i 'isedi

Iesu i voneni i vo, Awale? Me Diu yada ve'etoboda 'wa geugeuya, vuaga 'wa kadidi bani'odi 'wa folofolova 'Aiata Veawai 'waineye.”<sup>3</sup> ✧ Iesu Falisi yadi vona i tutuli i vo, 'Wa da vo kebu bani'odi Yaubada yana Buki 'wa da lu'iwawaiga, basenadiotoga Kini Devida ma enavo i lase faifaina.<sup>4</sup> I luku vanuga 'eba velu'ui nageneye, beledi tamu Yaubada 'ana 'anivelena tovelomu i veledi ma enavo i 'ani. De'e wata yada ve'etoboda kebu tamu aitoi 'ana fata beledinina i na 'ania tovelomu 'aisedi faifaidi, i 'ania siwe kebu i da sakonaga fai i lase.”<sup>5</sup> Wata Iesu i vo, Yau a vetomotogaotoga 'Aiata Veawai 'ana Toveimea, 'aku fata 'aiatanina 'waineye tomotoga yadi sauluva faifaidi a na veimeyedi.”

*Iesu i 'ive'atumai 'Aiata Veawai 'waineye.*

<sup>6</sup> Tamu 'Aiata Veawai 'waineye Iesu i nago 'eba miava'auta 'waineye bei i ve. 'Eba miava'autanina nageneye tamu tomogo nimana 'ana 'atagiega 'okana i miamia.<sup>7</sup> ✧ We'e 'ifwaidi ve'etoboda 'adi tovevo, wata 'ifwaidi Diu totafalolo Falisi Iesu i vemata'i'i'ieni. 'Ai'edi tamu tomogo i na 'ive'atumaia 'Aiata Veawai 'waineye i na yatoi 'eba vonayavuga 'waineye.<sup>8</sup> Siwe Iesu 'akonadi yadi nuanua i 'asetai begaidi tomogonina nimana 'okana i voneni i vo, 'U tovoi 'u mai 'aila'a matameye bega fuedi i na 'isemu,” nika tomogo i tovoi i nago.<sup>9</sup> ✧ Mulieta Iesu ve'etoboda 'adi tovevo wata Falisi i velutoliedi i vo, 'Wa da nuani yada ve'etoboda 'Aiata Veawai 'waineye 'ada fata tomotoga ta na 'ivaisedi 'alo ta na vesauluva sakoina 'waidie? Wata 'ai'edi sai'afoga tomogo i na wafaga ta na 'ita'ita'ieni 'alo ta na luve'wavu'wavugi?”

<sup>10</sup> Iesu tomotoga 'aitamogana 'aitamogana i 'isadewadi i 'a'avana tomogonina i voneni i vo, Nimamu 'u si'otoi,” nika nimana i si'otoi i ve'atumai.<sup>11</sup> ✧ Ve'etoboda 'adi tovevo wata Falisi kamodi i ogala-'afo'afo, 'aise'avadi i vo, Iesu bani'odi ta da munegi ta da luvewafai?”

*Iesu yana tomata'aulelevo i venua'ivinedi.*

<sup>12</sup> Tomogo nimana 'okana i ve'atumai, mulieta 'aiata 'ifwaidi i 'a'ava, Iesu i laka 'oyeye i na velu'ui. Lo-vana matatabuna i vevelu'ui Yaubada 'waineye i 'aseni.<sup>13</sup> 'Awa'awaie Iesu yana tovetutuyamavo matatabudi i goledi i nagoi 'waineye, 'waidiega 'adi 12 i venua'ivinedi bega i goledi tomata'aulele.<sup>14</sup> ✧ Tomata'aulelenidi side 'adi wagava, Saimoni, i goleni Fita, Anidulu, Saimoni taina, Iemesa ma taina Ioni, Filifi,

✧ 6:3: 1 Sam 21:3-6 ✧ 6:7: Luk 14:1-5 ✧ 6:9: Ion 7:23 ✧ 6:11: Luk 11:53-54 ✧ 6:14: Ion 6:70-71

Batolomiu,

<sup>15</sup> Madiu,

Tomasi,

Iemesa, Alefasi natuna,

Saimoni, toawa'idi'idi kebu nuanuana Loma gabemani i na veimeyedi,

<sup>16</sup> Iudasa, Iemesa natuna,

Iudasa, taunina Iesu 'ana to'etogiluva.

*Iesu i ve wata i 'ive'atumai.*

<sup>17</sup> Mulieta Iesu ma enavo i obuma 'oyayega i tovoi laube'uye, bei yana tovetutuyamavo fue di wata 'aila'a bwaikina i miamiani. Tomotoganidi i maia 'awalawa Iudia matatabuna 'wainega, Ielusalemega i obuma, 'atamana bwaikidi balebaleye Taia wata Saidoni 'waidiega i lukuma. <sup>18</sup> Matatabudi i maia Iesu yana vona i na nogai wata egavo i viga Iesu i na 'ive'atuma idi. Wata tomotoga yaiaina i agediga veviga i veluagai i maia, Iesu i vona yaiaina matatabudi i 'awa'a'idi. <sup>19</sup> \*Tomotoga matatabudi Iesu i 'iseni yana toketokena begaidi nuanuadi i na 'abitonovi bega yana toketokena i na souyeni i na damana 'waidie 'adi viga 'waidiega i na veagiagi.

*Nuavita wata sosoana lamudi.*

<sup>20</sup> \*Iesu i 'isanago yana tovetutuyamavo 'waidie i vonedi i vo,

'Omi 'asiau 'wa vewekowekomaga,

'Eba sosoana 'waimie fai 'akonadi Yaubada i veimeyemi yana 'Aila'a nageneye.

<sup>21</sup> \*Omi 'asiau 'wa laselasega,

'Eba sosoana 'waimie fai Yaubada i na vesauluva-atumaiemi nika 'ami fata.

Wata 'omi 'asiau ma yami nuavita 'wa 'we'we'welaga,

'Eba sosoana 'waimie fai 'awaie 'wa na sosoana wata 'wa na namaga.

<sup>22</sup> \*Tutuyanina yau kumaniku a vetomotogaotoga faifaiku, tomotoga i na vedumwe'ai'aiemi, i na awa'idi'idiemi, i na yagayagaimi wata i na falisakoyemiga,

<sup>23</sup> 'Eba sosoana 'waimie. Tutuyanina vitanidi i na souyediga,

'Eba sosoana 'waimie, ma yami sosoana 'wa na suya, fai 'ami tutula bwaikina Yaubada i yatoi i lulukamata abame.

'Wa na nuani basenadiotoga tovedumwe'ai'ainidi tubudiavo Yaubada yana tolu'ivonavo bani'odi i munegidi bega vita i veluagadi wata 'asiau 'omi 'waimie.

<sup>24</sup> \*We'e 'omi tutuya de'e 'wa 'ai'aiwabuga,



Nuakalikalimi bola yami 'ai'aiwabunidi i na 'a'ava kebu wata 'wa na veluagadi 'wa na nuavita nuami 'wa na 'uvanidi.

<sup>25</sup> We'e 'omi tutuya de'e kamomi i aiaidiga,

Nuakalikalimi bola 'wa na lase 'wa na nuavita nuami 'wa na 'uvanidi.

We'e 'omi tutuya de'e 'wa namaga-'avo'avovoga,

Nuakalikalimi bola 'wa na nuavita 'wa na 'we'wela.

<sup>26</sup> Basenadiotoga tomotoga fue di tolu'ivona-vekavekali i awave'atumaiedi nuanuadi yadi vona. We'e 'omi wata bani'odi, 'ai'edi tomotoga fue di i na awave'atumaie mi nuanuadi yami vona, nuakalikalimi 'wa na nuavita fai vematavu-  
loga 'wa na veluagai yami vekali faifaiddi."

*Egavo i na vesauluva sakoina 'waimie 'wa na nuakalikaliedi.*

<sup>27</sup> ☆Wata Iesu i vo, 'Omi fuemi yaku vona 'wa noganogaiga a na vonemi. Egavo i na vesauluva sakoina 'waimie 'wa na nuakalikaliedi wata egavo i na vedumwe'ai'aiemiga 'wa na vesauluva 'atumaina 'waidie. <sup>28</sup> Egavo i na yagaimiga ma yami nuakalikaliedi vona bikanega 'wa na vonedi wata egavo i na kiavesako 'waimie 'wa na velu'ui faifaiddi bega Yaubada i na 'ivaisedi.

<sup>29</sup> 'Ai'edi tamu tomogo 'ae'aemie i na 'ainikega, wata tamu 'ae'aemi 'wa na 'iyoyoeni i na nikei. We'e 'ai'edi aitoi yami 'eba vesifafa i na 'ewaiga, wata 'ami talauma 'wa na tauyeni kebu 'wa na ve'o'oleni. <sup>30</sup> 'Ai'edi aitoi tamu ava'ai i na velu'uiemiga, kebu 'wa na veumokai. Wata 'ai'edi aitoi tamu yami kukua i na 'ewaiga, 'asa'aiana kebu 'wa na lukwayegeni 'ana vevila faifaina. <sup>31</sup> 'Ai'edi ava'ai nuanuami tomotoga i na 'idewai 'waimie, 'omi wata bani'odi 'wa na 'idewai 'waidie.

<sup>32</sup> 'Ai'edi egavo i nuakalikalie mi wata 'aise'avadi 'wa na nuakalikaliedi, yami nuakalikalini na kebu nani bwaikina Yaubada mataneyeye, fai tomotoga fue di wata tosakona taiadi yadi sauluva egavo 'adi tonuakalikaliedi wata 'aise'avadi i nunuakalikaliedi. <sup>33</sup> ☆Wata 'ai'edi egavo i na vesauluva 'atumaina 'waimie wata 'aise'avadi 'wa na vesauluva 'atumaina 'waidie, kebu nani bwaikina Yaubada mataneyeye fai tomotoga fue di wata tosakona yadi sauluva. <sup>34</sup> Wata 'ai'edi nani 'ifwaidi tomotoga 'wa na veledi siwe nuanuami i na tutulidiga, kebu nani bwaikina Yaubada mataneyeye fai tosakona nani 'ifwaidi mali tosakona i veleveledi bega bola 'ana fata wata bani'odi i na tututula.

<sup>35</sup> Siwe kebu. Egavo i na vesauluva sakoina 'waimie 'wa na nuakalikaliedi wata 'wa na vesauluva 'atumaina 'waidie. 'Wa na 'anivelena-maimaiga kebu tutula faifaina 'wa na nuanua. 'Ai'edi bani'odi 'wa na vevesauluvediga bola tutula bwaikina

'wa na veluagai Yaubada Bwaikaotogina 'wainega wata i na ve'awa-natunemi fai tutuya fueidi tosakona wata taunidi kebu i da vevekaiwa Yaubada 'waineye siwe i vevesauluva 'atumaina 'waidie. <sup>36</sup> ✧ Begaidi side bani'odi. 'Omi 'wa na nuakalikali tomotoga fueidi 'waidie, bani'odi Tamami i nuakalikaliemi.”

*Kebu mali tomotoga 'wa na awavesakoyedi.*

<sup>37</sup> ✧ Wata Iesu i vona 'aila'a 'waidie i vo, Kebu mali tomotoga 'wa na 'amalakibuyedi, i na nunago wata Yaubada i na 'amalakibuyemi. Wata mali tomotoga kebu 'wa na awavesakoyedi i na nunago Yaubada i na awavesakoyemi. Mali tomotoga yadi sakona 'wa na nuatavunidi nika Yaubada yami sakona i na nuatavunidi.

<sup>38</sup> ✧ Tutuya fueidi 'wa na 'a'anivelena-maimaiga nika wata 'anivelena-maimaiga 'wa na veveluagadi. Nuakalikalinidi bwaikaotogidi bani'odi lugalagaladi wata 'udilidi, kebu 'ami fata 'wa na lilidiga fai fueotogidi. 'Ai'edi 'wa na 'anivelena-maimaiga bwaikina, wata 'anivelena-maimaiga bwaikina 'wa na veluagai. Wata bani'odi 'ai'edi 'wa na 'anivelena-maimaiga siaina, wata 'anivelena-maimaiga siaina 'wa na veluagai.”

<sup>39</sup> Wata Iesu i vona-awatabai 'waidie i vo, Kebu 'ana fata tamu tomatasako iana tomatasako i na siveikani, fai bola 'adi 'ailuga i na be'uluga vakavakale. <sup>40</sup> ✧ Kwamana yana 'asete kebu yana tove yana 'asete i da vebwaika-'iaweni, we'e tosikulu matatabudi yadi sikulu i na ve'a'avaga, yadi 'asete bwaikina yadi tove bani'odi.

<sup>41</sup> Awale iamu mataneye fwayafwaya nani siaina 'u 'iseni faifaina 'u vonavona, we'e kebu 'u da nuaniga 'omu 'ibwalobwalo'u bwaikina matamuye? <sup>42</sup> Kebu 'ana nogaya 'atumaina 'u vo, Iaku, nuanuaku matamu i lufwaluyaga a na 'ewai,” we'e kebu 'u da 'iseniga taunimu matamuye 'ibwalobwalo'u bwaikina? 'Omu tovekali. Nagami taunimu matamuyega 'ibwalobwalo'u bwaikina 'u na 'ewai bega 'u na 'isadewa nika 'ana fata fwayafwaya nani siaina 'u na 'ewai iamu matanega.”

*Sauluva ma 'ana 'eba 'isa.*

<sup>43</sup> Wata Iesu i vonedi i vo, Welavi 'atumaina tutuya fueidi vuagina 'atumaina, wata welavi sakoina tutuya fueidi vuagina sakoina. <sup>44</sup> Welavi 'aitamogana 'aitamogana vuagidiega ta na 'asetadi ava'ai welaviga. Kebu 'ana fata 'ala'ai vuagina ta na kadia 'uwe 'wainega. Wata kebu 'ana fata kalibo ta na kadia ulaulawa 'wainega. <sup>45</sup> ✧ Wata bani'odi tomotoga,

vuagidi 'waidiega ta na 'isa'inaanadi tomotoga 'atumaidi 'alo sakoidi. 'Ai'edi tomogo yana sauluva 'atumaidi, ta na 'asetai yana nuanua matatabuna tonovidi. We'e 'ai'edi yana sauluva sakoidi ta na 'asetai yana nuanua matatabuna sakoidi. Tomogo ava'ai i na voneyeniga, fai yana nuanua 'wainega i mai."

*To'aiyogona vanuga 'adi 'ailuga.*

<sup>46</sup> ✧ Wata Iesu i vona 'aila'a 'waidie i vo, Awale 'wa ve'awa-'Auvea 'waikuye we'e kebu yaku vona 'wa da veve-matayakeyakediga? <sup>47</sup> ✧ 'Ai'edi aitoi i na mai 'waikuye yaku vona i na nogaidi bega i na 'idewadi, taunina yana sauluva side bani'odi. <sup>48</sup> To'aiyogona 'atumaina nagami yana kabutu'u 'atumaina i venuma'ivinini, 'ogola fa'alidi i 'ewadi wata ovu manamanawedi i aladi bega yana vanuga matatabuna i yogoni. Tutuyanina 'wei i 'wei, weyagata i obu, yana 'atamana i sesei vanuganina kebu i da 'etofoiaga fai vanuga fa'alina i yogoni. <sup>49</sup> We'e 'ai'edi aitoi yaku vona i na nogaidi siwe kebu i na 'idewadiga, taunina tamu to'aiyogona bani'odi. To'aiyogonanina kabutu'u sakoina i venuma'ivinini nidule i 'aiyogona. Tutuyanina weyagata i obu vanuga i 'etofoiaga matatabuna i 'etogeugeuya."

## 7

*Tolugavia tamu yana tofolova Iesu i 'ive'atumaia.*

<sup>1</sup> Tutuyanina Iesu naninidi matatabuna i veifufu'a'avedi 'aila'a 'waidie, i tovoi i nago 'atamana Kafaneomi. <sup>2-3</sup> 'Atamananina 'waineye tamu me Loma yadi tolugavia bwaikina i miamia ma yana tofolova-maimaiga. Tofolovanina i viga bwaikina, sai'afoga i da wafa. Fai tolugavianina yana tofolova i nuakalikalieni bwaikina, tutuyanina i nogai Iesu valana 'ifwaidi Diu yadi to'edakumetavo 'au'auveadi i vetunedi Iesu i na voneni i na mai yana tofolova i na 'ive'atumaia. <sup>4-5</sup> Tutuyanina i le'wai i voneni i vo, Nuanuama bwaikina ta na nagoi iama 'u na 'ivaiseni. I lubwaineni tomogonina 'u na 'ivaiseni fai 'ida me Diu i nuakalikalieda wata taunina yama 'eba miava'auta de'e bei Kafaneomi i yogoni." <sup>6-7</sup> Iesu yadi vona i nogai taiadi i nagoi.

Sai'afu i le'wale'wai vanuga lilivaneye, tolugavianina enavo 'ifwaidi i vetunedi Iesu i voneni i vo, 'Auvea, yama toveimea i vonaga kebu taunimu yamu folova 'u na 'ivevitaiga. Yana nuanua kebu i da lubwainemu 'u na luku yana vanuge fai taunina kebu tomogo Diu, wata i bunumayaga kebu nuanuana i na mai 'waimuye. Bega

yana vona 'ana nogaya side bani'odi i vo, 'Asa'aiana, 'u na vonamo yaku tofolova i na ve'atumai. <sup>8</sup> A 'asetai ma yamu veimea bega 'amu fata 'u na 'ive'atumaia. Yau wata ma yaku veimea yaku tolugavia 'waidie 'aku fata a na vo, 'U nago," nika i na nago, wata a na vo, 'U mai," nika i na mai, wata yaku tofolova a na voneni a na vo, Side 'u 'idewai," nika i na 'idewai. Wata yau bani'odi, yaku to'edakumetavo yadi veimea a vevematayakeyakedi. 'Omu wata ma yamu veimea 'u na vonamo nika viga i na 'a'ava." <sup>9</sup> Tutuyanina Iesu i nogai yana vonanina, nuana i vogani bega i sivilai 'aila'anidi i yoyogo'wailiga i vonedi i vo, De'e Loma 'ana tomotoga siwe yana vetumagana kasikasisina, we'e 'omi me Diu Yaubada yana tomotoga, siwe kebu bani'odi vetumagananina a da veluagai 'waimie 'alo mali tomotoga 'waidie." <sup>10</sup> ✨I 'a'avana, tomotoganidi i vetunedi i maiaga i viladi tolugavia 'waineye, yana tofolova i 'iseni 'akonadi i ve'atumai.

*'Wabula natudi Iesu i sivetovoia.*

<sup>11</sup> Bola kebu 'aiata fueidi i da 'a'avaga, Iesu i nago 'atamana Neini yana tovetutuyamavo wata 'aila'a bwaikina taiadi. <sup>12</sup> 'Atamananina kalikalina bega tutuyanina Iesu i le'wa 'ana 'eba luku 'waineye i 'isedi tomotoga 'ifwaidi iadi i wafaga i evai i nunaweni taumaseye. Tomogonina i wafaga tamu 'wabula natudi tubu'eana iavetana, wata tovemogai fueidi taiadi i nunagoi. <sup>13</sup> ✨Tutuyanina Iesu i 'isedi i nuavita bwaikina i vonedi i vo, Kebu 'wa na 'we'welaga." <sup>14</sup> Bega Iesu i nago 'evo'evo i 'abitonovi nika toeva i tovoi. Iesu i vona tomogonina i wafaga 'waineye i vo, Iaku, a na vonemu, 'u tovoi." <sup>15</sup> ✨Tomogonina i 'isala i miabui nika i velamu i welava. Wata Iesu tomogonina inana i vonedi i vo, Side natumi 'akonadi i yawasa."

<sup>16</sup> Fueidi i 'iseni ma yadi kololo bwaikina Yaubada i subiai i vo, Tolu'ivona bwaikaotogina tamu i souyeni 'waideye," we'e 'ifwaidi i vo, Yaubada i mai yana tomotoga i na 'ita'ita'ieda." <sup>17</sup> Naninina Iesu i 'idewaiga, valana i nago 'awalawa Iudia matatabuna 'waineye, wata mali tomotoga i miamia lilivan-eye i 'aseti.

*Ioni tomotoga 'ifwaidi i vetunedi Iesu 'waineye.*

<sup>18</sup> Wata Ioni Tobafitaiso yana tovetutuyamavo i lu'ivona 'waineye naninidi Iesu i 'idewadewadiga faifaidi. <sup>19</sup> Begaidi Ioni tomotoga 'adi 'ailuga i goledi i nagoi 'waineye i vonedi i vo, 'Wa na nagoi yada 'Auvea 'waineye 'wa na velutolieni 'wa na vo, 'Omu kumanimu faifaimu me Diu ta lulukamata ta vo, 'Awaie 'ada To'ita'ita'i i na mai Yaubada 'wainega,"

'alo tulina faifaina ta na lulukamata?" 20 Tutuyanina i maia Iesu 'waineye i velutolieni i vo, Ioni Tobafitaiso i vetunema nuanuana i na 'asetai 'omu kumanimu faifaimu me Diu ta lulukamata ta vo, 'Awaie 'ada To'ita'ita'i i na mai Yaubada 'wainega, 'alo tulina faifaina ta na lulukamata?" 21 Tutuyanina 'waineye Iesu tovinga fueidi i 'i'ive'atumaidi, tomotoganidi yaiaina i agediga i vonevonedidi i 'a'awa'a'idi wata tomatasako fueidi i 'i'ive'atumaidi. 22 ✨Begaidi Iesu i vona Ioni yana tovetutuyamavo 'waidie i vo, 'Wa na vilami 'wa na nagoi Ioni 'waineye, ava'ai a 'i'idewadi 'wa 'isediga wata a veveifufuyedi 'wa nogaidiga faifaiddi 'wa na voneni. Side bani'odi 'wa na voneyedi 'wa na vo, Tomatasako i 'isadewa, tubusakosako i tubuoga, waiwaisesela i ve'atumai. Tanigadi 'uludi 'adi fata i na nogaya, towafa a sivetovoidi wafayega, wata Vala 'Atumaina 'ita'ita'i Yaubada 'wainega faifaina a lalau'age wekówekoma 'waidie." 23 Wata 'wa na voneni 'wa na vo, 'Ai'edi aitoi kebu ma yana venuanaluga i na vetumaganamo 'waikuye, 'eba sosoana 'waineye."

*Iesu i veifufu Ioni Tobafitaiso faifaina.*

24 Ioni yana tovetutuyamavo i tauya i nunagoi, Iesu 'aila'a 'waidie i veifufu Ioni faifaina i vo, Basenadi 'wa nagoi sali'avu'avuye Ioni 'waineye, ava'ai nuanuami 'wa da 'iseni? Tamu tomogo umaumana yana sauluva bikana bani'odi 'ayalele kaukau siaina i nunuga i 'anino'uya? Kebu. 25 'Alo ava'ai 'wa da 'iseni? Tamu tomogo i vaigavu kaleko 'atumaidiega? Wata kebu. Tomotoganidi i vaigavuga bani'odi, yadi vanuga 'ai'aiwabudi 'waidie i miamiani. 26 Nuanuaku a na 'asetai 'wa nagoga ava'ai 'wa da 'iseni? Tamu Yaubada yana tolu'ivona? E'e. Mogitana tolu'ivona. Siwe 'ifwaidi tolu'ivona sai'afo va'egai, we'e tomogonina 'wa 'iseniga bwaikaotogina. 27 ✨Vona mogitana tomogo bwaikina fai basenadiotoga faifaina i kilumi Yaubada yana Buki 'waineye. Yaubada i vona 'ana Venua'ivina 'waineye i vo, Taunina yaku tomata'aulele, a na vetunei i na kumeta yamu 'eda i na vusia."

28 Wata a na vonemi, tomia fwayafwaya matatabudi sai'afo va'egai, we'e Ioninina bwaikaotogina. Siwe tomotoga bwaikidi wata siaidi 'akonadi i lukuga Yaubada yana 'Eba Veimea nageneye i vagalaka, Ioni ma'itufa i obu fai bola kebu i da lukuga."

29 ✨Tutuyanina 'aila'a wata takesi 'ana tolaugogona vivinagodi taiadi yana vona i nogai, i ve'awamogitana Yaubada yana nuanua tonovidi fai Ioni i bafitaisodi. 30 We'e Falisi

wata ve'etoboda 'adi tovevo Yaubada yana nuanua faifaidi i vedumwe'ai'ai fai kebu nuanuadi Ioni i na bafitaisodi.

<sup>31</sup> Begaidi Iesu i vonedi i vo, Tutuya de'e 'ana tomotoga, ava'ai 'wainega a na awatalatutulemi? Yami sauluva ava'ai bani'odi? <sup>32</sup> Tomotoganimi bani'odi yavayavava to'wava nuanuadi i na vetutuyama 'atamanafouye. Tamu 'aila'a i vegole ediavo 'waidie i vo, Nuanuama tamu nani ta na 'idewai siwe 'wa baila. 'A lauina siwe kebu 'wa da suya, 'a tailauwawa siwe kebu 'wa da vemogai. Kebu nuanuami yama nuanua 'wa na fali'atumaiedi.” <sup>33</sup> 'Omi yavayavavanidi bani'odi, kebu nuanuami Ioni Tobafitaiso wata yau yama nuanua 'wa na fali'atumaiedi. Ioni i mai i ve'udigana 'ani bega yana velu'ui Yaubada 'waineye i na vetoketoke wata kebu oine i da yemuga, 'wa vona 'wa vo, Tomogo no'o, yaiaina i agei.” <sup>34</sup> ✨We'e yau a vetomotogaotoga a mai kebu a da ve'udiganaga, a 'ani'ani wata a yemuyemu siwe 'wa vo, 'Wa 'iseni, tomogo no'o. 'Awana bwalabwalaina, yana 'ani wata oine yana yemu 'afoina, takesi 'ana tolaugogona vivinagodi wata tovedumwe'ai'ai i veianedi.” <sup>35</sup> Egavo Yaubada yana nuanua 'ase'asetadi i vevematayakeyakedi, i nuani Yaubada ma yana 'asetamogitana.”

*Tamu vavine Iesu 'agena i lekoai bunamayega.*

<sup>36</sup> Tamu tutuya tamu totafalolo Falisi 'ana wagava Saimoni Iesu i tayegi yana vanuge i na 'ani, bega i nago i miabui. <sup>37</sup> 'Atamananina 'waineye tamu vavine yana sauluva sakoina yana matakamota 'afoina. Vala i nogai Iesu i mai Saimoni yana vanuge begaidi bunama magaina 'atumaina i 'ewai i nago i luku vanuganina 'waineye. We'e bei i koiaga kileu i 'idewai 'ana 'isa 'atumaotogina, 'ana wagava alibasita. <sup>38</sup> I nago Iesu lilivaneye i 'we'wela matageunega 'agena i vebutadi mulieta nava'aunega i luvelavelaladi. Wata ma yana ve'ililibu 'agena i yaogi, i 'a'avana bunamanina 'wainega i iwagi.

<sup>39</sup> Tutuyanina Saimoninina i 'iseni nuanega i vo, Kumanina Iesu, 'ai'edi mogitana Yaubada yana tolu'ivona 'ana fata i da 'asetai ava'ai vavinega i 'a'abitonovi wata i da 'asetai yana sauluva sakoina.” <sup>40</sup> Iesu i voneni i vo, Saimoni, nuanuaku tamu nani a na vonemu.” Saimoni i vo, Tove, nika 'u veifufu ta na nogai.” <sup>41</sup> Iesu i vo, Tamu tomogo 'ai'aiwabuna tomotoga 'adi 'ailuga mani i veledi, bola wata i na tutulidi. Tamu tomogo i veleniga lubulubu 500 wata tamu lubulubu 50. <sup>42</sup> Siwe 'adi 'ailuga kebu 'adi fata i na tutulidi bega i talabodedi i vo, 'Asa'aiadi, kebu 'wa na tutulidiga.” Tomotoganidi 'adi 'ailuga ma yadi sosoana i nuakalikalieni, siwe 'u na voneku

aitoi tomotogaga yana nuakalikali bwaikaotogina tomogo 'ai'aiwabuna 'waineye?" <sup>43</sup> Saimoni Iesu yana vona i tutuli i vo, A nuaniga tomogonina lubulubu 500 i 'ewaiga, kumanina i nuakalikali bwaikaotogina." Iesu i vo, 'U vona mogitana."

<sup>44</sup> ✧Mulieta i sivilai vavine 'waineye nika Saimoni i voneni i vo, 'Akonadi 'u 'iseni vavine de'e. We'e 'omu yamu vanuge a maiga, kebu ufa 'u da veleku bega 'ageku a da lekoadi yada sauluva bani'odi, siwe vavine de'e matage-unega 'ageku i lekoadi wata nava'aunega i luvelavelaladi. <sup>45</sup> Tutuyanina a le'wa kebu ma yamu sosoana 'u da 'avalamaigiku, siwe taunina 'ageku 'ana yaoga kebu i da 'ailove. <sup>46</sup> Kebu 'u da ve'ililibuyeku bega bunama 'u da iwagi 'unu'unukuye siwe taunina bunama magaina 'atumaina 'agekuye i iwaga'a'aveni. <sup>47</sup> Faifainanina a na vonemu, vavine de'e yana sakona fue di faifaidi nuatavuna i velu-agai, 'u 'iseni yana nuakalikali bwaikina 'waikuye. Aittoi yana sakona siaidi Yaubada i nuatavunidiga tomogonina yana nuakalikali Yaubada 'waineye siaina, we'e aittoi yana sakona fue di Yaubada i nuatavunidiga, tomogonina yana nuakalikali Yaubada 'waineye bwaikina." <sup>48</sup> ✧Mulieta Iesu vavine i voneni i vo, Yamu sakona a nuatavunidi." <sup>49</sup> 'Ifwaidi tomotoga 'eba 'ani 'waineye i miamianiga, nuadiega i vo, Ava'ai tomogoga de'e sakona i nunuatavunidi?" <sup>50</sup> Siwe Iesu i vona vavine 'waineye i vo, Fai 'u vetumaganeku Yaubada i 'ita'ita'iemu. Ma yamu sosoana 'u na nago, Yaubada i na nuakalikaliemu."

## 8

### *Vevine Iesu i 'weabuya.*

<sup>1</sup> ✧'Aiata 'ifwaidi i 'a'ava, mulieta Iesu i tovoi ma yana tovetutuyamavo 12 taiadi i nagoi 'atamana siaidi wata bwaikidi 'waidie, Vala 'Atumaina i lu'ageyeni Yaubada nuanuana tomotoga i na veimeyedaga faifaina. <sup>2-3</sup> Wata 'ifwaidi vevine taiadi i nagoi bega Iesu ma enavo i na 'i'ivaisedi wata 'adi'adi i na kimwakimwane taunidi yadi mani 'waidiega. Vevinenidi 'ifwaidi basenadi Iesu 'adi viga i 'ive'atumaidi wata 'ifwaidi yaiaina i agediga Iesu i vona i 'awa'a'idi. Vevinenidi 'waidiega side kumanidiavo, Meli, 'atamana Magidala 'wainega basenadi Iesu i vona yaiaina 7 i 'awa'a'idi 'wainega, Tusa yana vavine Ioana, tomogonina Kini Elodi yana vanuga 'ana to'isave'avina, wata Susana.

### *Luyavuyavulagi 'ana vona-awatabai.*

<sup>4</sup> Tamu 'aiata tomotoga fue di i deli i maia Iesu 'waineye 'atamana fue di 'waidiega. Begaidi Iesu vona-awatabaiega

i ve 'aila'a 'waidie i vo, Side bani'odi. <sup>5</sup> Tamu tomogo i nago bakule yana witi\* waifeidi i na bakulidi, we'e yadi sauluva luyavuyavulagi. Yana luyavuyavulagi 'waineye witi 'ifwaidi i ve'anita'idi 'eda balebaleye tomotoga yadi 'eba nago 'waineye i badi mulieta manuga i mai i 'anidi. <sup>6</sup> 'Ifwaidi i ve'anita'idi bwakebwakeye, tutuyanina i tabo fai fwayafwaya siaina i lala-matayo'o i 'awagi'adi. <sup>7</sup> 'Ifwaidi i ve'anita'idi 'awanavenaveye kebu 'adi 'oiga, i ugawegawedi kebu vuagidiga. <sup>8</sup> We'e 'ifwaidi i ve'anita'idi inageye fwayafwaya 'atumaina 'waineye i tabo i vuaga, 'aitamogana 'aitamogana vuagina 100." Wata Iesu i vonedi i vo, 'Akonadi yaku vona 'wa nogai, siwe 'wa na vena'ivina nika 'wa na 'asetai."

*Vona-awatabai lamuna.*

<sup>9</sup> Mulieta Iesu yana tovetutuyamavo i velutolieni i vo, Nuanuama yamu vona-awatabainina 'u da kiavemagetai 'waimeye." <sup>10</sup> \*Iesu i vonedi i vo, 'Akonadi Yaubada i tauyemi nani fuedi givagivadi 'wa na 'asetadi yana veimea tomotoga 'waidie faifaina. Siwe tomotoga 'ifwaidi 'asetai i na 'ewai vona-awatabaiega. Tomotoganidi i na 'isa'isa siwe kebu i na 'isa'inanaiga, wata i na noganogai siwe kebu i na 'asetaiiga begaidi a veve 'waidie vona-awatabai 'waidiega."

*Vona-awatabai Iesu i kiavemagetai.*

<sup>11</sup> \*Wata Iesu i vonedi i vo, Yaku vona-awatabainina 'ana 'asetai side bani'odi. Waifei, bani'odi Yaubada yana Vona. <sup>12</sup> Waifei i ve'anita'idi 'eda balebaleye 'ana nuanua, bani'odi tomotoga Yaubada yana Vona i nogai siwe Seitani i mai vonanina i elodi begaidi kebu 'adi fata i na vetumagana 'alo 'ita'ita'i i na veluagai. <sup>13</sup> Waifei i ve'anita'idi bwakebwakeye 'ana nuanua, bani'odi tomotoga ma yadi sosoana Yaubada yana Vona i nogai siwe yadi nuanua 'waidie kebu mogitana i da lukuga. I vetumagana siwe tutuya 'ale'usana. Tutuyanina 'eba sailubu i na veluagai i na baileni. <sup>14</sup> \*Waifei i ve'anita'idi gaweye 'ana nuanua, bani'odi tomotoga Yaubada yana Vona i nogai siwe yadi nuanua bwaikina 'ai'aiwabu wata fwayafwaya 'ana sosoana. Yadi kukuanidi wata yadi mia faifaidi i vevenuafouviga 'wa da vo i da ugawegawedi vuagidi kebu i da kumaga. <sup>15</sup> \*We'e waifei i ve'anita'idi inageye fwayafwaya 'atumaina 'waineye 'ana nuanua, bani'odi todumwebika 'atumaidi Yaubada yana Vona i nogai i 'ewai bega i tokemaiga i nagoga yadi folova Yaubada faifaina bani'odi i vuaga."

\* 8:5: 'Ana 'isa'isa bani'odi laisi.    \* 8:10: Luk 10:21    \* 8:11: 1 Fit 1:23

\* 8:14: Luk 18:18,22-24    \* 8:15: Ion 6:28-29; Iem 1:22



*Mageta 'aivoe dibuneye.*

<sup>16</sup> Wata Iesu i vonedi i vo, Kebu tamu aitoi mageta i da kabukabunina 'aivoeyega i da tatalafwaseni 'alo talalia dibuneye i da yatoyatoi. Mogitana mageta 'ana 'eba yato 'waineye i lulutalauleni bega tomotoga i na mimaiia vanuganina 'waineye i magemagesedi. <sup>17</sup> Wata de'e bani'odi ava'ai tomotoga i na givediga Yaubada i na sivemagesedi wata ava'ai i na nuagivediga Yaubada i na lu'ivoneyedi i na vemageta. <sup>18</sup> ✧ Begaidi 'wa na nogayadewadewa. 'Ai'edi aitoi sai'afoma yana 'aseta bega 'asetanina i na 'i'isave'aviniga, 'imoso'i Yaubada i na veleni we'e aitoi kebu tamu yana 'asetaga siwe igodi i vo, Yau yaku 'aseta bwaikina," 'asetanina Yaubada i na eloi."

*Iesu tainavo inadi taiadi i nagoi 'waineye.*

<sup>19</sup> Iesu tainavo ma inadi i maiia igodi i da luku Iesu 'waineye nika 'aila'a bwaikina. <sup>20</sup> Tamu tomogo Iesu i voneni i vo, Inamu wata taimwavo tanotanoge i lulualemu." <sup>21</sup> ✧ Iesu 'aila'a i vonedi i vo, Egavo Yaubada yana Vona i nogai wata i vevematayakeyakeniga taunidi mogitana inakwavo wata taikwavo."

*Iesu yagina i 'iveniwalovi.*

<sup>22</sup> Tamu 'aiata Iesu ma yana tovetutuyamavo i dodoga wakeye i vonedi i vo, Ta na damana no'o bega lavu vi'ainega," nika i tauya. <sup>23</sup> Tutuyanina i damadamana Iesu i 'enomataiva nika yagi'oya bwaikina i nunuga yagina bwaikina waka i ludododogi sai'afoga i da veadagi wata i da monu. <sup>24</sup> Begaidi tovetutuyamavo i maiia Iesu 'waineye i luvagoni i vo, 'Auvea, 'Auvea, sai'afoga ta na wafa." Iesu i tovoi kaukau wata yagina bwaikidi i talabodedi nika i 'awatagoni wata i niwalova bwaikina. <sup>25</sup> ✧ Mulieta yana tovetutuyamavo i vonedi i vo, Awale 'omi kebu 'wa da vetumaganekuga 'aku fata a na 'ita'ita'iemi?" Siwe nuadi i voganidi wata i kololo 'aise'avadi i veifufu i vo, Ava'ai tomogoga de'e? Kaukau wata yagina i talabodedi i vematayakayaka."

*Tomogo yaiaina i ageiga Iesu i 'ive'atumaia.*

<sup>26</sup> Iesu ma enavo i damana lavu vi'ainega 'awalawa Gegesa, 'ada fata 'atamana Galili 'wainega ta na 'isadamana 'awalawanina 'waineye. <sup>27</sup> Tutuyanina i obu 'avale tamu tomogo yaiaina i ageiga i veluagai, i maiga 'atamana 'wainega. Basenadiotoga yana vanuga i baileni, konekonena i miamia taumaseye. <sup>28-29</sup> ✧ Tutuya fuedi tomotoga nimana wata

✧ **8:18:** Mad 25:20-29 ✧ **8:21:** Luk 11:27-28; Ion 1:11-13 ✧ **8:25:** Mak 9:20-24 ✧ **8:28-29:** Luk 4:34

'agena i 'liyogoyogonidi bulava kainumu 'waidiega siwe yaiaina i kikiavetoketokei bega i dabadabadi wata i nunaweni wala'aie. Tutuyanina i 'iseni Iesu, i bwau ma yana ve'ililibu i be'u mataneyeye. Iesu yaiaina tomogo nageneye i voneni i vo, 'U 'awa'a'imu 'omu yaiaina sakoimu.” Tomogonina bonana bwaikinega Iesu i voneni i vo, Iesu, Yaubada Tabwaotogineye Natuna, ava'ai 'u na vaiku? A velu'ui 'waimuye kebu nuanuaku 'u na luvematavulogiku.”<sup>30</sup> Iesu i velutolieni i vo, Aitoi 'amu wagava?” Tomogo i vo, 'Aku wagava 'Aila'a.” De'e bani'odi i voneyediga fai yaiaina fuedi tomogonina i agei.<sup>31</sup> Yaiaina i toke i velu'ui-vaivaitugana i vo, Kebu nuanuama 'u na tawema 'a na obu Vatu'ai Manamanawena yaiaina yama 'eba mia 'waineye.”

<sup>32</sup> Fatala bwaikina bawe 'oya lilivaneye i luluduaduala, begaidi yaiaidanidi i velu'ui-vaitugana Iesu 'waineye i vo, 'U da tauyema bawenidi 'a da agedi,” nika Iesu i tauyedi.<sup>33</sup> Yaiaina i 'awa'a'idi tomogo 'wainega i nagoi bawe i agedi matatabudi i ve'ililide 'oyeamo i obu, i sou lavuye i ve'alamonumu.

<sup>34</sup> Tomotoganidi bawe i 'isave'avinidiga i 'iseni yadi bawevo i ve'alawafawafa, begaidi i lilide i nagoi i lu'ivona 'atamana wata kweda 'waidie.<sup>35</sup> Fuedi yadi veifufu i nogai bega i nagoi i na 'iseni. I maia Iesu 'waineye tomogonina basenadi yaiaina i ageiga siwe 'akonadi i 'awa'a'idi i 'iseni nuana tonovidi wata i ve'wesena i miabui Iesu 'ageneye i miamia. Tutuyanina Iesu yana toketokena i 'asetai i kololo bwaikina.<sup>36</sup> Bawe 'adi to'isave'avinavo i lu'ivona 'waidie bani'odi i munega tomogo i ve'atumai.<sup>37</sup> Begaidi tomotoga matatabudi 'awalawa Gegesa 'waineye Iesu i voneni nuanuadi i na 'iawedi fai i kololo-'afo'afo. Bega Iesu i dodoga wakeye i na tauya.

<sup>38-39</sup> Tomogonina i ve'atumaiga i mai Iesu i voneni i vo, Yau nuanuaku taiadi ta na nago.” Siwe Iesu i talabodeni i voneni i vo, 'U na vilamu 'u na nago yamu vanuge 'u na lu'ivona tomotoga fuedi 'waidie ava'ai Yaubada i 'idewaiga 'waimuye faifaina.” Bega tomogo i nago 'atamana bwaikina 'ana tomia matatabudi 'waidie i veifufu Iesu i 'ive'atumaiga faifaina.

*Yailo natuna wata vavine tamu Iesu i 'ive'atumaidi.*

<sup>40</sup> Iesu ma enavo i vila-vaituganidi i damanama de'e bega lavu lilivaneye 'aila'a i veluagadi i lulukamasedi.<sup>41-42</sup> I obu 'avale nika me Diu yadi 'eba miava'auta 'ana to'edakumeta tamu i veluagai 'ana wagava Yailo. Ma yana ve'ililibu i be'u Iesu mataneyeye i voneni i vo, Nuanuaku ta na nago yaku vanuge natuku vevinena sai'afoga yawaina i na 'a'ava 'u na 'ivaiseni. Natukunina tubu'eana yaku tamogana, 'ana malamala 12.”

Bega Iesu taiadi i nago wata 'aila'a bwaikina i vevetunufelagieni nuanuadi Iesu taiadi i na nago. <sup>43</sup> 'Aila'anina nageneye tamu vavine, vevine 'adi viga i 'ewadi, malamala 12 nagedie kebu i da 'a'ailove viganina i 'eno'eno. Fu'eyega yadi kukua matatabuna i sigoidi siwe kebu tamu aitoi 'ana fata i na 'ivaisedi. <sup>44</sup> Taunidi i mai Iesu mulineye, 'ana kaleko mataifwana i 'abitonovi nika 'adi viga i 'a'ava. <sup>45</sup> Iesu 'aila'a i velutoliedi i vo, Aitoi i 'abitonoviku?" Matatabudi i ve'ewa we'e Fita i vo, 'Avea awale bani'odi 'u velutoliedi? 'U 'iseni, 'aila'a bwaikina i sififinemu." <sup>46</sup> ✠Wata Iesu i vo, A 'asetai tamu tomotoga nuanuana yau begaidi i 'abitonoviku, fai 'aku vebae 'wainega a 'asetai yaku toketokena i damana to'abitonovanina 'waineye."

<sup>47</sup> Vavinenidi i nuani 'akonadi Iesu i 'asetadi begaidi i kololo, ma yadi tatava wata ma yadi ve'ililibu i be'u Iesu 'ageneye. Bei 'aila'a matadie i lu'ivona Iesu 'waineye ava'ai faifaina i 'abitonovi wata bani'odi i munega i ve'atumai-matayo'o. <sup>48</sup> Iesu i vonedi i vo, Natuku, yami vetumagana 'waikuye i 'ive'atumaimi. Ma yami sosoana 'wa na nago, Yaubada i na nuakalikiemi."

<sup>49</sup> Tutuyanina Iesu i veveifufu, tamu tomogo i mai Yailo yana vanuga 'wainega Yailo i voneni i vo, Natumu 'akonadi yana 'i'ituva i 'alasaweni. Kebu wata Tove 'u na vevekadia." <sup>50</sup> Siwe Iesu i nogaiga Yailo i voneni i vo, Kebu nuafoumu i na veviga, 'u na vetumaganamo 'waikuye natumu i na ve'atumai."

<sup>51</sup> I nagoi, tutuyanina i le'wai vanuge fueidi i talabodedi kebu i na lukuga, we'e Fita, Ioni, Iemesa, wata kwamana inana tamana taiadi i luku. <sup>52</sup> Fueidi vanuga nageneye i veve-mogai kwamananina faifaina siwe Iesu i vonedi i vo, Kebu 'wa na vemogaiga, kwamana kebu i da wafaga i 'eno'eno." <sup>53</sup> Matatabudi Iesu i sidibidibieni wata i namageni fai i 'asetai kwamana mogitana i wafa. <sup>54</sup> Siwe Iesu kwamana nimaneye i 'abi bonana bwaikinega i vo, Kwamana, 'u tovoi." <sup>55</sup> Nika kwamana i yawasa i tovoi wata Iesu i vo, 'Ani'ani 'wa na veleni i na 'ani." <sup>56</sup> ✠Kwamananina inana wata tamana nuadi i voganidi siwe Iesu i vonedi i vo, Kebu tamu aitoi 'waineye 'wa na lulu'ivonaga."

## 9

### *Iesu yana tovetutuyamavo 12 i vetunedi.*

1 Tamu tutuya Iesu yana tovetutuyamavo 12 i goledi i nagoi 'waineye veimea wata yana toketokena i veledi bega toviga i na 'ive'atumaidi wata yaiaina i na vonedi i na 'awa'a'idi. <sup>2</sup> Mulieta i vetunedi i na lau'age 'atamana fueidi

'waidie Yaubada yana veimea tomotoga 'waidie faifaina, wata tovinga i na 'ive'atumaidi. <sup>3</sup> \*Siwe wata i velu'ase'asedi i vo, 'Wa na nunagoiga kebu venuana 'wa na 'ewaga, wata wautogana kebu, 'ani'ani kebu, mani kebu 'alo wata tamu kaleko vunavunagina. <sup>4</sup> 'Ai'edi aitoi i na vonemi 'wa na luku yana vanuge bei 'wa na miamia mulieta yami folova i na 'a'ava 'atamananina 'waineye, vanuganina 'wa na 'iaweni. <sup>5</sup> Wata 'ai'edi ava'ai 'atamanaga 'ana tomotoga i na vedumwe'ubu'ubusemi wata yami vona kebu i na nogaidiga, 'wa na 'iawedi 'wa na nagoi wata 'agemiega fwayafwaya 'wa na lubutubutuya yadi 'eba 'isa bola bei wata kebu 'wa na lalau'age wata bola vematavuloga i na veluagai Yaubada 'wainega.” <sup>6</sup> Mulieta tovetutuyamavo i tauya i nagoi 'atamana fuedi 'waidie i lalau'age Vala 'Atumaina faifaina wata tomotoga i 'ive'atumaidi.

*Kini Elodi nuana i vogani Iesu faifaina.*

<sup>7</sup> \*Kini Elodi, 'awalawa Galili 'ana toveimea, Iesu yana folova valana i nogai nuana i vogani fai tomotoga 'ifwaidi i vonavona i vo, No'o Iesu, Ioni Tobafitaiso i yawasa wafayega.” <sup>8</sup> We'e 'ifwaidi i vo, Ilaitia i vilai i mai abamega,” wata 'ifwaidi i vo, Tamu tolu'ivona basenadiotoga i wafa wata i yawasa.” <sup>9</sup> \*We'e Elodi i vo, Ioni 'odona a boboi, we'e ava'ai tomogoga valana a noganogai?” Bega i nuanua bani'odi i na munega Iesu i na 'iseni.

*Iesu tomotoga 5000 i ve'anidi.*

<sup>10</sup> Basenadi Iesu yana tovetutuyamavo i vetunediga 'akonadi i viladi i maia nani matatabuna i 'idewadiga faifaidi i lu'ivona Iesu 'waineye. I veifufu'a'ava, mulieta i vagavaidi 'aise'avadi i nagoi tamu 'atamana 'ana wagava Bedasaida. <sup>11</sup> Siwe tomotoga fuedi valana i 'asetai ava'aibe bei i nunagoi begaidi Iesu i yogo'waili. Iesu ma yana sosoana i 'isedi nuanuana i na veifufu 'waidie Yaubada yana veimea tomotoga 'waideye faifaina wata tovinga fuedi i 'ive'atumaidi.

<sup>12</sup> 'Akonadi lavilavi sai'afoga i na sidudubali tovetutuyamavo i maia Iesu 'waineye i voneni i vo, Tomotoga 'u na vetunedi i na nagoi taunidi 'adi'adi i na lauuala 'atamana wata kweda 'waidie wata bei i na 'eno fai de'e bei kebu tomotogina.” <sup>13</sup> Siwe Iesu i vo, 'Omi taunimi 'wa na ve'anidi.” Yana vona i tutuli i vo, De'e 'aila'a bwaikaotogina we'e 'ima 'waimeye 'ani'ani mwadodoudi 5 wata igana 'ailuga, 'asa'aiana bani'odi, kebu fuediga. 'Alo nuanuamu 'a na nagoi 'adi'adi 'a na kimwane 'atamane? <sup>14</sup> 'Aila'anidi iaveta tulai'avadi 5000 wata vevine kwakwama taiadi bega Iesu

yana tovetutuyamavo i vonedi i vo, Tomotoga 'wa na vonedi i na veiwakukuna, kukuna 'aitamogana 'aitamogana nagedie tomotoga bani'odi 50.”<sup>15</sup> Yana tovetutuyamavo i nagoi tomotoga i vemianidi.<sup>16</sup> Nika Iesu 'ani'ani 5 wata igana 'ailuga i 'ewadi i 'isalaka abame Yaubada 'waineye i vekaiwa mulieta i 'ivividi yana tovetutuyamavo i veledi tomotoga i veutadi.<sup>17</sup> I 'ani'a'ava matatabudi kamodi i aidi, mulieta tovetutuyamavo tomotoga nikilidi i va'augidi bayawa 12 i veadagidi.

### *Fita Iesu i 'asetai.*

<sup>18</sup> Tamu tutuya Iesu 'aiseneye i vevelu'ui Yaubada 'waineye yana tovetutuyamavo i nagoi 'waineye i velutoliedi i vo, 'Wa da nogaiga tomotoga yadi nuanua yau aitoi?”<sup>19</sup> ✧ Yana velutoli i tutuli i vo, 'Ifwaidi i vonaga 'omu Ioni Tobafitaiso wafayega i da mai, wata 'ifwaidi i vonaga 'omu Ilaitia abamega i da obuma, wata 'ifwaidi i vonaga 'omu tamu Yaubada yana tolu'ivona basenadiotoga i wafa i tovoivaitugana.”<sup>20</sup> ✧ Wata yana tovetutuyamavo i velutoliedi i vo, We'e 'omi 'wa da nuaniga yau aitoi?” Fita i vo, 'Omu Keliso, Yaubada 'ana Venua'ivina.”

### *Iesu yana wafa i veifufuyeni.*

<sup>21</sup> Bega Iesu yana tovetutuyamavo i toke i talabodedi i vo, Kebu tamu aitoi 'waineye 'wa na lu'ivonaga yau Keliso, Yaubada 'ana Venua'ivina.<sup>22</sup> Yau a vetomotogotoga i lubwaineni veviga bwaikaotogina a na veluagai wata me Diu yada to'edakumeta 'au'auveadi, tovelomu 'adi to'edakumetavo taiadi, wata ve'etoboda 'adi tovevo i na vedumwe'ai'aieku. Mulieta i na luvewafaku siwe 'aiata 'ana vetonu 'waineye Yaubada i na sivetovoiku.”

<sup>23</sup> ✧ Mulieta matatabudi i vonedi i vo, 'Ai'edi aitoi nuanuana mogitana i na mai 'waikuye taiadi 'a na nagoga, 'aiata 'aitamogana 'aitamogana taunina yana nuanua i na bailedi. Fai i na vematayakeyakeku begaidi veviga bwaikina i na veveluagadi yau bani'odi a na veluagadi. Voke i na wafa faifaiku, yau wata bani'odi a na wafa 'ai lagalagana 'waineye.<sup>24</sup> 'Ai'edi aitoi yana mia 'ana 'atumaina i na ve'o'oleni kebu nuanuana yawaina i na tauyeni faifaiku, taunina i na wafao-toga. We'e 'ai'edi aitoi yana mia 'ana 'atumaina wata yawaina i na tauyedi faifaiku, mia 'atumaina wata miamia-vagaina i na veluagai.<sup>25</sup> 'Ai'edi tamu aitoi fwayafwaya matatabuna 'ana kukua i na 'ewadi mulieta yawaina i na 'a'ava, ava'ai'ana 'atumaina 'waineye?<sup>26</sup> ✧ We'e 'ai'edi aitoi yau faifaiku wata

✧ 9:19: Mak 6:14-16 ✧ 9:20: Ion 6:68-69 ✧ 9:23: Mad 10:38-39 ✧ 9:26: Luk 12:9

Valaku 'ana lu'ivona faifaina i na bunumayaga, yau a veto-motogaotoga bola ma yaku mageta mataududulina a na vila-vaitugana wata a na bunumayageni. Yaku vila-vaitugana 'waineye, anelose magemagetadi taiadi 'a na maia, Tamaku yana mageta mataududulina nageneye. <sup>27</sup> A vona mogitana 'waimie, 'omi 'ifwaimi bola ma yawaimi 'wa na miamiani, nagami 'wa na 'iseni Yaubada yana veimea tomotoga 'waidie, mulieta 'wa na wafa.”

*Iesu i vemaigisivilavila.*

<sup>28</sup> \*Iesu yana vona i 'a'ava bani'odi wiki 'aitamogana i 'a'ava, mulieta tamu 'aiata 'waineye Iesu i vonedi Fita, Iemesa, wata Ioni taiadi i laka 'oya bwaikineye 'aise'avadi i na velu'ui. <sup>29</sup> Tutuyanina Iesu i vevelu'ui Yaubada 'waineye maigina 'ana 'isa'isa i vetuli wata 'ana kaleko 'adi lau'avu mataududulidi. <sup>30-31</sup> \*I 'i'isanago nika tomotoga 'adi 'ailuga i souyedi Iesu taiadi i veveifufu. Tomotoganidi Mosese wata Ilaitia basenadiotoga i nagoi Yaubada 'waineye, siwe 'adi 'isa mataududulina abamega i obuma. Yadi veifufunina 'waineye i vonavona Yaubada yana nuanua 'ana mogitana i na souyeni Ielusalema 'waineye Iesu bei i na wafaga faifaina. <sup>32</sup> Fita ma enavo i 'eno'eno mulieta i 'isa Iesu yana mageta mataududulina wata tomotoga 'adi 'ailuga taiadi i tovtovoi i 'isedi. <sup>33</sup> Tomotoganidi sai'afoga i na tauya nika Fita i vo, 'Auvea, 'atumaina fai 'ima taiadi. Bega lau'weta 'aitonu 'a na 'idewadi, tamu 'omu faifaimu, 'ailuga Mosese ma iana Ilaitia faifaidi.” Fai Fita nuana i vogani begaidi i vona-'avo'avovo.

<sup>34</sup> Bola i veveifufu waowa i mai i ve'i'wa'uyedi mulieta i obu i tavunidi tovetutuyamavo 'adi 'aitonu i kololo bwaikina. <sup>35</sup> \*Bona'ava i nogai waowa 'wainega i vo, De'e Natuku, kumanina a venua'ivineni, bonana 'wa na nogai.” <sup>36</sup> Tutuyanina vona i 'a'ava, nika i 'iseni Iesu 'aise'avana i tovtovoi. Tutuyanina 'waineye tovetutuyamavo kebu tamu aitoi 'waineye i da lu'ivona ava'ai i 'iseniga faifaina, siwe tutuya manamanawena i 'a'ava mulieta i lu'ivona.

*Iesu i vona yaiaina i 'awa'a'ia kwamana 'wainega.*

<sup>37</sup> Iesu yana vemaigisivilavila i 'a'avana, mulieta i 'atai 'oyayega ma enavo i obuma 'aila'a bwaikina i veluagadi. <sup>38</sup> 'Aila'anidi nagediega tamu tomogo i vegole i vo, Tove, natuku tubu'eana iavetana yaku tamogana nuanuaku 'u na 'ivaiseni. <sup>39</sup> Yaiaina basenadi i agei, tutuyanina i vevekadia ma yana vebwaubwau i vavatu'oga wata buobuo 'awana i tutubodai. Kebu nuanuana i na baileni i vevekadi-vebogia, kwamana i veveviga. <sup>40</sup> Yamu tovetutuyamavo a vonedi

nuanuaku i da vona yaiaina i da 'awa'a'ia siwe kebu 'adi fataga.”

<sup>41</sup> Iesu tomotoga i vonedi i vo, 'Omi tovekali. Awale Yaubada yana toketokena kebu 'wa da vetumaganeniga? Tutuya manamanawena taiadi ta miamia wata a totoke-maigeku bwaikina siwe kebu 'wa da vetumaganeku mog-itana.” Iesu kwamana tamana i voneni i vo, Nika natumu 'u mieni ta na 'iseni.” <sup>42</sup> Kwamananina i nunagoga Iesu 'waineye yaiaina i vatufeleni i be'u fwayefwayeye i watu'o'oga. Iesu yaiaina i talabodeni nika i 'awa'a'ia kwamana i ve'atumai, mulieta tamana i voneni i mai natuna i 'ewai. <sup>43</sup> Tomotoga matatabudi i 'iseni, nuadi i voganidi Yaubada yana toketokena faifaina.

*Iesu i veifufu-vaitugana yana wafa faifaina.*

<sup>44</sup> ✧ Tomotoga bola i nunuavogana nani matatabuna Iesu i 'idewadewadiga faifaiddi we'e yana tovetutuyamavo i vonedi i vo, Ava'ai a na vonemiga kebu nuami i na fani. Yau a vetomotogaotoga i na 'aniveleneku tomotoga nimadie.” <sup>45</sup> Siwe tovetutuyamavo kebu i da 'asetaiya yana vonanina 'ana nuanuana. Yana nuanuananina Yaubada i giveni bega kebu 'adi fata i na 'asetai wata i kololo kebu nuanuadi i na velutolieni faifaina.

*Aitoi bwaikaotogina Yaubada mataneye.*

<sup>46</sup> ✧ Tamu tutuya Iesu yana tovetutuyamavo 'aise'avadi i ve'ikwayekwayega 'adi 'aila'a nageneye aitoi bwaikaotogina. <sup>47</sup> Iesu 'akonadi yadi nuanua i 'asetai begaidi tamu kwamana i goleni i nago i tovoi lilivaneye. <sup>48</sup> Mulieta i vonedi i vo, 'Ai'edi aitoi ma yana nuakalikali tamu kwamana de'e bani'odi i na 'ivaiseni faifaiku, siwe 'asa'aiana yau i 'ivaiseku. Wata 'ai'edi aitoi ma yana nuakalikali i na 'ivaiseku, siwe 'asa'aiana Yaubada taunina 'aku tovetune i 'ivaiseni. Aitoi siaina matamie, taunina bwaikaotogina Yaubada mataneye.”

*'Ami to'aivaitavo kebu 'wa na talabodebodediga.*

<sup>49</sup> Tamu Iesu yana tovetutuyama 'ana wagava Ioni i mai i vona i vo, 'Auvea, tamu tomogo 'a 'iseni 'amu wagavayega i vonavona yaiaina i 'a'awa'a'idi. 'A 'iseni 'a talabodebodeni fai taunina kebu 'ada 'aila'a.” <sup>50</sup> Iesu i vona Ioni 'waineye wata 'ifwaidi yana tovetutuyamavo 'waidie i vo, Kebu 'wa na talabodebodeniga, 'ai'edi aitoi kebu i na vedumwe'ai'aiemiga taunina 'ami to'aivaita.”

*Me Samelia kebu nuanuadi Iesu.*

<sup>51</sup> ✧ Akonadi Iesu yana tutuya i velilivana Yaubada i na vagavaia i na naweni abame. Begaidi ma yana tokemaiga

i tovoi ma yana tovetutuyamavo i na nagoi Ielusalema. <sup>52</sup> I nunagoi 'edeve Iesu tomotoga 'ifwaidi i vonedi i kumeta yadi 'eba veawai i na 'idewadewai me Samelia yadi 'atamane. <sup>53</sup> Fai me Samelia wata me Diu kebu taiadi i da veveiana wata fai Iesu i nunago me Diu yadi 'atamana bwaikina 'waineye Ielusalema, begaidi i talabodaboda kebu nuanuadi Iesu ma enavo i na miamiani yadi 'atamane. <sup>54</sup> We'e Ioni wata Iemesa tomotoga yadi talaboda i nogai Iesu i voneni i vo, 'Auvea bani'odi? Nuanuamu 'a na vona 'ai-'ala'alata abamega i na obuma tomotoga de'e i na 'ala'a'avadi?" <sup>55-56</sup> Siwe Iesu i sivilai i talabodedi, mulieta i tovoi i nagoi tamu 'atamana 'waineye.

*Tomotoga 'adi 'aitonu igodi nuanuadi Iesu i da vetutuyameni.*

<sup>57</sup> Tutuyanina i nunagoi 'edeve tamu tomogo i vona Iesu 'waineye i vo, Yau 'akonadi 'a tauyeku 'waimuye, 'ai'edi ava'aibe bei 'u na nunagoga yau taiadi." <sup>58</sup> Iesu tomogonina yana vona i tutuli i vo, 'U na nuani 'ou'ou walawala'ai ma 'adi ovu, wata manuga ma 'adi giuva, we'e yau a vetomotogotoga kebu tamu yaku vanuga bei a na 'eno 'alo a na veawai. 'Ai'edi 'omu yau taiadi ta na nagoga vita 'u na veluagadi." <sup>59</sup> ✨Wata Iesu tamu tomogo i voneni i vo, Nuanuaku 'omu taiadi ta na nago, yaku tovetutuyama." Nika tomogonina i vo, 'Auvea, 'atumaina siwe nuanuaku a na miamia nagami tamaku a na tavunina mulieta a na mai a na vetutuyamemu." <sup>60</sup> Iesu tomogonina yana vona i tutuli i vo, 'Asa'aiana 'u baileni, egavo kebu nuanuadi i na vetutuyameku, taunidi 'anu'anunudi wafawafadi yami towafa i na vevetavuna. We'e 'omu 'asiauotoga 'u na nago 'u na lau'age Yaubada yana veimea tomotoga 'waidie faifaina." <sup>61</sup> Wata tamu tomogo i vo, 'Auvea, nuanuaku a na vetutuyamemu, siwe nagami a na nago a na 'alanuai natukwavo wata yaku vavine 'waidie." <sup>62</sup> ✨Siwe Iesu tomogonina i voneni i vo, 'Ai'edi aitoni nuanuana i na vetofolova faifaiku we'e ma yana venumaluga taunina faifaina i na nuanua, kebu 'ana fata i na vetofolova Yaubada faifaina, wata kebu 'ana fata Yaubada i na veimeyeni."

## 10

*Iesu tovetutuyamavo 72 i vetunedi.*

<sup>1</sup> ✨Iesu tomotoga 'adi 'aitonu 'waidie i vona'a'ava mulieta tomotoga 72 i venua'ivinedi yana tovetutuyamavo. 'Adi 'ailuga 'adi 'ailuga i vetunedi i na kumeta 'atamana bwaikidi wata siaidi 'waidie, 'atamananidi 'waidie bola Iesu i na nago. <sup>2</sup> ✨Iesu i vonedi i vo, 'Akonadi tomotoga fuedi i lalauala



nuanuadi yadi mia i na ve'atumai, bega i na vetumaganeku i na luku Yaubada yana 'Aila'a 'waineye, siwe 'omi tofolova kebu fuemiga bega yaku vona 'wa na lu'ivoneyeni. Bega i Yaubada, taunina bani'odi tonibakula, 'wa na velu'ui 'waineye bega tofolova fue di i na vetuned i na 'ivaisemi 'wa da vo vuaganidi 'wa na mimaiedi Yaubada yana bubuwaka 'waineye. <sup>3</sup> Yau a vevetunemi 'wa na nagoiga yaku vona 'wa na lu'ivona tomotoga fue di 'waidie. 'Ifwaidi i na vedumwe'ai'aiemi begaidi 'omi bani'odi 'aisaya sifi 'wa nunagoi 'ou'ou walawala'ai kasikasisidi 'awasasadie. <sup>4</sup> \*Kebu mani 'wa na 'ewadiga, venuana 'alo 'ageyafayafa 'ifwaidi. 'Ai'edi wata aitoi 'ede ye 'wa na veluagaiga kebu taiadi 'wa na veveifufu manamanawena, 'wa na nago-matayo'o 'wa na lau'age.

<sup>5</sup> 'Ai'edi tamu vanuga 'waineye 'wa na lukuga vanuganina 'ana tomia 'wa na vonanuakalikali 'wa na vo, Kaiwa, ma yami sosoana 'wa na miamia, Yaubada i na nuakalialiemi.”

<sup>6</sup> 'Ai'edi 'waidiega tamu tomogo nuanuana yami vonanuakaliali i na nogai, Yaubada i na vesauluva-'atuma ieni. We'e 'ai'edi kebu nuanuadi yami vonanuakaliali, 'asa'aiana Yaubada i na vesauluva 'atumaina 'waimie we'e tomotoganidi kebu. <sup>7</sup> \*Vanuganina 'waineye 'wa na lukuga bei 'wa na miamia, kebu 'wa na miayaba-vuvua vanuga fue di 'waidie. 'Ani'ani i na 'idewaiga faifaimi 'wa na 'ani wata 'wa na yemu, kebu 'wa na bunumayaga fai i lubwaineni yami folova faifaiku 'ana tutula.

<sup>8</sup> 'Ai'edi ava'ai 'atamanaga 'ana tomotoga yami nago 'waidie faifaina i na sosoana, bega ava'ai i na 'idewaiga faifaimi kebu 'wa na vuanaluga 'wa na 'animi. <sup>9</sup> Siwe 'atamananina 'waineye tovig a 'wa na 'ive'atumaidi wata tomotoga matatabudi 'wa na vonedi 'wa na vo, Yaubada nuanuana taunimi 'wa na tauyemi 'waineye bega i na veimeyemi.”

<sup>10-11</sup> \*'Ai'edi ava'ai 'atamanaga kebu ma yadi sosoana i na lu'uma'umaiemiga i na vedumwe'ai'aiemi, 'wa na nagoi yadi 'atamanafouye 'wa na vonedi 'wa na vo, 'Wa 'isema yami 'atamana fwayafwayana 'agemega 'a luvutuvutugi, yami 'eba 'isa kebu wata 'a na lalau'age 'waimie wata vematavuloga 'wa na veluagai Yaubada 'wainega. Bega 'wa na 'asetatumaia, Yaubada nuanuana i na veimeyemi siwe 'omi 'wa baila.” <sup>12</sup> \*A na vonemi, bola Vonayavuga 'ana 'Aiata 'waineye tosakona basenadiotoga i miamianiga 'atamana Sodoma 'adi vematavuloga i na veluagai Yaubada 'wainega siwe sai'afo i na 'isanuakalikali, we'e tomotoganidi i na vedumwe'ai'aiemiga 'adi vematavuloga bwaikaotogina i na veluagai 'aiatanina 'waineye.”

\* 10:4: Mad 10:7-14 \* 10:7: 1 Kol 9:6-7; 1 Tim 5:18 \* 10:10-11: Fol 13:50-51

\* 10:12: Nag 19:24-25,27-28

*Tomotoga 'ifwaidi kebu Iesu i da vetumaganeni.*

<sup>13</sup> ☆Wata Iesu i vo, Ieu, 'omi me Kolesini nuakalikalimi wata me Bedasaida nuakalikalimi, 'waimie vita bwaikidi i na souyedi. We'e basenadiotoga me Taia wata me Saidoni yadi sakona bwaikidi faifaidi Yaubada i leodi. 'Ai'edi 'eba nuavogananidi wata 'eba nua'ewanidi a 'idewadiga matamie a da 'idewadi matadie tosakananidi i da vemwakula wata kaleko sakoidi i da ve'wesena, 'adi 'eba 'isa ma yadi nuavita i nuaviladi. <sup>14</sup> A na vonemi, 'awaie Vonayavuga 'ana 'Aiata 'waineye me Taia wata me Saidoni 'adi vematavuloga i na veluagai Yaubada 'wainega siwe sai'afo i na 'isanuakalikaliedi, we'e 'omi yaku vona 'wa baila kebu 'wa da nuavilamiga vita bwaikaotogina 'wa na veluagai. <sup>15</sup> ☆We'e 'omi me Kafaneomi taunimi 'wa awa'ai'aيمي igodi 'wa vo, 'Ima 'atumaima, abame 'a na luku,” siwe mogitana Yaubada i na veimea 'wa na obu watu'ai Manamanawena 'waineye.”

<sup>16</sup> ☆Wata Iesu i vona yana tovetutuyamavo 'waidie i vo, 'Ai'edi aitoi yami vona i na nogai, siwe 'asa'aiana yaku vona i nogai, wata 'ai'edi aitoi i na vedumwe'ai'aiemi siwe 'asa'aiana yau i vedumwe'ai'aieku. Wata 'ai'edi aitoi i na vedumwe'ai'aieku siwe 'asa'aiana Yaubada 'aku tovetune i vedumwe'ai'aieni.”

*Tomotoganidi 72 folovayega i viladi.*

<sup>17</sup> Tomotoganidi 72 basenadi Iesu i vetunediga, 'akonadi yadi folova i ve'a'ava wata ma yadi sosoana bwaikina i viladi i maia Iesu 'waineye. I le'wai i voneni i vo, 'Auvea, 'amu wagavayega 'a vona yaiaina 'waidie i vematayakayaka i 'awa'a'idi.” <sup>18</sup> ☆Iesu yadi vona i tutuli i vo, Yau a 'iseni Seitani yana toketokena i mwea abamega i 'anita'ia 'ana 'isa'isa bani'odi tomuyoana i kianamali. <sup>19</sup> ☆Wata a na vonemi, veimea 'akonadi a vele mi bega 'ami fata 'o'olo kasikasisidi wata dinigala 'wa na badi kebu i na ovamiga. Toketoke-nanina 'wainega 'wa na vetoketoke 'ami gaviavo Seitani ma enavo yaiaina 'waidie bega kebu tamu nani sakoina 'wainega i na nikemi. <sup>20</sup> ☆'Wa sosoana fai yaiaina yami vona i vematayakeyakedi. 'Atumaina, siwe kebu nani bwaikina. Mogitana 'wa na sosoana fai 'akonadi 'ami wagava i 'eno'enovi abame.”

*Iesu i sosoana.*

<sup>21</sup> ☆Tutuyanina 'waineye 'Anu'anunu 'Atumaina Iesu i kiavesosoani begaidi i vo, Tamaku. 'Omu abama wata fwayafwaya 'adi Toveimea, a vekaiwa 'waimuye fai yaku ve 'adi 'aseta 'u givedi taunidi 'ase'asetadi wata i awa'ai'aidiga

☆ **10:13:** Ioe 3:4-8; Emo 1:9-10; Sek 9:3-4 ☆ **10:15:** Ais 14:13-15 ☆ **10:16:** Ion 5:23 ☆ **10:18:** Ais 14:12; Ve 12:8-9 ☆ **10:19:** Same 91:13 ☆ **10:20:** Ve 3:5, 20:12 ☆ **10:21:** Luk 8:9-10

'waidiega bega i bavuyedi, we'e egavo i nunuaobuga yavayavava bani'odi, yaku ve 'adi 'aseta 'u kiavemagetadi 'waidie. Tamaku, vona mogitana ava'ai yamu nuanua i lubwaineniga 'akonadi 'u 'idewai 'amu kiavesosoana."

<sup>22</sup> ✨ Iesu i velu'ui i 'a'avana tomotoga i vonedi i vo, Nani matatabuna Tamaku i 'anivelenedi 'waikuye a veveimeyedi. Kebu tamu aitoi yau Yaubada Natuna i da 'asetaku, Tamaku 'aiseotogina 'aku to'aseta. Wata kebu tamu aitoi Tamaku i da 'asetai, yau Natuna 'aiseotogiku 'ana to'aseta wata 'ai'edi egavo nuanuaku, 'waidie Tamaku a na sivemageseni."

<sup>23</sup> Mulieta Iesu yana tovetutuyamavo 'aise'avadi i vonedi i vo, 'Eba sosoana 'waimie fai 'eba nuavogana wata 'eba nua'ewa a 'idewadewadi matamie. <sup>24</sup> ✨ We'e a na vonemi, tolu'ivona wata toveimea fuei nuanuadi bwaikina yaku folovanidi 'wa 'ise'isediga i da 'isedi, wata yaku ve 'wa noganogaiga i da nogai siwe kebu."

*Vona-awatabai tomogo Samelia 'atumaina faifaina.*

<sup>25</sup> ✨ Mulieta tamu ve'etoboda 'adi tove i mai Iesu 'waineye nuanuana i na velutolieni bonana i na nogai, 'ai'edi i na vekaliga 'adi fata i na 'ive'avini. Begaidi i velutolieni i vo, Tove, ava'ai a na vai bega yawai-vagata a na veluagai?"

<sup>26</sup> Iesu yana velutoli i tutuli i vo, Yaubada yana Buki nageneye i kilumiga, bani'odi i voneyedi?" <sup>27</sup> ✨ Tomogo i vo, 'Auvea yami Yaubada 'wa na nuakalikalieni mogitana nuamiega. 'Anu'anunumi, yami nuanua wata yami toketokena 'wa na tautauyedi 'waineye tutuya fuei. Wata emiavo 'wa na nuakalikaliEDI taunimi 'ami nuakalikali bani'odi." <sup>28</sup> ✨ Iesu tomogo i voneni i vo, 'Asa'aiana 'u vona mogitana. Veimeanidi 'u na 'idewadi bega mia 'atumaina wata miamia-vagaina 'u na veluagai."

<sup>29</sup> Tomogonina kebu nuanuana i na bunumayaga 'aila'a matadie begaidi i velutoli-vaitugana i vo, Ava'ai tomogoga iaku?" <sup>30</sup> Tomogonina yana vona Iesu i tutuli i vo, Side bani'odi. Tamu tomogo Diu Ielusalemega i tauya i obuobu Ieliko. 'Edeye tovainago i veluagadi i 'ive'avini, 'ana kaleko i silabulabu'i, wata i toke i nikei, sai'afoga i da 'ivewafai. Yana kukua wata yana mani i eloi i baileni 'edeeye i 'eno'eno i dega.

<sup>31</sup> 'Aiatanina 'waineye tamu tovelomu 'edanina 'waineamo i nunago i 'iseni i kekeseni. <sup>32</sup> Wata bani'odi tamu tovelomu 'adi to'aivaita i mai i 'isanaweni i nago lilivaneye i 'isadewai wata i kekeseni i nago. <sup>33</sup> ✨ Mulieta tamu tomogo Samelia i mai, kumanidiavo me Diu kebu taiadi i da veveianaga, i 'iseni i nuavita faifaina wata i nuakalikalieni. <sup>34</sup> I nago

'waineye 'ana kini'ona i lumulamuladi bunama wata oine 'waidiega. Mulieta i silakai i silakaveni yana 'aisaya doniki tabwaneye i 'ewai i naweni vanuga wakawaka 'waineye bei lovana 'aitamogana i 'isave'avini. <sup>35</sup> I 'atai mani i 'ewai i nago vanuga wakawaka 'ana to'isave'avina lubulubu 'ailuga i veleni wata i velu'ase'asei i vo, Tomogo de'e 'u na 'isave'avini mani we'e 'wainega. 'Ai'edi maninina 'u na ve'a'avaiga bola a na vilaku a na mai wata mani a na velemu yamu 'isave'avina tutulina.”

<sup>36</sup> Veifufunina Iesu i ve'a'avai mulieta ve'etoboda 'adi tovenina i voneni i vo, Tomotoganidi 'adi 'aitonu 'waidiega 'u da nuaniga, tomogonina i nikeiga aitoi iana?” <sup>37</sup> Ve'etoboda 'adi tove i vo, Tomogonina i nuakalikalieniga taunina mogitana iana.” Begaidi Iesu i voneni i vo, Wata 'omu bani'odi 'u na nago mali tomotoga 'u na nuakalikaliEDI wata 'u na vesauluva-'atumaiedi.”

*Iesu i nago Malida wata Meli 'waidie.*

<sup>38</sup> ✧ Iesu ma enavo i nunagoiga i le'wai tamu 'atamana 'waineye, bei tamu vavine 'ana wagava Malida i vonedi i luku yana vanuge 'ani faifaina. <sup>39</sup> Wata Malida taina 'ana wagava Meli i mai Iesu lilivaneye i miabui yana vona i noganogaya. <sup>40</sup> Malida 'aisena 'ani'ani i 'idewadewa begaidi i nuavita bwaikina. Malida i mai Iesu i voneni i vo, 'Auvea, 'u 'iseni yau 'aiseku a 'i'idewadewa, siwe voke kebu faifaina 'u da nuanua. 'U voneni Meli i na 'ivaiseku.” <sup>41</sup> ✧ Iesu i vo, Malida, Malida, 'omu nuamu 'u 'ivegauya nani fuedi 'waidiega. <sup>42</sup> Mogitana nani tamu bwaikina i lubwaineni faifaina 'u na nuanua. Naninina faifaina taimu Meli i nuanua. Fai i nuaniku begaidi kebu a na talabodeniga.”

## 11

*Velu'ui faifaina Iesu i ve.*

<sup>1</sup> Tamu tutuya Iesu i vevelu'ui tamu 'awalawa 'waineye. Tutuyanina i ve'a'ava, tamu yana tovetutuyama i voneni i vo, Basenadi Ioni Tobafitaiso yana tovetutuyamavo i vedi velu'ui, 'ima wata nuanuama 'u na vema.” <sup>2</sup> Iesu i vonedi i vo, Side bani'odi 'wa na vevelu'uiedi 'wa na vo,

Tamama,

'Omu magemagetamu,

Nuanuama tomotoga fuema 'a na ve'ililibuyemu,

Nuanuama 'u na veveimeyema,

<sup>3</sup> Nuanuama 'ama'ama 'aiata 'aitamogana 'aitamogana faifaidi 'u na vevelema,

<sup>4</sup> Mali tomotoga i vesauluva sakoina 'waimeye 'a nuatavunidi,

'Omu wata bani'odi yama sakona 'u da nuatavunidi.

'Eba sailubu 'waidie kebu 'u na tauyema."

<sup>5-6</sup> Wata Iesu i ve yana tovetutuyamavo 'waidie velu'ui 'ana 'asetai faifaina. I vo, 'Ai'edi tamu aitoi 'waimiega 'u da 'eno'eno tamu iamu i da le'wa lovana 'ana utukamwane nika 'ani'ani kebu, bega 'u da nago wata tamu iamu yana vanuge 'u da vo, Iaku, tamu tomogo 'ani'ieyega i mai siwe 'ani'ani kebu begaidi a mai 'waimuye 'ani'ani 'aitonu 'u na veleku bola wata a na tutulidi." <sup>7</sup> We'e 'ai'edi iamu i na vo, Kebu 'u na vematakaki, 'akonadi a saiboda ma yaku 'aila'a 'a 'eno'eno, kebu 'aku fata a na tovoi a na velemu." <sup>8</sup> \*Siwe a na vonemi, kebu veiana faifaina i na 'ivaisemu, yamu velu'ui-vaivaitugana faifaina i na velemu ava'ai nuanuamu.

<sup>9</sup> \*Wata 'omi bani'odi. 'Wa na vevelu'ui bega Yaubada i na velemi, 'wa na lalauialaga 'wa na veluagai, wata 'wa na velutolitoliga i na nogayemi saiboda i na sibaleni. <sup>10</sup> Vona mogitana, egavo i vevelu'uiga Yaubada i na veledi, egavo i lalauialaga i na veluagai, wata egavo i velutolitoli i na nogayedi saiboda i na sibaleni. <sup>11</sup> We'e 'omi kwakwama tamadiavo 'ai'edi tamu natumu igana i na velu'uiemuga, bani'odi 'o'olo 'u na veleni? <sup>12</sup> 'Alo 'ai'edi fou i na velu'uiemuga, bani'odi dinigala 'u na veleni? A nuani kebu i da lub-waineniga. <sup>13</sup> 'Omi tosakona siwe tutuya fuedi ava'ai natumiavo nuanuadi nani 'atumaidi 'wa veleveledi. 'Omi yami nuakalikali natumiavo 'waidie sai'afo bwaikina, we'e Tamada abame yana nuakalikali bwaikaotogina 'waimie, 'ai'edi 'wa na velu'uieni 'Anu'anunu 'Atumaina i na velemi."

*Ava'aiega Iesu yana toketokena i veluagai.*

<sup>14</sup> \*Tamu tomogo, basenadi yaiaina i ageiga kebu 'ana fata i na welava, Iesu i veluagai yaiaina i voneni i 'awa'a'ia. Tomotoga fuedi i 'iseni i welava-vaitugana begaidi nuadi i voganidi. <sup>15</sup> We'e tomotoga 'ifwaidi i vo, Seitani,\* taunina yaiaina yadi to'edakumeta, Iesu i agei bega yana toketokena 'wainega i vonavona yaiaina i 'a'awa'a'idi." <sup>16</sup> \*Tomotoga 'ifwaidi nuanuadi Iesu i na silubuya bega i vo, Nuanuama tamu 'eba nuavogana wata 'eba nua'ewa 'u na 'idewai bega 'a na 'asetai mogitana Yaubada i vetunemu." <sup>17</sup> Siwe Iesu 'akonadi yadi nuanua i 'asetai begaidi i vonedi i vo, 'Ai'edi 'eba veimea 'aise'avadi i na 'idia i na vetalaga bola 'eba veimeanina i na velovi. Wata 'ai'edi vanuga tamu 'ana tomia 'aise'avadi i na vetalaga, vanuganina i na 'iaweni i na vetumala. <sup>18</sup> Wata bani'odi Seitani yana 'eba veimea 'aise'avadi i na 'idia i na vetalaga i na 'a'avaotoga. De'e bani'odi a

\* **11:8:** Luk 18:5    \* **11:9:** Ion 14:13-16    \* **11:14:** Mad 9:32-34    \* **11:15:** 'Ana mogitana Bielisibabi, Seitani tamu 'ana wagava.    \* **11:16:** Mad 12:38, 16:1

voneyediga fai 'omi 'wa vonaga igodina Seitani yana toketokena i da veleku bega a da vonavona yaiaina i da 'a'awa'a'idi. Siwe kebu. 'Ai'edi Seitani yana toketokena i da veleku yana 'eba veimea i da ve'idi'idieni. <sup>19</sup> 'Wa vonaga Seitani yana toketokena 'wainega a vonavona yaiaina i 'a'awa'a'idi, we'e yami tomotoga 'ifwaidi wata i vonavona yaiaina i 'a'awa'a'idi, nika 'wa velutoliedi ava'aiega yadi toketokena i veluagai. Bola i na vo, Kebu Seitani 'wainega," nika 'wa na 'asetai 'wa vekali. <sup>20</sup> We'e mogitana Yaubada yana toketokena 'wainega yaiaina a vonevoned i 'a'awa'a'idi, 'wa 'iseni 'wa da 'asetai 'akonadi Yaubada yana veimea i mai 'waimie.

<sup>21</sup> Seitandinina bani'odi tamu tomogo toketokena ma yana 'eba vetalaga fuedi, yana vanuga i 'i'save'avini bega kebu tamu aitoi yana kukua i na 'ivesakodi. <sup>22</sup> ✧ We'e 'ai'edi tamu tomogo toketokeotogina† i na mai tomogonina taiadi i na vetalaga i na vetoketoke 'waineye yana kukua wata yana 'eba vetalaganidi i vevetumaganediga i na eloi enavo i na veutadi.

<sup>23</sup> A vona mogitana 'waimie 'ai'edi aitoi kebu taiadi 'a na folofolovaga, taunina 'aku gavia. We'e 'ai'edi aitoi kebu 'aku tofolovavaita, kebu tomotoga i na vavagavaidi i na mimaiedi 'waikuye, 'wa da vo tomotoga i da sogisogiedi, taunina yaku folova 'ana to'ivesako.

### *Yaiaina yana 'eba mia 'ana lauvai faifaina.*

<sup>24</sup> 'Ai'edi yaiaina i na 'awa'a'ia tamu tomogo 'wainega, i na nago 'awalawa sakoineye bei i na lalauala-vuvua yana 'eba mia. We'e 'ai'edi kebu i na veluagaiga i na vo, A na vilaku yaku 'eba mianina basenadi a 'iaweniga 'waineye." <sup>25</sup> Bega i na vilai, i na mai 'eba mianina i na 'iseni 'akonadi i 'idewai 'atumaina i 'eno'eno siwe nage'avana.‡ <sup>26</sup> Fai kebu 'ana veluvaiga bega i na souyeni i na nago wata yaiaina sakoiotogidi 7 i na vagavaidi i na miedi i na luku 'eba miananina 'waineye. Tomotoganina i na 'ivesakotogi mogitana, basenadi kebu bani'odiga."

### *Sosoana mogitana.*

<sup>27</sup> Tutuyanina Iesu i vona'a'ava, tamu vavine 'aila'a nagenega bonadi bwaikinega i toke i vona i vo, 'Eba sosoana inamu 'waidie fai i venatunemu wata i vesusumu." <sup>28</sup> ✧ Iesu i vonedi i vo, 'Wa vonaga mogitana siwe wata egavo Yaubada yana Vona i na nogai wata i na vevematayakeyakeni 'eba sosoana bwaikina 'waidie."

### *Tomotoga nuanuadi 'eba 'isa Iesu 'wainega.*

✧ **11:22:** Kolos 2:15 † **11:22:** Tomogonina toketokena, 'asa'aiana taunina Iesu Keliso. ‡ **11:25:** 'Anu'anunu 'Atumaina kebu tomogonina i da agei. ✧ **11:28:** Luk 8:21; Ve 1:3

29-30 ✧ Aila'a bwaikina Iesu i tovififineni bega i vonedi i vo, Tutuya de'e 'ana tomotoga yami sauluva sakoidi fai yami nu-anua bwaikina tamu 'eba nuavogana wata 'eba nua'ewa a na 'idewai matamie 'wa na 'isenina 'wa na ve'awamogitana yau Yaubada 'wainega a mai. Siwe tamu nani a na veifufuyeni yami 'eba 'isa. Basenadiotoga tamu Yaubada yana tolu'ivona 'ana wagava Iona igana bwaikina i tononi, 'aiata 'aitonu i 'a'ava i 'alaiwageni 'wa da vo bani'odi i da yawasa-vaitugana me Ninive yadi 'eba 'isa Yaubada i vetunei. Wata bani'odi yau a vetomotogaotoga yami 'eba 'isa. <sup>31</sup> ✧ Basenadiotoga me Siba yadi toveimea bwaikina Kwini Siba § 'ani'ieyega i mai Kini Solomoni yana 'aseta 'ana 'isa faifaina. Bega Vonayavuga 'ana 'Aiata 'waineye kwininina taiadi 'wa na tovoi Yaubada mataneye i na matawa'ulimi i na vo, Basenadi 'ani'ieyega a mai 'aseta 'ana 'isa faifaina wata a 'ewai, we'e 'omi kebu nuanuami 'wa na 'asetai bega 'wa na nuavilami." Wata Iesu i vo, A na vonemi Kini Solomoni tomogo bwaikina we'e tomogonina matamie i tovo-tovoi bwaikaotogina siwe 'wa baila, kebu nuanuami 'wa na 'asetai. <sup>32</sup> Wata bani'odi Vonayavuga 'ana 'Aiata 'waineye me Ninivenidi taiadi 'wa na tovoi Yaubada mataneye i na matawa'ulimi i na vo, Basenadi Iona i lau'age 'waimeye 'a nuavilama we'e 'omi kebu nuanuami." Wata Iesu i vo, A na vonemi, Iona tomogo bwaikina we'e tomogonina matamie i tovo-tovoi bwaikaotogina siwe 'wa baila.

*Mageta 'ana vona-awatabai.*

<sup>33</sup> ✧ Kebu tamu aitoi mageta i da kabukabunina i da give-giveni 'alo 'aivoeyega i da tatalafwaseni. Mogitana mageta 'ana 'eba yato 'waineye i lulutalauleni bega tomotoga i na mi-maiaga vanuganina 'waineye i na magemagesedi. <sup>34</sup> Matami bani'odi nuami 'ana mageta. 'Ai'edi nani 'atumaidi 'wa na 'ise'isediga, nuami matatabuna magemagetadi, we'e 'ai'edi nani sakoidi 'wa na 'ise'isediga, nuami matatabuna i na dudubalidi. <sup>35</sup> 'Wa na 'isa'isa i na nunago yami magetan-ina i na 'weu nuami i na dudubalidi. <sup>36</sup> 'Ai'edi mageta i na magesemi 'ami fata nani fuedi 'wa na 'isedi, wata bani'odi 'ai'edi nuami magemagetadi kebu tamu dudubala, nani matatabuna magemagetadi 'waimie."

*Falisi wata ve'etoboda 'adi tovevo Iesu i yagaidi.*

<sup>37</sup> ✧ Tutuyanina Iesu i vona'a'ava, tamu Diu totafalolo Falisi Iesu i tayegi 'ani faifaina bega i nago i miabui i na 'ani. <sup>38</sup> ✧ Falisinina i 'iseni Iesu kebu nimana i da lekoa-dewadi yadi

✧ 11:29-30: Ioa 3:4-10 ✧ 11:31: 1 Kin 10:1-10 § 11:31: 'Ana mogitana, Kwini i mai bolimanayega. ✧ 11:33: Luk 8:16 ✧ 11:37: Luk 14:1 ✧ 11:38: Mad 15:1-2

sauluva bani'odi begaidi nuana i vogani. <sup>39</sup> Toveimea Iesu tomogonina yana nuanua i 'asetai faifainanina i voneni i vo, 'Omi Falisi, tomogomi 'wa 'ivivigavudi we'e inagemi vainago 'ana ve'isakololo wata veumokai, yami sauluva bani'odi vedi wata 'aivoe, dumwedi 'wa tamatamadi we'e inagedi yoke 'anikudana. <sup>40</sup> 'Omi 'wava'wavami. Yaubada tomogomi i 'idewadi wata inagemi. <sup>41</sup> Yami kukua matatabuna 'wa na 'anivelenedi egavo i vewekowekomaga 'waidie, bega fuedi i na 'isemi i na 'asetai 'akonadi 'wa nuavilami yami sakona 'waidiega inagemi vunavunagidi.

<sup>42</sup> 'Omi Falisi nuakalikalimi, fai 'awaie vita bwaikina 'wa na veluagai Yaubada 'wainega. Veimea siaidi 'wa veve'ililibuyedi we'e veimea bwaikidi 'wa baibailedi. 'Ai'edi 'ani'ani 10 'waimie 'aitamogana 'wainega 'wa na 'anivelena-maimaiga Yaubada 'waineye. Wata nani saiotogidi bani'odi matasilisilili 10, 'aitamogana 'wainega 'wa na 'anivelena-maimaiga Yaubada 'waineye. 'Atumaina, bani'odi 'wa na vevesauluvedi, siwe awale veimea bwaikidi 'wa bailedi? Yaubada kebu 'wa da nuakalikalieni wata kebu tomotoga 'wa da vesauluva-'atumaiedi sauluva tonovidi 'waidiega.

<sup>43</sup> 'Omi Falisi nuakalikalimi, fai 'awaie vita bwaikina 'wa na veluagai Yaubada 'wainega. Tutuyanina 'wa lukuluku vanuga 'eba velu'ui 'waineye, nuanuami to'edakumeta taiadi 'wa na mimiabui. Wata 'atamanafouye nuanuami tomotoga matatabudi ma yadi ve'ililibu i na vevekaiwa 'waimie. <sup>44</sup> Nuakalikalimi, 'omi bani'odi taumata, inagena sakoina we'e tabwana 'atumaina. Tomotoga tabwaneamo i nunago siwe kebu i da 'asetai nageneye sakoina i 'eno'eno. Wata 'omi bani'odi, tomogomi 'atumaidei we'e inagemi sakoidi."

<sup>45</sup> Tamu ve'etoboda 'adi tove Iesu i voneni i vo, Tove, yamu vonanina 'wainega 'ima wata 'u falisakoyema." <sup>46</sup> Iesu i vo, 'Omi ve'etoboda 'adi tovevo nuakalikalimi, wata 'awaie vita bwaikina 'wa na veluagai Yaubada 'wainega. Ve'etoboda fuedi vitadi taunimi yami nuanuayega nuanuami tomotoga i na veve'ililibuyedi, 'wa da vo bani'odi venuana vitadi 'wa da vevevadi siwe kebu tamu sai'afo 'wa da vo, 'A na 'ivaisedi." <sup>47</sup> Nuakalikalimi. Basenadiotoga tubumiavo Yaubada yana tolu'ivonavo i luvewafadi. We'e 'omi, taumata 'atumaidei 'wa 'idewadi matumatu 'waidie tolu'ivonanidi lului faifaidei. <sup>48</sup> Tubumiavo tolu'ivonanidi i luvewafadi, we'e 'omi lului 'wa 'idewadi, 'eba 'isa yadi sauluvanina 'wa awave'atumaieni. <sup>49</sup> Yaubada yami nuanua i 'asetadi faifainanina ma yana 'asetai i vo, Yaku tolu'ivonavo wata yaku tomata'aulelevo a na vetunedi 'waidie, 'ifwaidi veviga i na veledi we'e 'ifwaidi i na luvewafadi." <sup>50-51</sup> ✧ Tutuyanina



Yaubada fwayafwaya i 'idewa-vauyeni 'wainega i maiga 'asiau tubumiavo tolu'ivona fueidi i luvewafadi. Basena-diotoga Keni taina Ebeli i luvewafai, nika bei tubumiavo 'ainike i velamuya i nagoga Sekalaia 'waineye, kumanina i luvewafai 'eba velomu wata vanuga 'eba velu'ui kamwadie. A vona mogitana tutuya de'e tomotoganimi to'ainikenidi 'adi vematavuloga 'omi 'wa na tovoieni, kebu 'ami fata 'wa na dega veviganina bwaikina 'wainega.”

<sup>52</sup> 'Omi ve'etoboda 'adi tovevo nuakalikalimi. Yaubada yana Buki 'ana 'aseta 'ana 'awa 'wa sibodai. Kebu nuanuami 'wa na luku 'asetanina 'waineye wata mali tomotoga nuanuadi i na luku siwe 'wa sibodedi.”

<sup>53-54</sup> ✧Tutuyanina Iesu i vona'a'ava nika i tauya vanuganina 'wainega. Ve'etoboda 'adi tovevo wata Falisi ma yadi 'amalakibu i vedumwe'ai'aieni, velutoli fueidi 'waidiega i siloloi nuanuadi i na vekali bega 'adi fata i na luvewafai.

## 12

### *Iesu i matakia Falisi faifaidi.*

<sup>1</sup> ✧Aila'a bwaikaotogina i deli i maia ma ediavo i vevetunufelagi nuanuadi Iesu yana vona i na nogai. Nagami Iesu i veifufu yana tovetutuyamavo 'waidie bega tomotoga sakoidi yadi sauluva kebu i na damana 'waidie. I vo, 'Wa na 'isave'avinimi totafalolo Falisi yadi isita\* i na nunago i na vedamanimi. 'Awadi sauluva sakoidi i tatalabodedi, siwe wata givagivayega i 'i'idewadi.

<sup>2</sup> Ava'ai tomotoga i na givediga Yaubada i na sivemagesedi. Ava'ai i na nuagivediga Yaubada i na lu'ivoneyedi. <sup>3</sup> Side bani'odi, ava'ai givagivayega 'wa voneyediga 'wa da vo dudubale, siwe i na sivemagesedi 'aila'a matadie. Ava'ai 'wa ve'awayeayediga tutudaba nageneye 'awaie i na sitalatalala'aiedi 'atamanafouye.”

### *Yaubada 'aisena ta na ve'ililibuyeni.*

<sup>4</sup> Wata Iesu i vo, Ekwavo a na vonemi. Tomotoga 'adi fata tomogo'avami i na luvewafadi siwe kebu 'wa na kololoyedi fai kebu wata tamu veviga i na velemiga. <sup>5</sup> ✧Nuanuaku a na vonemi i lubwainemi kumanina 'wa na kololoyeni. Kumanina 'ana fata i na luvewafamiga wata i na tawemi 'ai-'ala'alase, Yaubada. Vona mogitana kumanina 'wa na kololoyeni.

✧ **11:53-54:** Luk 6:11, 19:47, 20:19, 22:2 ✧ **12:1:** Mad 16:12 \* **12:1:** Isita beledi 'ana 'eba 'ivebwaika, falawa matatabuna 'waineye i na susula, bani'odi walabo 'aluna, 'ai'edi i na 'anibiai 'aisayanina matatabuna i na 'ivesakoi. ✧ **12:5:** Iem 4:12

6 ✨Ai'edi manudanidani 5 ta na kimwanediga, 'ana tutula siaina, bani'odi 2 toea. We'e Yaubada mataneyeye manudanidani nani bwaikina, 'aitamogana 'aitamogana kebu nuana i da fani i nuanuanidi. 7 Wata bani'odi, 'omi mataneyeye nani bwaikina, i 'aseta'a'avami bani'odi nava'au matatabuna 'adi 'aila'a i 'asetadi. Begaidi kebu 'wa na kolologa, 'omi kebu nani-'avo'avovo manudanidani bani'odiga, 'omi nani bwaikina Yaubada mataneyeye i 'i'isave'avinimi.

*Ta na tauyeda Iesu 'waineyeye.*

8-9 ✨Wata Iesu i vo, A na vonemi, 'ai'edi aitoi i na lu'ivona tomotoga matadie faifaiku i na vo, Yau a tauyeku Iesu 'waineyeye taunina 'aku Toveimea,” wata bani'odi yau a vetomotogaotoga 'awaie Yaubada yana anelose matadie a na vo, No'o tomotoganina yaku tomotoga.” We'e 'ai'edi aitoi i na ve'eweku tomotoga matadie i na vo, Yau kebu Iesu 'aku Toveimeaga,” wata bani'odi 'awaie yau Yaubada yana anelose matadie a na ve'eweni a na vo, No'o tomotoganina kebu yaku 'aila'aga.

10 ✨Wata 'ai'edi aitoi yau a vetomotogaotoga i na awavesakoyekuga 'ana fata Yaubada i na nuatavuni, we'e 'ai'edi aitoi i na vona-awadamana 'Anu'anunu 'Atumaina 'waineyeye, kebu nuatavuna i na veluagai.

11-12 ✨Wa vetutuyamekuga, faifainanina 'awaie mali tomotoga i na vagavaimi i na nawemi 'eba miava'auta 'waidie bega 'wa na vonayavuga yada to'edakumetavo wata toveimeavo matadie. Kebu nuafoumi i na veviga 'wa na vo, I vevitadaga bani'odi ta na ve'ewedi wata bani'odi ta na voneyedi?” fai tutuyanina 'waineyeye 'Anu'anunu 'Atumaina i na awave'ede'edemi bani'odi 'wa na voneyedi.”

*Vona-awatabai 'ai'aiwabu faifaiddi.*

13 Tutuyanina Iesu i veveifufu tamu tomogo 'aila'a nagediega i voneni i vo, Tove, nuanuaku tatak u na voneni bega kukuanidi tamama i wafa i 'iawediga i na veusedi, 'ifwaidi yana kukua, 'ifwaidi yau.” 14 Iesu yana vona i tutuli i vo, Aitoi i vona igodi 'ami 'ailuga yami kukua a na veuseni? Yau kebu yaku 'eba veimeaga.” 15 ✨Begaidi i vona matatabudi 'waidie i vo, 'Wa na 'isa'isa wata 'wa na 'isave'avinimi bega kebu 'wa na veumokai nani tulidi tulidi 'waidiega. A na vonemi, 'ai'aiwabu bwaikidi kebu 'ana fata 'waidiega yami mia i na ve'atamai wata 'wa na sosoana.”

16 ✨Begaidi Iesu vona-awatabaiega i vonedi i vo, Tamu tomogo 'ai'aiwabuna yana fwayafwaya 'wainega 'ani'ani bwaikina i veluagai. 17 I 'iseni yana nuanua 'waineyeye i vo,

✨ 12:6: Luk 12:24 ✨ 12:8-9: Luk 9:26 ✨ 12:10: Mad 12:23-25,28,31

✨ 12:11-12: Luk 21:12-15 ✨ 12:15: 1 Tim 6:9-10 ✨ 12:16: 1 Tim 6:17

Bani'odi a na munegidi? Yaku bubuwaka 'akonadi i adaga.”  
 18 Bega wata i vo, 'Akonadi a nuani. Side bani'odi, yaku bubuwaka matatabuna a na geudi 'ivaudi wata bwaikidi a na yogonidi bei 'ani'ani matatabuna a na vedodogidi wata 'ifwaidi yaku kukua taiadi. 19 \*Mulieta tauniku a na voneku a na vo, 'Alo yau tamu 'aiwabu. Yaku 'ai'iwabu matatabuna 'akonadi a 'idewadi nonogidi i na 'eno'eno malamala sino faifaidi. Bega folova 'waidiega a na veawai ma yaku sosoana a na 'ani'animo wata a na yemuyemumo ufa toketokedi.”

20 Siwe Yaubada i voneni i vo, 'Omu mogitana 'wava'wavamu. 'Ako lovananina yawaimu i na 'ewai, kukuanidi 'u 'idewadiga aitoi yana kukua?”

21 \*Iesu yana vona 'ana 'eba ve'a'ava 'waineye i vo, Vona mogitana, egavo fwayafwaya 'ana 'ai'iwabu faifaidi i na folofolova we'e kebu i na ve'ai'iwabu Yaubada mataneye, 'awaie wata bani'odi i na souyeni 'waidie.”

*Yaubada 'aisena ta na vetumaganeni.*

22 Wata Iesu i vona yana tovetutuyamavo 'waidie i vo, Kebu nuafoumi i na veviga 'ani'ani yami mia faifaina wata kaleko tomogomi faifaidi. 23 Yami mia nani bwaikina we'e kukua wata kaleko nani-'avo'avovo. 24 \*'Wa na nuani bwayobwayo yadi sauluva. Kebu i da bakubakulaga, kebu i da 'a'aile'waga wata kebu yadi bubuwakaga siwe Yaubada i veve'anidi. Manuga nani-'avo'avovo we'e 'omi tomotoga nani bwaikina Yaubada mataneye begaidi 'ami'ami i na vevelemi. 25 Begaidi kebu tamu nani faifaina 'wa na venuafouviga. Kebu tamu aitoi 'ana fata yana mia fwayefwayeye i na ki-avemanawei yana venuafouviga 'wainega. 26 Venuafouviga kebu 'ana fata i na 'ivaisemi naninina siaina 'waineye, awale 'wa vevenuafouviga nani fuedi faifaidi?

27 \*'Wa na nuani makavuvula yadi tabo. Kebu i da folofolova wata kebu 'adi kaleko i da 'i'idewadi siwe ma 'adi vaigavu 'atumaidi. A na vonemi. Kini Solomoni tomogo 'ai'iwabuna 'ana vaigavu 'atumaidi, we'e makavuvula 'atumaiotogidi. 28 Mosomoso matatabuna nani-'avo'avovo, 'asiau ta 'ise'isedi we'e 'awa'awai i na tunudi i na 'alaidi siwe Yaubada i veve'wesenidi. We'e 'omi tamu nani bwaikina mataneye, mogitana ma 'ami nuanuana i na veve'wesenimi. Awale yami vetumagana Yaubada 'waineye mweadi? 29 Begaidi 'ani'ani wata alu'ai faifaidi kebu nuafoumi i na veviga bega tutuya fuedi 'wa na lauala. 30 Yaubada 'ana tobavu naninidi nuanuadi bwaikina faifaidi i vevenuafouviga. We'e 'omi naninidi nuanuami, Tamami

\* 12:19: Iem 4:13-15 \* 12:21: Mad 6:19-21 \* 12:24: Same 147:9; Luk 12:7

\* 12:27: 1 Kin 10:23-25

abame 'akonadi yami nuanua i 'asetadi. <sup>31</sup> We'e 'wa veven-uafouviga 'asa'aiadi, i lubwainemi nagami taunimi 'wa na tauyemi Yaubada i na veveimeyemi wata yana nuanua 'wa na 'i'idewadi, mulieta naninidi fueidi i na velevelemi.”

*Ve'ai'aiwabu abame.*

<sup>32</sup> ✧ Wata Iesu i vona yana tovetutuyamavo 'waidie i vo, 'Omi 'ami 'aila'a siaina kebu fuemiga siwe kebu 'wa na kolologa. Tamami nuanuana i na veveimeyemi yana 'Aila'a nageneye. <sup>33</sup> Yami kukua 'wa na vekimwaneyedi, tutulidi 'wa na 'ewadi 'wa na veusedi wekowekoma 'waidie, bega yami 'ai'aiwabu abame i na 'eno-vagata. 'Ai'aiwabunidi abame i 'eno'enoviga kebu yadi 'a'avaga fai tovainago kebu, wata 'walu'walu kebu i na 'ivesakodi. <sup>34</sup> 'Wa na nuani, ava'aibe bei yami 'ai'aiwabu i 'eno'enoga, bei tutuya fueidi yami nuanua i na nunago.

*Tofolova dumwedi bikadi.*

<sup>35</sup> ✧ 'Wa na 'idewadewa, yami mageta i na 'ala'alata 'wa na lulukamata. <sup>36</sup> Tofolova 'atumaidi 'wa na vetutuyamedi, bani'odi yadi 'auvea i nago vavine 'ana vewelava 'waineye yana tofolovavo i 'idewadewa i lulukamaseni ma'avia i na vilai. Tutuyanina i na le'wa i na velutoli saiboda i na sibala-matayo'oyeni. <sup>37</sup> Tofolovanidi i 'idewadewa i lulukamataga 'eba sosoana bwaikina 'waidie yadi 'auvea yana le'wa faifaina. A vona mogitana. Yadi 'auveanina i na sosoana yana tofolova 'waidie bega i na vonedi i na miabui 'ana kaleko i na si'ilia 'idewadewa faifaina mulieta i na ve'anidi. <sup>38</sup> Wata 'ai'edi 'auveanina lovana 'ana utukamwane i na le'wa siwe i na lulukamaseniga 'eba sosoana bwaikina 'waidie.

<sup>39</sup> 'Wa na nuani, 'ai'edi tamu tomogo tovainago yana mai 'ana tutuya i da 'asetaigna i da 'isa'isa bega tovainagonina kebu 'ana fata i na luku yana vanuge. <sup>40</sup> 'Omi wata bani'odi 'wa na 'isa'isa i na nunago 'aiatanina 'waineye 'wa na vo, Kebu i na maiga,” yau a vetomotogaotoga bei a na le'wa.”

*Vona-awatabai Iesu yana mai wata tofolova 'adi tutula 'ana 'ewa faifaidi.*

<sup>41</sup> Fita Iesu i velutolieni i vo, 'Auvea, vona-awatabainina 'u vonevoneyeniga 'ima tovetutuyamavo 'aisema 'ama vona 'alo tomotoga matatabuma faifaima?” <sup>42</sup> ✧ Iesu i vo, A na vonemi tofolova 'atumaina, kumanina ma yana 'asetawata ma 'ana vetumagana. 'Ana toveimea i voneni yana tofolovavo 'ifwaidi i na 'i'isave'avinidi wata 'adi'adi i na veleveledi 'aiata 'aitamogana 'aitamogana mulieta i tauya. <sup>43</sup> Tutuyanina 'adi toveimea i na vilai i na mai, 'ai'edi i na

vematayakayaka folovanidi i na folofolovidi 'eba sosoana bwaikina tofolovanina 'waineye. <sup>44</sup> A vona mogitana 'waimie, 'ana toveimea i na voneni yana vanuga wata yana kukua matatabuna 'adi to'isave'avina. <sup>45</sup> We'e 'ai'edi tofolova sakoina, bola yana nuanua i na vo, 'Aku toveimea bola, kebu i na mai-matayo'oga," bega enavo tofolova i na nikenikedi we'e mali tomotoga sakoidi taiadi i na 'ani'ani wata ufa toke-tokena i na yemuyemu bega ma fuedie nuadi i na lugaugaudi. <sup>46</sup> Bani'odi i na vevesauluvediga tamu tutuya tofolovanina kebu i da 'asetai'ga 'ana toveimea i na mai yawaina i na velovogi. I na toke i na niki yana sauluvanina sakoina faifaina mulieta 'eba veviga bwaikina 'waineye i na yatoi tovedumwe'ai'ai taiadi.

<sup>47</sup> \*Tofolovanina 'ana toveimea yana nuanua i 'asetadi siwe i dumwe'ai kebu i da 'idewadi, 'ana vematavuloga bwaikaotogina. <sup>48</sup> We'e tofolovanina 'ana toveimea yana nuanua kebu i da 'asetadi bega i na sakosakonaga 'ana vematavuloga sai'afu. Wata bani'odi 'ai'edi aitoi 'ana veuveuta bwaikina Yaubada i veleni, i lubwaineni 'ana Toveimea faifaina i na folova bwaikina. Wata bani'odi 'ai'edi aitoi 'ana veuveuta bwaikaotogina Yaubada i veleni, i lubwaineni i na folova 'ana Toveimea faifaina bwaikaotogina."

### *Tomotoga i na ve'idi'idi Iesu faifaina.*

<sup>49</sup> Wata Iesu i vonedi i vo, Yau a maiga bega 'ai-'ala'alata i na souyeni fwayefwayeye. Nuanuaku bwaikina 'akonadi i da 'ala'alata. <sup>50</sup> \*Yau nuafouku i veveviga fai 'awaie a na luku veviga bwaikaotogina 'waineye, we'e mulieta veviganina i na 'a'ava nuafouku i na vatu. <sup>51</sup> 'Ifwaimi yami nuanua a maiga bega tomotoga matatabumi 'wa na veiana. Siwe kebu. A na vonemi, a maiga bega tomotoga tauni'avadi i na ve'alamagi'ai ve'idi'idi i na souyeni. <sup>52</sup> 'Asiau tutuyanidi 'waidie wata tutuya i mimai 'waidie 'aila'a fuedi 'waidie ve'idi'idi i na souyeni. Side bani'odi, 'aila'a 'aitamogana nageneye tomotoga 5, 'adi 'ailuga nuanuadi yau, 'adi 'aitonu i na vedumwe'ai'aieku, 'alo 'adi 'aitonu nuanuadi yau, 'adi 'ailuga i na vedumwe'ai'aieku, bega ve'idi'idi i na souyeni. <sup>53</sup> Tulaidi wata natudiavo iavetadi taiadi i na ve'ikwayekwayega faifaiku, wata bani'odi vevine tulaidi wata natudiavo vevinedi taiadi. We'e vevine wata lawadiavo vevinedi taiadi i na ve'ikwayekwayega faifaiku."

### *Tugusa 'adi 'asetai faifaina.*

<sup>54-55</sup> Wata Iesu i vona tomotoga 'waidie i vo, 'Ai'edi 'wa na 'iseni waowa i na vetovotovoiaga 'wa na 'asetai i na 'wei, wata 'ai'edi Malayaubani i na laka 'wa na 'asetai tutuya kumaga.

<sup>56</sup> 'Omi tovekali, tugusanidi abame wata fwayefwayeye i na vemi bega 'ami fata 'wa na 'asetadi ava'ai i na souyedi, we'e 'eba 'isa toketokedi Yaubada i 'i'idewadi matamie tutuya mulina faifaina kebu 'wa da 'isa'inaanidiga. <sup>57</sup> Awale kebu nuanuami 'wa na nua'ivina-'atumai bega 'eda tonovineamo 'wa na nagoi?

<sup>58</sup> 'Ai'edi tamu tomogo i na vevitami tamu sakona faifaina bega i na vagavaimi i na nunawemi 'eba vonayavuga 'waineye, 'wa na vewavawava 'edeye 'wa na sivetovetonovi naninina i vevitamiga faifaina. 'Ai'edi kebu, i na yatomi 'eba vonayavuga 'waineye mulieta toveimea i na 'anivelenemi filisimani nimaneye i na yatomi vanuga 'eba yogona 'waineye. <sup>59</sup> A na vonemi, kebu i na 'etoyavu-matayo'omu bei 'u na miamia nagami tutula 'u na yato'a'avai mulieta i na 'etoyavumu.”

## 13

*'Wa na nuavilami 'alo 'wa na wafa.*

1 Tutuyanina 'waineye tomotoga 'ifwaidi i maia Iesu 'waineye i vo, Me Galili 'ifwaidi i luku vanuga 'eba velu'ui i vevelomu Yaubada 'waineye nika Failato yana tolugaviavo i maia i luvewafadi.” <sup>2</sup> Iesu i vonedi i vo, Fai bani'odi i wafayediga 'wa da nuaniga tomotoganidi i wafaga yadi sakona bwaikaotogina we'e me Galili 'ifwaidi sai'afo? <sup>3</sup> Siwe kebu. A na vonemi, 'ai'edi yami sakona kebu 'wa na vedumwe'ubu'ubusediga, 'omi wata matatabumi 'wa na wafa. <sup>4</sup> Basenadi 'wa 'asetai tomotoga 18 i miamia Ufa Sailoama lili-vaneye nika vanuga manamanawena i 'anifoia i luvewafadi. Fai bani'odi i wafayediga 'wa da nuaniga tomotoganidi i wafaga yadi sakona bwaikaotogina we'e me Ielusalema 'ifwaidi sai'afo? <sup>5</sup> \*Siwe kebu. A na vonemi, 'ai'edi yami sakona kebu 'wa na vedumwe'ubu'ubusediga, 'omi wata matatabumi 'wa na wafa.”

*Iesu i ve, Yaubada kebu nuanuana me Diu i na vematavuloga-matayo'odi.*

<sup>6</sup> Wata Iesu vona-awatabaiega tomotoga i vonedi i vo, Tamu tomogo yana bakule 'ala'ai i tovtovoi. Tutuya fuedi i nunago vuagina faifaina i 'i'isa'ava. <sup>7</sup> Begaidi yana bakula 'ana to'isave'avina i voneni i vo, Malamala 'aitonu a mi-mai nuanuaku vuaga a na 'ewadi siwe kebu tamu a da veveluagai. 'U na talagi, kebu i da lubwaineni fwayafwaya i veve'amubwadodoyeni.” <sup>8</sup> Siwe bakula 'ana to'isave'avina yana vona i tutuli i vo, 'Auvea 'u baileni nagami lamuna a na

'oia wata 'aufafa a na talagi a na veivuya ta na 'iseni malamala 'aitamogana nageneye. <sup>9</sup> 'Ai'edi i na vuaga 'atumaina i na tovtovoi, 'ai'edi kebu, 'u na talagi.”

*Iesu vavine dumwena 'obwana i 'ive'atumaia.*

<sup>10</sup> ✧ Tamu 'Aiata Veawai Iesu i veve tamu me Diu yadi 'eba miava'auta 'waineye. <sup>11</sup> Vanuganina 'waineye tamu vavine basenadi yaiaina i agei begaidi dumwena i 'obwa i miamia malamala 18 kebu 'ana fata i na tonova. <sup>12</sup> Tutuyanina Iesu i 'iseni i goleni i nago 'waineye i voneni i vo, Novuku, 'omu 'akonadi yavuyavumu 'amu viga 'wainega.” <sup>13</sup> Iesu vavine i 'abitonovi nika dumwena i tonova ma yana sosoana Yaubada i subiai.

<sup>14</sup> 'Eba miava'autanina 'ana to'edakumeta i 'iseni i nuasako fai Iesu i kiave'atumi yadi 'Aiata Veawai 'waineye. Faifainanina to'edakumetanina tomotoga 'waidie i vo, 'Aiata 6 nagedie ta na folofolova, 'ai'edi nuanuami ve'atumi 'ami viga 'waidiega 'aiatanidi 'waidie 'wa na maia, we'e 'Aiata Veawai 'waineye kebu.” <sup>15</sup> Iesu yana vona i tutuli i vo, 'Omi tovekali. 'Awami i tatalaboda nani fue'di faifaidi siwe wata 'wa 'i'idewai. 'Omi yami sauluva 'aiata fue'di wata 'Aiata Veawai 'waidie yami 'aisaya 'wa yavuyavudi 'adi vanugayega 'wa nunawedi 'wa veveyemudi, siwe 'asa'aiana folova. <sup>16</sup> We'e de'e vavine i ve'atumi tamu Ebelamo tubuna siwe Seitani i yogoni i miamia malamala 18, i ve'atumaiga 'Aiata Veawai 'waineye i lubwaineni.” <sup>17</sup> Fai bani'odi Iesu i voneyediga 'ana tovedumwe'ai'ai bunudi i ve'alamayamayaga, we'e tomotoga fue'di i sosoana 'eba nuavogana wata 'eba nua'ewa Iesu i 'idewadewadi faifaidi.

*Iesu i awatalatutula 'ayawana bilana 'wainega.*

<sup>18</sup> Wata Iesu tomotoga i vonedi i vo, Bani'odi ta na voneyedi Yaubada yana veimea tomotoga 'waidie yana vebwaika faifaina 'alo ava'ai 'wainega ta na awatalatutula? <sup>19</sup> Yana vebwaika bani'odi 'ayawana bilana siaina tamu tomogo i 'ewai i bakuli. I tabo i vebwaika nika welavi bwaikaotogina bega manuga i mimai didineye i vevegiuva.”

*Vona-awatabai isita faifaina naninina beledi i 'ivebwaiki.*

<sup>20</sup> Wata Iesu i velutoliedi i vo, Bani'odi ta na voneyedi Yaubada yana veimea tomotoga 'waidie yana susula faifaina? <sup>21</sup> Yana susula bani'odi tamu vavine falawa bwaikina i vilai mulieta isita i yatoi, i susula falawa matatabuna 'waineye nika i vebwaika.”

*'Awa welilina.*

<sup>22</sup> Iesu i nunago Ielusalema bega 'atamana bwaikidi wata siaidi 'waidiamo i ve i nago. <sup>23</sup> Tamu tomogo Iesu i velutolieni

i vo, 'Auvea, Yaubada tomotoga fueidi i na 'ita'ita'iedi 'alo kebu?" <sup>24</sup> Iesu yana velutoli i tutuli i vo, 'Wa na vewavawava bega 'awa welilineamo 'wa na luku abame. A na vonemi, 'awaie fueidi nuanuadi beidimo i na nagoi siwe kebu 'adi fata.

<sup>25</sup> ✧ Tutuyanina 'waineye tonivanuga i na tovoi saiboda i na sibodai bega tanotanoge 'wa na tovoi 'wa na vevelutoli 'wa na vo, 'Auvea, nuanuama saiboda 'u na sibaleni." Siwe wata yami vona i na tutuli i na vo, Kebu a da 'asetamiga wata kebu a da 'asetai ava'aiega 'wa maia." <sup>26</sup> Bega 'wa na vo, 'U ve yama 'atamane wata taiadi ta 'ani." <sup>27</sup> Siwe wata i na vo, 'Wa nagoi, 'omi tosakona. Kebu a da 'asetamiga wata kebu a da 'asetai ava'aiega 'wa maia." <sup>28</sup> ✧ Ma yami nuavita bwaikina 'wa na 'we'wela tutuyanina 'wa na 'iseni Ebelamo, Aisake, Iakobo, wata tolu'ivona 'ifwaidi Yaubada yana 'Eba Veimea nageneye i na miamiani we'e 'omi i na tawemi 'wa na obu kalimulie. <sup>29</sup> Tomotoga fueidi i na maia inala yana 'eba lakayega wata yana 'eba inivayega, bolimanayega wata yavalatayega, i na luku Yaubada yana 'Eba Veimea nageneye yana sakali bwaikina 'waineye. <sup>30</sup> Tomotoga fueidi 'asiau i vemuliga 'awaie Yaubada 'waineye i na kumeta, we'e tomotoga fueidi 'asiau i kumeta, ma'itufa 'awaie i na vemuli."

*Iesu i nuavita me Ielusalema faifaidi.*

<sup>31</sup> Wata tutuyanina 'waineye 'ifwaidi totafalolo Falisi i maia Iesu i voneni i vo, Kini Elodi nuanuana i na luvewafamu begaidi 'u na dega 'u na nago tulineye." <sup>32</sup> Iesu yadi vona i tutuli i vo, Elodinina ma yana 'asetai givagivayega sauluva sakoidi i 'i'idewadi bani'odi 'ou'ou walawala'ai. 'Wa na nagoi 'wa na voneni 'wa na vo, 'Asiau wata 'awa'awai Iesu toviga i na 'i'ive'atumaidi wata tomotoga yaiaina i agediga i na vonavona i na 'a'awa'a'idi we'e 'aiata 'ana vetonu 'waineye yana folovanidi i na ve'a'avadi." <sup>33</sup> Siwe a na vonemi, 'asiau a nunago, 'awa'awai i na 'ataidiga a na le'wa Ielusalema. Yaubada yana tolu'ivonavo matatabudi bei i wafaga, i lub-waineku yau wata bei a na wafa.

<sup>34</sup> ✧ Iesu i taivonavona i vo, Ieu, me Ielusalema, me Ielusalema, Yaubada yana tolu'ivonavo 'wa luvewafadi wata yana tomata'aulelevo i vetunediga 'waimie, 'wa tutuwafadi kileuyega. Kamukamu natudiavo fafedie i vevedogidi, wata bani'odi yau, tutuya fueidi igodi a da 'avalamaigimi siwe 'wa baibaileku. <sup>35</sup> Tutuya de'e i na nagoga yami 'atamana i na velovi, we'e yau kebu wata 'wa na 'ise'isekuga i na nagoga mulieta 'wa na vo, Taunina i mai 'Auvea 'ana wagavayega ta na subiai," nika bei wata 'wa na 'iseku."



## 14

*Tomogo vivigina Iesu i 'ive'atumaia.*

1-2 Tamu 'Aiata Veawai 'waineye Iesu i nago tamu Falisi yadi to'edakumeta yana vanuge i na 'ani. Bei tamu tomogo tomogona tubutubugina i veluagai we'e tomotoga fue di vanuganina nageneye i vemata'i'i'ieni Iesu, 'ai'edi i na 'ive'atumaia 'Aiata Veawai 'waineye. 3 ✧ Begaidi Iesu i velutoli Falisi wata ve'etoboda 'adi tovevo 'waidie i vo, Bani'odi yada ve'etoboda? 'Ada fata tovigata na 'ive'atumaia 'Aiata Veawai 'waineye 'alo kebu?" 4 Siwe kebu tamu ava'ai i da voneyeniga. Bega Iesu toviganina nimaneye i 'abi i mieni i 'ive'atumaia mulieta i voneni i nago. 5 Wata Iesu i velutoliedi i vo, 'Ai'edi tamu natumu 'alo yamu 'aisaya i na be'u kulie 'Aiata Veawai 'waineye bani'odi 'u na munegi? A 'asetai 'u na 'abiwalowaloga 'u na silakai 'aiananina 'waineye." 6 Siwe Falisi wata ve'etoboda 'adi tovevo kebu tamu ava'ai i da voneyeniga.

*Tayega 'ana sauluva.*

7 ✧ Tutuyanina tomotoga i lukuluku 'ani faifaina Iesu i 'isedi i ve'abiwalowaloga nuanuadi i na miabui to'edakumeta yadi 'eba miabui 'waidie. Begaidi i vona-awatabai 'waidie. 8-9 I vo, 'Ai'edi tamu tomogo i na tayegimu sakali 'waineye, kebu 'u na miabui to'edakumeta yadi 'eba miabui 'waidie. 'Ai'edi 'akonadi bei 'u na miabuiga, voke tamu tomogo bwaikina wata i tayegi i na vemuli i na le'wa bega tonisakali i na vonemu 'u na tovoi we'e bei i na miabui. We'e 'omu 'u na nago 'aila'a mulidie 'u na miabui 'eba bunumayaga 'waimuye. 10 Bega 'ai'edi i na tayegimuga 'u na nago 'u na miabui tanotanoge mulieta tonisakali i na 'isemu i na vonemu i na vo, Iaku, 'u tovoi 'u mai side bei 'eba miabui 'atumaina 'waineye." Tomotoga matatabudi i na 'isemu i na ve'ililibuyemu. 11 ✧ Egavo taunidi i na awa'ai'aidiga, 'awaie Yaubada i na kiaobuyedi we'e egavo taunidi tonuaobu, 'awaie Yaubada i na kialakaidi."

12 ✧ Wata Iesu i vona tonisakali 'waineye i vo, 'Ai'edi 'ani'ani siaina 'alo bwaikina 'u na 'idewaiga, kebu emwavo 'u na tayegidiga, bani'odi taimwavo, yamu 'aila'a 'alo tomotoga 'ai'aiwabudi i miamiani yamu 'atamane, fai bola wata i na tayegimu bani'odi i tutuli. 13 Siwe a na vonemu. 'Ai'edi sakali bwaikina 'u na 'idewaiga side tomotoganidi 'u na tayegidi. Wekowekoma, bwalobwaloko, tubusakosako, wata tomatasako. 14 'Eba sosoana 'waimuye tomotoganidi 'u tayegidi faifaina fai kebu 'adi fata i na tutuli. Bola Yaubada

✧ 14:3: Luk 13:10-16 ✧ 14:7: Mad 23:2-3,6 ✧ 14:11: Luk 18:9-14 ✧ 14:12: Luk 6:32-35

'ana todumwebika yadi tovi-vaitugana 'waineye bei yamu nuakalikalina 'ana tutula 'u na veluagai.”

*Iesu i vona-awatabai sakali bwaikina faifaina.*

15 ✧ Sakalina 'waineye tamu tomogo Iesu yana vona i nogai bega i vona Iesu 'waineye i vo, 'Eba sosoana bwaikina egavo i na luku Yaubada yana 'Eba Veimea nageneye yana sakali bwaikina 'waineye.” 16 Iesu yana vona i tutuli vona-awatabaiega i vo, Tamu tomogo sakali bwaikina i 'idewai tomotoga fuedi i tayegidi. 17 Sakalina 'ana 'aiata 'waineye yana tofolova i vetunei tomotoganidi i tayegidiga i vonedi i vo, 'Wa maia ta na nagoi nani matatabuna 'akonadi i 'idewadi.”

18 Siwe tomotoganidi i vonediga i ve'alabaibaila. Tamu tomogo i vo, Yau 'asa'aiadi fai yaku fwayafwaya a kimwanei a na nago a na 'iseni.” 19 Wata tamu i vo, Yau 'asa'aiadi fai 'aisaya 10 a kimwanedi a na nago a na 'ewadi a na miedi.” 20 ✧ Wata tamu i vo, Yau 'asa'aiadi 'asiauotoga a nagi begaidi kebu a na wai.” 21 Bega tofolovanina i vilai i mai i lu'ivona 'ana toveimea 'waineye. Toveimeanina taunina tonivanuga i nuasako yana tofolova i voneni i vo, 'U na lilide 'u na nago 'atamane wata 'eda 'waidie, wekowekoma, bwalobwaloko, tomatasako wata tubusakosako 'u na vagavaidi 'u na miedi.”

22 Mulieta tofolovanina wata i vilai i mai i vo, 'Auvea, ava'ai 'u vonekuga 'akonadi a 'idewai, a nago a vonedi i maia siwe 'ani'ani bwaikaotogina 'awasasa 'ifwaidi i 'eno'enovi.” 23 Bega 'ana toveimea i vo, 'U na nago 'ani'ie kwedeye wata wala'aie tomotoga 'u na veluagadiga 'u na lukakadedi i na maia bega 'awasasa i na veadagi. 24 A na vonemi, egavo nagami a tayegidi kebu tamu sai'afo yaku 'ani'ani i na 'alatonovi.”

*Egavo 'adi fata Iesu i na vetutuyameni?*

25-26 ✧ Tamu tutuya Iesu wata 'aila'a bwaikina taiadi i nunagoi i sivilai i vonedi i vo, Aitoi nuanuana i na mai 'waikuye bega i na vetutuyameku, nagami tamana, inana, yana vavine, natunavo, tainavo, novunavo, wata taunina yana nuanua i na bailedi 'aiseku i na nuanuaniku. 27 ✧ 'Ai'edi aitoi nuanuana mogitana i na mai 'waikuye, nagami taunina yana nuanua i na bailedi. Fai i na vematayakeyakeku veviga bwaikina i na veluagai yau bani'odi a na veluagai. Voke i na wafa faifaiku yau bani'odi a na wafa 'ai lagalagana 'waineye. 'Ai'edi aitoi kebu bani'odi i na vesauluvediga, taunina kebu 'aku tovetutuyama.

28 Nagami 'wa na venua'ivina 'ami fata folovanina 'wa na 'idewai 'alo kebu. Side bani'odi. 'Ai'edi aitoi 'waimiega nuanuana vanuga bwaikina i na yogoni nagami yana mani i na 'iseni 'ai'edi vanuganina 'ana tutula 'ana fata. 29 'Ai'edi yana mani kebu i na 'iseniga, tutuyanina yana folova i na velamu voke bola mani i na 'a'aveni i na ve'ale'usa wata tomotoga i na 'iseni i na sidibidibieni. 30 I na vo, Tomogo de'e nuanuana vanuga i na yogoni siwe kebu 'ana fata i na ve'a'avai.”

31 Wata bani'odi 'ai'edi kini vala i na nogai tamu kini ma yana tolugaviavo 20,000 i mimaiia nuanuadi taiadi i na vetalaga, siwe kininina vala i nogaiga nagami i na venua'ivina 'ana fata yana tolugaviavo 10,000 i na vetoketoke bega 'adi gaviavo 20,000 taiadi i na vetalaga. 32 'Ai'edi kebu 'adi fataga, bola no'o bei vala i na vetunei i na talabodeni wata i na velutolieni i na vo, Ava'ai nuanuamu a na velemu bega kebu ta na vetalaga?” 33 ✨Wata Iesu i vonedi i vo, Wata side bani'odi, kebu tamu aitoi 'ana fata i na vo, Yau Iesu yana tovetutuyama,” 'ai'edi kebu nani matatabuna i na bailediga.

*Iesu 'ana tovetumaganavo bani'odi eyaga.*

34 Eyaga nani 'atumaina, siwe 'ai'edi i na ve'ulaufa kebu 'ana fata i na vegola-vaitugana. 35 Kebu 'ana fata bega 'ani'ani ta na 'ive'iwani wata kebu 'ana fata ta na yemuya, iwayavulagi i lubwaineni. 'Akonadi yaku vona 'wa nogai, siwe 'wa na venua'ivineni nika 'wa na 'asetai.”

## 15

*'Aisaya sifi i vuyo.*

1 ✨Tamu 'aiata takesi 'ana tolaugogona wata 'ifwaidi tosakona i maia Iesu 'waineye yana vona i na nogai. 2 Siwe totafalolo Falisi wata ve'etoboda 'adi tovevo 'ifwaidi i vebonavoluvolu i vo, Kebu tamu sai'afo 'ana 'isa 'atumainaga fai no'o tomogonina tosakona i veveianedi wata yana sauluva sakoitogina fai taiadi i 'ani'ani.” 3-4 Yadi nuanua Iesu i 'asetai begaidi vona-awatabaiega i vonedi i vo, 'Ai'edi 'waimiega aitoi ma yana 'aisaya sifi 100 we'e 'aitamogana i na yogo'eni nika i na vuyo, bani'odi i na munega? Sifi 99 i na yatodi i na miamiani gidegideye i na vilai i na nago i na lualeni i na nagoga nika i na veluagai. 5-6 ✨Tutuyanina i na 'ewai i na sosoana bwaikina i na evai i na naweni yana vanuge. Enavo matatabudi i na goleva'augidi i na vo, Ta na sosoana fai yaku sifi i vuyoga 'akonadi a veluagai.” 7 A na vonemi, wata bani'odi 'eba sosoana bwaikina abame 'ai'edi

tosakona 'aitamogana i na nuavilai, we'e tomotoga 'atumaidi 99 kebu i da vuyoga faifaidi sosoana sai'afo.

*Vavine i sosoana yadi mani i veluagai faifaina.*

<sup>8</sup> 'Ai'edi tamu vavine ma yadi mani siliba 10, we'e 'aitamogana i na taweni, bani'odi i na munega? Mageta i na luvetogali, vanuga i na divuya i na lauuala-'atumai i na nagoga nika i na veluagai. <sup>9</sup> Tutuyanina i na veluagai ediavo matatabudi i na goleva'augidi i na vonedi i na vo, Ta na sosoana fai yama mani 'a taweniga 'akonadi 'a veluagai." <sup>10</sup> Wata Iesu i vo, A na vonemi, wata bani'odi Yaubada yana anelose i na sosoana bwaikina 'ai'edi tamu tosakona i na nuavilai."

*Iesu i ve Yaubada yana nuakalikali tosakona 'waidie faifaina.*

<sup>11</sup> Wata Iesu i vona-awatabai i vo, Tamu tomogo natu-  
navo iavetadi 'adi 'ailuga. <sup>12</sup> Bwasiona tamana i voneni  
i vo, Tamaku, bola 'u na wafa yamu kukua wata yamu  
fwayafwaya ma tatau 'a na veusedi. Siwe nuanuaku  
'asiauotoga yau faifaiku 'u na 'idi-vagaseni 'u na veleku."  
Bega tamadi nani matatabuna i veusedi 'adi 'ailuga 'waidie.

<sup>13</sup> ✨'Aiata 'ifwaidi i 'a'ava, bwasiona 'ana veuveutanina i  
vekimwaneyedi, tutulidi i 'ewadi nika i 'idewadewa i tauya.  
I nago 'ani'ieogose tamu 'atamana bwaikina 'waineye, bei  
sauluva sakoidi 'waidie yana mani i ve'amubwadodoyedi.  
<sup>14</sup> Tutuyanina yana mani matatabuna i ve'a'aveni, loka  
bwaikina i souyeni 'awalawanina 'waineye we'e yana mani  
kebu tamu sai'afo i da luvegelaleni. <sup>15</sup> Begaidi i nago  
'atamana 'ana tomogo tamu 'waineye nuanuana i na folova  
'waineye bega i voneni i na nago tamu yana tanoga 'waineye  
yana bawe i na 'isave'avinidi. <sup>16</sup> ✨I lase bwaikina nuanuana  
bawe 'adi fwalaegilayega i na 'ani we'e kebu tamu aitoi tamu  
ava'ai i da veleni.

<sup>17</sup> I miamia tutuya manamanawena mulieta nuana i vilai  
i vo, Tamaku yana tofolovavo matatabudi ma 'adi'adi 'adi  
fata i na 'ani-wayogedi, we'e yau de'e laseyega a na mwea.  
<sup>18</sup> A na tovoi a na nago tamaku 'waineye a na voneni a na  
vo, Tamaku, a sakona matamuye wata Yaubada mataneye.  
<sup>19</sup> Kebu i da lubwainemu 'u na ve'awa-natunekuga, 'u na  
veimeyekumo a na vetofolova 'waimuye." <sup>20</sup> Bega i tovoi i  
vilai i nago tamana 'waineye.

Tamana 'ani'ieyega i 'isanaweni i 'isanuakalikali i lilide  
i nago i 'avalamaigi i yaogi. <sup>21</sup> Natuna i vo, Tamaku yau  
a sakona matamuye wata Yaubada mataneye. Kebu i da  
lubwainemu 'u na ve'awa-natuneku." <sup>22</sup> Siwe tamana

yana tofolovavo i goledi i maia i vonedi i vo, 'Wa na lilide talauma 'atumaina 'wa na mieni ta na ve'weseni, wata didikumakuma nimaneye 'wa na veagei wata 'ageyafayafa 'ageneye. <sup>23</sup> Mulieta 'wa na nagoi bulumakau natudi veve'anina 'wa na vunugi ma yada sosoana 'ani bwaikina ta na 'idewai. <sup>24</sup> \*Fai natuku de'e i wafa wata i yawasavaitugana. I vuyo wata a veluagai." Bega 'ani'ani i 'idewadewa i 'ani i sosoana.

<sup>25</sup> Tutuyanina i 'ani'ani, natuna tulaina i folofolova bakule. I vilai i mimai sai'afoga i na le'wa mwalilige nika inava i nogai i tavotavola. <sup>26</sup> Tamu tofolova i goleni i nago i velutolieni i vo, Ava'ai no'o?" <sup>27</sup> Tofolova i vo, Taimu i le'wa bega tamami i sosoana bulumakau natudi veve'anina i nikei fai natuna kebu i da wafa, ma yawaina i vilai i mai."

<sup>28</sup> \*Natuna tulaina i nuasako bwaikina kebu nuanuana i na luku vanuge. Bega tamana i souyeni i nago i voneni nuanuana taiadi i na luku. <sup>29</sup> Siwe natuna i vona i vo, Tamaku, malamala fuedi ma yaku tokemaiga a folofolova 'waimuye yamu veimea matatabuna a vematayakeyakedi. Siwe kebu tamu ava'ai 'u da veleku. Kebu tamu 'aisaya siaina 'u da veleku bega ma ekwavo 'a da 'ani 'a da sosoana. <sup>30</sup> We'e de'e natumu yamu kukua i ve'amubwadodoyedi vevine toalagogona 'waidie siwe tutuyanina i vilai i mai bulumakau veve'anina 'u nikei faifaina."

<sup>31</sup> Yana vona tamana i tutuli i vo, Natuku, 'omu tutuya fuedi taiadi ta miamia. Nani matatabuna 'akonadi a 'anivelenedi 'waimuye. <sup>32</sup> \*I lubwaineda ta na 'ani ta na sosoana fai taimu i wafa wata i yawasa, i vuyo siwe wata ta veluagai."

## 16

*To'isave'avina sakoina ma yana 'asetai.*

<sup>1</sup> Iesu i vona yana tovetutuyamavo 'waidie i vo, Tamu tomogo 'ai'aiwabuna yana tofolova i voneni bega yana kukua matatabuna i na 'isave'avinidi. Tamu tutuya tomogo tamu i nago i lu'ivona tomogo 'ai'aiwabuna 'waineye i vo, Yamu kukua 'ana to'isave'avina yana sauluva sakoina yamu mani i veve'amubwadodoyedi." <sup>2</sup> Bega tomogo 'ai'aiwabuna yana to'isave'avina i goleni i mai i voneni i vo, Yamu sauluva 'akonadi a 'asetai. Nuanuaku yaku kukua matatabuna tutulidi 'u na va'augidi ta na 'iseni 'aivia mani i luku, 'aivia mani i souyedi, nika ta na 'asetai 'aivia mani 'u ve'amubwadodoyedi. 'U na 'idewa'a'avai mulieta 'omu 'u na 'a'ava folovanina 'wainega." <sup>3</sup> Tofolovanina i nago 'aisena i nuanua i vo, Yaku 'auvea i na veugeugeku, bani'odi a na munega? Kebu 'aku fata a na bakulaga fai luluku mweana,

wata talavelu'ui bunumayamayagina. <sup>4</sup> 'Akonadi a nuani. Tamu nani a na 'idewai bega tutuyanina a na souyeku a na nago tomotoga fueidi i na vonevoneku yadi vanuge a na 'ani'ani wata a na 'eno'eno.”

<sup>5</sup> Basenadi tomotoga 'ifwaidi kukua i 'ewa-maimaigidi yana 'auvea 'wainega bega 'awaie i na tutula, begaidi to'isave'avinanina i goledi 'aitamogana 'aitamogana i maia 'waineye. Tamu tomogo i velutolieni i vo, Ava'ai bola 'u na tutuli basenadi yaku 'auvea 'wainega 'u 'ewaiga?” <sup>6</sup> I vo, Bunama ma dalamudi 100.” To'isave'avina i voneni i vo, Basenadi naninidi 'u 'ewadina we'e 'u kilumi side 'ana lubulubu. 'U miabui, 'u geuya 100, 'u na kiluma-matayo'oi 50.” <sup>7</sup> Wata tamu tomogo i velutolieni i vo, Ava'ai bola 'u na tutuli basenadi yaku 'auvea 'wainega 'u 'ewaiga?” I vo, Witi ma baikidi 100.” To'isave'avina i voneni i vo, Side 'ana lubulubu basenadi 'u 'ewadina bei 'u kilumi, 'u miabui 'u geuya 100, 'u na kiluma-matayo'oi 80.” Wata 'ifwaidi i maia, bani'odi i munegidi ava'ai basenadi i 'ewadiga faifaidi. <sup>8</sup> Tutuyanina yana 'auvea valana i nogai i vo, Yana sauluva sakoina i folova-sako 'waikuye, siwe yana 'asetayega yana sakona i velutavutavuni.”

Wata Iesu i vo, Vona mogitana, tomotoga yadi nuanua bwaikina kukua, tutuya fueidi yadi 'aseta bwaikina bega yadi kukua i 'i'imoso'i, we'e Yaubada 'ana tove'ililibu tutuya fueidi yadi 'aseta siaina.”

<sup>9</sup> ✧Wata Iesu i vona yana tovetutuyamavo 'waidie i vo, A na vonemi, tomotoga 'wa na 'ivaisedi yami kukua 'waidiega bega i na veianemi. Bola kukuanidi i na 'a'ava, ma yami sosoana 'wa na luku 'eba mia-vagata 'waineye.

*'Aseta mogitana kukua 'ana 'isave'avina faifaina.*

<sup>10</sup> ✧Aitoi nani siaidi i na 'isave'avinidi 'atumaina taunina ma 'ana vetumagana, wata 'ana fata nani bwaikidi i na 'isave'avinidi 'atumaina. We'e aitoi nani siaidi i na 'isave'avinidi sakoina, wata nani bwaikidi i na 'isave'avina-sakodi. <sup>11</sup> Begaidi 'ai'edi fwayafwaya 'ana 'ai'aiwabu 'wa na ve'amubwadodoyedi, 'omi kebu ma 'ami vetumagana, 'awaie kebu tamu aitoi 'ai'aiwabu mogitana i na velemini bega 'wa na 'isave'avinidi. <sup>12</sup> 'Ai'edi mali tomotoga yadi kukua 'wa na 'isave'avina-sakodi bega i na 'asetami kebu ma 'ami vetumagana, 'awaie igodi 'ami 'anivelena i na bodami.

<sup>13</sup> ✧Kebu 'ana fata tofolova 'aitamogana we'e 'ana toveimeavo 'adi 'ailuga 'waidie i na folofolova. Tamu i na baileni, tamu i na nuakalikalieni. 'Alo tamu i na vedumwe'ai'aieni, tamu i na vematayakeyakeni. Kebu 'ami fata 'wa na vefolova Yaubada wata kukua 'waidie.

14 ✧ Tutuyanina Falisi Iesu yana vona i nogai, i sidibidibieni fai yadi nuanuana bwaikina mani. 15 ✧ Bega Iesu i vonedi i vo, 'Omi kumanimiavo nuanuami mali tomotoga i na 'isemi i na vo, 'Atumaidi," siwe Yaubada yami nuanua matatabuna i 'asetadi. Naninidi tomotoga i subisubiadiga, Yaubada mataneye nani-'avo'avovo.

*'Ifwaidi Iesu yana vona.*

16 Basenadiotoga Yaubada veimea i yatodi bega tomotoga i na vematayakeyakedi, bani'odi ve'etoboda Mosesi 'wainega wata tolu'ivonavo 'adi kilukiluma. Veimeanidi i 'eno'eno nika Ioni Tobafitaiso i souyeni. Tutuyanina 'waineye Vala 'Atumaina 'ana lau'age i velamu Yaubada nuanuana tomotoga i na veimeyedi yana 'Aila'a nageneye. Tomotoga fuedi i nogai i ve'edaeloelo nuanuadi i na luku Yaubada yana 'Eba Veimea nageneye. 17 ✧ 'Ana fata abama wata fwayafwaya i na 'a'ava, we'e Yaubada yana veimeanidi 'waidiega kebu tamu sai'afu i na 'a'ava.

18 ✧ 'Ai'edi aitoi yana vavine i na vesa'ilidi wata tamu vavine i na nagidi i sakona Yaubada mataneye, we'e tomogo vavine nagisa'isa'ilidi i na nagidiga i na sakona Yaubada mataneye.

*Tomogo 'ai'aiwabuna wata Lasalo.*

19 Tamu tomogo 'ai'aiwabuna i miamia, tutuya fuedi kaleko 'atumai'avadi 'waidiega i vavaigavu wata 'ani'ani 'atumaidi i 'ani'ani. 20-21 We'e tamu tomogo i vewekowekoma 'ana wagava Lasalo, tutuya fuedi enavo i mimaieni tomogonina 'ai'aiwabuna yana vanuga 'awaneye. Bei i vevemiabuia nuanuana mukumuku i na 'ani'ani tomogo 'ai'aiwabuna 'ana ta'ulayega. Tomogonina bonubonuna begaidi 'ou'ou i mimai yana bonu i luluyamudi.

22 Tutuyanina Lasalo i wafa, anelose abamega i vagavaia i naweni Ebelamo lilivaneye i miabui. Mulieta tomogo 'ai'aiwabuna i wafa i tavuni i nago 'ai-'ala'alase. 23 Bei veviga bwaikina i veveluagai, i 'isalaka Ebelamo i 'iseni 'ani'ie Lasalo taiadi. 24 Bega i vegole 'waineye i vo, Tamaku Ebelamo, 'u da 'isanuakalikalieku Lasalo 'u da vetunei nimana i da lu'utuvi ufeye meaku i da vebikai, yau veviga bwaikina a veveluagai 'ai-'ala'alata de'e 'waineye." 25 Siwe Ebelamo i voneni i vo, Natuku, 'u na nuani basenadi ma yawaimuye nani fuedi 'atumaidi 'waimuye we'e Lasalo sakoidi. Siwe 'asiau ma yana sosoana nani 'atumaidi i veveluagadi, we'e 'omu 'u veveviga. 26 Wata fai bwagala bwaikina 'omu wata 'ima kamwadeye i 'eno'eno bega egavo nuanuadi i na wai

kebu 'adi fata wata kebu tamu aitoi 'ana fata 'waimuyega i na damanama 'waimeye.”

<sup>27-28</sup> Tomogo 'ai'aiwabuna i vo, Tamaku, we'e 'ai'edi kebu 'ana fataga, a vevelu'ui 'waimuye nuanuaku Lasalo 'u na vetunei tamaku yana vanuge taikwavo 5 i na vonedi i na nuaviladi bega de'e bei kebu i na mimaiia veviga 'waineye.”

<sup>29</sup> Wata Ebelamo i vo, 'Akonadi ve'etoboda Mosese 'wainega wata Yaubada yana tolu'ivonavo yadi vona i 'eno'enovi, i lubwainedi vonanidi i na 'isedi wata i na vematayakeyakedi.”

<sup>30</sup> Wata tomogo 'ai'aiwabuna i vo, Tamaku Ebelamo, we'e kebu 'ana fataga, siwe 'ai'edi tamu tomogo wafawafana i da yawasa-vaitugana i da nago i da vonedi 'adi fata i da nuaviladi yadi sakona 'waidiega.” <sup>31</sup> ✧Siwe Ebelamo i vo, Mosese wata tolu'ivonavo yadi vona i bailaga wata bani'odi 'ai'edi towafa i na yawasa-vaitugana kebu yana vona i na vetumaganeni.”

## 17

### *Sakona faifaina.*

<sup>1</sup> Iesu i vona yana tovetutuyamavo 'waidie i vo, 'Eba sailubu fuedi i 'eno'enovi, 'waidiega tomotoga sakona 'waidie i be'ube'u. 'Ai'edi aitoi tamu tomotoga i na vetalaimimili bega i na sakonaga, nuakalikalina fai 'awaie vita bwaikina i na veluagai. <sup>2</sup> 'Ai'edi tovetalaimimilanina tamu aitoi kwamana de'e bani'odi i na vetalaimimili, bola tomogonina veviga bwaikaotogina i na veluagai Yaubada 'wainega. Siwe nagami tomotoganina kebu i da vetalaimimilaga, bei tomotoga 'ifwaidi kileu vitana i da yogona-matayo'oi 'odoneye i da taweni malaveseye, veviga siaina i da veluagai. I da wafa-matayo'oga i lubwaineni, nika kebu i da vetalaimimilaga wata kebu veviga bwaikaotogina i da veluagai Yaubada 'wainega. <sup>3</sup> ✧Begaidi taunimi 'wa na 'isave'avinimi.

'Ai'edi tamu iami i na vesauluva sakoina 'waimie, 'wa na talabodeni wata 'ai'edi i na nuavilai yana sakona faifaina, 'wa na nuatavuni. <sup>4</sup> 'Ai'edi 'aiata 'aitamogana nageneye sakona 7 i na 'idewadi 'waimie, yana mai 'aitamogana 'aitamogana 'waimie i na vo, A nuavita yaku sauluva faifaina, 'u da nuatavuni,” bonana 'wa na nogai 'wa na nuatavuni.”

### *Vetumagana faifaina.*

<sup>5</sup> ✧Tomata'aulelevo yadi 'Auvea i voneni i vo, Nuanuama yama vetumagana 'u na 'imoso'iedi i na vetoketoke.”

<sup>6</sup> ✧'Auvea yadi vona i tutuli i vo, 'Ai'edi yami vetumagana siaidi bani'odi bila, 'ami fata welavi bwaikaotogina de'e



'waineye 'wa na vo, 'U 'aniabumu, wata taunimu 'u bakulimu eyage," nika yami vona i na vematayakeyakeni.

*Tofolova yana sauluva.*

7 'Ai'edi 'waimiega tamu aitoi ma yana tofolova, tofolovanina i na bakubakula 'alo 'aisaya i na 'i'isave'avinidi, tutuyanina i na vilai i na mai vanuge yana toveimea bani'odi i na voneyedi 'waineye? 'Wa da nuani, i da vo, 'Asa'aiana 'u miabui 'u 'ani"? 8 A nuani kebu. We'e mogitana i da vo, 'U 'idewadewa 'aku'aku, kaleko 'atumaina 'u na ve'wesena 'aku'aku wata 'aku alu'ai 'u na mimaiedi, i na 'a'avana mulieta 'omu 'u na 'ani." 9 Fai taunina yana tofolova kebu i na vekaiwa 'waineye, folovanina i 'idewaiga i lubwaineni. 10 Wata bani'odi 'omi, naninidi a voneyediga matatabuna 'wa 'i'idewadiga 'wa na vo, 'Asa'aiana, fai 'ima yamu tofolovavo, begaidi 'a 'idewadiga i lubwainema."

*Tomotoga waiwaiseselidi 10 Iesu i 'ive'atumaidi.*

11 Iesu i nunago Ielusalema bega 'awalawa Samelia wata Galili kamwadiamo i nago. 12-13 \*Sai'afoga i da le'wa tamu 'atamana 'waineye nika tomotoga waiwaiseselidi 'adi 10 i veluagadi. 'Ani'ie i tovoi bega i vegole i vo, 'Auvea Iesu, 'u da nuakalialiema."

14 \*Akonadi i 'isedi begaidi i vonedi i vo, 'Wa na nagoi tovelomu 'waidie i na 'iseimi 'akonadi 'wa ve'atumai." Tomotoganidi 10 i nunagoi 'edeye nika matatabudi i ve'atumai. 15 Matatabudi taunidi i 'isedi 'akonadi i ve'atumai, we'e tamu iadi ma yana sosoana i vilai i mimai Iesu 'waineye, bonana bwaikinega Yaubada i subisubiai. 16 \*Ma yana ve'ililibu i be'u Iesu mataneye i vekaiwa 'waineye. Tomogonina tomogo Samelia taunidi kebu me Diu taiadi i da veveiana.

17 Iesu i voneni i vo, Tomotoga 10 a 'ive'atumaimi, we'e emwavo 9 ava'aibe? 18 Emwavonidi 'adi 9 me Diu, we'e 'omu tulimu siwe 'u vilamu 'u mai 'u vekaiwa Yaubada 'waineye." 19 Wata Iesu i voneni i vo, 'U tovoi 'u nago, yamu vetumagana 'wainega 'akonadi 'u ve'atumai."

*Yaubada yana veimea yana mai faifaina.*

20 \*Tamu tutuya 'ifwaidi totafalolo Falisi Iesu i velutolieni i vo, Ava'ai tutuyaga Yaubada yana veimea i na mai tomotoga 'waideye?" Yadi vona i tutuli i vo, Yana veimea yana mai kebu 'wa na 'iseniga. 21 Kebu tamu aitoi 'ana fata i na vo, Side taunina," 'alo i na vo, Sino'o taunina," fai yana veimeanina 'akonadi i mai tomotoga 'waimie."

*Iesu yana mai faifaina.*

\* 17:12-13: Vei 13:45-46    \* 17:14: Vei 14:1-4; Luk 5:14    \* 17:16: Ion 4:9

\* 17:20: Ion 3:3, 18:36

22 ✧ Mulieta yana tovetutuyamavo i vonedi i vo, 'Aiata 'ifwaidi i na 'a'ava 'wa na vo, Iesu i da souyeni, sai'afo ta da 'iseni," siwe kebu 'ana fata yau a vetomotogaotoga bei a na souyeku. 23 'Awaie vala 'wa na nogai 'akonadi a souyeku, tomotoga 'ifwaidi i na vo, Side taunina," 'alo i na vo, Sino'o taunina," kebu bonadi 'wa na vetumaganedi wata kebu 'wa na yogo'wailidi. 24 'Ai'edi tomuyoana i na kianamali abama matatabuna i na magetai, wata bani'odi yau a vetomotogao-toga tutuyanina a na vilaku a na mai tomotoga matatabudi i na 'isa'a'avaku. 25 Siwe nagami tomotoga 'asiau ma yawaidi i na vedumwe'ai'aieku veviga bwaikina a na veluagai.

26-27 Basenadiotoga Noa yana tutuye tomotoga i nunuatahutavuna, 'ani'ava, yemu'ava, nagi'ava, nika Noa i dodoga yana wakeye mwai bwaikina i uledi matatabudi i ve'alawafawafa. Yau a vetomotogaotoga yaku mai-vaitugana wata bani'odi.

28-29 Wata basenadiotoga Lota yana tutuye tomotoga i nunuatahutavuna, 'ani'ava, yemu'ava, i kimwakimwane wata i vevekimwane, i bakubakula wata i 'a'aiyogona vanuga, nika Lota i tovoi 'atamana Sodoma i 'iaweni 'ai-'ala'alata wata manufagila abamega i obu matatabudi i 'alaidi. 30 Yau a vetomotogaotoga yaku souyagi wata bani'odi, tomotoga i na nunuatahutavuna nika bei a na le'wa.

31 ✧ Aiatanina 'waineye 'ai'edi aitoi masi'edeye i miamia kebu 'ana fata i na luku vanuge yana kukua i na 'ewadi i na dega-matayo'o. Wata aitoi i nago bakule, kebu 'ana fata i na vilai vanuge tamu ava'ai 'ana 'ewa faifaina. 32 'Wa na nuanidi Lota yana vavine. 'Ai-'ala'alata 'wainega i degadega i siviladi i wafa. 33 Aitoi yana mia 'ana 'atumaina i na ve'o'oleni, kebu nuanuana i na tauyeni faifaiku i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku, mia 'atumaina wata miamia-vagaina i na veluagai. 34 A na vonemi, lovananina 'waineye tomotoga 'adi 'ailuga i na 'eno'enovi 'eba 'eno 'aitamogana 'waineye, tamu Yaubada i na vagavaia i na naweni we'e tamu i na baileni. 35 Vevine 'adi 'ailuga 'ani'ani i na 'i'idewadewa, tamu Yaubada i na vagavaidi, we'e tamu i na bailedi. [36 Tomotoga 'adi 'ailuga i na bakubakula, 'aitamogana Yaubada i na vagavaia, tamu i na baileni." ] 37 Tovetutuyamavo i velutolieni i vo, 'Auvea, ava'aibe bei naninidi i na souyedi?" Iesu i vo, 'Ai'edi manusi-bosibo 'wa na 'isedi i na vava'auta bei mogitana tamu nani wafana i 'eno'eno."

## 18

*Iesu i vona-awatabai 'wabula wata toveimea faifaidi.*

<sup>1</sup> ✧Mulieta Iesu vona-awatabaiega i ve tovetutuyamavo 'waidie bega tutuya fue di i na vevelu'ui Yaubada 'waineye kebu i na 'ailove. <sup>2</sup> Iesu i vo, Tamu vonayavuga 'ana toveimea kebu Yaubada i da ve'ililibuyeni we'e tomotoga faifaidi kebu i da nuanua. <sup>3</sup> 'Atamananina 'waineye toveimeanina i mi-amiaga wata bei tamu 'wabula i miamia. Tutuya fue di i nunago toveimeanina 'waineye i vevelu'ui i vo, Tamu tomogo i vesauluva sakoina 'waimeye, nuanuama yamu veimea 'wainega 'u na 'ivaisema. <sup>4-5</sup> ✧Tutuya manamanawena toveimeanina i baibaila kebu nuanuana i na 'ivaisedi, siwe mulieta i logi yana nuanua i sivilai i vo, Yaubada kebu a da ve'ililibuyeni we'e tomotoga faifaidi kebu a da nuanua, siwe vavine yadi mai-vaivaitugana faifaina a 'abiawa begaidi a na 'ivaisedi. 'Ai'edi kebu a na veimea bega 'aivaita i na veluagai, tutuya fue di i na mimai-vebogi 'waikuye i na 'ivelogilogiku.”

<sup>6</sup> Wata Iesu i vonedi i vo, 'Wa na nuani toveimeanina yana vona. <sup>7</sup> ✧Toveimea sakoina siwe vavine i 'ivaisedi, we'e 'omi mogitana 'aivaita 'wa na veluagai Yaubada 'wainega fai taunina 'atumaiotogina. 'Omi 'wa da nuani, Yaubada yana tomotoga lovana wata 'aiata i vevelu'ui 'aivaita faifaina, i na 'ivaita-matayo'oyedi 'alo i na 'ivogavogana? <sup>8</sup> A na vonemi i na veimea yana nuanua tonovidi 'waidiega 'aivaita i na veluaga-matayo'oi. We'e tutuyanina yau a vetomotogaotoga a na vilaku a na mai tomotoga fue di ma yadi vetumagana a na veluagadi 'alo kebu?”

*Iesu i vona-awatabai Falisi wata tolaugogona faifaidi.*

<sup>9</sup> ✧Tomotoga 'ifwaidi yadi nuanua i vo, 'Ima 'atumaima, mali tomotoga bani'odi nani-'avo'avovo,” begaidi Iesu i vona-awatabai faifaidi. <sup>10</sup> I vo, Tomotoga 'adi 'ailuga i luku vanuga 'eba velu'ui 'waineye i na velu'ui. Tamu totafalolo Falisi we'e tamu takesi tolaugogona. <sup>11</sup> ✧Falisi i tovi'eni i velu'ui i vo, Yaubada a vekaiwa 'waimuye fai yaku sauluva kebu bani'odi mali tomotoga, taunidi toveumokai, vivinagodi wata tove'avula-'avo'avovo. Wata a vekaiwa fai yau kebu de'e takesi tolaugogona vivinagona bani'odiga. <sup>12</sup> Wiki 'aitamogana 'aitamogana nagedie 'aiata 'ailuga 'ailuga a veve'udigana 'ani matatabuna bega yaku velu'ui 'waimuye i na vetoketoke, wata mani a veveluagadi yaku folova 'wainega a 'e'etokwaudi 10, 'etokwau tamu a 'a'aniveleneni 'waimuye.”

<sup>13</sup> We'e tolaugogonanina tulineye i tovoi kebu nuanuana i na 'isalaka abame ma yana bunumayaga i 'odu i velu'ui i vo, Yaubada, yau tosakona, 'u da 'isanuakalikalieku.”

<sup>14</sup> Wata Iesu i vo, A na vonemi, tolaugogonanina yana sakona Yaubada i nuatuvunina i nago yana vanuge, we'e Falisi kebu. Egavo taunidi i na awa'ai'aidiga 'awaie Yaubada i na kiaobuyedi we'e egavo taunidi tonuaobu, 'awaie Yaubada i na kialakaidi.”

*Iesu yavayavava i nuakalikali.*

<sup>15</sup> Tomotoga 'ifwaidi natudiavo i miedi nuanuadi Iesu i na 'abitonovidi wata i na vonanuakalikali, siwe tovetutuyamavo i 'isedi i talabodedi. <sup>16</sup> Iesu yavayavavanidi i vonedi i na maia 'waineye wata i vo, Kwakwama 'wa bailedi i na maia 'waikuye, fai egavo taunidi tonuaobu yavayavava de'e bani'odi 'adi fata taunidi i na tauyedi bega Yaubada i na veveimeyedi. <sup>17</sup> A vona mogitana 'waimie, aitoi Yaubada i na vetumaganeni bani'odi yavayavava yadi vetumagana, Yaubada i na veimeyeni yana 'Aila'a nageneye, we'e 'ai'edi kebu, kebu 'ana fata.”

*Tomogo 'ai'aiwabuna.*

<sup>18</sup> Tamu me Diu yadi to'edakumeta i velutoli Iesu 'waineye i vo, Tove 'atumaimu, nuanuaku a na 'asetai ava'ai a na 'idewai bega mia 'atumaina wata miamia-vagaina a na veluagai.” <sup>19</sup> Iesu yana velutoli i tutuli i vo, Awale 'u awave'atumaieku? Kebu tamu aitoi 'atumainaga, Yaubada 'aiseotogina 'atumaina. <sup>20</sup> ✧Ve'etoboda 'akonadi 'u 'asetadi basenadiotoga Yaubada Mosese i veleni, kebu tamu aitoi yana vavine 'u na luobuyedi, kebu 'u na luvewafaga, kebu 'u na vainagoga, kebu 'u na vekali tamu tomotoga yana sauluva faifaina, tamamu wata inamu 'u na ve'ililibuyedi.” <sup>21</sup> Tomogo i vo, We'e ve'etobodanidi basenadi siaikuyega i maiga 'asiau a vevematayakeyakedi.” <sup>22</sup> ✧Iesu i voneni i vo, Wata tamu nani 'waimuye kebu 'u da 'idewaiga. 'U na nago yamu kukua wata ava'ai ava'ai 'waimuye i 'eno'enoviga matatabuna 'u na vekimwaneyedi, tutulidi 'u na 'ewadi, egavo i vewekowekomaga 'u na 'ivaisedi nika 'omu 'akonadi 'u na ve'ai'aiwabu abame. 'U na 'anivelenedi i na 'a'avana 'u na mai 'u na vetutuyameku.” <sup>23</sup> Tomogonina Iesu yana vona i nogai, nuana i vita bwaikina fai yana 'ai'aiwabu fuedi, nuana i loloi kebu nuanuana i na 'anivelenedi.

<sup>24</sup> Iesu i 'iseni tomogo ma yana nuavita maigina i 'anivivili begaidi i vo, 'Ai'aiwabu yadi luku Yaubada yana 'Aila'a 'waineye vitaotogina 'waidie. <sup>25</sup> Bawe yana luku aima mataneamo vitana, we'e 'ai'aiwabu yadi luku abame, 'waidie

vitaotogina.” <sup>26</sup> Tomotoganidi Iesu yana vona i nogai i voneni i vo, Vetuma kebu tamu aitoi 'ana fata 'ita'ita'i i na veluagai sakona 'wainega.” <sup>27</sup> Iesu yadi vona i tutuli i vo, Tomotoga tauni'avadi kebu 'adi fata 'ita'ita'i i na veluagaiga, Yaubada 'aisena 'ana fata i na 'ivaisedi.”

<sup>28</sup> Fita Iesu i voneni i vo, Maide 'ima nani matatabuna 'a bailedi 'a maia 'waimuye 'a vevetutuyamemu.” <sup>29</sup> Iesu i vonedi i vo, A vona mogitana 'waimie, egavo Yaubada yana veimea faifaina yadi vanuga i 'iawedi, yadi vevinevo, ediavo, tamadiavo, inadiavo 'alo natudiavo i 'iawediga, 'awaie naninidi 'adi tutula bwaikaotogina Yaubada i na veledi. <sup>30</sup> Naninidi 'ai'edi i na bailediga, tutuya de'e nani fueotogidi Yaubada i na veledi, wata 'awaie mia 'atumaina wata miamia-vagaina i na veluagai.

*Iesu yana vona 'ana vetonu yana wafa faifaina.*

<sup>31</sup> Iesu yana tovetutuyamavo i vonedi taiadi tulidie i nagoi i vonedi i vo, A na vonemi, ta nunagoi Ielusalema bei nani matatabuna basenadiotoga Yaubada yana tolu'ivona i kilumiga yau a vetomotogaotoga faifaiku, 'adi mogitana i na souyedi 'waikuye. <sup>32</sup> I na 'aniveleneku mali tomotoga taunidi kebu Diu 'waidie i na sidibidibieku, i na yagaiku, wata i na kiwaliku. <sup>33</sup> I na toke i na fitaliku mulieta i na luvewafaku, siwe 'aiata 'ana vetonu 'waineye a na tovoi wafayega.” <sup>34</sup> Siwe tovetutuyamavo kebu i da 'asetaiga yana vona 'ana nuanua. Yana nuanuanina Yaubada i giveni bega ava'ai Iesu i vonevoneyeniga kebu 'adi fata i na 'asetai.

*Totalavelu'ui matana sakoidi Iesu i 'ive'atumaia.*

<sup>35</sup> Iesu ma enavo sai'afoga i na le'wai Ieliko nika tamu tomatasako i veluagai 'edeye i miabui i vevelu'ui mani. <sup>36</sup> Tutuyanina tomogonina i nogai 'aila'a bonadi i mimai, i velutoli i vo, We'e ava'ai?” <sup>37</sup> \*Ifwaidi tomotoga yana velutoli i tutuli i vo, Iesu tomogo Nasaledi i mai i nunago.” <sup>38</sup> \*Begaidi tomatasako i vegole i vo, Iesu, 'omu Kini Devida tubuna 'u da 'isanuakalikalieku.” <sup>39</sup> Tomotoganidi i tovoivoiga Iesu lilivaneye i yagaia i vo, 'U ve'wada.” Nika i toke i vegolegole i vo, Iesu, 'omu Kini Devida tubuna, 'u da 'isanuakalikalieku.” <sup>40</sup> Bonana i nogai Iesu i tovoi i vo, Tovegolegolenina 'wa mieni 'waikuye.” <sup>41</sup> Tutuyanina i mai 'waineye i velutolieni i vo, Ava'ai nuanuamu 'waimuye a na 'idewai?” I vo, 'Auvea, nuanuaku a da 'isala.” <sup>42</sup> Iesu i vo, 'Atumaina, 'u 'isala. Fai 'u vetumaganeku, 'akonadi 'u ve'atumaia.” <sup>43</sup> Iesu yana voneye nika 'ana fata i na 'isadewa bega i tovoi, Iesu mulineye i nunago Yaubada 'waineye i vevekaiwa. Wata tomotoga fueidi i 'iseni Yaubada i subiai.

## 19

*Iesu wata Sakiusa.*

<sup>1</sup> Iesu tomatasako i 'ive'atumaia, i 'a'avana i luku Ieliko kamwaneamo i nago. <sup>2</sup> 'Atamananina 'waineye takesi tolaugogona 'adi to'edakumeta tamu bei i miamia. Taunina tomogo 'ai'aiwabuna, 'ana wagava Sakiusa. <sup>3</sup> Nuanuana Iesu i na 'iseni siwe kebu 'ana fataga fai tomogo 'ale'usana wata 'aila'a bwaikina i tovibabaleni. <sup>4</sup> Fai kebu 'ana fata i na 'iseniga begaidi i 'edakumeta i lilide i nago tamu welavi bwaikina 'edeve i tovtovoi, tabwaneve i laka bega 'ana fata Iesu i na 'iseni.

<sup>5</sup> Tutuyanina Iesu i le'wa welavinina lilivaneye i 'isalaka i voneni i vo, Sakiusa, 'u lilide 'u obuma ta na nago yamu vanuge 'amu veba'wa faifaina a mai." <sup>6</sup> Sakiusa i lilide i obu, ma yana sosoana Iesu i vagavaia ma fuedie i nagoi yana vanuge.

<sup>7</sup> Tomotoga fuedi Iesu i 'iseni i vebonavoluvolu i vo, Tomogo no'o awale i nago tosakona yana vanuge?" <sup>8</sup> \*We'e Sakiusa i tovoi 'Auvea mataneye i vo, A na vonemu, yaku kukua a na 'idia, sai'afo a na veledi wekewekoma, wata sai'afo tauniku faifaiku. Vekaliega tomotoga yadi mani a 'ewa-maimaigidi begaidi a na veviladi. Tutuyanina a na veviladiga, 'ai'edi 'aitamogana a vinagoi wata 'waikuyega 'aitonu taiadi a na veviladi." <sup>9</sup> \*Iesu i voneni i vo, 'Asiau 'ita'ita'i i mai vanuga de'e 'ana tomia 'waineye i lubwaineni, fai tomogonina tamu wata Ebelamo tubuna. <sup>10</sup> \*We'e yau a vetomotogaotoga a maiga egavo Yaubada yana 'eda'eda i bavuyeni, bani'odi i vuyo, a na lualedi a na 'ita'ita'iedi."

*Iesu i vona-awatabai tofolova 'atumaidi wata sakoina faifaidi.*

<sup>11</sup> Iesu ma enavo sai'afoga i na le'wai Ielusalema. 'Aila'a Iesu yana vona i noganogai yadi nuanua igodi i vo, Sai'afoga Yaubada yana veimea i na souyeni tomotoga 'waideve." begaidi Iesu i vona-awatabai 'waidie. <sup>12</sup> I vo, Tamu toveimea bwaikina i nago 'ani'ie tamu 'awalawa 'waineye bega i na ve-kini, mulieta i na vilai i na mai yana 'atamane. <sup>13</sup> Yana tauya 'waineye yana tofolovavo 10 i goledi i nagoi 'waineye 'aitamogana 'aitamogana lubulubu 100 i veledi. Wata i vonedi i vo, Tutuyanina a na nago no'o bei a na miamia, 'omi mani de'e 'wa na vefolovedi bega 'adi 'imoso'i 'wa na veluagadi." <sup>14</sup> Siwe yana tomotoga i vedumwe'ai'aieni bega tutuyanina i nunago vala i vetunei kini bwaikina 'waineye i vo, Tomogonina bola i na ve-kiniga kebu nuanuama 'waimeve i na vetoveimea 'a baila."

15 Siwe toveimeanina i ve-kini mulieta i vilai i mai yana 'atamane. Tutuyanina i le'wa yana tofolovavo i vonedi i na maia 'waineye, kumanidiavo basenadi mani i veledi. Nuanuana i na 'asetai 'aivia mani i veluagadi. 16 Tamu tofolova i mai i vo, 'Auvea, lubulubu 100 'u velekguga bega a vefolovedi a 'imoso'ieni lubulubu 1000 a veluagai." 17 ✧Yana 'auvea i voneni i vo, 'Atumaina, 'omu tofolova 'atumaimu ma 'amu vetumagana. Fai nani siaina 'u 'isave'avina-'atumaia, bega a na yatomu 'atamana bwaikidi 10 'u na 'isave'avinidi."

18 Tofolova 'ana veluga i mai i vo, 'Auvea, lubulubu 100 'u velekguga bega a vefolovedi a 'imoso'ieni lubulubu 500 a veluagai." 19 Yana 'auvea i voneni i vo, A na yatomu 'atamana bwaikidi 5 'u na 'isave'avinidi."

20 Wata tamu yana tofolova 'adi vetonu i mai i vo, 'Auvea, yamu mani side a giveni didiwaka 'waineye. 21 A 'asetamu 'omu tamu tomogo fa'alimu, begaidi a kololo. Mali tomotoga yadi kukua 'u eloelodi wata kebu 'u da bakubakulaga siwe 'u 'a'aialamo mali tomotoga yadi bakulayega." 22-23 Yana 'auvea i voneni i vo, 'Omu tofolova sakoimu. Yamu vonanina 'wainega a na veimeyemu. 'U vonaga yau tomogo fa'aliku, awale yaku mani 'u giveni? Wata 'u vonaga mali tomotoga yadi kukua a eloelodi wata kebu a da bakubakulaga siwe a 'a'aialamo, awale yaku mani kebu 'u da yatoi banika 'waineye? A vilaku a mai yaku maninina ma 'ana 'imoso'i a da 'ewai."

24 Kininina tomotoga i tovtovoiga i vonedi i vo, Lubulubu 100 'waineye 'wa na eloi, tomogonina lubulubu 1000 'waineye 'wa na veleni." 25 Siwe yana vona i tutuli i vo, 'Auvea, sino 'akonadi lubulubu 1000 'waineye i 'eno'eno." 26 Wata yadi vona i tutuli i vo, A na vonemi, 'ai'edi aitoi 'ana veuveuta 'wainega i na folova-'atumai wata 'imoso'i i na veluagai, we'e aitoi 'ana veuveuta kebu i na folova-'atumaieniga veuveutanina siaina i na elo'a'avai. 27 'Asa'aiana, 'aku tovedumwe'ai'ainidi basenadi i vona igodi kebu nuanuadi a na ve-kini, 'wa na miedi matakuye 'wa na luvewafadi."

### *Iesu i luku Ielusalema.*

28 Tutuyanina Iesu i veifufu'a'ava tomotoga 'waidie i kumeta i nunago Ielusalema. 29 'Akonadi sai'afu i le'wale'wai 'atamana 'ailuga 'waidie Bedifegi wata Bedani. Bei 'Oya Olive tabwaneye Iesu tovetutuyamavo 'adi 'ailuga i vonedi i na kumeta. 30 Wata i vonedi i vo, 'Atamana debanagomiega 'waineye 'wa na nagoi. Tutuyanina 'wa na le'wai 'wa na lukuluku 'wa na 'iseni 'aisaya doniki natudi i luifweni tamu vanuga 'waineye i tovtovoi, basenadi kebu tamu

aitoi kwavuneye i da lakaga. 'Wa na yavuya 'wa na mieni 'waikuye. <sup>31</sup> 'Ai'edi tamu aitoi i na velutoliemiga i na vo, Awale 'wa yavuyavuya?" 'wa na vo, 'Auvea nuanuana."

<sup>32</sup> Tovetutuyamavonidi 'adi 'ailuga i nagoi ava'ai Iesu i voneyeniga bani'odi i veluagai. <sup>33</sup> Tutuyanina i yavuyavuya toni'aisaya i vonedi i vo, Awale 'wa yavuyavuya?" <sup>34-35</sup> Toni'aisayanidi yadi vona i tutuli i vo, 'Auvea nuanuana," bega i 'ewai i naweni Iesu 'waineye. 'Aisayanina i mieni Iesu 'waineye 'adi talauma kwavuneye i yatodi mulieta Iesu i silakaveni bei i miabui. <sup>36</sup> Tutuyanina i laka i nunagoi tomotoga fuedi ma yadi ve'ililibu yana 'eda i 'ivivigavuya 'adi kalekoyega.

<sup>37</sup> 'Akonadi i laka 'Oya Olive deba'aineye we'e no'o bega 'eda i obuobu Ielusalema faifaina, nika yana tovetutuyamavo fuedi ma yadi vekaiwa bonadi bwaikinega Yaubada i subiai 'eba nuavogana wata 'eba nua'ewa Iesu i 'idewadewadiga faifaidi. <sup>38</sup> \*I vegolegole i vo,

Yada Kini i mimai 'Auvea 'ana wagavayega,

Wata ma yana nuakalikali i na vevesauluva 'atumaina 'waineye.

Tomia abama ma yadi sosoana i na mia-'atumai,

Bega Yaubada tabwaotogineye ta na subisubiai."

<sup>39</sup> \*Totafalolo Falisi 'ifwaidi 'aila'a 'waidiega bonadi bwaikinega Iesu 'waineye i vo, Tove, yamu tovetutuyamavo 'u talabodedi i na ve'wada." <sup>40</sup> Iesu yadi vona i tutuli i vo, A na vonemi, 'ai'edi i na ve'wada, ma 'itufa kileu i na vegolegole fai i lubwaineni 'asiau 'aku subisubia a na veluagai."

### *Iesu i lumatageu Ielusalema faifaina.*

<sup>41</sup> \*Iesu i le'wa Ielusalema lilivaotogineye i 'iseni ma yana nuavita matageuna i lolo. <sup>42</sup> Wata i vo, Nuanuaku bwaikina 'asiau 'wa da 'asetai bani'odi 'wa da munega bega yami mia i da ve'atumai. Siwe kebu 'ami fata 'wa na 'asetai. <sup>43-44</sup> Tamu tutuya i na souyeni 'waimie 'ami gaviavo i na maia i na tovifinemi wata i na tovibodemi. Yami 'atamana kalikalina wata fa'alina siwe 'ami gavianidi kalimuliega fwayafwaya i na ivuya i na laka, beidimo i na lakawa i na lukuwa i na leomi. I na lubaibaيمي bega kebu tamu aitoi i na luveyawayawai, vanuganidi wata kalinina matatabuna i na geudi. Vitanina i na souyeni 'waimie fai tutuyanina Yaubada i mai nuanuana i na 'ita'ita'iemie siwe 'wa bavuyeni."

### *Iesu i nago vanuga 'eba velu'ui 'waineye.*



45-46 Tutuyanina Iesu i luku vanuga 'eba velu'ui 'waineye i 'isedi tomotoga fue di yadi kukua i vevekimwaneyedi vanuganina nageneye. Begaidi matatabudi i sogiedi wata i vonedi i vo, Basenadiotoga i kilumi Yaubada yana Buki 'waineye, Yaubada i vo,

Yaku vanuga 'asa'aiana vanuga 'eba velu'ui tomotoga faifaidi,"

we'e 'omi 'wa sivilai tovainago yadi 'eba giva."

47 'Aiata 'aitamogana 'aitamogana Iesu i veve vanuga 'eba velu'ui nageneye. Tovelomu 'adi to'edakumetavo, ve'etoboda 'adi tovevo, wata tomotoga 'adi to'edakumetavo matatabudi nuanuadi i na luvewafai. 48 ✧ 'Ana luvewafa 'ana 'eda i luala-wayoga fai tomotoga matatabudi yana vona i vavainenega kebu nuanuadi tamu yana vona i na ve'anita'ia.

## 20

### *I velutolieni Iesu yana veimea lamuna.*

1 Tamu 'aiata Iesu i luku vanuga 'eba velu'ui 'waineye i lau'age tomotoga 'waidie. Tutuyanina i veve 'waidie Vala 'Atumaina faifaina tovelomu 'adi to'edakumetavo, ve'etoboda 'adi tovevo, wata tomotoga 'adi to'edakumetavo 'au'auveadi i maia i velutolieni. 2 I vo, Nuanuama 'a na 'asetai aitoi i vetunemu bega naninidi 'u 'i'idewadi 'alo aitoi veimea i velemu?" 3-4 Iesu i vo, Nuanuaku a na velutoliemi, Ioni Tobafitaiso aitoi veimea i veleni bega tomotoga i bafitaisodi? Yaubada 'alo tomotoga?" 5 To'edakumetanidi 'aise'avadi i veifufu i vo, Bani'odi ta na voneyedi? 'Ai'edi ta na vo, Yaubada Ioni veimea i veleni," 'ako i na vo, Vetuma awale kebu Ioni yana vona 'wa da vetumaganeni?" 6 Wata 'ai'edi ta na vo, Tomotoga veimea Ioni i veleni," 'aila'a de'e i na lukileuda fai i nuani Ioni tamu Yaubada yana tolu'ivona." 7 Begaidi yana velutoli i tutuli i vo, 'Ima kebu 'a da 'asetai aitoi veimea i veleni Ioni." 8 Iesu i vonedi i vo, Yau wata kebu a na vonemi aitoi veimea i veleku bega naninidi a 'i'idewadi."

### *Tofolova sakoidi 'adi vona-awatabai.*

9 Wata vona-awatabaiega Iesu i veifufu tomotoga 'waidie. I vo, Tamu tomogo kalefa talagina i yatoi mulieta tomotoga 'ifwaidi nimadie i yatoi i na 'i'isave'avini. We'e taunina i tovoi i nago mali 'awalaweye bei i na mia tutuya manamanawena. 10 Kalefa yana tofolova i voneni i na nago yana bakula 'ana to'isave'avinavo 'waidie, vuaga 'ifwaidi i na miedi faifaina. To'isave'avinanidi tofolova i 'ive'avini i nikei i vevilai nima'ava'avana. 11 Tamu 'aiata wata tamu tofolova i vetunei, i nikei, i yagaia, mulieta i vevilai nima'ava'avana.

<sup>12</sup> Wata 'ana vetonu i vetunei, veviga bwaikina i veleni wata i taweni kalimulie.

<sup>13</sup> Tonibakula yana nuanua i ve'ale'usa i vo, Bani'odi a na munega? 'Akonadi a nuani. Natuku yaku tamogana nauafouku a na vetunei, voke i na ve'ililibuyeni.” <sup>14</sup> Siwe to'isave'avinanidi i 'isanaweni i mimai 'aise'avadi i veifufu i vo, No'o tonibakula natuna, bola nani matatabuna i na 'ewadi i na veimeyedi. Ta na luwewafai bega naninidi ta na 'ewadi.” <sup>15</sup> Bega i 'ive'avini i taweni i obu kalimulie bei i luwewafai.”

Iesu tomotoga i velutoliedi i vo, Tonibakula yana bakula 'ana to'isave'avinavo bani'odi i na munegidi? <sup>16</sup> I na vilai to'isave'avinanidi matatabudi i na leodi mulieta tomotoga 'ifwaidi i na vonedi i na veto'isave'avina.” Tutuyanina tomotoga Iesu yana vona i nogai i vo, Kebu nuanuama vitanina i na souyeni.” <sup>17</sup> ✧Iesu i 'isanago tomotoga 'waidie, mulieta tamu vona-vagata Yaubada yana Buki 'wainega i voneyeni 'waidie to'edakumetanidi i na baileniga faifaina. I vo, 'Omi 'wa da nuani de'e vonanina ava'ai 'ana 'asetai? Vonanina i vo,

To'aiyogona folova tamu i 'iseni siwe i baileni.

Folovanina taunina 'unututu.”

<sup>18</sup> ✧Egavo i na tayaidi i na be'u folovanina tabwaneye i na tudabedabedi, wata 'ai'edi folovanina i na 'anifoia tomotoga tabwadie i na tukudakudadi i na vefwayafwaya.”

<sup>19</sup> ✧Vona-awatabainina Iesu i veifufuyeniga, ve'etoboda 'adi tovevo wata tovelomu 'adi to'edakumetavo 'akonadi i 'asetai 'adi vona-awatabai taunidi bani'odi to'aiyogonanidi wata to'isave'avinavo sakoidi, begaidi nuanuadi 'aiatanina 'waineye i na 'ive'avini, siwe kebu 'adi fataga fai tomotoga nuanuadi Iesu begaidi i kololoyedi.

### *Iesu i veifufu takesi faifaina.*

<sup>20</sup> Me Diu yadi to'edakumetavo nuanuadi Iesu i na 'ive'avini begaidi i vevemata'i'i'ieni. Tomotoga 'ifwaidi mani i veledi 'adi tutula i na nago Iesu 'waineye i na bavuseba, bega velutoli 'waidiega i na siloloi. 'Ai'edi i na vekali to'edakumetanidi 'adi fata Iesu i na 'ive'avini i na 'aniveleneni gabemani yadi toketokena 'waineye. <sup>21</sup> Begaidi tobavusebanidi i nagoi Iesu 'waineye i velutolieni i vo, Tove, yamu vona wata yamu ve tonovidi, kebu 'u da vekaliga. 'A 'asetamu kebu 'u da vaiega wata kebu 'u da lau'idi siwe 'u veve mogitana Yaubada yana nuanua tomotoga 'waimeye. <sup>22</sup> Nuanuama 'a na 'asetai i lubwaineda 'ida me Diu ta na takesi toveimea bwaikina Sisa\* 'waineye 'alo kebu?” <sup>23-24</sup> Iesu yadi bavuseba 'akonadi i 'asetai begaidi i vonedi

✧ 20:17: Same 118:22 ✧ 20:18: Ais 8:14-15 ✧ 20:19: Luk 19:47-48 \* 20:22: Sisa me Loma yadi toveimea bwaikaotogina. Iesu yana tutuye me Loma Diu i veimeyedi wata 'waidie i takesi.

i vo, Maninina 'wainega ta yatoyato takesi 'wa na mieni ta na 'iseni. Aitoi 'anununa wata 'ana wagava maninina nageneye?" <sup>25</sup> I vo, Sisa." Iesu i vonedi i vo, Vetuma 'ai'edi ava'ai Sisa faifaina 'wa na veleni, we'e 'ai'edi ava'ai Yaubada faifaina 'wa na veleni." <sup>26</sup> To'edakumetanidi kebu 'adi fata tamu ava'ai 'wainega Iesu i na siloloi tomotoga matadie bega i na vekali, faifainanina ma yadi nuavogana i ve'wadamo.

*Yawasa-vaitugana faifaina i velutoli.*

<sup>27</sup> 'Ifwaidi Diu totafalolo 'adi wagava Sadusi i maia Iesu 'waineye. Taunidi tovana igodina tomotoga kebu i na yawasa-vaitugana. <sup>28</sup> \*Tomotoganidi Iesu i velutolieni i vo, Tove, basenadiotoga Mosese yada veimea i kilumi i vo, 'Ai'edi tamu tomogo i na wafa siwe kebu natunavoga, 'wabulina taina i na nagidi bega kwakwama i na vetubugidi tatana 'ana wagava wata 'ana wauma faifaidi." <sup>29</sup> Tamu tomogo ma tainavo 'adi 'aila'a 7, tulaiotogina i nagi kebu tamu natunaga i wafa. <sup>30</sup> 'Wabula yadi bwa i nagia, wata kebu tamu natunaga i wafa. <sup>31</sup> Wata bani'odi 'adi vetonu yadi bwa i nagidi i nago taidiavo matatabudi 'wabulanidi taiadi i nagi siwe kebu tamu natudiavoga. <sup>32</sup> Tomotoganidi 7 i wafa'a'ava, mulieta vavine i wafa. <sup>33</sup> Nuanuama 'a na 'asetai, tutuyanina tovoi-vaitugana 'waineye vavinenidi aitoi mogitana yadi lamoga? Fai tomotoganidi 7 taiadi i nagi."

<sup>34</sup> Iesu yadi velutoli i tutuli i vo, Tomotoga 'asiau fwayefwayeye i miamianiga, iaveta wata vevine i nagingi. <sup>35</sup> We'e tomotoganidi i lubwainedi i na tovoi-vaitugana i na luku abame, bei i na miamiani yadi sauluva tulina nagi kebu. <sup>36</sup> Yadi mia bani'odi anelose kebu i na wafaga. Fai Yaubada i sivetovoidi wafayega begaidi natunavo.

<sup>37</sup> \*'Omi yami vona 'ana nogaya 'wa vo, Towafa kebu i na tovoi-vaitugana," siwe a na vonemi. 'Ai'edi Mosese 'ana kilukiluma 'wa da lu'iawawa-dewai 'wa da 'iseni towafa i na yawasa-vaitugana. Basenadiotoga Yaubada i veifufu Mosese 'waineye 'ai-'ala'alata 'wainega. I vo, Yau Ebelamo, Aisake, wata Iakobo yadi Yaubada." <sup>38</sup> De'e bani'odi Yaubada i voneyediga fai tomotoganidi basenadiotoga i wafa 'asiau ma yawaidi taiadi i miamiani. Begaidi ta na 'asetai egavo 'akonadi i wafa 'asiau ma yawaidi i miamiani kebu tamu aitoi wafawafana Yaubada mataneye." <sup>39</sup> We'e 'ifwaidi ve'etoboda 'adi tovevo Iesu yana vona i nogai i vo, Tove, 'u vona mogitana." <sup>40</sup> Kebu tamu wata aitoi i da vo, Iesu a na velutolieni," fai i kololo.

*Velutoli Keliso faifaina.*

41 Iesu tomotoga i velutoliedi i vo, Tomotoga i vonaga Keliso, taunina Yaubada 'ana Venua'ivina, Kini Devida tubuna. Awale bani'odi i voneyedi? 42-43 ✧ Basenadiotoga Devida tauniotogina i kilumi Buki Same 'waineye Yaubada 'ana Venua'ivina faifaina i vo,

Yaubada i vona 'aku Toveimea 'waineye, i vo,  
Veimea a velemuga bega 'u na miabui 'aku 'atagiega,  
I na nagoga 'amu gaviavo a na leodi bega 'u na veveimeyedi.”

44 Keliso mogitana Devida 'ana wauma 'wainega i souyeni, siwe i vebwaika-'iaweni Devida, faifainanina i ve'awa-Toveimea Keliso 'waineye.”

*Iesu i matakia ve'etoboda 'adi tovevo faifaidi.*

45-46 'Aila'a bwaikina Iesu yana vona i noganogaya, yana tovetutuyamavo 'waidie i vo, 'Wa na 'isa'isa ve'etoboda 'adi tovevo, nuanuadi yaba kaleko manamanawedi i veve'wesenedi bega 'aila'a bwaikina ma yadi ve'ililibu i na vevekaiwa 'waidie. Nuanuadi to'edakumeta bwaikidi taiadi i na mimiabui 'eba miava'auta 'waidie wata sakali 'waidie nuanuadi i na mimiabui ma 'adi wagava taiadi. 47 We'e 'wabu'wabulavo i vevekaliedi yadi vanuga i eloelodi wata yadi velu'ui i lulumanamanawedi bega tomotoga i na subisubiadi i na vo 'ako, Yaubada yana tofolovavo 'atumaidi.” 'Awaie 'adi vematavuloga bwaikina i na veluagai Yaubada 'wainega.”

## 21

*'Wabula yadi 'anivelena-maimaiga.*

1 Iesu i miabui vanuga 'eba velu'ui nageneye mani 'eba yato lilivaneye, tomotoga 'ai'aiwabudi i 'ise'isedi yadi 'anivelena-maimaiga i yatoyato 'eba yato 'waineye. 2 Wata tamu 'wabula i vewekowekomaga i 'isedi mani 'ailuga 'wau'waugidi i yatodi. 3 ✧ Iesu yana tovetutuyamavo i vonedi i vo, A vona mogitana, tomotoga matatabudi i yatoga 'eba yato 'waineye 'wabulanidi bwaikaotogina i yato. 4 'Ifwaidi i yatoga siwe wata yadi mani bwaikina i 'eno'enovi, we'e 'wabulanidi yadi mani matatabuna i lusaweni. Kebu wata tamu mani 'waidie i da 'eno'eno 'adi'adi faifaina.”

*Iesu i veifufu fwayafwaya 'ana 'eba ve'a'ava 'ana tugusa faifaina.*

5 Iesu yana tovetutuyamavo 'ifwaidi vanuga 'eba velu'ui i 'iseni faifaina i veifufu i vo, 'Wa 'iseni 'ana 'isa 'atumaiotogina. Kileu bwaikidi wata 'aninamanamalidi, we'e 'ana vaigavu tomotoga yadi nuakalikali Yaubada

faifaina.” <sup>6</sup> ✠ Iesu yadi vona i nogai i vonedi i vo, Vanuganina 'wa 'ise'iseniga 'awaie 'ami gaviavo i na maia matatabuna i na geuya, wata kileunidi bega i bibinaga i na tutuwealidi matatabuna i na tubakabakaledi.”

<sup>7</sup> Mulieta i velutoli Iesu 'waineye i vo, Tove, nuanuama 'a na 'asetai ava'ai tutuyaga vanuga 'eba velu'ui i na geuya wata ava'ai tugusaga 'a na 'iseni bega 'a na 'asetai naninidi sai'afoga i na souyedi.”

<sup>8</sup> Iesu i vonedi i vo, 'Wa na 'isa'isa bega kebu tamu aitoi i na vekaliemiga. Tomotoga fueidi i na mai 'aku wagavayega igodi i na vo, Yau 'asa'aiana Keliso, Yaubada 'ana Venua'ivina,” wata i na vo, Yaubada yana tutuya mogitana 'akonadi i sousouyeni.” Siwe kebu bonadi 'wa na nogai wata kebu 'wa na yogo'wailidi. <sup>9</sup> Kebu 'wa na venuafouviga tutuyanina gavia wata vetalaga valadi 'wa na noganogaidi. Mogitana, naninidi nagami i na souyedi we'e fwayafwaya 'ana 'eba ve'a'ava bola.”

<sup>10</sup> Wata Iesu i vonedi i vo, 'Eba veimea bwaikidi wata 'eba veimea bwaikidi 'ifwaidi taiadi i na vevetalaga, 'awalawa wata 'awalawa 'ifwaidi taiadi i na vevetalaga.” <sup>11</sup> We'e 'awalawa fueidi 'waidie yoyoyo bwaikidi i na yueyue, loka, wata viga sakoidi i na sousouyedi tomotoga fueidi 'waidie. 'Eba kololo fueidi i na 'isedi we'e abame tugusa bwaikidi i na souyedi.

<sup>12</sup> ✠ Naninidi mulieta i na souyedi siwe nagami 'wa na vetolu'ivona faifaiku begaidi tomotoga 'ifwaidi i na 'ive'avinimi veviga bwaikina i na velemini. I na 'anivelenemi 'eba mi-ava'auta 'waidie 'wa na vonayavuga, i na 'a'avana i na yatomi vanuga 'eba yogona 'waineye. Fai 'wa vetumagana 'waikuye begaidi i na nawemi toveimea bwaikidi wata kini matadie. <sup>13</sup> Bei 'ami fata Valaku 'Atumaina 'waidie 'wa na lu'ivona. <sup>14</sup> Kebu nuafoumi i na veviga wata kebu 'wa na nuana 'wa na vo, Ava'ai ta na voneyeni 'eba vonayavuga 'waineye?” <sup>15</sup> Tutuyanina 'waineye 'asetai a na velemini wata a na awave'ede'edemi bega 'ami gaviavo kebu 'adi fata yami vona i na tutuli, wata ava'ai 'wa na voneyeniga kebu 'adi fata i na awave'ewe'eweni. <sup>16-17</sup> Fai 'wa vetumaganeku begaidi tomotoga matatabudi i na vedumwe'ai'aiemi wata yami 'aila'avo. Bani'odi tamamiavo, inamiavo, taimiavo, wata emiavo i na 'etogiluvemi bega 'ami gaviavo i na 'ive'avinimi we'e 'ifwaimi i na luvewafami. <sup>18</sup> Siwe kebu tamu sai'afo 'wa na wafa-vagata. <sup>19</sup> 'Wa na tovofovo fa'alina kebu 'wa na baileku i na nagoga mia 'atumaina wata miamia-vagaina 'wa na veluagai.”

*Me Ielusalema 'adi leo faifaina Iesu i veifufu.*

20 ✨Wata Iesu i vonedi i vo, Bola 'wa na 'iseni tolugaviavo Ielusalema i na totovifinini nika 'wa na 'asetai sai'afoga i na leodi. 21 Tutuyanina tugusanina i na souyeniga, egavo i miamiani 'awalawa Iudia nageneye i lubwainedi i na dega i na nagoi 'oyeye, egavo Ielusalema i miamiani i na 'iaweni i na dega, we'e egavo 'akonadi i nagoi i yabayaba kebu wata i na vilaviladi Ielusalema. 22 ✨Tutuyanina 'waineye Yaubada tomotoga fuedi i na vematavulogidi bega ava'ai basenadiotoga Yaubada yana Buki 'waineye i kilumiga faifaina 'ana mogitana i na souyeni. 23 Siwe 'aiatanidi 'waidie toveinainage wata vauvau nuakalikalidi fai kebu 'adi fata i na dega-matayo'o veviga bwaikina i na veluagai. Vita bwaikaotogina i na souyeni de'e 'awalawanina 'waineye wata Yaubada yana nuasako bwaikina i na souyeni tomotoganidi 'waidie. 24 ✨Adi gaviavo 'ifwaidi i na luvewafadi kefata 'waidiega we'e 'ifwaidi i na 'ive'avinidi i na nawedi mali 'eba veimea 'waidie. Mali tomotoga taunidi kebu me Diu yadi veimea toketokena 'wainega Ielusalema i na luvaia bei i na miamiani siwe tutuyanina Yaubada nuanuana, tomotoganidi yadi veimea i na 'a'ava.

*Iesu yana vila-vaitugana faifaina.*

25 ✨Tutuyanina 'waineye tugusa 'adi 'isa 'eba kololo 'wa na 'isedi inala, weta'i, wata 'ubwana 'waidie bega 'wa na 'asetai nani vitana sai'afoga i na souyeni. Tua bwaikina i na dodoga wata ta'wala i na taina bwaikina, yagina butu'aidi i na toke i na dududi tomia fwayafwaya matatabudi i na kololo-'afo'afo yadi nuanua i na ve'ale'usa. 26 Nani matatabuna toketokedi abame i na yue bega tomotoga i na 'asetai nani sakoina sai'afoga i na souyeni fwayefwayeye, begaidi yadi kololo 'waidiega i na mwea. 27 ✨Tutuyanina 'waineye yau a vetomotogaotoga a na souyeku a na mimai waowa 'wainega ma yaku toketokena wata ma magetaku mataududulina. 28 Tutuyanina 'wa na 'isedi naninidi i na sousouyedi, 'wa na tovoi 'wa na 'isalaka 'ami 'ita'ita'i 'akonadi i le'wale'wa."

29 Iesu i awatalatutula tomotoga 'waidie modawa yana sauluva 'wainega. I vo, 'Wa na nuanidi modawa wata welavi 'ifwaidi yadi sauluva. 30 Tutuyanina i na ididi ta 'asetai 'aisaya i veyafa. 31 Wata bani'odi, tutuyanina tugusanidi a voneyediga 'wa na 'isedi i na sousouyedi, 'wa na 'asetai sai'afoga Yaubada yana veimea i na souyeni tomotoga 'waidie.

32 A vona mogitana 'waimie, tutuya de'e 'ana tomotoga bola i na miamiani naninidi matatabuna i na souyedi.

✨ 21:20: Luk 19:41-44 ✨ 21:22: Dan 9:25-26 ✨ 21:24: Lom 11:25; Dan 8:13; Ais 63:18-19 ✨ 21:25: Ais 13:6-13; Ioe 2:1-2; Ve 6:12-14 ✨ 21:27: Mad 16:27

<sup>33</sup> Fwayafwaya wata abama 'awaie i na 'a'ava, we'e yaku vona kebu tamu sai'afu i na 'a'ava i na 'eno-vagata.

*'Isaboda Iesu yana vila-vaitugana faifaina.*

<sup>34</sup> ✧ Taunimi 'wa na 'i'isave'avinimi i na nunago nani 'ifwaidi nuami i na 'ewadi 'wa na nuatavutavuna, bani'odi lusakali, ufa toketokedi, wata nani 'ifwaidi 'adi venuafou-vinga. 'Ai'edi bani'odi 'wa na nuatavutavunaga, yaku vila-vaitugana 'waineye a na veyawailovogimi. <sup>35</sup> Bani'odi 'aisaya nigola i sisimatayo'odi yawaidi i vevelovogidi, wata 'omi to-mia fwayafwaya matatabumi bani'odi a na munegimi. <sup>36</sup> 'Wa na 'isa'isa wata 'wa na vevelu'ui nika 'wa na vetoketoke bega kebu 'wa na be'u naninidi vitadi 'waidie we'e mogitana 'wa na tovoi fa'alina, mulieta 'ami fata 'wa na luku yau a vetomotogaotoga matakuye.”

<sup>37</sup> 'Aiatanidi 'waidie Iesu i veve vanuga 'eba velu'ui nagen-eye we'e livilavi i nunago 'Oya Olive bei lovana matatabuna i miamia. <sup>38</sup> 'Awa'awaiogose tomotoga fueidi i nunagoi vanuga 'eba velu'ui 'waineye nuanuadi Iesu yana vona i na noganogaya.

## 22

*I lauala Iesu 'ana laugiva faifaina.*

<sup>1</sup> ✧ Me Diu yadi Sakali Uvi'agalatagona 'ana 'aiata i velilivana. Sakalinina 'waineye me Diu beledi kebu 'ana 'ivebwaika i 'ani'ani, 'adi 'eba tolinuata'i basenadiotoga Yaubada tubudiavo i 'ita'ita'iedi 'awalawa Itifita 'wainega. <sup>2</sup> Diu yadi tovelomu 'adi to'edakumetavo wata ve'etoboda 'adi tovevo i nuanua bani'odi i na munega Iesu i na lugivai i na wafa. Fai tomotoga fueidi nuanuadi Iesu begaidi i kololoyedi. <sup>3</sup> ✧ Tutuyanina 'waineye Seitani i luku Iudasa Isakaliota yana nuanua 'waineye, taunina tamu Iesu yana tovetutuyamavo 'adi 'aila'a 12 'wainega. <sup>4</sup> Iudasanina i nago tovelomu 'adi to'edakumetavo wata vanuga 'eba velu'ui 'ana to'isave'avinavo 'waidie taiadi i veifufu bani'odi i na munega Iesu i na 'etogiluvuni. <sup>5</sup> Yana vona i nogai i sosoana bwaikina nuanuadi tutula i na veleni. <sup>6</sup> Iudasa i nogayedi bega i nago 'eda'eda 'atumaidi i lauala bega 'ana fata givagivayega Iesu i na 'aniveleneni 'waidie nika tomotoga kebu i na 'asetai.

*I 'idewadewa Iesu yana 'ani faifaina.*

<sup>7</sup> Sakalinina 'ana 'aiata i veluagai i lubwaineni 'aisaya sifi natudi i na nikedi i na velomuyedi Uvi'agalatagona faifaina. <sup>8</sup> 'Aiatanina 'waineye Iesu i vonedi Fita wata Ioni i vo, 'Wa na nagoi 'ada'ada 'wa na 'idewadewa Uvi'agalatagona faifaina.”

<sup>9</sup> Fita ma iana Ioni i vo, Ava'aibe bei nuanuamu 'a na 'idewadewa?" <sup>10-11</sup> Iesu i veifufu 'waidie i vo, Side bani'odi. 'Wa na nagoi Ielusalema, tamu tomogo ma yana 'eba koi ufa i veadagi 'wa na veluagai. Vanuganina 'waineye i na nunagoga 'wa na yogo'waili i na luku we'e tonivanuga 'wa na velutolieni, 'wa na vo, Yama Tove i vo, Ava'aibe bei tutudaba bei yaku tovetutuyamavo taiadi 'a na 'ani Uvi'agalatagona faifaina?" <sup>12</sup> Bei tonivanuga i na vemi tamu tutudaba bwaikina tabwaneye 'akonadi i 'idewadewai faifaida. Bei 'ada'ada 'wa na 'idewadewa." <sup>13</sup> Fita wata Ioni Iesu i nogayeni i tauya i nagoi naninidi Iesu i voneyediga matatabuna i veluagadi nika bei sakali i 'idewadewa.

### *Iesu yana 'ani.*

<sup>14</sup> 'Ani 'ana tutuya i le'wa Iesu ma yana tomata'aulelevo i nagoi i miabui i na 'ani. <sup>15</sup> Iesu i vonedi i vo, Nuanuaku bwaikina nagami ma fuedeye ta na 'ani Uvi'agalatagona de'e faifaina mulieta veviga bwaikina a na veluagai. <sup>16</sup> Siwe a na vonemi kebu tamu tutuya wata Uvi'agalatagona a na 'ani, bola Yaubada yana 'Eba Veimea 'waineye Uvi'agalatagona 'ana mogitana i na souyeni, bei sakalinina bwaikina 'waineye a na 'ani." <sup>17</sup> Mulieta Iesu oine ma vedina i 'ewai, Yaubada 'waineye i vekaiwa wata i vo, Oine de'e 'wa na 'ewai, 'aitamogana 'aitamogana 'wa na yemu. <sup>18</sup> A vona mogitana 'waimie, oine kebu wata a na yemuga i na nagoga Yaubada yana veimea i na souyeni tomotoga 'waimie, bei a na yemu."

<sup>19</sup> Wata Iesu 'ani'ani i 'ewai, i vekaiwa Yaubada 'waineye, mulieta i 'ivivia i 'a'avana yana tovetutuyamavo i veledi. I vonedi i vo, 'Ani'ani de'e 'asa'aiana tomogoku [a tauyeni faifaimi. Tutuya fue di side bani'odi 'wa na 'ani'aniedi, 'aku nuave'avina faifaina.

<sup>20</sup> \*'Ani i 'a'ava, wata bani'odi oine ma vedina i 'ewai i veledi i vonedi i vo, Oine de'e ma vedina 'asa'aiana dayagiku i na ilolo faifaimi bega yaku wafanina 'wainega Yaubada yana Veakutagona 'Ivauna basenadi faifaina i vona'awaufaua i na velamu 'waimie.]

<sup>21</sup> \*Siwe a na vonemi, kumanina i na 'etogiluveku a na wafa taunina ma fueda ta 'ani'ani. <sup>22</sup> \*Yau a vetomotogaotoga a na wafaga fai Yaubada nuanuana, siwe 'aku to'etogiluva nuakalikalina bola veviga bwaikaotogina i na veluagai Yaubada 'wainega." <sup>23</sup> Tovetutuyamavo Iesu yana vona i nogai 'aise'avadi i velutolitoi i vo, Aitoi kumanaga i na 'etogiluva?"

### *Aitoi bwaikaotogina?*



24 Sakalinina 'waineyeye tovetutuyamavo i ve'ikwayekwayega, 'waidiega aitoi mogitana bwaikaotogina. 25 \*Iesu i vonedi i vo, 'Akonadi 'wa 'asetai 'awalawa 'aitamogana 'aitamogana yadi kini yadi veimea toketokedi ve'isakololoyega tomotoga i veveimeyedi, wata nuanuadi tomotoga i na subiadi i na vo, 'Omi yama to'edakumeta 'atumaimi.” 26 \*Siwe a na vonemi. 'Omi kebu bani'odi 'wa na munega. 'Ai'edi aitoi nuanuana i na vetomogobwaika, nagami i na vetofolova bani'odi tamu kwamana. We'e 'ai'edi aitoi nuanuana i na veto'edakumeta 'waimie, nagami i na vetofolova-maimaiga 'waimie. 27 \*Mali tomotoga 'waidie yadi to'edakumetavo i mimiabuimo i lulukamata yadi tofolovavo 'waidie 'ani'ani i na veveledi i na 'ani'ani. We'e yau kebu bani'odi a da vevesauluvediga 'waimie. Yau a vevetofolova 'waimie.

28 \*'Omi yau taiadi vita ta veveluagadi siwe kebu 'wa da baileku. 29-30 \*Tamaku i venua'ivineku bega tomotoga a na veveimeyedi, wata bani'odi veimea a na veleme bega bola yaku 'Eba Veimea 'waineyeye taiadi ta na 'ani'ani. Wata bei 'wa na miabui 'eba miabui 'ai'aiwabudi 'waidie bega waumanidi 12 tubuda bwaikina Isileli 'wainega i souyediga matamie i na vonayavuga 'wa na veimeyedi.”

*Iesu i vona-vagata bola Fita i na ve'eweniga faifaina.*

31 \*Wata Iesu i vo, Saimoni, Saimoni a na vonemu. Seitani nuanuana i na silubumi 'wa na be'u, bani'odi tomotoga witi i sisiveavui. Seitani yana nuanuananina Yaubada i tauyeni i na 'idewai. 32 \*We'e 'omu Saimoni faifaimu a velu'ui bega yamu vetumagana kebu i na mwea. 'Awaie 'u na baileku siwe tutuyanina 'u na vilamu 'waikuye emwavo yadi vetumagana 'u na kiavetoketokedi.” 33 Fita i vo, 'Auvea, 'ai'edi i na 'ive'avinimu i na nawemu vanuga 'eba yogona 'waineyeye wata bei i na luvewafamuga, yau wata taiadi.” 34 Iesu i vo, Fita, a na vonemu. 'Ako lovane bola kamukamu kebu i na kwagega nagami tutuya 'aitonu 'u na bavusebeku.”

*Iesu yana tovetutuyamavo i matakiadi bola 'aivaita kebu i na veluagai.*

35 \*Wata Iesu i vonedi i vo, Basenadi a vetunemi 'wa nagoi 'wa lau'age nani 'ifwaidi a talabodedi, bani'odi mani, venumana, wata 'ageyafayafa. Naninidi tomotoga i nuakalikaliemi i veleme 'alo kebu?” I vo, kebu tamu nani faifaina a da ve'ale'usa.” 36-37 \*Wata Iesu i vo, 'Asiau tulina, fai ava'ai

\* 22:25: Mad 20:25-28 \* 22:26: 1Fit 5:1-5 \* 22:27: Ion 13:12-15 \* 22:28: 2Tim 2:12 \* 22:29-30: Mad 19:28 \* 22:31: Iob 1:6-12, 2:1-6 \* 22:32: Ion 17:9,11,15, 21:15-17 \* 22:35: Luk 9:3 \* 22:36-37: Ais 53:12; Luk 23:32-33

basenadiotoga i kilumi Yaubada yana Buki 'waineye faifaiku i lubwaineni 'ana mogitana i na souyeni. Vonanina i vo,

Taunina tosakona ma fuedie i awavetubamidi.” Fai vonanina 'ana mogitana i sousouyeni, bega egavo ma yadi mani i na 'ewadi, egavo ma yadi venuana i na 'ewadi, wata egavo kebu yadi kefataga 'adi talauma i na vekimwaneyedi bega mani i na 'ewadi kefata i na kimwane.” <sup>38</sup> Tovevutuyamavo yana vona 'ana nuanua kebu i da 'asetaigna begaidi i voneni i vo, 'Auvea, kefata 'ailuga side.” Iesu i vo, we'e 'wa baileni, 'asa'aiadi.”

*Iesu yana velu'ui.*

<sup>39</sup> Iesu i veifufu'a'ava, mulieta ma yana tovetutuyamavo i tovoi i nagoi 'Oya Olive yana sauluva tutuya fuedi bani'odi. <sup>40</sup> Tutuyanina i le'wai Iesu i vonedi i vo, 'wa na vevelu'ui bega vetalaimimila 'waineye kebu 'wa na be'u.” <sup>41</sup> I 'iawedi sai'afo i vaganago bani'odi 'atagi 'ana vemanawe 'waineye 'agena i vetufano'uyedi i velu'ui. <sup>42</sup> I vo, Tamaku, 'Ai'edi yamu nuanua i na lubwaineniga vita de'e wata wafa 'u da 'ewadi 'waikuyega. Siwe 'asa'aiana de'e kebu yau yaku nuanuaga, 'omu yamu nuanua bega a na vematayakeyakenimo.” <sup>43-44</sup> Tutuyanina i vevelu'ui nuafouna i veviga bwaikaotogina begaidi i ibala, 'ana ibala yana ilolo fwayefwayeye bani'odi dayaga. Faifainanina tamu anelose abamega i souyeni i kiavetoketokei.

<sup>45</sup> Yana velu'ui i 'a'ava Iesu i tovoi i vilai i nago yana tovetutuyamavo 'waidie i 'isedi 'akonadi i 'eno-mataiva fai i nuavita bwaikina. <sup>46</sup> I luvagonidi i vonedi i vo, Awale 'wa 'eno'enovi? 'Wa tovoi 'wa na vevelu'ui bega vetalaimimila 'waineye kebu 'wa na be'uga.”

*Iesu 'ana 'ive'avina.*

<sup>47</sup> Bola Iesu i veveifufu yana tovetutuyamavo 'waidie, nika 'aila'a i le'wai Iudasa taiadi, taunina tamu Iesu yana tovetutuyama. 'Aila'anidi i 'edakumesedi i maia i le'wai i nago nuanuana Iesu i na 'avalamaigi. <sup>48</sup> We'e Iesu i vo, Iudasa awale? Yau a vetomotogaotoga 'u 'e'etogiluveku 'avalamaiga 'wainega.” <sup>49</sup> Tutuyanina tovetutuyamavo i 'isedi 'aila'a nuauadi Iesu i na 'ive'avini begaidi i vo, 'Auvea, bani'odi, yama kefata 'waidiega 'a na nikedi?” <sup>50</sup> Tamu iadi yana kefata i yo'ei tovelomu bwaikina yana tofolova igodi i da niki, taniga'avana 'ana 'atagiegi i tutuomuya. <sup>51</sup> Siwe Iesu i talabodedi i vo, we'e 'wa baileni, kebu bani'odi 'wa na munega.” Mulietta tomogonina tanigana i 'abitonovi i ve'atumai.

<sup>52</sup> Tomotoganidi i maia Iesu 'ana 'ive'avina faifaina side 'aila'anidi. Tovelomu 'adi to'edakumetavo, vanuga 'eba velu'ui 'ana to'isave'avinavo, wata me Diu yadi

to'edakumetavo 'au'auveadi. Iesu i vonedi i vo, Yau 'wa da vo to'ainike bega 'wa maia ma yami kefata wata fulumai 'aku 'ive'avina faifaina. <sup>53</sup> ✱'Aiata 'aitamogana 'aitamogana ma fuedeye ta miamiani vanuga 'eba velu'ui nageneye siwe kebu 'wa da 'ive'aviniku." 'Asiau Seitani i veveimea, dudubala i vetoketoke, 'omi yami tutuya."

*Fita i ve'eweni Iesu*

<sup>54</sup> 'Aila'anidi Iesu i 'ive'avini i naweni i lukuveni tovelomu bwaikina yana vanuge, we'e Fita i yogo'waila siwe 'ani'ieogose kebu lilivadie. <sup>55</sup> Vanuganina 'waineye tanotanoge 'ai i levai Fita i mai bei tomotoga 'ifwaidi taiadi i vevevala. <sup>56</sup> Tamu tofolova vevinena Fita i 'iseni i vevevala nika 'ai i mageseni i 'isadewai i vona i vo, Side tomogonina tamu Iesu iana." <sup>57</sup> Siwe Fita i ve'ewa i vo, 'Ana 'isa, aigodi we'e kebu a da 'asetaga." <sup>58</sup> Mulieta tamu tomogo i 'iseni i vo, 'Omu wata tamu Iesu iana." Siwe Fita i vo, 'U vekali, yau kebu, tuliku." <sup>59</sup> 'Awasasa 'aitamogana i 'a'ava, mulieta tamu tomogo i 'alavulewai i vo, Vona mogitana, tamu Iesu iana. 'Adi 'ailuga i maia 'awalawa Galili 'wainega." <sup>60</sup> Nika Fita i tutuli i vo, Aigodi we'e, yamu vonanina 'ana nuanua kebu tamu sai'afu a da 'asetaga." Bola Fita i veve'ewa nika kamukamu i kwage. <sup>61</sup> ✱Iesu i sivilai i 'isanago Fita 'waineye nika Fita i nuani 'Auvea yana vona i voneni i vo, 'Ako lovane bola kamukamu kebu i na kwagega nagami tutuya 'aitonu 'u na bavusebeku." <sup>62</sup> Fita vonanina i nuani i souyeni i nago 'atamane i taibwaubwau.

*Iesu i sidibidibieni wata i fiagi.*

<sup>63</sup> Tomotoganidi Iesu i 'i'isave'aviniga i sisidibidibieni wata i fiafiagi. <sup>64</sup> Matana kalekoyega i umadina i nikei i voneni i vo, 'Omu igodi tolu'ivona mogitana, yama fio, 'u da nuaniga aitoi i nikemu?" <sup>65</sup> Wata nani fueidi 'waidiega i awavesakoyeni wata i yagaia.

*Iesu i tovoi Kaniselo matadie.*

<sup>66</sup> I 'atai 'awa'awaiogose me Diu yadi kaniselovo i va'auta bega Iesu i mieni matadie. Kaniselonidi nagedie 'ifwaidi Diu yadi to'edakumetavo 'au'auveadi, tovelomu 'adi to'edakumetavo wata ve'etoboda 'adi tovevo. <sup>67</sup> ✱Tomotoganidi Iesu i velutolieni i vo, Nuanuama 'a na 'asetai, mogitana 'omu Keliso Yaubada 'ana Venua'ivina 'alo kebu?" Iesu yadi velutoli i tutuli i vo, 'Ai'edi a na vonemi, siwe bonaku kebu 'wa na vetumaganeni. <sup>68</sup> Wata 'ai'edi tamu ava'ai a na velutoliemi, kebu 'wa na tutuliga. <sup>69</sup> ✱'Asiau de'e 'wainega i na nagoga yau a vetomotogaotoga ma yaku

veimea a na miabui Yaubada Bwaikaotogina 'ana 'atagiega.”<sup>70</sup> Matatabudi i vo, Vetuma, 'omu Yaubada Natuna?” Iesu i vo, 'Wa vonaga, 'asa'aiana bani'odi.”<sup>71</sup> Tomotoganidi Iesu bonana i nogai i vo, 'Akonadi taunida yana vona-awadamana Yaubada 'waineye ta nogai. Kebu wata aitoi i na lulu'ivona 'waideye yana sauluva sakoina faifaina.”

## 23

### *Iesu i vonayavuga Failato mataneye.*

<sup>1</sup> Me Diu yadi Kaniselovo i veifufu'a'ava, matatabudi i tovoi Iesu i vagavaia i naweni me Loma yadi toveimea 'waineye, 'ana wagava Failato. <sup>2</sup> ✧ Bei i lu'ivona-vekavekali Iesu faifaina i vo, Tomogo de'e 'a 'iseni tomotoga i lukakadedi nuanuana ma enavo 'omi me Loma taiadi 'wa na vetalaga, wata i talabodebodedi i vo, Kebu 'wa na takesi me Loma gabemani 'waidie,” wata i vo, Yau Keliso, yami Kini.” <sup>3</sup> Failato yadi vonanina i nogai bega Iesu i velutolieni i vo, 'Omu me Diu yadi Kini?” Iesu i vo, 'U vonaga, 'asa'aiana bani'odi.” <sup>4</sup> Mulieta Failato i vona tovelomu 'adi to'edakumetavo wata 'aila'a 'waidie i vo, Tomogo de'e kebu tamu yana sakona a da veluagai bega a na veimea i na wafa.” <sup>5</sup> Nika i kwayega-'afo'afo i vo, Tomotoga i lulukakadedi vetalaga faifaina. Yana ve i velamu Galili 'waineye, bega i nago 'awalawa matatabuna 'waidie Iudia nageneye, wata 'asiau de'e i mai Ielusalema.”

### *Iesu i nago Kini Elodi 'waineye.*

<sup>6</sup> Tutuyanina Failato i nogai Iesu yana folova i velamu Galili 'waineye begaidi i velutoliedi i vo, Tomogo de'e Galiliega i maiga?” <sup>7</sup> Tutuyanina 'waineye Galili 'ana toveimea i miamia Ielusalema 'ana wagava Kini Elodi begaidi i vonedi Iesu i na naweni 'waineye. <sup>8</sup> ✧ Tutuyanina Iesu i le'weni Elodi 'waineye i sosoana bwaikina fai vala'avana i noganogaimo we'e kebu tamu tutuya i da 'iseniga. Wata i nuanua i vo, Tamu tutuya Iesu 'eba nuavogana wata 'eba nua'ewa i na 'idewai matakuye a na 'iseni.” <sup>9</sup> Begaidi Elodi velutoli fuedi Iesu i veleni, siwe velutolinidi kebu tamu Iesu i da tutulidiga. <sup>10</sup> Wata tovelomu 'adi to'edakumetavo ve'etoboda 'adi tovevo taiadi i tovofovoiga Elodi mataneye bonadi bwaikinega i lu'ivona-vekavekali Iesu faifaina. <sup>11</sup> Elodi ma yana tolu-gaviavo Iesu i sidibidibieni wata i yagaia, mulieta toveimea 'adi vaigavuyega i 'ivivigavuya wata i vevilai i nago Failato 'waineye. <sup>12</sup> Basenadi Elodi wata Failato ma yadi nuasako ma iana i ve'idi'idi, siwe tutuyanina de'e 'waineye i veiana.

### *Failato i veimea Iesu i na wafa.*

13-14 Failato i vona tovelomu 'adi to'edakumetavo, tomotoga 'adi to'edakumetavo, wata 'aila'a i maia 'waineye, i vonedi i vo, Tomogo de'e 'wa mieni 'waikuye 'wa vonaga 'wa vo, Tomotoga i vevekaliedi.” Igodi yana sakonanidi 'wa lu'ivoneyediga 'waikuye faifaidi a velutolieni matamie siwe kebu tamu yana sakona a da veluagai. <sup>15</sup> Wata bani'odi kebu tamu yana sakona Elodi i da veluagai begaidi i vevilai i mai 'waikuye. Fai kebu tamu yana sakona bwaikina, begaidi kebu i da lubwaineni i na wafa. <sup>16</sup> 'Asa'aiana a na veimea i na fiagiamo i na 'a'ava a na 'etoyavuya.”

[<sup>17</sup> Malamala 'aitamogana 'aitamogana me Diu i sakasakali Uvi'agalatagona faifaina. Tutuyanina 'waidie me Diu fue di tamu iadi yogoyogonina i vevenua'ivineni bega gabemani i 'e'etoyavuya vanuga 'eba yogona 'wainega.] <sup>18</sup> Faifainanina 'aila'a bonadi bwaikinega i vegolegole i vo, Iesu 'wa na luwewafai, we'e Balaba 'wa na 'etoyavuya.” <sup>19</sup> Balabanina basenadi ma enavo Loma gabemani taiadi i vetalaga Balaba tamu tomogo i luwewafai.

<sup>20</sup> Failato nuanuana Iesu i na 'etoyavuya begaidi i kwayega 'waidie. <sup>21</sup> Siwe tomotoga i kwayega-'afo'afo i vo, 'U tutufwaseni, 'U tutufwaseni 'ai lagalagana 'waineye.” <sup>22</sup> Wata Failato yana vona 'ana vetonu tomotoga i vonedi i vo, Ava'ai yana sakonaga? I na wafaga kebu i da lubwaineni fai kebu tamu yana sakona a da veluagai. A na veimea i na nikeimo mulieta a na 'etoyavuya.” <sup>23</sup> Nika i toke i vegolegole bonadi ta'ebeiotoga i vo, 'U tutufwaseni. 'U tutufwaseni 'ai lagalagana 'waineye.” Nika yadi vona i tokega, Failato i ve'wada. <sup>24</sup> Bega ava'ai tomotoga yadi nuanua, Failato Iesu i tauyeni i na wafa. <sup>25</sup> We'e tomogonina tomotoga nuanuadi i na 'etoyavuyaga vanuga 'eba yogona 'wainega, Failato i 'etoyavuya. Kumanina basenadi vetalaga 'waineye tamu tomogo i luwewafai, ma'itufa Iesu i 'aniveleneni 'waidie bega ava'ai nuanuadi, i na 'idewai 'waineye.

### *Iesu 'ana tutufwatagi.*

<sup>26</sup> Bega tomotoga Iesu i 'ewai i na naweni i na tutufwaseni. I nunagoi 'edeeye tamu tomogo Sailini 'ana wagava Saimoni i veluagai, kwedayega i tauya i mimai Ielusalema. Tolugavivo tomogonina i lukakadeni Iesu 'ana 'ai lagalagana i vevai, Iesu mulineye i nago.

<sup>27</sup> Wata tomotoga fue di i yogo'waili, tomotoganidi 'waidiega 'ifwaidi vevine i vevemogai Iesu faifaina. <sup>28</sup> Iesu i sivilai i 'isedi i vonedi i vo, Me Ielusalema vevine, kebu 'wa na vevemogai faifaiku. I lubwainemi taunimi faifaimi 'wa na vevemogai wata natumiavo faifaidi. <sup>29</sup> 'Awaie tomotoga i na vo, Egavo kakalidi, kumanidiavo kebu i da venatuna wata i da

vesusuga, 'eba sosoana 'waidie fai vita sai'afo bwaikina i na veluagai, we'e egavo ma natudiavo vita bwaikaotogina i na veluagai." <sup>30</sup> ✧ Wata tutuyanina 'waineye tomotoga i na vona 'oya 'waidie i na vo, 'Wa 'anibai-matayo'omi 'wa tavunima nika kebu a na veveviga." <sup>31</sup> Yau 'wa na nike-maimaigiku, we'e 'omi mogitana bola i na nikemi vita bwaikina 'wa na veluagai."

<sup>32</sup> Wata tolugaviavo tosakona 'adi 'ailuga Iesu taiadi i nawedi bega i na yatodi wafa 'waineye. <sup>33</sup> Tutuyanina i le'wai tamu 'awalawa 'ana wagava 'Unu'unu Lulu'ava 'waineye, bei Iesu i tutufwaseni 'ai lagalagana 'waineye. Wata tosakona 'adi 'ailuga i tutufwasedi 'ai lagalagana 'waidie, tamu Iesu 'ana 'atagiega, tamu 'ana wamayega. <sup>34</sup> ✧ Mulieta Iesu i velu'ui i vo, Tamaku, tomotoganidi de'e yadi sakona 'u na nuatavunidi, ava'ai i 'i'idewai 'waikuye kebu i da 'asetaiiga fai i bavu." Tolugaviavo nuanuadi Iesu 'ana kaleko i na veusedi begaidi tamu 'wava i 'waveni bani'odi kate. 'Ai'edi aitoi i na kumetaga, ava'ai kalekoga nuanuana i na 'ewai. <sup>35</sup> ✧ Tomotoga fuedi i tovoi Iesu i 'ise'iseni wata me Diu yadi to'edakumetavo i sidibidibieni i vo, Tomotoga 'ifwaidi i 'ita'ita'iedi, 'ai'edi mogitana Keliso, Yaubada 'ana Venua'ivina, i lubwaineni taunina i na 'ita'ita'ieni."

<sup>36</sup> ✧ Wata bani'odi tolugaviavo i sidibidibieni oine yuyuna i mieni Iesu mataneye i 'iyoyoeni. <sup>37</sup> Wata i vo, 'Ai'edi 'omu me Diu yadi Kini, taunimu 'u na 'ita'ita'iemu, 'u na obuma 'ai lagalagana 'wainega." <sup>38</sup> De'e vonanina i kilumi 'ai lagalagana tabwaneye i vo, TOMOGO DE'E ME DIU YADI KINI."

### *Tamu tosakona i nuavilai.*

<sup>39</sup> Tamu tosakona 'ai lagalagana 'waineye Iesu i yagaia i vo, 'Omu 'wa da vo kebu Keliso. Taunimu 'u na 'ita'ita'iemu, wata 'ima 'u na 'ita'ita'iemu." <sup>40</sup> We'e iana tamu tosakona i talaboda i vo, Awale? Sai'afoga 'ada 'aitonu ta na wafa. I lubwaineni Yaubada 'u da ve'ililibuyeni. <sup>41</sup> 'Ada 'ailuga i lubwaineda ta na wafa yada sakona 'adi tutula, we'e Iesu kebu tamu yana sakonaga." <sup>42</sup> Wata i vona Iesu 'waineye i vo, Iesu, tutuyanina 'u na ve-Kini ma yamu veime'a 'u na mai, 'u da nuaniku." <sup>43</sup> Nika Iesu i voneni i vo, A vona mogitana 'waimuye, 'asiau 'ada 'ailuga ta na luku Faladaisi, 'eba mia 'atumaina wata sosoana-vagata 'waineye."

### *Iesu i wafa.*

✧ **23:30:** Ose 10:8; Ve 6:16 ✧ **23:34:** Same 22:18; Mad 5:44 ✧ **23:35:** Same 22:7-8 ✧ **23:36:** Same 69:21

44 ✨ Aiata 'ana utukamwana 'waineye inala yana mageta i 'ailove fwayafwaya matatabuna i dudubali, mulieta lavilavie bani'odi 3 kiloki i magetai. 45 ✨ Vanuga 'eba velu'ui nageneye tamu kaleko bwaikina bega Yaubada yana tudaba tabutabuotogina i sisibodeni. Tutuyanina 'waineye kalekonina i 'anilabu'alugedi nika bani'odi i sibaleni 'eba luku Yaubada 'waineye. 46 ✨ Iesu bonana bwaikinega i vegole i vo, Tamaku, 'Anu'anunuku a tauyeni 'waimuye.” I vona'a'ava nika yawaina i 'awatagoni. 47 Tolugaviavo 'adi to'edakumeta i 'iseni Iesu yana wafa begaidi Yaubada i subiai i vo, Vona mogitana, tomogo 'atumaina.”

48 Tomotoganidi i maiaga Iesu 'ana tutufwatagi 'waineye, i 'iseni yana wafa i viladi i nagoi yadi vanuge ma yadi nuavita bwaikina. 49 We'e tomotoganidi Iesu enavo, 'ifwaidi vevine taiadi basenadi Iesu i yogo'waili i maiaga Galili 'wainega, 'ani'ieyega i tovoivoi i 'i'isanago.

### *Iesu i ve'ufai.*

50-51 Ielusalema 'waineye tamu tomogo i miamia 'ana waga Iosefa, 'ana tuvada Alimadia, 'awalawa Iudia nageneye. Taunina tomogo 'atumaina yana sauluva tonovidi wata i lulukamata Yaubada yana veimea yana mai fwayefwayeye faifaina. Iosefanina tamu me Diu yadi Kaniselo siwe tutuyanina kaniselonidi i veimea Iesu i na wafa, yadi nuanua kebu i da awave'atumaeni. 52 Tutuyanina Iosefa i 'asetai Iesu i wafa i nago Failato 'waineye i velu'ui i vo, Nuanuaku Iesu tomogona a na ta'ia a na ve'ufai.” 53 Failato i tauyeni bega i nago Iesu tomogona i ta'ia i fania kaleko 'avu'avunega. Mulieta i nago i silukuveni taumata 'ivauna 'waineye. Taumatanina basenadi i alai matumatu 'waineye, kebu tamu aitoi bei i da ve'ufai. 54 Iesu i ve'ufaiga Falaidei lavilavie, me Diu yadi 'Aiata Veawai sai'afoga i na velamu.

55 Vevinenidi Iesu i yogo'waili i maiaga Galiliega Iosefa taia i nagoi taumaseye, i 'iseni Iesu 'ana ve'ufa. 56 Vevinenidi i viladi i nagoi yadi vanuge bunama magaidi 'atumaide i 'idewadewadi Iesu tomogona 'ana ve'ufa-'atumaide faifaina. Tutuyanina i 'idewadewa'a'ava, nika inala i simwanuya yadi 'Aiata Veawai i velamu, bega i veawai me Diu yadi veimea bani'odi.

## 24

### *Iesu i tovoi-vaitugana wafayega.*

1 Me Diu yadi 'Aiata Veawai i 'a'avana, Tafalolo 'awa'awaiogose, vevinenidi bunamanidi i 'idewadewadiga i

'ewadi i nagoi taumaseye. <sup>2</sup> Tutuyanina i le'wai i 'iseni kileu bega taumata i sibodaiga, 'akonadi i ketoi. <sup>3</sup> Matatabudi i luku taumata nageneye 'Auvea Iesu tomogona i 'isa'avai. <sup>4</sup> I tovtovoi i vevenua'ivina nika tomotoga 'adi 'ailuga ma 'adi talauma mataududulidi i souyedi 'waidie. <sup>5</sup> Vevinenidi i kololo-'afo'afo bega i 'odu tomotoganidi 'adi 'ailuga matadie. Tomotoganidi vevine i vonedi i vo, Ava'ai faifaina 'wa maia taumaseye 'wa lalauala tamu tomogo i yawasaga faifaina? <sup>6-7</sup> \*Iesu de'e bei kebu i da miamiaga, 'akonadi i tovoi. 'Wa na nuani yana vona basenadi Galili 'waineye i vonemi i vo, Yau a vetomotogaotoga i na 'aniveleneku tosakona 'waidie, bega i na tutufwaseku 'ai lagalagana 'waineye mulieta 'aiata 'ana vetonu 'waineye Yaubada i na sivetovoi-vaituganiku wafayega.”

<sup>8-9</sup> Nika vonanina basenadi Iesu i voneyeniga vevine i nuani i viladi i nagoi Ielusalema naninidi matatabuna i lu'ivoneyedi tomata'aulele 11 'waidie, wata 'ifwaidi tovetutuyamavo 'waidie. <sup>10</sup> \*Vevinenidi i nagoi taumata 'waineye side 'adi wagava. Meli 'atamana Magidala 'wainega, Ioana, Meli Iemesa inana, wata 'ifwaidi vevine. <sup>11</sup> Naninidi i 'isediga i lu'ivona Iesu yana tomata'aulele 'waidie, siwe kebu i da ve'awamogitana fai yadi nuanua i vo, Vonanina 'ana nogaya 'waideye 'wava'wavadi yadi vona.” <sup>12</sup> We'e Fita i tovoi i lilide i nago taumaseye i lukemula Iesu 'ana baniuma'ava i 'iseni, kebu tamu wata ava'ai i da 'iseniga. Bega i vilai i nago vanuge, nuana i 'ivi'ivina nika yana nuanua i ve'ale'usa.

*Iesu i souyeni Emeusa 'ana 'edeye.*

<sup>13</sup> 'Aiatanina 'waineye Iesu i tovoi wafayega, tovetutuyamavo 'adi 'ailuga Ielusalema 'wainega i tauya i nunagoi tamu 'atamana 'ana wagava Emeusa 'waineye, 'edanina 'ana nago bani'odi 'awasasa 'ailuga. <sup>14-15</sup> I nunagoi 'edeye ma iana i veveifufu-'eda'eda naninidi i souyediga faifaidi, nika Iesu tauniotogina mulidie i mai i veluagadi. <sup>16</sup> Tomotoganidi Iesu i 'iseni, siwe voke bani'odi i munega kebu i da 'isa'inanaiga.

<sup>17</sup> Iesu i velutoliedi i vo, Ava'ai faifaina 'wa veveifufu-'eda'eda?” Nika i tovoi maigidi 'ana 'isa nuavita. <sup>18</sup> Tamu iana 'ana wagava Kaliofasa i voneni i vo, Tomia Ielusalema matatabudi i 'asetai ava'ai i souyediga 'aiatanidi 'waidie, voke 'omu 'aiseotogimu bavubavumu.” <sup>19</sup> \*Wata Iesu i vo, Ava'ai naniga?” Kaliofasa i vo, Iesu, tomogo Nasaledi faifaina. Tomogonina tamu Yaubada yana tolu'ivona, yana vona toketokena, 'eba nuavogana wata 'ebanua'ewa i 'idewadewadi, begaidi Yaubada wata tomotoga



i awave'atumaieni. <sup>20</sup> Tovelomu 'adi to'edakumetavo wata 'ida yada to'edakumetavo i 'aniveleneni Loma gabemani 'waidie i veimeyeni i na wafa mulieta i tutufwaseni 'ai lagalagana 'waineye. <sup>21</sup> ✧'Ima 'a nuani kumanina Yaubada 'ana Venua'ivina i maiga me Isileli i na 'ita'ita'ieda. Yana wafa 'wainega i maiga 'asiau 'aiata 'ana vetonu ta veluagai. <sup>22-23</sup> ✧'We'e 'asiau 'awa'awaiogose 'ifwaidi vevine 'ama 'aila'a 'wainega i nagoi taumaseye Iesu tomogona i 'isa'avai. Tutuyanina i viladi i maia i lu'ivona 'waimeye i vo, Mogitana anelose i souyedi 'waimeye i vonema Iesu 'akonadi i tovoivaitugana." Yawaima i lovoga wata nuama i voganidi yadi vona faifaina. <sup>24</sup> Begaidi 'ifwaidi emavo i nagoi taumaseye ava'ai vevinenidi i voneyeniga i veluagai, Iesu tomogona i 'isa'avai."

<sup>25</sup> Iesu tomotoganidi 'adi 'ailuga i vonedi i vo, 'Omi bavubavumi. Basenadiotoga Yaubada yana tolu'ivonavo nani fuedi i kiluma-vagasedi Keliso faifaina siwe kebu 'wa da vetumagana. <sup>26</sup> I lubwaineni Yaubada 'ana Venua'ivina veviganidi i veluagadi, mulieta i na luku abame, yana 'eba mia 'ai'aiwabuna 'waineye." <sup>27</sup> ✧Mulietta Iesu taunina faifaina i kiavemageta Yaubada yana Buki 'wainega. Vonanidi i veifufuyediga i velamu Mosese 'ana kilukiluma 'wainega wata tolu'ivona 'adi kilukiluma 'waidiega.

<sup>28-29</sup> 'Akonadi i maia Emeusa lilivaneye 'adi 'ailuga i 'asetai Iesu i na vaganago tamu 'atamana 'waineye begaidi i talabodeni i vo, Side bei ta na 'eno, 'akonadi i lovalovani." Bega ma fuedie i luku bei taiadi i na 'eno. <sup>30</sup> Mulietta i miabui i na 'ani Iesu 'ani'ani i 'ewai, i vekaiwa Yaubada 'waineye i 'ivivia i veledi. <sup>31</sup> ✧Nika bei matadi i 'anialadi i 'isa'inanai, siwe 'waidiega i 'awafa'wani. <sup>32</sup> Iesu i nago, 'adi 'ailuga i veifufu i vo, Iaku vona mogitana, tutuyanina 'edeeye i kikiavemageta Yaubada yana Buki 'wainega ma 'ana vebae 'waideeye 'wa da vo nuafouda i da 'awadadedi."

<sup>33</sup> Ma iana i vonavona i 'a'avana nika i tovoi i viladi i nagoi Ielusalema, bei tovetutuyamavo 11 i veluagadi wata 'ifwaidi ediavo taiadi. <sup>34</sup> I le'wai i nogai i vonavona i vo, Vona mogitana, 'Auvea i tovoi-vaitugana, Saimoni i 'iseni." <sup>35</sup> Mulietta 'adi 'ailuga i lu'ivona, nani matatabuna i veifufuyedi. Yana souyagi 'edeeye, taiadi i veifufu-'eda'eda, wata 'ani 'waineye 'ani'ani i 'ivivia nika bei i 'isa'inanai.

*Iesu i souyeni yana tovetutuyamavo 'waidie.*

<sup>36</sup> Kaliofasa ma iana bola i veveifufu ediavo 'waidie nika Iesu tauniotogina i souyeni 'awasasadie. I vonedi i vo, Kebu 'wa na kolologa, ma yami sosoana 'wa na miamiani." <sup>37</sup> Siwe

✧ **24:21:** Luk 1:68, 2:25; Fol 1:6 ✧ **24:22-23:** Luk 24:1-11 ✧ **24:27:** Ais 53:12; Same 22:1,7-8,16-18, 69:21 ✧ **24:31:** Luk 24:16

i kololo-'afo'afo i 'ise'iseni i vo 'ako yalua. <sup>38</sup> Wata Iesu i vonedi i vo, Awale nuafoumi i veviga, wata 'wa vevenu-analuga? <sup>39</sup> 'Wa 'isamaiedi 'aku kini'ona nimakuye wata 'agekuye, wata 'wa na 'isa-dewaku mogitana yau. 'Wa na 'abitonoviku bega 'wa na 'asetaku yau kebu yaluaga, yalua kebu ma tomogona 'ana wagava kaukau.”

<sup>40</sup> I vona'a'ava mulieta nimana wata 'agena i vedi. <sup>41</sup> Sosoana mogitana i sosoana siwe kebu i da vetumagana fai nuadi i vogavoganidi. Begaidi Iesu i velutoliedi i vo, 'Ani'ani 'aivia 'waimie?” <sup>42-43</sup> Bega igana kabukabunina i 'ewai i veleni matadie i 'ani.

<sup>44</sup> Mulieta i vonedi i vo, 'Wa na nuani basenadi taiadi ta miamia a vonemi a vo, Nani matatabuna faifaiku i kilumidiga Yaubada yana Buki 'waineye i lubwainedi i na souyedi 'waikuye. Vonanidi i kilumidi Buki Same 'waineye, Mosese 'ana kilukiluma 'waidie, wata Yaubada yana tolu'ivonavo 'adi kilukiluma.” <sup>45</sup> ✨Iesu yadi nuanua i kiavemagetadi bega nani fuedi Yaubada yana Buki nageneye i 'asetadi, nika bei nuadi i magetadi. <sup>46</sup> I vonedi i vo, Vonanidi tamu side bani'odi. Keliso, Yaubada 'ana Venua'ivina veviga bwaikina i na veluagai, i na wafa, mulieta 'aiata 'ana vetonu 'waineye Yaubada i na sivetovoia. <sup>47</sup> We'e Kelisonina valana i na souyeni Ielusalema 'wainega i na nago 'awalawa matatabuna 'waidie. Valanina side bani'odi. Egavo Keliso 'ana wagavayega i na nuaviladi sakona 'wainega Yaubada i na nuatavunidi. <sup>48</sup> Naninidi basenadiotoga i kilumidiga Yaubada yana Buki 'waineye, 'omi matamie i souyedi.

<sup>49</sup> ✨Yau 'ami To'aivaita\* a na vetunei 'waimie, To'aivaitanina faifaina basenadi Tamaku i vona'awaufaufa i na velemini. Siwe kebu 'wa na tauya-matayo'o de'e bei 'wa na lulukamata Ielusalema nagami toketokena i na mai Yaubada 'wainega i na agemi.”

### *Iesu i laka abame.*

<sup>50-51</sup> Iesu yana veifufu i 'a'ava, yana tovetutuyamavo i 'edakumesedi Ielusalemega i nagoi Bedani. Bei nimana i silakai i vovonanuakalikali 'waidie nika Yaubada i vagavaia i naweni abame. <sup>52</sup> ✨Iesu i tauya i nunago yana tovetutuyamavo i subiai, mulieta ma yadi sosoana bwaikina i viladi i nagoi Ielusalema. <sup>53</sup> Tutuya matatabuna bei i miamia vanuga 'eba velu'ui nageneye Yaubada 'waineye i vevekaiwa.

'Asa'aiana bani'odi,  
Yau Luke.

✨ **24:45:** Luk 24:27 ✨ **24:49:** Ion 15:26, 16:7 ✨ **24:49:** To'aivaitanina  
'Anu'anunu 'Atumaina. ✨ **24:52:** Ion 14:28

## IONI Iesu Valana 'Atumaina Ioni 'ana kilukiluma

Ioni tamu Iesu yana tovetutuyamavo 12 'adi 'aila'a 'wainega. Taunina tutuya fue di Iesu taiadi i yabayaba bega yana folova i 'isedi wata yana ve i nogaidi. We'e Malika, Madiu wata Luke i kumeta i kiluma, mulieta Ioni i vemuli i kiluma.

Ioni yana veifufu ta na 'iseni 'wa da vo tamu tomogo i da kiluma we'e mogitana 'asa'aiana taunina i kiluma. Siwe kebu nuanuana taunina i na awa'ai'aia begaidi i vo, Yana tovetutuyamavo i vona,” we'e mogitana i da vo, Yana tovetutuyamavo 'a vona.”

Malamala fue di i 'a'ava tomotoga nuadi i fani Iesu yana wafa, yana tovoi-vaitugana wata yana laka abame faifaidi. Faifainanina Ioni nuanuana Iesu ifufuna i na kilumi tomotoga fueda faifaida. Vonanidi i kilumidiga 'Anu'anunu 'Atumaina yana 'aivaita 'wainega, vonanidi 'ada fata 'waidiega ta na vetumagana.

Yana kiluma 'eba velamu 'waineye Ioni i kiavemageta Keliso lamuna faifaina, Kelisonina nagamidiotoga Yaubada taiadi i miamia mulieta Tamana i voneni i mai fwayefwayeye. Yaubada i kiavemageta 'waideye Keliso 'wainega taunina yana 'asete faifaina, bega Keliso 'ana 'eba 'ainana tamu, Yaubada 'ana Tokiavemageta. Wata Ioni i veifufu Iesu 'eba nuavogana wata 'eba nua'ewa i 'idewadiga faifaidi, bega ta na lu'iaawawai nika ta na 'asete-'atumaia Iesu mogitana Yaubada Natuna. We'e me Diu fue di i baila kebu nuanuadi Iesu bega i luvewafai. Iesu yana wafa yana tovi-vaitugana wata yana souyagi enavo 'waidie faifaidi i kiluma. Ioni 'ana kilukiluma nageneye i vo,

Iesu folova toketokedi fue di 'eba nuavogana wata 'eba nua'ewa i 'idewadi yana tovetutuyamavo matadie, siwe kebu matatabuna 'adi kilumaga de'e bukinina 'waineye. Naninidi 'akonadi kilukilumidi 'wa na lu'iaawawadi bega 'wa na vetumagana Iesu Keliso taunina Yaubada Natuna wata 'ana Venua'ivina. Vetumagananina 'wainega mia 'ivauna wata 'atumaina 'wa na veluagai Iesu 'wainega. (Ioni 20:30-31)

*Keliso taunina Yaubada yana Tokiavemageta i vetomoto-gaotoga.*

<sup>1</sup> ✧ Basenadiotoga Yaubada fwayafwaya wata abama bola kebu i da 'idewadiga, nagamidiotoga yana Tokiavemageta

i miamia. Tokiavemagetanina Yaubada yana nuanua matatabuna 'ana tolu'ivona. Taunina Yaubada 'ana labilabina wata taunina 'asa'aiana Yaubadanina. <sup>2</sup> Tutuya 'eba velamunina 'waineye Tokiavemageta Yaubada taiadi i miamia. <sup>3</sup> ✨Yaubada yana nuanua 'wainega Tokiavemageta nani matatabuna i 'idewadi abame wata fwayefwayeye, kebu tamu nani taunina i da souye-maimaigeni. <sup>4</sup> ✨Taunina miamia-vagaina yawaida lamuna wata 'wainega mia 'ivauna wata 'atumaina ta veluagai, bani'odi mageta 'waideye. <sup>5</sup> ✨Tomotoga yadi sauluva sakoidi 'wa da vo bani'odi dudubala 'ana tomia, siwe Yaubada yana Tokiavemagetanina i magemagesedi, we'e tomotoganidi kebu 'adi fata i na vetoketoke magetanina i na luve'weuya.

<sup>6-7</sup> Yaubada nuanuana tomotoga magetanina i na 'asetai, begaidi yana tomata'aulele i vetunei bega i na lu'ivona 'waidie. Tomogonina 'ana wagava Ioni Tobafitaiso, i mai i lulu'ivona magetanina faifaina, bega tomotoga i na vetumagana 'waineye. <sup>8</sup> Ioninina kebu taunina mageta, i vetolu'ivonamo mageta faifaina. <sup>9</sup> Yaubada yana Tokiavemagetanina 'asa'aiana taunina mageta mogitana, fwayefwayeye i obuma matatabuda nuada i kiavemagetadi.

<sup>10</sup> ✨Yaubada yana nuanua 'wainega Tokiavemageta fwayafwaya i 'idewai mulieta i obuma i vetomotogaotoga, siwe 'asa'aiana taunina Iesu Keliso. I miamia siwe tomia fwayafwaya kebu i da 'asetai taunina 'adi to'idewadewa. <sup>11</sup> I mai taunina yana 'awalaweye siwe yana 'aila'a i baila. <sup>12</sup> ✨Siwe 'ifwaidi yana mai faifaina i sosoana i vetumagana taunina Keliso, Yaubada 'ana Venua'ivina begaidi Yaubada i tauyedi taunidi natunavo. <sup>13</sup> ✨Tomotoganidi bani'odi i tubuve'ivau. Tubuve'ivaunina kebu tomogo ma yana vavine 'waidiega, wata kebu tamu tomogo yana nuanuayega, tubuganina Yaubada 'wainega yana 'aila'a faifaina.

*Nuakalikali bwaikina i mai Keliso 'wainega.*

<sup>14</sup> ✨Keliso i obuma i vetomotogaotoga taiadi 'a miamiana. 'Ifwaima 'a 'iseni taunina magemagetana, yana sauluva tonovaotogidi wata ma yana nuakalikali i vevesauluva 'atumaina 'waideye. Fai Yaubada Natuna tubu'eana begaidi Tamana yana toketokena i veleni bega taunina magemagetana.

<sup>15</sup> Ioni Tobafitaiso i maiga bonana bwaikinega i lu'ivona 'aila'a 'waidie Keliso faifaina i vo, Sino taunina, kumanina faifaina a lulu'ivona 'waimie a vo, Avinodi yau a kumeta, taunina i mimai mulikuye, siwe taunina bwaikaotogina yau

✨ **1:3:** Kolos 1:16-17; Ibu 1:2 ✨ **1:4:** Ion 5:26 ✨ **1:5:** Ion 8:12 ✨ **1:10:** Ion 17:25 ✨ **1:12:** Gal 3:26; Kolos 2:6 ✨ **1:13:** Ion 3:3-6; 1 Fit 1:23 ✨ **1:14:** Fil 2:7; Ibu 2:14; Luk 9:32,35

kebu bani'odiga fai yau bola kebu a da tubugaga nagamid-iotoga taunina i miamia.”

<sup>16</sup> ✧Keliso tonuakalikali mogitana, tutuya fuedi i nunuakalikaleda wata i vevesauluva-'atumaieda. <sup>17</sup> Basenadiotoga Mosese ve'etoboda Yaubada 'wainega i veleda, we'e nuakalikali bwaikaotogidi wata sauluva tonovidi i mai Iesu Keliso 'wainega. <sup>18</sup> ✧Kebu tamu aitoi Yaubada i da 'iseniga, 'aiseotogina Natuna Keliso fai 'ana labilabina Tamana i sivemageseni tomotoga 'waideye, Kelisonina siwe 'asa'aiana taunina Yaubada.

*Ioni Tobafitaiso yana lau'age.*

<sup>19</sup> Me Diu to'edakumetavo i miamiani Ielusalema 'waineye nuanuadi i na 'asetai Ioni Tobafitaiso aitoi, begaidi tomotoga 'ifwaidi i vetunedi i nagoi 'waineye i velutolieni. Tomotoganidi tovelomu 'ifwaidi wata vanuga 'eba velu'ui 'ana to'isave'avinavo. <sup>20</sup> Ioni yadi velutoli kebu i da vedumwe'ai'aieni nani matatabuna i lu'ivoneyedi i vo, Yau kebu Keliso, Yaubada 'ana Venua'ivinaga.” <sup>21</sup> ✧Bega i velutolieni i vo, We'e 'omu aitoi? 'Alo 'omu Ilaitia 'u vilamu Yaubada 'wainega?” Ioni i vo, Kebu.” Wata i velutoli i vo, 'Alo 'omu tolu'ivonanimu, kumanimu faifaimu basenadiotoga Yaubada i lu'ivona Mosese 'waineye, i vo, Bola i na mai?” Nika wata i vo, Yau kebu kumanikuga.” <sup>22</sup> Wata tovelutolinidi i vo, Vetuma 'omu aitoi? Nuanuama taunimu 'u na lu'ivonemu bega 'a na vilama 'a na nagoi 'ama tovetune 'waidie 'a na veifufu.” <sup>23</sup> ✧Bega Ioni yadi velutoli i tutuli i veifufu 'waidie i vo,

Yau tovegolegole sali'avu'avuyega kumaniku a vo,

'Auvea yana 'eda 'wa na vusia, wata 'wa na sivetonovidi yana 'eba nago.”

Vonanina de'e Ioni taunina faifaina i lulu'ivoneyeniga, basenadiotoga Yaubada yana tolu'ivona 'ana wagava Aisea i kilumi.

<sup>24-25</sup> Tovelutolinidi Falisi i vetunediga wata Ioni i velutolieni i vo, 'U vonaga 'omu kebu Keliso, kebu Ilaitia, wata kebu Yaubada yana tolu'ivona bwaikina, siwe awale tutuya fuedi tomotoga 'u bafitaisodi?” <sup>26</sup> ✧I vonedi i vo, Yau ufa 'aisena 'wainega tomotoga a bafitaisodi, we'e tamu tomogo lilivamie siwe 'wa bavuyeni, sai'afoga yana folova i na velamu 'waimie. <sup>27</sup> I mimai mulikuye siwe taunina toketokeotogina, yau kebu bani'odi. Kebu i da lub-waineku 'waineye a na vetofolova fai taunina bwaikina a bunumayaga.”

✧ 1:16: Efe 3:19 ✧ 1:18: Ion 6:46; Mad 11:27 ✧ 1:21: VeL 18:15; Fol 3:22

✧ 1:23: Ais 40:3 ✧ 1:26: Ion 1:33

28 De'e bani'odi Ioni i veifufuyediga Bedani 'waineye, Ufa Iolidani we'e no'o bega, wata bei tomotoga i bafitaisodi.

*Iesu taunina Yaubada yana Sifi Siaina.*

29 ✨I 'atai Ioni i veveifufu 'aila'a 'waidie nika Iesu i 'isanaweni i mimai i vonedi i vo, Sino tomogonina, Yaubada yana Sifi Siaina i mai 'wainega. Taunina yana wafa 'wainega tomia fwayafwaya matatabuda yada sakona i na 'ewayavuledi. Tomotoga yadi sakona 'adi nuatavuna faifaidi sifi i nikenikedi i vevelomuyedi Yaubada 'waineye, we'e Iesu taunina yawaina i na tauyeni yada sakona 'adi 'u'uma faifaidi. 30 Kumanina basenadi faifaina a lu'ivona 'waimie a vo, Avinodi yau a kumeta, taunina i mimai mulikuye, siwe taunina bwaikaotogina yau kebu bani'odi fai yau bola kebu a da tubugaga nagamidiotoga taunina i miamia.” 31 Yau basenadi bavubavuku a vo, Keliso aitoi?” Siwe a mai a lalau'age wata tomotoga fuei a bafitaisodi ufayega bega me Isileli Kelisonina i na 'asetai.”

32 ✨Wata Ioni side bani'odi i lu'ivoneyedi tomotoga 'waidie i vo, Bei a 'iseni 'Anu'anunu 'Atumaina Iesu i age-vagaseni 'ana 'isa'isa bani'odi bunebune abamega i obuma i toa 'waineye. 33 'Ai'edi kebu a da 'iseniga bola a da bavubavu, siwe a 'iseni nika nuaku i 'anita'ia bei a nuani, basenadi tutuyanina Yaubada i vetuneku a na bafitaiso ufayega i voneku i vo, Tamu tutuya 'u na 'iseni 'Anu'anunuku i na obu tamu tomogo i na age-vagaseni 'u na 'asetai kumanina 'awaie 'Anu'anunu 'Atumaina tomotoga i na veledi i na agedi 'wa da vo i da bafitaisodi 'Anu'anununina 'wainega.” 34 Tauniku matakuyega a 'iseni, a vona mogitana taunina Yaubada Natuna.”

*Iesu yana tovetutuyamavo kumekumetadi.*

35-36 ✨I 'atai Ioni Tobafitaiso yana tovetutuyamavo 'adi 'ailuga taiadi i tovtovoi, nika Iesu i 'iseni i mai i nunago. Bega Ioni i vonedi i vo, Sino tomogonina Yaubada yana Sifi Siaina.”

37 'Adi 'ailuga yana vona i nogai Iesu mulineye i nagoi. 38 Iesu i sivilai i 'isedi i velutoliedi i vo, Tamu ava'ai yami nuanua faifaina 'wa mimaia?” Velutoliega yana velutoli i tutuli i vo, Tove, ava'aibe bei yamu vanuga?” 39 Iesu i vo, 'Wa maia ta na nagoi a na vemi.” Taiadi i nagoi yana 'eba mia i vedi. Fai 'akonadi i lavia, bani'odi 4 kiloki, bei i miamiani nika i lovani.

40 Tomotoganidi 'adi 'ailuga Ioni yana vona i nogai bega Iesu taiadi i nagoiga, tamu 'ana wagava Anidulu, Saimoni Fita taina. 41 Anidulu Iesu taiadi i veifufu'a'ava, tonovina i nago nika tatana i veluagai i voneni i vo, Saimoni, 'ima 'akonadi Keliso, Yaubada 'ana Venua'ivina 'a veluagai.” 42 ✨Bega i

✨ 1:29: Ais 53:6-7; 1 Fit 1:18-19 ✨ 1:32: Mad 3:16 ✨ 1:35-36: Ion 1:29

✨ 1:42: Mad 16:18

vagavaia taiadi i maia Iesu 'waineyeye. Iesu Fita i 'iseni i vo, 'Omu Saimoni, Ioni natuna, a na golemu Sifasa\*." Sifasa 'ana saivila Fita, me Guliki bonadiega.

*Iesu nuanuana Filifi wata Nataniela.*

43 I 'atai Iesu nuanuana i na nago 'awalawa Galili, Filifi i veluagai i voneni i vo, 'U mai taiadi ta na nago yaku tovetutuyama." 44 Filifi 'ana tuvada Bedasaida, 'atamananina 'wainega Anidulu wata Fita bega i maia. 45 ✧Filifi Iesu yana vona i nogai Nataniela i veluagai i voneni i vo, 'U na nuanani basenadiotoga Yaubada i vona'awaufaufa 'awaie yana tomogo tamu i na vetunei i na mai, bega Mosese wata 'ifwaidi tolu'ivonavo i kiluma Yaubada yana Buki 'waineyeye tomogonina faifaina. Tomogonina 'akonadi 'a veluagai, 'ana wagava Iesu, Iosefa tomogo Nasaledi natuna." 46 ✧Nataniela yawaina i lovoga i vo, Vona mogitana? Kebu tamu nani 'atumaina 'ana fata i na mai 'atamananina Nasaledi 'wainega." Yana vona Filifi i tutuli i vo, 'U mai ta na nago 'u na 'iseni."

47 Tutuyanina Iesu Nataniela i 'iseni i mimai tomotoga i vonedi i vo, Sino taunina mogitana tomogo Isileli, yana sauluva matatabuna tonovi'avadi." 48 Nataniela Iesu i velutolieneni i vo, Bani'odi 'u munega 'u 'asetaku?" Iesu i vo, Nagami a 'isemu 'ala'ai lamuneyeye 'u votovoi mulieta Filifi i lu'ivona 'waimuye faifaiku." 49 ✧Nataniela i vo, Tove, 'omu mogitana Yaubada Natuna, wata me Isileli yama Kini." 50 Iesu i vo, Ma yamu subisubia 'u vetumaganeku fai a 'asetamu wata yamu 'eba mia a lu'ivoneyeni. Yamu 'eba mia a lu'ivoneyeniga sai'afo nani siaina, siwe 'awaie nani bwaikidi 'u na 'isedi, 'eba nuavogana wata 'eba nua'ewa a na 'idewadi. 51 ✧A vona mogitana, bola 'u na 'iseni abama i na 'anikililia, Yaubada yana anelose 'u na 'isedi i na lakalaka wata i na obuobuma yau a vetomotogaotoga 'waikuye."

## 2

*Sakali nagi faifaina Kena 'waineyeye.*

1 'Aiata 'ailuga i 'a'avana, tamu tomogo nagi sakalina i 'idewai 'atamana Kena 'waineyeye, 'awalawa Galili nageneyeye, bega Iesu inana i nago. 2 Tonisakali Iesu wata yana tovetutuyamavo i vonedi i vo, 'Omi wata 'wa na waia." 3 'Ani 'waineyeye 'adi ufa oine i 'a'ava, Iesu inana i voneni i vo, Natuku, oine matatabuna i 'a'ava." 4 ✧Iesu i vo, Inaku, ava'ai nuanuami a na 'idewai kebu 'wa na vonekuga. Yaku folova

\* 1:42: Fita (me Guliki bonadiega) wata Sifasa (me Diu bonadiega) 'adi saivila Kileu. ✧ 1:45: VeL 18:18; Ais 7:14 ✧ 1:46: Ion 7:41,52 ✧ 1:49: Mad 14:33; Mad 16:16; Ion 12:13 ✧ 1:51: Nag 28:12 ✧ 2:4: Ion 7:30

'ana tutuya bola.”<sup>5</sup> Siwe inana 'ani'ani 'adi to'idewadewa i vonedi i vo, Ava'ai Iesu i na voneyediga, 'wa 'idewadi.”

<sup>6</sup> Diu totafalolo yadi sauluva nimadi i 'i'ilekoa-dewadi wata i tatafalolo bega igodi yadi nuanua vunavunagidi Yaubada mataneyeye, begaidi vanuganina 'waineyeye 'eba koi ufa bwaikidi matatabuna 6 i yatodi, 'aitamogana 'waineyeye 'ana fata dalamu siaidi matatabuna 5 'alo 7 ta iwagi i adaga. 'Eba koinidi kileu i 'eavidi. <sup>7</sup> Iesu i vona 'ani'ani 'adi to'idewadewa 'waidie i vo, Nuanuaku 'eba koinidi ufa 'wa na veliliwadi.” 'Eba koinidi i veliliwadi i ve'alafelefeledi. <sup>8</sup> I 'a'avana i vonedi i vo, 'Eba koi siainega 'wa na koia 'wa na naweni tonisakali 'wa na veleni i na yemu.” <sup>9</sup> I 'ewai i naweni i veleni ufanina i yemutonoviga 'akonadi i ve-oine. Tonisakalinina kebu i da 'asetaigna ava'aiega oine i veluagai we'e tofolova 'aise'avadi i 'asetai. <sup>10</sup> Bega tonisakali tomogonina i nagiga i goleni i mai i voneni i vo, Tomotoga fuedi yadi sauluva nagami oine 'ana lautonova 'atumaina i na 'aniveleneni tomotoga i na yemu, mulieta tutuyanina nuadi i na lugaugaudi, kibwana i na sivemageseni i na yemu. We'e 'omu 'u vesauluva tulina, nagami oine 'atumaina 'u sivemageseni mulieta 'atumaiotogina i vemuli.”

<sup>11</sup> ☆'Eba nuavogananina wata 'eba nua'ewanina bei Iesu i velamu i 'idewai 'atamana Kena 'awalawa Galili 'waineyeye. Yana folovanina 'wainega yana toketokena Yaubada 'wainega i sivemageseni, we'e yana tovetutuyamavo i vetumagana 'waineyeye taunina Yaubada 'ana Venua'ivina.

<sup>12</sup> Sakalinina i 'a'ava, Iesu, inana tainavo taiadi wata yana tovetutuyamavo i nagoi 'atamana Kafaneomi bei sai'afu i yogomia.

*Iesu i nago vanuga 'eba velu'ui 'waineyeye.*

<sup>13</sup> ☆'Akonadi tutuya i velilivana sai'afoga me Diu yadi Sakali Uvi'agalatagona\* 'ana 'aiata i na le'wa begaidi Iesu yana tovetutuyamavo taiadi i laka Ielusalema. <sup>14</sup> Iesu i luku vanuga 'eba velu'ui 'waineyeye tomotoga i 'isedi yadi 'aisaya i vevekimwaneyedi 'ifwaidi tomotoga 'waidie bega i na nikedi i na velomuyedi Yaubada 'waineyeye. 'Aisayanidi bulumakau, sifi, wata bunebune, we'e 'ifwaidi tomotoga mani tulina tulina 'adi tosivedavedamana† i miabui i miamiani 'adi talalia 'waidie. <sup>15</sup> Iesu ma yana nuasako bulava i 'ewadi i metani yana 'eba 'aifitala. Sifi wata bulumakau matatabudi i luveyavulidi, tosivedavedamana 'adi talalia i tutuviladi

☆ **2:11:** Ion 1:14, 4:54, 11:4 ☆ **2:13:** Sou 12:1-27 \* **2:13:** Me Diu yadi 'eba tolinuata'i basenadiotoga Yaubada tubudiavo i 'ita'ita'iedi Itifita 'wainega, anelose me Diu i uvi'agalatagonidi we'e me Itifita i nikedi. † **2:14:** Me Loma yadi mani kebu 'ana fata 'wainega i na 'anivelena-maimaiga bega i sisivedamana nuanuadi me Diu yadi mani.



yadi mani i 'etoiwaga. <sup>16</sup> We'e bunebune 'ana tovekimwane i lukakadedi i vo, Yami manuga 'wa 'ewadi 'wa souyemi. Tamaku yana vanuga 'ana wagava vanuga 'eba velu'ui, kebu yami 'eba sivedavedamanaga.” <sup>17</sup> ✨Yana tovetutuyamavo i 'iseni i nuani tamu vona basenadiotoga i kilumi Yaubada yana Buki 'waineye i vo,

Yaubada, nuanuaku bwaikina tomotoga yamu vanuga i na ve'ililibuyeni faifaina a 'i'ikasikasisi, begaidi vita a na veluagai.”

<sup>18</sup> Fai Iesu tomotoga i sogiedi faifainanina me Diu to'edakumetavo i maia Iesu 'waineye i velutoli i vo, Awale? Aitoi veimea i velemu tomotoga 'u luveyavulidi? Nuanuama tamu 'eba nuavogana wata 'eba nua'ewa 'u na 'idewai 'a na 'iseni wata 'a na 'asetai 'omu ma yamu veimea Yaubada 'wainega.” <sup>19</sup> ✨Iesu i vonedi i vo, 'Atumaina, 'eba nuavogana wata 'eba nua'ewa tamu a na 'idewai 'wa na 'iseni. Vanuga 'eba velu'ui de'e 'wa da geuyaga, 'aiata 'aitonu nagedie wata a da vetovoi-vaitugani.” <sup>20</sup> I voneni i vo, De'e vanuga 'eba velu'uinina i yogoyogoni malamala 46 nagedie, we'e 'omu igodi 'aiata 'aitonu nagedie 'u na yogona-vaitugani.”

<sup>21</sup> Siwe Iesu kebu mogitana i da vonavona vanuga 'eba velu'ui faifaina, i vonavona taunina faifaina. <sup>22</sup> ✨Tutuyanina Iesu i tovoi-vaitugana wafa 'wainega nika bei yana tovetutuyamavo yana vonanina i nuani bega Yaubada yana Buki wata Iesu yana vonanina faifaidi ma yadi vetumagana i ve'awamogitana.

### *Tomotoga matatabuda yada nuanua Iesu i 'asetadi.*

<sup>23</sup> Sakali Uvi'agalatagona 'ana tutuye Iesu i miamia Ielusalema 'eba nuavogana wata 'eba nua'ewa i 'idewadi. Tomotoga fuedi i 'iseni i vo, 'A vetumagana, mogitana i mai Yaubada 'wainega.” <sup>24</sup> Siwe Iesu 'aitamogana 'aitamogana yadi nuanua i 'asetadi begaidi yadi vetumagananina faifaina wata kebu Iesu i da ve'awamogitana. <sup>25</sup> Fai Iesu matatabuda i 'asetai'ava, begaidi 'ai'edi tamu aitoi iana yana sauluva faifaidi i na lu'ivona Iesu 'waineye kebu i da lubwaineniga.

## 3

### *Iesu i veifufu Nikodimo taiadi.*

<sup>1</sup> ✨Ielusalema 'waineye tamu Diu totafalolo Falisi 'ana wagava Nikodimo i miamia, we'e taunina tamu me Diu to'edakumeta bwaikina. <sup>2</sup> Tamu lovana i mai Iesu 'waineye i voneni i vo, 'Auvea, 'a 'asetamu 'omu Tove 'u mai Yaubada 'wainega. Kebu tamu aitoi 'ana fata 'eba nuavogana wata



16 ✨Fai Yaubada tomia fwayafwaya matatabumi i nuakalialiemi bwaikina, begaidi yau natuna yana tamogana i 'aniveleneku 'waimie bega egavo taunidi ma yadi vetumagana i na tauyedi 'waikuye kebu i na wafa mogitana, mia 'atumaina wata miamia-vagaina i na veluagai. 17 ✨We'e Yaubada kebu i da vo, Natuku a na vetunei bega yana veimea 'wainega tomia fwayafwaya vematavuloga i na veluagai," kebu, i vetunekuga tomia fwayafwaya a na 'ita'ita'iemi sakona 'waidiega.

18 ✨Egavo ma yadi vetumagana taunidi i na tauyedi Yaubada Natuna 'waikuye kebu vematavuloga i na veluagai, siwe egavo i baila 'akonadi Yaubada i veimea vematavuloga i na veluagai fai kebu i da vetumagana Yaubada Natuotogina tubu'eaku 'waikuye. 19 ✨Yau Yaubada Natunanina a maiga bani'odi mageta tomia fwayafwaya 'waimie, siwe tomotoga fue di nuanuadi dudubala fai i vevesauluva sakoidi, begaidi kebu nuanuadi mageta, faifainanina vematavuloga i na veluagai Yaubada 'wainega. 20 Tomotoganidi yadi sauluva sakoidi mageta i baila, fai kebu nuanuadi yadi sauluvanidi sakoidi i na sivemagesedi. 21 We'e egavo yadi sauluva tonovidi, ma yadi sosoana i na maia magetanina 'waikuye bega tomotoga fue di i na 'isedi i na 'asetadi Yaubada yana nuanua 'ana todumwebika."

*Ioni Tobafitaiso i veifufu Iesu faifaina.*

22 Iesu i veifufu'a'ava Nikodimo 'waineye, mulieta yana tovetutuyamavo taiadi i nagoi 'awalawa Iudia 'waineye. Bei sai'afu i yogomia wata bei yana tovetutuyamavo tomotoga fue di i bafitaisodi Iesu yana veimea 'wainega. 23-24 ✨Bola Ioni Tobafitaiso kebu i da lukuga vanuga 'eba yogona 'waineye i nago 'atamana Ainoni, Selimi lilivaneye. Bei tomotoga fue di i nunagoi 'waineye i bafitaisodi ufanina bwaikina 'waineye.

25 Tamu 'aiata, tamu tomogo Diu i nago Ioni Tobafitaiso yana tovetutuyamavo 'waidie taiadi i ve'ikwayekwayega i vo, Aitoi yana bafitaiso 'atumaiotogina bega 'ana fata tomotoga i na ve'atumai Yaubada mataneye?" 26 ✨Begaidi yana tovetutuyamanidi i nagoi Ioni i voneni i vo, Tove, 'u na nuani, tomogonina taiadi 'wa miamia Ufa Iolidani we'e no'o bega wata kumanina faifaina 'u veveifufuga, valana 'a nogai tomotoga fue di i baibailemu i nunagoi 'waineye bafitaiso faifaina." 27 ✨Ioni i vonedi i vo, Yaubada abame tomotoga 'aitamogana 'aitamogana yada folova i veleda. 28 'Wa na nuani basenadi a vonemi a vo, Yau kebu kumaniku Keliso,

✨ 3:16: Lom 5:8; 1 Ion 4:9-10 ✨ 3:17: Luk 19:10; Ion 12:47 ✨ 3:18: Ion 3:36

✨ 3:19: Ion 1:5 ✨ 3:23-24: Mad 14:3-4 ✨ 3:26: Ion 1:26-34 ✨ 3:27: Ion 19:11

yau a na vetomata'aulelemo faifaina.”<sup>29</sup> Side bani'odi. Nagi 'ana tutuye tonagi nani fueidi i veveluagadi, 'ani'ani, kukua wata tomotoga i veve'ililibuyeni i sososoana faifaina, we'e iana tosigeugeu kebu 'ana fata i na nuavita i na sosoanamo. Wata yau bani'odi, kebu 'ana fata nuaku i na vita fai iaku Iesu tomotoga fueidi i veve'ililibuyeni wata i sososoana faifaina. Tomotoga i baibaila 'waikuyega i nunagoi Iesu 'waineye, faifaina a sosoana bwaikina.<sup>30</sup> I lubwaineni Iesu i na vetomogo-bwaika, yau ma'itufa a na obu.”

### *Kumanina i mai abamega.*

<sup>31</sup> \*Aitoi i tubuga fwayefwayeye bei i miamia, begaidi tutuya fueidi i veveifufu nani fwayefwayeye faifaiddi, we'e Yaubada Natuna i mai tabwanega kebu bani'odi tomotoga, taunina bwaikaotogina wata nani matatabuna 'adi toveimea.<sup>32</sup> Kumanina i obuma tabwanega naninidi bei i 'isediga wata i nogaidi i lulu'ivoneyedi tomotoga 'waidie, siwe kebu fueidi bonana i da 'ewai.<sup>33</sup> Egavo Yaubada Natuna yana vona i vetumaganeni, taunidi wata Yaubada yana vona i ve'awamogitaneni.<sup>34</sup> \*Kumanina Yaubada i vetunei 'waideye Yaubada yana Vona 'ana tolu'ivona fai 'Anu'anununa mogitana i agei.<sup>35</sup> \*Yaubada Natuna i nuakalikalieni bwaikina, begaidi nani matatabuna i 'anivelenedi 'waineye i na veveimeyedi.<sup>36</sup> \*Egavo ma yadi vetumagana taunidi i tauyedi Yaubada Natuna 'waineye mia 'atumaina wata miamia-vagaina 'akonadi i veluagai, we'e egavo i vedumwe'ai'aieni kebu mia-vagatanina i na veluagai, Yaubada yana nuasako i na 'eno-vagata 'waidie.

## 4

### *Iesu i veifufu vavine Samelia 'waidie.*

<sup>1</sup> Me Diu totafalolo 'adi wagava Falisi vala i nogai Iesu yana bafitaisoyega yana tovetutuyamavo fueidi i veveluagadi, we'e Ioni Tobafitaiso kebu fueidiga.<sup>2</sup> We'e Iesu kebu i da bafitaisodi tomotoga, yana tovetutuyamavo 'aisedi bafitaiso i 'i'idewai.<sup>3</sup> Fai Falisi i vonaga i vo, Iesu tovetutuyamavo fueidi i veveluagadi,” begaidi Iesu yana tovetutuyamavo i vonedi ma fueidi i tovoi Iudia i 'iaweni wata i viladi i na nagoi 'awalawa Galili.<sup>4</sup> Fai Iesu nuanuana, i yogodaba 'awalawa Samelia kamwaneamo.

<sup>5</sup> \*I nunagoi Samelia kamwaneamo i souyedi tamu 'atamana 'ana wagava Saika 'waineye. 'Atamananina lilivaneye Iakobo yana fwayafwaya basenadiotoga i 'aniveleneni natuna Iosefa 'waineye.<sup>6</sup> Tanoganina 'waineye

\* 3:31: Ion 8:23    \* 3:34: Ion 1:32-34    \* 3:35: Mad 11:27; Ion 5:20    \* 3:36: Ion 3:16-18; 1 Ion 5:12    \* 4:5: Nag 33:19

bei Iakobo ufa i alai. Fai 'akonadi 'aiata 'ana utukamwana, wata Iesu i 'abiawa 'eda manamanawena begaidi i miabui ufanina lilivaneye i na veawai.

<sup>7-8</sup> We'e yana tovetutuyamavo i nagoi 'atamana bwaikina 'waineye 'adi'adi i na kinwane. Iesu i veveawai nika tamu vavine Samelia i le'wa ufa koi faifaina. Iesu i vona vavine 'waidie i vo, Ufa 'wa koia 'wa veleku a na yemu.” <sup>9</sup> ✨Me Diu wata me Samelia kebu taiadi i da veveiana, wata yadi 'eba yemu wata 'eba 'ani 'waidiega kebu 'ana fata me Diu bega i na yemu 'alo i na 'ani. Faifainanina vavinenidi i vo, Yau vavine Samelia, awale 'waimeye ufa 'u vevelu'ui?” <sup>10</sup> Iesu i vonedi i vo, 'Ai'edi 'wa da 'asetai ava'ai Yaubada nuanuana i na velemini, wata yau aitoi, 'wa da velu'uikeu bega ufa a da velemini, ufanina 'wainega mia 'ivauna wata 'atumaina 'wa da veluagai.” <sup>11</sup> ✨Vavine i voneni i vo, 'Auvea, yamu 'eba koi ufa kebu, wata ufa va'ebeiotoga ovu manamanawena, we'e 'omu ava'aiega ufa 'u na 'ewai bega mia 'ivauna wata 'atumaina 'a na veluagai?” <sup>12</sup> Wata vavinenidi i vo, Tubuda Iakobo ufa de'e i alai, taunina wata ma natunavo yadi 'aisaya taiadi bega i yemu, wata 'asiau 'ima bei 'a yemuyemu. Iakobo tomogo bwaikina, we'e 'omu igodi 'u na vebwaika-'iaweni bega tamu ufa 'atumaiotogina 'u na velema.” <sup>13-14</sup> ✨Iesu vavine yadi vona i tutuli i vo, 'Ai'edi aitoi de'e ovuyega ufanina i na yemu bola wata i na veufa'ani'anigoku, we'e aitoi ufa a na veleni i na yemuga, i na yemu-vagata kebu wata i na yemuyemu. Ufanina nuana 'waineye i na veufa-luluvuala bega mia 'atumaina wata miamia-vagaina i na veluagai.” <sup>15</sup> Vavine i vo, 'Auvea, ufanina nuanuama 'u na velema bega 'anigoma kebu i na lalala wata de'e bei kebu 'a na mimai 'a na koikoi.”

<sup>16</sup> Iesu i vonedi i vo, 'Wa nago yami lamoga 'wa vagavaia 'wa mai.” <sup>17-18</sup> Vavine i vo, Yau kebu tamu yama lamoga.” Iesu yadi vona i tutuli i vo, 'Wa vonaga 'wa vo, Kebu yama lamoga,” 'wa vona mogitana, siwe 'akonadi yami lalamogavo 5 'wa sa'iledi we'e tomogonina taiadi 'wa miamiaga, kebu mogitana yami lamoga.” <sup>19</sup> Vavine i vo, Yamu vona 'ana nogaya 'a 'asetamu 'omu tamu Yaubada yana tolu'ivona. <sup>20</sup> ✨Tubumavo Samelia tamu vanuga 'eba velu'ui i yogoni 'oya de'e 'waineye bega Yaubada 'waineye i subisubia, we'e 'omi me Diu 'wa vonaga 'wa vo, Matatabuda i lubwaineda Ielusalema 'aitamogana 'waineye ta na subisubia.” <sup>21</sup> Iesu i vonedi i vo, Vavine, a vona mogitana 'waimie, 'awaie de'e 'oyanina 'waineye wata Ielusalema 'waineye kebu bei 'aise'avadi 'waidie tomotoga i na subisubia, 'awalawa

✨ 4:9: Luk 10:33 ✨ 4:11: Ion 7:37-39; Ve 21:6 ✨ 4:13-14: Ion 6:35 ✨ 4:20: Same 122:1-4

matatabuna 'waidie bei Tamada i na subisubiai. <sup>22</sup> 'Omi me Samelia Yaubada 'wa 'asetai 'waineye 'wa subisubia, siwe kebu 'wa da 'asetai-atumaia, we'e 'ima me Diu 'a 'asetai-atumaia wata Yaubada i vena'ivinema 'waimega To'ita'ita'i i na souyeni. <sup>23</sup> ✱'Awaie wata tutuya de'e 'akonadi i velamu tomotoga kebu vanuga 'eba velu'ui 'aise'avadi 'waidie Tamada i na subisubiai, siwe wata yadi nuanua 'waidiega i na subisubia mogitana. Tamada nuanuana tomotoga side bani'odi i na subisubia. <sup>24</sup> ✱Yaubada taunina 'Anu'anunu kebu ma tomogona, begaidi i lubwaineda ta na subisubia mogitana nuadega.”

<sup>25</sup> Vavine i vona Iesu 'waineye i vo, Yau 'a 'asetai Yaubada 'ana Venua'ivina Keliso 'awaie i na mai fwayefwayeye. Tutuyanina i na mai nani fuedi i na veifufuyedi matatabuda 'waideye.” <sup>26</sup> Iesu i vo, Yau 'asa'aiana kumaniku Keliso, a veveifufu 'waimie.”

*Iesu Yaubada i vevematayakeyakeni, 'asa'aiana 'ana'ana.*

<sup>27</sup> Tutuyanina 'waineye Iesu yana tovetutuyamavo i viladi i maia. I le'wai i 'iseni vavine taiadi i veveifufu nuadi i voganidi bwaikina. Siwe kebu tamu aitoi 'waidiega i da velutoli vavine 'waidie i da vo, Ava'ai nuanuami?” 'alo i da velutoli Iesu 'waineye i da vo, Awale 'u veveifufu vavine taiadi?”

<sup>28</sup> Vavinenidi yadi 'eba koi ufa i baileni i 'eno'eno, i viladi i nago 'atamane. <sup>29</sup> Tomotoga i vonedi i vo, Tomogo no'o 'asiauna be'ama 'a veluagai, yama sauluva matatabuna i lu'ivoneyedi. 'Wa maia ta na nagoi 'wa na 'iseni. Voke kumanina Yaubada 'ana Venua'ivina.” <sup>30</sup> Tomotoga matatabudi 'atamana i 'iaweni i maia Iesu 'waineye 'ana 'isa faifaina.

<sup>31</sup> Bola tomotoga i mimaia yana tovetutuyamavo Iesu i lukakadeni i vo, Tove, 'ai'edi sai'afo 'u da 'ani.” <sup>32</sup> Yadi vona i tutuli i vo, Yau ma 'aku'aku 'ai'edi nuanuaku 'ani, a na 'ani siwe 'ani'arinina kebu 'wa da 'asetai.” <sup>33</sup> Begaidi yana tovetutuyamavo 'aise'avadi i veifufu i vo, Voke 'ai'edi tamu aitoi 'akonadi 'ani'ani i miedi i 'ani?” <sup>34</sup> ✱Iesu yadi veifufu i nogai i vonedi i vo, Yaubada kumanina i vetunekuga yana nuanua matatabuna a vevematayakeyakedi, wata folova i velekuga a na ve'a'avadi, 'asa'aiana kumanidi 'aku'aku.

<sup>35</sup> ✱Tutuya fuedi 'wa vonavona 'wa vo, Bola weta'i wata 4 i na 'a'ava, mulieta 'aiala, siwe a na vonemi. 'Wa 'isanawedi sino tomotoga i mimaia, sai'afoga i na vetumagana 'waikuye, taunidi bani'odi 'ani'ani 'akonadi i kumaga, tutuya 'aiala. <sup>36</sup> Yaku tofolovavo tomotoga i na miedi 'waikuye a na tutulidi, taunidi bani'odi to'aiala, wata tomotoganidi i na maia

✱ 4:23: Ion 15:26 ✱ 4:24: Lom 12:1 ✱ 4:34: Ion 6:38, 17:4 ✱ 4:35: Luk 10:2

'waikuye mia 'atumaina wata miamia-vagaina i na veluagai. Yaku tofолоvavo taunidi basenadi yaku vona i bakulidi tomotoga nuadie, tutuyanina i na 'isedi tomotoganidi ma yadi vetumagana i na mimaiia 'waikuye to'aialanidi taiadi i na sosoana. <sup>37</sup>Tamu yada vona 'akonadi 'ana mogitana i souyeni ta vo, Tamu tomogo 'ani'ani i bakuli we'e tamu tomogo i 'aiala.” <sup>38</sup> Basenadi yaku tofолоvavo yaku vona i bakulidi tomotoga nuadie we'e a vetunemi nonogina 'wa 'a'aialamo tomotoga ma yadi vetumagana 'wa na mimaiiedi 'waikuye.”

*Me Samelia fuedi i vetumagana Iesu 'waineye.*

<sup>39</sup> Me Samelia fuedi 'atamananina 'wainega i vetumagana Iesu 'waineye fai vavine i vo, Iesu yama sauluva matatabuna i veifufuyedi.” <sup>40</sup> Begaidi tutuyanina me Samelia i maia Iesu i 'iseni i voneni i vo, Nuanuama bwaikina taiadi ta na yogomia.” Iesu i nogayedi bei taiadi i miamia 'aiata 'ailuga.

<sup>41-42</sup> ✨Yana lau'age 'wainega wata tomotoga fuedi i vetumagana Iesu 'waineye, tomotoganidi vavine i vonedi i vo, Kebu yami vona 'aisena 'wainega 'a da vetumagana, 'ima taunima yana vona 'a nogai wata 'a 'asetai taunina mogitana tomia fwayafwaya 'ada To'ita'ita'.”

*Iesu tamu toveimeea natuna i 'ive'atumaia.*

<sup>43</sup> Samelia 'waineye 'aiata 'ailuga 'akonadi i 'a'ava, Iesu wata yana tovetutuyamavo taiadi i tovoi i nagoi 'awalawa Galili. <sup>44</sup> Basenadi Iesu i vo, Yaubada yana tolu'ivonavo taunidi 'adi tuvadeye kebu ma 'adi ve'ililibu yadi tomotoga 'waidie.” <sup>45</sup> Siwe tutuyanina i le'wai Galili Iesu 'ana tuvadeye, tomotoga ma yadi sosoana Iesu i ve'ililibuyeni fai basenadi taunidi i lakaga Ielusalema Sakali Uvi'agalatagona faifaina, bei i 'iseni 'eba nuavogana wata 'eba nua'ewa i 'idewadi.

<sup>46</sup> ✨Iesu wata yana tovetutuyamavo i viladi i nagoi 'atamana Kena 'awalawa Galili 'waineye, bei basenadi Iesu i vona ufa i ve-oine. Bei Kena 'waineye i miamiani tamu toveimeea Kafaneomi 'waineye natuna i viga. <sup>47</sup> Tutuyanina vala i nogai Iesu i mai Galili, 'awalawa Iudia 'wainega, i nago 'waineye i voneni i vo, 'Auvea, nuanuaku bwaikina ta na nago Kafaneomi, natuku sai'afoga i na wafa 'u na 'ivaiseni.”

<sup>48</sup> ✨Iesu i vona toveimeanina 'waineye i vo, 'Omi nuanuami nagami 'eba nuavogana wata 'eba nua'ewa a na 'idewadi 'wa na 'isedi mulieta 'wa na vetumagana 'waikuye, we'e kebu nuanuami nagami 'wa na vetumagana.” <sup>49</sup> Toveimeanina i vo, 'Auvea 'ai'edi ta na vemumuna natuku i na wafa, ta na lilide ta na nagoi.” <sup>50</sup> ✨Iesu i voneni i vo, 'U nago, natumu kebu i na wafaga i na ve'atumai.” Toveimeanina Iesu yana

vona i vetumaganeni nika i tauya. <sup>51</sup> I nunago 'edeeye yana tofолоvavo i veluagadi yana vala i mimaieni natuna i ve'atumaiga faifaina. <sup>52</sup> Begaidi i velutoliedi i vo, Ava'ai 'awasasaga i ve'atumai?" I vo, Bogi 'aiata-'wane'waneeye bani'odi 1 kiloki yana luyauyauta i 'awatagoni." <sup>53</sup> \*Nika tamana i nuani 'awasaanina 'waineye Iesu i voneni i vo, Natumu i na ve'atumai." Begaidi ma yana 'aila'a i vetumagana Iesu 'waineye.

<sup>54</sup> \*Iesu yana mai Iudia 'wainega, 'awalawa Galili 'waineye, yana folova toketokena 'ana veluga de'e i 'idewai.

## 5

### *Tamu tomogo Iesu i 'ive'atumaia ufa lilivaneye.*

<sup>1</sup> Iesu, toveimea natuna i 'ive'atumaia i 'a'ava, mulieta me Diu totafalolo sakali tamu tulina, i 'idewai Ielusalema 'waineye begaidi Iesu i laka. <sup>2</sup> Ielusalema kalikalina we'e tamu 'awa i 'idewai 'ana wagava Sifi-'adi-'Awa, fai beidimo 'aisaya sifi i lukulukuedi. 'Awanina lilivaneye tamu awana iulaula, awananina me Diu bonadiega i goleni Bedeseida, wata bei 'eba veawai 5 i didigidi. <sup>3-4</sup> 'Eba veawainidi 'waidie tovinga fueidi i miamiani taunidi tomatasako, tubusakosakoidi, wata bwalobwaloko. [Toviganidi bei i lulukamata fai tutuya 'ifwaidi tamu 'Aueva yana anelose i obuobuma ufanina i lulunekwanekwai. I na lunekwanekwai i 'a'avana, aitoi i na kumeta i na obu-matayo'o, kumanina i na ve'atumai 'ana viganina 'wainega.] <sup>5</sup> Toviganidi 'waidiega tamu iadi i viga i miamia malamala 38. <sup>6</sup> Iesu i mai tomogonina i 'iseni, i 'asetai 'ana viga i 'eno'eno tutuya manamanawena begaidi i velutolieni i vo, Nuanuamu 'u na ve'atumai?" <sup>7</sup> Toviganina Iesu yana vona i tutuli i vo, 'Aueva, siwe kebu tamu aitoi i na siobuyeku tutuyanina ufanina i na lunekwanekwai. Igodi a da obuobu nika iaku tamu i kumeta i obu i ve'atumai." <sup>8</sup> \*Iesu i voneni i vo, 'U tovoi, 'amu 'ivi 'u 'ewai 'u nago." <sup>9</sup> Iesu yana voneye nika tomogo i ve'atumai 'ana 'ivi i evai i nago.

'Aiatanina 'waineye tomogo i ve'atumaiga, me Diu yadi 'Aiata Veawai 'waineye. <sup>10</sup> \*Me Diu to'edakumetavo i 'iseni tomogonina 'ana 'ivi i evai i nunago begaidi i voneni i vo, Eva wata folova, awale 'Aiata Veawai 'waineye 'amu 'ivi 'u evaeva, yada ve'etoboda 'u geugeuya." <sup>11</sup> I vonedi i vo, Tomogonina i 'ive'atumaikuga i voneku i vo, 'Amu 'ivi 'u 'ewai 'u nago." <sup>12</sup> Me Diu i velutolieni i vo, Aitoi tomogoga bani'odi i voneyedi 'waimuye?" <sup>13</sup> Siwe tomogo i ve'atumaiga Iesu 'ana

\* 4:53: Fol 16:31 \* 4:54: Ion 2:11 \* 5:8: Mad 9:6 \* 5:10: Iel 17:21; Luk 13:14



wagava kebu i da 'asetaiğa wata 'akonadi Iesu ava'aibe i nago 'aila'a bwaikina 'waidie i vetuwanawana.

<sup>14</sup> ✧ Mulieta Iesu tomogonina i lualeni i veluagai vanuga 'eba velu'ui 'waineye i voneni i vo, 'U 'iseni, 'akonadi 'u ve'atumai, kebu wata 'u na sakonaga. 'Ai'edi 'u na sakona-vaitugana, bola tamu nani vitaotogina i na souyeni 'waimuye.” <sup>15</sup> Iesu i vona'a'ava, mulieta tomogonina i nago Diu to'edakumetavo 'waidie i vonedi i vo, Tomogonina i 'ive'atumaikuga 'ana wagava Iesu.”

<sup>16</sup> Begaidi tutuyanina 'waineye me Diu to'edakumetavo i velamu Iesu i vegavieni fai yadi nuanua igodi i vo, Iesu i folofolova 'Aiata Veawai 'waineye.” <sup>17</sup> Iesu i vonedi i vo, 'Aiata matatabuna wata 'Aiata Veawai taiadi Tamaku i folofolova, yau wata bani'odi a folofolovaga i lubwaineku.”

<sup>18</sup> ✧ Yana vonanina de'e 'wainega me Diu to'edakumetavo i kamogala nuanuadi Iesu i na luwewafai fai yadi nuanua i vo, Yada ve'etoboda 'Aiata Veawai faifaina i geugeuya, wata yana sakona i 'imoso'ieni i ve'awa-Tamaku Yaubada 'waineye, igodi nuanuana i na vesala Yaubada taiadi.”

### *Yaubada Natuna ma yana veimea.*

<sup>19</sup> ✧ Begaidi Iesu me Diu i vonedi i vo, A vona mogitana 'waimie, yau Yaubada Natuna kebu tamu nani yaku nuanuayega a da 'idewai, ava'ai a 'i'idewadiga Tamada 'wainega a 'isa'ewadi. Ava'ai Tamada i 'i'idewadiga, yau wata bani'odi a 'i'idewadi. <sup>20</sup> Tamada, yau Natuna i nukalikalieku bwaikina, wata nani matatabuna i 'i'idewadiga, i veveku. I voneku begaidi toviganina a 'ive'atumaia 'wa 'iseni, siwe sai'afo nani siaina. We'e 'awaie folova toke-tokeotogidi i na veku a na 'idewadi, 'wa na 'isedi nuami i na voganidi. <sup>21</sup> ✧ Bani'odi Tamada towafa i sisivetovoidi, yau wata egavo nuanuaku mia 'ivauna wata 'atumaina a veveledi. <sup>22-23</sup> ✧ Tomotoga 'adi vematavuloga faifaina kebu Tamada i da veveimea. Yau Natuna veimeanina i veleku tomotoga a na veimeyemi 'ami vematavuloga faifaina, begaidi tomia fwayafwaya matatabumi 'wa na ve'ililibuyeku bani'odi Tamada 'wa veve'ililibuyeni. We'e egavo yau Yaubada Natuna kebu i da veve'ililibuyeku, wata bani'odi Tamada i vetunekuga kebu i da veve'ililibuyeni.

<sup>24</sup> ✧ A vona mogitana 'waimie egavo yaku vona i na no-gaidi wata i na vetumagana Yaubada 'aku tovetune 'waineye, 'akonadi mia 'atumaina wata miamia-vagaina i veluagai. Tovetumagananidi kebu vematavuloga i na veluagai fai 'akonadi wafaotoga 'ana 'eda i baileni mia-vagatanina i

✧ 5:14: Ion 8:11 ✧ 5:18: Ion 10:30,33 ✧ 5:19: Ion 8:29 ✧ 5:21: Ion 5:26

✧ 5:22-23: Fol 10:42; Fil 2:10-1 ✧ 5:24: Ion 3:16

veluagai. <sup>25</sup> Wata a vona mogitana 'waimie 'awaie wata tutuya de'e 'akonadi i sousouyeni, tomotoganidi i nunagoi wafaotoga 'ana 'edeamo yaku vona i na nogai. 'Ai'edi tomotoganidi yau Yaubada Natuna yaku vona i na nogai i na vematayakeyakedi mia 'atumaina wata miamia-vagaina i na veluagai. <sup>26</sup> Tamada miamia-vagaina yawaimi lamuna, yau wata 'akonadi i tauyeku bega 'ana fata mia-vagatanina 'wa na veluagai 'waikuyega. <sup>27</sup> Fai yau a vetomotogaotoga Tamada i tauyeku bega tomia fwayafwaya matatabumi 'wa na vonayavuga matakuye a na veimeyemi. <sup>28-29</sup> ✧Yaku vonanidi faifaidi kebu nuami i na voganidi. 'Awaie wafawafadi taumatayega yaku vona i na nogai, matatabudi i na souyedi. Towafa fuedi, siwe egavo basenadi yadi sauluva 'atumaidi mia 'atumaina wata miamia-vagaina i na veluagai, we'e egavo yadi sauluva sakoidi yaku veimea 'wainega vematavuloga i na veluagai. <sup>30</sup> ✧Kebu 'ana fata tauniku yaku nu-anuayega wata 'aise'avaku a na 'idewai. Ava'ai Yaubada i vonekuga, bani'odi a veveimea, we'e yaku veimeanidi tonovidi fai 'aku tovetunenina yana nuanua a 'i'idewadi, kebu yau yaku nuanua."

### *Tolu'ivona 'ifwaidi Iesu faifaina.*

<sup>31</sup> Wata Iesu i vonedi i vo, 'Ai'edi tauniku faifaiku a na lu'ivona, bola kebu 'wa na ve'awamogitana. <sup>32</sup> ✧Siwe tamu tomogo i lu'ivona faifaiku. Taunina Tamaku yana lu'ivonanina vona mogitana. <sup>33</sup> ✧Basenadi tomotoga 'ifwaidi 'wa vetunedi i nagoi Ioni Tobafitaiso 'waineye i velutoli faifaiku. Naninidi faifaiku i veifufuyediga, vona mogitana. <sup>34</sup> 'Ai'edi kebu tamu aitoi i na lu'ivonaga faifaiku kebu tamu ava'ai, siwe nuami a tolinuata'idi Ioni yana lu'ivona faifaina. Yana lu'ivonanina faifaiku 'wa na nuani bega 'ita'ita'i 'wa na veluagai. <sup>35</sup> Ioni bani'odi mageta 'awaiaina, nani fuedi i kiavemagetadi. Yana vona nuanuami, faifaina 'wa sosoana siwe kebu tutuya manamanawenaga wata 'wa baila. <sup>36</sup> ✧Ioni yana lu'ivona faifaiku nani bwaikina, we'e nani bwaikaotogina 'eba nuavogana wata 'eba nua'ewa a 'i'idewadi. Folovanidi basenadi Tamada i veleku, 'wa na 'isedi bega 'ana fata 'wa na 'asetai Tamada Yaubada i vetuneku. <sup>37-38</sup> ✧Tamadanina wata taunina 'aku tolu'ivona, siwe kebu tamu tutuya bonana 'wa da nogaiga wata maigina kebu 'wa da 'iseniga, wata kebu nuanuami yana vona, faifainanina yau i vetunekuga kebu 'wa da vetumagana 'waikuye. <sup>39</sup> ✧Nuanuami miavagata 'wa na veluagai, begaidi Yaubada yana Buki 'wa

lulu'iawawa-vebogi. Bukinina wata faifaiku i lulu'ivona, siwe 'wa bavuyeni. <sup>40</sup> Nuanuami mia-vagata siwe kebu nu-anuami 'wa na tauyemi 'waikuye bega 'wa na veluagai.

<sup>41-42</sup> Yau kebu a da nuanua tauniku 'aku subia tomotoga 'waimiega faifaina, fai a 'asetami kebu Yaubada 'wa da nu-akalikalienu. <sup>43</sup> Yau Tamaku yana veimea 'wainega a mai, siwe kebu faifaiku 'wa da sosoana 'wa baila, we'e 'ai'edi tamu aitoi taunina yana nuanuayega i na mai, faifaina 'wa na sosoana. <sup>44</sup> Kebu 'ami fata 'wa na vetumaganeku fai nuanuami tauni'avami 'wa na subisubiami we'e kebu nuanuami 'ami subia Yaubada 'wainega. Yaubadanina toketokeotogina, kebu tamu wata aitoi bani'odi. <sup>45</sup> 'Awaie tomia fwayafwaya matatabumi 'wa na vonayavuga Tamada mataneyeye siwe kebu a na vevitami yami sakona faifaiki. 'Omi igodi 'wa nuaniga 'wa vo, 'A na luku abame, fai ve'etoboda Mosese 'wainega 'a veve'ililibuyedi." Siwe Mosesenina 'awaie i na lumatanimi Yaubada mataneyeye fai i kiluma faifaiku siwe kebu 'wa da vetumaganekuga. <sup>46</sup> \*'Ai'edi mogitana Mosese yana vona Yaubada yana Buki nageneyeye 'wa da vetumaganediga, yau wata 'wa da vetumaganeku fai faifaiku i kiluma. <sup>47</sup> \*Vonanina Mosese i kilumiga faifaiku kebu 'wa da vetumaganediga, bani'odi 'wa na munega 'wa na vetumaganeku?"

## 6

*'Aila'a 5000 Iesu i ve'anidi.*

<sup>1-4</sup> Mulieta me Diu yadi Sakali Uvi'agalatagona sai'afoga 'ana tutuya i na veluagai, Iesu wata yana tovetutuyamavo i viladi i damana Lavu Galili, me Loma bonadiega Lavu Taibilia. 'Aila'a bwaikina Iesu i yoyogo'waili fai 'akonadi yana folova toketokena i 'isedi tovinga 'waidie. Iesu wata yana tovetutuyamavo taiadi i laka 'oyeye bei i miabui. <sup>5</sup> Iesu i 'isanago 'aila'a bwaikina i 'isedi i mimai 'waidie begaidi i velutoli Filifi 'waineyeye i vo, Bani'odi ta na munega 'ani'ani sai'afomo'ina ta na kimwanei 'aila'a no'o ta na ve'anidi?" <sup>6</sup> Iesu 'akonadi i 'asetai 'ako bani'odi i na munega bega 'aila'a i na ve'anidi, siwe nuanuana Filifi yana vetumagana i na sitonovi begaidi i velutoli. <sup>7</sup> Filifi Iesu yana velutoli i tutuli i vo, 'Ai'edi de'e tomotoganidi 'ani'ani siaina siaina i na 'aniga, tutulina lubulubu 200\* igodi ta kimwaneyeniga 'ana fata." <sup>8-9</sup> Saimoni Fita taina, tamu Iesu yana tovetutuyama 'ana waga Anidulu, i vona Iesu 'waineyeye i vo, Sino tamu kwamana nimaneyeye 'ani'ani mwadodoudi 5 wata igana vakavakalidi

\* 5:46: Fol 3:22    \* 5:47: Luk 16:31    \* 6:7: Me Diu yadi mani Denali 200. Denali 'aitamogana, 'aiata 'aitamogana 'ana folova tutulina.

'ailuga. Siwe ava'ai 'ana 'atumaina? 'Ani'ani siaina we'e 'aila'a bwaikina.”<sup>10</sup> Bei mosomoso bikadi wata 'ale'usadi bega Iesu yana tovetutuyamavo i vonedi i vo, Tomotoga 'wa vemiabuidi mosomoso tabwadie.” Bega tomotoga i miabui iaveta tulai'avadi 'adi 'aila'a 5000, siwe wata vevine yavayavava taiadi.<sup>11</sup> Iesu 'ani'ani mwadodoudi i 'ewadi, Yaubada 'waineye i vekaiwa, mulieta yana tovetutuyamavo i veledi i veusedi tomotoganidi i miabuiga 'waidie. Wata bani'odi igana i munegidi, matatabudi i 'ani kamodi i aidi.<sup>12</sup> I 'ani'a'ava Iesu yana tovetutuyamavo i vonedi i vo, Nuanuaku 'ani'ani 'wa veuseni we'e 'ifwaidi 'wa luvegelalediga 'wa na kwakwadi bega kebu tamu ta na 'ivekokovi.”<sup>13</sup> Matatabuna i kwakwadi bayawa 12 i vedodogidi i adaga.

<sup>14</sup> ✧ Tomotoganidi Iesu yana folova toketokena i 'iseni i vo, Vona mogitana, Iesu kumanina tolu'ivonanina basena-diotoga Yaubada i vona'awaufaufa i vo, I na mai.”<sup>15</sup> ✧ Iesu tomotoga yadi nuanua i 'asetai nuanuadi i na 'ive'avini i na naweni i na ve-kini faifaidi, begaidi i tovoi wata 'aisena i vilai i laka 'oyeye fai kebu nuanuana.

*Iesu ufa tabwaneamo i nago.*

<sup>16</sup> ✧ Iesu i laka 'oyeye, we'e lavilavie yana tovetutuyamavo i obu balebaleye.<sup>17</sup> Bei Iesu i lulukamaseni nika 'akonadi i lo-vani begaidi i dodoga i na nagoi Kafaneomi.<sup>18</sup> I damadamana nika kaukau wata yagina bwaikidi i veluagadi.<sup>19</sup> I toke-maigedi i voi i nago sai'afo manamanawena† nika Iesu i 'iseni ufa tabwaneamo i mimai waka lilivaneye, matatabudi i kololo-'afo'afo.<sup>20</sup> Iesu i vonedi i vo, Kebu 'wa na kolologa, yau taunida.”<sup>21</sup> Tutuyanina i 'asetai mogitana Iesu, i voneni i dodoga nika waka i lilide i duduna-matayo'o Kafaneomi.

*Tomotoga nuanuadi Iesu.*

<sup>22</sup> I 'atai, we'e tomotoga bei i ve'anidiga no'o bei i mi-amiani, igodi Iesu i lulukamaseni balebaleye, fai yadi 'asetai i vo, Wakanina i mieniga 'akonadi tovetutuyamavo 'aisedi 'wainega i viladi.”<sup>23</sup> We'e waka tulidi 'atamana Taibilia 'wainega i nagoi i luku bei Iesu 'aila'a i ve'anidiga lilivaneye.<sup>24</sup> Tutuyanina 'aila'a Iesu i 'isa'avai wata yana tovetutuyamavo, wakanidi 'waidie i dodoga i lualedi i maia Kafaneomi.

*Iesu taunina 'ani'ani yada mia 'ivauna wata 'atumaina faifaina.*

<sup>25</sup> Tomotoga Iesu i lulualeni nika i veluagai Kafaneomi 'eba miava'auta nageneye, i velutolieni i vo, Tove, ma'avai 'u mai de'e bei?”<sup>26</sup> Iesu i vonedi i vo, A vona mogitana

✧ 6:14: Fol 3:22 ✧ 6:15: Mad 14:23 ✧ 6:16: Mak 6:46 † 6:19: 'Ana mogitana bani'odi 5 'alo 6 kilomita.

'waimie, yaku folova toketokena 'wa 'iseni siwe kebu faifaina 'wa da vetumagana 'waikuye 'wa da yoyogo'wai'waila, a ve'animiga faifaina 'wa yoyogo'wai'waila. <sup>27</sup> ✧Kebu i da lubwainemi 'ani'ani 'ana nuanua i na vebwaika 'waimie, fai bola 'ani'aninidi i na koga wata i na 'anikudadi. 'Ani'aninina kumanina 'wainega mia 'atumaina wata miamia-vagaina 'wa na velugaiga, i lubwainemi faifaina 'wa na nuanua. Yau a vetomotogaotoga Tamada Yaubada i venua'ivineku 'aku fata 'ani'aninina 'atumaina a na velemini.” <sup>28</sup> Tomotoga i velutoli Iesu 'waineye i vo, Bani'odi 'a na munega Yaubada yana folova 'a na 'idewadi?” <sup>29</sup> ✧Iesu i vo, Yaubada nuanuana yami folova side bani'odi. Yau i vetunekuga 'wa na vetumaganekumo. Siwe 'asa'aiana yami folova.”

<sup>30</sup> Yana vona i tutuli i vo, Nuanuama yamu folova toketokena ma 'ana 'eba 'isa 'u na 'idewai, bega 'a na 'iseni 'a na 'asetai Yaubada i vetunemu, 'waimuye 'a na vetumagana. Siwe ava'ai folovaga toketokena 'u na 'idewai? <sup>31</sup> ✧Basenadiotoga sali'avu'avuye tubudavo i yabayaba 'adi'adi kebu, bega Yaubada 'ani'ani tamu 'ana wagava mana i veledi abamega, wata bani'odi basenadiotoga i kilumi Yaubada yana Buki 'waineye i vo, 'Ani'ani abamega i veledi i 'ani.” 'Auvea, nuanuama 'omu wata bani'odi 'aiata 'aitamogana 'aitamogana 'ani'ani 'u na velevelema.” <sup>32</sup> Iesu i vonedi i vo, A vona mogitana 'waimie, we'e 'ani'aninina kebu Mosese yana 'anivelenaga, Tamaku yana 'anivelena abamega, siwe 'asiau nuanuana tamu 'ani'ani i na velemini, 'ani'aninina 'ani'ani mogitana. <sup>33</sup> 'Ani'aninina mogitana tamu tomogo, siwe 'asa'aiana taunina 'ani'ani. Tomogonina abamega i obuma bega tomia fwayafwaya mia 'ivauna wata 'atumaina 'wa na veluagai.” <sup>34</sup> Tomotoganidi i vo, 'Auvea, 'ani'aninina nuanuama tutuya fueidi 'u na velevelema.” <sup>35</sup> ✧Iesu i vonedi i vo, Yau 'asa'aiana kumaniku 'ani'ani. Yau mia 'ivauna wata 'atumaina 'ana to'anivelena tomotoga 'waimie. 'Ai'edi egavo i na mai 'waikuye kebu i na lasega, wata 'ai'edi egavo i na vetumagana 'waikuye kebu 'anigodi i na lala.

<sup>36</sup> 'Akonadi a vonemi, matamie yaku folova toketokena a 'idewai 'wa 'iseni siwe kebu 'wa da vetumagana 'waikuye. <sup>37</sup> ✧Tomotoganidi Tamada i na 'anivelenedi, matatabudi i na maia 'waikuye wata kebu tamu sai'afo a na vedumwe'ai'aiedi. <sup>38</sup> Yau a maiga abamega 'aku tovetune yana nuanua a na 'idewadi, kebu tauniku yaku nuanuaga. <sup>39</sup> ✧'Aku tovetunenina yana nuanua side bani'odi. Nuanuana

tomotoganidi i 'anivelenedi 'waikuye a na 'ita'ita'iedi, kebu tamu aitoi a na baileniga, wata tutuyanina tomotoga 'wa na vonayavuga Yaubada mataneyeye, yaku tomotoga yawaidi a na veledi i na tovoi-vaitugana. <sup>40</sup> ✧Side bani'odi. Tamaku nuanuana tomotoga matatabumi taunimi 'wa na tauyemi 'waikuye 'wa na vetumagana, mia 'atumaina wata miamia-vagaina 'wa na veluagai wata tutuyanina tomotoga 'wa na vonayavuga Yaubada mataneyeye a na sivetovoimi.”

*Iesu 'asa'aiana 'ada'ada mogitana.*

<sup>41</sup> Me Diu ma yadi nuasako i vebonavoluvolu fai Iesu i vo, Yau 'ami'ami a mai abamega.” <sup>42</sup> Begaidi i vo, Awale igodi bani'odi i voneyedi i vo, A obuma abamega”? Tamana wata inana ta 'asetadi. Iesu tomotogaotoga, Iosefa natuna.” <sup>43</sup> Iesu i vonedi i vo, Kebu 'aise'avami 'wa na vebonavoluvoluga. <sup>44</sup> Kebu tamu aitoi 'ana fata taunina yana nuanuayega i na mai 'waikuye, Tamada 'aku tovetune nagami i na 'ivaiseni yana nuanua i na sivilai bega 'ana fata taunina i na tauyeni 'waikuye wata tutuyanina tomotoga 'wa na vonayavuga Yaubada mataneyeye a na sivetovoia. <sup>45</sup> ✧Basenadiotoga yaku vonanina faifaina Yaubada yana tolu'ivonavo i kilumi i vo,

Tomotoga matatabudi Yaubada i na 'ivaisedi wata i na ve 'waidie.”

Begaidi egavo Tamada yana vona i na nogai bega i na ve 'waidie, 'adi fata i na maia 'waikuye. <sup>46</sup> ✧We'e 'omi kebu tamu aitoi Tamada i da 'iseniga, yau 'aiseotogiku a 'iseni fai a mai taunina Yaubada 'wainega. <sup>47</sup> ✧A vona mogitana 'waimie, egavo ma yadi vetumagana taunidi i tauyedi 'waikuye, 'akonadi mia 'atumaina wata miamia-vagaina i veluagai. <sup>48</sup> ✧Yau 'asa'aiana kumaniku 'ani'ani. Yau mia 'ivauna wata 'atumaina 'ana to'anivelenena tomotoga 'waidie. <sup>49</sup> Basenadiotoga sali'avu'avuyeye tubudavo 'ani'ani abamega i 'ani siwe kebu i da mia-vagata i wafa. <sup>50</sup> We'e 'ani'ani mogitana i obuma abamega egavo i na 'ani, kebu i na wafaotoga. <sup>51</sup> Yau 'asa'aiana kumaniku 'ani'ani abamega a obuma. 'Ai'edi egavo 'ani'aninina i na 'aniaga kebu i na wafaotoga i na mia-vagata. 'Ani'aninina a vonevoneyeniga tomogoku a na tauyeni bega tomia fwayafwaya matatabumi 'ami fata mia 'ivauna wata 'atumaina 'wa na veluagai.”

<sup>52</sup> Me Diu Iesu yana vona i nogai ma yadi nuasako 'aise'avadi i ve'ikwayekwayega i vo, No'o tomogo bani'odi i na munega tomogona i na veleda ta na 'ania? Kebu tamu sai'afo i da lubwaineni.” <sup>53</sup> Iesu i vonedi i vo, A vona mogitana 'waimie, yau a vetomotogaotoga 'ai'edi egavo kebu

✧ 6:40: Ion 11:25-26 ✧ 6:45: Ais 54:13 ✧ 6:46: Ion 1:18 ✧ 6:47: Ion 3:16

✧ 6:48: Ion 6:58

tomogoku i na 'aniaga wata dayagiku i na yemuyaga, kebu 'adi fata mia 'ivauna wata 'atumaina i na veluagai. <sup>54</sup> ✧ Egavo tomogoku i na 'aniaga wata dayagiku i na yemuga 'akonadi mia 'atumaina wata miamia-vagaina i veluagai wata tutyana tomotoga 'wa na vonayavuga Yaubada mataneye a na sivetovoidi. <sup>55</sup> Fai, tomogoku 'ani'ani mogitana, wata dayagiku alu'ai mogitana. <sup>56</sup> Egavo tomogoku i na 'ania wata dayagiku i na yemuyaga a na miamia nagedie yau 'adi labilabina wata i na miamiani nagekuye. <sup>57</sup> Tamada 'aku tovetune miamia-vagaina kebu yana 'a'avaga begaidi yana toketokena 'wainega a miamia. Wata bani'odi egavo i na 'anikuga yaku toketokena 'wainega i na mia-vagata. <sup>58</sup> Basenadiotoga tubudavo sali'avu'avuye 'ani'ani abamega i 'ani, siwe kebu 'ani'ani mogitana begaidi kebu i da miavagata i wafa. We'e yau 'ani'ani mogitana, abamega a mai 'ai'edi egavo 'ani'aninina i na 'aniaga i na mia-vagata.”

<sup>59</sup> De'e Iesu yana ve, i lau'age tomotoga 'waidie 'atamana Kafaneomi, 'eba miava'auta nageneye.

*Tovetutuyamavo 'ifwaidi Iesu i baileni.*

<sup>60</sup> Tovetutuyamavo fuedi Iesu yana vona i nogai 'aise'avadi i veifufu i vo, Iesu yana ve 'waideye 'ana nogaya vitana, kebu nuanuada. Kebu tamu aitoi 'ana fata i na 'asetai.” <sup>61</sup> Iesu i 'asetai yana tovetutuyamavo i vevebonavoluvolu yana ve faifaina begaidi i vonedi i vo, Yaku ve faifaina voke bunumi i mayaga. <sup>62</sup> Yaku venina vitana 'waimie kebu nuanuami, siwe 'ai'edi 'wa na 'iseku yau a vetomotogaotoga a na vilaku a na laka abame, 'waimie vitaotogina. † <sup>63-64</sup> ✧ 'Anu'anunu 'Atumaina 'aiseotogina 'ana fata mia 'ivauna wata 'atumaina i na velempi, kebu tamu wata aitoi 'ana fata i na 'ivaisemi bega mianina 'ivauna wata 'atumaina 'wa na veluagai. Yaku vonanidi 'akonadi a voneyediga 'anu'anunumi 'adi 'aivaita, 'waidiega 'ami fata mianina 'ivauna 'wa na veluagai, siwe 'ifwaimi kebu 'wa da vetumagana.”

Iesu de'e bani'odi i voneyediga fai nagami i 'asetai egavo kebu i da vetumagana, wata 'waidiega kumanina 'awaie i na 'etogiluvuni i 'asetai. <sup>65</sup> ✧ Wata Iesu i vona tomotoga 'waidie i vo, Yaku ve 'ana nogaya vitana 'waimie, faifainanina basenadi a vonemi a vo, Kebu tamu aitoi 'ana fata taunina yana nuanuanayega i na mai 'waikuye, Tamada nagami i na 'ivaiseni yana nuanua i na sivilai bega 'ana fata taunina i na tauyeni 'waikuye.”

✧ **6:54:** Mad 26:26-28 † **6:62:** Iesu i veifufu yana laka abame wata yana wafa faifaidi. Yana wafa 'waineye yana tovetutuyamavo i bunumayaga i ve'aladegadega. ✧ **6:63-64:** 2 Kol 3:6 ✧ **6:65:** Ion 6:44

<sup>66</sup> Yana vonanina faifaina yana tovetutuyamavo 'ifwaidi i baileni, kebu nuanuadi wata i na vevetutuyameni. <sup>67</sup> Begaidi Iesu yana tovetutuyamavo 'adi 12 i velutoliedi i vo, We'e 'omi bani'odi? Nuanuami 'wa na baileku 'wa na nagoi?" <sup>68</sup> Saimoni Fita yana velutoli i tutuli i vo, 'Auvea, kebu 'ana fata tamu wata aitoi 'waineye 'a na nagoi. Yamu vona 'waidiega 'ama fata mia 'atumaina wata miamia-vagaina 'a na veluagai. <sup>69</sup> \*Tutuya de'e 'a 'asetamu wata 'a vetumagana 'omu Yaubada Natuna Magemagetamu." <sup>70</sup> Iesu i vonedi i vo, Vona mogitana 'ami 12 a venua'ivinemi, siwe 'waimiega tamu Seitani iana." <sup>71</sup> Iesu i vonavona Iudasa faifaina, taunina Saimoni Isakaliota natuna wata tamu 'adi 'aila'a 12 'wainega, siwe taunina Iesu 'ana to'etogiluva.

## 7

### *Iesu tainavo kebu i da vetumagana 'waineye.*

<sup>1</sup> \*Mulieta Iesu i folova-vuvua 'awalawa Galili nageneye, kebu i da nago Iudia, fai me Diu to'edakumetavo nuanuadi i na luvewafai. <sup>2-3</sup> \*Me Diu yadi Sakali 'Ayavau\* sai'afoga 'ana tutuya i na veluagai, bega Iesu tainavo i voneni i vo, Yada 'awalawa 'u na baileni 'u na nago 'awalawa Iudia, 'u na folofolova yamu tovetutuyamavo i miamiani 'waidie, 'eba nuavogana wata 'eba nua'ewa 'u na 'i'idewadiga i na 'ise'isedi. <sup>4</sup> Egavo nuanuadi tomotoga i na subisubiadi kebu i da folova-givagiva, 'ai'edi nuanuamu fuedi i na subiamu 'u na vemageta, 'eba nuavogana wata 'eba nua'ewa 'u na 'i'idewadi 'aila'a bwaikina matadie." <sup>5</sup> \*Tainavo bani'odi i voneyediga fai taunidi wata kebu i da vetumagana 'waineye. <sup>6</sup> Iesu i vonedi i vo, 'Ai'edi nuanuami, 'omi i lubwainemi 'ami fata 'wa na nagoi Iudia we'e yau yaku tutuya bei a na sivemage-sekuga bola. <sup>7</sup> \*Kebu 'ana fata 'omi tomia fwayafwaya i na vedumwe'ai'aiemi, we'e mogitana yau 'akonadi i vevedumwe'ai'aieku fai tutuya fuedi a vonevoned i vo, 'Omi yami sauluva sakoidi." <sup>8</sup> 'Asa'aiana, 'wa kumeta ta waia sakalinina 'waineye. Tutuya de'e kebu i da lubwaineku." <sup>9</sup> Iesu i vona'a'ava, bei Galili i miamia.

### *Iesu i nago 'Ayavau 'ana Sakali 'waineye.*

<sup>10</sup> Iesu tainavo i kumeta i nagoi Ielusalema sakalinina faifaina, mulieta Iesu i vemuli, givagivayega i nago kebu i da vemageta. <sup>11</sup> Sakali nageneye me Diu to'edakumetavo Iesu i lualeni i vo, Ava'aibe bei Iesu taunina." <sup>12</sup> Tomotoga

\* 6:69: Mad 14:33, 16:16    \* 7:1: Ion 5:18    \* 7:2-3: VeL 16:13    \* 7:2-3: Sakalinina 'waineye me Diu yadi vanuga i baibaileidi tulidie i lalau'weta begaidi i goleni Lau'weta 'ana Sakali.    \* 7:5: Fol 1:14    \* 7:7: Ion 15:18



fuedi i ve'awayaya Iesu faifaina, 'ifwaidi i vo, Tomogo 'atumaina," we'e 'ifwaidi i vo, Kebu, we'e i vevekalieda." 13 ✨Siwe kebu tamu aitoi mageseye i da veveifufu fai me Diu to'edakumetavo i kololoyedi.

14 Sakalinina 'ana 'aiata sai'afoga i da 'a'ava, nika Iesu i vemageta i luku vanuga 'eba velu'ui nageneye, bei i velamu i veve tomotoga 'waidie. 15 ✨Me Diu nuadi i voganidi yana ve faifaina i vo, Tomogo no'o kebu i da nago sikulu 'waineye. Bani'odi i munega yana 'aseta bwaikina?" 16 ✨Begaiddi Iesu tomotoganidi i vonedi i vo, Yau kebu tauniku yaku nuanuayega a da veve, venidi Yaubada 'aku tovetune 'wainega i mai. 17 Egavo nuanuadi Yaubada yana nuanua i na 'i'idewadi, i na 'asetai kebu a da veve yaku nuanuayega, Yaubada 'wainega i mai. 18 Aitoi yana nuanuayega i na veveifufu, kumanina nuanuana tomotoga i na subisubiai, we'e aitoi nuanuana tomotoga 'ana tovetune i na subisubiai, yana sauluva tonovidi wata kebu tamu tutuya i da vekali. 19 Basenadiotoga Mosese ve'etoboda i velemini, siwe 'wa da vo kebu i da velemiga fai ve'etobodanidi matatabumi 'wa geugeudi, bega igodi nuanuami 'wa na luwewafaku." 20 ✨'Aila'anidi Iesu yana vona i tutuli i vo, 'Omu yaiaina i agemu bega 'wava'wavamu, kebu tamu aitoi 'amu 'ainike i da voneyeni." 21 Iesu i vonedi i vo, 'Omi nuami i voganidi fai 'Aiata Veawai 'waineye tomogo a 'ive'atumaia Ufa Bedeseida 'waineye. 22 ✨Siwe 'omi wata 'wa folofolova 'Aiata Veawai 'waidie, fai veimea Mosese 'wainega bunu 'aibobo faifaina 'wa vevematayakeyakeni 'Aiata Veawai 'waidie 'wa 'i'idewai. We'e bunu 'aibobo kebu mogitana Mosese 'wainega i da maiga, i velamu tubuda Ebelamo yana tutuye. 23 ✨Veimeanina natumiavo iavetadi 'adi 'aiata 8 i veveluagadi bunudi 'wa bobobodi, siwe wata 'ai'edi tamu kwamana 'ana 'aiata 8 i na veluagai 'Aiata Veawai 'waineye 'wa 'i'idewaimo, nika 'asa'aiana bei 'wa folofolova. Fai 'omi 'wa folofolova 'Aiata Veawai 'waidie, awale 'wa nuasako-maimaiga 'waikuye tomogo a 'ive'atumaotogi 'Aiata Veawai 'waineye faifaina? 24 ✨Kebu 'isa'ava 'wainega 'wa na 'amalakibuyeku, nagami 'wa na venuma'ivina-'atumai mulieta 'wa na vona."

*Tomotoga Iesu i ve'ikwayekwayegeni.*

25 'Ifwaidi Ielusalema 'ana tomotoga i vo, Voke no'o tomogonina yada to'edakumetavo nuanuadi i na luwewafai. 26 'Wa 'iseni? 'Aila'a matadeye i veveifufu siwe kebu tamu aitoi Iesu i da talabodeni. Voke yada to'edakumetavo 'akonadi i 'asetai taunina Keliso, Yaubada 'ana Venuma'ivina. 27 ✨Siwe

✨ 7:13: Ion 12:42, 19:38 ✨ 7:15: Mad 13:54 ✨ 7:16: Ion 12:49, 14:10

✨ 7:20: Ion 8:48-52 ✨ 7:22: Vei 12:3 ✨ 7:23: Ion 5:8-10,16 ✨ 7:24: Ion

8:15 ✨ 7:27: Ion 7:41-42

'ida 'akonadi ta 'asetai 'ai'edi Keliso i na souyeni, kebu tamu aitoi i na 'asetai yana 'eba mai. We'e 'atamananina 'wainega Iesu i maiga 'akonadi matatabuda ta 'asetai.”

28 ✨Iesu i veve vanuga 'eba velu'ui nageneye bonana bwaikinega tomotoga i vonedi i vo, 'Omi 'wa da vo 'wa da 'asetai yaku 'eba mai wata 'wa da vo 'wa da 'asetaku. Yau a maiga, kebu tauniku yaku nuanuayega, 'aku tovetune nuanuana begaidi a mai. 'Aku tovetunenina yana nuanua 'atumai'avadi wata tonovidi, siwe 'omi kebu 'wa da 'asetai. 29 We'e yau a 'asetai fai 'wainega a mai wata i vetuneku.”

30 ✨Yana vonanina faifaina nuanuadi i da 'ive'avini siwe kebu tamu aitoi 'ana fata, fai 'ana tutuya i lubwaineni 'waineye i na 'ive'aviniga, bola. 31 ✨Avinodi tomotoga fuedi i vedumwe'ai'aieni, siwe wata tomotoga fuedi 'aila'anina nageneye i vetumagana Iesu 'waineye i vo, Ta 'asetai tutuyanina Keliso i na mai 'eba nuavogana wata 'eba nua'ewa fuedi i na 'idewadi. Vona mogitana de'e taunina Keliso, Yaubada 'ana Venua'ivina. Kebu tamu aitoi 'ana fata Iesu i na salai 'alo i na 'iaweni.”

### *Igodi Iesu i da 'ive'avini.*

32 Diu totafalolo Falisi i nogai tomotoga 'ifwaidi i veve'awayaya i vo, Voke Iesu taunina Keliso,” begaidi Falisinidi wata tovelomu 'adi to'edakumetavo, vanuga 'eba velu'ui 'ana to'isave'avinavo i vetunedi i nagoi Iesu i na 'ive'avini. 33 Siwe Iesu i vona to'ive'avinanidi wata 'aila'a 'waidie i vo, Tutuya 'ale'usana yau taiadi ta na miamia, mulieta a na nago 'aku tovetune 'waineye. 34 ✨'Wa na lualeku siwe kebu 'wa na veluagaku, wata kebu 'ana fata 'wa na waia yaku 'eba mia 'waineye.” 35 Me Diu to'edakumetavo 'aise'avadi i veifufu i vo, Ava'aibe bei igodi i na nago bega kebu 'ada fata ta na veluagai? Voke i na nago me Guliki yadi 'atamana 'waidie, bei me Diu i miamiani bega tomotoga taunidi kebu Diu i na veve 'waidie? 36 Fai i vo, 'Wa na lualeku siwe kebu 'wa na veluagaku,” wata i vo, Kebu 'ami fata 'wa na wai yaku 'eba mia 'waineye.” Awale bani'odi i voneyedi?”

### *Ufa-luluvuala mia 'ivauna wata 'atumaina faifaina.*

37 ✨Me Diu yadi Sakali 'Ayavau 'ana 'aiata 'eba ve'a'ava, 'aiata bwaikina. 'Aiatanina 'waineye Iesu i tovoi i vegolegole i vo, Egavo nuanuami bwaikina mia 'ivauna wata 'atumaina bani'odi 'anigomi i lala, i lubwainemi 'wa na maia 'waikuye 'wa na yemu. 38 Yaubada yana Buki 'waineye, faifaiku side bani'odi i voneyedi. I vo, Egavo ma yami vetumagana taunimi 'wa na tauyemi 'waikuye, yami nuanua nagedie

bani'odi ufa i na luluvuala-vebogi. Ufanina 'wainega mia 'ivauna wata 'atumaina i sousouyeni.”<sup>39</sup> ✧De'e bani'odi Iesu i voneyediga, bola 'Anu'anunu 'Atumaina tovetumaganavo i na agedi. Iesu i vonavona fai bola kebu i da wafa bega i da lakaga abame yana 'ai'aiwabu 'waineye, begaidi 'Anu'anununina kebu i da 'aniveleneni tomotoga 'waidie bega i na agedi.

*Tomotoga 'waidiega 'idi i souyeni.*

40 ✧Aila'anidi Iesu yana vona i nogai, 'ifwaidi i vo, Taunina mogitana tolu'ivonanina faifaina basenadiotoga Yaubada i vona'awaufaufa i na mai nika 'akonadi i mai.”<sup>41</sup> We'e 'ifwaidi i vo, Kebu, no'o Keliso, Yaubada 'ana Venua'ivina.” Siwe 'ifwaidi i vo, Ta 'asetai Keliso kebu i na maiga 'awalawa Galili 'wainega, siwe 'awalawanina 'wainega Iesu i mai.<sup>42</sup> ✧Basenadiotoga i kilumiga Yaubada yana Buki 'waineye Kelisonina i na souyeni Kini Devida 'ana wauma 'wainega wata i na tubuga 'ana tuvadeye, 'atamana Bedeliema.”<sup>43</sup> ✧Bega 'aila'a i 'idia Iesu faifaina.<sup>44</sup> 'Ifwaidi nuanuadi i na 'ive'avini, siwe kebu tamu aitoi i da 'abi tomogoneye.

*Me Diu yadi to'edakumetavo kebu i da vetumagana Iesu 'waineye.*

45 ✧To'isave'avinanidi i maia igodi Iesu 'ana 'ive'avina faifaina i viladi i nagoi Falisi wata tovelomu 'adi to'edakumetavo 'waidie. To'edakumetanidi i velutoli i vo, Awale kebu Iesu 'wa da mieniga?”<sup>46</sup> ✧To'isave'avinanidi i vo, Tomogo no'o yana vona 'adi nogaya 'atumaotogidi, kebu tamu aitoi bani'odiga.”<sup>47</sup> Falisi i velutoli i vo, Voke 'omi wata yana vona nuami i 'ewadi?<sup>48</sup> ✧Kebu tamu sai'afu 'ima yami to'edakumetavo 'waimega, 'alo Falisi i da vetumagana tomogonina 'waineye.<sup>49</sup> 'Aila'anidi Iesu yana vona i noganogaiga, ve'etoboda Mosese 'wainega i bavuyedi, 'awaie 'adi vematavuloga i na veluagai Yaubada 'wainega.”<sup>50-51</sup> ✧To'edakumetanidi 'waidiega tamu 'ana wagava Nikodimo, kumanina basenadi i nago Iesu taiadi i veifufu. Enavo i vonedi i vo, Kebu i da lubwaineda yada ve'etoboda ta na geudi. Nagami Iesu i na vonayavuga matadeye, 'ai'edi ma yana sakona, mulieta 'ana fata ta na veimea vematavuloga i na veluagai.”<sup>52-53</sup> I voneni i vo, Voke 'omu wata 'u mai Galiliega, Iesu taiadi ma fuemi sakoimi. 'Ai'edi Yaubada yana Buki 'u da lu'iawawaga, 'u da 'asetai kebu tamu Yaubada yana tolu'ivona i da souyeni 'awalawa Galili 'wainega.”

✧ 7:39: Ion 15:26; Fol 2:4 ✧ 7:40: Fol 3:22 ✧ 7:42: Mai 5:2; Mad 2:4-6

✧ 7:43: Ion 9:16 ✧ 7:45: Ion 7:32 ✧ 7:46: Mak 1:22 ✧ 7:48: Ion 12:42

✧ 7:50-51: Ion 3:1-2

## 8

*Nuanuadi igodi tamu vavine i da lukileudi.*

[<sup>1</sup> Me Diu yadi ve'ikwayekwayega i 'a'ava, i nagoi yadi vanuge, we'e Iesu i laka 'Oya Olive. <sup>2</sup> I 'atai 'awa'awaiogose i vilai i mai vanuga 'eba velu'ui nageneye. 'Aila'a bwaikina i maia 'waineye bega Iesu i miabui i ve 'waidie. <sup>3</sup> We'e ve'etoboda 'adi tovevo wata totafalolo Falisi, tamu vavine i miedi Iesu 'waineye. Vavinenidi 'ifwaidi tomotoga i velu-agadi tamu tomogo tulina taiadi i veve'avula bega i miedi Iesu wata 'aila'a bwaikina matadie. <sup>4</sup> To'edakumetanidi Iesu i voneni i vo, Tove, vavine de'e 'a miediga, mogitana i 'isedi tamu tomogo taiadi i veve'avula. <sup>5</sup> \*Basenadiotoga Mosese yada ve'etoboda i kilumi i vo 'ai'edi de'e sauluvanina, i lubwaineni kileuyega ta na tutuvewafadi. We'e 'omu yamu nuanua bani'odi?" <sup>6</sup> De'e bani'odi i voneyediga Iesu i sisiloloi, nuanuadi bonana i na nogai, 'ai'edi i na vekaliga i na 'ive'avini i na naweni 'eba vonayavuga 'waineye. Siwe Iesu kebu tamu ava'ai i da voneyeniga, i 'odumo fwayefwayeye nimanega i kilukiluma. <sup>7</sup> Bola i kilukiluma wata tovevitanidi i lulukwayegeni nuanuadi Iesu yadi vona i na tutuli, mulieta Iesu i tovoi i vonedi i vo, 'Atumaina, siwe aitoi 'waimiega kebu yana sakonaga, kumanina nagami kileu i na 'ewai vavine i na nikedi." <sup>8</sup> Wata i 'odu-vaitugana, i kilukiluma fwayefwayeye. <sup>9</sup> Tomotoga Iesu yana vonanina i nogai, 'aitamogana 'aitamogana i sousouyedi i degadega, we'e 'au'auveadi kumanidiavo nagami i souyedi. Tovevitanidi i nagoi we'e Iesu wata vavine taiadi i miamia. <sup>10</sup> Mulieta Iesu i tovoi vavine i vonedi i vo, Tomotoganidi i miemiga 'akonadi i tauya? Tomotoga nuanuadi i na nikemi yami sakona faifaina aitoina tamu i 'ainike?" <sup>11</sup> \*Vavine i vo, 'Auvea kebu tamu aitoi i da nikema." Iesu i vonedi i vo, Yau wata, kebu a na veimea vematavuloga 'wa na veluagai. 'Asa'aiana 'wa souyemi 'wa nago, siwe kebu wata 'wa na sakosakona."]

*Iesu tomia fwayafwaya yada mageta.*

<sup>12</sup> \*Tomotoganidi i miamiani vanuga 'eba velu'ui nageneye Iesu i vonedi i vo, Yau 'omi tomia fwayafwaya yami mageta, wata yau kumaniku tomotoga nuami 'adi toki-avemageta. Egavo i na vetumagana 'waikuye yadi nuanua kebu dududubalidiga siwe mia 'ivauna wata 'atumaina i na veluagai magetanina 'wainega." <sup>13</sup> Totafalolo Falisi i voneni i vo, Taunimu 'u awa'ai'aimu, kebu 'a na ve'awamogitana yamu vona faifaidi." <sup>14</sup> Wata Iesu i vonedi i vo, A vonaga tauniku faifaiku vona mogitana, fai a 'asetai ava'aiega a mai

wata 'awaie a na nago 'waineye, we'e 'omi bega a maiga wata bei a na nagoga kebu 'wa da 'asetaiga. <sup>15-16</sup> ✨'Omi 'isa'ava 'wainega 'wa 'a'amalakibu, kebu 'aseta mogitana 'wainega 'wa da vevenua'ivina. Yau kebu a da vevenua'ivinaga yami sakona faifaina, we'e 'ai'edi a na venua'ivinaga yaku venua'ivinanina mogitana wata tonovina, fai kebu 'aiseku yaku nuanuayega, Tamada 'aku tovetune i 'i'ivaiseku wata i labilabiniku. <sup>17</sup> Yami veimea kilukilumina i 'eno'eno i vo, 'Ai'edi tomotoga 'adi 'ailuga yadi lu'ivona i na vesala, i vona mogitana." <sup>18</sup> ✨Wata bani'odi yau tauniku faifaiku a vonavona, wata Tamada, 'aku tovetune i vonavona faifaiku, 'ama 'ailuga yama vona i vesala bega vona mogitana." <sup>19</sup> ✨Falisinidi i velutolieni Iesu i vo, Ava'aibe bei tamamu?" Iesu i vo, 'Wa bavuyekuga, wata Tamaku 'wa bavuyeni. 'Ai'edi 'wa da 'asetakuga, Tamaku wata 'wa da 'asetai."

<sup>20</sup> ✨Iesu yana ve de'e 'aila'a bwaikina matadie, vanuga 'eba velu'ui nageneye, 'anivelena-maimaiga 'ana 'eba yato lilivaneye. Kebu tamu aitoi i da 'ive'avini, i lubwaineni bei i na 'ive'aviniga 'ana tutuya bola.

*Egavo kebu i na vetumagana yadi sakona i na*

*'eno-vagata.*

<sup>21</sup> ✨'Aila'anidi wata Iesu i vonedi i vo, A na tauya a na nago siwe 'wa na luala-wayogeku, 'wa na wafa yami sakona i na 'eno-vagata Yaubada kebu i na nuatavunidi. Bei a na nagoga kebu 'ami fata 'wa na waia 'waineye." <sup>22</sup> Vonanina me Diu to'edakumetavo i nogaiga 'aise'avadi i vona i vo, Voke taunina i na luvewafai fai i vo, Bei a na nagoga kebu 'ami fata 'wa na waia."

<sup>23</sup> Wata Iesu i vonedi i vo, 'Omi de'e bega 'wa souyemi, we'e yau tabwanega a mai. Yami 'eba mia fwayafwaya yau abamega a obuma. <sup>24</sup> Faifainanina a vo, 'Wa na wafa yami sakona i na 'eno-vagata kebu Yaubada i na nuatavunidi." Yau Yaubada 'ana Venua'ivina, 'ai'edi kebu 'wa na vetumagana 'waikuye, tutuyanina 'wa na wafa, yami sakona i na 'eno-vagata." <sup>25</sup> Begaidi i velutolieni i vo, Nuanuama 'a na 'asetamu, 'omu aitoi?" Iesu yadi velutoli i tutuli i vo, Tutuya fuedi a lulu'ivoneyeku 'waimie, siwe 'asa'aiana bani'odi. <sup>26</sup> 'Ai'edi nuanuaku, 'aku fata nani fuedi yami sakona faifaidi a da lu'ivoneyedi wata a da awavesakoyemi, siwe 'aku tovetune ava'ai i vonekuga 'aisedi a lulu'ivoneyedi tomia fwayafwaya matatabumi 'waimie. 'Aku tovetunenina yana nuanua wata yana sauluva tonovidi, 'ada fata ta na vetumagana yana vona 'waidie."

27 Siwe tomotoganidi kebu i da 'asetai, Iesu i vonavona Tamana faifaina, taunina 'ana tovetune. 28 ✧ Begaidi wata Iesu i vonedi i vo, De'e 'wa bavuyeku, siwe tutuyanina yau a vetomotogaotoga 'wa na silakaiku 'ai lagalagana 'waineye bei 'wa na 'asetai kebu tamu sai'afo tauniku yaku nuanuayega a da folofolova, siwe ava'ai 'akonadi Tamada i vonekuga bani'odi a vonevoneyedi. 29 ✧ Fai tutuya fuedi 'aku tovetunenina yana nuanua a 'i'idewadi i sososoana faifaiku, begaidi kebu tamu tutuya i da bailekuga i labilabiniku." 30 Tomotoga fuedi Iesu yana vona i nogai i vetumagana 'waineye.

*Iesu yana vona i na 'etoyavuda.*

31 Me Diu fuedi i vetumagana Iesu 'waineye begaidi i vonedi i vo, 'Ai'edi yaku ve 'wa na vevematayakeyakedi, 'omi yaku tovetutuyamavo mogitana. 32 Sakona i veveimeyemi 'wa da vo bani'odi 'omi yana tofolovavo, siwe yaku ve tonovidi 'wa nogaidiga 'wa na vevematayakeyakedi, 'wa na 'asetai yaku ve, vona mogitana, vonanidi i na 'etoyavumi." 33 Me Diu to'edakumetavo i vona Iesu 'waineye i vo, 'Ima Ebelamo tubunavo, kebu tamu tutuya 'a da vetofolova-maimaiga tamu tomogo 'waineye. Awale 'u vo, Yaku vona i na 'etoyavumi?" 34 ✧ Wata Iesu i vonedi i vo, A vona mogitana 'waimie, egavo i sakosakonaga, sakonanina i veveimeyedi. 35 'Ai'edi tamu tomogo yana tofolova-maimaiga i na kimwanei, tofolovanina kebu ma yana veimea wata kebu i na mia-vagata tomogonina yana 'aila'a nageneye, mogitana tomogonina natuotogina ma yana veimea wata yana 'aila'a nageneye i na mia-vagata. 36 ✧ Omi sakona yana tofolova-maimaiga, siwe 'ai'edi yau, Yaubada Natuna a na 'etoyavumi 'omi mogitana yavuyavumi. 37 Mogitana a 'asetai 'omi Ebelamo tubunavo, siwe 'ifwaimi nuanuami 'wa na luvewafaku fai yaku ve 'wa vedumwe'ai'aiedi. 38 ✧ Naninidi a 'isedi Tamaku 'waineye a veveifufuyedi 'waimie, we'e 'omi ava'ai nuanuami 'wa na 'idewaiga 'waikuye fai tamami sakoina i vonemi."

39 Me Diu to'edakumetavo Iesu yana vona i tutuli i vo, 'Ima tamama Ebelamo." Iesu i vo, 'Ai'edi 'omi natunavo mogitanaga, yana sauluva 'atumaidi 'wa da vevetutuyamedi. 40 Siwe yami sauluva tulina, kebu Ebelamo bani'odi. Nuanuami 'wa na luvewafaku fai tutuya fuedi Yaubada yana vona mogitana, 'wainega a nogai, a lulu'ivona 'waimie. 41 Omi kebu mogitana Ebelamo natunavo. Tamami yana sauluva sakoidi 'wa 'ewadi." To'edakumetanidi i vo, 'Ima kebu 'eda natunavoga. Matatabuma tamama 'aitamogana, taunina

✧ 8:28: Ion 3:14, 5:19 ✧ 8:29: Ion 16:32 ✧ 8:34: Lom 6:16; 2 Fit 2:19

✧ 8:36: Gal 5:1 ✧ 8:38: Ion 8:44

Yaubada.” 42 ✨ Iesu i vonedi i vo, 'Ai'edi mogitana Yaubada tamamiga, 'wa da nuakalikalieku fai yau Yaubada 'wainega a mai, taiadi ta miamiani. Kebu tauniku yaku nuanuayega a da mai, Yaubada i vetuneku. 43 Fai kebu nuanuami yaku vona 'wa na nogai, begaidi ava'ai a voneyediga 'wa bavuyedi. 44 ✨ 'Omi Seitani\* natunavo, nuanuami yana nu-anuana sakoidi 'waidie 'wa na nunagoi. Tutuya 'eba velamu 'wainega i maiga 'asiau Seitandinina toluvewafa, kebu tamu sai'afu yana vona tonovidi, naninidi tonovidi matatabuna i vevedumwe'ai'aiedi. Tutuya fuedi vekaliega i vonavona fai 'asa'aiana bani'odi yana sauluva wata vekali matatabuna taunina lamudi. 45 A vona tonovina 'waimie kebu a da vekaliga, siwe fai Seitani yana sauluva-vekavekali 'wa 'ewadi begaidi kebu 'wa da vetumaganekuga. 46 ✨ Kebu tamu aitoi 'ana fata i na vona mogitana 'waikuye i na vo, 'Omu tosakona.” Tutuya fuedi a vonavona tonovina 'waimie, siwe kebu tamu sai'afu 'wa da vetumagana 'waikuye. 47 Egavo tamadi Yaubada, Yaubadanina yana vona i noganogai, siwe 'omi kebu Yaubada yana 'Aila'a nageneye, faifainanina kebu nuanuami yana vona 'wa na nogai.”

*Iesu yana 'eba souyagi lamuna faifaina i veifufu.*

48 ✨ Me Diu to'edakumetanidi Iesu yana vona i tutuli i vo, Yama vona basenadi, 'akonadi 'ana mogitana i souyeni 'a vo, 'Omu yaiaina i agemu bega 'wava'wavamumu wata 'omu bani'odi tomogo Samelia sakoina.” 49 Iesu i vonedi i vo, Yau kebu yaiaina i da agekuga. Tamaku a veve'ililibuyeni, we'e 'omi kebu 'wa da veve'ililibuyekuga. 50 Kebu tauniku 'aku awa'ai'ai faifaina a da folofolova, a folofolovaga Yaubada i na awa'ai'aiku, we'e tomotoganidi i vedumwe'ai'aiekuga i na vematavulogidi. 51 ✨ A vona mogitana 'waimie, egavo yaku vona i na vevematayakeyakediga kebu i na wafaotoga, i na mia-vagata.” 52 Me Diu i voneni i vo, 'U vevekali, vona mogitana yaiaina i agemu. Basenadiotoga Ebelamo i wafa, wata Yaubada yana tolu'ivonavo taiadi, we'e igodi 'omu 'u vo, 'Ai'edi egavo yaku vona i na vevematayakeyakediga kebu i na wafaotoga, i na mia-vagata.” 53 Tubuda Ebelamo 'omu kebu bani'odiga, taunina tomogo bwaikina siwe i wafa tolu'ivonavo taiadi. 'Omu 'wa da vo bwaikaotogimu begaidi bani'odi 'u vonevoneyedi.” 54 Iesu i vonedi i vo, 'Ai'edi tauniku a da awa'ai'aiku 'ana nogaya nani-'avo'avovo. Tamaku, kumanina igodi 'wa vo, Yama Yaubada,” taunina 'aku

✨ **8:42:** Ion 16:28 ✨ **8:44:** 1 Ion 3:8; Nag 3:4 ✨ **8:44:** Seitani yaiaina 'adi to'edakumeta. ✨ **8:46:** 1 Fit 2:22 ✨ **8:48:** Ion 7:20 ✨ **8:51:** Ion 5:24

toawa'ai'ai. <sup>55</sup> ✧ Kebu tamu sai'afo Yaubadanina 'wa da 'asetatonovi, yau a 'asetai. 'Ai'edi a da vo, Kebu a da 'asetai, ” a da vekali, bani'odi 'omi yami sauluva. Siwe a 'asetai, wata yana vona a vevematayakeyakedi. <sup>56</sup> Basenadiotoga yaku mai 'ana tutuya tubumi Ebelamo i nuanimo nika i sosoana, siwe 'akonadi i 'iseni i sosoana bwaikina.” <sup>57</sup> Me Diu Iesu i voneni i vo, 'Omu bola kebu 'amu malamala 50 i da veluagai, voke 'u 'iseni Ebelamo? 'A nuani kebu tamu sai'afo 'u da 'isatonovi.” <sup>58</sup> ✧ Iesu i vo, A vona mogitana 'waimie, Bola Ebelamo kebu i da tubugaga, yau a mia-vagata.” <sup>59</sup> ✧ Me Diu yana vona i nogai, i nuasako, kileu i 'ewadi igodi nuanuadi i da luvewafai, siwe Iesu i giva tomotoga nagedie mulieta vanuga 'eba velu'ui 'wainega i souyeni i nago.

## 9

### *Tomatasako inana kamodiega Iesu i 'ive'atumaia.*

<sup>1</sup> Tamu tutuya Iesu wata yana tovetutuyamavo taiadi i nunagoi, tamu tomogo ma mata-sakoina inana kamodiega i mieniga i 'iseni. <sup>2</sup> ✧ Begaidi Iesu yana tovetutuyamavo i velutolieni i vo, Tove, aitoi yana sakona 'wainega ma mata-sakoina i tubuga? Taunina 'alo inana tamana taiadi?” <sup>3</sup> ✧ Iesu i vonedi i vo, Yana matasako kebu yana sakona 'wainega, 'alo inana tamana taiadi yadi sakona 'waidiega. I matasakoga bega Yaubada yana toketokena 'wainega i na ve'atumai tomotoga i na 'iseni. <sup>4</sup> I lubwaineda tutuya safailina 'waineye 'aku tovetune yana folova ta na 'i'idewadi, we'e tutuya vitana i na souyeniga, bani'odi dudubala, kebu tamu aitoi 'ana fata i na folova. <sup>5</sup> ✧ Tutuyanina a na miamia fwayefwayeye, yau tomia fwayafwaya yami mageta.” <sup>6</sup> Iesu i vona'a'ava, i kiwala fwayefwayeye, fwayafwayanina i 'ewai nimaneye i luogoi mulieta tomatasako matana i 'abidi. <sup>7</sup> I voneni i vo, Nuanuaku 'u na nago Ufa Sailoama 'waineye maigimu 'u na lekoai.” Ufanina Sailoama 'ana saivila, Vetune. Bega tomogonina i nago maigina i lekoai, nika i 'isadewa, i vilai i mai.

<sup>8</sup> Tomogonina matana i ve'atumaiga, enavo wata 'ifwaidi tomotoga i 'asetai tomogonina taunina totalavelu'ui, 'aise'avadi i velutolitoli i vo, 'Wa da nuani, voke kumanina totalavelu'uinina?” <sup>9</sup> Tomotoga 'ifwaidi i vo, 'Asa'aiana kumanina,” we'e 'ifwaidi i vo, Kebu, no'o tulina siwe 'ana 'isa'isa.” Tomogonina matana i ve'atumaiga i vo, 'Asa'aiana kumaniku yau.” <sup>10</sup> Tomotoga i velutolieni i vo, Bani'odi matamu i munega i ve'atumai?” <sup>11</sup> I vonedi i vo, Tamu tomogo 'ana wagava Iesu dobwadobwana i 'idewai matakui i 'abidi i 'a'avana i voneku i vo, Nuanuaku 'u na nago Ufa

✧ 8:55: Ion 7:28-29 ✧ 8:58: Ion 1:1 ✧ 8:59: Ion 10:31 ✧ 9:2: Sou 20:5

✧ 9:3: Ion 11:4 ✧ 9:5: Ion 8:23



Sailoama 'waineye, bei maigimu 'u na lekoai.” Bega a nago maigiku a lekolekoaiga nika a 'isadewa.” <sup>12</sup> Wata i velutolieni i vo, Tomogonina matamu i 'ive'atumaigida, ava'aibe?” I vo, Aigodi.”

*Falisi i velutolitoli tomatasako yana ve'atumai faifaina.*

<sup>13</sup> Bega tomotoga iadinina matana i ve'atumaiga i vagavaia i naweni totafalolo Falisi 'waidie. <sup>14</sup> We'e 'aiatanina 'waineye Iesu dobwadobwana i 'idewai tomogo i 'ive'atumaiga me Diu yadi 'Aiata Veawai 'waineye. <sup>15</sup> Bega Falisinidi tomogo i velutolieni i vo, Bani'odi matamu i munega i ve'atumai?” I vonedi i vo, Iesu dobwadobwanayega matakū i 'abidi, mulieta maigiku a lekoai nika a 'i'isadewa.” <sup>16</sup> ✨Falisi 'ifwaidi i vo, Tomogo de'e bani'odi i folovediga 'ana 'isa kebu taunina Yaubada 'wainega, fai i folova 'Aiata Veawai 'waineye yada ve'etoboda i geuya.” Siwe 'ifwaidi i vo, 'Ai'edi taunina tosakonaga kebu tamu sai'afo 'ana fata folova toketokedi i da 'i'idewadi.” Nika 'aise'avadi 'aila'a i 'idia.

<sup>17</sup> Wata Falisi i velutoli-vaitugana tomogo 'waineye i vo, 'U vonaga Iesu matamu i 'ive'atumaidi, we'e 'u da nuaniga yana toketokena ava'aiega i veluagai?” Yadi velutoli i tutuli i vo, Taunina tamu Yaubada yana tolu'ivona.” <sup>18-19</sup> Me Diu to'edakumetavo kebu i da vetumagana fai i nuani igodina basenadi matana kebu i da sakoga, faifainanina inana wata tamana taiadi i vonedi i maia i velutoliedi i vo, De'e natumi? Mogitana ma mata-sakoina i tubuga? Bani'odi i munega 'ana fata i 'i'isadewa?” <sup>20</sup> Inana wata tamana i vo, Mogitana de'e 'ima natuma, wata 'a 'asetai ma mata'uluna i tubuga. <sup>21</sup> Siwe matana yadi ve'atumai wata aitoi i 'ive'atumaigida kebu ta da 'asetadiga. Taunina 'wa velutolieni, tulaina 'ana fata i na vonemi.” <sup>22</sup> ✨Inana wata tamana bani'odi i voneyediga fai i kololo me Diu to'edakumetavo 'waidie. Basenadi yadi veimea i kiavefa'ali i vo, 'Ai'edi aitoi i na vo, Iesu taunina Yaubada 'ana Venua'ivina,” 'a na talabodeni kebu taiadi 'a na lukuluku 'eba miava'auta nageneye tafalolo faifaina.” <sup>23</sup> Faifainanina inana wata tamana i vonaga i vo, Taunina 'wa na velutolieni, tulaina 'ana fata i na vonemi.”

<sup>24</sup> Wata me Diu i vona-vaitugana tomogonina matana i ve'atumaiga i mai i voneni i vo, Nuanuama 'u na vona Yaubada mataneye kebu 'u na vekaliga, fai 'a 'asetai tomogonina Iesu, tosakona.” <sup>25</sup> Tomogo i vo, Aigodi tosakona 'alo kebu, siwe tamu nani a 'asetai, basenadi matakū sakoidi, siwe 'asiau a 'isa'isa.” <sup>26</sup> Wata i velutolieni i vo, Bani'odi i munegimu? Wata bani'odi i munega matamu i siayegidi?” <sup>27</sup> I vonedi i vo, 'Akonadi a lu'ivona 'waimie, siwe kebu

nuanuami bonaku 'wa na nogai. Awale nuanuami a na vona-vaivaitugana? 'Alo nuanuami 'omi wata Iesu yana tovetu-tuyamavo?" 28 Ma yadi nuasako i yagaia i vo, 'Omu 'aisemu kumanina 'ana tovetutuyama, 'ima Mosese yana tovetu-tuyamavo. 29 ✧A 'asetai Yaubada i vona Mosese 'waineye, we'e tomogonina kebu tamu sai'afo 'a da 'asetai ava'aiega i mai." 30 Tomogonina matana i ve'atumaiga i vonedi i vo, Nuaku i vogani yami bavu faifaina. Yana toketokena 'wainega matakua i ve'atumai siwe kebu 'wa da 'asetai ava'aiega i mai. 31 ✧Fai ta 'asetai Yaubada tosakona bonadi kebu i na nogai, siwe egavo i veve'ililibuyeni wata i veve-matayakeyakeni bonadi i noganogaidi. 32 Fwayafwaya 'ana 'idewadewavau 'wainega i maiga 'asiau, kebu tamu aitoi 'ana fata de'e bei tomatasako inana kamodiega i na 'ive'atumaia. 33 ✧Ai'edi Iesu kebu i da maiga Yaubada 'wainega wata 'ako kebu bani'odi i da folovediga." 34 Yana vona i tutuli i vo, 'Omu tosakona, inamu wata tamamu yadi sakona 'wainega 'u tubuga, igodi nuanuamu 'u na ve 'waimeye." De'e bani'odi i voneyedi i 'a'ava, i 'ive'avini i tufelefeleni i souyeni 'eba miava'auta 'wainega.

### *Tomotoga yadi nuanua bani'odi i vematasako.*

35 Iesu vala i nogai Falisi tomogonina matana i ve'atumaiga i bifelefeleni 'eba miava'auta 'wainega bega i nago i veluagai i velutolieni i vo, Kumanina i vetomotogaotoga, 'waineye 'u vetumagana 'alo kebu?" 36 Tomogo i vo, 'Auvea, ava'ai tomogoga? 'U voneku bega a na vetumagana 'waineye." 37 Iesu i voneni i vo, 'Akonadi 'u 'iseni, 'asa'aiana taunina taiadi 'wa veveifufu." 38 Tomogo i vona Iesu 'waineye i vo, 'Auvea, a vetumagana 'waimuye." I vona nika ma yana subia i 'odu mataneye.

39 ✧Iesu i vo, Yau a maiga fwayefwayeye tomotoga a na 'ididi, bega egavo yadi nuanua dudubalidi 'wa da vo i da vematasako, 'anu'anunudi matadi a na 'ive'atumaidi, we'e egavo igodina 'anu'anunudi matadi 'atumaidi a na 'ive'uludi." 40 ✧Falisi ma fuedie i tovtovoi i nogai Iesu yana vona begaidi i velutolieni i vo, 'U vonavonaga 'ima wata matama 'uludi?" 41 Iesu i vonedi i vo, 'Ai'edi mogitana yami nuanua i vematasako, Yaubada kebu 'ana fata i na vematavulogimi yami sakona faifaiddi fai bavubavumi. Siwe fai 'wa vonaga 'wa vo, Matama 'atumaiddi nani matatabuna 'a 'asetadi," begaidi yami sakonanidi i na 'eno'eno."

# 10

*Iesu i vona-awatabai 'aisaya sifi 'adi kali faifaina.*

1-2 Wata Iesu i vonedi i vo, A vona mogitana 'waimie, to'isave'avina sifi 'aiaseye yana 'aisaya i veve'anidi 'adi mosomoso, lovana i sisilukuvedi 'adi kalie, bei wata i 'i'isave'avinidi. 'Ai'edi to'isave'avinanina nuanuana i na lukuga, 'awa 'waineamo i lukuluku, we'e 'ai'edi tamu aitoi kebu 'awa 'waineamo i na lukuga kaliame i na nakikila, taunina to'ainike wata tovainago. <sup>3</sup> Tutuyanina to'isave'avina nuanuana yana 'aisaya i na nawedi, 'awa 'ana to'isave'avina i vonevoneni saiboda i sisibaleni, mulieta to'isave'avinanina yana sifi 'aitamogana 'aitamogana 'adi wagaveamo i tayatayamidi. <sup>4</sup> ☆Tutuyanina i sousouyedi to'isave'avina i kumekumeta we'e yana 'aisaya mulineye i delideli fai bonana i nogaya'inanai. <sup>5</sup> 'Aisayanidi kebu 'adi fata tamu tomogo mulineye i na nagoi, bola bonana i na bavuyeni i na ve'aladegadega.”

<sup>6</sup> De'e vona-awatabainina 'wainega Iesu i veifufu 'waidie, siwe kebu nuadi i da magetadi. <sup>7</sup> Tomotoga kebu nuadi i da magetadiga faifainanina Iesu i vona-vaitugana 'waidie i vo, A vona mogitana 'waimie, yau sifi 'adi kali 'ana 'awa. <sup>8</sup> Basenadi mali tomotoga nuanuadi i na veto'isave'avina igodina taunidi i da mai Yaubada 'wainega, tomotoganidi tovainago wata to'ainike, siwe yaku sifi kebu bonadi i da nogaya'inanadi. <sup>9</sup> ☆'Asa'aiana kumaniku 'awa. Egavo i na vetumagana 'waikuye, i na luku 'waikuyamo a na 'ita'ita'iedi wata a na 'i'isave'avinidi bani'odi to'isave'avina sifi yana 'aisaya i nunawedi i veve'anidi wata i mimaiedi 'adi kalie. <sup>10</sup> Tovainago i na maiga, vainago'ava, 'ainike'ava, 'ivesako 'aisedi faifaidi i na mai. Yau a maiga tomotoga mia 'ivauna wata 'atumaina a na veledi bega i na sososoana wata kebu tamu nani faifaina i na vevenuafouviga.”

*Iesu to'isave'avina sifi 'atumaina.*

<sup>11</sup>☆Wata Iesu i vonedi i vo, Yau to'isave'avina sifi 'atumaiku, faifainanina yawaiku a na tauyeni a na wafa yaku sifi 'adi 'ita'ita'i faifaina. <sup>12</sup> 'Ai'edi tamu tomogo i na vetofolova sifi i na 'i'isave'avinidi, fai taunina kebu tonisifi 'ai'edi 'ou'ou kasikasisina i na 'iseni i na mimaiga bola i na degalovedi, 'ou'ounina kasikasisina sifi i na ovadi i na ve'aladegadega. <sup>13</sup> Tofolovanina i dega fai taunina kebu tonisifi, begaidi kebu faifaidi i da vetafewa i folovamo tutula faifaina. <sup>14-15</sup> ☆Yau to'isave'avina sifi 'atumaiku. Tamada i 'asetaku wata yau a 'asetai, wata bani'odi yaku sifi a 'asetadi, wata i 'asetaku. Fai

☆ **10:4:** Ion 10:27 ☆ **10:9:** Ion 14:16 ☆ **10:11:** Same 23:1; Ion 15:13

☆ **10:14-15:** Ion 10:27; 1 Ion 3:16

taunidi yaku sifi, yawaiku a na tauyeni a na wafa 'adi 'ita'ita'i faifaina. <sup>16</sup> ✨We'e wata 'ifwaidi yaku sifi tulidie i miamiani, kebu de'e kalinina nageneye. I lubwaineku taunidi wata a na miedi, 'adi fata wata bonaku i na nogai, a na luvetubamidi 'aila'a 'aitamogana we'e 'adi to'isave'avina 'aitamogana.

<sup>17</sup> ✨Tamaku i nuakalikalieku bwaikina fai tauniku a tauyeku 'awaie a na wafa siwe wafanina 'wainega wata yawaiku a na veluaga-vaitugani. <sup>18</sup> ✨Kebu tamu aitoi 'ana fata yawaiku i na dabai, yau taunikuna a na tauyeni. Fai ma yaku veimea wata ma yaku toketokena 'aku fata yawaiku a na tauyeni, wata 'aku fata yawaikunina a na veluaga-vaitugani. Tamaku yana veimea 'waikuye side bani'odi.”

<sup>19</sup> Iesu i vona'a'ava, mulieta vonanina faifaina me Diu 'aila'a wata i 'idia. <sup>20</sup> Fuedi i vona i vo, Vona mogitana yaiaina i agei i ve'wawa'wawa. Kebu bonana 'wa na nogai.” <sup>21</sup> We'e 'ifwaidi i vo, Iesu yana vona 'ana nogaya kebu bani'odi tomogo yaiaina i ageiga yana vona. Yaiaina kebu 'ana fata tomatasako i na 'ive'atumaia Iesu i 'idewaiga bani'odi.”

### *Me Diu Iesu i vedumwe'ai'aieni.*

<sup>22</sup> Malayaubanie me Diu fuedi i va'auta Ielusalema tamu sakali i 'idewai. Sakalinina 'adi 'eba tolinuata'i wata yadi 'eba nuave'avina basenadi mali tomotoga yadi vanuga 'eba velu'ui i 'ivesakoi we'e i 'idewa-vaitugani faifaina. <sup>23</sup> Tutuyanina 'waineye Iesu i nago vanuga 'eba velu'ui 'waineye, i yabayaba Kini Solomoni yana Masi'eda 'waineye. <sup>24</sup> Me Diu i 'iseni i maia i toviffineni i voneni i vo, Tutuya manamanawena 'a vevenuanaluga yamu vona faifaiddi. 'Asiauotoga nuanuama 'u na vona tonovina 'waimeye, mogitana 'omu Keliso Yaubada 'ana Venua'ivina 'alo kebu?” <sup>25-26</sup> ✨Iesu i vo, 'Akonadi a vonemi siwe kebu 'wa da vetumaganekuga. Folovanidi toketokedi a 'i'idewadiga Tamaku yana veimea 'wainega, 'wa da 'isedi 'wa da 'asetai yau a mai Yaubada 'wainega, siwe kebu 'wa da vetumagana fai 'omi kebu yaku sifi. <sup>27</sup> ✨Yaku sifi mogitana bonaku i noganogai, 'aitamogana 'aitamogana a 'asetadi wata i yoyogo'wailiku. <sup>28</sup> ✨Mia 'atumaina wata miamia-vagaina a veleveledi bega kebu i na wafaotoga wata kebu tamu aitoi 'ana fata i na sieloeloku. <sup>29</sup> Tomotoganidi Tamaku i velekuga nani bwaikaotogina mataneyeye, nani 'ifwaidi sai'afo, faifainanina kebu tamu aitoi 'ana fata i na vunugidi Tamada yana 'isave'avina 'wainega. <sup>30</sup> Tamada wata yau 'aitamogana. Yama nuanua, yama sauluva, wata lamuma 'aitamogana.”

✨ **10:16:** Ion 11:52 ✨ **10:17:** Fil 2:8-9 ✨ **10:18:** Ion 19:11 ✨ **10:25-26:** Ion 5:36, 10:38 ✨ **10:27:** Ion 10:3 ✨ **10:28:** Ion 3:16, 6:39

<sup>31</sup> Vonanina faifaina me Diu kileu i 'ewadi igodi i da luwewafai basenadi bani'odi. <sup>32</sup> Siwe Iesu i vonedi i vo, Folova fueidi, 'atumaide wata toketokedi matamie a 'i'idewadi Tamada yana veimea 'wainega. Folovanidi 'waidiega ava'ai folovaga faifaina nuuanami 'wa na nikeku?" <sup>33</sup> Me Diu Iesu yana vona i tutuli i vo, Yamu folova 'atumaide faifaide 'ako kebu 'a na nikemuga, siwe fai 'u vona-uvi'agala Yaubada 'waineye. 'Omu tomogo-'avo'avovo siwe igodi 'u vo, Yau Yaubada." <sup>34</sup> ✧Wata Iesu i vonedi i vo, Basenadiotoga i kilumi Yaubada yana Buki 'waineye, bukinina 'wa veve'ililibuyeni bwaikina, Yaubada i vona toveimea i venua'ivinediga 'waidie i vo, 'Omi tomotoga 'asa'aiana taunimi yaubadanimi." <sup>35</sup> 'Akonadi ta 'asetai Yaubada yana Buki i na 'eno-vagata wata kebu tamu sai'afo vekali nageneye, we'e toveimeanidi Yaubada yana Vona i nogai, Yaubada i goledi yaubadavo. <sup>36</sup> ✧Fai Yaubada tomotoga i fali-yaubadedi, yau wata a vo, Yau Yaubada Natuna," i lubwaineku fai i venua'ivineku i vetuneku a mai tomia fwayafwaya 'waimie, begaidi kebu Yaubada a da awaobuobuyeni. <sup>37</sup> 'Ai'edi Tamaku yana folova kebu a da 'i'idewadiga, i lubwainemi kebu 'wa da vetumagana 'waikuye, siwe fai Tamaku yana folova a 'i'idewadi i lubwainemi 'wa na vetumagana 'waikuye. <sup>38</sup> ✧Kebu nuuanami 'wa na vetumagana 'waikuye, siwe fai folovanidi toketokedi a 'i'idewadiga i lubwainemi 'wa na vetumaganedi bega 'wa na 'asete-'atumaia yau Tamada 'ana labilabina wata Tamadanina i labilabiniku." <sup>39</sup> Fai Iesu i vo, Yau Tamada 'ana labilabina wata Tamadanina i labilabiniku," begaidi to'edakumetavo wata igodi i da 'ive'avini, nika i 'iawedi i nago. <sup>40</sup> Iesu wata yana tovetutuyamavo taiadi wata i viladi Ufa Iolidani i damana no'o bega i miamiani, basenadi bei Ioni tomotoga i bafitaisodi. <sup>41</sup> Tomotoga fueidi i maia Iesu 'waineye tomotoganidi 'aise'avadi i veifufu i vo, Ioni kebu tamu folova toketokena i da 'idewai, siwe nani matatabuna basenadi i veifufuyediga Iesu faifaina, 'akonadi 'adi mogitana i souyedi." <sup>42</sup> Begaidi tomotoga fueidi i vetumagana Iesu taunina Yaubada 'ana Venua'ivina.

## 11

### *Lasalo yana wafa ifufuna.*

<sup>1-3</sup> ✧Tamu 'atamana 'ana wagava Bedani bei Lasalo i miamia ma novunavo, Meli wata Malida. Melinina kumanina 'Auvea Iesu 'agena i iwagi bunama magaina 'atumaina 'wainega, wata nava'aunega i tamavelavelalai. Tamu tutuya

Lasalo i viga bwaikina begaidi novunavo vala i vetunei Iesu 'waineye i vo, 'Auvea, iamu kumanina 'u nuakalikalienu bwaikina i viga.”<sup>4</sup> ✧ Tutuyanina Iesu valana i nogai i vona i vo, Viganina i souyeniga Lasalo 'waineye kebu wafaotoga faifaina, siwe i souyeni bega tomotoga fuedi Yaubada i na subiai wata 'wainega, yau Natuna i na awa'ai'aiku.”

<sup>5-6</sup> Lasalo ma novunavo Iesu i nuakalikalienu bwaikina, siwe tutuyanina i nogai Lasalo i viga kebu i da nago 'waineye, 'atamananina 'waineye i valenogaya bei wata 'aiata 'ailuga i mia. <sup>7</sup> 'Aiatanidi 'adi 'ailuga i 'a'avana, mulieta yana tovetutuyamavo i vonedi i vo, Ta na vilada ta na nagoi Iudia.”<sup>8</sup> ✧ Yana tovetutuyamavo i vo, Tove, basenadi bei me Diu igodi i da luvewafamu, wata igodi nuanuamu bei 'u na nago.”<sup>9</sup> Iesu i vonedi i vo, 'Akonadi 'wa 'asetai 'aiata 'ana 'awasasa matatabuna 12. 'Awasasanidi 'waidie ta na yabaga kebu 'ana fata ta na nikeyeda fai fwayafwaya 'ana mageta 'wainega ta 'i'isadewa. <sup>10</sup> Siwe 'ai'edi ta na yabavuvua lovane, bola ta na nikeyeda fai mageta kebu. Bola yaku tutuya 'atumaina i 'eno'eno, 'aku fata a na folofolova. <sup>11</sup> ✧ Iada Lasalo i 'enomwadumwadu, siwe ta na nagoi a na luvagoni i na 'isa.”<sup>12</sup> Yana tovetutuyamavo i vo, 'Auvea, 'ai'edi i na 'eno'enovamo 'ana fata i na ve'atumai.”<sup>13</sup> Siwe Iesu i vonavona i wafaga faifaina, we'e yana tovetutuyamavo yadi nuanua i vo, 'Eno mogitana faifaina i vonavona.”<sup>14-15</sup> Begaidi Iesu i vonaotoga 'waidie i vo, Lasalo i wafa, siwe 'ai'edi 'waineye taiadi ta da miamiani a da 'ive'atumaia viga 'aisena 'wainega bola yami vetumagana mweadi. 'Atumaina, ta na nagoi 'waineye yaku folova 'wa na 'iseni bega yami vetumagana i na vetoketoke.”<sup>16</sup> ✧ Tomasi, tamu 'ana 'eba 'ainana Natulugaluga tovetutuyamavo 'ifwaidi i vonedi i vo, Ekwavo, ta na nagoi yada 'Auvea taiadi bega ma fueda ta na wafa.”

*Iesu tosivetovoi wata yawai-vagata 'ana to'anivelena.*

<sup>17</sup> Tutuyanina Iesu yana tovetutuyamavo taiadi i le'wai sai'afu Bedani lilivaneye, tomotoga i vonedi i vo, Lasalo yawaina i 'a'ava, i 'eno'eno taumaseye 'akonadi 'aiata 4 i veluagai.”<sup>18-19</sup> Ielusalemega ta na nago Bedani kebu 'ani'iega, vivideye\* begaidi me Diu fuedi i maia Bedani Malida ma taina Meli nuadi i na 'iveagiagidi, novudi i 'iawediga faifaina.

<sup>20</sup> Tutuyanina Malida i nogai Iesu i nunago, begaidi i mai i yogo'ede'edeni, we'e Meli i miamia vanuge. <sup>21</sup> ✧ Malida i veluagai nika i vona Iesu 'waineye i vo, 'Auvea, 'ai'edi 'omu taiadi ta da miamiaga 'ako novuku kebu i da wafaga.

✧ 11:4: Ion 9:3 ✧ 11:8: Ion 10:31 ✧ 11:11: Mad 9:24 ✧ 11:16: Ion 20:25

\* 11:18-19: 'Ana mogitana bani'odi 3 kilomita. ✧ 11:21: Ion 11:32

<sup>22</sup> Mogitana novuku i wafa, siwe a 'asetai ava'ai nuanuamu 'u na velu'ui Yaubada 'waineye i na velemu bega 'aivaita 'a na veluagai.” <sup>23</sup> Iesu i voneni i vo, Novumu i na tovoi-vaitugana.” <sup>24</sup> ✧Malida i vo, E'e 'akonadi a 'asetai 'awaie fwayafwaya 'ana 'eba ve'a'ava 'waineye i na tovoi-vaitugana.” <sup>25</sup> Wata Iesu i voneni i vo, Yau kumaniku towafa 'adi tosivetovoi wata mia-vagata 'ana to'anivelena. 'Ai'edi egavo i na vetumagana 'waikuye mulieta i na wafa, siwe mia 'atumaina wata miamia-vagaina i na veluagai. <sup>26</sup> Egavo i na vetumagana 'waikuye kebu tamu sai'afo i na wafaotoga. Malida, yaku vona de'e 'u da nuani, 'u vetumagana 'alo kebu?” <sup>27</sup> ✧Malida i vo E'e 'Auvea yamu vonanina faifaina a vetumagana, wata a 'asetai 'omu Keliso, Yaubada Natuna wata 'ana Venua'ivina, kuanimu basenadi Yaubada i vona'awaufaufa yamu mai fwayefwayeye faifaina.”

### *Iesu i lumatageu.*

<sup>28</sup> Malida i vona'a'ava, mulieta i vilai i nago Meli 'waineye 'aise'avadi i veifufu i vo, Tove 'akonadi i mai, nuanuana 'u na nago i na vonemu.” <sup>29</sup> Bega Meli i tovoi i lilide i mai Iesu 'waineye.

<sup>30</sup> Iesu bola kebu i da souyeni 'atamane, ava'aibe bei Malida i veluagaiga bei bola i tovtovoi. <sup>31</sup> Me Diu i maiaga Meli ma iana 'adi 'ivenuagiagi faifaina, tutuyanina i 'iseni Meli i tovoi i souyeni i lilide i mimai yadi nuanua igodi i vo, I nunago taumaseye bei i na vemogai,” begaidi i yogo'waili.

<sup>32</sup> Tutuyanina Meli i le'wa ma yana ve'ililibu i be'u Iesu mataneye i voneni i vo, 'Auvea, 'ai'edi 'omu taiadi ta da miamiaga, 'ako kebu novuku i da wafaga.” <sup>33</sup> Iesu Meli i 'iseni me Diu taiadi i vevemogai nuana i vekalikalia wata i nuasako wafa faifaina. <sup>34</sup> Begaidi i velutoliedi i vo, Ava'aibe bei iada 'wa ve'ufai?” I voneni i vo, 'Auvea 'u mai ta na nago 'a na vemu.” <sup>35</sup> ✧Nika Iesu i lumatageu. <sup>36</sup> Me Diu i 'iseni Iesu ma matageuna begaidi i vo, Vona mogitana, iana i nuakalikalieni bwaikina.” <sup>37</sup> ✧We'e 'ifwaidi i vo, Tomatasako i 'ive'atumaia bega wata iana i da 'ivaiseni yana viga 'waineye nika kebu i da wafaga.”

### *Iesu Lasalo wafayega i sivetovoia.*

<sup>38</sup> Wata Iesu nuana i vekalikalia sai'afo i vaganago taumata 'waineye. Taumatanina ovu matumatu 'waineye, kileu bwaikinega 'awana i vetovibodai. <sup>39</sup> Iesu tomotoga i vonedi i vo, Kileunina 'wa 'ewai.” Nika Malida towafanina novuna i vo, 'Auvea, magari fai 'aiata 4 'akonadi i 'a'ava.” <sup>40</sup> ✧Siwe

✧ **11:24:** Ion 6:40    ✧ **11:27:** Ion 6:68-69; Ion 6:58-69    ✧ **11:35:** Luk 19:41

✧ **11:37:** Ion 9:6-7    ✧ **11:40:** Ion 11:4

wata Iesu i voneni i vo, 'Wa da vo kebu a da vonemu a vo, 'Ai'edi 'u na vetumagana 'waikuye, Yaubada yana toketokena 'u na 'iseni.”<sup>41</sup> Tomotoga kileu i 'ewai, mulieta Iesu i 'isalaka i velu'ui Yaubada 'waineye i vo, Tamaku, a vekaiwa bwaikina 'waimuye fai bonaku 'u noganogaidi.<sup>42</sup> ✱'A 'asetai mogitana tutuya matatabuna bonaku 'u noganogaidi, siwe de'e bani'odi a vevelu'uiediga fai nuanuaku tomotoga i na nogai i na vetumagana 'omu 'u vetuneku a mai.”<sup>43</sup> Iesu i velu'ui'a'ava, mulieta i vegole i vo, Lasalo, 'u souyemu.”<sup>44</sup> Iesu yana voneye nika Lasalo i tovoi i souyeni taumatayega nimana wata 'agena taiadi fanifanidi, wata 'unu'ununa babanumana. Iesu tomotoga i vonedi i vo, 'Wa na 'iyavuyavuya nika 'ana fata i na yaba.”

*Me Diu nuanuadi Iesu i na luwewafai.*

<sup>45</sup> ✱Me Diu fuedi i maiga Meli 'waineye, Iesu yana folova toketokena i 'iseni i vetumagana 'waineye.<sup>46</sup> We'e 'ifwaidi i viladi i nagoi totafalolo Falisi 'waidie i lu'ivona ava'ai Iesu i 'idewaiga faifaina.<sup>47</sup> Begaidi Falisinidi, tovelomu 'adi to'edakumetavo, wata me Diu yadi Kaniselo taiadi i va'auta i veifufu Iesu faifaina i vo, Bani'odi ta na munegi? Tomogonina 'eba nuavogana wata 'eba nua'ewa fuedi i 'i'idewadewadi.<sup>48</sup> 'Ai'edi ta na 'ise'isenimoga, bola tomotoga matatabudi i na vetumagana 'waineye. Bega Loma gabemani tomotoga i na 'isedi i na vo, I baibailema i nunagoi Iesu 'waineye,” bega i na maia i na leoda, 'ida me Diu yada veimea i na geuya, yada vanuga 'eba velu'ui taiadi.”<sup>49</sup> Tamu me Diu yadi Kaniselo 'ana wagava Kaiafa, taunina tovelomu bwaikina malamalanina 'waineye, i vonedi i vo, 'Omi 'wawa'wavami, we'e kebu 'wa da nuaniga.<sup>50</sup> I lubwainemi 'wa da 'asetai Iesu ta na luwewafai bega me Diu matatabuda ta na mia 'atumaina. 'Ai'edi kebu i na wafaga, me Loma i na leoda.”

<sup>51</sup> Vonanina Kaiafa i 'inanaiga, kebu taunina yana nuanuayega, siwe fai taunina tovelomu bwaikina malamalanina 'waineye begaidi Yaubada yana venuayato 'wainega i vonavagata siwe kebu i da 'asetaga. Yana vonanina 'ana nuanua mogitana 'awaie Iesu i na wafa me Diu matatabudi faifaidi.<sup>52</sup> ✱Kebu mogitana 'aise'avadi faifaidi siwe wata Yaubada natunavo faifaidi i vemiave'eve'e'elagi 'awalawa matatabuna 'waidie, Iesu yana wafa 'wainega i na va'augidi bega natunavo 'aila'a 'aitamogana.<sup>53</sup> Bega tutuyanina 'waineye me Diu to'edakumetavo i velamu 'aise'avadi i veveifufu-givagiva bani'odi i na munega Iesu i na luwewafai.<sup>54</sup> ✱Begaidi Iesu kebu i da yogomagemageta 'awalawa Iudia

✱ 11:42: Ion 12:30 ✱ 11:45: Ion 4:48 ✱ 11:52: Ion 10:16, 17:21; 1 Ion 2:2

✱ 11:54: Ion 7:1



nageneye, faifainanina givagivayega yana tovetutuyamavo taiadi i tauya i nagoi 'atamana Ifeleimi, sali'avu'avu lilivan-eye, bei taiadi i miamiani.

<sup>55</sup> \*Sai'afoga me Diu i na sakali Uvi'agalatagona† faifaina, begaidi tomotoga fuedi 'awalawa tulina tulina 'waidiega i laka Ielusalema, nagami i na 'ilekoa-dewa wata i na tafalolo yadi sauluva bani'odi, nuanuadi i na ve'atumai Yaubada mataneye, mulieta sakalinina i na 'idewai. <sup>56</sup> Tomotoganidi Iesu i lulualeniga, wata tutuyanina i va'auta vanuga 'eba velu'ui nageneye 'aitamogana 'aitamogana i velutolitoli i vo, 'Wa da nuani, 'ako Iesu i na mai, 'alo kebu?" <sup>57</sup> We'e Diu totafalolo Falisi wata tovelomu 'adi to'edakumetavo taiadi veimea fa'alina i yatoi i vo, 'Ai'edi aitoti Iesu i na 'iseni ava'aibe bei i miamiaga i na lu'ivona 'waimeye." Yadi veimeanina fa'alina i yatoiga fai nuanuadi Iesu i na 'ive'avini.

## 12

*Iesu 'ana iwaga Bedani 'waineye.*

<sup>1</sup> \*Aiata 6 i na 'a'ava, me Diu sakalinina i na 'idewai Uvi'agalatagona faifaina begaidi Iesu yana tovetutuyamavo taiadi i nagoi Bedani, Lasalo yana 'atamane, tomogonina Iesu i sivetovoia wafayega. <sup>2</sup> Bei 'ani'ani bwaikina i 'idewai Iesu 'ana ve'ililibu faifaina, bega Iesu wata Lasalo ediavo taiadi i miabui 'eba 'ani 'waineye i na 'ani we'e Malida 'ani'ani i 'a'anivelena. <sup>3</sup> Tutuyanina Iesu i 'ani'ani, Meli bunama magaina 'atumaiotogina wata 'ana tutula bwaikina ma botolina i mieni Iesu 'ageneye i iwaga'a'aveni, mulieta nava'aunega i tamavelavelaladi. Bunamanina 'ana waga Nadi, magaina vanuga matatabuna i susuli. <sup>4-5</sup> \*Tamu yana tovetutuyama 'ana wagava Iudasa Isakaliota, kumanina Iesu 'ana to'etogiluva i vo, Awale? Bunamanina tutulina bwaikina i ve'amubwadodoyeni. I lubwaineni ta da vekimwaneyeni, bani'odi lubulubu 300\* ta da veluagai, bega egavo i wewekowekomaga ta da 'ivaisedi." <sup>6</sup> De'e bani'odi Iudasa i vonaga, kebu mogitana wewekoma i da nuanidi faifaiddi i da vonavona, fai taunina tovainago wata yadi mani 'ana to'isave'avina bega taunina 'ana 'aivaita faifaina i vona. <sup>7</sup> \*We'e Iesu i vo, 'Asa'aiana, vavine kebu 'u na 'ivebunumayagi. I iwagikuga i lubwaineni, tomogoku i 'idewa-vagaseni 'aku ve'ufa faifaina me Diu yada sauluva

\* **11:55:** Sou 12:14-20 † **11:55:** Me Diu yadi 'eba tolinuata'i base-nadiotoga Yaubada tubudiavo i 'ita'ita'iedi Itifita 'wainega, anelose me Diu i uvi'agalatagonidi we'e me Itifita i nikedi. \* **12:1:** Ion 11:1,43 \* **12:4-5:**

Ion 18:2-3 \* **12:4-5:** 'Ana mogitana me Diu yadi mani Denali 300, malamala 'aitamogana 'ana folova tutulina. \* **12:7:** Ion 19:40

bani'odi. <sup>8</sup> Tutuya fuedi 'omi wekowekoma taiadi 'wa miami-ani, 'ami fata 'wa na 'i'ivaisedi, we'e yau kebu taiadi ta na miavagata.”

<sup>9</sup> \*Aila'a bwaikina me Diu vala i nogai Iesu i miamia Bedani, begaidi fuedi i maia nuanuadi i na 'iseni. Kebu Iesu 'aisenaga, wata nuanuadi Lasalo i na 'iseni, kumanina Iesu i sivetovoia wafayega. <sup>10-11</sup> Fai me Diu fuedi Lasalo i 'iseni ma yawaina i 'asetai wafayega i yawasa-vaitugana, begaidi me Diu to'edakumetavo yadi veimea i vevedumwe'ai'aiedi Iesu 'waineye i vevetumagana. Faifainanina tovelomu 'adi to'edakumetavo 'aise'avadi i veifufu nuanuadi Lasalo wata Iesu taiadi i na luvewafadi.

*Iesu i luku Ielusalema.*

<sup>12</sup> I 'atai, 'aila'a bwaikina i va'autaga Uvi'agalatagona 'ana sakali faifaina, vala i nogai Iesu i nunago Ielusalema. <sup>13</sup> \*Begaidi saisai lukudi i kinidabadi i miedi Iesu i na yogo'ede'edeni. Wata i vegolegole i vo,

Kaiwa, kaiwa,†

'Auvea 'ana wagavayega i mimai,

Wata ma yana nuakalikali i na vevesauluva 'atumaina 'waineye.

Taunina me Isileli yada Kini.”

<sup>14</sup> \*Iesu tamu 'aisaya doniki i 'ewaiga kwavuneye i laka bega i nago. Nika bei Yaubada yana Buki 'ana mogitana i souyeni basenadiotoga i kilumi Iesu faifaina i vo,

<sup>15</sup> 'Omi Ielusalema‡ 'ana tomotogavo, kebu 'wa na kolologa, 'Akonadi yami Kini i viwai 'waimie,

Doniki tubuvauvauna 'wainega.”

<sup>16</sup> Tutuyanina 'waineye yana tovetutuyamavo kebu i da 'asetai-atumaiaga Yaubada yana Buki 'ana mogitana i sousouyeni, siwe tutuyanina Iesu i laka abame yana 'ai'aiwabu 'waineye, nika bei i nuani vonanina i kilumiga Iesu faifaina vona mogitana, wata tomotoganidi ma yadi sosoana i subiai wata i awave-Kini 'waineye.

<sup>17-18</sup> Tomotoganidi matadie Iesu i gojeni Lasalo taumatayega i souyeniga ma yawaina, i nagoi Iesu yana folovanina toketokena i lu'ivoneyeni bega mali tomotoga taiadi i maia Iesu i yogo'ede'edeni. <sup>19</sup> We'e Falisi i 'isedi 'aila'a bwaikina i nunagoi Iesu 'waineye begaidi 'aise'avadi i veifufu i vo, 'Wa 'iseni, 'ida ta 'i'ivemweamweadaga. Tomotoga matatabudi 'akonadi i nunagoi Iesu 'waineye.”

*Me Guliki 'ifwaidi nuanuadi i na veifufu*

\* 12:9: Ion 11:43-44    \* 12:13: Same 118:25-26    † 12:13: 'Ana mogitana Osana, me Diu bonadiega.    \* 12:14: Sek 9:9    ‡ 12:15: 'Ana mogitana Saioni. Ielusalema tamu 'ana wagava.

*Iesu 'waineye.*

<sup>20</sup> 'Aila'anidi i nagoiga Ielusalema Yaubada i na subiai wata i na sakali, 'ifwaidi tomotoga me Guliki. <sup>21</sup> Tomotoganidi me Guliki i maia Filifi 'waineye, taunina tomogo Bedasaida 'awalawa Galili nageneye, i voneni i vo, 'Auvea, nuanuama Iesu taiadi 'a na veifufu.” <sup>22</sup> Bega Filifi i nago Anidulu i voneni, mulieta 'adi 'ailuga i nagoi i lu'ivona Iesu 'waineye. <sup>23</sup> ✧ Iesu yadi vona i nogai i vonedi i vo, 'Akonadi yaku tutuya i vevelilivana, Yaubada i na silakaiku bega tomotoga i na 'iseku yau a vetomotogaotoga i na ve'ililibuyeku wata i na subiaiku. <sup>24</sup> A vona mogitana 'waimie, 'ai'edi waifei bubuwakeye i na 'eno'eno kebu 'ana fata i na vefue. We'e ta na koyoviga tubutubuna i na 'anikudai, i na tabo, 'wainega 'ani'ani fuedi i na souyedi. Yau wata bani'odi a na wafa bega yaku 'aila'a i na vefue. <sup>25</sup> ✧ Wata side bani'odi. 'Ai'edi aitoi yana mia 'ana 'atumaina i na ve'o'oleni, kebu nuanuana yawaina i na tauyeni faifaiku, taunina i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku, mia 'atumaina wata miamia-vagaina i na veluagai. <sup>26</sup> ✧ Aitoi nuanuana i na vetofolova 'waikuye i lubwaineni i na vetutuyameku, bega ava'aibe bei a na nunago yaku tofolovanidi taiadi. 'Awaie yaku tofolovavo matatabudi Tamaku i na silakaidi tomotoga matadie i na subiadi.”

*Iesu i veifufu yana wafa faifaina.*

<sup>27</sup> ✧ Wata Iesu i vo, Tutuya de'e nuafouku i veveviga bwaikina, bega 'wa da nuani bani'odi a na voneyedi? Voke a na velu'ui a na vo, Tamaku, nuanuaku vita wata wafa 'waidiega 'u na 'ita'ita'ieku.” Siwe kebu i da lubwainekuga 'ai'edi bani'odi a na velu'ui, fai vitanina faifaina a mai. <sup>28</sup> A nuani side bani'odi a na velu'ui a na vo, Tamaku, nuanuaku yamu toketokena tomotoga 'u na vedi bega i na subisubiamu.” Iesu i vona'a'ava nika tamu bona i souyeni abamega i vo, 'Akonadi yaku toketokena a vedi wata 'awaie a na vedi.”

<sup>29</sup> 'Aila'a i tovoovoi lilivadie bonananina i nogai 'ifwaidi i vo, Tomuyoana i duduya,” we'e 'ifwaidi i vo, Tamu anelose i vona Iesu 'waineye.” <sup>30</sup> Nika Iesu i vo, Bonananina ta nogaiga, yau kebu 'aku 'aivaita faifaina, 'omi 'ami 'aivaita faifaina. <sup>31</sup> ✧ Tutuya de'e Yaubada i na velamu tomia fwayafwaya i na veveimeyedi vematavuloga faifaina wata Seitani ma enavo i na leodi, taunina tomia fwayafwaya 'ami toveimea sakoina. <sup>32</sup> ✧ We'e yau tomotoga i na silakaiku 'ai lagalagana 'waineye bega tomotoga matatabumi a na

vemwadami 'wa na maia 'waikuye.”<sup>33</sup> Iesu yana vona de'e i vonavona yana wafa faifaina ava'ai 'wainega tomotoga i na luwewafai.<sup>34</sup> \*'Aila'a yana vonanina i nogai i vo, Yada veimea basenadiotoga i kilumi i vo, Keliso kebu i na wafaga i na mia-vagata.” We'e awale 'u vo, Yau a vetomotogaotoga tomotoga i na silakaiku 'ai lagalagana 'waineye?” Aitoi kumanina i vetomotogaotoga?”<sup>35</sup> \*Bega Iesu i vonedi i vo, Tutuya 'ale'usana 'waineye taiadi ta na miamia a na vevemi, yau yami mageta. Yaku venina nuami i na magetadi bega 'ai'edi 'wa na vetumaganeku dudubala kebu i na mimai 'waimie. Egavo i vevedumwe'ai'aieku taunidi bani'odi i yabayaba dudubala 'waineye, kebu i da 'asetai ava'aibe bei i nunagoi.<sup>36</sup> \*Tutuyanina taiadi ta na miamia i lubwainemi 'wa na vetumagana 'waikuye, yau yami mageta, bega ma yami sosoana 'wa na miamia yaku 'aila'a nageneye.”

*Me Diu Iesu kebu i da vetumaganeni.*

Iesu i vona'a'ava, i tovoi 'aila'a i 'iawedi givayega i nago tulineye.<sup>37</sup> Avinodi Iesu 'eba nuavogana wata 'eba nua'ewa fuedi i 'i'idewadi tomotoga matadie, siwe kebu i da vetumagana 'waineye.<sup>38</sup> \*Nika ava'ai basenadiotoga Yaubada yana tolu'ivona 'ana wagava Aisea i kilumi 'ana mogitana i souyeni. Side bani'odi i kilumedi i vo,

'Auvea, valamu 'a lulu'ivoneyeni siwe kebu tamu aitoi i da ve'awamogitana.

Tomotoga 'Auvea yana toketokena i 'iseni, siwe kebu i da 'asetai wata i da vetumagana.”

<sup>39-40</sup> \*Fai tomotoganidi Yaubada yana vona i vevedumwe'ai'aiedi, begaidi kebu 'adi fata i na vetumagana. Bega wata Aisea i kilumi faifaiddi i vo,

Yaubada matadi i 'ive'uludi,

Bega kebu 'adi fata i na 'isa.

Nuadi i kiavevuyovuyodi,

Bega kebu 'adi fata i na 'asetai.

Begaidi kebu nuanuadi i na nuaviladi 'waikuye,

a na 'ive'atumaidi.”

<sup>41</sup> \*Vona de'e Aisea i kilumiga fai basenadiotoga Yaubada i veni, Iesu ma yana 'ai'aiwabu magemagetadi, wata i veni tomotoga fuedi i na vedumwe'ai'aieni.

<sup>42</sup> \*We'e tutuyanina 'waineye me Diu fuedi, yadi to'edakumetavo 'ifwaidi taiadi i vetumagana Iesu 'waineye, siwe kebu i da lu'ivona fai Falisi i kololoyedi yadi veimea fa'alina faifaina i vo, Egavo i na vetumagana Iesu 'waineye 'a na talabodedi kebu taiadi 'a na lukuluku 'eba miava'auta

\* 12:34: Dan 7:13-14    \* 12:35: Ion 8:12    \* 12:36: Efe 5:8    \* 12:38: Ais 53:1    \* 12:39-40: Ais 6:10; Fol 28:26-27    \* 12:41: Ais 6:1    \* 12:42: Ion 9:22

nageneye tafalolo faifaina.”<sup>43</sup> ✨Fai nuanuadi tomotoga i na awave'atumaiedi, we'e kebu nuanuadi 'adi awave'atumai Yaubada 'wainega, begaidi i ve'wadamo kebu i da lu'ivona.

*Iesu yana vona tomotoga i na veimeyeda.*

<sup>44</sup> Iesu bonana bwaikinega i veifufu tomotoga 'waidie i vo, Egavo i na vetumagana 'waikuye, siwe 'asa'aiana 'akonadi i vetumagana Yaubada 'aku tovetune 'waineye.<sup>45</sup> ✨Wata bani'odi, egavo i na 'iseku wata 'akonadi Yaubada 'aku tovetune i 'iseni.<sup>46</sup> ✨Yau a maiga fwayefwayeye bega egavo i na vetumagana 'waikuye nuadi a na kiavemagetadi kebu yadi nuanua i na dududubalidi.

<sup>47</sup> ✨Wata a maiga tomia fwayafwaya a na 'ita'ita'iemii, kebu a da mai bega yaku veimea 'wainega vematavuloga 'wa na veluagai. Begaidi egavo yaku vona i na nogaidi, siwe kebu i na vematayakeyakedi, yau kebu a na veimeyedi vematavuloga i na veluagai.<sup>48</sup> ✨Siwe tutuyanina tomotoga 'wa na vonayavuga Yaubada mataneye, yaku vonanidi tovedumwe'ai'ainidi i na veimeyedi bega vematavuloga i na veluagai. 'Adi vematavuloga lamuna, yaku vonanidi kebu nuanuadi, wata i vedumwe'ai'aieku.<sup>49</sup> Kebu yaku nuanuayega a da veveifufu, fai Tamada 'aku tovetune ava'ai i vonekuga, wata bani'odi a vonavona.<sup>50</sup> ✨A 'asetai 'ami fata mia 'atumaina wata miamia-vagina 'wa na veluagai Yaubada yana Vona 'waidiega, faifainanina ava'ai a vonevoneyediga, fai 'akonadi Tamada i voneku.”

## 13

*Iesu yana tovetutuyamavo 'agedi i lekoadi.*

<sup>1</sup> ✨Awa'awai bani'odi Uvi'agalatagona sakalina i na 'idewai, Iesu 'akonadi i 'asetai yana tutuya, fwayafwaya i na 'iaweni i na vilai i na nago Tamana 'waineye. Iesu yana 'aila'a fwayefwayeye i nuakalikaliEDI bwaikina, 'eba velamu 'wainega i nagoga wata yana wafa 'waineye.<sup>2</sup> ✨Lovananina 'waineye, Iesu wata yana tovetutuyamavo taiadi i 'ani'ani we'e Seitani\* 'akonadi tamu nuanua i yatoi Iudasa 'waineye Iesu i na 'etogiluvani. Iudasanina, Saimoni Isakaliota natuna.<sup>3</sup> ✨Iesu i 'asetai taunina i mai Yaubada 'wainega, wata i na vilai i na nago 'waineye, wata i 'asetai Yaubada nani matatabuna i 'anivelenedi 'waineye i na veveimeyedi.<sup>4</sup> Fai naninidi Iesu i 'asetadi, begaidi 'eba 'ani 'wainega i tovoi 'ana talauma tabwaneye i ta'ia, mulieta tamatama i

✨ 12:43: Ion 5:44 ✨ 12:45: Ion 14:9 ✨ 12:46: Ion 1:9, 8:12 ✨ 12:47: Ion 3:17 ✨ 12:48: Ibu 4:12 ✨ 12:50: Ion 8:28 ✨ 13:1: Ion 15:13 ✨ 13:2:

Ion 13:27 \* 13:2: Seitani yaiaina 'adi to'edakumeta. ✨ 13:3: Ion 16:28

'ewai tolobwaneye i yogoneni, 'wa da vo bani'odi tofolova-maimaiga. <sup>5</sup> Iesu 'aivoe i 'ewai, bei ufa i iwagi bega yana tovetutuyamavo 'aitamogana 'aitamogana 'agedi i lekoadi, mulieta i tamavelavelaladi. <sup>6</sup> Tutuyanina i le'wa Saimoni Fita 'waineye i talaboda i vo, 'Auvea, yau kebu nuanuaku 'ageku 'u na lekoadi, 'ana 'isa kebu 'atumainaga.” <sup>7</sup> Iesu i voneni i vo, Yaku folova a 'i'idewaiga 'ana nuanua 'u bavuyeni, we'e 'awaie 'u na 'asetai.” <sup>8</sup> Fita i ve'awafatafata i vo, Kebu tamu tutuya 'ageku 'u na lekoadi.” Iesu i vo, 'Ai'edi kebu a na lekoamuga, 'omu kebu wata 'aku 'auga.” <sup>9</sup> Wata Saimoni Fita i vo, Vetuma kebu 'age'avaku 'u na lekoadiga, nuanuaku 'unu'unuku wata nimaku taiadi 'u na lekoadi.” <sup>10</sup> Iesu i voneni i vo, Egavo i toaga, tomogodi matatabuna vunavunagidi, 'age'avadi i veyokega i na lekoadi. 'Omi matatabumi vunavunagimi, we'e 'aitamogana 'waimiega kebu.” <sup>11</sup> Fai Iesu 'akonadi i 'asetai 'ana to'etogiluva, taunina tosakona, begaidi i vo, 'Omi matatabumi vunavunagimi, we'e 'aitamogana 'waimiega kebu.”

<sup>12</sup> Iesu 'agedi i lekoa'a'avadi, wata 'ana talauma i silakaveni i vilai i nago 'ana 'ivie i miabui. I velutoliedi i vo, 'Asiauotoga de'e yaku folova a 'idewaiga 'waimie, 'ana nuanua 'wa 'asetai, 'alo kebu? <sup>13</sup> Tutuya fuedi 'wa goleku 'wa vo, 'Auvea,” wata 'wa vo, Tove,” we'e 'wa vonaga vona mogitana fai yau yami 'Auvea wata yami Tove. <sup>14</sup> ✧ Yau yami 'Auvea wata yami Tove, siwe 'asiauotoga 'agemi a lekoadi, 'omi wata bani'odi i lubwainemi ma yami nuaobu 'wa na vetofolova 'aitamogana 'aitamogana. <sup>15</sup> ✧ Yau 'eba 'isa a 'idewai 'waimie, bega bani'odi 'wa na vetutuyameku. <sup>16</sup> A vona mogitana 'waimie, tofolova kebu 'ana toveimea i da vebwaika-'iaweni, 'alo tomata'aulele 'ana tovetune i da vebwaika-'iaweni. Kebu i da lubwaineni tofolova i na vona 'ana toveimea 'waineye i na vo, Folovanina nuanuamu a na 'idewai, we'e nani-'avo'avovo a baila.” <sup>17</sup> ✧ Naninidi a voneyediga, 'akonadi 'wa 'asetadi. 'Ai'edi ma yami nuaobu 'wa na vetofolova, 'wa na sososoana.

*Iesu i vona-vagata tamu tomogo i na 'etogiluvini faifaina.*

<sup>18</sup> Kebu a da vonavona 'omi matatabumi faifaimi, fai a venua'ivinemi begaidi 'aitamogana 'aitamogana yami nuanua a 'asetadi. Siwe Yaubada yana Buki i vona tonovina 'ana mogitana 'akonadi i na souyeni i vo,

Tamu tomogo taiadi 'ama'ama 'aitamogana siwe i sivilai i vegavieku.”

<sup>19</sup> ✧ A vovona-vagasemi tamu tomogo i na 'etogiluveku, bega tutuyanina i na souyeni 'wa na vetumagana yau Yaubada 'ana Venua'ivina. <sup>20</sup> A vona mogitana 'waimie,

egavo ma yadi nuakalikali yaku tofolovavo i na 'ivaisedi, siwe 'asa'aiana yau i 'ivaiseku. Wata bani'odi egavo ma yadi nuakalikali i na 'ivaiseku siwe 'asa'aiana Yaubada 'aku tovetune i 'ivaiseni.”

<sup>21</sup> Iesu i veifufu'ava nika i nuavita bwaikina, yana tovetutuyamavo i vonedi i vo, A vona mogitana 'waimie, tamu iami i na 'etogiluveku a na wafa.” <sup>22</sup> Matatabudi i ve'isa'isa yadi nuanua i ve'ale'usa aitoi faifaina i vonavona. <sup>23-24</sup> ✧ Iadi tamu kumanina Iesu i nuakalikali bwaikina, lilivaotogin-eye i miabui begaidi Saimoni Fita i lu'wai i voneni i vo, 'U velutolieni Iesu, aitoi mogitana faifaina i vonavona.” <sup>25</sup> Bega i sivilai Iesu i ve'awayayai i vo, 'Auvea, aitoi kumanaga?” <sup>26</sup> Iesu i voneni i vo, Tomogonina a na ve'ililibuyeni, 'ani'ani a na 'ewai a na lu'utuvi a na veleveleni taunina tomogonina 'aku to'etogiluva.” Bega Iesu 'ani'ani tamu i 'ewai, i lu'utuvi Iudasa, Saimoni Isakaliota natuna, i veleni. <sup>27</sup> Iudasa i 'anielo i 'ania, mulieta Seitani i agei. Iesu i voneni i vo, 'Ai'edi ava'ai nuanuamu 'u na 'idewaiga, 'u souyematayo'oyemu 'u nago.” <sup>28</sup> Iesu i vonavona Iudasa 'waineye we'e yana tovetutuyamavo 'ifwaidi kebu i da 'asetai'ava'ai i vonevoneyeni. <sup>29</sup> ✧ Fai Iudasa yadi mani 'ana to'isave'avina, 'ifwaidi yadi nuanua i vo, Voke i vetunei i na nago 'ada'ada i na kimwane sakali faifaina,” we'e 'ifwaidi yadi nuanua i vo, Voke i vetunei, mani i na naweni egavo i vewekowekomaga i na 'ivaisedi.” <sup>30</sup> Iudasa 'ani'aninina i 'ani'a'avai, i souyematayo'oyeni i nago, siwe 'akonadi i lovani dudubala.

*Iesu veimea 'ivauna i yatoi.*

<sup>31</sup> Iudasa i tauya i nunago Iesu i vonedi i vo, Tutuya de'e yau a vetomotogaotoga yaku toketokena i na sivemageseni, bega tomotoga Yaubada i na subiai ava'ai i na souyeniga 'waikuye faifaina. <sup>32</sup> ✧ Fai tomotoga Yaubada i na subiai ava'ai i na souyeniga 'waikuye faifaina, begaidi yau Natuna i na silakaiku wata yana 'ai'aiwabu magemagetadi i na veleku bega tomotoga i na subiaku. Sai'afoga Yaubada i na 'idewamatayo'oi 'waikuye. <sup>33</sup> ✧ Ekwavo a nuakalikaliemi bwaikina, yau sai'afoga a na 'iawemi 'wa na lualeku. Siwe a na vonemi, basenadi bani'odi me Diu yada to'edakumetavo a vonedi a vo, A nunagoga bei kebu 'ami fata 'wa na waiga.” <sup>34</sup> ✧ Veimea 'ivauna a na velemini, side bani'odi. Ma emiavo 'wa na venuakalikali. Fai yau a nuakalikaliemi bwaikina, 'omi wata bani'odi ma emiavo 'wa na venuakalikali. <sup>35</sup> ✧ Ai'edi ma emiavo 'aitamogana 'aitamogana 'wa na venuakalikali, mali tomotoga i na 'isemi i na 'asetai 'omi yaku tovetutuyamavo.”

✧ 13:23-24: Ion 21:7,20 ✧ 13:29: Ion 12:6; Same 41:9 ✧ 13:32: Ion 17:5

✧ 13:33: Ion 7:33-34 ✧ 13:34: Ion 15:12; Efe 5:2 ✧ 13:35: 1 Ion 3:14; Ion 17:23

*Iesu i vona-vagata Fita i na ve'eweniga faifaina.*

<sup>36</sup> Fai Iesu i vonaga i vo, A na nago bei kebu 'ami fata 'wa na waia," begaidi Fita i velutoli 'waineye i vo, 'Auvea, ava'aibe 'u na nago?" Iesu Fita yana velutoli i tutuli i vo, Bei a na nagoga kebu 'amu fata tutuya de'e 'u na yogo'wailiku, we'e bola mulikuye 'u na wai." <sup>37</sup> Wata Fita i velutoli i vo, 'Auvea, awale kebu 'aku fata a na yogo'wailimuga tutuya de'e 'waineye? We'e yau a tauyeku a na wafa faifaimu." <sup>38</sup> Iesu i voneni i vo, Mogitanaotoga 'u tauyemu wafa 'waineye faifaiku? A vona mogitana 'waimuye, 'ako lovane bola kamukamu kebu i na kwagega, nagami tutuya 'aitonu 'u na bavusebeku."

## 14

*Iesu yada 'eda Tamada 'waineye.*

<sup>1</sup> \*Wata Iesu i vo, Kebu nuafoumi i na vevigaga, 'wa na vetumagana Yaubada 'waineye wata yau 'waikuye. <sup>2-3</sup> \*Awalawanina 'waineye Tamaku i miamiaga, vanuga fuedi i tovofovi. Yau a na nago yami 'eba mia a na 'i'idewadewadi. I na 'a'ava, a na vilaku a na mai a na vagavaimiga ta na nagoi bei yau a miamiaga 'waineye. 'Ai'edi 'eba mianidi kebu i da 'eno'enoviga, 'ako kebu a da vonemiga. <sup>4</sup> Bei a na nagoga 'akonadi 'wa 'asetai, wata 'ana 'eda 'wa 'asetai." <sup>5</sup> Tomasi i voneni i vo, 'Auvea, 'ima kebu 'a da 'asetai'aga ava'aibe 'u na nago, begaidi 'ana 'eda kebu tamu sai'afo 'a da 'asetai." <sup>6</sup> \*Iesu i voneni i vo, Yau 'asa'aiana kumaniku 'eda. Yau nani matatabuna tonovidi lamuna, wata 'asetai mogitana 'ana tove. Yau wata 'waikuyega mia 'ivauna wata 'atumaina i sousouyeni. Kebu tamu wata 'eda i da 'eno'eno bega 'wa na nagoi Tamaku 'waineye, 'eda 'aitamogana, ma yami vetumagana taunimi 'wa na tauyemi 'waikuye. <sup>7</sup> 'Ai'edi mogitana 'wa da 'asetakuga, wata bani'odi Tamaku 'wa da 'asetai. Siwe 'asiau wata 'awaie 'akonadi 'wa 'asetai'atumaia wata 'wa 'iseni."

*Iesu Yaubada 'ana labilabina.*

<sup>8</sup> Filifi i voneni i vo, 'Auvea, nuanuama Tamada 'u na vema, 'asa'aiana kumanina yama nuanua." <sup>9</sup> \*Wata Iesu yana tovetutuyamavo i vonedi i vo, 'Omi, yau taiadi tutuya manamanawena ta miamia, siwe Filifi 'wa da vo kebu 'u da 'asetaku. Egavo i 'iseku, 'asa'aiana 'akonadi wata Tamada i 'iseni. Awale 'u vo, Tamada 'u na vema?" <sup>10</sup> \*Filifi, 'u da vetumagana, yau Tamada 'ana labilabina, wata Tamadanina i labilabiniku. Yaku vona a veifufuyediga 'waimie kebu tau-niku yaku nuanuayega, Tamada 'aku labilabina yana folova i 'i'idewadi 'waikuyega. <sup>11</sup> \*Nuanuaku 'wa na vetumagana

\* 14:1: Ion 14:27    \* 14:2-3: Ion 17:24    \* 14:6: Efe 2:18; Ion 11:25    \* 14:9: Kolos 1:15    \* 14:10: Ion 12:49    \* 14:11: Ion 10:38



'waikuye, yau Tamada 'ana labilabina wata Tamadanina i labilabiniku. 'Ai'edi vitana 'waimie, 'eba nuavogana wata 'eba nua'ewa a 'idewadiga 'wa na nuanidi nika 'ami fata 'wa na vetumagana 'waikuye. <sup>12</sup> ✧A vona mogitana 'waimie egavo i na vetumaganaga 'waikuye folovanidi bani'odi yau a 'i'idewadiga 'adi fata i na 'idewadi. Siwe wata folova toke-tokeotogidi wata bwaikaotogidi 'adi fata i na 'i'idewadi fai yau a na nago Tamada 'waineye. <sup>13</sup> ✧Ava'ai naniga nuanuami, 'aku wagavayega Tamada 'waineye 'wa na vevelu'ui, mogitana a na 'i'idewadi. Fai yami nuanua a na 'i'idewadiga, mali tomotoga i na 'iseni Tamada i na subisubiai. <sup>14</sup> Naninidi nuanuami, 'ai'edi 'aku wagavayega 'wa na vevelu'ui 'waikuye, mogitana a na 'i'idewadi.”

*Iesu i vona'awaufaufa 'Anu'anunu 'Atumaina*

*i na vetunei.*

<sup>15</sup> ✧Wata Iesu i vo, 'Ai'edi mogitana 'wa na nuakalikalieku yaku veimea 'wa na vevematayakeyakedi. <sup>16</sup> ✧Tamada 'waineye a na velu'ui bega tamu 'ami To'aivaita i na velempi, taiadi 'wa na mia-vagata. <sup>17</sup> ✧To'aivaitanina, taunina 'Anu'anunu 'Atumaina, Yaubada yana nuanua tonovidi i na veve 'waimie. Tomotoganidi fwayafwaya 'ana nuanua 'waidie i vebwaikaga, kebu 'adi fata taunidi i na tauyedi 'Anu'anunu 'Atumaina 'waineye fai kebu i da 'isa'inanai wata kebu i da 'asetai. We'e 'omi 'akonadi 'wa 'asetai fai taiadi 'wa miamiani wata 'awaie i na agemi.

<sup>18</sup> A na 'iawemi siwe kebu 'wa na vo, 'Ima fovafovama, kebu tamu 'ama to'aivaitaga,” fai a na vilaku a na mai 'waimie. <sup>19</sup> Sai'afoga tomotoganidi fwayafwaya 'ana nuanua 'waidie bwaikina kebu wata i na 'ise'isekuga, we'e 'omi 'wa na 'ise'iseku. Yau a mia-vagata, begaidi 'omi wata 'wa na miamia. <sup>20</sup> ✧Tutuyanina 'Anu'anunu 'Atumaina i na mai, 'wa na 'asetai yau Tamaku 'ana labilabina, wata 'wa na 'asetai yau a labilabinimi wata bani'odi 'omi 'wa labilabiniku.

<sup>21</sup> ✧Egavo yaku veimea i 'asetadi wata i veve-matayakeyakedi, taunidi 'aku tonuakalikali. Fai i nuakalikalieku, begaidi Tamaku i na nuakalikaliedi. Yau wata a na nuakalikaliedi bega tauniku faifaiku a na lulu'ivona 'waidie.” <sup>22</sup> Tamu Iudasa, kebu Iudasa Isakaliota, i velutoli Iesu 'waineye i vo, 'Auvea, awale taunimu faifaimu 'u na lu'ivona 'waimeye, we'e tomotoganidi fwayafwaya 'ana nuanua bwaikina 'waidie, kebu 'u na lu'ivonaga?” <sup>23</sup> ✧Iesu Iudasa yana vona i tutuli

✧ **14:12:** Mak 16:19-20 ✧ **14:13:** Mad 7:7; Ion 16:23-24, 15:7 ✧ **14:15:** 1 Ion 5:3 ✧ **14:16:** Ion 14:26, 15:26 ✧ **14:17:** Ion 16:13 ✧ **14:20:** Ion 17:21 ✧ **14:21:** Ion 15:10 ✧ **14:23:** Ve 3:20

i vo, Egavo i nuakalikalieku mogitana, yaku vona i na vevematayakeyakedi. Tomotoganidi Tamaku i na nuakalikaliedi bega yau wata Tamaku taiadi 'a na mai 'a na lauvila 'waidie. <sup>24</sup> Egavo kebu i da nuakalikaliekuga, taunidi yaku vona kebu i na vematayakeyakedi. Vonanidi a veifufuyedi 'wa nogaidiga kebu tauniku yaku nuanuayega, Tamada 'aku tovetune 'wainega i maia.

<sup>25</sup> Bola taiadi ta miamiagana, vonanidi a vonevoneyedi 'waimie. <sup>26</sup> ☆ Siwe tutuyanina Tamada 'Anu'anunu 'Atumaina 'aku wagavayega i na vetunei 'waimie, nani matatabuna i na vemi. Fai taunina 'ami To'aivaita, wata 'ami 'Eba Tolinuata'i bega naninidi a voneyediga matatabuna kebu nuami i na fani.

*Iesu nuanua bikana mia 'atumaina taiadi i veleveleda.*

<sup>27</sup> ☆ A na 'iawemi siwe a na 'ivaisemi yami nuanua i na bikadi. Tutuya fuedi yaku nuanua bikana, nuanuananina bikana a vevelele mi yau tauniku 'waikuyega bega nuami kebu i na vita, kebu 'wa na kololo, wata kebu nuafoumi i na veviga. Mali tomotoga 'adi fata i na 'ivaisemi bega nuami sai'afo i na bikadi, siwe kebu tutuya manamanawenaga i na 'a'ava, we'e nuanua bikana mia 'atumaina taiadi a vevelelemiga i na 'eno-vagata 'waimie. <sup>28</sup> ☆ Akonadi 'wa nogai a vonemi a vo, Yau sai'afoga a na 'iawemi, siwe wata a na vilaku a na mai 'waimie." 'Ai'edi mogitana 'wa da nuakalikalieku, 'ako kebu 'wa da nuavitaga yaku tauya faifaina, 'wa da sososoana fai yau a na nago Tamada 'waineye, taunina i vebwaika-'iaweku. <sup>29</sup> Bola taiadi ta miamiagana a vona-vagasemi yaku tauya faifaina, bega tutuyanina i na souyeni 'wa na 'iseni nika 'wa na vetumagana 'waikuye. <sup>30</sup> ☆ Kebu a na veveifufu manamanawena 'waimie fai sai'afoga Seitani i na le'wa. Seitantinina ma yana veimea fwayefwayeye nuanuana i na niteku siwe yana toketokena 'waikuye nani-'avo'avovo wata kebu tamu sai'afo i na vevitaku sakona faifaina. <sup>31</sup> I lubwaineni tomia fwayafwaya i da 'asetatumaia Tamada a nuakalikalieni wata a tauyeku 'waineye bega ava'ai nuanuana i na vonekuga a na 'idewai." Iesu i vona'a'avana, yana tovetutuyamavo i vonedi i vo, 'Wa tovoi ta na nagoi."

## 15

*Iesu taunina Welavi 'Atumaina.*

<sup>1</sup> Wata Iesu i vona yana tovetutuyamavo 'waidie i vo, Yau Welavi 'Atumaiku, Tamaku tobakula. <sup>2</sup> 'Ai'edi didiku 'ifwaidi kebu i na vuavuaaga-'atumai, Tamaku i na kuyailidi, we'e didiku 'ifwaidi 'akonadi ma vuagidi, ililidi 'ifwaidi i na

☆ 14:26: Ion 15:26, 16:7 ☆ 14:27: Ion 16:33; Fil 4:7 ☆ 14:28: Luk 24:31-32

☆ 14:30: Ion 12:31

kinikadikadidi bega i na ve'atumai i na vuagadewa. <sup>3</sup> 'Omi bani'odi didiku 'atumaide, yaku vona 'wa vetumaganedi, vonanidi i 'ive'atumaimi. <sup>4</sup> Yau taiadi ta na miave'itubama bega yau 'ami labilabina. 'Ai'edi didina ta na kuyai, kebu 'ana fata i na vuaga, we'e 'ai'edi welavinina 'waineye i na 'eno'enoga, 'ana fata i na vuaga. 'Omi wata bani'odi, 'ai'edi 'wa na bailekuga, kebu 'ami fata yaku nuanua 'wa na 'idewadi.

<sup>5</sup> \*Yau Welavi, 'omi didiku. Egavo 'waikuye i na mai taiadi 'a na miave'itubamaga, yau 'adi labilabina bega 'adi fata yadi folova faifaiku 'atumaide wata yadi sauluva tonovidi 'wa da vo i da vuaga-'atumai. 'Ai'edi yau kebu taiadiga, 'aise'avami kebu 'ami fata tamu nani 'atumaina 'wa na 'idewai. <sup>6</sup> Egavo i baileku kebu taiadi 'a na miave'itubamaga, bani'odi didi sakoidi, tobakula i na kuyailidi wata i na valo'udi, mulieta i na bwavu i na tunudi i na 'alaidi. <sup>7</sup> \*'Ai'edi yau taiadi ta na miave'itubamaga, wata yaku vona nuamie i na 'eno'enoviga, ava'ai nuanuami faifaide 'wa na vevelu'ui 'ana fata 'wa na veluagadi. <sup>8</sup> \*'Ai'edi yami folova faifaiku 'atumaide wata yami sauluva tonovidi, 'omi yaku tovetutuyama mogitana bega tomotoga i na 'isemi Tamaku yana toketokena i na subiai.

### *Nuakalikali mogitana.*

<sup>9</sup> Tamaku i nuakalikalienu bwaikina, yau wata bani'odi a nuakalikaliemi, nuanuaku 'wa na miamiani yaku nuakalikalinina nageneye. <sup>10</sup> \*Tamaku yana nuakalikali nageneye a miamia fai yana veimea a vevematayakeyakedi, 'omi wata bani'odi, 'ai'edi yaku veimea 'wa na vevematayakeyakediga yaku nuakalikali nageneye 'wa na miamiani.

<sup>11</sup> \*'Akonadi a vona'a'avemi yaku veimea 'wa na vevematayakeyakedi, bega yaku sosoanayega 'wa na sososoana, sosoananina sosoana mogitana. <sup>12</sup> \*De'e yaku veimea bwaikina a vevelemi, yau a nuakalikaliemi bwaikina, nuanuaku 'omi wata bani'odi ma emiavo 'wa na venuakalikali mogitana. <sup>13</sup> \*Nuakalikali side bani'odi, 'ai'edi tamu tomogo yawaina i na tauyeni wafa 'waineye enavo 'adi 'ita'ita'i faifaina, taunina mogitana nuakalikali. <sup>14</sup> 'Ai'edi yaku veimea 'wa na vevematayakeyakediga 'omi ekwavo mogitana. <sup>15</sup> Basenadi a vo, 'Omi yaku tofolovavo," tutuya de'e a na vo, 'Omi ekwavo." Tofolova yana 'auvea yana nuanua matatabuna kebu i da 'asetadi, we'e 'omi, nani matatabuna Tamaku i vonekuga a lu'ivoneyedi 'waimie, begaidi a vo, 'Omi ekwavo." <sup>16</sup> \*'Wa na nuani, 'omi kebu 'wa da vo, Yada 'auvea ta na venua'ivineni," mogitana yau a venua'ivinemi

\* 15:5: Ion 15:16    \* 15:7: Ion 14:13    \* 15:8: Mad 5:16    \* 15:10: 1 Ion 2:5

\* 15:11: Ion 17:13    \* 15:12: Ion 13:34    \* 15:13: 1 Ion 3:16    \* 15:16: Ion 15:5, 16:23

wata a vetunemi 'wa na folova 'atumaina faifaiku, wata yami sauluva i na tonova, vuaganidi i na 'eno-vagata. 'Ai'edi ma vuagimi, ava'ai nuanuami 'aku wagavayega 'wa na velu'ui Tamada 'waineye i na velemini. <sup>17</sup> 'Akonadi yaku veimeanina a vonemi a vo, Nuanuaku ma emiavo 'wa na venuakalikali.

*Tomotoga Iesu yana tovetutuyamavo i na vedumwe'ai'aiedi.*

<sup>18</sup> \*'Ai'edi Yaubada 'ana tobaila i na vedumwe'ai'aiemi, 'wa na nuani yau wata nagami i vedumwe'ai'aieku. <sup>19</sup> \*'Ai'edi fwayafwaya 'ana nuanua 'waimie bwaikina tobailanidi bani'odi, 'ako i da nuakalikiemi wata i da veianemi. We'e 'omi tulimi fai tomia fwayafwaya 'waidiega a venua'ivinemi, bega 'omi kebu ediavo wata i vevedumwe'ai'aiemi. <sup>20</sup> \*Siwe yaku vona 'wa na nuani a vo, Tofolova kebu 'ana toveimea i da vebwaika-'iaweni." Yau 'ami Toveimea siwe veviga a veveluagadi tomotoga 'waidiega, wata bani'odi 'omi yaku tofolovavo, mogitana vita 'wa na veluagadi 'aku tovedumwe'ai'ai 'waidiega. Yaku vona kebu i da vematayakeyakediga, wata bani'odi yami vona i na baila. <sup>21</sup> \*Vitanidi i na 'idewadiga 'waimie, fai 'omi yaku tomotoga, wata fai Yaubada 'aku tovetune kebu i da 'asetauga. <sup>22</sup> 'Ai'edi basenadi kebu a da maiga, wata 'ako kebu a da vonediga, Yaubada tosakonanidi kebu i da 'uvanidiga yadi sauluva sakoidi faifaidi. 'Akonadi a mai yadi sakona a lu'ivoneyedi siwe kebu i da nuaviladi, begaidi kebu 'adi fata i na dega vematavuloga 'wainega. <sup>23</sup> \*Egavo i vedumwe'ai'aieku, siwe 'asa'aiana wata Tamaku i vedumwe'ai'aieni. <sup>24</sup> Wata basenadi 'ai'edi kebu 'eba nuavogana wata 'eba nua'ewa a da 'idewadiga matadie, 'ako Yaubada kebu i da 'uvanidiga yadi sauluva sakoidi faifaidi, siwe 'akonadi a mai folova toke-tokedi, kebu tamu aitoi 'ana fata bani'odi i na 'idewadiga, a 'idewadi matadie, siwe Tamaku taiadi i vedumwe'ai'aiema. <sup>25</sup> \*I vedumwe'ai'aiema i lubwaineni, fai basenadiotoga i kilumi Yaubada yana Buki 'waineye faifaiku i vo,

Yadi vedumwe'ai'ai 'waikuye kebu tamu lamunaga."

Tutuya de'e 'akonadi vonanina 'ana mogitana i souyeni.

<sup>26</sup> \*'Awaie 'Anu'anunu 'Atumaina a na vetunei 'waimie, Tamada 'wainega. Taunina 'ami To'aivaita, Tamada yana nu-anua tonovidi i na veve 'waimie wata faifaiku i na lulu'ivona. <sup>27</sup> \*Wata 'omi faifaiku 'wa na lulu'ivona tomotoga 'waidie, fai 'eba velamuyega i maiga 'asiau yau taiadi ta miamiani nani matatabuna a veve 'waimie."

\* 15:18: 1 Ion 3:13    \* 15:19: Ion 17:14    \* 15:20: Ion 13:16    \* 15:21: Ion 16:2-3    \* 15:23: Luk 10:16    \* 15:25: Same 69:4    \* 15:26: Ion 14:26  
\* 15:27: Fol 5:30-32

## 16

*Vita 'waidie ta na vetoketoke.*

<sup>1</sup> Wata Iesu i vona yana tovetutuyamavo 'waidie i vo, Naninidi 'akonadi a voneyediga 'waimie bega tutuyanina vita i na souyeni 'waimie kebu 'wa na mwea, nuanuaku 'wa na vetoketoke. <sup>2</sup> \*Yada to'edakumetavo me Diu i na talabodemi kebu 'ami fata 'wa na lukuluku 'eba miava'auta 'waidie tafalolo faifaina. Wata 'awaie tomotoga i na luve-wafami, yadi nuanua i na vo 'ako, Yaubada yana nuanua.” <sup>3</sup> \*I na ve'idi'idiemiga wata i na luvewafamiga fai Tamada i bavuyeni wata yau taiadi. <sup>4</sup> Naninidi faifaidi nagami a matakiami bega tutuyanina i na souyedi 'waimie nika 'wa na nuani yaku vona.

*'Anu'anunu 'Atumaina yana folova.*

Vitanidi 'awaie 'wa na veluagadiga faifaidi nagami kebu a da vonemi fai yau taiadi ta miamia. <sup>5</sup> Fai sai'afoga a na tauya a na nago 'aku tovetune 'waineye bega naninidi a lulu'ivona-vagasedi 'waimie. Siwe kebu tamu aitoi 'waimiega i da velutoli 'waikuye i da vo, Ava'aibe bei 'u na nago?” <sup>6</sup> Fai a vo, A na nago,” 'wa nuavita bwaikina. <sup>7</sup> \*Siwe a vona mogitana 'waimie 'ai'edi taiadi ta na miamia, 'atumaina siwe kebu mogitana 'atumaiotogina, fai 'ami To'aivaita kebu i na maiga, we'e a na nagoga 'atumaiotogina 'waimie fai To'aivaitanina a na vetunei i na mai. <sup>8</sup> Tomia fwayafwaya i vekali kebu i da nuanuadewa. Siwe tutuyanina 'Anu'anunu 'Atumaina i na mai fwayefwayeye i na vedewedewedi bega i na 'asetai matatabudi i sakona, wata sauluva tonovina i na vedi, wata i na vedi bega i na 'asetai 'awaie matatabudi i na vonayavuga Yaubada mataneyeye, i na veimeyedi. <sup>9</sup> Tomotoga i sakosakonaga fai kebu i da vetumagana 'waikuye, i na vedi. <sup>10</sup> Wata i na vedi, fai 'akonadi a nunago Tamada 'waineye kebu wata 'wa na 'ise'isekuga, 'eba 'isa yaku sauluva tonovidi. <sup>11</sup> \*Akonadi Yaubada i veimea tosakona yadi toveimea Seitani vematavuloga i na veluagai, begaidi 'Anu'anunu 'Atumaina i na vedi tosakona matatabudi i na vonayavuga Yaubada mataneyeye.

<sup>12</sup> Fai 'wa nuavita, begaidi 'asiau kebu 'aku fata nani matatabuna a na lu'ivoneyedi 'waimie. <sup>13</sup> \*Siwe tutuyanina 'Anu'anunu 'Atumaina i na mai nuanua mogitana Yaubada 'wainega matatabuna i na vemi, 'Anu'anununina nani matatabuna tonovidi lamuna. Kebu 'ana fata taunina yana nuanuayega i na veifufu 'waimie, siwe ava'ai i na nogai Yaubada 'wainega, i na lu'ivona 'waimie, wata naninidi 'awaie i na souyediga faifaidi i na vona-vagasemi. <sup>14</sup> 'Awaie

ava'ai nuanuaku a na vonemiga, 'Anu'anunu 'Atumaina i na lu'ivona 'waimie, bega 'wainega 'aku subia a na veluagai. <sup>15</sup> Tamaku yana 'ai'aiwabu matatabuna i 'anivelenedi 'waikuye begaidi 'akonadi a vonemi a vo, 'Awaie ava'ai a na voneyeniga, 'Anu'anunu 'Atumaina i na lu'ivona 'waimie."

*Nuavita wata sosoana.*

<sup>16</sup> Sai'afoga a na 'iawemi 'wa na 'isa'avaku, siwe kebu tutuya manamanawenaga wata 'wa na 'iseku." <sup>17</sup> Tovetutuyamavo 'ifwaidi 'aise'avadi i velutoli i vo, Yana vona 'ana nuanua bani'odi? I vonaga i vo, Sai'afoga a na 'iawemi 'wa na 'isa'avaku, siwe kebu tutuya manamanawenaga wata 'wa na 'iseku," wata i vo, A na nago Tamada 'waineye." <sup>18</sup> Wata i vo, Kebu tutuya manamanawenaga," 'ana nuanua ava'ai? Aigodi, kebu ta da 'asetai ava'ai i vonevoneyeni." <sup>19</sup> Iesu 'akonadi i 'asetai yadi nuanua, nuanuadi i na velutoli begaidi i vonedi i vo, Voke nuanuami 'wa na 'asetai yaku vona 'ana nuanua fai a vo, Sai'afoga a na 'iawemi 'wa na 'isa'avaku, siwe kebu tutuya manamanawenaga wata 'wa na 'iseku." <sup>20</sup> A vona mogitana 'waimie, tutuyanina a na 'iawemi, 'aku mogai 'wa na 'we'wela, we'e Yaubada 'ana tovedumwe'ai'ai i na sosoana. Mogitana 'wa na nuavita siwe tutuyanina 'wa na 'iseku igodi 'wa nunuavitaga 'wa na sosoana. <sup>21</sup> Tutuyanina vavine i na vebutudi 'eba nuavita fai veviga bwaikina i vevebaedi, siwe tutuyanina kwamana i na tubuga 'eba sosoana bwaikina 'waidie, veviganina nua'ubudie i na yatoi fai natudi i na 'ise'iseni. <sup>22</sup> \*'Omi wata bani'odi, 'asiau 'wa nuavita siwe tutuyanina a na vilaku a na mai, 'wa na 'iseku 'wa na sosoana bwaikina. Yami sosoananina kebu tamu aitoi 'ana fata i na talabodeni.

<sup>23</sup> \*'A vona mogitana 'waimie, 'awaie kebu wata tau-ntogikulu 'waikuye 'wa na vevelu'ui, ava'ai nuanuami tonovina 'wa na vevelu'ui 'aku wagavayega Tamaku 'waineye i na vevelemi. <sup>24</sup> \*'Basenadi i maiga 'asiau, kebu 'aku wagavayega 'wa da vevelu'ui Tamaku 'waineye, siwe tutuya de'e i velamu bega i na nagoga 'wa na vevelu'ui 'aku wagavayega bega ava'ai nuanuami 'wa na veveluagadi, wata 'wa na sososoana mogitana."

*Iesu i vetoketoke tomotoga matatabudi 'waidie.*

<sup>25</sup> Wata Iesu i veifufu yana tovetutuyamavo 'waidie i vo, Naninidi a veifufuyediga, vona-awatabaiega, siwe 'awaie kebu wata vona-awatabaiega a na veveifufu, we'e a na vo Tamaku faifaina a na veifufu 'waimie 'ana lu'eda'aiagalidi. <sup>26</sup> Tutuyanina 'waineye, ava'ai nuanuami tonovina 'wa na

vevelu'ui 'aku wagavayega Tamada 'waineye i na vevelelele, we'e ava'ai yami nuanua kebu wata a na vevelu'ui faifaidi, 'omi taunimi 'wa na vevelu'ui tonovina Tamada 'waineye. <sup>27</sup> \*Fai 'wa nuakalikalieku wata 'wa vetumagana yau a mai Yaubada 'wainega, begaidi i nuakalikaliemi. Fai i nuakalikaliemiga, begaidi ava'ai nuanuami 'ami fata 'wa na vevelu'ui tonovina 'waineye. <sup>28</sup> Yau a mai fwayefwayeye Tamada 'wainega, 'akonadi a na 'iawemi a na vilaku a na nago Tamadanina 'waineye.”

<sup>29</sup> Iesu yana tovetutuyamavo yana vona i nogai i vo, We'e vonanina 'ana nogaya kebu vona-awatabaiga, 'u vovonaotoga. <sup>30</sup> 'Akonadi 'a 'asetamu, nani matatabuna 'u 'asetadi, kebu tamu wata aitoi 'ana fata i na awave'ede'edemu. Yamu 'asetanina 'a 'iseni 'a vetumagana 'waimuye 'a 'asetai 'omu 'u mai Yaubada 'wainega.” <sup>31</sup> Iesu i vonedi i vo, 'Alo be'ama 'wa vetumagana. <sup>32</sup> \*Siwe 'awaie wata 'akonadi i sousouyeni, matatabumi 'wa na vemiave'eve'e'elagi yami vanuga 'aitamogana 'aitamogana 'waidie, we'e yau 'wa na degaloveku. 'Wa na degaloveku siwe kebu mogitana 'aisekuga fai Tamada taiadi 'a miamia. <sup>33</sup> \*Naninidi a voneyediga bega nuanua bikana mia 'atumaina taiadi 'wa na veveluagai yau 'ami labilabina 'waikuyega. Mogitana veviga 'wa na veveluagadi Yaubada 'ana tovedumwe'ai'ai 'waidiega siwe kebu 'wa na kolologa, 'wa na vevenuafoufa'ala. 'Akonadi a vetoketoke tomotoga matatabuna 'waidie.”

## 17

### *Iesu i velu'ui taunina faifaina.*

<sup>1</sup> Iesu i vona'a'ava, mulieta i 'isalaka abame Tamana 'waineye i velu'ui i vo, Tamaku, 'akonadi yaku tutuya i souyeni, yau Natumu nuanuaku 'u na silakaiku tomotoga matadie, bega 'waikuyega fuedi i na subiamu. <sup>2</sup> \*'Akonadi 'u tauyeku tomotoga matatabuna a veveimeyedi bega egavo 'u velekuaga mia 'atumaina wata miamia-vagaina a na veledi. <sup>3</sup> \*Mia-vagatanina 'ana 'eda'eda side bani'odi. Egavo i na 'aseta-'atumaimu 'omu Yaubada mogitana 'aiseotogimu, wata i na 'aseta-'atumaiku yau Iesu Keliso, 'amu Venua'ivina, kumaniku 'u vetuneku, bega mia-vagatanina i na veluagai. <sup>4</sup> \*Nani matatabuna 'u voneku a na 'idewadiga, 'akonadi a sigoidi, wata yaku folovanidi 'waidiega tomotoga fuedi i subisubiamu. <sup>5</sup> \*Basenadiotoga fwayafwaya bola kebu 'u da 'idewaiga, 'waimuye taiadi ta miamia

☆ 16:27: Ion 14:21,23 ☆ 16:32: Mad 26:31,56; Ion 8:29 ☆ 16:33: Ion 14:27; Ion 5:4 ☆ 17:2: Ion 6:39-40 ☆ 17:3: 1 Ion 5:20 ☆ 17:4: Ion 4:34 ☆ 17:5: Ion 17:24

ma yada 'ai'aiwabu magemagetadi. Nuanuaku matamuye 'ai'aiwabunidi 'waidiega 'asiau 'u na 'ive'ai'aiwabuku.

*Iesu i velu'ui yana tovetutuyamavo faifaidi.*

<sup>6</sup> Basenadi tomia fwayafwaya 'waidiega yamu tomotoga 'u venua'ivinedi. Tomotoganidi 'u velekuga 'waidie a sivemage-semu, bega yamu vona i vematayakeyakedi. <sup>7</sup> 'Akonadi i 'asetai nani matatabuna 'u velekuga, 'omu 'waimuyega i maia. <sup>8</sup> \*Vonanidi 'u velekuga a lu'ivoneyedi 'waidie ma yadi sosoana i nogai. Bega i 'aseta-'atumaia yau a mai 'omu 'waimuyega, wata i vetumagana 'omu 'u vetuneku.

<sup>9</sup> \*Tomotoganidi 'u velekuga faifaidi a vevelu'ui 'waimuye. Kebu tomia fwayafwaya matatabudi faifaidi a da vevelu'ui, siwe tomotoganidi 'u velekuga faifaidi a vevelu'ui fai 'omu yamu tomotoga. <sup>10</sup> Tomotoganidi wata nani matatabuna a veveimeyediga 'omu yamu nani wata yamu tomotoga, wata nani matatabuna 'waimuye tomotoganidi taiadi, 'u 'anivelenedi 'waikuye bega 'waidiega ve'ililibu a veluagai. <sup>11</sup> \*'Akonadi a na wai 'waimuye we'e yaku tovetutuyamavo a na 'iawedi i na miamia de'e bei fwayefwayeye. Tamaku Magemagetamu, nuanuaku 'amu wagava toketokenega 'aku tovetumaganavo 'u na 'i'isave'avinidi, toketokenanina basenadi 'u velekuga 'wainega. Nuanuaku 'u na 'i'isave'avinidi bega yadi nuanua 'aitamogana bani'odi 'omu wata yau yada nuanua 'aitamogana. <sup>12</sup> \*Yau de'e bola taiadi 'a miamiani, 'amu wagava toketokenega a 'i'isave'avinidi, toketokenanina basenadi 'u velekuga 'wainega. 'Waidiega kebu tamu aitoi a da baileni a 'i'isave'avinidi, we'e mogitana tamu i be'u, i lubwaineni 'ai-'ala'alase i na nago, fai basenadiotoga tamu vona tomogonina faifaina i kilumi yamu Buki nageneye, nika 'ana mogitana 'akonadi i souyeni.

<sup>13</sup> \*Tutuya de'e a na wai 'waimuye, we'e yaku tovetutuyamavo taiadi 'a miamiani, nani fuedi a veifufuyedi 'waidie bega i na sososoana bwaikina. <sup>14</sup> \*Yamu vona a lu'ivona 'waidie, i nogai begaidi tomotoganidi fwayafwaya 'ana nuanua 'waidie bwaikina, i vevedumwe'ai'aiedi. I vevedumwe'ai'aiediga fai de'e tovetutuyamavo tomotoganidi yadi sauluva sakoidi i bailedi. Yau wata tovedumwe'ai'ainidi kebu yadi 'aila'a 'waineye a da miamia. <sup>15</sup> \*A vevelu'ui, kebu a da vo, 'U na vagavaidi fwayafwaya de'e 'wainega," we'e mogitana a vevelu'ui bega 'u na 'i'ita'ita'iedi Seitani yana nuanua sakoidi 'waidiega. <sup>16</sup> Tomotoganidi fwayafwaya

\* 17:8: Ion 16:30    \* 17:9: Ion 6:37    \* 17:11: Ion 17:21    \* 17:12: Fol 1:18

\* 17:13: Ion 15:11    \* 17:14: Ion 15:19    \* 17:15: 2 Tes 3:3



'ana nuanua 'waidie bwaikina, yau kebu 'adi 'aila'a nageneye a da miamia, wata bani'odi yaku tovetutuyamavo. <sup>17</sup> Wata a velu'ui 'waimuye, yamu vona 'atumaidi wata tonovidi 'waidiega yaku tovetutuyamavo 'u na 'ive'atumaidi bega yadi sauluva tonovidi i na miamiani yamu 'aila'a nageneye. <sup>18</sup> \*Basenadi 'u vetuneku a mai tomotoganidi fwayafwaya 'ana nuanua 'waidie bwaikina 'awasasadie, yau wata bani'odi yaku tovetutuyamavo a vevetunedi tomotoganidi 'awasasadie. <sup>19</sup> Yaku tovetutuyamavonidi faifaiddi a tauyeku 'waimuye bega tomotoganidi wata taunidi i na tauyedi mogitana 'waimuye, yamu 'aila'a.

*Iesu i velu'ui 'ana tovetumaganavo faifaiddi.*

<sup>20</sup> Kebu yaku tovetutuyamavo 'aise'avadi faifaiddi a da vevelu'ui, siwe yadi veifufu wata yadi lau'age 'waidiega egavo i na vetumagana 'waikuye, faifaiddi a vevelu'ui. <sup>21</sup> \*A vevelu'ui nuanuaku matatabudi yadi nuanua 'aitamogana. Tamaku, 'omu 'u labilabiniku wata yau 'amu labilabina, wata bani'odi nuanuaku tomotoganidi taiadi ta na miave'itubama bega yadi nuanua 'aitamogana, mali tomotoga i na 'isedi i na vetumagana yau 'u vetuneku. <sup>22</sup> \*Basenadi yamu toke-tokena magemagetana 'u veleku, yau wata bani'odi toketokenanina a veledi bega yadi nuanua 'aitamogana bani'odi 'omu wata yau 'aitamogana. <sup>23</sup> Yau 'adi labilabina, 'omu 'u labilabiniku, bega mogitana yadi nuanua i na luvetubama nika 'aitamogana. Mali tomotoga i na 'isedi i na 'asetai 'u nuakalikaliedi bwaikina bani'odi yau 'u nuakalikalieku, wata i na 'asetai 'u vetuneku a mai.

<sup>24</sup> \*Tamaku, nuanuaku tomotoganidi 'u veleku a va'aibe bei a na miamiaga wata taunidi taiadi, bega yaku 'ai'aiwabu magemagetadi i na 'isedi. Fai 'u nuakalikalieku bwaikina, bola fwayafwaya kebu 'u da 'idewaiga 'ai'aiwabunidi 'u veleku. <sup>25</sup> Tamaku, yamu veimea tonovidi. Tomotoganidi fwayafwaya 'ana nuanua bwaikina 'waidie i bavuyemu, we'e yau a 'asetamu wata yaku tomotoga i 'asetai 'omu 'u vetuneku. <sup>26</sup> \*Amu 'asetai faifaiddi a lu'ivona 'waidie, wata a na lulu'ivona 'waidie bega 'u nuakalikaliekuga wata bani'odi nuakalikalinina i na 'eno'eno nagedie, we'e yau a na labilabinidi.”

## 18

*Iesu 'ana 'ive'avina.*

<sup>1</sup> \*Iesu yana velu'ui i 'a'ava, mulieta yana tovetutuyamavo taiadi Ielusalema i 'iaweni i nagoi i obu Ufa Kidiloni i

damani no'o bega i laka. Bei welavi fuei i tabo, nagedie i luku. <sup>2</sup> Iudasa, taunina Iesu 'ana to'etogiluva, 'awalawanina i 'asetai fai tutuya fuei Iesu ma yana tovetutuyamavo bei i nunagoi. <sup>3</sup> Mulieta Iudasa 'ifwaidi tolugaviavo taiadi i maia 'awalawanina 'waineye. Tolugavianidi 'ifwaidi vanuga 'eba velu'ui 'ana to'isave'avinavo, i maia tovelomu 'adi to'edakumetavo wata Falisi 'waidiega, siwe ma yadi 'ibadi wata kefata i laudukala i maia. <sup>4-5</sup> Iesu 'akonadi i 'asetai ava'ai sai'afoga i na souyedi 'waineye begaidi tutuyanina Iudasa tolugaviavo taiadi i le'wai, Iesu i vaganago 'waidie i velutoliedi i vo, Aitoi 'wa lulualeni?" Tolugaviavo i vo, Tomogo Nasaledi 'ana wagava Iesu." Iesu i vo, Yau side tauniku." <sup>6</sup> Tutuyanina Iesu i vonedi i vo, Yau side tauniku," tolugaviavo i vemuliuga i nagoi i be'u i ve'ufo'ufobala. <sup>7</sup> Wata Iesu i velutoliedi i vo, Aitoi 'omi 'wa lulualeni?" Tolugaviavo i vo, Tomogo Nasaledi 'ana wagava Iesu." <sup>8</sup> Iesu i vo, 'Akonadi a vonemi a vo, Yau side 'asa'aiana tauniku." Fai nuanuami yau, de'e yaku tovetutuyamavo 'wa na vonedi i na nagoi." <sup>9</sup> \*Iesu i vonaga i vo, 'Wa na vonedi i na nagoi," nika yana vonanina basenadi 'ana mogitana i souyeni fai i vo, Tamaku, tomotoganidi 'u velekuga 'waidiega kebu tamu aitoi a da baileni a 'i'isave'avinidi." <sup>10</sup> Saimoni Fita ma yana kefata, i yo'ei tovelomu bwaikina yana tofolova igodi i da niki, taniga'avana 'ana 'atagiega i tutuomuya. Tofolovanina 'ana wagava Maleko. <sup>11</sup> \*Iesu Fita i talabodeni i vo, 'Asa'aiana, yamu kefata 'u dodogi 'ana 'eba 'aidodoga 'waineye. I lub-waineku vita wata wafa a na veluagadi fai Tamaku nuanuana, we'e 'omu yana nuanuanina 'u tatalabodeni."

<sup>12</sup> Tolugaviavo ma yadi toeva biola, wata vanuga 'eba velu'ui 'ana to'isave'avinavo taiadi, Iesu i 'ive'avini i yogoni. <sup>13</sup> Mulieta i 'ewai i naweni Anasa 'waineye. Anasinina natuna yadi lamoga tovelomu bwaikina malamalanina 'waineye, 'ana wagava Kaiafa. <sup>14</sup> \*Kaiafa kumanina basenadi me Diu to'edakumetavo i vonedi i vo, I lubwaineni Iesu i na wafa bega tomotoga fueda ta na mia 'atumaina."

*Fita Iesu i ve'eweni.*

<sup>15</sup> Saimoni Fita wata tamu tovetutuyama Iesu i yogo'waili. Ma fuei i le'wai tovelomu bwaikina yana vanuge, vanuginina kalikalina, nageneye i luku tamu 'awasasa 'waineye. Fai tovelomu bwaikina tovetutuyamanina i 'asetai begaidi Iesu taiadi i luku. <sup>16</sup> We'e Fita i tovtovoi tanotanoge kali 'ana 'awa lilivaneye bega iana, kumanina tovelomu bwaikina i 'asetai i vilai i mai vavine ne'e'elina 'awa 'ana to'isave'avina i voneni Fita i tauyeni i luku. <sup>17</sup> \*Vavinenina ne'e'elina Fita

i voneni i vo, Voke 'omu kumanimu no'o tomogonina tamu yana tovetutuyama.” Siwe Fita i ve'ewa i vo, Yau tuliku.”

<sup>18</sup> Fai kaukau, tofolovavo wata tolugaviavo 'ai i levai mula'wayega bei i vevevala. Wata Fita i nago lilivadie i tovoi ma fue die i vevevala.

*Tovelomu bwaikina Iesu i velutolitoli.*

<sup>19</sup> Vanuganina nageneye tovelomu bwaikina Iesu i velutolitoli yana tovetutuyamavo wata yana ve faifaidi. <sup>20</sup> ✧Yana vona Iesu i tutuli i vo, Yau tutuya fue di mageseye a vevefufu 'aila'a matadie. Kebu a da givagiva a da veve, yaku ve matatabuna vanuga 'eba velu'ui nageneye wata 'eba miava'auta 'waidie me Diu fue di matadie. <sup>21</sup> Awale 'u velutolitoli? Nuanuamu velutoli, tomotoganidi yaku vona i noganogaidi 'waidie 'u da velutoli. Ava'ai a voneyediga i 'asetadi, 'adi fata i na lu'ivona 'waimuye.” <sup>22</sup> De'e bani'odi Iesu i vonevoneyediga, tamu tolugavia i 'ainike Iesu maigin-eye wata i vo, Awale we'e bani'odi 'u voneyedi yada tovelomu bwaikina 'waineye, kebu 'u da ve'ililibuyeniga.” <sup>23</sup> Tolugavia yana vona, Iesu i tutuli i vo, 'Ai'edi a vekaliga, 'u na lu'ivona tomotoga 'waidie, we'e 'ai'edi a vona tonovina, awale 'u niku?”

<sup>24</sup> Anasa yana velutoli i 'a'ava, Iesu yogoyogonina i vetunei i nago tovelomu bwaikina tamu 'ana wagava Kaiafa 'waineye.

*Fita Iesu i ve'ewa-vaituganeni.*

<sup>25</sup> Fita bola i vevevala, 'ifwaidi tomotoga i voneni i vo, Voke 'omu no'o tomogonina tamu yana tovetutuyama.” Siwe Fita i ve'ewa i vo, Kebu, yau tuliku.” <sup>26</sup> ✧Tovelomu bwaikina yana tofolova, kumanina Fita tanigana i tutuomuya we'e iana tamu wata taunina tofolova i vona Fita 'waineye i vo, 'Asiau 'a waia Iesu 'a 'ive'avini voke a 'isemu Iesu taiadi.” <sup>27</sup> ✧Wata Fita i ve'ewa i vo, Kebu,” nika kamukamu i kwage.

*Iesu i tovoi Failato mataneye.*

<sup>28</sup> 'Awa'awaiogose Kaiafa yana vanugayega me Diu to'edakumetavo Iesu i vagavaia i naweni Loma gabemani 'adi to'edakumeta yana vanuga bwaikina 'waineye 'ana wagava Failato. Taunina kebu tomogo Diu, begaidi me Diu i vo, 'Ai'edi ta na luku yana vanuge, ta na veyoke Yaubada mataneye bega kebu 'ada fata Uvi'agalatagona sakalina ta na 'ani.” <sup>29</sup> Fai nuanuadi i na miamiani tanotanoge, begaidi Failato i souyeni yana vanugayega i mai i velutoliedi i vo, Ava'ai faifaina tomogo de'e 'wa vevitai?” <sup>30</sup> Me Diu yana vona i tutuli i vo, 'Ai'edi kebu yana sakonaga, 'ako kebu 'a da mieniga.” <sup>31</sup> ✧Bega Failato i vonedi i vo, 'Wa naweni i

✧ 18:20: Mad 26:55; Ion 7:26 ✧ 18:26: Ion 18:1,10 ✧ 18:27: Ion 13:38

✧ 18:31: Ion 19:6-7

na vonayavuga matamie. 'Ai'edi ma yana sakona taunimi yami veimea 'waidiega vematavuloga 'wa na veleni." Me Diu to'edakumetavo Failato i voneni i vo, Nuanuama i na wafa yana sakona faifaina, siwe 'omi me Loma 'wa talabodema. Nuanuama 'u na vona i na wafa 'ai lagalagana 'waineye." <sup>32</sup> ✧ Basenadi Iesu i vona-vagata 'awaie i na wafa 'ai lagalagana 'waineye, tutuyanina me Diu i vo, Nuanuama 'ai lagalagana 'waineye i na wafa," nika Iesu yana vonanina 'ana mogitana i souyeni. <sup>33</sup> Failato i vilai i luku yana vanuge, tomotoga i vonedi Iesu i naweni 'waineye i voneni i vo, 'Alo 'omu kumanimu me Diu yadi kini." <sup>34</sup> Iesu Failato i voneni i vo, Yamu vonanina, 'omu yamu nuanua 'alo mali tomotoga i vonemuna bani'odi 'u voneyedi?" <sup>35</sup> Wata Failato i vo, 'Alo yau tomogo Diu bani'odi a da voneyedi. Taunimu yamu tomotoga wata yamu tovelomu 'adi to'edakumetavo i 'anivelenemu 'waikuye. Siwe ava'ai yamu sakonaga?" <sup>36</sup> Iesu i voneni i vo, De'e bei fwayefwayeye kebu yaku 'Eba Veimea i da 'eno'eno. We'e 'ai'edi yaku 'eba veimea fwayefwayeye i da 'eno'enoga, 'ako yaku tofolovavo i da 'ikasikasisieku me Diu yama to'edakumetavo taiadi i da vetalaga 'aku 'ita'ita'i faifaina. Yaku veimea lamuna kebu fwayafwaya 'wainega." <sup>37</sup> ✧ Bega Failato i velutoli Iesu 'waineye i vo, 'Alo 'omu kini?" Iesu i vo, 'U vonaga yau kini, 'u vona mogitana. Faifaina yau a mai fwayefwayeye a tubuga, a vevetolu'ivona Yaubada yana nuanua tonovidi. Egavo nuanuadi sauluva tonovidi, yaku vona i noganogaidi." <sup>38</sup> Failato i vo, Ava'ai nuanuaga tonovidi?"

Mulieta Failato i vilai i obu tanotanoge me Diu i vonedi i vo, Kebu 'aku fata a na veimea i na wafa fai kebu tamu yana sakona a da veluagai. <sup>39</sup> Siwe yami sauluva mala-mala 'aitamogana 'aitamogana Uvi'agalatagona 'ana sakali 'waineye 'wa vonavona tamu tomogo a 'e'etoyavuya vanuga 'eba yogona 'wainega. Bega nuanuami me Diu yami kini a na 'etoyavuya?" <sup>40</sup> I vegolegole i vo, Kebu, kebu kumanina yama nuanuaga. Nuanuama Balaba 'u na 'etoyavuya." Balabanina taunina tovainago wata to'ainike.

## 19

### *Failato i veimea Iesu i na wafa.*

<sup>1</sup> Failato 'aila'a bonadi i nogai, bega Iesu i 'ewai i naweni yana vanuge tolugaviavo i vonedi i toke i fitali. <sup>2</sup> Tolugavianidi fisili ma yana 'ibadi i 'etofifini Iesu 'unu'ununeye i biuleni, wata kaleko yamoyamoinega i ve'weseni. Vaigavunidi kini 'adi vaigavu 'adi 'isa'isa, siwe

Iesu 'waineye i sidibidibieni. <sup>3</sup> Wata i ve'ililibu-vekavekali 'waineye i vo, Kaiwa, 'omu me Diu yadi kini." I 'a'avana maigineye i 'ainike.

<sup>4</sup> Wata Failato i vilai i obuma 'aila'a i vonedi i vo, Tomogonina a na mieni 'wa na 'iseni, 'wa na 'asetai kebu tamu sakona a da veluagai 'wainega bega kebu 'aku fata a na veimea i na wafa. <sup>5</sup> Iesu i obumaga tanotanoge ma 'ivivigavuna, fisili 'etofifinina 'unu'ununeye wata kaleko yamoyamoinega i ve'weseni. Failato 'aila'a i vonedi i vo, 'Wa 'isamaieni, side tomogonina." <sup>6</sup> Tutuyanina me Diu to'edakumetavo wata tovelomu 'adi to'edakumetavo Iesu i 'iseni i vegolegole i vo, 'U tutufwaseni 'ai lagalagana 'waineye, 'u tutufwaseni 'ai lagalagana 'waineye." Failato i vonedi i vo, Taunimi 'wa 'ewai 'wa tutufwaseni 'ai lagalagana 'waineye. Kebu i da lubwaineniga wafa fai kebu yana sakonaga." <sup>7</sup> ✧ Me Diu i vo, I lubwaineni i na wafa fai yada veimea i geuya. 'A nogai igodi i vo, Yau Yaubada Natuna."

<sup>8-9</sup> ✧ Iesu yana vonanina me Diu i lu'ivoneyeni Failato i nogai i kololo bwaikina fai i nuani i vo, Vo ke mogitana Yaubada Natuna. Begaidi i vilai i luku vanuge Iesu i voneni i vo, Nuanuaku a na 'asetai 'omu ava'aiega 'u mai?" Siwe Iesu kebu tamu ava'ai i da voneyeniga Failato 'waineye. <sup>10</sup> Wata Failato Iesu i voneni i vo, Awale kebu bonaku 'u da tutuliga? Yau ma yaku veimea 'aku fata a na 'etoyavumu, wata 'aku fata a na veimea i na tutufwasemu 'ai lagalagana 'waineye." <sup>11</sup> ✧ Iesu i vona i vo, 'Ako kebu 'u da veimeyekuga, siwe fai Yaubada veimea i velemu, 'amu fata 'u na veimeyeku. Yamu veimeanina 'wainega 'u sakona, siwe tomogonina i 'aniveleneku 'waimuye yana sakona bwaikaotogina." <sup>12</sup> ✧ Vonanina Failato i nogai nuanuana bwaikina Iesu i na 'etoyavuya, siwe me Diu kebu nuanuadi. Begaidi i vegolegole i vo, 'Ai'edi aitoi taunina i na awa'ai'aia i na vo, Yau kini," tomogonina me Loma yami to'edakumeta bwaikaotogina Sisa 'ana gavia. 'Ai'edi Iesu 'u na 'etoyavuya 'omu kebu Sisa ianaga, fai Iesu taunina i awa'ai'aia nuanuana i na ve-kini." <sup>13</sup> Tutuyanina Failato me Diu yadi vona i nogai Iesu i vagavaia i obuyeni didige, 'eba vona yavuga 'waineye bei Failato i miabui. Didiganina 'ana wagava Didiga Bababana, me Diu bonadiega i goleni Kabada.

<sup>14</sup> 'Akonadi 'aiata-'wana'wana, we'e 'awa'awai me Diu i na sakali Uvi'agalatagona\* faifaina. Failato me Diu i vonedi i vo, Side, yami kini." <sup>15</sup> Me Diu i vegole-vaitugana i vo,

✧ 19:7: Vei 24:16; Ion 5:18 ✧ 19:8-9: Mad 27:12; Luk 23:9 ✧ 19:11: Ion

10:18; Fol 2:23; Lom 13:1 ✧ 19:12: Luk 23:2; Fol 17:7 \* 19:14: Me Diu yadi

'eba tolinuata'i basenadiotoga Yaubada tubudiavo i 'ita'ita'iedi Itifita 'wainega, anelose me Diu i uvi'agalatagonidi we'e me Itifita i nikedi.

'U luvewafai, 'u luvewafai, 'u tutufwaseni 'ai lagalagana 'waineye.” Failato i velutoliedi i vo, Nuanuami yami kini a na tutufwaseni 'ai lagalagana 'waineye?” Tovelomu 'adi to'edakumetavo Failato yana vona i tutuli i vo, De'e Iesunina kebu yama kini. Yada kini 'aitamogana Sisa.” <sup>16</sup> Failato nuanuana nuadi i na 'iveagiagidi bega Iesu i 'aniveleneni 'waidie i na tutufwaseni 'ai lagalagana 'waineye.

*Iesu 'ana tutufwatagi.*

<sup>17</sup> Iesu i 'ewai i naweni, we'e 'ana 'ai lagalagana taunina i eva. Ma fuedie i nagoi i le'wai tamu 'awalawa 'ana wagava 'Unu'unu Lulu'ava 'waineye, me Diu bonadiega i goleni Goligota. <sup>18</sup> 'Awalawanina 'waineye bei Iesu i tutufwaseni 'ai lagalagana 'waineye. Wata tomotoga 'adi 'ailuga i tutufwasedi 'ai lagalagana 'waidie, tamu wamayega, tamu 'atagiega, we'e Iesu kamwaneye. <sup>19</sup> Failato tamu vona i kilumi tolugaviavo i veledi Iesu 'ana 'ai lagalagana 'waineye i tutufwaseni. Vonanina i kilumiga side bani'odi.

DE'E TOMOGO NASALEDI 'ANA WAGAVA IESU,  
ME DIU YADI KINI.”

<sup>20</sup> 'Awalawanina bei Iesu i tutufwaseniga kebu 'ani'iega Ielusalema lilivaneye, begaidi me Diu fuedi i nagoi i lu'iawawai. Vonanina Failato i kilumiga vona 'aitonu 'waidiega, me Loma bonadiega, Me Guliki bonadiega, wata me Diu bonadiega. <sup>21</sup> Tovelomu 'adi to'edakumetavo i 'iseni i nagoi Failato i voneni i vo, Awale 'u kilumi 'u vo, Me Diu yadi kini?” Nuanuama 'u da vo, Tomogo de'e igodi i vo, Yau me Diu yadi kini.” <sup>22</sup> Siwe Failato i vonedi i vo, Ava'ai 'akonadi a kilumiga, 'asa'aiana bani'odi i na 'eno'eno.”

<sup>23-24</sup> ✧ Tolugaviavo Iesu i tutufwaseni i 'a'avana, mulieta tolugaviavo 4 'aise'avadi 'ana kaleko i 'ewadi, i veusedi. Wata 'ana talauma i 'ewai i 'iseni kebu 'ana tubwaga, mwadodouna i 'idewai begaidi i vo, Kebu ta na labu'iga, tamu 'wava ta na 'waveni bani'odi kate, ta na 'iseni aitoi i na kumeta kumanina i na 'ewa.” Naninina i 'idewaiga, nika tamu vona basenadiotoga Yaubada yana Buki 'waineye i kilumiga, 'ana mogitana i souyeni i vo,

'Aku kaleko i veusedi 'aitamogana 'aitamogana 'waidie,  
Wata 'aku talauma faifaina i 'wava bani'odi kate.”

Fai bani'odi i voneyediga, begaidi tolugaviavo bani'odi i 'idewai.

<sup>25</sup> Iesu 'ana 'ai lagalagana lilivaneye vevine 4 i tovoivoi. Side vevinenidi, Iesu inana ma taidi, Kilofa yana vavine 'adi wagava Meli, wata tamu Meli 'atamana Magidala 'wainega. <sup>26</sup> Iesu i 'isaobu inana i 'isedi, wata yana tovetutuyama kumanina i nuakalikalieni bwaikina i tovoivoiga i 'iseni inana

i vonedi i vo, Inaku, siwe natumi.”<sup>27</sup> We'e tovetutuyamanina i voneni i vo, Siwe inaku, 'u na 'isave'avinidi.” Bei tutuyanina 'waineye i nawedi yana vanuge i 'i'isave'avinidi.

*Iesu i wafa.*

<sup>28</sup> ✧ Iesu 'akonadi i 'asetai nani matatabuna i sigoidi wata fai nuanuana Yaubada yana Buki 'waineye basenadiotoga i kilumiga 'ana mogitana i na souyeni begaidi i vo, 'Anigoku i lala.”<sup>29</sup> ✧ Bei Iesu i tutufwaseniga tamu oine yuyuna ma 'aivoena i 'eno'eno. Tomotoga Iesu bonana i nogai, bega kikifa i 'ewai i lu'utuvi oine 'waineye, tamu 'ai 'waineye i velugaganeni i 'iyoyoeni Iesu 'waineye. <sup>30</sup> ✧ Iesu oine i yemuyana i vo, I 'a'ava,” mulieta i 'odu nika yawaina i tauyeni i wafa.

*Iesu lumalumaneye i 'ailovena.*

<sup>31</sup> ✧ Iesu i wafa 'aiata 'idewadewa 'waineye. Me Diu to'edakumetavo kebu nuanuadi tomotoganidi tomogodi i na 'eno'eno 'ai lagalagadi 'waidie 'Aiata Veawai 'waineye, wata fai 'awa'awai bani'odi 'Aiata Veawai bwaikina Uvi'agalatagona faifaina. Begaidi to'edakumetanidi i nagoi Failato 'waineye i velu'ui nuanuadi i na tauyedi bega tomotoganidi 'ai lagalagana 'waidie 'agedi i na tutubaidi bega i na wafa matayo'o, mulieta i na ta'idi. <sup>32</sup> Failato i tauyedi bega tolugaviavo i vonedi i nagoi tomotoga 'adi 'ailuga kumanidiavo Iesu taiadi i tutufwasediga, 'agedi i tutubaidi. <sup>33</sup> Iesu 'waineye i le'wai i 'iseni 'akonadi taunina i wafa bega kebu 'agena i da tutubaidi. <sup>34</sup> We'e tamu tolugavia Iesu lumalumaneye i 'ailovena, nika dayaga wata ufa i kausewa. <sup>35</sup> ✧ Tamu tomogo mataotogineye i 'iseni dayaga wata ufa i kausewa bega i lu'ivoneyeni, yana lu'ivonanina vona mogitana. I vona mogitana wata i 'asetai kebu i da vekali bega 'omi wata 'wa na vetumagana Iesu 'waineye. <sup>36</sup> ✧ Tolugaviavo kebu Iesu 'agena i da tutubaidiga bega ava'ai basenadiotoga i kilumi Yaubada yana Buki 'waineye 'ana mogitana i souyeni i vo,

Kebu tamu luluna i da tubaia.”

<sup>37</sup> ✧ Wata tamu vona basenadiotoga i kilumi i vo,

Tomogonina i loveniga tomotoga i na vemata'i'i'ieni.”

*Iesu 'ana ve'ufa.*

<sup>38</sup> ✧ Mulieta tamu tomogo 'atamana Alimadia 'wainega 'ana wagava Iosefa, i nago i velu'ui Failato 'waineye Iesu tomogona faifaina. Iosefanina tamu Iesu yana tovetutuyama siwe kebu nuanuana i na lu'ivona fai me Diu

✧ 19:28: Same 22:15 ✧ 19:29: Same 69:21 ✧ 19:30: Ion 4:34 ✧ 19:31: VeL 21:22-23 ✧ 19:35: Ion 21:24 ✧ 19:36: Sou 12:46 ✧ 19:37: Ve 1:7

✧ 19:38: Ion 7:13

to'edakumetavo i kololoyedi. Iosefa yana velu'ui faifaina Failato i awave'atumaieni bega i voneni i nago Iesu tomogona i ta'ia i naweni. <sup>39</sup> ✧We'e Nikodimo, basenadi kumanina lovane i nago Iesu 'waineye, bunama 'atumaidei wata bwaikidi† i 'ewadi i mai Iosefa taiadi i nago. Bunamanidi 'adi wagava Mulo wata Aloe. <sup>40</sup> Tomotoganidi 'adi 'ailuga Iesu tomogona i naweni kaleko manamanawedi 'waidiega i fania bunamanidi taiadi, bani'odi me Diu yadi sauluva ve'ufa faifaina. <sup>41-42</sup> Fai sai'afoga me Diu yadi 'Aiata Veawai i na velamu, bega tamu taumata kebu 'ani'iega vivideye bei Iesu i silukuveni. Taumatanina basenadi i ala-vagaseni matumatu 'waineye bei kebu tamu aitoi i da ve'ufai, we'e lilivaneye welavi fuedi i tovofovoi.

## 20

### *Iesu 'ana taumata'ava.*

<sup>1</sup> Me Diu yadi 'Aiata Veawai i 'a'avana, Tafalolo bola matalovalovanineye, Meli vavine Magidala i tovoi i nago taumaseye. Tutuyanina i le'wa i 'iseni kileu taumata 'awana 'ana vetoviboda 'akonadi i ketoi. <sup>2</sup> ✧Bega i lilide i mai Saimoni Fita wata tamu tovetutuyama, kumanina Iesu i nuakalikalienei bwaikina, i vonedi i vo, 'Auvea tomogona i 'ewai taumata 'wainega siwe kebu ta da 'asetaigna ava'aibe bei i yatoi." <sup>3</sup> Begaidi Fita ma iana i tovoi i nagoi taumaseye. <sup>4</sup> I ve'ilililide iana i kumeta i le'wa-matayo'o taumaseye. <sup>5</sup> I lukemula i 'iseni kaleko'ava bagase bega Iesu tomogona i fania, siwe kebu i da lukuga. <sup>6-7</sup> Saimoni Fita i vemuli i le'wa tonovina i luku, kalekonidi i 'isedi wata Iesu 'unu'ununa 'ana fanifani. Fanifaninina nununumina siwe tulineye i 'eno'eno. <sup>8</sup> Mulieta iana wata i luku Iesu i 'isa'avai, i vetumagana Iesu 'akonadi i tovoi. <sup>9</sup> ✧Siwe kebu mogitana i da 'asetaigna-atumaiia ava'ai basenadiotoga i kilumi Yaubada yana Buki nageneye, i lubwaineni Iesu i na tovoi-vaitugana wafayega. <sup>10</sup> Nika i viladi i nagoi vanuge.

### *Iesu i souyeni Meli 'waineye.*

<sup>11-12</sup> Melinina 'atamana Magidala 'wainega i vilai i nago taumaseye bei i tovoi i 'we'we'wela. Wata i lukemula anelose 'adi 'ailuga i 'isedi ma 'adi talauma 'avu'avudi. Bei Iesu i ve'enoviga 'waineye i miamiani, tamu 'unu'ununega, tamu 'agenega. <sup>13</sup> Tomotoganidi 'adi 'ailuga Meli i velutolieni i vo, Vavine, ava'ai faifaina 'u 'we'we'wela?" Yadi velutoli i tutuli i vo, Yaku 'Auvea i 'ewai, siwe kebu a da 'asetaigna ava'aibe bei i yatoi." <sup>14</sup> ✧I vona'a'ava i sivilai Iesu i 'iseni i tovofovoi, siwe

✧ 19:39: Ion 3:1-2 † 19:39: Bunamanidi 'adi vita 45 kilogalamu. ✧ 20:2: Ion 13:32 ✧ 20:9: Fol 2:24-32 ✧ 20:14: Luk 24:16; Ion 21:4



kebu i da 'isa'inanaiga. <sup>15</sup> Iesu i velutoli i vo, Vavine, ava'ai faifaina 'u 'we'we'wela? Aitoi kumanaga 'u lulualeni?" Meli yana nuanua i vo 'ako, 'Awalawanina 'ana to'isave'avina," begaidi i vo, 'Ai'edi Iesu tomogona 'u 'ewaiga, nuanuaku 'u na voneku ava'aibe bei 'u yatoi, bega a na nago a na 'ewai." <sup>16</sup> Iesu i vona Meli 'waineye i vo, Meli." Meli i sivilai i 'isanago me Diu bonadiega i vo, Labonai," 'ana saivila Tove. <sup>17</sup> \*Iesu i voneni i vo, Kebu 'u na 'abitonovikuga, yau bola kebu a da laka Tamada 'waineye. Siwe nuanuaku 'u na nago ekwavo 'waidie side bani'odi 'u na voneyedi 'u na vo, Iesu i vonaga i vo, A na vilaku a na nago Tamaku 'waineye, Tamakunina 'omi wata Tamami, yaku Yaubada wata 'omi yami Yaubada." <sup>18</sup> Iesu i vona'a'ava, mulieta Meli i vilai i mai tovetutuyamavo 'waidie, i vonedi i vo, Yau 'Auvea a 'iseni," wata ava'ai i voneniga i lu'ivona 'waidie.

*Iesu i souyeni yana tovetutuyamavo 'waidie.*

<sup>19</sup> Tafalolo lovananina, Iesu yana tovetutuyamavo me Diu to'edakumetavo i kololoyedi begaidi vanuga i sibodai nageneye i miasai'auga i miamiani. I veveifufu nika Iesu 'awasasadie i souyeni i vonedi i vo, Ma yami sosoana 'wa na miamiani, kebu 'wa na kololo." <sup>20</sup> \*I vona'a'ava, mulieta 'ana kini'ona i vedi, nimana 'waidie wata lumalumaneye. Matatabudi i sosoana-'afo'afo fai 'Auvea i 'iseni. <sup>21</sup> \*Wata Iesu i vona-vaitugana 'waidie i vo, Ma yami sosoana 'wa na miamiani, kebu 'wa na kololo. Basenadi Tamada i vetuneku a mai tomia fwayafwaya 'waimie, wata bani'odi 'omi a vevetunemi tomia fwayafwaya 'awasasadie." <sup>22-23</sup> I vona'a'ava, mulieta yawaina i tauyavuleni 'waidie i vonedi i vo, De'e 'Anu'anunu 'Atumaina a vevelelemi begaidi 'ai'edi tomotoga yadi sakona 'wa na nuatavunidi, wata Yaubada i na nuatavunidi. We'e 'ai'edi kebu 'wa na nuatavunidiga wata nuatavuna kebu i na veluagai Yaubada 'wainega."

*Tomasi yana vetumagana.*

<sup>24</sup> \*Tutuyanina Iesu i souyeni yana tovetutuyamavo 'waidie, Tomasi kebu taiadi i da miamiaga, taunina iadi, tamu 'ana wagava Natulugaluga. <sup>25</sup> Iesu i tauya i nago, mulieta Tomasi i le'wa i voneni i vo, 'Ima 'Auvea 'a 'iseni." Tomasi i vonedi i vo, Yau kebu a na vetumagana Iesu i tovoiga faifaina, nagami 'ana kini'ona a da 'isedi nimaneye, wata neli 'awa'ividi a da 'abitonovidi, wata lumalumaneye 'ibadi 'awa'ivina 'waineye nimaku a da silukuveni, mulieta a da vetumagana."

\* 20:17: Ibu 2:11-12 \* 20:20: Ion 19:34, 16:22; 1 Ion 1:1 \* 20:21: Ion 17:18

\* 20:24: Ion 11:16, 14:5

26 'Aiata 7 i 'a'ava, mulieta wata Iesu i souyeni. Tutuyanina 'waineye yana tovetutuyamavo matatabudi Tomasi taiadi i saiboda i miamiani, nika Iesu i souyeni 'awasasadie. I vonedi i vo, Ma yami sosoana 'wa na miamiani, kebu 'wa na kololo.” 27 Mulieta Tomasi i voneni i vo, Nimaku 'u 'isedi, 'u 'abitonovidi, wata nimamu 'u na 'otoi lumalumakuye 'u na silukuveni. We'e venuanaluganina 'u baileni, 'u na vetumaganamo.” 28 Tomasi i vo, 'Omu yaku 'Auea wata yaku Yaubada.” 29 \*Wata Iesu i voneni Tomasi i vo, Fai 'u 'iseku, begaidi 'u vetumagana. We'e egavo kebu i da 'isekuga i vetumaganamo 'eba sosoana bwaikina 'waidie.”

*Side kumanina faifaina buki de'e i kilumi.*

30 \*Iesu folova toketokedi fuedi 'eba nuavogana wata 'eba nua'ewa i 'idewadi yana tovetutuyamavo matadie, siwe kebu matatabuna 'adi kilumaga de'e bukinina 'waineye. 31 \*Naninidi 'akonadi kilukilumidi 'wa na lu'iaawadi bega 'wa na vetumagana Iesu Keliso taunina Yaubada Natuna wata 'ana Venua'ivina. Vetumagananina 'wainega mia 'ivauna wata 'atumaina 'wa na veluagai Iesu 'wainega.

## 21

*Iesu i souyeni balebaleye.*

1 Tamu tutuya Iesu yana tovetutuyamavo i nagoi Lavu Galili,\* wata bei Iesu i vemageta 'waidie. Yana souyagi side bani'odi. 2-3 Saimoni Fita, Tomasi tamu 'ana wagava Natulugaluga, Nataniela 'ana tuvada Kena 'awalawa Galili nageneye, Sebedi natunavo wata tovetutuyamavo 'adi 'ailuga i miamiani nika Saimoni Fita i vo, A na nago a na vuata.” Enavo i voneni i vo, Ma fuedeye ta na nagoi.” Bega i tovoi i nagoi, waka i 'ewai i laka i vuata, siwe lovananina matatabuna kebu tamu sai'afo igana i da 'onadi.

4 Inala i vulaoga tamu tomogo i 'iseni i tovoivoi balebaleye siwe kebu i da 'isa'inanaiga, tomogonina Iesu. 5 \*I vegole 'waidie i vo, Kwakwama, igana 'wa 'onadi, 'alo kebu?” I vo, Kebu'a'avaotoga.” 6 \*Wata i vegole 'waidie i vo, 'Ami 'atagiega 'wa na lelega, nika 'wa na 'onadi.” Yana voneye i lelegeni, siwe kebu 'adi fata vuata i na yo'ei fai igana fueotogidi i 'ona.

7 Toveutuyamanina Iesu i nuakalikalieni bwaikina, Fita i voneni i vo, Fita, va'e 'Auea.” Saimoni Fita i nogai iana i vo, Va'e 'Auea,” bega 'ana kaleko i 'ewai i ve'wesena, fai 'akonadi i yavudi ma 'ana iviga'ava yaubani faifaina, i sou i kayo i obu. 8 We'e tovetutuyamavo 'ifwaidi wakayega

\* 20:29: 1 Fit 1:8    \* 20:30: Ion 21:25    \* 20:31: Ion 3:15; 1 Ion 5:13    \* 21:1: 'Ana mogitana Lavu Taibilia, Lavu Galili tamu 'ana wagava.    \* 21:5: Luk 24:41  
\* 21:6: Luk 5:4-7

i voi, vuata ma iganina i yo'ei i obuyeni. Kebu 'ani'iega, bani'odi 'atagida 'ana vemanawe. <sup>9</sup>Tutuyanina 'avale i obu i 'iseni mula'wa i 'ala'alata, mula'wanina 'waineye igana wata 'ani'ani i 'ala'alaidi. <sup>10</sup>Iesu i vonedi i vo, Igana 'asiauotoga 'wa 'onadiga, 'ifwaidi 'wa na miedi.” <sup>11</sup>Saimoni Fita i laka wakeye vuata ma iganina i yo'ei i lakama 'avale. Igananidi bwaikidi wata matatabuna 153. Fueotogidi siwe vuata kebu i da bwekaiga. <sup>12</sup>Fita igana i miedi mulieta Iesu i vonedi i vo, 'Wa maia 'wa na 'ani.” Tovetutuyamavo 'waidiega kebu tamu aitoi nuanuana i na velutoli i na vo, 'Omu aitoi?” fai 'akonadi i 'asetai taunina mogitana 'Auvea. <sup>13</sup>Bega Iesu i nago 'ani'ani i 'ewadi i veledi, wata igana bani'odi.

<sup>14</sup> ✧De'e Iesu yana souyagi 'ana vetonu yana tovetutuyamavo 'waidie tutuyanina i tovoi wafayega.

### *Iesu nuanuana Fita.*

<sup>15</sup> ✧'Ani i 'a'ava, mulieta Iesu i velutoli Saimoni Fita 'waineye i vo, Saimoni, 'omu Ioni natuna, nuanuaku a na 'asetai, mogitana 'u nuakalikalieku bwaikina we'e emwavo sai'afo?” Fita i vo, E'e 'Auvea, 'akonadi 'u 'asetaku a nuakalikaliemu.” Iesu i vo, Egavo i vetumagana 'waikuye siwe bola mweamweadi nuanuaku 'u na veve 'waidie bega i na vetoketoke, 'wa da vo bani'odi yaku sifi siaidi 'u da veve'anidi.” <sup>16</sup> ✧Wata 'ana veluga Iesu i velutoli Fita 'waineye i vo, Saimoni, 'omu Ioni natuna, mogitana 'u nuakalikalieku bwaikina?” Fita i vo, E'e 'Auvea, 'akonadi 'u 'asetaku a nuakalikaliemu.” Iesu i vo, Egavo i vetumagana 'waikuye, nuanuaku 'u na 'i'ivaisedi, 'wa da vo bani'odi yaku sifi 'u da 'i'isave'avinidi.” <sup>17</sup> Wata 'ana vetonu i velutolieni i vo, Saimoni, 'omu Ioni natuna, 'u nuakalikalieku?” Iesu yana velutoli 'ana vetonu 'waineye Fita nuana i vita, i voneni i vo, 'Auvea, nani matatabuna 'u 'asetadi, wata 'u 'asetaku a nuakalikaliemu.” Iesu i vo, Egavo i vetumagana 'waikuye nuanuaku 'u na veve 'waidie, 'wa da vo bani'odi yaku sifi 'u da veve'anidi. <sup>18</sup> ✧A vona mogitana 'waimuye, basenadi 'omu tubuvauvaumuye, taunimu 'amu wa'ila 'u yogoyogoni, 'ai'edi ava'aibe yamu nuanua, 'ana fata bei 'u na nago, siwe tutuyanina 'u na ve'auvea, nimamu 'u na 'otoidi bega tamu tomogo i na yogonimu, ava'aibe bei kebu yamu nuanua bei i na nawemu.” <sup>19</sup> Iesu de'e bani'odi i voneyediga fai 'awaie tosakona Fita i na 'iyogoyogoni mulieta i na luvewafai. Yana wafanina 'wainega tomotoga fueidi i na 'iseni i na 'asetai taunina tovetumagana mogitana, bega Yaubada i na subiai. Iesu yana velutoli Fita 'waineye i ve'a'avadi, mulieta i voneni i vo, Nuanuaku 'u na vetutuyameku.”

*Iesu i veifufu Ioni yana wafa faifaina.*

<sup>20</sup> ✧ Iesu i veveifufu Fita 'waineye, Fita i sivilai tovetutuyamanina Iesu i nuakalikaliene bwaikina i 'iseni, kumanina basenadi 'Auvea yana 'ani 'waineye lilivaotogineye i miabui i velutoli Iesu 'waineye i vo, 'Auvea, aitoi kumanaga i na 'etogiluvemu?" <sup>21</sup> Tutuyanina Fita tovetutuyamanina i 'iseni i velutoli Iesu 'waineye i vo, 'Auvea, de'e kumanina 'ana nuanua bani'odi? 'Awaie bani'odi i na wafayedi?" <sup>22</sup> Iesu Fita yana velutoli i tutuli i vo, 'Ai'edi nuanuaku yaku vilavaitugana i na 'iseni, ma yawaina i na miamia a na vilaku, we'e 'asa'aiana, kebu kumanina faifaina 'u na nuanua, siwe 'omu'e 'u na vetutuyameku." <sup>23</sup> Vonanina Iesu i voneyeniga faifaina, enavo matatabudi i 'asete, siwe yadi nuanua igodina kebu i na wafaga. Siwe Iesu kebu i da vo, I na mia-vagata kebu i na wafaga," mogitana i vo, 'Ai'edi nuanuaku yaku vilavaitugana i na 'iseni, ma yawaina i na miamia a na vilaku, we'e 'asa'aiana, kebu kumanina faifaina 'u na nuanua."

<sup>24</sup> ✧ Yau kumaniku Iesu yana tovetutuyama, naninidi matatabuna a 'isedi wata faifaide a kiluma, bega fuema 'a 'asetai vona mogitana kebu vekali.

*Veifufu 'ana 'eba ve'a'ava.*

<sup>25</sup> ✧ Naninidi Iesu i 'idewadiga a kilumidi, siwe wata nani fuedi i 'eno'enovi kebu a da kilumidiga. 'Ai'edi matatabuna i da kiluma'a'avadiga buki fueotogidi, siwe a nuani fwayefwayeye kebu tamu 'awasasa i da 'eno'eno bega bei bukinidi ta na yatodi.

## **FOLOVA**

### **Iesu 'ana tomata'aulelevo yadi folova, Luke 'ana kilukiluma.**

De'e bukinina 'ana wagava Tomata'aulelevo yadi Folova, Luke yana buki 'ana veluga, Tomata'aulelevo 'aitamogana 'aitamogana yadi folova i veifufuyedi de'e bukinina nageneye. Veifufunidi 'ifwaidi taunidi i veifufuyedi Luke 'waineye we'e 'ifwaidi taunina i 'asetadi fai Faulo taiadi i yabayaba wata yadi 'eba mia 'aitamogana. Begaidi daba 16 'waineye ta na 'iseni Luke i vo, 'Ima 'a dodoga," wata i vo, 'Ima 'a le'wa." We'e tomotoga 'ifwaidi yadi nuanua i vo, Tutuyanina Faulo i miamia Loma vanuga 'eba yogona 'waineye buki de'e Luke i kilumi.

Luke yana nuanua side bani'odi. 'Anu'anunu 'Atumaina yana toketokena tomata'aulelevo wata tovetumagana i veledi bega Toveimea Iesu faifaina i lau'age. Tomata'aulelevo Iesu 'ana wagavayega 'eba nuavogana wata 'eba nua 'ewa i 'idewadi ma 'adi 'eba 'isa bega tomotoga 'awalawa fuedi 'waidie i vetumagana Iesu 'waineye. Iesu yana tomata'aulelevo 12 yadi lau'age i velamu Ielusalema nageneye, tutuya kamwaneye 'ifwaidi tomotoga bani'odi Filifi i nago 'awalawa Samelia bei i lau'age, mulieta Faulo 'ainegi i nagoi 'awalawa fuedi 'waidie Iesu valana i lau'agevuvueni.

We'e tamu nuanua de'e buki 'waineye, me Diu 'aisedi tovetumagana we'e mali tomotoga taunidi kebu Diu i vetumagana Iesu 'waineye. Basenadi me Diu wata mali tomotoga taunidi kebu Diu kebu taiadi i da miave'itubama, mulieta 'Anu'anunu 'Atumaina yana 'aivaita 'wainega i luvetubama bega 'aila'a 'aitamogana.

Wata Luke nuanuana Loma gabemani i na 'asetai Iesu 'ana tovetumaganavo kebu todumwe'ai, we'e mogitana Loma gabemani yadi veimea matatabuna i vematayakeyakeni. Diu to'edakumetavo tutuya fuedi tomata'aulelevo i 'i'ive'avinidi i nunawedi 'eba vonayavuga 'waineye. We'e Loma toveimea nuanuadi i na 'asetai ava'ai sakonaga faifaina siwe i lalauala kebu tamu sakona i da veveluagai 'waidiega.

De'e bukinina nageneye 'Anu'anunu 'Atumaina yana folova ifufuna i 'eno'eno. 'Anu'anununina Iesu yana tomotoga i kiavetoketokedi wata nuanua tonovidi i veledi. Begaidi 'ai'edi bukinina ta na goleni 'Anu'anunu 'Atumaina yana folova, i lubwaineni. De'e bukinina 'ana 'idi side bani'odi.

Tovetumaganavo 'adi 'aila'a yana 'eba velamu wata yana vebwaika. 1:1-5:42  
 Tovetumaganavo vita i veluagadi siwe i vetoketoke. 6:1-9:31  
 Fita yana lau'age-vuvua faifaina. 9:32-12:25  
 Faulo yana lauvivila nagami. 13-14:28  
 Tovetumagana yadi to'edakumetavo i va'auta Ielusalema. 15:1-41  
 Faulo yana lauvivila 'ana veluga. 16:1-18:23  
 Faulo yana lauvivila 'ana vetonu. 18:24-21:14  
 Faulo 'ana 'ive'avina wata yana nago Loma. 21:15-28:31.

1-2 \*Iaku Tiofilo, basenadi yaku buki kumekumetana\* 'waineye a kilumiga tutuyanina Iesu yana folova i velamu nani matatabuna i 'idewadi wata i ve faifaide, i nagoga nika Yaubada i vagavaia i naweni abame. Bola kebu i da lakaga, nagami 'ana tomata'aulelevo vevenua'ivinidi veimea i veledi 'Anu'anunu 'Atumainega. 3 \*Iesu i yawasa-vaitugana yana veviga i 'a'ava, 'aiata 40 nagedie i sousouyeni 'ana tomata'aulelevo 'waidie, 'eba 'isa fuedi i 'idewadi bega i na 'asetai mogitana ma yawaina, wata Yaubada yana veimea tomotoga 'waidie i veifufuyeni. 4 \*Tutuyanina Iesu taiadi i miamiaga i velu'ase'asedi i vo, 'Wa na miamiani Ielusalema, 'Anu'anunu 'Atumaina 'wa na lulukamaseni. Tamaku basenadi bani'odi i vona'awaufaufaga 'waimie bani'odi i na veleme, wata yau bani'odi a vonemi. 5 \*Ioni tomotoga i bafitaisodi ufayega, siwe 'aiata 'ifwaidi i na 'a'ava, mulieta 'Anu'anunu 'Atumaina i na agemi, 'wa da vo Yaubada i da bafitaisomi.”

*Yaubada Iesu i vagavaia i naweni abame.*

6 Tamu 'aiata Iesu ma 'ana tomata'aulelevo i miava'auta i velutolieni i vo, 'Auvea, kebu nuanuama me Loma i na veveimeyeda. Ava'ai tutuyaga 'u na 'ivaisema bega 'ida me Isileli tauni'avada wata ta na veimeyeda? Tutuya de'e 'alo bola?” 7 \*Iesu i vonedi i vo, Nani de'e nuanuami 'wa na 'asetai siwe kebu i da lubwainemi. Yaubada Tamaku 'aisena i veimeyedi ava'ai tutuyaga nuanuana bani'odi i na 'idewai. 8 \*Siwe nani de'e 'wa na 'asetai. Tutuyanina 'Anu'anunu 'Atumaina i na agemi 'wa na vetoketoke bega 'wa na vetolu'ivona faifaiku, tomotoga i miamiani Ielusalema 'waineye, 'awalawa Iudia 'waineye, Samelia matatabuna nageneye, wata tomia fwayafwaya matatabudi 'waidie.” 9 Tutuyanina Iesu yana vona i 'a'ava, tomata'aulelevo

\* 1:1-2: Luk 1:1-4; Luk 24:49-51 \* 1:1-2: Bukinina 'ana wagava Luke. \* 1:3: Luk 24:36-45 \* 1:4: Luk 24:49; Ion 14:16-17 \* 1:5: Mad 3:11 \* 1:7: Mak 13:32 \* 1:8: Mad 28:19; Fol 2:32, 5:32; Efe 3:16

matadie Yaubada i vagavaia, i vevemata'i'i'ieni i lakalaka nika waowa 'waineamo i luku abame.

<sup>10</sup> Bola i vevemata'i'i'ieni nika tomotoga 'adi 'ailuga abamega i souyedi lilivadie ma 'adi talauma mataududulidi i tovtovoi. <sup>11</sup> \*Bega i vo, Tomotoga Galili, ava'ai faifaina 'wa 'i'isalaka abame? Ta'e Iesu 'waimiega i vagavaia i nunaweni abame, bola i na vila-vaitugani, wata beidimo i na mai bani'odi 'wa 'iseni i nunago.”

*Tamu tomogo Iudasa tutulina.*

<sup>12</sup> Tomotoganidi abamega i nagoi, mulieta tomata'aulelevo 'aise'avadi 'Oya Oliveyega i viladi i nagoi Ielusalema kebu 'ani'iega, vivideye.† <sup>13</sup> Matatabudi i luku tamu vanuga 'waineye. Vanuganina 'etotubwatubwana tutudaba 'ifwaidi dibuneye, 'ifwaidi tabwaneye. I laka tutudaba tabwaneye bei i miamianiga 'waineye. Tomotoganidi side 'adi wagava,

Fita,

Ioni,

Iemesa,

Anidulu,

Filifi,

Tomasi,

Batolomiu,

Madiu,

Iemesa tamu, taunina Alefasi natuna,

Saimoni, toawa'idi'idi kebu nuanuana Loma gabemani i na veveimeyedi,

Iudasa, Iemesa natuna.

<sup>14</sup> Tutuya fuedi tomotoganidi i vava'auta i vevelu'ui Yaubada 'waineye, wata 'ifwaidi vevine, Meli Iesu inana, wata tainavo taiadi.

<sup>15-17</sup> \*Aiata 'ifwaidi i 'a'ava, Iesu 'ana tovetumaganavo i mi-ava'auta 'adi 'aila'a bani'odi 120. Fita matadie i tovoi i vonedi i vo, Ekwavo, a na vonemi. Basenadiotoga 'Anu'anunu 'Atumaina i venuayato Kini Devida 'waineye bega i kilumi Yaubada yana Buki 'waineye tamu tomogo Keliso i na 'etogiluvani. I lubwaineni 'akonadi 'ana mogitana i souyeni to'etogiluvanina Iudasa Isakaliota, tamu 'ada 'aila'a. Basenadi Iesu i vena'ivineni 'ada folovavaita, siwe taunina Iesu 'ana to'ive'avina 'adi to'edakumeta.”

<sup>18</sup> \*We'e Iudasanina yana 'etogiluva tutulina 'wainega tamu fwayafwaya i kimwanei. To'etogiluvanina tabwanega i be'u kamona i tutulabu'eni kamokamona i yavula i wafa. <sup>19</sup> Tomotoga fuedi Ielusalema 'waineye valana i nogai begaidi

\* 1:11: Luk 21:27; Ve 1:7 † 1:12: 'Ana vemanawe kilomita 'aitamogana.

\* 1:15-17: Same 41:9 \* 1:18: Mad 27:3-10; Luk 22:22

tanoganina Diu bonadiega i goleni Akelidama, 'ana saivila, Tanoga Dayadayagina.

<sup>20</sup> ✧Wata Fita i vonedi i vo, Basenadiotoga Kini Devida i kilumi Yaubada yana Buki Same 'waineye to'etogiluvanina faifaina i vo,

Yana vanuga i da venage'ava, bei kebu tamu aitoi i na miamiana.”

Wata i kilumi i vo,

Tamu tomogo tutulina i da folofolova.”

<sup>21-22</sup> Fai Yaubada yana Buki bani'odi i voneyediga, begaidi nuanuada tamu tomogo yada 'Auvea Iesu yana yawasa-vaitugana 'ana to'aseta, 'waideye i na mai ma fuedeye ta na lulu'ivona. Tomogonina ta na venua'ivineniga bega Iudasa i na tutuli, taunina basenadi ma fuedeye Iesu taiadi ta yabayaba, wata mataneye Iesu i bafitaiso Ioni 'wainega, wata Iesu yana folova matatabuna i 'isedi, i nagoga nika Iesu i laka abame.”

<sup>23</sup> Tutuyanina Fita i vona'a'ava, tovetumaganavo tomotoga 'adi 'ailuga i 'inanadi 'adi wagava Iosefa, tamu 'ana wagava Balisaba we'e 'ifwaidi yadi 'eba 'ainana Iusito, wata Mataiasi. <sup>24-25</sup> ✧Fuedi i velu'ui i vo, 'Auvea, basenadi Iudasa i vetomata'aulele siwe i baila i wafa i nago ava'aibe bei i lubwaineniga 'waineye. Tomotoga matatabuma yama nuanua 'u 'asetadi, bega nuanuama tomotoga de'e 'adi 'ailuga 'waidiega 'u na vema aitoi 'u venua'ivineni bega i na vetomata'aulele Iudasa tutulina.” <sup>26</sup> Yadi velu'ui i 'a'avana, mulieta 'adi 'ailuga 'adi wagava i kilumidi kileu 'waidie i dodogidi vedie, mulieta tamu tomata'aulele ma mata'uluna kileu 'aitamogana i 'ewai. Kileunina bei Mataiasi 'ana wagava i kilumi bega fuedi i 'asetai taunina Yaubada i venua'ivineni bega tomata'aulele 'adi 'aila'a 12.

## 2

*'Anu'anunu 'Atumaina yana mai.*

<sup>1</sup> ✧Iesu yana tovi-vaitugana mulieta 'aiata 50 i 'a'ava, Diu yadi Sakali Fenitikosi 'ana tutuya i le'wa. 'Aiatanina 'waineye Iesu 'ana tovetumaganavo fuedi i va'auta 'eba mia 'aitamogana 'waineye. <sup>2</sup> I miamiani nika abamega kaukau bani'odi butu'aina bwaikaotogina i nogai vanuga matatabuna i susuli. <sup>3</sup> ✧Fuedi tamu nani i 'iseni bani'odi 'ai meana i souyedi i obuobu tomotoga 'aitamogana 'aitamogana i 'abitonovidi. <sup>4</sup> ✧Anu'anunu 'Atumaina tovetumaganavo matatabudi i agedi begaidi 'aitamogana

✧ 1:20: Same 69:25; 109:8 ✧ 1:24-25: Ion 2:25 ✧ 2:1: VeL 16:9-11 ✧ 2:3: Mad 3:11; Ion 3:8 ✧ 2:4: Ion 14:17; Fol 4:31; 10:44-46



'aitamogana yana 'alavelevelena 'wainega i vonavona, bonanidi basenadi kebu i da 'asetadiga 'waidiega.

<sup>5</sup> Ielusalema 'waineye Diu fueidi i miamiani Yaubada 'ana tove'ililibu i maia 'awalawa tulidi 'waidiega. <sup>6</sup> Tutuyanina kaukau butu'aina i nogai Diunidi i ve'ilililide i nagoi bei tovetumaganavo i miamianiga 'waineye. 'Aitamogana 'aitamogana bonana i nogai nuadi i voganidi. <sup>7</sup> Nuadi i 'ewai bega i vo, Tomotoganidi i vonavonaga, matatabudi 'awalawa Galili 'wainega i maia. <sup>8</sup> Bani'odi i munega mali vona i 'asetadi, fai 'aitamogana 'aitamogana bonada ta noganogai? <sup>9</sup> 'Ifwaida me Falidia, me Midia, me Ilamu wata 'ifwaida Mesafotemiayega ta maia. 'Ifwaida me Iudia, 'ifwaida me Kafadosia, 'ifwaida me Fonito wata 'ifwaida me Eisia. <sup>10</sup> 'Ifwaida ta maia Filigia wata Famifilia 'waidiega, 'ifwaida Itifita 'wainega, wata 'awalawa Libia Sailini lilivanega, wata 'ifwaida Loma 'wainega ta maia. <sup>11</sup> \*'Ifwaida Diu mogitana we'e 'ifwaida tulida siwe ta ve-Diu. Wata 'ifwaida Kilitiega 'ifwaida Aleibiyega. Matatabuda ta maia 'awalawa tulina tulina 'waidiega siwe nani bwaikidi Yaubada i 'idewadi 'aitamogana 'aitamogana bonadega i vonavona ta noganogaidi.” <sup>12</sup> Nuadi i voganidi bega 'aitamogana 'aitamogana i velutolitoli i vo, Bani'odi i munega? 'Ana 'asetava'ai?” <sup>13</sup> We'e tomotoga 'ifwaidi tovetumaganavo i sidibidibiedi igodina ufa toketokena i da yemu nuadi i da lugaugaudi bega i da vona-'avo'avovo.

### *Fita yana lau'age.*

<sup>14</sup> Fita yadi vona i nogai, enavo 11 taiadi i tovoi bega Fita bonana bwaikinega 'aila'a i vonedi i vo, Ekwavo, fuemi 'wa miamiani Ielusalema 'waineye wata 'awalawa Iudia nageneye, 'wa ve'wada naninina i souyeniga a na kiavemagetai. <sup>15</sup> Yami nuanua 'wa vo 'ima ufa toketokena 'a yemu bega nuama i lugaugaudi. Siwe kebu, de'e bola 'awa'awai, yada sauluva kebu 'awa'awaie ta da yemuyemu. <sup>16</sup> We'e mogitana, basenadiotoga Yaubada yana tolu'ivona Ioeli i vona-vagata vonanina i kilumi ava'ai 'wa 'ise'iseni faifaina.

<sup>17</sup> Yaubada i vo, Sai'afoga fwayafwaya 'ana 'eba ve'a'ava 'waineye, 'Anu'anunuku tomia fwayafwaya fueidi a na veledi bega i na agedi. Natumiavo i na vona-vagata ava'ai'awaie i na souyediga faifaidi, 'au'auveavo wata tubuvauvau nani fueidi a na vedi 'enoneganega 'waidiega.

<sup>18</sup> Wata bani'odi 'aiatanidi 'waidie, yaku tofolovavo iave-tadi wata vevinedi 'Anu'anunuku a na veledi bega yaku Vona i na lu'ivoneyedi.

19-20 Tugusa a na vedi abame, inala i na dudubali wata weta'i i na yamota bani'odi dayaga. Fwayefwayeye 'eba nuavogana wata 'eba nua'ewa a na 'idewadi bani'odi dayaga, 'ai-'ala'alata, wata lufwa bwaikina i na 'isedi, mulieta 'Auvea i na souyeni. 'Aiatanina 'waineye fuei i na kololo 'Auvea yana toketokena wata yana 'ai'aiwabu magemagetadi faifaidi.

21 Tutuyanina 'waineye egavo nuanuadi 'aivaita, Yaubada 'waineye i na vegole nika i na 'ita'ita'iedi."

22 ✨Wata Fita i vo, Me Isileli a na vonemi, side bani'odi. Iesu Nasalediega faifaina a vonavona. 'Akonadi 'wa 'asetai taunina 'eba nuavogana wata 'eba nua'ewa fuei i 'idewadi matamie, naninidi toketokedi 'waidiega Yaubada i vemi veimea Iesu i veleni. 23 ✨Tomogonina to'etogiluva i 'aniveleneni 'waimie we'e 'omi 'wa tauyeni tosakona 'waidie i tutufwaseni 'ai lagalagana 'waineye. Nagami Yaubada yana nuanua i 'idewai wata i 'asetai naninidi i na souyedi bega i tauyeni Iesu i mai i wafa. 24 Wafa 'ana veviga 'wainega Yaubada i 'ita'ita'ieni i sivetovoi-vaitugani, fai kebu 'ana fata wafa i na kiave'avina-vagaseni. 25 ✨Basenadiotoga Kini Devida i vona-vagata vonanina i kilumi Iesu yana vona Yaubada 'waineye i vo,

A 'asetai 'Auvea tutuya fuei 'aku 'weabu i miamia 'aku 'atagiega. Yaubada toketokena i 'i'ivaiseku bega kebu a na be'u vita 'waidie.

26-27 Faifainanina ma yaku sosoana a subisubia. Tutuyanina a na wafa a 'asetai a na ve'atumai, avinodi 'anunuku i na nago towafa yadi 'eba mia 'waineye siwe kebu 'u na baileku bega a na wafaotoga. Yau yamu Tofolova Magemagetaku kebu 'u na tauyeku bega tomogoku i na bokana.

28 Mia-vagata 'ana 'eda 'akonadi 'u veku wata matamuye yamu toketokena 'wainega a na sosoana bwaikina."

29 ✨Ekwavo, de'e a na kiavemageta tubuda Kini Devida faifaina. Basenadiotoga i wafa i tavuni, 'ana taumata tutuya fuei ta 'ise'iseni bega ta 'asetai kebu i da vona-vagata taunina faifaina. 30 ✨Tutuyanina Kini Devida ma yawaineye, taunina Yaubada yana tolu'ivona, i 'asetai Yaubada yana vona'awaufaufa 'waineye bola yana 'aila'a 'wainega tamu tubuna Yaubada i na sivetovoi i na ve-kini taunina bani'odi. 31 ✨Fai Devida i 'asetai bola ava'ai Yaubada i na 'idewai bega Keliso, taunina Yaubada 'ana Venua'ivina, yana tovi-vaitugana faifaina i vona-vagata i vo,

Yaubada kebu i na baileni towafa yadi 'eba mia 'waineye, wata tomogona kebu i na bokana."

✨ 2:22: Ion 3:2 ✨ 2:23: Fol 4:27,28 ✨ 2:25: Same 16:8-11 ✨ 2:29: 1 Kin 2:10; Fol 13:36 ✨ 2:30: Same 132:11 ✨ 2:31: Same 16:10

32-33 ✧Tomogonina taunina Iesu, Yaubada wafayega i sivetovoia, matatabuma matamega 'a 'iseni. Yaubada i silakai veimea i veleni i miabui 'ana 'atagiega, wata 'Anu'anunu 'Atumaina i veleni basenadi bani'odi Tamana i vona'awaufaufa 'waineye. 'Anu'anununina Tamada Iesu i veleniga, 'asiau wata 'ima i velema i agema, 'akonadi 'wa 'iseni wata 'wa nogai. 34-35 ✧Iesu ma tomogona i laka abame we'e Devida kebu, begaidi ta 'asetai Devida i vona-vagata tamu tomogo faifaina i vo,

Yaubada i vona 'aku Toveimea 'waineye i vo,  
Veimea a velemuga bega 'u na miabui 'aku 'atagiega,  
I na nagoga 'amu gaviavo a na leodi bega 'u na veveimeyedi.”

36 Wata Fita i vona 'aila'a 'waidie i vo, 'Ida me Isileli fueda ta na 'aseta-'atumaia Toveimeanina i voneyeniga taunina Iesu siwe yami veimea 'wainega i tutufwaseni 'ai lagalagana 'waineye, Yaubada i silakai bega 'ana Venua'ivina wata 'ada Toveimea.”

*'Aila'a bwaikina i vetumagana Iesu 'waineye.*

37 ✧Tutuyanina tomotoga Fita bonana i nogai nuafoudi i veviga bwaikina, tomata'aulelevo i velutoliedi i vo, Emavo, bani'odi 'a na munega?” 38 Fita i vo, 'Aitamogana 'aitamogana 'wa na nuavilami yami sakona 'wa na vedumwe'ubu'ubusedi wata 'wa na bafitaiso Iesu Keliso 'ana wagavayega bega Yaubada yami sakona i na nuatavunidi wata 'Anu'anunu 'Atumaina i na velema. 39 ✧Basenadi Yaubada i vona'awaufaufa 'Anu'anunu 'Atumaina i na veleda, wata vona'awaufaufanina i na damana natudavo 'waidie wata egavo i miamiani 'ani'ie 'Auvea yada Yaubada i na goledi i na nagoi 'waineye.”

40 Wata 'ifwaidi vona 'waidiega i velu'ase'asedi i vo, Bola Yaubada tosakona fuedi i na luvematavulogidi bega yadi sauluva sakoidi 'wa na bailedi nika taunimi 'wa na 'ita'ita'iemi.” 41 ✧Aiatanina 'waineye tomotoga bani'odi 3000 Fita yana vona i vetumaganeni, i bafitaiso i luku tovetumaganavo 'adi 'aila'a 'waineye.

*Iesu 'ana tovetumaganavo yadi sauluva.*

42 Tutuya fuedi tovetumaganavo taunidi i tauyedi tomata'aulelevo yadi ve 'waidie, i veveiana, Yaubada 'waineye i vevelu'ui, wata Iesu 'ana 'eba nuave'avina faifaina ma fuedie i 'ani'ani. 43 ✧Matatabudi ma yadi kololo Yaubada i ve'ililibuyeni, we'e tomata'aulelevo 'eba nuavogana wata 'eba nua'ewa fuedi i 'idewadewadi

✧ 2:32-33: Fol 1:4,8, 7:55,56; 1 Fit 3:22 ✧ 2:34-35: Same 110:1 ✧ 2:37: Fol 16:30-33 ✧ 2:39: Efe 2:12,13,17 ✧ 2:41: Fol 4:4; 5:14 ✧ 2:43: Fol 5:11,12

tomotoga matadie. <sup>44</sup> ☆Tovetumagananidi matatabudi i veveiana wata nani 'ifwaidi 'waidiega i veve'ivaiva. <sup>45</sup> Yadi kukua i vekimwaneyedi, tutulidi i 'ewadi wekowekoma i veledi 'aitamogana 'aitamogana yana nuanua 'ana fata bani'odi. <sup>46</sup> ☆'Aiata 'aitamogana 'aitamogana matatabudi i mimiava'auta vanuga 'eba velu'ui 'waineye, wata yadi vanuge ma yadi sosoana wata ma yadi nuaobu i 'a'aniluvetubama bega Iesu i na nuave'avini. <sup>47</sup> ☆Yaubada i subisubiai we'e tomotoga 'ifwaidi yadi sauluva i 'iseni nuadi i 'ewai i ve'ililibuyedi. 'Aiata 'aitamogana 'aitamogana tovetumaganavo 'adi 'aila'a i vevebwaika fai egavo Iesu Valana i vetumaganeni 'Auvea i 'ita'ita'iedi i lukuluku 'adi 'aila'a 'waineye.

### 3

#### *Tomogo 'agena sinunumina i ve'atumai.*

<sup>1</sup> Tamu 'aiata Fita wata Ioni i nagoi vanuga 'eba velu'ui 'waineye. 'Akonadi 'auyewa i 'awavilai, velu'ui 'ana tutuya i le'wa. <sup>2</sup> ☆Vanuga 'eba velu'ui tamu 'awana 'ana wagava 'Awa 'ana 'isa 'Atumaiotogina, bei tomogo 'agena sinunumina inana kamodiega i miamia. 'Aiata 'aitamogana 'aitamogana enavo i nunaweni bei i vevemiabuia egavo i nunagoi vanuga 'eba velu'ui 'waineye, 'waidie mani i vevelu'ui. <sup>3</sup> Tutuyanina Fita wata Ioni i 'isedi i mimai 'waidie i velu'ui 'ai'edi tamu ava'ai i da veleni. <sup>4</sup> Siwe 'adi 'ailuga i 'isadewai Fita i voneni i vo, 'U 'isamaiema." <sup>5</sup> I 'isanawedi yana nuanua i vo 'ako, Ava'ai i na veleku?" <sup>6</sup> ☆Nika wata Fita i voneni i vo, Kebu tamu mani 'waikuye bega a na velemu, siwe nani tamu a na velemu. Iesu Keliso 'atamana Nasaledi 'wainega yana toketokenayega a na vonemu, 'U tovoi 'u yaba." <sup>7-8</sup> Fita 'ana 'atagie i 'abi i sivetovoia nika 'agena wata 'ana buseumatana i vetoketoke i luafwalagi i yaba. Mulieta Fita wata Ioni ma fuedie i luku vanuga 'eba velu'ui 'waineye, tomogonina i yogosousou Yaubada i subisubiai. <sup>9-10</sup> 'Aila'a bwaikina tomogonina i 'iseni i yogosousou wata Yaubada i subisubiai, i 'isa'innanai taunina totalavelu'ui yana 'eba mia vanuga 'eba velu'ui 'awaneye begaidi fuedi nuadi i voganidi wata nuadi i 'ewai yana ve'atumai faifaina.

#### *Fita yana lau'age vanuga 'eba velu'ui 'waineye.*

<sup>11</sup> Vanuga 'eba velu'ui masi'edana 'ana wagava Masi'eda Solomoni bei tomogonina i ve'atumaiga Fita wata Ioni taiadi i vedima'abi'abi i tovoivoi. 'Aila'a i 'iseni i ve'atumai ma yadi nuavogana i ve'ilililide i mai 'waidie. <sup>12</sup> Fita tomotoga

i 'isedi i vonedi i vo, Emavo, awale nuami i voganidi wata 'wa 'i'isadewama? 'Omi 'wa nuaniga 'wa vo 'ako taunima yama toketokenayega 'alo yama sauluva magemagetadi 'waidiega tomogo de'e 'a da 'ive'atumaia, siwe kebu. Tamu tomogo yana toketokena 'wainega i ve'atumai. <sup>13</sup> ✧Ebelamo, Aisake, Iakobo, wata 'ifwaidi tubudavo yadi Yaubada, Natuna Iesu i silakai, toketokena wata veimea i veleni. Tomogonina 'wa 'aniveleneni yada to'edakumetavo 'waidie wafa faifaina, igodi Failato i da 'etoyavuya siwe 'wa baileni. <sup>14</sup> Taunina magemagetana, yana sauluva 'atumai'avana Yaubada mataneyeye siwe 'omi 'wa vedumwe'ai'aieni Failato 'wa voneni tamu to'ainike 'ana wagava Balaba i 'etoyavuya. <sup>15</sup> ✧Begaidi yami veimea 'wainega yawaida lamuna i luve-wafai siwe Yaubada i sivetovoia wafayega, 'ima matamega 'a 'iseni. <sup>16</sup> Iesu yana toketokena 'wainega tomogo de'e 'agena i 'ani'otoidi. Ava'ai 'wa 'iseni 'alo 'wa 'asetai yama vetumagana wata Iesu yana toketokena 'waidiega. Yama vetumagananina Iesu 'waineyeye tomogonina matamie i ve'atumai.

<sup>17</sup> ✧Ekwavo, side bani'odi. A nuani 'omi wata 'ida me Diu yada to'edakumetavo taiadi yami bavu 'wainega Iesu 'wa luvewafai fai kebu 'wa da 'asetai-atumaia taunina Yaubada Natuna. <sup>18</sup> ✧Basenadi Yaubada i venuayato yana tolu'ivonavo 'waidie bega i vona-vagata 'ana Venua'ivina Keliso veviga bwaikina i na veluagai mulieta i na wafa. 'Akonadi 'ana mogitana i souyeni yami veimea 'wainega. <sup>19</sup> Faifainanina yami sakona 'waidiega 'wa na nuavilami Yaubada 'waineyeye bega yami sakonanidi i na 'u'umidi. <sup>20</sup> Wata 'Auvea yada Yaubada 'aivaita i na velema bega 'anu'anunumi i na ve'atumai wata i na vetoketoke, nika Yaubada 'ana Venua'ivina, taunina Iesu i na vetunei faifaimi. <sup>21</sup> Tutuya de'e Iesunina i miamia abame i na nagoga Yaubada yana tutuya 'ana mogitana i na veluagai. Tutuyanina 'waineyeye nani matatabuna fwayefwayeye wata abame i na 'ive'ivaudi, bani'odi basenadiotoga yana tolu'ivona magemagetadi i vona-vagata. <sup>22-23</sup> ✧Wata bani'odi basenadiotoga Mosese i kilumi Yaubada yana Buki nageneyeye Iesu faifaina i vo,

'Auvea yada Yaubada bola tamu yana tolu'ivona i na vetunei 'waimie yau bani'odi. Taunina yada tomotoga 'waidega i na silakai wata nani matatabuna i na lu'ivonaga 'waimie bonana 'wa na nogai. 'Ai'edi aitoi kebu i na vematayakeyak-eniga Yaubada yana 'Aila'a 'wainega i na ve'idi'idieni i na wafaotoga.”

<sup>24</sup> Wata Fita i vonedi i vo, Basenadiotoga tolu'ivona matatabudi Yaubada yana nuanua i lu'ivoneyediga, i

✧ 3:13: Sou 3:15; Luk 23:13-25 ✧ 3:15: Fol 2:32; 5:30 ✧ 3:17: Luk 23:34

✧ 3:18: Luk 24:27 ✧ 3:22-23: VeL 18:15,18-19

vona-vagata naninidi i souyediga tutuya de'e faifaina. Tolu'ivonanidi bani'odi Samuela wata 'ifwaidi mulineye i mai. <sup>25</sup> \*Yaubada yana vona'awaufaufanidi tolu'ivona i lu'ivoneyediga 'omi faifaimi. Basenadiotoga Yaubada i vona'awaufaufa tubudavo 'waidie wata 'omi 'waimie. Wata bani'odi i voneyedi tubuda Ebelamo 'waineye i vo,

Yau a na nuakalikaliemu bega tubumwavo 'waidiega ma yaku nuakalikali a na vesauluva 'atumaina tomia fwayafwaya matatabuna 'waidie.”

<sup>26</sup> Nika mogitana Yaubada Natuna i venua'ivineni nagami 'waimie i vetunei bega i na vesauluva 'atumaina 'waimie i na kiavenuavilami yami sauluva sakoidi 'waidiega.”

## 4

### *Fita wata Ioni i tovoi Kaniselo matadie.*

<sup>1</sup> Tutuyanina Fita wata Ioni i vonavona tomotoga 'waidie, 'ifwaidi totafalolo i maia 'waidie. Taunidi tovelomu, Diu 'ifwaidi 'adi wagava Sadusi, wata tolugavia 'adi to'edakumeta, taunidi vanuga 'eba velu'ui 'ana to'isave'avinavo. <sup>2</sup> Ma yadi nuasako i maia fai yadi nuanua igodina towafa kebu i na tovoi-vaitugana, siwe Fita wata Ioni tomotoga 'waidie i veve i vo, Yaubada Iesu i sivetovoia wafayega begaidi towafa fueidi i na yawasa-vaitugana.”

<sup>3</sup> \*Faifainanina i 'ive'avinidi siwe 'akonadi i lavia i yatodi vanuga 'eba yogona 'waineye i 'eno. <sup>4</sup> \*We'e fueidi Iesu valana i nogai i vetumagana i luku tovetumaganavo 'waidie i 'imoso'iedi bega iaveta'ava 'adi 'aila'a 5000, siwe wata vevine kwakwama taiadi.

<sup>5</sup> I 'atai, me Diu yadi toveimeavo, yadi to'edakumetavo 'au'auveadi wata ve'etoboda 'adi tovevo i va'auta Ielusalema.

<sup>6</sup> Wata 'ifwaidi tomotoga taiadi, Anasa tovelomu bwaikina ma yana 'aila'avo, wata Kaiafa, Ioni, Alekisana taiadi. <sup>7</sup> \*I va'auta'a'ava, Fita wata Ioni i miedi matadie i velutololiedi i vo, Tomogo bani'odi 'wa munegi i ve'atumai? Ava'aiega yami toketokena 'wa veluagai 'alo aitoi 'ana wagavayega?”

<sup>8-9</sup> Siwe 'Anu'anunu 'Atumaina Fita i agei mogitana bega yadi velutoli i tutuli i vo, 'Omi 'ama to'edakumetavo, wata yama 'auveavo, 'asiau 'wa velutoliemaga, voke tomogo 'agenas sinunumina 'a 'ivaiseni i ve'atumai faifaina.

<sup>10</sup> \*Siwe 'omi wata me Isileli fuemi 'wa na 'asetai, tomogonina 'wa 'ise'iseni, Iesu Keliso 'atamana Nasaledi 'wainega yana toketokena 'wainega i ve'atumaiotoga. Tomogonina Yaubada 'ana Venua'ivina, basenadi 'omi 'wa tutufwaseni 'ai lagalagana 'waineye siwe Yaubada i sivetovoia wafayega.

11 ✨ Basenadiotoga i kilumi Yaubada yana Buki 'waineye Iesu faifaina i vo,

Folovanina 'omi to'aiyogona 'wa baileni,  
Yaubada i silakai i ve'unututuyeni.”

12 ✨ Side bani'odi. Fai Yaubada Iesu i silakai, 'aiseotogina 'ana fata i na 'ita'ita'ieda. Yaubada Iesu i veleda bega i na 'ita'ita'ieda, we'e tomia fwayafwaya matatabuna 'waidega kebu tamu aitoi bani'odiga.”

13 Diu yadi Kaniselovo Fita wata Ioni yadi venuafoufa'ala i 'iseni wata i 'asetadi taunidi tomotoga-'avo'avovo kebu i da luku sikulu 'waineye, faifainanina nuadi i voganidi yadi vona 'atumaina faifaina, bega i nuani Iesu 'adi 'weabu wata 'adi tove. 14 To'edakumetavonidi kebu tamu ava'ai 'adi fata i da voneyeniga fai tomogonina i 'iseni 'akonadi i ve'atumai taiadi i tovtovoi. 15-16 ✨ Bega i vonedi 'adi 'aitonu i souyedi tutudaba 'wainega kaniselovo 'aise'avadi i veifufu i vo, Bani'odi ta na munegidi? Kebu 'ada fata yadi folova toketokena ta na awave'ewe'eweni fai tomotoga fueidi Ielusalema nageneye 'akonadi i 'asetai Fita wata Ioni tomogonina i 'ive'atumaia. 17 ✨ Siwe 'adi 'ailuga ta na talabodedimo kebu wata Iesu Valana i na lu'ivona-vuvueni mali tomotoga 'waidie bega nani de'e kebu i na vebwaika.”

18 I goledi i luku-vaitugana 'waidie i velu'ase'asedi i vo, 'A talabodemi, kebu wata 'wa na veveifufu 'alo 'wa na veve Iesu faifaina.” 19-20 Siwe Fita wata Ioni yadi vona i tutuli i vo, 'Omi taunimi 'wa na venua'ivina ava'ai nuanuaga Yaubada mataneye 'atumaina. 'Omi yami nuanua 'a na vematayakeyakeni 'alo Yaubada? 'A nuaniga kebu 'ama fata 'a na 'ailove 'a na vonavona, fai Iesu yana folova matamega 'a 'iseni wata yana vona tanigamega 'a nogai.”

21-22 Kaniselovo kebu tamu ava'ai Fita wata Ioni 'waidiega i da veluagai bega i na luvematavulogidi we'e tomotoga fueidi Yaubada i subisubiai tomogonina i 'ive'atumaiga faifaina, begaidi kebu 'adi fata i na nikedi. Tomogonina i ve'atumaiga kebu tubuvauvaunaga 'ana malamala 40 i 'iaweni. Wata Kaniselovo i kwayega i talabodebodedi, mulieta i vonedi i souyedi.

*Tovetumaganavo i velu'ui Yaubada 'waineye.*

23 Tutuyanina Fita wata Ioni i souyedi i viladi i nagoi 'adi 'aila'avo tovetumagana 'waidie i lu'ivona tovelomu bwaikidi wata to'edakumetavo 'au'auveadi yadi vona. 24 I lu'ivona i 'a'avana, ma fueдие yadi nuanua 'aitamoganega Yaubada 'waineye i velu'ui i vo, 'Auvea, 'omu bwaikimu,

✨ 4:11: 1 Fit 2:7; Same 118:22-23

✨ 4:12: Ion 14:6

✨ 4:15-16: Ion 11:47

✨ 4:17: Fol 5:28-29

abama, fwayafwaya, wata ufa 'adi to'idewadewa wata nani fuedi nagedie i 'eno'enovi. <sup>25</sup> ✧Basenadiotoga 'Anu'anunu 'Atumaina i venuayato yamu tofolova wata tubuma Devida 'waineye bega i vona-vagata vonanina i kilumi i vo,

Awale tomotoga 'aila'a tulina tulina i nuasako bwaikina Yaubada 'waineye?

Tomotoganidi yadi nuanua givagivana i 'idewa-wayogeni, igodi i da vesauluva sakoina 'Auvea 'waineye.

<sup>26</sup> Kini fuedi yadi 'eba vetalaga i 'idewadi wata to'edakumetavo i va'auta nuanuadi Yaubada wata 'ana Venua'ivina taiadi i na vetalaga.”

<sup>27</sup> ✧Yadi nuanuananina basenadiotoga Devida i voneyeni siwe 'akonadi 'ana mogitana i sousouyeni 'atamana de'e 'waineye, fai Kini Elodi wata Fonitio Failato i va'auta me Isileli wata mali tomotoga taiadi. Bega yadi nuanua 'aitamogana 'wainega Iesu yamu Tofolova Magemagetana 'u venua'ivineniga, i vedumwe'ai'aieni. <sup>28</sup> ✧Basenadiotoga ma yamu toketokena yamu nuanua 'u 'idewai Iesu faifaina, we'e ava'ai tomotoganidi i 'idewadewadi fai nagami yamu nuanua bani'odi. <sup>29</sup> ✧'Auvea 'akonadi 'u 'asetai tomotoganidi nuanuadi veviga bwaikina i na vevelema, faifainanina 'ima yamu tofolovavo 'u na 'ivaisema bega yamu vona matatabuna venuafoufa'alayega 'a na lulu'ivoneyedi. <sup>30</sup> Wata nuanuama yamu Tofolova Magemagetana Iesu, yana toketokena 'wainega 'eba nuavogana wata 'eba nua'ewa 'u na 'i'idewadi wata tovigga 'u na 'i'ive'atumaidi.

<sup>31</sup> ✧Tutuyanina i velu'ui'a'ava, Yaubada yana toketokena 'wainega vanuga i yue. 'Anu'anunu 'Atumaina tovetumaganavo i agedi mogitana, ma yadi venuafoufa'ala Yaubada yana Vona i veveifufuyedi.

### *Kukuayega i veve'ivaivaita.*

<sup>32</sup> ✧Tovetumaganavo matatabudi yadi nuanua 'aitamogana. Naninidi 'waidie, 'waidiega i ve'ivaivaita ma ediavo kebu tamu aitoi i da veumokai. <sup>33</sup> Toketokena bwaikina 'wainega tomata'aulelevo i lulu'ivona mogitana Toveimea Iesu yana tovi-vaitugana faifaina, wata ma yana nuakalikali Yaubada i vevesauluva 'atumaina 'waidie <sup>34-35</sup> ✧Tovetumagananidi kebu tamu aitoi i da 'usa tamu nani 'wainega fai egavo ma yadi kukua bwaikidi i vevekimwaneyedi tutulidi i 'ewa'ewadi tomata'aulelevo i veveledi, mulieta i veveusedi 'aitamogana 'aitamogana yana nuanua 'ana fata bani'odi.

<sup>36-37</sup> ✧Bani'odi Iosefa, tomata'aulelevo i goleni Banabasa,

✧ 4:25: Same 2:1-2 ✧ 4:27: Mad 27:1-2 ✧ 4:28: Fol 2:23 ✧ 4:29: Efe 6:19 ✧ 4:31: Fol 2:4 ✧ 4:32: Fol 2:44 ✧ 4:34-35: Fol 2:25 ✧ 4:36-37: Fol 11:22-26; 13:2-3



'ana saivila To'aivaita, yana fwayafwaya i vekimwaneyeni maninina i mieni i 'aniveleneni tomata'aulelevo 'waidie. Tomogonina i tubuga Imula Saifilosu 'waineye wata Livai 'ana wauma 'wainega.

## 5

### *Ananiasi wata Safaila yadi vekali.*

<sup>1</sup> Tovetumaganavo ma ediavo kukuayega i veve'ivaivaita we'e iadi tamu 'ana wagava Ananiasi ma yana vavine Safaila 'ifwaidi yadi fwayafwaya i vekimwaneyeni.

<sup>2</sup> ✧Maninina i 'ewai, 'ifwaidi i ve'o'oledi wata 'ifwaidi Ananiasi i nawedi tomata'aulelevo i veledina i vonedi i vo, Side, yama fwayafwaya tutulina matatabuna a mieni." Wata yana vavine yana vekali i 'asetai.

<sup>3</sup> ✧Tutuyanina maninina i veledi Fita i vo, Ananiasi, awale taunimu 'u tauyemu Seitani yana nuanua 'waineye, bega 'u vekali 'Anu'anunu 'Atumaina 'waineye? Yamu vekalinina fai 'ifwaidi yami fwayafwaya tutulina 'u ve'o'oleni 'u vo, Matatabuna a mieni."

<sup>4</sup> Basenadi 'omu yamu fwayafwaya, wata tutuyanina 'u vekimwaneyeniga tutulina 'omu yamu mani. Awale yamu nuanuananina bani'odi i souyeni? Kebu 'aisema 'u da vekaliemaga, wata 'u vekali Yaubada 'waineye."

<sup>5</sup> Tutuyanina Fita yana vona i nogai i wafa i 'awauliulia. Fuedi valana i nogai Ananiasi bani'odi i munega i wafa, i kololo bwaikina. <sup>6</sup> Mulieta nigolalaga i maia tomogona i fania i evai i naweni i tavuni.

<sup>7</sup> 'Awasasa 'aitonu i 'a'ava wata yana vavine i mai we'e yadi lamoga yana wafa kebu i da 'asetai. <sup>8</sup> Fita i vonedi i vo, Nuanuaku a na 'asetai, vona mogitana de'e yami fwayafwaya tutulina matatabuna 'alo kebu? Safaila i vo, E'e matatabuna."

<sup>9</sup> Wata Fita i vo, Awale ma yami lamoga yami nuanua 'aitamogana 'wainega 'Auvea 'Anu'anununa 'wa silubuya? We'e nigolalaga yami lamoga i tavuniga siwe 'akonadi i le'wai 'omi wata 'ako i na evami i na nawemi i na tavunimi." <sup>10</sup> Nika i wafa i 'awauliulidi Fita 'ageneye. Nigolalaganidi i luku i 'isedi 'akonadi i wafa i evadi i nawedi i tavunidi yadi lamoga lilivaneye.

<sup>11</sup> Iesu yana 'Aila'a matatabudi valadi i nogai i kololo bwaikina wata mali tomotoga fuedi taiadi.

### *Tomata'aulelevo tovinga fuedi i 'ive'atumaidi.*

<sup>12</sup> ✧Tomata'aulelevo 'eba nuavogana wata 'eba nua'ewa fuedi i 'i'idewadi tomotoga matadie. Tovetumaganavo yadi sauluva i vava'auta Masi'eda Solomoni 'waineye vanuga 'eba velu'ui nageneye. <sup>13</sup> Tomotoga fuedi tovetumaganavonidi i

ve'ililibuyedi siwe kebu i da nagoi 'waidie i kololo. <sup>14</sup> We'e 'ifwaidi i vevetumagana Toveimea Iesu 'waineye i lukuluku 'adi 'aila'a 'waineye bega i veve'ila'edi, vevine wata iaveta. <sup>15</sup> Fai tomata'aulelevo 'eba nuavogana wata 'eba nua'ewa i 'i'idewadi, toviga ma 'ividi i mimaiedi 'edeye i yatoyatodi bega bola Fita 'ifwaidi i na 'abitonovidi, we'e 'ai'edi kebu, 'ifwaidi i na ve'i'wa'uyedimo i na ve'atumai. <sup>16</sup> \*Wata tomotoga 'aila'a bwaikaotogina 'atamana fuedi Ielusalema lilivaneye yadi toviga i miedi wata 'ifwaidi yaiaina i agediga siwe matatabudi i ve'atumai.

*Tomata'aulelevo i 'ive'avinidi.*

<sup>17-18</sup> \*Tovelomu bwaikina ma enavo totafalolo Sadusi, ma yadi nuasako, tomata'aulelevo i ve'unumagigiedi, i 'ive'avinidi i yatodi vanuga 'eba yogona 'waineye. <sup>19</sup> \*Siwe lovananina 'waineye tamu 'Aueva yana anelose vanuga 'eba yogona 'ana saiboda i sibaleni i vonedi i souyedi. <sup>20</sup> Wata i vonedi i vo, 'Wa na nagoi 'wa na luku vanuga 'eba velu'ui 'waineye tomotoga 'waidie 'wa na veifufu-dewa mia 'ivauna Iesu 'wainega faifaina.” <sup>21</sup> Tomata'aulelevo bonana i nogai, mulieta i 'atai i luku vanuga 'eba velu'ui nageneye bei i veve tomotoga 'waidie.

'Aiatanina 'waineye Diu yadi kaniselovo matatabudi i va'auta, taunidi tovelomu bwaikina ma enavo wata Diu yadi to'edakumetavo 'au'auveadi. Tolugaviavo i vonedi i nagoi vanuga 'eba yogona 'wainega tomata'aulelevo igodi i da miedi kaniselovo 'waidie. <sup>22-23</sup> Tutuyanina tolugaviavo i le'wai tomata'aulelevo i 'isa'avadi bega i viladi i nagoi kaniselovo 'waidie i lu'ivona i vo, 'A le'wai vanuga 'eba yogona 'a 'iseni 'ana saiboda fa'alidi wata to'isave'avinavo i tovtovoi 'awa lilivadie, siwe saiboda 'a sibaleniga kebu tamu aitoi 'a da veluagai nageneye.” <sup>24</sup> Tutuyanina tolugaviavo 'adi to'edakumeta wata tovelomu 'adi to'edakumetavo yadi vona i nogai, nuadi i voganidi i vo, Bani'odi i munega i souyedi?”

<sup>25</sup> I vonavona nika tamu tomogo i le'wa i vonedi i vo, 'Wa ve'wada a na vonemi, tomotoganidi 'wa yatodiga vanuga 'eba yogona 'waineye, sino i veve tomotoga 'waidie vanuga 'eba velu'ui nageneye.” <sup>26</sup> Bega tolugaviavo ma yadi to'edakumeta i nagoi vona bikanega tomata'aulelevo i veviladi. Kebu bonadi i da siaya'aia fai tomotoga i kololoyedi, bola tomata'aulelevo i na 'ikasikasisiedi kileuyega i na nikedi.

<sup>27-28</sup> \*Tolugaviavo tomata'aulelevo i miedi kaniselo matadie tovelomu bwaikina i vonedi i vo, Basenadi 'a

\* 5:16: Mak 6:56; Fol 19:11,12    \* 5:17-18: Fol 4:1-3    \* 5:19: Fol 12:7-10

\* 5:27-28: Fol 4:18-19; Mad 27:25

talabodemi 'a vo, Iesu faifaina kebu 'wa na veve.” Siwe 'akonadi yami venina tomia Ielusalema matatabudi i 'asetai, wata nuanuami 'wa na 'uwanima yana wafa faifaina.” <sup>29</sup> Fita ma enavo yadi vona i tutuli i vo, 'Omi, wata mali tomotoga yami vona kebu 'a na vematayakeyakedi, Yaubada 'aisena yana nuanua i lubwaineni. <sup>30</sup> 'Omi Iesu 'wa luwewafai 'ai lagalagana 'waineye, siwe tubudavo yadi Yaubada wafayega i sivetovoia. <sup>31</sup> \*Wata i silakai i vemiabuia 'ana 'atagiega veimea i veleni bega taunina yada To'edakumeta wata 'ada To'ita'ita'i, bega 'ida me Isileli 'ada fata ta na nuavilada Yaubada yada sakona i na nuatavunidi. <sup>32</sup> \*Yana wafa wata yana tovi-vaitugana matamega 'a 'isedi wata 'Anu'anunu 'Atumaina i 'asetai. Yaubada 'Anu'anununina 'Atumaina i velema 'ima 'ana tovmatayakayaka 'waimeye.”

### *Gamelieli enavo i talabodedi.*

<sup>33</sup> Kaniselovo yadi vonanina i nogai i nuasako bwaikina yadi nuanua 'aitamoganega i vo, Ta na nikedi i na wafa.” <sup>34-35</sup> Siwe tamu iadi 'ana wagava Gamelieli taunina totafalolo Falisi, ve'etoboda 'ana tove, wata fuedi i ve'ililibuyeni, i tovoi matadie tomata'aulelevo i vonedi i souyedi. Mulieta Gamelieli kaniselovo i vonedi i vo, Ekwavo, 'ai'edi nuanuami 'wa na vo ava'ai 'wa na 'idewai de'e tomotoganidi 'waidie, nagami 'wa na nuanua tonovina. <sup>36</sup> Basenadi tamu tomogo 'ana wagava Tiudasi i vo, Yau tomogo bwaikiku, 'waikuye 'wa na 'isa wata 'wa na vetutuyameku,” bega tomotoga bani'odi 400 i nagoi 'waineye. Siwe mali tomotoga i niki i wafa, 'ana tovetutuyamavo i ve'iyavuyavulagi yana nuanuananina igodi i da 'idewaiga i 'a'ava. <sup>37</sup> Mulieta gabemani tomotoga 'adi wagava i kilukilumidi tutuyanina 'waineye, tamu tomogo Galili 'ana wagava Iudasa yana nuanua tamu i 'idewai wata tomotoga fuedi i nagoi 'waineye. Taunina wata i wafa, yana tomotoga wata yana nuanuananina i 'iawelovedi. <sup>38-39</sup> Wata 'asiau bani'odi. A vona mogitana. 'Ai'edi Iesu valana tomotoga yadi nuanua, bola i na 'a'ava fai taunina 'akonadi i wafa tomotoganidi 'adi 'ailuga bani'odi, we'e 'ai'edi Yaubada yana nuanua, kebu 'ami fata 'wa na leodi. Fai voke bola 'wa na nunagoi Yaubada taiadi 'wa na vevetalaga. Faifainanina de'e tomata'aulelenidi kebu 'wa na nikedi. 'Wa bailedi i na nagoi.” Kaniselovo matatabudi Gamelieli yana vona i nogai i ve'ililibuyeni. <sup>40-41</sup> \*Mulieta tolugaviavo i vonedi tomata'aulelevo i miedi i toke i fitalidi mulieta kaniselovo i talabodedi kebu wata Iesu faifaina i na veveifufu. I 'a'avana i vonedi i na nagoi nika ma yadi sosoana

\* 5:31: Efe 1:20; Ibu 12:2    \* 5:32: Fol 1:8    \* 5:40-41: Fol 4:18; Mad 5:10-12; 1 Fit 4:13

i souyedi kebu i da bunumayaga i vo, Yaubada i tauyeda veviga ta veveluagai Iesu faifaina.”

42 ✨'Aiata 'aitamogana 'aitamogana tomata'aulelenidi i lukuluku vanuga 'eba velu'ui 'waineye wata tomotoga yadi vanuge, 'waidie i veve wata i lalau'age Iesu Valana 'Atumaina faifaina i vo, Iesu taunina Keliso, Yaubada 'ana Venua'ivina.

## 6

*To'aivaita 'adi 7 i venua'ivinedi.*

1 'Aiata 'aitamogana 'aitamogana tovetumaganavo 'adi 'aila'a i vevebwaika, siwe 'ifwaidi i nuavita yadi 'wabu'wabulavo faifaiddi. Tovetumaganavo 'ifwaidi me Guliki i vonavona i vo, 'Aiata 'aitamogana 'aitamogana tomata'aulelevo 'ani'ani 'wabu'wabulavo i vevelediga, yama 'wabu'wabulavo 'adi 'anivelena siaina, we'e me Ibeliu yadi 'wabu'wabulavo 'adi veuveuta bwaikina.”

2 Faifainanina tomata'aulelevo 'adi 12 tovetumaganavo matatabudi i goledi i va'auta taiadi i veifufu i vo, Yama folova mogitana Yaubada yana Vona 'a na lalau'age. Kebu i da lubwainema folovanina 'a na baileni we'e 'ani'ani 'a na 'i'isave'avini. 3 Faifainanina side bani'odi emavo, 'waimiega tomotoga 'adi 7 'wa na venua'ivinedi, tomotoganidi ma yadi 'aseta bwaikina wata 'Anu'anunu 'Atumaina i agedi mogitana. Taunidi yadi folova, 'a na veimeyedi 'ani'ani i na 'i'isave'avini. 4 We'e 'ima tutuya fuedi yama folova 'a na lalau'age wata 'a na vevelu'ui Yaubada 'waineye.”

5 Tovetumagananidi matatabudi i sosoana tomata'aulelevo yadi nuanua faifaina. Begaidi Sitiveni i venua'ivineni, taunina tovetumagana toketokena, wata 'Anu'anunu 'Atumaina i agei mogitana. Wata 'ifwaidi Sitiveni bani'odi i venua'ivinedi. 'Adi wagava:

Filifi,  
Filikolo,  
Nikanoli,  
Taimoni,  
Falimina,

Nikola, tomogo Anitioki, basenadi i ve-Diu, mulieta i vetumagana Iesu 'waineye.

6 ✨Tovetumaganavo tomotoganidi 'adi 7 i miedi tomata'aulelevo 'waidie, bega tomata'aulelenidi i velu'ui faifaiddi, wata nimadi i yatodi 'unu'unudie bega Yaubada i na nuakalikaliedi wata i na 'ivaisedi yadi folova 'waidie.

7 ✨Yaubada yana Vona i yavula tomotoga fuedi 'waidie. Tovetumaganavo 'adi 'aila'a Ielusalema nageneye i

vebwaika-'afo'afo, wata me Diu yadi tovelomu fueidi i vetumagana Iesu 'waineye.

*Sitiveni 'ana 'ive'avina.*

<sup>8</sup> Yaubada ma yana nuakalikali i vevesauluva 'atumaina Sitiveni 'waineye wata toketokena i veleni bega 'eba nuavogana wata 'eba 'isa toketokedi i 'i'idewadi tomotoga matadie. <sup>9</sup> Tamu me Diu yadi 'eba miava'auta 'ana wagava Yavuyavudi Folova-maimaiga 'Wainega, 'eba miava'autanina 'ana tomotoga 'ifwaidi i maia Sitiveni taiadi i ve'ikwayekwayega. Tomotoganidi taunidi Diu, 'ifwaidi i maia Sailini wata Alekisanidilia 'waidiega, wata 'ifwaidi Silisia wata Eisia 'waidiega. <sup>10</sup> \*Tutuyanina i veve'ikwayekwayega, 'Anu'anunu 'Atumaina 'aseta bwaikina Sitiveni i veleni bega kebu 'adi fata yana vona i na tutuli.

<sup>11-12</sup> \*Faifainanina tomotoganidi givagivayega i nagoi mali tomotoga i tutulidi bega i na lu'ivona-vekavekali tovelomu 'waidie Sitiveni faifaina. Tolu'ivonanidi i nagoi Diu yadi to'edakumetavo 'au'auveadi, ve'etoboda 'adi tovevo, wata mali tomotoga 'waidie i vekali i vo, 'A nogai Sitiveni i vona-awadamana Yaubada wata Mosese 'waidie." To'edakumetanidi tovekali yadi vona i nogai ma yadi nuasako i nagoi Sitiveni i 'ive'avini i mieni Diu yadi kaniselovo 'waidie. <sup>13</sup> Kaniselovo tovekali i goledi i luku 'waidie i vekali Sitiveni faifaina, igodina i da vo, 'A nogai tutuya fueidi i vona-awadamana Yaubada yana vanuga 'eba velu'ui wata yada ve'etoboda Mosese i veledaga 'waidie. <sup>14</sup> Wata tamu yana vona 'a nogai i vo, Iesu Nasalediega yada vanuga 'eba velu'ui i na geuya wata yada sauluva matatabuna i maiga Mosese 'wainega i na siviladi i na vetuli." <sup>15</sup> Matatabudi i miamiani kaniselovo yadi tududaba nageneye Sitiveni i 'isadewai, i 'iseni 'ana 'isa'isa i vetuli, maigina mataududulina bani'odi tamu anelose.

## 7

*Sitiveni yana vonayavuga.*

<sup>1</sup> Tovelomu bwaikina Sitiveni i velutolieni i vo, Tolu'ivonanidi i vonaga mogitana 'alo kebu?" <sup>2-3</sup> \*Sitiveni i vo, Tamakwavo wata ekwavo a na vonemi. Tolu'ivonanidi we'e i vekaliemi. Basenadiotoga tubuda Ebelamo i miamia Mesafotemia, bola kebu i da nago Elana, Yaubada Magemagetana i souyeni 'waineye i voneni i vo, Yamu 'aila'a 'u na 'iawedi wata yamu 'awalawa, 'u na nago tamu 'awalawa 'waineye bola a na vemu." <sup>4</sup> Bega 'awalawa Kalidia

i 'iaweni i nago 'atamana Elana 'waineye i mia. Mulieta Ebelamo tamana i wafa Yaubada i voneni i kwekwe i mai yada 'awalaweye. <sup>5</sup> ✧Tutuyanina 'waineye bei Yaubada kebu tamu fwayafwaya Ebelamo i da veleniga, kebu tamu yana fwayafwaya mogitanaga bani'odi 'iave 'ana bababa, we'e Yaubada i vona'awaufaufa 'waineye bola fwayafwayanina matatabuna i na veleni wata 'ana wauma faifaidi. Vona'awaufaufanina Yaubada Ebelamo i veleniga, siwe tutuyanina 'waineye kebu natunavo. <sup>6</sup> ✧Yaubada yana vona side bani'odi Ebelamo 'waineye i vo, Bola 'amu wauma i na nagoi mali 'awalaweye, bei malamala 400 nagedie i na vetofolova-maimaiga wata vita i na veveluagadi tomotoga 'waidiega. <sup>7</sup> Siwe tomotoganidi bola vematavuloga a na veledi bega 'amu wauma i na viladi i na maia de'e 'awalawanina 'waineye i na subisubiaku.” <sup>8</sup> ✧Wata Yaubada Ebelamo i voneni i vo, 'Amu wauma matatabudi bunudi i na bobodi yaku vona'awaufaufa 'u vetumaganeniga 'ana tugusa.” Mulieta Aisake i tubuga, 'aiata 'ana ve-8 'waineye Ebelamo bununa i boboi. Wata bani'odi Aisake natuna Iakobo i tubuga, mulieta Iakobonina natunavo 12, taunidi tubudavo ta veve'ililibuyedi.”

<sup>9-10</sup> ✧Wata Sitiveni kaniselovo i vonedi i vo, Tubudavonidi taidi Iosefa i ve'unumagigieni i vekimwaneyeni mali tomotoga 'waidie bega i naweni Itifita bei i vetofolova-maimaiga. Siwe Yaubada i 'wea'weabuya yana veviga 'waidiega i 'ita'ita'ieni. Tamu 'aiata Itifita 'ana kini 'ana wagava Felo, Iosefa i goleni i nago 'waineye, wata bei Yaubada i 'ivaiseni, faifainanina Felo i 'iseni yana sauluva 'atumaina wata ma yana 'asetai. Bega i silakai i vetoveimea yana vanuga 'ana tofolovavo wata 'awalawa Itifita matatabuna 'waidie.

<sup>11</sup> ✧Tutuyanina 'waineye Itifita wata Kenani 'waidie vita i souyeni i loka bwaikina. Tubudavo kebu 'adi fata ava'aibe bei 'ani'ani i na veluagai. <sup>12</sup> ✧Mulieta Iakobo vala i no-gai 'ani'ani Itifita 'waineye bega natunavo i vetunedi i na kimwane, wata i na viladi i na maia. <sup>13</sup> ✧Tamu tutuya 'adi'adi i saigo wata i nagoi 'ani'ani i na kimwane. Bei Iosefa taunina i lu'ivoneyeni enavo 'waidie fai i na vo 'ako i wafa, mulieta Felo i 'asetai Iosefa yana 'aila'a. <sup>14-15</sup> ✧Iosefa enavo i vonedi i vo, 'Wa na nagoi tamada 'wa na voneni matatabumi 'wa na maia de'e bei ta na mia.” I viladi tamadi i voneni bega Iakobo ma yana 'aila'avo matatabudi 75 i maia Itifita. Bei i miamiani mulieta Iakobo i wafa, wata 'ifwaidi tubudavo. <sup>16</sup> ✧Basenadiotoga Ebelamo i miamia Sekemu,

✧ 7:5: Nag 17:8 ✧ 7:6: Nag 15:13,14; Sou 3:12 ✧ 7:8: Nag 17:9-11 ✧ 7:9-10: Nag 37:11,28; 39:23; 41:37-44 ✧ 7:11: Nag 41:54 ✧ 7:12: Nag 42:1-5 ✧ 7:13: Nag 45:1-11 ✧ 7:14-15: Nag 46:1-7; 49:33 ✧ 7:16: Nag 33:19

tamu fwayafwaya i kimwanei Emoli 'ana wauma 'waidiega. Tutuyanina Iakobo wata Iosefa i wafaga tomogodi i nawedi fwayafwayanina 'waineye i ve'ufadi.

*Sitiveni i veifufu me Diu yadi souyagi faifaina.*

17 ✧ Malamala fuedi i 'a'ava tubudavo 'adi 'aila'a i vebwaika- 'afo'afo wata Yaubada yana vona'awaufaufa Ebelamo 'waineye bola 'awalawa Kenani tubunavo i na veledi, 'ana tutuya i vevelilivana. 18 Mulieta tamu kini i tovoi Itifita i veimeyeni, Iosefa i bavuyeni fai basenadiotoga i wafa. 19 ✧ Kininina tubudavo i vekaliedi wata tutuya vitana i veledi. I lulukakadedi bega natudiavo wala'aie i yatoyatodi i wafawafa.

20-21 ✧ Tutuyanina 'waineye tamu kwamana 'atumaiotogina i tubuga 'ana wagava Mosese. Weta'i 'aitonu nagedie inana wata tamana i giveni vanuge, mulieta i sivemageseni Felo natuna vevinena i fayayeni, i taulai 'wa da vo bani'odi natuotogina. 22 Me Itifita yadi nuanua matatabuna Mosese i veni begaidi ma yana 'asetai bwaikina. Yana vona 'adi nogaya 'atumaidei wata yana folova toketokena.”

23 ✧ Wata Sitiveni Kaniselovo i vonedi i vo, Tutuyanina Mosese 'ana malamala 40 i nuanua nuanuana i na nago yana tomotogavo me Isileli i na fogedi. 24 I nago tamu tomogo Itifita i 'iseni tamu tomogo Isileli i nikenikei, bega Mosese iana i 'ivaiseni tomogo Itifita i nikei i wafa. 25 I nuani i vo, 'Akonadi ekwavo i 'asetai bola Yaubada i na 'ivaiseku bega a na 'ita'ita'iedi me Itifita 'waidiega, kebu wata i na folovamaimaiga,” siwe kebu i da 'asetai. 26-27 I 'atai, wata i nago tomotoga Isileli'ava 'adi 'ailuga i 'isedi i vevetalaga, Mosese nuanuana ma iana i na veiana bega i vonedi i vo, 'Wa 'ailove, we'e iamu awale tauni'avada 'wa vevetalaga?” Igodi i da talabodedi nika tomogonina vetalaga i vesivauliga Mosese i bifeleni i vo, 'Omu igodi nuanuamu 'u na veimeyema wata 'u na 'isave'avinima, siwe 'omu kebu tamu aitoi i da veimeyemu.” 28 Bogi tomogo Itifita 'u nikei i wafa, yau wata igodi nuanuamu 'u na nikeku.” 29 Tutuyanina vonanina Mosese i nogai i dega Itifita 'wainega i nago 'awalawa Midi-ani. Bei i nagi i venatuna natunavo iavetadi 'adi 'ailuga.

30 ✧ Malamala 40 i 'a'ava, mulieta tamu 'aiata Mosese i nunago sali'avu'avuye 'Oya Sainai lilivaneye, tamu anelose i souyeni 'waineye 'ai-'ala'alata nageneye. 31-32 I 'iseni welavi yauyauvina i 'ala'alata, nuana i vogani i nago lilivaneye nuanuana i na 'isadewai. 'Auvea bonana i nogai i vo, Yau tubumwavo yadi Yaubada. Ebelamo, Aisake, wata Iakobo

yadi Yaubada.” Mosese ma yana kololo i tatava, kebu nuanuana i na 'ise'iseni. <sup>33</sup> Wata 'Auvea Mosese i voneni i vo, 'Amu 'ageyafayafa 'u na ta'idi. We'e bei 'u tovotovoiga 'awalawa tabu fai Yau bei a miamia. <sup>34</sup> Yaku tomotoga Itifita 'waineye i miamiani yadi veviga bwaikina a 'iseni mogitana wata yadi taivonavona a nogai bega a obuma a na 'ita'ita'iedi. Begaidi de'e 'wainega a na vevilamu 'u na nago Itifita.”

<sup>35</sup> Wata Sitiveni i vona kaniselovo 'waidie i vo, Side bani'odi, me Isileli Mosese i vedumwe'ai'aieni, i voneni i vo, 'Omu igodi nuanuamu 'u na veimeyema wata 'u na 'isave'avinima siwe 'omu kebu tamu aitoi i da veimeyemu.” Mosese Yaubada i vetunei me Isileli 'waidie anelose wata 'ai-'ala'alata 'waidiega bega Mosese 'adi to'edakumeta wata 'adi to'ita'ita'i. <sup>36</sup> \*I nago tomotoganidi i vagavaidi Itifita 'wainega malamala 40 nagedie i yabedi sali'avu'avuye. Itifita 'waineye, wata Eyaga Yamoyamoina 'waineye wata sali'avu'avuye 'eba nuavogana wata 'eba nua'ewa fueidi i 'idewadi matadie. <sup>37</sup> \*Wata Mosese me Isileli i vonedi i vo, Bola Yaubada tamu yana tolu'ivona i na vetunei 'waimie yau bani'odi. Taunina yada tomotoga 'waidega i na silakai.” <sup>38</sup> \*Tamu tutuya Mosese wata tubudavo me Isileli i miava'auta sali'avu'avuye. Bei 'Oya Sainai 'waineye tamu anelose Yaubada yana Vona i lu'ivoneyeni Mosese 'waineye. Vonanina Mosese i veleda i na 'eno-vagata.

*Sitiveni i veifufu me Isileli yadi*

*dumwe'ai faifaina.*

<sup>39</sup> \*Siwe tubudavo i vedumwe'ai'ai kebu Mosese i da ve-matayakeyakeni, nuanuadi i na viladi Itifita. <sup>40</sup> \*Begaidi tomotoganidi Mosese tatana 'ana wagava Eloni i voneni i vo, Mosese basenadi i vagavaida Itifita 'wainega i laka 'Oya Sainai 'waineye, siwe kebu ta da 'asetai voke i vuyo. Nuanuama kumaea 'u na 'idewadi bega 'waidie ta na 'odu'odu, taunidi i na 'edakumeseda.” <sup>41</sup> Eloni yadi vona i nogai tamu kumaea i 'idewai 'ana 'isa'isa bani'odi 'aisaya bulumakau natudi, wata i sakali. Sakalinina 'waineye tamu 'aisaya i nikei i kabuni kumaea faifaina bega i sosoana bwaikina fai taunidi 'adi 'idewadewa 'waineye ma yadi subia i 'odu'odu. <sup>42</sup> \*Fai Yaubada i vedumwe'ai'aieni nuanuadi kumaea, begaidi Yaubada i bailedi, i tauyedi 'ubwana 'waidie i na 'odu'odu. I 'a'avana mulieta sauluvanina faifaina Yaubada yana tolu'ivona Emosi i kilumi Yaubada yana vona i vo,

Me Isileli, malamala 40 nagedie sali'avu'avuye 'aisayayega 'wa velomu, siwe kebu yau 'wa da subiaku.



43 Tutuya fuedi lau'weta 'wa yogoyogoni bega bei yaubada-vekavekali 'ana wagava Maloke 'waineye ma yami subia 'wa 'odu'odu. Wata tamu nani 'ana 'isa'isa bani'odi 'ubwana 'wa 'idewai 'wa goleni Lifani, 'waineye 'wa 'odu'odu.

Begaidi me Babiloni a na tauyedi i na 'ive'avinimi i na nawemi yadi 'awalaweve i na veimeyemi.”

44 ✨Wata Sitiveni i vo, Basenadiotoga tubudavo i miamiani sali'avu'avuye, Yaubada Mosese i veni bega vanuga i yogoni 'aisaya bunudiega yadi 'eba velu'ui Yaubada 'waineye. Lau'wetanina nageneye Yaubada yana ve'etoboda 10, basenadi i kilumi kileuye, ma didiwakana bei i yatoi, yadi 'eba 'isa Yaubada 'adi 'weabu. 45 ✨Mulieta tubudavo lau'wetanina natudiavo i veledi. Tutuyanina Iosua i 'edakumesedi i 'ewavuvuveni wata Yaubada i 'ivaisedi mali tomotoga i sogiedi yadi fwayafwaya i elodi. Bei me Isileli i miamiani fwayafwayanina 'waineye wata lau'wetanina i 'enoga i nago tutuyanina tubuda Devida i souyeni. 46 ✨Devida yana sauluva 'atumaina Yaubada mataneye, begaidi Yaubada i nuakalikali. Wata Devida i velu'ui Yaubada 'waineye i vo, Yaubada, 'omu basenadiotoga Iakobo i subisubiamu, 'u da tauyeku yamu vanuga 'eba velu'ui a da yogoni.” 47 ✨Siwe Yaubada kebu i da tauyeni we'e natuna Solomoni vanuganina i yogoni.

48 ✨We'e tomotoga 'adi 'a'aiyogona Yaubada Bwaikaotogina kebu yana 'eba mia. Begaidi tamu tutuya tamu yana tolu'ivona Yaubada yana vona i kilumi i vo,

49 Vanuganidi 'wa yogoyogonidiga yau kebu i da lub-waineku.

Kebu 'ana fata bei a na miaga.

Abama yaku 'eba mia,

Fwayafwaya 'ageku 'adi 'eba yato, wata yaku 'eba veimea.

50 Naninidi 'wa da vo Yau kebu a da 'idewadiga.”

51 ✨Wata Sitiveni kaniselo i vonedi i vo, 'Omi tutuya fuedi Yaubada yana vona 'wa baileni. 'Wa nogai siwe 'wa kwayega, kebu 'wa da vematayakayaka. 'Omi 'asa'aiana tubudavo yadi sauluva 'wa 'ewa-'afo'afoi. 'Omi wata tutuya fuedi 'Anu'anunu 'Atumaina yana folova 'waimie 'wa tatalabodeni. 52 ✨Tubudavo Yaubada yana tolu'ivonavo matatabudi i vedumwe'ai'aiedi veviga i veledi, kebu tamu i da vesauluva-'atumaeni. Basenadiotoga Yaubada yana tomata'aulelevo i vetunedi i vona-vagata yana Tofolova 'Atumaiotogina Iesu yana mai faifaina, siwe tubumiavo i nikedi i wafa. We'e tutuyanina Iesu i le'wa 'omi 'wa 'etogiluvuni wata 'wa luvewafai. 53 ✨'Omi kumanimiavo

✨ 7:44: Sou 25:9 ✨ 7:45: Ios 4:11; 18:1; 23:9 ✨ 7:46: 2 Sam 7:1,2 ✨ 7:47:

1 Kin 6:1,14 ✨ 7:48: Ais 66:1,2 ✨ 7:51: Sou 32:9 ✨ 7:52: 2 Ifu 36:16

✨ 7:53: Fol 7:38; Ibu 2:2

Yaubada yana ve'etoboda 'wa 'ewadi anelose 'wainega siwe kebu 'wa da vematayakeyakedi.” Side bani'odi Sitiveni yana lau'age i ve'a'avai.

*Sitiveni i lukileuya.*

<sup>54</sup> Kaniselovo matatabudi Sitiveni yana vona i noganogaiga gadodi i 'alasedi i nuasako bwaikina 'waineye. <sup>55</sup> Siwe Sitiveni, 'Anu'anunu 'Atumaina i agei mogitana bega i 'isalaka abame i 'isedi Yaubada yana mageta mataududulina wata 'ana 'atagiega Iesu i tovoovoi. <sup>56</sup> ✨I vo, Mataku 'wa na velugai. Abama i 'anikililia a 'iseni Iesu kumanina i vetomotogaotoga i tovoovoi Yaubada 'ana 'atagiega.”

<sup>57-58</sup> ✨Tanigadi i 'ibodadi wata i vegolegole Sitiveni bonana i lutavutavuni. I lilide i tovimfineni i 'ive'avini i yo'ei i obuyeni mwalilige bei i lukileuya. Sitiveni bonana 'ana tonogaya wata to'ainikenidi 'adi talauma i 'a'idi bega i na 'ainike-'atumai i 'etokwayua tamu tubuau 'ana wagava Saulo i 'isave'avinidi. <sup>59</sup> ✨Tutuyanina i nikenikei Sitiveni bonana bwaikinega i velu'ui i vo, 'Aueva Iesu, 'Anunuku a tauyeni 'waimuye 'u na 'ewai.” <sup>60</sup> ✨Agena i vetufano'uyedi wata i vegole i vo, 'Aueva, yadi sauluva sakoina 'u da nuatavuni.” I vona'a'ava nika yawaina i 'a'ava.

## 8

1-3 ✨Saulo Sitiveni yana wafa i 'iseni yana nuanua. Tomotoga 'ifwaidi Yaubada 'ana tovmatayakayaka Sitiveni i mogaia, i 'ewai i nagoi i ve'ufai.

*Keliso yana 'Aila'a vita bwaikina i veluagai bega i yavula.*

'Aiatanina 'waineye Sitiveni i wafaga, 'ifwaidi Iesu 'ana tovedumwe'ai'ai i velamu tovetumaganavo Ielusalema 'waineye veviga bwaikaotogina i veveledi. Saulo i nago vanuga 'aitamogana 'aitamogana 'waidie 'ai'edi bei tovetumaganavo, vevine wata iaveta i veveluagadi, i yo'eyo'edi i nunawedi vanuga 'eba yogona 'waidie. Bani'odi i munegidi igodi tovetumaganavo 'adi 'aila'a i da leo'a'avadi. Faifainanina tovetumaganavonidi i yavula i nagoi 'awalawa fuedi 'waidie Iudia wata Samelia nagedie. Tomata'aulelevo 'aisedi i miamiani Ielusalema.

*Filifi i lau'age Samelia 'waineye.*

<sup>4</sup> Tovetumaganavonidi i yavulaga i nagoi 'awalawa matatabuna 'waidie Iesu Valana i lulu'ageyeni. <sup>5</sup> We'e Filifi i nago tamu 'atamana bwaikina 'waineye 'awalawa Samelia nageneye, bei i lau'age Yaubada 'ana Venua'ivina Keliso

✨ 7:56: Kol 3:1 ✨ 7:57-58: Fol 22:20 ✨ 7:59: Luk 23:46 ✨ 7:60: Luk 23:34 ✨ 8:1-3: Fol 11:19; Fol 9:1,2; 26:9,11

faifaina. <sup>6</sup> Wata bei tomotoga matadie 'eba nuavogana wata 'eba nua'ewa i 'idewadi begaidi yana vona i vinenegeni 'atumaina. <sup>7</sup> ✧Filifi 'eba nuavogananidi i 'idewadi side bani'odi. I vona yaiaina 'waidie ma yadi vebwaubwau tomotoga fueidi 'waidiega i 'awa'a'idi. Bwalobwaloko wata tomotoganidi 'agedi i sinunumidiga fueidi i 'ive'atumaidi. <sup>8</sup> Faifainanina tomotoga fueidi i sosoana bwaikina.

<sup>9</sup> 'Atamananina 'waineye tamu tomogo 'afo'afo'ana i miamia 'ana wagava Saimoni, taunina i awa'ai'aia i vo, Yau tomogo bwaikiku, yami 'eba 'isa," wata me Samelia fueidi nuadi i voganidi 'ana 'afo'a faifaina. <sup>10-11</sup> Fai tutuya fueidi 'eba nuavogana wata 'eba nua'ewa i 'idewadi, tomotoga bwaikidi wata tomotoga-'avo'avovo nuadi i 'ewai i ve'ililibuyeni igodi i vo, Tomogo de'e yana toketokena bwaikina Yaubada 'wainega." <sup>12</sup> Siwe tutuyanina Filifi i le'wa i lalau'age Vala 'Atumaina Yaubada yana veimea tomotoga 'waidie faifaina, wata Yaubada 'ana Venua'ivina Iesu faifaina. Fueidi i nogai i vetumaganeni i bafitaiso, vevine wata iaveta. <sup>13</sup> Wata Saimoni i vetumagana i bafitaiso, begaidi Filifi i yogo'wai'waili yana folova toketokedi i 'isedi nuana i 'ewai.

<sup>14</sup> Tomata'aulelevo i miamianiga Ielusalema 'waineye, me Samelia fueidi valadi i nogai Yaubada yana Vona i vetumaganeni, bega Fita wata Ioni i vetunedi i na nagoi i na 'isedi. <sup>15-16</sup> Tutuyanina i le'wai i 'asetai 'akonadi i bafitaiso 'Auvea Iesu 'ana wagavayega siwe 'Anu'anunu 'Atumaina kebu i da agedi. <sup>17</sup> ✧Begaidi Fita wata Ioni i velu'ui faifaidi, nimadi i yatodi 'unu'unudie nika 'Anu'anunu 'Atumaina i agedi.

<sup>18-19</sup> Tutuyanina Yaubada 'Anu'anunu 'Atumaina i tauyeni tomotoganidi i agedi, Saimoni i 'iseni i nago Fita wata Ioni 'waidie igodi mani i da veledi i vo, Toketokenanina 'wa na veleku bega yau wata 'ai'edi nimaku a na yatodi tomotoga 'waidie, 'Anu'anunu 'Atumaina i na agedi." <sup>20</sup> Fita ma yana nuasako Saimoni i voneni i vo, 'Omu igodi Yaubada yana nukalikali 'u na kimwanei maniega. Nuanuaku yamu maninina taiadi 'wa da luku Seitani 'waineye, 'ai-'ala'alase i da 'alaimu. <sup>21</sup> 'Omu yamu folova wata 'ima yama folova kebu i da vesala. Kebu 'u na 'ivaisema fai yamu nuanua kebu tonovinaga Yaubada mataneye. <sup>22</sup> Sakonanina faifaina 'u nuanua 'u na nuavilamu 'u na velu'ui 'Auvea 'waineye bega 'ai'edi i na nuatavunimu. <sup>23-24</sup> A 'asetamu 'u ve'unumagigiema, wata sakona i yogonimu." Saimoni i vona Fita wata Ioni 'waidie i vo, 'Wa da velu'ui 'Auvea 'waineye faifaiku, bega veviganidi 'wa voneyediga, kebu i na sousouyedi 'waikuye. <sup>25</sup> Mulieta bei Fita wata Ioni i lulu'ivona Iesu faifaina wata

'Auvea Valana i vevefufuyeni, i 'a'avana i viladi i nunagoi Ielusalema, 'atamana fuedi Samelia nageneye 'waidiamo Vala 'Atumaina Iesu faifaina i lau'age i nagoi.

*Filifi wata to'edakumeta Itiofia 'wainega.*

<sup>26</sup> Tamu 'aiata 'Auvea yana anelose i souyeni Filifi 'waineye i voneni i vo, 'U na 'idewadewa 'u na tovoi 'u na nago yavalatayega, 'edeeye 'u na nunago tamu 'eda 'u na 'iseni Ielusalemega i obuobu Gasa sali'avu'avu 'waineamo.” <sup>27-28</sup> ✧ Begaidi Filifi i 'idewadewa i tauya i nunago 'edeeye 'awalawa Itiofia tamu 'ana toveimea i veluagai. Toveimeanina tomogo bwaikina, Itiofia 'ana Kwini 'adi wagava Kanidesa, yadi mani 'ana to'isave'avina. Tomogonina basenadi i luku Ielusalema, Yaubada 'waineye i subisubia, i 'a'ava, i vilai i mimai fwayafwaya 'ana wakeamo, 'aisaya osi i luluyo'ei. 'Edeeye i nunago i lulu'iawawa Yaubada yana Buki basenadiotoga Aisea i kilumi. <sup>29</sup> ✧ 'Anu'anunu 'Atumaina Filifi i voneni i vo, 'U vaganago waka lilivaotogineye.” <sup>30</sup> Filifi i lilide i nago tomogonina i lulu'iawawaga lilivaneye i nogai, begaidi i velutolieni i vo, Bukinina 'u lulu'iawawaiga 'u 'asetai 'alo kebu?” <sup>31</sup> Tomogonina Itiofiayega i vo, Bani'odi a na munega a na 'asetai? 'Ai'edi aitoi i na kiavemagetai 'waikuye 'aku fata a na 'asetai. 'Ai'edi 'u 'asetai 'u lakama lilivakuye 'u miabui 'u kiavemagetai 'waikuye.” <sup>32</sup> ✧ Vonanina Yaubada yana Buki nageneye i lulu'iawawaiga side bani'odi.

Taunina yana sauluva bani'odi 'aisaya sifi. 'Ai'edi sifi vutuvutuna i na bobodiga, kebu i na 'we'welaga, wata 'ai'edi tomotoga i na vo, 'A na nikei,” Kebu i na vetafewaga.

Wata taunina bani'odi, kebu tamu ava'ai i na voneyeni.

<sup>33</sup> Tomotoga i awaobubouyeni wata veviga bwaikina i veleni,

Siwe kebu tamu aitoi i da 'ivaiseni veimea tonovina 'wainega.

Kebu 'ana fata tubunavo ta na veifufuyedi,

Fai yana mia fwayefwayeye i daba-matayo'oi yana 'aila' kebu.”

<sup>34</sup> Itiofia 'ana toveimea Filifi i velutolieni i vo, Nuanuaku a na 'asetai aitoi faifaina i vonavona, taunina 'alo tamu tomogo?” <sup>35</sup> Filifi i voneni i vo, Kebu i da veifufu taunina faifaina i veifufu Iesu faifaina.” Begaidi Filifi vonanina i veifufuyeni, i 'a'ava wata Yaubada yana Buki 'ifwaidi i kiavemagetadi Vala 'Atumaina Iesu faifaina.

<sup>36</sup> I nunago 'edeeye ufa i veluagai toveimeanina Filifi i voneni i vo, Ufa sino. I lubwaineku 'u na bafitaisoku.”

[<sup>37</sup> Filifi i voneni i vo, 'Ai'edi yamu nuanua matatabuna 'u na tauyeni Iesu 'waineye 'u na vetumaganeni a na bafitaisomu." Toveimeanina i vo, A vetumagana Iesu Keliso taunina Yaubada Natuna wata 'ana Venua'ivina."]<sup>38</sup> Waka i 'ailove, 'adi 'ailuga i obu i tovi'utuva ufeye, Filifi toveimeanina i bafitaisoi. <sup>39</sup> Tutuyanina i lakama 'avale Filifi i 'awafa'wani fai 'Auvea 'Anu'anununa i vagavaia i naweni, begaidi toveimeanina kebu i da 'asetai ava'aiamo i nago kebu wata i da 'iseni, siwe ma yana sosoana i tauya i nago yana vanuge. <sup>40</sup> \*We'e Filifi i souyeni 'atamana Asota i nago 'atamana bwaikidiamo Iesu Valana 'Atumaina i lalau'agevuvua, bega i nago i le'wa Sisalia.

## 9

### *Saulo yana nuavilana.*

<sup>1-2</sup> \*Tutuyanina 'waineye, Saulo Toveimea Iesu 'ana tovetumaganavo i veve'isakololodi, nuanuana i na nikedu. I nago tovelomu bwaikina i voneni lubulubu i na kilumidi i na veleni i na nawedi Damasiko. Bei Diu yadi 'eba miava'auta 'adi to'edakumetavo i na lu'iawawadi i na 'asetai Saulo ma yana veimea bega 'ai'edi Iesu yana 'Eda'eda 'ana tovetumaganavo i na veluagadiga, vevine wata iaveta, i na 'ive'avinidi i na miedi Ielusalema.

<sup>3-4</sup> Paulo wata 'ifwaidi tomotoga taiadi i nunagoi Damasiko sai'afoga i na le'wa 'atamananina 'waineye, nika mageta abamega i kianamali Saulo i mageseni i be'u fwayefwayeye. Bona i nogai i vonavona 'waineye i vo, Saulo, Saulo, awale vita 'u veleveleku a veveviga?" <sup>5</sup> \*Bonana i tutuli i vo, 'Auvea, 'omu aitoi? I vo, Yau Iesu, kumaniku vita 'u veleveleku. <sup>6</sup> Siwe 'u na tovoi 'u na nago 'atamana bwaikina 'waineye, bei tamu tomogo i na vonemu ava'ai 'u na 'idewai."

<sup>7</sup> Tomotoganidi Saulo taiadi i nunagoiga, i tovi-valavalalai kebu 'adi fata tamu ava'ai i na voneyeniga. Bonananina i nogai, siwe kebu tamu aitoi i da 'iseniga. <sup>8</sup> 'Akonadi mageta i 'awaiiaia i 'a'ava, Saulo i tovoi i 'isala siwe kebu tamu ava'ai i da 'iseniga, begaidi nimaneye i 'abi i naweni Damasiko. <sup>9</sup> 'Aiata 'aitonu nagedie, kebu 'ana fata i na 'isa, kebu i da 'ani wata kebu i da yemu.

<sup>10</sup> Damasiko 'waineye, tamu tovetumagana i miamia, 'ana wagava Ananiasi, I 'isa'isa nika 'Auvea i souyeni 'waineye i voneni, 'wa da vo, bani'odi i da 'enoneganega i vo, Ananiasi." I vo, Yau, 'Auvea." <sup>11-12</sup> 'Auvea i voneni i vo, 'U na tovoi 'u na nago 'eda 'ana wagava 'Eda Tonovina 'wainemo, Iudasa yana vanuge 'u na velutoli Saulo

'atamana Tasisu 'wainega faifaina. Vanuganina 'waineye Saulo i vevelu'ui Yaubada 'waineye 'akonadi i 'isemu 'wa da vo i da 'enoneganega, 'u luku 'waineye, nimamu 'u yatodi 'waineye bega i na 'isadewa.”<sup>13</sup> Siwe Ananiasi 'Auvea yana vona i tutuli i vo, Tomotoga fue di i lu'ivona 'waikuye tomogonina faifaina, yamu tomotoga Ielusalema 'waineye i nikenikedi.<sup>14</sup> 'Akonadi tovelomu 'adi to'edakumetavo veimea i veleni i mai Damasiko bega fue di i subisubiamuga i na 'ive'avinidi.”<sup>15</sup> ✧'Auvea Ananiasi i voneni i vo, 'Asa'aiana, 'u na nago fai 'akonadi a venua'ivineni yaku tofolova. Faifaiku i na lulu'ivona me Diu wata mali tomotoga kebu Diu yadi kini taiadi 'waidie.<sup>16</sup> ✧Wata yau a na veni veviga bwaikina i na veluagai faifaiku.”

<sup>17</sup> 'Auvea yana vona i 'a'avana, Ananiasi i tovoi i nago Iudasa yana vanuge, i luku Saulo i 'abitonovi i voneni i vo, Taiku Saulo, 'Auvea i vetuneku. Taunina Iesu kumanina 'u 'iseni 'edeve tutuyanina 'u mimai side bei. I vetuneku bega 'u na 'isa-vaitugana wata 'Anu'anunu 'Atumaina i na agemu.”<sup>18-19</sup> I vona'a'avana tamu nani matanega i 'anita'ia bani'odi igana kwanavidi nika i 'isadewa. I tovoi i bafitaiso wata i 'ani, nika yana fa'alina i veluagai.

### *Saulo i lau'age Damasiko 'waineye.*

Saulo i yogomia tovetumaganavo taiadi Damasiko 'waineye.<sup>20</sup> Bei tonovina i nago Diu yadi 'eba miava'auta 'waidie i lau'age Iesu faifaina i vo, Taunina Yaubada Natuna.”<sup>21</sup> ✧Fuedi i nogai nuadi i voganidi 'aise'avadi i vona i vo, Voke kumanina tomogonina Iesu 'ana tovetumaganavo i luluwewafadi Ielusalema 'waineye wata i mai side bei igodi tovetumaganavo i da 'ive'avinidi i da nawedi tovelomu 'adi to'edakumetavo 'waidie.”

<sup>22</sup> ✧Saulo yana lau'age i vevetoketoke i kiavemageta Iesu mogitana Yaubada 'ana Venua'ivina, begaidi me Diu i miamianiga Damasiko 'waineye kebu 'adi fata bonana i na tutuli.

<sup>23</sup> ✧'Aiata fue di i 'a'ava, mulieta me Diu i va'auta i veifufugiva bani'odi i na munega Saulo i na niki i na wafa.<sup>24</sup> 'Atamananina matatabuna kalikalina, kalinina i didigi i laka manamanawena bega toveifufunidi 'awa i tovibodadi igodi nuanuadi Saulo i na 'ive'avini, siwe tamu tomogo i lu'ivona 'waineye.<sup>25</sup> Begaidi tamu lovana Saulo yana tovetutuyamavo i naweni i laka kali tabwaneye walisava fa'alina 'waineye i dodogi, i siobuyeni kalimulie i dega.

### *Saulo Ielusalema nageneye.*

<sup>26</sup> Tutuyanina Saulo Damasiko i 'iaweni i nago Ielusalema nuanuana bei tovetumaganavo ma fuedie i na folofolova siwe i kololoyeni i vo 'ako, Kebu tonuavilanaga.” <sup>27</sup> ✧Mulieta tamu tovetumagana 'ana wagava Banabasa i mai Saulo i 'ivaiseni i 'edakumeseni i naweni tomata'aulelevo 'waidie. I veifufu 'waidie i vo, De'e iada, 'Auvea i 'iseni Damasiko 'ana 'edeye wata i veifufu 'waineye. Mulieta i luku Damasiko nageneye ma yana venuafoufa'ala i lau'age Iesu faifaina.” <sup>28</sup> Tomata'aulelevo i ve'awamogitana bega taiadi i miamiani, wata ma fuedie Ielusalema matatabuna 'waineye i lalau'age Toveimea Iesu faifaina, ma yana toketokena kebu i da kolologa. <sup>29</sup> Wata i nago Diu 'ifwaidi bonadi Guliki 'waidie, taiadi i ve'ikwayekwayega, siwe igodi i da luvewafai. <sup>30</sup> Tutuyanina tovetumaganavo i 'asetai, i vagavaia i obuyeni 'atamana Sisalia 'waineye, bega i vetunei i nago Tasisu 'ana tuvadeye.

<sup>31</sup> Tutuyanina i 'iawedi, Iesu 'ana tovetumaganavo i miamiani 'awalawa Iudia, Galili wata Samelia yadi mia i ve'atumai, kololo wata venuafouviga kebu. 'Anu'anunu 'Atumaina yana 'aivaita 'wainega i vetoketoke wata i tovoi fa'alina, wata 'adi 'aila'a i vebwaika, matatabudi Toveimea Iesu i ve'ililibuyeni.

*Fita tomogo bwalobwalokona i 'ive'atumaia.*

<sup>32</sup> Fita 'atamana fuedi 'waidie i folova-vuvua, wata tamu 'aiata i nago 'atamana Lida, Yaubada yana tomotoga i na fogedi. <sup>33</sup> Bei tamu tomogo bwalobwalokona i veluagai 'ana wagava Inia malamala 8 'ivie i 'eno'enovamo kebu 'ana fata i na yaba. <sup>34</sup> ✧Fita i voneni i vo, Inia, Iesu Keliso i na 'ive'atumaimu. 'U tovoi, 'amu 'ivi 'u nunumi.” Fita i vona'a'ava, Inia i tovoi-matayo'o. <sup>35</sup> Tomotoga Lida wata Seloni laube'una 'waidie i miamiani, i 'iseni bega fuedi i nuaviladi 'Auvea 'waineye.

*Vavine wafawafadi Fita i sivetovoidi.*

<sup>36</sup> We'e 'atamana Iofa nageneye tamu vavine i miamia, 'adi wagava Tabida, taunidi tovetumagana. 'Adi wagavanina 'ana saivila Guliki bonadiega Dokasa. Vavine de'e yadi sauluva wata yadi folova 'atumaide, wekowekoma i nunuakalikali. <sup>37</sup> Tutuyanina 'waineye viga i veluagai i wafa. Vanuganina 'waineye i wafaga, 'etotubwatubwana, tutudaba 'ifwaidi dibuneye, 'ifwaidi tabwaneye bega ediavo tomogodi i lekoai, mulieta i yatodi tamu tutudaba 'waineye vanuga tabwaneye. <sup>38</sup> Iofa kebu 'ani'iega Lida 'wainega bega tutuyanina tovetumaganavo i nogai Fita i miamia Lida, tomotoga 'adi 'ailuga i vetunedi Fita i na voneni nuanuadi i na lilide i na mai

Iofa. <sup>39</sup>✧Fita tomotoga 'adi 'ailuga i nogayedi i tovoi ma fuedie i nagoi. Tutuyanina i le'wai i lakaveni tutudaba 'waineye vanuga tabwaneye. 'Wabu'wabulavo fuedi Dokasa tomogodi i toviffineni i vevemogai, we'e talauma siaidi wata bwaikidi ma yawaidie i 'idewadiga Fita i veni. <sup>40</sup> Fita i talabodedi i souyedi, i 'odu i velu'ui, mulieta i sivilai tomogodi 'waineye i vona i vo, Tabida, 'wa tovoi." I 'isala Fita i 'iseni i tovoi i miabui. <sup>41</sup> Fita nimana i 'otoi i sivetovoiotogidi. I 'a'avana, tovetumaganavo wata 'wabu'wabulavo taiadi i goledi i luku i vedi vavine 'akonadi i yawasa. <sup>42</sup> Matatabudi Iofa nageneye valadi i nogai, bega fuedi i vetumagana 'Auvea 'waineye. <sup>43</sup> 'Aiata fuedi nagedie Fita i miamia Iofa, Saimoni 'aisaya bunudi 'adi to'idewadewa, yana vanuge.

## 10

### *Anelose i souyeni Konilio 'waineye.*

<sup>1</sup> 'Atamana Sisalia 'waineye tamu tolugavia 'adi to'edakumeta i miamia, 'ana wagava Konilio. Tolugavianidi 'adi wagava 'Aila'a Itali. <sup>2</sup> Taunina wata yana vavine natunavo taiadi totafalolo, Yaubada i subisubiai. Taunina kebu tomogo Diu siwe yana sauluva me Diu i vewekowekomaga i 'i'ivaisedi, wata tutuya fuedi i vevelu'ui Yaubada 'waineye. <sup>3</sup> ✧Tamu lavilavi, bani'odi 3 kiloki 'waineye, tamu Yaubada yana anelose i souyeni 'waineye 'wa da vo i da 'enoneganega i voneni i vo, Konilio." <sup>4</sup> ✧Ma yana kololo i 'isanago 'waineye i vo, Ava'ai 'Auvea?" Anelosenina i vo, Yaubada yamu velu'ui i nogaidi wata yamu nuakalikali i 'isedi i sosoana bega i nuanuanimu. <sup>5</sup> 'Asiau 'ifwaidi tomotoga 'u na vetunedi i na nagoi Iofa, bei tamu tomogo i na veluagai 'ana wagava Saimoni Fita. <sup>6</sup> ✧Tomogonina tamu Saimoni 'aisaya bunudi 'adi to'idewadewa 'ana wakawaka i miamiana balebaleye." <sup>7-8</sup> I vona'a'ava i 'iaweni, Konilio yana vanuga 'ana tofolovavo 'adi 'ailuga wata tamu tolugavia siwe taunina totafalolo, i goledi i veifufudi mulieta i vetunedi i obu Iofa.

### *Fita 'wa da vo i da 'enoneganega.*

<sup>9</sup> I 'atai, tomotoganidi 'adi 'aitonu i tauya i nunago 'edeye sai'afoga i na le'wai Iofa, utukamwane Fita i laka vanuga tabwana bababana yadi 'eba veba'wa 'waineye bei i na velu'ui. <sup>10-11</sup> I lase nuanuana i na 'ani, siwe tutuyanina tomotoga 'ifwaidi 'ani'ani i 'idewadewa, Fita i 'iseni abama i 'anikililia tamu nani i obuobuma 'wa da vo i da 'enoneganega. Naninina i 'iseniga bani'odi velu'uva bwaikina ifwadi 4 'waidie i



'abi i sisiobuyeni fwayefwayeye. <sup>12</sup> Nageneye 'aisaya tulina tulina, 'ifwaidi daledaledi, wata manuga, matatabudi me Diu yadi tabu. <sup>13</sup> Fita tamu bona i nogai i vo, Fita, 'u tovoi tamu 'u nikei 'u 'ani.” <sup>14</sup> \*Siwe Fita i vo, Kebu 'Auvea, yau kebu a da 'utavenuafaniga wata 'aisayanidi 'ima me Diu yama tabu kebu a da 'ani'anidiga.” <sup>15</sup> Wata i vona-vaitugana 'waineye i vo, Ava'ai Yaubada i awave'atumaiediga, kebu 'u na awavesakoyedi.” <sup>16</sup> Tutuya 'aitonu naninina i souyeni 'waineye, mulieta velu'uvanina i silakai i laka abame.

<sup>17-18</sup> Fita 'aise'avana i nuanua 'enoneganega de'e bani'odi 'ana nuanua nika Konilio yana tomotogavo i le'wai Iofa, i vedi ava'aibe bei Saimoni yana vanuga bega i nagoi 'awaneye i tovoi i vegole i vo, De'e bei tamu wakawaka i miamia 'ana wagava Saimoni Fita?”

<sup>19</sup> \*We'e Fita bola i nuanua ava'ai i 'iseniga faifaina, nika 'Anu'anunu 'Atumaina i vo, Saimoni, tomotoga 'adi 'aitonu i vevelutolitoi faifaimu. <sup>20</sup> 'U tovoi 'u obu ma fuemie 'wa na nagoi. Taunidi kebu tomotoga Diu siwe kebu 'u na venuanaluga 'u na nagomo fai yau a vetunedi.” <sup>21</sup> Bega Fita i obu tomotoganidi i vonedi i vo, Yau side, tomotoganiku 'wa lulualeku. Ava'ai faifaina 'wa maia?” <sup>22</sup> I voneni i vo, Konilio, tolugavia 'adi to'edakumeta tamu, i vetunema 'a maia. Taunina tomogo 'atumaina, Yaubada 'ana tosubia wata me Diu fuedi i ve'ililibuyeni. Tamu anelose magemagetana i voneni i vo, Vona 'u na vetunei Fita 'waineye i na mai, ava'ai i na vonemuga bonana 'u na nogai.” <sup>23</sup> Tomotoganidi 'adi 'aitonu i lu'ivona'a'ava, Fita i vonedi i luku i 'enovi Saimoni yana vanuge.

### *Fita i nago Konilio yana vanuga.*

I 'atai, Fita i 'idewadewa, ma fuedie i tauya, wata 'ifwaidi Iesu 'ana tovetumaganavo Iofa 'wainega taiadi i nagoi. <sup>24</sup> 'Edeye i 'enovi, mulieta i le'wai Sisalia ava'aibe bei Konilio i lulukamata ma yana vavine natunavo taiadi wata enavo 'akonadi i vonedi i maiaga ma fuedie. <sup>25</sup> \*Fita i le'wa sai'afoga i da luku yana vanuge, Konilio taiadi i veluaga ma yana ve'ililibu 'agena i vetufano'uyeni i 'odu Fita 'waineye. <sup>26</sup> Siwe i sivetovoia, i voneni i vo, 'U tovoi, yau tomotoga 'omu bani'odi bega kebu 'u na 'odu 'waikuye.”

<sup>27</sup> Fita Konilio taiadi i veifufu'eda'eda i luku vanuge tomotoga fuedi i 'isedi 'akonadi i va'auta i miamiani. <sup>28</sup> Fita i vonedi i vo, 'Akonadi 'wa 'asetai 'ima me Diu yama ve'etoboda, kebu 'a na veiana wata 'a na vava'auta 'omi mali tomotoga taiadi, siwe bogibei Yaubada i veku kebu

mali tomotoga a na awavesakoyedi wata a na awa'idi'idi. <sup>29</sup> Faifainanina tutuyanina iada bonana i wai a nogai, kebu a da venuanaluga a tovoi a mai. Begaidi a na velutoliemu awale nuanuamu yau?"

<sup>30-31</sup> Konilio Fita i voneni i vo, 'Aiata 'aitonu bogibei i 'a'avaga, lavilavi 3 kiloki 'waineye a vevelu'ui yaku vanuge nika tamu tomogo ma yana kaleko 'aninamanamalina i souyeni i tovoi maigikuyega i voneku i vo, Konilio, Yaubada yamu velu'ui i nogai wata yamu nuakalikali i 'isedi i sosoana i nuanuanidi. <sup>32</sup> 'Asiau 'ifwaidi tomotoga 'u na vetunedi i na nagoi Iofa, bei tamu tomogo i na veluagai 'ana wagava Saimoni Fita i na voneni i na mai. Tomogonina i miamiana balebaleye, tamu Saimoni 'aisaya bunudi 'adi to'idewadewa 'ana wakawaka." <sup>33</sup> Bega a vetune-matayo'odi faifaimu, 'u maiga 'atumaina 'waikuye. 'Ida de'e matatabuda Yaubada mataneye nuanuama ava'ai 'Auvea i vonemuga, faifaidi 'u na lu'ivona 'waimeye."

### *Fita yana veifufu.*

<sup>34</sup> ✧Fita i velamu i vo, Tutuya de'e a 'asetai Yaubada kebu me Diu 'aisema nuanuaotoginaga, siwe wata mali tomotoga fuedi nuanuaotogina, kebu i da lau'idi. <sup>35</sup> Tomia fwayafwaya 'aila'a tulida tulida, siwe egavo ma yadi ve'ililibu Yaubada i subisubiai wata i vevesauluva-tonovina, tomotoganidi 'atumaidi Yaubada mataneye. <sup>36-37</sup> ✧A 'asetai 'akonadi 'wa nogai Vala 'Atumaina me Isileli tomotoga faifaima. Iesu Keliso, Yaubada 'ana Venua'ivina wata tomotoga fueda 'ada Toveimea i mai bega Yaubada taiadi ta na veiana. Valananina i velamu tutuyanina Ioni Tobafitaiso i lau'age wata i bafitaiso Galili 'waineye, mulieta nani bwaikidi i souyedi 'awalawa Iudia nageneye. <sup>38</sup> Wata 'wa 'asetai Yaubada yana toketokena Iesu tomogo Nasaledi i veleni wata 'Anu'anunu 'Atumaina i agei. Fai Yaubada i 'wea'weabuya, begaidi Iesu i nago 'atamana fuedi 'waidie, i vevesauluva 'atumaina tomotoga 'waidie, wata egavo Seitani ma yana 'aila'a i agediga i vona yaiaina 'waidie i 'awa'a'idi.

<sup>39</sup> ✧'Ima tomata'aulelevo nani matatabuna Iesu i 'idewadiga 'a 'isedi, Ielusalema 'waineye, wata 'ifwaidi me Diu yama 'awalawa 'waidie, mulieta me Diu 'ai lagalagana 'waineye i tutufwaseni i wafa. <sup>40</sup> Siwe 'aiata 'ana vetonu 'waineye Yaubada i sivetovoia wafayega, wata i sivemageseni. <sup>41</sup> ✧Tomotoga matatabudi kebu i da 'iseniga, we'e 'ima 'akonadi Yaubada i venua'ivinemaga

✧ **10:34:** Lom 2:11 ✧ **10:36-37:** Efe 2:13,14; Mad 3:16 ✧ **10:39:** 1 Kol 15:4-7

✧ **10:41:** Luk 24:42-43

bega 'a na vetolu'ivona faifaina 'a 'iseni. Tutuyanina i tovoivaitugana taiadi 'a 'ani wata 'a yemu. <sup>42</sup> ☆Wata Iesu i toke i velu'ase'asema bega Valana 'Atumaina 'a na lu'ageyeni tomotoga 'waidie, wata 'a na lu'ivona Yaubada 'akonadi Iesu i silakai bega tomotoga matatabuda, ma yawaida wata wafawafadi 'ada Toveimea, bola ta na vonayavuga mataneyeye. <sup>43</sup> ☆Yaubada yana tolu'ivonavo matatabudi i vonavagata Iesu faifaina i vo, Egavo i na vetumagana 'waineyeye, Yaubada yadi sakona i na nuatavunidi Iesu yana toketokena 'wainega.”

*Tomotoga taunidi kebu Diu, 'Anu'anunu 'Atumaina i agedi.*

<sup>44</sup> Tutuyanina Fita i veveifufu, 'Anu'anunu 'Atumaina i obuma, tonogaya matatabudi i agedi. <sup>45-46</sup> ☆Tomotoganidi 'Anu'anunu 'Atumaina yana 'alavelevelena 'wainega i vonavona, bonanidi basenadi kebu i da 'asetadiga 'waidiega wata Yaubada i subisubiai i fafali-bwaiken. Me Diu tovetumaganavo Fita taiadi i maiaga Iofa 'wainega i nogai nuadi i voganidi fai i 'asetai Yaubada 'Anu'anunu 'Atumaina mali tomotoga taunidi kebu Diu i veledi. <sup>47</sup> Fita i vonavaitugana i vo, De'e tomotoganidi 'Anu'anunu 'Atumaina i agedi 'ida basenadi bani'odi. Kebu tamu aitoi 'ana fata i na talabodedi bafitaiso ufayega faifaina.” <sup>48</sup> ☆Fita i veimeyedi i na bafitaiso Iesu Keliso 'ana wagavayega. I 'a'avana tovetumaganavo fuedi Fita i talabodeni sai'afo taiadi i na yogomia.

## 11

*Fita yana lu'ivona Ielusalema 'waineyeye.*

<sup>1</sup> Tomata'aulelevo wata Iesu 'ana tovetumaganavo 'awalawa Iudia matatabuna 'waineyeye vala i nogai i vo, Mali tomotoga kebu Diu, Yaubada yana Vona i vetumaganeni.” <sup>2-3</sup> Ielusalema 'waineyeye, 'ifwaidi Diu, taunidi Iesu 'ana tovetumaganavo yadi nuanua i vo, Egavo kebu Diu i vetumagana Iesu 'waineyeye, Diu yada sauluva i na ve'ililibuyedi, nagami bunudi i na bobodi mulieta i na luku Iesu yana 'Aila'a 'waideye.” Bega tutuyanina Fita i laka Ielusalema, tomotoganidi i awavesakoyeni i vo, 'Omu 'u nago mali tomotoga kebu bunudi 'adi 'aiboboga 'waidie. Awale 'u miamia yadi vanuge wata taiadi 'wa 'ani?” <sup>4-5</sup> Siwe Fita nani matatabuna 'waidie i veifufuyedi i vo, Nagami, 'atamana Iofa 'waineyeye a vevelu'ui, a 'iseni abama i 'anikililia tamu nani i obuobuma 'wa da vo a da 'enoneganega. Naninina a 'iseniga bani'odi velu'uva bwaikina ifwadi <sup>4</sup> 'waidie i 'abi i siobuyeni 'waikuye. <sup>6</sup> A 'isadewai nageneyeye a 'isedi 'aisaya

☆ **10:42:** Fol 17:31 ☆ **10:43:** Ais 53:5,6; Iel 31:34 ☆ **10:45-46:** Fol 2:4

☆ **10:48:** Fol 2:38; Mad 28:19

tauvanuga, walawala'ai, nani daledaledi, wata manuga, matatabudi me Diu yada tabu. <sup>7</sup> Bona a nogai i vo, Fita, 'u tovoi tamu 'u nikei 'u 'ani." <sup>8</sup> Siwe a vo, Kebu 'Auvea, yau kebu a da 'utavenuafaniga wata 'aisayanidi 'ima me Diu yama tabu kebu a da 'ani'anidiga." <sup>9</sup> Wata i vona-vaitugana 'waikuye i vo, Ava'ai Yaubada i awave'atumaiediga, kebu 'u na awavesakoyedi." <sup>10</sup> Tutuya 'aitonu naninina i souyeni 'waikuye, mulieta velu'uvanina i silakai i laka abame. <sup>11</sup> Tutuyanina i laka, nika tomotoga 'adi 'aitonu i le'wai 'waikuye Sisalia 'wainega, i maia ava'aibe bei vanuganina a miamiaga 'waineye. <sup>12</sup> Yaubada 'Anu'anununa i voneku i vo, Kebu 'u na venuanaluga, taiadi 'wa na nagoi." Wata de'e tomotoganidi 'adi 6, taunidi Iesu 'ana tovetumaganavo Iofa 'wainega taiadi 'a nagoi Sisalia. 'A le'wai 'a luku tamu tomogo 'ana wagava Konilio yana vanuge. <sup>13</sup> I vonema bagase tamu anelose i souyeni i tovoi yana vanuge i voneni i vo, 'Ifwaidi tomotoga 'u na vetunedi i na nagoi Iofa, bei tamu tomogo i na veluagai 'ana wagava Saimoni Fita i na voneni i na mai. <sup>14</sup> ✧ Ava'ai i na vonemu 'u na 'idewai bega Yaubada i na 'ita'ita'iemi sakona 'waidiega, 'omu wata yamu vanuga 'ana tomia."

<sup>15</sup> ✧ Tutuyanina a velamu a veveifufu Konilio ma enavo 'waidie, 'Anu'anunu 'Atumaina i obuma i agedi, 'ida nagami i agedaga bani'odi. <sup>16</sup> ✧ Nika a nuani 'ada Toveimea Iesu yana vona basenadi i vo, Ioni Tobafitaiso ufayega tomotoga i bafitaisodi we'e 'omi 'Anu'anunu 'Atumaina i na agemi 'wa da vo Yaubada i da bafitaisomi." <sup>17</sup> 'Akonadi ta 'asetai Yaubada 'Anu'anununina 'Atumaina mali tomotoga taunidi kebu Diu i veledi, 'ida bani'odi nagami i veleda tutuyanina ta vetumagana Toveimea Iesu Keliso 'waineye. Begaidi kebu i da lubwaineku Yaubada a na talabodeni."

<sup>18</sup> ✧ Tutuyanina toawavesakonidi Fita yana veifufu i nogai, kebu tamu ava'ai i da voneyeni siwe Yaubada i subisubiaimo, i vo, Mogitana, mali tomotoga taunidi kebu Diu wata Yaubada i tauyedi, 'adi fata i na nuaviladi bega mia 'atumaina wata miamia-vagaina i na veluagai."

*Keliso yana 'Aila'a Anitioki 'waineye.*

<sup>19</sup> Tutuyanina me Diu Sitiveni i nikei i wafa, tovetumaganavo veviga bwaikaotogina i veveluagai Iesu 'ana tovedumwe'ai'ai 'waidiega. Bega i yavula i nagoi 'awalawa 'ifwaidi 'waidie. Finisia, Imula Saifilosu, wata 'atamana Anitioki, bei Iesu Valana i lulu'ivona ediavo Diu 'aise'avadi 'waidie. <sup>20</sup> We'e 'ifwaidi tovetumaganavo Saifilosu wata 'atamana Sailini 'waidiega i nagoi Anitioki wata bei Vala

'Atumaina Toveimea Iesu faifaina i lulu'ivona mali tomotoga taunidi kebu Diu 'waidie. <sup>21</sup> ✧ 'Auvea yana toketokena i veledi bega 'aila'a bwaikaotogina i vetumagana wata i nuaviladi 'Auvea 'waineye.

<sup>22</sup> ✧ Valadi i nago tovetumaganavo Ielusalema 'waineye i nogai bega Banabasa i vetunei Anitioki i na 'isedi. <sup>23</sup> ✧ Tutuyanina i le'wa i 'iseni Yaubada yana nuakalikali tomotoga 'waidie i sosoana i vonedi i vo, Ma yami vetumagana taunimi 'wa na tautauyemi Iesu 'waineye, 'wa na nunuakalikalieni wata 'wa na vevematayakeyakeni." <sup>24</sup> Banabasa tomogo 'atumaina taunina tovetumagana toketokena wata 'Anu'anunu 'Atumaina i agei mogitana bega 'atamananina 'waineye tomotoga fue di i vetumagana Toveimea Iesu 'waineye.

*Banabasa i nago Saulo i vagavaia yana to'aivaita.*

<sup>25</sup> Mulieta Banabasa i tauya i nago 'atamana Tasisu Saulo i na lualeni. <sup>26</sup> Tutuyanina i veluagai i vagavaia i naweni Anitioki bei i valovei. Malamala 'aitamogana nageneye, 'adi 'ailuga tovetumaganavo fue di taiadi i vava'auta wata i veve 'waidie. Tutuyanina 'waineye, bei mali tomotoga i velamu tovetumaganavo i golegole di Keliso yana 'Aila'a.

<sup>27</sup> Tutuyanina 'waineye, 'ifwaidi Yaubada yana tolu'ivonavo Ielusalemega i obu Anitioki. <sup>28-30</sup> ✧ 'Waidiega tamu, 'ana wagava Agabu, 'Anu'anunu 'Atumaina toketokena i veleni bega i tovoi i vona-vagata bola loka bwaikina i na souyeni fwayafwaya matatabuna 'waineye. Tovetumaganavo yana vonanina i nogai, i nuanua nuanuadi 'aitamogana 'aitamogana bani'odi 'adi fata mani i na yato ediavo Iudia 'waineye i miamianiga 'adi 'aivaita. Yadi nuanuananina i 'idewai i 'a'avana, Banabasa wata Saulo nimadie mani i yatoi bega i na naweni Ielusalema i na 'aniveleneni tovetumaganavo 'adi to'edakumetavo 'waidie. Mulieta Loma 'ana toveimea bwaikaotogina Sisa Kaladiu yana tutuye vona-vagatanina 'ana mogitana i souyeni loka bwaikina.

## 12

*Kini Elodi veviga i 'ivebwaiki tovetumaganavo 'waidie.*

<sup>1</sup> Tutuyanina 'waineye Kini Elodi i velamu 'ifwaidi Keliso yana 'Aila'a veviga i veveledi. <sup>2</sup> ✧ Yana tolugaviavo i vonedi Iemesa Ioni tatana i luvewafai kefatayega. <sup>3</sup> ✧ Iemesa yana wafa faifaina me Diu i sosoana bega Elodi Fita i 'ive'avini i yatoi vanuga 'eba yogona 'waineye. Nani de'e i souyeni

tamu me Diu yadi sakali 'ana tutuye. Sakalinina 'waineye beledi kebu 'ana 'ivebwaika i 'ani'ani, 'adi 'eba tolinuata'i basenadiotoga Yaubada tubudiavo i 'ita'ita'iedi i vagavaidi 'awalawa Itifita 'wainega faifaina. <sup>4</sup> 'Eba yogona nageneye tolugaviavo 'adi 'aila'a 4 Fita i 'isave'avini, 'aila'a 'aitamogana 'aitamogana nageneye tomotoga 'adi 4. Elodi yana nuanua Diu yadi sakalinina 'ana wagava Uvi'agalatagona i na 'a'ava, Fita i na vonayavuga tomotoga fue di matadie mulieta i na nikei i na wafa. <sup>5</sup> \*Siwe tovetumaganavo 'adi 'aila'a i toke i vevelu'ui Yaubada 'waineye Fita faifaina.

*Fita i souyeni vanuga 'eba yogona 'wainega.*

<sup>6</sup> 'Awa'awai bani'odi Elodi igodi Fita i da nikei, lovananina 'waineye, Fita i 'eno'eno tolugavia 'adi 'ailuga 'awasasadie. Nimana bulava kainumu 'adi 'ailuga 'waidiega i yogonidi wata tolugavianidi nimadie i luifwedi, we'e 'ifwaidi tolugaviavo i tovo tovoi vanuga 'eba yogona 'awana 'ana to'isave'avinavo. <sup>7</sup> \*I 'eno'eno nika tamu 'Auvea yana anelose i souyeni i tovoi tutudaba i magetai. Anelosenina Fita 'avalaneye i 'abi i luvagoni i vo, 'U tovoi-matayo'o," nika bulava kainumu i 'anita'idi Fita nimanega. <sup>8</sup> Wata i vo, 'Amu wa'ila 'u na si'i'ia wata 'amu 'ageyafayafa 'u na veagei." Yana vona Fita i vematayakeyakeni bega wata i voneni i vo, Yamu velu'uva 'u 'ewai 'u sifafamu 'u mai mulikuye." <sup>9</sup> Bega anelosenina i kumeta Fita i vemuli siwe kebu i da 'asetai, mogitana i sousouyeni 'alo i 'e'enoneganega. <sup>10</sup> I maia, tolugaviavo 'ifwaidi i 'iawedi, wata i vagamai tamu 'aila'a i 'iawedi mulieta i le'wa vanuga 'eba yogona 'ana saiboda kainumu 'waineye. Saibodanina taunina i 'anibaleni, i souyedi. I nunagoi 'atamana kamwaneamo nika anelose Fita i 'iaweni. <sup>11</sup> Bega Fita nuana i magetai i vo, 'Alo de'e mogitana. 'Auvea yana anelose i vetunei i 'ita'ita'ieku Elodi yana toketokena wata naninidi vitadi igodi me Diu nuanuadi i da 'idewadiga 'waikuye 'waidiega."

*Tovetumaganavo kebu i da vetumagana Fita i souyeniga faifaina.*

<sup>12</sup> 'Akonadi Fita i 'asetai ava'ai i souyeni 'waineye, i nago Meli yadi vanuge, taunidi Ioni Malika inana. Bei tomotoga fue di i va'auta, i vevelu'ui faifaina. <sup>13</sup> Fita i le'wa i tovoi tanotanogayega i velutoli, nika tamu tofolova ne'e'elina 'ana wagava Loda bonana i nogai bega i nago i na 'iseni aitoi. <sup>14</sup> Taunina ne'e'elanina Fita bonana i nogaya'inanai, i sosoana bwaikina bega kebu saiboda i da sibaleni i vilai i lilide i nago enavo 'waidie. I vonedi i vo, Fita siva'e i tovo tovoi

tanotanoge.”<sup>15</sup> I voneni i vo, 'Omu 'u ve'wava'wava,” nika i ve'awafatafata i vo, Mogitana.” Tomotoganidi i voneni Loda i vo, We'e tamu anelose Fita bonanega i nago.”

<sup>16</sup> Loda tomotoga taiadi i veve'ikwayekwayega Fita bola i vonavona nuanuana saiboda i na sibaleni, mulieta tutuyanina saiboda i sibaleni nika mogitana i 'iseni nuadi i voganidi. <sup>17</sup> \*Nimanega i talabodedi i na ve'wada bega i veifufu 'waidie bani'odi 'Auvea i munegi i souyeni vanuga 'eba yogona 'wainega. I vo, Nani de'e matatabuna 'wa na lu'ivona Iesu taina Iemesa 'waineye wata 'ifwaidi tovetumaganavo 'waidie.” I vona'a'avana, i 'iawedi i nago tulineye.

<sup>18</sup> I 'atai 'awa'awaie tolugaviavo Fita i 'isa'avai i veludabedabeni i vo, Fita ava'aiamo i nago?” <sup>19</sup> Kini Elodi i vonedi i na lualeni, siwe kebu i da veluagai, begaidi tolugavianidi <sup>16</sup> i vetalatolitoliedi mulieta i veimea i na luvewafadi fai Fita i 'isave'avina-sakoi.

I 'a'avana, mulieta Elodi Iudiayega i obu 'atamana Sisalia bei i na yogomia.

### *Elodi i wafa.*

<sup>20</sup> Tamu tutuya Kini Elodi i nuasako bwaikina tomia Taia wata Saidoni 'waidie, bega tomotoganidi i va'auta i nagoi i na 'iseni. Siwe nagami yana vanuga 'ana to'isave'avina 'ana wagava Balasitu i veianeni bega i na 'ivaisedi Elodi nuana i na 'iveagiagia fai yana 'eba veimea 'wainega 'adi'adi i mimai.

<sup>21</sup> Balasitu i veifufu Elodi 'waineye begaidi tamu 'aiata i venua'ivinini bega kini 'adi vaigavu i vigavuyeni i miabui yana 'eba miabui 'ai'aiwabuna 'waineye bega i veifufu tomotoga 'waidie. <sup>22</sup> 'Aila'a yana vona i nogai, ma yadi subia i vegolegole i vo, We'e kebu tomogo bonana, Yaubada bonana.” <sup>23</sup> Fai Elodi kebu i da vo, Yau kebu Yaubadaga, yau tomotogaotoga,” begaidi tamu 'Auvea yana anelose i nikei ugauga i 'alavewafa-matayo'oi.

<sup>24</sup> \*Tutuyanina 'waineye Keliso yana 'Aila'a i vevebwaika. Tomotoga fuedi basenadi Yaubada yana Vona kebu i da no-gaiga, wata i nogai bega fuedi Iesu i vetumaganeni.

<sup>25</sup> Basenadi Banabasa wata Saulo i laka Ielusalema mani tovetumaganavo i na veledi loka faifaina. 'Akonadi i 'a'ava wata i vilaviladi Anitioki, wata Malika tamu 'ana wagava Ioni i vagavaia ma fuedi i nagoi.

## 13

### *Faulo yana lauvivila i velamu.*

<sup>1</sup> Anitioki 'waineye, tovetumaganavo 'waidiega 'ifwaidi Yaubada yana Vona 'ana tolu'ivonavo wata 'ifwaidi yana

tovevo. Tomotoganidi 'ifwaidi side 'adi wagava, Banabasa, Simioni tamu 'ana wagava Boto, Lusia tomogo Sailini, Maneni Kini Elodi taivakevakelina, wata Saulo. <sup>2</sup> ✧ Tamu tutuya 'Auvea i subisubiai wata i veve'udigana 'ani matatabuna yadi velu'ui i na vetoketoke faifaina, 'Anu'anunu 'Atumaina i vonedi i vo, Banabasa wata Saulo 'wa na vemia'idiedi fai a venua'ivinedi i na vetofolova faifaiku." <sup>3</sup> ✧ Begaidi tutuyanina ve'udigana wata velu'ui i 'a'avana, nimadi i yatodi 'adi 'ailuga 'unu'unudie, mulieta i vetunedi.

*Banabasa wata Saulo i nagoi Imula Saifilosu.*

<sup>4</sup> 'Anu'anunu 'Atumaina 'akonadi Banabasa wata Saulo i vetunedi, 'adi 'ailuga i obu 'atamana Selusia bega wakeye i dodoga i nagoi Imula Saifilosu. <sup>5</sup> ✧ Tutuyanina i le'wai i nagoi 'atamana Salami, bei Yaubada yana Vona i lu'ageyeni me Diu yadi 'eba miava'auta 'waidie. Wata Ioni Malika i 'weabudi 'adi to'aivaita.

<sup>6-7</sup> 'Agediamo imula kamwaneamo i yogodaba i souyedi 'atamana Fefosi, bei tamu tomogo 'afo'afo'ana i veluagai 'ana wagava Baiesu tutuya fuedi 'eba nuavogana wata 'eba nua'ewa i 'i'idewadi. Taunina tomogo Diu, siwe i vekali tomotoga 'waidie i vo, Yau Yaubada yana tolu'ivona." Baiesu iana gabemani 'ana to'edakumeta 'ana wagava Sesiasi Faulosi, yana 'asetu bwaikina. To'edakumetanina Banabasa wata Saulo i goledi nuanuana i na nagoi 'waineye Yaubada yana Vona i na veifufuyeni. <sup>8</sup> Tomogo 'afo'afo'ananina me Guliki bonadiega tamu 'ana wagava Elimasi, nuanuana igodi Sesiasi Faulosi i na talabodeni bega kebu i na vetumagana Iesu 'waineye. <sup>9-10</sup> ✧ Saulo, tamu 'ana wagava Faulo 'Anu'anunu 'Atumaina i agei mogitana, i 'isanago tomogo 'afo'afo'ana 'waineye i vona i vo, 'Omu Seitani natuna, nani 'atumaidi matatabuna 'adi to'ivesako. 'Omu sakoimu tovekali, 'Auvea yana nuanua tonovidi 'adi tosidamadamana. <sup>11</sup> 'Asiauotoga 'Auvea i na nikemu, matamu i na sako bega tutuya 'ifwaidi 'waidie kebu 'amu fata mageta 'u na 'ise'iseni."

Saulo yana voneye Elimasi i vebaeni matana i vewaowa wata i dudubali, bega i 'abitufa nuanuana tamu tomogo i na siveyaia. <sup>12</sup> Tutuyanina gabemani 'ana to'edakumeta i 'iseni, i vetumagana Iesu 'waineye, wata nuana i vogani bwaikina 'Auvea yana Vona faifaina.

*Faulo ma enavo i nagoi Anitioki 'awalawa Fisidia 'waineye.*

<sup>13</sup> ✧ Mulieta Faulo ma enavo i dodoga Fefosi 'wainega i nagoi Fega, 'awalawa Famifilia 'waineye. Bei i miamia we'e Ioni Malika i vilai i nago Ielusalema. <sup>14</sup> Wata bega i tauya,

✧ 13:2: Fol 9:15 ✧ 13:3: Fol 6:6 ✧ 13:5: Fol 12:12 ✧ 13:9-10: Fol 4:8; Ion 8:44 ✧ 13:13: Fol 15:38



Fega i 'iaweni i nagoi Anitioki 'awalawa Fisidia 'waineye. Me Diu yadi 'Aiata Veawai 'waineye, i luku yadi 'eba miava'auta nageneye i miabui. <sup>15</sup>Yaubada yana veimea Moses 'wainega, wata tolu'ivona 'adi kilukiluma 'waidiega tamu tomogo i lu'iawawadi i 'a'ava mulieta 'eba miava'auta 'ana to'edakumetavo yala i vetunei Faulo ma enavo 'waidie i vo, Emavo, 'ai'edi tamu yami vona 'ama 'aivaita faifaina, nuanuama 'wa na veifufu 'waimeye.”

<sup>16</sup>Bega Faulo i tovoi nimanega i talabodedi i na ve'wada mulieta i vo, Ekwavo, 'omi me Isileli wata 'omi mali tomotoga kebu Diu Yaubada 'wa subisubiaiga a na vonemi. <sup>17-18</sup> ✧ Ida me Isileli yada Yaubada tubudavo i venua'ivinedi wata tutuyanina i miamiani Itifita 'adi 'aila'a i 'ivebwaiki. Wata Yaubada yana toketokena bwaikinega i vagavaidi Itifita 'wainega bega sali'avu'avuye malamala 40 nagedie i 'isave'avinidi. <sup>19</sup> ✧ Mulieta Kenani 'waineye, Yaubada i 'ivaisedi 'awalawa bwaikidi 7 'adi tomotoga i leodi, bega yadi fwayafwaya matatabuna i 'aniveleneni me Isileli 'waidie i veimeyeni. <sup>20-21</sup> ✧ Yaubada me Isileli i 'ivaisedi i maiga, malamala 450 i veluagai.

I miamiani Kenani, Yaubada toveimea toketokedi i venua'ivinedi bega i na 'isave'avinidi. Mulieta Yaubada yana tolu'ivona Samuela yana tutuye, me Isileli nuanuadi tamu kini i na 'isave'avinidi. Begaidi Yaubada i veledi Saulo, Kisa natuna, Beniamina 'ana wauma 'wainega, i ve-kini malamala 40 nagedie. <sup>22</sup> ✧ I 'a'avana Yaubada i ve'idi'idieni i obu, ma'itufa Devida i silakai i ve-kini. Yaubada tomogonina faifaina i vo, Devida, Iese natuna yana nuanua bani'odi yau yaku nuanua wata i vevematayakeyakeku nani matatabuna 'waidie.” <sup>23</sup> ✧ Devidanina 'ana wauma 'wainega Yaubada tamu tomogo i silakai 'ana wagava Iesu, i ve-To'ita'ita'i me Isileli 'waideye bani'odi basenadi i vona'awaufaufa. <sup>24</sup> ✧ Bola Iesu kebu i da maiga, nagami Ioni i lau'age tomotoga Isileli matatabuna 'waidie i vo, Yami sakona 'wa na vedumwe'ubu'ubusedi 'wa na nuavilami, wata 'wa na bafitaiso.” <sup>25</sup> ✧ Mulieta sai'afoga Ioni yana folova i na 'a'ava, tomotoga i vonedi i vo, 'Wa da nuani yau aitoi? Kumanina Yaubada 'ana Venua'ivina 'wa lulukamaseniga, yau kebu kumanikuga. Siwe wata a na vonemi. I mimai mulikuye, taunina toketokeotogina, yau kebu bani'odi. Kebu i da lubwaineku 'waineye a na vetofolova fai taunina bwaikina a bunumayaga.”

*Faulo i lau'age 'ada 'etoyavu faifaina.*

✧ **13:17-18:** Sou 6:6; 12:51; Sou 16:35 ✧ **13:19:** Num 7:1 ✧ **13:20-21:** 1 Sam 8:5,19 ✧ **13:22:** 1 Sam 13:14; 16:13 ✧ **13:23:** Ais 11:1 ✧ **13:24:** Mad 3:1,2 ✧ **13:25:** Ion 1:20,27

<sup>26</sup> Ekwavo, 'ifwaimi Ebelamo 'ana wauma 'wainega, wata 'ifwaimi mali tomotoga kebu me Diu Yaubada 'ana to-subisubiavo, valanina i mai Yaubada 'wainega 'ida faifaida, Iesu 'ana fata i na 'ita'ita'ieda. <sup>27</sup> ✧Tomotoga i miamianiga Ielusalema 'waineye wata yadi to'edakumetavo kebu i da 'isa'inanaiga Iesu taunina To'ita'ita'i. Wata Yaubada yana tolu'ivonavo 'adi kilukiluma i vonavona Iesu faifaina kebu i da 'asetaiiga, vonanidi i lulu'iawawa-vebogidi me Diu yadi 'Aiata Veawai 'waidie. Siwe tutuyanina i veimea Iesu i na wafa, tolu'ivonavo yadi vona 'ana mogitana i souyeni. <sup>28</sup> ✧Kebu tamu wafa lamuna 'waineye i da veluagai siwe Failato i voneni nuanuadi i na luyewafai. <sup>29</sup> ✧Vonanidi basenadiotoga i kilumidiga Iesu faifaina 'adi mogitana i souyedi i 'a'avana, mulieta enavo i ta'ia 'ai lagalagana 'wainega tau-maseye i tavuni. <sup>30-31</sup> ✧Siwe Yaubada wafayega i sivetovoia, wata 'aiata fuedi nagedie i sousouyeni enavo 'waidie, taunidi basenadi taiadi i maia Ielusalema Galili 'wainega. Enavonidi 'asiau i lulu'ivona tomotoga Isileli 'waidie Iesu faifaina.

<sup>32-33</sup> ✧Wata 'ima bani'odi 'a mai Iesu Valana 'Atumaina 'a mieni 'wa na nogai. Ava'ai basenadiotoga Yaubada i vona'awaufaufa tubudavo 'waidie, 'akonadi i 'idewadi faifaida fai Iesu i sivetovoi-vaitugani wafayega. Basenadi bani'odi i kilumi Iesu yana tovi-vaitugana faifaina Same 2 'waineye Yaubada i vo,

'Omu natuku,

'Asiau fai yau Tamamu veimea a velemu.”

<sup>34</sup> ✧Wata tamu Yaubada yana vona i kilumi Iesu i sivetovoi-vaitugani kebu i na wafa-vagata faifaina. I vo,

Basenadi a vona'awaufaufa Devida 'waineye nani 'atumaotogidi wata magemagetadi a na 'idewadi faifaina.

We'e mogitana naninina a na 'idewadiga 'omi faifaimi.”

<sup>35</sup> ✧Wata tamu yana vona Same 'waineye Devida i vo,

Yamu Tofolova Magemagetana kebu 'u na baileni bega tomogona i na bokana.”

<sup>36</sup> ✧Devida i kilumiga kebu taunina faifaina fai tutuyanina i miamia ma yana 'aila'avo, Yaubada yana folova i 'idewa'a'avadina i wafa tubunavo liliwadie i tavuni siwe i bokana. <sup>37</sup> We'e tamu tomogo Yaubada i sivetovoia wafayega kebu i da bokanaga. <sup>38-39</sup> ✧Ekwavo a na vonemi. Tomogonina Iesu 'wainega Yaubada 'ana fata yami sakona i na nuatavunidi begaidi valana 'a lulu'ageyeni. Yaubada yana ve'etoboda i maiaga Mosese 'wainega 'ai'edi 'wa na geudiga 'ami vematavuloga 'wa na wafa. Ve'etobodanidi kebu 'adi

✧ 13:27: Ion 16:3 ✧ 13:28: Mad 27:22,23 ✧ 13:29: Mad 27:59,60

✧ 13:30-31: Fol 2:24; Fol 1:3,8 ✧ 13:32-33: Same 2:7 ✧ 13:34: Ais 55:3

✧ 13:35: Same 16:10 ✧ 13:36: Fol 2:29 ✧ 13:38-39: Fol 10:43; Lom 10:4

fata i na 'etoyavumi yami sakona 'waidiega, Iesu 'aisena 'ana fata. Begaidi nuanuama 'wa na 'asetai, egavo Iesu i na vetumaganeni sakona 'waidiega i na 'etoyavudi wata i na ve'atumai Yaubada mataneyeye. <sup>40</sup> 'Wa na 'isave'avinimi, bega vitanina Yaubada yana tolu'ivonavo basenadiotoga faifaina i kilumi kebu i na souyeni 'waimie, fai basenadi Yaubada i vo,

<sup>41</sup> ✨Tamu yaku folova a 'idewadewai yami tutuya 'waineye, siwe kebu 'wa na vetumagana.

'Ai'edi tamu tomogo i na kiavemagetai, kebu 'wa na ve'awamogitana.

'Omi yaku vona 'wa 'amalakibuyeniga, a na vonemi.

Yaku folovanina 'wa na 'iseni 'wa na nuavogana, mulieta 'wa na wafa.”

*Mali tomotoga taunidi kebu Diu i sosoana Iesu Valana faifaina.*

<sup>42</sup> 'Akonadi yadi tafalolo i 'a'ava, Faulo wata Banabasa i sousouyedi 'eba miava'auta 'wainega, tomotoga i velu'ui 'waidie nuanuadi 'Aiata Veawai matadie i na viladi bega wata i na veifufu nani de'e faifaiddi. <sup>43</sup> Matatabudi i yavula, 'ifwaidi Diu wata 'ifwaidi mali tomotoga i ve-Diu, Faulo wata Banabasa taiadi i veifufu'eda'eda. Tomata'aulelevo 'adi 'ailuga tomotoganidi i velu'ase'asedi i vo, Taunimi 'wa na tautauyemi Yaubada yana nuakalikali 'waineye, kebu 'wa na baileni.”

<sup>44</sup> 'Aiata Veawainina matadie i le'wa, tomotoga sai'afo matatabudi 'atamana bwaikina 'wainega i maia, nuanuadi 'Auvea yana Vona i na nogai. <sup>45</sup> ✨Tutuyanina me Diu 'aila'a bwaikina i 'isedi i ve'unumagigi bega i vona-awadamana Faulo 'waineye, wata tomotoga i vonedi i vo, We'e Faulo i vevekaliemi, kebu bonana 'wa na nogai.” <sup>46</sup> ✨Siwe Faulo wata Banabasa ma yadi venuafoufa'ala i vonedi i vo, I lubwainema Yaubada yana Vona nagami a na lu'ivona 'waimie mulieta mali tomotoga. Siwe fai 'omi 'wa vedumwe'ai'aieni, taunimi 'wa veimeyemi kebu i da lubwainemi mia 'atumaina wata miamia-vagaina 'wa na veluagai. Faifainanina 'a na bailemi 'a na nagoi mali tomotoga taunidi kebu Diu 'waidie. <sup>47</sup> ✨Fai 'akonadi bani'odi 'Auvea i vonema yana Buki 'wainega i vo,

'Omu mageta bani'odi a yatomu mali tomotoga taunidi kebu Diu faifaiddi bega 'omu 'waimuyega tomia fwayafwaya matatabudi 'adi fata 'ita'ita'i i na veluagai.”

<sup>48</sup> Tutuyanina mali tomotoga vonanina i nogai, ma yadi sosoana 'Auvea i subisubiai yana Vona faifaina, we'e egavo 'akonadi Yaubada i venua'ivinedi bega mia 'atumaina wata

miamia-vagaina i na veluagai, taunidi i vetumagana Iesu 'waineye.

<sup>49</sup> 'Awalawanina 'waineye, tomotoga matatabudi 'Auvea yana Vona i nogai. <sup>50</sup> Me Diu i nagoi 'atamana 'ana to'edakumetavo wata vevine 'adi wagava bwaikidi 'waidie nuadi i 'anidi. Vevinenidi kebu Diu, siwe Yaubada 'ana tove'ililibu. Bega to'edakumetanidi 'aila'a i vonedi i daba Faulo wata Banabasa veviga i veledi wata i sogiedi yadi 'awalawa 'wainega. <sup>51</sup> Tomata'aulelevo 'adi 'ailuga i souyedi 'awalawanina 'wainega, 'agedi i lubutubutudi, yadi 'eba 'isa kebu wata bei i na lalau'age, mulieta i nagoi 'atamana Ikoniami. <sup>52</sup> We'e Anitioki 'waineye, 'ifwaidi 'akonadi Faulo wata Banabasa yadi vona i vetumaganeni, i sosoana bwaikina wata 'Anu'anunu 'Atumaina i agedi.

## 14

### *Faulo wata Banabasa i lau'age Ikoniami.*

<sup>1</sup> Tutuyanina Faulo wata Banabasa i le'wa Ikoniami, i nagoi me Diu yadi 'eba miava'auta 'waineye, bei ma yadi toketokena i veifufu 'waidie nika me Diu wata taunidi kebu Diu fuedi i vetumagana Iesu 'waineye. <sup>2</sup> \*Diu 'ifwaidi i baila kebu i da vetumagana i nagoi mali tomotoga nuadi i 'anidi bega Faulo wata Banabasa i vedumwe'ai'aiedi. <sup>3</sup> \*Tomata'aulelenidi 'adi 'ailuga bei i miamiani 'aiata fuedi nagedie ma yadi venuafoufa'ala i veveifufu Toveimea Iesu yana nuakalikali faifaina. Yadi vonanina Toveimea Iesu i ve'awamogitaneni fai toketokena i veledi bega 'eba nuavogana wata 'eba nua'ewa i 'i'idewadi. <sup>4</sup> 'Aila'a bwaikina 'atamananina 'waineye i 'idia, 'ifwaidi nuanuadi Faulo ma iana Banabasa, 'ifwaidi i baila.

<sup>5</sup> \*Mulieta 'ifwaidi Diu wata mali tomotoga ma yadi to'edakumetavo nuanuadi tomata'aulelevo i na 'ive'avinidi veviga i na veledi mulieta i na lukileudi i na wafa. <sup>6-7</sup> Tutuyanina yadi nuanua i 'asetai, Faulo ma iana i dega i nagoi 'awalawa Likionia. Bei 'atamana Lisitala, Debi, wata 'awalawa lilivadie Vala 'Atumaina Iesu faifaina i lau'age.

### *Tomogo bwalobwalokona i ve'atumai.*

<sup>8</sup> \*Lisitala nageneye, tamu tomogo i miamia, 'agena sinunumina inana kamodiega kebu 'ana fata i na yaba. <sup>9-10</sup> Tutuyanina Faulo i lalau'age, toviganina i miabui i noganogaya. Faulo i 'isanaweni yana nuanua 'waineye i vo, I lubwaineni a na 'ive'atumaia fai i vetumagana Iesu

'waineye.” Bega bonana bwaikinega i voneni i vo, 'U tovoi tonovimu,” nika tomogonina i luafwalagi i yaba.

11-12 Tutuyanina 'aila'a i 'iseni ava'ai Faulo i 'idewai tovi-ganina 'waineye, i vegolegole bonadiega vona Likionia 'wainega igodi i vo, 'Akonadi yada yaubada 'adi 'ailuga i vetomotoga i obuma 'waideye.” Tomotoganidi yadi yaubada-vekavekali fueidi, yaubadanidi yadi to'edakumeta 'ana wa-gava Iufita, we'e yadi toveifufu 'ana wagava Makiuli. Tomo-toga yadi nuanua i vo, Banabasa i ve-Iufita we'e Faulo i ve-Makiuli fai taunina toveifufu.” 13 Basenadi tamu vanuga 'eba velu'ui i yogoni Iufita faifaina 'atamana bwaikina lilivaneye. 'Aiatanina 'waineye Iufita 'ana tovelomu 'aisaya bulumakau wata welavi ididi uyauyana i miedi 'awa 'waineye, ma yana tomotogavo igodi 'aisayanidi i da velomuyedi Banabasa wata Faulo 'waidie bega i da subisubiadi.

14-15 ✧Tutuyanina Banabasa wata Faulo i 'asetai tomotoga nuanuadi i na velomu 'waidie, ma yadi nuavita 'adi kaleko i silabu'idi\* i lilide i nagoi 'aila'a nagedie i vegolegole i vo, Awale nuanuami 'wa na velomu 'waimeye? 'Ima tomoto-gaotoga 'omi bani'odi, kebu yami yaubadavo. 'Ima 'a maiga Iesu Valana 'Atumaina 'a lulu'ivoneyeni 'waimie bega yami yaubada-'avo'avovo 'waidiega 'wa na nuavilami Yaubada miamia-vagaina 'waineye. Taunina abama, fwayafwaya, eyaga wata nani fueidi nagedie i 'idewadi. 16 Basenadi tomia fwayafwaya matatabudi Yaubada i tauyedi taunidi yadi nuanua i 'i'idewadi. 17 ✧Yaubada nani fueidi 'atumaidi i 'idewadewadi faifaيدا, yada 'eba 'isa bega ta na 'asetai Yaubada miamia-vagaina wata toketokena. Yana nuaka-likali i veveda fai i veve'wei abamega, 'ani'ani i veleveleda 'aitamogana 'aitamogana 'adi tutuya 'waidie, bega kamoda i aiaidi wata ta sososoana.” 18 Faulo wata Banabasa de'e vonanina 'wainega tomotoga i talabodedi kebu i na velomu 'waidie siwe i kwayega i nagoga yadi talaboda i vetoketoke.

19 ✧Mulieta 'ifwaidi me Diu i maia Anitiokiega, 'awalawa Fisidia nageneye, wata 'atamana Ikoniami 'wainega. Tomo-toganidi 'aila'a nuadi i 'anidi bega ma fueidie i daba Faulo i 'ive'avini i lukileuya. Yadi nuanua i vo, I wafa,” bega i luyo'ei i naweni mwalilige. 20 Siwe tovetumaganavo i tov-ififineni nika Faulo i tovoi-matayo'o wata i vila-vaitugani i nago 'atamane. I 'atai, ma iana Banabasa i tauya i nago Debi.

### *I viladi i nagoi Anitioki 'awalawa Silia 'waineye.*

✧ 14:14-15: Fol 17:24 \* 14:14-15: Me Diu yadi sauluva, 'ai'edi von-a-awadamana Yaubada 'waineye i na nogai, 'adi kaleko i na silabu'idi. ✧ 14:17: Lom 1:19-20 ✧ 14:19: Fol 17:13

<sup>21</sup> ✧Faulo wata Banabasa Iesu Ifufuna 'Atumaina i lu'ageyeni Debi 'waineye bega fue di i vetumagana Iesu 'waineye, mulieta i viladi i nagoi Lisitala. Bega i tauya i nago Ikoniami, wata bega i tauya i nago Anitioki 'awalawa Fisidia nageneye. <sup>22</sup> ✧'Atamananidi 'waidie, tomata'aulelenidi 'adi 'ailuga tovetumaganavo velu'ase'aseyega i kiavefa'alidi i vo, Kebu 'wa na 'ailove, 'wa na vevetumagana Iesu 'waineye, fai nagami veviga fue di ta na veluagadi, mulieta Yaubada i na veimeyeda yana 'Aila'a nageneye.” <sup>23</sup> Faulo wata Banabasa i nagoi tovetumaganavo 'adi 'aila'a 'aitamogana 'aitamogana 'waidie, yadi to'edakumetavo i venua'ivinedi bega tovetumaganavonidi i na 'isave'avinidi. Fai nuanuadi Yaubada i na 'ivaisedi, i ve'udigana 'ani matatabuna wata i vevelu'ui i vo, 'Auvea, 'a vetumaganemu bega nuanuama to'edakumetanidi 'u na 'ivaisedi wata tutuya fue di 'u na 'isave'avinidi.”

<sup>24</sup> I 'a'avana mulieta i tauya i nago 'awalawa Fisidia 'waineamo nika i le'wai 'awalawa Famifilia. <sup>25</sup> Fega 'waineye Iesu Valana i lu'ageyeni, mulieta i obu 'atamana Atelia. <sup>26</sup> ✧Bei i dodoga i viladi i nagoi Anitioki 'awalawa Silia nageneye. Anitiokinina 'waineye basenadi ediavo i velu'ui faifaidi bega Faulo wata Banabasa Yaubada i na 'ivaisedi wata i na nuakalialiedi folovanina 'akonadi i ve'a'avaiga faifaina.

<sup>27</sup> ✧Tutuyanina Faulo wata Banabasa i le'wai Anitioki, tovetumaganavo i goleva'augidi i lu'ivona 'waidie. I veifufu 'waidie bani'odi Yaubada i 'ivaisedi taiadi i folova, wata mali tomotoga taunidi kebu Diu wata Yaubada i tauyedi Iesu 'waineye i vetumagana. <sup>28</sup> Anitioki 'waineye, i mia tutuya manamanawena tovetumaganavo taiadi.

## 15

*Tovetumaganavo yadi to'edakumetavo i va'auta Ielusalema.*

<sup>1</sup> ✧Tamu tutuya tomotoga 'ifwaidi Iudia 'wainega i maia Anitioki. Bei tomotoganidi tovetumaganavo i ve 'waidie i vo, 'Ai'edi bunumi kebu 'wa na bobodiga bani'odi yada veimea Mosese 'wainega, Yaubada kebu i na 'ita'ita'iemi yami sakona 'waidiega.” <sup>2</sup> Faulo wata Banabasa tovenidi taiadi i ve'ikwayekwayega i 'alamagi'aia begaidi mali tovetumaganavo nuanuadi tomata'aulelenidi 'adi 'ailuga wata 'ifwaidi Anitioki 'wainega i na nagoi Ielusalema i na veifufu 'ifwaidi tomata'aulelevo wata to'edakumetavo 'au'auveadi taiadi bunu 'aibobo faifaina. <sup>3</sup> Tovetumaganavo Anitioki 'wainega, Faulo, Banabasa wata ediavo taiadi i nawedi

✧ 14:21: Mad 28:19 ✧ 14:22: Fol 18:23; 2 Tim 3:12 ✧ 14:26: Fol 13:1-2

✧ 14:27: Fol 15:4,12 ✧ 15:1: Gal 5:2

'edeye i valovedi i viladi we'e tomotoganidi i nagoi 'awalawa 'ailuga 'waidiamo, Finisia wata Samelia. Bei mali tovetumaganavo 'waidie i lu'ivona tomotoga taunidi kebu Diu yadi nuavilana Yaubada 'waineye faifaina, begaidi matatabudi i sosoana bwaikina. <sup>4</sup> \*Tutuyanina i le'wai Ielusalema, tomata'aulelevo, to'edakumetavo 'au'auveadi, wata tovetumaganavo matatabudi, Faulo ma enavo i yogo'ede'ededi ma yadi sosoana. Mulieta i veifufu 'waidie bani'odi Yaubada i 'ivaisedi taiadi i folova.

*Fita wata Iemesa i veifufu tovetumaganavo 'waidie.*

<sup>5</sup> We'e tovetumaganavo 'ifwaidi, taunidi Falisi yadi 'aila'a 'wainega, i tovoi i vonedi i vo, Egavo nuanuadi i na luku Keliso yana 'Aila'a 'waideye, nagami bunu 'aibobo i na 'ewai, wata ta na vonedi ve'etobodanidi basenadiotoga Mosese i veledaga i na vevematayakeyakedi.”

<sup>6</sup> Begaidi tomata'aulelevo wata to'edakumetavo 'au'auveadi taiadi i miava'auta bunu 'aibobo 'ana nuanua i na sivetovetonovi. <sup>7</sup> \*Tutuya manamanawena naninina faifaina i veveifufu, mulieta Fita i tovoi i vo, Ekwavo, 'akonadi 'wa 'asetai, basenadi yau Yaubada i venua'ivineku 'waimiega bega Iesu Valana 'Atumaina a na lau'age mali tomotoga taunidi kebu Diu 'waidie bega 'adi fata i na vetumagana Iesu 'waineye. <sup>8</sup> Yaubada tomotoga matatabuda yada nuanua i 'asetadi bega i veda nuanuana mali tomotoga taunidi kebu Diu, Iesu 'waineye i na vetumagana. I vedaga fai 'Anu'anunu 'Atumaina i veledi, basenadi 'ida bani'odi. <sup>9</sup> 'Ida me Diu, wata taunidi kebu Diu, Yaubada kebu i da lu'idida, fai tomotoganidi i vetumagana Iesu 'waineye, yadi sakona i nuatavunidi wata i 'ive'atumaidi. <sup>10</sup> Awale nuanuami igodi Yaubada 'wa na silubuya bega i na nuasako? 'Akonadi i veda mali tomotoga i tauyedi i na vetumagana. Tovetumaganavo kebu ta na lukakadedi 'ida me Diu yada ve'etoboda vitadi i na ve'ililibuyedi. 'Ai'edi ta na lulukakadediga, bani'odi venuana vitana ta vevevadi, ve'etobodanidi tubudavo wata 'ida kebu 'ada fata ta na evaevadi. <sup>11</sup> \*Kebu bani'odi ta na munega. Ta vetumagana Toveimea Iesu yana nuakalikaliiega i 'ita'ita'ieda sakona 'waidiega bega ta ve'atumai, wata taunidi kebu Diu bani'odi i 'ita'ita'iedi.”

<sup>12</sup> Fita i vona'a'ava, matatabudi kulukulu i lovogi. Mulieta Banabasa wata Faulo i tovoi i lu'ivona 'waidie Yaubada 'eba nuavogana wata 'eba nua'ewa i 'idewadi mali tomotoga taunidi kebu Diu matadie.

<sup>13</sup> Tutuyanina i vona'a'ava, nika Iemesa i vo, Ekwavo a na vonemi. <sup>14</sup> Saimoni Fita ava'ai 'akonadi i voneyeniga, i vona mogitana. I veifufuga Yaubada mali tomotoga

taunidi kebu Diu i nuakalikaliEDI wata be'ama 'waidiega 'ifwaidi i venuma'ivinedi, wata 'Anu'anunu 'Atumaina i agedi, bega yana tomotoga mogitana. <sup>15</sup> Fita yana vona i vesala tolu'ivona yadi vona bani'odi fai basenadiotoga i vona-vagata mali tomotoga taunidi kebu Diu Yaubada i na ve'ililibuyeni. <sup>16</sup> \*Yaubada yana vona i kilumi i vo.

Kini Devida 'ana wauma 'wa da vo yana vanuga i be'u, Siwe yau Yaubada a na vilaku a na lufolovi wata a na vetovoi-vaitugani.

<sup>17</sup> A na 'ive'ivauya bega mali tomotoga matatabudi yau yadi 'Auvea i na lualeku.

Taunidi kebu Diu a venuma'ivinediga a goledi i na maia bega yaku tomotoga mogitana.”

<sup>18</sup> Vonanina 'Auvea yana vona, basenadiotoga i voneyeni.”

<sup>19</sup> Wata Iemesa i vonedi i vo, De'e yau yaku nuanua. Mali tomotoga taunidi kebu Diu i nunuaviladiga Yaubada 'waineye, kebu nuanuaku vita fueDI ta na veveledi. <sup>20-21</sup> \*Siwe tomotoga fueDI yada ve'etoboda wata veimea Mosese 'wainega i 'asetadi fai ta lulu'iawawa-vebogidi vanuga 'eba miava'auta 'waidie yada 'Aiata Veawai 'aitamogana 'aitamogana 'waidie, wata 'atamana fueDI 'waidie ta lulu'ageyedi. Faifainanina lubulubu'ava ta na kilumi ta na vonedi bega 'aisayanidi mali tomotoga yaubada-vekavekali 'waidie i velomuyediga, kebu i na 'ani'anidi, wata kebu i na ve'avula-'avo'avovo. Lologa kebu i na 'ani, wata 'aisaya 'i'i'idi kebu i na 'anidi fai dayaga bwaikina nagedie.”

*Lubulubu i kilumi mali tomotoga faifaidi.*

<sup>22</sup> Yadi vona i 'a'ava, tomata'aulelevo, to'edakumetavo 'au'auveadi, wata tovetumaganavo matatabudi taiadi yadi nuanua 'aitamogana 'wainega, tomotoga 'ifwaidi i venuma'ivinedi bega i na vetunedi i na nagoi Anitioki Faulo wata Banabasa taiadi. Tomotoganidi i venuma'ivinediga ma 'adi ve'ililibu ediavo 'waidiega, 'adi wagava Sailasa, wata Iudasa tamu 'ana wagava Balisaba. <sup>23</sup> Valanina i kilumiga tomotoganidi i na naweniga 'ana nogaya side bani'odi.

Ie emavo,

'Omi tovetumaganavo kebu Diu 'wa miamiani Anitioki, 'awalawa Silia, wata Silisia 'waidie.

'Ima emiavo tomata'aulelevo, to'edakumetavo 'au'auveama wata tovetumaganavo, matatabuma 'a vekaiwa 'waimie. <sup>24</sup> \*Vala 'a nogai tomotoga 'ifwaidi 'ama 'aila'a 'wainega i vonemi bunumi 'wa na bobodi wata 'ifwaidi me Diu yama ve'etoboda 'wa na ve'ililibuyedi, 'a nuaniga i vekaliemi. Kebu nuafoumi i na veviga, 'ima kebu 'a



da vetunedi, taunidi yadi nuanuayega i vona 'waimie.  
<sup>25-26</sup> Faifainanina fuema 'a va'auta 'a veifufu yama nuanua  
 'aitamogana 'wainega, 'ifwaidi tomotoga 'a venua'ivinedi  
 'a na vetunedi i na waia 'waimie. Tomotoganidi i na  
 waiaga emavo nuafouma Banabasa wata Faulo taiadi,  
 tomata'aulelenidi 'adi 'ailuga yawaidi i tauyedi 'ada  
 Toveimea Iesu Keliso yana folova faifaina. <sup>27</sup> Bega Iudasa  
 wata Sailasa 'a venua'ivinedi 'a na vetunedi 'waimie, ava'ai i  
 na voneyeniga wata 'ima ava'ai 'a veifufuyeniga 'adi nogaya  
 'aitamogana. <sup>28</sup> 'Anu'anunu 'Atumaina wata 'ima yama  
 nuanuana 'aitamogana, veimea vitadi kebu 'a na vele  
 mi siwe nuanuama 'ifwaidi ve'etoboda 'wa na ve'ililibuyedi.  
<sup>29</sup> ✨'Aisayanidi mali tomotoga yaubada-vekavekali 'waidie i  
 velomuyediga, kebu 'wa na 'ani'anidi, wata lologa kebu 'wa  
 na 'ani. 'Aisaya 'i'i'idi kebu 'wa na 'ani fai dayaga bwaikina  
 nagedie, wata kebu 'wa na ve'avula-'avo'avovo. Side bani'odi  
 'ai'edi ve'etobodanidi 'wa na ve'ililibuyedi yami sauluva i na  
 ve'atumai.

'Asa'aiana yama nuanua 'ana fata 'waimie.

Ieu emavo.”

<sup>30</sup> Valanina i kilumi tomotoga i na nagoiga Anitioki i veledi  
 i naweni. Tutuyanina i le'wai tovetumaganavo matatabudi  
 i va'auta bega valanina i veledi. <sup>31</sup> I lu'iwawawai, i sosoana  
 bwaikina fai 'aivaita i veluagai. <sup>32</sup> Iudasa wata Sailasa,  
 taunidi Yaubada yana Vona 'ana tolu'ivonavo i veifufu man-  
 amanawena tovetumaganavo taiadi, yadi vetumagana Iesu  
 'waineye i kiavefa'alidi wata i kiavesosoanidi. <sup>33</sup> Iudasa wata  
 'ifwaidi tomotoga i maiaga Ielusalemega, Anitioki 'waineye  
 i miamiani sai'afo tutuya manamanawena, we'e yadi tauya  
 'waineye ediavo i vonanuakalikali 'waidie mulieta i viladi  
 Ielusalema 'adi tovetune 'waidie. [<sup>34</sup> We'e Sailasa nuanuana  
 i na miamia kebu i da vilai Ielusalema.]

<sup>35</sup> Wata Faulo ma iana Banabasa i miamiani Anitioki,  
 'ifwaidi tomotoga taiadi bei i lalau'age wata i veve 'Auvea  
 yana Vona.

*Faulo yana lauvivila 'ana veluga i velamu.*

<sup>36</sup> Tutuya 'ifwaidi i 'a'ava, Faulo Banabasa i voneni i vo,  
 Side beidimo ta na vilada ta na nagoi 'atamana 'aitamogana  
 'aitamogana 'waidie basenadi bei 'Auvea yana Vona ta  
 lau'agega, 'waideamo. Edavo ta na 'isedi ta na 'asetai yadi ve-  
 tumagana Iesu 'waineye i fa'alidi 'alo kebu.” <sup>37-38</sup> ✨Banabasa  
 nuanuana Ioni Malika taiadi i na nago, siwe Faulo i nu-  
 ani kebu 'atumainaga bega i vo, Basenadi taiadi ta folo-  
 folova Famifilia 'waineye yada folova kebu ta da ve'a'avadiga

Malika i 'iaweda.”<sup>39-40</sup> 'Adi 'ailuga i ve'ikwayekwayega bwaikina begaidi i vetawe'eagi, Banabasa Malika i vagavaia i damana Imula Saifilosi, we'e Faulo Sailasa i venua'ivineni 'ana 'weabu. Mulieta ediavo 'Auvea 'waineye i velu'ui i na nuakalikaliedi wata i na 'isave'avinidi.<sup>41</sup> I 'a'avana nika Faulo wata Sailasa i tauya i nagoi 'awalawa Silia wata Silisia 'waidiamo tovetumaganavo yadi vetumagana Iesu 'waineye i kikiavefa'alidi.

## 16

*Timoti, Faulo, wata Sailasa taiadi i nagoi.*

<sup>1</sup> ✧Faulo ma iana Sailasa i nagoi 'atamana Debi wata Lisitala. Bei tamu Iesu 'ana tovetumagana 'ana wagava Timoti i miamia, inana tovetumagana vavine Diu, we'e tamana tomogo Guliki.<sup>2</sup> ✧Tovetumaganavo matatabudi Lisitala wata Ikoniami 'waidie Timoti i ve'ililibuyeni.<sup>3</sup> Faulo nuanuana Timoti taiadi i na nago siwe 'atamananidi 'waidie me Diu i 'asetai Timoti tamana tomogo Guliki, bununa kebu 'ana 'aiboboga wata natuna bani'odi. Faifainanina Faulo Timoti bununa i boboi bega me Diu i na 'asetai yadi sauluva i ve'ililibuyedi.<sup>4</sup> ✧I 'a'avana, ma fuedie i nagoi 'atamana fuedi 'waidiamo, Iesu Valana 'Atumaina i veveifufuyeni tovetumaganavo 'waidie wata ve'etoboda i lu'ivoneyedi bega i na ve'ililibuyedi. Ve'etobodanidi tomata'aulelevo wata to'edakumetavo 'au'auveadi basenadi i veifufuyedi Ielusalema 'waineye.<sup>5</sup> Bega tovetumaganavo 'adi 'aila'avo 'atamana 'aitamogana 'aitamogana 'waidie yadi vetumagana i vetoketoke wata 'aiata 'aitamogana 'aitamogana 'adi 'aila'a i vevebwaika.

*Faulo i 'enoneganega Tiloasi 'waineye.*

<sup>6</sup> ✧Faulo ma enavo i nagoi 'awalawa Filigia wata Galetia 'waidiamo, wata igodi Iesu Valana i da lau'age 'awalawa Eisia nageneye, siwe 'Anu'anunu 'Atumaina i talabodedi.<sup>7</sup> Tutuyanina i le'wa 'awalawa Maisia lilivaneye, nuanuadi i na luku 'awalawa Batinia 'waineye, siwe Iesu 'Anu'anununa kebu i da tauyediga.<sup>8</sup> Begaidi i viladi i nagoi 'awalawa Maisia lilivaneamo bega i obu 'atamana Tiloasi.<sup>9</sup> Bei lovane Faulo i 'enoneganega, tamu tomogo Masidoniayega i 'iseni i vevelu'ui 'waineye i vo, 'Wa da mai Masidonia 'wa da 'ivaisema.”<sup>10</sup> Faulo 'ana 'enoneganega i 'a'avana i tovoi, wata yau\* taiadi 'a 'idewadewa 'a na tauya Masidonia fai yama nuanua Yaubada i vonema Iesu Valana 'Atumaina 'a na lau'age me Masidonia 'waidie.

✧ 16:1: 2 Tim 1:5 ✧ 16:2: Fil 2:19-22 ✧ 16:4: Fol 15:23-29 ✧ 16:6: Fol

18:23 \* 16:10: Taunina Luke. Buki de'e 'ana tokiluma.

*Lidia yadi vetumagana Filifai 'waineye.*

<sup>11</sup> Tiloasi 'wainega 'a dodoga, tonovina 'a nagoi 'a luku Imula Samotilesi. I 'atai wata 'a dodoga 'a nagoi 'atamana Nefoli bei 'a obu. <sup>12</sup> Wata bega 'a tauya 'agemeamo 'a luku Filifai, 'atamananina bwaikina 'awalawa Masidonia nageneye, basenadi me Loma bei i vila i mia. Bei 'a miamiani 'aiata 'ifwaidi 'waidie.

<sup>13</sup> Mulieta me Diu yadi 'Aiata Veawai 'waineye 'atamananina 'a 'iaweni 'a obu ufeye fai 'a nuani bei me Diu yadi 'eba velu'ui. Bei 'a miabui mosomoso 'waidie, 'a veifufu vevine i va'autaga 'waidie. <sup>14</sup> Vevinenidi 'waidiega tamu vavine Taiatala 'wainega bonama i nogai. Vavinenidi 'adi wagava Lidia, Yaubada 'ana tove'ililibu we'e yadi folova kaleko yamoyamoina wata 'ana tutula bwaikina i vevekinwaneyedi. 'Auvea i 'ivaisedi yadi nuanua i magetai bega ava'ai Faulo i voneyeniga i vetumagana. <sup>15</sup> \*Mulieta taunidi wata tomotoganidi yadi vanuga 'ana tomia matatabudi taiadi i bafitaiso. I 'a'avana i vonema 'a na nagoi yadi vanuge i vo, 'Ai'edi 'wa na nuaniga yau tovetumagana mogitana 'Auvea 'waineye, 'wa na mai yama vanuge bei 'wa na 'eno'enovi." Yadi lukakada 'wainega 'a nagoi.

*Faulo wata Sailasa i yogonidi Filifai 'waineye.*

<sup>16</sup> Tamu 'aiata 'a nunagoi 'eba velu'ui 'waineye, tamu vavine tofolova-maimaiga 'a veluagai. Basenadi yaiaina i agei bega 'ana fata i na vona-vagata tutuya i mimai ava'ai i na souyeniga faifaina. 'Ai'edi aitoi mani i na veleni i na vona-vagata ava'ai bola i na souyeni 'waineye, we'e maninina bwaikina i 'une'unediga 'ana to'isave'avinavo i eloeloi. <sup>17</sup> \*Tutuya fuedi Faulo wata 'ima i yoyogo'wailima wata i vevegolegole i vo, De'e tomotoganidi Yaubada Bwaikaotogina yana tofolovavo. Ava'ai i veveifufuyediga bonadi 'wa na nogai bega Yaubada i na 'ita'ita'iemi." <sup>18</sup> \*Aiata fuedi nagedie i vevegolegole, Faulo i logi bega i sivilai yaiaina i talabodeni i vo, Iesu Keliso 'ana wagavayega a vonemu 'u 'awa'a'imu vavine 'wainega." Faulo i vona'a'ava nika yaiaina i 'awa'a'ia.

<sup>19</sup> Vavine 'ana to'isave'avinavo i 'iseni i nuani kebu wata i na vona-vagata wata kebu 'ana fata i na 'ai'une yadi mani 'akonadi i 'a'ava. Begaidi ma yadi nuasako Faulo wata Sailasa i 'ive'avinidi i yo'edi i nawedi 'atamanafouye gabe-manu 'waidie. <sup>20</sup> \*Tutuyanina vavine 'ana to'isave'avinavo Faulo wata Sailasa i le'wedi toveimeanidi Loma 'wainega matadie i vonedi i vo, De'e tomotoganidi me Diu, sakona

'adi to'idewadewa yada 'atamane. <sup>21</sup> Yadi sauluva i veveda igodi nuanuadi sauluvanidi me Loma ta talabodediga ta na 'i'idewadi.”

<sup>22</sup> Tomotoga fueidi i maia Faulo wata Sailasa i tovifinedi i velamu i nikenikedi we'e toveimeanidi gabemani Faulo ma iana 'adi talauma i silabu'idi mulieta tolugaviavo i veimeyedi i toke i fitalidi. <sup>23</sup> I toke i lumadimadiwauwadi, mulieta vanuga 'eba yogona 'waineye i yatodi, wata to'isave'avina i voneni i na toke i na sibodedi. <sup>24</sup> Fai bani'odi i veimeyeni, begaidi to'isave'avinanina i bifelefeledi i luku tamu tutudaba 'waineye vanuga 'eba yogona kamwaneye, wata 'agedi i vetutufwasedi 'ai vitadi 'waidiega.

*Faulo ma iana 'adi to'isave'avina i vetumagana Iesu 'waineye.*

<sup>25</sup> ✧ Lovana 'ana utukamwana 'waineye, Faulo wata Sailasa i vevelu'ui wata i lei-subisubia Yaubada 'waineye, mali tomotoga yogoyogonidi i noganogai bonadi. <sup>26</sup> Nika tutuyanina 'waineye yoyoyo bwaikina i yue vanuga 'eba yogona matatabuna wata 'ana 'ogola taiadi i fetu. Saiboda matatabuna i 'aniyavudi wata bulava kainumu i 'anidabadi tomotoga yogoyogonidi nimadiega. <sup>27</sup> To'isave'avina i 'isa, saiboda matatabuna i 'isedi yavuyavudi yana nuanua i vo 'ako, Tomotoga yogoyogonidi 'akonadi i ve'aladegadega,” begaidi yana kefata i 'ewai igodi taunina i da luvewafai.† <sup>28</sup> Siwe Faulo i ta'ala i vo, Taunimu kebu 'u na 'ivekokovimu. 'Ima matatabuma side'e.”

<sup>29</sup> Bega vanuga 'eba yogona 'ana to'isave'avina i vegole mageta i na mieni, i lilide i luku 'waidie ma yana tatava wata ma yana ve'ililibu i be'u Faulo wata Sailasa matadie. <sup>30</sup> Mulieta to'isave'avinanina Faulo wata Sailasa i vonedi taiadi i souyedi vanuga 'eba yogona 'wainega i velutoliedi i vo, Yaku 'auveavo, ava'ai a na vai bega 'ita'ita'i a na veluagai?” <sup>31</sup> I voneni i vo, Ma yamu vetumagana taunimu 'u na tauyemu Toveimea Iesu 'waineye i na 'ita'ita'iemu, 'omu wata yamu 'aila'a.” <sup>32</sup> Mulieta 'Auvea yana Vona i veifufuyedi 'waineye wata yana vanuga 'ana tomia 'waidie. <sup>33</sup> ✧ Bola lovana siwe i veifufu'a'avana, vanuga 'eba yogona 'ana to'isave'avina i vagavaidi i nawedi 'adi kini'ona i lekoadi mulieta taunina wata yana 'aila'avo taiadi i bafitaiso. <sup>34</sup> I 'a'avana Faulo wata Sailasa i nawedi yana vanuge 'ani'ani i veledi i 'ani. Fai to'isave'avinanina ma yana 'aila'avo i vetumagana Yaubada 'waineye, faifainanina i sosoana bwaikina.

✧ **16:25:** Kolos 3:16 † **16:27:** Me Loma yadi sauluva, 'ai'edi tomotoga yogoyogonidi i na dega, to'isave'avina i na wafa fai i 'isave'avina-sako. ✧ **16:33:** Fol 16:15

<sup>35</sup> I 'atai, toveimeanidi Loma 'wainega filisimani i vonedi i vo, 'Wa na nagoi vanuga 'eba yogona 'ana to'isave'avina 'waineye 'wa na voneni bega Faulo wata Sailasa i na 'etoyavudi.” <sup>36</sup> Filisimani i nagoi to'isave'avina i voneni i 'a'avana to'isave'avinanina i nago Faulo ma iana i vonedi i vo, Toveimeanidi Loma 'wainega i veimeaga a na 'etoyavumi. Bega 'asa'aiana 'wa na nagoi, kebu 'wa na kolologa.” <sup>37</sup> ✧Siwe Faulo filisimani i vonedi i vo, 'Ima kebu tamu yama sakona lamuna i da veluagaiga wata kebu i da tauyema 'a da vonayavuga, we'e i fitalima 'aila'a matadie wata i bifelefelema 'a luku vanuga 'eba yogona 'waineye. 'Ima Loma 'ana tomotoga yama gabemani sauluvanidi i talabodedi. Wata 'asiau igodi nuanuadi i na vetunema givagivayega. Kebu tamu sai'afo i da lubwaineni. Toveimeanidi i lubwainedi taunidi i na maia bega i na vetunema 'a na nagoi.”

<sup>38</sup> Bega filisimani i viladi i nagoi Loma toveimeavo 'waidie Faulo bonana i lu'ivoneyeni. Tutuyanina i nogai i nuani Faulo wata Sailasa taunidi mogitana Loma 'ana tomotoga begaidi i kololo. <sup>39</sup> Faifainanina toveimeanidi i nagoi Faulo ma iana 'waidie ma yadi bunumayaga i vonave'ililibu fai kebu tamu yadi sakonaga i nike-maimaigidi. Mulieta vona bikanega Faulo wata Sailasa i vonedi nuanuadi yadi 'atamana i na 'iaweni. <sup>40</sup> Bega Faulo wata Sailasa i tovoi i souyedi vanuga 'eba yogona 'wainega i nagoi Lidia yadi vanuge. Bei tovetumaganavo fuedi i veluagadi i 'ivaisedi velu'ase'aseyega, mulieta yadi 'atamana i 'iaweni.

## 17

### *Faulo ma enavo i nagoi Tesalonaika.*

<sup>1</sup> ✧Faulo ma enavo Filifaiega i tauya i nagoi 'atamana 'ailuga 'waidiamo, Amiffoli wata Afolonia, mulieta i le'wai Tesalonaika, ava'aibe bei Diu yadi 'eba miava'auta 'waineye. <sup>2</sup> ✧Yana sauluvanina bani'odi Faulo i nago 'eba miava'autanina 'waineye, wata bei 'Aiata Veawai 'aitonu 'waidie tomotoga taiadi i ve'ikwayekwayega Yaubada yana Buki 'wainega. <sup>3</sup> I kiavemageta wata i veve Iesu Keliso faifaina veviga i veluagaiga i lubwaineni, siwe mulieta i tovoi-vaitugana wafayega. Wata Faulo i vonedi i vo, Tomogonina Iesu kumanina a lulu'ivoneyeniga 'waimie, taunina Keliso Yaubada 'ana Venua'ivina.” <sup>4</sup> Tomotoga 'ifwaidi yana veifufu faifaina i ve'awamogitana bega Faulo wata Sailasa 'adi 'aila'a 'waineye i luku. Tovetumaganavonidi me Guliki fuedi Yaubada 'ana tosubisubia, 'ifwaidi vevine 'adi wagava bwaikidi, wata 'ifwaidi me Diu.

<sup>5</sup> Tutuyanina me Diu i 'iseni tomotoga fue di Faulo yana vona i vetumaganedi i ve'unumagigiedi, faifainanina Diunidi i nagoi 'atamanafouye toveyaba-'avo'avovo i goledi i veifufu taiadi. I 'a'ava mulieta i nagoi 'adi 'aila'a i laugogona bega i daba i maia 'atamana matatabuna i veadagi nuanuadi Faulo wata Sailasa i na 'ive'avinidi i na miedi 'aila'a bwaikina matadie i na nikedi. Yadi nuanua i vo 'ako, Daisoni yana vanuge i miamiani," bega i nagoi vanuganina 'waineye, saiboda i tutuwealidi siwe Faulo ma iana kebu i da veluagadiga. <sup>6</sup> \*Fai kebu i da veluagadiga, Daisoni wata 'ifwaidi tovetumaganavo i 'ive'avinidi i yo'edi i nawedi 'atamana 'ana toveimeavo 'waidie ma yadi vegolegole i vo, Faulo ma enavo to'ivesako 'awalawa matatabuna 'waidie wata i maia yada 'atamane i vevesauluva-sakoina. <sup>7</sup> \*Tomotoganidi Daisoni 'ana wakawaka. 'Ida me Loma yada veimea, yada kini 'aitamogana Sisa ta veve'ililibuyeni, siwe tomotoganidi yada veimea i geugeuya i vonavona tamu kini ta na subisubiai 'ana wagava Iesu." <sup>8</sup> Vonanina faifaina toveimeavo wata 'aila'a bwaikina ma yadi kamogala i toke i vegolegole. <sup>9</sup> Gabemani Daisoni ma enavo 'waidiega mani i 'ewai, igodi yadi sakona tutulina, mulieta i vonedi i nagoi.

*Faulo ma enavo igodi i da nikedi Belia 'waineye.*

<sup>10</sup> Iesu 'ana tovetumaganavo 'atamananina 'waineye i kololo Faulo wata Sailasa faifaiddi, bega lovane i vetunedi i nagoi Belia. Tutuyanina i le'wai i nagoi Diu yadi 'eba miava'auta 'waineye bei i veifufu tomotoga 'waidie. <sup>11</sup> \*Me Belia nuadi 'anibwekabwekadi kebu bani'odi me Tesalonaika. Ma yadi sosoana Faulo yana vona i nogai bega nuadi i mage-tadi. 'Aiata 'aitamogana 'aitamogana Yaubada yana Buki i lulu'iawawa nuanuadi i na 'asetai Faulo i vona mogitana 'alo kebu. <sup>12</sup> \*Me Diu fue di Faulo yana vona i vetumaganeni, 'ifwaidi me Guliki iaveta wata 'ifwaidi vevine Guliki 'adi wagava bwaikidi.

<sup>13</sup> \*Tutuyanina me Diu i miamianiga Tesalonaika vala i nogai Faulo Yaubada yana Vona i lulu'ageyeni Belia 'waineye, i maia i veifufu tomotoga 'waidie nuadi i 'anidi i vo, Faulo i vevekaliemi," bega ma yadi nuasako ma fue die nuanuadi Faulo i na niki. <sup>14</sup> Tutuyanina tovetumaganavo yadi nuanua i 'asetai, Faulo i voneni bega tomotoga 'ifwaidi taiadi i nagoi balebaleye, we'e Sailasa wata Timoti i miamiani Belia. <sup>15</sup> Tomotoganidi Faulo taiadi i obuga balebaleye ma fue die i dodoga i nagoi 'atamana Adeni bei Faulo i valovei. Mulieta bega i viladi i nagoi Belia Faulo yana vona i lu'ivoneyeni

\* 17:6: Fol 16:20    \* 17:7: Luk 23:2    \* 17:11: Ion 5:39    \* 17:12: Fol 17:4

\* 17:13: Fol 14:19

Sailasa wata Timoti 'waidie nuanuana i na yogo-matayo'o i lulukamasedi Adeni.

*Faulo i ve Adeni 'waineye.*

<sup>16</sup> Tutuyanina Faulo i lulukamasedi Sailasa wata Timoti, yana yaba 'waineye kumaea fueidi i 'isedi me Adeni i 'idewadi, i nuavita tomotoganidi faifaidi fai ma yadi subia 'waidie i 'odu'odu. <sup>17</sup> Faifainanina 'eba miava'auta 'waineye me Diu taiadi i ve'ikwayekwayega wata mali tomotoga taunidi kebu Diu Yaubada 'ana tosubisubia. Wata 'aiata 'aitamogana 'aitamogana 'atamanafouye, toyaba taiadi i veve'ikwayekwayega. <sup>18</sup> 'Ifwaidi to'asetai i nagoi Faulo taiadi i veifufu, to'asetanidi 'adi 'aila'a 'ailuga i goledi Efikuliani wata Sitoika. 'Ifwaidi i vo, Faulo nuana i lugaugauya kebu i da nuanua mulieta i da vonavona," we'e 'ifwaidi i vo, Voke i vonavona mali tomotoga yadi yaubadavo faifaidi." Tomotoganidi i vonaga fai Faulo i lalau'age Iesu faifaina wata tovi-vaitugana wafayega faifaina.

<sup>19-21</sup> Me Adeni wata 'adi wakawaka yadi nuanua bwaikina tutuya matatabuna nani 'ivau'avadi i na veveifufuyedi wata i na noganogaidi. Begaidi Faulo i naweni Aliofago Kaniselo 'waidie i voneni i vo, Nuanuama 'a na 'asetai yamu ve 'ivauna wata ava'ai 'u vonevoneyeni. Yamu ve 'ifwaidi 'a bavuyedi wata nuama i voganidi. 'Adi nuanua 'waimeye 'u na ki-avemagetadi."

<sup>22</sup> Faulo i tovoi Aliofago Kaniselo matadie i vo, 'Omi tomotoga Adeni, a 'isemi nuanuami bwaikina 'wa na vetotafalolo yami yaubadavo 'waidie. <sup>23</sup> A yabayaba yami 'atamane a 'isedi yami 'eba 'odu 'aitamogana 'aitamogana, wata tamu 'eba velomu a veluagai. 'Eba velomunina 'waineye kiluma a 'iseni 'ana nogaya side bani'odi.

**TAMU YAUBADA KEBU 'A DA 'ASETAIGA FAIFAINA.**

Yaubadanina 'wa subisubiaiga siwe 'wa bavuyeni, kumanina a lulu'ageyeni 'waimie. <sup>24</sup> ✧Yaubadanina fwayafwaya wata nani matatabuna nageneye i 'eno'enoviga i 'idewadi, abama wata fwayafwaya 'adi Toveimea. We'e tomotoga vanuga 'eba velu'ui nimadiega i yogoni kebu yana 'eba miaga. <sup>25</sup> Tomotoga kebu 'ada fata tamu ava'ai ta na 'idewai ta na veleni, fai nani matatabuna nimanega i souyedi wata yawaida lamuna. <sup>26</sup> ✧Nagami Yaubada tamu tomogo 'ana wagava Adama i 'idewai, mulieta tomia fwayafwaya fueidi i souyedi 'wainega, wata i luveyavulidi fwayafwaya matatabuna 'waineye i miamiani. Bola tomotoga kebu i da 'idewadiga, nagami 'aila'a 'aitamogana 'aitamogana yadi 'eba mia wata yadi tutuya i yatodi. <sup>27</sup> ✧Yaubada tomotoga i

'idewadi i na lualeni, wata 'ai'edi i na vo, 'A na veluagai," i na 'abitufa voke i na veluagai. Siwe Yaubada kebu 'ani'iega, lilivadeye. <sup>28</sup> Basenadi tamu tomogo vonanina faifaina i veifufu i vo,

Fai yawaida i veleveleda ta fetofeto wata ta miamiani lilivaneye."

Wata vonanina faifaina yami lei i kilumi i vo,

'Ida wata natunavo."

<sup>29</sup> \*Fai 'ida Yaubada natunavo, kebu ta na vo 'ako, Yaubada bani'odi kumaea todabi ma yana 'aseta 'ana kilukiluma kileu, siliba, 'alo golidi 'waidiega." <sup>30</sup> Basenadi Yaubada kebu i da luvematavulogimi fai yami bavu 'wainega kumaea 'wa dabidabidi 'waidie 'wa 'odu'odu, siwe 'asiau i veimea tomotoga matatabuna i na nuaviladi yadi sauluva sakoidi 'waidiega. <sup>31</sup> \*Fai 'akonadi tamu 'aiata Yaubada i venua'ivineni tomia fwayafwaya matatabuda ta na vonayavuga mataneye i na veimeyeda faifaina. We'e yana veimeanina tamu tomogo 'akonadi i venua'ivineni 'wainega i na mai, wata yana veimea tonovina fai yada sauluva i 'asetadewadi. 'Akonadi i veda bani'odi i na 'idewai fai tomogonina Iesu i sivetovoi-vaitugani wafayega."

<sup>32</sup> Tutuyanina tomotoga i nogai Faulo i vonavona tovi-vaitugana wafayega faifaina, 'ifwaidi i sidibidibieni, we'e 'ifwaidi i vo, Tamu tutuya 'ima nuanuama wata 'u na veveifufuyeni 'waimeye." <sup>33</sup> Mulieta Faulo 'eba miava'auta i 'iaweni.

<sup>34</sup> Tomotoga 'ifwaidi i vetumaganeni i nagoi Faulo 'waineye. Tomotoganidi 'waidiega tamu tomogo Aliofago yadi kaniselo 'wainega 'ana wagava Daionosiasi, wata tamu vavine 'adi wagava Damali.

## 18

### *Faulo ma enavo i nagoi Kolinita.*

<sup>1</sup> Faulo i souyeni Aliofago Kaniselo 'wainega, mulieta Adeni i 'iaweni i nago 'atamana Kolinita. <sup>2-3</sup> \*Tutuyanina 'waineye, me Loma yadi toveimea bwaikaotogina Sisa Kaladiu i veimea me Diu matatabudi 'atamana Loma i na baileni, i na nagoi mali 'awalawa 'waidie. Bega tamu Fonito tomogina 'ana wagava Akwila ma yana vavine Filisila i tovoi i nago Kolinita. Bei Faulo i veluagadi 'waidie i miamia yadi vanuge, ma fuedie 'aisaya bunudi i 'iagiagila lau'weta faifaiddi, bega mali tomotoga i na kimwanedi. Folovanina basenadi Faulo yana folova. <sup>4</sup> Me Diu yadi 'Aiata Veawai 'aitamogana 'aitamogana 'waidie, Faulo i lukuluku yadi 'eba miava'auta 'waineye, me Diu wata



Guliki taiadi i veve'ikwayekwayega, nuanuana matatabudi i na vetumagana Iesu 'waineye.

<sup>5</sup> ✧ Paulo i miamia Kolinita, nika Sailasa wata Timoti i le'wai Masidonia 'wainega. Tutuyanina 'waineye Paulo 'iagiagila i baileni, yana tutuya matatabuna i tauyeni i lalau'agemo wata i veve Iesu faifaina, taunina mogitana Keliso, Yaubada 'ana Venua'ivina. <sup>6</sup> ✧ Me Diu fuedi yana vona i vedumwe'ai'aieni i vona-awadamana Paulo 'waineye, bega 'ana kaleko i sibu-tubutuya fwayafwaya i na 'anita'idi matadie, yadi 'eba 'isa kebu wata bei i na lalau'age. Wata i vonedi i vo, 'Omi taunimi, yau kebu. 'Ai'edi ma yami sakona 'wa na luku 'ai-'ala'alase, kebu 'wa na 'uvanikuga. 'Asa'aiana, tutuya de'e a na bailemi a na lalau'age mali tomotoga kebu Diu 'waidie.”

<sup>7</sup> Begaidi i tovoi i 'iawedi i nago Taito Iusito yana vanuge bei i miamia. Tomogonina kebu Diu, siwe Yaubada 'ana tosubisubia, we'e yana vanuga, 'eba miava'auta lilivaotogin-eye. <sup>8</sup> 'Eba miava'autanina 'ana to'edakumeta 'ana wagava Kilisifasi ma yana 'aila'a matatabudi i vetumagana Toveimea Iesu 'waineye. Wata tomotoga fuedi Kolinita 'waineye Vala Iesu faifaina i nogai i vetumagana wata i bafitaiso.

<sup>9-10</sup> ✧ Tamu lovane 'Auvea i souyeni Paulo 'waineye 'wa da vo i da 'enoneganega i voneni i vo, Yau 'amu 'weabu bega kebu 'u na kolologa tomotoga 'waidie. 'U na veveifufu Vala 'Atumaina faifaina, kebu 'u na 'ailove. Kebu tamu aitoi 'ana fata i na nikemu fai fuedi 'atamana de'e 'waineye yaku tomotoga.” <sup>11</sup> Paulo 'Auvea yana vona i nogai begaidi i miamia malamala 'aitamogana wata weta'i 6, tomotoga 'waidie i veve Yaubada yana Vona.

### *Gabemani Paulo i 'ivaiseni.*

<sup>12</sup> Tutuyanina Galio i vetoveimea Guliki yadi 'awalawa 'waineye, me Diu fuedi yadi nuanua 'aitamogana 'wainega i tovoi Paulo i 'ive'avini i mieni 'eba vonayavuga 'waineye. <sup>13</sup> I vo, Tomogo de'e nuanuana i na lukakadedada bega Yaubada ta na subisubiai, siwe kebu yada sauluva bani'odi yada veimea i geugeudi.” <sup>14</sup> ✧ Paulo igodi i da veifufu, nika Galio ma yana nuasako i veifufu-matayo'o me Diu 'waidie. I vo, 'Ai'edi Paulo sai'afo i da vekali wata 'ai'edi tamu yana sakona bwaikina i lubwaineni bonami a da nogai. <sup>15</sup> We'e kebu 'wa da ve'ikwayekwayega me Loma yama veimea faifaidi, 'wa ve'ikwayekwayega-maimaiga nani siaidi faifaidi, bani'odi wagava, vona, wata yami ve'etoboda-'avo'avovo. Yau naninidi kebu 'adi toveimea, 'omi taunimi.” <sup>16</sup> Bega tolu-gaviavo i vonedi tomotoganidi i sogiedi 'eba vonayavuga

'wainega. <sup>17</sup> I sousouyedi nika yadi 'eba miava'auta 'ana to'edakumeta 'ana wagava Sosideni i veluagai, i 'ive'avini bei vanuga 'awaneye i niki. Galio i 'isedi kebu tamu sai'afu i da 'ikasikasisi faifaina.

*Faulo i vilai i nago Anitioki.*

<sup>18</sup> 'Aiata fuedi nagedie Faulo i miamia Kolinita tovetumaganavo taiadi. Yana tauya 'waineye enavo 'waidie i 'alanuai, mulieta i nago 'atamana Senikilia. Basenadi Faulo i vona'awaufaufa Yaubada 'waineye tamu nani faifaina bega yana tugusa nava'auna kebu i na boboi bani'odi Diu yadi sauluva. Bei Senikilia 'waineye, vona'awaufaufanina 'ana tutuya i 'a'ava, begaidi nava'auna i boboi. Mulieta Akwila ma yana vavine Filisila taiadi i nagoi tamu waka i veluagai i nunago Silia, bei i dodoga i nagoi. <sup>19-21</sup> \*Tutuyanina i luku Efeso, Faulo i nago Diu yadi 'eba miava'auta 'waineye i luku taiadi i ve'ikwayekwayega. I voneni nuanuadi taiadi sai'afu i na yogomia siwe kebu i da nogaya. Tutuyanina i tautauya i vonedi i vo, 'Ai'edi Yaubada nuanuana, a na vilaku a na mai 'waimie, we'e 'ai'edi kebu nuanuana, kebu a na maiga." Efeso 'waineye, bei Akwila ma yana vavine i 'iawedi Faulo 'aisena i dodoga i nago Sisalia.

<sup>22</sup> Tutuyanina i le'wa i laka Ielusalema tovetumaganavo i 'isedi wata taiadi i veifufu. 'Aiata 'ifwaidi i 'a'ava, mulieta i 'iawedi i nago Anitioki. <sup>23</sup> Tutuyanina Anitiokiega i tauya i nago 'atamana fuedi 'waidiamo 'awalawa Galetia wata Filigia nagedie. Toveumaganavo 'adi 'aila'a 'aitamogana 'aitamogana i fogedi taiadi i veveifufu bega yadi vetumagana i na vetoketoke.

*Faulo yana lauvivila 'ana vetonu i velamu.*

<sup>24</sup> \*Tamu tomogo Diu 'ana wagava Afolosa, 'ana tuvada 'atamana Aleksanidilia Itifita nageneye i mai Efeso bei i miamia. Tomogonina yana lau'age 'adi nogaya 'atumaidi wata Yaubada yana Buki i 'aseta-'atumaia. <sup>25</sup> \*Tutuyanina i miamia Itifita nageneye Ioni Tobafitaiso ifufuna i nogai wata Iesu Valana 'Atumaina i vetumaganeni. Ma yana toketokena wata ma yana sosoana i veveifufu Iesu faifaina wata ve tonovina 'wainega i veve tomotoga 'waidie, siwe Ioni yana bafitaiso 'aisena i 'asetai. <sup>26</sup> Tamu tutuya ma yana venuafoufa'ala i lalau'age me Efeso yadi 'eba miava'auta 'waineye nika Akwila ma yana vavine i nogai. Bega i vavina i naweni yadi vanuge nani matatabuna Yaubada yana 'Eda'eda faifaina i veifufu-deweni 'waineye.

<sup>27</sup> Afolosa nuanuana i na nago me Guliki yadi 'awalaweye, bega tovetumaganavo Efeso 'wainega lubulubu i kilumi 'ana awave'atumai faifaina ediavo me Guliki 'waidie, Afolosa i na 'isave'avini faifaina. We'e me Guliki fue di basenadi Yaubada ma yana nuakalikali i 'ivaisedi bega i vetumagana Iesu 'waineye. Tutuyanina Afolosa i le'wa, tomotoganidi i veluagadi bega yana lau'age 'wainega yadi vetumagana i vetoketoke. <sup>28</sup> ☆Aila'a bwaikina matadie, Diu taiadi i ve'ikwayekwayega Yaubada yana Buki 'wainega mogitana i ve Iesu taunina Keliso, Yaubada 'ana Venua'ivina, we'e me Diu kebu 'adi fata yana vona i na tutuli.

## 19

### *Faulo i lau'age Efeso 'waineye.*

<sup>1</sup> ☆Tutuyanina Afolosa i miamia Kolinita, Faulo 'awalawa Galetia wata Filigia kamwadiamo i nago Efeso i le'wa bei Iesu 'ana tovetumaganavo i veluagadi. <sup>2</sup> ☆Faulo i velutoliedi i vo, Tutuyanina 'wa vetumagana Iesu 'waineye, 'Anu'anunu 'Atumaina i agemi 'alo kebu?" Yana velutoli i tutuli i vo, 'Anu'anununina 'Atumaina ava'ai? Ke bu tamu sai'afo 'a da 'asetai ga." <sup>3</sup> Wata Faulo i vo, Vetuma tutuyanina 'wa bafitaiso, aitoi yana ve 'waineye 'wa vetumagana?" I vo, Ioni To-bafitaiso yana ve 'waineye 'a vetumagana." <sup>4</sup> ☆Faulo i vonedi i vo, Basenadi tomotoga yadi sakona i vedumwe'ubu'ubusedi, Ioni i bafitaisodi yadi nuavilana Yaubada 'waineye 'ana tugusa. Siwe wata Ioni i vonedi i vo, Bola tamu tomogo i mimai, taunina Iesu 'wa na vetumaganeni." <sup>5</sup> Faulo yana vona i nogai bega tovetumaganavonidi wata i bafitaiso Iesu 'ana wagavayega. <sup>6</sup> I 'a'avana, Faulo nimana i yatoi 'waidie bega 'Anu'anunu 'Atumaina i agedi, nika 'Anu'anunu 'Atumaina yana 'alavelevelena 'wainega i vonavona, bonanidi basenadi kebu i da 'asetadiga 'waidiega, wata Yaubada yana Vona i lu'ivoneyeni. <sup>7</sup> Tomotoganidi 'Anu'anunu 'Atumaina i agediga matatabudi bani'odi 12.

<sup>8</sup> Weta'i 'aitonu nagedie Faulo i lukuluku me Diu yadi 'eba miava'auta 'waineye ma yana venuafoufa'ala tomotoga taiadi i ve'ikwayekwayega. Nuanuana bwaikina Yaubada yana veimea tomotoga 'waideye me Diu i na 'asete-'atumaia wata i na vetumaganeni. <sup>9</sup> ☆Siwe 'ifwaidi nuadi i 'amalakibu kebu nuanuadi i na vetumagana, 'aila'a matadie i vona-awadamana Toveimea Keliso wata yana 'Eda'eda tomotoga faifaida 'waidie. Faifainanina Faulo ma enavo tomotoganidi i 'iawedi i nagoi Tilanasa yana vanuga sikulu 'waineye, bei 'aiata 'aitamogana 'aitamogana i veve 'waidie. <sup>10</sup> Faulo i veve

malamala 'ailuga nagedie, bega me Diu wata mali tomotoga matatabudi i miamianiga 'awalawa Eisia nageneye Toveimea Iesu Valana i nogai.

*Sikiva natunavo igodi nuanuadi i na vona yaiaina i na 'awa'a'idi.*

<sup>11</sup> ✨Yaubada Faulo i 'ivaiseni bega 'eba nuavogana wata 'eba nua'ewa i 'i'idewadi. <sup>12</sup> ✨Faulo kebu yogo 'wainega i da 'ive'atumaiga, siwe 'ai'edi tovetumaganavo 'ifwaidi nuanuadi i na 'ive'atumai, Faulo 'ana kaleko i veveledi i nunaweni bega tovinga kalekonina 'wainega i 'a'abitonovidi i veve'atumai wata yaiaina i 'a'awa'a'idi.

<sup>13</sup> We'e 'ifwaidi me Diu tokweli kebu i da vetumagana Iesu 'waineye siwe taunidi yadi nuanuayega 'atamana fuedi 'waidie i nunagoi i vonavona yaiaina i 'a'awa'a'idi. Yadi nuanua i vo, 'Ai'edi Iesu 'ana wagava ta na 'inanai, bonada kasikasisina.” Begaidi tomotoga yaiaina i agediga i vonevoned i vo, Tomogonina Iesu faifaina Faulo i vevega, 'ana wagavayega a vonemi 'wa 'awa'a'imi.” <sup>14</sup> Tamu me Diu yadi tovelomu 'adi to'edakumeta 'ana wagava Sikiva natunavo matatabudi 7 wata de'e bani'odi i vonavona yaiaina i 'a'awa'a'idi. <sup>15</sup> ✨Siwe tutuyanina Iesu 'ana wagava i 'inanai, yaiaina i vonedi i vo, Iesu a 'asetai wata Faulo, siwe 'omi egavo?” <sup>16</sup> Bega tomogonina yaiaina i ageiga i tovoi tomotoganidi 'adi 7 i 'ive'avinidi i toke i nikedi. 'Adi kaleko i silabulabu'idi bega ma 'adi dayaga i ve'aladegadega konekoned i.

<sup>17</sup> Me Diu wata mali tomotoga fuedi i miamiani Efeso, vala i nogai i ve'alakolokololo begaidi Toveimea Iesu 'ana wagava i ve'ililibuyeni bwaikina. <sup>18</sup> Iesu 'ana tovetumaganavo fuedi i maia ediavo tovetumaganavo matadie yadi sakona 'waidiega i nuaviladiga faifaiddi i lu'ivona. <sup>19</sup> ✨We'e 'ifwaidi taunidi basenadi tovebalau, tokweli wata tolu'afo'a, yadi yogo wata 'adi 'afo'a 'adi buki bei i kilumidiga i va'augidi 'atamanafouye i kabunidi. Bukinidi 'adi tutula i lu'iawawadi lubulubu 50,000.\* <sup>20</sup> Naninidi valadi tomotoga fuedi i 'asetai bega Iesu Valana 'Atumaina i vebwaika i nago mali tomotoga 'waidie bega 'ifwaidi wata i vetumagana Iesu 'waineye.

*Me Efeso i daba Faulo faifaina.*

<sup>21</sup> ✨'Adi 'afo'a 'adi buki wata yadi yogo i kabunidi i 'a'avana, Faulo i nuanua nuanuana i na nago 'awalawa Masidonia wata Gulisi 'waidiamo bega i na nago Ielusalema. Wata Faulo i vo, Ekwavo Ielusalema 'waineye a na fogedi, mulieta

✨ 19:11: Fol 14:3 ✨ 19:12: Fol 5:15 ✨ 19:15: Mak 1:24 ✨ 19:19:

VeL 18:10-12 \* 19:19: 'Ana mogitana me Guliki yadi mani Dalakima 50,000. Dalakima 'aitamogana 'aiata 'aitamogana 'ana folova 'ana tutula. ✨ 19:21: Lom 1:13

a na nago Loma.” <sup>22</sup> Begaidi Faulo 'ana to'aivaitavo 'adi wagava Timoti wata Elastasi i vonedi i kumeta Masidonia, we'e taunina sai'afoga i yogomia 'awalawa Eisia bola i na nago.

<sup>23</sup> Tutuyanina 'waineye tomotoga fuefi Efeso 'waineye i vetumagana Iesu 'waineye, faifainanina mali tomotoga i nuasako bwaikina 'waidie. <sup>24</sup> Yadi nuasako lamuna side bani'odi. Efeso 'waineye tamu yaubada-vekavekali 'ana wagava Daiana tomotoga ma yadi subia i 'odu'odu 'waineye bega 'ana tosubianidi vanuga 'eba velu'ui bwaikina i yogoni faifaina. We'e tamu tomogo 'ana wagava Dimitilasi siliba i dabadabidi vanuga 'eba velu'uinina 'ana 'isa'isa bani'odi. Tomotoga i kimwakimwanedi 'waidie i 'odu'odu bega Dimitilasi ma 'ana to'aivaitavo mani bwaikina i veveluagai.

<sup>25</sup> Tomotoga fuefi Daiana i baibaileni Iesu 'waineye i vevetumagana, faifainanina to'idabadabi matatabudi Dimitilasi i goleva'augidi i vonedi i vo, Ekwavo, 'akonadi 'wa 'asetai yada folova de'e 'wainega mani bwaikina ta veveluagai.

<sup>26</sup> \*Siwe kumanina Faulo yana sauluva 'akonadi 'wa 'iseni wata 'wa nogai i vonavona Daiana wata yada yaubadavo kebu yaubada mogitana fai tomotoga nimadega ta 'idewai. We'e de'e bei Efeso 'waineye, wata 'awalawa Eisia sai'afoga matatabuna nageneye, fuefi i ve'awamogitana Faulo yana vona faifaina. <sup>27</sup> A kololo i na nunago yada folova i na 'ivesakoi bega mani ta veveluagadiga i na 'ailove, wata yada yaubada Daiana faifaina a kololo. Taunina me Eisia wata tomia fwayafwaya matatabudi i subisubiaiga voke yana toke-tokena i na mwea wata yana vanuga 'eba velu'ui i na venani'avo'avovo.”

<sup>28</sup> Fuefi i nogai yana vona ma yadi nuasako i vegolegole i vo, 'Ida me Efeso yada yaubada Daiana toketokena.”

<sup>29</sup> \*Bega tomotoga 'ifwaidi i nogai wata bani'odi i vegolegole 'atamananina matatabuna bani'odi 'oluga. Tomotoga matatabudi i ve'ililide i nagoi yadi 'eba miava'auta 'waineye, Faulo 'ana 'weabu 'adi 'ailuga Masidonia 'wainega i 'ive'avinidi i nawedi, 'adi wagava Gaiasa wata Alisitako.

<sup>30</sup> Faulo taunina nuanuana matadie i na veifufu, siwe tovetumaganavo i kololo i talabodebodeni. <sup>31</sup> Wata Faulo enavo 'ifwaidi, taunidi gabemani, vala i vetunei 'waineye i vo, Kebu nuanuama 'eba miava'auta 'waineye 'u na lukuga.”

<sup>32</sup> 'Eba miava'autanina nageneye tomotoga 'ifwaidi i vevelegolegole nani 'aitamogana faifaina, wata 'ifwaidi i vevelegolegole nani tulidi tulidi faifaifi, we'e sai'afoga matatabudi yadi va'auta lamuna kebu i da 'asetai. <sup>33-34</sup> Me Diu tamu tomogo 'ana wagava Alekisana i lukakadeni i tovoi 'aila'a

matadie. 'Aila'anidi i 'iseni i vo, Voke kumanina, taunina daba lamuna.” Tomogonina igodi i da ve'ewa matadie wata nuanuana nimanega i na talabodedi i na ve'wada siwe tutuyanina i 'isa'inanai taunina tomogo Diu, Daiana 'waineye kebu i da subisubiaga, ma yadi nuasako i vegolegole bonadi bwaikinega 'awasasa 'ailuga nagedie i vo, 'Ida me Efeso yada yaubada Daiana toketokena.”

<sup>35</sup> Mulieta kaniselo yadi kalaka 'ana fata 'aila'a i talabodedi bega i tovoi matadie i vo, Ekwavo me Efeso, 'wa ve'wada a na vonemi. Yada 'atamana nageneye yada yaubada Daiana toketokena yana vanuga 'eba velu'ui wata yana kileu tabu basenadi i 'anita'ia abamega ta 'i'isave'avinidi. Wata tomotoga matatabudi nani de'e i 'asetai. <sup>36</sup> Kebu tamu aitoi 'ana fata i na awave'eve'eweni naninidi yada 'atamane i 'eno'enovi, bega 'asa'aiana 'wa 'ailove, kebu 'wa na lu'avo'avovo nagami 'wa na venua'ivina-'atumai. <sup>37</sup> Faulo enavo kebu yada yaubada i da awavesakoyeniga wata kebu i da vainagoga yada vanuga 'eba velu'ui 'wainega siwe 'wa 'ive'avina-maimaigidi 'wa miedi. <sup>38</sup> 'Ai'edi Dimitilasi ma yana tofolovavo nuanuadi tamu tomogo i na vevitai, 'adi fata i na naweni 'eba vonayavuga 'waineye bei toveimea matadie i na vonayavuga. <sup>39</sup> We'e 'ai'edi 'omi kebu ma yami sosoana wata tamu nuana 'waimie, yada toveimea gabemani 'adi fata tomotoga matatabuda i na goleva'augida, nuanuananina ta na sive-tovetonovi. <sup>40</sup> 'Asiau 'wa daba, faifainanina voke Loma gabemani veimea vitana i na veleda. Bani'odi ta na veifufuyedi fai yami daba kebu lamunaga? <sup>41</sup> 'Asa'aiana, 'wa 'ailove. 'Wa nagoi yami vanuge.”

## 20

### *Faulo ma enavo i nagoi Masidonia wata Gulisi.*

<sup>1</sup> Tomotoga yadi nuasako i 'a'ava i nagoi yadi vanuge, mulieta Faulo tovetumaganavo i goleva'augidi i velu'ase'asedi wata i kiavefa'alidi. I 'a'avana i 'alanuai 'waidie i 'iawedi i nago Masidonia. <sup>2</sup> 'Awalawanina 'waineamo i nunago tovetumaganavo 'adi 'aila'a 'aitamogana 'aitamogana i 'ivaisedi yadi vetumagana i vetoketoke yana lau'age 'wainega, mulieta i nago i le'wa 'awalawa Gulisi. <sup>3-4</sup> \*Bei weta'i 'aitonu nagedie i miamia mulieta i 'idewadewa igodi wakeamo i da nago Silia, siwe vala i nogai me Diu 'ana laugiva 'ana 'eda 'akonadi i veluagai bega i na luvewafai. Faifainanina i vilai Masidonia 'waineamo i nagoi ma 'ana 'weabuvo taiadi. Tomotoganidi side 'adi wagava.

Sofata, taunina tomogo Belia, Filiasi natuna,

Alisitako wata Sekanido, 'atamana Tesalonaika 'wainega, Gaiasa, tomogo Debi, Timoti,

Tikiasa wata Tolofimo, 'awalawa Eisia 'wainega.

<sup>5</sup> Tomotoganidi i kumeta i lulukamasema 'atamana Tiloasi 'waineye. <sup>6</sup> Tutuyanina 'waineye me Diu i sakali, beledi kebu 'ana 'ivebwaika i 'ani, 'adi 'eba tolinuata'i basenadiotoga Yaubada tubudiavo i 'ita'ita'iedi i vagavaidi 'awalawa Itifita 'wainega. Sakalinina i 'a'avana, yau\* ma ekwavo 'a dodoga Filifai 'wainega 'a nunagoi 'aiata 5 nagedie, mulieta 'a le'wa Tiloasi, bei tomotoganidi 'a veluagadi wata 'a miamiani wiki 'aitamogana.

*Faulo tovetumaganavo i fogedi Tiloasi 'waineye.*

<sup>7</sup> Satadei lavilavie, tovetumaganavo matatabuma 'a 'aniluvetubama, i 'a'avana Iesu 'ana 'eba nuave'avina faifaina 'a 'ani. Fai 'awa'awaie Faulo i na tauya, begaidi i veifufuga lovana 'ana utukamwana. <sup>8</sup> Vanuganina 'waineye 'a va'autaga 'etotubwatubwana tutudaba 'ifwaidi dibuneye, 'ifwaidi kamwaneye, wata 'ifwaidi tabwaotogineye. Tutudabanina 'waineye 'a miava'autaga tabwaotogineye bei mageta fuedi i 'ala'alata. <sup>9</sup> We'e tamu tubuau 'ana wagava Iutiko tutubweka 'waineye i miabui Faulo yana veifufu i vavainenega. Yana veifufu i vemanamanawe begaidi Iutiko matana i duduna. I vevemataduduna nika i be'u i obu tanotanoge. Tomotoga i obu i silakai 'akonadi i wafa. <sup>10</sup> Faulo i obu tubuaunina tabwaneye i lumata'afufu i 'avalamaigi i vo, Kebu nuafoumi i na veviga, ma yawaina." <sup>11</sup> Mulieta wata i viladi i laka tutudabanina 'waineye bei i 'ani Iesu 'ana 'eba nuave'avina faifaina. 'Ani i 'a'ava, wata Faulo i velamu i veifufuga nika i 'atai i tauya. <sup>12</sup> We'e enavo i nagoi yadi vanuge ma yadi sosoana tubuaunina taiadi.

*Tiloasi 'wainega i nagoi Milito.*

<sup>13</sup> Emavo 'a 'iawedi, Faulo i vonema bega 'a dodoga 'a kumeta 'a nagoi Asosa, bei Faulo 'a lulukamaseni i yoyogodaba 'ageneamo i mimai. <sup>14</sup> Tutuyanina Faulo i veluagama Asosa, ma fuema 'a dodoga 'a nagoi 'atamana Mitilini. <sup>15</sup> Wata bega Mitiliniega 'a tauya 'awa'awaie Kaiosi tabwaneamo 'a yogo-vagata. Wata 'aiata 'aitamogana i 'a'ava 'a le'wa Samosi bega 'awa'awaie Efeso tabwaneamo 'a yogo-vagata 'a nago 'a luku Milito. <sup>16</sup> Faulo i walowaloga nuanuana nagami i na le'wa Ielusalema mulieta Diu yadi Sakali Fenitikosi 'ana 'aiata i na veluagai. Faifainanina kebu nuanuana i na yogomia 'awalawa Eisia nageneye, begaidi kebu 'a da lukuga Efeso.

\* **20:6:** Taunina Luke. Buki de'e 'ana tokiluma.

*Faulo i 'alanuaidi Efeso 'ana to'edakumetavo 'au'auveadi.*

<sup>17</sup> Tutuyanina 'a luku Milito, Faulo vala i vetunei Efeso bega tovetumaganavo yadi to'edakumetavo 'au'auveadi i na maia taiadi i na veifufu. <sup>18-19</sup> Tomotoganidi i le'wai Faulo i veifufu 'waidie i vo, Basenadi a mai Eisia yami 'awalawe ye i maiga 'asiau de'e ma yaku nuaobu a vetofolova 'Auvea faifaina, wata ma matageuku a nuavita faifaimi fai nuanuaku bwaikina Iesu 'wa na vematayakeyakeni. We'e me Diu igodi nuanuadi i da luvewafaku faifainanina tutuya vitadi a veveluagadi. Naninidi de'e 'akonadi 'wa 'asetadi. <sup>20</sup> Iesu Valana 'Atumaina a lalau'age fuedi matadie, wata yami vanuga 'waidie a veve, vonanidi 'ami 'aivaita kebu tamu a da giveniga. <sup>21</sup> Me Diu wata mali tomotoga taunidi kebu Diu kebu a da lu'idia, a vonedi yadi sakona i na bailedi i na nuaviladi Yaubada 'waineye, wata 'ada Toveimea Iesu i na vetumaganeni.

<sup>22</sup> ✧ We'e yau 'Anu'anunu 'Atumaina i lukakadeku a nunago Ielusalema, kebu a da 'asetai ga ava'ai i na souyeni 'waikuye no'o bei. <sup>23</sup> ✧ Siwe 'Anu'anunu 'Atumaina 'akonadi i voneku 'atamana 'aitamogana 'aitamogana 'waidie tutuya vitadi a na veveluagadi wata tomotoga i na 'i'ive'aviniku i na yatoyatoku vanuga 'eba yogona 'waidie. <sup>24</sup> ✧ 'Ai'edi a na wafa 'alo ma yawaiku 'asa'aiana kebu tamu ava'ai. Siwe nani bwaikina 'waikuye nuanuaku nagami folova basenadi Toveimea Iesu i velekuga a na ve'a'avai. Folovanina Vala 'Atumaina Yaubada yana nuakalikali bwaikina faifaina a veve tomotoga 'waidie.

<sup>25</sup> Side bani'odi. Tutuya fuedi matamie a lalau'age Yaubada yana veimea tomotoga 'waideye faifaina, siwe 'awaie kebu tamu aitoi 'waimiega maigiku i na 'ise'iseni. <sup>26-27</sup> Siwe tutuya de'e a na vonemi, 'ai'edi tamu aitoi 'waimiega i na wafa ma yana sakona i na luku 'ai-'ala'alase kebu i na 'uvaniku. 'Omi taunimi, yau kebu fai 'akonadi Yaubada yana nuanua matatabuna 'ita'ita'i faifaina a lu'ivoneyedi 'waimie, kebu tamu nani a da giveni. <sup>28-29</sup> ✧ Taunimi 'wa na 'i'isave'avinimi fai 'Anu'anunu 'Atumaina i venua'ivinemiga Yaubada 'ana tovetumaganavo 'adi 'aila'a 'wa na 'isave'avinidi. 'Aila'anidi Yaubada i veakutagonidi taunina natuna yana wafa 'wainega. Taunidi bani'odi sifi, we'e 'omi 'adi to'isave'avinavo. Bola a na 'iawemi a 'asetai tomotoga 'ifwaidi i na mai i na vekaliedi nuanuadi i na sakona, bani'odi 'ou'ou kasikasisidi sifi i ovaovadi, faifainanina 'wa na 'isave'avina-dewadi. <sup>30</sup> Wata tutuya mulina 'waineye, 'ifwaidi tomotoga taunimi yami 'aila'a 'wainega ediavo i na vekaliedi bega yadi sauluva wata yadi nuanua i na



vetutuyamedi. <sup>31</sup> Begaidi 'wa na 'isa'isa i na nunago i na vekaliemi. 'Wa na nuani 'aiata wata lovana malamala 'aitonu nagedie kebu a da veawai ma matageuku a veve 'waimie.

<sup>32</sup> ✧Bega 'asiau de'e a na 'iawemi, a 'anivelenemi Yaubada 'waineye i na 'i'isave'avinimi wata yana nuakalikali valana i na kaliffinemi. Valanina 'ana fata yami vetumagana i na kiavetoketokedi wata Yaubada i na vesauluva-'atumaiemi wata nani fuedi 'atumaiddi i yato'idiediga yana tomotoga faifaidi i na veleemi. <sup>33</sup> 'Waimiega kebu tamu aitoo yana mani 'alo yana kukua 'adi 'ewa faifaidi a da nuagiva. <sup>34</sup> ✧'Akonadi 'wa 'asetai yau wata ekwavo taiadi kebu vakeli 'a da 'ani'ani, tauniku nimakuyega 'a folofolova bega 'ama'ama wata yama kukua a kimwakimwane. <sup>35</sup> Yaku sauluva 'waidiega a vemi egavo kebu 'adi fata i na folova ta na 'ivaisedi yada folova toketokedi 'waidiega. Ta na nuani Toveimea Iesu taunina yana vona basenadi i vo, Ta na 'une ta na sosoana, we'e ta na ve'unega 'eba sosoana bwaikaotogina.”

<sup>36</sup> Tutuyanina Faulo yana vona i 'a'ava, matatabuma 'agema 'a vetufano'uyedi Yaubada 'waineye 'a velu'ui. <sup>37</sup> Matatabudi Faulo 'ana mogai i 'we'wela wata i 'avalamaigi. <sup>38</sup> ✧Yadi nuavita bwaikaotogina Faulo yana vona faifaina fai i vonediga kebu wata i na 'ise'iseniga. I 'a'avana ma fuema 'a nagoi wakeye 'ima 'a dodoga.

## 21

### *Faulo i nago Ielusalema.*

<sup>1</sup> Ma yama nuavita 'a 'alanuai me Efeso 'waidie i 'a'avana nika 'a silakata tonovima 'a nagoi Imula Kosa. I 'atai Kosa 'wainega 'a silakata 'a nagoi 'a le'wa Imula Losa, wata bega 'a silakata 'a nagoi 'a le'wa 'atamana Fetala. <sup>2</sup> Bei tamu waka 'a veluagai i nunago 'awalawa Finisia bei 'a dodoga 'a nagoi. <sup>3</sup> 'A nagoi, 'a le'wa Imula Saifilosii lilivaneamo siwe 'ama wamayega 'a yatoi tonovima 'a nagoi 'awalawa Silia. 'A luku 'atamana Taia bei kukua i siobuyedi. <sup>4-5</sup> 'Atamananina 'waineye Iesu 'ana tovetumaganavo 'a veluagadi taiadi 'a miamiani wiki 'aitamogana. 'Anu'anunu 'Atumaina i vedi Faulo veviga bwaikina i na veluagai bega i talabodebodeni kebu i na nago Ielusalema, siwe wikinina i 'a'ava, 'a tovoi 'a tauya. Ma yadi vevinevo wata natudiavo taiadi ma fuema 'a obu balebaleye bei 'agema 'a vetufano'uyedi 'a velu'ui Yaubada 'waineye. <sup>6</sup> Velu'uinina i 'a'avana, i 'alanuaima wata 'a 'alanuaidi mulieta 'a dodoga wakeye we'e i viladi i nagoi yadi vanuge.

<sup>7</sup> Wata Taia 'wainega 'a silakata 'a nagoi 'a le'wa 'atamana Tolemesi, tovetumaganavo 'a veluagadi 'a vekaiwa 'waidie, bei taiadi 'a miamiani 'aiata 'aitamogana. <sup>8</sup> ✧ I 'atai bega 'a tauya 'a nagoiga nika 'a le'wa Sisalia. 'A le'waga 'a nagoi Filifi yana vanuge bei taiadi 'a miamiani. Taunina tomogonina ma enavo 6 basenadi Ielusalema 'waineye tovetumaganavo i venua'ivinedi bega 'ani'ani i na 'i'isave'avinidi wata taunina tolau'age Iesu Valana 'Atumaina faifaina. <sup>9</sup> ✧ We'e natunavo 4 ne'e'elidi taunidi Yaubada yana Vona 'ana tolu'ivonavo.

<sup>10</sup> ✧ Aiata 'ifwaidi taiadi 'a miamiani nika tamu Yaubada yana tolu'ivona Iudiyega i le'wa, 'ana wagava Agabu. <sup>11</sup> ✧ I lukuma Faulo 'ana wa'ila i 'ewai Agabu taunina nimana wata 'ageni i 'iyogoyogonidi i 'a'avana i vona i vo, 'Anu'anunu 'Atumaina i vonekuga wa'ila de'e 'ana tomotoga bola side bani'odi me Diu i na 'iyogoyogoni Ielusalema 'waineye bega i na 'aniveleneni mali tomotoga taunidi kebu Diu 'waidie.” <sup>12</sup> Tutuyanina Agabu yana vona 'a nogai, 'ima wata me Sisalia tovetumaganavo Faulo a talabodebodeni bega kebu i na nago Ielusalema. <sup>13</sup> ✧ Siwe Faulo i vo, Awale 'wa 'we'we'wela. Kebu nuafouku 'wa na kiavedayadayagi. Yau a tauyeku i na yogoniku Ielusalema 'waineye, we'e 'ai'edi i na luwewafakuga Toveimea Iesu faifaina, kebu tamu ava'ai.” <sup>14</sup> Faulo yana vona 'a nogai siwe kebu 'ama fata 'a na talabodebodeni 'a ve'wadamo 'a vo, Naninina i na souyeniga 'asa'aiana, Yaubada 'aisena yana nuanua.” <sup>15</sup> Aiata 'ifwaidi i 'a'ava, 'a 'idewadewa 'a tauya 'a nagoi Ielusalema. <sup>16</sup> Ifwaidi tovetumaganavo Sisalia 'wainega i 'weabuma taiadi 'a nagoi Nasoni yana vanuge bei taiadi 'a na miamia. Taunina tomogo Saifilosu wata taunina tamu Iesu yana tovetutuyama kumekumetana.

### *Faulo i nago Iemesa i 'iseni.*

<sup>17</sup> Tutuyanina 'a le'wa Ielusalema emavo tovetumaganavo 'a veluagadi i sosoanema. <sup>18</sup> Bei 'a 'eno i 'atai Faulo taiadi 'a nagoi Iemesa 'waineye, wata yana vanuge tovetumaganavo 'adi 'aila'a 'adi to'edakumetavo 'au'auveadi 'a veluagadi. <sup>19</sup> ✧ Faulo i vona-vekaiwa 'waidie, mulieta nani matatabuna i lu'ivoneyedi ava'ai Yaubada i 'idewaiga mali tomotoga taunidi kebu Diu 'waidie, taunina yana folova 'wainega. <sup>20</sup> Tutuyanina Faulo yana vona i nogai, ma yadi sosoana Yaubada i subiai. Wata i vona Faulo 'waineye i vo, Iama side bani'odi, me Diu fueotogidi side bei 'akonadi i vetumagana Iesu 'waineye, we'e yada ve'etoboda Moses

✧ 21:8: Fol 8:5,40 ✧ 21:9: Fol 2:17 ✧ 21:10: Fol 11:28 ✧ 21:11: Fol 21:33

✧ 21:13: Fol 20:24 ✧ 21:19: Fol 15:12

'wainega i veve'ililibuyedi mogitana. <sup>21</sup> Tomotoganidi i nu-asako 'waimuye fai vala-vekavekali i nogai igodina 'omu 'u da veve me Diu mali 'awalaweye i miamiani 'waidie 'u da vo, Ve'etoboda Mosese 'wainega 'wa na bailedi, natumiavo bunudi kebu 'wa na bobodi, wata 'ida me Diu yada sauluva kebu 'wa na ve'ililibuyedi." <sup>22</sup> Wata Iemesa ma enavo Faulo i voneni i vo, Taunidi 'ako vala i na nogai 'omu 'akonadi 'u mai de'e bei. Bani'odi ta na munega? <sup>23</sup> Ava'ai 'edaga 'a na vemu 'u na 'idewai. 'Ama 'aila'a 'wainega tomotoga 4 'akonadi i vona'awaufaufa Yaubada 'waineye tamu nani faifaina. <sup>24</sup> Taiadi 'wa na nagoi yadi 'aisaya 'u na kimwanedi i na velomu Yaubada 'waineye wata taiadi 'wa na tafalolo yada sauluva bani'odi. I na 'a'avana 'adi fata nava'audi i na 'welidi yadi tugusa 'akonadi yadi vona'awaufaufa Yaubada 'waineye i 'idewai. Fuedi i na 'isemi i na ve'awamogitana yada ve'etoboda Mosese 'wainega 'u veve'ililibuyedi wata valanina i nogaiga igodina yada sauluva 'u da geugeudi kebu mogitana, vekali. <sup>25</sup> \*We'e mali tomotoga taunidi kebu Diu i vetumagana Iesu 'waineye 'akonadi leta 'a kilumi 'waidie bega yama nuanua 'a vonedi 'aisayanidi yaubada-vekavekali 'waidie mali tomotoga i velomuyediga, kebu i na 'ani'anidi, wata kebu i na ve'avula-'avo'avovo. Lologa kebu i na 'ani, wata 'aisaya 'i'i'idi kebu i na 'anidi fai dayaga bwaikina nagedie." <sup>26</sup> \*Faulo yadi vona i nogai bega i 'atai tomotoganidi 'adi 4 i vagavaidi i nawedi taiadi i tafalolo bega i na vevunavunaga Yaubada mataneye. Mulieta ma fuedie i luku vanuga 'eba velu'ui nageneye 'aiatanina yadi tafalolo i na ve'a'avaga 'ana 'aiata i lu'ivoneyeni tovelomu 'waidie, mulieta 'adi 4-nidi yadi 'aisaya i na velomuyedi basenadi bani'odi i vona'awaufaufaga Yaubada 'waineye.

*Me Diu Faulo i 'ive'avini vanuga 'eba velu'ui 'waineye.*

<sup>27</sup> Faulo ma enavo yadi tafalolo 'adi 'aiata 7 sai'afoga i na 'a'ava, nika me Diu 'ifwaidi i maia 'awalawa Eisia 'wainega Faulo i 'iseni vanuga 'eba velu'ui nageneye. I vegolegole bega fuedi i lilide ma yadi kamogala Faulo i 'ive'avini. <sup>28</sup> Yadi vegolegolenina i vo, Emavo me Isileli 'wa 'ivaisema. De'e tomogonina tutuya fuedi mali 'awalaweye i nunago i veve 'ida me Isileli wata yada vanuga 'eba velu'ui bani'odi nani-'avo'avovo, wata yada ve'etoboda Mosese 'wainega i geugeudi. We'e 'asiau yana sakona bwaikaotogina fai mali tomotoga taunidi kebu Diu i miedi de'e yada vanuga 'eba velu'ui tabutabuna nageneye i 'iveyokei." <sup>29</sup> De'e bani'odi i voneyediga fai i 'iseni Tolofimo 'atamana Efeso 'wainega

taunina kebu tomogo Diu Faulo taiadi i tovoovoi 'atamane yadi nuanua i vo 'ako, Wata taiadi i luku vanuga 'eba velu'ui tabutabuna nageneye, bei mali tomotoga taunidi kebu Diu, kebu 'adi fata i na lukuga.”

<sup>30</sup> Tomotoga matatabudi 'atamane i miamiani i daba i lilide i maia Faulo i 'ive'avini i yo'ei i obuyeni tanotanoge. Tutuyanina i souyedi vanuga 'eba velu'ui 'awana i siboda-matayo'oi. <sup>31</sup> 'Aila'anidi igodi Faulo i da luvewafai siwe tamu tomogo vona i vetunei Loma tolugavia yadi toeva biola 'waineye i vo, Me Ielusalema matatabudi i daba.” <sup>32</sup> Vonanina toeva biola i nogai tolugaviavo wata 'adi to'edakumetavo i vonedi taiadi i ve'ilililide i obu 'aila'a 'waidie. 'Aila'anidi i 'isedi i mimaia Faulo i nikenikeiga i 'ailove.

<sup>33</sup> ✧ Toevanina biola i nago Faulo i 'ive'avini i veimea yana tolugaviavo i na yogoni bulava kainumu 'ailuga 'waidiega. I velutoli 'aila'a 'waidie i vo, Ava'ai tomogo de'e? Ava'ai yana sakona?” <sup>34</sup> 'Ifwaidi i vegolegole nani 'aitamogana faifaina wata 'ifwaidi yadi vegolegole tulina tulina, bega toevanina biola kebu 'ana fata i na 'asetai ava'ai lamuna i daba. Faifainanina tolugaviavo i vonedi Faulo i na naweni i na laka yadi vanuga fa'alina 'waineye. <sup>35</sup> Tutuyanina i le'wai vanuganina 'ana wanala 'waineye, tolugaviavo Faulo i evai fai 'aila'a ma yadi nuasako nuanuadi i na nikei. <sup>36</sup> ✧ 'Aila'anidi i yogo'waili i maia i toke i vegolegole i vo, 'Wa luvewafai.”

### *Faulo i vonayavuga 'aila'a matadie.*

<sup>37</sup> Sai'afoga i da lukuvuni vanuge, nika Faulo toeva biola i voneni i vo, Nuanuaku a na veifufu 'waimuye.” Tutuyanina i nogai vona Guliki 'wainega i vonavona toeva biola i vo, 'Alo 'omu 'u 'asetai vona Guliki. <sup>38</sup> Siwe tutuyanina a 'isemu yaku nuanua a vo 'ako, 'Omu tomogo Itifita,” wata igodi a vo, Kumanina tomogonina basenadi tolugaviavo 4,000 i 'edakumesedi taiadi i nagoi wala'aie Loma gabemani taiadi i vetalaga.” <sup>39</sup> Nika Faulo i vo, Yau tomogo Diu 'aku tuvada Tasisu 'awalawa Silisia nageneye wata 'atamananina bwaikina 'ana tomotoga yau. A vevelu'ui 'waimuye, nuanuaku a da veifufu tomotoga 'waidie.” <sup>40</sup> Bega toeva biola Faulo i tauyeni i tovoi wanala 'waineye, nimanega i talabodedi nika i ve'wada i veifufu 'waidie Diu bonadiega.

## 22

<sup>1</sup> Faulo i vonedi i vo, Ekwavo wata tamakwavo matatabumi 'wa ve'wada a na vonemi 'waikuye 'wa nuasakoga faifaina.” <sup>2</sup> Tutuyanina 'aila'a i nogai Faulo i veveifufu taunidi Diu bonadiega, i ve'wada-'afo'afo nika i veifufu i nago. <sup>3</sup> ✧ I

vo, Yau tomotoga Diu, 'aku tuvada Tasisu 'awalawa Silisia nageneye 'a mai de'e bei Ielusalema a taulai. 'Aku tove-'atumaí Gamelieli, wata ve'etoboda tubudavo 'waidiega i ve 'waikuye bega matatabuna a 'aseta-'afo'afoidi. 'Omi tutuya matatabuna taunimi 'wa tautauyemi Yaubada 'waineye 'wa veve'ililibuyeni, yau wata bani'odi. <sup>4</sup> \*Basenadi Iesu yana 'Eda'eda 'ana toveimatayakayaka, vevinedi wata iavetadi, a 'i'ive'avinidi a yatoyatodi vanuga 'eba yogona 'waidie, veviga a veveledi we'e 'ifwaidi i wafawafa. <sup>5</sup> Tovelomu bwaikina wata Diu yada Kaniselovo taunidi 'aku to'aseta 'adi fata i na veifufu 'waimie. Taunidi basenadi leta i kilumidi 'aku awave'atumaí wata 'aku 'aseta faifaina ediavo me Diu i miamianiga Damasiko faifaidi. I veleku a nawedi igodi bei Iesu yana tomotoga a da 'ive'avinidi wata a da yogonidi bulava kainumu 'waidiega a da miedi Ielusalema vematavuloga faifaina.”

*Faulo yana nuavilana Iesu 'waineye i veifufuyeni.*

<sup>6</sup> Wata Faulo i vonedi i vo, 'Aiatanina 'waineye utukamwane a nunago Damasiko sai'afoga a da le'wa 'atamananina 'waineye nika mageta bwaikina abamega i kianamali i mageseku. <sup>7</sup> A be'u fwayefwayeye bona a nogai i vonavona 'waikuye i vo, Saulo, Saulo, awale vita 'u veveleku a veveviga?” <sup>8</sup> Bonana a tutuli a vo, 'Auvea, 'omu aitoi?” I vo, Yau Iesu 'atamana Nasalediega, kumaniku vita 'u veveleku.” <sup>9</sup> Tomotoganidi taiadi a nunagoiga, mageta i 'iseni siwe tomotoganina i vonavona 'waikuye kebu bonana i da 'asetai. <sup>10</sup> Yau a velutoli a vo, 'Auvea, bani'odi a na munega?” 'Auvea i voneku i vo, 'U na tovoi. 'U na nago Damasiko, bei tamu tomogo nani matatabuna Yaubada yana nuanua faifaimu i na vonemu.” <sup>11</sup> Igodi a da 'isala nika matakú i sako fai mageta bwaikina, bega 'aku to'weabu nimakuye i 'abi i veikaniku 'a nagoi Damasiko.

<sup>12</sup> Damasiko 'waineye tamu tomogo i miamia 'ana waga Ananiasi. Taunina Yaubada 'ana tove'ililibu, yada ve'etoboda i vevematayakeyakedi, wata me Diu matatabudi i miamianiga Damasiko i veve'ililibuyeni. <sup>13</sup> Tomogonina i mai lilivakuye i tovoi i vo, Taiku Saulo, 'U 'isa-vaitugana.” Yana vona i ve'a'ava, nika a 'isala a 'iseni. <sup>14</sup> Wata i voneku i vo, Tubudavo yadi Yaubada i venua'ivinemu bega yana nuanua 'u na 'asetai wata yana Tofolova 'Atumaiotogina Iesu 'u na 'iseni, tauniotogina i na veifufu 'waimuye. <sup>15</sup> Bega 'u na vetolu'ivona faifaina ava'ai 'u 'iseniga wata 'u nogaiga faifaidi tomotoga matatabudi 'waidie. <sup>16</sup> Bega kebu 'u na lulukamata, 'u tovoi 'u bafitaiso wata 'u na velu'ui 'ana wagavayega bega yamu sakona i na lekoa-yavuledi.”

*'Auvea Faulo i venua'ivineni i na lau'age mali tomotoga 'waidie.*

17-18 Wata Faulo tomotoga i vonedi i vo, Bafitaiso i 'a'avana a vilaku a nago Ielusalema, a luku vanuga 'eba velu'ui 'waineye. A vevelu'ui nika 'Auvea i souyeni 'waikuye a 'iseni 'wa da vo a da 'enoneganega. I voneku i vo, Tomotoganidi de'e bei i miamianiga yamu vona faifaiku kebu i na nogaiga, faifainanina 'u na tovoi-matayo'o Ielusalema 'u na 'iaweni.” 19 ✨Bonana a tutuli a vo, Kebu 'Auvea, nuanuaku a na miamia. Tomotoganidi de'e i 'asetaku mogitana fai basenadi a nago a luku yadi 'eba miava'auta 'waidie, 'amu tovetumaganavo a 'ive'avinidi a nikenikedi. 20 ✨We'e yamu tofolova Sitiveni yana wafa yau matakuye, 'ana to'ainike 'adi kaleko a 'isave'avinidi we'e yana wafa faifaina a sosoana. Fai basenadi tomotoga de'e bei yaku sauluvanina i 'iseni bega kebu i na vedumwe'ai'aiekuga. Tutuyanina a na veifufu faifaimu, yaku vona i na nogai.” 21 ✨Siwe wata 'Auvea i voneku i vo, A na vetunemu 'u na nago 'ani'ie mali tomotoga 'waidie taunidi kebu Diu, bonamu i na nogai.”

*Faulo tamu Loma 'ana tomotoga bega kebu i da fitali.*

22 ✨Faulo wanalayega i veveifufu tomotoga 'waidie yana vona i noganogai, siwe tutuyanina i vonedi 'Auvea i vetunei mali tomotoga taunidi kebu Diu 'waidie bega 'ita'ita'i i na veluagai, ma yadi nuasako i vegolegole i vo, 'Wa luvewafai, kebu i da lubwaineni ma yawaina taiadi ta na miamia.” 23 Matatabudi i gagali, 'adi kalekoyega i lu'wai'wai wata fwayafwaya i sevalidi i tawedi i laka. 24 Tomotoga i gagagali nika me Loma yadi toeva biola yana tolugaviavo i vonedi Faulo i na 'ewai i na naweni vanuga fa'alina 'waineye bei i na fitali wata i na velutolitoliene ava'ai faifaina me Diu i daba. 25 ✨Akonadi i 'iyogoyogoni i 'a'avana, igodi i da fitali nika Faulo i vona tamu yadi to'edakumeta 'waineye i vo, 'Alo 'omu i lubwainemu Loma yana tomotoga 'u na niki 'ai'edi bola kebu i na vonayavuga.” 26 Tutuyanina to'edakumetanina Faulo bonana i nogai, i nago yana toeva biola 'waineye i lu'ivona i vo, No'o tomogonina tamu Loma 'ana tomotoga. Kebu i da lubwaineda 'ai'edi ta na niki.” 27 Bega toeva biola i nago Faulo i velutoliene i vo, Vona mogitana 'omu tamu Loma 'ana tomotoga?” Faulo i vo, E'e, mogitana.” 28 Toeva biola i vo, Yau wata Loma 'ana tomotoga, siwe nagami mani bwaikina a veledi Loma gabemani mulieta i tauyeku yau 'ana tomotoga mogitana.” Siwe Faulo i voneni i vo, Tamaku

✨ 22:19: Fol 8:3 ✨ 22:20: Fol 7:58 ✨ 22:21: Fol 9:15 ✨ 22:22: Fol 21:36

✨ 22:25: Fol 16:38

tomogo Loma, faifainanina yau a tubuga tamu Loma 'ana tomotoga.”<sup>29</sup> Tomotoganidi igodi i da velutolitolieniga bonana i nogai yawaidi i lovoga i dega, wata toeva biola i kololo fai i 'asetai tamu Loma 'ana tomotoga i yogoni bulava kainumu 'waidiega.

<sup>30</sup>Toeva biola nuanuana i na 'aseta-'atumaia ava'ai faifaina me Diu i nuasako Faulo 'waineye, faifainanina i 'atai 'awa'awaie Faulo nimana 'ana yogoyogona i 'etoyavudi wata i veimea tovelomu 'adi to'edakumetavo Kaniselo taiadi i na miava'auta. Tutuyanina i va'auta'a'ava, toeva biola Faulo i mieni i tovoi matadie.

## 23

### *Faulo i vonayavuga Kaniselo matadie.*

<sup>1</sup> Faulo i 'isanago me Diu yadi Kaniselovo 'waidie i vonedi i vo, Ekwavo, tutuya matatabuna 'aku vebae yaku nuanua tonovidi Yaubada mataneye, 'asiau wata bani'odi.”<sup>2</sup> Tovelomu bwaikina 'ana wagava Ananiasi i nuasako, begaidi tomotoga i tovtovoiga Faulo lilivaneye i vonedi 'awaneye i 'ainike.<sup>3</sup> Faulo i vo, 'Omu toveimea sakoimu. 'Omu wata Yaubada i na nikemu. 'U miabuimo 'u veveimea 'waikuye yada ve'etoboda 'waidiega siwe yada ve'etobodanidi 'akonadi 'u geudi fai 'u veimea i nikeku.”<sup>4</sup> Wata tomotoganidi i tovtovoiga Faulo lilivaneye i voneni i vo, Awale 'u vovona-awadamana Yaubada yana tovelomu bwaikina 'waineye.”<sup>5</sup> \*Faulo i vo, Ee. Ekwavo kebu a da 'asetaigna taunina tovelomu bwaikina. We'e Yaubada yana Buki 'waineye i vo, Kebu 'wa na vona-awadamana tomotoga 'adi to'edakumetavo 'waidie.”<sup>6</sup> \*Tutuyanina Faulo i 'asetai Kaniselovo 'ifwaidi Sadusi yadi 'aila'a wata 'ifwaidi Falisi yadi 'aila'a i toke bonana bwaikinega i vo, Ekwavo, tamaku wata inaku Falisi, wata yau bani'odi. 'Asiau a vovonayavuga matamie fai a nuani mogitana towafa Yaubada i na sivetovoidi wafayega.”<sup>7</sup> Tutuyanina i vona'a'ava, Falisi wata Sadusi taiadi i ve'ikwayekwayega begaidi 'aila'a i 'idia.<sup>8</sup> \*Yadi ve'ikwayekwayega side bani'odi. Sadusi i vonaga igodina Yaubada towafa kebu i na sivetovoidi, wata i vo, Anelose wata 'anu'anunu kebu i da miamianiga.” We'e Falisi naninidi 'aitonu i vetumagana 'waidie.<sup>9</sup> Yadi ve'ikwayekwayega i vebwaika-'afo'afo begaidi 'ifwaidi ve'etoboda 'adi tovevo taunidi Falisi i tovoi 'awadi i fa'ala i vo, Tomogo de'e, kebu tamu yana sakona 'a da veluagai. Voke mogitana tamu anelose 'alo tamu 'anu'anunu i souyeni 'waineye Damasiko 'ana 'edeje.”

<sup>10</sup> Yadi ve'ikwayekwayega 'wainega vetalaga i souyeni begaidi Loma yadi toeva biola i kololo i vo i na nunago Faulo i na sivo'avo'ai bega yana tolugaviavo i vonedi i obu Faulo nimaneye i 'abi i yo'ei me Diu 'waidiega i naweni yadi vanuga fa'alina 'waineye.

<sup>11</sup> ✧ Lovananina 'waineye, 'Auea i souyeni lilivaneye i tovoi i voneni i vo, Kebu 'u na kolologa. 'Akonadi 'u vetolu'ivona faifaiku de'e bei Ielusalema 'waineye, wata bani'odi 'u na nago Loma, bei wata 'u na lu'ivona faifaiku.”

*Diu nuanuadi Faulo i na luvewafai.*

<sup>12</sup> I 'atai 'ifwaidi me Diu i va'auta yadi nuanua i 'idewai bani'odi i na munega Faulo i na luvewafai. Taunidi i bodadi i vona'awaufaufa Yaubada mataneye kebu i na 'ani wata i na yemu nagami Faulo i na nikei i na wafa.

<sup>13</sup> Toveifufunidi 'adi 'aila'a 40 i 'iaweni. <sup>14</sup> Bega i nagoi tovelomu 'adi to'edakumetavo wata 'ifwaidi to'edakumeta 'au'auveadi 'waidie i vonedi i vo, 'Ima taunima a bodao-togima kebu tamu ava'ai 'a na 'alatonovi nagami Faulo 'a na nikei i na wafa. <sup>15</sup> ✧ Begaidi nuanuama 'omi wata Kaniselovo matatabudi taiadi vona 'wa na vetunei Loma yadi toeva biola 'waineye Faulo i na mieni 'waimie. Yami vaiseba 'wa na vo, Nuanuama 'a na 'asete-'atumaia yana nuanua wata yana sauluva,” we'e 'ima 'a na 'idewadewa 'edeye 'a na lulukamata bei 'a na luvewafai.”

<sup>16</sup> Siwe Faulo avuna novuna natudi, 'ana 'ainike faifaina i nogai bega i nago i luku vanuga fa'alina 'waineye yadi nuanua i lu'ivoneyedi Faulo 'waineye. <sup>17</sup> Begaidi Faulo tamu tolugaviavo 'adi to'edakumeta i goleni i mai i voneni i vo, Tubuau de'e 'u na vagavaia 'u na naweni toeva biola 'waineye i na veifufu.” <sup>18</sup> Bega to'edakumeta tubuaunina i vagavaia i naweni toeva biola 'waineye. Tutuyanina i le'wa i voneni i vo, Kumanina Faulo i miamia vanuga 'eba yogona 'waineye i voneku tubuau de'e a mieni, nuanuana i na veifufu 'waimuye.” <sup>19</sup> Toeva biola nimaneye i 'abi 'aiseneye i naweni i velutolieni i vo, Ava'ai nuanuaga 'u na veifufuyeni 'waikuye?” <sup>20</sup> Tubuaunina i voneni i vo, Me Diu fuedi i veifufu yadi nuanua i fali'atumaieni i na mai i na vonemu bega 'awa'awaie Faulo 'u na naweni Kaniselovo 'waidie, yadi vaiseba i na vo, 'A na 'asete-'atumaia yana nuanua wata yana sauluva faifaiki.” <sup>21</sup> Kebu bonadi 'u na nogai fai tomotoga bani'odi 40 i na 'edu 'edeye i na lulukamata. Faulo 'ana luvewafa faifaina taunidi i bodadi kebu i na 'ani wata i na yemu nagami i na nikei. 'Akonadi i 'idewadewa i lulukamata 'ai'edi 'u na nogayedi.” <sup>22</sup> Toeva biola tubuau i velu'ase'asei



i vo, 'U lu'ivonaga 'waikuye, kebu tamu aitoi 'u na voneni," mulieta i voneni i nago.

*Faulo i tovoi Filikesa mataneye.*

<sup>23</sup> Toeva biola vonanina i nogai tubuau 'wainega begaidi tolugaviavo 'adi to'edakumetavo 'adi 'ailuga i goledi i mai i vonedi i vo, 'Wa na nagoi tolugaviavo ma yadi 'ibadi 200, wata tolugaviavo 70 ma yadi 'aisaya osi, wata 'ifwaidi tolugaviavo 200 'wa na vonedi i na 'idewadewa lavilavi 'ana utukamwane 'wa na tauya Faulo 'wa na naweni Sisalia. <sup>24</sup> Wata 'aisaya osi 'ifwaidi 'wa na 'idewadi bei Faulo i na dodoga wata 'wa na 'isave'avina-'atumaia 'wa na naweni gabemani 'adi to'edakumeta bwaikina 'ana wagava Filikesa 'waineye 'wa na valovei." <sup>25-26</sup> Bega toeva biola leta side bani'odi i kilumedi i vo,

'Omu gabemani 'adi to'edakumeta bwaikina Filikesa, ma yaku ve'ililibu a vekaiwa 'waimuye.

<sup>27</sup> ☆Tomogo we'e yaku tolugaviavo i viweni, me Diu i 'ive'avini igodi i da luwewafai. Vala a nogai taunina tamu Loma 'ana tomotoga bega ma yaku tolugaviavo 'a obu 'a 'ita'ita'ieni. <sup>28</sup> ☆Nuanuaku a na 'asetai i vevitaiga lamuna bega a naweni Diu yadi Kaniselovo 'waidie. <sup>29</sup> A velutolitoliedi bega a 'asetai i vevitai nani-'avo'avovo taunidi yadi veimea faifaidi, kebu tamu yana sakona a da veluagai bega a na yatoi vanuga 'eba yogona 'waineye 'alo i na wafa. <sup>30</sup> ☆We'e tamu tomogo i lu'ivona 'waikuye me Diu i veifufugiva Faulo i na luwewafai faifaina. Faifainanina a vetunei 'waimuye, wata 'ana tovevitavo a vonedi i na waia bei taiadi i na vonayavuga 'waimuye.

Side bani'odi,

Yau, Kaladiu Laisiasi.

<sup>31</sup> Tolugaviavo yadi toeva biola yana vona i nogai, bega letanina wata Faulo taiadi i naweni, ma lovanidi i nagoi i le'wa 'atamana Anitifatili. <sup>32</sup> I 'atai, tolugaviavo ma yadi 'aisaya osi Faulo i naweni we'e tolugavianidi 'agediamo taiadi i nagoiga, wata i viladi Ielusalema. <sup>33</sup> Tutuyanina i le'wai Sisalia, i luku gabemani 'waineye leta i veleni wata Faulo nimaneye i yatoi. <sup>34-35</sup> Filikesa letanina i lu'iawawai, i 'a'ava Faulo i velutolieni i vo, 'Amu tuvada mogitana ava'aibe?" Faulo i vo, Silisia." Tutuyanina i 'asetai Faulo i mai tamu me Loma yadi 'awalawa 'wainega i voneni i vo, Bola 'amu tovevitavo i na maia taiadi 'wa na vonayavuga 'waikuye." Mulieta yana tolugaviavo i vonedi Faulo i na 'isave'avini vanuga bwaikineye basenadi Kini Elodi i yogoni.

## 24

### *Me Diu Faulo i vevitai.*

<sup>1</sup> Faulo i miamia Kini Elodi yana vanuga bwaikina 'waineye, mulieta 'aiata 5 i 'a'ava, tovelomu bwaikina Ananiasi, wata Diu yadi to'edakumetavo 'au'auveadi 'ifwaidi i maia Sisalia, to'aivaita tamu taiadi. To'aivaitanina 'ase'asetana 'ana wagava Tetalasi, me Diu yadi nuanua i na lu'ivona vonayavuga 'waineye. Ma fuedie i tovoi Filikesa mataneye Faulo i vevitai. <sup>2-3</sup> Yadi vevita i 'a'avana, Faulo i goleni i luku 'waidie mulieta me Diu yadi vevita Faulo faifaina Tetalasi i veifufuyeni Filikesa mataneye. Side bani'odi yana vona i vo, 'Auvea bwaikimu, yamu 'asetai bwaikina wata 'ama to'edakumeta bega tutuya manamanawena kebu tamu vetalaga i da souyeni yama 'awalawa nageneye. Tutuya fuedi 'u veveimea 'atumaina bega yama mia i ve'atumi. 'Ima matatabuma 'a miamiani 'awalawa 'aitamogana 'aitamogana 'waidie ma yama sosoana 'a vekaiwa bwaikina 'waimuye nani de'e faifaiddi. <sup>4</sup> Kebu nuanuama 'a na veifufuvedule bega 'u na 'abiawa, nani bwaika'avadi 'a na veifufuyedi siwe 'a velu'ui 'waimuye 'u na nuakalikaliema bonama 'u na nogai.

<sup>5</sup> ✧Tomogo de'e 'a 'asetai sakoiotogina, wata 'atamana 'aitamogana 'aitamogana yana vona 'waidiega me Diu kamoma i ogaogala tauni'avadi i vevetalaga. Iesu 'ana tovetumaganavo 'adi 'aila'a 'adi wagava Nasaledi, tomogonina 'adi to'edakumeta. <sup>6-7</sup> ✧Wata yama vanuga 'eba velu'ui i 'iveyokei begaidi 'a 'ive'avini. [Taunima yama ve'etoboda 'waidiega igodi a da veimeyeni siwe toeva biola Laisiasi ma yana tolugaviavo i obuma i luleoleoma bega i 'ive'avini i naweni. <sup>8</sup> Mulieta Laisiasi i veimeia 'a na mai Faulo taiadi 'a na vonayavuga 'waimuye.] 'Ai'edi tomogo de'e 'u na velutolitoliene, bola taunimu 'u na 'asetai-atumaia taunina 'wainega ava'ai faifaina 'a vevitai." <sup>9</sup> Tutuyanina Tetalasi yana vona i 'a'ava, me Diu matatabudi i gagali i vo, E'e mogitana."

### *Faulo i vonayavuga Filikesa mataneye.*

<sup>10</sup> Bega tomogo bwaikina gabemani nimanega Faulo i voneni i na tovoi i na veifufu. Faulo i tovoi i vo, 'Asiau ma yaku sosoana a na ve'ewa 'waimuye me Diu i vevitakuga faifaina fai a 'asetai malamala fuedi 'u veveimeyema yama 'awalawa nageneye bega me Diu yama nuanua 'u 'asetadi. <sup>11</sup> 'Ai'edi tomotoga de'e 'u na velutoliedi 'u na 'asetai-atumaia, a lakaga Ielusalema Yaubada a subiai i maiga 'asiau bola kebu 'aiata 13 ta da veluagai. <sup>12</sup> Tutuyanina 'waineye me Diu

kebu i da 'iseku tamu aitoi taiadi a da veve'ikwayekwayega vanuga 'eba velu'ui nageneye, 'alo i da 'iseku tomotoga a da kiavekamogaogalidi yadi 'eba miava'auta 'waidie 'alo 'atamane. <sup>13</sup> Tomotoganidi i vevitakuga kebu tamu ava'ai i na vemu bega 'u na ve'awamogitana yadi vonanidi faifaidi. <sup>14</sup> \*We'e tamu nani a na lu'ivoneyeni. Tubumavo yadi Yaubada a subisubiai wata Iesu yana 'Eda'eda a vevetutuyameni, 'Eda'edanina faifaina i vo, Vekali.” Yama ve'etoboda Mosese 'wainega wata Yaubada yana tolu'ivonavo 'adi kilukiluma a subiadi wata a vetumagana 'waidie. <sup>15</sup> \*Aku tovevitanidi i nuani mogitana bega i lulukamata 'awaie to'atumaina wata tosakona i wafaga Yaubada i na sive-tovoidi wafayega, yau wata bani'odi a nuani mogitana. <sup>16</sup> Faifainanina a tokemaigeku bega tutuya matatabuna 'aku vebae wata yaku nuanua tonovidi Yaubada mataneye wata tomotoga matadie.

<sup>17</sup> \*Malamala fue di kebu a da nunago Ielusalema begaidi a laka, 'anivelena-maimaiga basenadi a va'augi, ekwavo me Diu a na veledi wata a na velomu Yaubada 'waineye. <sup>18</sup> \*Nagami a tafalolo yama veime a bani'odi bega a vevunavunaga Yaubada mataneye, i 'a'avana mulieta a luku vanuga 'eba velu'ui nageneye velomu faifaina, bei i veluagaku, kebu tamu ve'ikwayekwayega wata 'aila'a kebu. <sup>19</sup> We'e me Diu 'ifwaidi 'awalawa Eisia 'wainega matadie wata i 'iseku. 'Ai'edi yadi vevita mogitana, i lubwainedi i da maia i da lu'ivona matamuye. <sup>20</sup> 'Ai'edi kebu, side tomotoganidi taiadi ta miamiani i na veifufu 'ai'edi ava'ai yaku sakona i veluagai tutuyanina a tovoi Kaniselovo matadie. <sup>21</sup> \*Siwe tamu nani a na lu'ivona 'waimuye, tutuyanina a tovoi matadie bonaku bwaikinega a vonedi a vo, 'Asiau a vovonayavuga matamie fai a nuani mogitana towafa Yaubada i na sive-tovoidi wafayega.”

<sup>22</sup> Faulo yana vona i 'a'ava, Filikesa 'akonadi nani fue di Iesu yana 'Eda'eda faifaidi i 'asetadi begaidi i vona Faulo 'waineye i vo, Bola toeva biola Laisiasi i na mai, mataneye yamu vonayavuga a na venva'ivineni wata a na sidewadewai. 'Asa'aiana, bei ta na yatoi.” <sup>23</sup> \*Vonayavuga i 'a'ava, tolu-gaviavo i vonedi Faulo i na 'isave'avini vanuga 'eba yogona 'waineye, veviga kebu i na veleni, wata 'ai'edi enavo 'anava i na mimaiedi faifaina, kebu i na talabodediga.

*Faulo i veifufu Filikesa ma yana vavine matadie.*

<sup>24</sup> 'Aiata 'ifwaidi i 'a'ava, Filikesa ma yana vavine Dalusila, taunidi vavine Diu, i nago 'eba vonayavuga 'waineye, vona

i vetunei tolugaviavo 'waidie Faulo i na mieni 'waidie i na veifufu Iesu Keliso faifaina, wata bani'odi tomotoga i na munega i na vetumagana. <sup>25</sup> Wata Faulo i veifufu i nago, sauluva 'atumaidi faifaidi, taunida yada sauluva ta na 'isave'avinidiga faifaidi, wata Iesu yana mai-vaitugana faifaina tomotoga ta na tovoi mataneyeye ta na vonayavuga wata i na veimeyeda. Filikesa Faulo yana vona i nogai i kololo i vo, 'Asa'aiana 'u tovoi 'u nago. 'Ai'edi tamu 'aiata safailina 'waikuye wata a na golemu 'u na mai.” <sup>26</sup> Tutuya fuedi i golegoleni i mimai 'waineyeye taiadi i veveifufu, Filikesa yana nuanua igodi i vo, Faulo mani i na mieni givagivayega i na veleku 'ana fata a na 'etoyavuya vanuga 'eba yogona 'wainega.”

<sup>27</sup> 'Akonadi malamala 'ailuga i 'a'ava, Fokiasi Fesito i mai, Filikesa tutulina. Fai Filikesa 'ana subia, nuanuana me Diu i na subiai, i veimea Faulo i na miamia vanuga 'eba yogona 'waineyeye.

## 25

*Faulo nuanuana i na vonayavuga Loma yadi toveimea bwaikaotogina mataneyeye.*

<sup>1</sup> Mulieta Fesito i le'wa Sisalia bega 'awalawanina 'ana toveimea. I miamia 'aiata 'aitonu, i 'a'ava mulieta i laka Ielusalema. <sup>2</sup> Me Diu 'adi to'edakumetavo wata tovelomu 'adi to'edakumetavo matatabudi i maia Fesito 'waineyeye, i vevitaimaimaiga Faulo faifaina. <sup>3</sup> ✧Fai nuanuadi Faulo i na nikei 'edeeye, Fesito i lukakadeni i vo, Nuanuama 'u da vesauluva 'atumaina 'waimeyeye bega vona 'u da vetunei Faulo i da mieni Ielusalema.” <sup>4</sup> Fesito i vo, Faulo Sisalia i miamia vanuga 'eba yogona 'waineyeye, yau sai'afoga wata a na vilaku bei. <sup>5</sup> Bega yami to'edakumetavo 'wa na vonedi taiadi 'a na nagoi Sisalia, tomogonina 'ai'edi ma yana sakona bei i na vevitai matakuye.”

<sup>6</sup> Fesito i miamia Ielusalema bani'odi 'aiata 8 'alo 10 mulieta i obu Sisalia. I 'atai, i luku 'eba vonayavuga nageneyeye i miabui i veimea Faulo i na mieni. <sup>7</sup> ✧Tutuyanina Faulo i le'wa me Diu Ielusalemega i tovfifineni nani fuedi sakoidi 'waidiega i vevitai siwe kebu tamu ava'ai i da veni bega toveimea i na ve'awamogitana.

<sup>8</sup> We'e Faulo i ve'ewa i vo, Yau kebu tamu me Diu yama ve'etoboda a da geuya, wata vanuga 'eba velu'ui a da 'iveyokei, wata a da vesauluva sakoina Loma gabemani 'waidie.” <sup>9</sup> ✧Fesito nuanuana me Diu i na awa'ai'aia bega Faulo i velutolien i vo, Nuanuamu ta na nagoi Ielusalema bei

'u na vonayavuga matakuye me Diu i vevitamuga faifaina?"  
 10 Siwe Faulo yana vona i tutuli i vo, 'Akonadi a tovotovoi Loma gabemani yadi toveimea bwaikaotogina Sisa yana 'eba vonayavuga 'waineye, wata ava'ai 'eba vonayavuga ta na lualeni? 'Akonadi 'u 'aseta-'atumaia kebu tamu yaku sakona me Diu 'waidie. 11 'Ai'edi ve'etoboda bwaikidi a da geudiga i lubwaineku a da wafa, 'ako kebu a da baila. We'e 'ai'edi i vevita-maimaigiku, kebu tamu aitoi 'ana fata i na 'aniveleneku me Diu 'waidie. 'Omu kebu 'u na 'aniveleneku me Diu 'waidie, nuanuaku a na nago a na vonayavuga Loma yadi toveimea bwaikaotogina Sisa mataneyeye." 12 Fesito i nogai bega i veifufu yana kaniselovo taiadi, mulieta Faulo i voneni i vo, Fai nuanuamu Sisa, 'atumaina, Sisa 'waineye 'u na nago."

*Fesito i veifufu Akalifa taiadi Faulo faifaina.*

13 'Akonadi 'aiata fuedi i 'a'ava, Kini Akalifa ma novuna Benaisa i maia Sisalia bega i na vekaiwa Fesito 'waineye i maiga faifaina. 14 Bei i miamia 'aiata 'ifwaidi i 'a'ava, Fesito i veifufu kininina 'waineye Faulo faifaina. I vo, Sino tamu tomogo i miamia vanuga 'eba yogona nageneye Filikesa yana tutuye i veimea i luku. 15 Tutuyanina a nago Ielusalema me Diu yadi tovelomu 'adi to'edakumetavo wata 'ifwaidi to'edakumeta 'au'auveadi yadi vevita tomogonina faifaina i lu'ivona 'waikuye nuanuadi a na veimea i na wafa. 16 Siwe a vonedi a vo, 'Ima me Loma kebu bani'odi yama sauluvaga. 'Ai'edi tomogo yogoyogonina 'ana tovevita kebu taiadi i na vonayavuga wata kebu 'ama fata 'a na veimea i na wafa. I lubwaineni nagami i na vonayavuga, bega ta na 'asetai i ve'ewa mogitana 'alo i vevekali." 17 A vonedi i na maia de'e bei i na vonayavuga. Tutuyanina i maia kebu a da 'ivogavogana. A 'eno i 'atai a nago 'eba vonayavuga 'waineye a miabui a veimea tomogonina i mieni. 18-19 \*Yaku nuanua a vo 'ana tovevitavo yana sakona fuedi faifaiddi i na lu'ivona siwe i tovoi i vona-'avo'avo yadi tafalolo 'ana veimea faifaiddi wata tamu towafa 'ana wagava Iesu faifaina. Faulo i vonaga tomogonina i yawasa-vaitugana ma yawaina. 20 Yau a venuanaluga bani'odi a na munega bega a na 'aseta-'atumaia nani de'e faifaiddi, faifainanina Faulo a velutolieni a vo, Nuanuamu 'u na nago Ielusalema bei 'u na vonayavuga i vevitamuga faifaina?" 21 \*Siwe Faulo i baila nuanuana i na vonayavuga Sisa mataneyeye. Bega tolugaviavo a vonedi i na 'i'isave'avini vanuga 'eba yogona 'waineye, mulieta a na vetunei Sisa 'waineye." 22 Akalifa i vo, Yau wata nuanuaku

tomogonina bonana a na nogai.” Nika Fesito i vo, 'Awa'awai bonana 'u na nogai.”

*Faulo i tovoi Akalifa ma novuna matadie.*

<sup>23</sup> ✨ I 'atai, Akalifa ma novuna Benaisa i lukuluku vanuga 'eba mia va'auta 'waineye matatabudi i ve'ililibuyedi fai taunina tomogo bwaikina wata ma yana 'ai'aiwabu. Toeva biola 'ifwaidi wata 'ifwaidi tomotoga bwaikidi 'atamananina 'ana to'edakumetavo taiadi i luku. I luku i miabui, mulieta Fesito yana vona i vetunei Faulo i mieni. <sup>24</sup> ✨ Fesito i velamu i veifufu i vo, Kini Akalifa wata 'omi matatabumi taiadi ta maia, side tomogonina me Diu matatabudi de'e bei wata Ielusalema 'waineye faifaina i lu'ivona 'waikuye. Matatabudi i vegolegole i vo, I lubwaineni wafa, kebu nu-anuama taiadi ta na miamia.” <sup>25</sup> Siwe kebu tamu yana sakona bwaikina a da veluagai bega a na veimea i na wafa. Taunina i vonaga nuanuana i na vonayavuga Sisa mataneye, faifainanina a nuani a na vetunei i na nago 'waineye. <sup>26</sup> Fai yana sakona kebu a da veluagai, kebu 'aku fata yana sakananidi faifaidi leta a na kilumi Sisa 'waineye. Begaidi Faulo a mieni, Kini Akalifa matamuye wata matatabumi matamie yana vona ta na nogai mulieta 'aku fata faifaina a na kiluma a na veifufu Sisa 'waineye. <sup>27</sup> Kebu 'ana 'isa 'atumaina 'waikuye 'ai'edi tamu tomogo yogoyogonina a na vetuneimo i na nago Sisa 'waineye kebu yana lamunaga.”

## 26

*Faulo i veifufu Akalifa mataneye.*

<sup>1</sup> Fesito yana vona i 'a'ava, Akalifa Faulo i voneni i vo, A tauyemu 'u na veifufu taunimu faifaimu.” Faulo i velamu ma nimanimana, side bani'odi i veifufuyedi. <sup>2</sup> I vo, Kini Akalifa, a sosoana fai 'asiau a na vonayavuga matamuye naninidi me Diu i vevitakuga faifaidi. <sup>3</sup> Yaku sosoana lamuna fai me Diu yama sauluva wata yama nuanua tulidi tulidi 'u 'asetai'atumaide. Begaidi a velu'ui 'waimuye, 'u na tokemaigemu yaku vona matatabuna 'u na nogaidi.

<sup>4</sup> ✨ Tutuyanina tubuaukuye me Diu matatabudi yaku sauluva i 'asetadi, nagami 'aku tuvadeye mulieta a mai Ielusalema. <sup>5</sup> Yau siaikuye tomogo Diu, siwe Falisi yadi 'aila'a nageneye a miamia yama ve'etoboda matatabuna a veve'ililibuyedi. Nani de'e me Diu fueidi i 'asetai wata 'ai'edi nuanuadi 'adi fata i na veifufuyedi 'waimuye. <sup>6-7</sup> ✨ Basenadiotoga Yaubada i vona'awaufaufa tubumavo 'waidie 'ana Venua'ivina Keliso i na vetunei, bega me Diu

✨ 25:23: Mad 10:18 ✨ 25:24: Fol 22:22 ✨ 26:4: Fol 22:3; Fmi 3:5-6

✨ 26:6-7: Fol 28:20

'ama wauma 12 tutuya matatabuna ma yadi subia wata ma yadi vetumagana vona'awaufaufanina i lulukamaseni. Kini Akalifa, vona'awaufaufanina 'waineye yau wata a vetumagana begaidi me Diu i vevitaku a tovtovoi matamuye. <sup>8</sup> Awale 'omi 'waimie vitana kebu 'ami fata 'wa na vetumagana Yaubada towafa i na sivetovoidiga faifaina?

<sup>9</sup> Basenadi yau yaku nuanua, egavo i vetumagana Iesu tomogo Nasaledi 'waineye, veviga a veveledi. <sup>10</sup> \*Side bani'odi a munemunegidi Ielusalema 'waineye. Tovelomu 'adi to'edakumetavo veimea i veleku bega Iesu 'ana to-dumwebika fuedi a yatoyatodi vanuga 'eba yogona 'waineye, wata i nikenikedi i wafawafa yau 'anigoku i bikabika. <sup>11</sup> \*Yaku veimea 'wainega fuedi i nikenikedi 'eba miava'auta 'waidie, 'ifwaidi a veve'isakololodi nuanuaku yadi vetumagana Iesu 'waineye i na baileni. Wata kamoku i ogaogala a nunago 'ani'ie mali 'awalawa 'waidie veviga a veveledi.”

*Faulo yana nuavilana i veifufuyeni.*

<sup>12</sup> Wata Faulo i vonedi i vo, Fai nuanuaku Iesu 'ana tovetumaganavo veviga a na veveledi, begaidi tovelomu 'adi to'edakumetavo veimea i veleku i vetuneku a na nago Damasiko. <sup>13</sup> Kini Akalifa, 'aiata-'wane'waneye 'a nunago 'ifwaidi tomotoga taiadi, nika 'edeye mageta abamega i mage-sema. Magetanina bwaikaotogina, kebu bani'odi inala yana mageta. <sup>14</sup> Matatabuma 'a be'u fwayefwayeye bona a nogai Diu bonamega i vonavona 'waikuye i vo, Saulo, Saulo awale vita 'u veveleku a veveviga, siwe 'omu wata taunimu veviga 'u vevelemu.” <sup>15</sup> Yau a vo, 'Auvea, 'omu aitoi?” Yaku velutoli 'Auvea i tutuli i vo, Yau Iesu, kumaniku vita 'u veveleku. <sup>16</sup> 'U tovoi. Yau a souyeku 'waimuye bega a na venua'ivinemu yaku tofologa wata yaku tolu'ivona. 'U na nago mali tomotoga 'waidie 'u na lu'ivona 'asiau a souyeku 'waimuye faifaina wata bola tutuya 'ifwaidi 'u na 'iseku faifaina. <sup>17</sup> A na vetunemu mali tomotoga taunidi kebu Diu 'waidie, tomotoganidi wata yamu tomotoga me Diu nuanuadi i na nikemu siwe a na 'i'ita'ita'iemu. <sup>18</sup> \*Tomotoganidi matadi 'u na tolijadi, bega dudubala 'wainega 'u na vagavadi 'u na miedi mageta 'waineye, wata bani'odi Seitani yana toketokena 'wainega 'u na vagavadi 'u na miedi Yaubada 'waineye. Fai i na vetumagana 'waikuye, Yaubada yadi sakona i na nuatavunidi mulieta i na luku yana tomotoga basenadi i venua'ivinediga 'waidie.”

*Faulo yana folova Iesu faifaina i veifufuyeni.*

19-20 ✨Wata Faulo i vo, Kini Akalifa, Iesu yana vona abamega i 'a'ava, kebu a da vedumwe'ai'aieni a vematayakayaka a lau'age me Diu wata mali tomotoga taunidi kebu Diu 'waidie. Nagami a nago Damasiko, mulieta Ielusalema, wata bani'odi a nago 'awalawa matatabuna 'waidie Iudia nageneye. Matatabudi a vonedi yadi sakona i na bailedi, Yaubada 'waineye i na nuaviladi, yadi sauluva i na ve'atumai bega mali tomotoga i na 'isedi i na 'asetai 'akonadi i nuaviladi. <sup>21</sup> ✨Yaku folovanidi faifaidi me Diu i 'ive'aviniku vanuga 'eba velu'ui nageneye wata igodi i da luvewafaku. 22-23 ✨Tutuya fuedi Yaubada i 'i'ita'ita'ieku i maiga 'asiau begaidi a tovoi a lulu'ivona 'omi tomotoga bwaikimi wata tomotoga-'avo'avovo 'waimie. Ava'ai a veveifufuyediga i vesala Mosese wata Yaubada yana tolu'ivonavo yadi vona ta-iadi, vonanidi basenadiotoga i kilumidi bola Keliso Yaubada 'ana Venua'ivina veviga bwaikina i na veluagai i na wafa mulieta kumanina nagami i na tovoi-vaitugana. Wata i kilumi Keliso faifaina i vo, 'Awaie yana lau'age bani'odi mageta me Diu wata mali tomotoga taunidi kebu Diu 'waidie.”

<sup>24</sup> De'e bani'odi Faulo i veveifufuga, nika Fesito bonana bwaikinega i vo, Faulo, 'omu 'u ve'wava'wava. Yamu sikulu bwaikina nuamu i 'ivegaugauya.” <sup>25</sup> Faulo yana vona i tutuli i vo, Fesito 'omu toveimea bwaikimu, yau kebu a da ve'wava'wavaga. Yaku vona tonovina wata nuaku kebu i da lugaugauya. <sup>26</sup> ✨Ava'ai a veifufuyediga 'akonadi Kini Akalifa i 'asetadi begaidi ma yaku venuafoufa'ala 'aku fata a na veveifufu 'waineye. Iesu yana wafa wata yana tovi-vaitugana tomotoga fuedi i 'iseni wata i 'asetai. A nuani naninidi matatabuna 'akonadi i 'asetadi kebu nani givagivana.

<sup>27</sup> Kini Akalifa, 'omu Yaubada yana tolu'ivonavo yadi vona 'u vetumaganedi? A 'asetai 'u vetumagana.” <sup>28</sup> Siwe Kini Akalifa i voneni i vo, Yamu vonanina 'ale'usana 'wainega igodi nuanuamu yaku nuanua 'u na sivilai a na vetumagana Iesu 'waineye.” <sup>29</sup> Faulo i vo, Aigodi, yaku veifufu 'ale'usanega 'alo manamanawena siwe a vevelu'ui Yaubada 'waineye, nuanuaku 'omu wata 'ifwaimi 'asiau yaku vona 'wa noganogaiga, 'wa na vetumagana Iesu 'waineye yau bani'odi a vetumagana, siwe kebu i da lubwainemi tolugavia i na yogonimi yau bani'odi.”

30-31 ✨Faulo yana vona i 'a'ava, Kini Akalifa, Fesito, Benaisa, wata 'ifwaidi tomotoga matatabudi i tovoi i souyedi tanotanoge 'aise'avadi i veifufu i vo, Faulo kebu i da lubwaineni i na miamia vanuga 'eba yogona 'waineye 'alo i na wafa fai

✨ 26:19-20: Fol 9:22,28, 22:21  
24:46-47 ✨ 26:26: Ion 18:20

✨ 26:21: Fol 21:30-31  
✨ 26:30-31: Fol 25:25

✨ 26:22-23: Luk



kebu tamu yana sakona.”<sup>32</sup> Akalifa Fesito i voneni i vo, Tomogo de'e 'ai'edi kebu Sisa i da 'inanaiga, ta da 'etoyavuya, siwe fai nuanuana i na nago i na vonayavuga Sisa 'waineye, 'asa'aiana i na miamia vanuga 'eba yogona 'waineye, mulieta i na nago Loma.”

## 27

### *Faulo i dodoga i nunago Loma.*

<sup>1</sup> Faulo i miamia vanuga 'eba yogona 'waineye, mulieta Fesito i veimea 'a na nagoi\* Loma. Loma tolugaviavo, tamu 'aila'a 'ana wagava 'Aila'a Sisa, 'ana to'edakumeta 'ana wagava Diuliasa. Tomogonina Faulo wata 'ifwaidi tomotoga yogoyogonidi i 'ewadi taiadi 'a na nagoi Loma. <sup>2</sup> Tamu waka 'a veluagai 'atamana Adalamitio 'wainega i mai, sai'afoga i na tauya i na nago 'atamana fueDi Eisia balabalana 'waidiamo. Wakanina 'waineye 'a dodoga wata tamu tomogo Masidonia taiadi 'atamana Tesalonaika 'wainega 'ana wagava Alisitako.

<sup>3</sup> \*I 'atai 'a le'wa 'atamana Saidoni. Diuliasa tomogo 'atumaina, Faulo i tauyeni i nago enavo i na 'isedi wata ava'ai nuanuana i na veleni. <sup>4</sup> Wata bega 'a silakata, fai yagina i vevevilama begaidi Imula Saifilosu wata fwayafwaya bwaikina kamwaneamo 'a nago. <sup>5</sup> 'Awalawa Silisia wata Fami-filia tabwadiamo 'a nago 'a le'wa 'atamana Maila, 'awalawa Lisia nageneye. <sup>6</sup> Bei tolugaviavo 'adi to'edakumeta tamu waka bwaikina i veluagai Alekisanidilia 'wainega i mai i na nago 'awalawa Itali bega matatabuma wakanina 'waineye 'a dodoga 'a nagoi, we'e 'ama 'aila'a 276.

<sup>7</sup> Fai yagina i vevevilama bega kebu 'a da lilidega, ma'inuama 'a nago mulieta 'a le'wa 'atamana Naidasi. Bei kaukau debanagomega i nununuga bega 'a laka 'a nago Salimoni fogeneamo, bei kaukau sai'afo 'a veluagai. <sup>8</sup> Bega Imula Kiliti balabala lilivaneamo 'a nago bei wata yagina i vevevilama begaidi ma'inuama 'a nago 'a le'wa 'Awauku Niwaniwalovina 'waineye 'atamana Lasea lilivaneye.

<sup>9-10</sup> Tutuya manamanawena 'akonadi i 'a'ava kebu i da lubwainema 'a na vaganago fai 'akonadi toalu'u i le'wa, kaukau bwaikina 'ana tutuya. Faifainanina Faulo waka 'ana tofolovavo i vonedi i vo, Ekwavo, a nuani 'ai'edi ta na tauya bola vita ta na veluagai malaveseye waka wata kukua i na 'ivesakodi, wata 'ifwaida ta na monu.”<sup>11-12</sup> Faulo yana nuanuananina i veifufuyeniga tolugaviavo 'adi to'edakumeta kebu i da awave'atumaigeniga. 'Eba lukunina kebu 'atumainaga kaukau 'ana tutuye begaidi tomotoga fueDi nuanuadi sai'afo 'a na vaganago 'ai'edi 'ama fata 'a da

\* **27:1:** Luke taiadi i nagoi. ☆ **27:3:** Fol 24:23

le'wa Finikisa, bei tamu 'awauku Imulanina Kiliti 'waineye. 'Awaukunina 'atumaiotogina fai kaukau 'ana tutuye yagina kebu 'ana fata i na luku. Begaidi tolugaviavo 'adi to'edakumeta toniwaka wata wakanina 'ana to'isave'avina yadi nuanua i fali'atumaieni.

*Kaukau wata yagina waka i beweni.*

<sup>13</sup> 'Awaukunina 'waineye 'a luku bei 'a miamiani, nika kaukau sai'afo i nunuga bolimanayega, waka 'ana tofolovavo yadi nuanuananina i veveifufuyeniga nuanuadi 'a na tauya 'a na nago Finikisa. Bega lomu i yo'ei naya i silakai balabala lilivaneamo 'a nago. <sup>14</sup> 'A balabala nika tamu kaukau bwaikina i yagiobuma 'oyayega. Kaukaunina 'atagiega i nunuga, yavalata bolimana kamwadie. <sup>15</sup> Kaukau naya i 'onai, waka i yagivekenai kebu 'ama fata debanagomega 'a na nago bega waka i vivieni i bewemamo. <sup>16</sup> I bewema 'a nago imula siaina 'ana wagava Koda dibunega bei sai'afo i velubabalema bega waka siaina 'a dikwadikwaniga 'a tokemaigema 'a silakai i laka tabwaneye 'a sifwasefwaseni. <sup>17</sup> I 'a'avana waka bwaikina i fania bulavayega bega yagina kebu waka i na tufuai. Waka 'ana tofolovavo i kololo waka i na tula faifaina 'awalawa Libia 'waineye bega naya i siobuyeni kaukau i bewemamo 'a nago. <sup>18</sup> I 'atai kaukau wata yagina bwaikaotogidi waka i lusakosakoi begaidi kukua i vedodogidiga i veavuledi. <sup>19</sup> Wata 'awa'awaie yagina i vebwaika-'afo'afo waka taunina 'ana kukua wata i veavuledi. <sup>20</sup> 'Aiata fuedi nagedie kaukau bwaikina i nununuga kebu 'ama fata 'ubwana wata inala 'a na 'isedi bega 'a bavu, kebu 'a da 'asetaiiga ava'aibe 'a nunago. Yama nuanua matatabuna i ve'ale'usa 'a vo, Kebu ta na ve'atumaiga, mogitana ta na wafa."

<sup>21</sup> ✧Tutuya manamanawena kebu tamu aitoi i da 'ani, mulieta Faulo i tovoi matameye i matawa'ulidi i vo, 'Wa 'iseni, bonaku 'wa taweniga. Ta da miamiaga Imula Kiliti, 'ako kebu vita de'e ta da veluagai wata kukua i da 'eno'eno 'atumaidei." <sup>22</sup> Wata Faulo i tolinuavatuvatudi i vo, Kebu 'wa na kolologa, waka mogitana i na tuweaweali we'e kebu tamu aitoi 'waidega i na wafaga. <sup>23-24</sup> ✧Lovane yaku Yaubadanina kumanina a subisubiaiga, tamu yana anelose i souyeni 'waikuye i voneku i vo, Faulo, kebu 'u na kolologa. Yaubada nuanuana 'u na vonayavuga Loma yadi toveimea bwaikaotogina mataneye wata 'akonadi i vesauluva-'atumaiemu emwawonidi taiadi wakeye 'wa dodoga kebu tamu aitoi i na wafa." <sup>25</sup> Ekwavo, 'wa na tokemaigemi. A vetumagana ava'ai Yaubada i vonekuga, bani'odi i na souyeni. <sup>26</sup> ✧Siwe bola tamu imula 'waineye ta na tula."

*Waka sai'afo i le'wa balabala lilivaneye.*

<sup>27</sup> 'Aiata 14 nagedie kaukau bwaikina i nununuga i bewebewema Eyaga Mediteleniani 'waineye. Lovananina 'ana utukamwane waka 'ana tofолоvavo i nuani 'akonadi 'a le'wale'wa fwayafwaya lilivaneye. <sup>28</sup> Awana i 'etowavai 'eba 'etowavayega i 'iseni 'ana vemanawe 40 mita. I yo'ei 'a vaganago wata i 'avalainani i 'iseni 30 mita bega i 'asetai 'akonadi 'avala lilivaneye. <sup>29</sup> Waka 'ana tofолоvavo i kololo kileuye 'a na tula faifaina, begaidi lomu matatabuna 4 i tawedi waka mulineye bega waka i sive'avini, wata i velu'ui yadi yaubada-vekavekali 'waidie 'atai-matayo'o faifaina. <sup>30</sup> Siwe 'ifwaidi nuanuadi i na dega bega waka siaina i siobuyeni igodi i da obu yadi vaiseba i vo, Wata lomu 'ifwaidi 'a na tawedi fogenega." <sup>31</sup> Faulo yadi nuanua 'akonadi i 'asetai begaidi tolugaviavo wata 'adi to'edakumeta taiadi i vonedi i vo, 'Ai'edi no'o tomotoganidi i na dega, 'omi fuemi 'wa na wafa." <sup>32</sup> Begaidi tolugaviavo waka siaina 'ana bulava i kinidabai i beweni.

<sup>33</sup> Sai'afoga tutuya i na fuai Faulo matatabudi i lukakadedi 'ani faifaina i vo, Wakeye ta mimai 'aiata 14 nagedie kebu tamu sai'afo 'wa da 'anitonova. <sup>34</sup> ✧A vonevonemi 'wa na 'ani bega 'wa na vetoketoke. Tutuyanina ta na obuobu 'avale, kebu tamu ava'ai i na 'eto'wa'imi, matatabumi 'atumai'avami." <sup>35</sup> Faulo yana vona i 'a'ava, 'ani'ani i 'ewai, matadie i vekaiwa Yaubada 'waineye i 'ivivia i 'ani. <sup>36</sup> Matatabudi Faulo i 'iseni nuafoudi i watu begaidi i 'ani. <sup>37</sup> 'Ama 'aila'a matatabuma 276. <sup>38</sup> Matatabuma 'a 'ani kamoma i aidi. 'Ani i 'a'ava, nuanuadi waka i na safaila begaidi witi basenadi i vedodogidiga matatabuna i veavuledi eyage.

*Waka i tula.*

<sup>39</sup> I 'atai, waka 'ana tofолоvavo balabala i 'isanaweni siwe kebu i da 'isa'inanai. Nidula i 'iseni 'awaukuye nuanuadi bei yagina i da bewema i da lulakavema nidule 'ai'edi 'ana fata. <sup>40</sup> Bega lomu 'adi bulava i tudabadi i bailedi eyaga nageneye i 'eno'enovi, wata wayaisi i siobuyedi we'e fogeneye naya i silakai bega 'ai'edi 'ana fata kaukau waka i na beweni 'a na obu balebaleye. <sup>41</sup> Siwe waka bwaikina bega i lilide i nago tamu nidula malaveseye bei i tula wata i toke fogena i vet-ufadualeni nidulanina 'waineye. Fai yagina bwaikaotogidi waka mulina i tugeugeuya.

<sup>42</sup> Tolugaviavo yadi nuanua, nuanuadi tomotoganidi yoyogonidi matatabudi i na luvewafadi bega kebu tamu aitoi i na kayo i na obu 'avale i na dega. <sup>43</sup> Siwe tolugavianidi 'adi to'edakumeta nuanuana Faulo i na 'ita'ita'ieni begaidi

i talabodebodedi wata matatabuma i vonema i vo, Egavo kayokayomi nagami 'wa na sou 'wa na kayo 'wa na obu balebaleye. <sup>44</sup> ✧ We'e 'ifwaimi kayo bavubavumi deu 'wa na 'ewadi bega 'wa na kayo." Side bani'odi 'a munega bega matatabuma 'atumai'avama.

## 28

### *Faulo ma enavo Imula Melita 'waineye.*

<sup>1</sup> Matatabuma 'atumai'avama 'a laka 'avale, we'e imulanina 'ana tomotoga i vonema imula 'ana wagava Melita. <sup>2</sup> I vekaiwa 'waimeye wata ma yadi nuakalikali i 'ivaisema bwaikina. 'Wei i le'wa fuema 'a vekaukau begaidi faifaima 'ai i levai. <sup>3</sup> Faulo 'ai'weu'weu ma 'itavina i mieni matatabuna i silakaveni 'ai meaneye 'o'olo kasikasisina i 'alavesouya Faulo nimaneye i 'aiova kebu i da 'anita'ia i fwata-vagata. <sup>4</sup> Imulanina 'ana tomotoga i 'iseni 'o'olo i fwata-vagata 'aise'avadi i vona i vo, Vona mogitana Faulo basenadi tamu tomogo i luvewafai. I lubwaineni i da wafa wakeye, siwe i dega, begaidi tamu yada yaubada 'ana wagava Feiti de'e bei i na luvewafai." <sup>5</sup> ✧ Faulo 'o'olo i luitaleni 'ai i 'alai siwe kebu tamu ava'ai i da vaia. <sup>6</sup> ✧ Tomotoganidi Faulo i 'ise'iseni i vo, Tomogona matatabuna i na tubuga 'alo i na 'aniuliulia i na wafa." Tutuya manamanawena i 'ise'iseni nika 'atumai'avana bega yadi nuanua i sivilai i vo, Tomogonina no'o tamu yaubada."

<sup>7</sup> Imulanina 'ana tomotoga 'adi to'edakumeta bwaikina 'ana wagava Fabilisi yana tanoga kebu 'ani'iega bei 'a vevevalaga 'wainega. I mai i vekaiwa 'waimeye bega i vagavaima 'a nagoi yana vanuge 'a miamiani 'aiata 'aitonu nagedie i 'lisave'avinima. <sup>8</sup> Fabilisi tamana i viga kamotaitaina i 'iveyaviyavia. Faulo i luku yana tududabeye i velu'ui faifaina wata nimana i yatoi 'waineye i veagiagi. <sup>9</sup> Toviga matatabudi imulanina 'waineye vala i nogai i maia Faulo 'waineye i 'ive'atumaiddi. <sup>10</sup> Yadi nuakalikali nani fuedi i velema wata tutuyanina yama dodoga 'waineye 'ifwaidi wata i velema 'ama 'ibua.

### *Melita 'wainega Faulo ma enavo i tauya i na nagoi Loma.*

<sup>11</sup> Weta'i 'aitonu nagedie 'a miamiani Imula Melita 'waineye, mulieta 'a dodoga tamu waka 'ana wagava Yaubadavo-Natulugaluga 'waineye. Wakanina basenadi Alekisanidilia 'wainega i mimai nika kaukau 'ana tutuya i veluagai bei i tutubodeni i mia-vagata. <sup>12</sup> 'A silakata 'a nago 'a le'wa 'atamana Silakusa, Imula Sisili 'waineye bei

'a miamiani 'aiata 'aitonu. <sup>13</sup> Wata bega 'a silakata 'a nago 'a le'wa 'atamana Litiami 'a 'eno. I 'atai kaukau i nunuga bolimanayega wata bega 'a silakata 'aiata 'ailuga 'a nunago mulieta 'a le'wa 'atamana Futoli. <sup>14</sup> Bei tovetumaganavo 'ifwaidi 'a veluagadi nuanuadi taiadi 'a na miamiani wiki 'aitamogana, mulieta 'a tauya 'a na nagoi Loma. <sup>15</sup> Emavo tovetumaganavo Loma 'waineye valama i nogai i maia i yogo'ede'edema. 'Ifwaidi 'a veluagadi 'eba sivedavedamana 'waineye Afiasi, wata 'ifwaidi tamu 'atamana 'waineye, Vanuga Wakawaka 'Aitonu. Tutuyanina Faulo i 'isedi ma yana sosoana i vekaiwa Yaubada 'waineye.

*Faulo i le'wa Loma.*

<sup>16</sup> Tutuyanina 'a le'wa Loma, tolugaviavo 'adi to'edakumeta Faulo i tauyeni i na mia'eni, siwe tamu tolugavia i na 'i'isave'avini.

<sup>17</sup> 'A miamiani 'aiata 'aitonu, mulieta Faulo nuanuana i na veifufu me Diu 'adi to'edakumetavo 'waidie. Vala i vetunei 'waidie matatabudi i va'auta 'waineye taiadi i veifufu i vo, Ekwavo, basenadi me Diu i miamianiga Ielusalema i 'ive'aviniku i 'aniveleneku me Loma 'waidie, siwe kebu tamu sakona a da 'idewai yada tomotoga 'waidie wata kebu tamu yada sauluva tubudavo 'waidiega a da geuya. <sup>18</sup> ✧Loma gabemani i velutolitolieku nuanuadi i da 'etoyavuku fai kebu tamu sakona i da veluagai 'waikuye bega i na luvewafaku. <sup>19</sup> Siwe me Diu i baila kebu nuanuadi i na 'etoyavuku begaidi me Loma gabemani a vonedi nuanuaku a na vonayavuga Sisa mataneye. Yada tomotoga me Diu i vevita-maimaigiku siwe kebu a da nuasako 'waidie wata kebu nuanuaku yadi vevita a na tutuli. <sup>20</sup> ✧Me Isileli fueda ta vetumagana Yaubada 'ana Venua'ivina i na vetunei faifaina 'wa lulukamata, yau wata bani'odi a vetumagana, faifainanina i yogoniku de'e bulava kainumu 'wainega.” <sup>21</sup> To'edakumetanidi Faulo yana vona i tutuli i vo, Emavo Iudia 'waineye i miamiani kebu tamu leta i da vetunei 'waimeye 'omu faifaimu, wata 'waidiega kebu tamu aitoni i da mai valamu i da veifufuyeni 'waimeye 'alo i da awavesakoyemu. <sup>22</sup> Siwe nuanuama 'u na veifufu 'waimeye bega yamu nuanua 'a na 'asetadi fai 'a nogai 'omi Iesu yana 'Aila'a tomotoga fuedi i awaobuobuyemi.”

<sup>23</sup> Bega tamu 'aiata i venua'ivineni tomotoga fuedi i souyedi ava'aibe bei Faulo i miamia 'waineye. Faulo i veifufu wata i kiavemageta Yaubada yana veimea tomotoga 'waideye faifaina, 'awa'awaiega i nago i lovani. Nuanuana fuedi i na vetumagana Iesu 'waineye begaidi vona 'ifwaidi Yaubada yana Buki 'wainega i voneyedi. Vonanidi i maia Mosese wata

'ifwaidi Yaubada yana tolu'ivonavo 'waidiega. <sup>24</sup> Tomotoga 'ifwaidi yana veifufu i nogai i vetumagana Iesu 'waineye, we'e 'ifwaidi kebu i da vetumagana i baila. <sup>25-28</sup> ✧Yadi tauya 'waineye taiadi i ve'ikwayekwayega begaidi Faulo i vonedi i vo, Basenadiotoga 'Anu'anunu 'Atumaina i vona mogitana tubudavo 'waidie 'omi tobailanimita faifaimi. Tamu Yaubada yana tolu'ivona 'ana wagava Aisea i 'ivaiseni bega i kilumi i vo,

'U na nago me Diu 'u na vonedi 'u na vo,

Tomotoga de'e nuadi tabodadi,

Tanigadi i 'ibodadi

Bega kebu i na nogai.

Matadi i 'uludi

Bega kebu i na 'iseni.

'Ai'edi nuadi i da magetaiga

I da nuaviladi 'waikuye

A da 'ive'atumaidi.

Begaidi i na nogaya-wayoga, kebu nuadi i na magetadi.

Wata i na 'isa-wayoga siwe kebu i na 'isa'inanaiga.”

Wata Faulo i vonedi i vo, Fai 'omi me Diu fuemi 'wa baila, nuanuaku 'wa na 'asetai Yaubada nuanuana mali tomotoga taunidi kebu Diu i na 'ita'ita'iedi. 'Ita'ita'i valana 'akonadi i vetunei 'waidie, taunidi i na nogai i na vetumagana.” [29 Faulo yana vona i 'a'ava, me Diu i sousouyedi, tauni'avadi i veve'ikwayekwayega Faulo yana veifufu faifaina.]

<sup>30</sup> Malamala 'ailuga nagedie Faulo i miamia tamu tomogo yana vanuga 'waineye i tututula, wata egavo 'ana veba'wa faifaina i mimia ma yana sosoana taiadi i veveifufu. <sup>31</sup> Ma yana venuafoufa'ala i lalau'age Yaubada yana veimea tomotoga 'waideye faifaina, wata i veve 'waidie Toveimea Iesu Keliso faifaina, kebu tamu aitoi i da tatalabodeni.

'Asa'aiana bani'odi,

Yau Luke.

## LOMA

### Faulo yana kiluma me Loma 'waidie.

De'e leta Faulo i kilumi tovetumaganavo i miamianiga Loma faifaidi. Tutuyanina Faulo i miamia Kolinita, buki de'e i kilumi, mulieta tamu vavine 'adi wagava Fibi i veledi i naweni 'atamana Loma, 'awalawa Itali nageneye. Bei Loma toveimea bwaikaotogina i miamia 'ana wagava Sisa. 'Atamananina 'ana wagava bwaikina.

Faulo nuanuana i na ve 'waidie, tomotoga matatabuda ta sakona Yaubada mataneye, siwe kebu 'ada fata ta na ve'atumai yada folova 'alo yada sauluva 'atumaidi 'waidiega. 'Ai'edi ta na vetumaganamo Iesu Keliso 'waineye, Yaubada i na 'ive'atumaida wata yada sakona i na nuatavunidi.

Faulo nuanuana i na nago Loma, tovetumaganavo bei i miamianiga i na kiavetoketokedi yana lau'age 'waidiega. Tove-tumagananidi 'ifwaidi me Diu we'e 'ifwaidi me Guliki. Letanina nageneye Faulo yana nago wata 'ana 'aivaita faifaidi i veifufu. De'e letanina 'ana 'idi side bani'odi.

Vona-vekaiwa wata leta de'e inagena 'ana nuanua. 1:1-17

Tomotoga fueda tosakona bega Yaubada yana vematavu-loga ta na veluagai. 1:18-3:20

Kebu 'ita'ita'i ta da veluagai ve'etoboda 'adi vematayakayaka 'waidiega, we'e mogitana Keliso 'ana vetumagana 'wainega. 3:21-4:25

Miave'itubama Keliso taiadi 'wainega mia 'ivauna wata miamia-vagaina ta na veluagai 5:1-8:39

Me Isileli tovedumwe'ai'ai siwe 'awaie Yaubada i na veviladi yana 'Aila'a 'waineye. 9:1-11:36

Sauluvanidi 'ida tovetumagana 'ada laubwaina faifaina. 12:1-15:13

Faulo yana nuanua, yana 'alanuai, wata yana velu'ase'ase. 15:14-16:27

<sup>1</sup> \*Ekwavo, yau Faulo, Iesu Keliso yana tofolova, a vekaiwa 'waimie. Basenadi Yaubada i venuma'ivineku veimea i veleku a vetomata'aulele Valana 'Atumaina faifaina. <sup>2</sup> Valanina 'Atumaina faifaina basenadiotoga i vona'awaufau, yana tolu'ivonavo i kilumi yana Buki nageneye. <sup>3-4</sup> \*Valanina Natuna faifaina, taunina 'ada Toveimea Iesu Keliso i vetomotogaotoga i tubuga Kini Devida 'ana wauma 'wainega. Tutuyanina i wafaga, Yaubada i sivetovoia bega yana tovi-vaitugana 'wainega i veda taunina mogitana Yaubada Natuna wata 'anu'anunu magemagetana ma yana toketokena. <sup>5</sup> \*Yaubada yana veimea 'wainega,

Kelisonina ma yana nuakalikali i tauyema 'a vetomata'aulele faifaina, bega yama folova 'wainega tomotoga 'aila'a tulina tulina 'waidiega 'ifwaidi i na vetumagana 'waineye wata i na vematayakeyakeni nika 'ana wagava i na vebwaika. <sup>6</sup> 'Omi tovetumagananimi Loma 'waineye taunidi ma fuemie Yaubada i venuma'ivinemi bega 'omi Iesu Keliso yana tomotoga.

<sup>7</sup> Bega a kilukiluma 'omi 'wa miamianiga Loma 'waimie, 'aila'aniami Yaubada i nuakalikaliemi wata i venuma'ivinemi bega 'omi yana tomotoga mogitana.

A vevelu'ui faifaimi, nuanuaku Tamada Yaubada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie wata nuanua bikadi mia 'atumaina taiadi i na velevelemi.

*Faulo nuanuana tovetumagana Loma 'waineye i na fogedi.*

<sup>8</sup> \*Nagami faifaimi a vekaiwa Yaubada 'waineye Iesu Keliso 'ana wagavayega, fai 'wa vetumaganaga Iesu Keliso 'waineye bega tomotoga fuedi 'awalawa matatabuna 'waidiega valami i 'asetai. <sup>9-10</sup> \*Yaubada i 'asetaku mogitana tutuya fuedi yaku velu'ui 'waidie a nuanuanimi. Yaubadanina 'waineye tauniku a tauyeku mogitana a vetofolova bega Natuna Valana a lulu'ageyeni. Wata a vevelu'ui nuanuaku 'ai'edi tutuya de'e 'waineye Yaubada nuanuana, i na tauyeku 'aku fata a na wai 'waimie. <sup>11</sup> Nuanuaku bwaikina a na wai a na 'isemi bega tamu nuakalikali 'wa na veluagai 'Anu'anunu 'Atumaina 'wainega, nuakalikalinina yami vetumagana i na kiavetoketokei. <sup>12</sup> Yaku nuanuananina side bani'odi, yada vetumagananidi 'waidiega ta na ve'ivaivaita.

<sup>13</sup> Ekwavo, nuanuaku 'wa na 'asetai tutuya fuedi igodi a da viwai nika nani 'ifwaidi i velubodebodeku. Nuanuaku a da folofolova 'awasasamie bega yaku folovanina 'wainega vuaga a da 'iseni 'ifwaidi i da vetumagana Iesu Keliso 'waineye, bani'odi basenadi a folova mali tomotoga taunidi kebu Diu 'waidie nika i vetumagana.

<sup>14</sup> Fai folovanina Yaubada i veleku, i lubwaineku a na lalau'age tomotoga matatabuna 'waidie Iesu Keliso faifaina. Vona mogitana, 'atamana bwaikidi 'adi tomia wata kweda 'adi tomia 'waidie, taunidi ma yadi 'aseta wata taunidi kebu i da sikulu, matatabudi 'waidie a na lalau'age. <sup>15</sup> Wata bani'odi i lubwaineku nuanuaku bwaikina Iesu Valana 'Atumaina 'omi wata 'wa miamianiga Loma, 'waimie a na lau'age.

*Keliso Valana 'Atumaina toketokena.*

<sup>16</sup> \*Valananina 'Atumaina faifaina kebu a da ve'awamayamaya, fai kebu nani mweanaga. Valanina Keliso faifaina Yaubada yana 'eda'eda toketokena, egavo i



na vetumaganeni i na 'ita'ita'iedi sakona 'waidiega. 'Ima me Diu nagami Valanina 'a nogai, mulieta mali tomotoga taunidi kebu Diu. <sup>17</sup> ✱Keliso Valananina 'wainega Yaubada i veveda taunina tomotoga i 'ive'atumaida yada sauluva i tonova mataneye, siwe vetumagana'ava 'wainega. Avinodi 'ida tosakona, fai ma yada vetumagana taunida ta tauyeda Keliso 'waineye bega Yaubada i awave'atumaieda. 'Ada 'ive'atumai Yaubada mataneye faifaina basenadiotoga i kilumi Yaubada yana Buki 'waineye i vo,

Egavo yadi vetumagana 'wainega yadi sauluva i na tonova Yaubada mataneye,

Mia 'atumaina wata miamia-vagaina i na veluagai.”

*Tomotoga matatabuda ta sakona Yaubada mataneye.”*

<sup>18</sup> ✱Yaubada abame yana nuasako tosakona faifaiddi 'akonadi i veda. Fai tomia fwayafwaya fuedi Yaubada i vevedumwe'ai'aieni wata sakona tulina tulina i 'i'idewadi 'adi vematavuloga i na veluagai 'wainega. Yadi sakananidi 'waidiega Yaubada yana nuanua tonovidi i tatalabodedi tomotoga 'ifwaidi 'waidiega. <sup>19</sup> ✱Yaubada vematavuloga i veveleledi fai ava'ai nuanuana tomotoga i na 'asetai taunina faifaina mageseye, kebu i da givediga, taunina i sivemagesedi. <sup>20</sup> I sivemagesediga yana 'idewadewa 'waidiega fai fwayafwaya 'ana 'idewavau 'wainega i maiga 'asiau Yaubada yana toketokena i 'eno-vagata wata yana sauluva magemagetadi tomotoga i 'asetadi. Kebu 'adi fata Yaubada i na 'isaotogi siwe 'ana 'idewadewa i da 'isedina nika i da 'asetai taunina mogitana Yaubada toketokena bega kebu 'adi fata i na bavuseba i na vo, 'Ima bavubavuma bega 'a sakosakona.”

<sup>21</sup> ✱Vona mogitana Yaubada i 'asetai, i lubwainedi i da subisubiai wata i da vevekaiwa yadi Yaubada 'waineye, siwe fai i baila bega nuadi 'anigaugaudi, nua'avadi wata nuadi dududubalidi. <sup>22</sup> Yadi vona 'adi nogaya 'wa da vo 'ase'asetadi, we'e mogitana kebu ma yadi 'asetaga. <sup>23</sup> ✱Yaubada Miamia-vagaina wata Magemagetana i da subisubiaiga i baileni, taunidi 'adi 'idewadewa 'waidie i 'odu'odu. Yadi 'eba 'odunidi kumaea, 'adi 'isa'isa tomotoga siwe kebu i na mia-vagata, manuga, 'aisaya wata 'aisaya daledaledi.

<sup>24</sup> Fai tomotoga i baila Yaubada, nani-'avo'avovo 'waidie i 'odu'odu, begaidi Yaubada i baila i tauyedi bega ava'ai sauluvaga sakoidi nuanuadi i 'i'idewadi. Sauluvanidi bunu 'ana nuanua 'eba bunumayaga, tauni'avadi tomogodiega i sakosakona. <sup>25</sup> Yaubada 'ana 'asetai i baila, ma'itufa taunidi i

tauyedi nani-vekavekali 'waidie. Yaubada 'ana 'idewadewa 'waidie i 'odu'odu we'e mogitana i lubwaineda tomotoga matatabuda Yaubada 'ada to'idewadewa ta na subisubiai kebu ta na 'ailove. Vona mogitana, yaku nuanua bani'odi.

<sup>26</sup> Fai tomotoga nuanuadi sakona, Yaubada i baila i tauyedi bunu 'ana nuanua 'eba bunumayaga 'waidie. Wata vevine bani'odi, sauluvanidi i lubwainediga i baila, vevine'ava i lu'avo'avovo. <sup>27</sup> ✧ Wata bani'odi iaveta nagi i baila, nuanuaotogidi iaveta'ava i na lulu'avo'avovo. Iaveta'avadi i sakosakona 'eba bunumayaga bwaikaotogina, begaidi vematavuloga i veveluagai tomogodi wata nuadi 'waidie. Vematavuloganina i lubwainedi, yadi sauluva sakoidi 'adi tula.

<sup>28</sup> Wata fai Yaubada 'ana 'asetai mogitana 'waidie i venani'avo'avovo kebu nuanuadi faifaina i na nuanua, bega Yaubada i tauyedi nua'anigaugau 'waineye kebu 'adi fata i na venua'ivina-'atumai. Nuadi i lulugaugaudiga, sauluvanidi kebu i da lubwainediga i 'i'idewadi. <sup>29-31</sup> Sakona tulina tulina nuadi i 'ewadi, bani'odi kukua 'adi nuanua 'waidie i vebwaika, bunu 'ana nuanua sakoidi nuadi i 'ewai, i veve'unumagigi, i luluwewafa, i veveta'ata'ala, i vevekali, wata i totolive'eda nuanuadi vita i na veveluagadi. Wata i vevebonaivo, i awavesako, Yaubada i vevedumwe'ai'aieni, i manimanini-'avo'avovo, i nunualaka, wata taunidi i awa'ai'aidi. Tutuya fuedi nani sakoidi 'adi nuanua 'waidie i vevebwaika, tamadiavo wata inadiavo yadi veimea kebu nuanuadi, yadi nuanua 'oka'okadi, yadi vona'awaufaufa i geugeudi, kebu i da nunuakalikali wata kebu i da 'i'isanuakalikali. <sup>32</sup> Yaubada yana veimea i 'eno'eno, tomotoga bani'odi i na vesauluvediga i lubwainedi i na wafaotoga. Veimeanina i 'asetai siwe wata i 'i'idewadi. Mogitana i sakona siwe yadi sakona i vebwaika-'afo'afo, fai mali tomotoga bani'odi i na sakosakonaga i na 'isedi i na awave'atumaiedi.

## 2

*Tomotoga matatabuda ta na vonayavuga Yaubada mataneye.*

<sup>1</sup> Ekwavo, voke 'wa vonavona 'wa vo, Tomotoganidi mogitana tosakona, vematavuloga i na veluagai Yaubada 'wainega." Siwe 'omi wata tomotoganidi bani'odi 'wa sakosakona, 'wa awavesakoyediga nika 'asa'aiana taunimi 'wa awavesakoyemi, 'awaie kebu 'ami fata 'wa na ve'ewa yami sakonanidi faifaidi Yaubada mataneye. <sup>2</sup> Ta 'asetai Yaubada i lubwaineni i na veimea tomotoga vematavuloga i

na veluagai sauluvanidi sakoidi faifaidi. <sup>3</sup> Ekwavo, 'omi tomotoga 'ifwaidi 'wa awavesakoyedi yadi sakona faifaidi, siwe 'omi wata bani'odi 'wa sakosakona, kebu tamu sai'afo 'wa na dega Yaubada yana vematavuloga 'wainega. <sup>4</sup> 'Akonadi i 'isanuakalikaliami, i tokemaiga kebu i da tutula-matayo'o 'waimie yami sakona faifaidi. 'Alo yana nuakalikalini i venani-'avo'avovo 'waimie? I lubwainemi 'wa da 'asetai Yaubada ma yana nuakalikalii i lulukamasemi, nuanuana 'wa na nuavilami yami sakona 'waidiega.

<sup>5</sup> Siwe 'omi 'wa baila, kebu nuanuami 'wa na nuavilami begaidi taunimi 'ami vematavuloga 'wa 'ivebwaika'a'avai. We'e Vonayavuga 'ana 'Aiata 'waineye Yaubada yana veimea tonovina 'wainega ma yana nuasako tosakona matatabudi i na vematavulogidi, bei mogitana 'ami tutula 'wa na veluagadi. <sup>6</sup> ☆'Wa na veluagadiga fai 'aiananina 'waineye tomotoga matatabuda tutula ta na veluagai Yaubada 'wainega, yada sauluva 'adi 'isa'isa bani'odi. <sup>7</sup> Tomotoga 'ifwaidi tutuya fuedi i vevesauluva 'atumaina nuanuadi Yaubada i na awave'atumaiedi, nuanuadi 'ai'aiwabu i na veluagai 'wainega, wata nuanuadi taiadi i na mia-vagata. Tomotoganidi Yaubada mia 'atumaina wata miamia-vagaina i na veledi. <sup>8</sup> ☆We'e tomotoga 'ifwaidi taunidi 'aisedi faifaidi i nuanua, nani tonovidi i baila we'e sakona nuadi i 'ewai, tomotoganidi Yaubada yana nuasako kasikasisinega i na vematavulogidi. <sup>9</sup> Tomia fwayafwaya matatabudi i sakosakonaga veviga wata 'we'wela i na veluagai, mogitana me Diu, siwe wata mali tomotoga taiadi. <sup>10</sup> We'e tomia fwayafwaya matatabudi i vevesauluvaga 'atumaina, Yaubada i na awave'atumaiedi, 'ai'aiwabu i na veledi, wata nuanua bikana mia 'atumaina taiadi i na veluagai 'wainega, mogitana me Diu, siwe wata mali tomotoga taiadi. <sup>11</sup> ☆Mogitana Yaubada de'e bani'odi i na veimeyeda, kebu i na lau'idi, me Diu wata mali tomotoga matatabuda ta vesala mataneye.

<sup>12-15</sup> ☆We'e mali tomotoga taunidi kebu Diu Yaubada yana ve'etoboda i maiaga Mosese 'wainega kebu i da 'asetadiga, siwe 'ai'edi i na sakonaga i na wafaotoga. Yaubada kebu i na veimeyedi ve'etobodanidi kilukilumidi 'waidiega fai kebu i da 'eno'enoga 'waidie, siwe fai yadi nuanua 'waidie Yaubada yana ve'etoboda i 'eno'enovi, i na geugeudiga vematavuloga i na veluagai. 'Ai'edi taunidi yadi nuanua 'waidiega yadi sauluva wata Yaubada yana ve'etoboda kilukilumidi taiadi i na vesalaga, ta 'asetai ve'etobodanidi yadi nuanua 'waidie i 'eno'enovi. 'Ai'edi tamu sauluva sakoina i na 'idewaiga, 'adi vebae 'wainega i na 'asetai 'akonadi i sakona, we'e 'ai'edi

tamu sauluva 'atumaina i na 'idewaiga, 'adi vebae 'wainega i na 'asetai kebu i da sakonaga, yadi sauluva tonovidi. Fai 'adi fata de'e bani'odi i na vebaedi, 'eba 'isa Yaubada yana ve'etoboda i 'eno'enovi nuadie.

We'e me Diu, Yaubada yana ve'etoboda kilukilumidi i 'eno'enovi 'waidie. 'Ai'edi i na sakonaga Yaubada i na veimeyedi ve'etobodanidi 'waidiega vematavuloga i na veluagai. Egavo Yaubada yana ve'etoboda i na nogaidi siwe kebu i na vematayakeyakediga, kebu i na ve'atumai mataneyeye, we'e egavo ve'etobodanidi i na 'i'idewadiga Yaubada i na 'ive'atumaidi. 'Ai'edi tamu aitoi ve'etobodanidi matatabuna i na vematayakeyakediga Yaubada i na vo, Tomogonina yana sauluva tonovidi matakuye.”<sup>16</sup> ✧Bei Vonayavuga 'ana 'Aiata 'waineye Yaubada Iesu Keliso i na voneni tomotoga matatabuda yada sauluva wata yada nuanua givagivadi faifaidi ta na vonayavuga mataneyeye i na veimea vematavuloga faifaina. Naninidi a lulu'ageyedi Keliso Valana 'Atumaina 'wainega.

*Ve'etoboda Mosese 'wainega i maiaga me Diu kebu i da vematayakeyakediga.*

<sup>17</sup> We'e 'omi me Diu a na vonemi. Taunimi 'ami wagava 'wa awa'ai'aia 'wa vo, 'Ima me Diu, 'a tauyema Yaubada yana ve'etoboda 'waidie, wata 'ima yana tomotoga mogitana 'a veiana taiadi.”<sup>18</sup> Yaubada yana nuanua 'akonadi 'wa 'asetai ve'etobodanidi 'waidiega, bega 'ami fata 'wa na venua'ivina-'atumai ava'aibe sakona, 'alo ava'aibe sauluva 'atumaina. <sup>19</sup> Wata 'wa vo, Egavo Yaubada i bavuyeniga i miamiani dudubala 'waineye, 'ima 'adi tove. Yadi nuanua dududubalidi 'a kikiavemagetadi.”<sup>20</sup> Tutuya fuedi tobavu 'wa awave'ede'ededi wata egavo yadi nuanua bola mweamweadi yavayavava bani'odi 'waidie 'wa veve. Yami nuanua 'wa vo, Fai Yaubada yana ve'etoboda 'waimeye, nani matatabuna 'a 'aseta-'atumaidi wata naninidi 'a vonevoneyediga, vona mogitana.”<sup>21</sup> Mali tomotoga 'waidie 'wa veve, we'e kebu 'wa da vo, Taunima 'a na ve 'waimeye.” 'Wa lalau'age 'wa vo, Kebu 'wa na vainagoga,” we'e 'omi 'wa da nuani, 'wa vavainago? <sup>22</sup> 'Wa vonavona 'wa vo, Kebu 'wa na sakonaga bunu 'ana nuanua 'waidie,” we'e 'omi 'wa da nuani, bani'odi 'wa sakosakona? Kumaea 'waidie tomotoga i 'odu'odu 'wa 'ise'isedi 'wa veve'eduogaogala siwe 'omi 'wa da nuani, kukua 'wa vivinagodi kumaeanidi 'adi vanuga 'eba 'odu'odu 'waidiega? <sup>23</sup> Ve'etoboda i maiaga Mosese 'wainega faifaidi taunimi 'wa awa'ai'aimi 'wa vo, 'Ima me Diu Yaubada yana ve'etoboda 'a 'asetadi, nani bwaikina 'waimeye.” Siwe 'wa da nuani, ve'etobodanidi 'wa geugeudi

bega yami sauluvanidi 'waidiega mali tomotoga Yaubada i awavesakoyeni? <sup>24</sup>☆Yami sauluvanidi faifaidi basenadiotoga i kilumi Yaubada yana Buki 'waineye i vo,  
 'Omi me Diu yami sauluva sakoidi 'waidiega  
 Mali tomotoga Yaubada i awavesakoyeni.”

*'Anu'anunu 'Atumaina Yaubada yana tomotoga yadi nuanua i 'ive'ivaudi.*

<sup>25</sup> Wata 'omi me Diu a na vonemi. Basenadi 'wa tubugaga bunumi i bobodi, 'ami tugusa 'omi me Diu mogitana Yaubada yana tomotoga. We'e 'ai'edi yana ve'etoboda 'wa na ve-matayakeyakediga, bunu 'aibobo 'ami wagava 'eba 'inana. 'Ai'edi ve'etobodanidi 'wa na geugeudi, bunu 'aibobo ava'ai 'ana 'atumaina, 'omi bani'odi mali tomotoga Yaubada i bavuyeni. <sup>26</sup> We'e 'ai'edi mali tomotoga taunidi kebu Diu bunu 'aibobo kebu i da 'ewaiga, siwe Yaubada yana ve'etoboda i na vevematayakeyakediga, taunidi mogitana yana tomotoga. <sup>27</sup> Tomotoganidi mogitana kebu tomotoga Diu, bunu 'aibobo kebu, siwe 'omi me Diu i na awavesakoyemi fai ve'etoboda 'wa geugeudi. Avinodi Yaubada yana ve'etoboda kilukilumidi 'waimie i 'eno'enovi wata bunu 'aibobo 'wa 'ewai siwe 'wa geugeudi, we'e tomotoganidi kebu bunu 'aibobo i da 'ewaiga, siwe Yaubada yana ve'etobodanidi i vevematayakeyakedi.

<sup>28</sup> Egavo Yaubada yana tomotoga mogitana? 'Omi me Diu 'wa vonaga 'wa vo, Bunu 'aibobo 'a 'ewaiga Yaubada yana veimea bani'odi, 'ima yana tomotoga mogitana. Tamamavo wata inamavo tomotoga Diu, sauluva Diu matatabuna 'a veve'ililibuyedi, mogitana 'ima me Diu.” Bani'odi 'wa voneyediga siwe kebu. <sup>29</sup> ☆Egavo yadi nuanua tonovidi Yaubada mataneye taunidi yana tomotoga mogitana. Ve'etoboda kilukilumidi kebu 'ana fata tamu aitoi yana nuanua i na sivilai, we'e mogitana 'Anu'anunu 'Atumaina tomotoganidi yadi nuanua i sisiviladi i 'ive'ivaudi, 'wa da vo 'Anu'anununina 'Atumaina yadi nuanua sakoidi i da bobo-yavuledi. Tomotoganidi mogitana Yaubada yana tomotoga, 'adi subia i veveluagai 'wainega, kebu tomotoga 'waidiega.

### 3

*Yaubada yana vona'awaufaufa kebu i na geudi.*

<sup>1</sup> A vonavonaga bunu 'aibobo faifaina, 'wa da nuani, tomotoga Diu 'aivaita i na veluagai fai taunidi 'aila'a Diu 'alo kebu? Bunu 'aibobo, 'wainega 'aivaita i na veluagai? <sup>2</sup> E'e, 'eba 'aivaita fuedi me Diu 'waidie. Tamu 'eba 'aivaita side

bani'odi. Yaubada yana Vona i 'aniveleneni me Diu 'waidie i na 'i'isave'avini.

<sup>3</sup> ✧Avinodi me Diu 'ifwaidi yana Vonanidi i vedumwe'ai'aiedi, we'e Yaubada kebu tamu sai'afo i na bailedi. <sup>4</sup> ✧'Akonadi 'wa 'asetai tomotoga matatabudi i vevekali we'e Yaubada yana vona matatabuna tonovidi. Bani'odi yana Buki 'waineye i kilumi i vo,

Yaubada, 'u vonaga, tomotoga fueidi i 'iseni yamu vona tonovidi.

'Ai'edi tomotoga i na vevitamu sakona faifaina, fueidi i na 'asetai i vevekali."

<sup>5</sup> Tomotoga 'ifwaidi i vonavona i vo, 'Ai'edi ta na sakosakonaga, nani 'atumaina, mali tomotoga sakonanidi i na 'isedi 'wainega i na vo, Yaubada kebu bani'odiga, taunina 'atumaotogina." Wata i vo, Yama sakonanidi 'waidiega Yaubada yana 'atumaina 'a sisivemageseni, siwe awale vematavuloga 'a veveluagai 'wainega?" <sup>6</sup> Yadi vonanidi mogitana vekali, kebu bani'odiga. Yaubada yana sauluva tonovi'avadi. 'Ai'edi sakona i da 'ise'isedimoga, 'awaie Vonayavuga 'ana 'Aiata 'waineye kebu 'ana fata veimea tonovina 'wainega i na veimeyeda. <sup>7</sup> Wata tomotoga 'ifwaidi i vonavona i vo, 'Ai'edi ta na vevekaliga, nani 'atumaina, bega tomotoga vekalinidi i na 'isedi nika 'wainega Yaubada yana Vona tonovidi i na 'asetai-matayo'odi ma yadi subia Yaubada i na awa'ai'aia. Yama vekalinidi 'waidiega Yaubada yana sauluva tonovidi 'a sisivemagesedi, siwe awale vematavuloga 'a na veluagai 'wainega 'wa da vo 'ima tosakona bani'odi." <sup>8</sup> 'Ai'edi yadi vonanidi vona mogitana 'ako ta da vo, Ma fueda ta na sakotoga nika nani 'atumaidi i na souyedi." Nuanuananidi mogitana vekali, siwe tomotoga 'ifwaidi i awavesakoyeku igodina yau wata bani'odi a da vevesauluvedi. I lubwainedi tomotoganidi 'adi vematavuloga i na veluagai.

*Kebu tamu aitoi tonovina Yaubada mataneye.*

<sup>9</sup> ✧Vetuma bani'odi ta na voneyedi? 'Wa da nuani, me Diu 'atumaidi Yaubada mataneye, we'e mali tomotoga sakoidi? Kebu'a'ava. 'Akonadi a vonemi matatabuda ta vesala, me Diu wata mali tomotoga ma fueda ta sakosakona, 'wa da vo sakona i da veveimeyeda. <sup>10</sup> ✧Bani'odi basenadi Yaubada yana Buki 'waineye i kilumi i vo,

Kebu tamu aitoi tonovina Yaubada mataneye, kebu'a'avaotoga.

<sup>11</sup> Kebu tamu aitoi sauluva tonovina i da 'asetai, 'alo Yaubada faifaina i da nunuavetafawaga.

12 Tomotoga matatabudi Yaubada yana 'eda'eda i baileni.  
Tomotoganidi i venani-'avo'avovo.

Kebu tamu aitoi i da vevesauluva 'atumaina,  
kebu'a'avaotoga.

13 ✨Yadi vona 'adi nogaya bani'odi taumata 'anibaina mag-  
aina,

Bonadi vekali 'adi loi,

Yadi vona tuva bani'odi, 'waidiega tomotoga vita wata wafa  
i veveluagadi.

14 ✨Ma yadi nuasako i manimanini,

15 ✨Yadi nuanua 'anidabadi, nuanuadi tomotoga vita i na  
veveledi wata luwewafa.

16 'Awalawa matatabuna 'waidiamo i nunagoga i  
sakosakona, 'wa da vo mulidiega yadi sakona 'iavena i da  
'eno'eno, 'ivesako wata 'we'wela,

17 Mia 'atumaina wata veiana bavubavuotogidi.

18 ✨Kebu tamu sai'afo Yaubada i da kololoyeni bega i da  
ve'ililibuyeni.”

Tomotoga yada sauluva side bani'odi begaidi Yaubada de'e  
bani'odi i voneyedi yana Buki 'waineye.

19 Egavo Yaubada yana Vona i 'ewadiga, i lubwainedi yana  
Vonanidi matatabuna i da vematayakeyakedi. Siwe tomo-  
toga matatabuda, me Diu wata mali tomotoga taiadi yana  
Vonanidi ta geugeudi bega Vonayavuga 'ana 'Aiata 'waineye  
mataneye ta na ve'wadamo kebu ta na ve'awafatafata. 20 ✨Fai  
matatabuda yana ve'etoboda ta geugeudi bega kebu 'ana fata  
Yaubada i na vo, De'e tomogonina yana sauluva tonovidi  
matakuye.” We'e mogitana Yaubada yana ve'etobodanidi  
yada sakona i sivemagesedi fai ta geugeudi nika 'wainega ta  
'asetai matatabuda ta sakosakona.

*Yaubada tomotoga i 'ive'atumaida vetumagana 'wainega.*

21 Mogitana 'ida nagami tosakona siwe tutuya de'e  
'waineye Yaubada tamu 'eda'eda i veda 'wainega taunina i  
'ive'atumaida yada sauluva i tonova mataneye. 'Eda'edanina  
faifaina basenadiotoga Mosese wata Yaubada yana  
tolu'ivonavo i kilumi, we'e kebu ta da ve'atumai Yaubada  
mataneye yana ve'etoboda 'adi vematayakayaka 'waidiega.  
22-23 ✨Ada 'ive'atumainina side bani'odi. Yaubada i  
'ive'atumaidaga yada vetumagana 'wainega. Egavo ma yadi  
vetumagana taunidi i tauyedi Iesu Keliso 'waineye, faifaiddi  
Yaubada i vo, Tomotoganidi yadi sauluva tonovidi matakuye,  
kebu yadi sakonaga.” Tomotoga matatabuda ta vesala, me  
Diu wata mali tomotoga ma fueda ta sakona. Yaubada

✨ **3:13:** Same 5:9, 140:3 ✨ **3:14:** Same 10:7 ✨ **3:15:** Voa 1:16 ✨ **3:18:**  
Same 36:1 ✨ **3:20:** Gal 2:16; Lom 7:7 ✨ **3:22-23:** Lom 1:17, 3:9

Magemagetana, i lubwaineda 'ida wata yada sauluva magemagetadi, siwe matatabuda yada sakonanidi faifaiddi ta 'usa 'waineye. <sup>24</sup> ✧Ta sakona siwe fai ta vetumagana Iesu Keliso 'waineye Yaubada i 'ive'atumaida wata i nuatavunida. Kelisonina 'wainega i 'isanuakalikaliyeda wata i vesauluva 'atumaina 'waideye i tuveobuda sakona 'wainega, siwe kebu ta na tutuliga. <sup>25</sup> ✧Yaubada Keliso i 'aniveleneni i wafa tomotoga matadie bega yana wafanina 'wainega yada sakona 'adi vita i evadi, Yaubada yana nuasako 'waideye i 'a'ava, wata dayaginega yada sauluva i tonova Yaubada mataneye. 'Ai'edi ta na vetumagana Keliso dayagina i lolo faifaidda, nuatavunanina ta na veluagai. Wata Keliso yana wafanina 'wainega, Yaubada i veda yana sauluva tonovidi fai basenadi i tokemaiga tomotoga yadi sakona i 'ise'isedimo, siwe i 'asetai 'awaie Keliso yadi sakonanidi i na tutulidi yana wafa 'wainega. <sup>26</sup> We'e tutuya de'e, fai Keliso i 'aniveleneni bega ta 'asetai Yaubada yana sauluva tonovidi wata tomotoga yadi vetumagana 'waidiega i 'ive'atumaiddi. Egavo i vetumagana, Keliso yana wafa 'wainega yadi sakona i tutula'a'avadi, Yaubada i nuatavunidi yadi sauluva i tonova mataneye.

<sup>27</sup> Vetuma 'wa da nuani? 'Ada fata taunida ta na awa'ai'aidi 'ada 'ive'atumai Yaubada mataneye faifaidda? Kebu, kebu 'ada fata ta na awa'ai'aidaga fai 'ada 'ive'atumai mataneye kebu ve'etoboda 'adi vematayakayaka 'waidiega, we'e mogitana vetumagana 'wainega. <sup>28</sup> ✧Bega ta nuani tomotoga yadi sauluva i tonovaga Yaubada mataneye vetumagana 'aisena 'wainega, kebu ve'etoboda 'adi vematayakayaka 'waidiega. <sup>29-30</sup> ✧Wata 'wa da nuaniga? Me Diu 'aisedi yadi Yaubada wata 'aisedi i na 'ita'ita'iedi? Kebu. Yaubada 'aitamogana, bega taunina me Diu yadi Yaubada wata mali tomotoga kebu taunidi Diu yadi Yaubada. 'Omi me Diu 'wa na ve'atumai Yaubada mataneye yami vetumagana 'wainega, wata bani'odi 'omi kebu me Diu yami vetumagana 'wainega 'wa na ve'atumai. <sup>31</sup> Fai ta ve'atumaiga Yaubada mataneye yada vetumagana 'wainega, we'e yana ve'etoboda bani'odi? Ta na bailedi? Kebu, kebu ta na bailediga, ta na awave'atumaiddi.

## 4

### *Ebelamo yana vetumagana yada 'eba 'isa.*

<sup>1</sup> Ebelamo, me Diu 'adi wauma lamuna a na veifufuyeni. Yana ve'atumai Yaubada mataneye, ava'ai 'wainega?  
<sup>2</sup> 'Ai'edi yana vematayakayaka 'wainega Yaubada i da



'ive'atumaia, 'ako yana vematayakayakanina faifaina taunina i da awa'ai'aia. Siwe kebu tamu nani i da 'eno'eno bega 'wainega taunina i na awa'ai'aia Yaubada mataneyeye.  
<sup>3</sup> ✱'Ana 'ive'atumai faifaina i kilumi Yaubada yana Buki 'waineye i vo,

Ebelamo i vetumagana Yaubada 'waineye,  
 Yana vetumagananina faifaina Yaubada i awave'atumaieni

I vo, Taunina yana sauluva tonovidi matakuye.”

<sup>4</sup>'Ai'edi tamu aitoi i na vetofolovaga tamu tomogo 'waineye mani i na veleni. Siwe kebu i na vo, De'e 'ana nuakalikali,” we'e mogitana i na vo, 'Ana tutula, folova vitadi i 'idewadiga faifaina.” <sup>5</sup>We'e 'ive'atumai folova 'wainega kebu faifaina Yaubada i da nuanuaga, vetumagana nani bwaikina 'waineye. Avinodi 'ida tosakona, siwe 'ai'edi ta na vetumaganamo Yaubada 'waineye ta na ve'atumai mataneyeye, bega faifaيدا i na vo, Taunidi yadi sauluva tonovidi matakuye, yadi sakona i 'a'ava.” <sup>6</sup>Wata bani'odi basenadiotoga Kini Devida i vona 'ada 'ive'atumai Yaubada mataneyeye faifaina. I vonaga i vo, Egavo i ve'atumaiga, kebu yadi folova 'alo yadi vematayakayaka 'waidiega, i ve'atumaiga vetumagana'ava 'wainega, 'eba sosoana 'waidie.” <sup>7</sup>✱Wata i vo,

Egavo yadi sauluva sakoidi Yaubada i nuatavunidiga wata yadi sakona i 'u'umidiga,

'Eba sosoana 'waidie.

<sup>8</sup>Aitoi yana sakona 'Auvea kebu i na nuanuanidiga,

'Eba sosoana 'waineye.”

<sup>9</sup>Sosoananina Devida i voneyeniga, 'wa da nuani, me Diu kumanidiavo bunudi i bobodiga 'aisedi i veveluagai yadi vetumagana 'wainega? Kebu, wata mali tomotoga bunu 'aibobo kebu i da 'ewaiga 'adi fata i na sosoana yadi vetumagana 'wainega. Nani de'e ta 'asetai fai 'akonadi Yaubada yana Buki 'wainega a lu'ivona 'waimie. I vo,

Ebelamo i vetumagana Yaubada 'waineye,

Yana vetumagananina faifaina Yaubada i awave'atumaieni,

I vo, Taunina yana sauluva tonovidi matakuye.”

<sup>10</sup>Ma'avia 'ana awave'atumai i veluagai? Nagami Yaubada i awave'atumaieni mulieta bununa i boboi, 'alo bununa i boboina mulieta i awave'atumaieni? Nagami Yaubada i awave'atumaieni, mulieta bununa i boboi. <sup>11</sup>Nagami Yaubada i vo, Ebelamo yana vetumagana 'wainega yana sauluva i tonova matakuye,” mulieta wata i voneni bununa i boboi. I boboiga, yana 'eba 'isa nagami Yaubada i

awave'atumaieni yana vetumagana faifaina, mulieta tugusanina i 'ewai. Naninidi i souyedi Ebelamo 'waineye bega egavo tugusanina kebu i da 'ewaiga siwe yadi vetumagana 'aisena 'wainega i ve'atumi Yaubada mataneye, taunidi bani'odi Ebelamo 'ana wauma i vetubuna 'waineye. <sup>12</sup> Wata bani'odi Ebelamo me Diu tubudi, kumanidiavo Yaubada yana tugusa i 'ewai tomogodi 'waidie. I vetubunaga kebu bunu 'aibobo 'aisena faifainaga, siwe wata fai yana sauluva i salai. Yana sauluvanina bola kebu bunu 'aibobo i da 'ewaiga, ma yana vetumagana Yaubada 'waineye i miamia.

*Yaubada yana vona'awaufaufa 'waideye 'adi mogitana ta na veluagadi vetumagana 'wainega.*

<sup>13</sup> Basenadiotoga Yaubada i vona'awaufaufa Ebelamo 'waineye i vo, 'Omu wata 'amu wauma fwayafwaya matatabuna a na vele mi.” De'e bani'odi Yaubada i vona'awaufaufa Ebelamo 'waineye fai yana vetumagana faifaina Yaubada i vo, Taunina yana sauluva i tonova matakuye,” kebu ve'etoboda 'adi vematayakayaka 'waidiega i da ve'atumaiga. <sup>14</sup> ✧Yaubada kebu i da vo, Tomotoganidi yaku ve'etoboda a velediga Mosese 'wainega i na vematayakeyakedi yaku vona'awaufaufa 'adi mogitana i na veluagadi.” 'Ai'edi mogitana, we'e tomotoganidi i vetumaganamo bani'odi? 'Wa da vo i da vetumagana-maimaiga wata Yaubada yana vona'awaufaufa i da venani-'avo'avovo. <sup>15</sup> ✧Kebu 'ana fata tomotoga Yaubada yana vona'awaufaufa 'adi mogitana i na veluagadi yana ve'etoboda 'adi vematayakayaka 'waidiega fai ve'etobodanidi i geugeudi bega Yaubada yana nuasako wata yana vematavuloga i sousouyedi 'waidie. 'Ai'edi ve'etoboda kebu, 'ako tomotoga kebu i da geugeudi. Siwe fai ve'etobodanidi i 'eno'enovi nika tomotoga i geugeudi 'adi vematavuloga i na veluagai.

<sup>16</sup> Fai ve'etoboda 'waidiega Yaubada yana nuasako i sousouyeni, bega yana vona'awaufaufa 'adi mogitana kebu 'ana fata ta na veluagadi ve'etobodanidi 'adi vematayakayaka 'waidiega. We'e mogitana vetumagana'ava 'wainega nika ta na 'asetai mogitana, vona'awaufaufanidi Yaubada yana 'anivelena-maimaiga 'waideye. 'Ai'edi me Diu yadi ve'etoboda ta na vematayakeyakediga 'alo kebu, kebu tamu ava'ai, we'e nani bwaikina ta na vetumagana Yaubada 'waineye Ebelamo bani'odi i vetumagana, nika vona'awaufaufa 'adi mogitana ta na veluagadi. 'Ai'edi Ebelamo ta na salaiga, 'ida tubunavo. <sup>17</sup> ✧Ta na vetubuna

Ebelamo 'waineye faifaina Yaubada i vona yana Buki 'waineye i vo,

A venua'ivinemu bega 'aila'a tulina tulina i na ve'awatubuna 'waimuye."

Bega Ebelamo 'ida tovetumagana tubuda Yaubada mataneye. Yaubadanina kumanina Ebelamo i vetumagana 'waineye, taunina towafa 'adi tosivetovoi wata naninidi bola kebu i da souyediga, faifaiddi i vovona-vagata 'wa da vo 'akonadi i da souyedi.

18 ✨ Basenadiotoga Yaubada Ebelamo i voneni i vo,

'Amu wauma i na vefue,

Wala'ai 'ana 'ilukulukuta bani'odi."

Ebelamo kebu tamu natunavoga wata 'akonadi i ve'auvea siwe kebu i da vo, Bani'odi i na munega 'aku 'aila'a i na vefue?" Ma yana vetumagana i nuaniamo mogitana Yaubada yana vona'awaufaufanina 'ana mogitana i na souyeni, nika mogitana 'aila'a tulina tulina i vetubuna 'waineye. 19 ✨ Ebelamo i ve'auvea-'afo'afo 'ana malamala 100 lilivaneye i 'asetai taumata 'awaneye i tovetovoi we'e yana vavine Sela i vemo'ai kebu 'adi fata venatuna, siwe yana vetumagana kebu i da mwea. 20 Ma yana vetumagana Yaubada yana vona'awaufaufanina faifaina kebu i da venuanaluga, yana vetumagananina i kiavetoketokei Yaubada i subiaimo naninina 'awaie i na souyeni ga faifaina. 21 I nuani mogitana Yaubada ma yana toketokena, ava'ai i voneyeni ga 'ana mogitana i na souyeni. 22 ✨ Yana vetumagananina 'wainega Yaubada i awave'atumaieni i vo, Taunina yana sauluva matatabuna tonovidi matakuye." 23-24 ✨ Awave'atumai 'ana vonanina i kilumiga kebu Ebelamo 'aisena faifainaga, wata 'ida faifaidda, fai ta vetumagana 'waineye Yaubada i awave'atumaieda. Yaubadanina, 'ada Toveimea Iesu i sivetovoi wa fayega. 25 ✨ Ada Toveimeanina Yaubada i 'aniveleneni tomotoga i luvewafai yada sakona faifaiddi we'e Yaubada i sivetovoi bega ta ve'atumai mataneye yada sakona i nuatavunidi.

## 5

### *Iesu 'wainega Yaubada i veianeda.*

1 ✨ Tutuya de'e 'waineye Yaubada i 'ive'atumaida yada sakona i 'u'umidi fai ta vetumagana Iesu Keliso 'waineye. 'Ada 'ive'atumainina 'wainega ta veiana Yaubada taiadi wata mia 'atumaina ta veveluagai, 'ada Toveimea Iesu Keliso faifaidda i 'idewai. 2 Wata fai ta vetumagana 'waineye i mieda

✨ 4:18: Nag 15:5 ✨ 4:19: Nag 17:17 ✨ 4:22: Nag 15:6 ✨ 4:23-24: Lom 15:4 ✨ 4:25: Ais 53:5 ✨ 5:1: Lom 3:24

Yaubada yana nuakalikali nageneye, 'asiau bei ta miamia i vevesauluva 'atumaina 'waideye. Wata fai ta nuani mogitana 'awaie Yaubada yana 'ai'aiwabu magemagetadi i na veleda ta sososoana bwaikina. <sup>3</sup> ✧ 'Ai'aiwabu ta na veluagadiga kebu 'aisedi faifaidi ta da sososoanaga, siwe wata vita ta veveluagadiga faifaidi ta sososoana fai ta 'asetai vitanidi 'waidiega yada tokemaiga i vevebwaika. <sup>4</sup> Yada tokemaiga i na nagoga ta na vetoketoke wata ta na kumakumaga, nika 'wainega ta na vetumagana fa'alina wata ta na nuani mogitana 'ai'aiwabu i na veleda. <sup>5</sup> Ta 'asetai mogitana ta na veluagai bega kebu ta na bunumayaga, fai 'Anu'anunu 'Atumaina i veleda bega ta vevebaeda Yaubada yana nuakalikali bwaikina 'waideye.

<sup>6</sup> Mogitana Yaubada i nuakalikaliyeda fai bola 'ida kebu ta da vetoketokega wata kebu 'ada fata taunida ta na 'ive'atumaidaga, bei Yaubada yana nuanua 'ana tutuya mogitana 'waineye, Keliso i wafa 'ida Yaubada 'ana tove-dumwe'ai'ai faifaida. <sup>7</sup> Tamu tomogo 'atumaina 'ana 'ita'ita'i faifaina, kebu 'ana fata tamu aitoi taunina i na tauyamatayo'oyeni wafa 'waineye. We'e voke tamu tonuakalikali 'ana 'ita'ita'i faifaina 'ana fata tamu aitoi taunina i na tauyeni wafa 'waineye. <sup>8</sup> ✧ We'e Yaubada yana nuakalikali bwaikao-togina i veda fai bola ta sakosakona Keliso i wafa 'ada 'ita'ita'i faifaina.

<sup>9</sup> ✧ Fai Keliso dayagina i ilolo faifaida bega ta ve'atumai Yaubada mataneye, vona mogitanaotoga i na 'ita'ita'ieda Yaubada yana nuasako 'wainega nika kebu yada sakona 'adi tutula ta na veluagadiga. <sup>10</sup> ✧ Nagami 'ida Yaubada 'ana gavi-avo, Natuna yana wafa 'wainega i veianeda. 'Akonadi taiadi ta veianaga, vona mogitanaotoga i na 'ita'ita'ieda fai Keliso ma yawaina i miamia abame. <sup>11</sup> Mogitana i na 'ita'ita'ieda siwe wata ta sososoana Yaubada 'waineye fai 'ada Toveimea Iesu Keliso 'wainega Yaubada taiadi ta veiana.

*Adama 'wainega wafa i souyeni,*

*we'e Keliso 'wainega mia-vagata i souyeni.*

<sup>12</sup> ✧ Tomogo 'aitamogana yana sakona 'wainega, tomia fwayafwaya matatabuda ta sakona, bei sakona i velamu. Adama yana sakonanina 'ana tutula i wafa bega wata wafa i souyeni tomia fwayafwaya matatabuda 'waideye fai fueda ta sakona. <sup>13</sup> Basenadiotoga Yaubada yana ve'etoboda kebu i da maiga Mosese 'wainega, tomotoga i sakosakona siwe fai ve'etoboda kebu, bega Yaubada yadi sakonanidi i

✧ 5:3: Iem 1:2-3 ✧ 5:8: Ion 3:16; 1 Ion 4:10 ✧ 5:9: Efe 1:7 ✧ 5:10: Kolos 1:22 ✧ 5:12: Nag 3:6; Lom 6:23

veve'ise'isedi. <sup>14</sup> ✧Adama 'wainega i mai Mosese 'waineye wafa i vetoketoke tomotoga 'waidie. Tomotoga matatabudi i wafa, we'e egavo Yaubada yana veimea kebu i da geuyaga bani'odi Adama i sakona, siwe wata i wafa.

Adama wata yana sakonanina, a na veifufuyedi bega 'waidiega Iesu yana sauluva 'atumaidi 'wa na 'asetadi. <sup>15</sup> Tomotoganidi 'adi 'ailuga yadi sauluva kebu i da vesalaga fai Yaubada yana 'anivelena-maimaiga 'waideye kebu bani'odi Adama yana sakona. Tomogonina yana sakona 'wainega tomotoga fuedi wafa i veluagai, we'e mogitana tamu tomogo yana nuakalikali 'wainega Yaubada ma yana nuakalikali i 'anivelena-maimaiga 'waideye. Mogitana, Iesu Keliso 'wainega, Yaubada yana 'anivelena-maimaiga 'atumaiotogina tomotoga fueda ta veluagai. <sup>16</sup> Yaubada yana 'anivelena-maimaiga 'waideye yana nuakalikali 'wainega, kebu i da vesalaga naninidi i souyedi tomogonina 'aitamogana yana sakona 'wainega. Sakonanina 'aitamogana 'wainega Yaubada i veimea sakona matatabuna 'adi tutula wafa. We'e tomotoga matatabudi i sakosakona mulieta Yaubada yana 'anivelena-maimaiga 'ada nuakalikali i 'ive'atumaida bega i vo, Yami sakona i 'a'ava, yami sauluva tonovidi matakuye.” <sup>17</sup> Tomogonina 'aitamogana yana sakona 'wainega wafa i vetoketoke, we'e vona mogitana naninina i souyeniga tamu tomogo 'ana wagava Iesu Keliso 'wainega 'atumaiotogina. Egavo Yaubada yana nuakalikali bwaikina i na 'ewai wata i na vonedi i na vo, 'Omi a 'ive'atumaimi siwe kebu 'wa na tutuliga,” taunidi yadi mia matatabuna 'waidie i na vetoketoke Keliso 'wainega.

<sup>18</sup> ✧Yaku vona 'ana nuanua side bani'odi. Sakona 'aitamogana 'wainega matatabuda ta sakosakona bega Yaubada i vo, Yadi sakona 'adi tutula vematavuloga a na veledi,” wata bani'odi Keliso nani 'aitamogana 'atumaina i 'idewai i wafa faifaida bega tomotoga fueda i 'etoyavuda sakona 'waidiega wata mia 'atumaina wata miamia-vagaina taiadi i veleda. <sup>19</sup> Wata fai tomogo 'aitamogana Yaubada yana veimea i vedumwe'ai'aieni matatabuda ta sakosakona, we'e tomogo 'aitamogana Keliso, Yaubada yana nuanua i vematayakeyakeni nika 'wainega Yaubada tomotoga fuedi i na 'ive'atumaidi.

<sup>20</sup> Yaubada yana ve'etoboda i maia Mosese 'wainega bega tomotoga yadi sakona i sivemagesedi nika sakona i vebwaika. Mogitana i vebwaika, siwe Yaubada yana nuakalikali i vebwaika-'afo'afo. <sup>21</sup> ✧Nagami sakona i vetoketoke 'ana tutula tomotoga matatabudi i wafawafa, siwe fai Yaubada

yana nuakalikali i vebwaika-'afo'afo i 'ive'atumaida, begaidi mia 'atumaina wata miamia-vagaina ta na veluagai. Nani de'e Yaubada i 'idewai 'ada Toveimea Iesu Keliso yana wafa 'wainega.

## 6

*Keliso 'ana miave'itubama 'wainega mia 'ivauna ta veluagai.*

<sup>1</sup> Yaubada yana nuakalikali nani bwaikaotogina, bega 'wa da nuani? Tutuya fuedi ta na sakosakonaga, i lubwaineni 'ana fata Yaubada yana nuakalikali i na vevebwaika? <sup>2</sup> A nuani kebu'a'avaotoga. 'Ai'edi tamu aitoi i na wafaga, yana mia fwayefwayeye i 'a'ava, wata bani'odi 'ida ta wafa yada sauluva sakoidi ta 'iawedi. Fai ta wafaga sakona yana toke-tokena 'waideye i 'a'ava, bega 'ai'edi ta na sakosakonaga kebu i da lubwaineda. <sup>3</sup> Ava'ai a na voneyeniga 'akonadi 'wa 'asetai. Tutuyanina ta bafitaiso Iesu Keliso 'ana wagavayega, 'akonadi taiadi ta miave'itubama. Fai ta miave'itubama taiadi, yana wafa 'waineye 'wa da vo taiadi ta da wafa. <sup>4</sup> ✱Keliso i wafaga i tavuni, wata bani'odi ta bafitaiso i lekoada ufayega 'wa da vo Iesu taiadi ta da wafa i da tavunida. Fai bani'odi ta wafayediga, bega Yaubada Tamada Keliso i sivetovoia wafayega yana toketokena 'wainega, wata 'ida i sivetovoida bega mia 'ivauna wata 'atumaina ta veluagai.

<sup>5</sup> Ta wafaga wata i sivetovoida mia 'ivauna ta velugaiga 'adi 'asetai side bani'odi. Kebu 'aisedaga, Keliso taiadi ta wafa wata bani'odi Yaubada i sivetovoia wata fai 'akonadi taiadi ta miave'itubama 'ida mogitana i na sivetovoida. <sup>6</sup> ✱'Akonadi ta 'asetai tutuyanina Keliso i tutufwaseni 'ai lagalagana 'waineye, yada nuanua sakoidi nagami, taiadi i tutufwasedi i wafa. Nagami tauniotogida nuanuada bega ta sakosakona, we'e Keliso 'ana 'ai lagalagana 'waineye nuanuananidi i ve'a'avaotogidi. Basenadi sakona i vetoketoke 'waideye, sakananina yana nuanua ta 'i'idewadi, siwe fai bani'odi ta wafayediga Keliso taiadi, kebu 'ana fata sakona wata i na veveimeyeda. <sup>7</sup> 'Ai'edi aitoi Keliso taiadi i na wafaga, sakona kebu 'ana fata i na veveimeyeni.

<sup>8</sup> Fai Keliso taiadi ta wafaga, ta vetumagana wata Keliso taiadi ta na miamia. <sup>9</sup> ✱Mogitana taiadi ta na miamia fai ta 'asetai Yaubada Keliso i sivetovoia kebu 'ana fata i na wafa-vaitugana, kebu wata wafa i na vetoketoke 'waineye. <sup>10</sup> ✱Wafanina 'wainega i wafaga, yada sakona i wafedi, tutuya 'aitamogana i wafa sakona matatabuna faifaidi, we'e 'asiau Yaubada taiadi i miave'itubama i miamia. <sup>11</sup> ✱Wata bani'odi

✱ 6:4: Kolos 2:12 ✱ 6:6: Gal 2:19-20 ✱ 6:9: Ve 1:18 ✱ 6:10: 1 Fit 3:18

✱ 6:11: 1 Fit 2:24

taunimi 'wa na nuanimi, 'wa na vo, 'Ima 'a wafa Keliso taiadi, sakona kebu 'ana fata i na vetoketoke 'waimeye wata fai Iesu Keliso taiadi 'a miave'itubama, ma yawaima taunima 'a tauyema Yaubada 'waineyey."

*Ta na tauyeda Yaubada yana nuakalikali i na veimeyeda.*

12 'Omi 'wa miave'itubama Keliso taiadi, siwe 'ai'edi sakona i na vetoketoke tomogomie bega yana nuanua 'wa na vematayakeyakedi, 'wa na sakosakonaga kebu i da lubwainemiga. 13 \*Wata kebu tamu du'umi 'wa na tauyeni sakona 'waineyey 'wa na foloveni. We'e mogitana taunimi 'wa na tauyemi Yaubada 'waineyey fai wafayega i vevilami bega mia 'ivauna wata 'atumaina 'wa veluagai. Taunimi 'wa na 'anivelenemi 'waineyey yana nuanua tonovidi 'wa na 'i'idewadi. 14 Tomotoga 'ifwaidi igodi nuanuadi i na ve'atumai Yaubada mataneyey yana ve'etoboda 'adi vematayakayaka 'waidiega, we'e 'omi 'akonadi 'wa ve'atumai yami vetumagana 'wainega. Ve'etobodanidi kebu i da veveimeyemiga 'ami 'ive'atumai faifaina we'e mogitana Yaubada yana nuakalikali faifaimi i veveimeyemi, begaidi sakona kebu 'ana fata i na vetoketoke 'waimie.

*Ta na vetofolova sauluva tonovidi 'waidie.*

15 \*'Ada 'ita'ita'i kebu ta da veluagaiga ve'etoboda 'adi vematayakayaka 'waidiega, we'e mogitana Yaubada yana nuakalikali 'wainega ta veluagai. Fai Yaubada kebu i na vematavulogida bega 'wa da nuani, ta na sakosakonaga i lubwaineni 'alo kebu? A nuani kebu tamu sai'afo i da lubwaineni. 16 \*'Wa na nuani, 'ai'edi 'wa na nago tamu tomogo bwaikina 'waineyey 'wa na vo, 'Auvea, nuanuaku a na vetofolova-maimaiga, tauniku a tauyeku 'waimuyey yamu veimea matatabuna a na vematayakeyakedi," 'omi 'akonadi tomogonina yana tofolova-maimaiga. Wata bani'odi 'ai'edi taunimi 'wa na tauyemi sakona 'waineyey siwe 'asa'aiana 'akonadi 'wa vetofolova sakona 'waineyey i na nagoga wafa i na souyeni. We'e 'ai'edi taunimi 'wa na tauyemi Yaubada 'waineyey yana nuanua 'wa na vevematayakeyakediga, siwe 'asa'aiana 'akonadi 'wa vetofolova Yaubada 'waineyey i na nagoga i na 'ive'atumaimi. 17 Siwe ta na vekaiwa Yaubada 'waineyey, fai basenadi 'wa vetofolova sakona 'waineyey, we'e tutuya de'e taunimi 'wa tauyemi mogitana Keliso yana tomotoga yadi vona nuanuami, yadi venidi vona tonovidi 'wa vevematayakeyakedi. 18 \*'Omi 'akonadi Yaubada i yavumi sakona 'wainega, sakonanina nagami 'ami toveimea we'e

'asiau 'wa vetofolova sauluva tonovidi 'waidie, taunina 'ami toveimea 'ivauna.

<sup>19</sup> Vonanidi a voneyediga vitadi 'waimie we'e tofolova wata 'adi toveimea 'waidiega a awatalatutula nika 'wa na 'asetamatayo'oi. Nagami taunimi 'wa tauyemi mogitana bunu 'ana nuanua sakoidi 'waidie bega yami sakona i vevebwaika-'afo'afo, we'e tutuya de'e i lubwainemi taunimi 'wa na tauyemi sauluva tonovidi 'wa na 'i'idewadi i na nagoga nika yami sauluva magemagetadi, 'wa da vo 'wa na vetofolova sauluvanidi 'waidie. <sup>20</sup> Nagami 'wa vetofolovaga sakona 'waineye, sauluva tonovidi kebu faifaidi 'wa da nuanuaga. <sup>21</sup> \*Tutuyanina 'waineye ava'ai naniga 'atumaina 'wa veluagai sauluvanidi sakoidi 'waidiega? Sauluvanidi 'adi tutula wafa, we'e 'asiau faifaidi bunumi i mayaga. <sup>22</sup> Tutuya de'e 'akonadi Yaubada i yavumi sakona 'waidiega kebu wata i na vetoketoke 'waimie, ma'itufa 'wa vetofolova Yaubada 'waineye. 'Wa vetofolovaga Yaubada 'waineye, yami sauluva i na magemagetadi i na nagoga mia 'atumaina wata miamia-vagaina 'wa na veluagai. <sup>23</sup> \*Sakona 'ana tutula wafa, we'e Yaubada yana 'anivelena-maimaiga 'waideye mia 'atumaina wata miamia-vagaina fai ta miave'itubama 'ada Toveimea Iesu Keliso taiadi.

## 7

*Yada mia 'ivauna faifaina Faulo i awatalatutula nagi 'wainega.*

<sup>1</sup> Ekwavo, 'omi ma fueda Iesu yana 'aila'a, veimea matatabuna 'akonadi 'wa 'asetadi bega a na vonemi. 'Ai'edi tamu tomogo ma yawaina i na miamiaga, i lubwaineni veimea matatabuna i na vematayakeyakedi, 'ai'edi i na wafaga, 'akonadi veimeanidi i 'iawedi. <sup>2</sup> Nagi 'ana sauluva 'wainega a na awatalatutula, side bani'odi. 'Ai'edi tamu vavine ma yadi lamoga i na miamia, yadi lamoga bola ma yawaina vavinenidi nagi 'ana veimea i na veveimeyedi. We'e yadi lamoga i na wafaga vavinenidi yavuyavudi nagi 'ana veimea 'wainega. <sup>3</sup> Begaidi 'ai'edi yadi lamoga bola ma yawaina i na baileni i na nago mali tomogo 'waineye, taunidi i sakona 'ana wagava saidamana. We'e 'ai'edi yadi lamoga i na wafa, 'akonadi yavuyavudi veimeanina 'wainega bega 'ai'edi i na nagi-vaitugana kebu i da sakonaga.

<sup>4</sup> \*Ekwavo, wata bani'odi, tutuyanina Keliso i wafa 'wa da vo 'omi taiadi 'wa da wafa bega 'omi yavuyavumi ve'etoboda 'waidiega. Fai 'akonadi yavuyavumi 'omi tamu tomogo yana tomotoga, taunina Iesu Keliso, kumanina Yaubada i



sivetovoia wafayega bega 'omi nani 'atumaidi 'waidie 'wa na folofolova Yaubada faifaina. <sup>5</sup> ✧Yada nuanua sakoidi nagami, basenadi i veimeyeda, sauluvanidi sakoidi Yaubada i talabodediga nika yada nuanua 'waidie i vebwaika. I vebwaikaga bega tomogoda 'waidie ta vebaeda naninidi i talabodediga nuanuada ta na 'idewadi. Sauluvanidi faifaiddi Yaubada i veimea 'adi tutula wafa. <sup>6</sup> ✧Basenadi Yaubada yana ve'etoboda igodi ta da vematayakeyakedi siwe kebu 'ada fata, 'wa da vo ve'etobodanidi i da yogonida. Fai Keliso taiadi ta wafaga 'ida yavuyavuda ve'etobodanidi 'waidiega, bega nuanua nagami wata ve'etoboda kilukilumidi taiadi ta bailedi. We'e tutuya de'e 'Anu'anunu 'Atumaina yana 'aivaita 'wainega nuanua 'ivauna ta 'i'idewai bega ta folofolova Yaubada faifaina.

*Yaubada yana ve'etoboda nani 'atumaidi, siwe 'waidiega sakona i vetoketoke.*

<sup>7</sup> ✧'Akonadi a vona a vo, Ve'etoboda i maia Mosese 'wainega i 'eno'enovi begaidi sakona i vevetoketoke." We'e 'wa da nuaniga, ve'etobodanidi nani sakoidi? Kebu'a'avaotoga. We'e mogitana, ve'etobodanidi i veku nika a 'asetai ava'ai sauluvaga sakoidi. 'Ai'edi Yaubada yana ve'etoboda kebu i da vo, Emiavo yadi kukua faifaiddi kebu 'wa na nuagiva," wata 'ako kebu a da 'asetai nuagiva nani sakoina. <sup>8</sup> We'e ve'etobodanina 'wainega sakona yana 'eda i veluagai bega nuagiva tulina tulina 'adi nuanua i vebwaika 'waikuye. 'Ai'edi ve'etoboda kebu i da 'eno'enoviga, sakona kebu 'ana fata i na vetoketoke. <sup>9</sup> Basenadi Yaubada yana ve'etoboda kebu a da 'asetadiga yaku mia 'atumaina, siwe tutuyanina ve'etobodanina nuagiva faifaina a nogai nuanua sakoidi i vetoketoke 'waikuye nika a sakona, sakonanina 'ana tutula wafa. <sup>10</sup> Yaubada nuanuana yada mia i na ve'atumai bega ve'etoboda i veleda, we'e yau tauniku a geuya, yaku sakonanina faifaina 'ana tutula wafa. <sup>11</sup> A geuyaga fai ve'etobodanina 'wainega sakona yana 'eda i veluagai nika i vekalieku, yaku sakona 'ana tutula wafa, 'wa da vo sakona i da luvewafaku Yaubada yana ve'etoboda 'wainega. <sup>12</sup> ✧Yaubada yana ve'etoboda tauniotogina 'wainega i maia begaidi veimeanidi magemagetadi, tonovidi wata 'atumaidi. <sup>13</sup> 'Wa da nuani, naninidi 'atumaidi 'waidiega a wafa? Kebu'a'avaotoga. We'e mogitana sakona 'wainega a wafa. Ve'etoboda 'atumaidi 'waidiega sakona i luvewafaku bega yaku nuanua sakoidi i na sivemagesedi. Fai Yaubada yana Veimea ta 'asetadi, yada nuanua sakoidi faifaiddi ta na vo, Mogitana yaku sakona nani sakoiotogina."

✧ 7:5: Lom 6:21

✧ 7:6: Lom 8:2

✧ 7:7: Sou 20:17

✧ 7:12: 1 Tim 1:8

*Nuanua 'atumaidi wata nuanua sakoidi tomotoga i veveyo'eyo'eyeda.*

<sup>14</sup> Ta 'asetai Yaubada yana ve'etoboda i veleda, 'anu'anunuda 'adi 'ive'atumi faifaina, we'e yau tomotogaotoga tomogoku 'ana nuanua i vebwaika 'waikuye, nika sakona i veveimeyeku. <sup>15</sup> Sauluvanidi a 'i'idewadiga nuaku i vogavogani, fai sauluvanidi 'atumaidi nuanuaku, siwe kebu a da 'idewadiga, we'e sauluvanidi sakoidi 'eba ve'eduogaogala igodi a baibailaga a 'i'idewadi. <sup>16</sup> Sauluvanidi kebu nuanuaku a na 'idewadiga, siwe a 'idewadi nika vita a vebaeku yaku sakonanina faifaina 'wainega a 'asetai ve'etoboda nani tonovidi a awave'atumaiedi. <sup>17</sup> Fai yau kebu nuanuaku sakona, siwe a na 'idewaiga, ta 'asetai yau kebu kumaniku a da sakonaga, we'e mogitana sakonanina 'waikuye i 'eno'enoga i vetoketoke. <sup>18</sup> A 'asetai kebu tamu nani 'atumaina i da 'eno'eno 'waikuye, tomogoku nageneye, nuanuana sakona-vebogi. Nuanuaku a da vevesauluva 'atumaina, siwe kebu 'aku fata. <sup>19</sup> Sauluvanidi 'atumaidi nuanuaku siwe kebu a da 'idewadiga ma'itufa sauluvanidi sakoidi kebu nuanuaku a 'i'idewadi. <sup>20</sup> Naninidi kebu nuanuaku a 'i'idewadiga ta 'asetai yau kebu kumaniku a da sakonaga, we'e mogitana sakonanina 'waikuye i 'eno'enoviga i vetoketoke.

<sup>21</sup> Yaku 'asetai sauluva 'atumaidi wata sakoidi faifaide side bani'odi. Tutuyanina nuanuaku sauluva 'atumaidi a na 'idewadi siwe a venua'ivina-sako bega kebu 'aku fata nani 'atumaidi a na 'idewadi. <sup>22</sup> Yaku nuanua 'waineye Yaubada yana veimea 'waikuye 'eba sosoana mogitana. <sup>23</sup> ✧ We'e tomogoku 'waineye 'ana vebae tamu nuanua i yo'eyo'eku nuanuana a na sakona we'e tamu nuanua 'waikuye nuanuana Yaubada yana veimea a na vematayakeyakedi. I veveyo'eyo'eyeku nika sakona tomogokuye i vetoketoke 'wa da vo i da yogoyogoniku. <sup>24</sup> Vona mogitana yaku mia i sako-'afo'afo, a nuavita bwaikina, sakona tomogokuye i vetoketoke wafa a vaduduni. Aitoi 'ana fata i na 'ita'ita'ieku? <sup>25</sup> ✧ Ada Toveimea Iesu Keliso, taunina 'aku to'ita'ita'i, faifaina a vekaiwa Yaubada 'waineye.

Vonanidi a voneyediga 'adi nuanua side bani'odi. Tauniku yaku nuanua a tauyeni Yaubada 'waineye, yana veimea a na vematayakeyakedi, we'e sakona tomogokuye i vetoketoke.

## 8

*'Anu'anunu 'Atumaina 'wainega yada mia i na ve'atumi.*

<sup>1</sup> Iesu Keliso yana wafa 'wainega yada sakona 'adi tutula i evadi, begaidi tutuya de'e 'waineye egavo i miave'itubama Kelisonina taiadi, kebu vematavuloga i na veluagai. <sup>2</sup> Basenadi sakona i vetoketoke 'waideye, sakonanina 'adi tutula wafa, 'wa da vo sakona wata wafa i da yonida we'e tutuya de'e Iesu Keliso i yavuda mia 'ivauna wata 'atumaina ta veluagai 'Anu'anunu 'Atumaina yana toke-tokena 'wainega. <sup>3-4</sup> \*Basenadi tomogoda yadi nuanua ta 'i'idewadi bega kebu 'ada fata Yaubada yana ve'etoboda ta na vematayakeyakedi, 'ako ta da vematayakeyakediga ta da ve'atumai Yaubada mataneyeye. We'e tutuya de'e Yaubada i 'ive'atumaida, yada sauluva tonovidi mataneyeye, fai taunina Natuna i vetunei i vetomotogaotoga 'ida tosakona bani'odi, siwe kebu i da sakonaga, yana wafa 'wainega yada sakona i 'u'umidi. Yaubada yana ve'etoboda matatabuna tonovidi, i lubwaineda ta da vematayakeyakedi, siwe fai kebu, 'ana tutula wafa. We'e Natuna tomogonega tutulanina i evai i wafa faifaida nika Yaubada mataneyeye yada sauluva matatabuna i tonova, 'wa da vo ve'etoboda matatabuna ta da veve-matayakeyakedi. 'Ida tomotoganida 'Anu'anunu 'Atumaina yana nuanua ta 'i'idewadi, ma'itufa tomogoda yadi nuanua sakoidi ta bailedi.

<sup>5</sup> Egavo yadi nuanua i tauyedi tomogodi yadi nuanua sakoidi 'waidie, nuanuananidi tomogodi 'waidie i veveimeyedi. We'e egavo yadi nuanua i tauyedi 'Anu'anunu 'Atumaina yana nuanua 'waineye, nuanuananidi 'Anu'anunu 'Atumaina 'wainega i veveimeyedi. <sup>6</sup> \*'Ai'edi 'Anu'anunu 'Atumaina yami nuanua i veveimeyediga, mia 'ivauna wata 'atumaina 'wa veveluagai wata Yaubada taiadi 'wa veiana. We'e 'ai'edi tomogomi yami nuanua i veveimeyediga 'wa na wafaotoga. <sup>7</sup> 'Wa na wafaotoga fai 'ai'edi aitoi taunina i tauyeni tomogona yana nuanua sakoidi 'waidie i vegavia Yaubada 'waineye. Tomogonina Yaubada 'ana gavia fai kebu nuanuana Yaubada yana ve'etoboda i na vematayakeyakedi wata mogitana kebu 'ana fata i na vematayakeyakedi. <sup>8</sup> Egavo tomogodi yadi nuanua sakoidi i veveimeyediga, kebu 'ana fata Yaubada i na sosoana faifaiddi.

<sup>9</sup> \*We'e 'omi, 'ai'edi 'Anu'anunu 'Atumaina i agemi 'waimie i miamiaga, tomogomi yadi nuanua kebu i da veveimeyemi, we'e mogitana Yaubada 'Anu'anununa i veveimeyemi. We'e 'ai'edi aitoi Keliso 'Anu'anununa kebu i da ageiga, taunina kebu Keliso yana tomotoga. <sup>10</sup> Tomogomi i na wafa sakona 'wainega, we'e 'ai'edi Keliso i agemi 'waimie i miamiaga, 'anu'anunumi i na mia-vagata fai Yaubada i 'ive'atumaimi.

11 Mogitana tomogomi i na wafa, we'e 'ai'edi Yaubada 'Anu'anununa i agemi 'waimie i miamiaga, Yaubadanina tomogomi i na sivetovoidi wafayega. Ta 'asetai i na sivetovoimi fai Keliso i sivetovoia wafayega wata fai 'Anu'anununa 'waimie i miamia.

*'Ida 'Anu'anunu 'Atumaina i agedaga Yaubada natunavo.*

12 Ekwavo, fai 'Anu'anunu 'Atumaina 'waimie i miamia, i lubwainemi yana nuanua 'wa na 'i'idewadi, we'e kebu i da lubwainemi tomogomi yadi nuanua 'wa na vematayakeyakedi. 13 ✧'Ai'edi tomogomi yadi nuanua sakoidi 'wa na 'i'idewadiga 'awaie 'wa na wafaotoga, we'e 'ai'edi 'Anu'anunu 'Atumaina yana toketokena 'wainega yami sauluva sakoidi 'wa na bailedi 'wa da vo 'wa da luvewafadi, nika yami mia i na ve'atumai mia-vagata 'wa na veluagai. 14 Egavo Yaubada 'Anu'anununa yana nuanua i vonevoned i 'i'idewadiga taunidi Yaubada natunavo. 15 ✧Nagami Yaubada 'wa kololoyeni vematavuloga faifaina 'wa da vo yami kololo i da veimeyemi, we'e tutuya de'e Yaubada 'Anu'anununa i tauyeni i agemi kebu wata kololo i na veimeyemiga. We'e mogitana i agemi bega 'omi Yaubada natunavo wata 'Anu'anununina yana 'aivaita 'wainega ta vebaeda bega 'aitamogana 'aitamogana ta vevegole ta vo, Ie Tamaku." 16 ✧Ta vebaeda 'ida Yaubada natunavo wata Yaubada 'Anu'anununa i ve'awamogitana 'anu'anunuda 'waidie. 17 ✧Fai 'ida Yaubada natunavo 'ai'aiwabunidi i 'idewadi i 'eno'enoviga natunavo faifaidi, 'awaie i na veleda, wata 'ai'aiwabunidi i 'idewadi Keliso faifaina, wata ma fueda faifaيدا taiadi i na veleda. Mogitana i na veleda siwe nagami i lubwaineda vitanidi Keliso i veluagadiga wata bani'odi ta na veluagadi faifaina, mulieta Keliso taiadi 'ai'aiwabunidi magemagetadi ta na 'ewadi.

*'Awaie Yaubada natunavo 'ai'aiwabu i na veluagai.*

18 ✧Vitanidi tutuya de'e ta veveluagadiga Keliso faifaina sai'afu bwaikidi we'e 'ai'aiwabu magemagetadi 'awaie ta na veluagadi Yaubada 'wainega nani bwaikaotogina. Vitanidi faifaidi kebu ta na nuanua. 19 Yaubada 'ana 'idewadewa matatabudi i lulukamata nuanuadi bwaikina nagami Yaubada natunavo i na sivetovoidi. 20-21 ✧I lulukamata fai basenadi bei Adama i sakona Yaubada 'ana 'idewadewa i 'alatabutabudi i venani-'avo'avovo. 'Ana 'idewadewanidi kebu taunidi i da venani-'avo'avovo siwe fai Yaubada nuanuana. Yaubada yana veimeanina 'wainega nani matatabudi i sakosako wata i wafawafa, siwe tutuyanina i 'alatabutabudiga bei i nuani 'awaie i na 'ive'atumaiddi.

✧ 8:13: Gal 6:8 ✧ 8:15: 2 Tim 1:7; Gal 4:6 ✧ 8:16: 1 Ion 4:13 ✧ 8:17: Gal 4:7; Ve 21:7 ✧ 8:18: 2 Kol 4:17 ✧ 8:20-21: Nag 3:17-19; Ve 21:1

'Ida Yaubada natunavo fwayafwaya 'ana vita i yogonida siwe 'awaie i na yavuda yana 'ai'aiwabu magemagetadi i na veleda, wata bani'odi, 'ana 'idewadewa matatabudi i na yavudi i na ve'atumaioletoga.

<sup>22</sup> Yaubada i 'alatabutabudiga i maiga 'asiau tomotoga, 'aisaya, mosomoso wata nani 'ifwaidi i veveviga wata i wafawafa 'wa da vo i da taidaida bani'odi tamu vavine kwamana i tubutubuga i tataidaida. <sup>23</sup> ✧Kebu 'ana 'idewadewa 'aisedi i da tataidaida, wata 'ida yana tomotoga ta tataidaida. Mogitana Yaubada 'Anu'anununa i tauyeni i ageda, 'Anu'anununina yana 'anivelena 'waideye nagami, siwe ta lulukamata ta tataidaida ta vo, Aioe, Yaubada i da vagavaida i da naweda yana 'Aila'a 'waineye bega 'ida natunavo mogitana, tomogoda 'ivaudi ta da veluagadi."

<sup>24</sup> Basenadi ta vetumagana ta nuani mogitana 'awaie ta na luku Yaubada yana 'Aila'a nageneye, bega vetumagananina 'wainega 'ita'ita'i ta veluagai. 'Ai'edi naninina faifaina ta lulukamataga ta da 'ise'iseniga 'ako kebu ma yada vetumagana ta da lulukamaseni. 'Ai'edi tamu tomogo tamu nani nuanuana siwe 'akonadi i veluagai, kebu 'ana fata i na lulukamaseni. <sup>25</sup> We'e 'ai'edi ta na vetumagana tamu nani bola kebu i da souyeni faifaina, ma yada tokemaiga ta lulukamaseni.

<sup>26</sup> Wata, 'ida yada nuanua mweadi, siwe 'Anu'anunu 'Atumaina i 'i'ivaiseda. Kebu ta da 'asetai ava'ai faifaina ta na vevelu'ui wata bani'odi ta na vevelu'uiedi siwe 'Anu'anununina faifaida i vevelu'ui Yaubada 'waineye. Voke kebu 'ada fata yada veviga wata vita 'waidie, bonada i na souyedi, siwe ve'awagusi 'waidiega 'Anu'anunu 'Atumaina i vevelu'ui faifaida. <sup>27</sup> ✧Yaubada velu'uinidi i noganogaidi fai 'ida yana tomotoga yada nuanua i 'asetadi wata 'Anu'anunu 'Atumaina yana nuanua i 'asetadi. We'e ava'ai Yaubada nuanuana i na 'idewaiga 'Anu'anununa 'akonadi i 'asetadi begaidi 'ana fata i na velu'ui Yaubada 'waineye yana tomotoga faifaida.

<sup>28</sup> ✧Wata 'ida Yaubada ta nuakalikalieniga ta 'asetai nani matatabuna i na souyedi 'waideye i na siviladi yada 'atumaina faifaina, 'ida tomotoganida i venua'ivineda ava'ai i nuaniga faifaina. <sup>29</sup> ✧Fai basenadiotoga egavo nagami Yaubada i 'asetadi wata i venua'ivinedi bega 'awaie i na vetuli Natuna bani'odi, we'e Natunanina tatadi bwaikaotogina, taiadi i na miamia. <sup>30</sup> ✧Tomotoganidi Yaubada i venua'ivinediga wata i goledi i nagoi 'waineye,

✧ **8:23:** 2 Kol 5:2-4 ✧ **8:27:** Same 139:1 ✧ **8:28:** Efe 1:11 ✧ **8:29:** 1 Ion 3:2 ✧ **8:30:** 2 Tes 2:13-14

i golediga i 'ive'atumaidi mataneyeye kebu yadi sakonaga, i 'ive'atumaidiga i vetuli bega Yaubada taiadi magemagetadi.

*Yaubada yana nuakalikali 'waideye ta veluagai Iesu Keliso 'wainega.*

<sup>31</sup> Yaubada yana nuanuananidi 'atumaiotogidi 'ida yana tomotoga 'waideye a veifufuyedi, nuanuaku ta na nuanidi. Fai Yaubada nuanuana 'ida, kebu tamu aitoi 'ana fata i na vetoketoke 'waideye. <sup>32</sup> Kebu nuana i da loloiga, Natuna i 'aniveleneni i wafa matatabuda faifaida. Natuna 'akonadi i veleda, siwe wata nuakalikali tulina tulina i na veveledamo. <sup>33</sup> 'Ida Yaubada yana tomotoga vevenua'ivinida, kebu tamu aitoi 'ana fata i na vevitada sakona faifaina fai Yaubada tauniotogina i 'ive'atumaida yada sakona i nuatavunidi. <sup>34</sup> ✧Wata kebu tamu aitoi 'ana fata i na veimea vematavuloga ta na veluagai sakona faifaidi, fai Iesu Keliso yana wafa 'wainega 'ada vematavuloga i evai. Wafanina 'wainega Yaubada i sivetovoia, 'asiau ma yana veimea Yaubada 'ana 'atagiega i miabui i miamia i vevelu'ui faifaida.

<sup>35</sup> ✧Wata kebu tamu ava'ai 'ana fata i na ve'idi'idieda Keliso yana nuakalikali bwaikina 'wainega. 'Ai'edi vita tulina tulina i na souyedi 'waideye bani'odi veviga, mali tomotoga i na vesauluva sakoina 'waideye Keliso faifaina, 'ai'edi ta na lase, 'alo ta na ve'ale'usa tomogoda 'adi baniuma faifaidi, 'alo 'ai'edi tomotoga nuanuadi i na luvewafada, vitanidi de'e kebu 'ana fata i na ve'idi'idieda Keliso yana nuakalikali 'wainega. <sup>36</sup> ✧Vitanidi faifaidi basenadiotoga i kilumi Yaubada yana Buki 'waineye i vo,

Yaubada, fai 'ima yamu tomotoga, bega 'aiata matatabuna 'waidie, 'amu tovedumwe'ai'ai nuanuadi i na luvewafama.

'Ima 'wa da vo 'aisaya i da vunugidi 'adi luvewafa faifaina."

<sup>37</sup> Vitanidi kebu 'adi fata i na ve'idi'idieda kumanina i nuakalikaledaga 'wainega, we'e mogitana 'ada tonuakalikalinina 'wainega ta vevetoketoke-'afo'afo nani matatabuna 'waidie. <sup>38-39</sup> ✧A nuani mogitana 'ai'edi ma yawaida 'alo ta na wafa kebu tamu nani 'ana fata i na ve'idi'idieda Yaubada yana nuakalikali 'wainega. Anelose kebu, yaiaina kebu, 'alo wata tamu nani toketokena. Kebu tamu nani i da 'eno'eno 'alo 'awaie i na souyeni 'ana fata i na ve'idi'idieda. Kebu tamu nani tabwaotoginega 'alo dibuotoginega, 'alo Yaubada yana 'idewadewa matatabuna 'waidiega 'ana fata i na ve'idi'idieda yana nuakalikali 'wainega. Yaubada yana nuakalikalinina 'waideye

✧ 8:34: 1 Ion 2:1; Ibu 7:25

✧ 8:35: 2 Kol 4:8-11

✧ 8:36: Same 44:22

✧ 8:38-39: Ion 10:38

bwaikaotogina, ta 'iseni 'ada Toveimea Iesu Keliso i wafa faifaida.

## 9

### *Faulo i venuafouviga me Isileli faifaidi.*

<sup>1</sup> Ekwavo, nuanuaku a na veifufu tamu nani faifaina, naninina 'eba nuavita bwaikaotogina 'waikuye. Yau Keliso yana tomotoga, bega ta 'asetai naninina a na voneyeniga vona mogitana, kebu a na vekaliemi. Wata a vebaeku 'Anu'anunu 'Atumaina i ve'awamogitana yaku nuanua 'waineye. <sup>2-3</sup> Vona mogitana a nuavita bwaikaotogina wata ma yaku venuafouviga me Isileli faifaidi. A nuavitaga fai tomotoganidi yaku 'aila'a siwe Keliso i vedumwe'ai'aieni 'awaie vematavuloga i na veluagai Yaubada 'wainega i na wafaotoga. A vona mogitana siwe 'ai'edi i da lubwaineniga nuanuaku ekwavo me Isileli 'adi vematavuloganina a da evai wata nuanuaku Keliso i da 'awa'idia 'waikuyega ma'itufa me Isileli i da labinidi. <sup>4</sup> Me Isileli 'adi 'aivaita i veluagadi Yaubada 'wainega, siwe kebu i da vematayakeyakeni. Basenadiotoga Yaubada i venua'ivinedi taunidi yana tomotoga mogitana i vonedi i vo, 'Omi natukwavo.” Yana mageta mataududulina i sivemageseni 'waidie, i veakutagonidi, wata ve'etoboda i veledi. 'Ana subia 'ana 'eda'eda mogitana i vedi, wata yadi mia i na ve'atumaiga faifaina 'waidie i vona'awaufaufa. <sup>5</sup> ✧ 'Aila'anina i souyedi tomotoga bwaikaotogidi 'waidiega bani'odi Ebelamo, Aisake, Iakobo, we'e Keliso Yaubada 'ana Venua'ivina i vetomotogaotoga 'aila'anidi 'waidiega. Kelisonina 'asa'aiana Yaubada, taunina nani matatabuna 'adi Toveimea. I lubwaineda tutuya matatabuna 'waidie ta na subisubiai. Vona mogitana, yaku nuanua bani'odi.

### *Yaubada yana tomotoga vevenua'ivinidi.*

<sup>6</sup> A vonaga me Isileli Iesu i vedumwe'ai'aieni faifaina, we'e kebu a da vo, Yaubada i vona'awaufaufaga me Isileli 'waidie yana nuanua wata i sivilai.” Me Isileli matatabudi, siwe kebu matatabudi Yaubada yana tomotoga fai yadi vetumagana kebu. <sup>7</sup> ✧ Wata bani'odi Ebelamo tubunavo taunidi me Isileli, kebu matatabudi Yaubada yana 'aila'a fai basenadiotoga Yaubada kebu i da vona Ebelamo natunavo matatabudi faifaidi, Aisake 'aisena faifaina i vona i vo,

Natumu Aisake 'aisena 'wainega 'amu 'aila'a i na souyedi.”

<sup>8-9</sup> ✧ Vonanina 'ana 'asete Ebelamo tubunavo kebu matatabudi Yaubada natunavo fai yana vona'awaufaufa Ebelamo 'waineye side bani'odi i vo,

A vonevonemu tutuya de'e bani'odi wata a na mai, bei Sela i na venatuna.”

Fai bani'odi Yaubada i voneyedi ta 'asetai Ebe-lamo tubunavo mogitana, kumanidiavo i souyedi vona'awaufaufanina 'wainega.

<sup>10-12</sup> ✧ Natunanina i tubuga i goleni Aisake, taunina me Isileli tubudi, mulieta i taulai Libeka taiadi i nagi. Sai'afoga natulugaluga i na venatunedi Yaubada i vonedi i vo, Tulaina i na vetofolova bwasiona 'waineye.” Bola kebu i da tubugaga Yaubada bwasiona Iakobo i venua'ivineni yana nuanua i na 'idewai, we'e tulaina Iso i na vetofolova taina 'waineye. Wata fai bola kebu i da tubugaga, bega kebu tamu ava'ai 'atumaina 'alo sakoina i da 'idewai, Yaubada Iakobo i venua'ivineni fai yana venua'ivina kebu tomotoga yadi sauluva 'waidiega, siwe taunina yana nuanua 'wainega. <sup>13</sup> ✧ Yana venua'ivinanina faifaina tamu yana vona i 'eno'eno yana Buki nageneye i vo,

Iakobo nuanuaku, we'e Iso kebu.”

<sup>14</sup> Fai Yaubada tamu tomogo nuanuana we'e tamu tomogo kebu nuanuana, voke 'wa vo, Awale Yaubada yana veimea kebu tonovinaga?” Kebu bani'odi 'wa na voneyediga.

<sup>15</sup> ✧ Yana venua'ivina 'ana 'asetai faifaina basenadiotoga Yaubada Mosese i voneni i vo,

'Ai'edi nuanuaku tamu aitoi a na 'isanuakalikalieniga, a na 'isanuakalikalienimo.

'Ai'edi nuanuaku tamu aitoi ma yaku nuakalikali a na vesauluva 'atumaina 'waineye, a na vesauluva-'atumaalienimo.”

<sup>16</sup> ✧ Fai bani'odi i voneyediga bega ta 'asetai Yaubada yana venua'ivina kebu tomotoga yadi nuanua 'wainega 'alo yadi sauluva 'atumaidi 'waidiega, we'e mogitana egavo Yaubada i na 'isanuakalikaliadi, tomotoganidi i vevenua'ivinedi.

<sup>17</sup> ✧ Yaubada yana venua'ivina 'ana vona i 'eno'eno yana Buki 'waineye, vonanina 'wainega Mosese i vona me Itifita yadi toveimea bwaikina 'ana wagava Felo 'waineye. Yaubada i vo,

Yau a vona 'u ve-kini ava'ai a nuaniga faifaina.

Naninidi a na 'idewadi 'waimuye, 'waidiega yaku toketokena a na sivemageseni bega tomia fwayafwaya matatabudi i na 'asetaku yau Yaubada mogitana.”

<sup>18</sup> Fai Yaubada bani'odi i voneyedi ta 'asetai 'ai'edi nuanuana tamu aitoi i na 'isanuakalikalieni, i na 'isanuakalikalienimo, we'e 'ai'edi kebu nuanuana tamu aitoi yana nuanua i na tauya-matayo'oyeni tamu nani faifaina, nuafouna Yaubada i na kiavefa'ali.



*Yaubada yana nuakalikali wata yana nuasako Faulo i veifu-fuyedi.*

<sup>19</sup> Voke 'ifwaimi 'wa vonavona 'wa vo, Yaubada tomotoga 'ifwaidi nuafoudi i kikiavefa'alidi, vetuma awale i sakosakonga i awavesakoyedi? Ava'ai Yaubada i nuaniga kebu tamu aitoi 'ana fata i na talabodeni.” <sup>20</sup> \*Ekwavo, 'omi 'wa da vo bwaikimi Yaubada 'wa 'uva'uvani. 'Ai'edi nau ma 'awanaga kebu i da lubwaineni i da vo, 'Omu 'aku to'abi, awale bani'odi 'u 'abiku?” <sup>21</sup> \*Nau 'ana to'abi ma yana veimea fwayafwaya 'waineye. Fwayafwayanina 'akonadi i 'idewaiga 'wainega 'ana fata tamu nau 'atumaina i na 'abia i na kilumi 'eba 'ani faifaina, we'e tamu i na 'abia ta'ula-'avo'avovo.

<sup>22</sup> Yaubada nau 'ana to'abi bani'odi, 'ida tomia fwayafwaya i 'idewada bega ma yana veimea 'waideye. Tomotoga 'ifwaidi i 'idewadi bega yana toketokena wata yana nuasako i na sivemagesedi. Tomotoganidi i sakosakona i lubwainedi 'adi vematavuloga i da wafaotoga siwe Yaubada i tokemaiga kebu vematavuloga i da vele-matayo'odi. 'Ai'edi Yaubada nuanuana yana toketokena wata yana nuasako i na sivemagesedi tomotoganidi 'waidiega, we'e 'wa na 'uvani kebu i da lubwaineniga. <sup>23</sup> Yaubada i tokemaiga tosakonanidi kebu i da leodi tomotoga 'ifwaidi 'adi 'aivaita faifaina, kumanidiavo basenadiotoga i venua'ivinedi wata i 'idewadi bega i na 'isanuakalikali. Nuanuana yana 'ai'aiwabu magemagetadi i na sivemagesedi 'waidie. <sup>24</sup> Tomotoganidi i venua'ivinediga, 'asa'aiana 'ida. Kebu me Diu 'aisedi 'waidiega, siwe wata mali tomotoga 'waidiega i venua'ivineda bega yana 'ai'aiwabu magemagetadi ta na veluagadi. <sup>25</sup> \*Omi mali tomotoga kebu me Diu i venua'ivinemiga faifaina basenadiotoga tamu Yaubada yana tolu'ivona 'ana wagava Osea i kiluma. Yaubada i vona i vo,

Mali tomotoga taunidi kebu me Diu nagami kebu yaku tomotoga, siwe 'asiau a na vo, Yaku tomotoga.”

We'e 'aila'anina nagami kebu a da nuakalikali, siwe 'asiau a na vo, A nuakalikaliemi.”

<sup>26</sup> \*Awalawanina 'waineye nagami a vonedi a vo, 'Omi kebu yaku tomotoga,” 'asiau 'awalawanina 'waineye a na vo, Yau Yaubada Mia-mia-vagaiku natukwavo 'omi.”

<sup>27</sup> \*We'e basenadiotoga tamu Yaubada yana tolu'ivona 'ana wagava Aisea i vegolegole me Isileli faifaiddi i vo,

'Ai'edi me Isileli 'adi 'aila'a i na vefue wala'ai 'ana 'ilukulukuta bani'odi, siwe 'adi 'aivia bani'odi 'ita'ita'i i na veluagai.

\* 9:20: Ais 45:9    \* 9:21: Iel 18:6    \* 9:25: Ose 2:23    \* 9:26: Ose 1:10

\* 9:27: Ais 10:22-23

28 Kebu fuedi 'ita'ita'i i na veluagai fai tomia fwayafwaya matatabudi 'adi vematavuloga i na veluaga-matayo'oi 'Auvea 'wainega. Yadi sakona i na tutula-vagasedi.”

29 ✧ Wata bani'odi Aisea i vona-vagata me Isileli faifaidi i vo, 'Auvea Toketokeotogina i tauyeda 'ada 'aila'a 'ifwaidi ma yawaidi i miamiani,

'Ai'edi kebu, 'ako matatabuda i da leoda bani'odi basenadi me Sodoma wata me Gomola i leodi.”

*Me Diu kebu nuanuadi i na vetumagana Keliso 'waineye.*

30 Vonanidi a veifufuyediga 'adi 'asete side bani'odi. Mali tomotoga taunidi kebu Diu kebu i da vetafewa 'adi 'ive'atumai Yaubada mataneyeye faifaina, siwe yadi vetumagana 'wainega Yaubada i 'ive'atumaidi. 31 We'e me Isileli i vetafewa nuanuadi taunidi i na 'ive'atumaidi Yaubada mataneyeye ve'etoboda 'adi vematayakayaka 'waidiega, nika i vetafewa-wayoga. 32 Kebu i da ve'atumaiga Yaubada mataneyeye fai kebu ma yadi vetumagana taunidi i da tauyedi Yaubada 'waineye, nuanuadi taunidi yadi folova wata igodi yadi vematayakayaka 'waidiega i da ve'atumai. Tomotoganidi i baila, kebu nuanuadi i na vetumagana Iesu 'waineye begaidi vita i na veluagai. Iesu bani'odi 'unututu vanuga 'eba velu'ui nageneye, tomotoganidi 'wa da vo folovanina i da tayaidi. 33 ✧ 'Adi 'agetaya wata folovanina, faifaidi basenadiotoga i kilumi Yaubada yana Buki 'waineye. Yaubada i vo,

A na vonemi, yaku 'atamana Saioni 'waineye tamu folova a sisivetovoia, folovanina 'waineye tomotoga i na tayaidi i na be'ube'u.

We'e egavo i na vetumagana folovanina 'waineye kebu i na vetumagana-maimaiga, mogitana 'aivaita i na veluagai.”

## 10

*'Ada 'ive'atumai Yaubada 'aiseotogina 'wainega.*

1 Ekwavo, nuanuaku bwaikina yaku 'aila'a me Isileli 'ita'ita'i i na veluagai Yaubada 'wainega begaidi tutuya matatabuna a vevelu'ui faifaidi. 2 A 'asetadi bega 'aku fata a na lu'ivona me Isileli i dumwebika Yaubada faifaina siwe ava'ai Yaubada nuanuana bavubavudi bega i folovaimaiga. 3 ✧ I bavuga fai kebu i da 'asetai Yaubada bani'odi i munegidi tomotoga i ve'atumai mataneyeye. Taunidi yadi nuanuayega i vo, Ve'etoboda 'a na vematayakeyakediga 'a na ve'atumai Yaubada mataneyeye.” Siwe kebu nuanuadi taunidi i na tauyedi Yaubada 'waineye bega i na 'ive'atumaidi.

4 Ve'etoboda i maiaga Mosese 'wainega i 'eno'novi nika Keliso i mai, ve'etobodanidi tutulidi, bega egavo ma yadi

vetumagana taunidi i na tauyedi Keliso 'waineye Yaubada i na 'ive'atumaidi nika yadi sakona kebu.

*Tomotoga matatabudi 'adi fata 'ita'ita'i i na veluagai.*

<sup>5</sup> Me Isileli yadi 'asete, 'ai'edi Yaubada yana ve'etoboda matatabuna i na vevematayakeyakedi i na 'ive'atumaidi mataneye. Basenadiotoga Mosese 'adi 'ive'atumainina faifaina i kilumi i vo,

'Ai'edi aitoi ve'etoboda matatabuna i na vematayakeyakedi, Mia 'atumaina wata miamia-vagaina i na veluagai.”

<sup>6-7</sup> We'e vetumaganayega ta na ve'atumai Yaubada mataneye 'ana vona i vo,

Kebu taunimi yami nuanuayega 'wa na vo, Aitoi i na laka Keliso i na obuyedima abamega?”

Wata kebu 'wa na vo, Aitoi i na obu towafa yadi 'eba mia 'waineye Keliso i na voneni i na souyeni?”

Kebu bani'odi 'wa na voneyediga fai Keliso 'akonadi i obuma wata wafayega 'akonadi i tovoi. <sup>8</sup> ✧ We'e tamu vona Yaubada yana Buki nageneye i vo,

Yaubada yana Vona lilivamie i 'eno'eno,

Nuamie 'wa nuanuanidi wata 'wa vonevoneyedi.”

Yaubada yana Vonanina 'waineye ta vetumaganaga, faifaina a lalau'age 'waimie. <sup>9</sup> 'Ai'edi tomotoga matadie 'wa na vo, Iesu 'aku Toveimea, tauniku a tauyeku 'waineye,” wata 'wa na vetumagana Yaubada i sivetovoia wafayega, Yaubada i na 'ita'ita'iemi sakona 'waidiega. <sup>10</sup> I na 'ita'ita'iedaga fai ta vetumagana bega ta ve'atumai Yaubada mataneye we'e ta lu'ivonaga ta vo, Iesu 'ada Toveimea,” bega Yaubada i 'ita'ita'ieda. <sup>11</sup> ✧ Yada vetumagana Keliso 'waineye, faifaina tamu vona i 'eno'eno Yaubada yana Buki 'waineye i vo,

'Ai'edi aitoi i na vetumagana 'waineye kebu i na vetumagana-maimaiga, 'aivaita i na veluagai.”

<sup>12</sup> ✧ Vonanina a voneyeniga tomotoga matatabuda faifaida, me Diu wata mali tomotoga taunidi kebu me Diu, matatabuda 'ada vona fai matatabuda 'ada Toveimea 'aitamogana. Egavo ma yadi vetumagana i na velu'ui 'ada Toveimeanina 'waineye i na vevesauluva 'atumaiotogina 'waidie. <sup>13</sup> ✧ Fai wata tamu yana vona i vo,

Tomotoga matatabudi i na velu'uiga 'Auvea 'ada Toveimea 'waineye 'aivaita faifaina, 'ita'ita'i i na veluagai.”

<sup>14-15</sup> ✧ Siwe 'ai'edi kebu i na vetumagana 'waineye, kebu 'adi fata i na velu'ui 'aivaita faifaina, wata 'ai'edi 'ada Toveimea Valana kebu i na nogaiga kebu 'adi fata i na vetumagana.

✧ 10:8: VeL 30:14 ✧ 10:11: Ais 28:16 ✧ 10:12: Kolos 3:11; Gal 3:28

✧ 10:13: Ioe 2:32 ✧ 10:14-15: Ais 52:7

Wata 'ai'edi kebu tamu aitoi Valanina i na lu'ivoneyeniga kebu 'adi fata i na nogaiga, wata 'ai'edi tovetune kebu, to-lau'age kebu i na vetuneiga nika kebu 'ana fata tamu aitoi Iesu Valana i na lu'ageyeni. Siwe Yaubada 'akonadi tolau'age i vetunedi, yana Buki nageneye i vo,

Egavo Vala 'Atumaina i mieniga yadi mai nani 'atumaotogina.”

16 ✧Tomotoganidi Valanina Iesu faifaina i nogaiga, siwe kebu matatabudi i da ve'awamogitana. Aisea tobailanidi faifaidi i vona i vo,

'Auvea, valamu 'a lulu'ageyeni, siwe kebu fuedi i da ve'awamogitana.”

17 Bega tolau'age Keliso Valana i na lu'ageyeni, tomotoga i na nogai, nika 'ifwaidi i na vetumagana.

18 ✧We'e me Isileli, Keliso Valana i nogai 'alo kebu?

Manava'a i nogai, i nogaiga faifaina basenadiotoga i kilumi Yaubada yana Buki 'waineye i vo,

I lau'age-vuvua tomia fwayafwaya matatabuna 'waidie bonadi i nogai,

Fai mogitana bani'odi, tomotoga 'awalawa 'aitamogana 'aitamogana 'waidie i 'asetai.”

19-20 ✧We'e Valanina me Isileli i 'asetai 'alo kebu? E'e, i nogai wata i 'asetai, siwe fai kebu nuanuadi i na vetumagana, Yaubada taunina i sivemageseni mali tomotoga 'waidie bega taunidi yana tomotoga. Nuanuana me Isileli i na ve'unumagigi 'waidie bega 'ai'edi i da nuaviladi i da vetumagana 'waineye. Yaubada yana vona me Isileli faifaidi nagami Mosese i kilumi i vo,

'Omi me Isileli yami nuanua 'wa vo, Mali tomotoga nani-'avo'avovo, taunidi 'wava'wavadi.”

We'e yau a na vona tomotoganidi faifaidi a na vo, Tau-nidi yaku tomotoga.” Begaidi 'omi 'wa na nuasako 'wa na ve'unumagigiedi.”

Mulieta Aisea ma yana venuafoufa'ala Yaubada yana vona i lu'ivona me Isileli 'waidie i vo,

Egavo kebu i da lulualekuga 'akonadi i veluagaku,

Egavo kebu faifaiku i da nuanuaga, 'waidie tauniku a sivemageseku.”

21 ✧We'e me Isileli-nidi faifaidi Yaubada i vo,

Tutuya matatabuna a lulukamata nuanuaku bwaikina i na maia 'waikuye.

Siwe taunidi tovemata'wana'wana, kebu nuanuadi a na veveimeyediga.”

✧ 10:16: Ais 53:1    ✧ 10:18: Same 19:4    ✧ 10:19-20: VeL 32:21; Ais 65:1

✧ 10:21: Ais 65:2

## 11

*Yaubada taunina yana tomotoga me Isileli i 'i'isanuakalikaliedi.*

<sup>1</sup> ✱Yau a vonavona me Isileli Yaubada i vedumwe'ai'aieniga faifaina, bega 'wa da nuani? Taunina yana tomotoga i awa'idi'idiedi 'alo nuanuana? A nuani nuanuana, kebu i da awa'idi'idiediga. Yau wata bani'odi tomotoga Isileli, yau tamu Ebelamo tubuna, we'e aisena Beniamina 'ana wauma 'wainega a souyeku, siwe Yaubada kebu i da awa'idi'idieku.

<sup>2-3</sup> ✱Yana tomotoganidi me Isileli basenadiotoga Yaubada i venua'ivinediga kebu i da awa'idi'idiediga. 'Wa na nuani, Ilaitia ifufuna Yaubada yana Buki nageneye. Ilaitia me Isileli i awavesakoyedi Yaubada mataneye i vo,

'Auvea, me Isileli yamu tolu'ivonavo i luvewafadi, yamu 'eba velomu i talageugeudi, yau 'aiseku 'amu tonuakalicali a miamia, nuanuadi wata yau i na nikeku a na wafa."

<sup>4</sup> ✱Siwe Yaubada Ilaitia bonana i tutuli i vo,

'Omu kebu 'aisemuga, yaku tomotoga 7,000 i miamiani, we'e kumaea tomotoga 'ifwaidi igodi yadi yaubada 'ana wa-gava Beli 'waineye kebu i da 'odu'oduga."

<sup>5</sup> 'Asiau wata bani'odi, me Isileli matatabudi kebu Yaubada i da baileni, Yaubada ma yana nuakalicali 'ifwaidi i venua'ivinedi 'ita'ita'i i veveluagai. <sup>6</sup> I vevenua'ivinediga, kebu yadi sauluva 'atumaidi faifaiddi, we'e mogitana yana 'isanuakalicali 'wainega i venua'ivinedi. 'Ai'edi Yaubada tomotoga yadi sauluva 'atumaidi i da 'isedi bega tomotoganidi i da venua'ivinedi, 'ako yana 'isanuakalicali 'wa da vo tutula yadi sauluva 'atumaidi faifaiddi, bega kebu 'isanuakalicali mogitana.

<sup>7</sup> Ava'ai a voneyeniga 'ana nuanua side bani'odi. Me Isileli i vetafewa igodi nuanuadi i da ve'atumai Yaubada mataneye siwe i vetafewa-wayoga. Tomotoga kebu fuediga Yaubada i venua'ivinedi i ve'atumai mataneye, we'e me Isileli 'ifwaidi i baila yadi venuafoufa'ala Yaubada i 'ivebwaika'a'avadi.

<sup>8</sup> ✱Yadi bailanina faifaina basenadiotoga i kilumi Yaubada yana Buki 'waineye i vo,

Yaubada nuadi i kiavegaugaudi bega kebu 'adi fata i na 'asetai wata i na venua'ivina-'atumai.

Tanigadi wata matadi i 'ibodadi, tutuyanina 'wainega i maiga 'asiau kebu i da 'isa'inanaiga wata i da nogaya'inanai."

<sup>9</sup> ✱Wata bani'odi Kini Devida me Isileli i tolive'ededi i vo,

Yadi sakali 'waidie i sosoana-'avo'avovo 'adi'adi bwaikina faifaina, tutuyanina 'waineye nuanuaku Yaubada i da tayaidi i da be'u vita i da veluagai, 'adi vematavuloga i da veledi.

<sup>10</sup> Nuanuaku matadi i da 'ibodadi bega kebu 'adi fata i na 'isadewa wata vita fueidi i da veveledi 'wa da vo tutuya fueidi venuana i da akuve'obwa'obwadi."

*Tomotoganidi kebu me Isileli 'ita'ita'i i veluagai.*

<sup>11</sup> ☆Tutuyanina me Isileli Iesu Keliso i baileni i tayaidi i be'u. 'Wa da nuani, i be'u-vagata bega Yaubada i baila-vagasedi? Kebu'a'avaotoga, siwe fai i sakona ma'itufa mali tomotoga taunidi kebu me Isileli 'ita'ita'i i veluagai bega me Isileli i na ve'unumagigi 'waidie. I na ve'unumagigiediga bega 'ai'edi i da nuaviladi i da vetumagana Iesu 'waineye. <sup>12</sup> Fai me Isileli i sakona Iesu Keliso i baileni, tomia fwayafwaya matatabuda Yaubada yana nuakalikali bwaikina ta veluagai. Fai me Isileli yana nuakalikalina kebu i da velugaiga mali tomotoga taunidi kebu Isileli 'ai'aiwabu 'atumaidi Yaubada i veledi. Me Isileli yadi bailanina faifaina bega mali tomotoga nuakalikali bwaikina ta veluagai, siwe 'awaie tutuyanina me Isileli i na nuaviladi i na vetumagana Keliso 'waineye mogitana ma fueda 'ada nuakalikali wata yada 'ai'aiwabu 'atumaiotogidi ta na veluagadi Yaubada 'wainega.

<sup>13-14</sup> 'Omi 'wa miamiani Loma, 'ifwaimi kebu me Diu, bega tutuya de'e 'waimie a na veifufu. 'Akonadi 'wa 'asetai Yaubada i venua'ivineku a vetomata'aulele 'omi kebu me Diu faifaimi. Yaku folovanina a awa'ai'aia yaku 'aila'a me Diu matadie bega 'ai'edi i na ve'unumagigiemi 'ita'ita'i 'wa velugaiga faifaina, 'ifwaidi i da nuaviladi Iesu Keliso 'waineye nika ma fuemie 'ita'ita'i 'wa na veveluagai. <sup>15</sup> Tutuyanina Yaubada me Diu i mia'ubuidi ma'itufa tomia fwayafwaya 'ifwaidi i veianedi. Siwe 'awaie me Diu i na nuaviladi, Yaubada nuanuana i na nagoi 'waineye mia 'ivauna wata 'atumaina i na veluagai. Yadi mianina 'wa da vo towafa i da yawasa.

<sup>16</sup> Tamu 'eba 'isa side bani'odi. 'Ai'edi 'ayavau 'wa na 'aile'wa 'ani'ani 'ifwaidi 'wa na 'anivelenedi Yaubada 'waineye, siwe 'asa'aiana 'ani'ani matatabuna 'akonadi 'wa 'anivelenedi. Wata bani'odi 'ai'edi tamu yami welavi 'walamina 'wa na 'anivelenedi Yaubada 'waineye, siwe 'asa'aiana tolobwana wata didina 'akonadi 'wa 'anivelenedi, welavinina matatabuna Yaubada yana welavi. Wata bani'odi basenadiotoga Ebelamo wata me Diu 'ifwaidi i vetumagana Yaubada 'waineye, faifaidi Yaubada i vo, Taunidi yaku tomotoga," siwe 'asa'aiana 'akonadi me Diu matatabudi Yaubada yana tomotoga.

<sup>17</sup> Me Diu bani'odi welavi 'ana wagava Olive i tabotabo bakule, we'e 'omi mali tomotoga kebu Diu bani'odi welavi Olive-walawala'ai. Welavinina bakule didina 'ifwaidi

Yaubada i baidi i yatodi, mulieta welavi wala'aiega i ilidi i miedi i sifwasedi i baidiga 'waidie. Ufana i 'ivebikadi i luvedavedamanidi nika welavi 'aitamogana. Me Diu i vetumagana Yaubada 'waineye bani'odi welavi bakule ma 'walamina, we'e 'omi mali tomotoga kebu Diu bani'odi welavi wala'aiega ililina i sifwasedi yana welavi 'waineye. Welavi bakulayega ufaninega welavi wala'aiega i 'iveyauyauvi, wata bani'odi 'omi mali tomotoga kebu Diu, 'wa vevetoketokega me Diu 'adi nuakalikali 'wainega. <sup>18</sup> Begaidi kebu i da lubwainemi me Diu, kumanidiavo Yaubada i baidiga 'wa na awavesakoyedi. Fai yami toketokena 'wa veveluagai me Diu 'walamidiega we'e 'omi 'wa fwatafwatamo, bega kebu 'wa na awa'ai'aimiga.

<sup>19</sup> Voke 'ifwaimi 'wa na vo, Mogitana 'a vetoketoke 'waidiega, Yaubada me Diu i baidi bega 'awasaanina i velema. <sup>20</sup> 'Wa vonaga, mogitana, fai kebu i da vetumagana begaidi i baidi, we'e 'omi 'wa vetumaganaga ma'itufa 'awasaanina 'waineye 'wa miamia. Siwe kebu taunimi 'wa na awa'ai'aimi, i lubwainemi 'wa na kololo. <sup>21</sup> Me Diu Yaubada yana welavi didina mogitana, siwe i sakona kebu i da ve'ise'isediga i baidi. We'e 'omi, fai wala'aiega, 'wa na sakonaga, mogitana i na baimi.

<sup>22</sup> ✧Fai Yaubada bani'odi i na munegida ta 'asetai yana nuakalikali bwaikaotogina wata yana veimea toketokena. Egavo i be'u sakona 'waineye i vematavulogidi, we'e 'omi i nuakalikaliemi. 'Ai'edi yami vetumagana 'wa na yato-vagaseni 'waineye tutuya fuedi i na nuakalikaliemi, 'ai'edi kebu, 'omi wata i na baimi. <sup>23</sup> We'e me Isileli, 'ai'edi i na nuaviladi ma yadi vetumagana taunidi i na tauyedi Yaubada 'waineye, i na sifwatagi-vaituganidi. Yaubada 'ana fataotoga me Isileli-nidi i na veviladi 'adi 'ivie.

<sup>24</sup> Ava'ai a voneyeniga side bani'odi. 'Omi mali tomotoga kebu Diu bani'odi welavi wala'aiega ilina Yaubada i ilimi i sifwasemi welavi bakule 'waineye 'wa luvedavedamanimi, nika 'omi bani'odi welavi 'aitamogana. Fai 'omi wala'aiega 'ami sifwatagi vitana. We'e me Isileli taunidi bani'odi welavinina bakule didina Yaubada i baidi, bega 'adi sifwatagi 'alo yadi vila-vaitugana safailaotogina Yaubada 'waineye fai taunidi welavinina didina mogitana.

*Yaubada matatabuda i 'isanuakalikaliada.*

<sup>25</sup> Ekwavo, nuanuaku 'wa na 'asetai Yaubada yana nuanua basenadi i giveni siwe tutuya de'e i sivemageseni. Nuanuanina 'wa na 'asetai bega kebu taunimi 'wa na awa'ai'aimi 'wa na vo, 'Ima tomotoga 'atumaima 'a luku Yaubada yana

'Aila'a 'waineye, we'e me Isileli i bailedi.” Yana nuanuanina side bani'odi. Me Isileli 'ifwaidi i venuafoufa'ala kebu nuanuadi i na vetumagana Keliso 'waineye. Siwe kebu i da venuafoufa'ala-vagata, nagami tomotoganidi tau-nidi kebu Diu basenadiotoga Yaubada i venua'ivinedi i na lukuluku 'waineye nika 'adi 'aila'anina Yaubada nuanuana i na veluagai, mulieta me Isileli i na nuaviladi wata i na luku. <sup>26</sup> \*Side bani'odi Yaubada me Isileli matatabudi i na 'ita'ita'iedi. 'Adi 'ita'ita'inina faifaina Yaubada yana vona basenadiotoga Aisea i kilumi yana Buki 'waineye i vo,

To'ita'ita'i i na mai 'atamana Ielusalema\* 'wainega,  
Me Diu i na kiavenuaviladi kebu wata i na sakosakonaga.

<sup>27</sup> Tutuyanina 'waineye yadi sakona a na 'u'umidi,  
Bani'odi basenadi a vona'awaufaufa.

<sup>28</sup> Basenadiotoga Yaubada me Diu tubudiavo bwaikidi i venua'ivinedi wata i vona'awaufaufa 'waidie tubudiavo wata taunidi i na vesauluva-'atumaina 'waidie. Siwe fai me Diu Iesu Keliso Valana i baila Yaubada i vegaviedi, ma'itufa 'omi mali tomotoga 'ita'ita'i 'wa veluagai. Siwe fai Yaubada i vona'awaufaufa me Diu tubudiavo 'waidie yana nuakalikali bwaikina i 'eno'eno 'waidie. <sup>29</sup> Kebu 'ana fata Yaubada yana vona'awaufaufa i na lugeuya 'alo yana nuakalikali i na 'ailove. <sup>30</sup> 'Omi mali tomotoga kebu Diu basenadi Yaubada yana nuanua 'wa baila, siwe fai me Diu wata yana nuanua i baila ma'itufa 'asiau Yaubada i 'isanuakalikaliemi. <sup>31</sup> Wata bani'odi fai 'omi mali tomotoga Yaubada i 'isanuakalikaliemi bega 'asiau me Diu i baibaila, we'e 'awaie wata ma fuemie Yaubada i na 'isanuakalikaliemi. <sup>32</sup> Mogitana tomotoga matatabudi i sakona i lubwainedi 'adi tutula wafa 'wa da vo Yaubada i da yogonidi vematavuloga faifaina. I yogonidiga bega 'ana fata matatabudi i na 'isanuakalikaliiedi.

*Yaubada ta na subiai.*

<sup>33</sup> Vona mogitana, Yaubada kebu ta na vona.

Yana 'ai'aiwabu bwaikaotogina, yana 'aseta manamanaweotogina tutuya fuedi i vevenua'ivina 'atumaina.

Yana nuanua i 'i'idewadiga kebu tamu aitoi 'ana fata i na 'asetadi 'alo nimana i na salai.

<sup>34</sup> \*Kebu tamu aitoi 'ana fata 'Auvea yana nuanua i na 'asetadi wata kebu tamu aitoi 'ana fata i na awave'ede'edeni.

<sup>35</sup> Taunina nani matatabuna 'adi to'anivelena bega kebu tamu aitoi 'ana fata tamu nani i na velenina i na vo, 'U tutuli.”

<sup>36</sup> \*Nani matatabuna i souyedi nimanega, yana toketokena 'wainega ma yawaidi i miamiani, 'waidiega 'ana subia i veveluagai.

\* **11:26:** Ais 59:20-21      \* **11:26:** 'Ana mogitana Saioni, Ielusalema tamu 'ana wagava.      \* **11:34:** Ais 40:13; Iob 41:11      \* **11:36:** 1 Kol 8:6



Yana 'ai'aiwabu magemagetadi miamia-vagaidi,  
I lubwaineda fueda ta na subisubiai tutuya matatabuna  
'waidie.  
Vona mogitana, yaku nuanua bani'odi.

## 12

*Taunida ta na tauyeda Yaubada 'waineye.*

<sup>1</sup> ✧Ekwavo, vona mogitana Yaubada yana 'isanuakalikaili bwaikaotogina 'waideye begaidi a na vonemi. I lubwainemi nuanuaku tomogomi wata yami nuanua 'wa na tauyedi Yaubada 'waineye. Basenadi tomotoga yadi 'aisaya i mimaiedi i nikenikedi mulieta i 'a'anivelenedi Yaubada 'waineye 'ana subia faifaina. We'e 'omi tutuya matatabuna ma yawaimi taunimi 'wa na 'a'anivelenemi Yaubada 'waineye, yami sauluva wata yami folova faifaina magemagetadi, 'waidiega 'wa na kiavesosoani. Sauluvanina tafalolo yana 'eda'eda mogitana, i lubwainemi bani'odi 'wa na vevesauluvedi. <sup>2</sup> ✧Tomotoga fuedi fwayafwaya 'ana nuanua 'waidie i vebwaika, we'e 'omi kebu wata 'wa na vetutuyamediga. Taunimi 'wa na tauyemi nika Yaubada yami nuanua i na 'ive'ivaudi bega yami sauluva wata yami nuanua matatabuna i na vetuli. I na vetuliga mulieta 'ami fata 'wa na 'asetai ava'ai Yaubada nuanuana 'wa na 'idewai, yana nuanuanidi 'atumaidi, tonovidi, yana 'eba sosoana.

<sup>3</sup> ✧Yaubada ma yana nuakalikali i venua'ivineku a vetomata'aulele faifaina, bega a na vonemi. Kebu i da lubwainemi taunimi 'wa na awa'ai'aimi 'wa na vo, 'Ima bwaikima, ma yama toketokena 'a vetofolova Yaubada faifaina." We'e mogitana nagami 'wa na nuanua tonovina taunimi faifaimi 'wa na venua'ivina-'atumai, yami vetumagana Yaubada i velemiga 'wa na nuani bwaikina 'alo siaina, nika 'wa na 'asetai 'omi bwaikimi 'alo siaimi. <sup>4</sup> ✧Tomogoda 'aitamogana we'e du'uda fuedi, yadi folova tulina tulina. <sup>5</sup> Wata bani'odi 'ida Keliso du'una. 'Ida fueda, yada folova tulina tulina, siwe fai ta miave'itubama taunina taiadi, bani'odi tomogo 'aitamogana i souyeni. Ta luvetubamaga ta ve'ivaivaita kebu 'ana fata tamu du'u i na mia'eni. <sup>6</sup> ✧Yaubada ma yana nuakalikali 'aitamogana 'aitamogana 'ada veuveuta i veleda. 'Ada veuveutanidi ta na folovedi 'adi 'etowava bani'odi. 'Ai'edi tamu aitoi 'ana veuveuta lu'ivona, i lubwaineni 'Anu'anunu 'Atumaina i na voneniga i na lu'ivona tovetumagana 'waidie yana vetumagana 'ana 'etowava 'wainega. <sup>7</sup> 'Ai'edi aitoi 'ana veuveuta 'aivaita, i lubwaineni i na 'aivaita-'atumai, we'e aitoi 'ana veuveuta

✧ 12:1: Lom 6:13 ✧ 12:2: Efe 4:22-24, 5:17 ✧ 12:3: Efe 4:7 ✧ 12:4: 1 Kol 12:12 ✧ 12:6: 1 Kol 12:7-10; 1 Fit 4:10-11

ve, i na kikiavemageta 'atumaina. <sup>8</sup> 'Ai'edi tamu aitoi 'ana veuveuta 'ivenua-agiagi, i lubwaineni yana lau'age wata yana vona 'waidiega i na 'a'aivaita. 'Ai'edi aitoi mani 'alo 'ani'ani i na veluagadi Yaubada 'wainega, i lubwaineni ma yana nuakalikali i na 'a'aivaita. 'Ai'edi aitoi 'ana veuveuta veto'edakumeta, i lubwaineni ma yana dumwebika tomotoga i na 'i'isave'avinidi, we'e aitoi to'isanuakalikali, i lubwaineni kebu i na 'isanuakalikalimo ma yana sosoana i na vevesauluva 'atumaina tomotoganidi nuanuadi 'aivaita 'waidie.

### *Nuakalikali.*

<sup>9</sup> ✧Kebu 'awami i na vo, Nuakalikali,” i lubwainemi 'wa na nuakalikali mogitana. Sakona matatabuna 'wa na vedumwe'ai'aiedi nani 'atumaidei 'waidie 'wa na vevetoke-toke. <sup>10</sup> 'Omi 'wa luku Iesu yana 'Aila'a 'waineye, begaidi ma emiavo 'wa na vevenuakalikali mogitana, wata 'wa na veve'ililibu, kebu 'aise'avami faifaimi 'wa na nuanua. <sup>11</sup> ✧Ma yami dumwebika 'wa na folofolova 'Auvea faifaina, kebu 'wa na 'abiawa 'wa na tokemaigemi. <sup>12</sup> ✧Ava'ai 'wa nuaniga mogitana 'awaie Yaubada i na veleme, faifaidei 'wa na sososoana, vita i na souyediga 'waimie 'wa na tokemaigemi, wata tutuya fuedi 'wa na vevelu'ui. <sup>13</sup> Emiavo tovetumagana 'ifwaidi nani 'waidie i na 'usaga 'wa na 'ivaisedi yami kukuayega. Wakawaka 'adi 'ivi 'wa na lubutubutudi i na lakawa 'waimie.

<sup>14</sup> ✧'Ai'edi egavo vita i na veleme fai 'omi Keliso yana tomotoga, kebu 'wa na yagaidi, 'wa na velu'uimo Yaubada 'waineye i na vesauluva 'atumaina tomotoganidi 'waidie. <sup>15</sup> Egavo i sososoana, ma fuemi 'wa na sososoana, we'e egavo i nunuavita, wata i 'we'welaga, ma fuemi 'wa na 'we'wela wata 'wa na nunuavita. <sup>16</sup> ✧Matatabumi yami nuanua i na vesala, bega yami nuanua 'aitamogana 'wainega 'wa na miamiani. Kebu taunimi 'wa na awa'ai'aimi, ma yami nuaobu 'wa na vetofolova tomotoga-'avo'avovo faifaidei. Kebu 'wa na vo, 'Ima 'aisema yama 'asete bwaikina.”

<sup>17</sup> ✧'Ai'edi tamu aitoi i na vesauluva sakoina 'waimie, kebu wata sauluva sakoina 'wainega 'wa na tutuli. 'Wa na vewavawava bega sauluvanidi tomotoga fuedi 'adi laubwaina 'wa na 'i'idewadi. <sup>18</sup> Kebu tamu aitoi taiadi 'wa na ve'ikwayekwayega, 'wa na veiana 'wa na mia 'atumaina tomotoga matatabudi taiadi, we'e 'ai'edi 'ifwaidi kebu nuanuadi, 'asa'aiana. <sup>19</sup> ✧Ekwavo, 'ai'edi tomotoga i na vesauluva sakoina 'waimie kebu 'wa na tutuli 'alo 'wa na nuanua kuba faifaina, we'e mogitana sauluvanina 'wa na 'aniveleneni

✧ 12:9: 1 Fit 1:22 ✧ 12:11: Kolos 3:23 ✧ 12:12: 1 Tes 5:15-18 ✧ 12:14: Mad 5:44; Luk 23:34 ✧ 12:16: Lom 14:19; Fil 2:2-3 ✧ 12:17: 1 Tes 5:15  
✧ 12:19: VeL 32:35; 2 Tes 1:6-7

Yaubada 'waineye, taunina ma yana nuasako vematavuloga i na veledi. I na vematavulogidiga fai yana vona i 'eno'eno yana Buki 'waineye i vo,

Yau kumaniku totutula, tomotoga yadi sakona a na tutulidi.”

<sup>20</sup> Kebu bani'odi 'wa na vesauluvediga we'e mogitana 'ai'edi 'ami vita 'ana to'anivelena i na lasega, 'ani'ani 'wa na veleni, 'anigona i na lalaga, ufa 'wa na veleni. 'Ai'edi de'e bani'odi 'wa na vesauluvediga taunina yana sauluva sakoina i na nuani nika i na bunumayaga. <sup>21</sup> Kebu i da lubwaineni sakona i na vetoketoke 'waimie, we'e mogitana yami sauluva 'atumaidi 'waidiega 'wa na vetoketoke sakona 'waineye.

## 13

### *Gabemani yadi veimea ta na vematayakeyakedi.*

<sup>1</sup> \*Gabemani wata toveimea 'aitamogana 'aitamogana Yaubada i sisilakaidi. Kebu tamu aitoi taunina yana nu-anuayega i da vetoveimea, begaidi tomotoga matatabuda i lubwaineda yadi veimea ta na vematayakeyakedi. <sup>2</sup> Egavo toveimea yadi veimea i na baila siwe 'asa'aiana wata Yaubada yana veimea i baila, taunidi 'adi vematavuloga i 'i'idewai. <sup>3</sup> \*Egavo yadi sauluva 'atumaidi kebu i na kolologa gabemani yadi veimea faifaina, we'e mogitana egavo yadi veimea i geugeudi i na kololo. 'Ai'edi kebu nuanuami 'wa na kololo gabemani 'waidie 'wa na vevesauluva 'atumaina nika i na subiami yami sauluva faifaidi. <sup>4</sup> Toveimeanidi Yaubada yana tofolovavo yami 'atumaina faifaina i folofolova, we'e 'ai'edi sauluva sakoina 'wa na 'idewaiga 'ana fata 'wa na kololoyedi fai 'akonadi yadi veimea i 'eno'eno vematavuloga faifaina. Toveimeanidi Yaubada yana tofolovavo bega tosakona Yaubada yana nuasako wata yana vematavuloga i na veluagadi toveimeanidi 'waidiega. <sup>5</sup> Begaidi i lubwainemi toveimea yadi veimea 'wa na vevematayakeyakedi, kebu vematavuloga 'aisena faifaina 'wa na nuanua, siwe wata fai yada nuanua 'waidie ta vevebaeda i lubwaineda ta na vevematayakeyakedi.

<sup>6</sup> Wata fai Yaubada gabemani i sisivetovoidi, begaidi takesi 'wa yatoyato. Toveimea yadi folova tulina tulina i 'i'idewadiga siwe 'asa'aiana Yaubada faifaina i folofolova, begaidi takesi 'wa yatoyato. <sup>7</sup> \*Bega ava'ai faifaina 'wa na 'anivelenaga i lubwainemi, 'wa na 'anivelenamo. Takesi tulina tulina 'wa na yatoyato wata toveimea 'aitamogana 'aitamogana 'wa na veve'ililibuyedi.

*Ma edavo ta na vevenuakalikali*

*fai Iesu yana vila-vaitugana sai'afoga.*

<sup>8</sup> \*Ai'edi tamu nani 'wa na 'ewa-maimaigi 'alo 'wa na 'uneiga, i lubwainemi 'wa na tutuli kebu i na 'eno'enoga. We'e tamu nani kebu 'ami fata 'wa na tutuliga, fai 'ami nuakalikali bwaikaotogina 'wa na tutula-wayogeni, i lubwainemi ma emiavo 'wa na vevenuakalikalimo. 'Ai'edi aitoi tomotoga i na nuakalikaliiediga, siwe 'asa'aiana Yaubada yana veimea matatabuna i vevematayakeyakedi. <sup>9</sup> \*Basenadiotoga Mosese Yaubada yana ve'etoboda i kilumidi Yaubada yana Buki 'waineye, side bani'odi i vo,

Kebu 'wa na lauobuga, kebu 'wa na luvewafa, kebu 'wa na vainago, kebu 'wa na nuagiva mali tomotoga yadi kukua 'alo tamu yadi nani faifaina.”

De'e ve'etobodanidi wata 'ifwaidi 'adi 'itava 'aitamogana, venuakalikali. Emiavo 'wa na nuakalikaliiedi taunimi 'ami nuakalikali bani'odi. <sup>10</sup> \*Egavo ediavo i na nuakalikaliiediga kebu 'adi fata sauluva sakoina i na 'idewai 'waidie. Begaidi 'ai'edi ta na nuakalikali, siwe 'asa'aiana 'akonadi Yaubada yana veimea wata yana ve'etoboda matatabuna ta vevematayakeyakedi.

<sup>11</sup> I lubwainemi ma emiavo 'wa vevenuakalikali fai tutuya de'e 'wa 'asetai, Iesu yana vila-vaitugana i vevelilivana. Basenadi tutuyanina ta vetumagana Iesu 'waineye ta vo, Iesu yana vila-vaitugana i velilivana.” Bega 'asiau ta na vo, 'Akonadi i vagamai bega i na 'ita'ita'ieda.” Fai yana mai sai'afoga, kebu 'wa na 'eno'enoga, 'wa na tovoi 'wa na lulukamata. <sup>12</sup> \*Lovana sai'afoga i na 'a'ava, 'aiata 'akonadi i vagamai sai'afoga i na magetai, begaidi dudubala 'ana sauluva ta na bailedi, yada sauluva magemagetadi 'waidiega ta na vetalaga Yaubada faifaina. <sup>13</sup> \*Ida mageta 'ana tomotoga, ava'ai sauluvaga i lubwaineda ta na 'i'idewadi. Kebu 'wa na toke ufa toketokena 'wa na yemu bola nuanuami i na lugaugaudi 'wa na lu'avo'avovo. Kebu 'wa na ve'avula-'avo'avovo, kebu bunu 'ana nuanua sakoidi faifaidi 'wa na nuanua, ve'ikwayekwayega 'wainega kebu 'wa na ve'alamagi'ai, wata kebu 'wa na ve'unumagigi. <sup>14</sup> \*Kebu bani'odi 'wa na vesauluvediga wata yami nuanua sakoidi yadi nuanua kebu 'wa na 'idewadi. We'e mogitana taunimi 'wa na tauyemi 'ada Toveimea Iesu Keliso 'waineye i na agemi, yana toketokenayega faifaina 'wa na vevetalaga.

\* 13:8: Mad 22:39-40 \* 13:9: Sou 20:13-17 \* 13:10: 1 Kol 13:5 \* 13:12: Efe 6:11 \* 13:13: Efe 5:18 \* 13:14: Gal 5:16

## 14

*Kebu emiavo tovetumagana 'wa na awavesakoyediga.*

<sup>1</sup> ✱'Ai'edi aitoi ma yana vetumagana taunina i na tauyeni Iesu Keliso 'waineye siwe yana vetumagananina bola kebu i da vetoketoke, kebu 'wa na baileni 'wa na voneni i na luku yami 'aila'a 'waineye. We'e sauluva 'ifwaidi faifaidi i vevenuanaluga kebu faifaidi 'wa na ve'ikwayekwayega. <sup>2</sup> Tovetumagana 'ifwaidi yadi 'aseta i vo, 'Ani'ani matatabuna 'aisaya taiadi Yaubada yana 'anivelena faifaida, 'ana fata matatabuna ta na 'anidi.” We'e 'ifwaidi yadi vetumagana mweadi taunidi i bodadi kebu 'aisaya i da 'ani'ani, 'ani'ani'ava i 'ani'ani. <sup>3</sup> Egavo nani matatabuna i na 'anidimoga kebu i na awaobuobu tove'udigana 'waidie, wata bani'odi tomotoganidi i veve'udigana 'aisaya kebu i na vona to'ani 'waidie i na vo, 'Omi sakoimi.” Kebu bani'odi 'wa na awavesakoyediga fai 'akonadi Yaubada i tauyedi i luku yana 'Aila'a 'waineye. <sup>4</sup> ✱'Omi kebu tomotoganidi 'adi toveimea, 'wa na awavesakoyediga kebu i da lubwaineniga. 'Adi Toveimea Yaubada 'aisena i na veimea, i na awavesakoyedi 'alo i na awave'atumaiedi. 'Ana fata i na awave'atumaiedi fai taunina yana toketokena i na veledi bega kebu i na be'u sakona 'waineye i na tovoivoi fa'alina.

<sup>5</sup> We'e tovetumagana 'ifwaidi yadi 'aseta tamu 'aiata faifaina i vo, De'e 'aiatanina 'aiata bwaikina Yaubada 'ana subia faifaina we'e 'aiata 'ifwaidi kebu.” We'e tomotoga 'ifwaidi i vo, 'Aiata matatabuna i vesala 'ana fata 'aiatanidi 'waidie Yaubada ta na subisubiai.” I lubwainemi 'aitamogana 'aitamogana taunimi 'wa na venua'ivina 'aiata 'eba subia faifaidi. <sup>6</sup> Egavo i na vo, De'e 'aiatanina 'aiata bwaikina Yaubada 'ana 'eba subia,” i vonaga fai nuanuadi 'Auvea i na veve'ililibuyeni. Egavo 'ani'ani matatabuna 'aisaya taiadi i 'ani'anidimoga, 'Auvea i veve'ililibuyeni fai i nuani nani matatabuna Yaubada taunina 'adi to'anivelena wata faifaidi i vevekaiwa 'waineye. We'e egavo i veve'udigana 'aisaya, wata Yaubada i veve'ililibuyeni wata i vevekaiwa 'waineye. <sup>7-8</sup> ✱Mogitana yada sauluva matatabuna 'waidiega Yaubada ta na veve'ililibuyeni fai 'ai'edi ma yawaida ta na miamia kebu 'aiseda yada nuanua ta na 'i'idewadi, taunida ta na tauyeda 'Auvea 'waineye. 'Ai'edi ta na wafaga wata taunida ta na tauyeda nimaneye. Yada mia wata yada wafa 'ida kebu yada 'eba veimea, 'ida 'Auvea yana tomotoga i veveimeyeda.

<sup>9</sup> Fai nuanuana 'ida yana tomotoga, Keliso i wafa wata i tovoi-vaitugana bega ma yawaida ta na miamia 'alo ta na

wafaga, siwe taunina 'ada Toveimea. <sup>10</sup> ✧Fueda Keliso 'ada Toveimea bega emiavo 'wa na awavesakoyedi 'alo 'wa na sidibidibiediga kebu i da lubwaineni. 'Awaie matatabuda ta na vonayavuga Yaubada mataneyeye i na veimeyeda yada sauluva faifaidi. <sup>11</sup> ✧I na veimeyedaga fai yana vona i 'eno'eno yana Buki nageneye i vo,

Yau fai Miamia-vagaiku, yaku vona, vona mogitana.

Tomotoga matatabudi ma yadi ve'ililibu i na 'odu 'waikuye, I na vo, 'Omu Yaubada mogitana.”

<sup>12</sup> ✧Bega 'aitamogana 'aitamogana taunida yada sauluva ta na lu'ivoneyedi Yaubada 'wayneeye.

*Emiavo kebu 'wa na kiavebe'udi sakona 'waidie.*

<sup>13</sup> Fai 'awaie matatabuda ta na vonayavuga Yaubada mataneyeye, kebu wata edavo ta na awavesakoyediga. We'e mogitana nagami yami nuanua 'waidie 'wa na vo, 'Ai'edi tamu yaku sauluva a 'i'idewai, siwe iaku sauluwanina faifaina i na vo, Sauluva sakoina,” sauluwanina a na baileni. 'Ai'edi a na 'idewaiga i na 'iseni voke taunina wata i na 'idewai, nika 'wainega vita i na veluagai 'alo i na be'u sakona 'wayneeye. <sup>14</sup> ✧Yau a miave'itubama 'aku Toveimea Iesu taiadi bega a 'asetai mogitana kebu tamu 'ani'ani 'alo 'aisaya 'waidiega sakona i na souyeni. 'Ai'edi tamu aitoi tamu 'aisaya 'alo 'ani'ani faifaina i na vo, 'Ai'edi a na 'ania a na sakona Yaubada mataneyeye,” taunina 'aiseotogina faifaina i na talabodeni kebu 'ana fata i na 'ania. <sup>15</sup> ✧'Ai'edi tamu ava'ai 'wa na 'ani'ania iami mataneyeye siwe 'ani'aninina faifaina 'akonadi taunina i bodai, i na 'isemi i na nuavitaga, 'ana 'isa kebu 'wa da nuakalikalieni. Tomotoganina ma fuemie faifaimi Keliso i wafa, bega kebu i da lubwainemi tamu yami sauluva i na 'iseni i na vo, Yau wata a na 'idewai,” nika i na be'u sakona 'wayneeye. <sup>16</sup> 'Ai'edi tamu sauluva 'omi 'waimie 'atumaina, we'e 'ifwaidi tomotoga 'waidie sakoina, kebu matadie 'wa na 'idewaiga i na nunago sauluwanina i na awavesakoyeni. <sup>17</sup> 'Ida Yaubada yana tomotoga i veimeyeda begaidi 'ai'edi ta na 'ani'ani wata ta na yemuyemu 'alo ta na veve'udigana kebu tamu ava'ai, nani siaidi 'waideye, we'e mogitana nani bwaikidi 'waideye, yada sauluva i na ve'atumai Yaubada mataneyeye, yada nuanua i na bika wata yada mia i na ve'atumai, wata ta na sososoana. Naninidi bwaikidi 'Anu'anunu 'Atumaina i veleveleda. <sup>18</sup> Egavo de'e bani'odi i na vevesauluvediga Yaubada yana 'eba sosoana wata tomotoga i na awave'atumaiedi.

✧ **14:10:** Fol 17:31; 2 Kol 5:10 ✧ **14:11:** Ais 45:23; Fil 2:10-11 ✧ **14:12:** 1 Fit 4:5 ✧ **14:14:** Fol 10:15 ✧ **14:15:** 1 Kol 8:11-12

19 ✨Fai sauluvanidi 'Anu'anunu 'Atumaina 'wainega nani bwaikidi, tutuya fueidi ta na vewavawava ta na veiana yada mia i na ve'atumai, wata ma edavo ta na ve'ivaiva ita nika yada vetumagana i na vevetoketoke. 20 'Ani'ani wata 'aisaya matatabuna 'atumaide, siwe 'ai'edi tamu aitoi tamu nani faifaina i na vo, 'Ai'edi a na 'aniaga a na sakona Yaubada mataneyey," i na 'isemi 'wa na 'ani'aniga wata i na 'ani nika i na sakona. Kebu yami sauluvanina 'wainega ava'ai Yaubada i 'i'idewadiga iami 'waineyey 'wa na 'ivesakoi. 21 ✨'Ai'edi 'aisaya 'wa na 'ani'ani 'alo ufa toketokena 'wa na yemuyemu 'alo tamu yami sauluva 'wainega iami 'wa na kiavebe'uya i lubwainemi sauluvanina 'wa na baileni.

22 Naninidi 'ifwaidi tomotoga i talabodediga kebu faifaide 'wa na ve'ikwayekwayega, 'omi 'aisemi wata Yaubada taiadi naninidi faifaide 'wa na venuma'ivina. 'Ai'edi tamu sauluva 'wa awave'atumaie niga 'wa na 'idewai, mulieta 'ami vebae 'waidie 'wa na nuani kebu 'wa da sakonaga, 'eba sosoana 'waimie. 23 We'e 'ai'edi aitoi nuanuana tamu nani i na 'ania siwe wata i na vo, A na 'aniaga a na sakona Yaubada mataneyey," i na kwayega i na 'ania, mogitana i sakona. Sauluva matatabuna faifaide 'wa na vo, 'A na 'idewaiga 'a na sakona Yaubada mataneyey," siwe wata 'wa na 'idewaiga, 'akonadi 'wa sakona.

## 15

*Kebu 'aise'avada, wata mali tomotoga ta na 'ivaiesedi.*

1-2 ✨'Ida yada vetumagana fa'alidi Iesu Keliso 'waineyey, i lubwaineda egavo yadi vetumagana mweadi ta na 'ivaiesedi. Kebu tauni'avada faifaide ta na nuana, wata edavo tovetumagana 'ifwaidi ta na nuananidi. Yada 'aivaita 'waidiega yadi mia i na ve'atumai wata yadi vetumagana i na vetoke-toke. 3 ✨Keliso kebu taunina faifaina i da nuana, wata mali tomotoga i 'ivaiesedi. Yana sauluvanina faifaina tamu vona i 'eno'eno Yaubada yana Buki 'waineyey, Keliso i vona Yaubada 'waineyey i vo,

Tomotoga i yagayagaimu, siwe yadi manini yau a tovoieni."

4 ✨Yaubada yana Vona kilukilumidi matatabuna i veve 'waideyey yada tokemaiga wata 'ada 'ivenua-agiagi faifaide. Naninidi 'waidiega ta nuani ta vetumagana mogitana ava'ai basenadi Yaubada i vona'awaufaufa i na veledaga, mogitana ta na velugadi.

5-6 A vevelu'ui faifaime nuanaaku Yaubada kumanina tokemaiga wata 'ivenua-agiagi i veveledaga, nuana 'aitamogana i na velemi. Yami nuana 'aitamogana 'wainega

✨ 14:19: Lom 12:18 ✨ 14:21: 1 Kol 8:13 ✨ 15:1-2: Lom 14:19; 1 Kol 10:24

✨ 15:3: Same 69:9 ✨ 15:4: 1 Kol 10:11; 2 Tim 3:16-17

Iesu Keliso 'wa na vevetutuyameni bega matatabumi bonami 'aitamogana 'wainega Yaubada 'wa na subisubiai, taunina 'ada Toveimea Iesu Keliso Tamana.

*Tomotoga matatabudi 'adi fata 'ita'ita'i i na veluagai.*

<sup>7</sup> 'Akonadi Keliso i vagavaimi 'wa luku yana 'Aila'a 'waineye, wata 'omi bani'odi ma yami sosoana emiavo 'wa na vonedi i na luku 'ami 'aila'a nageneye wata 'wa na veianedi, bega ma fuemi Yaubada 'wa na subisubiai. <sup>8</sup> \*A na vonemi, Keliso i vetofolova me Diu 'adi 'aivaita faifaina bega ta na 'asetai Yaubada yana Vona, vona mogitana. Basenadiotoga Yaubada i vona'awaufaufa me Diu tubudiavo bwaikidi 'waidie tomotoga 'adi 'ive'atumai Yaubada mataneye faifaina, bega Keliso i mai nika yana vona'awaufaufanina 'ana mogitana i souyeni. <sup>9</sup> \*Wata i mai bega mali tomotoga taunidi kebu Diu Yaubada i na subisubiai i 'isanuakalikaliediga faifaina. Yaubada 'ana subianina mali tomotoga 'waidiega faifaina i kilumi yana Buki nageneye i vo,

Yaubada, a na subiamu mali tomotoga taunidi kebu Diu 'awasasadie,

A na lei-subisubia 'amu wagava a na 'inanai.”

<sup>10</sup> \*Wata tamu vona i vo,

'Omi mali tomotoga 'wa na sosoana Yaubada yana tomotoga me Diu taiadi.”

<sup>11</sup> \*Wata tamu vona i vo,

'Omi mali tomotoga kebu me Diu, 'Auvea 'wa na subiai.

Tomotoga matatabumi 'awalawa 'aitamogana 'aitamogana 'waidiega 'wa na lei-subisubia 'waineye.”

<sup>12</sup> \*Wata Yaubada yana tolu'ivona Aisea i vona-vagata Keliso yana mai faifaina i vo,

Kini Devida tamana 'ana wagava Iese 'ana wauma 'wainega tamu tomogo i na souyeni,

Yaubada i na sivetovoia, mali tomotoga taunidi kebu me Diu i na veimeyedi,

Ma yadi vetumagana taunidi i na tauyedi 'waineye.”

<sup>13</sup> \*Yaubada i vona'awaufaufa i na 'ita'ita'ieda bega 'ida ta nuani ta vetumagana mogitana ta na veluagai. Begaidi a vevelu'ui faifaimi nuanuaku yami vetumagana 'wainega Yaubada sosoana bwaikina i na vevelemi, wata nuanua bikana mia 'atumaina taiadi. Naninidi i na velemi bega 'Anu'anunu 'Atumaina yana toketokena 'wainega yami vetumagana 'waineye i na vevetoketoke.

*Faulo Keliso yana tomata'aulele*



*mali tomotoga taunidi kebu Diu faifaidi.*

14 Ekwavo, 'ida ma fuedeye Iesu 'ana tovetumaganavo, yau tauniku yaku 'aseta 'wainega a nuani 'omi mogitana yami sauluva 'atumaiotogidi, yami 'aseta bwaikidi Iesu Keliso faifaina, wata 'ami fata ma emiavo 'wa na awave'eda'eda bega yami vetumagana i na vetoketoke. 15 \*Basenadi Yaubada ma yana nuakalikali i vena'ivineku a vetomata'aulele faifaina, begaidi de'e yaku kilumanina 'waineye nuanua 'ifwaidi a sivemagesedi, ma yaku venafofufa'ala vona toketokena a veleme bega de'e 'ami tolinuata'i. 16 We'e yau a vetofolova Iesu Keliso faifaina, Vala 'Atumaina Yaubada 'wainega a lulu'ivona mali tomotoga taunidi kebu me Diu 'waidie. Yaku folovanina tovelomu bani'odi, taunidi tomotoga yadi 'aisaya i 'a'anivelenedi Yaubada 'waineye, we'e yau, yaku lau'age 'wainega tomotoga taunidi i tau-tauyedi Yaubada 'waineye, 'wa da vo a da 'a'anivelenedi nika i na sosoana faifaidi. 'Anu'anunu 'Atumaina yana folova 'wainega tomotoganidi yadi sauluva magemagetadi Yaubada mataneye.

17 Fai Iesu Keliso yana toketokena 'wainega, yaku folova Yaubada faifaina ma vuagina, bega 'eba sosoana 'waikuye. 18-19 \*Mogitana 'eba sosoana 'waikuye bega yaku folovanina faifaina a na toke a na vonavona. Kebu tauniku a na awa'ai'aiku, we'e mogitana Keliso a na awa'ai'aia fai toketokena i veleveleku. Yana toketokenanina 'wainega a folofolova begaidi mali tomotoga taunidi kebu me Diu taunidi i tauyedi Yaubada i vematayakeyakeni. Yaku vona i nogai, yaku sauluva i 'isedi, 'eba 'isa toketokedi, 'eba nuavogana wata 'eba nua'ewa a 'idewadi matadie nika 'Anu'anunu 'Atumaina yana toketokena 'wainega i vetumagana Iesu 'waineye. Ielusalema 'wainega a velamu a luvivila 'atamana 'aitamogana 'aitamogana 'waidiamo Iesu Keliso Valana a lulu'ivona a nagoga a le'wa 'atamana Ililikami. 20 \*Tutuya matatabuna nuanuaku a na lalau'age, bei 'akonadi tamu aitoi yana lau'age 'wainega tovetumagana i souyedi wata bei kebu a na lau'agega, we'e mogitana 'atamananidi kebu Iesu Keliso Valana i da nogaiga, 'waidie a na nago a na lau'age. 21 \*Nuanuaku tamu vona Yaubada yana Buki 'waineye a na vetutuyameni i vo,

Egavo 'waidie kebu Yaubada Valana i da lu'ivoneyeniga, i na 'iseni.

Egavo basenadi Valananina kebu i da nogaiga, i na 'asetai."

*Faulo yana nuanua Loma 'ana nago faifaina.*

\* 15:15: Lom 1:5 \* 15:18-19: 2 Kol 3:5; Fol 19:11-12 \* 15:20: 2 Kol 10:15-16

\* 15:21: Ais 52:15

22 Fai nuanuaku a na lalau'age tomotoganidi Iesu Valana kebu i da nogaiga 'waidie, tutuya fueidi igodi a vo, A na wai Loma," nika kebu 'aku fata. 23-24 \*We'e de'e 'awalawanidi 'waidie 'akonadi yaku folova i 'a'ava, malamala fueidi a nu-anua nuanuaku a da wai me Loma 'waimie a da 'isemi, bega tutuya de'e 'ami foge faifaina a nu-anua a na wai a na 'isemina, a na nago 'awalawa Sifeni. Ma yada sosoana Loma 'waineye taiadi ta na miamia, mulieta yami 'aivaita 'wainega a na 'iawemi a na nago Sifeni. 25 Siwe nagami a na nago Ielusalema, Yaubada yana tomotoga bei i miamiani 'adi nuakalikali a na naweni a na veledi. 26 \*Tovetumaganavo 'awalawa Masidonia wata Gulisi 'waidie i miamiani, nu-anuadi yadi 'anivelena-maimaiga i yato Yaubada yana tomotoga i vewekowekoma Ielusalema nageneye 'adi 'aivaita. 27 Tauniotogidi nuanuadi, siwe wata i lubwainedi i na 'aivaita. Tovetumagananidi i vewekowekomaga taunidi me Diu, 'adi 'aila'a 'wainega Keliso i tubuga. Me Masidonia wata me Guliki taunidi kebu Diu, siwe me Diu 'waidiega 'ita'ita'i i veluagai Keliso 'wainega, begaidi yadi 'aivaita mani i vetuneiga i lubwaineni. 28 Tutuyanina yadi nuakalikali matatabuna a na 'aniveleneni me Ielusalema 'waidie, i na 'a'avana nika a na vilaku a na wai a na nago Sifeni, a na waiga 'waimiamona bega a na nago. 29 \*Tutuyanina a na waiga a nuani mogitana tamu nuakalikali Keliso 'wainega a na viweni, nuakalikalinina 'atumaina, 'wainega yami vetumagana i na vetoketoke nika wata ava'ai 'wa na lualeni?

30 \*Ekwavo, 'ida fai Toveimea Iesu Keliso yana tomotoga, wata fai 'Anu'anunu 'Atumaina yana 'aivaita 'wainega 'wa nunuakalikali, bega nuanuaku bwaikina 'wa na 'ivaiseku, ma yami tokemaiga ta na vevelu'ui Yaubada 'waineye faifaiku. 31 'Wa na vevelu'ui nika kebu vita a na veluagai Keliso 'ana tovedumwe'ai'ai i miamianiga 'awalawa Iudia 'waidiega. Wata 'wa na vevelu'ui Yaubada yana tomotoga i miamiani Ielusalema, 'adi nuakalikali kebu i na baileni, ma yadi sosoana i na 'ewai. 32 Maninina a na veledi i na 'a'avana, 'ai'edi Yaubada nuanuana a na viwaiga ma yaku sosoana a na wai a na veluagami ma fueda ta na vetoketoke.

33 A vevelu'ui faifaimi, nuanuaku Yaubada, kumanina nu-anua bikana i veveleleda mia 'atumaina taiadi, lilivamie i na miamia i na 'wea'weabumi.

Vona mogitana, yaku nu-anua bani'odi.

## 16

*Faulo enavo i miamianiga Loma, 'waidie i vekaiwa.*

<sup>1</sup> Ekwavo, nuanuaku a na vonemi, novuda Fibi vavine 'atumaidi ma fueda tovetumagana. Vavinenidi i veto'aivaita tovetumaganavo 'waidie 'atamana Senikilia. <sup>2</sup> Tutuyanina i na wai Loma 'waimie, i na le'waga ma yami sosoana 'wa na vagavaidi wata 'wa na 'i'isave'avinidi fai ma fuemie 'Auvea yana 'Aila'a. Bani'odi 'wa na vesauluvediga 'waidie i lubwainemi wata 'ifwaidi Yaubada yana tomotoga 'wa na 'isave'avinidi. 'Ai'edi ava'ai nuanuadi 'wa na 'ivaisedi fai tomotoga fuedi 'waidie yadi 'aivaita 'atumaina wata yau 'waikuye.

<sup>3</sup> \*Yaku vekaiwa 'wa na lu'ivona Filisila wata yadi lamoga Akwila 'waidie, folovanina 'aitamogana 'waineye ta-  
iadi 'a folofolova Iesu Keliso faifaina. <sup>4</sup> Yawaidi i tauyedi 'aku 'ita'ita'i faifaina sai'afoga i da wafa faifaiku, begaidi a vekaiwa bwaikina 'waidie. Yau kebu 'aiseku a da vevekai-  
waga 'waidie, siwe wata tovetumagana 'aila'a tulina tulina i vekaiwa, kumanidiavo mali tomotoga taunidi kebu Diu. <sup>5</sup> \*Wata tovetumaganavo i vava'auta velu'ui faifaina Filisila ma yadi lamoga yadi vanuge, 'waidie a vekaiwa.

Yaku vekaiwa 'wa na lu'ivona Efinito 'waineye, kumanina iaku mogitana, 'awalawa Eisia nageneye tomogonina nagami i vetumagana Keliso 'waineye, mulieta 'ifwaidi.

<sup>6</sup> Wata yaku vekaiwa 'wa na lu'ivona tamu Iesu yana tofolova 'waidie, 'adi wagava Meli, 'aivaita bwaikina 'wa veveluagai 'waidiega.

<sup>7</sup> Anidalonaiko wata Iunia taunidi yaku 'aila'a mogitana, basenadi ma fuema 'a luku vanuga 'eba yogona 'waineye Iesu Keliso faifaina, bega yaku vekaiwa 'waidie 'wa na lu'ivona. Tomotoganidi 'adi 'ailuga nagami i vetumagana Keliso 'waineye, mulieta yau, wata ma 'adi 'asetai Iesu yana tomata'aulelevo 'waidie.

<sup>8</sup> Wata yaku vekaiwa 'wa na lu'ivona Amifilia 'waineye, taunina iaku mogitana ma fueda 'Auvea yana tomotoga.

<sup>9</sup> Ebani taunina ma fueda ta folofolova Keliso faifaina wata tamu iaku mogitana 'ana wagava Sitakisi, 'adi 'ailuga 'waidie 'wa na lu'ivona yaku vekaiwa.

<sup>10-11</sup> Wata a vekaiwa Afeli 'waineye, kumanina vita i velu-  
agai Keliso faifaina siwe i vetoketoke bega ta 'asetai yana tomotoga mogitana.

Yaku vekaiwa 'wa na lu'ivona Alisitobilo yana vanuga 'ana tomia 'waidie, wata a vekaiwa Elodioni 'waineye, taunina yaku 'aila'a mogitana.

Wata yaku vekaiwa 'wa na lu'ivona Nasisi yana vanuga 'ana tomia 'waidie, kumanidiavo i vetumagana 'Auvea 'waineye.

12 Talaifina wata Talaifosa, vevinenidi 'adi 'ailuga yadi folova 'atumaina 'Auvea faifaina 'waidie a vekaiwa, wata yaku nuakalikali 'wa na lu'ivona Fesisi 'waidie, vavinenidi wata yadi folova toketokena 'Auvea faifaina.

13 ✧A vekaiwa Lufusa 'waineye, tamu tofolova 'atumaiotogina 'Auvea 'waineye, we'e inana yadi sauluva 'atumaina 'waikuye 'wa da vo yau natudi, wata 'waidie a vekaiwa.

14 Wata yaku vekaiwa 'wa na lu'ivona Asinikilito, Filigoni, Emisi, Fataloba, Emasi, wata 'ifwaidi tovetumaganavo taiadi i miamiani.

15 Wata a vekaiwa Filologo, Diulia, Neliasi wata novuna, Olimifasi, wata 'ifwaidi Yaubada yana tomotoga taiadi i miamiani 'waidie.

16 ✧Tutuyanina emiavo tovetumaganavo 'wa na veluagadi ma yami sosoana 'wa na 'avalamaigidi, yami nuakalikali 'ana 'eba 'isa. Tovetumaganavo 'adi 'aila'a tulina tulina yadi vekaiwa i vetunei 'waimie.

*Faulo yana vona 'ana 'eba ve'a'ava.*

17 ✧Ekwavo, a na velu'ase'ase, 'wa na 'isa'isa i na nunago tomotoga 'ifwaidi yadi ve tulina 'wainega i na ki-avebe'umi. Yadi ve wata venidi nagami Keliso yana tomotoga 'waidiega 'wa nogaiga, kebu taiadi i da vesalaga, yadi ve tuliogina. Tovetumagana 'ifwaidi venidi faifaiddi i veve'ikwayekwayega yadi vetumagana i 'ivesakodi. Kebu lilivadie 'wa na nunagoiga, 'wa na bailedi. 18 ✧Tomotoganidi bani'odi i vesauluvediga kebu Keliso 'ada Toveimea faifaina i da folofolova, taunidi 'aisedi faifaiddi i nuanua. We'e mali tomotoga bola nuadi kebu i da magetadiga tovenidi bonadi 'adi nogaya 'eba nua'ewa wata yadi subia-vekavekali 'waidiega i vevekaliedi.

19 ✧We'e 'omi yami vematayakayaka Keliso 'waineye faifaina 'akonadi tomotoga fuedi i 'asete, begaidi faifaiddi a sosoana bwaikina. Nuanuaku nuami i na 'anibwekadi nani 'atumaiddi faifaiddi we'e sauluva sakoidi kebu faifaiddi 'wa na nuanua.

20 Yaubada, kumanina nuanua bikana mia 'atumaina taiadi i veveleleda, sai'afoga Seitani igodi i vevetoketokega yana toketokena i na ve'a'avai 'wa da vo i da tukudakudai, bega 'omi ma'itufa 'wa na veimeyeni.

A vevelu'ui faifaiddi, nuanuaku 'ada Toveimea Iesu ma yana nuakalikali i na vevesauluva 'atumaina 'waimie.

*Tovetumaganavo 'ifwaidi yadi vekaiwa me Loma 'waidie.*

✧ 16:13: Mak 15:21 ✧ 16:16: 1 Kol 16:20; 1 Fit 5:14 ✧ 16:17: Tai 3:9-10

✧ 16:18: Fil 3:19; 2 Fit 2:3 ✧ 16:19: Lom 1:8

21 ✨Timoti taunina 'aku tofolovavaita i vekaiwa 'waimie, wata Lusia, Daisoni, Sosifata kumanidiavo yaku 'aila'a mogitana yadi vekaiwa i vetunei 'waimie.

22 We'e yau Tetiasi kumaniku Faulo yana leta de'e 'ana tokiluma a vekaiwa 'waimie 'Auvea 'ana wagavayega.

23 ✨Yau Faulo a miamia Gaiasa yana vanuge, wata bei tovetumaganavo 'a vava'auta velu'ui faifaina, tomogonina i vekaiwa 'waimie.

Elasitasi taunina gabemani yadi mani 'ana to'isave'avina wata iada Kwatasi 'adi 'ailuga yadi vekaiwa i vetunei 'waimie.

24 A vevelu'ui faifaimi, nuanuaku 'ada Toveimea Iesu Keliso ma yana nuakalikali i na vevesauluva 'atumaina 'waimie. Vona mogitana yaku nuanua bani'odi.

### *Yaubada 'ana subia.*

25-26 ✨Yaubada ta na subisubiai. 'Ana fata i na kiavetoke-tokemi Iesu Keliso Valana 'Atumaina 'wainega. Valananina faifaina a lalau'age, basenadi 'ana nuanua givagivana tutuya manamanawena i 'eno'eno. We'e tutuya de'e Yaubada Miamia-vagaina yana veimea 'wainega tolau'age i sisivemagesedi tomotoga 'adi 'aila'a tulina tulina 'waidie. Basenadiotoga Yaubada yana tolu'ivonavo i vona-vagata Iesu yana mai faifaina, bega 'asiau tolau'agenidi tolu'ivona yadi vonanidi i 'ewadi i kikiavemagetadi bega tomotoga 'aila'a tulina tulina 'adi fata i na vetumagana Yaubada 'waineye i na vematayakeyakeni.

27 ✨Yaubada 'aiseotogina nani matatabuna 'adi to'asete, i lubwaineda ta na subisubiai, Iesu Keliso yana folova 'wainega Yaubada yana 'ai'aiwabu magemagetadi kebu i na 'a'avaga i na 'eno-vagata. Vona mogitana yaku nuanua bani'odi.

'Asa'aiana bani'odi,  
Yau Faulo.

# 1 KOLINITA

## Faulo yana kiluma nagami me Kolinita 'waidie.

Tutuyanina Faulo i miamia Efeso, de'e leta i kilumi me Kolinita tovetumaganavo faifaidi. Kolinita tamu 'atamana 'ana wagava bwaikina 'awalawa Akaia 'alo Gulisi nageneye. 'Atamananina nageneye 'ifwaidi tomotoga Gukili we'e 'ifwaidi me Diu. Tomotoganidi bei i miamianiga fue di 'ai'aiwabudi yadi kukua fue di wata yadi 'aseta bwaikidi siwe kumaea 'waidie i 'odu'odu wata bunu 'ana nuanua sakoidi tulina tulina nuadi i 'ewadi.

Faulo yana lau'age-vuvua 'ana veluga 'waineye kumanina nagami Vala 'Atumaina i lu'ageyeni me Kolinita 'waidie. Bei i veve malamala 'aitamogana wata weta'i 6. (Folova 18:1-17) Tutuya 'ifwaidi i 'a'avana Afolosa i nago 'waidie i lau'age. Mulieta Faulo i nogai me Kolinita tovetumaganavo valadi kebu 'atumaina, wata taunidi leta i kilumi i velutoli Faulo 'waineye nani 'ifwaidi faifaidi. Faulo leta de'e nagami i kilumi i yagaidi yadi sakona faifaidi wata yadi velutoli i tutulidi. De'e letanina 'ana 'idi side bani'odi.

Vona-vekaiwa. 1:1-9

Ve'ikwayekwayega wata 'eto'idi'idi tovetumaganavo 'waidie i souyeni. 1:10-4:21

Fwayafwaya 'ana nuanua sakoidi tovetumaganavo nuadi i 'ewadi. 5:1-6:20

Nagi 'ana nuanua. 7:1-40

Kebu ta na luwanawana. Keliso 'aisena 'waineye ta na vetumagana. 8:1-11:1

Sauluva tulina tulina tovetumaganavo yadi tafalolo faifaina. 11:2-14:40

Keliso i tovi-vaitugana wafayega wata tovetumagana i na tovoi-vaitugana. 15:1-58

Faulo yana nuanua, yana 'alanuai wata yana velu'ase'ase. 16:1-24

1-2 ✨Emavo, yau Faulo iada Sosideni taiadi 'a vekaiwa 'waimie. Yaubada nuanuana bega a vetomata'aulele Iesu Keliso faifaina, we'e 'omi Yaubada yana 'Aila'a 'wa miamianiga 'atamana Kolinita 'waineye a kilukiluma 'waimie. Yaubada i venua'ivinemi 'omi yana tomotoga mogitana wata fai Iesu Keliso taiadi 'wa miave'itubama i 'ive'atumaimi bega yami sauluva tonovidi mataneye. Kebu 'aisemiga, wata tomotoga matatabuna 'awalawa tulina tulina 'waidie, kumanidiavo ma

yadi subia i vevegole 'ada Toveimea Iesu Keliso 'waineye, taunina 'adi Toveimea wata 'ada Toveimea.

<sup>3</sup> 'A vevelu'ui faifaimi, nuanuama Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie, wata nuanua bikadi mia 'atumaina taiadi i na vevelelemi.

*'Aivaita bwaikina ta veluagai Keliso 'wainega.*

<sup>4</sup> \*Tutuya matatabuna a vevekaiwa Yaubada 'waineye faifaimi, fai ma yana nuakalikali i vesauluva 'atumaina 'waimie Iesu Keliso 'wainega. <sup>5</sup> 'Wa miave'itubamaga Keliso taiadi bega nani matatabuna 'waidie 'aivaita bwaikina 'wa veluagai Yaubada 'wainega 'wa da vo i da 'ive'ai'aiwabumi. Yana 'aivaitanina 'wainega yami vona faifaina matatabuna 'adi nogaya 'eba nua'ewa, wata yana nuanua tonovidi 'wa 'asetadi mogitana. <sup>6-7</sup> Keliso Valana a lu'ivoneyeniga 'waimie nuamie i 'eno'eno, wata taunimi 'wa tauyemi 'waineye, begaidi tutuyanina 'ada Toveimea Iesu Keliso yana souyagi 'wa lulukamaseni, Yaubada yana nuakalikali fuedi 'waimie i 'eno'enovi, kebu tamu nani 'wainega 'wa da ve'ale'usa 'anu'anunumi 'adi 'aivaita faifaiddi. <sup>8</sup> \*Wata i na kiki-avefa'alimi i na nagoga 'eba ve'a'ava 'waineye 'ada Toveimea Iesu Keliso yana vila-vaitugana 'ana 'aiata 'waineye kebu tamu yami sakonaga, yami sauluva matatabuna tonovidi Yaubada mataneyee. <sup>9</sup> \*Naninidi Yaubada 'wainega ta na veluagadi fai bani'odi i vona, mogitana i na 'idewadi. Yaubadanina i venua'ivinemi bega 'wa veiana Natuna 'ada Toveimea Iesu Keliso taiadi.

*Tovetumaganavo i ve'idi'idi.*

<sup>10</sup> \*Ekwavo, 'ada Toveimea Iesu Keliso veimea i veleku begaidi a vevelu'ui 'waimie kebu 'wa na ve'ikwayekwayega, nuanuaku matatabumi yami vona 'adi nuanua 'aitamogana bega kebu 'wa na ve'idi'idiga. Wata nuanuaku yami nuanua matatabuna 'aitamogana wata nani matatabuna 'waidie yami venua'ivina i na vesala bega 'wa na luvetubama 'ami 'aila'a 'aitamogana. <sup>11</sup> \*Ekwavo, bani'odi a voneyediga fai Kilo i yadi vanuga 'ana tomia 'ifwaidi i maia 'waikuye i lu'ivona 'aise'avami 'wa veve'ikwayekwayega. <sup>12</sup> Yami awa'idi'idi side bani'odi, 'ifwaimi 'wa vo, 'Ima Faulo yana tomotoga," 'ifwaimi 'wa vo, 'Ima Afolosa yana tomotoga," we'e 'ifwaimi 'wa vo, 'Ima Fita yana tomotoga," wata 'ifwaimi 'wa vo, 'Ima Keliso yana tomotoga."

<sup>13</sup> Bani'odi 'wa vevesauluvediga kebu i da lubwaineniga. Yami awa'idi'idi 'waidiega 'wa da vo Keliso 'wa da sivo'avo'ai.

'Wa da nuani yau Faulo i tutufwaseku 'ai lagalagana 'waineye a wafa faifaimi? 'Alo 'aku wagavayega 'wa bafitaiso bega 'omi yaku tovetutuyamavo? A nuani kebu. <sup>14-15</sup> ☆A vekaiwa Yaubada 'waineye kebu fuemi a da bafitaisomi, Kilisifasi wata Gaiasa 'aisedi a bafitaisodi, begaidi kebu tamu aitoi 'waimiega 'ana fata i na vo, Yau Faulo i bafitaisoku, yau yana tovetutuyama mogitana." <sup>16</sup> ☆Wata tamu a nuani, Sitefana yana vanuga 'ana tomia taiadi a bafitaisodi, we'e a nuani kebu tamu wata aitoi a da bafitaisoi. <sup>17</sup> ☆Keliso i voneku a vetofolovaga kebu bafitaiso faifaina, we'e mogitana Valana 'Atumaina a na lalau'age. A lalau'agega kebu nuanuaku tomotoga i na vo, Faulo yana lau'age 'ana nogaya ma yana 'asete bwaikina wata 'eba nua'ewa." Kebu yaku nuanua bani'odi, nuanuaku Keliso yana wafa 'ai lagalagana 'waineye 'aiseotogina tomotoga nuadi i na 'ewadi. Fai kebu nuanuaku Valananina yana toketokena i na venani-'avo'avovo begaidi a lulu'ivonamo tomotoga 'waidie.

*Yaubada yana 'asete wata yana toketokena Keliso i sivegagesedi.*

<sup>18</sup> ☆Keliso yana wafa 'ai lagalagana 'waineye 'ana vona tomotoganidi wafaotoga 'ana 'edeamo i nunagoiga, 'ana nogaya 'waidie 'wava'wavadi yadi vona. We'e 'ida 'ita'ita'i ta veveluagai ta vo, Keliso i wafaga, Yaubada yana 'eda'eda toketokena, 'ada 'ita'ita'i faifaina." <sup>19</sup> ☆Tofalive'wava'wavanidi yadi 'asete faifaina tamu vona i 'eno'eno Yaubada yana Buki nageneye, Yaubada i vo,

To'asete yadi 'asete a na 'ivesakodi,

Tomotoganidi nuadi magemagetadi yadi nuanua a na 'ivetabodadi."

<sup>20</sup> Begaidi to'asete, tomotoganidi nuadi magemagetadi, wata tomotoganidi tutuya de'e ma yadi 'asete i veve'ikwayekwayega, yadi 'asetanidi ava'aibe bei i nago? Mogitana, tomia fwayafwaya yadi 'asete Yaubada i sivilai bega bani'odi 'wava'wavadi yadi 'asete. <sup>21</sup> Yadi 'asetanidi i siviladiga fai Yaubada ma yana 'asete yana nuanua i 'idewai bega tomotoga i vetumagana taunidi yadi 'asete 'waineye kebu 'adi fata Yaubada i na veluagai. We'e mogitana Yaubada i nuani nuanuana egavo i na vetumagana Keliso Valana 'waineye i na 'ita'ita'iedi, Valananina faifaina 'a lalau'age we'e tomia fwayafwaya fueidi yadi nuanua igodina 'wava'wavadi yadi vona. <sup>22</sup> ☆Tofalive'wava'wavanidi me Diu, nuanuadi 'eba nuavogana wata 'eba nua'ewa i na 'isedina mulieta i na ve'awamogitana. We'e me Guliki i

☆ **1:14-15:** Fol 18:8 ☆ **1:16:** 1 Kol 16:15 ☆ **1:17:** 1 Kol 2:1-2,5 ☆ **1:18:** Lom 1:16 ☆ **1:19:** Ais 29:14 ☆ **1:22:** Mad 12:38; Fol 17:18



falive'wawa'wavaga nuanuadi vona ma 'adi 'aseta wata 'eba nua'ewa i na nogaidi mulieta i na ve'awamogitana. <sup>23</sup> We'e 'ima 'a lalau'age Keliso i wafaga 'ai lagalagana 'waineye tomotoga 'ada 'ita'ita'i faifaina, siwe me Diu i nogai i nuani wafanina 'ana 'isa sakoina nika i bunumayaga i baila, mali tomotoga i nogai i vo, 'A baila, 'ana nogaya 'waimeye 'wawa'wavadi yadi vona.” <sup>24</sup> We'e tomotoganida Yaubada i venua'ivinedaga bega 'ita'ita'i ta na veluagai, me Diu wata mali tomotoga taiadi, 'waideye Keliso taunina Yaubada yana toketokena wata yana 'aseta. <sup>25</sup> Tomotoga igodi to'aseti i vo, Yaubada Natuna i 'aniveleneni wafa 'waineye 'ana 'isa i ve'wawa'wawa,” siwe Yaubada yana nuanuananina tomotoga yadi 'aseti i vebwaika-'iawedi. Wata tomotoganidi i vo, Yaubada mweana, Natuna i wafa 'ai lagalagana 'waineye,” siwe Yaubada yana mweananina toketokeotogina, kebu bani'odi tomotoga yadi toketokena.

*Kebu tamu aitoi 'ana fata taunina i na awa'ai'aia Yaubada mataneye.*

<sup>26</sup> ✧Ekwavo, 'wa na nuani tutuyanina Yaubada i venua'ivinemi 'wa vetumagana Keliso 'waineye, tomotoga matadie to'aseti kebu fuemiga, tovetoketoke kebu fuemiga, wata to'ai'a iwabu kebu fuemiga. <sup>27</sup> We'e mogitana tomotoganimi faifaimi tomia fwayafwaya i vo, Yadi sauluva 'wa da vo 'wawa'wavadi yadi sauluva bani'odi,” siwe Yaubada i venua'ivinemi bega igodi to'aseti i na vedi yadi nuanuananina vekali nika i na bunumayaga. Wata bani'odi tomotoganimi mweami tomia fwayafwaya matadie, siwe Yaubada i venua'ivinemi bega tomotoga toketokedi i na vedi yadi toketokenanina nani-'avo'avovo nika i na bunumayaga. <sup>28</sup> ✧Tomotoga-'avo'avovo, naninidi tomotoga i awaobuobuyediga, wata nani siaidi, Yaubada i venua'ivinedi bega 'waidiega naninidi tomotoga matadie bwaikidi i na venani-'avo'avovo. <sup>29</sup> Nani de'e Yaubada i 'idewaiga begaidi kebu tamu aitoi 'ana fata taunina i na awa'ai'aia mataneye. <sup>30</sup> ✧We'e 'omi Yaubada i miemi Keliso 'waineye taiadi 'wa miave'itubama, bega Kelisonina 'asa'aiana yada 'aseti, nika 'wainega 'ada fata ta na venua'ivina-'atumai. Wata Keliso yana wafa 'wainega Yaubada i 'ive'atumaimi bega 'omi yana tomotoga mogitana yami sauluva matatabuna magemagetadi, wata Kelisonina 'wainega Yaubada i tuveobumi sakona 'wainega. <sup>31</sup> ✧Fai naninidi 'atumaidi Yaubada i 'idewadi Keliso 'wainega

✧ 1:26: Mad 11:25 ✧ 1:28: Iem 2:5 ✧ 1:30: Lom 3:22; Efe 1:7 ✧ 1:31: Iel 9:24; 2 Kol 10:17

begaidi ava'ai i voneyeniga Yaubada yana Buki nageneye ta na 'idewai i vo,

'Ai'edi aitoi i na vo, A na subia,"

I lubwaineni 'Auvea 'aisena i na subiai,

Kebu taunina i na awa'ai'aia."

## 2

*Keliso yana wafa 'ai lagalagana 'waineye nani bwaikao-togina.*

<sup>1</sup> ✧Ekwavo, basenadi a wai 'waimie a lau'agega Yaubada Valana 'ada 'ita'ita'i faifaina, bonaku 'ana nogaya kebu 'eba nua'ewa wata yaku lau'age kebu vitadiga. <sup>2</sup> Yaku vonanidi safailidiamo a nago fai yaku nuanua a 'idewai bega tutuyanina taiadi ta miamia kebu tamu nani faifaina a da nuanua, 'aiseotogina Iesu Keliso faifaina a nuanua, we'e mogitana yana wafa 'ai lagalagana 'waineye nani bwaikao-togina 'waikuye. <sup>3</sup> Tutuyanina a wai-vauvau 'waimie yau kebu toketokekuga, wata ma yaku kololo a tatava. <sup>4</sup> ✧Yaku lau'age wata ava'ai faifaina a lalau'agega, 'adi nogaya kebu 'eba nua'ewa 'alo kebu bani'odi tomia fwayafwaya yadi 'aseta, siwe Yaubada 'Anu'anununa yaku vonanidi i kiave-toketokedi, yami 'eba 'isa a vonavona mogitana. <sup>5</sup> A lau'agega 'Anu'anunu 'Atumaina yana toketokena 'wainega bega yami vetumagana Keliso 'waineye 'wa veluagai, kebu tomotogotoga yadi 'aseta 'wainega, we'e mogitana Yaubada yana toketokena 'wainega.

*Yaubada yana nuanua 'ase'asetana.*

<sup>6</sup> 'Wa na vo 'ako yau kebu to'asetaga, siwe tovetumaganavo i kumaga 'waidie 'eba 'aseta mogitana a lulu'ivona. 'Asetanina kebu tutuya de'e 'ana tomotoga yadi 'aseta bani'odiga 'alo yadi toveimeavo yadi 'aseta bani'odi, toveimeanidi yadi toketokena i mweamwea sai'afoga i na 'a'ava. <sup>7</sup> ✧'Eba 'asetanina faifaina a vonavona Yaubada yana nuanua givagivana wata 'ase'asetana. Basenadiotoga Yaubada bola kebu fwayafwaya i da 'idewaiga yana nuanua 'ase'asetana i 'idewai. Yana nuanuananina 'wainega i 'ive'ai'aiwabuda, siwe i giveni tomotoga 'waidiega. <sup>8</sup> ✧Tutuya de'e toveimeanidi 'waidiega kebu tamu aitoi Yaubada yana nuanua 'ase'asetana i da 'asetai, i da 'asetai'ako kebu 'ada Toveimea Magemagetana i da tutufwaseni 'ai lagalagana 'waineye. <sup>9</sup> ✧Yaubada yana nuanua givagivana wata 'ase'asetana a lulu'ivoneyeniga, faifaina tamu vona i 'eno'eno Yaubada yana Buki nageneye i vo,

Ava'ai Yaubada i 'idewadiga 'ana tonuakalikali faifaidi, 'atumaiotogidi,

Kebu tamu aitoi i da 'isedi wata kebu tamu aitoi i da nogaidi.

Naninidi 'atumaiotogidi faifaidi tomotoga i nuanuawayoga.

<sup>10</sup> We'e 'ida yana nuanuananina 'waideye i sivemageseni 'Anu'anununa 'wainega. I sivemageseniga fai 'Anu'anunu 'Atumaina nani matatabuna 'waidie i susula, siwe wata Yaubada yana nuanua givagivadi wata 'adi 'aseta vitadi 'waidiamo i nago. <sup>11</sup> Kebu aitoi 'ana fata tamu tomogo yana nuanua i na 'asetadi, tomotoganina 'anu'anununa 'aiseotogina 'ana to'aseta. Wata bani'odi kebu tamu aitoi 'ana fata Yaubada yana nuanua i na 'asetadi, 'Anu'anununa 'aiseotogina 'ana to'aseta. <sup>12</sup> \*We'e 'ida Yaubada 'Anu'anununa i tauyeni i ageda, kebu tamu 'anu'anunu tulina ta da 'ewai fwayafwaya de'e 'wainega, we'e mogitana 'Anu'anunu 'Atumaina naninidi Yaubada i 'anivelenediga 'waideye, i sivemagesedi nika ta 'asetadi.

<sup>13</sup> Yaubada yana nuanua 'ase'asetadi faifaidi 'a lulu'ivona, yama vonanidi kebu 'a da 'ewadi tomia fwayafwaya 'waidiega, we'e mogitana 'Anu'anunu 'Atumaina yana awave'eda'eda 'wainega, Yaubada yana nuanua tonovidi 'a lulu'ivoneyedi tomotoganidi 'Anu'anunu 'Atumaina i agediga 'waidie. <sup>14</sup> \*We'e tomotoganidi Yaubada 'Anu'anununa kebu i da agediga, i baila kebu nuanuadi 'Anu'anununa yana 'anivelenena i na 'ewadi fai 'waidie nani-'avo'avovo. Kebu 'adi fata naninidi i na 'asetadi fai 'Anu'anunu 'Atumaina 'aiseotogina 'ana fata i na kiavemagetadi. <sup>15</sup> Tomotoganidi 'Anu'anunu 'Atumaina i agediga 'adi fata nani matatabuna i na venua'ivinedi, ava'aibe 'atumaina, wata ava'aibe sakoina. We'e tomia fwayafwaya 'waidiega kebu tamu 'ana fata tovetumagananidi yadi 'aseta wata yadi toketokena i na nuaveluagai ava'aiega i mai. <sup>16</sup> \*Tomia fwayafwayanidi 'Anu'anunu 'Atumaina kebu i da agedi i bavuga, faifaina tamu vona i 'eno'eno Yaubada yana Buki nageneye i vo,

Kebu tamu aitoi 'ana fata tauni'avana 'Auvea yana nuanua i na 'asetadi,

Wata kebu 'ana fata i na awave'ede'edeni.”

We'e 'ida Yaubada 'Anu'anununa i agedaga, nuadeye Keliso yana nuanua i 'eno'enovi.

### 3

*Me Kolinita bola, kebu i da vetoketoke.*

1 ✨Ekwavo, 'omi bani'odi kwakwama, yami vetumagana Keliso 'waineye mweadi, bola kebu i da vetoketoke. Yaku vona 'waimie kebu bani'odi tomotoganidi i tauyediga 'Anu'anunu 'Atumaina 'waineye 'adi vona, we'e mogitana tomotoganidi fwayafwaya 'ana nuanua 'waidie bola i vevetoketoke 'adi vona a velemi. <sup>2-3</sup> Kwakwama mwedamwedaldi nuanuadi susu'ava, 'ani'ani fa'alidi kebu 'adi fata. 'Omi bani'odi kwakwamanidi, Iesu 'ana veifufu 'adi 'aseti vitadi bani'odi 'ani'ani fa'alidi igodi a da velemi, siwe kebu 'ami fata yami vetumagana mweana, begaidi ve safailidi 'wa da vo susu'ava a velemi. Tutuya de'e 'ani'ani fa'alidi kebu 'ami fata fai bola fwayafwaya 'ana nuanua bwaikina i 'eno'eno 'waimie. I vebwaikaga fai tauni'avami 'wa veve'unumagigi wata 'wa awa'idi'idi ve'ikwayekwayega 'waidiega, 'eba 'isa fwayafwaya 'ana sauluva 'waidiega 'wa vevesauluva. Yami sauluvanidi Yaubada 'ana tobavu yadi sauluva 'wa saladi. <sup>4</sup> Fai 'wa veve'ikwayekwayega 'ifwaimi 'wa vo, 'Ima Faulo yana tomotoga," we'e 'ifwaimi 'wa vo, 'Ima Afolosa yana tomotoga." 'Wa 'iseni, Yaubada 'ana tobavu 'wa vevetutuyamedi.

*Yaubada yana Vona 'ana tolau'age bani'odi tobakula*

<sup>5</sup> Afolosa wata yau Faulo kebu tomotoga bwaikima, awale faifaima 'wa 'eto'idi'idi? 'Ima Yaubada yana tofолоvavo, ava'ai folovaga i velevelema siwe 'asa'aiana 'a 'i'idewadi, yama folovanina 'wainega 'wa vetumagana Keliso 'waineye. <sup>6</sup> ✨Yama folova bani'odi bakula 'ana sauluva. Yau Yaubada yana Vona tomotoga nuamie a bakulidi, Afolosa to'isave'avina, we'e Yaubada taunina 'adi tokiavebwaika. <sup>7</sup> Tobakula wata to'isave'avina kebu tomotoga bwaikidi, Yaubada 'aisena bwaikaotogina, taunina tokiavebwaika. <sup>8</sup> Tomogonina Yaubada yana Vona 'ana tobakula, wata tomogonina to'isave'avina yadi folova 'aitamogana. Tomotoganidi 'aitamogana 'aitamogana 'adi tutula i na veluagadi Yaubada 'wainega yadi folova 'adi 'isa'isa bani'odi. <sup>9</sup> ✨'Ama 'ailuga Yaubada 'ana folova-vaita taiadi 'a folofolova, we'e 'omi yana tanoga.

*Yaubada yana Vona 'ana tovevo bani'odi to'aiyogona.*

Wata 'omi Yaubada 'ana 'a'aiyogona. <sup>10</sup> Yaubada ma yana nuakalikali i veku bega yau bani'odi to'aiyogona ma yana 'aseti. Tutuyanina Yaubada yana Vona a lau'age 'waimie, bei yaku folova i velamu, 'wa vetumagana Iesu 'waineye 'wa da vo Yaubada yana vanuga 'ana 'unututu a da vetovoia. Tutuya de'e mali tovetumaganavo yadi ve 'waidiega vanuganina

'omi luluna i 'iyogoyogonimi 'unututunina 'waineye. Siwe to'aiyogonanidi i lubwainedi yadi folova i na 'i'isave'avinidi i na folova-dewa, ve tonovidi wata mogitana bani'odi folova fa'alidi 'waidiega i na 'aiyogona. <sup>11</sup> ✱'Ami 'unututu 'akonadi i tovtovoi, taunina 'asa'aiana Iesu Keliso, yada vetumagana lamuna. Kebu tamu aitoi 'ana fata tamu 'unututu tulina i na vetovoia, Keliso 'aiseotogina Yaubada yana vanuga 'ana 'unututu. <sup>12</sup> 'Unututunina 'waineye tomtoga 'ifwaidi i 'a'aiyogona folova fa'alidi 'waidiega bani'odi golida, siliba wata kileu 'aninamanamalidi 'adi tutula bwaikidi, 'waidiega. We'e 'ifwaidi nuanuadi folova-'avo'avovo bani'odi welavi nuvanuvadi, 'ayalele, wata danidani. <sup>13</sup> ✱'Awaie Vonayavuga 'ana 'Aiata 'waineye tomtoga 'aitamogana 'aitamogana yada folova 'adi mogitana Yaubada i na sivemagesedi 'ai-'ala'alata 'wainega, yana 'ainina 'wainega yada folova i na sitonovidi 'atumaidi 'alo sakoidi. <sup>14</sup> 'Ai'edi aitoi i na 'aiyogona 'unututunina 'waineye we'e yana folova kebu i na 'ala'a'avaiga, taunina tutula i na veluagai. <sup>15</sup> 'Ai'edi aitoi yana folova i na 'ala'a'avadi, tomogonina 'ana tutula Yaubada i na ve'o'oleni, siwe fai taunina tovetumagana 'ita'ita'i 'aisena i na veluagai 'wa da vo tamu tomtoga nima'ava'avana i da dega 'ai-'ala'alata 'wainega.

*'Omi Yaubada yana vanuga 'eba velu'ui.*

<sup>16</sup> ✱'Wa da vo kebu 'wa da 'asetai, 'omi Yaubada yana vanuga 'eba velu'ui, 'Anu'anununa nagemie i miamia. <sup>17</sup> 'Ai'edi aitoi Yaubada yana vanuganina i na kiavebe'uya bega i na sakona, wata Yaubada tomogonina i na 'ivesakoi. I na 'ivesakoiga fai yana vanuganina magemagetana, 'omi 'asa'aiana yana vanuganimi.

*Yaubada nani matatabuna i veleda 'ada 'aivaita faifaidi.*

<sup>18</sup> 'Ai'edi tamu aitoi 'waimiega i na vo, Yau to'aseta tomtoga matadie," yana vonanina 'ana nogaya vekali. Igodina ma yana 'aseta siwe i lubwaineni 'asetanina i na baileni, ma'itufa Yaubada yana 'aseta i na 'ewai. I na 'ewaiga nika ma yana 'aseta mogitana siwe tomtoga i na 'iseni i na fali'wave'waveni. <sup>19</sup> ✱Taunina yana 'aseta i na baileniga i lubwaineni fai Yaubada mataneye tomia fwayafwaya yadi 'aseta nani-'avo'avovo. Tomotoganidi igodi to'aseta 'adi vona i 'eno'eno Yaubada yana Buki nageneye i vo,

To'aseta yadi 'aseta Yaubada i sisiviladi, 'waidiega ilagi i veveluagadi."

<sup>20</sup> ✱Wata tamu vona i 'eno'eno i vo,

'Auvea to'aseta yadi nuanua i 'aseta'a'avadi,

✱ 3:11: 1 Fit 2:6 ✱ 3:13: 1 Kol 4:5 ✱ 3:16: 1 Kol 6:19 ✱ 3:19: Iob 5:13

✱ 3:20: Same 94:11

Yadi nuanuanidi nani-'avo'avovo mataneye.”

<sup>21</sup> Fai tomotoga yadi 'aseta nani-'avo'avovo Yaubada mataneye, 'wa subisubiadiga 'asa'aiana 'wa na 'ailove. Yami to'edakumetavo tulina tulina 'wa awa'ai'aidi, siwe kebu i da lubwainemi, to'edakumetanidi matatabudi 'ami to'aivaita. To'edakumetanidi nani matatabuna fwayefwayeye taiadi 'omi faifaimi. <sup>22</sup> Afolosa, Fita wata yau Faulo matatabuma 'omi faifaimi, wata bani'odi fwayafwaya, yami mia wata yami wafa, naninidi tutuya de'e i 'eno'enovi wata naninidi 'awaie i na souyediga, matatabuna 'omi faifaimi. <sup>23</sup> 'Omi Keliso faifaina, we'e Keliso Yaubada faifaina.

## 4

*Yaubada 'aisena tovenua'ivina ava'aibe 'atumaina wata ava'aibe sakoina.*

<sup>1</sup> Side bani'odi 'wa na nuanuayedi faifaima. 'Ima Keliso yana tofolovavo, Yaubada yana nuanua givagivadi 'adi to'isave'avinavo, bega a na lulu'ivoneyedi 'waimie. <sup>2</sup> 'Akonadi 'wa 'asetai to'isave'avinavo i lubwainedi ma yadi dumwebika yadi toveimea yana nuanua i na 'i'idewadi. <sup>3</sup> 'Ai'edi 'wa na venua'ivina yau to'isave'avina 'atumaiku 'alo sakoiku, 'waikuye kebu nani bwaikina. Wata bani'odi 'ai'edi mali tomotoga i na venua'ivina faifaiku, kebu tamu ava'ai. Yau wata kebu a da vevenua'ivina tauniku faifaiku yaku folova 'atumaina 'alo kebu, i na nunago a na vekali. <sup>4</sup> 'Aku vebae 'waineye a lutonovi yaku folova matatabuna 'waineye kebu a da sakonaga, siwe 'aku vebaenina 'wainega kebu 'ami fata 'wa na 'asetai a vona mogitana 'alo kebu. 'Ada Toveimea Iesu 'aiseotogina i 'asetaku yaku sauluva 'adi tovenua'ivina. <sup>5</sup> Begaidi kebu i da lubwaineni tamu tomogo yana sauluva faifaina 'wa na venua'ivina. Tutuyanina 'ada Toveimea Iesu i na vila-vaitugani naninidi givagivadi dudubala nageneye wata tomotoga yadi nuanua givagivadi i na sivemagesedi. Tutuyanina 'waineye tomotoga 'aitamogana 'aitamogana 'ana subia i na veluagai Yaubada 'wainega yana sauluva 'adi 'isa'isa bani'odi. Begaidi tutuya de'e kebu awave'atamai 'alo awavesako 'ana tutuya, 'awaie Keliso nani matatabuna i na sivemagesedi 'ada fata bei ta na venua'ivina.

*Faulo i talaboda, me Kolinita kebu taunidi i na awa'ai'aidi.*

<sup>6</sup> Ekwavo, a vonaga a vo, Yau wata Afolosa yami to'isave'avinavo, Yaubada faifaina 'a folofolova 'waimie,” wata a vo, Kebu ta na venua'ivina mali tomotoga yadi sauluva faifaidi.” Vonanidi wata yaku vona 'ifwaidi 'adi 'aseta faifaina, yau wata Afolosa a awatalatutulema nika nuami i na magetadi. A awatalatutulemaga nuanuaku tamu

yada vona 'wa na 'aseta-'atumaia vonanina i vo, Veimea tonovidi kebu 'wa na bailedi.” 'Ai'edi veimea tonovidi 'wa na vematayakeyakediga, kebu taunimi 'wa na awa'ai'aimi 'ami to'edakumetavo faifaidi, we'e mali to'edakumetavo 'wa na awaobuobuyedi. <sup>7</sup> Kebu tamu aitoi i da kialakaimiga we'e awale taunimi 'wa awa'ai'aimi? Nani matatabuna 'waimie i 'eno'enovi Yaubada yana 'anivelena, kebu tamu nani taunimi nimamiega i da souyeni, we'e awale taunimi 'wa awa'ai'aimi 'wa da vo naninidi taunimi 'ami 'idewadewa.

<sup>8</sup> ✧ Omi me Kolinita 'ami 'isa. Igodi yami nuanua 'wa vo, 'Ima 'akonadi 'ama fata nani matatabuna 'waidie, 'ai'aiwabu bwaikina 'a veluagai. 'Ima 'a ve-kini ma yama veimea.” De'e bani'odi 'wa vonevoneyediga, igodi 'wa na vebwaika-'iawema siwe 'ai'edi mogitana 'omi tomotoga bwaikimi Yaubada mataneyeye yau a da sosoana bwaikina nika 'omi, wata 'ima taiadi ta da veveimea. <sup>9</sup> 'Ana 'isa 'waikuye Yaubada i veimea 'ima tomata'aulele 'a vemuliotoga. Base-nadi tolugavia 'adi gaviavo i 'i'ive'avinidi i lulu'ivevenedi tomotoga matadie bega i na 'isadewadi mulieta i luluve-wafadi. Wata 'ima bani'odi mali tomotoga i kumekumeta we'e 'ima i vevemuliema, anelose wata tomia fwayafwaya matatabudi i 'i'isadewama 'wa da vo 'a da nunago 'a na wafa. <sup>10</sup> Keliso faifaina 'a vetofolova begaidi mali tomotoga i fali'wave'wavema, we'e 'omi Keliso yana tomotoga, igodina yami 'asete bwaikina. 'Ima tomotoga mweama we'e 'omi igodina toketokemi. Mali tomotoga i awaobuobuyema we'e 'omi igodina ma 'ami ve'ililibu. <sup>11</sup> ✧ Basenadi wata 'asiau 'a laselase wata 'anigoma i lalala, 'ama kaleko 'anilabulabu'idi, tomotoga i nikenikema wata kebu yama vanuga 'a miayabavuvua. <sup>12</sup> ✧ A toke 'a folofolova nimamega taunima 'ama 'aivaita faifaina. Tomotoga i yagayagaima we'e 'ima faifaidi 'a vevelu'ui Yaubada i na vesauluva 'atumaina 'waidie, i 'i'ivekokovima, siwe 'a totokemaigema. <sup>13</sup> Tomotoga i awavesakoyema, we'e 'ima vona bikadiega yadi vonanidi 'a tutulidi. Mogitana 'ima bani'odi 'ula'ula wata yogo tomotoga matadie.

*Faulo i vo, Me Kolinita natukwavo.”*

<sup>14</sup> De'e bani'odi a vonevoneyediga yaku kiluma 'wainega, kebu a da vo, A na 'ivebunumayagidi,” we'e mogitana fai 'omi bani'odi natukwavo a nuakalikiemi bega nuanuaku a na awave'ede'edemi ve tonovidi 'waidiega. <sup>15</sup> Avinodi 'ami to'isave'avinavo fuedi i veve 'waimie Keliso faifaina, siwe tamamiaivo kebu fuediga. Yau 'aiseotogiku tamamia fai a kumeta a lau'age 'waimie Iesu Keliso Valana 'Atumaina

faifaina nika 'wa vetumagana 'wa luku yana 'Aila'a nageneye 'wa da vo a da venatunemi. <sup>16</sup> ✧ Fai yau tamami a na vonemi, nuanuaku 'wa na salaku. <sup>17</sup> ✧ Fai nuanuaku 'wa na salaku Timoti a voneni i na wai 'waimie. Taunina natuku Keliso yana 'Aila'a 'waineye a nuakalikali, dumwena bikana 'ada Toveimea yana nuanua i 'i'idewadi. A vetuneiga 'ami tolinuata'i faifaina, i na vonemi 'wa na nuani yaku mia 'ivauna Iesu Keliso 'waineye 'ana sauluva, sauluvanidi faifaiddi a veve tovetumaganavo 'adi 'aila'a tulina tulina 'waidie, 'awalawa matatabuna 'waidie.

<sup>18</sup> 'Ifwaimi ma yami fwausa taunimi 'wa awa'ai'aimi 'wa vo, 'A nuani Faulo kebu i na mai, i kololoyema." <sup>19</sup> Siwe 'ai'edi 'Auvea i na tauyekuga sai'afoga a na wai tomotoganidi i awa'ai'aidiga a na 'isedi a na 'asetadi ma yadi toketokena i folofolova 'alo 'awa'avadi i vonavonamo. <sup>20</sup> ✧ A na 'asetadi fai 'ida Yaubada i veveimeyedaga yada toketokena i vevelede, kebu 'awa'avada i da vonavonamo. <sup>21</sup> Taunimi 'wa na venua'ivina ava'ai nuanuami. Nuanuami a na wai vematavuloga a na velemi yami sauluva sakoidi faifaiddi, 'alo nuanuami nagami yami sauluva 'wa na 'ive'atumaidi mulieta ma yaku nuakalikali a na wai bonaku bikanega a na vonemi?

## 5

### *Tovetumagana nuanuana sakona, 'ana veugauga.*

<sup>1</sup> Tamu vala i lulu'ivona-vuvueni a nogai, tamu tomogo tovetumagana 'ami 'aila'a 'wainega yana sauluva sakoiotogina. Tomotoga fuedi Yaubada 'ana tobavu taiadi sauluvanina i talabodeni kebu bani'odi i na 'i'idewai, we'e tomogonina taunina tovetumagana siwe madiana, tamana yana vavine taiadi i 'eno'eno. <sup>2</sup> Awale taunimi 'wa awa'ai'aimi, we'e mogitana i lubwainemi 'wa da nuavita bwaikina, wata tosakonanina 'wa da veugeugeni 'ami 'aila'a 'wainega. <sup>3</sup> Yau tulikuye a miamia siwe a nuanuanimi. 'Ada Toveimea Iesu veimea i veleku bega 'akonadi a veimea tosakonanina vematavuloga i na veluagai 'wa da vo taiadi ta da miamia a da vona. <sup>4-5</sup> ✧ Tutuyanina 'wa na va'autaga yau yaku nuanua taiadi 'wa na vava'auta, 'ada Toveimea Iesu yana toketokena 'wainega tosakonanina 'wa na 'aniveleneni Seitani 'waineye. 'Wa na veugeugeniga i na nago Seitani nimaneye vita fuedi 'waidiega voke yana nuanua sakoidi i na 'a'ava bega 'aiatanina 'ada Toveimea Iesu i na vila-vaitugani, 'anu'anununa 'ita'ita'i i na veluagai.



*Tovetumagana i sakosakona kebu taiadi 'wa na miave'itubama.*

<sup>6</sup> 'Wa awa'ai'aimi 'wa vo 'Ima 'atumai'avama," siwe kebu i da lubwainemi. 'Wa na nuani, isita nani siaina siwe falawa matatabuna 'waineye i sususula i vevebwaika. Wata bani'odi tomogo 'aitamogana yana sakona siwe i na tunuvelevelemi.\*

<sup>7</sup> \*Naninina sakoina 'wa na 'ewayavuleni nika yami sauluva 'atumai'avana nagami bani'odi, kebu tamu yami sakonaga. 'Wa na ve'atumaiga fai Keliso yami sakona i 'u'umidi.

Basenadi Itifita 'waineye me Diu 'ita'ita'i i veluagai 'aisaya sifi dayagidi 'waidiega. Anelose dayaganidi i 'isedi yadi vanuge, kebu i da luvewafadi i uvi'agalatagonidi. Begaidi Uvi'agalatagona 'ana sakali 'waineye me Diu sifi natudiavo i nikenikedi 'ana 'eba nuave'avina. Wata bani'odi Iesu, taunina Yaubada yana Sifi Siaina, i wafa yada sakona 'adi nuatavuna faifaidi. <sup>8</sup> \*Sakalinina i na velilivana me Diu beledinidi i kabunidiga isita taiadi i tawetawedi, ma'itufa beledinidi i kabunidiga falawa'ava 'wainega ma yadi sosoana i 'ani'anidi. Wata 'omi bani'odi, kebu sauluva sakoidi 'wa na luwanawanadi yami sauluva 'atumaidi taiadi, i lubwainemi yami mia matatabuna 'waidie ma yami sosoana Keliso yana wafa 'wa na nuanuani, wata yami nuanua yami sauluva taiadi tonovi'avadi.

<sup>9</sup> Basenadi tamu leta a kilumi i wai a vonemi a vo, Tove'avula-'avo'avovo kebu taiadi 'wa na miave'itubama."

<sup>10</sup> Siwe Yaubada 'ana tobavu i sakosakonaga kebu faifaidi a da vonavona. Tobavunidi i veve'avula-'avo'avovo, i luluve'ove'o'olagi, i vavainago, wata yaubada-vekavekali i subisubiadi. 'Ai'edi nuanuami tomia fwayafwaya sakoidi matatabudi 'wa na bailediga, ava'aibe 'wa na nagoi? 'Wa na vo, 'A na bailedi," fwayafwaya de'e 'wa na 'iaweni. <sup>11</sup> \*We'e mogitana yaku vona 'ana 'asete side bani'odi. 'Ai'edi aitoi i na vo, Yau a vetumagana Iesu 'waineye," siwe i na veve'avula-'avo'avovo, i na luluve'ove'o'olagi, yaubada-vekavekali i na subisubiadi, i na vevebonaivo, ufa toketokena i na toke i na yemuyemu, 'alo i na vavainago, tomotoganidi bani'odi, faifaidi a vonavona. Kebu taiadi 'wa na miave'itubamaga wata kebu 'wa na tayegidi 'ani faifaina.

<sup>12-13</sup> Tomotoganidi kebu i da vetumagana Iesu 'waineye yadi sauluva faifaidi kebu a na vo 'atumaidi 'alo sakoidi, kebu yaku 'eba veimea, Yaubada 'aisena i na veimea 'adi vematavuloga faifaina. We'e 'omi ma yami veimea tovetumagana 'waidie. I lubwainemi 'ami fata emiavo tovetumagana i na sakonaga 'wa na veimeyedi 'adi vematavuloga faifaina.

\* **5:6:** Bani'odi walabo 'aluna, nani siaina siwe 'ana fata 'aisayanina matatabuna i na 'ivesakoi. \* **5:7:** Sou 12:21; Ion 1:29 \* **5:8:** Sou 12:15 \* **5:11:** Efe 5:3,7

Tamu vona i 'eno'eno Yaubada yana Buki nageneye 'wa na vetutuyameni i vo,

'Ai'edi tamu aitoi Yaubada yana 'Aila'a nageneye i na sakosakonaga, 'wa na veugegeni."

Wata 'omi me Kolinita i lubwainemi tomogonina i sakosakona tamana yana vavine taiadi 'wa na veugegeni.

## 6

### *Tovetumagana yadi vonayavuga faifaina.*

<sup>1</sup> Ekwavo, tamu yaku nuanua side bani'odi. 'Ai'edi tamu 'ami 'aila'a ma iana tovetumagana'ava taiadi i na ve'ikwayekwayega, kebu tamu sai'afo i da lubwaineni ve'ikwayekwayeganina faifaina iana i na naweni 'eba vonayavuga 'waineye. I na naweniga Yaubada 'ana tobavu yadi toveimea 'waidie vonayavuga faifaina kebu i da lubwaineniga. We'e mogitana, 'ai'edi i na ve'ikwayekwayega i lubwainedi i na vonayavuga Yaubada yana tomotoga matamie nika 'omi 'wa na veimea naninina faifaina. <sup>2</sup> 'Wa da vo kebu 'wa da 'asetai, 'awaie tomia fwayafwaya matatabudi i na vonayavuga 'omi Yaubada yana tomotoga matamie 'wa na veimeyedi. Fai 'ami fata tomia fwayafwaya matatabudi 'wa na veimeyedi vonayavuga 'waineye, mogitana tutuya de'e 'ami fata nani siaidi faifaidi 'wa na veveimea. <sup>3</sup> Wata 'wa da vo kebu 'wa da 'asetai, 'awaie anelose i na vonayavuga matadeye ta na veimeyedi yadi sauluva faifaidi. Fai folovanina bwaikina 'wa na 'idewai abame, mogitana naninidi i sousouyedi fwayefwayeye yada mia faifaidi, 'ami fata 'wa na veveimea. <sup>4</sup> Begaidi 'ai'edi 'ifwaimi 'wa na ve'ikwayekwayega naninidi i sousouyediga faifaidi, tovetumaganavo 'ifwaidi 'wa na venumavinedi i na vetoveimea bega tove'ikwayekwayeganidi i na vonayavuga matadie. We'e tovetumaganavonidi i na vetoveimeega, 'ai'edi matamie kebu 'adi wagava bwaikidiga, kebu tamu ava'ai, 'adi fata i na veimea tonovina. <sup>5</sup> De'e bani'odi a voneyediga bega 'wa na bunumayaga. 'Wa vovonayavuga Yaubada 'ana tobavu matadie 'ana 'isa 'wa da vo kebu tamu aitoi 'waimiega ma yana 'asetaga, kumanina 'ana fata emiavo yadi ve'ikwayekwayega i na kiavetonovi. <sup>6</sup> I lubwainemi tauni'avami 'wa da kikiavetonova siwe tovetumaganavo 'ifwaidi ediavo i nunawedi 'eba vonayavuga 'waineye, bei Yaubada 'ana tobavu matadie i vovonayavuga i vevitadiga faifaina.

<sup>7</sup> ✧ 'Omi tovetumagana yami ve'ikwayekwayega wata emiavo 'wa nunawedi 'eba vonayavuga 'waineye, 'eba 'isa

Yaubada yana nuanua kebu 'wa da 'i'idewadi, sakona i vetoketoke 'waimie. We'e 'ai'edi emiavo i na vesauluva sakoina 'waimie 'alo yami kukua i na vinagodiga tamu 'eda'eda 'atumaina i 'eno'eno, 'wa na tokemaigemi kebu naninina faifaina 'wa na nuanua. <sup>8</sup> Siwe tokemaiga 'wa baila, ma emiavo 'wa vevesauluva sakoina wata 'wa vavainago. Fai emiavo tovetumagana ma fuemie, mogitana 'waidie 'wa da vesauluva 'atumaina, siwe 'wa vevesauluva sakoina 'waidie.

<sup>9-10</sup> ✨'Wa da vo kebu 'wa da 'asetai, tosakona kebu 'adi veuveuta i na veluagaiga abame Yaubada yana 'Eba Veimea nageneye. Kebu nuanuaku tamu aitoi i na vekaliemiga, tosakonanidi kebu i na lukuga side sauluvanidi 'waidiega. Tomotoganidi bunu 'ana nuanua sakoidi i 'i'idewadiga, tomotoganidi ma yadi subia i 'odu'odu yaubada-vekavekali 'waidie, tomotoganidi vevine i luluobuyediga, tomotoganidi iaveta'ava i sakosakonaga, tomotoganidi i vavainagoga, tomotoganidi i luluve'ove'o'olagiga, tomotoganidi ufa toketokena i toke i yemuyemu, tomotoganidi i vevebonaivoga, wata tomotoganidi i lalaugiva kukua faifaidi, taunidi kebu i na luku. Tomotoganidi de'e bani'odi, kebu tamu sai'afo 'adi veuveuta i na veluagai Yaubada yana 'Eba Veimea nageneye. <sup>11</sup> ✨'Ifwaimi basenadi kebu 'wa da vetumagana Keliso 'waineye bani'odi 'wa vevesauluvedi, tutuya de'e 'akonadi yami sakona i lekoa-yavuledi. 'Ada Toveimea Iesu Keliso 'ana wagavayega wata yada Yaubada 'Anu'anununa yana toketokena 'wainega Yaubada i 'ive'atumaimi bega 'omi yana tomotoga magemagetami, kebu tamu yami sakona mataneye.

*Tomogoda 'Anu'anunu 'Atumaina yana 'eba mia,*

*kebu ta na lu'avo'avovoyedi.*

<sup>12</sup> Voke 'ifwaimi 'wa vo, Iesu yaku sakona i ve'a'avadi begaidi yavuyavuku, 'ai'edi ava'ai sauluvaga nuanuaku, 'aku fata a na 'idewai." Siwe a na vo, Sauluva matatabuna kebu 'atumai'avadi, wata kebu 'eba 'aivaita." Wata voke 'ifwaimi 'wa na vo, Kebu, Iesu yaku sakona i ve'a'avadi begaidi yavuyavuku, 'ai'edi ava'ai sauluvaga nuanuaku, 'aku fata a na 'idewai." We'e yau a na vo, Sauluva 'ifwaidi a baila, i na nunago sauluvanidi i na vetoketoke 'waikuye 'wa da vo i da veveimeyeku." <sup>13</sup> ✨Wata 'ifwaimi 'wa vo, 'Ani'ani kamo faifaina, we'e kamoda 'ani'ani 'ana mwai bega 'ai'edi tomogoda 'waidiega ta na sakosakonaga, kebu tamu ava'ai." Siwe 'awaie Yaubada yana veimea 'wainega 'ani'ani wata kamo 'adi ailuga i na 'a'ava. Tomogoda kebu sakona faifaina, i lubwaineda tomogoda ta na folovedi 'Auvea faifaina, we'e

taunina tomogoda 'adi to'isave'avina. <sup>14</sup>✧Yaubada yana toke-tokena 'wainega 'ada Toveimea Iesu i sivetovoia wafayega, wata bani'odi yana toketokenanina 'wainega i na sivetovoida tomogoda i na ve'ivau.

<sup>15</sup>✧'Wa da vo kebu 'wa da 'asetai, tomogomi Keliso du'una. Tomogoku, Keliso du'una, 'wa da nuani 'ana fata 'wainega a na sakona vavine tolagogona taiadi bega tomogoma i na luvetubama? A nuani kebu tamu sai'afo i da lubwaineni.

<sup>16</sup>✧Wata 'wa da vo kebu 'wa da 'asetai, 'ai'edi aitoi i na sakona tamu vavine taiadi 'akonadi i luvetubama tomogodi 'aitamogana. I na luvetubamaga fai tamu vona i 'eno'eno Yaubada yana Buki nageneye i vo,

'Adi 'ailuga siwe 'wa da vo tomotoga 'aitamogana."

<sup>17</sup>We'e 'ai'edi aitoi taunina i na tauyeni 'ada Toveimea Keliso 'waineye taiadi i na miave'itubamaga, tomogonina 'anu'anununa wata Keliso 'Anu'anununa 'akonadi taiadi i luvetubama nika 'aitamogana.

<sup>18</sup>Bunu 'ana nuanua sakoidi matatabuna 'wa na kekesedi. Sauluva 'ifwaidi sakoidi kebu i na tunuvedamana tomogomie, we'e 'ai'edi bunu 'ana nuanua 'waidiega 'wa na sakonaga, sakonanina i na 'eno'eno tomogomie. <sup>19-20</sup>✧'Wa da vo kebu 'wa da 'asetai, tomogomi 'Anu'anunu 'Atumaina yana 'eba mia, 'Anu'anununina Yaubada yana 'anivelena, nagemie i miamia. Tomogomi kebu taunimi yami 'eba veimea, Yaubada 'aiseotogina 'ami Toveimea fai tutula bwaikaotogina 'wainega i kimwanemi, tutulanina Keliso, i 'aniveleneni i wafa faifaimi. Fai Yaubada i kimwanemi, kebu tomogomi 'wa na tauyedi sakona 'waineye, we'e mogitana tomogomi 'waidiega 'wa na vevesauluva 'atumaina Yaubada 'ana subia faifaina.

## 7

### *Faulo i veifufu nagi mogitana faifaina.*

<sup>1</sup>Basenadi leta 'wa kilumi i mai 'wa velutoli nani 'ifwaidi faifaidi, bega tutuya de'e naninidi a na veifufuyedi.

'Ai'edi aitoi kebu nuanuana nagi, 'atumaina, kebu tamu ava'ai. <sup>2</sup>Siwe fai tomotoga fuedi i sakosakona bunu 'ana nuanua 'waidiega i na nunago sauluvanidi i na silubumi 'wa na sakona, begaidi i lubwaineni iaveta 'aitamogana 'aitamogana i na nagi bega taunina taunina yana vavine. Wata bani'odi vevine i na nagi bega taunidi taunidi yadi lamoga. <sup>3</sup>'Ai'edi vavine nuanuadi i na nago yadi lamoga 'waineye, yadi lamoga kebu i na baila, wata 'ai'edi tomogo nuanuana i na nago yana vavine 'waidie, yana vavine kebu i

✧ 6:14: Lom 8:11; 2 Kol 4:14 ✧ 6:15: 1 Kol 12:27 ✧ 6:16: Nag 2:24

✧ 6:19-20: 1 Kol 3:16; 1 Fit 1:18-19

na baila. <sup>4</sup>Kebu i na bailaga fai vavine i nagiga tomogodi kebu 'aisedi 'ana toveimea, wata yadi lamoga yana 'eba veimea. Wata bani'odi tomogo i nagiga tomogona kebu 'aisena 'ana toveimea, wata yana vavine yadi 'eba veimea. <sup>5</sup>'Eno faifaina, iaveta kebu yami vevinevo 'wa na talabodedi, wata vevine kebu yami lalamogavo 'wa na talabodedi. Siwe 'ai'edi tamu tutuya tamu tomogo ma yana vavine i na veifufu yadi nuanua 'aitamogana i na vo, 'Aiata 'ifwaidi nagedie kebu taiadi ta na veluaga bega 'ada fata ta na tauyeda velu'ui faifaina," sauluvanina, sauluva 'atumaina. Mulieta yami velu'ui 'adi 'aiata i na 'a'avana, 'ami fata wata 'wa na veluaga, i na nunago Seitani yana sailubu 'wainega naninina 'ana nuanua i na vebwaika 'waimie nika 'wa na sakona tamu tomogo 'alo tamu vavine taiadi.

<sup>6</sup> Yaku vonanidi nagi faifaina, kebu veimea fa'alina a da vevelemi, siwe a tauyemi bani'odi 'wa na vevesauluvedi.

<sup>7</sup> Yau umaumalaku, nuanuaku iaveta wata vevine matatabumi 'wa da salaku. Siwe Yaubada ma yana nuakalikali 'ada veuveuta tulina tulina i veleda bega 'ifwaidi yana 'aivaitanina 'wainega i 'iveumaladi i folofolova faifaina. 'Ifwaidi yana 'aivaitanina 'wainega i nagi wata faifaina i folofolova.

<sup>8</sup> Tutuya de'e a na veifufu umaumala, kolokoloa wata 'wabu'wabula 'waimie. 'Ai'edi tutuya de'e kebu 'wa na nagiga, 'aise'avami 'wa na miamia yau bani'odi, a nuani 'atumaiotogina. <sup>9</sup>✧We'e 'ai'edi nuafoumi yalayaladi nuanuami bwaikina ve'avula, i lubwainemi 'wa na nagi. Ve'avula 'ana nuanua i na vebwaikaga 'waimie 'wa da vo i da 'alavekasikasisimi i na nagoga nika 'wa na sakona, we'e 'wa na nagiga 'atumaina, bei kebu 'wa na sakonaga.

<sup>10-11</sup> We'e nagingagimi a na vonemi. Tamu veimea a na velemi, veimeanina yau kebu 'waikuyega, 'Auvea 'wainega. Vavine nagingagidi kebu yadi lamoga i na baileniga, we'e 'ai'edi i na 'iaweni i na nagoga, vetuma kebu i na nagiga tamu tomogo taiadi. 'Ai'edi mia'aise 'ana vebae sakoina 'waidie, i lubwainedi i na viladi yadi lamoga 'waineye, siwe i na veiana taiadi i na mia. Wata bani'odi tomogo yana vavine kebu i na vesa'ilidi.

<sup>12</sup> 'Ai'edi aitoi i vetumaganaga Keliso 'waineye siwe yana vavine 'alo yadi lamoga kebu i da vetumagana, 'adi vona de'e. Vonanina yau tauniku 'waikuyega, kebu 'Auvea i da veleku. 'Ai'edi tamu tomogo taunina tovetumagana, we'e yana vavine kebu i da vetumagana, siwe nuanuadi taiadi i na miamia, tomogonina kebu i na vesa'ilidi. <sup>13</sup> Wata bani'odi vavine, 'ai'edi vavine tovetumagana, we'e yadi lamoga kebu

i da vetumaganaga siwe nuanuana yana vavine taiadi i na miamia, vavine kebu i na sa'ilaga. <sup>14</sup> Kebu i na sa'ila taiadi i na miamia fai vavine i vetumaganaga 'waidiega yadi lamoga i ve'atumai Yaubada mataneyeye bega tomogonina Yaubada yana tomotoga. We'e tomogo i vetumaganaga 'wainega yana vavine i ve'atumai Yaubada mataneyeye bega vavinenidi Yaubada yana tomotoga. 'Ai'edi tama wata ina kebu i na ve'atumai Yaubada mataneyeye, natudiavo 'wa da vo Yaubada 'ana tobavu natudiavo, we'e mogitana fai 'adi 'ailuga i ve'atumaiga, natudiavo wata i ve'atumai bega matatabudi Yaubada yana tomotoga.

<sup>15</sup> ☆ 'Ai'edi tamu tomogo tovetumagana we'e yana vavine kebu i da vetumagana nuanuadi yadi lamoganina i na baileni i na nago, tomogo kebu i na talabodediga i na tauyedi. Wata bani'odi 'ai'edi tamu vavine tovetumagana we'e yadi lamoga kebu i da vetumagana nuanuana yana vavinenidi i na bailedi i na 'awa'idia, vavine kebu i na talabodeniga i na tauyeni. Kebu tamu veimea i da 'eno'eno bega tovetumagana i na yogonidi, 'ai'edi yana vavine 'alo yadi lamoga kebu i da vetumaganaga nuanuadi i na nagoga, 'asa'aiana i na tauyeni. I na nagoga fai Yaubada i venua'ivineda kebu nuanuana ve'ikwayekwayega, nuanuana yada mia 'atumai'avana. <sup>16</sup> ☆ 'Omi vavine 'wa vetumaganaga a na vonemi. 'Omi kebu 'wa da 'asetai siwe 'ai'edi yami lamoga taiadi 'wa na miamia, voke yana nuanua 'wa na sivilai nika i na vetumagana Keliso 'waineye. Wata 'omu tomogo 'u vetumaganaga bani'odi, kebu 'u da 'asetai siwe 'ai'edi yamu vavine taiadi 'wa na miamia, voke yadi nuanua 'u na sivilai nika i na vetumagana.

*'Omi Keliso yana tomotoga yavuyavumi.*

<sup>17</sup> ☆ 'Omi tovetumaganavo wata a na vonemi. 'Aitamogana 'aitamogana yada mia wata yada sauluva tulidi bani'odi 'Auvea i veutada, bega kebu tamu aitoi i na vo, Yaku mi-anina i na vetuli.” Yaubada yana vegole 'wainega 'wa luku yana 'Aila'a 'waineye, siwe kebu 'wa na vo, Yaku mia nagami a na baileni,” ava'ai yami folova nagami, tutuya de'e wata 'waineye 'wa na folofolova, 'ai'edi nagami 'omi tomotoga bwaikimi 'alo siaimi 'asa'aiana bei 'wa na miamia. De'e veimeanina a veve tovetumaganavo 'adi 'aila'a 'aitamogana 'aitamogana 'waidie. <sup>18</sup> Tamu 'eba 'isa side bani'odi. 'Ai'edi tamu tomogo Diu basenadi Yaubada yana tugusa bunu 'aibobo i 'ewai, mulieta Yaubada yana vegole 'wainega i luku Keliso yana 'Aila'a 'waineye, kebu yana nuanua i na vo, Tugusanina a na luvuyovuyoi.” Wata 'ai'edi

aitoi bunu 'aibobo kebu i da 'ewaiga siwe Yaubada yana vegole 'wainega i luku Keliso yana 'Aila'a 'waineye, kebu i na vo, Bunu 'aibobo a na 'ewai.”<sup>19</sup> ☆'Ai'edi bunu 'aibobo ta 'ewai 'alo kebu, kebu tamu ava'ai, we'e nani bwaikina Yaubada yana veimea ta na vevematayakeyakedi.<sup>20</sup> Yaubada yana vegole 'wainega 'wa luku Keliso yana 'Aila'a 'waineye, siwe kebu 'wa na vo, Yaku mia nagami a na baileni,” 'aitamogana 'aitamogana yami mia nagami, 'asa'aiana 'waidie 'wa na miamia.<sup>21</sup> Wata tamu 'eba 'isa, 'ai'edi 'ifwaimi 'wa vetofolova-maimaiga tamu toveimea 'waineye, siwe Yaubada yana vegole 'wainega 'wa luku Keliso yana 'Aila'a 'waineye, 'ami toveimeavo yadi veimea fa'alidi faifaidi kebu 'wa na nuanua, 'wa na folofolovamo. Siwe 'ai'edi yami toveimea i na tauyemi i na vo, 'Asa'aiana 'wa nago,” 'ami fata 'wa na 'iaweni.<sup>22</sup> 'Wa vetofolova-maimaiga kebu faifaina 'wa na nuavita fai tutuyanina 'ada Toveimea Keliso i golemi 'wa luku yana 'Aila'a 'waineye, nika bei i yavumi. Mogitana tutuya de'e tamu tomogo i veveimeyemi, siwe 'omi Keliso yana tomotoga yavuyavumi, sakona kebu i da veveimeyemi. We'e 'ifwaimi kebu tamu tomogo 'waineye 'wa da vetofolova-maimaiga, tutuyanina Keliso yana vegole 'wainega 'wa luku yana 'Aila'a 'waineye, bei 'wa vetofolova-maimaiga faifaina.<sup>23</sup> Yaubada i kimwanemi tutula bwaikaotogina 'wainega, tutulanina Keliso, i 'aniveleneni i wafa faifaimi, begaidi taunina 'ami Toveimea mogitana. Kebu yami nuanua 'wa na tauyedi bega tamu aitoi i na veveimeyemi.<sup>24</sup> Ekwavo, Yaubada yana vegole 'wainega yami sauluva 'wa siviladi 'wa luku Keliso yana 'Aila'a 'waineye siwe kebu 'wa na vo, Yaku mia nagami a na baileni,” 'aitamogana 'aitamogana yami mia nagami, 'asa'aiana 'waidie 'wa na miamia. Siwe tutuya de'e Yaubada i mialafinimi wata i 'i'ivaisemi.

*Umaumala, kolokoloa, wata 'wabu'wabulavo 'adi vona.*

<sup>25</sup> Tutuya de'e yami velutoli egavo kebu i da nagiga faifaina a na tutuli. Kebu tamu veimea 'Auvea i da veleku siwe fai ma yana nuakalikali i venuma'ivineku a vetofolova faifaina, bega yaku nuanua a na lu'ivona 'waimie, 'ami fata 'waineye 'wa na vetumagana.<sup>26</sup> Fai vita fuedi i sousouyedi 'ida tovetumaganavo 'waideye, yami mia nagami, a nuani i lubwainemi 'asa'aiana 'waidie 'wa na miamia.<sup>27</sup> Side bani'odi. 'Ai'edi naginagimi, kebu yami vevinevo 'wa na vesa'ilidi. Egavo kebu 'wa da nagiga, kebu nagi faifaina 'wa na nuanua.<sup>28</sup> We'e 'ai'edi 'wa na nagiga 'alo ne'e'elina i na nagiga kebu i na sakonaga. 'Wa na nagiga vita fuedi i na souyedi 'waimie we'e 'ai'edi nagi 'wa na baileni, 'atumaina, kebu nuanuaku 'ami vita i na vefue.

☆ 7:19: Gal 5:6

<sup>29</sup> Ekwavo, yaku vona 'ana 'aseta side bani'odi. Yada tutuya fwayefwayeye 'akonadi i veve'ale'usa, begaidi tutuya de'e i na nagoga iaveta nagingidi Yaubada 'ana nua'ewa 'waidie i na 'eno'eno, yadi folova toketokena faifaina 'wa da vo umaumaladi. <sup>30</sup> Wata tovemogai, i lubwainedi Yaubada 'ana nua'ewa 'waidie i na 'eno'eno, yadi folova toketokena faifaina 'wa da vo kebu i da nuavitaga. Egavo i sososoana, i lubwainedi Yaubada 'ana nua'ewa 'waidie i na 'eno'eno, yadi folova toketokena faifaina 'wa da vo kebu i da sosoanaga. Egavo kukua i kimwakimwane, i lubwainedi i na toke i na folofolova Yaubada faifaina siwe 'adi 'isa 'wa da vo kukuanidi kebu 'waidie. <sup>31</sup> \*Egavo i folofolova fwayafwaya 'ana nani faifaidi, naninidi kebu nuadi i na 'ewadi, i lubwainedi Yaubada 'ana nua'ewa i na 'eno'eno 'waidie. I lubwaineniga fai de'e fwayafwayanina nani 'ifwaidi taiadi tutuya de'e i 'eno'enoviga, sai'afoga i na 'a'ava.

<sup>32</sup> Kebu nuanuaku 'wa na venuafouviga nani fuedi faifaidi. Egavo kebu i da nagiga tutuya matatabuna 'Aueva yana folova faifaina i nuanua fai nuanuadi i na kiavesosoani. <sup>33</sup> We'e nagingidi, fwayafwaya 'ana nani 'adi nuanua 'waidie i 'eno'eno fai nuanuadi yadi vevinevo i na kiavesosoanidi. <sup>34</sup> 'Aueva yana folova faifaina i nuanua wata yana vavine 'adi kiavesosoana faifaina i nuanua bega yana nuanua i vesidakadakai. Wata bani'odi vevine kebu i da nagiga wata ne'e'ela, tutuya matatabuna 'Aueva yana folova faifaina i nuanua fai nuanuadi tomogodi wata 'anu'anunudi matatabuna i na tauyedi 'waineye. We'e vevine nagingidi, fwayafwaya 'ana nani 'adi nuanua 'waidie i 'eno'eno fai nuanuadi yadi lalamogavo i na kiavesosoanidi.

<sup>35</sup> De'e bani'odi a voneyediga nagi faifaina, kebu a da tatalabodemiga, we'e mogitana nuanuaku a na 'ivaisemi bega sauluva 'ana tonovineamo 'wa na nunago. Wata nuanuaku taunimi 'wa na tauyemi mogitana 'Aueva 'waineye, 'aiseotogina 'ana nua'ewa 'waimie i na 'eno'eno.

<sup>36</sup> 'Ai'edi aitoi natuna ne'e'elina i na talabodeni nagi faifaina, mulieta yana nuanua i na sivilai i na vo, Yaku talaboda a nuani kebu 'atumainaga fai natuku 'akonadi nagi 'ana malamala i veluagai wata nuanuana i na nagi." 'Ai'edi bani'odi i na nuanuayediga, taunina 'aisena i na veimea, natuna i na tauyeniga kebu i da sakonaga. <sup>37</sup> We'e 'ai'edi aitoi nuanuana natuna ne'e'elina kebu i na nagiga, kebu venuanaluga 'alo lukakada 'wainega, 'atumaina, taunina 'aisena i na veimea. <sup>38</sup> Yaku vonanina 'ana 'aseta side bani'odi. 'Ai'edi aitoi natuna ne'e'elina i na tauyeni i na nagi, yana nuanuananina 'atumaina, we'e 'ai'edi aitoi natuna



ne'e'elina i na talabodeni kebu i na nagiga, yana nuanuananina 'atumaiotogina.

<sup>39</sup> \*'Ai'edi vavine yadi lamoga ma yawaina i na miamia, vavinenidi yadi lamoga 'ana 'au, 'wa da vo yogoyogonidi yadi lamoganina 'waineye. Mulieta yadi lamoga i na wafaga, 'akonadi yavuyavudi 'wainega, 'ai'edi nuanuadi tamu to-mogo taiadi i na nagiga, 'ana fata. Siwe tomogonina taiadi i na nagiga, i lubwaineni taunina tovetumagana. <sup>40</sup> 'Ai'edi i na nagiga 'eba sosoana 'waidie, we'e 'ai'edi kebu i na nagiga, 'eba sosoana bwaikaotogina 'waidie. Fai Yaubada 'Anu'anununa i ageku 'waikuye i miamia, bega yana awave'eda'eda 'wainega a nuani yana nuanua a lulu'ivona 'waimie.

## 8

### *Faulo i veifufu 'aisaya i velomuyediga*

#### *yaubada-vekavekali 'waidie faifaina.*

<sup>1</sup> Ekwavo, yami velutoli 'aisaya i velomuyediga yaubada-vekavekali 'waidie a na tutuli. Sauluvanina faifaina 'wa vo, Matatabuda ma yada 'aseta." 'Wa vonaga 'wa vona mogitana, siwe 'ai'edi aitoi ma yana 'aseta, nuanuana ma yana nualaka taunina i na awa'ai'aia. We'e 'ai'edi aitoi ma yana nuakaliki, nuanuana enavo i na kiavetoketokedi. <sup>2</sup> Wata 'ai'edi aitoi yana nuanua i na vo, Yau to'aseta, nani matatabuna a 'asetadi," 'ana 'isa tomogonina bavubavuna, naninidi i lubwaineni i da 'asetadi siwe i bavuyedi. <sup>3</sup> \*We'e mogitana aitoi Yaubada i nuakalikalieniga tomogonina faifaina Yaubada i vo, Taunina yaku tomotoga, a 'asetai."

<sup>4</sup> 'Aisayanidi faifaidi side bani'odi. Tomotoga 'ifwaidi 'aisaya i nikenikedi i 'a'anivelenedi yaubada-vekavekali 'adi subia faifaina, mulieta 'aisayanidi 'ifwaidi i nunawedi 'eba sivedavedamana 'waineye vekimwane faifaina. 'Aisayanidi faifaidi 'wa velutolieu 'wa vo, 'Ida tovetumaganavo, 'ada fata 'aisayanidi ta na kimwanedi ta na 'anidi 'alo kebu?" Ta 'asetai Yaubada 'aitamogaotogina i miamia, wata kebu tamu ava'ai 'alo aitoi taunina bani'odi. We'e yaubada-vekavekalinidi ta 'asetadi fwayefwayeye taunidi nani-'avo'avovo. <sup>5-6</sup> \*Siwe tomotoga 'ifwaidi 'waidie i vevelomu yadi nuanua i vo, Fwayefwayeye wata abame yaubadavo fuedi i miamiani." Mogitana yaubadavo fuedi, toveimea fuedi wata yaiaina i miamiani, siwe 'ida 'waideye, Yaubada 'aitamogaotogina, taunina Tamada. Tamadanina nani matatabuna tomotoga taiadi 'ada to'idewadewa, we'e 'ida yana nuanua 'ana to'idewadewa. Wata bani'odi

'ada Toveimea Bwaikaotogina 'aitamogaotogina i miamia, Toveimeanina Iesu Keliso. Yaubada yana veimea 'wainega Keliso nani matatabuna i 'idewadi, wata 'wainega yada mia 'ivauna wata 'atumaina ta veveluagai.

<sup>7</sup> Yaubada 'aitamogaotogina i miamia we'e yaubada-vekavekali nani-'avo'avovo, siwe tovetumagana matatabudi kebu i da 'asetai. Malamala fuedi nagedie, 'ifwaidi yadi nuanua igodina yaubada-vekavekali yaubadavo mogitana. Avinodi tutuya de'e i vetumagana Keliso 'waineye, siwe yadi nuanuananina kebu i da baileni, begaidi 'ai'edi 'aisaya mali tomotoga i velomuyediga yaubada-vekavekalinidi 'waidie i na 'ania, yadi nuanua igodina yaubadanidi yadi toketokena i da 'eno'eno 'aisayanidi 'waidie. Tomotoganidi yadi vetumagana bola kebu i da vetoketoke 'ai'edi i na 'ani'aniga, 'adi vebae 'waidie i na lutonovi i sakosakona. <sup>8</sup> Ava'ai 'aisayaga 'alo 'ani'aniga ta na 'anidiga faifaina Yaubada kebu i da nuanua. 'Aisaya i velomuyediga ta na 'anidiga, kebu ta na vaganago Yaubada 'waineye, we'e ta na bailaga, wata kebu ta na vaganago 'wainega.

<sup>9</sup> ✧ 'Akonadi 'wa 'asetai kebu tamu aitoi i da talabodemi, 'aisayanidi i velomuyediga yaubada-vekavekali 'waidie 'ami fata 'wa na 'ani, siwe yami sauluvanina 'wa na 'i'isave'avini i na nunago mali tovetumagana yadi vetumagana mweadi 'wa na kiavebe'udi i na sakona. <sup>10</sup> Tovetumagananidi yadi nuanua i vo, 'Ai'edi 'aisayanidi i velomuyediga yaubada-vekavekali 'waidie 'a na 'anidiga, 'a na sakona Yaubada mataneye." We'e 'omi 'akonadi 'wa 'asetai kebu tamu aitoi i da talabodemi, we'e 'ai'edi 'aisayanidi 'wa na 'ani'ani yaubada-vekavekali yadi vanuga 'eba 'odu'odu nageneye, voke tamu iami yana vetumagana mweana i na 'isemi i na vo, 'Aku vebae 'waineye a lutonovi 'ai'edi bani'odi a na vesauluvediga a na sakona, siwe fai mali tovetumaganavo i 'ani'ani yaku talaboda a na geuya, yau wata a na 'ani." Tomogonina taunina yana talaboda i na geuyaga nika i na sakona Yaubada mataneye. <sup>11</sup> Mogitana tomogonina yana vetumagana mweana, siwe taunina iami, Keliso i wafa faifaina, siwe fai 'omi tovetumagana 'wa vo, 'A 'asetai kebu tamu nani sakoina," tomogonina taunina yana talaboda i geuya nika 'akonadi 'wa kiavebe'uya, wafaotoga 'ana 'edeamo i nunago. <sup>12</sup> 'Ai'edi yami sauluvanina emiavo tovetumagana i na 'isemi i na sakonaga, 'wainega yadi vetumagana wata 'adi vebae 'wa na 'ivesakodi, 'omi 'akonadi 'wa sakona Keliso 'waineye fai tomotoganidi yana tomotoga. <sup>13</sup> ✧ Fai kebu nuanuaku iaku i na sakona, tauniku a na bodaku. 'Ai'edi yaku 'ani 'wainega i

na vetutuyameku i na sakonaga, tauniku a na bodaku, kebu tamu tutuya 'aisaya a na 'alatonovi i na nunago iaku a na kiavebe'uya sakona 'waineye.

## 9

*Faulo i vetomata'aulelega ma yana veimea,*

*siwe taunina faifaina kebu i da nuanua.*

<sup>1</sup> ✧Yau Iesu Keliso yana tomata'aulele, kebu tamu ve'etoboda 'alo tomotoga i da veveimeyeku. 'Ada Toveimea Iesu mogitana a 'isaotogi, a vetofolova faifaina bega yaku lau'age 'waidiega 'wa vetumagana 'waineye, 'omi yaku folova vuagina. <sup>2</sup> ✧Tomotoga 'ifwaidi yadi nuanua igodina yau kebu Keliso yana tomata'aulele, we'e 'omi, a nuani mogitana 'wa vo, Yana tomata'aulele.” 'Wa 'asetakuga fai yaku folova 'wainega ma yami vetumagana 'wa miave'itubama 'ada Toveimea Keliso taiadi, 'eba 'isa yau yana tomata'aulele mogitana.

<sup>3</sup> 'Ai'edi egavo ma yadi 'amalakibu nuanuadi i na 'asetaku, 'waidie side bani'odi a voneyedi. <sup>4</sup> Banabasa wata yau, 'ama 'ailuga Yaubada yana tofologavo, begaidi ma yama veimea i lubwaineni 'ama'ama wata 'ama ufa 'a da veveluagadi tovetumagana 'waimiega. <sup>5</sup> Tomata'aulele 'ifwaidi, wata 'ada Toveimea Iesu tainavo yadi vevinevo taunidi tovetumagana, bega taiadi i yabayaba yadi lauvivila 'waidie, wata bani'odi Fita ma yana vavine. 'Wa da nuani, voke 'aise'avama kebu 'ama fata 'a na saladi? Kebu, ma yama veimea. <sup>6</sup> Tomata'aulele 'ifwaidi 'adi 'aivaita i veveluagadi tovetumaganavo 'waidiega, we'e 'wa da nuani, yau wata Banabasa 'ama 'aivaita faifaina taunima nimamega? Kebu, wata ma yama veimea, 'ana fata 'ima wata tomata'aulelenidi taiadi 'aivaita 'a da veveluagadi tovetumagana 'waimiega.

*Yaubada yana tofologavo i lubwainedi 'adi 'aivaita i na*

*veveluagadi tovetumaganavo 'waidiega.*

<sup>7</sup> Tolugaviavo 'adi'adi wata 'adi kaleko kebu taunidi yadi mani 'waidiega i da kimwakimwane, nonogidi gabemani i veveleledi. Tobakula kebu tamu aitoi i na talabodeni 'ani'aninidi yana bakulayega i na bailedi. Ma yana veimea 'ana fata i na 'ani. Toyaubani wata ma yana veimea, 'aisayanidi i na veluagadiga 'ana fata i na 'ani.

<sup>8</sup> Yaku vonanina kebu tomotoga 'aiseda yada nuanuayega ta da vonavona, wata bani'odi i voneyedi Yaubada yana Buki nageneye. <sup>9</sup> ✧Vonanina Mosese i kilumi i vo,

'Ai'edi yamu 'aisaya i na 'i'ivaisemuga yamu folova 'waineye, kebu 'ani'ani 'u na bodaiga, 'u na tauyeni i na 'ani."

We'e 'omi 'wa da nuani? Yaubada 'aisaya 'aisedi faifaidi i nuanua bega i vona? <sup>10</sup> Kebu, vona de'e i 'inanai wata 'ima yana tofolovavo faifaima, bega 'ama 'aivaita 'a da veveluagadi tovetumagana 'waimiega. Tokoyova wata to'atu'ai i na folofolova i na nuani 'awaie yadi folovanina 'wainega 'ani'ani 'ifwaidi i na veluagadi. <sup>11</sup> ✨'Ima Yaubada yana tofolova wata bani'odi. Yaubada yana Vona 'a koyovidi 'anu'anunumi 'waidie, begaidi i lubwaineni 'ama 'aivaita 'a da veveluagadi 'omi 'waimiega. <sup>12</sup> Yami tovevo 'adi 'aivaita i veveluagadi 'waimiega, 'atumaina, ma yadi veimea bega i lubwainemi 'wa na 'i'ivaisedi. We'e 'ima, 'a kumeta nagami 'a lau'age 'waimie nika bei 'wa vetumagana Keliso 'waineye, bega mogitana ma yama veimea, i lubwaineni 'ama 'aivaita bwaikina 'a da veveluagadi 'waimiega.

Ma yama veimea, siwe kebu tamu tutuya 'ama 'aivaita faifaina 'a da talavelu'ui 'waimie, we'e mogitana vita fue di lase taiadi 'waidie 'a totokemaigema bega tomotoga Keliso Valana kebu i na baileni. Kebu nuanuama tamu aitoi i na vo, Faulo ma enavo i lalau'age-sebaseba nuanuadi 'ani'ani wata kukua, bega yadi lau'agenina Keliso faifaina ta baila." <sup>13</sup> ✨'Wa da vo kebu 'wa da 'asetai, tomotoganidi i folofolova vanuga 'eba velu'ui nageneye 'adi'adi i veveluagadi tosubia yadi 'anivelena-maimaiga 'waidiega. We'e tomotoganidi velomu i 'idewaiga 'eba velomu 'ana 'aisayayega 'adi 'aisaya i veveluagadi. <sup>14</sup> ✨Wata bani'odi 'ada Toveimea Iesu i veimea Valana 'Atumaina 'ana tolau'age 'adi 'aivaita nani 'ifwaidi taiadi i na veveluagadi Valanina 'ana tovetumaganavo 'waidiega.

*Faulo i lau'agemo, tutula kebu, siwe i sososoana.*

<sup>15</sup> Mogitana ma yaku veimea, i lubwaineni 'aku 'aivaita a da veveluagadi 'waimiega siwe kebu nuanuaku, we'e a kilukiluma de'e, kebu a da vo, A na vekukuyedi bega i na 'ivaiseku." 'Aku fata tauniku a na awa'ai'aiku a na vo, Iesu Valana 'Atumaina a lalau'agemo, we'e 'aivaita 'waimiega kebu faifaina a da nuanua." 'Aku 'aivaita faifaina, 'ai'edi 'omi 'alo mali tomotoga a na lulukakademiga, yaku awa'ai'ainina i na venani-'avo'avovo. 'Ai'edi laseyega a na wafaga, kebu tamu ava'ai, nuanuaku a na lalau'agemo. <sup>16</sup> A vetolau'agega, kebu tauniku yaku nuanuayega, we'e mogitana Yaubada i veimeyeku a vetofolova Iesu Valana faifaina. Fai i veimeyeku

i lubwaineku a na lalau'age, kebu 'ana fata tauniku a na subiku folovanina faifaina, we'e 'ai'edi a na vedumwe'ai'ai, nuakalikali i na 'a'veku, vita bwaikina a na veluagai. <sup>17</sup> 'Ai'edi tauniku yaku nuanuayega a da folofolova 'ana fata tutula a da veluagai, siwe fai Yaubada i venua'ivineku folovanina i veleku kebu 'aku fata a na baileni. <sup>18</sup> Vetuma, 'wa da nuani yaku folovanina 'ana tutula ava'ai? 'Aku tutula side. A sosoana fai tutuyanina Iesu Valana 'Atumaina a lalau'age, kebu a da talavelu'ui tutula faifaina, 'ani'ani 'alo mani. Ma yaku veimea bega 'aku fata tutula a da 'ewai, siwe yaku veimeanina 'asa'aiana a lalau'agemo. Yaku sosoananina 'asa'aiana taunina 'aku tutula.

*Faulo nuanuana bwaikina tomotoga matatabuna*

*i na miedi Keliso 'waineye.*

<sup>19</sup> Yaku folova 'ana tutula kebu tamu aitoi 'wainega a da veveluagai, begaidi yau yavuyavuku, kebu tomotoga i da veveimeyeku. Siwe tauniku a tauyeku a vetofolovamaimaiga tomotoga matatabuna 'waimie bega fueotogimi a na vagavaimi 'wa na maia Keliso 'waineye. <sup>20</sup> Tutuyanina me Diu taiadi 'a miamiaga yadi sauluvayega a nunago bega ava'ai a na voneyeniga 'adi fata bonaku i na nogai nika i na vetumagana. Fai a miave'itubama Keliso taiadi, ve'etobodanidi i mai Mosese 'wainega kebu i da veveimeyeku, siwe tutuyanina ve'etobodanidi 'adi tove'ililibu taiadi 'a miamia, yau wata a veve'ililibuyedi bega ava'ai a na voneyeniga tomotoganidi 'adi fata bonaku i na nogai nika i na vetumagana. <sup>21</sup> Wata bani'odi, tutuyanina mali tomotoga taunidi kebu Diu taiadi 'a miamia, yadi sauluvayega a nunago bega ava'ai a na voneyeniga 'adi fata bonaku i na nogai nika i na vetumagana. Yadi sauluvanidi a vevetutuyamediga siwe kebu Yaubada yana veimea a da geudi, we'e mogitana Keliso i veveimeyeku yana nuanua a 'i'idewadi. <sup>22</sup> Tutuyanina tomotoganidi yadi vetumagana mweadi taiadi 'a miamia, naninidi faifaidi i vuananaluga kebu a da sidibidibiedi 'alo a da 'amalakibuyedi, siwe sauluvanidi a ve'ililibuyedimo bega ava'ai a na voneyeniga 'adi fata bonaku i na nogai nika i na vetumagana. Tomotoga matatabuna yadi sauluva tulina tulina 'waidiamo a nunago, 'eda'eda matatabuna 'waidiega a folofolova 'ai'edi tomotoga 'ifwaidi a na vagavaidi i na maia Keliso 'waineye nika 'ita'ita'i i na veluagai. <sup>23</sup> De'e bani'odi a vevesauluvediga Iesu Valana i na vebwaika tomotoga 'waidie, nika Valana 'ana tovetumagana ma fueda Yaubada yana nuakalikali ta na veluagadi.

24 ✨ Wa da vo kebu 'wa da 'asetai, 'wawa 'waineye, tomotoga fuedi i veve'ililide, siwe tokumeta kebu fuediga. Tomotoganidi ma yadi tokemaiga i lilide tutula 'ana 'ewa faifaina, 'omi wata bani'odi 'wa na tokemaigemi bega nani 'atumaina 'wa na veluagai Yaubada 'wainega. 25 ✨ Tolilidenidi nuanuadi i na kumeta begaidi 'ifwaidi veimea i na ve'ililibuyedi bani'odi yadi 'ani, yadi 'eno i na 'i'isave'avinidi nika i na vetoketoke. Veimeanidi i na ve'ililibuyediga bega kumeta 'ana kunabanaba i na 'ewai, kunabanabanina ma 'ana ve'ililibu, 'ana 'isa'isa kini 'adi vaigavu bani'odi, siwe mosomosoyega i 'idewai wata 'a'a'avina. We'e 'ida ta na tokemaigeda Yaubada yana nuanua ta na 'i'idewadi bega 'ada kunabanaba 'eno'eno-vagaidi ta na veluagadi. 26 Begaidi yau kebu a da yogo-balabala tonovina a na nunago Yaubada yana 'eda'eda 'waineamo.

Wata tamu 'wawa 'waineye tomotoga 'adi 'ailuga nimadiega i na vetalaga, i na 'ainike-dewa kebu i na tufaweili. Yau wata bani'odi a folofolova-dewa Yaubada yana folova 'waineye. 27 Tomogoku a toke a veveimeyeni, kebu a da tauyeni nani-'avo'avovo 'waidie, i na nunago tomotoganidi 'waidie a lau'agega i na kumeta nani 'atumaina i na veluagai Yaubada 'wainega, we'e yau i na ve'idi'idieku.

## 10

*Yada sauluva ta na 'isave'avinidi bega kebu ta na be'u.*

1 ✨ Ekwavo, nuanuaku 'wa na nuani tubudavo me Diu yadi sauluva, fai Yaubada yana nuanua i bailedi kebu tamu nani 'atumaina i da veluagai 'wainega. Basenadiotoga Mosese tubudavo i vagavaidi Itifita 'wainega i nagoi sali'avu'avuyeye. Matatabudi Yaubada i 'edakumesedi yana waowa 'wainega wata yana veimea 'wainega Eyaga Yamoyamoina i 'awa'idia, matatabudi lalaneamo i damana. 2 Waowanina i ve'i'wa'uyediga 'wa da vo 'wainega i da bafitaisodi bega taunidi Mosese yana tomotoga mogitana, wata bani'odi tutuyanina eyageamo i damadamana wata 'wa da vo bei i da bafitaisodi. 3 ✨ Sali'avu'avuyeye 'ani'ani wata ufa kebu, siwe tubudavo matatabudi tamu 'ani'ani 'wainega i 'ani, 'ana wagava mana, Yaubada 'Anu'anununa yana 'anivelena. 4 ✨ Wata bani'odi tamu ufa i yemuyemu, Yaubada 'Anu'anununa yana 'anivelena, ufanina i souyeni tamu kileu 'wainega. Kileunina 'asa'aiana taunina Keliso, i 'wea'weabudi wata i 'i'isave'avinidi. 5 ✨ Avinodi Yaubada i 'i'isave'avinidi wata i 'e'edakumesedi, siwe yana nuanua

kebu i da vematayakeyakedi bega sai'afo matatabudi kebu faifaidi i da sosoana. Fai kebu i da vematayakayakaga, sali'avu'avuye i ve'alawafawafa 'wa da vo bei Yaubada tomogodi i da luyavuyavuledi.

6-7 \*Yadi sauluvanidi sakoidi wata 'adi vematavuloga, yada 'eba 'isa bega kebu ta na vetutuyamedi. Sauluvanidi sakoidi Yaubada i talabodediga nuanuadi bwaikina, we'e 'ifwaidi ma yadi subia i 'odu'odu yaubada-vekavekali 'waidie. Yadi sauluvanidi faifaidi tamu vona i 'eno'eno Yaubada yana Buki nageneye i vo,

Tomotoganidi i miabui bega i na 'ani wata i na yemu, Mulieta i tovoi ma yadi vebaisa i suya sakona faifaina.”

8 \*Kebu i da lubwaineda bunu 'ana nuanua 'waidiega ta na sakona tomotoganidi 'ifwaidi bani'odi, yadi sakonanina faifaina Yaubada vematavuloga i veledi, 'aiata 'aitamogana nageneye 23,000 i ve'alawafawafa. 9 \*Wata kebu i da lubwaineda Yaubada ta na silubuya tomotoganidi 'ifwaidi bani'odi. Yadi sakona 'waidiega 'Auvea yana tokemaiga i silubuya i vo 'ako, Kebu vematavuloga i na velemaga,” siwe yana veimea 'wainega 'o'olo kasikasisidi i ovadi i ve'alawafawafa. 10 \*Kebu i da lubwainemi 'wa na ve'anigovoluvolu Yaubada 'waineye tomotoganidi 'ifwaidi bani'odi, Yaubada yana anelose i vetunei i luvewafadi.

11 \*Vematavuloganidi tomotoga 'ifwaidi yadi 'eba 'isa, ifui-fufudi i kilomidi Yaubada yana Buki nageneye bega ta na 'isedi ta na nuanuanidi nika kebu ta na vetutuyamedi. Ifui-fufunidi kebu ta na venuafanidi fai 'ida tutuya 'eba ve'a'ava 'waineye ta miamiani.

12 'Ai'edi aitoi yana nuanuayega i na vo, Ma yaku vetumagana a tovoivoi fa'alina,” i lubwaineni tomogonina taunina yana sauluva i na 'i'isave'avinidi i na nunago i na be'u sakona 'waineye. 13 \*'Eba sailubu tulina tulina 'wa veveluagadi 'wa na sakonaga faifaina, kebu 'aisemi 'waimie i da sousouyedi, wata tomotoga matatabuna 'waidie. Siwe Yaubada i vona'awaufaufa i na 'ivaiseda 'eba sailubu 'waidie, bega 'ada fata ta na vetumagana 'waineye, 'ai'edi 'eba sailubu 'wa na veluagadi siwe Yaubada i na 'ivemweadi bega kebu 'ana fata i na vetoketoke 'waimie. Tutuyanina 'eba sailubu 'wa na veluagadi siwe Yaubada tamu 'eda i na 'idewai bega 'ami fata 'wa na dega sakonanidi 'waidiega nika 'wa na tovoivoi fa'alina.

*Kebu 'ailuga 'waidie taunida ta na tauyeda, Iesu 'aisena 'waineye.*

<sup>14</sup> Ekwavo, kebu nuanuaku 'eba sailubu 'waidiega 'wa na be'u, begaidi yaubada-vekavekali 'wa na mia'iawedi, kebu taiadi 'wa na veiana. <sup>15</sup> A vonavona 'waimie yaku vonanina to'asete 'adi vona, 'aitamogana 'aitamogana yaku vona matatabuna 'wa na vena'ivinedi a vona mogitana 'alo a vevekali. <sup>16</sup> \*Tutuyanina ta vava'auta 'ada Toveimea Iesu yana 'ani faifaina, toveuta i vevekaiwa Yaubada 'waineye ufa ma vedina faifaina, mulieta ma yada vekaiwa ta yemuyemu 'wa da vo Keliso dayagina ta da yemuyemuya, yada 'eba 'isa yana wafa 'wainega ta miave'itubama taunina taiadi. Wata 'ani'ani vividi ta 'ani'ani 'wa da vo Keliso tomogona ta da 'ani'ania, yada 'eba 'isa yana wafa 'wainega ta miave'itubama taunina taiadi. <sup>17</sup> 'Ani'aninina 'aitamogana 'wainega ta 'ani'ani, tomotoga fueda, siwe yada 'aninina 'wainega i lu-vetubamida, 'ida Keliso yana 'Aila'a 'aitamogana, 'Aila'anida 'asa'aiana Keliso tomogona.

<sup>18</sup> 'Wa na nuani me Isileli yadi sauluva. 'Ani'ani wata 'aisaya i 'a'anivelenedi Yaubada 'waineye 'eba velomu 'wainega, mulieta tovelomu 'ani'ani wata 'aisaya 'ifwaidi i veveviladi bega tomotoganidi i 'ani'anidi. Fai 'ani'aninidi 'eba velomu 'wainega i 'ani'anidi, yadi 'eba 'isa taunidi i tauyedi Yaubada 'waineye, bega yana tomotoga mogitana. <sup>19</sup> \*Voke 'wa na vo, Faulo yana vonanina 'ana nogaya yaubada-vekavekali mogitana ma yadi toketokena i miamia wata 'aisayanidi i velomuyediga 'waidie nani bwaikidi ma yadi toketokena." <sup>20</sup> Siwe kebu, yaku vonanina 'ana 'asete side bani'odi. Tutuyanina Yaubada 'ana tobavu yadi 'aisaya i vevelomuyedi, kebu Yaubada 'waineye, we'e mogitana yaiaina 'waidie bega taunidi yadi tomotoga mogitana. 'Ai'edi tomotoganidi ma yadi subia 'aisaya i na vevelomuyedi wata i na 'ani'anidi yaubada-vekavekali matadie, kebu nuanuaku taiadi 'wa na 'ani. Taiadi 'wa na 'aniga, 'eba 'isa ma fuemie 'wa veiana yaiaina taiadi. <sup>21</sup> \*Kebu 'wa na yemulugaluga Iesu 'ana vediegana wata 'wa na nago yaiaina Seitani enavo 'adi vediega. Wata kebu 'wa na 'ani-lugaluga Iesu yana ta'ulayegana wata yaiaina yadi ta'ulayega. <sup>22</sup> 'Ai'edi nuanuami 'ailuganidi 'waidie 'wa na veianaga, yami sauluvanina 'wainega 'Auvea i na ve'unumagigi fai taunina 'aiseotogina toketokeotogina 'omi kebu bani'odiga.

*Yada sauluva matatabuna 'waidiega Yaubada ta na kialakai.*

<sup>23</sup> Voke 'ifwaimi 'wa vo, Iesu yaku sakona i ve'a'avadi begaidi yavuyavuku, 'ai'edi ava'ai sauluvaga nuanuaku, 'aku



fata a na 'idewai.” Siwe a na vo, Sauluva matatabuna kebu 'atumai'avadi wata kebu 'eba 'aivaita. Wata voke 'ifwaimi 'wa na vo, Kebu, Iesu yaku sakona i ve'a'avadi begaidi yavuyavuku, 'ai'edi ava'ai sauluvaga nuanuaku, 'aku fata a na 'idewai.” We'e yau a na vo, Sauluva 'ifwaidi ta na 'idewadiga, yada vetumagana Keliso 'waineye kebu i na vetoketoke.”<sup>24</sup> Kebu i da lubwaineni tamu aitoi taunina yana nuanua 'aisedi faifaidi i na nuanua, wata mali tomotoga 'adi 'aivaita faifaina i na nuanua.

<sup>25</sup> We'e 'omi side bani'odi 'wa na vevesauluvedi. Ava'ai 'aisayaga 'wa na 'iseni 'eba sivedavedamana 'waineye, 'ami fata 'wa na kimwane wata 'wa na 'ani. Kebu 'wa na velutolitoli 'wa na vo, 'Aisayanina, ava'aiega i mai, i velomuyedi yaubada-vekavekali 'waidie 'alo kebu?”<sup>26</sup> 'Wa na 'anidimo fai tamu vona i 'eno'eno Yaubada yana Buki nageneye i vo,

Fwayafwaya 'Auvea 'ana 'idewadewa, wata naninidi i 'eno'enoviga fwayefwayeye, 'Auvea 'wainega i mai.”

Begaidi, 'ani'ani wata 'aisaya matatabuna 'atumaidi, 'wa na 'anidimo.

<sup>27</sup> 'Ai'edi tamu aitoi, taunina kebu Keliso 'ana tovetumagana, i na tayegimi 'ani faifaina, wata 'ai'edi nuanuami, 'atumaina, 'wa na nago. Ava'ai 'ani'aniga wata 'aisayaga i na yatodi matamie 'wa na 'anidimo, kebu 'wa na velutolitoli 'wa na vo, Ava'aiega i mai, i velomuyedi yaubada-vekavekali 'waidie 'alo kebu?”<sup>28-29</sup> We'e 'ai'edi tamu aitoi i na vonemi i na vo, 'Aisayanina de'e, nagami i velomuyeni yaubada-vekavekali 'waidie,” 'aisayanina 'wa na baileni kebu 'wa na 'ani. 'Omi yami vetumagana toketokena bega yami nuanua 'wa vo, 'Aisayanina de'e Yaubada 'ana 'idewadewa, 'aku fata a na 'ani.” We'e iami i vonemiga yana vetumagana mweana yana nuanua i vo, 'Aisayanina de'e i velomuyedigaga yaubada-vekavekali 'waidie, yaiananidi yadi toketokena 'akonadi i damana 'aisayanina 'waineye, begaidi 'ai'edi aitoi i na 'ania i na sakona Yaubada mataneye.” Iami yana nuanuananina faifaina 'wa na baileni kebu 'wa na 'ani.

Voke tamu 'waimiega i na vo, Keliso yana wafa 'wainega, yau yavuyavuku, kebu tamu ve'etoboda i da veveimeyeku, kebu i da lubwaineni tamu aitoi yana nuanua i na veimeyeku bega yaku sauluva 'ifwaidi a na bailedi.<sup>30</sup> 'Ai'edi a na vekaiwa Yaubada 'waineye 'aku'aku wata 'aku 'aisaya faifaidi, kebu i da lubwaineni tamu tomogo i na awavesakoyeku i na vo, Awale 'aisaya tabutabuna 'u 'ani'ania?” We'e yau a na 'aniamo, fai 'akonadi faifaina a vekaiwa.”

<sup>31</sup> We'e mogitana side bani'odi 'wa na vesauluvedi. Nani tulina tulina 'wa na 'i'idewadiga, voke 'ani, yemu, 'alo tamu nani, yami sauluva matatabuna 'wa na 'i'isave'avinidi

Yaubada 'ana subia faifaina. <sup>32</sup> 'Wa na 'isave'avinidiga bega kebu tamu aitoi 'wa na kiavebe'uya sakona 'waineye. Voke me Diu, mali tomotoga taunidi kebu Diu, 'alo Yaubada yana 'Aila'a taunidi tovetumagana Keliso 'waineye. <sup>33</sup> Yau wata bani'odi yaku sauluva matatabuna a 'i'isave'avinidi wata a vewavawava nuanuaku tomotoga matatabudi a na kiavesosoanidi. Kebu tauniku yaku 'atumaina faifaina a da nuanua, we'e mogitana yaku sauluva a 'i'isave'avinidi tomotoga fuei yadi 'atumaina faifaina bega 'ita'ita'i i na veluagai Yaubada 'wainega.

## 11

<sup>1</sup> Yau Keliso a vevetutuyameni, wata 'omi bani'odi, 'wa na vevetutuyameku yau.

*Tafalolo 'ana 'eda'eda mogitana.*

<sup>2</sup> 'Omi me Kolinita, yaku vona 'waimie nani fuei faifaiddi 'wa nuanuanidi wata venidi 'ida tovetumaganavo faifaidda a ve 'waimie 'wa vevematayakeyakedi, bega faifaiddi a subisubiami. <sup>3</sup> Siwe nuanuaku 'wa na 'asetai 'ida iaveta 'ada Toveimea Keliso, wata bani'odi vevine 'adi toveimea yadi lalamogavo, we'e Keliso 'ana Toveimea Yaubada. <sup>4</sup> 'Ai'edi tamu tomogo tafalolo 'waineye i na velu'ui 'alo Yaubada yana Vona i na lu'ivona, siwe 'unu'ununa 'ana baniuma kebu i na ta'iaga yada sauluva bani'odi, 'eba 'isa taunina i tauyeni mali tomotoga yadi veimea 'waineye, we'e 'ana Toveimea Keliso, kebu i da ve'ililibuyeni. <sup>5</sup> 'Ai'edi tamu vavine tafalolo 'waineye i na velu'ui 'alo Yaubada yana Vona i na lu'ivona, siwe 'unu'unudi kebu ma 'ana baniumaga yada sauluva bani'odi, 'eba 'isa kebu yadi lamoga i da ve'ililibuyeni wata kebu i da tauyedi 'waineye. 'Unu'unudi 'ana baniuma i baila, 'wa da vo 'unu'unudi 'weli'welina, i da bunumayaga. Yadi sauluvanina vevine toalagogona yadi sauluva bani'odi. <sup>6</sup> 'Ai'edi baniuma i na baila, i lubwainedi nava'audi i na 'welia, we'e 'ai'edi i na vo, 'Weli 'eba bunumayaga," i lubwainedi 'unu'unudi i na baniumai. <sup>7</sup> ✧ We'e iaveta, Yaubada i 'idewadi taunina 'anununa bani'odi 'ana subia faifaina, begaidi i lubwainedi tafalolo 'waineye 'unu'unudi kebu i na baniumadi, 'eba 'isa Yaubada 'aisena 'adi Toveimea. We'e vevine i 'idewadi, iaveta 'adi subia faifaina, begaidi 'unu'unudi i na baniumadi tafalolo 'waineye, 'eba 'isa yadi lalamogavo i veve'ililibuyedi. <sup>8</sup> ✧ Fai basenadi tomogo i 'idewaiga, kebu vavine lumalumadi 'wainega, we'e mogitana vavine i 'idewadi tomogo lumalumana 'wainega. <sup>9</sup> ✧ Wata tomogo i 'idewai, kebu vavine faifaiddi, we'e mogitana vavine

i 'idewadi tomogo faifaina. <sup>10</sup> Fai Yaubada vavine i 'idewadi tomogo faifaina, wata fai anelose i 'ise'isedi, bega tutuyanina i na tafalolo, i lubwainedi 'unu'unudi i na baniumadi yada sauluva bani'odi, 'eba 'isa taunidi i tauyedi yadi lalamogavo yadi veimea 'waidie.

<sup>11</sup> We'e tomogo wata vavine, taiadi i na miamia Keliso yana 'Aila'a nageneye, kebu i na lau'idi, tomogo vavine i na 'ivaisedi wata vavine tomogo i na 'ivaiseni. <sup>12</sup> I na ve'ivaivaita fai basenadi Yaubada vavine i 'idewadi tomogo 'wainega, wata bani'odi tutuya de'e iaveta i tubutubuga vevine 'waidiega, we'e iaveta, vevine wata nani matatabuna ta souyeda Yaubada 'wainega.

<sup>13</sup> 'Omi me Kolinita 'wa na venua'ivina, 'ai'edi vavine i na vevelu'ui Yaubada 'waineye siwe 'unu'unudi kebu 'ana baniumaga, i lubwaineni 'alo kebu? <sup>14-15</sup> Kebu i da lubwaineni fai matatabuda 'ada vebae 'waidiega ta 'asetai vevine nava'audi manamanawedi 'atumaina, 'adi vaigavu, we'e iaveta nava'audi i na vemanawega 'eba bunumayaga. Yaubada vevine nava'audi i velediga 'unu'unudi 'adi talauma faifaina, begaidi taunidi wata 'unu'unudi i na baniumadi tafalolo faifaina. <sup>16</sup> 'Ai'edi tamu aitoi nuanuana i na ve'ikwayekwayega sauluvanina faifaina a na voneni a na vo, 'Ima tomata'aulelevo wata Yaubada yana 'Aila'a 'awalawa tulina tulina 'waidie yada sauluva 'aitamogana, tafalolo 'waineye 'ai'edi tamu vavine nuanuadi i na velu'ui 'alo Yaubada yana Vona i na lu'ivona, 'unu'unudi i na baniumai."

*Me Kolinita Iesu yana 'ani i 'ivesakoi.*

<sup>17</sup> Tutuya de'e tamu nani faifaina a na awave'eda'eda 'waimie, siwe naninina faifaina kebu a na awa'ai'aimi, fai tutuyanina 'wa vava'auta 'ada Toveimea Iesu yana 'ani 'ana 'eba nuave'avina faifaina kebu 'aivaita 'wa da veveluagaiga, we'e mogitana vita 'wa veveluagai. <sup>18</sup> ✧Nagamidiotoga a na vonemi, tamu valami a nogai i vo, Me Kolinita tafalolo faifaina i mimiava'auta bei i veve'ikwayekwayega wata i lalau'idi." Valanina faifaina sai'afo a ve'awamogitana. <sup>19</sup> We'e yami lau'idinidi 'waidiega 'ada fata ta na 'asetadi egavo yadi nuanua tonovidi. <sup>20</sup> Tutuyanina 'wa vava'auta 'ada Toveimea Iesu yana 'ani 'ana 'eba nuave'avina faifaina, kebu 'aninina faifaina 'wa da vava'auta, 'aniotoga faifaina 'wa vava'auta. <sup>21</sup> Tutuyanina 'wa vava'auta taunina taunina 'ana'ana i mimaiedi, siwe 'ani 'waineye 'wa 'anitala'ubu'ubuta, begaidi 'ifwaimi 'ami'ami siaidi 'wa laselase we'e 'ifwaimi ufa toketokena 'wa toke 'wa yemuyemu nuami

i lugaugaudi. <sup>22</sup> 'Omi ma yami vanuga bei 'wa da 'ani-vagata, siwe yami sauluvanina 'ana 'isa 'wa da vo kebu yami vanuga. Yami sauluvanina 'wainega Yaubada yana 'Aila'a kebu 'wa da ve'ililibuyedi wata emiavo 'adi'adi siaidi 'wa 'anitala'ubu'ubuidi i bubunumayaga. Bani'odi a na voneyedi 'waimie? Igodi 'wa vo, I na subiamana." Kebu tamu sai'afo a na subiami yami sauluvanina faifaina.

*Iesu yana 'ani 'ana sauluva mogitana.*

<sup>23-24</sup> ✧ Basenadi 'ada Toveimea Iesu yana 'ani 'ana 'eda'eda mogitana taunina 'waikuye i ve, mulieta venina a lu'ivona 'waimie. A vonemiga side bani'odi. Lovananina 'waineye Iudasa 'ada Toveimea Iesu i 'e'etogiluvuni 'ana tovedumwe'ai'ai 'waidie, Iesu 'ani'ani i 'ewai, i vekaiwa Yaubada 'waineye, mulieta i 'ivivia i 'a'avana yana tovetutuyamavo i vonedi i vo, 'Ani'ani de'e, 'asa'aiana tomogoku, a tauyeni faifaimi. Tutuya fuedi side bani'odi 'wa na 'ani'aniedi 'aku nuave'avina faifaina." <sup>25</sup> ✧ 'Ani i 'a'ava, wata bani'odi oine ma vedina i 'ewai i vonedi i vo, Oine de'e ma vedina 'asa'aiana dayagiku i na ilolo faifaimi bega yaku wafanina 'wainega Yaubada yana Veakutagona 'Ivauna basenadi faifaina i vona'awaufaufa i na velamu 'waimie. Tutuyanina de'e bani'odi 'wa na yemuyemuga nika 'wa na nuaniku." <sup>26</sup> ✧ De'e bani'odi Iesu i voneyediga, begaidi 'ada Toveimea Iesu yana 'ani 'waineye, 'wa na 'ani'ani wata 'wa na yemuyemu, 'wa veve Iesu i wafa faifaimi. Tutuya fuedi 'wa na 'i'idewai i na nagoga 'ada Toveimea Iesu i na vila-vaitugani.

*'Ai'edi aitoi kebu i na ve'ililibuga Iesu yana 'ani 'waineye, vematavuloga i na veluagai.*

<sup>27</sup> Fai Iesu sakalameni 'ana 'eda'eda mogitana i veleda, begaidi 'ai'edi aitoi kebu ma yana ve'ililibu 'ada Toveimea Iesu yana 'ani i na 'ania 'alo 'ana vedi 'wainega i na yemu, tomogonina 'akonadi i sakona, 'wa da vo Iesu tomogona wata dayagina i da 'ivekokovidi. <sup>28</sup> ✧ Begaidi i lubwaineni tomotoga 'aitamogana 'aitamogana nagami taunina i na nuani bega yana nuanua wata yana sauluva i na tonova, mulieta Iesu yana 'ani i na 'ani wata 'ana vedi 'wainega i na yemu. <sup>29</sup> Fai 'ai'edi aitoi i na 'animo wata i na yemumo, we'e kebu i na venua'ivinaga 'ada Toveimea Iesu tomogona wata dayagina faifaina, tomogonina yana 'ani wata yana yemu 'waidiega vematavuloga i na veluagai. <sup>30</sup> Fai fuemi kebu 'wa da vevenua'ivina 'ani 'waineye begaidi 'ifwaimi 'wa viga, 'ifwaimi tomogomi i mwea, wata 'ifwaimi 'wa wafa. <sup>31</sup> ✧ We'e

✧ **11:23-24:** Lom 15:2 ✧ **11:25:** 1 Kol 8:4-13; Ibu 9:18-20 ✧ **11:26:** Same 24:1 ✧ **11:28:** 2 Kol 13:5 ✧ **11:31:** Kolos 3:17

'ai'edi Iesu yana 'ani 'waineye, nagami taunida ta da nu-anida bega sauluva sakoidi ta da bailedi, 'ako kebu Yaubada vematavuloga i da veveledaga. <sup>32</sup> ✧Ta na sakosakonaga, Yaubada ma yana veimea vematavuloga i na veveleda bega ta na nuavilada yada sauluva i na tonova. Kebu nuanuana 'awaie ta na wafaotoga 'ana tovedumwe'ai'ai taiadi.

<sup>33</sup> ✧Begaidi ekwavo, tutuyanina 'wa na vava'auta 'ani-veiana faifaina, kebu 'wa na 'ani-naganaga, emiavo 'wa na lukamasedi ma fuemiena 'wa na 'ani. 'Aninina i na 'a'avana, mulieta bei Iesu yana 'ani 'wa na 'idewai. <sup>34</sup> 'Ai'edi aitoi i na lase bwaikina, i lubwaineni yana vanuge i da 'ani-vagata, mulieta taiadi 'wa da va'auta 'ani-veiana wata Iesu 'ana nu-ave'avina faifaidi. We'e 'ai'edi ma 'ana lase i na mai, 'aniotoga 'aisena faifaina i na nuanua, we'e Iesu 'ana 'eba nuave'avina kebu i na ve'ililibuyeni, vematavuloga i na veluagai Yaubada 'wainega.

Nani 'ifwaidi kebu a da veifufuyediga, bola a na wai 'waimie a na kiavetonovidi.

## 12

*'Ada veuveuta tulina tulina 'Anu'anunu 'Atumaina yana 'anivelena.*

<sup>1</sup> Ekwavo, tutuya de'e a na veifufu 'Anu'anunu 'Atumaina yana 'anivelena faifaidi, kebu nuanuaku faifaidi 'wa na bavubavu. <sup>2</sup> 'Akonadi 'wa 'asetai basenadi Iesu kebu 'wa da 'asetai ga yaubada-vekavekali i veveimeyemi. Seitani nuami i 'ewadi bega i vevekaliemi 'wa 'odu'odu yaubada-vekavekali 'waidie, naninidi kebu 'adi fata i na welava. <sup>3</sup> Fai basenadi 'waidie 'wa 'odu'odu wata fai 'Anu'anunu 'Atumaina 'wa bavuyeni, nuanuaku 'Anu'anununina faifaina a na awave'ede'edemi. 'Ai'edi aitoi Iesu i na yagaia 'eba 'isa 'Anu'anunu 'Atumaina kebu i da ageiga wata 'Anu'anununina kebu i da vonavona tomogonina 'wainega. We'e 'ai'edi aitoi i na vo, Iesu mogitana 'aku Toveimea," 'eba 'isa 'Anu'anunu 'Atumaina i agei, yana 'alavelevelena 'wainega i vonavona.

<sup>4</sup> 'Ada nuakalikali tulina tulina 'Anu'anunu 'Atumaina i veutada, siwe nuakalikalinidi 'adi to'anivelena 'aitamogana.

<sup>5</sup> Yada folova 'adi 'eda'eda tulina tulina siwe matatabuda ta folofolova 'ada Toveimea 'aitamogana faifaina. <sup>6</sup> Yaubada, toketokena tulina tulina i veleda bega ta folofolova faifaina, siwe matatabuda yada toketokena lamudi 'aitamogana.

<sup>7</sup> ✧'Anu'anunu 'Atumaina taunina i sivemageseni 'ida tovetumaganavo 'aitamogana 'aitamogana 'waideye 'ada veuveuta 'waidiega, bega Keliso yana 'Aila'a ta na

ve'ivaivaita. <sup>8</sup> 'Anu'anunu 'Atumaina yana 'anivelena tamu tomogo 'ana veuveuta, ma yana 'aseta Yaubada yana nuanua i na lulu'ivona 'waideye. We'e tamu tomogo 'ana veuveuta 'Anu'anununina 'wainega, 'aseta nani tulina tulina faifaidi i veleni bega 'ana fata i na awave'eda'eda 'waideye. <sup>9</sup> Tamu tomogo 'ana veuveuta yana vetumagana toketokena, we'e tamu tomogo i na 'i'ive'atumai toviga 'waidie, veuveutanidi 'Anu'anununina 'aitamogana yana 'anivelena. <sup>10</sup> Tamu tomogo 'ana veuveuta 'eba nuavogana wata 'eba nua'ewa i 'i'idewadi, tamu tomogo 'ana veuveuta Yaubada yana Vona i na lulu'ivona 'waideye, wata tamu tomogo 'ana veuveuta i veleniga 'ana fata i na venua'ivina 'atumaina tamu tomogo yana lu'ivona faifaina, voke i mai 'Anu'anunu 'Atumaina 'wainega, 'alo taunina yana nuanuayega 'alo yaiaina i agei bega i vona. Tamu tomogo 'ana veuveuta 'Anu'anunu 'Atumaina yana 'alavelevelena 'wainega i vonavona, bonanidi kebu i da 'asetadiga 'waidiega, siwe taunina kebu i da 'asetai ava'ai i vonevoneyeni. Mulieta tamu tomogo 'ana veuveuta bonanidi kebu i da 'asetadiga i na sisiviladi nika Yaubada yana vona 'ana 'aseta i na souyeni 'waideye. <sup>11</sup> Veuveutanidi matatabuna 'adi to'anivelena 'aitamogana, taunina 'Anu'anunu 'Atumaina, 'aisena yana nuanua 'wainega i 'a'anivelena tomotoga 'aitamogana 'aitamogana 'waideye.

*'Ida Keliso yana 'Aila'a 'alo Tomogona.*

<sup>12</sup> ✧ Tomogoda 'aitamogana, siwe du'u fueidi. Du'u fueidi siwe i luvetubama tomogo 'aitamogana i souyeni. Wata bani'odi 'ida Keliso 'ana tovetumagana fueda, siwe ta luvetubama bega 'ida Keliso Tomogona i souyeni. <sup>13</sup> ✧ Fai Yaubada i bafitaisoda 'Anu'anunu 'Atumaina 'wainega 'ida Keliso yana 'Aila'a 'alo Tomogona 'aitamogana. Avinodi 'ifwaida me Diu, 'ifwaida mali tomotoga, 'ifwaida tofolovamaimaiga, wata 'ifwaida kebu 'ada toveimeaga, siwe Yaubada 'Anu'anunu 'Atumaina i tauyeni, 'Anu'anununina 'aitamogana matatabuda i ageda.

<sup>14</sup> Tomogoda kebu du'u 'aitamogana, du'u fueidi. <sup>15</sup> 'Ai'edi tamu tomotoga 'agena ma 'awanaga bega i da vona i da vo, Yau kebu nima, begaidi de'e tomogonina yau kebu tamu du'una," yana vonanina 'wainega kebu i da 'awa'idia. <sup>16</sup> Wata 'ai'edi tomogonina tanigana ma 'awanaga bega i da vona i da vo, Yau kebu mata, begaidi de'e tomogonina yau kebu tamu du'una," yana vonanina 'wainega kebu i da 'awa'idia. <sup>17</sup> 'Ai'edi tomogoda matatabuna mata, ava'aiega ta na no-gaya? Wata 'ai'edi tomogoda matatabuna taniga, ava'aiega

ta na yaoga? <sup>18</sup> Siwe Yaubada kebu tomogoda bani'odi i da 'idewadi. Tomogoda du'una tulina tulina i yatodi yana nuanua i lubwaineniga bani'odi. <sup>19</sup> 'Ai'edi du'u 'aitamogana, ava'ai 'ana 'atumaina? Kebu 'ana fata du'u 'aitamogana 'wainega tomotoga i na souyeni. <sup>20</sup> We'e mogitana, du'u fuedi, i luvetubama bega tomotoga 'aitamogana.

<sup>21</sup> 'Ai'edi tamu tomotoga matana ma 'awanaga kebu i na vo, 'Omu nima, kebu nuanuaku, nani matatabuna 'akonadi 'aku fata." Wata 'unu'ununa kebu i na vo, 'Omu 'age, kebu nuanuaku, nani matatabuna 'akonadi 'aku fata." <sup>22</sup> We'e mogitana, du'udanidi yada nuanua 'waidie ta vo, Mweadi," siwe yadi folova bwaikidi, 'ai'edi kebu i da 'eno'enoviga 'ako yada mia i da vita. <sup>23</sup> Wata du'udanidi yada nuanua 'waidie ta vo, Nani-'avo'avovo," siwe ta 'i'isave'avina-dewadi wata du'udanidi kebu nuanuada ta na sivemagesediga, ma yada ve'ililibu ta givegivedi. <sup>24</sup> We'e du'u 'adi 'isa 'atumaidi, 'waideye kebu 'eba bunumayaga, kebu ta da babaniumadiga. Yaubada tauniotogina du'u i luvetubamidi bega du'unidi ta nuani nani-'avo'avovo 'alo 'adi 'isa kebu 'atumaidiga ma 'adi ve'ililibu, ta 'i'isave'avinidi. <sup>25</sup> Fai Yaubada tomogoda i luvetubami bega kebu 'ana fata tamu du'u 'aiseotogina i na mia'eni, we'e mogitana du'u tulina tulina ma ediavo i na ve'ivaivaita. <sup>26</sup> 'Ai'edi du'u tamu ilagi i na veluagai, du'u 'ifwaidi taiadi vitanina i vebaedi, wata 'ai'edi du'u tamu 'ana subia i na veluagai, du'u 'ifwaidi taiadi i na sosoana.

<sup>27</sup> ✧Yaku vonanina 'ana 'asete side bani'odi. 'Omi 'aila'animi 'asa'aiana Keliso Tomogona, we'e 'aitamogana 'aitamogana du'una 'omi. <sup>28</sup> ✧Keliso Tomogona 'alo yana 'Aila'a nageneye, Yaubada folova tulina tulina i veutada side bani'odi.

Folovanina i 'edakumetaga tomata'aulelevo,  
 'Ana veluga, Yaubada yana Vona 'ana tolu'ivonavo,  
 'Ana vetonu, Yaubada yana nuanua tonovidi 'adi tovevo,  
 'Ifwaidi i venua'ivinedi bega 'eba nuavogana wata 'eba nua'ewa i na 'i'idewadi,  
 'Ifwaidi tovinga i na 'i'ive'atumaidi,  
 'Ifwaidi i venua'ivinedi i veto'aivaita ediavo tovetumaganavo 'waidie,  
 'Ifwaidi i veto'edakumeta Keliso yana 'Aila'a 'waideye,  
 'Ifwaidi i venua'ivinedi bega 'Anu'anunu 'Atumaina yana 'alavelevelena 'wainega i na vonavona, bonanidi kebu i da 'asetadiga 'waidiega.

Side bani'odi Yaubada yada folova tulina tulina i veutada. <sup>29-30</sup> Yaubada tomogoda i 'idewadiga kebu taniga'ava 'alo mata'ava, wata bani'odi 'ida Keliso Tomogona yada

folova tulina tulina. I veutadaga kebu matatabuda ta da vetomata'aulele, kebu matatabuda ta da vetolu'ivona, wata kebu matatabuda ta da vetove. Kebu 'ana fata matatabuda 'eba nuavogana wata 'eba nua'ewa ta na 'idewadi, kebu 'ana fata matatabuda tovigga 'waidie ta na 'i'ive'atumai, kebu 'ana fata matatabuda 'Anu'anunu 'Atumaina yana 'alavelevelena 'wainega ta na vonavona, bonanidi kebu ta da 'asetadiga 'waidiega, wata kebu 'ana fata matatabuda bonanidi ta na siviladi bega 'adi 'aseta mogitana i na souyedi. <sup>31</sup> ☆Ada veuveuta 'Anu'anunu 'Atumaina 'wainega tulina tulina, siwe i lubwaineda ma yada dumwebika ta na tokemaigeda bega yana 'anivelena kumekumetadi ta na 'ewadi.

Siwe tutuya de'e a na veifufu tamu sauluva 'atumaiotogina faifaina, sauluvanina 'ada veuveutanidi i vebwaika-'iawedi. Sauluvanina 'ana wagava nuakalikali

## 13

### *Nuakalikali*

<sup>1</sup> 'Ai'edi 'aku fata tomia fwayafwaya bonadi tulina tulina 'waidiega a da vonavona, 'alo anelose bonadiega, siwe kebu a da nuakalikaliga, yaku vonanidi 'adi nogaya nani-'avo'avovo 'wa da vo a da kwagekwage 'alo a da lu'e'e'ela. <sup>2</sup> 'Ai'edi 'aku fata Yaubada yana Vona a da lulu'ivona, 'ai'edi Yaubada yana nuanua givagivadi a da 'asetadi, 'ai'edi nani matatabuna a da 'asetadi, wata 'ai'edi yaku vetumagana toketokeotogina bega 'aku fata a da vona 'oya 'waidie i da nagoi tulidie, siwe kebu a da nuakalikaliga, yau bani'odi nani-'avo'avovo. <sup>3</sup> Naninidi 'waikuye i 'eno'enoviga, 'ai'edi matatabuna a da 'anivelenedi, voke wata tomogoku a da tauyeni wafa 'waineye tomotoga faifaidi siwe kebu a da nuakalikaliga, ava'ai 'ana 'atumaina 'wainega a na veluagai?

<sup>4</sup> ☆Tonuakalikali kebu i da nuasako-matayo'o, i totokemaigamo wata ma yana nuakalikali i 'a'aivaita. Tonuakalikali kebu i da ve'unumagigi, kebu taunina i da awa'ai'aia wata kebu i da nunualaka. <sup>5</sup> Tonuakalikali i veve'ililibu, kebu taunina 'aisena faifaina i da nuanua, kebu i da logilogi, wata tomotoga yadi sakona 'waineye kebu i da nuanuanidi. <sup>6</sup> ☆'Ai'edi tamu aitoi i na sakonaga, tonuakalikali kebu faifaina i na sosoana, we'e mogitana sauluva tonovidi faifaidi i sososoana. <sup>7</sup> ☆'Ai'edi tamu tomogo i na vesauluva sakoina tonuakalikali 'waineye, i na tokemaigeni kebu i na veveifufuvuvueni, tutuya matatabuna i na vetumagana tomogonina tomogo 'atumaina, i na nuani mogitana bega i na lulukamata



yana sauluva i na veve'atumai, wata kebu tamu tutuya to-mogonina i na baileni.

<sup>8</sup> 'Ada veuveuta tulina tulina 'Anu'anunu 'Atumaina yana 'anivelena, 'awaie i na 'a'ava, we'e nuakalikali kebu i na 'a'ava i na 'eno-vagata. Vetolu'ivona Yaubada yana Vona faifaina i na 'a'ava, 'Anu'anunu 'Atumaina yana 'alavelevelena bega tomotoga bonadi tulina 'waidiega i vonavona i na 'a'ava, wata 'aseta 'adi tokiavemageta yadi folova i na 'ailove. <sup>9</sup> 'Ada veuveutanidi i na 'a'ava fai tutuya de'e Yaubada 'ana 'aseta 'waideye sai'afo, wata yada lu'ivona faifaina kebu ta da veveifufu-dewedi. <sup>10</sup> Siwe 'awaie Yaubada nani matatabuna i na sivemage'se'a'avedi wata i na 'idewa'a'avadi nika bei naninidi sai'afo, i na savovola.

<sup>11</sup> Side bani'odi. Basenadi siaikuye, yaku vona, 'aku vebae wata yaku nuanua yavayavava bani'odi. We'e tutuya de'e a taulaiga, yaku 'aseta i vebwaika wata sauluva yavayavava a bailedi. <sup>12</sup> \*Wata bani'odi tutuya de'e yada 'aseta Yaubada faifaina siaina, 'wa da vo ta da 'isa-ganuganuyeni, we'e 'awaie ta na vemaigi'isa'isa. Tutuya de'e yaku 'aseta Yaubada faifaina sai'afo, 'awaie a na 'asetaotogi yau tutuya de'e i 'asetakuga bani'odi.

<sup>13</sup> Veuveutanidi 'Anu'anunu 'Atumaina yana 'anivelena 'awaie i na 'a'ava, we'e nani bwaikidi 'aitonu i na 'eno-vagata. Yada vetumagana Yaubada 'waineye, ta nuani mogitana bega ta lulukamata naninidi 'atumaidi i na 'i'idewadi faifaida, wata nuakalikali. Siwe 'aitonunidi 'waidiega nuakalikali nani bwaikaotogina.

## 14

*Bona ma 'ana 'aseta 'eba 'aivaita.*

<sup>1</sup> \*Ekwavo, nuanuaku nuakalikali 'waimie i na vebwaika, wata ma yami dumwebika 'wa na tokemaigemi bega 'ami veuveuta 'wa na veluagadi 'Anu'anunu 'Atumaina 'wainega, we'e mogitana veuveutanina bwaikina faifaina 'wa na lauala bega 'ami fata Yaubada yana Vona 'wa na lulu'ivona 'Anu'anunu 'Atumaina yana awave'eda'eda 'wainega. <sup>2</sup> Tomotoga 'ifwaidi 'adi veuveuta 'Anu'anunu 'Atumaina yana 'alavelevelena 'wainega i vonavona, bonanidi kebu i da 'asetadiga 'waidiega, siwe taunidi kebu i da 'asetai ava'ai i vonevoneyeni. Tomotoganidi i vonavonaga, kebu tomotoga 'waidie fai kebu tamu aitoi i da 'asetai, we'e mogitana i vonavona Yaubada 'waineye. Yaubada yana nu-anua givagivadi i veveifufuyedi 'Anu'anunu 'Atumaina yana 'alavelevelena 'wainega. <sup>3</sup> We'e tomotoganidi i vetolu'ivona Yaubada yana Vona faifaina i vonavona tomotoga 'waidie

bega yadi vetumagana i na vetoketoke, i na kiavefa'alidi wata i na kiavesosoanidi. <sup>4</sup> 'Ai'edi aitoi 'Anu'anunu 'Atumaina yana 'alavelevelena 'wainega i vonavona, bonanidi kebu i da 'asetadi 'waidiega, tomogonina 'aiseotogina 'aivaita i vevelu-agai yana vetumagana faifaina, we'e 'ai'edi aitoi Yaubada yana Vona i na lulu'ivona, Keliso yana 'Aila'a matatabumi 'aivaita 'wa na veluagai nika yami vetumagana i na vetoke-toke.

<sup>5</sup> Nuanuaku matatabumi 'Anu'anunu 'Atumaina yana 'alavelevelena 'wainega 'wa da vonavona bonanidi kebu 'wa da 'asetadi 'waidiega, siwe wata nuanuaku bwaikina Yaubada yana Vona faifaina 'wa da vetolu'ivona. Folo-vanidi 'adi 'ailuga, siwe vetolu'ivona folova bwaikaotogina, we'e tomotoganidi i vonavona bonanidi kebu i da 'asetadi 'waidiega, yadi folova sai'afo bwaikina. 'Ai'edi tomotoganidi 'Anu'anunu 'Atumaina yana 'alavelevelena 'wainega i na vonavona, mulieta tamu tomogo 'ana veuveuta 'Anu'anunu 'Atumaina 'wainega i na siviladi nika Keliso yana 'Aila'a matatabumi 'aivaita 'wa na veluagai, bei yadi folova 'ana 'atumaina i na souyeni.

*Ta na tafalolo taunida bonadega*

<sup>6</sup> Ekwavo, tutuyanina a na wai 'waimie, 'ai'edi 'Anu'anunu 'Atumaina yana 'alavelevelena 'wainega a na vonavona siwe bonanidi kebu 'wa na 'asetadiga, ava'ai 'ana 'atumaina? We'e 'ai'edi a na wai, naninidi Yaubada i sivemagesedi 'waikuye a na lu'ivona 'waimie, 'alo naninidi Yaubada nuanuana 'wa na 'asetadi a na ve 'waimie, 'alo yana Vona a na lu'ivona 'waimie, 'alo a na awave'ede'edemi, mogitana 'aivaita 'wa na veluagai, nika 'ana fata yami vetumagana i na vetoke-toke. <sup>7</sup> I lubwaineda taunida bonadega ta na vonavona bega Yaubada yana nuanua ta na 'asetadi, begaidi 'ifwaidi 'eba 'isa a na velemini. 'Umo wata mafa kebu ma yawaidiga, siwe ma bonadi, begaidi 'ai'edi to'umo kebu i na 'umo-dewaga, kebu 'ana fata tamu aitoi nuana i na 'ewai. Wata bani'odi 'ai'edi mafa kebu i na nike-dewaiga i na lu'e'e'elimo, kebu tamu aitoi i na mai va'auta faifaina. <sup>8</sup> Wata 'ai'edi evulega kebu i na yuve-'atumaia, kebu 'ana fata tomotoga i na va'auta folova faifaina. <sup>9</sup> 'Omi wata bani'odi, 'ai'edi 'wa na vonavona, siwe kebu tamu aitoi bonami i na 'asetai, bani'odi i na munega nuana i na magetai? 'Ana 'isa 'wa da vo 'wa da vonavona 'awasasa'aveye. <sup>10</sup> Tomia fwayafwaya bonada fueotogidi, siwe 'aitamogana 'aitamogana ma 'adi to'asetai. <sup>11</sup> We'e 'ai'edi aitoi i na vonavona 'waikuye, siwe bonana kebu a na 'asetai, tomogonina 'waikuye taunina wakawaka, wata tomogonina 'waineye yau 'wa da vo wakawaka. <sup>12</sup> ✧'Omi

wata bani'odi, ava'ai bonaga emiavo i na 'asetadi, bonanina 'wainega 'wa na vonavona 'waidie. Nuanuami bwaikina 'ami veuveuta 'Anu'anunu 'Atumaina i na velemini, siwe i lubwainemi veuveutanidi 'waidiega Keliso yana 'Aila'a 'wa na kiavetoketokedi, faifaiddi ma yami dumwebika 'wa na vetafewa bega 'wa na 'ewadi.

<sup>13</sup> Fai nuanuada tovetumagana ta na kiavetoketokeda, bega 'ai'edi tamu tomogo 'Anu'anunu 'Atumaina yana 'alavelevelena 'wainega i na vonavona, bonanidi kebu i da 'asetadi 'waidiega, i lubwaineni i na velu'ui 'Anu'anununina tamu veuveuta i na veleni nika 'ana fata yana vonanidi i na kiavemagetadi. <sup>14</sup> 'Ai'edi 'Anu'anunu 'Atumaina yana 'alavelevelena 'wainega a na velu'ui tamu bona tulina 'wainega, 'anu'anunukuyega a na vevelu'ui, siwe ava'ai a na vonevoneyeniga kebu ma 'ana 'asetaga. <sup>15</sup> ✧Vetuma bani'odi a na velu'uiedi? Tamu tutuya 'anu'anunukuyega a na velu'ui, tamu tutuya a na velu'ui yaku 'aseta 'wainega bega fuedi i na 'aseta. Wata bani'odi, tamu tutuya a na lei-subisubia 'anu'anunukuyega tamu bona 'wainega, tamu tutuya yaku 'aseta 'wainega a na lei-subisubia. <sup>16</sup> 'Ai'edi tafalolo 'waineye 'Anu'anunu 'Atumaina yana 'alavelevelena 'wainega Yaubada 'wa na subisubiai tamu bona kebu 'wa da 'asetai 'wainega, tamu tomogo taiadi 'wa va'autaga i na nogai, kebu 'ana fata yami velu'uinina faifaina i na vo, Vona mogitana yaku nuanua bani'odi," fai ava'ai 'wa vonevoneyeniga i bavuyeni. <sup>17</sup> Yami vekaiwanina voke 'eba nua'ewa, siwe fai tomogonina kebu i da 'asetai, 'waineye kebu tamu ava'ai 'ana 'atumaina.

<sup>18</sup> A vekaiwa Yaubada 'waineye fai tutuya fuedi 'aisekuye a vonavona 'Anu'anunu 'Atumaina yana 'alavelevelena 'wainega bonanidi kebu a da 'asetadiga 'waidiega, we'e 'omi matatabumi sai'afo. <sup>19</sup> 'Ai'edi tafalolo 'waineye yaku vona kebu fuediga siwe tomotoga 'aivaita i na veluagai yaku venina 'wainega, yau a na sosoana, we'e 'ai'edi vona fueotogidi 'waidiega a na ve 'Anu'anunu 'Atumaina yana 'alavelevelena 'wainega siwe bonaku i na bavuyeni, faifaina kebu a na sosoana.

*Vona mali bonana 'waidiega faifaina 'wa na venua'ivina-atumai.*

<sup>20</sup> ✧Ekwavo, vona mali bonana 'waidiega nuami i 'ewai, 'wa da vo 'omi yavayavava. Yavayavavanidi kebu 'adi fata i na venua'ivina-atumai nani bwaikidi faifaiddi, sauluvanina bani'odi 'wa na baileni, i lubwainemi yami nuanua i na kumagidi bega 'wa na venua'ivina-atumai vona mali

bonana 'waidiega faifaina. We'e yavayavava siaidi, yadi 'aseta sakona faifaina siaina, i lubwainemi 'wa da saladi. <sup>21</sup> ✧ Basenadiotoga Yaubada i veifufu me Diu 'waidie taunidi bonadiega siwe i baila, yana nuanua kebu i da 'idewadi, begaidi tamu 'adi vona i 'eno'eno Yaubada yana Buki nageneye, 'Auvea i vo,

Mali tomotoga bonadiega a na vona me Diu 'waidie, wata tomotoga tulidi 'waidiega a na vona.

Siwe tutuyanina 'waineye kebu bonaku i na nogai basenadi bani'odi.”

<sup>22</sup> Vonanina mali bonana 'wainega tovedumwe'ai'ainidi yadi tugusa, i da 'iseni i da nuaviladi. 'Omi wata bani'odi, 'ifwaimi 'Anu'anunu 'Atumaina yana 'alavelevelena 'wainega 'wa vonavona bonanidi kebu 'wa da 'asetadiga 'waidiega, vonanidi kebu tovetumagana yada tugusa, Yaubada 'ana tovedumwe'ai'ai yadi tugusa, i da nogai i da nuaviladi. We'e 'ifwaimi 'Anu'anunu 'Atumaina yana awave'eda'eda 'wainega Yaubada yana Vona 'wa lulu'ivona, vonanina kebu 'ana tovedumwe'ai'ai yadi tugusa, we'e mogitana 'ida tovetumagana yada tugusa bega ta na nogai ta na ve'awamogitana.

<sup>23</sup> Begaidi 'ai'edi tovetumagana 'aila'aniami 'wa na va'auta, matatabumi 'Anu'anunu 'Atumaina yana 'alavelevelena 'wainega 'wa na vonavona mali bonana 'waidiega, siwe 'ai'edi tovetumagana bavubavudi 'alo tomotoganidi kebu i da vetumaganaga i na lukuwa bonami i na nogai, nuadi i na voganidi i na vo, Mogitana matatabudi i ve'wava'wava.”

<sup>24</sup> ✧ We'e 'ai'edi matatabumi 'Anu'anunu 'Atumaina yana awave'eda'eda 'wainega Yaubada yana Vona 'wa na lulu'ivona, tomotoganidi i na luku i na nogai nika yadi sakona tulina tulina i na nuanidi i na vo, Mogitana, 'ima tosakona.” <sup>25</sup> Yadi nogaya 'wainega yadi nuanua givagivadi i na sivemagesedi, ma yadi nuavilana wata ma yadi ve'ililibu i na lumata'afufu Yaubada i na subiai wata i na nubala i na vo, Mogitana Yaubada 'waimie i miamia.”

### *Tafalolo faifaina 'ana 'eda'eda tonovina.*

<sup>26</sup> Ekwavo, tutuyanina 'wa na vava'auta tafalolo faifaina, nuanuaku side bani'odi 'wa na vesauluedi. Tamu tomogo i na lei-subisubia, tamu tomogo Yaubada yana Vona 'wainega i na ve, tamu tomogo, naninidi Yaubada i sivemagesedi 'waineye i na lu'ivoneyedi, tamu tomogo, 'Anu'anunu 'Atumaina yana 'alavelevelena 'wainega i na vona, bonanidi kebu 'wa da 'asetadiga 'waidiega, we'e tamu tomogo, 'ana veuveuta 'Anu'anunu 'Atumaina 'wainega bonanidi i na

siviladi nika Yaubada yana nuanua ma 'ana 'asete. Naninidi de'e bani'odi, matatabuna 'wa na 'il'idewadiga bega 'omi Keliso yana 'Aila'a matatabumi 'aivaita 'wa na veluagai. <sup>27</sup> 'Ai'edi 'ifwaimi nuanuami 'Anu'anunu 'Atumaina yana 'alavelevelena 'wainega 'wa na vona, bonanidi kebu 'wa da 'asetadiga 'waidiega, 'atumaina, siwe i lubwaineni 'aitamogana i na vona, 'alo 'ami 'ailuga 'alo 'ami 'aitonu. Kebu 'ami 'aitonuna 'wa na vona, 'aitamogana 'aitamogana i na vona, i na 'a'avana tamu tomogo i na siviladi bega 'ami 'aivaita 'wa na veluagai. <sup>28</sup> 'Ai'edi 'ami 'aila'a nageneye tosaivila kebu, siwe tamu tomogo nuanuana i na vonaga 'asa'aiana, kebu i na vona 'aila'a matamie, nuanega i na vona Yaubada 'waineye bona tulina 'waidiega.

<sup>29</sup> ✧Wata bani'odi, tolu'ivona 'ailuga 'alo 'aitonu Yaubada yana Vona i na lu'ivona 'waimie, we'e 'ifwaimi yadi vonanidi faifaidi 'wa na venva'ivina 'ana 'asete mogitana faifaina. <sup>30</sup> Siwe 'ai'edi tolu'ivona tamu i na vonavona, nika 'Anu'anunu 'Atumaina tamu nuanua i na sivemageseni tamu tonogaya 'waineye, tolu'ivonanina i na 'ailove bega tomogonina 'Anu'anunu 'Atumaina yana ve i na lu'ivona 'waimie. <sup>31</sup> Matatabumi ma 'ami veuveuta 'Anu'anunu 'Atumaina 'wainega, 'ami fata 'aitamogana 'aitamogana Yaubada yana Vona 'wa na lulu'ivona bega tovetumagana matatabumi 'wa na 'asete wata 'wa na vetoketoke. <sup>32-34</sup> ✧Kebu nuanuaku 'wa na ve'ilakalaka fai sauluvanina kebu Yaubada 'wainega i da mai, taunina nuanua bikana wata mia 'atumaina 'adi Yaubada. Begaidi yana tolu'ivonavo i lubwainedi i na toke taunidi i na veimeyedi bega kebu i na ve'ilakalaka.

Tutuyanina 'wa na va'auta tafalolo faifaina, nuanuaku Keliso yana 'Aila'a tulina tulina yadi sauluva 'wa na vetutuyameni bega vevine kebu i na vonavona yami miava'auta nageneye i na veve'wadamo. 'Adi talaboda i 'eno'eno bega kebu i na vonavonaga, wata kebu vevine iaveta i na veimeyedi fai bani'odi Yaubada yana Buki i vona. <sup>35</sup> 'Ai'edi vevine nuanuadi i na velutoli tamu nani faifaina, i lubwainedi 'aikona yadi vanuge iaveta 'waidie i na velutoli nika i na 'asetai. We'e tafalolo 'waineye, 'ai'edi vevine i na vonavona, 'eba bunumayaga 'waideye. <sup>36</sup> Awale veimeanina vevine faifaidi 'wa geugeuya? Yami sauluvanina 'wa da vo Yaubada yana veimea 'waimiega i da souyeni, 'alo 'wa da vo 'aiseotogimi 'waimie yana vona i da 'eno'eno. I lubwainemi 'wa da vematayakayaka.

<sup>37</sup> 'Ai'edi aitoi yana nuanua 'waineye i na vo, Yau Yaubada yana Vona 'ana tolu'ivona," 'alo i na vo, Yau ma 'aku veuveuta 'Anu'anunu 'Atumaina 'wainega," 'ai'edi yana nuanua

bani'odi, i da 'asetai veimeanina a kilumiga 'Auvea 'wainega. <sup>38</sup> We'e 'ai'edi yaku vonanina i na baila, 'omi wata tomogonina 'wa na baileni, kebu bonana 'wa na nogai.

<sup>39</sup> Ekwavo, yaku vona 'adi 'aseta side bani'odi. Ma yami dumwebika 'wa na tokemaiga bega 'ami veuveuta 'wa na veluagadi 'Anu'anunu 'Atumaina 'wainega, nika 'ami fata Yaubada yana Vona 'wa na lulu'ivona, we'e tomotoganidi 'Anu'anunu 'Atumaina yana 'alavelevelena 'wainega i vonavona mali bonana 'waidiega kebu 'wa na talabodedi.

<sup>40</sup> \*Siwe tutuyanina 'wa na va'auta tafalolo faifaina, yami sauluva 'wa na 'isave'avinidi bega naninidi i lubwainemiga 'wa na 'i'idewadi wata 'eda'eda tonovineamo 'wa na tafalolo.

## 15

### *Keliso wafayega i tovoi.*

<sup>1</sup> Ekwavo, tutuya de'e nuanuaku nuami a na tolinuata'idi Iesu Keliso Valana 'Atumaina faifaina. Valanina basenadi a lau'age 'waimie nuanuami, 'wa tauyemi 'waineye, wata Valanina 'wainega 'wa vetumagana bega 'wa tovtovoi fa'alina. <sup>2</sup> Wata 'ai'edi Valanina 'Atumaina a lu'ageyeniga 'waimie 'wa na toke 'wa na 'ive'avina-vagaseni, 'ita'ita'i 'wa na veveluagai. Siwe 'ai'edi kebu taunimi 'wa da tauyemiga Valanina 'waineye 'ako yami vetumagana nani-'avo'avovo, wata 'ako 'ita'ita'inina kebu 'wa da veluagai.

<sup>3</sup> \*'Wa na nuani venina a velemiga a 'ewai Keliso 'wainega siwe bwaikaotogina wata kumanina i kumetaotoga Valanina i vo, Keliso i wafa yada sakona faifaidi, basenadi bani'odi i vona-vagata Yaubada yana Buki nageneye. <sup>4</sup> \*We'e i wafaga i tavuni, 'aiata 'ana vetonu 'waineye Yaubada i sivetovoi wafayega, basenadi bani'odi i vona-vagata Yaubada yana Buki nageneye.” <sup>5</sup> \*Tutuyanina i tovoi wafayega taunina i sivemageseni Fita 'waineye, mulieta yana tomata'aulelevo 'waidie. <sup>6</sup> Wata tamu tutuya taunina i sivemageseni tovetumaganavo fueidi 'waidie, 'adi 'aila'a bani'odi 500 i 'iaweni, edavonidi fueidi 'asiau ma yawaidi i miamia, we'e 'ifwaidi 'akonadi yawaidi i 'a'ava. <sup>7</sup> Mulieta i souyeni Iemesa 'waineye, wata tamu tutuya taunina i sivemageseni yana tomata'aulele matatabuna 'waidie. <sup>8</sup> \*Yana souyagi 'ana 'eba ve'a'avaotoga yau 'waikuye. 'Ai'edi vavine ma kamodi siwe yadi 'aiata mogitana kebu i na veluagaiga, natudi i na tubugamatayo'oga, yawaidi i na lovoga. Yau wata bani'odi, fai yau tosakona tomotoga i vo, Kebu 'ana fata i na vetumagana Keliso 'waineye bega i na tubeve'ivau,” siwe Keliso

\* 14:40: 1 Kol 14:32-33

\* 15:3: Ais 53:8-9

\* 15:4: Fol 2:24-32; Luk 24:46

\* 15:5: Luk 24:33-34,36

\* 15:8: Fol 9:3-6

i 'ive'avina-matayo'oku nika bei a tubuve'ivau Keliso yana 'Aila'a 'waineye, yawaidi i lovoga.

<sup>9</sup> \*Mogitana yau tosakona fai basenadi Yaubada yana 'Aila'a i vetumaganaga Keliso 'waineye, vita a veleveledi. We'e tomata'aulele matatabudi 'waidiega yau a vemuliotoga bega 'ai'edi i na golegoleku i na vo, Tomata'aulele," kebu i da lubwaineni. <sup>10</sup> \*Siwe Yaubada ma yana nuakalikali i vesauluva 'atumaina 'waikuye a vetomata'aulele Keliso faifaina wata yaku sauluva i vetuli, we'e yana nuakalikalinina kebu a da ve'amubwadodoyeni, ma vuagina. Yaku folova toketokena Keliso faifaina yau a kumeta, mulieta 'ifwaidi tomata'aulele. A folofolovaga, kebu tauniku yaku toketokena 'wainega, we'e mogitana Yaubada i vesauluva 'atumaina 'waikuye bega yana toketokena 'wainega a folofolova. <sup>11</sup> We'e 'ai'edi tomata'aulele 'ifwaidi i lau'agega 'waimie 'alo yau, kebu tamu ava'ai, matatabuma yama nuanua 'aitamogana 'a lalau'age Iesu yana wafa wata yana tovi-vaitugana faifaidi, wata 'omi 'wa vetumagana Valanina 'waineye.

*Keliso i sivetovoia, wata 'ida i na sivetovoida wafayega.*

<sup>12</sup> Yama lau'age 'waimie Keliso yana tovi-vaitugana faifaina 'omi 'wa vetumagana, siwe awale 'ifwaimi 'wa vonavona 'wa vo, Towafa kebu 'adi fata i na tovoi-vaitugana wafayega?" <sup>13</sup> 'Ai'edi towafa kebu i na tovoi-vaitugana 'ako Yaubada Keliso kebu i da sivetovoia, i da wafa-vagata. <sup>14</sup> Wata bani'odi 'ai'edi Keliso kebu i da tovoi, 'ako 'ima 'a da lau'age-maimaiga wata yami vetumagana Keliso 'waineye nani-'avo'avovo. <sup>15</sup> \*Wata, 'ai'edi Yaubada Keliso kebu i da sivetovoia, 'ako yama lu'ivona Yaubada faifaina vekali fai 'a vo, Yaubada kumanina Keliso i sivetovoia wafayega." Siwe 'ai'edi Yaubada kebu tamu towafa i na sivetovoia, 'ako yama vonanina Keliso faifaina vekali. <sup>16</sup> Fai 'ai'edi towafa Yaubada kebu i na sivetovoidiga, 'ako wata bani'odi Keliso kebu i da sivetovoia. <sup>17</sup> 'Ida ta vetumagana ta vo, Keliso i wafa wata i tovoi-vaitugana yada sakona 'adi 'u'uma faifaidi," siwe 'ai'edi Keliso i da wafa-vagata 'ako kebu yami sakona i da 'u'umidi, Yaubada mataneyeye yami sakananidi i da 'eno'eno, 'awaie vematavuloga 'wa da veluagai. <sup>18</sup> Wata 'ai'edi Keliso i da wafa-vagata, 'ako tovetumagana i wafaga i da wafaotoga. <sup>19</sup> 'Ida ta nuani mogitana 'awaie 'ita'ita'i ta na veluagai Keliso 'wainega, begaidi tutuya de'e yada vetumagananidi 'waidiega 'aivaita ta veveluagai. Siwe 'ai'edi Keliso kebu i da tovoiga, yada wafa 'waineye 'ako kebu 'aivaita ta da

veluagai nika tomotoga 'ifwaidi i da fali-nuakalikalieda, i da vo, Nuakalikalidi, i vetumagana-maimaiga.”

20 ✨We'e mogitana, Yaubada Keliso i sivetovoia wafayega, yada 'eba 'isa 'ida Keliso yana tomotoga wafa 'waineye ta na 'eno'enoga wata i na sivetovoida. Keliso i kumeta i tovoi, 'ida ta na vemuli. 21 ✨Wafa i souyeni fwayefwayeye tamu tomogo 'ana wagava Adama 'wainega, we'e tovi-vaitugana wafayega wata i souyeni tamu tomogo 'wainega, 'ana wagava Keliso. 22 Basenadiotoga Adama Yaubada yana veimea i geuya bega yana sakonanina 'ana tutula wafa, wata bani'odi, fai tomia fwayafwaya matatabuda Adama yana 'aila'a bega ta wafawafa. We'e 'ida tovetumagana ta miave'itubamaga Keliso taiadi bega 'ida yana 'Aila'a, matatabuda Yaubada i na sivetovoida wafayega nika mia 'atumaina wata miamia-vagaina ta na veluagai. 23 ✨We'e Yaubada tutuya tulina tulina i yatodi tovoi-vaitugana faifaina, nagami Keliso i sivetovoia, mulieta yana vila-vaitugana 'waineye 'ida yana tomotoga i na sivetovoida. 24-26 ✨I na sivetovoida i na 'a'avana, mulieta tutuya 'ana 'eba ve'a'avaotoga i na souyeni. Fai Yaubada nuanuana, tutuyanina 'waineye Keliso ma yana toketokena i na velamu i na veimea i na nagoga nika i na vetoketoke 'ana gaviavo matatabuna 'waidie. Toveimea bwaikidi, tomotoga toketokedi, wata yaiaina, 'ana tovedumwe'ai'ainidi matatabudi i na leo'a'avadi. I na 'a'avana, 'eba ve'a'avaotoga 'waineye 'ana gavia tamu i na lusawe-vagaseni, 'ana wagava Wafa. Keliso i na vetoketoke naninidi matatabuna 'waidie, mulieta yana 'Eba Veimea i na 'anivelenedi Tamana Yaubada 'waineye. 27 ✨Veimeanina Yaubada Keliso i veleniga, faifaina tamu vona i 'eno'eno Yaubada yana Buki nageneye i vo,

Nani matatabuna i 'anivelenedi 'waineye bega i na veveimeyedi.”

Vonanina i vo, Nani matatabuna,” 'ana nogaya 'wa da vo Keliso Yaubada i da veveimeyeni, siwe kebu, ta 'asetai Keliso kebu Yaubada i da veveimeyeni fai taunina veimeanina 'ana to'anivelenena Keliso i veleni. 28 Tutuyanina Keliso nani matatabuna i na veveimeyedi, wata taunina i na tauyeni Tamana yana veimea 'waineye, Tamananina nagami veimea i 'anivelenedi 'waineye, bega Yaubada 'aiseotogina ma yana veimea nani matatabuna tomotoga taiadi i na 'i'isave'avinida.

*Fai ta na tovoi wafayega bega ta na tokemaiga Keliso faifaina.*

✨ 15:20: 1 Tes 4:14 ✨ 15:21: Lom 5:12,18 ✨ 15:23: 1 Tes 4:16 ✨ 15:24-26: Mad 22:44; Ve 20:14 ✨ 15:27: Same 8:6



29 'Ifwaimi 'wa vo, Towafa kebu 'adi fata i na tovoi-vaitugana wafa 'wainega,” bega yami nuanuananina faifaina a na vonemi. Tamu yami sauluva 'ifwaimi bafitaiso 'wa 'ewa'ewai towafa faifaidi, siwe ava'ai 'ana 'atumaina? 'Ai'edi kebu aitoi i na tovoi wafayega yami nuanua bani'odi, awale bafitaiso 'wa 'ewa'ewai towafa faifaidi bega igodi 'wa vo, Yadi mia i na ve'atumai”?

30 ✨Ima, 'a lalau'age Keliso faifaina, begaidi 'ana tovedumwe'ai'ai vita i vevelema nuanuadi i na luluvewafama. 'Ai'edi Yaubada kebu i na sivetovoida Keliso taiadi, 'ako kebu 'a da lalau'agega wata 'ako kebu vita 'a da veveluagadi 'awasasa 'aitamogana 'aitamogana 'waidie. 31 Ekwavo, Yaubada i 'asetaku, a vona mogitana 'waimie 'aiata 'aitamogana 'aitamogana ilagi 'eba wafa a veveluagadi Keliso faifaina. Yaku vonanina wata yaku sosoana faifaimi, 'adi 'ailuga vona mogitana. A sosoanaga fai 'wa miave'itubama 'ada Toveimea Iesu Keliso taiadi. 32 ✨Tutuya de'e Efeso 'waineye a miamia Keliso 'ana tovedumwe'ai'ai ma yadi nuasako i daba nuanuadi i na luvewafaku, yadi nuasakonina 'wa da vo 'aisaya kasikasisidi taiadi a da vetalaga. 'Ai'edi fwayafwaya 'ana nuanua 'aisena faifaina a da tokemaigeku ilagi 'eba wafa 'waineye kebu tamu ava'ai 'ana 'atumaina 'waikuye. Siwe fai yada tovi-vaitugana faifaina a nuani, begaidi a tokemaigeku. 'Ai'edi Yaubada kebu towafa i na sivetovoidiga, 'ifwaidi tomotoga ta na salad i vo, 'Ida wafawafada, ta na 'ani, ta na yemu, ta na wafa-vagata.”

33 Siwe kebu i na vekaliemiga. Tamu yada vona bwaikina i 'eno'eno i vo, 'Ai'edi tosakona taiadi 'wa na veiana, yadi sauluva i na vedamanimi, nika yami sauluva 'atumaiddi i na 'ivesakodi.” 34 ✨Nuanuaku yami nuanua i na tonova, yami sauluva sakoidi 'wa na bailedi. 'Ifwaimi Yaubada 'wa bavuyeni, 'wa da bunumayaga.

*Tovi-vaitugana 'waineye tomogoda i na ve'ivau.*

35 Voke tamu aitoi i na velutoli i na vo, Yaubada bani'odi i na munega towafa i na sivetovoidi? 'Ai'edi i na sivetovoidiga ava'ai 'ana 'isa'isa tomogodi?” 36 Yana velutolinidi 'ana nogaya 'wa da vo i da ve'wava'wava. Tutuyanina tamu waifei 'wa na bakuli i na tabo, siwe 'ai'edi tubutubuna kebu i na 'anikudaiga, 'alo kebu i na wafa, kebu 'ana fata vuaga 'wa na veluagai. 37 'Ai'edi tamu waifei 'wa na bakuliga bani'odi boada 'alo tamu 'ani'ani, siwe kebu ma 'ani'arinina 'wa da bakubakuli, waifei'avana. 38 ✨Waifeinina i na tabo i na

✨ 15:30: 2 Kol 4:10-11, 11:26 ✨ 15:32: Luk 12:19-20 ✨ 15:34: Luk 15:17-18

✨ 15:38: Nag 1:11

nagoga vuagina i na souyeni Yaubada yana nuanua bani'odi, waifei tulina tulina taunidi vuagidi mogitana.

<sup>39</sup> Wata bani'odi nani ma yawaidi tomogodi tulina tulina. 'Ida tomotoga tomogoda tulina, 'aisaya yaveyavegidi tomogodi tulina, 'aisaya daledaledi tomogodi tulina, 'aisaya ufayega tomogodi tulina wata 'aisaya 'ifwaidi tomogodi tulina.

<sup>40</sup> Wata bani'odi, tomia abama tomogodi tulina wata tomia fwayafwaya tomogodi tulina. Tomia abamanidi tomogodi 'adi 'isa 'ana ve'atumai tulina wata tomia fwayafwayanidi tomogodi 'adi 'isa 'ana ve'atumai tulina. <sup>41</sup> Inala yana mageta 'ana 'isa tulina, weta'i yana mageta 'ana 'isa tulina, wata 'ubwana yadi mageta 'adi 'isa tulina, we'e 'ubwananidi 'aitamogana 'aitamogana 'adi 'isa tulina tulina.

<sup>42</sup> Mogitana Yaubada nani 'aitamogana 'aitamogana 'adi 'isa tulina tulina i veledi, wata bani'odi 'awaie tovi-vaitugana 'waineye tomogoda tulina Yaubada i na veleda. Tutuyanina tamu waifei ta na tavuni i na tabo, siwe tubutubuna kebu i na 'anikudaiga 'alo kebu i na wafa, kebu 'ana fata tamu nani 'atumaina ta na veluagai. Wata bani'odi tutuyanina towafa ta na tavuni tomogona 'a'a'avina i na 'anikudai, siwe tutuyanina Yaubada i na sivetovoia wafayega, tomogona 'ivauna wata miamia-vagaina i na souyeni. <sup>43</sup> ✧ Towafa ta na tavuniga tomogona 'ana 'isa i kibwa, siwe sivetovoi-vaitugana 'waineye 'ana 'isa 'atumaina. Ta na tavuniga tomogona mweamweana, siwe sivetovoi-vaitugana 'waineye tomogona toketokena. <sup>44</sup> 'Ida tomia fwayafwaya ma tomogoda yada mia fwayefwayeye faifaina, begaidi towafa ta na tavuniga fwayafwaya 'ana nani ta na tavutavuni. Siwe tutuyanina Yaubada i na sivetovoia, tomogona 'ivauna 'anu'anununa yana 'eba mia 'atumaina, yana mia abame faifaina.

Matatabuda ta 'asetai tutuya de'e ma tomogoda yada mia fwayefwayeye faifaina, begaidi ta 'asetai 'awaie tomogoda 'ivaudi yada mia abame faifaina. <sup>45</sup> ✧ Tomogodanidi faifaiddi tamu vona i 'eno'eno Yaubada yana Buki nageneye i vo,

Tomotoga kumekumetana 'ana wagava Adama, Yaubada i 'idewai fwayafwaya 'wainega ma yawaina.”

We'e Keliso, taunina 'wa da vo Adama vevemulina i mai, taunina 'anu'anunu, mia 'ivauna wata miamia-vagaina 'ana to'anivelena. <sup>46</sup> Tomogoda yada mia abame faifaina kebu nagami ta da 'ewadi. We'e mogitana tomogoda yada mia fwayefwayeye faifaina nagami ta 'ewadi, tomogoda 'ivaudi abama faifaina 'awaiebei ta na veluagadi. <sup>47</sup> ✧ Tomotoga kumekumetana 'ana wagava Adama, Yaubada i 'idewai

fwayafwayayega, we'e Adama vevemulina taunina Keliso, abamega i mai. <sup>48</sup> 'Ida tomia fwayafwaya yada mia i vesala tomogonina i 'idewaiga fwayafwayayega bani'odi, we'e 'ida Keliso yana tomotoga, kumanina i mai abamega, 'awaie ta-ia-di abame yada mia i na vesala. <sup>49</sup> Tutuya de'e 'ada 'isa'isa bani'odi tomogonina Yaubada i 'idewai fwayafwayayega, wata bani'odi 'awaie 'ada 'isa'isa kumanina i mai abamega bani'odi.

*Iesu 'wainega ta na vetoketoke wafa 'waineye.*

<sup>50</sup> ✧ Ekwavo, yaku vona 'ana 'asete side bani'odi. Kebu 'ana fata tomotogaotogida ta na luku Yaubada yana 'Eba Veimea nageneye bega 'ada veuveuta ta na veluagai, wata kebu 'ana fata tomogoda 'a'a'avidu i na luku nani miamia-vagaidi yadi 'eba mia 'waineye.

<sup>51</sup> ✧ Tamu Yaubada yana nuanua givagivana a na sivemage-seni 'waimie. 'Ida tovetumagana kebu matatabuda ta na wafa, siwe tovetumagana matatabuda wafawafadi taiadi, Yaubada tomogoda i na 'ive'ivaudi ta na vetuli-matayo'o. <sup>52</sup> I na 'ive'ivau-matayo'odaga 'wa da vo matada ta da taulovogi 'alo tomuyoana i da kianamali. Tutuya 'eba ve'a'avaotoga 'waineye, Yaubada yana evulega ta na nogai, nika tovetu-magana i wafaga Yaubada i na sivetovoidi tomogodi 'ivaudi yadi mia abame faifaina i na veledi, siwe miamia-vagaidi kebu i na wafa. We'e 'ida tovetumagana ma yawaida ta na miamiaga ta na vetulimo, tomogoda 'ivaudi ta na 'ewadi. <sup>53</sup> ✧ Fai Yaubada nuanuana, tomogoda 'ivaudi abamega tomogoda 'a'a'avidu i na agedi, tomogodanidi 'ivaudi kebu 'ana fata i na 'anikudadi. Tomogoda 'ivaudi wata miamia-vagaidi tomogoda wafawafadi i na agedi. <sup>54</sup> ✧ Tutuyanina ta na vetuli i na 'a'avana nika tamu vona Yaubada yana Buki nageneye 'ana mogitana i na souyeni i vo,

Yaubada i vetoketoke wafa 'waineye, i ve'a'ava-vagaseni."

<sup>55</sup> ✧ Wata tamu vona i vo,

Wafa, yamu 'eba vetoketoke ava'aibe? Yamu toketokena 'akonadi i 'a'ava.

Wafa, yamu 'eba vekasikasisi 'wainega vita 'u velevelema, ava'aibe? 'Akonadi i mwea."

<sup>56</sup> ✧ Fai Yaubada yana Ve'etoboda ta geugeudi ta sakosakona, we'e yada sakonanidi 'adi tutula wafa. Wafanina yana 'eba vetoketoke 'asa'aiana sakona. <sup>57</sup> ✧ Siwe 'ada Toveimea Iesu Keliso 'ada vematavuloga wafa i tovoieni i vetoketoke 'waineye, wata yana 'aivaita 'wainega ta

✧ 15:50: Ion 3:5-6 ✧ 15:51: 1 Tes 4:15-17; Ve 11:15 ✧ 15:53: 2 Kol 5:4

✧ 15:54: Ais 25:8 ✧ 15:55: Ose 13:14 ✧ 15:56: Lom 6:23 ✧ 15:57: Lom

7:24-25

vevetoketoke. Naninidi Yaubada i 'idewadi, bega ta na vekaiwa 'waineye.

<sup>58</sup> ✨Ekwavo, 'omi a nuakalikiemi, fai 'awaie ta na tovoi-vaitugana, nuanuaku 'wa na tovoi fa'alina, yami vetumagana 'waidiega kebu 'wa na 'ivemweamweami. Ma yami dumwebika taunimi 'wa na tautauyemi 'Auvea yana folova 'waineye, 'akonadi 'wa 'asetai 'ai'edi yana toketokena 'wainega 'wa na folofolovaga faifaina, ma vuagina wata ma 'ana tutula.

## 16

*'Anivelena-maimaiga tovetumagana 'adi 'aivaita faifaina.*

<sup>1</sup> ✨Tutuya de'e, nuanuaku a na veifufu yami 'anivelena-maimaiga faifaina, maninina 'wainega Yaubada yana tomotoga i vewekowekomaga 'wa na 'ivaisedi. Tovetumagana 'aila'a tulina tulina 'awalawa Galetia nageneye yaku nuana 'anivelena-maimaiga faifaina a vonedi i na 'idewai, 'omi wata bani'odi 'wa na 'idewai. <sup>2</sup> 'Aiata Tafalolo 'aitamogana 'aitamogana yami mani 'ifwaidi 'wa na yatoyato 'anivelena-maimaiga faifaina. 'Wa na yatoyatoga, 'aitamogana 'aitamogana yana folova 'ana tutula 'ana 'etowava 'wainega, 'ai'edi tutula bwaikina, wata bwaikina i na yato, we'e 'ai'edi siaina, wata i na yato siaina. 'Wa na yayato-vagata bega tutuyanina a na waiga nonogina i na 'eno'eno. <sup>3</sup> Tomotoga 'ifwaidi 'wa na vena'ivinedi maninina i na naweni faifaina, mulieta a na wai tomotoganidi yadi lubulubu a na kilumidi 'adi 'aseta wata 'adi awave'atumai faifaidi. I na 'a'avana a na vetunedi yami 'anivelena-maimaiga i na naweni Ielusalema i na 'aniveleneni tovetumagana i vewekowekomaga 'waidie. <sup>4</sup> 'Ai'edi i na lubwaineni yau a na nunago Ielusalema, tomotoganidi a na vonedi taiadi 'a na nagoi.

*Faulo i na nago Kolinita, faifaina i veifufu.*

<sup>5</sup> ✨Tutuyanina a na viwaiga, nagami 'awalawa Masidonia matatabuna 'waineye a na lauvivila, mulieta a na viwaina a na le'wa. <sup>6</sup> A na waiga voke sai'afu taiadi ta na yogomia, 'alo voke kaukau 'ana tutuya matatabuna bei taiadi ta na miamia, mulieta yami 'aivaita 'wainega a na tauya a na nago tamu 'atamana 'waineye. <sup>7</sup> Kebu nuanuaku 'isa'ava faifaina a na wai, begaidi nagami a na nago Masidonia, tutuyanina yaku folova i na 'a'ava a na wai 'waimie. 'Ai'edi 'Auvea i na tauyekuga, nuanuaku tutuya manamanawena taiadi ta na yogomia.

<sup>8</sup> Siwe tutuya de'e a na miamia 'atamana Efeso, sakali bwaikina Fenitikosi 'ana 'aiata i na veluagai, mulieta a na wai. <sup>9</sup> ☆A na miamiaga fai 'Anu'anunu 'Atumaina yana 'aivaita 'wainega me Efeso fuedi i nunuaviladi i vevetumagana Keliso 'waineye, wata Keliso 'ana tovedumwe'ai'ai fuedi yaku folova i 'i'ivesakoi begaidi a na miamia.

*Faulo yana vona 'ana 'eba ve'a'ava.*

<sup>10</sup> ☆'Ai'edi Timoti i na viwai i na le'wa 'waimie, kebu nu-anuaku i na kololoyemi, ma yami sosoana 'wa na veianeni fai taunina i folofolova 'Auvea faifaina yau a folofolovaga bani'odi. <sup>11</sup> ☆Fai taunina 'Auvea yana tofolova, bega kebu tamu aitoi 'waimiega i na kibuya, taiadi 'wa na miamia mulieta yami 'aivaita 'wainega wata ma yana sosoana i na vilai i na mai 'waikuye. Edavo tovetumagana wata Timoti taiadi, faifaidi a lulukamata.

<sup>12</sup> ☆We'e iada Afolosa a toke a vonevoneni nuanuaku i da wai i da fogemi edavo tovetumagana 'ifwaidi taiadi siwe i baila, kebu nuanuana tutuya de'e i na wai. Siwe tamu tutuya safailina 'waineye i na wai.

<sup>13</sup> ☆'Wa na 'isa'isa, taunimi yami sauluva 'wa na 'i'isave'avinidi, ma yami vetumagana 'wa na tovofovo fa'alina, nuafoumi i na fa'alidi bega kebu 'wa na kololo Keliso 'ana tovedumwe'ai'ai 'waidie, wata 'wa na vevetoketoke. <sup>14</sup> Ava'ai 'wa na 'i'idewadiga, yami sauluva matatabuna nuakalikali.

<sup>15-16</sup> ☆'Akonadi 'wa 'asetai 'awalawa Gulisi matatabuna nageneye Sitefana ma yana 'aila'a taunidi nagami i vetumagana Keliso 'waineye, mulieta tomotoga 'ifwaidi. Ma yadi dumwebika taunidi i tauyedi Yaubada yana tomotoga 'ada 'aivaita faifaina. Ekwavo, nuanuaku bwaikina ma yami ve'ililibu taunimi 'wa na tauyemi tomotoganidi 'waidie wata 'ifwaidi tomotoga 'waidie, kumanidiavo yadi sauluva bani'odi Sitefana ma yana 'aila'a. Wata nuanuaku taunimi 'wa na tauyemi tomotoganidi i toke i folova-vaita Keliso faifaina 'waidie.

<sup>17</sup> Fai 'omi kebu taiadi ta da miamia a nunuavita, siwe edavo 'ifwaidi i maia 'waimiega i kiavesosoaniku, tomotoganidi Sitefana, Fotiuneto, wata Akaikasi. <sup>18</sup> ☆Tomotoganidi i le'wai nika i kiavesosoaniku wata i kiavetoketokeku, 'omi wata bani'odi 'akonadi 'aivaitanidi 'wa veluagadi 'waidiega. Tomotoganidi de'e bani'odi i lubwainemi 'aila'a matadie 'wa na awa'ai'aidi.

*Faulo yana 'alanuai.*

☆ **16:9:** Fol 19:1-2,8-10 ☆ **16:10:** 1 Kol 4:17 ☆ **16:11:** 1 Tim 4:12 ☆ **16:12:** 1 Kol 3:6 ☆ **16:13:** Efe 6:10 ☆ **16:15-16:** 1 Kol 1:16; 1 Tes 5:12 ☆ **16:18:** Fmi 1:7

19 ✧Keliso yana 'Aila'a tulina tulina 'awalawa Eisia nageneye yadi vekaiwa i vetunedi 'waimie. Wata Akwila ma yana vavine Filisila wata tovetumagananidi i vava'auta yadi vanuge, ma fuedie ma yadi nuakalikali yadi vekaiwa i vetunei 'waimie 'Auvea 'ana wagavayega. 20 Emiavo tovetumagana taiadi 'a miamianiga, wata yadi vekaiwa i vetunei 'waimie.

Emiavo tovetumaganavo 'wa na veluagadiga, ma yami nuakalikali 'wa na 'avalamaigidi.

21 Side bei yaku leta 'ana tokiluma a voneni i 'ailove, yau tauniku a na ve'a'avai. Yau Faulo de'e nimaku, a vekaiwa 'waimie.

22 ✧'Ai'edi aitoi 'ada Toveimea Keliso kebu i na nuakalikalieniga, Yaubada ma yana nuasako vematavuloga i na veleni i na wafaotoga.

Iesu, 'omu 'ama Toveimea, nuanuama 'u na mai-matayo'o.

23 A vevelu'ui faifaimi, nuanuaku 'ada Toveimea Iesu ma yana nuakalikali i na vevesauluva 'atumaina 'waimie.

24 'Ida matatabuda Keliso yana tomotoga, begaidi a nuakalikaliemi bwaikina.

'Asa'aiana bani'odi,  
Yau Faulo.

## 2 KOLINITA

### Faulo yana kiluma 'ana veluga me Kolinita 'waidie.

De'e letanina Faulo i kiluma-vaitugana me Kolinita 'waidie 'atamana Masidonia 'wainega. Kolinita tamu 'atamana 'ana wagava bwaikina 'awalawa Akaia 'alo Gulisi nageneye.

We'e nagami Faulo i kilumaga me Kolinita i yagaidi, mulieta tamu tutuya Taito i vetunei, i na 'asetadi bega i na vilai i na mai i na veifufu. Taito i vilai i mai i veifufu i vo, Me Kolinita Faulo bonana i nogai 'akonadi i nuaviladi, we'e 'ifwaidi i baila kebu nuanuadi Faulo yana veimea.” De'e letanina nageneye nani bwaikidi 4 i 'eno'novi. Nagami, Faulo i sosoana tomotoganidi i nuaviladiga faifaidi, wata Vala 'Atumaina Iesu Keliso 'ana nuanua nageneye mogitana faifaina i tolinuata'i. We'e 'ana vetonu i vonedi yadi 'anivelena-maimaiga i na yato tovetumagana i vewekowekomaga faifaidi. 'Ana ve 4, i kiavemageta 'waidie taunina mogitana tomata'aulele. De'e letanina 'ana 'idi side bani'odi.

Vona-vekaiwa me Kolinita 'waidie wata Yaubada 'ana subia. 1:1-11

Me Kolinita Faulo i kiavenuavitai we'e Faulo nuanuana i na veianedi. 1:12-2:13

Faulo yana folova mogitana vetolu'ivona Yaubada yana Veakutagona 'Ivauna faifaina. 2:14-6:10

Faulo 'ana lautonova me Kolinita faifaidi i lu'ivoneyeni. 6:11-7:16

'Anivelena-maimaiga 'ana 'idewadewa taunidi yadi nuanuayega faifaina. 8:1-9:15

Faulo i veifufu yana vetomata'aulele me 'adi 'eba 'isa. 10:1-12:21

Faulo yana nuanua, yana velu'ase'ase wata yana 'alanuai. 13:1-13

<sup>1</sup> ✧Emavo, yau Faulo iada Timoti taiadi 'a vekaiwa 'waimie. Yaubada nuanuana, bega a vetomata'aulele Iesu Keliso faifaina, we'e 'omi Yaubada yana 'Aila'a 'wa miamiani 'atamana Kolinita 'waineye, kumanimiavo 'wa vetumaganaga Keliso 'waineye wata Yaubada yana tomotoga matatabumi 'awalawa Gulisi nageneye, a kilukiluma 'waimie.

<sup>2</sup> ✧'A vevelu'ui faifaimi, nuanuama Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie wata nuanua bikana, mia 'atumaina taiadi i na vevelemi.

*Yaubada 'ada To'aivaita.*

<sup>3</sup> ✧Yaubada ta na subisubiai, taunina 'ada Toveimea Iesu Keliso yana Yaubada wata Tamana. Taunina Tamada, 'ada To'isanuakalikali, 'aiseotogina 'wainega 'aivaita ta veveluagadi. <sup>4</sup> 'Ada vita matatabuna 'waidie i kikiavefa'alida wata nuada i 'iveagiagidi bega tovetumagana 'ifwaidi vita tulina tulina i na veluagadiga, 'ada fata ta na 'ivaisedi 'aivaitanidi ta veluagadiga 'waidiega. <sup>5</sup> Vita wata veviga Keliso i veluagadi faifaida, 'ida wata bani'odi vita bwaikidi ta veveluagadi faifaina. Mogitana ta veveluagadi siwe wata 'aivaita bwaikafalafaladi ta veveluagadi fai Keliso taiadi ta miave'itubama. <sup>6</sup> Fai Iesu Valana 'Atumaina 'a lalau'age vita bwaikidi 'a veveluagadi, siwe kebu 'a da veluaga-maimaigidi, fai yama lau'agenidi 'waidiega 'wa vetumagana Iesu Valana 'waineye nika Yaubada i 'ivaisemi wata i 'ita'ita'iemi. Fai Yaubada i 'i'ivaisema vita 'adi tutuye, 'omi wata bani'odi 'aivaita 'wa na veluagadi nuami i na ve'atumai. Mogitana vitanidi 'a veveluagadiga 'omi wata 'wa veveluagadi siwe 'ami 'aivaitanidi 'waidiega Yaubada i na kiavetoketokemi i na nagoga ma yami tokemaiga 'wa na tovtovoi fa'alina. <sup>7</sup> 'A nuani mogitana 'wa na tovtovoi fa'alina. Avinodi 'ada vita i vesala, siwe wata 'ada 'aivaita Yaubada 'wainega i vesala.

<sup>8</sup> ✧Emavo, vita bwaikaotogidi 'a veluagadi 'awalawa Eisia nageneye, nuanuama 'wa na 'aseta-'atumaidi. Mogitana vitanidi vitaotogidi 'wa da vo i da akufwasema 'a vo 'ako, 'Wainega 'a na wafa." <sup>9</sup> 'A vebaemaga 'wa da vo mali tomotoga i da veimea 'a na wafa. Siwe vitanidi i souyediga 'waimeye bega kebu taunima yama toketokena 'a na vetumaganeni, we'e mogitana ma yama vetumagana taunima 'a tauyema Yaubada 'aiseotogina 'waineye, 'a na wafaga kebu tamu ava'ai, fai taunina towafa 'adi tosive-tovoi. <sup>10-11</sup> ✧Vitanidi 'eba wafa 'waidiega i 'ita'ita'iemaga wata 'awaie i na 'ita'ita'iema. 'Omi 'wa na 'i'ivaisema yami velu'ui 'waidiega, 'a nuani mogitana tutuya matatabuna i na 'i'ita'ita'iema. 'Ai'edi fuemi 'wa na vevelu'ui faifaima Yaubada yami velu'uinidi i na tutulidi ma yana nuakalikali, i na vesauluva 'atumaina 'waimeye, 'omi wata mali tomotoga 'wa na 'iseni 'wa na vevekaiwa 'waineye yana nuakalikalinina 'waimeye faifaina.

*Faulo igodi i da nago Kolinita.*

<sup>12</sup> ✧'Ama fata 'a na awa'ai'aima fai 'ama vebae 'waineye 'a lutonovi yama sauluva 'atumaidi mali tomotoga matadie we'e mogitana 'omi me Kolinita matamie. Yaubada yana



toketokena 'wainega yama sauluva i tonova, kebu 'a da luwanawana sauluva sakoidi wata 'atumaidi taiadi. Yama sauluvanidi kebu tomia fwayafwaya yadi nuanua bani'odiga, we'e mogitana Yaubada yana nuakalikali i veveimeyema bega yama sauluva tonovidi. <sup>13-14</sup> ✧Yama leta matatabuna 'waimie kebu tamu vona givagivana 'a da kilumiga, we'e mogitana ava'ai 'a kilumiga 'ami fata 'wa na lu'iawawadi wata 'wa na 'asetadi. Tutuya de'e yami 'aseta faifaima sai'afo, nuanuaku yami 'asetanina i na vevebwaika i na nagoga yama nuanua matatabuna 'wa na 'aseta'a'avadi, bega 'aiatanina 'ada Toveimea Iesu i na vila-vaitugani 'ami fata 'wa na awa'ai'aima, 'ima 'a na awa'ai'aimiga bani'odi.

<sup>15-16</sup> Fai a nuani mogitana nuanuami yau, bega yaku nu-anua a 'idewai a vo, A na nunagoga 'awalawa Masidonia, nagami a na nago me Kolinita 'waidie, mulieta yaku lauvivila i na 'a'ava, a na vilaku a na mai wata a na 'isedi. A na miamia, mulieta yadi 'aivaita 'wainega a na tauya a na nago 'awalawa Iudia.” A vo, De'e bani'odi a na nagoyediga tutuya 'ailuga a na 'isedi, wata tutuya 'ailuga i na sosoana.” <sup>17</sup> Fai a vo, A na nago me Kolinita 'waidie,” siwe kebu a da wai, voke yami nuanua 'wa vo, Faulo tovekali.” Tomotoga fuedi 'awadi i na vo, E'e, 'a na 'idewai,” siwe yadi nuanua 'waidie i vo, Kebu 'a na 'idewaiga.” We'e yau, kebu bani'odi yaku sauluvaga.

<sup>18</sup> Ava'ai Yaubada i na voneyeniga, mogitana i na 'idewai, 'ima wata bani'odi kebu 'a da vekaliemiga. Nagami 'a vonemi 'a vo, E'e, 'a na 'idewai,” siwe yama nuanua 'waineye kebu 'a da vo, Kebu.” <sup>19</sup> 'Ima kebu tovekaliga fai Iesu Keliso Yaubada Natuna, kumanina faifaina yau, Sailasa, Timoti taiadi 'a lau'age 'waimie, kebu tovekaliga. Kelisonina i na vo, E'e, a na 'idewai,” we'e yana nuanua kebu tulineamo i da nunago. Ava'ai i voneyediga, matatabuna i na 'idewadi wata 'awaie i na 'idewadi. <sup>20</sup> ✧Yaubada yana vona'awaufaufa fuedi, siwe Keliso 'aitamogana 'aitamogana i 'idewadi. Begaidi Yaubada ta subisubiai ta vo, Vona mogitana, Yaubada i na 'idewadi Keliso 'wainega.” <sup>21-22</sup> ✧Yaubada 'aiseotogina 'ima wata 'omi yada miave'itubama Keliso 'waineye, 'ana tokiavefa'ala. Wata Yaubada 'aiseotogina i vena'ivineda yana nuanua ta na 'idewadi wata yana tugusa i yatoi 'waideye bega 'ida yana tomotoga mogitana. Tugusanina, 'Anu'anunu 'Atumaina i ageda, yada 'eba 'isa 'awaie 'ada veuveuta ta na veluagadi 'wainega.

<sup>23</sup> ✧Yaubada 'aku to'aseta a vona mogitana 'waimie kebu a da vekali. Fai a nuanidi yami sauluva kebu 'atumaidiga,

✧ **1:13-14:** Fil 2:16 ✧ **1:20:** Lom 15:18-19; Ve 3:14 ✧ **1:21-22:** 1 Ion 2:27; Efe 1:13-14; Lom 8:16-17 ✧ **1:23:** Lom 1:9

yaku lauvivila 'ana tutuye kebu a da wai 'waimie. A da waiga yami sauluva sakoidi a da 'isedi, faifaidi a da awavesakoyemi. <sup>24</sup> ✧ 'Akonadi 'wa vetumagana Keliso 'waineye 'wa tovofovo fa'alina, bega kebu nuanuama 'a na veimeyemi 'a na vo, Side naninidi 'waidie 'wa na vetumagana." We'e mogitana 'ima wata 'omi ma fueda ta folofolova yami sosoana faifaina.

## 2

*Faulo tamu yana leta 'wainega me Kolinita i awavesakoyedi.*

<sup>1</sup> ✧ Basenadi a waiga a awavesakoyemi yami sauluva faifaidi 'wa nuavita. Bega yaku nuanua a vo, Tutuya de'e kebu wata a na nagoga, kebu nuanuaku yaku awavesako 'wainega wata i na nuavita." <sup>2</sup> 'Omi 'aku tokiavesosoana, 'ai'edi a da awavesakoyemi yami sauluvanidi faifaidi nuami a da 'ivevitadi nika yau wata a da nuavita. 'Wa da nuavitaga kebu tamu wata aitoi i da miamia bega i da kiavesosoaniku. <sup>3</sup> Begaidi tamu leta a kilumi i wai 'waimie a awavesakoyemi yami sauluva sakoidi faifaidi. I lubwainemi 'wa da kiavesosoaniku bega nuanuaku nagami yami sauluva i na ve'atumai, mulieta tutuyanina a na waiga, kebu a na nuavita a na sosoana faifaimi. 'Omi matatabumi a 'asetami, a nuani mogitana 'ai'edi a na wai ma yaku sosoana a na veluagami, 'omi matatabumi wata 'wa na sosoana. <sup>4</sup> ✧ Fai nuanuaku taiadi ta na sosoana ma yaku nuavita wata ma yaku venuafouviga, ma matageuku a kiluma 'waimie. A kilumaga, kebu nuami 'adi 'ivevita faifaina, we'e mogitana a kiluma bega 'wa na 'asetai a nuakalikiemi bwaikina.

*Faulo i veifufu tamu tosakona faifaina.*

<sup>5</sup> ✧ Nuanuaku a na veifufu tomogonina nuada i kiavenuavitadiga faifaina. Fai taunina tamu iami yau kebu 'aiseku yana sauluva faifaina a da nuavita, 'omi wata sai'afo 'wa nuavita. Siwe kebu nuanuaku yana bunumayaga a na 'ivebwaiki, begaidi kebu wata faifaina a na vona. <sup>6</sup> 'Akonadi sai'afo matatabumi vematavuloga 'wa veleni yami luvulewa 'wainega, siwe tutuya de'e 'asa'aiana. <sup>7</sup> Nuanuaku 'wa na nuatavuni nuana 'wa na 'ive'atumaia i na nunago yana nuavita i na vebwaika-'afo'afo i na 'ivedumwe'ai'aia. <sup>8</sup> Begaidi a na vonemi nuanuaku yami sauluva wata yami vona 'waidiega 'wa na ve bega i na 'asetai 'wa nuakalikiemi. <sup>9</sup> Basenadi leta a kiluma i wai 'waimie 'ana vematavuloga faifaina, a silubumi a da 'asetai yaku vona 'wa veve-matayakeyakedi nani matatabuna 'waidie 'alo kebu. <sup>10</sup> 'Ai'edi

aitoi 'wa nuatavuniga, yau wata bani'odi 'akonadi a nuatavuni. We'e yaku nuatavunanina, 'ai'edi mogitana tamu sakona i 'eno'eno a nuatavuniga, a nuatavuni Keliso mataneye yami 'atumaina faifaina nika 'wa na sosoana. <sup>11</sup> \*Fai Seitani yana nuanua sakoidi ta 'asetadi, tosakona 'akonadi i nuavilaiga ta na nuakalikalieni, i na nunago Seitani i na vetoketoke 'waideye nika 'ida tovetumagana yada mia i na 'ivesakoi.

*Yaubada yana tofolovavo i kiavetoketokedi.*

<sup>12</sup> \*Basenadi yaku lauivila 'waineye a nago 'atamana Tiloasi a na lau'age Keliso Valana 'Atumaina faifaina. Tutuyanina a le'wa a 'iseni 'akonadi 'Aueva tomotoganidi yadi nuanua i 'idewadi begaidi nuanuadi Valananina i na nogai. <sup>13</sup> We'e bei igodi iada Taito a da veluagai valami i da lu'ivona 'waikuye nika a 'isa'avai. Fai a 'isa'avai nuafouku i veviga begaidi a 'alanuai nika a tauya a nago 'awalawa Masidonia.

<sup>14</sup> \*Bei Taito a veluagai valami i lu'ivona 'waikuye, 'ana nogaya 'atumaina begaidi a vekaiwa Yaubada 'waineye. A vekaiwaga Yaubada 'waineye fai i vetoketoke 'ana gaviavo 'waidie Keliso 'wainega, we'e 'ima yana tofolovavo tutuya matatabuna i 'e'edakumesema wata i kikiavetoketokema. Yaubada i venuma Keliso 'ana 'asetu faifaina 'a lalau'age tomotoga matatabuna 'waidie, 'wa da vo tamu magari 'ana yaoga 'iwanina i da susula tomotoga 'waidie. <sup>15</sup> \*Tomotoga 'ifwaidi i nunago 'ita'ita'i 'ana 'eda 'wainemo, we'e 'ifwaidi i nunago wafaotoga 'ana 'eda 'wainemo. Keliso faifaina 'a lalau'age tomotoganidi matadie, bani'odi Keliso magari i sousouyeni 'waimega, Yaubada yana 'eba sosoana. <sup>16</sup> Tomotoganidi i nunago wafaotoga 'ana 'eda 'wainemo Keliso 'ana lau'age 'waidie bani'odi taumata 'anibaina magari, we'e tomotoganidi 'ita'ita'i i veveluagai, 'ana lau'age 'waidie bani'odi magari 'iwanina, yadi 'eba 'isa 'awaie mia 'atumaina wata miamia-vagina i na veluagai. Folovanina vetolau'age, 'wa da nuani egavo 'adi fata i na folovi? <sup>17</sup> \*Tomotoga fuedi Yaubada yana Vona i lalau'agega yadi nuanua i vo, Nani-'avo'avovo siwe 'a na lalau'age mani bwaikina 'a na veluagai." We'e 'ima, kebu bani'odi 'a da vesauluvediga. Fai Yaubada i venuma 'a vetofolova Keliso faifaina, kebu faifaime 'a da nuanua, Yaubada mataneye yana Vona 'a veveifufu tonovina. Begaidi folovanina vetolau'age faifaina, 'ima 'ama fata.

### 3

*Faulo Yaubada yana toketokena 'wainega i folofolova.*

<sup>1</sup> ✱Ima 'a vo, 'Ama fata Yaubada yana folova 'a na 'idewai," bega voke 'wa na vo, Faulo ma enavo taunidi i awa'ai'aidi basenadi bani'odi." Tolau'age 'ifwaidi i waia 'waimie ma yadi lubulubu mali tomotoga i kilumidi 'adi 'aseta wata 'adi awave'atumai faifaina. Wata bani'odi 'omi me Kolinita to-lau'age 'ifwaidi yadi lubulubu 'wa kilumidi 'adi 'aseta wata 'adi awave'atumai faifaina bega i na nagoi mali 'awalawa 'waidie i na lau'age. Voke wata 'wa na vo, Faulo ma enavo i lubwainedi ma yadi lubulubu 'adi 'aseta wata 'adi awave'atumai faifaina." <sup>2</sup> We'e 'ima, 'ama 'aseta wata 'ama awave'atumai 'ana lubulubu 'asa'aiana 'omi. 'A vebaema 'wa awave'atumiema, 'wa da vo 'wa da kiluma yama nuanua 'waidie. Tomotoga matatabudi 'adi fata yami sauluva i na 'isedi i na 'asetai 'omi Keliso yana tomotoga, yama folova vuagina 'omi, nika i na awave'atumiema. <sup>3</sup> ✱Akonadi ma 'ana 'aseta tomotoga 'waidie 'omi Keliso yana leta. Yama lau'age 'wainega Keliso tauniotogina i kiluma yami nuanua 'waidie. Basenadiotoga Yaubada yana ve'etoboda i kilu-midi kileu 'waidie i 'anivelenedi Mosese 'waineye. We'e Keliso kebu 'eba kilumaotoga 'wainega i da kiluma kileu 'alo lubulubu 'waineye, i kilumaga Yaubada Miamia-vagaina 'Anu'anununa 'wainega tomotoga yami nuanua 'waidie.

<sup>4</sup> De'e bani'odi yama folova vuagina 'a veifufuyeniga fai ma yama vetumagana taunima 'a tauyema Yaubada 'waineye wata 'a nuani mogitana Keliso toketokena i vevelema naninidi faifaidi. <sup>5</sup> Kebu tamu nani toketokena i da 'eno'eno 'waimeye bega 'a da vo, Yaubada yana folovanina, tauni'avama 'ama fata," we'e mogitana Yaubada yama toketokena i vevelema bega 'ama fata yana folova 'a na 'i'idewai. <sup>6</sup> ✱Tauniotogina yana toketokena 'wainega 'a vetofolova faifaina yana Veakutagona 'Ivauna 'ana vona'awaufaufa 'ada 'ita'ita'i faifaina 'a veveifufuyeni. Yana Veakutagona 'Ivauna kebu bani'odi ve'etoboda kilukilumidi, we'e mogitana i mai Yaubada 'Anu'anununa 'wainega. Tomotoganidi ve'etoboda kilukilumidi i geudi, 'adi vematavuloga i wafaotoga, we'e Yaubada 'Anu'anununa 'wainega tomotoga mia 'atumaina wata miamia-vagaina i veveluagai.

*Veakutagona 'Ivauna 'ai'aiwabu magemagetana.*

<sup>7</sup> ✱Yaubada yana ve'etoboda i kilumidi kileu 'waidie i 'anivelenedi Mosese 'waineye. Tutuyanina 'waineye yana mageta mataududulina i souyeni nika Mosese maigina i magetai. Magetanina 'akonadi i vevesiai siwe me Diu kebu 'adi fata Mosese maigina i na 'isadewai fai matadi

✱ 3:1: Fol 18:27

✱ 3:3: Sou 24:12

✱ 3:6: Ion 6:63; Lom 7:6

✱ 3:7: Sou

34:30; Gal 3:2-5

i 'ani'anidi. Yaubada yana ve'etoboda, 'asa'aiana yana Veakutagona Nagami, i souyeni yana mageta mataududulina taiadi, siwe tomotoganidi i geudi wafa i veluagai. <sup>8</sup> We'e Yaubada yana Veakutagona 'Ivauna i souyeniga 'Anu'anunu 'Atumaina 'wainega, vona mogitana 'ai'aiwabu wata mageta mataududulina bwaikaotogina i sousouyedi 'wainega. <sup>9</sup> \*Ve'etobodanidi 'adi togeu Yaubada i veimea 'adi vematavuloga wafa, siwe tutuyanina ve'etobodanidi i souyedi, Yaubada yana mageta mataududulina taiadi. We'e Yaubada yana Veakutagona 'Ivauna 'wainega i 'ive'atumaida yada sauluva matatabuna i tonova, vona mogitana Veakutagonanina toketokeotogina wata yana 'ai'aiwabu bwaikaotogina. <sup>10</sup> Fai tutuya de'e Yaubada yana Veakutagona 'ada 'ita'ita'i faifaina nani bwaikaotogina, ve'etobodanidi i maiga Mosese 'wainega mageta taiadi bani'odi i venani-'avo'avovo. <sup>11</sup> Ve'etoboda i mai mageta taiadi siwe 'a'a'avidu, we'e Veakutagona 'Ivauna, kumanina i na 'eno-vagata, vona mogitana naninina toketokeotogina wata yana 'ai'aiwabu bwaikaotogina.

<sup>12</sup> Fai 'a nuani mogitana Yaubada yana Veakutagona 'Ivauna 'ada 'ita'ita'i faifaina i na 'eno-vagata, 'ima yana tofolovavo yama lau'age 'waidie kebu 'a da ve'awamayamaya, ma yama venuafoufa'ala 'a veveifufu'a'aveni. <sup>13</sup> 'Ima kebu bani'odi Mosese. Kebu tamu vona 'a da giveni Veakutagona 'Ivauna faifaina. We'e Mosese, Yaubada yana mageta mataududulina maigineye i giveni. Maigina i baniumai kalekoyega bega me Isileli kebu 'adi fata magetanina i vevesiaiga i na 'iseni. <sup>14</sup> \*Kebu Mosese 'aisena maigina babaniumanaga, wata me Isilelinidi nuadi tabodadi. Tutuyanina 'wainega i maiga 'asiau Veakutagona Nagami 'ana lu'iwawa me Isileli kebu nuadi i da magemagetadi 'wa da vo baniumanina 'wainega nuadi i da baniumadi. Kebu tamu aitoi 'ana fata baniumanina i na si'a'ia i na taweni, 'aiseotogina Keliso 'ana fata. 'Ai'edi i na vetumagana Keliso 'waineye bega taiadi i na miave'itubama, baniumanina i na si'a'ia nika nuadi i na magetadi. <sup>15</sup> Kebu basenadi 'aisena, 'asiau wata, ve'etoboda i maiga Mosese 'wainega i na lu'iwawadi siwe nuadi kebu i da magemagetadi fai nuadi babaniumadi. <sup>16</sup> \*We'e 'ai'edi aitoi yana sakona 'wainega i na nuavilai 'Auvea 'waineye nuana 'ana baniuma i na si'a'ia.

<sup>17</sup> \*'Auveanina siwe 'asa'aiana 'Anu'anunu 'Atumaina. Aitoi i na agei 'waineye i na miamiaga, taunina yavuyavuna nani matatabuna i veimeyeniga 'waidiega. <sup>18</sup> 'Ida tovetu-

\* 3:9: Lom 3:21    \* 3:14: Lom 11:25    \* 3:16: Lom 11:23,26    \* 3:17: Ion 8:32,36; Lom 8:2; Gal 5:1

maganavo matatabuda Keliso nuada i kiavemagetadi 'wa da vo nuada 'adi baniuma i da si'a'idi nika 'ida nigo'ita bani'odi. Tomotoga 'adi 'isa'isa 'adi fata nigo'ita 'waineye i na 'iseni, wata bani'odi tomotoga 'adi fata 'Auvea yana 'ai'aiwabu magemagetana wata yana 'atumaina i na 'isedi 'waideye. 'Auveanina, taunina 'Anu'anunu 'Atumaina i 'i'idewada bega yana 'ai'aiwabu magemagetana wata yana 'atumaina i vevebwaika 'waideye wata ta vevetuli i na nago bega 'ida taunina bani'odi.

## 4

*Yaubada 'ana 'aseta 'waideye bani'odi 'ai'aiwabu.*

<sup>1</sup> Yaubada ma yana nuakalikali i venua'ivinema 'a vetolau'age Iesu Valana 'Atumaina faifaina, begaidi tutuyanina vita tulina tulina 'a veluagadi kebu 'a da baila. <sup>2</sup> ✧ We'e mogitana sauluva givagivadi wata 'eba bunumayaga 'a bailedi. Kebu tomotoga 'a da vekaliedi 'aseta-vekavekali 'waidiega wata Yaubada yana Vona kebu 'a da 'ivesakoi bega ve tulina 'wainega tomotoga nuadi 'a da 'ani'anidi. Mogitana Yaubada mataneyeye yana nuanua tonovidi 'a kikiavemagetadi tomotoga 'waidie bega 'adi vebae 'waidie i lutonovi yama ve vona mogitana. <sup>3</sup> Iesu Valana 'Atumaina 'a lulu'ageyeniga mogitana givagivana tomotoga 'ifwaidi 'waidie, tomotoganidi wafaotoga 'ana 'eda 'waineamo i nunagoi, 'aisedi kebu 'adi fata i na 'asetai. <sup>4</sup> ✧ Seitani, kumanina fwayafwaya 'ana yaubada sakoina, nuadi i 'ivetabodadi bega kebu i da vetumagana wata Vala 'Atumaina yana mageta kebu 'adi fata i na 'isa'inanai. Valanina, Keliso yana 'ai'aiwabu wata yana mageta mataududulina i sivemagesedi, We'e Kelisonina taunina mogitana Yaubada bani'odi. <sup>5</sup> 'Wa 'iseni, 'ima kebu taunima 'ama subia faifaina 'a da lalau'age, we'e mogitana Iesu Keliso faifaina 'a lalau'age 'a vo, Taunina 'ada Toveimea, we'e 'ima 'a vetofolovaga 'waimie taunina faifaina." <sup>6</sup> ✧ A vetofolovaga wata 'a lalau'agega fai Yaubada nuama i kiavemagetadi. Basenadiotoga dudubala'ava, bega Yaubada i vo, Mageta i na souyeni dudubala 'wainega," nika mogitana i magetai. Wata bani'odi Yaubadanina nuama i kiavemagetadi yana mageta 'wainega bega yana 'ai'aiwabu magemagetana 'a 'iseni Iesu Keliso maigina 'waineye. Yaubada yana 'ai'aiwabunina 'ana 'aseta 'waimeye bani'odi mageta.

<sup>7</sup> Wata yana 'ai'aiwabunina mataududulina 'ana 'aseta 'waimeye 'asa'aiana 'ama 'uyua. 'Ima mweama tomogoma bani'odi nau siwe 'ai'aiwabunina i dodogidi 'waimeye bega mali tomotoga i na 'isema i na 'asetai yama toketokena 'a

veluagai Yaubada 'wainega kebu taunima 'waimega. Toke-tokenanina bwaikaotogina, kebu 'ifwaidi bani'odiga. <sup>8</sup> Vita tulina tulina 'a veveluagadi siwe kebu 'a da 'awakuakualima, vitanidi faifaidi 'a vekoi siwe kebu yama vetumagana i da mwea. <sup>9</sup> Keliso 'ana gaviavo i nikenikema siwe kebu Yaubada i da bailemaga, 'eba ilagi bwaikidi 'a veveluagadi siwe kebu 'a da wafa. <sup>10</sup> Basenadi Iesu 'ana gaviavo 'waidiega vita wata veviga i veveluagadi, mulieta i luvewafai. 'Ima wata bani'odi vita 'a veveluagadi Iesu Valana faifaina, igodi nu-anuadi tomogoma i da luluwewafadi siwe vitanidi 'waidiega tomotoga fuedi i 'asetai Iesu mia 'ivauna wata 'atumaina 'adi to'anivelena. <sup>11</sup> ✧Yama mia matatabuna 'waidie 'eba wafa 'a veveluagadi Iesu faifaina. Igodi bei 'a da wafawafa siwe ma yawaima bega tomotoga 'ifwaidi tomogoma 'a'a'avidu i na 'isedi i na 'asetai Iesu miamia-vagaina tomogomeye i miamia. <sup>12</sup> 'Ana 'asetai side bani'odi. Fai 'a lalau'age Iesu Keliso faifaina 'ana gaviavo vita i vevelema igodi nu-anuadi i da luluwewafama, we'e 'omi yama lau'age 'waidiega Keliso Valana 'wa nogai, mia 'atumaina wata miamia-vagaina 'wa veveluagai.

<sup>13</sup> Tamu vona i 'eno'eno Yaubada yana Buki nageneye i vo, A vetumagana Yaubada 'waineye, begaidi a voneyeni.”

'Ima wata bani'odi 'a vetumagana begaidi yana vona 'a veveifufuyeni. <sup>14</sup> ✧Yaubada, kumanina 'ada Toveimea Iesu i sivetovoia wafayega, 'a 'asetai wata i na sivetovoima Iesu taiadi. Wata bani'odi 'omi i na sivetovoimi, 'omi wata 'ima taiadi i na vagavaida ta na nagoi mataneyeye. <sup>15</sup> 'Ama vitanidi matatabuna 'a veluagadi fai Iesu Valana 'Atumaina 'a lalau'age, siwe fai 'wa vetumagana Valanina 'waineye 'aivaita 'wa veluagai. Valanina i nunago tomotoga fuedi 'waidie Yaubada yana nuakalikali i veveluagai nika tovetumagana 'ada 'aila'a i vevefue. I vevefuega nika yada vekaiwa Yaubada 'ana subia i toke i vevebwaika-'afo'afo.

*'Ai'aiwabunidi 'awaie ta na veluagadiga vita i vebwaika-iawedi.*

<sup>16</sup> Fai 'awaie Yaubada i na sivetovoida Iesu taiadi, bega kebu 'a da vo, 'A baila.” Tomogoma yadi toketokena i mweamwea i na nagoga nika i na 'a'ava, we'e 'aiata 'aitamogana 'aitamogana 'anu'anunuma i 'i'ive'ivaudi. <sup>17</sup> ✧Vitanidi 'a veveluagadi nani siaina 'awaie i na 'a'ava, siwe 'waidiega 'ai'aiwabu magemagetana wata miamia-vagaina 'a na veluagadi, 'ai'aiwabunidi bwaikaotogidi, kebu bani'odi 'ama vita. <sup>18</sup> ✧Begaidi naninidi 'a veveluagadi fwayefwayeye 'a 'isamata'aliliedi, we'e naninidi kebu ta da 'ise'isediga

faifaidi 'a nuanua. Naninidi ta 'ise'isediga 'a'a'avididi 'awaie i na 'a'ava, we'e naninidi kebu ta da 'ise'isediga i na 'eno-vagata.

## 5

*Faulo nuanuana tomogona 'ivauna abamega i na veagei.*

1 \*Vitanidi 'a veveluagadi kebu faifaidi 'a da nuanua fai 'a 'asetai fwayefwayeye tomogoda bani'odi vadavada, 'awaie wafa 'ana tutuye i na 'awageudi. Mogitana ta na wafa tomogoda ta na bailedi, siwe tomogoda 'ivaudi wata miamia-vagaidi i 'eno'enovi abame, tomogodanidi kebu tomotogaotoga 'adi 'idewadewa, Yaubada taunina i 'idewadi. 2 \*Tutuya de'e tomogodanidi 'waidiega ta 'abiawa ta veve'awagusi, nuanuada bwaikina tomogoda abamega i na veageda. 3 Tomogoda 'ivaudi i na veagedaga 'ida kebu 'anu'anunu'avaga, ma tomogoda. 4 \*Fwayefwayeye ta miamia tomogodanidi de'e 'waidie vita ta veveluagadi ta veve'awagusi 'wa da vo venuana vitadi ta da evaevadi. Ta veve'awagusiga, kebu ta da vo, Tomogodanidi ta na bailedi," we'e mogitana nuanuada ma yawaida tomogoda abamega i na veageda bega mia 'ivauna wata miamia-vagaina tomogoda 'a'a'avididi i na talafwasedi. 5 \*Ta na vetuliga faifaina Yaubada tauniotogina i 'idewada, 'Anu'anununa i tauyeni i ageda yada 'eba 'isa 'awaie 'ada veuveuta tomogoda 'ivaudi taiadi ta na veluagadi.

6 \*Fai 'Anu'anunu 'Atumaina i ageda, 'ima Yaubada yana tofolovavo kebu 'a da kolologa, tutuya matatabuna 'a vevenuafoufa'ala. 'A 'asetai fwayafwaya de'e 'waineye tomogomanidi 'waidie 'a vevevanuga, 'ani'idina 'Auvea 'wainega 'a miamia. 7 Naninidi 'awaie 'a na veluagadiga kebu 'a da 'ise'isedi, siwe yama mia matatabuna 'waidie 'a vetumagana Yaubada 'waineye. 8 \*Mogitana 'a venuafoufa'ala, kebu wafa faifaina 'a da kololo. Nuanuama bwaikina tomogoma 'a na bailedi, 'a na vevanuga 'Auvea 'waineye. 9 Siwe yama nuanua bwaikaotogina nani 'aitamogana faifaina. Naninina nuanuama 'Auvea i na sosoana faifaima, we'e 'ai'edi 'a na vevevanuga tomogomeye 'alo 'a na 'iawedi 'a na nago 'waineye taiadi 'a na miamia, kebu tamu ava'ai. 10 \*Nuanuama Yaubada faifaima i na sosoana fai i lubwaineda 'awaie matatabuda ta na tovoi Keliso mataneyeye ta na vonayavuga. I na veimea 'aitamogana 'aitamogana 'ada tutula ta na 'ewa yada sauluva fwayefwayeye faifaidi, 'adi 'isa'isa bani'odi, 'atumaidi 'alo sakoidi.

\* 5:1: 1 Kol 15:47-49    \* 5:2: Lom 8:23    \* 5:4: 1 Kol 15:53    \* 5:5: Lom 8:16,23    \* 5:6: Ibu 11:13-14    \* 5:8: Fil 1:23    \* 5:10: Lom 2:16



*Keliso yana wafa 'wainega ta veiana Yaubada taiadi.*

<sup>11</sup> Fai 'awaie tutula ta na veluagai Keliso 'wainega ma yama ve'ililibu 'Aueva 'a koloyeni, begaidi yana vona 'a veveifufuyeni tomotoga 'waidie, nuanuama bwaikina ma yadi vetumagana taunidi i na tauyedi 'waineye. Yaubada yama sauluva matatabuna i 'asetadi, nuanuaku 'ami vebae 'waidie 'omi wata 'wa na lutonovi yama nuanua tonovidi. <sup>12</sup> Voke 'ifwaimi 'wa na vo, Faulo ma enavo 'adi subia faifaina taunidi i awa'ai'ai'di basenadi bani'odi." Siwe kebu. Nuanuama 'a na tolinuata'i 'waimie yama sauluva faifaidi bega 'ami fata 'wa na subiyama mali tomotoga 'waidie. Tomotoga 'ifwaidi 'waimie 'adi 'isa faifaidi taunidi i awa'ai'ai'di, siwe yadi sauluva kebu i da nuanidi. Tutuyanina taunidi i na awa'ai'ai'di 'ami fata yama sauluva tonovidi 'wa na lu'ivona toawa'ai'ainidi 'waidie. <sup>13</sup> 'Ai'edi 'ifwaimi 'wa na vo, Faulo ma iana nuadi 'anigaugaudi," bani'odi 'wa na vonevoneyediga 'asa'aiana siwe fai Yaubada nuama i 'ewadi 'a toke 'a folofolova faifaina. 'Ai'edi 'wa na vo, Faulo ma iana nuadi magemagetadi," bani'odi 'wa na voneyediga 'wa vona mogitana fai ma yama 'aseta 'a ve 'waimie, 'aivaita 'wa veluagai. <sup>14</sup> Keliso yana nuakalikali faifaida i lulukakadema yama sauluva matatabuna i veveimeyedi. I veveimeyema fai 'a 'asetai Keliso 'aiseotogina i wafa tomotoga matatabuda faifaida, begaidi matatabuda ta wafa taiadi. <sup>15</sup> \*I wafaga matatabuda faifaida bega egavo ma yawaidi i miamianiga, kebu taunidi yadi nuanua i na 'i'idewadi, we'e mogitana Keliso 'aisena yana nuanua nuadi i na 'ewai, Kelisonina kumanina faifaidi i wafa wata i tovoi-vaitugana.

<sup>16</sup> Basenadi tomotoga 'adi 'isa 'waidiega 'a awavesakoyedi 'alo 'a awave'atumaiedi, we'e tutuya de'e kebu wata bani'odi 'a na voneyediga. Wata bani'odi basenadi Keliso 'ana 'isa 'wainega 'a vo, Taunina tomogo-'avo'avovo," tutuya de'e 'a 'isa'inanai taunina 'ada Toveimea. <sup>17</sup> \*'Ai'edi aitoi Keliso taiadi i na miave'itubama, 'akonadi Yaubada i 'ive'ivauya, yana nuanua nagami sakoidi i 'a'ava, ma'itufa yana mia 'ivauna nuanua 'ivaudi taiadi i souyedi. <sup>18</sup> \*Ve'ivaunina nuanua 'ivaudi taiadi Yaubada i 'idewadi. Basenadi 'ida Yaubada 'ana gaviavo, siwe Keliso yana wafa 'wainega i veianeda, wata folova i velema bega tomotoga 'a vonevonedidi bani'odi i na munega bega wata i na veiana Yaubada taiadi. <sup>19</sup> \*A vonavonaga side bani'odi 'a vo, Yaubada Keliso i voneni i mai fwayefwayeye yana wafa 'wainega yada sakona i tovoiedi begaidi i veianeda. Vematavuloga kebu i da veleda yada sakananidi faifaidi i veve'ise'isedamo wata i nuatavunida.

Vala, veiana faifaina Yaubada i tauyema 'a lalau'age tomotoga 'waidie.

<sup>20</sup> Begaidi 'ima Keliso tutulina 'a lulu'ivona faifaina 'wa da vo Yaubada tauniotogina i da toke i da vonavona 'waimega. Keliso 'ana wagavayega 'a vevelu'ui 'waimie, nuanuama taunimi 'wa na tauyemi Yaubada 'waineye i na veianemi.

<sup>21</sup> \*Keliso kebu tamu yana sakonaga siwe Yaubada yada sakona matatabuna i 'ewadi Keliso i ve'ewai bega Yaubada yana nuasako wata 'ada vematavuloga i tovoiedi. Yada sakonanidi i tovoiedi bega 'ida ta miave'itubama taunina taiadi Yaubada yana 'atumaina i 'aniveleneni 'waideye nika ta ve'atumi mataneye.

## 6

<sup>1</sup> 'Ima Yaubada yana tofolovavo taunina taiadi 'a folofolova begaidi wata 'a na vonemi. Yaubada yana nuakalikali 'wa veluagaiga, kebu 'wa na venani-'avo'avovoyeniga. <sup>2</sup> \*Fai Yaubada yana Vona i 'eno'eno yana Buki nageneye i vo,

Tutuyanina a vo, Nuanuaku 'wa na mai 'waikuye," bonami a nogaidi.

'Aiatanina 'waineye a vo, A na 'ita'ita'iemi," bei a 'ivaisemi."

We'e yau Faulo a na vonemi, tutuya de'e Yaubada nuanuana 'wa na nagoi 'waineye, 'asiau nuanuana i na 'ita'ita'iemi.

### *Faulo vita fuedi i veluagadi.*

<sup>3</sup> Yama sauluva matatabuna 'a 'i'isave'avinidi, i na nunago tamu aitoi yama sauluva i na 'iseni i na vo, Faulo igodina Yaubada yana tofolova siwe i sakosakona, begaidi Kelisonina i vonevoneyeniga a baila." 'Ai'edi bani'odi tomotoga 'a na kiavebe'udiga, mali tomotoga yama folova i na awavesakoyeni.

<sup>4</sup> We'e mogitana nani matatabuna 'waidie 'a veve 'ima Yaubada yana tofolovavo. Naninidi side. Vita tulina tulina 'a veveluagadi 'eba nuavita taiadi siwe 'a tokemaigema.

<sup>5</sup> Tomotoga i nikenikema, i yatoyatoma vanuga 'eba yogona 'waidie, wata 'ama daba i dabadaba. Fai 'ima Yaubada yana tofolovavo 'a toke 'a folofolova kebu 'a da veveawai, lovane kebu 'a da 'enodewadewa wata tutuya fuedi ma 'ama lase. <sup>6</sup> \*Wata yama sauluva tonovidi 'waidiega, yama 'asete 'waidiega, yama tokemaiga mali tomotoga faifaidi 'waidiega, wata yama 'anivelenena 'waidiega 'a veve 'ima yana tofolovavo. Wata fai 'Anu'anunu 'Atumaina i agema wata ma yama nuakalikali taunima 'a tauyema tomotoga 'waidie. <sup>7</sup> Yama vona 'adi nogaya tonovidi 'waidiega 'a veve 'ima Yaubada

yana tofolovavo wata fai yana toketokena i 'i'ivaisema nani

matatabuna 'waidie. Tolugavia 'adi 'atagiega yadi 'ibadi, we'e 'adi wamayega yadi babala. 'Ima wata bani'odi, Yaubada yana nuanua tonovidi 'asa'aiana yama 'eba vetalaga wata yama 'eba vetoketoke. <sup>8</sup> Tomotoga 'ifwaidi i ve'ililibuyema, we'e 'ifwaidi i awadamana 'waimeye. 'Ifwaidi i subياما, 'ifwaidi i yagaima. Yama vona matatabuna tonovidi, siwe 'ifwaidi i vo, I vevekali.” <sup>9</sup> \*Tomotoga 'ifwaidi yadi nuanua 'ima tomotoga-'avo'avovo, we'e Yaubada wata yana tomotoga taiadi, 'waidie ma 'ama 'aseta. I nikenikemaga 'ifwaidi i vo, I na wafa,” siwe kebu, ma yawaima 'a miamia. 'Eba ilagi 'a veveluagadi siwe kebu 'a da wafawafa. <sup>10</sup> \*Ma yama nuavita 'a miamia siwe tutuya matatabuna Yaubada i kiki-avesosoanima. 'Ama 'isa 'waidiega 'ima 'a vewekowekoma, siwe yama lau'age 'waidiega tomotoga fueidi i ve'ai'aiwabu Yaubada yana nuanua 'waidiega. 'Ana 'isa 'ima kebu tamu ava'ai 'waimeye i da 'eno'eno, we'e mogitana nani fueidi Yaubada yana 'anivelena 'waimeye i 'eno'enovi.

<sup>11</sup> Emavo, 'omi me Kolinita, kebu tamu nani 'a da giveni 'waimiega, nani matatabuna 'a veifufu'a'avedi, wata 'a nuakalikaliemi bwaikina. <sup>12</sup> Yama nuakalikali 'waimie kebu givagivana, we'e 'omi yami nuakalikali 'waimeye 'a lulualawayogeni. <sup>13</sup> A vonevonemi 'omi 'wa da vo natukwavo mogitana, nuanuama ma yami nuakalikali taunimi 'wa na tauyemi 'waimeye, 'ima 'a nuakalikaliemiga bani'odi.

*Tovetumagana wata taunidi kebu i da vetumagana kebu taiadi 'wa na miave'itubama.*

<sup>14</sup> \*Tomogo manamanawena wata kwamana siaina kebu 'adi fata venuana i na 'ifafuli, wata bani'odi tovetumagana wata taunidi kebu i da vetumaganaga kebu 'adi fata taiadi i na miave'itubama. 'Wa da nuani? 'Ana fata nuanua tonovidi wata sakona taiadi i na veiana? Bani'odi mageta nuanuana dudubala? Kebu'a'ava, kebu tamu sai'afo bani'odi. <sup>15</sup> 'Wa da nuani, Keliso Seitani yana nuanua 'ana fata i na awave'atumaieni? Tovetumagana wata taunidi kebu i da vetumaganaga, 'adi fata taiadi i na ve'au? 'A nuani yadi nuanua kebu i da vesala. <sup>16</sup> \*'Ana fata tomotoga i na 'odu'odu tamu nani 'waineye Yaubada yana vanuga 'eba velu'ui nageneye? Kebu'a'ava, fai 'ida Yaubada Miamia-vagaina yana 'eba mia, begaidi side bani'odi Yaubada i voneyedi yana Buki nageneye i vo,

Tomotoganidi 'waidie a na vevanuga, taiadi 'a na miamia. Yau yadi Yaubada, we'e taunidi yaku tomotoga.”

<sup>17</sup> \*Fai 'Auvea i vevanuga 'waideye begaidi wata i vo, Tosakona 'wa na bailedi, 'wa na 'awa'idimi 'waidiega.

Naninidi a talabodediga kebu 'wa na 'abitonovidi, nika a na vagavaimi 'wa na maia 'waikuye.

<sup>18</sup> ✨Yau tamami, we'e 'omi natukwavo iavetami wata vevinemi.

Yau 'Auvea Toketokeotogiku yaku vona side bani'odi.”

## 7

<sup>1</sup> ✨Ekwavo, vona'awaufaufanidi ta veluagadi Yaubada 'wainega begaidi i lubwaineda naninidi tomogoda wata 'anu'anunuda i 'ivesakodi ta na bailedi. Ta ve'ililibuga Yaubada 'waineye begaidi ta na vewavawava yada sauluva i na ve'atumaiotoga, kebu tamu sakona i na 'eno'eno.

*Faulo yana sosoana.*

<sup>2</sup> Nuanuama ma yami nuakalikali taunimi 'wa na tauyemi 'waimeye. Kebu tamu aitoi 'waineye 'a da vesauluva sakoina, kebu tamu aitoi 'a da vekalieni i da sakona, kebu tamu aitoi yana kukua 'a da eloi vekaliega. <sup>3</sup> Mogitana tomotoga 'ifwaidi bani'odi i awavesakoyeku siwe kebu nuanuaku a na vevitami 'wa vonaga bani'odi. Basenadi a vonemi wata a na luvaitugani, yama nuakalikali 'waimie bwaikina. 'Ai'edi taiadi ta na miamia 'alo ta na wafa kebu tamu ava'ai, siwe tutuya matatabuna 'a nuanuanimi. <sup>4</sup> Ma yaku vetumagana a nuani mogitana 'wa na tovoi fa'alina, ma yaku sosoana a awa'ai'aimi mali tomotoga 'waidie. Fai valami 'ana nogaya 'atumaina 'waikuye 'ama vita 'waidie 'wa kiavesosoaniku, yaku sosoananina kebu ta na vona.

<sup>5</sup> Tutuyanina 'a le'wa 'awalawa Masidonia, bei wata vita 'a veluagadi. Kebu tamu tutuya 'a da veawai vitanidi 'waidiega i veluboda'a'avema. 'Ama tovedumwe'ai'ai nuanuadi taiadi 'a na ve'ikwayekwayega we'e 'ima 'a venuafouviga 'omi tovetumaganavo faifaimi i na nunago Keliso 'wa na baileni.

<sup>6</sup> ✨We'e Yaubada, taunina tonuavita nuadi 'adi to'ive'atumai bega i kiavesosoanema Taito 'wainega, tutuyanina i le'wa 'a 'iseni 'a sosoana. <sup>7</sup> Kebu yana mai 'aisena faifaina 'a da sosoana, siwe wata 'a sosoana fai 'omi Taito 'wa kiavesosoani. I lu'ivona 'waimeye 'wa nuakalikalieku faifaina, ma yami nuavita 'wa nuavilami yami sakona 'waidiega, wata nuanuami ma yami dumwebika yaku nuanua 'wa na 'i'idewadi. Begaidi a sosoana-'afo'afo faifaimi.

<sup>8</sup> Mogitana 'wa nuavita letanina basenadi a kilumi 'waimie faifaina, siwe kebu yaku nuanua a na sivilai a na vo, Awale bani'odi a kilumedi?” Nagami a nuavita letanina faifaina fai a 'asetai yaku vonanidi toketokedi 'waidiega 'wa nuavita, siwe kebu bei 'wa da nunuavitaga, 'akonadi i 'a'ava. <sup>9</sup> We'e yau, tutuya de'e a sosoana, siwe kebu a kiavenuavitamiga

faifaina, a sosoana fai yami nuavitanina 'wainega 'wa nuavilami nika yami sauluva 'wa siviladi. 'Wa nuavitaga Yaubada nuanuana 'ami 'aivaita faifaina, bega vita kebu 'wa da veluagai yaku vonanidi a kilumidiga 'waidiega. <sup>10</sup> ✧ 'Wa nuavitaga nani 'atumaina, fai nuavitanina Yaubada nuanuana, 'wainega nuavilana i souyeni i na nagoga 'ita'ita'i 'wa na veluagai. Nuavilananina faifaina kebu nuanuada nuada ta na siviladi. We'e tomotoganidi fwayafwaya 'ana nuanua nuadi i 'ewadiga, i na nuavitaga kebu i na nuaviladi i na nagoga nika i na wafaotoga. <sup>11</sup> Yami nuavitanina 'wainega, ava'ai Yaubada i 'idewaiga 'akonadi 'wa 'iseni. 'Wa dumwebika faifaina, nuanuami bwaikina mali tomotoga i na 'isemi yami sauluva 'akonadi i tonova. Sakonanina 'waimie faifaina 'wa bunumayaga bwaikina, wata nuafoumi i veviga vematavuloga faifaina. Wata yami nuavitanina 'wainega yami nuakalikali faifaiku i souyeni, we'e ma yami tokemaiga tosakona tamu 'waimiega vematavuloga 'wa veleni. Yami sauluvanidi i ve, 'akonadi nani matatabuna 'wa kiavetonovidi, kebu tamu aitoi 'ana fata i na vevitami. <sup>12</sup> Letanina basenadi a kiluma i waiga, tosakona wata tomotoganina vita i veluagai tosakonanina 'wainega, kebu 'aisedi faifaiddi. Siwe wata a kilumaga, yaku nuanua bwaikina nuanuaku a na 'ivaisemi nika Yaubada mataneye 'wa na 'asetai 'wa nuakalikaliema. <sup>13</sup> Naninidi 'waidiega nuama i ve'atumai wata 'a sosoana.

Mogitana 'a sosoana yami sauluvanidi faifaiddi, siwe wata 'a sosoana bwaikina fai Taito 'wa kiavesosoani yami sauluva 'atumaidi 'waidiega. <sup>14</sup> Basenadi Taito 'waineye a awa'ai'aimi. A awa'ai'aimiga i lubwaineni fai tutuyanina Taito i wai yami sauluva 'atumaidi i 'isedi, faifaiddi i sosoana, we'e yau kebu a da bunumayaga a subiamiga faifaina. Yama vona matatabuna 'waimie vona mogitana, wata bani'odi yaku subianina faifaiddi 'ana mogitana i souyeni. <sup>15</sup> Matatabumi ma yami kololo wata ma yami ve'ililibu Taito taiadi 'wa veluaga wata taunimi 'wa tauyemi yana nuanua 'wa vematayakeyakedi, begaidi tutuya de'e yami sauluvanidi i nuanuanidi nika yana nuakalikali faifaiddi i vevebwaika. <sup>16</sup> Wata fai a nuani mogitana bola 'wa vevematayakayaka a sosoana bwaikina.

## 8

*Faulo i veifufu 'anivelena-maimaiga faifaina.*

<sup>1</sup> ✧ Emavo, nuanuama 'wa na 'asetai Yaubada ma yana nuakalikali i vesuluva 'atumaina tovetumaganavo 'adi 'aila'a

tulina tulina 'waidie, Masidonia nageneye. Yana nuakalalinina 'wainega me Masidonia i 'a'aivaita. <sup>2</sup> Tomotoganidi vita fuedi i veluagadi 'adi sailubu, siwe i sosoanamo. Avinodi i vewekowekoma mogitana siwe yadi 'anivelena-maimaiga bwaikaotogina. <sup>3-4</sup> \*Yau a 'asetadi bega a na lu'ivona 'waimie, ava'ai 'waidie 'ana fata bani'odi i yato, siwe wata nuanuadi i 'imoso'i nika taunidi faifaidi i 'usa. Taunidi yadi nuanuayega i velu'uiema, nuanuadi bwaikina 'a na tauyedi mali tovetumaganavo taiadi, Yaubada yana tomotoga i vewekowekomaga i na 'ivaisedi. <sup>5</sup> 'Ima nagami 'a nuani 'a vo, Me Masidonia i na 'anivelena-maimaiga," siwe kebu nimadiega 'aisena. Nagami Yaubada yana nuanua bani'odi taunidi i tauyedi 'ada Toveimea Iesu 'waineye wata 'ima 'waimeye. <sup>6</sup> Me Masidonia yadi sauluva 'a 'iseni begaidi Taito 'a voneni 'a vo, Basenadi 'u veifufu me Kolinita 'waidie 'anivelena-maimaiga faifaina i velamu i yatoyato. Nuanuama wata 'u na nago 'waidie 'u na 'ivaisedi i na ve'a'avai nika ta na 'isedi ta na 'asetai ma yadi nuakalikali." De'e bani'odi Taito 'a vonenina i wai. <sup>7</sup> \*Omi 'wa kumeta nani fuedi wata 'atumaidi 'waidie. Yami vetumagana fa'alina, yami vona 'adi nogaya 'eba nua'ewa, yami 'asetai bwaikidi, ma yami dumwebika 'wa 'a'aivaita, wata 'wa nuakalikaliema mogitana. Nuanuama wata 'wa na kumeta ma yami nuakalikali 'wa na 'anivelena-maimaiga.

<sup>8</sup> De'e kebu a da veveimeyemiga. Me Masidonia yadi dumwebika a veifufuyedi 'waimie, bega yami 'anivelena-maimaiga 'a na 'iseni 'a na 'asetai 'wa nuakalikali mogitana tomotoganidi bani'odi 'alo kebu. <sup>9</sup> \*Akonadi 'wa 'asetai 'ada Toveimea Iesu Keliso yana nuakalikali. Taunina nagami 'ai'aiwabuna siwe 'omi faifaimi i vewekowekoma bega yana vewekowekoma 'wainega i 'ive'ai'aiwabumi Yaubada faifaina. 'Omi wata bani'odi taunimi 'wa na tauyemi 'wa na 'anivelena.

<sup>10</sup> Yami 'anivelena-maimaiga faifaina, yaku nuanua a na veifufuyeni 'waimie. Ava'ai 'wa velamuyaga malamala i 'a'ava 'waineye, 'ai'edi tutuya de'e 'wa na ve'a'avaiga, 'atumaina. 'Omi 'aila'aniami 'wa kumeta 'wa yato, we'e mali tovetumaganavo i vemuli. 'Wa kumetaga kebu yato 'aisena faifaina, siwe wata 'wa kumeta 'anivelena-maimaiga 'ana nuanua 'wa 'idewai, 'ifwaidi i vemuli. <sup>11</sup> Begaidi, tutuya de'e nuanuama folovanina 'wa 'i'idewaiga 'wa na ve'a'avai. Folovanina 'wa venua'ivinini ma yami dumwebika 'wa velamuyaga, wata ma yami dumwebika 'wa na ve'a'avai. Ava'ai 'waimie i 'eno'enoviga 'waidiega 'wa na ve'a'avai. <sup>12</sup> \*Ai'edi nuanuami ma yami dumwebika ava'ai 'waimie i 'eno'enoviga 'waidiega

'wa na 'anivelena, yami nuakalikalinidi Yaubada yana 'eba sosoana. We'e Yaubada kebu i da vo, Naninidi kebu 'waimie i da 'eno'enoviga, 'waidiega 'wa na 'anivelena-maimaiga.”

13-14 ✧Kebu nuanuama mali tomotoga ve'ai'a iwabu i na veluagai 'waimiega we'e 'omi ma'itufa 'wa na vewekowekoma. We'e mogitana fai tutuya de'e sai'afomo'so'ina 'waimie, nuanuaku 'wa na yato tomotoganidi i 'usaga faifaiddi, mulieta 'ai'edi 'omi 'wa na 'usaga we'e taunidi 'waidie moso'ina i na 'ivaisemi. Bani'odi 'wa na vesauluvediga yami mia i na vesala kebu aitoi i na laka we'e aitoi i na obu. 15 ✧Tamu vona i 'eno'eno Yaubada yana Buki nageneye ta na ve'ivaivaita bega yada mia i na vesala faifaina i vo,

Tomotoganidi 'ani'ani bwaikina i kwakwa, kebu tamu i da luvegelaleni.

We'e tomotoganidi 'ani'ani siaina i kwakwa, 'asa'aiana 'adi 'etowava.”

Wata bani'odi ta na ve'ivaivaita yada 'anivelena-maimaiga 'waidiega bega yada mia i na vesala.

*Taito i na nago me Kolinita 'waidie 'anivelena-maimaiga i na 'ewai.*

16 ✧A vekaiwa bwaikina Yaubada 'waineye fai yaku nuanuananina 'ami 'aivaita faifaina i venuayato Taito 'waineye bega taunina i tauyeni i na wai 'ami 'aivaita faifaina. 17 Tutuyanina 'a voneni i na wai 'waimie, ma yana sosoana i nogayema. I nogaya, siwe fai wata nuanuana bwaikina i na 'ivaisemi bega i na wai. 18 Wata iada tamu 'a na vetunei Taito taiadi, tomogonina ma 'ana ve'ililibu tovetumaganavo 'adi 'aila'a matatabuna 'waidie. I 'asetai taunina todumwebika Iesu Valana 'Atumaina 'ana lau'age 'waineye. 19 Kebu ve'ililibu 'aisena faifaina, siwe wata tovetumaganavo i venua'ivineni nuanuadi taiadi 'anivelena-maimaiga 'a na 'ewai 'a na naweni. De'e folovanina 'a 'i'idewai 'Auvea 'ana subia faifaina wata 'wainega 'wa na 'asetai nuanuama 'a na 'ivaisemi. 20 Yama nuanuananina 'a 'idewaiga ma fuema taiadi 'a na nagoi bega 'ama fata de'e 'anivelena-maimaiga bwaikina 'a na 'i'isave'avini, kebu nuanuama tamu aitoi i na fali-vivinagoyema. 21 Nuanuama 'Auvea mataneye yama sauluva tonovidi mani 'ana 'isave'avina faifaina, kebu 'aisena mataneye, wata tomotoga matadie.

22 Wata iada tamu 'adi vetonu 'a voneni taiadi i na wai, tutuya fuedi yana folova 'wainega 'a 'iseni 'a 'asetai taunina todumwebika nani fuedi 'waidie. We'e tutuya de'e, fai i nuani mogitana 'wa na vematayakayaka nuanuana bwaikina i na 'ivaisemi. 23 We'e Taito, taunina 'aku 'au taiadi 'a folofolova

'ami 'aivaita faifaina, we'e edavonidi 'adi 'ailuga taiadi i na waiga, taunidi tovetumaganavo 'adi 'aila'avo tutulidi, 'adi wagavayega i na wai, yadi folova tomotoga i na 'isedi Keliso i na subiai. <sup>24</sup> \*Taiadi 'wa na miamianiga 'wa na vevesauluva 'atumaina 'waidie nika i na 'asetai 'wa nuakalikaliedi, wata naninidi faifaidi 'a awa'ai'aimiga 'wa na 'i'idewadi nika tovetumaganavo 'adi 'aila'a tulina tulina i na 'isemi i na ve'awamogitana.

## 9

*Yaubada nuanuana ma yada sosoana ta na 'anivelena-maimaiga.*

<sup>1-2</sup> \*A 'asetami ma yami dumwebika nuanuami 'wa na 'anivelena-maimaiga tovetumaganavo 'adi 'aivaita faifaina, begaidi kebu i da lubwaineku faifaina a na kiluma manamanawena 'waimie. A awa'ai'aimi me Masidonia 'waidie a vo, Me Kolinita wata 'ifwaidi tovetumaganavo 'awalawa Gulisi nageneye taiadi, malamala i 'a'avaga 'waineye yadi nuanua i 'idewai 'anivelena-maimaiga faifaina.” Yami dumwebika valana me Masidonia i nogai, nika sai'afo matatabudi wata i dumwebika 'anivelena-maimaiga faifaina. <sup>3</sup> Yama awa'ai'ainina kebu nuanuama i na vo, I vekali,” begaidi edavo 'adi 'aitonu a vonedi i na waia bega yadi 'aivaita 'wainega yami 'anivelena-maimaiga 'wa na yato. Tutuyanina 'a na wai 'a na 'isemi yami 'aivaitanina 'wa 'idewai i 'eno'eno, basenadi a vona bani'odi. <sup>4</sup> 'Ai'edi me Masidonia 'ifwaidi taiadi 'a da waiga 'waimie 'a da 'iseni kebu 'wa da yatoga 'ima 'a da bunumayaga 'a vetumaganemiga faifaina, we'e 'omi 'wa da bunumayagaotoga. <sup>5</sup> Fai kebu nuanuama ta na bunumayaga begaidi a nuanina edavo a vonedi i na kumeta i na waia bega yadi 'aivaita 'wainega yami 'anivelena-maimaiga basenadi faifaina 'wa vona'awaufaufa 'wa na 'idewai i na 'eno'eno. Mulieta tutuyanina 'a na waiga 'a na 'isenina nika 'a na 'asetai 'omi to'anivelena, we'e kebu nuanuaku 'a na wai 'a na lueloelomi.

*Ta na yatoga bwaikina wata bwaikina ta na veluagai.*

<sup>6</sup> \*Ana 'asetai side bani'odi, 'ai'edi aitoi waifei siaina i na koyovi, wata 'aiala 'waineye 'ani'ani siaina i na veluagai. We'e 'ai'edi aitoi waifei bwaikina i na koyovi, wata 'aiala 'waineye bwaikina i na veluagai. <sup>7</sup> Begaidi i lubwaineni tomotoga 'aitamogana 'aitamogana yana nuanua 'waineye i tauyeniga bani'odi i na yato. Kebu ma yana nualolo 'wainega i na yato wata kebu lukakada 'wainega, we'e mogitana ma yana sosoana i na 'anivelena, fai egavo ma yadi sosoana i



'a'anivelena, Yaubada i nuakalikaliedi. <sup>8</sup> Naninidi 'waidie 'wa ve'ale'usa, Yaubada 'ana fata i na vevelele mi nika tutuya matatabuna 'ami fata, siwe wata ma 'adi 'imoso'i bega 'ami fata 'waidiega tomotoga fue di 'wa na 'i'ivaisedi. <sup>9</sup> ✱ Tamu vona i 'eno'eno Yaubada yana Buki nageneye to'anivelena faifaidi i vo,

Yana nuakalikasi fue di i luyavuyavuledi wekówekoma 'waidie.

Yana sauluvanidi tonovidi 'adi nuanua kebu i na 'a'avaga i na 'eno-vagata.”

<sup>10</sup> ✱ Yaubada waifei i veleda bega 'ada fata ta na koyova, taunina 'adi tokiavevuaga nika 'ani'ani ta veveluagadi. Wata bani'odi Yaubada i na 'a'anivelena 'waimie wata naninidi i na 'i'imoso'iedi i na nagoga yami 'anivelena vuagidi i na veveb-waika. <sup>11</sup> Yaubada i na 'i'ive'ai'aiwabumi nani matatabuna 'waidiega bega tutuya matatabuna 'wa na 'a'anivelena nika tomotoga fue di i na vekaiwa Yaubada 'waineye yami nuakalikalini di faifaidi. Nuakalikalini di 'a na 'ewadi 'waimiega mali tomotoga 'a na veledi.

<sup>12</sup> Yami 'anivelena-maimaiga 'wainega nani 'ailuga 'atumaidi i sousouyedi. Tamu, Yaubada yana tomotoga ava'ai 'waidie i 'usaga 'wa 'i'ivaisedi, 'ana veluaga, tomotoga fue di Yaubada 'waineye i vevekaiwa nuakalikalini di faifaidi. <sup>13</sup> Tomotoga fue di yami 'anivelena-maimaiga i na 'iseni Yaubada i na subiai i na vo, Me Kolinita Keliso faifaina i lulu'ivona, siwe wata i vevematayakeyakeni. Yadi vematayakayakanina vuagina ta 'iseni i 'a'anivelena 'waideye wata mali tovetumaganavo 'waidie.” <sup>14</sup> Tomotoganidi ma yadi nuakalikasi i na vevelu'ui faifaimi fai 'ami nuakalikasi bwaikaotogina Yaubada i velemiga, 'waidiega 'wa 'ivaisedi. <sup>15</sup> We'e Yaubada, Natuna i 'aniveleneni 'waideye, yana nuakalikalini di bwaikaotogina kebu ta na vona, begaidi ta na subiai.

## 10

*Faulo i veifufu me Kolinita 'waidie 'ana awavesako faifaina.*

<sup>1</sup> ✱ Ekwavo, yau Faulo, tauniotogiku a na vonemi. Keliso yana sauluva bikana wata yana nuaobu a na saladi, 'waidiega a na velu'ase'ase mi. Tomotoga 'ifwaidi i vo, Faulo taiadi ta miamiaga 'awana umaumana kebu i da toke i da vonavona, we'e tuliniga kebu i da kolokolologa i toke i vonavona.”

<sup>2</sup> ✱ Siwe a nuani tutuyanina a na wai 'waimie, tomotoga 'ifwaidi taiadi 'wa miamianiga 'waidie a na toke a na vona,

✱ 9:9: Same 112:9 ✱ 9:10: Ais 55:10; Ose 10:12 ✱ 10:1: 1 Kol 2:3 ✱ 10:2: 1 Kol 4:21

tomotoganidi yadi nuanua igodina 'ima Yaubada yana tofolovavo 'a da vevesauluva Yaubada 'ana tobavu bani'odi. A vevelu'ui 'waimie, kebu nuanuaku 'wa na silubuku yami sauluva sakoidi 'waidiega i na nunago 'omi wata a na toke a na vonemi. <sup>3</sup> Mogitana 'ima tomotogaotoga fwayafwaya tabwaneye ta miamiani, siwe Yaubada faifaina 'a vevetalaga sakona taiadi, we'e yama vetalaganina kebu Yaubada 'ana tobavu bani'odiga. <sup>4</sup> \*Kebu tomia fwayafwaya yadi kukua 'eba vetalaga 'waidiega 'a da vevetalaga, we'e mogitana Yaubada yana 'eba vetalaga toketokedi 'waidiega 'ama fata Seitani yana 'eba veimea toketokedi 'waidie 'a na vetoketoke. Side bani'odi 'a vevetoketoke 'waineye. <sup>5</sup> Yaubada yana 'eba vetalaganidi 'waidiega fwayafwaya 'ana nuanua tomotoga nuadi i 'ewa'ewadiga 'a sisiviladi 'a vetoketoke 'waidie. Yaubada 'ana tovedumwe'ai'ai 'ana 'aseti i sibodeni nualaka tulina tulina 'waidiega bega mali tomotoga kebu 'adi fata Yaubada i na 'asetai, we'e 'ima naninidi i tovibodaga 'a tutuwealidi. Wata 'eba vetalaganidi 'waidiega tomotoga yadi nuanua matatabuna 'a 'i'ive'avinidi 'a nunawedi Keliso 'waineye nika yana nuanua i vevematayakeyakedi. <sup>6</sup> 'A lulukamata 'omi tovetumagana 'wa miamiani Kolinita 'waineye nagami taunimi 'wa na tauyemi Keliso 'wa na vevematayakeyakeni, mulieta 'ai'edi aitoi i na baila, bei vematavuloga 'a na veleni.

<sup>7</sup> 'Wa 'ise'isekumo, 'ai'edi 'wa da venua'ivineku yaku sauluva wata yaku veimea 'wa da 'asetadi. 'Ai'edi aitoi i na nuani mogitana taunina Keliso yana tomotoga, 'atumaina, siwe i lubwaineni i na venua'ivina-vaitugana nika i na nuani 'ima wata Keliso yana tomotoga, kebu 'aisenaga. <sup>8</sup> 'Auvea veimea i velema bega 'a na kiavetoketokemi, kebu i da vo, 'Wa na 'ivesakodi," we'e 'ai'edi 'wa na vo, Faulo yana vonanina 'ana nogaya taunina i awa'ai'aia," kebu a na bunumayaga, fai mogitana Yaubada veimeanina i veleku begaidi a awa'ai'aiku. <sup>9-10</sup> \*Kebu nuanuaku 'wa na vo, Faulo yana leta 'waidiega i veve'isakololoda," fai 'ifwaimi 'wa vonaga 'wa vo, Faulo yana leta vitadi wata toketokedi, we'e taiadi ta na miamiaga ta 'ise'iseni taunina tomogo mweana yana vona 'adi nogaya nani-'avo'avovo." <sup>11</sup> \*Egavo bani'odi i voneyediga i lubwainedi i da 'asetai yama toketokena 'a veve leta 'waidiega wata yama toketokena tutuyanina 'a na waiga 'waimie 'wa na 'iseniga i vesala.

<sup>12</sup> Tove 'ifwaidi 'waimie taunidi i awa'ai'aidi i vo, 'Ima 'atumaima 'wa na ve'ililibuyema," we'e 'ima, kebu tamu sai'afo nuanuama 'a na vo, Tomotoganidi yadi sauluva wata 'ima yama sauluva taiadi i vesala." Tovenidi yadi

nuanuayega taunidi yadi sauluva i 'etowavadi i vo, 'A ve'atumaiga, 'asa'aiana 'akonadi 'ama fata, kebu tamu aitoi yana 'atumaina 'ima bani'odiga.” 'Ana 'isa tomotoganidi kebu ma yadi 'asetaga. <sup>13</sup> ☆We'e 'ima 'eba veimea 'ifwaidi Yaubada i tauyedi 'waimeye beidimo 'a na folofolova faifaina, yama folovanidi vuagidi faifaidi 'ama fata taunima 'a na awa'ai'aima. Kebu 'a na uvi'agala 'a na damana tamu aitoi yana 'eba veimea 'waineye bei taunima 'a na awa'ai'aima tomogonina yana folova vuagidi faifaidi. We'e 'omi me Kolinita yama 'eba veimea nageneye 'wa miamia. <sup>14</sup> Mogitana 'omi yama 'eba veimea nageneye, begaidi tutuyanina 'a wai-vauvau 'waimie Keliso Valana 'Atumaina 'a viweni, kebu yama 'eba veimea 'ana tugusa 'a da uvi'agali. <sup>15</sup> Yaubada yama 'eba veimea 'ana tugusa i yatodi, begaidi mali tomotoga i folofolova 'eba veimea 'ifwaidi 'waidie, yadi folova vuagidi faifaidi kebu taunima 'a na awa'ai'aima. We'e mogitana nuanuama yami vetumagana i na vevetoketoke bega yama folova 'waimie yama 'eba veimeanina nageneye i na vevebwaika. <sup>16</sup> Yama folova i na vebwaikaga 'waimie, mulieta 'ama fata 'a na vaganago mali 'awalawa 'waidie wata bei Iesu Valana 'Atumaina 'a na lau'age. 'A na vaganagoga fai kebu nuanuama taunima 'a na awa'ai'aima tamu tomogo yana folova taunina yana 'eba veimea nageneye faifaina.

<sup>17</sup> We'e mogitana ava'ai i voneyeniga Yaubada yana Buki nageneye ta na 'idewai i vo,

'Ai'edi aitoi i na vo, A na subia,”

I lubwaineni 'Auvea 'aisena i na subiai,

Kebu taunina i na awa'ai'aia.”

<sup>18</sup> ☆'Ai'edi aitoi taunina i na awa'ai'aia, yana awa'ai'ainina nani-'avo'avovo, we'e 'ai'edi 'Auvea tamu aitoi i na awa'ai'aiaga 'ana awa'ai'ainina vona mogitana.

## 11

*Faulo i veifufu tove-vekavekali faifaidi.*

<sup>1</sup> Fai tauniku a awa'ai'aiku yaku vona 'ana nogaya 'wa da vo sai'afo a da ve'wawa'wawa, siwe nuanuaku 'wa na toke-maiga. 'Wa na tokemaigemiga, nuanuaku bwaikina yaku nuanua a na lu'ivona 'waimie. <sup>2</sup> ☆Yaubada i ve'unumagigi faifaimi, nuanuana 'omi 'aiseotogina yana tomotoga, yau wata bani'odi a ve'unumagigi faifaimi. Nuanuaku Keliso 'aiseotogina 'wa na nuakalikalieni, 'wa da vo 'omi tamu vavine ne'e'elina bani'odi, kebu tamu yana sakonaga. A veakutagonimi Keliso 'aiseotogina faifaina, 'omi bani'odi yana vavine 'atumai'avami. <sup>3</sup> ☆Siwe a venuafouviga faifaimi.

Basenadiotoga Seitani 'o'olo i agei bega 'asetavekavekali 'wainega Ive i vekaliedi i sakona, wata bani'odi 'omi faifaimi a venuafouviga i na nunago tomotoga 'ifwaidi i na vekaliemi Keliso 'wa na baileni. Basenadi ma yami nuakalikali taunimi 'wa tauyemi Keliso 'aiseotogina 'waineye, kebu nuanuaku tamu aitoi nuami i na 'ewai 'wa na damana 'waineye. <sup>4</sup> \*A venuafouviga fai tove-vekavekali i waiga 'waimie, ma yami sosoana taunimi 'wa tauyemi 'waidie. Basenadi Iesu Valana 'Atumaina 'a lau'age 'waimie, 'wa vetumagana nika 'Anu'anunu 'Atumaina i agemi. Mulieta tove-vekavekalinidi i waia 'waimie tamu Iesu faifaina i lau'age, kumanina 'ima kebu faifaina 'a da lalau'agega. Yadi ve tulina siwe ma yami sosoana 'wa nogai 'wa vetumagana 'waineye wata taunimi 'wa tauyemi tamu 'anu'anunu tulina 'waineye.

<sup>5</sup> Tovenidi igodi yami tomata'aulele bwaikaotogidi, we'e yau a nuani kebu i da vebwaika-'iaweku. <sup>6</sup> \*Vokeye yaku vona 'ana nogaya kebu 'eba nua'ewa tovenidi bani'odi, 'wa da vo kebu a da luku sikulu 'waineye, siwe a vonavonaga ma yaku 'asetavekavekali. Tutuya matatabuna yaku 'asetavekavekali 'a sisivemageseni 'waimie nani tulina tulina faifaidi.

<sup>7</sup> Basenadi a wai Yaubada Valana 'Atumaina a lalau'age 'waimie, kebu tutula faifaina a da nuanua, mani 'alo 'ani'ani 'waimiega a da 'ewa'ewadi. Tauniku a kiaobuyeku ma'itufa 'omi a kialakaimi. Fai kebu a da lukakademi tutula faifaina, 'wa da nuani, a sakona matamie? <sup>8</sup> \*A folofolovaga 'waimie tovetumagana 'aila'a fuedi i 'i'ivaiseku mani 'wainega, 'wa da vo a da vavainago 'waidiega a na 'ivaisemiga faifaina. <sup>9</sup> Tutuyanina taiadi ta miamia nani 'ifwaidi 'waidiega a ve'ale'usa, siwe kebu tamu vita a da velemiga talavelu'uega. We'e mogitana edavo i maia Masi-doniayega, naninidi 'waidiega a ve'ale'usaga i miedi. Basenadi wata 'awaie kebu tamu sai'afo nuanuaku vita a na vevelemi 'aku 'isave'avina faifaina. <sup>10</sup> Keliso yana nuanua tonovidi i 'eno'enovi 'waikuye begaidi a na vonemi. Tutuyanina Keliso Valana 'Atumaina a lalau'age 'waimie kebu tamu nani nimamiega a da 'ewai. Kebu tamu ava'ai a da 'ewa'ewai 'waimiega, faifaina tutuya fuedi tauniku a awa'ai'aiku yami 'awalawa Gulisi matatabuna nageneye, siwe kebu tamu aitoi 'ana fata i na talabodeku a na 'ailove. <sup>11</sup> Awale a vonavona a vo, Mali tovetumaganavo i 'ivaiseku we'e 'omi kebu? "Alo 'omi kebu a da nuakalikaliemiga? Kebu, Yaubada 'aku to'asetavekavekali, i 'asetaku a nuakalikaliemi. Wata kebu a da vo, A na vetalavologa bega mani i na veleku."

<sup>12</sup> Tutuya de'e a folofolovamo kebu tutula faifaina a da nuanua, wata 'awaie bani'odi a na folofolovamo bega

tomotoganidi igodi yami tomata'aulelevo kebu 'adi fata taunidi i na awa'ai'aide. Tomotoganidi i lulukakademi mani 'wa veveledi yadi nuanua i vo, 'Ima Yaubada yana tomata'aulele, Faulo yana folova wata 'ima yama folova i vesala." Siwe kebu, yau kebu mani faifaina a da nuanua, begaidi kebu i da lubwainedi taunidi i na awa'ai'aide i na vo, 'Ima 'a vesala Faulo taiadi."

<sup>13</sup> ✧ Tomotoganidi kebu tomata'aulele mogitana, tovekali. Yadi folova vekali wata yadi sauluva i vetuli ta na 'isedi ta na vo 'ako, Mogitana Keliso yana tomata'aulelevo." <sup>14</sup> Kebu nuami i na voganidi 'wa na vekoi fai yadi toveimea Seitani 'ana fata i na vemaigisivilavila 'ana 'isa 'wa da vo anelose mataududulina. <sup>15</sup> Fai Seitani 'ana fata i na vetuli anelose bani'odi, bega kebu nani vitana yana tofolovavo 'waidie, wata 'adi fata i na vetuli 'wa da vo nuanua tonovidi 'adi tofolovavo. 'Eba ve'a'ava 'waineye 'adi tutula i na veluagadi yadi sauluva sakoidi 'adi 'isa'isa bani'odi.

*Vitanidi Faulo i veluagadiga Keliso faifaina i veifufuyedi.*

<sup>16</sup> Wata yaku vona a na luvaitugani. Kebu i da lubwaineni tamu aitoi yana nuanua i na vo, Faulo taunina i awa'ai'aia, yana vona 'ana nogaya i ve'wawa'wawa." 'Ai'edi yami nuanua bani'odi, 'wa na tokemaigemi sai'afo a na awa'ai'aiku 'wa na nogai, bani'odi 'wa totokemaiga tomotoganidi i ve'wawa'wavaga 'waidie. <sup>17</sup> Yaku awa'ai'ainina kebu 'Auvea yana nuanua bani'odiga, 'wawa'wavadi yadi sauluva a na saladi. <sup>18</sup> Tomotoga fuedi taunidi i awa'ai'aide 'adi 'aivaita fwayefwayeye faifaina wata yau a na saladi. <sup>19</sup> 'Ami 'isa, igodina 'omi to'aseti siwe 'wa tokemaiga tove-vekavekali 'waidie. Tovenidi yadi vona 'ana nogaya i ve'wawa'wawa siwe ma yami sosoana taunimi 'wa tauyemi 'waidie. <sup>20</sup> 'Ai'edi aitoi i na lukakademi yana veimea fuedi 'wa na vevematayakeyakedi, 'alo yami kukua i na elomi, 'asa'aiana 'wa tokemaiga. 'Alo 'ai'edi givagivayega i na vekaliemi nuanuana yana nuanua 'wa na 'i'idewadi, 'alo i na awaobuobuyemi, 'alo maigimi i na tutubodadiga, 'asa'aiana 'wa sosoanamo. <sup>21</sup> Fai 'ima kebu bani'odi 'a da vesauluva sakoina 'waimie, yau 'wa da vo mweaku, igodi a bunumayaga.

'Ai'edi tamu aitoi i na vetoketoke taunina i na awa'ai'aia nani 'ifwaidi faifaidi, yau wata bani'odi 'aku fata tauniku a na awa'ai'aiku naninidi faifaidi. A 'asetai yaku awa'ai'ai 'ana nogaya a ve'wawa'wawa, siwe wata a na vonemi. <sup>22</sup> ✧ 'Ai'edi tomotoganidi i na vo, 'Ima me Ibeliu," yau wata tomogo Ibeliu. 'Ai'edi i na vo, 'Ima wauma Isileli," yau wata bani'odi. 'Ai'edi i na vo, 'Ima Ebelamo tubunavo," yau wata bani'odi tamu

tubuna. <sup>23</sup> ✧ 'Ai'edi i na vo, 'Ima Keliso yana tofolova," we'e yau mogitana yana tofolova. A nuani yaku awa 'ai'ainina 'ana nogaya 'wa da vo a da ve'wava'wava, siwe wata a na vonemi. Yaku folova vitadi wata Keliso faifaina vanuga 'eba yogona 'waidie i yatoyatoku 'waidiega tomotoganidi a vetoketoke-'iawedi. Tutuya fuedi Keliso 'ana tovedumwe'ai'ai i toke i nikenikeku, wata tutuya fuedi sai'afoga i da luvewefaku, we'e tomotoganidi kebu bani'odiga. <sup>24</sup> ✧ Fai a folofolova Keliso faifaina, tutuya 5 yaku tomotoga me Diu i toke i fi-taliku bulava metametanina 'wainega, tutuya 'aitamogana 'aitamogana 'aku 'ainike matatabuna 39 me Diu yadi sauluva bani'odi. <sup>25</sup> ✧ Tutuya 'aitonu me Loma i toke i nikeku fulumai-iega, tamu tutuya i lukileuku igodi nuanuadi i na luvewefaku. Tutuya 'aitonu yama waka i tula i tutuwealema, tamu tutuya a kayokayo malaveseye 'aiata wata lovana matatabuna. <sup>26</sup> ✧ Tutuya fuedi yaku lauivila 'waidie ilagi a veveluagadi sai'afoga a da wafawafa weyagata 'waidie. To'ainike 'waidiega, yaku tomotoga me Diu 'waidiega wata mali tomotoga taunidi kebu Diu 'waidiega. Wata bani'odi ilagi a veveluagadi 'atamana bwaikidi 'waidie, wala'aie, malaveseye wata tovetumagana-vekavekali 'waidiega. <sup>27</sup> Tutuya fuedi a toke a folofolova, lovana fuedi kebu a da 'enodewa, a laselase wata 'anigoku i lalala, tutuya fuedi a veve'ale'usa 'ani'ani wata kaleko 'waidiega, wata a vevekaukau. <sup>28</sup> Vita fuedi a veluagadi, 'ifwaidi a 'inanadi, 'ifwaidi kebu, vitanidi 'waidiega yami tove-vekavekali a vetoketoke-'iawedi. Siwe wata tamu vita bwaikina a vevebaeku tovetumaganavo faifaimi 'awalawa tulina tulina 'waidie, 'aiata 'aitamogana 'aitamogana a vevenuafouviga faifaimi voke yami vetumagana Keliso 'waineye fa'alina 'alo kebu. <sup>29</sup> 'Ai'edi tamu aitoi yana vetumagana i na mwea, 'aku vebae 'wainega a na lutonovi. 'Ai'edi tamu aitoi sakona nuana i na 'ewai i na be'uga, yau a na venuafouviga faifaina.

<sup>30</sup> 'Ai'edi aitoi i na vo, I lubwaineni Faulo taunina i na awa'ai'aia nika tomotoga i na 'asetai taunina tomogo toketokena." Siwe kebu nuanuaku, nuanuaku 'aku vitanidi wata naninidi 'waidiega tomotoga 'adi fata i na 'asetakuga yau tomogo mweaku, 'aisedi faifaidi a na vonavona. <sup>31</sup> Yaubada 'aku to'asetai, i 'asetaku kebu a da vevekali. Taunina 'ada Toveimea Iesu Tamana wata yana Yaubada, i lubwaineda tutuya fuedi ta na subisubiai, kebu i na 'a'avaga, i na 'eno-vagata. <sup>32</sup> ✧ Yau tomogo mweaku, a na veifufuyeni nika 'wa na 'asetai. Basenadi Kini Aletasi tamu gabemani bwaikina i venua'ivineni 'atamana Damasiko i 'isave'avini.

'Atamananina matatabuna kalikalina, kalinina i toke i didigi i laka. Bei a miamia toveimeanina nuanuana i na 'ive'aviniku bega tolugaviavo i vonedi 'awa i tovibodadi. <sup>33</sup> Siwe lovane ekwavo i naweku walisaveye a luku, tutubwekaneamo i ve'ioyoku a obu a dega.

## 12

*Faulo 'ana 'enoneganega i veifufuyeni, 'wa da vo tamu tomogo 'ana 'enoneganega i da veifufuyeni.*

<sup>1</sup> A nuani kebu 'ana fata 'aivaita a na veluagai yaku awa'ai'ai 'wainega siwe 'asa'aiana a na awa'ai'aiku nika 'wa na 'asetai ma yaku veimea Yaubada 'wainega. Tutuya de'e a na veifufuyedi naninidi 'Auvea i veku 'wa da vo a da 'enoneganega. <sup>2</sup> 'Akonadi malamala 14 i 'a'ava tamu tomogo taunina Keliso taiadi i miave'itubamaga, Yaubada i vagavaia i naweni ta'ebeiotoga abame. Kebu a da 'asetai-atumaia ma tomogona 'alo 'anu'anunu'avana, Yaubada 'aisena i 'asetai. <sup>3</sup> Wata a na luvaitugani, Yaubada 'aisena i 'asetai, voke ma tomogona 'alo 'anu'anununa 'aisena, siwe a 'asetai Yaubada i vagavaia i naweni Faladaisi, 'eba mia 'atumaina wata sosoana-vagata 'waineye. <sup>4</sup> I lakaga nani fuedi 'eba nua'ewa i nogaidi veifufu-wayoga, siwe Yaubada tomogonina i tala-bodeni kebu i na lu'ivoneyedi. <sup>5</sup> 'Aku fata tomogonina\* a na awa'ai'aia, siwe kebu nuanuaku tauniku a na awa'ai'aiku. We'e naninidi faifaidi tomotoga i 'asetaku yau tomogo mweaku 'aisedi faifaidi a na vonavona. <sup>6</sup> 'Ai'edi nuanuaku tauniku a na awa'ai'aikuga kebu a da ve'wawa'wavaga fai naninidi a da lu'ivoneyediga vona mogitana. Siwe 'asa'aiana kebu nuanuaku tauniku a na awa'ai'aiku i na nunago tomotoga i na kialakaiku tauniku yaku vona 'wainega. We'e mogitana tomotoga i na 'iseni ava'ai a 'idewaiga wata i na nogai yaku lau'age nika bei i na nuani yau tomogo-'avo'avovo 'alo bwaikiku.

<sup>7</sup> \*Tutuyanina Yaubada i silakaiku abame 'eba nua'ewa 'atumaiotogidi tulina tulina i veku, fai kebu nuanuana faifaidi a na nualaka begaidi Yaubada Seitani i tauyeni tamu vita tomogokuye i yatoi, 'wainega veviga wata 'we'wela a veveluagadi. <sup>8</sup> Tutuya 'aitonu viganina faifaina a vevelu'ui 'Auvea 'waineye, nuanuaku i na 'ewayavuleni. <sup>9</sup> \*Siwe i vo, Yaku nuakalikali 'waimuye 'akonadi 'amu fata 'wainega 'aivaita 'u veveluagai. Tutuyanina 'u na mwea yaku toke-tokena i na 'ivaisemu nika 'u na vetoketoke.” Begaidi a sosoana bwaikina naninidi 'waidiega a mwea, faifaidi a na awa'ai'aiku. A mweaga bega Keliso yana toketokena i na

\* 12:5: Tomogonina 'asa'aiana Faulo. ✧ 12:7: Iob 2:6 ✧ 12:9: Fil 4:11-13

ageku i na veve'isabodeku. <sup>10</sup> 'Ai'edi Keliso faifaina a na mweaga, 'ai'edi tomotoga i na yagayagaikuga, 'ai'edi 'eba venuafouviga a na veveluagadiga, 'ai'edi Keliso 'ana tovedumwe'ai'ai i na veve'isakolologa 'waikuye, 'ai'edi vita tulina tulina a na veveluagadiga, a na sosoanamo. A na sosoanaga fai tutuyanina a na vo, Yau a mwea, kebu 'aku fata," bei Keliso i na kiavetoketokeku nika vitanidi matatabuna 'aku fata.

*Faulo i venuafouviga me Kolinita faifaidi.*

<sup>11</sup> Fai yami tomata'aulele-vekavekali 'wa awa'ai'aidi tauniku a awa'ai'aiku yaku sauluva 'wa da vo a da ve'wava'wava, siwe 'omi yami awa'ai'ainina 'wainega 'wa lukakadeku. Yau a vetomata'aulele Keliso faifaina 'waimie a folova, begaidi 'omi tomotoganimi i lubwainemi awave'atumai 'waimiega i da souyeni faifaiku. Avinodi yau bani'odi nani-'avo'avovo siwe tomotoganidi igodi yami tomata'aulele bwaikaotogidi kebu tamu sai'afo i da vebwaika-'iaweku. <sup>12</sup> ☆A tokemaiga bwaikina vetomata'aulele 'ana tugusa a ve 'waimie. Yaubada yana toketokena 'wainega 'eba nuavogana wata 'eba nua'ewa ma 'adi tugusa a 'idewadi matamie kebu tamu wata aitoi 'ana fata bani'odiga, 'wa da 'isedi nika 'wa da 'asetai yau tomata'aulele mogitana. <sup>13</sup> ☆Naninidi a 'idewadi tovetumaganavo 'adi 'aila'a 'ifwaidi 'waidie, 'omi wata 'waimie bani'odi, kebu tamu nani a da ve'o'oleni 'waimie. Voke tamu nani a ve'o'oleni, mali tovetumaganavo a tauyedi i na 'i'ivaiseku we'e 'omi kebu a da lukakademi 'ani'ani 'alo tamu nani faifaina. 'Ai'edi 'wa nuani yaku sauluvanina 'wainega a sakonaga 'waimie, nuanuaku 'wa na nuatavuniku.

<sup>14</sup> Tutuya de'e yaku wai 'ana vetonu faifaina a 'idewadewa a na wai a na fogemi, siwe kebu vita a na velemiga 'aku 'isave'avina faifaina. Naninidi 'waimiega bani'odi kukua kebu nuanuaku, nuanuaku 'omi tauniotogimi. 'Omi natukwavo 'wa na 'i'isave'avinikuga kebu i da lubwaineni fai kwakwama kebu i da bakubakula tamadiavo wata inadiavo faifaidi, we'e mogitana tama wata ina i bakubakula natu-diavo faifaidi. <sup>15</sup> Yau tamami bani'odi, ma yaku sosoana nani matatabuna 'waikuye a tauyedi faifaimi tauniotogiku taiadi bega a na toke a na folofolova faifaimi. I na nunago a na mwea faifaimi, 'asa'aiana a na sosoanamo. Yau a nuakalikiemi bwaikina, we'e 'omi bani'odi, yami nuakaliki 'waikuye i vevesiai? <sup>16</sup> 'Ai'edi 'wa na vo, Mogitana, Faulo kebu vita i da veleda 'ana 'isave'avina faifaina," siwe 'ifwaimi 'wa na vo, Kebu, Faulo yana vaiseba, yana vetalavologa 'wainega yada mani i eloeloda." <sup>17</sup> Bani'odi a munega a elomi? Tomotoganidi a vonedi i wai 'waimie yaku vona i



lu'ivona 'waimie, voke 'waidiega a elomi? <sup>18</sup> Basenadi Taito a vetunei i wai 'waimie, wata iada tamu a voneni taiadi i wai. Voke Taito kumanina yami mani i elomi? Kebu'a'ava, 'wa 'asetai taunina tomogo 'atumaina, we'e yau yaku sauluva wata yaku nuanua i vesala yana sauluva wata yana nuanua bani'odi.

<sup>19</sup> Voke yaku leta 'wa lulu'iawawai 'wa nuanua 'wa vo, Faulo ma enavo i veve'ewa 'waideye taunidi 'adi awave'atumi 'waidiega." Siwe kebu, Yaubada mataneye 'a vonavona Keliso yana nuanua bani'odi. We'e 'omi emavo 'a nuakalikiemiga, yama sauluva matatabuna 'a 'i'idewadi 'ami kiavefa'ala faifaina. <sup>20</sup> Nuanuama 'a na kiavefa'alimi fai a venuafouviga a na waiga 'waimie yami sauluva 'ifwaidi a na 'isedi, sauluvanidi kebu yaku nuanua bani'odi, wata yau ava'ai a na 'idewaiga 'waimie, 'omi kebu nuanuami. A venuafouviga 'ai'edi a na 'isemi 'wa na veve'ikwayekwayega, 'wa na veve'unumagigi, 'wa na nunuasako, tauni'avami faifaimi 'wa na nuanua we'e emiavo kebu, emiavo 'wa na yagayagaidi, 'wa na vevebonaivo, 'wa na nunualaka, wata kebu 'wa na folofolova veimea 'ana tonovineamo. <sup>21</sup> \*Mogitana a venuafouviga tutuyanina wata a na wai 'waimie 'ai'edi yami sauluva a na 'isedi bola kebu 'wa da 'ive'atumaidi, nika yami sauluvanidi faifaidi yaku Yaubada bunumayaga i na veleku matamie. Basenadi fuemi 'wa sakona, siwe voke bola kebu 'wa na nuavilamiga, bunu 'ana nuanua sakoidi 'wa 'i'idewadi, 'wa veve'avula-'avo'avovo, wata 'wa nunuagiva nika nani sakoidi 'wa 'i'idewadi. Yau a na 'isedina a na vemogai faifaimi.

## 13

### *Faulo yana matakia.*

<sup>1</sup> \*De'e a na wai a na fogemiga, yaku wai 'ana vetonu. Tamu vona i 'eno'eno Yaubada yana Buki nageneye faifaina nuami a na tolinuata'idi. I vo,

'Ai'edi tamu aitoi iana i na vevitai tamu sakona faifaina,

I lubwaineni sakonanina 'ana to'isa 'adi 'ailuga 'alo 'adi 'aitonu nika yana vevitanina mogitana."

Wata bani'odi, 'omi 'ai'edi kebu 'wa na nuavilamiga 'wa na vonayavuga matakuye. <sup>2</sup> Basenadi yaku wai 'ana veluga 'waineye, tomotoganidi i sakonaga wata 'ifwaimi a vonemi vematavuloga faifaina, we'e tutuya de'e tulikuyega wata vonanina a na luvaitugani. Side bani'odi. Tutuyanina wata a na waiga tosakonanimi kebu a na ve'ise'isemiga, 'aitamogana 'aitamogana vematavuloga a na velemi. <sup>3</sup> Nuanuami 'eba 'isa 'ifwaidi a na 'idewadi 'wa na 'isedina 'wa na ve'awamogitana

yau Keliso yana tomata'aulele, Kelisonina faifaina a vonavona. 'Atumaina, a na waiga a na vemi vematavuloga a na velemiga 'wainega. Keliso yana sauluva 'waimie kebu mweanaga, we'e mogitana ma yana toketokena i folofofova 'awasasamie. <sup>4</sup> ✧ Mogitana Keliso tomogona mweana i tutufwaseni 'ai lagalagana 'waineye i wafa, siwe tutuya de'e Yaubada yana toketokena 'wainega i miamia. Wata bani'odi 'ima Keliso yana tomotoga mweama, siwe Yaubada yana toketokena 'wainega taiadi 'a miamia bega 'ama fata nani matatabuna 'a na 'i'idewadi 'waimie ma yama toketokena.

<sup>5</sup> We'e 'omi, i lubwainemi taunimi 'wa na sitonovimi 'wa na 'asetai ma yami vetumagana 'wa tauyemi Keliso 'waineye 'alo kebu. 'Wa da 'asetai Iesu Keliso i miamia nagemie, siwe 'ai'edi yami saitonovanina 'wainega 'wa na 'asetai kebu 'wa da vetumagana, wata 'wa na 'asetai Keliso kebu nagemie i da miamia. <sup>6</sup> We'e 'ima 'a nuani 'wa na 'asetama kebu tomata'aulele-vekavekali, nagemeye Keliso i miamia. <sup>7</sup> 'A vevelu'ui faifaimi Yaubada 'waineye bega kebu 'wa na sakona. Kebu 'a da vo, 'A na velu'ui faifaidi bega mali tomotoga yadi sauluva 'atumaidi i na 'isedi i na vo, Faulo ma enavo tomata'aulele mogitana." Kebu bani'odi yama nuanuaga, mogitana 'a vevelu'ui faifaimi, nuanuama 'wa na vevesauluva 'atumaina, we'e 'ai'edi tomotoga i na awavesakoyema, 'asa'aiana, kebu tamu ava'ai. <sup>8</sup> ✧ 'Ima tomata'aulele kebu tamu yama toketokena i da 'eno'eno bega Yaubada yana nuanua tonovidi 'a na tovibodedi, we'e mogitana i lubwainema tutuya fue di nuanuananidi 'a na lulu'ivoneyedi bega tomotoga i na vematayakeyakedi. <sup>9</sup> 'Ai'edi 'ama 'isa 'wainega 'ima tomotoga mweama we'e 'omi ma yami toketokena Yaubada yana nuanuananidi 'wa 'i'idewadi, 'a sososoana. Begaidi 'a vevelu'ui faifaimi yami sauluva i na ve'atumaotoga. <sup>10</sup> ✧ Nuanuama yami sauluva i na ve'atumaotoga begaidi tulikuyega yami leta a kilukiluma bega a na waiga 'waimie kebu ma yaku veimea a na vematavulogimi. Veimeanina 'Auvea i velekuga 'wainega a na kiavetoketokemi, we'e kebu i da vo, 'Wainega 'wa na 'ivesakodi."

*Faulo yana vona 'eba ve'a'ava.*

<sup>11</sup> Side bani'odi yaku veifufu 'ana ma'usa 'waimie, ieu ekwavo. Yami sauluva 'wa na 'i'isave'avinidi tonovidi i na 'eno'eno, yaku vona 'wa na nunuave'avinidi wata 'wa na 'i'idewadi, matatabumi yami nuanua i na vesala 'wa na veveiana. We'e Yaubada, taunina i nunuakalikali wata

nuanua bikana mia 'atumaina taiadi i veveleleda, lilivamie i na miamia.

<sup>12</sup> Emiavo tovetumaganavo 'waidie yami nuakalikali 'wana ve 'avalamaigayega. Yaubada yana tomotoga matatabudi yadi vekaiwa i vetunei 'waimie.

<sup>13</sup> 'Ada Toveimea Iesu Keliso yana 'isave'avina, Yaubada yana nuakalikali wata 'Anu'anunu 'Atumaina yana veiana i na 'eno'eno matatabumi 'waimie.

'Asa'aiana bani'odi.  
Yau Faulo.

## GALETIA

### Faulo yana kiluma me Galetia 'waidie.

Galetia nageneye tovetumaganavo 'aila'a tulina tulina bei i miamiani bega Faulo de'e leta i kilumi i nago 'waidie. Basenadi Faulo taunina i nago 'atamana fuedi 'waidie Galetia nageneye Iesu Valana 'Atumaina faifaina i lau'age bega tovetumaganavo 'adi 'aila'a tulina tulina i souyedi.

Tovetumaganavo Galetia nageneye tomotoga tulidi tulidi, Faulo i lau'age 'waidie i vo, Vetumagana'ava 'wainega Yaubada i na awave'atumaiemi." Mulieta me Diu 'ifwaidi i maia Faulo yana ve i awavesakoyeni i vo, Tovetumaganavo i lubwainedi ve'etoboda Mosese 'wainega i maiga i na vematayakeyakedi nika 'wainega i na ve'atumai Yaubada mataneye." We'e veimea tamu faifaina i ve'ikwayekwayega bunu 'aibobo.

Yadi venina faifaina Faulo i nuasako bwaikina. Bega i vo, 'Ai'edi veimeanidi 'adi vematayakayaka 'waidiega ta da ve'atumaiga, Keliso yana wafa sakona 'adi nuatavuna faifaina i da venani-'avo'avovo kebu lamunaga." Faulo de'e letanina i kilumi me Galetia i yagaidi. Faulo nuanuana tovetumaganavo ve-vekavekali i na bailedi i na viladi Iesu yana 'eda'eda mogitana 'waineye. De'e letanina 'ana 'idi side bani'odi.

Vona-vekaiwa wata Vala 'Atumaina 'ana nuanua mogitana.

1:1-10

Faulo yana vetomata'aulele faifaina i veifufu. 1:11-2:21

Yaubada i na 'ive'atumaida yada vetumagana 'waidiega, kebu ve'etoboda 'adi vematayakayaka 'waidiega. 3:1-4:31

Sakona i veimeyedaga 'wainega Keliso i yavuda bega 'Anu'anunu 'Atumaina yana nuanua ta na 'i'idewadi. 5:1-6:10

Yana 'alanuai wata yana nuanua bwaikidi 'adi 'eba ki-avemageta. 6:11-18

<sup>1</sup> ✧Ekwavo, yau Faulo, Iesu Keliso yana tomata'aulele a vekaiwa 'waimie. A vetomata'aulelega kebu tamu aitoi yana venua'ivina 'wainega, 'alo tamu tomogo yana veimea 'wainega. We'e mogitana Iesu Keliso wata Yaubada Tamada, kumanina Keliso i sivetovoa wafayega, i venua'ivineku bega a vetomata'aulele.

<sup>2</sup> Yau wata edavo tovetumaganavo taiadi 'a miamianiga yama vekaiwa 'a vevetunei 'omi Keliso yana 'Aila'avo 'waimie, 'wa miamiani 'awalawa Galetia nageneye.

<sup>3</sup> A vevelu'ui faifaimi, nuanuaku Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie, wata nuanua bikadi mia 'atumaina taiadi i na vevelelemi.

<sup>4</sup> ✧Yada Yaubada Tamada yana nuanua Keliso i vematayakeyakeni, taunina i tauyeni i wafa yada sakona 'adi nuatavuna faifaidi, wata i yavuda tutuya de'e 'ana sakona 'wainega. <sup>5</sup> Yaubada ta na subisubiai tutuya matatabuna 'waidie, yana 'ai'aiwabu kebu i na 'a'avaga i na 'eno-vagata. Vona mogitana, yaku nuanua bani'odi.

*Vala 'Atumaina, Iesu 'aisena Valana.*

<sup>6</sup> Yau nuaku i vogani, kebu tutuya manamanawenaga kumanina i vena'ivinemiga 'wa baibaileni. Basenadi a wai Iesu Valana 'Atumaina a lau'age 'waimie, Valananina 'wa nogai nika Yaubada i golemi Keliso yana nuakalikali bwaikina 'wainega, nuanuana 'ita'ita'i 'wa na veluagai. Nagami taunimi 'wa tauyemi Valananina 'waineye, we'e tutuya de'e awale Yaubada 'wa baibaileni 'wa damadamana vala tulina 'waineye igodina Vala 'Atumaina? <sup>7</sup> ✧Siwe kebu tamu vala tulina 'ita'ita'i faifaina i da 'eno'eno. A vonevonemiga fai tomotoga 'ifwaidi nuami i 'ivegaudi wata i fetomi, nuanuadi Keliso Valana 'Atumaina i na 'ivesakoi. <sup>8</sup> ✧We'e 'ai'edi tamu aitoi, 'alo yau, 'alo tamu anelose abamega tamu vala tulina 'a na lau'age 'waimie igodina 'ami 'ita'ita'i faifaina, siwe kebu i na vesala Valanina a lu'ageyeniga taiadi, tomogonina i lubwaineni Yaubada i na veimea i na luku 'ai-'ala'alase kebu yana 'weuga 'waineye. <sup>9</sup> Ava'ai 'akonadi a vonemiga, wata a na luvaitugani. 'Ai'edi tamu aitoi tamu vala tulina i lalau'age 'waimie igodina 'ami 'ita'ita'i faifaina, siwe kebu i da vesala Valanina nagami 'wa 'ewai taiadi, tomogonina i lubwaineni Yaubada i na veimea i na luku 'ai-'ala'alase kebu yana 'weuga 'waineye.

<sup>10</sup> ✧De'e yaku vona 'ana nogaya kebu a da vo, Nuanuaku tomotoga i na awave'atumaieku," we'e mogitana Yaubada 'ana awave'atumai faifaina a nuanua. Wata kebu a da vo, Vonanina 'wainega tomotoga nuadi a na 'ewadi i na subiaku." 'Ai'edi a da nuanua 'aku subia faifaina, 'ako yau kebu Keliso yana tofolovaga.

*Keliso Valana, tauniotogina i sivemageseni Faulo 'waineye.*

<sup>11</sup> ✧Ekwavo nuanuaku yaku lau'age faifaina a na vonemi bega 'wa na 'asetai Iesu Valana 'Atumaina a lalau'agega, kebu tomotogaotoga yadi nuanua 'wainega. <sup>12</sup> We'e yau, yaku

✧ 1:4: Gal 2:19-20; Tai 2:14 ✧ 1:7: Fol 15:1,24 ✧ 1:8: 1 Kol 16:22 ✧ 1:10: 1 Tes 2:4 ✧ 1:11: Mad 16:17

'asetu Valananina faifaina kebu a da veluagai tamu tomotoga 'wainega, wata kebu tamu aitoi i da ve 'waikuye, we'e mogitana Iesu Keliso tauniotogina i sivemageseni 'waikuye.

13 ✨'Akonadi valaku 'wa 'asetai yaku sauluva basenadi, yau tomogo Diu, yama veimea wata yama ve'etoboda matatabuna a ve'ililibuyedi, wata Yaubada yana tomotoga i vetumaganaga Keliso 'waineye yau 'adi to'ivesako, kebu tamu sai'afu a da 'isanuakalikaliedi, igodi nuanuaku a da leo'a'avadi. 14 ✨We'e ekwavo 'aku 'aila'a 'waidiega yau a kumeta me Diu yama veimea a 'idewa'a'avadi, ekwavo sai'afu. Mogitana, sauluvanidi matatabuna i mai tubumavo 'waidiega, 'waidie a vetoketoke.

15-16 ✨We'e Yaubada ma yana nuakalikasi i vesauluva 'atumaina 'waikuye. Bola kebu a da tubuga, siwe nagami i venua'ivineku yana veimea 'wainega a na vetofolova faifaina. Yaubada yana nuanua faifaiku 'ana tutuya i veluagaina, Natuna i sivemageseni 'waikuye, bega 'aku fata Natunanina Valana 'Atumaina a na lau'age mali tomotoga kebu Diu 'waimie. Tutuyanina i sivemageseni i 'a'avana, kebu a da nago tamu tomogo 'waineye i da kiavetonoveku Iesu Valana faifaina. 17 Wata kebu a da vo, A na nago Ielusalema, Iesu 'ana tomata'aulelevo taiadi 'a na veifufu ava'ai i souyeniga 'waikuye faifaina." Mogitana taunidi tomata'aulele kumekumetadi we'e yau a vemuli, siwe kebu a da nago 'waidie. Tonoviku a nago sali'avu'avuye 'awalawa Aleibia nageneye, bei a miamia mulieta wata a vilaku a nago Damasiko.

18 A miamia, mulieta malamala 'aitonu i 'a'avana a laka Ielusalema Fita taiadi 'a veifufu, wata bei taiadi 'a miamia wiki 'ailuga. 19 ✨Bei 'a miamia, 'ifwaidi tomata'aulelevo kebu a da 'isediga, Iemesa 'ada Toveimea Iesu taina wata Fita, 'aisedi a veluagadi siwe kebu yaku 'asetu Keliso faifaina a da 'ewai 'waidiega. 20 'Akonadi Yaubada i 'asetaku, ava'ai a vonevonemiga yaku kiluma 'wainega, vona mogitana, kebu a da vevekaliemiga. 21 Wiki 'ailuga i 'a'avana Ielusalemega a tauya a nago 'awalawa Silia wata Silisia. 22 Tutuyanidi 'waidie Keliso yana tomotoga 'adi 'aila'a 'aitamogana 'aitamogana 'awalawa Iudia nageneye vala'avaku i noganogai, we'e tauniku kebu i da 'isekuga. 23 Mali tomotoga i vonevonedimo i vo, Tomogonina basenadi vita i veveleleda, tutuya de'e Iesu Valana 'Atumaina 'ada 'ita'ita'i faifaina i lalau'age, we'e nagami igodi nuanuana 'ida Keliso 'ana tovetumaganavo i da leo'a'avada." 24 Valakunina

i nogai begaidi Yaubada i subiai ava'ai i 'idewaiga 'waikuye faifaina.

## 2

*Tomata'aulele 'ifwaidi Faulo yana lau'age i awave'atumaieni.*

<sup>1-4</sup> \*A miamia, mulieta malamala 14 i 'a'avana, Yaubada yana nuanua i sivemageseni 'waikuye, nuanuana a na laka Ielusalema. Bega iada Banabasa taiadi 'a nago, wata Taito a voneni ma fuema 'a laka. 'A lakaga, tovetumaganavo 'adi to'edakumetavo 'aise'avadi taiadi 'a veifufu, yaku 'aseta Iesu Valana 'Atumaina faifaina a sivemageseni 'waidie, Valanina 'wainega a lalau'age mali tomotoga taunidi kebu Diu 'waidie. Yau a lalau'agega tomotoga yada ve'atumi Yaubada mataneye faifaina, a vo, Ta na vetumaganamo Iesu Keliso 'waineye nika ta na ve'atumi." We'e 'ifwaidi tomotoga i vo, Kebu, nagami Diu ve'etoboda wata veimea ta na vematayakeyakedi wata Yaubada yana tugusa bunu 'aibobo ta na 'ewai, mulieta Yaubada i na awave'atumaieda." Fai bani'odi i voneyediga yaku lau'age vetumagana'ava 'wainega ta na ve'atumaiga, a sivemageseni to'edakumetanidi 'waidie, kebu nuanuaku yaku folova basenadi 'alo tutuya de'e i na awavesakoyeni, nuanuaku yaku 'asetanina i na awave'atumaieni. Yaku veifufu i nogai, i sosoana we'e 'aku 'weabu Taito, taunina kebu tomogo Diu, siwe kebu i da lukakadeniga bunu 'aibobo faifaina. We'e tomotoga 'ifwaidi igodina taunidi tovetumagana yadi vaiseba i lukuma yama va'auta 'waineye nuanuadi Taito bunu 'aibobo i na 'ewai. Tomotoganidi wata nuanuadi yama vona i na nogai bega i na awavesakoyema fai 'a vo, Ta miave'itubama Iesu Keliso taiadi bega i yavuda me Diu yama ve'etoboda 'adi vematayakayaka 'waidiega." Tomotoganidi igodi nuanuadi ve'etoboda matatabuna ta na vematayakeyakedi 'wa da vo nuanuadi ve'etobodanidi i da yogonida. <sup>5</sup> Yadi nuanuananina kebu tamu sai'afo 'a da awave'atumaieni. 'Ako 'a da awave'atumaieniga, Keliso Valana 'Atumaina 'ana nuanua tonovidi i da 'ivesakoi, nuanuama Valananina i na 'eno'eno 'waimie 'atumi'avana.

<sup>6</sup> \*To'edakumetanidi ma 'adi ve'ililibu taiadi 'a va'autaga, kebu tamu nani tulina i da voneku, i awave'atumaiekumo. Vona mogitana taunidi to'edakumeta bwaikidi, siwe kebu faifaidi a da nuanua fai Yaubada mataneye matatabuda ta vesala, siaidi wata bwaikidi. <sup>7</sup> To'edakumetanidi kebu tamu nani tulina faifaina i da vona 'waikuye we'e mogitana i vo, Yaubada Faulo i venua'ivineni Iesu Valana 'Atumaina i na lau'age mali tomotoga taunidi kebu Diu 'waidie, bani'odi

wata Fita i venua'ivineni i na lau'age me Diu 'waidie.”<sup>8</sup> I vonaga fai i 'asetai Yaubada yana toketokena 'wainega a vetomata'aulele mali tomotoga taunidi kebu Diu 'waimie, bani'odi wata Fita i vetomata'aulele me Diu 'waidie Yaubada yana toketokena 'wainega.<sup>9</sup> ✧Iemesa, Fita wata Ioni, taunidi to'edakumeta toketokedi ma 'adi ve'ililibu, tutuyanina i 'asetai Yaubada ma yana nuakalikali folovanina i veleku, begaidi taiadi 'a vedima'abi, wata Banabasa, 'eba 'isa ma fuemeye 'a folofolova, Fita ma enavo me Diu 'waidie we'e 'ima mali tomotoga 'waimie.<sup>10</sup> 'A vedima'abi i 'a'avana, nani 'aitamogana faifaina i vona 'waikuye. Nuanuadi tovetumaganavo i vewekowekoma 'adi 'aivaita faifaina 'a na nuanua, naninina faifaina 'akonadi a toke a vevetafewa.

*Fita yana sauluva faifaina Faulo i awavesakoyeni.*

<sup>11</sup> Yau a miamia 'atamana Anitioki, mulieta Fita i wai. Bei 'a miamia Fita tamu sauluva 'ana 'isa kebu 'atumainaga i 'idewai, begaidi tomotoga matadie a tolimatani.<sup>12</sup> ✧Tamu me Diu yama ve'etoboda kebu mali tomotoga taiadi i na 'ani. Fita, kumanina nagami tomogo Diu wata mali tomotoga taunidi kebu me Diu siwe 'akonadi i vetumaganaga, matatabuma taiadi 'a 'ani'ani, tovetumagananidi i vo, Vetumagana'ava 'wainega 'a ve'atumi Yaubada mataneyeye, we'e kebu me Diu yadi veimea 'adi vematayakayaka 'waidiega.” Mulieta 'ifwaidi tovetumagana, taunidi tomotoga Diu, Iemesa i vetunediga i le'wai. Tutuyanina Fita i 'isedi i kololo i vo, Tovetumagananidi me Diu yama ve'etoboda i vevematayakeyakedi wata nuanuadi mali tomotoga i vetumaganaga Iesu 'waineyeye bunu 'aibobo i na 'ewai wata ve'etoboda matatabuna i na 'i'idewadi. 'Ai'edi i na 'iseku mali tomotoga taunidi kebu Diu taiadi 'a 'ani'ani, bola i na awavesakoyeku.” Fita yana nuanuananina faifaina enavo i bailedi kebu taiadi i da 'ani'ani.<sup>13</sup> Tovetumagana 'ifwaidi taunidi me Diu, Fita i 'iseni 'ani i baibaila, taunidi wata i kololo i ve'alabaibaila. We'e Banabasa i 'isedi wata i nuani i baila.

<sup>14</sup> Tutuyanina a 'isedi, Iesu Valana 'Atumaina 'ana 'eda mogitana kebu 'waineamo i da nunago, begaidi Fita a voneni 'aila'a matadie a vo, 'Omu mogitana tomogo Diu, siwe basenadi 'u vetumagana Iesu 'waineyeye, sauluva Diu 'u bailedi, mali tomotoga taunidi kebu Diu yadi sauluva 'u 'ewadi. We'e tutuya de'e awale tovetumagana taunidi kebu Diu yamu sauluvayega 'u lulukakadedi me Diu yada sauluva i na vetutuyamedi.

<sup>15</sup> Tamadavo wata inadavo me Diu, bega 'ida wata me Diu, 'ida kebu mali tomotoga kumanidiavo ta golegoledi tosakona.<sup>16</sup> ✧Siwe yada 'aseti vetumagana'ava 'wainega ta



ve'atumai bega ta vo, Egavo ma yadi vetumagana taunidi i na tauyedi Iesu Keliso 'waineye Yaubada i na 'ive'atumaidi, we'e ve'etobodanidi i maiga Mosese 'wainega i na vematayakeyakediga 'waidiega kebu i na ve'atumai.” Wata 'ida bani'odi yada vetumagana ta yatoi Iesu Keliso 'waineye bega ta ve'atumai Yaubada mataneye, 'ada 'ive'atumainina ta velugaiga fai ta vetumagana Keliso 'waineye, we'e kebu ve'etoboda 'adi vematayakayaka 'waidiega. Kebu tamu aitoi 'ana fata i na ve'atumai Yaubada mataneye ve'etoboda 'adi vematayakayaka 'waidiega.

<sup>17</sup> Fai nuanuada ta na ve'atumai Yaubada mataneye bega ta miave'itubama Keliso taiadi. Fai bani'odi ta vetumagana Keliso 'waineye, bega me Diu i vonavona i vo, Tove-tumagananidi tosakona, yada ve'etoboda kebu i da veve-matayakeyakedi, Keliso i kiavebe'udi i sakosakona.” I vekali, kebu bani'odiga. <sup>18</sup> Igodi tomotoga 'adi 'ive'atumai ve'etoboda 'adi vematayakayaka 'waidiega yau a talabodeni, siwe 'ai'edi tutuya de'e a na awave'atumaieni a na vo, Ta na vetumagana siwe wata ve'etobodanidi ta na vematayakeyakedi nika ta na ve'atumai,” mogitana yau Yaubada yana nuanua 'ana togeu. <sup>19</sup> \*Basenadi ma yaku tokemaiga igodi nuanuaku ve'etobodanidi i maiga Mosese 'wainega a da vevematayakeyakedi, siwe kebu 'aku fata bega a bailedi a damana Keliso 'waineye 'wa da vo a da wafa ve'etoboda 'waidiega. A bailedi bega tutuya de'e 'aku fata yaku mia matatabuna 'waidie Yaubada yana nuanua a na vevematayakeyakedi. <sup>20</sup> Tutuyanina Keliso i wafa 'ai lagalagana 'waineye, 'wa da vo yau taiadi 'a da wafa, bega tutuya de'e 'akonadi i ageku yana nuanua a 'i'idewadi, we'e yau tau-niku yaku nuanua a bailedi, bani'odi a wafa 'waidiega. Mogitana ma tomogoku a miamia, siwe yaku mia matatabuna 'ana 'atumaina a veluagai vetumagana 'wainega. Yaku vetumagananina a yato-vagaseni Yaubada Natuna 'waineye, taunina 'aku tonuakalikali wata taunina i tauyeni faifaiku i wafa. <sup>21</sup> Yaubada yana nuakalikalinina 'waideye kebu a da baila, nuanuaku. 'Ako tomotoga ta da ve'atumaiga Yaubada mataneye ve'etoboda 'adi vematayakayaka 'waidiega, Keliso yana wafa i da venani-'avo'avovo, kebu ma lamunaga.

### 3

*Ava'ai 'wainega 'ada 'ive'atumai ta veluagai?*

<sup>1</sup> 'Omi me Galetia, yami sauluva 'ana 'isa 'wa da vo 'ulua nuami i da 'anidi. Basenadi a wai Iesu Keliso yana wafa 'ai lagalagana 'waineye a veifufu-deweni 'waimie,

nika 'wa 'asetai ava'ai faifaina i wafa, siwe tutuya de'e 'akonadi 'wa baibaila. <sup>2</sup> 'Wa da 'asetai ava'ai 'wainega 'Anu'anunu 'Atumaina i agemi. I agemiga kebu ve'etoboda 'adi vematayakayaka 'waidiega, we'e mogitana nagami Iesu Valana 'Atumaina 'wa nogai, ma yami vetumagana taunimi 'wa tauyemi 'waineye nika 'Anu'anunu 'Atumaina i agemi. <sup>3</sup> Awale 'wa ve'wawa'wawa? Yami mia 'ivauna i velamu 'Anu'anunu 'Atumaina yana toketokena 'wainega, siwe tutuya de'e igodi nuanuami taunimi yami toketokena 'wainega 'wa na ve'atumai ve'etoboda 'adi vematayakayaka 'waidiega. <sup>4</sup> Naninidi 'atumaidi 'wa veluagadi Keliso 'wainega kebu nani-'avo'avovoga, ma lamudi. Fai naninidi 'waimie bani'odi nani bwaikidi. <sup>5</sup> Yaubada 'Anu'anununa i tauyeni i agemi, wata 'waimie 'eba nuavogana wata 'eba nua'ewa i 'i'idewadi. I 'i'idewadiga, kebu ve'etoboda 'adi vematayakayaka 'waidiega, we'e mogitana nagami Iesu Valana 'Atumaina 'wa nogai, ma yami vetumagana taunimi 'wa tauyemi 'waineye bega naninidi i souyedi.

<sup>6</sup> ✧Tovetumagana yada 'eba 'isa tamu me Diu tubuma 'ana wagava Ebelamo. Tamu vona i 'eno'eno Yaubada yana Buki nageneye tomogonina faifaina i vo,

Fai Ebelamo i vetumagana Yaubada 'waineye, yana vetumagananina faifaina Yaubada i vo,

Ebelamo yana sauluva matatabuna tonovidi matakuye.”

<sup>7</sup> 'Wa 'iseni, tomotoganidi i vetumagana Yaubada 'waineye, taunidi Ebelamo tubunavo mogitana. <sup>8</sup> ✧Wata tamu vona i 'eno'eno Yaubada yana Buki nageneye i vona-vagata mali tomotoga taunidi kebu Diu 'adi 'ive'atumai Yaubada mataneye faifaina. 'Adi 'ive'atumainina, yadi vetumagana 'wainega Yaubada i 'ive'atumaidi, begaidi vonanina Iesu Valana 'Atumaina faifaina nagami Yaubada i 'inanai Ebelamo 'waineye i vo,

'Waimuyega yau Yaubada ma yaku nuakalikali a na vesauluva 'atumaina tomotoga 'aila'a tulina tulina 'waidie.”

<sup>9</sup> ✧Ebelamo ma yana vetumagana begaidi Yaubada i vesauluva 'atumaina 'waineye, wata egavo i na vetumaganaga, Yaubada i na vesauluva 'atumaina 'waidie, Ebelamo 'waineye bani'odi, kebu tulinaga.

<sup>10</sup> ✧Tomotoga 'ifwaidi i vo, Ve'etoboda i maia Mosese 'wainega 'a na vematayakeyakediga 'a na ve'atumai Yaubada mataneye,” siwe 'akonadi Yaubada i veimea tomotoganidi vematavuloga i na veluagai fai ve'etobodanidi i geugeudi. Vita i na velugaiga fai tamu vona i 'eno'eno Yaubada yana Buki nageneye i vo,

Egavo Yaubada yana ve'etoboda kilukilumidi matatabuna kebu i na vevematayakeyakedi tutuya matatabuna 'waidie, 'awaie 'adi vematavuloga i na veluagai Yaubada 'wainega, i na wafaotoga.”

11 ✨De'e vonanina 'wainega ta 'asete-'atumai Yaubada tomotoga i na 'ive'atumaidiga kebu ve'etoboda 'adi vematayakayaka 'waidiega we'e mogitana yadi vetumagana 'wainega fai tamu vona Yaubada yana Buki nageneye i vo,

Egavo yadi vetumagana 'wainega yadi sauluva i na tonova Yaubada mataneyeye,

Mia 'atumaina wata miamia-vagaina i na veluagai.”

12 ✨We'e ve'atumai ve'etoboda 'adi vematayakayaka 'waidiega wata ve'atumai vetumaganayega kebu taiadi i da vesala. 'Ai'edi nuanuami igodi 'wa na ve'atumai ve'etoboda 'waidiega, kebu 'ana fata 'aivaita 'wa na veluagai vetumagana 'wainega. Tamu vona i 'eno'eno Yaubada yana Buki nageneye i vo,

'Ai'edi aitoi ve'etoboda matatabuna i na vevematayakeyakedi, kebu tamu nani i na baileni, 'ana fata mia-vagata i na veluagai.”

Siwe a nuani kebu 'ana fata ve'etobodanidi matatabuna ta na vevematayakeyakedi. <sup>13</sup> ✨Yaubada yana Buki nageneye i vonaga i vo,

'Ai'edi aitoi i na sakona bwaikina i lubwaineni 'ana vematavuloga i na wafa, 'wa na luvewafaiga tomogona 'wa na sifwaseni 'ai 'waineye, fai tomotoganina tosakona bega Yaubada wata i na veimea 'ana vematavuloga faifaina.”

Wata 'ida bani'odi, fai Yaubada yana ve'etoboda ta geudi i lubwaineda 'ada vematavuloga wafaotoga yada sakananidi faifaidi, siwe Keliso i mai, 'ai lagalagana 'waineye i tutufwaseni 'ada vematavuloga i tovoieni i wafa faifaida. Yana wafanina 'wainega i tuveobuda sakona 'wainega, kebu wata ve'etoboda i na veimeyeda. <sup>14</sup> Basenadi Yaubada yana vona'awaufaufa 'wainega i vesauluva 'atumaina Ebelamo 'waineye, tutuya de'e 'ima me Diu wata 'omi mali tomotoga Iesu Keliso yana wafa 'wainega Yaubada i vesauluva 'atumaina 'waideye Ebelamo 'waineye bani'odi. Fai ta vetumagana Keliso i wafa yada sakona 'adi nuatavuna faifaidi, ta ve'atumai Yaubada mataneyeye wata 'Anu'anunu 'Atumaina basenadi Yaubada i vona'awaufaufa i na veledaga, 'akonadi i ageda.

*Yaubada i vona'awaufaufa-vagata, kebu 'ana fata yana nu-anua i na sivilai.*

15 Ekwavo, 'omi tovetumagana, nuanuaku Yaubada yana vona'awaufaufa a na awatalatutuleni tamu yada sauluva 'wainega. 'Ai'edi tomotoga 'adi 'ailuga yadi nuanua i na vesala tamu nani i na 'idewaiga faifaina, 'adi 'ailuga 'adi wagava i na kilumidi yadi vona'awaufaufanina 'ana lubulubu 'waineye bega kebu tamu aitoi 'ana fata i na 'u'umi 'alo tamu nuanua tulina i na kilumi. Wata bani'odi Yaubada, fai taunina yana sauluva 'atumai'avana kebu tamu sai'afo yana vona'awaufaufa i na geuya. 16 \*Basenadi Yaubada i vona'awaufaufa Ebelamo wata tubuna 'waidie i vo, 'Waimiega a na vesauluva 'atumaina tomotoga matatabuna 'waidie.” 'Wa 'iseni, Yaubada kebu i da vo, Ebelamo wata tubunavo 'waidie,” we'e i vonaga tubuna 'aitamogana faifaina, tubunanina taunina Keliso. 17 \*Yaku vona 'ana 'asetai side bani'odi. Yaubada yana vona'awaufaufanina 'asa'aiana yana veakutagona. Ebelamo 'wainega malamala 430 i 'a'avana mulieta yana ve'etoboda i yatodi Mosese 'waineye, siwe ve'etobodanidi kebu 'adi fata Yaubada yana vona'awaufaufanina i na geuya wata yana veakutagonanina i na venani-'avo'avovo. 18 \*'Ai'edi ve'etoboda 'adi vematayakayaka 'waidiega 'ada nuakalikali Yaubada i da veledaga, 'ako kebu ta da veluagadiga yana vona'awaufaufa 'wainega. We'e mogitana Yaubada ma yana nuakalikali i vesauluva 'atumaina Ebelamo 'waineye wata 'ida 'waideye fai nagami i vona'awaufaufa.

19 \*Voke 'ifwaimi 'wa na velutoli 'wa na vo, Vetuma awale Yaubada ve'etoboda i yatodi?” Nagami Yaubada yana vona'awaufaufa i veleda, mulieta ve'etoboda i yatodi bega 'ai'edi tomotoga i na vesauluva sakoina, 'adi fata i na 'asetai i sakona Yaubada mataneye. Yaubada nuanuana yana ve'etobodanidi ma yadi toketokena i na 'eno'eno i na nagoga Keliso yana mai 'waineye i na 'a'ava. Kelisonina taunina Ebelamo tubuna, kumanina faifaina basenadi Yaubada i vona'awaufaufa. Yaubada yana ve'etoboda i 'anivelenedi Mosese 'waineye, nagami anelose i veledina mulieta i 'anivelenedi Mosese 'waineye. Mosese i 'ewadina i lu'ivoneyedi tomotoga 'waidie. 20 We'e yana vona'awaufaufa kebu tamu aitoi i da velenina bega i da 'aniveleneni Ebelamo 'waineye, fai yana vona'awaufaufanina nani 'atumaiotogina bega Yaubada tauniotogina i 'aniveleneni Ebelamo 'waineye.

21 \*Voke 'ifwaimi 'wa na velutoli 'wa na vo, Yaubada yana ve'etoboda i yatodiga, we'e yana vona'awaufaufa bani'odi? I awavesakoyeni?” Kebu i da awavesakoyeniga fai 'ai'edi tamu ve'etoboda 'ana vematayakayaka 'wainega mia 'ivauna wata

\* 3:16: Luk 1:54-55; Nag 12:7    \* 3:17: Fol 7:6    \* 3:18: Lom 4:14; 11:6

\* 3:19: Lom 5:20    \* 3:21: Lom 8:2-4

miamia-vagaina ta da veveluagaiga wata 'waidiega ta da veve'atumaiga Yaubada mataneyeye 'ako vona'awaufaufa 'ana 'eda kebu i da 'idewai siwe yana vona'awaufaufa i 'idewai bega ta na ve'atumai mataneyeye we'e kebu 'ana fata 'aivaita ta na veluagai ve'etoboda 'waidiega. <sup>22</sup> ✧We'e tamu vona i 'eno'eno Yaubada yana Buki nageneyeye i vo,

Tomia fwayafwaya matatabudi i sakona, 'wa da vo sakona i da veveimeyedi.”

We'e egavo i na vetumagana Iesu Keliso 'waineyeye i na ve'atumai Yaubada mataneyeye wata mia 'ivauna miamia-vagaina taiadi i na veluagai. Naninidi Yaubada yana 'anivelena-maimaiga, bani'odi basenadi i vona'awaufaufa i na veleda vetumagana 'wainega.

<sup>23</sup> Bola Keliso kebu i da maiga, Yaubada ve'etoboda i yatodi i veve'isabodeda 'wa da vo i da yogonida, i nagoga nika Yaubada Keliso i sivemageseni, bega 'ada fata ta na vetumagana 'waineyeye. <sup>24</sup> Nagami ve'etobodanidi bani'odi 'ada to'isave'avina i awave'ede'ededa i nagoga mulieta Keliso i mai bega 'ada fata ta na ve'atumai Yaubada mataneyeye yada vetumagana 'wainega. <sup>25</sup> Yada vetumagana bei ta na yatoiga 'akonadi i mai bega tutuya de'e ve'etobodanidi kebu wata i na 'i'isave'avinida.

*'Ida Yaubada natunavo.*

<sup>26</sup> ✧Fai 'wa vetumagana, Iesu Keliso taiadi 'wa miave'itubama nika 'omi matatabumi Yaubada natunavo. <sup>27</sup> ✧Mogitana 'omi Yaubada natunavo fai tutuyanina 'wa bafitaiso taunimi 'wa tauyemi Keliso 'waineyeye, i agemi taiadi 'wa miave'itubama. <sup>28</sup> ✧Fai 'wa miave'itubama Iesu Keliso taiadi, matatabumi 'wa vesala Yaubada mataneyeye, me Diu wata taunidi kebu me Diu, tofолоva-maimaiga wata tomotoga yavuyavudi, iaveta wata vevine, matatabuda ta miave'itubama Keliso taiadi, bega 'ida 'aila'a 'aitamogana. <sup>29</sup> Fai 'omi Keliso yana tomotoga, wata 'omi Ebelamo tubunavo mogitana. Wata fai 'omi Keliso yana tomotoga naninidi 'atumaidi basenadi Yaubada i vona'awaufaufa Ebelamo 'waineyeye 'ami veuveuta 'wa na veluagadi.

## 4

<sup>1-2</sup> Yaku vona 'ana 'asete side bani'odi. 'Ai'edi tamu tomogo 'ai'aiwabuna yana wafa i na velilivana tamu lubulubu i na kilumi yana kukua 'awaie natuna i na 'ewadiga faifaina. Kwamananina bola siaineyeye tamana i na wafa, taunina wata yana kukua 'ana to'isave'avinavo i na veveimeyedi. Kukuanidi matatabuna tamana i 'iawediga kwamananina yana kukua,

siwe fai bola siaina kebu tamu yana veimea i da 'eno'eno, kukuanidi kebu i na 'abitonovidi, taunina bani'odi tofolova-maimaiga. Mulieta malamalanina tamana i yatoiga i na velu-againa i na velamu kukuanidi i na 'ewadi i na veveimeyedi. <sup>3</sup> \*Wata 'ida bani'odi bola nuada kebu i da magetadiga, yaiaina kumanidiavo ma yadi veimea fwayefwayeye, wata yada veimea tubudavo 'waidiega i veveimeyeda 'wa da vo ta da vetofolova-maimaiga 'waidie. <sup>4-5</sup> \*Siwe Yaubada yana tutuyanina i yatoiga i veluagai, taunina Natuotogina i voneni i vetomotogaotoga i mai fwayefwayeye. I maiga taunina i tauyeni me Diu yama ve'etoboda i ve'ililibuyedi bega tomotoganida ve'etobodanidi i veveimeyedaga i tuveobuda nika 'ida Yaubada natunavo.

<sup>6</sup> \*Fai 'omi wata 'ima Yaubada natunavo, Natuna 'Anu'anununa i voneni i agheda nika 'Anu'anununa yana 'aivaita 'wainega ta vevegole ta vo, Tamaku, ie Tamaku.”

<sup>7</sup> \*Begaidi yaiaina wata ve'etoboda tubudavo 'waidiega kebu wata i na veveimeyemi, 'akonadi i 'a'ava, we'e mogitana 'omi natunavo. Wata fai 'omi natunavo veuveutanidi 'atumaidi natunavo faifaidi, 'omi wata i na velemini.

*Faulo i venuafouviga me Galetia faifaidi.*

<sup>8</sup> \*Basenadi Yaubada 'wa bavuyeni bega taunimi 'wa tauyemi ve'etoboda tubumiavo 'waidiega wata yaiaina 'waidie, naninidi igodi yami yaubadavo i veveimeyemi.

<sup>9</sup> Tutuya de'e 'akonadi Yaubada 'wa 'asetai wata 'wa veianeni, we'e mogitana ta na vo Yaubada i 'asetami wata i veianemi, begaidi 'ai'edi nuami i na viladi naninidi 'waidie kebu i da lubwainemi. Yaiaina wata ve'etobodanidi nani mweadi, kebu 'aivaita 'wa na veluagai 'waidiega, siwe awale nuanuami taunimi 'wa na tauyemi naninidi 'waidie i na veimeyemi basenadi bani'odi? <sup>10</sup> \*Basenadi ve'etoboda fuedi 'adi vematayakayaka vitadi 'wa veve'ililibuyedi siwe

Keliso i 'etoyavumi ve'etobodanidi 'waidiega. We'e tutuya de'e ve'etobodanidi vitadi 'wa vevematayakeyakedi, bani'odi 'aiata 'ifwaidi, weta'i 'ifwaidi, tutuya 'ifwaidi wata malamala 'ifwaidi 'wa veve'ililibuyedi wata igodi 'wa vo, Tutuyanidi 'waidie ta na tafalolo, Yaubada i na awave'atumaieda.”

<sup>11</sup> Yau a venuafouviga, i na nunago yaku folova nagami a waiga 'waimie i na venani-'avo'avovo.

<sup>12</sup> Ekwavo, nuanuaku bwaikina yaku sauluva 'wa na vevetutuyamedi, fai basenadi a salami. Basenadi a waiga 'waimie kebu tamu nani sakoina 'wa da 'idewai 'waikuye 'wa 'isave'aviniku 'atumaina. <sup>13</sup> \*Wa na nuani basenadi

\* 4:3: Kolos 3:20-23    \* 4:4-5: Ion 1:14; Lom 8:3-4    \* 4:6: Lom 8:15-16

\* 4:7: Lom 8:17; Gal 3:29    \* 4:8: 1 Kol 8:4-6    \* 4:10: Kolos 2:16    \* 4:13:

1 Kol 2:3

igodi a da nago tamu 'awalawa 'waineye, nika fai a viga a wai 'waimie. Bei ta miamia 'waimie a lau'age-vauvau Iesu Valana 'Atumaina faifaina. <sup>14</sup> Fai a viga 'aku 'isa sakoina wata 'aku 'isave'avina vitana siwe kebu 'wa da baila wata kebu 'wa da dumwe'aieku, we'e mogitana ma yami sosoana 'wa lu'uma'umaieku wata 'wa 'isave'aviniku, 'wa da vo yau tamu anelose Yaubada 'wainega 'alo Iesu Keliso tauniotogina. <sup>15</sup> Taiadi ta miamiaga, a 'isemi 'wa sosoana bwaikina, yami sosoananina ava'aibe i nago? A 'asetami mogitana bega 'aku fata a na lu'ivona tomotoga 'ifwaidi 'waidie ma yami sosoana 'wa 'ivaisekuga faifaina. Kebu tamu nani 'atumaina 'wa da ve'o'oleni, 'ako i da lubwaineniga matami 'wa da kiamwanudi 'wa da veleku i da 'ivaiseku. <sup>16</sup> ✧ We'e tutuya de'e yaku vona tonovidi yami sakona faifaidi voke 'wa nuasako 'waikuye.

<sup>17</sup> Tove-vekavekalinidi taiadi 'wa miamiaga, kumanidiavo Iesu Valana 'Atumaina 'ana to'ivesako, i dumwebika kebu yami 'atumaina faifaina, i vevewavawava nuanuadi nuami i na 'ewadi bega 'omi yadi tomotoga. Nuanuadi bwaikina yau 'wa na baileku ma'itufa yadi nuanua 'waineye 'wa na luku ma yami dumwebika 'wa na vematayakeyakedi. <sup>18</sup> 'Ai'edi tamu nani 'atumaina faifaina ta na dumwebikaga i lubwaineda. Yau taiadi ta miamia 'wa dumwebika, we'e mogitana i lubwainemi tutuya matatabuna 'wa na dumwebika. <sup>19</sup> 'Omi natukwavo, a nuakalikiemi. Yau 'wa da vo vavine i da vebutudi i da veveviga, tutuya de'e ma yaku venuafou-viga a veveviga faifaimi basenadi bani'odi. Veviganina i na nagoga Keliso i na agemi mogitana nika a na sosoana faifaimi. <sup>20</sup> Nuanuaku taiadi ta da miamia, yaku vona toketokedi a da bailedi, bikadiega a da 'ivaisemi. A nuanua bwaikina, bani'odi a na munega a na 'ivaisemi?

*Faulo yana ve Ega wata Sela 'waidiega.*

<sup>21</sup> 'Omi nuanuami ve'etoboda Mosese 'wainega i na veveimeyemiga a na vonemi. Ve'etobodanidi wata 'ifwaidi Mosese 'ana kilukiluma 'wa da vo 'omi kebu 'wa da 'asetadiga. <sup>22</sup> ✧ Tamu yana vona side bani'odi. Ebelamo yana vevinevo 'adi 'ailuga, tamu yana vavine mogitana 'adi wagava Sela, we'e tamu 'adi wagava Ega, taunidi Sela yadi tofolova-maimaiga. Ebelamo natunavo 'adi 'ailuga, tamu yana vavine mogitana 'waidiega, tamu tofolova-maimaiga 'waidiega. <sup>23</sup> ✧ Natuna tamu 'ana wagava Aisake, fai Yaubada i vona'awaufaufa Ebelamo 'waineye, yana vavine mogitana 'waidiega i tubuga. We'e Isimeli i tubuga tofolova-maimaiga

'waidiega kebu vona'awaufaufa 'wainega, 'ida matatabuda ta tubuga bani'odi.

24-25 ✧Vevinenidi 'adi 'ailuga bani'odi veakutagona 'ailuga Yaubada i 'idewadi tomotoga faifaida. Yana Veakutagona Nagami i 'idewai 'Oya Sainai 'waineye 'awalawa Aleibia nageneye. Bei Yaubada yana ve'etoboda Mosese i veleni, 'ai'edi tomotoga ve'etobodanidi matatabuna i na veve-matayakeyakedi i na ve'atumai Yaubada mataneye.

Ega, Ebelamo yana tofolova-maimaiga taunidi bani'odi Veakutagonanina Nagami 'Oya Sainai 'wainega. Taunidi natudiavo taiadi tofolova-maimaiga, wata bani'odi tomotoganidi ve'etoboda i veveimeyediga 'wa da vo i da vetofolova-maimaiga ve'etobodanidi 'waidie. Wata Ega bani'odi Ielusalema tutuya de'e 'waineye. 'Atamananina 'ana tomotoga, taunidi me Diu, ve'etobodanidi i veveimeyedi.

[We'e Yaubada tamu yana veakutagona i 'idewai Iesu yana wafa 'wainega, Veakutagonanina 'Ivauna faifaina nagami i vona'awaufaufa Ebelamo 'waineye i na souyeni tamu yana 'aila'a 'wainega. Egavo i na vetumagana Iesu 'waineye i na ve'atumai Yaubada mataneye wata yavuyavudi ve'etoboda 'adi vematayakayaka 'waidiega.

Sela, Ebelamo yana vavine mogitana, taunidi bani'odi veakutagonanina Yaubada i 'idewaiga Iesu 'wainega. Sela kebu i da vetofolova-maimaiga wata 'ida Iesu 'ana tovetumaganavo ve'etoboda kebu i da veveimeyeda, vetumagana'ava 'wainega ta ve'atumai Yaubada mataneye.]

26 ✧Wata Sela bani'odi Ielusalema 'Ivauna abame, 'atamananina 'ida tovetumagana yada 'eba mia mogitana, bei tomotoga matatabuda yavuyavuda. 27 ✧Tamu vona-awatabai i 'eno'eno Yaubada yana Buki nageneye Ielusalema 'Ivauna faifaina, 'atamananina bwaikina wata 'ana tomotoga fueotogidi, kebu Ielusalema nagami bani'odi, bega i vo,

'Omi vavinenimi kebu natumiga wata venatuna 'ana veviga kebu 'wa da vebaemi, 'wa na sosoana bwaikina.

'Omi yami lalamogavo i 'iawemiga ma yami sosoana 'wa na 'oluga fai 'awaie natumiavo fuedi,

We'e vavinenidi ma yadi lamoga natudiavo kebu fuediga.”

28 Basenadi Yaubada i vona'awaufaufa Ebelamo 'waineye natuna iavetana i na tubuga, mulieta Aisake i tubuga. We'e ekwavo 'omi tovetumagana wata bani'odi, fai Yaubada i vona'awaufaufa, bega 'omi natunavo. 29 Isimeli yana tubuga 'ida matatabuda yada tubuga bani'odi, Isimeli i veve'oyaneni Aisake vita i veveluagai, kumanina i tubuga Yaubada 'Anu'anununa yana toketokena 'wainega. Wata 'ida



bani'odi tutuya de'e 'waineye, 'ida Keliso yana 'Aila'a vita ta veveluagadi ve'etoboda 'adi tovetumatayakayaka 'waidiega.  
<sup>30</sup> \*Siwe tamu vona i 'eno'eno Yaubada yana Buki nageneye vita 'ana to'anivelena faifaidi i vo,

Vavinenidi tofolova-maimaiga ma natudi 'u na veugegedi, bega 'awaie kebu tamu veuveuta natudi i na veluagai tamana 'wainega, we'e yana vavine mogitana natudi veuveuta matatabuna i na 'ewadi tamana 'wainega."

<sup>31</sup> 'Ida kebu tofolova-maimaiga natunavoga, we'e mogitana 'ida tovetumagana, Keliso i yavuda ve'etoboda 'adi vematayakayaka 'waidiega.

## 5

*Keliso i yavudaga, yavuyavumi 'wa na miamia.*

<sup>1</sup> \*Keliso i yavuda ve'etoboda 'adi vematayakayaka 'waidiega nuanuana yavuyavuda ta na miamia. Fai yavuyavumi 'wa na tovoi fa'alina taunimi 'wa na 'i'isave'avinimi bega kebu tamu aitoi i na yogonimi ve'etoboda 'waidiega, i na nunago 'wa na vetofolova-maimaiga ve'etoboda 'waidie basenadi bani'odi.

<sup>2</sup> Yau Faulo a na vonemi, nuanuaku yaku vona 'wa na 'ewadi. 'Ai'edi taunimi 'wa na tauyemi Yaubada yana tugusa me Diu faifaidi bunu 'aibobo 'wa na 'ewai, bega 'wa na vo, Bunu 'aibobo 'wainega 'a na ve'atumai Yaubada mataneye," kebu tamu sai'afo 'ita'ita'i 'wa na veluagai Keliso 'wainega. <sup>3</sup> Yaku vonanina vona mogitana, bega nuanuaku wata a na luvaitugani. 'Ai'edi aitoi i na vo, Bunu 'aibobo a na 'ewai bega a na ve'atumai Yaubada mataneye," i lubwaineni ve'etoboda i maia Mosese 'wainega matatabuna i na vevematayakeyakedi. <sup>4</sup> Egavo igodi nuanuami 'wa na ve'atumai Yaubada mataneye ve'etoboda 'adi vematayakayaka 'waidiega, 'akonadi 'wa 'awa'idimi Keliso 'wainega wata Yaubada yana nuakalikali 'wainega 'akonadi 'wa souyemi. <sup>5</sup> We'e 'ida Iesu 'ana tovetumaganavo ta vetumagana ta nuani mogitana Yaubada i na 'ive'atumaida, 'ada 'ive'atumainina faifaina ta lulukamata, 'Anu'anunu 'Atumaina yana 'aivaita 'wainega yada vetumagananina fa'alina. <sup>6</sup> Mogitana ta na ve'atumai fai 'akonadi ta miave'itubama Iesu Keliso taiadi bega 'ai'edi bunu 'aibobo basenadi ta 'ewai 'alo kebu, kebu tamu ava'ai. We'e nani bwaikina ma yada vetumagana taunida ta tauyeda Keliso 'waineye, yada vetumagananina vuagina ta nunuakalikali.

<sup>7</sup> Nagami yami vetumagana Keliso 'waineye toketokena 'wa da vo 'wa da lililide 'atumaina, we'e tutuya de'e 'ana 'isa

'wa da vo tamu aitoi i da yogobodemi 'wa 'ailove, Yaubada yana nuanua tonovidi kebu 'wa da vevematayakeyakedi. <sup>8</sup> Ava'ai 'alo aitoi nuami i 'ewadi bega 'wa 'ailove? A nu-aniga Yaubada kebu, Yaubadanina kumanina i golegolemi bega 'omi yana tomotoga. <sup>9</sup> Walabo 'aluna nani siaina, siwe 'ana fata 'aisayanina matatabuna i na 'ivesakoi. Wata 'omi bani'odi, tove-vekavekali kebu fuediga siwe yadi ve 'ana fata matatabumi yami vetumagana i na 'ivesakodi. <sup>10</sup> We'e yau a 'asetami, yada miave'itubama 'ada Toveimea Iesu taiadi 'wainega a nuani mogitana yami nuanua i na vesala yau yaku nuanua bani'odi. Wata a nuani tomotoganina nuami i 'ivegaudi wata i fetomiga, kumanina kebu a da 'asetai, 'ana vematavuloga i na veluagai Yaubada 'wainega.

<sup>11</sup> ✧Ekwavo, we'e tomotoga 'ifwaidi i vonavona i vo, Paulo yana lau'age 'waineye i vonaga bunu 'aibobo ta na 'ewai nika ta na ve'atumai Yaubada mataneyeye." Mogitana basenadi bani'odi a lu'ageyedi, mulieta a vetumagana Iesu 'waineye nika a baila. 'Ai'edi tutuya de'e bani'odi a da lalau'ageyediga bunu 'aibobo faifaina 'ako vita kebu a da veveluagadiga tomotoganidi bunu 'aibobo i awave'atumaieniga 'waidiega. Fai tomotoga ma yadi nuasako vita i veleveleku, 'eba 'isa kebu a da lalau'agega bunu 'aibobo faifaina, we'e mogitana a lalau'age Keliso i wafa 'ai lagalagana 'waineye bega ta na vetumaganamo 'waineye ta na ve'atumai Yaubada mataneyeye. <sup>12</sup> We'e tomotoganidi nuanuadi bunu 'aibobo, kumanidiavo yami vetumagana i 'ivemweadi, nuanuaku vigodi taiadi i da bobo-otogidi.

*'Anu'anunu 'Atumaina yana nuanua ta na 'i'idewadi.*

<sup>13</sup> ✧Ekwavo, 'omi Yaubada i golemi, nuanuana yavuyavumi 'wa na miamiani. Mogitana 'akonadi 'omi yavuyavumi siwe kebu 'wa na vo, Ve'etoboda kebu i da veveimeyemaga, vetumagana'ava 'wainega 'a ve'atumai Yaubada mataneyeye, bega 'ama fata 'a na sakosakona." Bunu 'ana nuanua sakoidi kebu nuami i na 'ewadiga, we'e mogitana ma yami nuakalikali ma emiavo 'wa na ve'ivaivaita. <sup>14</sup> ✧Yaubada yana ve'etoboda wata yana veimea matatabuna 'adi 'itava 'aitamogana, i vo, Emiavo 'wa na nuakalikali, taunimi 'ami nuakalikali bani'odi." <sup>15</sup> Siwe 'ai'edi venuakalikali 'wa na baila, 'wa na 'isa'isa i na nunago ma emiavo 'wa na nuavita wata 'wa na nuasako nika 'aila'aniami matatabumi 'wa na 'ivesakomi.

<sup>16</sup> ✧Bega'idi a na vonemi, yami mia matatabuna 'waidie 'Anu'anunu 'Atumaina 'wa na tauyeni i na agemi mogitana bega taunina 'ami tokiavetovetonova nika kebu 'ami fata 'wa na tauyemi taunimi yami nuanua sakoidi 'adi

nuagiva 'waidie. <sup>17</sup> ✱Naninidi yada nuanua sakoidi nu-anuadi, wata naninidi 'Anu'anunu 'Atumaina nuanuana tutuya fuedi i veveyo'eyo'eyeda. 'Anu'anunu 'Atumaina wata taunida yada nuanua sakoidi 'adi 'ailuga i vevegavia, bega 'ai'edi 'Anu'anunu 'Atumaina yana nuanua 'wa na vevematayakeyakediga kebu 'ami fata taunimi yami nu-anua 'wa na 'i'idewadi. <sup>18</sup> ✱'Ai'edi 'Anu'anunu 'Atumaina i na awave'ede'edemi yana nuanua 'wa na 'i'idewadiga, ve'etoboda i maiaga Mosese 'wainega yadi toketokena i 'a'ava 'waimie, kebu wata i na veveimeyemiga.

<sup>19</sup> Naninidi tomotoga i 'i'idewadi taunidi yadi nuanua 'waidiega mageseye, matatabuda ta 'asetadi. Naninidi side. Ve'avula-'avo'avovo, sakona tulina tulina 'eba bunumayaga, wata bunu 'ana nuanua sakoidi. <sup>20-21</sup> Wata i 'odu'odu kumaea 'waidie igodina yadi yaubadavo, balau, bwalata wata filo nuadi i 'ewadi. I vevedumwe'ai'ai, i veve'alamagi'ai, i veve'unumagigi, i nunuasako, taunidi yadi vebwaika 'aisena faifaina i nuanua. I veve'idi'idi, 'aila'a 'aitamogana 'aitamogana taunidi 'aisedi faifaidi i nuanua, i nunuagiva ediavo yadi kukua faifaidi, ufa toketokena i toke i yemuyemu nuadi i lulugaugaudi, naninidi 'eba bunumayaga i 'i'idewadi, wata nani 'ifwaidi sakoidi i 'i'idewadi. Basenadi a matakia 'waimie sauluvanidi faifaidi, tutuya de'e wata a luluvaitugani. Egavo naninidi de'e bani'odi i 'i'idewadiga kebu 'ana fata Yaubada i na veveimeyedi yana 'Aila'a nageneye bega 'adi veuveuta i na veluagai 'wainega.

<sup>22</sup> ✱We'e 'ai'edi 'Anu'anunu 'Atumaina yana nuanua ta na 'i'idewadi, side naninidi i na souyedi. Venuakalikali, tutuya fuedi ta na sososoana, nuanua bikadi mia 'atumaina taiadi ta na veveluagadi, ta na totokemaiga vita 'waidie, ma yada nuakalikali ta na vevesauluva 'atumaina edavo 'waidie, yada sauluva i na tonova wata dumweda i na bika ma 'ada vetumagana. <sup>23</sup> Ta na nunuaobu wata taunida yada sauluva ta na 'i'isave'avinidi. Naninidi kebu tamu 'adi 'eba ve'etobodaga. <sup>24</sup> ✱Egavo i miave'itubamaga Iesu Keliso taiadi, taunidi yadi nuanua matatabuna wata bunu 'ana nuanua sakoidi, 'akonadi i bailedi, 'wa da vo i da tutufwasedi Keliso 'ana 'ai lagalagana 'waineye i da wafa. <sup>25</sup> Mia 'ivauna wata 'atumaina 'akonadi ta veluagadi 'Anu'anunu 'Atumaina 'wainega, i lubwaineda taunida ta na tauyeda yana nu-anua 'waidie i na veveimeyeda. <sup>26</sup> ✱Kebu taunida ta na awa'ai'aida, kebu edavo ta na 'ivelogilogidi yada sauluva 'waidiega i na nunago i na nuasako, wata emiavo kebu 'wa na ve'unumagigiediga.

✱ 5:17: Lom 7:15-23 ✱ 5:18: Lom 6:14 ✱ 5:22: Mad 7:16-20; Efe 5:8-9

✱ 5:24: Kolos 3:5 ✱ 5:26: Fil 2:3

## 6

*Ma emiavo 'wa na ve'ivaivaita.*

<sup>1</sup> ✱Ekwavo, 'ida matatabuda tovetumaganavo, 'ai'edi tamu iada tamu sauluva sakoina 'waineye i na be'uga, 'omi 'Anu'anunu 'Atumaina yana nuanua 'adi to'idewadewa, bonami bikadiega tomogonina 'wa na kiavetonovi. We'e 'omi taunimi 'wa na 'i'isave'avinimi i na nunago sailubu 'wainega tamu sauluva sakoina 'waineye 'omi wata 'wa na be'u. <sup>2</sup> ✱'Ai'edi emiavo vita i na veluagadi 'wa na 'ivaisedi. Yami 'aivaita 'waidiega Keliso yana veimea 'wa na vematayakeyakeni. <sup>3</sup> We'e 'ai'edi aitoi taunina i na awa'ai'aia i na vo, Yau tomogo bwaikiku,” we'e mogitana taunina tomogo-'avo'avovo, yana vonanina 'ana noga-gaya vekali. <sup>4-5</sup> ✱'Aitamogana 'aitamogana nagami taunimi yami sauluva 'wa na nuanidi nika 'ami fata 'wa na 'asetadi 'atumaidi 'alo sakoidi. 'Ai'edi 'atumaidi, 'ami fata 'wa na fwausa naninidi 'wa 'idewadiga faifaidi. Wata kebu 'wa na vo, 'Ima yama sauluva 'atumaiotogidi, emavo sai'afo,” we'e mogitana i lubwainemi 'aitamogana 'aitamogana taunina yana sauluva i na 'i'isave'avinidi, we'e enavo yadi sauluva kumanina kebu 'adi toveimea.

<sup>6</sup> ✱'Ai'edi aitoi yana tove i veve 'waineye Yaubada yana Vona, tomogonina i lubwaineni yana tove i na 'ivaiseni, naninidi 'atumaidi 'waineye, 'waidiega i na 'aivaita.

*'Ai'edi tamu ava'ai ta na bakuliga, 'awaie wata ta na veluagai.*

<sup>7</sup> 'Wa na venua'ivina-'atumaiga, vona de'e 'wa na 'asetai. Kebu 'ami fata Yaubada 'wa na vekalieni bega sauluva 'atumaidiega yami sakona 'wa na velubwasabwasadi. 'Ai'edi aitoi tamu ava'ai i na bakuliga, naninina 'awaie wata i na alai, wata bani'odi yada sauluva fwayefwayeye Yaubada i na tutulidi, 'atumaidi, wata 'atumaidi 'waidiega, sakoidi, wata sakoidi 'waidiega. <sup>8</sup> ✱'Ai'edi aitoi taunina yana nuanua sakoidi 'waidie i na bakulaga, 'awaie vuagina i na veluagai wafaotoga. We'e 'ai'edi aitoi taunina i na tauyeni 'Anu'anunu 'Atumaina yana nuanua i na 'i'idewadi, 'wa da vo bei i da bakula, vuagina i na veluagai mia 'atumaina wata miamia-vagina. <sup>9</sup> ✱Begaidi tutuya matatabuna 'waidie ta na vevesauluva 'atumaina, 'ai'edi kebu ta na 'abiawa, 'awaie 'aiala 'ana tutuye vuaga 'atumaidi ta na veluagadi. <sup>10</sup> Begaidi 'ai'edi egavo ta na 'isedi nuanuadi 'aivaita i lubwaineda matatabudi 'waidie ta na vesauluva 'atumaina, we'e

✱ 6:1: Mad 18:15 ✱ 6:2: Lom 15:1-2 ✱ 6:4-5: 2 Kol 13:5; Lom 14:12 ✱ 6:6: 1 Kol 9:11,14 ✱ 6:8: Ion 3:6, 6:63; Lom 8:13 ✱ 6:9: 2 Tes 3:13; 1 Kol 15:58

mogitana edavo Keliso yana 'Aila'a 'waidie, 'ida ma fueda ta vetumagana 'waineye ta na 'i'ivaisedi.

*Faulo yana velu'ase'ase wata yana 'alanuai 'adi 'eba ve'a'ava.*

<sup>11</sup> De'e bei yaku leta 'ana tokiluma a voneni i 'ailove, yau tauniku a na ve'a'avai. 'Wa na 'iseni nimaku, vona matadi bwaikidi a kilumidi.

<sup>12</sup> \*Tomotoganidi i lulukakademi nuanuadi bunu 'aibobo 'wa na 'ewai, taunidi 'adi subia 'aisena faifaina i nuanua, nuanuadi tomotoga i na awa'ai'aidi tomogodi 'adi ve'etoboda 'adi vematayakayaka faifaiddi. Bunu 'aibobo i awave'atumaieniga fai kebu nuanuadi vita i na veluagai Keliso faifaina. 'Ai'edi i da vo, Keliso i wafa 'ai lagalagana 'waineye bega aitoi i na vetumagana 'waineye, yana vetumagana'ava 'wainega i na ve'atumai Yaubada mataneye," tomotoga fuedi i da nuasako vita i da veleveledi. Siwe i baila, kebu nuanuadi vita i na veluagai bega nuanuadi bunu 'aibobo. <sup>13</sup> Bunu 'aibobo i 'ewai, siwe ve'etoboda 'ifwaidi kebu i da vevematayakeyakedi. Nuanuadi 'omi bunu 'aibobo 'wa na 'ewai bega taunidi i na awa'ai'aidi i na vo, Yama vona 'waidiega bunu 'aibobo i 'ewai, taunidi yama tomotoga."

<sup>14</sup> \*We'e yau, kebu tamu sai'afo tauniku a na awa'ai'aiku tamu ava'ai faifaina, 'ada Toveimea Iesu Keliso i wafa 'ai lagalagana 'waineye 'aiseotogina a na awa'ai'aia. Fai Keliso i wafa faifaiku 'ai lagalagana 'waineye, fwayafwaya 'ana nuanua matatabuna a bailedi 'wa da vo a da wafa 'waidiega, wata tomotoga fwayafwaya 'ana nuanua 'waidie bwaikina kebu nuanuadi yau, fai 'wa da vo wafawafaku. <sup>15</sup> \*Voke bunu 'aibobo basenadi ta 'ewai 'alo kebu, siwe kebu tamu ava'ai. We'e nani bwaikina Yaubada i 'ive'ivauda ta vetuli. <sup>16</sup> Egavo Yaubada i 'ive'ivaudiga faifaiddi a vevelu'ui. Nuanuaku nuanua bikadi mia 'atumaina taiadi Yaubada i na veleveledi wata i na 'i'isanuakalikali. A vevelu'ui tomotoganidi matatabudi faifaiddi taunidi Yaubada yana 'Aila'a.

<sup>17</sup> \*Yaku vona 'ana 'eba ve'a'ava. Yau Iesu yana tofolova, we'e 'ana tovedumwe'ai'ai yadi bwaya tomogokuye i 'eno'enovi, begaidi kebu nuanuaku tamu wata aitoi taiadi 'a na veve'ikwayekwayega 'alo yaku veimea i na awaobuobuyeni.

<sup>18</sup> Ekwavo, 'ida matatabuda Iesu 'ana tovetumaganavo, a vevelu'ui faifaimi, nuanuaku 'ada Toveimea Iesu Keliso ma yana nuakalikali i na vevesauluva 'atumaina 'waimie. Vona mogitana yaku nuanua bani'odi.

'Asa'aiana bani'odi,

\* 6:12: Gal 5:11; Fil 3:18    \* 6:14: Luk 14:27; Gal 2:20-21    \* 6:15: 2 Kol 5:17

\* 6:17: 2 Kol 4:10

Yau Faulo.

## EFESO

### Faulo yana kiluma me Efeso 'waidie.

Tutuyanina Faulo i miamia Loma vanuga 'eba yogona nageneye leta 4 i kilumidi. Tamu leta tovetumaganavo i miamiani Efeso 'waineye faifaidi, tamu me Filifai faifaidi, tamu me Kolose faifaidi, we'e tamu Filimoni faifaina. De'e letanina i kilumiga me Efeso faifaidi nagami i na lu'iawawai i na 'a'avana mulieta tovetumaganavo 'atamana 'ifwaidi 'waidie letanina i na lu'iawawai.

Efeso tamu 'atamana 'ana wagava bwaikina 'awalawa Eisia nageneye. Tomotoganidi bei i miamianiga kukua 'ana nuanua 'waidie bwaikina wata taunidi i tauyedi tamu yaubada-vekavekali 'waineye 'ana wagava Daiana. We'e Efeso nageneye tamu vanuga 'eba velu'ui 'atumaotogina i tovetovoi Daiana faifaina. (Folova 19:17).

Faulo yana lauvivila 'ana veluga 'waineye bei i lau'age me Diu 'waidie 'Aiata Veawai 'waineye. (Folova 18:18-21). We'e yana lauvivila 'ana vetonu 'waineye i nago Efeso bei i miamia malamala 'aitonu 'waidie i veve. (Folova 19). Me Efeso fuedi taunidi mali tomotoga kebu Diu, siwe wata 'ifwaidi me Diu taiadi i miamiani. Faulo i ve 'waidie Keliso 'wainega me Diu wata taunidi kebu Diu i luvetubama, bega tutuya de'e tomotoga matatabudi Keliso taiadi i mia've'itubama, 'aila'a 'aitamogana. Wata Faulo Keliso yana 'Aila'a i awatalatutuleni nani 'aitonu 'waidiega. 'Ida Keliso tomogona, taunina yada to'edakumeta. Wata 'ida Yaubada yana vanuga, we'e Keliso taunina 'asa'aiana vanuganina 'ana 'unututu. Wata Faulo i awatalatutula Keliso yana 'Aila'a bani'odi yana vavine. De'e letanina 'ana 'idi side bani'odi.

Vona-vekaiwa. 1:1-2

Yaubada yana nuakalikali, wata yada miave'itubama Keliso taiadi faifaidi. 1:3-3:21

Tovetumaganavo i lubwainedi yadi nuanua 'aitamogana. 4:1-16

Tovetumaganavo i lubwainedi sauluva dududubalidi i na bailedi. 4:17-5:20

Tovetumaganavo i lubwainedi ma yadi nuakalikali taunidi i na tauyedi ediavo tovetumagana 'waidie. 5:21-6:10

Keliso yana toketokena 'wainega tovetumaganavo i na vetoketoke Seitani ma yana 'aila'a 'waidiega. 6:11-20

Faulo yana 'alanuai. 6:21-24

1 ✧Ekwavo, yau Faulo, a vekaiwa 'waimie. Yaubada nu-anuana, bega a vetomata'aulele Iesu Keliso faifaina, we'e

'omi Yaubada yana tomotoga 'wa miamianiga 'atamana Efeso 'waineye, kumanimiavo Keliso 'ana todumwebika 'wa miave'itubama taiadi, 'waimie a kilukiluma.

<sup>2</sup> A vevelu'ui faifaimi, nuanuaku Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie, wata nuanua bikadi mia 'atumaina taiadi i na vevelele mi.

*Yaubada i vesauluva 'atumaina 'waideye Iesu Keliso 'wainega.*

<sup>3</sup> Ma yada sosoana ta na vekaiwa 'ada Toveimea Iesu Keliso yana Yaubada wata Tamana 'waineye. I lubwaineda ta na subiai fai nuakalikali tulina tulina abamega 'akonadi i veleda 'anu'anunuda yadi mia 'atumaina faifaina, 'ida kumanida ta miave'itubama Keliso taiadi. <sup>4-5</sup> ✧Bola kebu fwayafwaya i da 'idewaiga, 'ida Keliso taiadi ta miave'itubamaga Yaubada i venua'ivina-vagaseda bega mataneye yada sauluva magemagetadi kebu tamu yada sakonaga. Fai i nuakalikali nagami i venua'ivineda bega Iesu Keliso 'wainega i fayayeda nika 'ida natunavo. De'e bani'odi i vesauluvediga 'waideye fai taunina yana nuanua 'wainega, yana 'eba sosoana faifaina. <sup>6</sup> Yaubada yana nuakalikali magemagetana i vesauluva 'atumaina 'waideye Natuna nuafouna 'wainega begaidi ta na subiai ta na vo, Yaubada, yamu 'anivelena-maimaiga 'waimeye 'atumaotogina." <sup>7-9</sup> ✧Fai 'ida ta miave'itubama Iesu Keliso taiadi, yana wafa 'wainega Yaubada i tuveobuda. Basenadi ta sakosakona 'wa da vo sakonanina i da yogonida, siwe Keliso dayagina i ilolo faifaida i yavuda sakona 'wainega nika Yaubada i nuatavunida. Vona mogitana yana nuakalikali wata yana 'anivelena-maimaiga 'waideye bwaikaotogina. Yaubada yana 'asetu bwaikina i vevenua'ivina-'atumai bega basenadiotoga yana nuanua givagivana i 'idewai Keliso faifaina. Yana nuanuananina yana 'eba sosoana, 'akonadi i sivemageseni 'waideye. <sup>10</sup> Yana nuanuananina side bani'odi. Tutuyanina Yaubada nuanuana, tutuya 'eba ve'a'ava 'waineye, nani matatabuna abamega wata fwayafwayayega taiadi i na va'augida, 'ada to'edakumeta 'aiseotogina Keliso.

<sup>11</sup> Yaubada nani matatabuna i 'i'idewadi yana nuanua bani'odi. Wata bani'odi nagami Yaubada i venua'ivineda yana nuanua i na 'idewadi 'waidega. Wata i venua'ivineda bega 'ida yana tomotoga mogitana, Keliso taiadi ta miave'itubama. <sup>12</sup> 'Ima 'a kumeta yama vetumagana 'a yatoi Keliso 'waineye bega 'a lulukamata i na 'ita'ita'iema faifaina.



Yaubada nuanuana yana 'ai'aiwabu magemagetadi 'a na sisivemagesedi nika tomotoga i na subisubiai. <sup>13</sup> ✱'Omi wata bani'odi, tutuyanina Iesu Valana 'Atumaina 'ami 'ita'ita'i faifaina 'wa nogai 'wa vetumagana Keliso 'waineye. Valanina Yaubada yana Vona Tonovidi, 'wa vetumagana 'waineye begaidi Keliso taiadi 'wa miave'itubama nika Yaubada yana tugusa i yatoi 'waimie. Tugusanina 'Anu'anunu 'Atumaina i agemi, bani'odi basenadi Yaubada i vona'awaufaufa i na tauyeni 'waideye. <sup>14</sup> ✱'Anu'anununina 'Atumaina 'wainega Yaubada i veakutagonida 'ida yana tomotoga mogitana, yada 'eba 'isa 'awaie 'ada veuveuta ta na veluagadi 'wainega. Wata fai Yaubada 'Anu'anunu 'Atumaina i tauyeni i ageda ta 'asetai 'awaie yana tomotoga matatabuda i na tuveobu'a'avada sakona 'wainega. Bega matatabuda Yaubada Magemagetana ta na subiai.

*Faulo i velu'ui nuanuana me Efeso i na 'asetai*

*Keliso bwaikaotogina.*

<sup>15-16</sup> ✱Fai Yaubada yana nuakalikali bwaikaotogina 'ida yana tomotoga 'waideye, tutuya matatabuna a vevekaiwa 'waineye faifaimi. Basenadi valami a nogai yami vetumagana toketokena 'ada Toveimea Iesu 'waineye wata Yaubada yana tomotoga 'wa nunuakalikali, tutuyanina 'wainega i maiga 'asiau faifaimi a velu'ui-vebogi kebu tamu tutuya a da venuafanimi. <sup>17</sup> Wata a velu'ui, nuanuaku 'ada Toveimea Iesu Keliso yana Yaubada, taunina Tamada Magemagetana nuanua 'anibwekabwekana i na velevelemi wata taunina i na sivemageseni 'waimie nika yami 'asetai Yaubada faifaina i na vebwaika. <sup>18</sup> Wata nuanuaku niami i na magetadi bega 'wa na 'asetai i vena'ivinemiga 'ita'ita'i 'wa na veluagai, naninina bwaikaotogina faifaina ma yami vetumagana 'wa lulukamata. Wata nuanuaku 'wa na 'asetai 'ida yana tomotoga 'ada veuveuta magemagetadi ta na veluagadi 'wainega. <sup>19-20</sup> ✱Wata nuanuaku 'wa na 'asetai Yaubada yana toketokena bwaikaotogina i folofofova 'ida 'ana tovetumaganavo 'waideye, kebu tamu aitoi yana toketokena bani'odi. Toketokenanina 'wainega Keliso i sivetovoia wafayega i vemiabuia 'ana 'atagiega, abame ma yana veimea i miamia. <sup>21</sup> ✱I veveimea abama tabwaotogin-eye, taunina bwaikaotogina kebu tamu aitoi bani'odi. Kini, toveimea tulina tulina, anelose, yaiaina, gabemani, tomotoganidi toketokedi ma 'adi ve'ililibu tutuya de'e 'waineye wata tutuya i mimaiga 'waineye, matatabudi 'adi wagava sai'afu, we'e Keliso bwaikaotogina. <sup>22</sup> ✱Yaubada Keliso i

✱ 1:13: Efe 4:30 ✱ 1:14: 2 Kol 1:22 ✱ 1:15-16: Kolos 1:4-11 ✱ 1:19-20: Ibu 1:3,13 ✱ 1:21: Kolos 2:15; Fil 2:9-10 ✱ 1:22: Kolos 1:18

silakai, nani matatabuna i veveimeyedi, wata i venua'ivineni i veto'isave'avina 'ida tovetumagana 'ada 'aila'a 'waineye. <sup>23</sup> 'Ida Keliso Tomogona, we'e 'unu'unu 'asa'aiana taunina. Nani matatabuna fwayefwayeye, 'ai'edi 'aise'avadiga i da ve nani-'avo'avovo, siwe fai Keliso i 'i'isave'avinidi i luve-tubama taiadi. Wata bani'odi 'ida Keliso 'ana tovetumaganavo, 'ako 'aise'avadaga ta da venani-'avo'avovo, siwe fai Keliso i 'i'isave'avinida bega taiadi ta miave'itubama nika Keliso Tomogona i souyeni.

## 2

*Nagami 'ida bani'odi towafa, Keliso mia 'ivauna i veleda.*

<sup>1</sup> \*We'e 'omi nagami bani'odi towafa. Yaubada yana ve'etoboda 'wa geugeudi taunimi 'wa tauyemi sakona 'waidie bega 'anu'anunumi wafawafadi. <sup>2</sup> \*Yami mia matatabuna 'waidie fwayafwaya 'ana nuanua sakoidi 'wa vevetutuyamedi wata Seitani yaiaina yadi to'edakumeta, kumanina kebu ta da 'ise'iseniga, 'wa vevematayakeyakeni. Tutuya de'e Seitandinina Yaubada 'ana tovedumwe'ai'ai i lulukakadedi yana nuanua sakoidi i 'i'idewadi. <sup>3</sup> \*Wata 'ida basenadi tovedumwe'ai'ainidi bani'odi. Taunida ta tauyeda bunu 'ana nuanua sakoidi 'waidie bega sakonanidi tomogoda yadi nuanua wata nuada i 'ewadi, 'asa'aiana ta 'i'idewadimo. Yada tubuga 'waidiega 'ida ta sakosakona tomotoga matatabudi bani'odi, i lubwaineda Yaubada ma yana nuasako i da vematavulogida yada sakonanidi faifaidi. <sup>4-5</sup> We'e Yaubada 'ana wagava To'isanuakalikali. Fai yana nuakalikali bwaikaotogina 'waideye, bani'odi Keliso i sivetovoia wafayega wata 'ida 'anu'anunuda wafawafadi yawai i veledi i yawasa-vaitugana bega Keliso taiadi ta miave'itubama. Vona mogitana, avinodi nagami 'anu'anunuda wafawafadi fai ta sakona, siwe Yaubada mia 'ivauna wata 'atumaina i veleda. Yaubada yana nuakalikali kebu ta na vona, i nuakalikali nika i 'ita'ita'ieda. <sup>6</sup> \*Wata 'ida ta miave'itubama Iesu Keliso taiadi, bega ma fuedeye Yaubada i sivetovoida, mia 'ivauna i veleda i vemiabuida abame Kelisonina taiadi. <sup>7</sup> \*I vemiabuidaga Keliso taiadi, 'ida tomotoga yadi 'eba 'isa tutuya matatabuna faifaidi. 'Ada 'ita'ita'inina Yaubada yana 'anivelena-maimaiga 'atumaiotogina 'waideye, bega mali tomotoga i na 'iseni i na 'asetai yana nuakalikali 'ida ta miave'itubamaga Keliso taiadi 'waideye. Yana nuakalikalinina bwaikaotogina, kebu 'ada fata ta na 'etowavai. <sup>8</sup> \*Fai Yaubada ma yana nuakalikali i vesauluva 'atumaina 'waimie, tutuyanina 'wa vetumagana

\* 2:1: Kolos 2:13    \* 2:2: Efe 6:12    \* 2:3: Tai 3:3    \* 2:6: Lom 6:8    \* 2:7: Lom 2:4    \* 2:8: Lom 3:24; 2 Tim 1:9

Keliso 'waineye i 'ita'ita'iemu, kebu taunimi yami folova 'waidiega, we'e mogitana Yaubada yana 'anivelena-maimaiga 'wainega. <sup>9</sup> ✨Wata 'ami 'ita'ita'inina kebu 'wa da velugaiga yami folova toketokedi 'waidiega, 'wa velugaiga Yaubada yana nuakalikali 'wainega begaidi kebu tamu aitoi 'ana fata taunina i na awa'ai'aia 'ita'ita'inina i velugaiga faifaina. <sup>10</sup> ✨Ida Yaubada 'ana 'idewadewa, i 'ive'ivauda Keliso taiadi ta miave'itubama bega Yaubada yana nuanua 'atumaidi ta na dumwebikedi. Yana nuanuananidi nagami i 'idewadi bega yada mia 'waidie bani'odi ta na vevesauluvedi.

*Tovetumagana matatabuda 'ada 'aila'a 'aitamogana*

*Keliso 'waineye.*

<sup>11</sup> 'Omi mali tomotoga kebu me Diu, yami mia nagami, 'wa na nuani. Basenadi 'ima me Diu 'a awaobuobuyemi 'a vo, Yaubada yana tugusa bunu 'aibobo kebu 'wa da 'ewaiga, bega 'omi kebu Yaubada yana tomotoga, 'ima 'aisema yana tomotoga." Tugusanina tomotoga nimadiega i 'idewai, tomogodi 'aisedi faifaidd. <sup>12</sup> ✨Yami mia nagami kebu Keliso taiadi 'wa da miave'itubama, 'wa mia'iaweni. Wata 'omi kebu Yaubada yana tomotoga me Diu bani'odi, 'omi tulimi mali tomotoga. Basenadiotoga Yaubada 'ima me Diu i venua'ivinema yana veakutagona 'ana vona'awaufaufa i 'idewai 'ima 'aisema 'ama 'ita'ita'i faifaina, we'e 'omi kebu. Yami mia fwayafwaya de'e 'waineye yami Yaubada kebu, wata kebu 'wa da vetumagana 'awaie 'ita'ita'i 'wa na velugai faifaina. <sup>13</sup> Vona mogitana, basenadi 'ani'ieogose 'wa miamia Yaubada 'wainega, we'e tutuya de'e Keliso dayagina i ilolo faifaimi, Yaubada i miemi lilivaneye bega 'wa miave'itubama Keliso taiadi.

<sup>14</sup> ✨Basenadi me Diu wata mali tomotoga taunidi kebu Diu ta veve'idi'idi 'wa da vo nuasako i da bibineda. Siwe Keliso i mai yana wafa 'wainega nuasakanina i geuya, i vemiave'itubamida nika veiana i souyeni, 'ida 'aila'a 'aitamogana. Keliso tauniotogina 'ada Toveiana mogitana, 'wainega matatabuda ta mia 'atumaina. <sup>15</sup> Wata Keliso yana wafa 'wainega, me Diu yama ve'etoboda wata yama veimea yadi toketokena i 'ivemweadi bega 'ima me Diu wata 'omi mali tomotoga i luvetubamida nika 'ida 'aila'a 'aitamogana, matatabuda ta veiana wata Keliso taiadi ta miave'itubama. <sup>16</sup> ✨Basenadi 'ima wata 'omi Yaubada 'ana gaviavo, siwe Keliso i wafa 'ai lagalagana 'waineye bega ta luvetubama, Yaubada taiadi ta veiana. Wata yana wafanina 'wainega ve'idi'idi matatabuna i geuya. <sup>17</sup> Wata Keliso i maiga, Vala 'Atumaina veiana faifaina i lau'age tomotoga matatabuda

✨ 2:9: Tai 3:5 ✨ 2:10: Tai 2:14 ✨ 2:12: Lom 9:4; 1 Tes 4:13 ✨ 2:14: Kolos 1:20; 1 Kol 12:13 ✨ 2:16: Kolos 1:20,22

'waideye, 'omi mali tomotoga Yaubada 'wainega 'wa mia 'ani'ie, wata 'ima me Diu 'a miamianiga Yaubada lilivaneye. <sup>18</sup> ✧Fai bani'odi Keliso i veianeda, bega 'ima me Diu wata 'omi mali tomotoga 'ada fata ta na lukuluku Tamada Yaubada mataneye 'Anu'anununa 'aitamogana 'wainega.

<sup>19</sup> Fai Keliso i luvetubamida, 'omi kebu tulimiga wata 'omi kebu wakawaka, tutuya de'e 'wa luku Yaubada yana 'Aila'a 'waineye, matatabuda yana tomotoga mogitana. <sup>20</sup> ✧Ida Yaubada yana 'Aila'a, yana vanuga bani'odi. Keliso taunina vanuganina 'ana 'unututu, we'e 'ima tomata'aulele tolu'ivonavo taiadi bani'odi 'ana 'ogola. 'Omi Yaubada yana 'Aila'a vanuganina luluna, i 'iyogonemi. <sup>21</sup> ✧Keliso vanuganina matatabuna i 'ivefa'ali, yana toketokena 'wainega i vevebwaika i na nagoga nika Vanuga 'eba Velu'ui 'Auvea faifaina i na souyeni. <sup>22</sup> ✧Wata 'omi me Efeso, Yaubada yana tomotoga 'ifwaidi taiadi 'wa miave'itubama Keliso taiadi i 'iyogonemi vanuganina 'waineye, bei Yaubada i miamia 'Anu'anununa 'wainega. Side bani'odi, fai Yaubada 'Anu'anununa i ageda ta 'asetai Yaubada i vevanuga 'waideye.

### 3

#### *Yaubada yana nuanua givagivana i sivemageseni.*

<sup>1</sup> ✧Yau Faulo, Iesu Keliso yana tofолоva a luku vanuga 'eba yogona 'waineye faifaimi. 'Ima me Diu wata 'omi mali tomotoga yada miave'itubama Keliso taiadi faifaina a lalau'age begaidi i yatoku vanuga 'eba yogona 'waineye. <sup>2</sup> A nuani 'akonadi valaku 'wa 'asetai Yaubada ma yana nuakalikali i venua'ivineku folovanina faifaina, bega 'omi mali tomotoga kebu Diu 'aivaita 'wa veluagai. <sup>3-4</sup> ✧Yaubada yana nuanua givagivana nagami a bavuyeni, siwe i sivemageseni 'waikuye. Yana nuanuananina faifaina 'akonadi a kiluma siwe kebu manamanawena, 'ale'usana, bega 'ai'edi 'wa na lu'iawawaiga yaku 'asetanina Yaubada yana nuanua givagivana Keliso faifaina 'wa na nuani. <sup>5</sup> Basenadi Yaubada yana nuanuananina kebu i da lu'ivoneyeni tomotoga 'waidie, tutuya de'e 'Anu'anunu 'Atumaina 'wainega i sivemageseni yana tomata'aulelevo wata yana tolu'ivonavo magemagetadi 'waidie. <sup>6</sup> ✧Yaubada yana nuanuananina givagivana side bani'odi. Fai Keliso i wafa faifaida, bega kebu 'ima me Diu 'aisema 'ama veuveuta 'a na veluagadi Yaubada yana 'ai'aiwabu 'waidiega, 'omi wata mali tomotoga veuveutanidi

✧ 2:18: Efe 3:12 ✧ 2:20: Mad 16:18; 1 Kol 3:11 ✧ 2:21: 1 Kol 3:16; Kolos 2:19 ✧ 2:22: 2 Kol 6:16 ✧ 3:1: Efe 4:1; Fil 1:13 ✧ 3:3-4: Efe 1:9; Kolos 1:26 ✧ 3:6: Efe 2:13,19

ma fueda ta na veluagadi. Wata matatabuda ta luwetubama, 'ida Yaubada yana 'Aila'a 'aitamogana, we'e naninidi basenadi Yaubada i vona'awaufaufa i na 'idewai me Diu faifaima, tutuya de'e ma fueda 'adi mogitana ta veveluagadi. Naninidi i souyedi Iesu Keliso yana wafa 'wainega, 'akonadi ta nogai Valana 'Atumaina 'wainega bega taiadi ta miave'itubama.

<sup>7</sup> ✧ Iesu Valana 'Atumaina faifaina a vetofolovaga Yaubada yana venua'ivina 'wainega. A vetofolovaga, Yaubada yana 'anivelena-maimaiga 'atumaina 'waikuye, wata yana toke-tokena i veleku yaku folovanina faifaina. <sup>8</sup> ✧ Yaubada yana tomotoga matatabuda 'waidega 'aku 'isa siaina, yau 'wa da vo kwamana. Avinodi 'aku 'isa siaina, siwe 'asa'aiana Yaubada i tauyeku Keliso yana 'ai'aiwabu magemagetana faifaina a lalau'age 'omi mali tomotoga 'waimie. 'Ai'aiwabunina bwaikaotogina, kebu 'ada fata ta na 'etowawaiga. <sup>9</sup> ✧ Wata tamu folova i velekuga, Yaubada yana nuanua givagivana 'ada 'ita'ita'i faifaina a sisivemageseni bega tomotoga matatabudi 'adi fata i na 'asetai. Basenadiotoga i maiga tutuya de'e 'waineye, Yaubada yana nuanuananina givagivana kebu i da sivemageseni, nuaneyeye i 'eno'eno, tutuya de'e 'akonadi 'ana 'asetamagemagetana. Yaubadanina nani matatabuna wata 'ida taiadi, 'ada to'idewadewa. <sup>10</sup> Tutuya de'e Yaubada yana nuanuananina i sivemageseni bega toveimea wata tomotoga toketokedi abame i na 'iseni Yaubada yana 'asetamwaikina nani tulina tulina 'waidie. Yana 'asetanina i na 'iseni Keliso 'ana tovetumaganavo 'waidega, 'ima me Diu wata 'omi mali tomotoga 'akonadi ta luwetubama bega Keliso yana 'Aila'a 'aitamogana. <sup>11</sup> Basenadiotoga, bola fwayafwaya kebu i da 'idewaiga, Yaubada yana nuanua nuaneyeye i 'idewai, we'e tutuya de'e yana nuanuananina i souyeni 'ada Toveimea Iesu Keliso 'wainega. <sup>12</sup> ✧ Fai ta miave'itubama Keliso taiadi wata ta vetumagana 'waineye, kebu tamu ve'etoboda 'waideye i da 'eno'eno 'ada fata ta na lukuluku Yaubada mataneyeye ma yada venuafoufa'ala, ta nuani mogitana ma yana sosoana i na lu'uma'umaieda. <sup>13</sup> ✧ Begaidi kebu nuanuaku 'wa na nuavita faifaiku i na nunago yami vetumagana i na mwea. Mogitana de'e vanuga 'eba yogona 'waineye a miamia, siwe vitanidi a veveluagadiga 'ami 'aivaita faifaina.

*Keliso yana nuakalikali bwaikina.*

<sup>14</sup> Fai Yaubada yana nuanua givagivana i 'idewai 'ada 'ita'ita'i faifaina, begaidi ma yaku ve'ililibu a 'odu Tamada mataneyeye. <sup>15</sup> Tamadanina 'ida yana 'Aila'a matatabuda

✧ **3:7:** Kolos 1:25   ✧ **3:8:** 1 Kol 15:9-10   ✧ **3:9:** Kolos 1:29   ✧ **3:12:** Efe 2:18; Ibu 4:16   ✧ **3:13:** 2 Tim 2:10

abame wata fwayefwayeye 'ana wagava 'eba 'inana. 16-18 ✧A vevelu'ui Yaubada 'waineye faifaimi, nuanuaku yana 'ai'aiwabu magemagetana 'wainega yana toketokena i na velemi nika 'wa na vetoketoke. I na kiavetoketokemiga 'Anu'anununa 'wainega, wata fai 'wa vevetumagana Keliso 'waineye, Kelisonina i na vevanuga yami nuanua 'waidie.

Wata a vevelu'ui faifaimi, nuanuaku yami nuakalikali i na vetoketoke. Welavi yadi 'eba vetoketoke 'walamidi, wata bani'odi nuanuaku yami nuakalikali i na 'ivefa'alimi bega 'omi wata Yaubada yana tomotoga 'ifwaidi taiadi, 'ami fata 'wa na 'asetai Keliso yana nuakalikali bwaikaotogina, 'etowava-wayoga. Yana nuakalikalinina bala-wayoga, nago-wayoga, laka-wayoga wata obu-wayoga. 19 Mogitana, nuanuaku Keliso yana nuakalikali bwaikaotogina 'wa na vebaemi wata 'wa na 'asetai, siwe 'wa na nuanua-wayoga. De'e bani'odi Keliso yana nuakalikali i na vebwaikaga 'waimie, nika Yaubada kumanina kebu tamu ava'ai 'waineye i da ve'ale'usaga, i na agemi mogitana.

20 ✧Yaubada ta na subisubiai. Fai yana toketokena i folo-folova 'waideye, naninidi faifaiddi ta na nuanua wata ta na velu'uiga, 'ana fata i na veleda, siwe wata ma 'adi 'imoso'i. Mogitana yana 'anivelena bwaikaotogidi 'waideye, yada nuanua wata yada velu'ui i vebwaika-'iawedi. 21 I lubwaineda ta na subisubiai. 'Ana ve'ililibu i veveluagai wata 'ana subia taiadi Keliso yana tomotoga 'waidega wata Iesu Keliso taunina 'wainega, siwe kebu i na 'a'avaga, i na 'eno-vagata tutuya matatabuna 'waidie. Vona mogitana, yaku nuanua bani'odi.

## 4

*'Ida Iesu tomogona 'waineye 'ada 'aila'a 'aitamogana.*

1 ✧Yau Paulo a miamia vanuga 'eba yogona 'waineye 'ada Toveimea Keliso faifaina, begaidi a na vonemi. 'Akonadi 'wa 'asetai naninidi 'atumaidi Keliso i 'idewadiga faifaimi, bega nuanuaku yami mia 'waidie yami sauluva 'atumai'avadi. I lubwainemi bani'odi 'wa na vevesauluvediga fai Yaubada i venva'ivinemi 'omi yana tomotoga. 2 ✧Tutuya matatabuna ma yami nuaobu yami sauluva i na bika wata 'wa na tokemaiga. 'Ai'edi emiavo tovetumagana i na vesauluva sakoina 'waimie, ma yami tokemaiga 'wa na nuakalikaliemo. 3 ✧Anu'anunu 'Atumaina 'wainega 'omi tovetumagana 'ami 'aila'a 'aitamogana, bega 'wa na vewavawava ma emiavo 'wa na veveiana nika yami nuanua 'aitamogana,

✧ 3:16-18: Kolos 2:7; Ion 14:23 ✧ 3:20: Kolos 1:29 ✧ 4:1: Kolos 1:10 ✧ 4:2: Kolos 3:12-13 ✧ 4:3: Lom 12:16-18; 1 Fit 3:8

'wa da vo yami veiana i da 'itavimi. <sup>4</sup> ✧ Ida matatabuda Keliso Tomogona, 'Anu'anununina 'Atumaina, 'aitamogana matatabuda i ageda. Wata bani'odi basenadi Yaubada i venua'ivinemiga, 'wa nuani mogitana 'ita'ita'i 'wa na veluagai, matatabumi yami nuanua i vesala. <sup>5</sup> Keliso taunina 'ada Toveimea 'aitamogana, matatabuda yada vetumagana i vesala, wata bafitaisonina 'aitamogana 'wainega matatabuda ta bafitaiso. <sup>6</sup> Tomotoga fueda, siwe Tamada 'aitamogana Yaubada. Yaubadanina nani matatabuna wata tomotoga i veveimeyeda, matatabuda 'waidega i folofolova wata matatabuda inagedeye i miamia.

*'Ada veuveuta tulina tulina ta veluagadi Keliso 'wainega.*

<sup>7</sup> ✧ Mogitana matatabuda ta luvetubama Keliso 'wainega, siwe Keliso yana nuakalikali 'aitamogana 'aitamogana 'ada veuveuta i veleda ava'ai i nuaniga bani'odi. <sup>8</sup> ✧ Keliso 'ada veuveuta i veledaga tamu 'ana vona i 'eno'eno Yaubada yana Buki 'waineye. Basenadiotoga i vona-vagata i vo,

Tutuyanina i laka tabwaotogineye, abame,

'Ana gaviavo yogoyogonidi i nawedi,

We'e tomotoga 'adi veuveuta i veledi, 'adi 'aivaita.

<sup>9</sup> Awale i vo, I laka?" Fai nagami abamega i obuma, kebu i da obumaga 'aisena, siwe wata i obu fwayafwaya nageneye towafa yadi 'eba mia 'waineye. <sup>10</sup> Tomogonina i obumaga taunina Keliso, siwe i laka abame, kebu abama 'aisena 'waineye i da lakaga, siwe wata i vagalaka bega yana 'eba mia nani matatabuna 'waidie, abame wata fwayefwayeye. <sup>11</sup> ✧ Kelisonina i lakaga abame, taunina tomotoga 'ada veuveuta 'ana to'anivelena. 'Ifwaidi 'adi veuveuta i velediga, i vetomata'aulele taunina faifaina, 'ifwaidi i vetolu'ivona Yaubada yana Vona faifaina, 'ifwaidi i vetolau'age Iesu Valana 'Atumaina faifaina. 'Ifwaidi 'adi veuveuta i velediga i veto'isave'avina Keliso yana 'Aila'a 'waideye, we'e 'ifwaidi Yaubada yana Vona i veve 'waideye. <sup>12</sup> ✧ Ada veuveutanidi i veledaga bega 'waidiega ta na ve'ivaivaita nika Keliso Tomogona 'ida Yaubada yana 'aila'a i na vevebwaika wata i na vevetoketoke. <sup>13</sup> ✧ Ta na vetoketoke i na nagoga yada nuanua 'aitamogana 'wainega yada vetumagana wata yada 'aseta Yaubada Natuna faifaina i na vesala nika ta na kumaga. Keliso i kumaga wata yana nuanua 'atumai'avadi, wata bani'odi 'ida ta na salai.

<sup>14</sup> ✧ Ai'edi ta na kumaga Keliso bani'odi yada nuanua fa'alidi. Yavayavava yadi sauluva ta na baileni nuadi a'wadi. Kaukau i na nunuga nani safailidi i bewebewedi, we'e

✧ 4:4: 1 Kol 12:12-13 ✧ 4:7: Lom 12:3,6 ✧ 4:8: Same 68:18 ✧ 4:11: 1 Kol 12:28 ✧ 4:12: 1 Kol 14:12 ✧ 4:13: Kolos 1:28 ✧ 4:14: 1 Kol 14:20

yagina waka i tutuvilavilai kebu bani'odi ta na munega. Tomotoga yadi ve-vekavekali 'waidiega nuanuadi i na fetoda. Yadi venidi 'adi nogaya 'eba nua'ewa, siwe 'ai'edi taunida ta na tauyedaga 'waidie, ve mogitana ta na bailedi. <sup>15</sup> ✨Kebu nuada i na a'wa, we'e mogitana ma yada nuakalikali Yaubada yana nuanua tonovidi ta na 'i'idewadi bega yada sauluva matatabuna i na vevetoketoke i na nagoga nika yada sauluva i na vesala Keliso yana sauluva bani'odi. Kelisonina taunina 'unu'unu 'ida yana 'Aila'a 'alo Tomogona. <sup>16</sup> ✨Yana toketokena 'wainega 'ida du'u tulina tulina ta tubwa 'waineye i 'i'ive'avinida. Wata yana toketokena 'wainega du'u 'aitamogana 'aitamogana ta na veve'ivaivaita bega nuakalikali 'wainega 'ida yana 'Aila'a 'alo Tomogona ta na vevebwaika wata ta na vevetoketoke.

*Mia 'ivauna wata 'atumaina Keliso 'wainega.*

<sup>17</sup> ✨Fai 'omi Keliso Tomogona, bega yau Kelisonina 'ada Toveimea 'ana wagavayega a na vonemi. Kebu i da lubwainemi Yaubada 'ana tobavu yadi sauluva 'wa na salad. Nani-'avo'avovo 'aisedi faifaidi i nuanua, nuadi dududubalidi. <sup>18</sup> Kebu nuanuadi Yaubada i na 'asetai, nuafoudi fa'alidi begaidi i bavuyeni wata Yaubada yana 'anivelena-maimaiga mia 'atumaina wata miamia-vagaina kebu i da veluagai. <sup>19</sup> Taunidi i tauyedi bunu 'ana nuanua sakoidi 'waidie, i lulu'avo'avovo sakona tulina tulina 'waidie, kebu nuanuadi i na 'ailove, yadi sakonanidi faifaidi kebu i da bunumayaga.

<sup>20</sup> We'e 'omi, Keliso 'ana 'asetai 'wa veluagaiga, kebu de'e sauluvanidi sakoidi 'waidiega. <sup>21</sup> A nuani Iesu Keliso Valana mogitana 'wa nogai, 'wa luku yana 'Aila'a 'waineye, 'asetai 'akonadi 'wa veluagai Iesu yana nuanua tonovidi faifaidi. <sup>22</sup> ✨Yami nuanua sakoidi nagami, 'wa na si'a'idi, nuanuananidi i vevekaliemi wata i 'i'ivesakoimi. <sup>23</sup> Tutuya fuedi taunimi 'wa na tauyemi Yaubada 'waineye bega yami nuanua wata 'anu'anunumi i na 'ive'ivaudi. <sup>24</sup> Yami nuanuananidi 'ivaudi 'wa na ve'wesenedi, nuanuananidi Yaubada 'ana 'idewadewa taunina yana nuanua bani'odi, nika yami sauluva mogitana 'atumaide wata magemagetadi.

<sup>25</sup> ✨Fai yami nuanua 'ivaudi Yaubada yana nuanua bani'odi, vekali 'wa na 'ailove. Matatabuda 'aila'a 'aitamogana Keliso Tomogona begaidi ma edavo ta na vonavona vona mogitana 'waidiega. <sup>26</sup> 'Wa na nuasakoga sauluva sakoina faifaina, nuami i na veagiagi-matayo'o. I lubwainemi 'aiatanina 'waineye yami nuasako i na 'a'ava, we'e i na vemanawega 'akonadi 'wa sakona. <sup>27</sup> Kebu Seitani

✨ 4:15: Efe 4:25 ✨ 4:16: Kolos 2:19 ✨ 4:17: Lom 1:21 ✨ 4:22: Kolos 3:9-10; Lom 12:2 ✨ 4:25: Efe 4:15



'wa na wanaleni tamu yami sauluva 'wainega i na nunago i na vetoketoke 'waimie. <sup>28</sup> ✧ Egavo i vavainagoga, vainago i na 'ailove, i lubwainedi i na folovamo yadi 'atumaina faifaina bega 'adi fata wata wekowekoma i na 'i'ivaisedi.

<sup>29</sup> ✧ Vona sakoidi kebu 'awamiega i na souyedi, nuanuaku bonami 'adi nogaya 'eba 'aivaita. Ava'ai 'wa nuani emiavo i lubwainedi 'adi kiavefa'ala wata yadi 'eba ve'atumai, 'waidiega 'wa na vonavona. <sup>30</sup> ✧ Kebu yami sauluva 'waidiega 'Anu'anunu 'Atumaina 'wa na 'ivenuavitai. 'Anu'anununina Yaubada yana tugusa, i tauyeni i agemi bega 'omi yana tomotoga, yada 'eba 'isa 'awaie Yaubada i na tuveobuda. <sup>31</sup> ✧ Vitanidi 'wa veluagadi tomotoga 'ifwaidi 'waidiega kebu faifaidi 'wa na nuanua, kebu 'wa na nuasako-matayo'o, wata yami nuasako kebu 'wa na lumanamanawediga. Kebu 'wa na veta'ata'ala, kebu 'wa na manini-'avo'avovo, wata kebu tamu aitoi 'wa na tolive'edeni vita i na veluagai faifaina. <sup>32</sup> ✧ We'e mogitana, ma emiavo 'wa na ve'isanuakalikali, ma yami nuakalikali 'wa na vevesauluva 'atumaina 'waidie. Fai 'wa miave'itubama Keliso taiadi, Yaubada yami sakona i nuatavunidi, wata 'omi bani'odi emiavo yadi sakona 'wa na nuuatavunidi.

## 5

### *Ta na miamia Keliso yana mageta 'waineye.*

<sup>1</sup> Fai 'omi Yaubada natunavo nuafouna wata yami sakona i nuatavunidi, nuanuaku Tamami 'wa na salai. <sup>2</sup> ✧ Keliso i nuakalikali taunina i tauyeni i wafa faifaia, 'omi wata bani'odi yami mia matatabuna 'waidie nuanuaku yami sauluva matatabuna nuakalikali. Keliso taunina i 'aniveleneni Yaubada 'waineye i wafa 'ada 'ita'ita'i faifaina, Yaubada yana 'eba sosoana, 'wa da vo tamu 'aisaya i da velomuyeni magaina 'iwanina sakona 'ana nuatavuna faifaina.

<sup>3</sup> 'Omi Yaubada yana tomotoga magemagetami, i lubwainemi yami sauluva 'atumai'avadi, bega kebu tamu aitoi 'ana fata i na awavesakoyemi. Ve'avula-'avo'avovo wata bunu 'ana nuanua sakoidi 'wa na bailaotogedi, we'e kukua kebu nuami i na 'ewadiga. <sup>4</sup> ✧ Wata kebu i da lubwainemi naninidi 'adi nogaya sakoidi faifaidi 'wa na sidibidibi, nuadi 'anigaugaudi yadi vona 'wa na bailedi, wata vonanidi ta talabodediga kebu 'waidiega 'wa na manini. We'e mogitana i lubwainemi vona 'atumai'avadi 'waidiega 'wa na vonavona wata 'wa na vevekaiwa Yaubada 'waineye.

✧ 4:28: Fol 20:35 ✧ 4:29: Efe 5:4; Kolos 4:6 ✧ 4:30: Efe 1:13-14 ✧ 4:31: Kolos 3:8 ✧ 4:32: Kolos 3:12-13 ✧ 5:2: Gal 2:20 ✧ 5:4: Efe 4:29

<sup>5</sup> ✧Ava'ai a na vonemiga, vona mogitana. Egavo i veve'avula-'avo'avovo, egavo bunu 'ana nuanua sakoidi i 'i'idewadi, wata egavo kukua nuadi i 'ewa'ewadi kebu tamu sai'afo 'adi veuveuta i na veluagadi Keliso wata Yaubada yadi 'Eba Veimea nageneye. Tomotoganidi kukua 'adi nua'ewa 'waidie, kebu 'adi veuveuta i na veluagadiga fai kukua 'adi nuakalikali 'waidie bwaikina, 'wa da vo i da 'odu'odu kukuanidi 'waidie, we'e Yaubada kebu. <sup>6</sup> ✧Taunimi 'wa na 'i'isave'avinimi bega kebu tamu aitoi i na vekaliemi bonana 'adi nogaya 'eba nua'ewa 'waidiega, sauluvanidi sakoidi siwe i na awave'atumaiedi. Egavo sauluvanidi i na 'i'idewadiga, taunidi Yaubada yana nuanua 'ana tove-dumwe'ai'ai, Yaubada ma yana nuasako i na vematavulogidi. <sup>7</sup> Kebu tamu sai'afo 'wa na luve'auyedi.

<sup>8</sup> ✧We'e 'omi, basenadi dudubala 'waineye 'wa miamia 'wa sakosakona, tutuya de'e 'omi Toveimea Keliso yana tomotoga, yana mageta 'waineye 'wa miamia. Fai 'omi mageta 'ana tomotoga, i lubwainemi yami sauluva magemagetadi. <sup>9</sup> Mageta vuagina sauluva tulina tulina 'atumaidi wata tonovidi, wata sauluvanidi Yaubada yana nuanua mogitana i saladi. <sup>10</sup> ✧Mogitana i lubwainemi yami sauluva magemagetadi, wata 'wa na vevetafewa naninidi 'Auvea yana 'eba sosoana 'wa na 'asetadi. <sup>11</sup> Sauluva dududubalidi 'wa na bailedi, kebu 'wa na 'abitonovidi, kebu tamu sai'afo 'aivaita 'wa na veluagai 'waidiega. Sauluvanidi 'wa na sivemagesedi yami sauluva magemagetadi 'waidiega nika tomotoga i na 'isedi i na 'asetadi nani sakoidi. <sup>12</sup> Sauluvanidi dududubalidi givagivayega i 'i'idewadi nani sakoitogina, 'ai'edi aitoi i na veveifufuyediga 'eba bunumayaga. <sup>13</sup> ✧Nani matatabuna ta na sivemagesedi Keliso yana mageta 'wainega, 'adi 'aseta mogitana i na souyedi, 'atumaidi 'alo sakoidi. <sup>14</sup> 'Ana fata nani matatabuna i na vemageta Keliso yana mageta 'wainega. Begaidi tamu vona-awatabai i 'eno'eno tomotoganidi yadi nuanua dududubalidi faifaidi i vo,

'Omi 'wa 'eno'eno, 'wa 'isa,

Wafayega 'wa na tovoi,

Nika Keliso yana magetayega i na magesemi.”

*Ta na tauyeda 'Anu'anunu 'Atumaina i na ageda.*

<sup>15</sup> Fai 'omi mageta 'ana tomotoga yami mia matatabuna 'waidie yami sauluva 'wa na 'i'isave'avinidi, tobavu kebu 'wa na saladi, ma yami 'aseta 'wa na vevenua'ivina 'atumaina. <sup>16</sup> ✧Fai tutuya de'e sakona i vevetoketoke kebu 'wa na mia-maimaiga, 'ai'edi tamu aitoi nuanuana 'aivaita, 'wa

na 'ivaisenimo. <sup>17</sup> ✨Wata tomotoga nuadi 'anigaugaudi yadi sauluva kebu 'wa na 'ewadiga, 'wa na vevewavawava naninidi 'ada Toveimea Iesu nuanuana 'wa na 'idewadiga, 'wa na 'asetadi. <sup>18</sup> ✨Kebu ufa toketokena 'wa na toke 'wa na yemu, bola nuami i na lugaugaudi, wata i na nunago yami mia i na 'ivesakoi. We'e mogitana taunimi 'wa na tauyemi 'Anu'anunu 'Atumaina 'waineye bega i na agemi mogitana. <sup>19</sup> ✨Yami veifufu 'waidie, Same Yaubada yana Buki 'wainega, lei 'eba subia, wata lei 'Anu'anunu 'Atumaina yana 'alavelevelena, 'wa na 'ina'inanadi. I lubwainemi 'wa na sososoana, ma yami subia 'wa na leilei 'ada Toveimea Iesu Keliso 'waineye. <sup>20</sup> ✨Tutuya matatabuna nani 'aitamogana 'aitamogana faifaidi 'wa na vevekaiwa Yaubada Tamada 'waineye, 'ada Toveimea Iesu Keliso 'ana wagavayega.

*Veimea naginagi faifaidi.*

<sup>21</sup> Fai 'omi Keliso 'wa veve'ililibuyeni, taunimi 'wa na tauyemi emiavo yadi nuanua 'wa na 'i'idewadi.

<sup>22</sup> ✨Wata bani'odi 'omi vevine 'akonadi taunimi 'wa tauyemi 'ada Toveimea Iesu 'waineye, wata bani'odi 'wa na tauyemi yami lalamogavo yadi nuanua 'wa na 'i'idewadi. <sup>23</sup> ✨'Ida Keliso yana 'Aila'a, taunina i veveimeyeda wata i 'i'isave'avinida. Wata bani'odi tomogo ma yana veimea yana vavine i na 'i'isave'avinidi, we'e Keliso 'ida 'aila'anida 'alo Tomogona 'ada To'ita'ita'i. <sup>24</sup> 'Ida Keliso yana 'Aila'a taunida ta tauyeda yana nuanua ta 'i'idewadi, wata bani'odi 'omi vevine i lubwainemi taunimi 'wa na tauyemi yami lalamogavo yadi nuanua 'wa na vevematayakeyakedi nani matatabuna 'waidie.

<sup>25</sup> ✨We'e 'omi iavetami naginagimi a na vonemi. Keliso 'ida yana 'Aila'a i nuakalikaliyeda bwaikina, taunina i tauyeni wafa 'waineye faifaida. 'Omi iavetami wata bani'odi i lubwainemi 'aitamogana 'aitamogana yana vavine i na nuakalikaliyedi. <sup>26</sup> ✨Keliso i wafaga yana 'Aila'a faifaida, bega 'ida magemagetada, yana Vona 'wainega wata 'ilekoa ufayega ta ve'atumai mataneyeye. <sup>27</sup> ✨Wata i wafaga bega 'ida i vavayida yana 'Aila'a mogitana bani'odi yana vavine, 'ada 'isa 'atumaiotogina, kebu maigida lululunaga, kebu ta da bweluluga 'alo kebu tamu ava'ai 'ada 'isa i da 'ivesakoi, we'e mogitana 'ida magemagetada wata 'atumai'avada mataneyeye.

<sup>28</sup> 'Omi iavetami Keliso yana sauluvanina 'wa na vetutuyameni tomogo 'aitamogana 'aitamogana yana vavine i na nuakalikaliyedi. Tomogomi 'adi nuanua 'waimie bwaikina

✨ 5:17: Kolos 1:9 ✨ 5:18: Lom 13:13; 8:6 ✨ 5:19: Kolos 3:16 ✨ 5:20: Kolos 3:17; 1 Tes 5:18 ✨ 5:22: 1 Fit 3:1 ✨ 5:23: 1 Kol 11:3 ✨ 5:25: Kolos 3:19 ✨ 5:26: Ibu 10:10; Ion 15:3 ✨ 5:27: 2 Kol 11:2

'wa 'i'isave'avinidi, wata bani'odi i lubwainemi 'aitamogana 'aitamogana yana vavine 'adi nuanua 'waineye i na veb-waika wata i na 'i'isave'avinidi. 'Ai'edi de'e bani'odi yana vavine i na nuakalikaliEDI, siwe 'asa'aiana 'akonadi taunina tomogona i nuakalikaliENI fai tomogonina wata yana vavine 'wa da vo tomotoga 'aitamogana. <sup>29</sup> ✧Kebu tamu aitoi taunina tomogona i na 'anigodadageni we'e mogitana i 'i'isave'avini 'atumaina wata i veve'ania, wata bani'odi Keliso yana 'Aila'a ma yana nuakalikali i 'i'isave'avinida. <sup>30</sup> 'Ida Tomogona, begaidi i 'i'isave'avinida. <sup>31</sup> ✧Tamu vona i 'eno'eno Yaubada yana Buki 'waineye tomogo wata yana vavine bani'odi tomotoga 'aitamogana bega i vo,

Faifainanina 'ai'edi tomogo i na nagiga, 'akonadi i 'awa'idia tamana wata inana 'waidiega, yana vavine taiadi i luve-tubama.

'Adi 'ailuga siwe 'wa da vo tomotoga 'aitamogana.”

<sup>32</sup> Vonanina nageneye, tamu nuanua bwaikina givagivana i 'eno'eno, yaku 'aseto tomogo wata yana vavine yadi lu-vetubama 'eba 'isa Keliso wata 'ida yana 'Aila'a yada luve-tubama faifaina. <sup>33</sup> Wata 'omi bani'odi, tomogo 'aitamogana 'aitamogana yana vavine i na nuakalikaliEDI taunina 'ana nuakalikali bani'odi, we'e vevine 'aitamogana 'aitamogana yadi lalamogavo i na veve'ililibuyedi.

## 6

*Yavayavava wata tamadiavo inadiavo taiadi, 'adi vona.*

<sup>1</sup> ✧Yavayavava a na vonemi. Fai 'ada Toveimea Iesu nuanu-ana, i lubwainemi tamamiavo wata inamiavo 'waidie 'wa na vevematayakayaka. <sup>2-3</sup> ✧Yaubada yana veimea i 'eno'eno i vo, Tamamiavo wata inamiavo 'wa na ve'ililibuyedi.” Veimean-ina veimea nagami ma 'ana vona'awaufaufa i vo,

Tamamiavo wata inamiavo 'wa na ve'ililibuyedi bega yami mia matatabuna 'atumaina wata yami mia fwayefwayeye i na vemanawe.”

<sup>4</sup> ✧'Omi tamadiavo wata inadiavo a na vonemi. Natumiavo kebu 'wa na yagai-maimaigidi i na nunago i na nuasako, we'e mogitana 'wa na ifufudi wata 'wa na awave'ede'ededi 'ada Toveimea Iesu yana nuanua bani'odi.

*Tofolova-maimaiga wata 'adi toveimeavo 'adi vona.*

<sup>5</sup> ✧'Omi tofolova, 'ami toveimeavo yadi vona 'wa na veve-matayakeyakedi. Ma yami kololo 'wa na veve'ililibuyedi wata yami nuanua 'wa na tauyedi 'wa na vo, 'Aku toveimea yana nuanua a na 'idewadiga, siwe 'asa'aiana 'akonadi a

folofolova Keliso faifaina begaidi a na dumwebika.”<sup>6</sup> Kebu 'wa na vo, 'Aku toveimea mataneye a da folova-'atumai 'aku awave'atumai faifaina,” we'e mogitana 'ai'edi kebu mataneye, siwe fai 'wa vetofolova-maimaiga Keliso 'waineye ma yami dumwebika Yaubada yana nuanua 'wa na 'i'idewadi.<sup>7</sup> Ma yami sosoana 'wa na folofolova, 'wa da vo 'wa da folofolova 'ada Toveimea Iesu 'waineye, kebu tomotoga 'aisedi 'waidie.<sup>8</sup> \*'Wa na nuani, 'ada Toveimea Iesu tomotoga 'aitamogana 'aitamogana i na tutulidi, folova 'atumaidi i 'idewadiga faifaidi, 'ai'edi tofolova-maimaiga 'alo kebu tofolova-maimaiga, siwe i na tutulidi.

<sup>9</sup> \*We'e 'omi toveimea, wata bani'odi 'wa na vevesauluva 'atumaina yami tofolovavo 'waidie. Kebu 'wa na ve'isakololo 'waidie fai 'omi wata taunidi ma fuemie 'ami Toveimea bwaikina 'aitamogana abame, kebu i da lu'idia, veimea 'aitamogana 'wainega matatabumi i na veimeyemi.

*Seitani ma yana 'aila'avo taunidi 'ada gaviavo.*

<sup>10</sup> Ekwavo, de'e tamu yaku vona 'eba ve'a'ava. 'Omi 'wa miave'itubama 'ada Toveimea Iesu taiadi, begaidi yana toketokena bwaikina 'wainega 'wa na vevetoketoke.<sup>11</sup> \*Yaubada yana kukua 'eba vetalaga wata vaigavu i velemiga, matatabuna 'wa na 'ewadi, kukuanidi 'waidiega 'wa na tovoi fa'alina Seitani yana yogosidu 'adi 'eda'eda 'waidie bega kebu i na vekaliemi.<sup>12</sup> 'Eba vetalaganidi i lubwainemi 'wa na 'ewadi siwe kebu tomotogaotoga taiadi 'wa na vetalaga. We'e mogitana ta vevetalaga Seitani ma yana 'aila'avo taiadi, 'aila'anidi yaiaina sakoidi kebu 'ada fata ta na 'isediga. Mogitana ta vevetalaga yadi to'edakumeta bwaikidi, yadi toveimeavo, wata tomia dudubala ma yadi toketokena taiadi.<sup>13</sup> \*Fai Seitani ma yana 'aila'avo taiadi ta vevetalaga, Yaubada yana 'eba vetalaga 'wa na 'ewadi 'waimie i na 'eno'eno bega tutuyanina sakona nuanuana i na vetoketoke 'waimie nika 'omi 'akonadi 'wa tovo'ovoi fa'alina. 'Wa na vetalaga i na nagoga nika 'omi ma yami toketokena 'wa na tovo'ovoi.

<sup>14</sup> \*Bei 'akonadi 'wa tovo'ovoiga 'wa na tovi-vagata 'wa na lulukamata. Yaubada yana kukua 'eba vetalaganidi side. Nuanua tonovidi 'wa na vewa'iledi, 'wa na toke 'wa na si'l'idi. Sauluya 'atumaidi nuafoumi 'adi velubabala 'wa na silakavedi.<sup>15</sup> \*Iesu Valana 'Atumaina mia 'atumaina faifaina, 'waineye taunimi 'wa na tauyemi 'ami 'eba 'aivaita, 'wa da vo 'ami 'ageyafayafa 'wa da veagedi, 'agemi 'adi velubabala.<sup>16</sup> Naninidi 'wa na 'idewadi i na

\* 6:8: Kolos 3:24-25    \* 6:9: Kolos 4:1    \* 6:11: Iem 4:7; 1 Fit 5:8-9    \* 6:13: 2 Kol 10:4    \* 6:14: 1 Tes 5:8    \* 6:15: Ais 40:9

'a'avana wata 'wa na toke 'wa na 'abi fa'alina yami vetu-magana 'waidie bani'odi yami babala. Yami babalanina 'wainega 'ami fata Seitani kumanina tosakona yana 'ibadi 'ala'alaidi 'wa na luve'weudi. <sup>17</sup> ✧ 'Ita'ita'i Keliso i velemiga 'wa na 'ewai, bani'odi 'unu'unumi 'adi velubabala. Wata 'Anu'anunu 'Atumaina yana kefata nigonigona, taunina Yaubada yana Vona 'wa na 'ewai. <sup>18</sup> ✧ Naninidi 'wa 'ewadi 'wa na 'idewadiga, siwe wata 'wa na vevelu'ui Yaubada 'waineye i na 'i'ivaisemi. Tutuya matatabuna velu'ui tulina tulina 'waidiega 'wa na vevelu'ui Yaubada 'waineye 'Anu'anunu 'Atumaina yana awave'eda'eda 'wainega. Yami velu'uinidi 'waidie kebu nuanuaku 'wa na 'abiawa, 'wa na 'isa'isa wata tutuya matatabuna 'wa na vevelu'ui Yaubada yana tomotoga faifaiddi.

<sup>19</sup> ✧ Wata nuanuaku 'wa na vevelu'ui faifaiku bega tutuyan-ina a na vo, A na veifufu," Yaubada yana 'alavelavelagi 'wainega a na veveifufu nika ma yaku venuafoufa'ala Iesu Valana 'Atumaina 'ana nuanua givagivadi a na sivemagesedi. <sup>20</sup> Yaubada i venua'ivineku a vetomata'aulele Valananina faifaina, siwe Yaubada 'ana tovedumwe'ai'ai i yogoniku i yatoku de'e vanuga 'eba yogona 'waineye a miamia. Begaidi 'wa na vevelu'ui nika kebu a na kololo i lubwaineku a na veveifufumo.

### *Faulo yana 'alanuai.*

<sup>21-22</sup> ✧ Ekwavo, nuanuaku valaku 'wa na 'asetai begaidi iaku mogitana Tikiasa a na vetunei 'waimie. Tomogonina todumwebika 'ada Toveimea Iesu yana folova 'waineye, nani matatabuna i na lu'ivoṅa 'waimie nika 'wa na 'asetama 'ama vebae wata ava'ai 'a vivai. Wata a na vetuneiga bega i na kiavefa'alimi wata nuami i na 'iveagiagidi.

<sup>23</sup> Ekwavo, 'omi Iesu 'ana tovetumaganavo a vevelu'ui faifaimi, nuanuaku Yaubada Tamada wata 'ada Toveimea Iesu Keliso nuanua bikana i na vevelele mi 'atumaina taiadi, wata nuanuaku nuakalikali i na vevelele mi, vetu-magana toketokena taiadi. <sup>24</sup> ✧ 'Omi wata 'ifwaidi tomotoga yami nuakalikali 'wa yato-vagaseni 'ada Toveimea Iesu Keliso 'waineye, nuanuaku Yaubada ma yana nuakalikali matatabumi 'waimie i na vevesauluva 'atumaina.

'Asa'aiana bani'odi,  
Yau Faulo.

## FILIFAI

### Faulo yana kiluma me Filifai 'waidie.

Tutuyanina Faulo i miamia Loma vanuga 'eba yogona nageneye, leta 4 i kilumidi. Letanidi tovetumaganavo i miamianiga Filifai, Efeso wata Kolose faifaidi, we'e tamu Filimoni faifaina. De'e letanina i kilumiga i vekaiwa me Filifai 'waidie yadi 'anivelena-maimaiga faifaina, 'anivelena-maimaiganina Efafiledaito nimaneye i yatoi i naweni Faulo 'ana 'aivaita.

Filifai tamu 'atamana 'ana wagava bwaikina 'awalawa Masidonia nageneye. Faulo yana lauivila 'ana veluga 'waineye i nago Filifai bei be'ama Vala 'Atumaina i lu'ageyeni 'waidie nika tovetumagana tamu 'aila'a i souyeni. (Folova 16:12-40)

Tovetumaganavo i miamiani Filifai kebu 'aila'a 'aitamogana, 'aila'a tulina tulina wata kebu yadi mani bwaikidiga siwe i 'anivelena-maimaiga tovetumagana i vewekowekomaga Ielusalema nageneye, wata Faulo 'adi 'aivaita faifaina.

Faulo i miamia vanuga 'eba yogona nageneye siwe ma yana sosoana, wata nuanuana me Filifai i na sosoana 'ai'edi vita tulina tulina i na souyedi 'waidie. Faulo i veifufu 'waidie i na tokemaigedi wata tove-vekavekali faifaidi i matakia, kumanidiavo i lulukakadedi bunu 'aibobo faifaina. Wata nuanuana ma yadi nuaobu i na vevesauluva Iesu bani'odi yana sauluva. Leta de'e 'wainega ta 'asetai Faulo ma yana nuakalikali tovetumaganavo Filifai 'waineye i nuanuanidi. De'e letanina 'ana 'idi side bani'odi.

Vona-vekaiwa. 1:1-2

Me Filifai yadi veiana Faulo 'waineye faifaina i vekaiwa.

1:31

Faulo yana mia i lu'ivoneyeni. 1:12-26

Sauluvanidi tovetumaganavo 'adi laubwaina. 1:27-2:18

Faulo yana nuanua i 'idewai Timoti wata Efafiledaito faifaidi. 2:19-30

Sauluva tonovidi wata ve'ililide Keliso yana 'eda 'wainemo. 3:1-4:9

Faulo i vekaiwa yadi 'anivelena-maimaiga faifaina. 4:10-20

'Ifwaidi yana 'alanuai. 4:21-23

<sup>1</sup> ✧Emavo, yau Faulo iada Timoti taiadi Iesu Keliso yana tofолоvavo 'a vekaiwa 'waimie. 'Omi Yaubada yana tomotoga, 'wa miamiani 'atamana Filifai 'waineye 'wa mi-

ave'itubama Iesu Keliso taiadi, yami to'edakumetavo wata 'ami to'aivaitavo taiadi 'a kilukiluma 'waimie.

<sup>2</sup> 'A vevelu'ui faifaimi nuanuama Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie, wata nuanua bikadi mia 'atumaina taiadi i na vevelemi.

*Faulo yana vekaiwa wata yana velu'ui me Filifai faifaidi.*

<sup>3-4</sup> Tutuyanina a nuanuanimi a vevekaiwa yaku Yaubada 'waineye faifaimi, we'e tutuya 'aitamogana 'aitamogana a vevelu'uiga faifaimi, ma yaku sosoana. <sup>5</sup> A sososoanaga fai 'aiatanina 'wa vetumagana Iesu Keliso 'waineye i maiga 'asiau 'wa 'i'ivaiseku Valana 'Atumaina 'ana folova 'waineye. <sup>6</sup> \*A nuani mogitana Yaubada, kumanina basenadi tamu folova 'atumaina i velamuya 'waimie, i na 'i'idewami i na nagoga Iesu Keliso yana Vila-vaitugana 'ana 'Aiata 'waineye i na ve'a'avai.

<sup>7</sup> Tutuya fuedi ma yaku nuakalikali a nuanuanimi. Bani'odi a na nuanuanimiga i lubwaineku fai 'omi 'wa 'i'ivaiseku folovanina Yaubada ma yana nuakalikali i velekuga 'waineye. 'Asiau a miamia vanuga 'eba yogona 'waineye 'wa 'i'ivaiseku, wata kebu a da lukuga yau Iesu Valana 'Atumaina 'ana tove'awa-mogitana wata 'ana tokiavefa'ala tomotoga 'waidie, bei wata 'wa 'ivaiseku. <sup>8</sup> Yaubada 'aku to'asetai, Iesu Keliso i nuakalikaliemiga bani'odi, yau wata a nuakalikaliemi.

<sup>9-10</sup> \*A vevelu'ui faifaimi, nuanuaku yami nuakalikali tutuya fuedi i na vevebwaika, wata bani'odi 'asetai mogitana wata venua'ivina tonovina i na vebwaika i na nagoga bega 'ami fata sauluva 'atumai'avadi 'wa na vevenua'ivinedi. 'Ai'edi bani'odi 'wa na vevesauluvediga, 'aiatanina Keliso i na vilaiga 'waineye, kebu tamu yami sakonaga wata kebu tamu nani faifaina i na awavesakoyemi. <sup>11</sup> Wata a vevelu'ui faifaimi nuanuaku yami sauluva 'atumai'avadi, sauluvanidi ta na 'i'idewadi Iesu Keliso yana toketokena 'wainega bega Yaubada 'ana subia wata 'ana awave'ai'aiwabu i na veluagadi.

*Yada mia fwayefwayeye, nani bwaikina Keliso.*

<sup>12</sup> \*Ekwavo, nuanuaku 'wa na 'asetai, vitanidi a veluagadiga kebu Iesu Valana 'Atumaina 'ana 'eba ve'etobodaga, we'e mogitana 'waidiega Valananina i vevebwaika tomotoga 'waidie. <sup>13</sup> Side bani'odi. Tolugaviavo taunidi toveimea bwaikina yana vanuga 'ana to'isave'avinavo wata tomotoga 'ifwaidi de'e bei, yaku luku vanuga 'eba yogona 'waineye lamuna i 'asetai fai a vetofolova Keliso faifaina begaidi.



14 Wata fai a miamia vanuga 'eba yogona 'waineye 'ada Toveimea Iesu 'ana tovetumaganavo sai'afo matatabudi yadi vetumagana i yatoi fa'alina 'waineye, bega ma yadi venuafofufa'ala i vevetoketoke Yaubada yana Vona i lalau'age kebu i da kolologa ve'isakololo 'waidie.

15 Mogitana, siwe 'ifwaidi i ve'unumagigieku wata i veve'ikwayekwayega nuanuadi 'adi wagava i na vebwaika bega Keliso faifaina i lalau'age. 16 We'e 'ifwaidi yadi nuanua 'atumaidi 'waidiega i vetolau'age, taunidi tonuakalikali fai i 'asetai de'e folovanina Yaubada i veleku, yau Iesu Valana 'Atumaina 'ana tove'awa-mogitana. 17 We'e tove'unumagiginidi kebu mogitana taunidi i da tauyedi i na vetolu'ivona Keliso faifaina, we'e mogitana taunidi 'adi subia faifaina. Igodi nuanuadi 'aku vita de'e vanuga 'eba yogona nageneye i na 'imoso'ieni. 18-19 \*Kebu tamu ava'aiga, 'asa'aiana yau a sosoanamo fai 'eda'eda tulina tulina 'waidiega tomotoga Keliso valana i noganogai. I lalau'agega nuanua tonovina 'wainega 'alo 'adi subia faifaina siwe 'eba sosoana 'waikuye.

A sosoanaga fai a 'asetai yami velu'ui 'waidiega wata Iesu Keliso 'Anu'anununa yana 'aivaita 'wainega vanuga 'eba yogona 'wainega a na souyeku. 20 \*Nuanuaku bwaikina bega a nuani mogitana kebu tamu yaku sauluva sakoina faifaina a na bunumayaga. We'e mogitana 'asiau wata tutuya matatabuna a na vevenuafoufa'ala bega yaku sauluva matatabuna 'waidiega Keliso 'ana subia i na veluagai, 'ai'edi ma yawaiku a na miamiaga 'wainega, 'alo a na wafaga 'wainega. 21 \*Yaku mia fwayefwayeye nani bwaikina 'waikuye Keliso, we'e 'ai'edi a na wafaga, 'wainega nani 'atumaiotogina i na souyeni Keliso 'ana subia faifaina. 22 'Ai'edi ma yawaiku a na miamiaga, yaku folova Keliso faifaina ma vuagina. Bani'odi a na venua'ivinedi, i lubwaineku ma yawaiku a na miamia 'alo a na wafa? 23-24 \*Aigodi, nuanuananidi 'adi 'ailuga i veveyo'eyo'eyeku. Nuanuaku bwaikina a na wafa fwayafwaya a na 'iaweni, bega ma yawaiku Keliso taiadi 'a na miamia, bei a na miamiaga 'atumaiotogina 'waikuye, siwe nani bwaikaotogina taiadi ta na miamia a na 'i'ivaisemi. 25 Fai a nuani mogitana i lubwaineku taiadi ta na miamia a na 'i'ivaisemi, a 'asetai kebu i na luvewafaku, taiadi ta na miamia a na 'i'ivaisemi yami vetumagana Keliso 'waineye i na vevetoketoke wata yami sosoana faifaina i na vevebwaika. 26 Taiadi ta na miamiaga yami sosoana wata yami subia Iesu Keliso 'waineye i na vebwaika-'afo'afo faifaiku.

*Ta na vetoketoke Keliso faifaina.*

<sup>27</sup> ✧Ava'ai i na souyeniga 'waikuye nani siaina, we'e nani bwaikina ava'ai Keliso i voneyediga i lubwainemi yami sauluva taiadi i na vesala. Bani'odi 'wa na vevesauluvediga, 'ai'edi a na wai a na 'isemi, 'alo bola a na miamia vanuga 'eba yogona 'waineye, siwe a na 'asetami 'ami vebae 'aitamogana 'wainega 'wa na tovofovo fa'alina wata yami nuanua 'aitamogana 'wainega matatabumi 'wa na vevetoketoke, nika tomotoga 'ifwaidi i na vetumagana Iesu Valana 'Atumaina 'waineye. <sup>28</sup> Wata nuanuaku valami a na nogai, 'omi kebu tamu sai'afo 'wa da kololo 'ami tovedumwe'ai'ai 'waidie, i vedumwe'ai'aiga fai 'wa vetumagana Iesu 'waineye. 'Ai'edi tutuya fuedi matadie 'wa na vevenuafoufa'alaga i na 'isemi i na 'asetai 'awaie Yaubada taunina yana toketokena 'wainega i na wafaotoga we'e 'omi 'ita'ita'i 'wa na veluagai. <sup>29</sup> ✧Vona mogitana 'ita'ita'i 'wa na veluagai fai Yaubada ma yana nuakalikali i venua'ivinemi bega nani 'ailuga 'atumaidi 'wa na veluagadi. Tamu, 'wa vetumagana Keliso 'waineye, we'e wata tamu, i tauyemi faifaina veviga 'wa veveluagai. <sup>30</sup> ✧Tutuya de'e 'omi ma fueda Keliso faifaina ta lulugavia vita ta veveluagadi. Basenadi bani'odi 'wa 'ise'iseku a lulugavia we'e tutuya de'e wata valaku 'wa noganogai bola a lulugavia vanuga 'eba yogona 'waineye.

## 2

*Ta na nuaobu.*

<sup>1</sup> 'Omi Keliso taiadi 'wa miave'itubama begaidi 'wa vevetoketoke wata yana nuakalikaliega nuami i 'iveololodi. 'Anu'anunu 'Atumaina i agemi i labilabinimi wata ma emiavo 'wa veve'isanuakalikali bega 'wa ve'ivaivaita. <sup>2</sup> Fai 'aivaitanidi 'wa veluagadiga, nuanuaku yami nuanua 'aitamogana, 'wa na vevenuakalikali wata 'ami vebae i na vesala. 'Ai'edi bani'odi 'wa na vevesauluvediga, yaku sosoana 'waimie i na vebwaika-'afo'afo. <sup>3</sup> ✧Yami sauluva matatabuna 'waidie kebu 'aisemi faifaimi 'wa na nuanua wata kebu taunimi 'wa na awa'ai'aimiga 'ami subia faifaina. We'e mogitana i lubwainemi ma yami nuaobu 'wa na vo, Taunidi bwaikidi, we'e 'ima sai'afo." <sup>4</sup> ✧Kebu 'aisemi yami nuanua faifaiddi 'wa na nuanua, siwe wata tomotoga 'ifwaidi yadi nuanua faifaiddi 'wa na nuanua.

*Keliso taunina i kiaobuyeni we'e Yaubada i kialakai.*

✧ 1:27: Efe 4:1 ✧ 1:29: Fol 5:41 ✧ 1:30: 1 Tes 2:2 ✧ 2:3: Lom 12:10,16

✧ 2:4: 1 Kol 10:24,33

<sup>5</sup> I lubwainemi yami nuanua tomotoga 'ifwaidi faifaidi i na vesala Keliso yana nuanua bani'odi. Keliso yana nuanuanidi side bani'odi.

<sup>6</sup> ✧ Iesu Keliso tutuya matatabuna mogitana bani'odi Yaubada,

Yana vebwaika wata Yaubada yana vebwaika taiadi i vesala, siwe kebu nuanuana i na luve'ove'o'oleni.

<sup>7</sup> ✧ Kebu 'aisena i da tovoieni, siwe taunina yana 'ai'aiwabu wata yana vebwaika i bailedi, bega taunina tofolova bani'odi.

I vetomotogaotoga 'ida tomia fwayafwaya bani'odi.

<sup>8</sup> ✧ Taunina i kiaobuyeni, Yaubada yana nuanua i vematayakeyakeni bega i wafa, yana wafanina 'ai lagalagana 'waineye 'eba bunumayaga.

<sup>9</sup> ✧ Fai bani'odi taunina i kiaobuyeni i wafaga, bega Yaubada i kialakai abame i vebwaika-'afo'afo,

Yana vebwaikanina wata 'ana wagava i veleniga bwaikao-togina kebu tamu aitoi bani'odiga.

<sup>10</sup> ✧ Bega Iesu 'ana ve'ililibu faifaina

Nani matatabuna tomotoga taiadi abame, fwayefwayeye, wata towafa yadi 'eba mia 'waineye,

Ma yadi ve'ililibu i na 'odu'odu 'waineye.

<sup>11</sup> ✧ Matatabudi i na lulu'ivona Iesu Keliso taunina

Toveimea Bwaikaotogina,

Yadi ve'ililibunina 'wainega, Yaubada Tamada 'ana subia i na veluagai.

*'Ida tomotoga yadi 'eba 'isa.*

<sup>12</sup> Ekwavo, a nuakalialiemi. Keliso Yaubada yana nuanua i vematayakeyakediga, nuanuaku 'omi wata bani'odi.

Basenadi taiadi ta miamiaga 'wa vevematayakeyakeku, we'e tutuya de'e a 'iawemiga, mogitana i lubwainemi yaku vona

'wa na vematayakeyakedi. Ma yami tokemaiga wata ma yami kololo 'wa na folofolova bega 'ita'ita'i 'wa veluagaiga

vuagina tomotoga i na 'iseni. <sup>13</sup> ✧ I lubwainemi bani'odi

'wa na vevesauluvedi fai wata Yaubada tutuya fueidi yami nuanua i sisiviladi bega nuanuami taunimi 'wa na tauyemi

'waineye wata 'ami fata yana nuanua 'atumaidi 'wa na vevematayakeyakedi.

<sup>14-15</sup> Ava'ai 'wa na 'idewadiga, tutuya matatabuna kebu 'wa na vebonavoluvoluga wata kebu 'wa na ve'ikwayekwayega,

nika yami sauluva tonovidi, kebu tamu aitoi i na vevitami sakona faifaina. Bani'odi 'wa na vesauluvediga,

'omi Yaubada natunavo 'atumai'avami, tomotoga yadi sauluva 'oka'okadi wata sakoidi 'awasasadie. Abama

✧ 2:6: Ion 1:1-2 ✧ 2:7: 2 Kol 8:9 ✧ 2:8: Ibu 5:8; 12:2 ✧ 2:9: Efe 1:20-21; Ibu 1:3-4 ✧ 2:10: Lom 14:11 ✧ 2:11: Lom 10:9 ✧ 2:13: 1 Tes 2:13

i magemagetaiga 'ubwana yadi magetayega, wata 'omi bani'odi tomotoganidi yadi nuanua dududubalidi 'wa na kiavemagetadi yami sauluva magemagetadi 'waidiega. <sup>16</sup> Mia 'ivauna wata 'atumaina valana 'wa na lulu'ivoneyeni 'waidie, bega 'wainega nuadi i na magetadi. Bani'odi 'wa na vevesauluvediga, tutuyanina Keliso i na vila-vaituganiga ma yaku sosoana a na awa'ai'aiku faifaimi. A na vo, De'e tomotoganidi yaku folova wata yaku tokemaiga vuagina, kebu a da folova-maimaiga.”

<sup>17</sup> Yami folova wata yami vetumagana 'asa'aiana yami 'anivelena-maimaiga Yaubada 'waineye, we'e yau a tauyeku wafa 'waineye Iesu faifaina, 'asa'aiana yaku 'anivelena-maimaiga bega 'ai'edi a na wafaga, yami 'anivelenanina a na 'imoso'ieni. 'Ai'edi mogitana a na wafa, yau a na sosoana wata yaku sosoanayega ma fueda ta na sosoana. <sup>18</sup> Wata bani'odi i lubwainemi 'wa na sosoana faifaiku, yami sosoanayega ma fueda ta na sosoana.

*Faulo i veifufu Timoti wata Efafilodaito faifaidi.*

<sup>19</sup> A nuani mogitana 'ai'edi 'ada Toveimea Iesu nuanuana, Timoti a na vetunei i na wai 'waimie, siwe kebu tutuya manamanawenaga, sai'afo. Bola i na vilai i na mai valami i na lu'ivoneyeni 'waikuye nika a na sosoana faifaimi. <sup>20</sup> 'Waikuye kebu tamu aitoi Timoti bani'odiga, 'aiseotogina tutuya fuedi ma yana nuakalikali faifaimi i nuanua. <sup>21</sup> ☆We'e 'ifwaidi tomotoga taunidi yadi nuanua 'aisedi faifaidi i nuanua, we'e naninidi Iesu Keliso faifaina, kebu faifaidi i da nuanuaga. <sup>22</sup> 'Omi 'akonadi 'wa 'asetai Timoti yana sauluva 'atumaiddi i veveda, fai 'wa da vo bani'odi kwamana tamana i da 'i'ivaiseni, we'e Timoti yau i 'i'ivaiseku Iesu Valana 'Atumaina faifaina taiadi 'a folofolova. <sup>23</sup> Mogitana taunina 'aku to'aivaita begaidi nuanuaku a na vetunei i na wai 'waimie, siwe nagami gabemani yadi veimea a na 'asetai vanuga 'eba yogona 'waineye a miamiaga faifaina, mulieta i na wai. <sup>24</sup> Wata a nuani mogitana 'ai'edi 'ada Toveimea Iesu nuanuana, sai'afoga tauniotogiku a na wai.

<sup>25</sup> ☆We'e a nuani i lubwaineku nagami iada Efafilodaito a voneni i na vilai i na wai. Basenadi 'wa vetunei i mai 'waikuye faifaimi i vetomata'aulele 'aku to'aivaita, bega taiadi 'a folofolova wata 'a lulugavia Iesu Keliso faifaina. <sup>26</sup> Nuanuana bwaikina wata i na wai 'waimie wata i nuavita faifaimi fai valana 'wa nogai i viga, kebu nuanuana 'wa na vevenuafouviga faifaina, i na wai 'wa na 'iseniga nuafoumi i na vatu. <sup>27</sup> Mogitana i viga, sai'afoga i da 'iaweda, siwe Yaubada i 'isanuakalikalieni, kebu 'aisenaga,

yau wata i 'isanuakalikalieku bega yaku nuavita vanuga 'eba yogona 'waineye kebu i da 'ivebwaika-'afo'afoi. <sup>28</sup> Fai 'wa nunuavitaga faifaina, nuanuaku bwaikina a na vetunei i na wai 'wa na 'iseni nika wata 'wa na sosoana, we'e yau yaku nuavita faifaimi i na 'a'ava. <sup>29-30</sup> Tutuyanina i na le'waga, 'wa na sosoaneni fai taunina iami, ma fuemie Keliso yana 'Aila'a. Yawaina i tauyeni, sai'afoga i da 'iaweda Keliso yana folova faifaina. 'Omi nuanuami 'wa da 'aivaitaga, nika fai 'ani'ie 'asa'aiana Efafilodaito 'akonadi i 'ivaiseku. Taunina 'wa na ve'ililibuyeni wata 'ifwaidi tomotoga yadi sauluva taunina bani'odi 'wa na ve'ililibuyedi.

### 3

*Ta ve'atumai Yaubada mataneye yada vetumagana 'wainega.*

<sup>1</sup> \*Ekwavo, sai'afoga a na 'ailove, siwe nuanuaku wata a na vonemi. 'Wa na sososoana fai 'omi Toveimea Iesu yana tomotoga. Ava'ai basenadi a kiluma a voneyediga 'waimie, wata a na luvaituganidi. Yaku luvaitugana faifaina kebu a na 'abiawaga, 'ami 'aivaita nika kebu 'wa na be'uga.

<sup>2</sup> Tomotoga 'ifwaidi i vonevonemi i vo, 'Ai'edi nuanuami 'wa na luku Yaubada yana 'Aila'a nageneye, yana tugusa nagami bunumi 'wa na bobodi." Tomotoganidi bani'odi i vonevoneyediga taunidi tosakona. 'Ou'ou kasikasisidi tomotoga tomogodi i 'u'utadabadi, wata tosakonanidi bani'odi, nuanuadi tomogomi i na 'ivekokovidi. Taunimi 'wa na 'i'isave'avinimi 'ou'ounidi 'waidiega. <sup>3</sup> \*Fai bunudi i bobodi yadi nuanua igodina taunidi Yaubada yana 'Aila'a, we'e mogitana 'ida tovetumagana yana 'Aila'a fai Yaubada yana tugusa mogitana 'waideye i 'eno'enov. Tugusanidi side bani'odi, taunida ta tauyeda Yaubada 'waineye bega yada sauluva sakoidi i bobodi ma'itufa ta subisubiai 'Anu'anununa 'wainega. Ta sososoana fai ta miave'itubama Iesu Keliso taiadi, we'e tugusanidi tomogoda 'waidie faifaidi 'ida kebu ta da vetumaganaga.

<sup>4</sup> 'Ai'edi nuanuaku, veimeanidi tomogoda faifaidi 'waidie a da vetumagana, siwe a baila, kebu nuanuaku yaku vetumagana a na yatoi tomogoku 'waineye. 'Ai'edi aitoi i na vo, Yau a ve'atumai Yaubada mataneye fai veimea tomogoda wata yada sauluva faifaidi, matatabuna a vematayakeyakedi," we'e yau Paulo 'ako mogitana a da ve'atumaiotoga. <sup>5</sup> \*Fai side bani'odi. A tubugana 'aiata 'ana ve-8 'waineye Yaubada yana tugusa a 'ewai bunuku i boboi. Yau tomogo Isileli mogitana,

Beniamina 'ana wauma 'wainega, tubukwavo matatabudi to-motoga Ibeliu, bega yau wata bani'odi. Yau nagami totafalolo Falisi, 'aila'anina veimea bwaikidi wata siaidi matatabuna 'a vematayakeyakedi. <sup>6</sup> ✧Fai bavubavuku igodi a vo, A na toke a na folova Yaubada faifaina, Iesu yana 'Aila'a vita a na veledi.” Veimeanidi Mosese 'wainega, matatabuna a vematayakeyakedi bega kebu tamu aitoi 'ana fata i na awavesakoyeku yaku sauluva faifaina, we'e mogitana yaku sauluva tonoviotogina.

*Keliso 'aiseotogina bwaikina.*

<sup>7</sup> ✧Yaku sauluvanidi a vo 'ako, 'Atumaidi, yaku 'ai'aiwabu,” we'e 'asiau matakuye nani-'avo'avovo fai Keliso 'wainega a ve'atumaotoga. <sup>8-9</sup> ✧Naninidi kebu 'aisedi i da venani-'avo'avovoga 'waikuye, wata nani matatabuna taiadi. We'e nani 'aitamogana bwaikaotogina 'waikuye, 'aku Toveimea Iesu Keliso 'ana 'asetai wata 'ana veiana. Kelisonina faifaina yaku sauluva tuatuaidi matatabuna a bailedi, 'waikuye bani'odi yogo, ma'itufa Keliso a vagavaia taiadi 'a mi-ave'itubama. Basenadi yaku nuanua a vo, Yaku 'atumaina a veluagai me Diu yama veimea 'adi vematayakayaka 'waidiega,” we'e 'asiau yaku 'atumaina a veluagaiga fai a vetumagana Keliso 'waineye. Mogitana yada vetumagana 'wainega Yaubada i 'ive'atumaida. <sup>10</sup> ✧Yaku nuanua matatabuna, nuanuaku Keliso a na 'asetai taiadi 'a na veiana. Taunina ma yana toketokena i tovoi wafayega, nuanuaku yana toketokenanina 'wainega a na vetoketoke, we'e vita fuedi i veluagadiga, nuanuaku wata bani'odi vitanidi a na veluagadi faifaina, i na nagoga a na wafa, i wafaga bani'odi. <sup>11</sup> ✧Bani'odi a na vevesauluvediga a nuani mogitana Yaubada wafayega i na sivetovoiku.

*Ta na vetafewa tutula ta na 'ewai.*

<sup>12</sup> ✧Kebu a na vo, Yaku sauluva 'akonadi Iesu Keliso yana sauluva i salaotogi,” wata kebu a na vo, Yau 'akonadi a ve'atumaotoga.” Basenadi Iesu Keliso i 'ewaku, 'waineye a nago bega tutula a na veluagai, begaidi 'asiau a vevetafewa tutulanina 'ana 'ewa faifaina. <sup>13</sup> Ekwavo, we'e mogitana yau a 'asetai bola kebu tutula a da veluagaiga. Yau bani'odi tove'ililide. 'Ai'edi i na lilidega, kebu nani 'ifwaidi mulineye faifaidi i na nuanua, i na lilidemo 'eba 'ailove 'ana tugusa faifaina i na vetafewa. We'e yau, yaku sauluva tuatuaidi kebu faifaidi a da nuanua siwe nani 'aitamogana matakuye

✧ 3:6: Fol 8:3 ✧ 3:7: Mad 13:46 ✧ 3:8-9: Lom 3:21-22 ✧ 3:10: Lom 6:3-5

✧ 3:11: 1 Kol 15:23 ✧ 3:12: 1 Tim 6:12,19

faifaina a vevetafewa. <sup>14</sup> ✧ Bega a lililidemo tonovina, nuanuaku 'eba ve'a'ava 'waineye a na le'wa, tutula a na 'ewai. Tutulanina mia 'atumaina wata miamia-vagaina abame, faifaina Yaubada i goleku fai Iesu Keliso i 'ita'ita'ieku.

<sup>15</sup> ✧ Ida matatabuda yada mia Keliso 'waineye 'akonadi ta kumaga, i lubwaineda yada nuanua 'aitamogana ava'ai a veifufuyediga 'waidie. We'e 'ai'edi 'ifwaimi yami nuanua tulina, wata Yaubada nuanua tonovina i na vele mi nuami i na magetadi. <sup>16</sup> Siwe nani bwaikina, 'asetanina 'akonadi ta veluagai Keliso faifaina kebu ta na baileni, yada 'asetanina ta na 'i'imoso'ieni nika yada sauluva i na tonova-'afo'afo.

<sup>17</sup> ✧ Ekwavo, nuanuaku matatabumi yaku sauluva 'wa na vevetutuyamedi. 'Ima yami tovevo sauluva 'atumaina 'a vemi, bega egavo i vetutuyamemaga yami 'eba 'isa, wata bani'odi 'wa na munega. <sup>18</sup> Ava'ai a na voneyeniga 'waimie, basenadi a vonevonemi siwe 'asiau a nuavita ma matageuku vonanina a na luvaitugani. Tovetumaganavo fue di yadi sauluva 'waidiega Keliso i vegavieni, yana wafa 'ai lagalagana 'waineye nani-'avo'avovo 'waidie. <sup>19</sup> ✧ Taunidi i tauyedi bunu 'ana nuanua sakoidi 'waidie 'wa da vo yadi yaubada. Yadi sauluvanidi faifaiddi taunidi i awa'ai'aidi, we'e mogitana i lubwainedi i da bunumayaga. Fwayafwaya 'ana nuanua 'waidie i vebwaika, 'aisena faifaina i nuanua, begaidi i na wafaotoga 'ai-'ala'alase. <sup>20</sup> ✧ We'e 'ida, abama 'ana tomotoga mogitana, ma yada sosoana 'ada To'ita'ita'i ta lulukamaseni i na mai abamega, To'ita'ita'inina Iesu Keliso taunina 'ada Toveimea. <sup>21</sup> ✧ Tutuyanina i na maiga tomogoda mweadi wata 'a'a'avidu i na siviladi i na vetuli bega tomogoda taunina tomogona magemagetana wata miamia-vagaina bani'odi. Naninina i na 'idewaiga yana toketokena 'wainega, toketokenanina 'wainega nani matatabuna i veveimeyedi.

## 4

### *Ma yami tokemaiga 'wa na tovoi fa'alina.*

<sup>1</sup> ✧ Ekwavo, a nuakalialiemi bwaikina, nuanuaku taiadi ta da miamia. 'Omi yaku folova vuagina, faifaimi a sososoana wata a awa'ai'aimi. Ava'ai a voneyeniga de'e yaku leta 'waineye, nuanuaku bonaku 'wa na 'ewai bega 'wa na tovoi fa'alina yami mia 'ada Toveimea Iesu 'waineye faifaina.

<sup>2</sup> We'e 'omi vevine 'ami 'ailuga Yodia wata Sinitiki a na vonemi. Fai 'omi 'ada Toveimea Iesu 'ana tovetumagana i lubwainemi kebu 'wa na veve'ikwayekwayega, nuanuaku yami nuanua 'aitamogana 'wainega 'wa na veiana. <sup>3</sup> ✧ We'e

✧ 3:14: 1 Kol 9:24 ✧ 3:15: 1 Kol 2:6 ✧ 3:17: 1 Tes 1:7 ✧ 3:19: Lom 16:18

✧ 3:20: Efe 2:6,19 ✧ 3:21: 1 Kol 15:28 ✧ 4:1: 1 Tes 2:19-20 ✧ 4:3: Lom 10:20

'omu 'aku 'au todumwebika Iesu yana folova 'waineye, nu-anuaku vevinenidi 'u na 'ivaisedi i na veiana mogitana fai 'adi 'ailuga taiadi 'a toke 'a folova Iesu Valana 'Atumaina yana vebwaika faifaina. Vevinenidi, Kelemeniti wata 'ifwaidi 'aku to'aivaita Iesu faifaina, 'akonadi 'adi wagava i ki-lumidi i 'eno'enovi Mia-vagata 'ana Buki nageneye bega mia 'atumaina wata miamia-vagaina i na veluagai Yaubada 'wainega.

<sup>4</sup> Tutuya matatabuna 'wa na sososoana fai 'omi Toveimea Iesu yana tomotoga, wata a na luvaitugani, a na vo, 'Wa na sososoana."

<sup>5</sup> \*Nuanuaku yami sauluva i na bika bega tomotoga i na 'ise'iseni. 'Ada Toveimea Iesu sai'afoga i na le'wa.

<sup>6</sup> \*Kebu tamu nani faifaina 'wa na venuafouviga, we'e mogitana nani matatabuna faifaidi 'wa na vevelu'ui. Ava'ai nu-anuami yami nuanua 'wa na lu'ivoneyedi Yaubada 'waineye wata 'wa na vevekaiwa 'waineye. <sup>7</sup> \*'Ai'edi bani'odi 'wa na vevelu'uiga Yaubada nuanua bikana i na velemi bega yami nuanua wata nuami i na 'ita'ita'iedi nika kebu 'wa na venuafouviga. Mogitana nuanua bikana 'wa na veluagai fai 'omi 'wa miave'itubama Iesu Keliso taiadi, nuanuanina bikana faifaina tomotoga i nuanua-wayoga.

<sup>8</sup> Ekwavo, sai'afoga a na 'ailove, siwe wata a na vonemi. Nuanuaku nani 'atumaotogidi wata naninidi tomotoga i awave'atumaiediga nuamie 'wa na yatodi 'wa na nunuave'avinidi. Naninidi side. Naninidi mogitana, naninidi ma 'adi ve'ililibu, naninidi tonovidi, naninidi 'atumi'avadi Yaubada mataneye, naninidi 'eba nua'ewa, tomotoga yadi nuanua 'ana laubwaina. Naninidi nuanuaku 'wa na nunuave'avinidi. <sup>9</sup> Ava'ai a vemiga wata 'waikuyega a sivedamanidi 'waimie yaku vonayega wata yaku sauluva 'waidiega, i lubwainemi 'wa na 'i'idewadi. 'Ai'edi bani'odi 'wa na vesauluvediga, Yaubada kumanina nuanua bikana wata mia 'atumaina 'adi to'anivelena, lilivamie i na miamia.

*Faulo i vekaiwa me Filifai 'waidie yadi 'aivaita faifaina.*

<sup>10</sup> Ekwavo, basenadi 'wa 'ivaiseku yami 'anivelena-maimaiga 'waidiega, we'e tutuya kamwaneye yami 'aivaita kebu a da veluagai. Kebu 'wa da venuafanikuga siwe fai kebu tamu 'eda i da 'eno'eno 'ana vetune faifaina. Tutuya de'e yami 'aivaita wata a veluagai bega ma yaku sosoana a vekaiwa bwaikina 'ada Toveimea 'waineye. <sup>11</sup> Kebu tamu nani 'waineye a da 'usa faifaina a da vonavona we'e ava'ai i sousouyedi 'waikuye, mia 'atumaina 'alo vitana 'akonadi a lutohovidi, ma yaku 'aseta a na sosoanamo. <sup>12</sup> Tutuya 'ifwaidi



nani fueodi faifaidi a ve'ale'usa, we'e tutuya 'ifwaidi nani fueotogidi 'waikuye. Vona mogitana 'akonadi a lutionovidi bega ava'ai i na souyeniga 'waikuye kebu a na venuafouviga, ma yaku 'aseta. 'Ai'edi ma kamoaike 'alo ma 'aku lase, wata yaku kukua fueotogidi 'alo kebu, siwe a na sosoanamo. <sup>13</sup> ✧ Keliso i kiavetoketokeku tutuya fueodi bega ava'ai i na souyediga 'waikuye 'aku fata.

<sup>14</sup> Mogitana Keliso 'aku to'aivaita siwe fai vita 'waidie 'wa 'ivaisekuga a vekaiwa 'waimie. <sup>15</sup> 'Omi me Filifai 'akonadi 'wa 'asetai nagami a wai Iesu Valana 'Atumaina a lau'age 'waimie 'wa 'ivaiseku. Tutuyanina yami 'awalawa Masidonia a 'iaweni 'omi Iesu yana 'Aila'aniami 'aisemi 'wa 'ivaiseku yami 'anivelena-maimaiga 'wainega we'e tovetu-magana 'adi 'aila'a 'ifwaidi kebu. <sup>16</sup> We'e tutuyanina a miamiaga 'atamana Tesalonaika 'waineye, tutuya fueodi 'wa 'ivaiseku 'aku 'isave'avina faifaina, a 'usaga 'wa 'ivaiseku. <sup>17</sup> Kebu nuanuaku yami nuakalikali a na 'ewaimo, siwe wata nuanuaku 'wa na 'a'anivelena-maimaiga bega 'awaie tutulina 'wa na veluagai Yaubada 'wainega. <sup>18</sup> ✧ Fai yami 'aivaita fueodi 'waikuye, yaku vekaiwa a kilukilumi de'e lubu-lubunina nageneye. Yami nuakalikalinidi 'wa vetunediga Efafiledaito i miedi 'aku fata yaku nuanua bani'odi, siwe wata bwaikaotogina 'wa vetunei. Mogitana yami 'aivaita 'waikuye 'wa da vo yami 'aisaya i da 'alavesigasigagai 'eba velomu 'wainega Yaubada faifaina, magaina 'iwanina i da yaogi, 'ana 'eba kiavesosoana wata nuanuana. <sup>19</sup> ✧ We'e yaku Yaubada yana 'ai'aiwabu magemagetadi fueotogidi bega 'ai'edi tamu nani 'waineye 'wa na 'usaga fueotogidi i na velemi. I na velemiga fai 'wa miave'itubama Iesu Keliso taiadi.

<sup>20</sup> Yaubada Tamada ta na subisubiai, yana 'ai'aiwabu magemagetadi kebu i na 'a'avaga i na 'eno-vagata.

Vona mogitana yaku nuanua bani'odi.

### *Faulo yana 'alanuai.*

<sup>21</sup> Yaku vekaiwa Yaubada yana tomotoga matatabumi 'waimie, 'omi 'wa miave'itubama Iesu Keliso 'waineye. Ek-wavo tovetumagana taiadi 'a miamianiga wata i vekaiwa 'waimie. <sup>22</sup> Yaubada yana tomotoganidi de'e bei matatabudi i vekaiwa 'waimie, we'e mogitana tomotoganidi i folofolova me Loma yadi toveimea bwaikina Sisa yana vanuge, i vekaiwa.

<sup>23</sup> A vevelu'ui faifaimi, nuanuaku 'ada Toveimea Iesu Keliso ma yana nuakalikali i na vevesauluva 'atumaina matatabumi 'waimie.

'Asa'aiana bani'odi,  
Yau Faulo.

## **KOLOSE**

### **Faulo yana kiluma me Kolose 'waidie.**

Tutuyanina Faulo i miamia Loma vanuga 'eba yogona 'waineye de'e letanina i kilumi me Kolose faifaidi. We'e wata tamu leta i kilumiga Filimoni faifaina fai taunina tomogo Kolose, bega letanidi 'ailuga Tikiasa wata Onesimo i nawedi. Kolose sai'afo Efeso lilivaneye, 'awalawa Eisia nageneye. Kolose tovetumagana 'adi 'aila'a i souyeniga kebu Faulo yana lau'age 'wainega, Faulo taunina i miamia Efeso we'e Efafilasi i vetunei i lau'age 'waidie nika tovetumagana 'adi 'aila'a i souyeni. (Kolose 1:7) Efafilasi 'atamana 'ailuga 'waidie i folova Kolose lilivaneye, Lodisia wata Ilafolisi. (Kolose 4:13) Kebu tamu tutuya 'atamananidi 'adi tomotoga Faulo i da 'isediga, siwe faifaidi i nuanua wata faifaidi i vevelu'ui.

Efafilasi i nago Faulo 'waineye i lu'ivona tove-vekavekali faifaidi, bega Faulo de'e letanina i kilumi, kebu nuanuana tovekalinidi me Kolose yadi vetumagana i na 'ivesakodi. Tovekalinidi nuanuadi tovetumaganavo ma yadi subia i na 'odu'odu tomotoga bwaikidi wata toketokedi bani'odi anelose 'waidie, kumanidiavo i miamia abame, wata i vonaga Iesu kebu mogitana Yaubada Natuna, taunina tamu anelose bani'odi. Wata tovekalinidi nuanuadi bunu 'aibobo wata ve'etoboda 'ifwaidi Mosese 'wainega i na vevematayakeyakedi.

De'e leta 'wainega Faulo i ve me Kolose 'waidie Keliso 'asa'aiana mogitana Yaubada bani'odi, yadi 'ai'aiwabu, yadi sauluva wata yadi nuanua i vesala, Kelisonina 'wainega Yaubada nani matatabuna i 'idewadi wata taunina tovetumaganavo yadi To'edakumeta. Keliso 'aiseotogina 'ita'ita'i wata mia 'atumaina lamudi. De'e leta 'ana 'idi side bani'odi.

Faulo yana vona-vekaiwa. 1:1-2

Faulo i vekaiwa wata i velu'ui me Kolose faifaidi. 1:3-14

Keliso yana vebwaika wata yana folova faifaidi. 1:15-23

Faulo yana folova tovetumagana 'adi 'aila'avo faifaidi. 1:24-2:5

Me Kolose i na miave'itubama Keliso taiadi, we'e tove-vekavekali i na bailedi. 2:6-3:4

Sauluvanidi tovetumaganavo 'adi laubwaina. 3:5-4:1

Velu'ase'ase 'ifwaidi, wata yana 'alanuai. 4:2-18

1-2 Emavo, yau Faulo iada Timoti taiadi 'a vekaiwa 'waimie. Yaubada nuanuana, bega a vetomata'aulele Iesu Keliso faifaina, we'e 'omi emavo Yaubada 'ana todumwebika 'wa miamianiga 'atamana Kolose 'waineye, matatabuda Keliso taiadi ta miave'itubama. 'A vevelu'ui faifaimi, nuanuama

Yaubada Tamada ma yana nuakalikali i na vevesauluva 'atumaina 'waimie wata nuanua bikana mia 'atumaina taiadi i na vevelele mi.

*Faulo i vekaiwa Yaubada 'waineye me Kolose faifaidi.*

<sup>3-4</sup> ✧ Yama velu'ui 'waidie, tutuya fuedi 'a vevekaiwa faifaimi 'ada Toveimea Iesu Keliso Tamana 'waineye. Faifaimi 'a vevekaiwaga Yaubada 'waineye fai valami 'a nogai, yami vetumagana Iesu Keliso 'waineye fa'alina wata Yaubada yana tomotoga matatabudi 'wa nunuakalikali edi. <sup>5</sup> Basenadi Iesu Valana 'Atumaina 'wa nogai, Valanina Yaubada yana Vona tonovina, nika bei 'wa nuani mogitana 'awaie 'ami veuveuta 'atuma idi 'wa na veluagadi Yaubada 'wainega. 'Ami veuveutanidi Yaubada 'akonadi i 'idewadi faifaimi, abame i 'eno'enov, bega ma yami vetumagana faifaidi 'wa lulukamata. Naninidi 'wa nuani mogitana 'awaie 'wa na veluagadi, begaidi 'wa nunuakalikali wata 'wa vevetumagana. <sup>6</sup> Valanina Iesu faifaina basenadi 'wa nogaiga, wata i vevebwaika tomia fwayafwaya matatabudi 'waidie, 'atumaina wata ma vuagina. We'e 'omi Valananina 'wainega 'wa 'asetai mogitana 'akonadi Yaubada ma yana nuakalikali i vesauluva 'atumaina 'waimie, wata yana nuakalikalinina 'wa vebaemi. Tutuyanina 'wainega i maiga 'asiau Iesu Valana i vevebwaika 'waimie wata yami sauluva i veve'atumi 'wa da vo ma vuagina. <sup>7</sup> Yami 'asetanina Yaubada yana nuakalikali faifaina Efafla 'wainega 'wa nogai, iadanina todumwebika ta nuakalikalieni, ma fuema 'a vetofolova Keliso faifaina, taunina tutulima 'waimie. <sup>8</sup> We'e 'wa nuakalikali ga Yaubada 'Anu'anununa yana 'anivelena, wata faifaina Efafla i vonema.

*Faulo i velu'ui nuanuana me Kolose i na vetoketoke Keliso faifaina.*

<sup>9</sup> Valami 'a nogai bega tutuya fuedi 'a vevelu'ui faifaimi. Tutuyanina 'a nogai i maiga 'asiau kebu 'a da 'ailove 'a vevelu'ui Yaubada 'waineye faifaimi, naninidi Yaubada nuanuana 'wa na 'i'idewadiga, nuanuama 'wa na 'aseta-'atuma idi. Nuanuama 'Anu'anunu 'Atumaina nuanua 'anibwekabwekana i na velemi bega nani matatabuna 'waidie ma yami 'asetai 'wa na vevenua'ivina 'atumaina. <sup>10</sup> ✧ Naninidi i na velemiga, nika sauluvanidi 'Auvea yana tomotoga 'adi laubwaina 'wa na 'i'idewadi yami mia matatabuna 'waidie. Wata nani tulina tulina 'waidie ga 'Auvea 'wa na kiavesosoani. 'Wa na vevesauluva 'atumaina nani tulina tulina 'waidie 'wa da vo yami mia ma vuagina wata Yaubada 'ana 'asetai i na vevebwaika 'waimie. <sup>11</sup> Wata 'a vevelu'ui faifaimi

bega tutuya fueidi Yaubada i na kiavetoketokemi taunina yana toketokena magemagetana 'wainega, bega vita tulina tulina i na sousouyediga kebu 'wa na 'abiawa, 'wa na tokemaigemi wata ma yami sosoana 'wa na vevekaiwa Tamada 'waineye. <sup>12</sup> ✧ 'Wa na vekaiwa Tamada 'waineye fai i 'ive'atumaimi bega 'ami fata 'ami veuveuta 'wa na veluagadi yana 'ai'aiwabu 'waidiega. 'Ai'aiwabunidi i 'idewadi yana tomotoga faifaida 'awaie yana 'Eba Veimea magemagetana nageneye i na veleda. <sup>13</sup> ✧ Tamadanina i 'ita'ita'ieda Seitani yana veimea dududubalina 'wainega i sidamaneda Natuna nuafouna yana 'isave'avina 'waineye. <sup>14</sup> ✧ Natunanina 'wainega Yaubada i tuveobuda sakona 'wainega wata yada sakonanidi i nuatavunidi.

*Keliso wata yana folova ifufudi.*

<sup>15</sup> ✧ Keliso, siwe 'asa'aiana taunina Yaubada bani'odi, fai Yaubada kebu ta da 'ise'iseniga i vemageta Keliso 'wainega. Kelisonina Yaubada Natuna, 'eba velamu 'waineye taunina i miamia, Yaubada 'ana 'idewadewa matatabuda taunina 'ada to'edakumeta. <sup>16</sup> ✧ Taunina to'edakumeta fai 'wainega nani matatabuna tomotoga taiadi Yaubada i 'idewada. Naninidi abame wata fwayefwayeye, naninidi ta 'ise'isediga wata kebu 'ada fata ta na 'isediga, wata tomotoga bwaikidi abame, kumanidiavo anelose, tomotoga toketokedi wata toveimea tulina tulina. Taunidi nani matatabuna taiadi i souyedi Keliso 'wainega, taunina yana nuanua faifaidi. <sup>17</sup> ✧ We'e 'ana 'idewadewanidi bola kebu tamu i da souyeniga, Keliso 'akonadi i miamia, mulieta nani matatabuna i souyedi i 'a'avana i 'i'isave'avinidi wata i 'i'ivefa'alidi. <sup>18</sup> ✧ Wata Keliso yana 'Aila'a 'alo Tomogona i 'i'isave'avinida, taunina 'unu'unu. Taunina nagami wafayega i tovoivaitugana, begaidi 'ida Tomogona yawaida lamuna. Side bani'odi, nani matatabuna 'waidiega taunina 'aiseotogina i 'edakumetaotoga. <sup>19</sup> ✧ Fai Yaubada nuanuana, bega yana 'ai'aiwabu, yana toketokena, yana nuanua, wata yana sauluva matatabuna i 'eno'enovi Natuna 'waineye, kebu tamu ava'ai 'waineye i da 'usa, taunina mogitana Yaubada bani'odi. <sup>20</sup> ✧ Wata Yaubada i nuani, nuanuana Natuna yana wafa 'wainega 'ida 'ana 'idewadewa i na veianeda. Basenadi nani matatabuna abame wata fwayefwayeye tomotoga taiadi ta 'awa'idida Yaubada 'wainega, siwe fai Natuna i wafa 'ai lagalagana 'waineye, dayagina i ilolo faifaida, matatabuda ta veiana Yaubada taiadi.

✧ **1:12:** Efe 1:18-19    ✧ **1:13:** Efe 6:12    ✧ **1:14:** Efe 1:7-8    ✧ **1:15:** Ion 1:18

✧ **1:16:** Ion 1:3    ✧ **1:17:** Ion 1:1    ✧ **1:18:** Efe 1:22-23    ✧ **1:19:** Kolos 2:9

✧ **1:20:** Efe 2:16

21 ✧We'e 'omi, basenadi yami sauluva wata yami nu-anua sakoidi 'waidiega Yaubada 'wa vedumwe'ai'aieni 'wa 'awa'idimi 'wainega. 22 ✧Tutuya de'e Yaubada i veianemi Natuna yana wafa 'wainega. Natunanina i vetomotogotoga i wafa faifaida bega Yaubada i na vagavaimi i na nawemi mataneye, bega 'omi magemagetami, kebu tamu yami sakona wata kebu tamu 'ami 'eba awavesako. 23 ✧Siwe i lubwainemi yami vetumagana Keliso 'waineye fa'alina, kebu 'wa na venuanaluga, wata kebu 'wa na fetoga. Tutuyanina Iesu Valana 'Atumaina 'wa nogai, 'wa vetumagana Keliso i wafa 'ami 'ita'ita'i faifaina wata 'wa nuani mogitana 'awaie 'ami veuveuta 'atumaidi 'wa na veluagadi Yaubada 'wainega, begaidi ma yami vetumagana 'wa lulukamata. Siwe i lubwainemi yami vetumagananidi fa'alidi i na 'eno'enovi kebu 'wa na baila. Valanina 'wa nogaiga 'akonadi Yaubada yana tomotoga i lu'ivona tomotoga matatabuna 'waidie, we'e yau Paulo a vetofolova faifaina a lalau'age.

*Faulo yana folova wata yana veviga Iesu yana 'Aila'a faifaidi.*

24 Yau Iesu Valana 'Atumaina a lalau'age, 'ana tovedumwe'ai'ai 'waidiega veviga a veveluagadi faifaimi, siwe veviganidi faifaidi a sosoana. 'Omi Keliso yana 'Aila'a 'alo Tomogona veviga bwaikina i veluagai faifaimi, siwe veviganidi bola i 'eno'enovi, begaidi veviganidi a veveluagadiga 'aku veuveuta, 'waidiega Keliso yana veviga a veve'a'avadi, faifainanina a sososoana. 25 Yaubada i venua'ivineku a vetofolova Keliso yana 'Aila'a faifaimi 'ami 'aivaita faifaina. Yaku folovanina Yaubada yana Vona matatabuna a sisivemagesedi tomotoga 'waimie. Yana Vonanina a lulu'ageyeniga side bani'odi. 26 ✧Basenadi tamu Yaubada yana nuanua givagivana kebu i da lu'ivoneyeni tomotoga 'waidie, givagivana i 'eno'eno i maiga tutuya de'e i sivemagaseni yana tomotoga 'waideye. 27 ✧I sivemageseniga fai nuanuana ta na 'asetai yana nuanuananina givagivana 'atumaiotogina wata magemagetana. Yaubada yana nuanuananina givagivana tomotoga 'ada 'aila'a tulina tulina faifaida side. Keliso i agemi inagemie i miamia, bega 'awaie abame Yaubada yana 'ai'aiwabu magemagetadi i na vele mi.

28 ✧Begaidi 'a lalau'age Keliso faifaina tomotoga matatabumi 'waimie, ma yama 'asetai nani tulina tulina faifaidi 'a vevelu'ase'ase wata 'a veve 'waimie. Nuanuama tomotoga 'aitamogana 'aitamogana Keliso taiadi i na miave'itubama i na kumaga bega 'a na vagavaidi 'a na

✧ 1:21: Efe 2:3 ✧ 1:22: Efe 2:14-16 ✧ 1:23: Ibu 6:11 ✧ 1:26: Efe 3:3-6

✧ 1:27: Efe 1:18-19 ✧ 1:28: Efe 4:13

nawedi Yaubada mataneye. <sup>29</sup> ✧Fai nuanuaku tomotoga i na miave'itubama Keliso taiadi, i na kumaga wata i na luku Yaubada mataneye, begaidi ma yaku tokemaiga a toke a folofolova. Keliso toketokeotogina yana toketokena i veleku, 'wainega a folofolova wata toketokenanina i folofolova 'waikuye.

## 2

*Keliso 'ana 'aseta 'waideye 'asa'aiana 'ai'aiwabu.*

<sup>1</sup> Nuanuaku 'wa na 'asetai yaku velu'ui 'waidiega a toke a folofolova faifaimi, 'omi kebu 'aisemi faifaimiga, wata Iesu 'ana tovetumaganavo i miamianiga 'atamana Lodisia 'waineye faifaidi, wata tovetumaganavo 'ifwaidi, kumanidiavo kebu maigiku i da 'ise'iseniga wata faifaidi a vevelu'ui. <sup>2</sup> ✧A vevelu'ui faifaimi bega Yaubada i na kiavefa'alimi, wata ma emiavo yami venuakalikali i na luve-tubamimi. Wata nuanuaku yami 'aseta i na vebwaika bega Yaubada yana nuanua givagivana 'wa na 'aseta-'atumaia. De'e naninina bani'odi kukuafou fai nuanuananina givagivana 'asa'aiana taunina Keliso. <sup>3</sup> ✧Kelisonina 'aiseotogina 'wainega 'aseta matatabuna ta veveluagadi nika 'ada fata ta na vevenua'ivina 'atumaina, naninidi bani'odi 'ai'aiwabu givagivadi. <sup>4</sup> ✧Naninidi a vonevonemi, kebu nuanuaku tamu aitoi i na vekaliemi bonana 'adi nogaya 'eba nua'ewa 'waidiega. <sup>5</sup> Yau kebu 'waimie taiadi ta da miamia, siwe nuaku i viwai 'waimie, wata a sososoana fai yami nuanua 'wa yatoi 'aitamogana 'wa tovtovoi fa'alina wata yami vetumagana Keliso 'waineye toketokena.

*Mia 'ivauna wata 'atumaina ta veluagai Keliso 'wainega.*

<sup>6</sup> Basenadi ma yami vetumagana taunimi 'wa tauyemi Iesu Keliso 'waineye, taunina 'ami Toveimea, i lubwainemi tutuya de'e wata bani'odi yami mia matatabuna 'waidie ma yami vetumagana taunimi 'wa na tautauyemi 'waineye 'wa na miave'itubama taiadi. <sup>7</sup> ✧Welavi yadi 'eba vetoketoke 'walamidi, wata bani'odi taunimi 'wa na tautauyemi Keliso 'waineye bega i na 'i'ivefa'alimi wata i na kikiavetoketokemi. Yami vetumagana 'waineye i na vevebwaika bega 'wa na tovtovoi fa'alina basenadi bani'odi Yaubada yana tomotoga i ve 'waimie. Wata tutuya fueidi 'wa na vevekaiwa Yaubada 'waineye.

<sup>8</sup> 'Wa na 'isa'isa i na nunago tamu aitoi nuami i na 'ewadi venidi igodina 'eba 'aseta 'waidiega, we'e mogitana venidi i na yogonimi kebu 'eba 'aivaita. Venidi kebu Keliso 'wainega,

tomotogaotoga yadi ve, i mai tubudiavo 'waidiega wata ya-iaina ma yadi veimea 'waidiega.

<sup>9</sup> \*Tomotoganidi yadi ve vekali, we'e Keliso i vetomotogaotoga, siwe 'asa'aiana Yaubada yana 'ai'aiwabu, yana toketokena, yana nuanua, wata yana sauluva matatabuna i 'eno'enovi 'waineye, Keliso mogitana Yaubada bani'odi.

<sup>10</sup> \*We'e 'omi, fai Keliso taiadi 'wa miave'itubama, mia 'ivauna wata 'atumaina 'wa veluagadi, bega kebu tamu ava'ai 'waineye 'wa da ve'ale'usa. Kelisonina yana veimea toketokeotogina, yaiaina yadi veimea kebu bani'odi, bega toveimea wata tomotoga toketokedi kebu ta da 'ise'isediga, matatabudi Keliso i veveimeyedi.

<sup>11</sup> \*Me Diu i vonavona i vo, Yaubada yana tugusa bunu 'aibobo 'a 'ewaiga, 'ima yana tomotoga mogitana." We'e 'omi, tutuyanina 'wa miave'itubama Keliso taiadi, kebu bunu 'aibobo 'wa da 'ewaiga tomotoga 'waidiega, we'e Keliso yami nuanua sakoidi nagami, i si'a'idi bega 'wa da vo nuanuananidi sakoidi i da boboyavuledi. <sup>12</sup> \*Wata side bani'odi. Keliso i wafaga i tavuni, wata bani'odi ta bafitaiso i lekoada ufayega, yada 'eba 'isa Iesu taiadi ta wafa i tavunida. Tutuyanina Yaubada Iesu i sivetovoia, 'ida ta vetumaganaga Yaubada yana toketokena 'waineye, taiadi i sivetovoida nika mia 'ivauna wata 'atumaina ta veluagadi.

<sup>13</sup> \*Basenadi 'anu'anunumi wafawafadi fai 'wa sakosakona. Wata fai 'omi kebu me Diu, 'omi mali tomotoga, Yaubada 'wa bavuyeni yana ve'etoboda kebu 'wa da vematayakeyakedi, begaidi 'anu'anunumi wafawafadi. We'e Yaubada Keliso i sivetovoia, 'omi wata bani'odi tutuya de'e Yaubada mia 'ivauna wata miamia-vagaina i velemini, wata yada sakona matatabuna i nuatavunidi. <sup>14</sup> \*Basenadi Yaubada yana ve'etoboda wata yana veimea ta geugeudi, yada sakonanidi 'adi tutula i lubwaineda ta da wafa, siwe Keliso yana wafa 'wainega yada sakonanidi i 'u'umidi, 'wa da vo yada sakona kilukilumidi i da 'ewayavuledi i da tutufwasedi 'ai lagalagana 'waineye, nika bei i ve'a'avadi.

<sup>15</sup> \*Keliso yana wafanina 'wainega, Seitani ma enavo yaiaina yadi toketokena i ve'a'avadi, tomotoga matatabudi matadie i lu'ivevenedi nika i bunumayaga.

*Venidi tomotoga yadi nuanuayega 'wa na bailedi.*

<sup>16</sup> \*Fai Keliso i vetoketoke bega a na vonemi. 'Ai'edi tomotoga 'ifwaidi nuanuadi i na talabodemi nani 'ifwaidi 'wa 'ani'anidi 'alo 'wa yemuyemudi faifaidi, kebu bonadi

\* 2:9: Ion 1:14,16    \* 2:10: Efe 1:21-22    \* 2:11: Lom 2:28-29    \* 2:12: Lom 6:4-5    \* 2:13: Efe 2:1,4-5    \* 2:14: Efe 2:14-16    \* 2:15: Kolos 1:13    \* 2:16: Lom 14:1-12



'wa na nogaidi. 'Ai'edi nuanuadi 'aiata 'ifwaidi 'wa na veve'ililibuyedi tafalolo faifaina, weta'i 'ivauna 'ana tafalolo, me Diu yadi 'Aiata Veawai, kebu bonadi 'wa na nogaidi. <sup>17</sup> \*Veimeanidi de'e 'a'a'avidu, i 'eno'enovi nika Keliso i souyeni. Naninidi bani'odi 'anunu, we'e Keliso mogitana tau-  
 niotogina. <sup>18</sup> \*Tomotoganidi taunidi yadi nuanuayega i veve 'waimie i vo, I lubwaineda taunida ta na kiaobuyeda wata ma yada ve'ililibu ta na 'odu'odu anelose 'waidie." 'Ai'edi yadi nuanuananidi kebu 'wa na 'idewadiga i na awavesakoyemi, siwe kebu bonadi 'wa na nogaidi. Taunidi i awa'ai'aidi, tutuya fuedi 'adi 'enoneganega i veveifufu-dewedi igodi i vo, Nani fuedi Yaubada i vevema, 'wa na ve'ililibuyema," siwe yadi vonanidi taunidi yadi nuanua 'waidiega i sousouyedi. <sup>19</sup> \*Tomotoganidi yadi miave'itubama Keliso taiadi, 'akonadi i 'awa'ididi 'wainega. Kelisonina taunina 'unu'unu, we'e 'ida, yana 'Aila'a 'alo Tomogona. Yana toketokena 'wainega 'ida du'u tulina tulina ta tubwa 'waineye i 'i'ive'avinida wata i 'i'isave'avinida. Wata Yaubada yana toketokena 'wainega 'ida Keliso Tomogona ta vevebwaika wata ta vevetoketoke Yaubada yana nuanua bani'odi.

<sup>20</sup> \*Tutuyanina Keliso i wafa, 'omi 'wa da vo taiadi 'wa da wafa, i yavumi Seitani ma enavo yaiaina 'waidiega, kumanidiavo ma yadi veimea fwayefwayeye. Mogitana i yavumi siwe awale yami sauluva 'wa da vo fwayafwaya 'ana nuanua i da vebwaika 'waimie? Naninidi tomotoga 'aisedi yadi nuanuayega i talabodedi, awale tomotoganidi 'wa vematayakeyakedi? <sup>21</sup> Yadi talabodanidi i vo, Nani de'e tabu, kebu 'wa na 'abitonovi. 'Ani'ani de'e tabu, kebu 'wa na 'ania." <sup>22</sup> \*Naninidi tomotoga i talabodediga nani-'avo'avovo, 'a'a'avidu. Ve'etobodanidi tomotoga yadi nuanua wata yadi ve 'waidiega i sousouyedi, kebu Yaubada 'wainega. <sup>23</sup> Tomotoganidi i veve 'waimie i vo, I lubwainemi taunimi 'wa na kiaobuyemi wata ma yami ve'ililibu 'wa na 'odu'odu anelose 'waidie." Taunimi tomogomi 'wa na nikenikedu bega nuagiva sakoidi 'waimie i 'eno'enovi i na 'a'ava." Yadi vonanidi 'adi nogaya 'wa da vo taunidi to'aseta, we'e mogitana kebu 'eba 'aivaita, kebu 'ana fata nuagiva sakoidi 'wa na talabodedi taunimi 'ami 'ivekokova 'wainega.

### 3

*Keliso ma yana 'ai'aiwabu mataududulina i na souyeniga, wata 'ida taiadi.*

<sup>1</sup> \*Keliso i wafa Yaubada i sivetovoia i laka abame ma yana veimea i miabui Yaubada 'ana 'atagiega. 'Omi wata

\* 2:17: Ibu 10:1 \* 2:18: 1 Kol 4:6 \* 2:19: Efe 4:15-16 \* 2:20: Gal 4:3-5,9  
 \* 2:22: 1 Kol 6:13 \* 3:1: Mak 16:19

bani'odi i sivetovoimi Keliso taiadi mia 'ivauna wata miamia-vagaina i velemi, begaidi i lubwainemi yami nuanua i na nunago abama 'ana nuanua 'waidie. <sup>2</sup> ✨Nuanuaku abama 'ana nuanua nuami i na 'ewaotogidi, we'e fwayafwaya 'ana nuanua kebu i na vebwaika 'waimie. <sup>3</sup> ✨Bani'odi 'wa na nuanuayediga fai tutuyanina Keliso i wafa wata bei 'omi 'wa wafa. Tutuya de'e Yaubada taiadi 'wa miave'itubama, nageneye 'wa givagiva Keliso taiadi. <sup>4</sup> ✨We'e Kelisonina, taunina yami mia 'ivauna wata miamia-vagaina lamudi, bega wata 'awaie ma yana 'ai'aiwabu magemagetana i na souyeniga, 'omi taiadi 'wa na souyemi, yana 'ai'aiwabunina i na velemi.

*Sauluva sakoidi 'wa na bailedi, 'ivaudi 'wa na 'ewadi.*

<sup>5</sup> ✨Fai Keliso taiadi 'wa miave'itubama, i lubwainemi fwayafwaya 'ana nuanua sakoidi 'wa na bailediga 'wa da vo 'waidiega 'wa da wafa, bega kebu 'wa na ve'avula-'avo'avovo, sakona tulina tulina 'eba bunumayaga wata bunu 'ana nuanua sakoidi taiadi 'wa na bailedi. Naninidi sakoidi kebu faifaidi 'wa na nuagiva wata kukua 'adi nuanua kebu 'waimie i na vebwaika. Tomotoganidi kukua nuadi i 'ewadiga, mogitana i sakona fai kukua 'adi nuakalikali 'waidie bwaikina, 'wa da vo 'waidie i da 'odu'odu, we'e Yaubada i da baileni. <sup>6</sup> ✨Egavo sauluvanidi i na 'i'idewadiga, taunidi Yaubada yana nuanua 'adi tovedumwe'ai'ai, 'awaie ma yana nuasako vematavuloga i na veledi. <sup>7</sup> Basenadi 'omi wata tovedumwe'ai'ainidi 'wa saladi, taunimi 'wa tauyemi sauluvanidi sakoidi 'waidie.

<sup>8</sup> ✨Tutuya de'e i lubwainemi sauluva sakoidi matatabuna 'wa na bailedi. Kebu 'wa na nunuasakoga, kebu kamomi i na ogaogalaga, wata kebu tamu aitoi 'wa na tolive'edeni bega vita i na veluagai. Kebu 'wa na vebonaivo wata vona sakoidi kebu 'awamiega i na sousouyedi. <sup>9-10</sup> Kebu emiavo 'wa na vekaliedi fai yami nuanua sakoidi nagami, sauluva sakoidi taiadi 'akonadi 'wa si'a'idi, ma'itufa yami nuanua 'ivaudi 'wa ve'wesenedi. Yami nuanuananidi 'ivaudi 'adi to'idewadewa Yaubada, tutuya fuedi i 'i'ive'ivaudi taunina yana nuanua bani'odi, bega taunina 'wa na 'aseta'a'avai wata taiadi 'wa na veiana. <sup>11</sup> Fai Yaubada yada nuanua i 'ive'ivaudi ta luku yana 'Aila'a 'waineye, matatabuda ta vesala mataneye, me Diu wata taunidi kebu me Diu, taunidi bunu 'aibobo i 'ewaiga wata kebu i da 'ewaiga, yavuyavula wata tobavu, tofolova-maimaiga wata tomotoga yavuyavudi, matatabuda Keliso i ageda bega kebu ta na lau'idi, 'aiseotogina bwaikina 'waideye.

✨ 3:2: Mad 6:33 ✨ 3:3: 2 Kol 5:17; Lom 6:6-7 ✨ 3:4: 1 Ion 3:2 ✨ 3:5: Efe 5:3-5 ✨ 3:6: Lom 1:18 ✨ 3:8: Efe 4:25-32; Lom 12:2

12 ✨ Omi tomotoganimi Yaubada yana tomotoga, i nuakalikaliemi wata i venua'ivinemi 'omi yana tomotoga mogitana. Begaidi i lubwainemi side naninidi 'wa na 'i'idewadi. 'Wa na 'i'isanuakalikali, ma yami nuakalikali 'wa na vevesauluva 'atumaina tomotoga 'waidie, 'wa na nunuaobu, yami sauluva i na bika, 'ai'edi egavo i na vesauluva sakoina 'waimie, ma yami tokemaiga 'wa na nuakalikaliyedi. 13 ✨ Ma emiavo 'wa na ve'ivaivaita kebu 'wa na logiedi, emiavo i na vesauluva sakoina 'waimie yadi sakona 'wa na nuatavunidi. Yada 'Auvea yami sakona i nuatavunidi, i lubwainemi 'omi wata emiavo yadi sakona 'wa na nuatavunidi. 14 ✨ De'e sauluvanidi 'atumaidi 'wa na 'i'idewadi, siwe ma yami nuakalikali. Nuakalikalinina i na 'itavimi, 'wainega 'wa na luvetubama.

15 ✨ Keliso 'akonadi nuanua bikana i velemi, i lubwainemi yami nuanua 'waidie i na 'eno'enovi bega yana 'aivaita 'wainega i na vevemi ava'ai nuanuana 'wa na 'i'idewadi. Nuanuananina bikana Yaubada nuanuana 'waimie i na 'eno'enovi begaidi i venua'ivinemi 'omi yana 'Aila'a 'aitamogana, matatabumi yami mia i na ve'atumai. Wata tutuya fueidi 'wa na vevekaiwa Yaubada 'waineye. 16 ✨ I lubwainemi Keliso Valana 'Atumaina nuami i na 'ewadi, bega ma yami 'aseti nani matatabuna faifaidi emiavo 'waidie 'wa na veve wata 'wa na awave'eda'eda. Same Yaubada yana Buki 'wainega, lei 'eba subia, wata lei 'Anu'anunu 'Atumaina yana 'alavelevelena 'wa na leileiedi wata nuamiega 'wa na vevekaiwa Yaubada 'waineye. 17 ✨ Fai 'omi 'ada Toveimea Iesu yana tomotoga, ava'ai 'wa na 'i'idewadi bonamiega 'alo nimamiega, yami sauluva matatabuna 'wa na 'i'idewadi 'ana wagavayega, wata 'wa na vevekaiwa Keliso 'waineamo Yaubada Tamada 'waineye.

*Yaubada yana tomotoga 'ada veimea.*

18 ✨ Omi vevine nagingimi, fai 'omi Keliso yana tomotoga i lubwainemi taunimi 'wa na tauyemi yami lalamogavo yadi nuanua 'wa na 'i'idewadi.

19 ✨ We'e 'omi iaveta nagingimi yami vevinevo 'wa na nunuakalikaliyedi wata kebu vita 'wa na velediga.

20 ✨ We'e 'omi yavayavava nani matatabuna 'waidie, tamamiavo wata inamiavo 'wa na vevematayakeyakedi nika 'ada Toveimea Iesu i na sosoana faifaimi.

21 ✨ We'e 'omi tamadiavo wata inadiavo, natumiavo kebu 'wa na yagai-maimaigidi, i na nunago i na nuavita wata i na vedumwe'ai'ai.

✨ 3:12: Gal 5:22-23 ✨ 3:13: Mad 6:14 ✨ 3:14: Lom 13:8-10 ✨ 3:15: Ion 14:27 ✨ 3:16: Efe 5:19 ✨ 3:17: Efe 5:20 ✨ 3:18: 1 Fit 3:1-2 ✨ 3:19: 1 Fit 3:7 ✨ 3:20: Efe 6:1-3 ✨ 3:21: Efe 6:4

22 We'e 'omi tofolovavo, 'ami toveimeavo yadi vona 'wa na vevematayakeyakedi nani matatabuna 'waidie. Kebu 'ami awave'atumai 'aisena faifaina 'wa na vematayakeyakedi wata kebu 'wa na vo, 'Aku toveimea mataneyeye a da folova-'atumai," we'e mogitana 'ai'edi kebu mataneyeye, siwe fai 'ami Toveimea abame 'wa veve'ililibuyeni, ma yami dumwebika 'wa na folofolova. 23 Ava'ai folovaga 'wa na 'i'idewaiga, ma yami sosoana 'wa na toke 'wa na folova, kebu tomotoga 'aisedi 'waidie 'wa da folofolova, we'e mogitana 'ami Toveimea Keliso 'waineyeye 'wa folofolova. 24 Vona mogitana 'wa na toke 'wa na folova fai 'awaie 'ami Toveimea Keliso abame i na tutulimi, naninidi 'atumaidi i yatodiga yana tomotoga faifaidi 'waidiega. I na tutulimi fai taunina 'ami Toveimea mogitana. 25 ✧Egavo sauluva sakoidi i 'i'idewadi 'aitamogana 'aitamogana wata tutula i na veluagai Yaubada 'wainega siwe nani sakoidi. Yaubada kebu i da lau'idi, mataneyeye tomotoga bwaikidi wata siaidi i vesala, bega matatabuda tutula ta na veluagai.

## 4

1 We'e 'omi toveimea, 'wa na vevesauluva 'atumaina yami tofolovavo 'waidie, wata 'adi 'aivaita 'wa na veveledi 'eda'eda mogitana 'waineamo. 'Wa na nuani 'omi wata ma 'ami Toveimea i miamia abame.

*Faulo yana velu'ase'ase velu'ui wata vona 'atumaina faifaidi.*

2 ✧Tutuya fuedi 'wa na vevelu'ui Yaubada 'waineyeye kebu 'wa na 'ailove. Yami velu'ui 'waidie, kebu yami nuanua i na nunago mali nuanua 'waidie, Yaubada 'aisena faifaina 'wa na nuanua wata 'waineyeye 'wa na vevekaiwa. 3 ✧Wata yami velu'ui 'waidie, faifaima 'wa na vevelu'ui bega Yaubada tamu 'eda'eda 'atumaina i na 'idewai, nika 'ama fata yana Vona 'a na lalau'age tomotoga 'waidie. Vonanina, Keliso faifaina basenadi givagivana, siwe tutuya de'e i sivemageseni. Fai Vonanina a lalau'age, Keliso 'ana tovedumwe'ai'ai i yatoku vanuga 'eba yogona 'waineyeye a miamia. 4 ✧I lubwaineku Keliso faifaina a na lalau'age, begaidi nuanuaku 'wa na vevelu'ui faifaiku bega 'aku fata a na kiavemageta 'atumaina nika 'ana 'aseta safailina. 5 ✧Tomotoganidi kebu i da vetumagana Keliso 'waineyeye taiadi 'wa na miamiaga, matadie yami sauluva 'wa na 'i'isave'avinidi ma yami 'aseta. 'Ai'edi tutuya 'atumaina 'wa na veluagai bei 'wa na lu'ivona Keliso faifaina. 6 ✧Tutuya matatabuna yami vona 'adi nogaya 'atumaidi wata

✧ 3:25: Fol 10:34 ✧ 4:2: Efe 6:18 ✧ 4:3: Efe 6:19 ✧ 4:4: Efe 6:20 ✧ 4:5: 1 Tes 4:11-12 ✧ 4:6: Efe 4:29; 1 Fit 3:15-16

'iwanidi bega 'ai'edi aitoi i na velutoliemi yami 'aseta Keliso faifaina yami tutula 'atumai'avana.

*Faulo yana 'alanuai.*

<sup>7</sup> ✨Iada Tikiasa i na wai valaku matatabuna i na lu'ivona 'waimie. Taunina iada mogitana, ma fuema 'a folofolova 'ada Toveimea Iesu faifaina, wata taunina Iesu 'ana todumwebika ma 'ana vetumagana. <sup>8</sup> ✨A vevetunei 'waimie bega 'ama vebae wata ava'ai 'a vivai i na lu'ivoneyedi 'waimie wata i na kiavefa'alimi. <sup>9</sup> ✨Wata Onesimo taiadi i na wai, taunina iada mogitana Iesu 'ana todumwebika ma 'ana vetumagana wata taunina tamu 'ami 'aila'a. 'Adi 'ailuga i na lu'ivona 'waimie naninidi i sousouyediga 'waimeye faifaiddi.

<sup>10-11</sup> ✨Alisitako, kumanina taiadi 'a miamia vanuga 'eba yogona de'e 'waineye, Malika Banabasa nibaina, wata Iosua tamu 'ana wagava Iusito, 'adi 'aitonu i vekaiwa 'waimie. Me Diu 'waidiega 'asa'aiana 'adi 'aitonunidi 'aku tofolova-vaita taiadi 'a folofolova bega Yaubada yana veimea i na vebwaika tomotoga 'waidie. Taunidi mogitana 'aku tokiavesosoana. We'e Malika, 'akonadi faifaina yaku vona i wai, 'ai'edi i na viwai i na le'waga, ma yami sosoana 'wa na lu'uma'umaieni.

<sup>12</sup> Efafla taunina wata tamu 'ami 'aila'a wata Iesu Keliso yana tofolova, i vekaiwa 'waimie. Tomogonina tutuya fuedi ma yana tokemaiga i vevelu'ui faifaiddi, nuanuana ma yami vetumagana 'wa na tovetovoi fa'alina, 'wa na kumaga, wata Yaubada yana nuanua matatabuna 'wa na 'aseta-'atumaidi wata 'wa na 'i'idewadi. <sup>13</sup> Efafla a veveifufuyeni fai nuanuaku 'wa na 'asetai taunina i toke i folofolova 'ami 'aivaita faifaina wata tovetumaganavo i miamiani 'atamana Lodisia wata llafolisi faifaiddi.

<sup>14</sup> ✨Luke, kumanina viga 'adi to'ive'atumai iada mogitana, wata Dimasi, 'adi 'ailuga i vekaiwa 'waimie.

<sup>15</sup> Nuanuama yama vekaiwa 'wa na lu'ivona Nimufa 'waidie wata edavo tovetumaganavo i miamiani 'atamana Lodisia. Vavinenidi yadi vanuge tovetumaganavo i vava'auta velu'ui faifaina, wata 'waidie 'wa na lu'ivona yama vekaiwa.

<sup>16</sup> Tutuyanina leta de'e 'wa na lu'iawawa-'a'avai, 'wa na vetunei i na nago Lodisia wata bei i na lu'iawawai. We'e letanina a vetunei i nago Lodisia wata i na vetunei i na wai 'waimie 'omi 'wa na lu'iawawai.

<sup>17</sup> Wata nuanuaku Akifasi 'wa na voneni 'wa na vo, 'Omu 'ada Toveimea Keliso taiadi 'wa miave'itubama bega folovanina i velemuga 'u na ve'a'avai.”

✨ 4:7: Efe 6:21 ✨ 4:8: Efe 6:22 ✨ 4:9: Fmi 1:10 ✨ 4:10-11: Fol 27:2; 12:12

✨ 4:14: 2 Tim 4:9-12

<sup>18</sup> De'e bei yaku leta 'ana tokiluma a voneni i 'ailove, tauniku a na ve'a'avai. Yau Faulo de'e nimaku, a vekaiwa 'waimie.

'Wa na nuanuaniku faifaiku 'wa na vevelu'ui fai yau vanuga 'eba yogona 'waineye a miamia.

A vevelu'ui faifaimi, nuanuaku Yaubada ma yana nuakalikali i na vevesauluva 'atumaina 'waimie.

'Asa'aiana bani'odi,  
Yau Faulo.

# 1 TESALONAIIKA

## Faulo yana kiluma nagami me Tesalonaika 'waidie.

Tutuyanina Faulo i miamia Kolinita, de'e leta nagami i kilumi me Tesalonaika tovetumaganavo faifaidi. Tesalonaika tamu 'atamana bwaikina 'awalawa Masidonia nageneye, 'atamananina balebaleye. Faulo yana lau'age-vuvua 'ana vetonu 'waineye, bei be'ama Vala 'Atumaina i lu'ageyeni me Tesalonaika 'waidie. Yana lau'agenina 'wainega, tamu 'aila'a tovetumagana i souyeni. (Folova 17:1-14) Tovetumagananidi 'ifwaidi me Diu, we'e mali tomotoga taunidi kebu Diu sai'afomoso'idi. We'e me Diunidi 'ifwaidi Iesu yana tafalolo 'ana 'eda'eda 'waineye i damana, begaidi me Diu to'edakumetavo i ve'unumagigi, Faulo ma enavo i sogiedi i nagoi Belia. Muli-eta Faulo Timoti i vetunei i nago Tesalonaika. Tutuyanina i vilai i mai valadi 'atumaina i lu'ivoneyeni.

Letanina nageneye Faulo i vekaiwa Yaubada 'waineye fai me Tesalonaika ma yadi vetumagana i tokemaiga vita tulina tulina 'waidie, wata fai ma yadi nuakalikali Faulo i nuanuani. Faulo nuanuana yana leta 'wainega i na kiavefa'alidi wata yadi velutoli tovetumagana i wafaga faifaidi i tutuli. De'e letanina 'ana 'idi side bani'odi.

Faulo yana vona-vekaiwa. 1:1

I vekaiwa Yaubada 'waineye yadi vetumagana faifaina.

1:2-10

Faulo yana sauluva me Tesalonaika 'awasasadie faifaina.

2:1-12

Faulo i nuanua me Tesalonaika yadi mia faifaina. 2:13-3:13

Sauluvanidi tovetumaganavo 'adi laubwaina. 4:1-12

Ve Iesu yana vila-vaitugana faifaina. 4:13-5:11

Velu'ase'ase 'ifwaidi wata yana 'alanuai. 5:12-28

1 Emavo, yau Faulo, Sailasa wata Timoti taiadi 'a vekaiwa 'waimie. 'Omi Keliso yana 'Aila'a 'wa miamiani 'atamana Tesalonaika 'waineye, Yaubada Tamada wata 'ada Toveimea Iesu Keliso yadi tomotoga, 'waimie 'a kilukiluma.

'A vevelu'ui faifaimi, nuanuama Yaubada Tamada wata Keliso ma yadi nuakalikali i na vevesauluva 'atumaina 'waimie wata nuanua bikana i na vevelele mi mia 'atumaina taiadi.

*Vekaiwa me Tesalonaika yadi sauluva faifaina.*

2 ✧Tutuya fuedi 'a vevekaiwa Yaubada 'waineye matatabumi faifaimi wata 'a vevelu'ui 'waineye bega i na 'i'ivaisemi. 3 Yama vekaiwa Yaubada Tamada 'waineye

faifaimi, fai tutuya fuei 'a nuanuanimi yami vetumagana ma 'ana 'eba 'isa, yami folova toketokena fai ma yami nuakalikali, wata vita 'waidie 'wa totokemaigemi fai yami vetumagana 'wa yato-vagaseni 'ada Toveimea Iesu Keliso 'waineye.

<sup>4-5</sup> ✧ Emavo 'a 'asetai Yaubada i nuakalikaliemi wata i venua'ivinemi fai tutuyanina Iesu Valana 'Atumaina 'a viweni 'waimie, 'Anu'anunu 'Atumaina i 'imoso'ieni bega kebu vona 'aisena 'wainega, wata Yaubada yana toketokena i vemi bega 'wa ve'awamogitana. Yama sauluva 'akonadi 'wa 'asetai tutuyanina taiadi ta miamia, yami 'eba 'isa wata 'ami 'aivaita.

<sup>6</sup> ✧ Yama sauluvanidi wata 'ada Toveimea Iesu yana sauluva 'wa vetutuyamedi Avinodi vita fuei 'wa veluagadi Keliso 'ana tovedumwe'ai'ai 'waidiega, siwe ma yami sosoana 'Anu'anunu 'Atumaina 'wainega taunimi 'wa tauyemi Vala 'Atumaina 'waineye. <sup>7</sup> Keliso 'ana tovetumaganavo 'awalawa Masidonia wata Gulisi nagedie yami sosoana wata yami tokemaiga i 'isedi yadi 'eba 'isa i na vetutuyamemi. <sup>8</sup> Vona mogitana 'awalawanidi 'adi tomia Toveimea Valana i 'asetai 'waimiega wata 'awalawa 'ifwaidi 'ani'ieyega 'waidie tomotoga fuei yami vetumagana Yaubada 'waineye valana 'akonadi i 'asetai, begaidi kebu i da lubwainema 'waidie 'a na lulu'ivona. <sup>9</sup> ✧ Tomotoganidi i lulu'ivona basenadi ma yami sosoana 'wa lu'uma'umaiema faifaina, wata kumaea 'waidie 'wa tauyemiga 'akonadi 'wa vedumwe'ai'aiedi 'wa nuavilami taunimi 'wa tauyemi Yaubada 'waineye 'wa vetofolova faifaina. Taunina 'aiseotogina Yaubada, miamia-vagaina. <sup>10</sup> ✧ Wata tomotoganidi i lulu'ivona 'wa lulukamata Yaubada Natuna yana vila-vaitugana abamega faifaina. Natunanina Iesu, kumanina basenadi i sivetovoa wafayega bega i 'i'ita'ita'ieda Yaubada yana nuasako wata yana vematavuloga 'awaie i na souyediga 'waidiega.

## 2

*Faulo yana folova Tesalonaika 'waineye.*

<sup>1</sup> Emavo, 'akonadi 'wa 'asetai yama wai 'waimie kebu 'a da wai-maimaiga, 'wainega 'aivaita 'wa veluagai. <sup>2</sup> ✧ Wata 'wa 'asetai basenadi 'atamana Filifai 'waineye Keliso 'ana tovedumwe'ai'ai vita bwaikina i velema wata i yagaima siwe yada Yaubada toketokena i velema bega 'a wai 'waimie ma yama venuafoufa'ala Valana 'Atumaina 'a lu'ivona. We'e tovedumwe'ai'ai 'ifwaidi taiadi 'wa miamianiga kebu 'a da kololoyedi bega yama folova 'a da baileni fai Yaubada yana

✧ **1:4-5:** 1 Kol 4:20 ✧ **1:6:** 2 Tes 3:9; 1 Fit 5:3; Lom 1:8 ✧ **1:9:** Fol 14:14-15

✧ **1:10:** Mad 16:27 ✧ **2:2:** Fol 16:19-24



'aivaita 'wainega 'a folofolova. <sup>3</sup> 'A lau'agega 'waimie kebu vekaliga 'alo si'wayo'wayoga we'e mogitana ava'ai Yaubada nuanuana 'a na veifufuyediga faifaidi 'a vona. <sup>4</sup> \*A vonaga fai Yaubada i nuani 'ima i lubwainema bega Iesu Valana 'Atumaina i tauyeni 'waimeye 'a na lulu'ivona. Kebu tomotoga 'adi kiavesosoana faifaina 'a da vonavona siwe ava'ai Yaubada nuanuana 'ana 'eba kiavesosoana faifaina 'a vonavona, Yaubadanina yama nuanua matatabudi i 'asetadi, 'atumaidi 'alo sakoidi. <sup>5</sup> \*Omi 'wa 'asetama wata Yaubada i 'asetama kebu nuami 'a da 'ani'anidi subia-vekavekali 'wainega wata mani faifaina kebu a da veiana-sebesebemi. <sup>6</sup> \*Kebu 'ama subia faifaina 'a da folofolova, 'omi 'alo mali tomotoga 'waimiega.

<sup>7</sup> 'Ima Keliso yana tomata'aulelevo 'ama fata 'a da lukakademi 'ani'ani wata nani 'ifwaidi 'wa da vevelema, siwe kebu bani'odi 'a da vevesauluvediga. Tutuyanina taiadi ta miamiani yama sauluva bikana bani'odi vavine natudiavo i 'i'isave'avinidi. <sup>8</sup> Ma yama nuakalikali Yaubada yana Vona 'a lu'ivona 'waimie. 'A nuakalikaliemi bwaikina begaidi kebu vona 'aisena 'a da velema, wata taunima 'a tauyema 'a vetofolova 'waimie.

<sup>9</sup> \*Emavo, 'wa na nuani basenadi yama folova 'waimie. 'Aiata wata lovana 'a folofolova bwaikina, Yaubada yana Vona a lulu'ivona 'waimie wata taunima 'a 'i'isave'avinima 'ani'ani 'wainega fai kebu nuanuama vita 'a na velema 'ama 'isave'avina faifaina.

<sup>10</sup> Side bani'odi, 'omi Keliso 'ana tovetumaganavo, yama sauluva 'wa 'isedi wata Yaubada i 'isedi, bega 'wa 'asetama kebu tamu tutuya 'a da vekaliemi, yama mia matatabuna 'waidie yama sauluva tonovidi wata 'atumaidi. <sup>11</sup> \*Fai yama 'aivaita 'aitamogana 'aitamogana 'waimie 'wa da vo bani'odi tomogo natunavo i da 'i'isave'avinidi. <sup>12</sup> \*Yami vetumagana 'a kiavefa'alidi, nuami 'a 'iveagiagidi wata 'a vevelu'ase'ase mi yami sauluva i na ve'atumi bega Yaubada i na sosoana faifaimi. I lubwainemi yami sauluva 'atumi'avadi fai Yaubada i venuma'ivinemi nuanuana yana 'ai'aiwabu magemagetadi i na velema taiadi 'wa na miamia yana 'Eba Veimea nageneye.

*Me Tesalonaika vita i veluagadi Keliso 'ana tovedumwe'ai'ai 'waidiega.*

<sup>13</sup> \*A vevekaiwa Yaubada 'waineye fai tutuyanina Yaubada yana Vona 'a viweni 'wa nogai nuanuami bwaikina, fai 'wa 'asetai vonanina Yaubada yana Vona kebu tomotogaotoga yadi vona, vona mogitana Yaubada 'wainega. Vonanina

\* 2:4: Gal 1:10    \* 2:5: Fol 20:33    \* 2:6: Ion 5:41,44    \* 2:9: 1 Kol 4:12

\* 2:11: 1 Kol 4:14    \* 2:12: Fil 1:27    \* 2:13: Gal 1:11-12

'wainega Yaubada i folofolova 'omi tovetumagana nuamie. 14-15 ✨Emavo, tutuyanina 'wa tauyemi Keliso 'waineye vita 'wa veluagadi taunimi yami tomotoga 'waidiega, bani'odi basenadi me Iudia 'ifwaidi i vetumagana Iesu Keliso 'waineye i luku Yaubada yana 'Aila'a 'waineye, vita i veluagadi taunidi yadi tomotoga me Diu 'waidiega. Tovedumwe'ai'ainidi basenadi Yaubada yana tolu'ivonavo i luwewafadi mulieta Toveimea Iesu, wata 'ima i soziema. Tomotoganidi ma yadi nuasako tomotoga matatabuda i vevegavieda we'e Yaubada kebu i da sosoana faifaidi. 16 ✨Yadi sakona i 'imoso'ieni igodi i tatalaboda kebu nuanuadi 'a na lalau'age mali tomotoga kebu Diu 'waidie bega Yaubada i na 'ita'ita'iedi. Yadi sakananidi i vevebwaika i maiga nika 'asiau Yaubada yana nuasako i souyeni i na vematavulogidi.

*Faulo nuanuana me Tesalonaika i na foge-vaituganidi.*

17 Emavo, basenadi 'a 'iawemi kebu maigimi 'a da 'ise'isedi siwe kebu 'a da venuafanimiga. 'A mai kebu tutuya manamanawenaga nuanuama bwaikina 'a da wai 'a da foge-vaituganimi. 18 Vona mogitana 'a vetafewa 'a da wai faifaina, we'e yau Faulo tutuya fuedi a vetafewa-wayoga fai Seitani yama 'eda i sibodai vita tulina tulina 'waidiega. 19 ✨'Awaie 'ada Toveimea Iesu i na vilai i na mai fueda ta na tovoi mataneye, 'omi yama 'eba sosoana 'ama subia faifaina. Yama folova 'wainega 'wa vetumagana Keliso 'waineye bega 'a nuani mogitana 'ana tutula 'a na veluagai Yaubada 'wainega. 20 Vona mogitana 'omi 'ama 'eba subia 'a sososoanemi.

### 3

*Faulo Timoti i vetunei nuanuana me Tesalonaika yadi mia i na 'asetai.*

1-3 ✨Tutuya manamanawena kebu maigimi 'a da 'ise'isedi wata valami 'a da noganogai begaidi 'a vevenuafouviga faifaimi. 'A nuani yau wata Sailasa 'ama 'ailuga 'a na miamia 'atamana Adeni, we'e Timoti 'a voneni i wai 'waimie. Taunina iada 'ama 'aila'a, ma fuemeye Yaubada faifaina 'a folofolova Keliso Valana 'Atumaina 'a lalau'age-vuvua. 'A vetuneiga i na 'ivaisemi yami vetumagana i na kiavetoketokedi bega tutuyanina vita 'wa na veluagadiga, kebu tamu aitoi 'waimiega Iesu i na baileni i na vilai yana sauluva tuatuaina 'waineye. 'Omi 'akonadi 'wa 'asetai Yaubada vita i tauyedi i na souyedi 'waideye. 4 ✨'Wa 'asetaigna fai tutuyanina taiadi ta miamiani 'a vona-vagasemi 'a vo, 'Awaie Keliso 'ana tovedumwe'ai'ai i na vegavieda vita ta na veluagadi," ava'ai a voneyeniga

✨ 2:14-15: Fol 17:5; Fol 2:23  
Fol 17:15; Fol 16:1; 2 Tim 3:12

✨ 2:16: Lom 1:18  
✨ 3:4: Fol 14:22

✨ 2:19: Fil 4:1 ✨ 3:1-3:

'ana mogitana i sousouyeni 'waimie, 'wa 'isenina nika 'wa nuani. <sup>5</sup> ✧ Fai a 'asetai vita 'wa veveluagadi a venuafouviga bwaikina faifaimi, begaidi Timoti a vetunei i wai 'waimie yami vetumagana i na 'iseni toketokena 'alo i mwea bega i na mai i na lu'ivona 'waikuye. A kololo i na nunago Seitani 'eba sailubu bwaikina i na velemi 'wa na be'u bega basenadi yama folova 'waimie i na 'ivesakoi.

*Timoti yana lu'ivona me Tesalonaika faifaidi.*

<sup>6</sup> ✧ Side bani'odi, ma yaku venuafouviga Timoti a vetunei i wai taiadi 'wa miamia, tutuyanina i vilai i mai valami i lu'ivoneyeni a sosoana fai i vo, Me Tesalonaika yadi sauluva a 'iseni, i vevetumagana mogitana Keliso 'waineye wata tau-nidi tonuakalikali. Tutuya fuedi ma yadi sosoana i nuanu-anida nuanuadi bwaikina ta na foge-vaituganidi, bani'odi i nuanuayediga 'ida wata yada nuanua i vesala.”

<sup>7</sup> Emavo, 'ima vita wata veviga 'a veveluagadi siwe valami 'a nogai, mogitana i kiavesosoanima. <sup>8</sup> Yami vetumagananina valana faifaina nuafouma i vatu wata yama mia i ve'atumai fai 'wa tovofovoi fa'alina wata 'wa vevesauluva 'atumaina 'Auvea yana nuanua bani'odi. <sup>9</sup> 'Asiau 'ama fata 'a na vekaiwa Yaubada 'waineye faifaimi. 'A sosoanemi bwaikina begaidi Yaubada mataneyeye 'a vevekaiwa. <sup>10</sup> 'Aiata wata lovana 'a vevelu'ui nuanuama bwaikina tauniotogimi 'a na 'isemi bega yami vetumagana Keliso 'waineye 'a na 'imoso'iedi.

<sup>11</sup> A vevelu'ui nuanuaku yada Yaubada Tamada tauniotogina wata 'ada Toveimea Iesu yama 'eda i na 'idewai 'a na wai 'waimie. <sup>12</sup> Wata nuanuaku i na 'ivaisemi yami nuakalikali emiavo wata tomotoga 'ifwaidi faifaidi i na vebwaika-'afo'afo, yama nuakalikali 'waimie 'ana fata bani'odi. <sup>13</sup> ✧ I na 'ivaisemi 'wa na vetoketoke bega tutuyanina 'ada Toveimea Iesu i na vila-vaitugani yana tomotoga matatabudi taiadi, yami sauluva 'atumai'avadi wata magemagetadi 'wa na tovoi yada Yaubada Tamada mataneyeye.

## 4

*Sauluvanina Yaubada yana 'eba sosoana, kumanina nuanuana.*

<sup>1-2</sup> Emavo, sai'afoga 'a na 'ailove, siwe nuanuama wata 'a na vonemi. Sauluva tonovidi 'wa 'asetadi 'waidiega 'ana fata Yaubada 'wa na kiavesosoani fai 'a ve 'waimie Iesu Keliso yana veimea 'wainega. 'Akonadi bani'odi 'wa vevesauluvedi, siwe 'asiau 'ada Toveimea Iesu 'ana wagavayega wata 'a na vonemi, nuanuama bwaikina 'wa

na nunuave'avini Yaubada yana nuanua 'wa na 'i'idewai.  
 3-4 ✧Side bani'odi Yaubada nuanuana 'wa na vevesauluva.  
 Nuanuana yami sauluva magemagetadi mataneyeye, kebu  
 'wa na sakona bunu 'ana nuanua 'wainega, 'wa na nagiga  
 yami vevinevo 'wa na veve'ililibuyedi wata yami sauluva  
 tonovidi Yaubada mataneyeye. 5 ✧Kebu nuanuama tomotoga  
 ganidi Yaubada kebu i da 'asetai yadi sauluva 'wa na ve-  
 tutuyamedi, i veve'avula-'avo'avovo. 6 Kebu i da lubwaineni  
 tamu aitoi iana i na vekalieni yana vavine i na luobuyedi, fai  
 egavo bani'odi i sakonaga 'Auvea vematavuloga i na veledi.  
 Naninina faifaina basenadi 'a matakiami. 7-8 ✧Yaubada i  
 venuma'ivineda kebu ta na sakosakona, i venuma'ivinedaga  
 ta na vevesauluva tonovina mataneyeye, bega egavo yama  
 venidi i na vedumwe'ai'aiediga, kebu tomotoga yama veimea  
 'aisedi i da vedumwe'ai'aiedi, siwe wata Yaubada, taunina  
 'Anu'anununa 'Atumaina 'ana to'anivelena 'waimie, i ve-  
 dumwe'ai'aieni.

9 ✧'Omi tovetumagana ma emiavo 'wa vevenuakalikali,  
 kebu i da lubwaineku faifaina 'a na kiluma 'waimie. Kebu i  
 da lubwainekuga fai 'akonadi Yaubada i vemi bani'odi 'wa  
 na munega ma emiavo 'wa na vevenuakalikali. 10 Vona  
 mogitana 'akonadi bani'odi 'wa vevesauluvedi emiavo tove-  
 tumaganavo yami 'awalawa Masidonia matatabuna nagen-  
 eye 'wa nunuakalikali. 'Wa nunuakalikali siwe 'a na  
 velu'ase'ase mi nuanuama yami nuakalikali i na vebwaika-  
 'afo'afo.

11 ✧Nuanuama 'wa na vewavawava yami mia bikana, kebu  
 'wa na tolive'eda tomotoga 'ifwaidi 'waidie, we'e 'ami'ami  
 faifaina taunimi 'wa na folofolova, basenadi bani'odi 'a  
 vonemi. 12 ✧'Ai'edi bani'odi 'wa na vesauluvediga, egavo  
 kebu i da taayediga Iesu 'waineye yami sauluva i na 'isedi i na  
 ve'ililibuyemi wata kebu vakeli'ava 'waineye 'wa na nuanua.

### *Iesu yana vila-vaitugana faifaina.*

13 ✧Emavo, nuanuama 'a na veifufu 'waimie towafa faifaidi  
 bega kebu 'wa na nuavita. Egavo kebu i da vetumaganaga  
 Keliso 'waineye i nunuavita ediavo i wafaga faifaidi fai  
 nuani kebu wata i na 'isedi, we'e 'ida tovetumagana kebu  
 bani'odi ta na munega. 14 'Ida ta vetumagana ta 'asetai Iesu  
 i wafa wata i yawasa-vaitugana, begaidi wata ta vetumagana  
 Iesu yana tomotoga i wafaga i na yawasa-vaitugana bega Iesu  
 taiadi Yaubada i na vagavaidi i na maia.

15 ✧De'e 'ada Toveimea Iesu yana vona 'a lulu'ivoneyeni  
 'waimie. Tutuyanina i na vilai i na mai 'ida ma yawaida

✧ 4:3-4: 1 Fit 1:16; 1 Kol 6:13,15 ✧ 4:5: Lom 1:24-28 ✧ 4:7-8: 1 Fit 1:15; Luk  
 10:16 ✧ 4:9: Ion 13:34 ✧ 4:11: Efe 4:28 ✧ 4:12: Kolos 4:5 ✧ 4:13: 1  
 Kol 15:20; Efe 2:12 ✧ 4:15: 1 Kol 15:51-52

kebu ta na kumetaga, nagami tovetumagana wafawafadi i na kumeta Iesu taiadi i na veluaga. <sup>16-17</sup> We'e 'aiatanina 'waineye bona bwaikina 'wainega i na veimea, anelose yadi to'edakumeta bonana wata Yaubada yana evulega tomotoga i na nogaidi, nika 'ada Toveimea taunina i na obuma abamega. Keliso 'ana tovetumaganavo i wafaga nagami i na tovoi, mulieta 'ida ma yawaida ta na miamianiga i na si'augida ma fuedeye ta na laka waowa 'waidie Toveimea Iesu taiadi ta na veluaga 'awasasa'aveye. Bega tutuya matatabuna 'ada Toveimea taiadi ta na mia-vagata. <sup>18</sup> Vona mogitana ta na tovoi wafayega begaidi wafa 'ana tutuye emiavo 'wa na ki-avesosoanidi vona de'e 'wainega.

## 5

*'Wa na 'idewadewa 'ada Toveimea yana vila-vaitugana faifaina.*

<sup>1-2</sup> ✧ Emavo, kebu i da lubwainema Iesu yana vila-vaitugana 'ana tutuya faifaina 'a na kiluma 'waimie fai 'aiatanina 'akonadi 'wa 'asetai i na vaimwaimwamo. 'Ai'edi tamu to-vainago nuanuana i na vainago lovane kebu i na lu'ivona, i na maimo. Wata bani'odi 'ada Toveimea yana 'aiata kebu i na lu'ivona i na maimo tomotoga yawaidi i na lovoga. <sup>3</sup> ✧ 'Ai'edi vavine ma kamodi, kebu i da 'asetai ma'avia i na vebutudi, i na miamiamo nika i na vebutudi. Wata bani'odi kebu ta da 'asetai ga ma'avia Iesu i na souyeni. Tutuyanina tomotoga i na vo, Yada mia i ve'atumai, vetalaga kebu," bei i na tala'avuidi nika yawaidi i na lovoga. Kebu tamu aitoi 'ana fata i na dega 'alo ava'aiamo i na nago.

<sup>4</sup> Emavo, we'e 'omi kebu dudubala 'ana tomia, bega kebu i da lubwainemi 'ada Toveimea i na veyawailovogimi yana 'aiata 'waineye. <sup>5</sup> ✧ 'Omi matatabumi mageta 'ana tomia wata 'aiata 'ana tomia. 'Ida kebu lovana 'ana tomia, kebu nuanuada dudubala 'ana sauluva. <sup>6</sup> Begaidi kebu i da lub-waineda ta na 'eno'eno tomotoga 'ifwaidi bani'odi, ta na 'isa'isa wata yada sauluva ta na 'i'isave'avinidi. <sup>7</sup> We'e lo-vana tomotoga yadi 'eba 'eno, wata lovane tomotoga ufa toketokedi i yemuyemu nuadi i lulugaugaudi. <sup>8</sup> ✧ 'Ida 'aiata 'ana tomia i lubwaineda yada sauluva ta na 'i'isave'avinidi, ma yada nuakalikali Yaubada ta na vevetumaganeni, wata ta na nuani mogitana 'ita'ita'i ta na veluagai Iesu 'wainega. Bani'odi ta na vevesauluvediga taunida ta na 'ibababaleda Seitani 'wainega. <sup>9-10</sup> ✧ Yaubada i venua'ivinedaga kebu yana vematavuloga faifaina, i venua'ivineda nuanuana i na

✧ 5:1-2: Mad 24:36; Mad 24:42-44 ✧ 5:3: Luk 21:34-36 ✧ 5:5: Efe 5:8-9

✧ 5:8: Efe 6:14,17 ✧ 5:9-10: Lom 14:7-9

'ita'ita'ieda 'ada Toveimea Iesu Keliso 'wainega, taunina i wafa faifaida bega taiadi ta na miamia. 'Ai'edi ma yawaida 'alo ta na wafaga kebu tamu ava'ai, tutuyanina i na vilai i na mai 'waineye ta na nagoi. <sup>11</sup> ✧Akonadi ma emiavo 'wa ve'ivaivaita yami vona 'waidiega i lubwainemi tutuya fuedi bani'odi 'wa na munemunega fai ta 'asetai 'awaie Iesu taiadi ta na miamia.

*Faulo yana nuanua 'ana 'eba ve'a'ava.*

<sup>12</sup> ✧Emavo, nuanuama bwaikina 'ami to'edakumetavo 'wa na veve'ililibuyedi, taunidi 'ada Toveimea Iesu i venua'ivinedi yana folova i 'i'idewadi 'awasasamie, i 'i'isave'avinimi wata i veve 'waimie Keliso yana nuanua faifaiddi. <sup>13</sup> Yadi folovanidi faifaiddi ma yami nuakalikali 'wa na ve'ililibuyedi bwaikina. Ma emiavo yami mia i na ve'atumai kebu taiadi 'wa na ve'ikwayekwayega.

<sup>14</sup> ✧Emavo, 'a na velu'ase'ase, nuanuama tovedumwe'ai'ai 'wa na matakiadi i na folofolova, tovenuafouviga 'wa na tolinuavatuvatudi, egavo i mwea 'wa na 'i'ivaisedi, wata 'wa na totokemaiga 'wa na vetofolova tomotoga matatabudi 'waidie. <sup>15</sup> ✧Wa na 'i'isave'avinimi bega 'ai'edi egavo i na vesauluva sakoina 'waimie, kebu tamu aitoi 'waimiega wata sakona 'wainega i na tutuli, siwe tutuya fuedi 'wa na vewavawava ma emiavo wata tomotoga 'ifwaidi 'waidie 'wa na vevesauluva 'atumaina.

<sup>16-18</sup> ✧Omi Iesu Keliso yana tomotoga, side bani'odi Yaubada nuanuana 'wa na vevesauluvedi. Tutuya matatabuna ma yami sosoana, 'wa na vevelu'ui-vebogi, wata 'ai'edi tutuya safailina 'alo tutuya vitana 'waimie, siwe 'wa na vevekaiwamo Yaubada 'waineye.

<sup>19-20</sup> ✧Anu'anunu 'Atumaina yana folova wata yana 'aivaita kebu 'wa na ve'etobodeni, wata 'ai'edi aitoi 'Anu'anununina yana toketokena 'wainega i na lau'agega, kebu 'wa na sidibidibieni. <sup>21-22</sup> ✧Venidi wata nani matatabuna nagami 'wa na venua'ivinedi, 'ai'edi mogitana 'atumaina 'wa na 'ive'avini, we'e nani 'aitamogana 'aitamogana sakoidi 'wa na kekesedi.

*Faulo yana 'alanuai.*

<sup>23</sup> Yaubada nuanua bikana wata mia 'atumaina i vevelede, bega a vevelu'ui nuanuaku Yaubadanina i na 'ivaisemi yami sauluva 'atumai'avana mataneye. Wata nuanuaku 'anu'anunumi, yami nuanua, wata tomogomi i na 'i'isave'avinidi i na nagoga 'ada Toveimea Iesu Keliso yana vila-vaitugana 'waineye kebu tamu 'ami 'eba awavesako.

✧ 5:11: Iud 1:20-21 ✧ 5:12: Ibu 13:17 ✧ 5:14: 2 Tes 3:6,11,15 ✧ 5:15: 1 Fit 3:9 ✧ 5:16-18: Fil 4:4; Luk 18:1; Efe 5:20 ✧ 5:19-20: Efe 4:30 ✧ 5:21-22: 1 Ion 4:1

24 ✨Yaubada i venua'ivinemiga, taunina naninidi de'e i na 'idewadi faifaimi fai ma 'ana vetumagana, kebu i na baileda.

25 Emavo, nuanuama faifaima 'wa na vevelu'ui.

26 Tutuyanina emiavo tovetumagana 'wa na veluagadi, ma yami sosoana matatabudi 'wa na 'avalamaigidi, yami nuakalikali 'ana 'eba 'isa.

27 'Auvea yana veimea 'wainega a velu'ase'ase mi bega leta de'e 'wa na lu'iawawai edavo tovetumagana matatabudi matadie.

28 'A vevelu'ui faifaimi, nuanuaku 'ada Toveimea Iesu Keliso ma yana nuakalikali i na vevesauluva 'atumaina 'waimie.

'Asa'aiana bani'odi,  
Yau Faulo.

## 2 TESALONAIIKA

### Faulo yana kiluma 'ana veluga me Tesalonaika 'waidie.

Faulo bola i miamia Kolinita, leta de'e 'ana veluga i kilumi i nago Tesalonaika tovetumaganavo 'waidie. Faulo vala i nogai me Tesalonaika 'ifwaidi i venuanaluga Iesu yana vila-vaitugana faifaina. Yadi nuanua igodina Iesu 'akonadi i da vila-vaitugani i da mai begaidi i vemia-'avo'avovo. De'e leta nageneye Faulo i ve 'waidie, nagami Yaubada 'ana Tovedumwe'ai'ai i na souyeni, yana vekali 'waidiega tomotoga fuedi i na sakona, mulieta Toveimea Iesu Keliso i na vilai bega tosakona matatabudi 'adi vematavuloga i na velugai. Wata Faulo i velu'ase'ase nuanuana yadi sauluva i na siviladi, folova wata sauluva 'atumaidi 'waidie i na dumwebika. De'e letanina 'ana 'idi side bani'odi.

Faulo yana vona-vekaiwa. 1:1-2

I vekaiwa Yaubada 'waineye yadi tokemaiga faifaina, wata i veifufu 'adi tovedumwe'ai'ai 'adi vematavuloga faifaina. 1:3-12

Ve Yaubada 'ana Tovedumwe'ai'ai wata Iesu yana mai faifaidi. 2:1-17

Velu'ase'ase folova 'atumaidi faifaidi. 3:1-15

Faulo yana 'alanuai. 3:16-18

<sup>1</sup> Emavo, yau Faulo, Sailasa wata Timoti taiadi 'a vekaiwa 'waimie. 'Omi Iesu yana 'Aila'a 'wa miamiani 'atamana Tesalonaika 'waineye, Yaubada Tamada wata 'ada Toveimea Iesu Keliso yadi tomotoga, 'waimie 'a kilukiluma.

<sup>2</sup> 'A vevelu'ui faifaimi nuanuama Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie wata nuanua bikana mia 'atumaina taiadi i na vevelemi.

*Keliso bola i na maiga, tomotoga i na veimeyeda faifaina.*

<sup>3</sup> ✧Emavo, i lubwainema tutuya matatabuna 'a na vevekaiwa Yaubada 'waineye faifaimi. 'Atumaina 'ai'edi 'a na vevekaiwa faifaimi fai yami vetumagana Iesu 'waineye i vevetoketoke-'afo'afo wata yami venuakalikali emiavo taiadi i vevebwaika. <sup>4</sup>✧Yami sauluvanidi faifaidi 'ima 'a awa'ai'aimi Yaubada yana 'Aila'avo 'aitamogana 'aitamogana 'waidie, 'a vo, Me Tesalonaika vita wata veviga bwaikidi i vevelugadi Iesu 'ana tovedumwe'ai'ai 'waidiega siwe yadi vetumagana fa'alina i totokemaiga vitanidi 'waidie.



5 ✨Vitanidi 'wa veveluagadi Iesu faifaina, 'wainega ta 'asetai Yaubada yana sauluva tonovidi fai vitanidi 'waidiega i 'idewa-vagasemi bega i lubwainemi 'wa na luku yana 'Eba Veimea 'waineye. 6-8 ✨Wata ta 'asetai Yaubada yana sauluva tonovidi fai tomotoganidi vita i vevelemiga i na veimea vematavuloga i na veluagai, we'e 'omi i na 'ita'ita'iemi 'wa na veawai vita 'waidiega, wata 'ima bani'odi. Naninidi de'e i na souyedi tutuyanina 'ada Toveimea Iesu yana anelose toke-tokedi taiadi i na mai abamega, 'ai-'ala'alata Iesu i na umeni i na mai bega egavo kebu nuanuadi Yaubada, wata 'ada Toveimea Iesu Valana 'Atumaina kebu i da vematayakeyak-eniga, i na vematavulogidi. 9 ✨Adi vematavuloga wafavagata wata Yaubada i na awa'idi'idiedi kebu 'ada Toveimea maigina i na 'ise'iseni yana toketokena magemagetana i na bavuyeni. 10 ✨Naninidi i na souyediga 'ada Toveimea Iesu yana 'aiata bwaikina 'waineye, tutuyanina i na mai yana tomotoga taunidi i vetumaganaga 'waineye i na subiai wata ma yadi nua'ewa i na ve'ililibuyeni. 'Omi me Tesalonaika wata ma fuemie 'wa na subia fai valana 'a lu'ivoneyeni 'waimie 'wa vetumagana 'waineye.

*Faulo yana velu'ui me Tesalonaika faifaidi.*

11 ✨Fai 'ita'ita'i 'wa na veluagai wata mataneyeye 'wa na tovoi, tutuya fuedi 'a vevelu'ui faifaimi. Side bani'odi 'a vevelu'uiedi 'a vo, Yaubada, 'omu me Tesalonaika 'u venua'ivinedi yamu tomotoga, bega nuanuama 'u na 'i'ivaisedi i na vevesauluva 'atumaina yamu nuanua bani'odi. Nuanuadi yadi sauluva i na ve'atumai matamuye, 'u da 'ivaisedi yamu toketokenayega i na ve'atumai mogitana, wata yadi nuanua i 'idewadewadiga ma yadi vetumagana, ma fuemie 'wa na 'idewadi." 12 ✨De'e yama velu'uinina 'wainega 'ada Toveimea Iesu Keliso 'ana subia i na veluagai 'waimiega, we'e yada Yaubada wata 'ada Toveimea Iesu Keliso ma yadi nuakalikali i na vesauluva 'atumaina 'waimie, i na subiami wata i na 'ive'ai'aiwabumi.

## 2

*Yaubada 'ana Tovedumwe'ai'ai i na souyeniga faifaina.*

1-2 ✨Nuanuaku a na veifufu 'ada Toveimea Iesu Keliso yana vila-vaitugana, wata i na si'augida ta na lakaga 'waineye faifaidi. Ekwavo, a na vonemi, kebu nuanuaku 'wa na venuanaluga wata 'wa na venuafouviga vala 'wa nogai igodina 'ada Toveimea 'akonadi i da vila-vaitugani. Fai voke tamu

✨ 1:5: Fil 1:29 ✨ 1:6-8: Lom 12:19; Mad 25:31; Mad 25:41; Lom 2:8 ✨ 1:9: Mad 25:41,46; 2 Fit 3:7 ✨ 1:10: Kolos 3:4 ✨ 1:11: Kolos 1:10 ✨ 1:12: 1 Kol 10:31 ✨ 2:1-2: 1 Tes 4:13-17

tomogo i vekaliemi yana lau'age 'eba nua'ewa 'wainega, 'alo tamu aitoi i vonemi i vo, Yau Yaubada i voneku Iesu 'akonadi i mai." 'Alo voke tamu tomogo i vonemi i vo, Tamu Faulo yana leta a 'iseni i kilumi i vo, Iesu 'akonadi i vilai i mai." <sup>3</sup> ✨Siwe kebu. Vekalinidi kebu 'wa na ve'awamogitanedi.

Kebu 'ana fata 'aiatanina i na souyeni, nagami nani 'ailuga i na souyedi. Tamu, tomotoga fue di Yaubada i na vegavieni, wata tamu, Yaubada 'ana Tovedumwe'ai'ai i na souyeni, kumanina faifaina 'akonadi Yaubada i veimea 'eba ve'a'ava 'waineye i na luku 'ai-'ala'alase i na wafaotoga. Naninidi nagami i na souyedi, mulieta Iesu i na vila-vaitugani. <sup>4</sup> ✨Tovedumwe'ai'ainina Yaubada yana tomotoga i na talabodedi kebu i na 'odu'odu Yaubada 'waineye, wata tomotoga 'ifwaidi i na talabodedi yadi yaubada-vekavekali 'waidie kebu i na 'odu'oduga. Taunina i na awa'ai'aia i na vo, Yami 'eba 'odu nani-'avo'avovo, ma yami subia yau 'waikuye 'wa na 'odu'odu," wata i na luku Yaubada yana vanuga 'eba velu'ui 'waineye i na miabui i na vo, Yau mogitana Yaubada."

<sup>5</sup> Siwe 'wa na nuani yaku vona, basenadi taiadi ta miamia naninidi faifaiddi a ve 'waimie. <sup>6-7</sup> Tutuya de'e kebu 'ana fata Tovedumwe'ai'ainina i na souyeni fai tamu tomotoga i veve'etobodeni, we'e 'omi tomotoganina 'akonadi 'wa 'asetai. Tutuya de'e Tovedumwe'ai'ainina yana toke-tokena sakoina i sousouyeni, givagivayega 'akonadi i folo-folova fwayefwayeye, siwe naninidi sakoiotogidi kebu 'adi fata i na souyedi, nagami tove'etoboda i na tovibala mulieta tutuyanina Yaubada nuanuana i na tauyeni nika 'ana Tovedumwe'ai'ai i na souyeni. <sup>8-12</sup> ✨I na maiga, Seitani yana toketokenayega 'eba nuavogana wata 'eba nua'ewa tulina tulina i na 'i'idewadi bega tomotoga fue di wafaotoga 'ana 'edeamo i nunagoiga nuadi i na 'ewadi yana vekalinidi sakoidi 'waidiega. Tomotoganidi i na wafaotoga fai Yaubada yana Vona Tonovidi i baila kebu nuanuadi i na ve'awamogitanedi 'alo i na nuakalikaliadi bega Yaubada i na 'ita'ita'iedi. Fai yana vona i baila, vekali ma yana toketokena i na vetunei 'waidie bega vekalinidi i na vevetumaganedi. Fai kebu nuanuadi Yaubada yana Vona Tonovidi i na vetumaganedi, nuanuadi ma yadi sosoana i na sakosakona-vebogi Yaubada i na veimea 'eba ve'a'ava 'waineye 'adi ve-matavuloga i na veluagai i na wafaotoga. Yaubada 'ana Tovedumwe'ai'ainina tomotoga i na vevekaliedi i na nagoga nika Toveimea Iesu i na vila-vaitugani, 'awayagugulinega i na luvewafai, we'e yana mageta mataududulina 'wainega i na ve'a'ava-vagaseni, kebu wata i na miamia.

*Egavo Yaubada i venua'ivinediga, wata i na 'ita'ita'iedi.*

13 ✨Emavo, toskonanidi 'omi kebu bani'odiga, 'omi Toveimea Iesu i nuakalikiemi begaidi tutuya fuedi 'a vevekaiwa Yaubada 'waineye faifaimi. I lubwainema 'a na vevekaiwa faifaimi fai Yaubada bola fwayafwaya kebu i da 'idewaiga 'omi i venua'ivinemi i na 'ita'ita'iemiyami sauluva i na ve'atumai mataneye bega 'omi yana tomotoga. We'e 'ami 'ita'ita'inina 'Anu'anunu 'Atumaina yana toketokena 'wainega wata yami vetumagana 'wainega yana Vona Tonovidi 'waidie. 14 Basenadi taiadi ta miamia Iesu Valana 'Atumaina 'a lu'ageyeni 'waimie bega 'wainega Yaubada i 'ivaisemi taunimi 'wa tauyemi 'ada Toveimea Iesu Keliso 'waineye bega bola yana 'ai'aiwabu magemagetadi i na velemini. 15 ✨Emavo, begaidi i lubwainemi 'wa na tovofovi fa'alina wata ve Iesu faifaina 'wa na nunuave'avinidi, venidi lau'ageyega 'a vonemi wata letayega.

16-17 ✨A vevelu'ui faifaimi, nuanuama 'ada Toveimea Iesu Keliso wata Yaubada Tamada i na kiavenuafou-fa'alimi bega kebu 'wa na kololo vita 'waidie, wata i na 'i'ivaisemi ma yami toketokena 'wa na folofolova wata 'wa na vonavona nani 'atumaidi faifaidi. Yaubadanina 'ada tonuakaliki i vevesauluva 'atumaina 'waideye bega venuafoufa'ala miamia-vagaina i veleda vetumagana taiadi bega ta nuani mogitana 'awaie ta na luku Iesu Keliso 'waineye.

### 3

*Faulo nuanuana me Tesalonaika i na velu'ui faifaina.*

1 ✨Emavo, sai'afoga 'a na 'ailove siwe nuanuama wata 'a na vonemi tamu nani faifaina. Nuanuama 'wa na vevelu'ui Yaubada 'waineye faifaima bega 'ada Toveimea Iesu Valana 'ana luyavuyavulagi i na lilide, tomotoga fuedi i na subiai wata taunidi i na tauyedi 'waineye, 'omi basenadi 'waimie bani'odi. 2 Wata nuanuama 'wa na vevelu'ui Yaubada i na 'i'ita'ita'iemia Iesu 'ana tovedumwe'ai'ai sakoidi 'waidiega fai ta 'asetadi tomotoga 'ifwaidi kebu i da vetumagana Iesu 'waineye nuanuadi vita i na veveleleda.

3 ✨Mogitana nuanuadi vita i na veveleleda siwe yada 'Auvea i na 'i'isave'avinimi kebu 'ana fata i na bailemi. Yami vetumagana i na kiavetoketokedi wata i na 'i'ita'ita'iemiyami bega Seitani taunina Tosakona kebu 'ana fata i na vetoketoke 'waimie. 4 Yama vetumagana 'waimie 'Auvea i 'imoso'ieni bega 'a nuani mogitana naninidi 'a veve 'waimie 'wa 'i'idewadi.

5 ✨ A vevelu'ui faifaimi nuanuama 'Auvea yami nuanua i na kiavemagetadi bega 'wa na totokemaiga Keliso faifaina wata Yaubada yana nuakalikali 'waimie 'wa na vevebaemi.

*I lubwainemi 'wa na folofolova.*

6 ✨ Emavo, 'akonadi 'ada Toveimea Iesu Keliso veimea i velema bega 'a na vonemi, edavo tovetumagana 'ifwaidi folova dumwedi 'aidi wata kebu nuanuadi i na vevesauluva basenadi bani'odi 'a ve 'waimie. Tovedumwe'ai'ainidi mogitana emiavo siwe taiadi kebu 'wa na miamia 'alo 'wa na yabayaba. 7 ✨ We'e 'omi 'wa 'asetai-'atumaima 'ima todumwebika 'omi wata bani'odi 'wa na vetutuyamema. Basenadi taiadi ta miamia kebu 'a da dumwe'ai. 8 Mogitana 'ani'ani wata nani 'ifwaidi 'wa vevelema siwe wata 'a tututulidi. Lovana wata 'aiata taunima 'a toke 'a folofolova lau'age wata mani faifaidi, fai kebu nuanuama vita 'a na velemi 'ama 'isave'avina faifaina. 9 I lubwainemi 'wa da 'aivaita-maimaiga 'waimie fai 'ima Keliso yana tomata'aulelevo siwe 'a baila, nuanuama 'ima yama folova yami 'eba 'isa. 10 Tutuyanina taiadi ta miamia 'a vonemi 'a vo, 'Ai'edi emiavo 'ifwaidi folova i na bailaga, 'ani'ani kebu 'wa na velediga.

11 Bani'odi 'a voneyediga fai vala 'a nogai 'ami 'aila'a 'ifwaidi 'asa'aiana nuanuadi mia-maimaiga, nuanuadi i na totolive'edamo. 12 ✨ Tomotoganidi faifaidi 'ada Toveimea Iesu Keliso 'ana wagavayega veimea fa'alina 'a na yatoi 'adi matakia. Side bani'odi 'a na voneyedi, i lubwainedi yadi mia i na ve'atamai, taunidi yadi folova 'waidiega 'adi'adi i na veveluagadi.

13 ✨ Emavo, we'e 'omi sauluva tonovidi 'waidie kebu 'wa na logi, 'wa na tokemaiga.

14 ✨ Ai'edi tamu tomogo 'waimiega de'e yama vona kebu i na vematayakeyakediga, 'wa na lu'ivona emiavo 'waidie yana sauluva i na 'asetai bega taiadi kebu 'wa na miamia 'alo 'wa na yabayaba, 'wainega i na 'asetai nika i na bunumayaga. 15 Siwe 'wa na nuani taunina kebu tulinaga, ma fuemie tovetumagana begaidi 'wa na velu'ase'asei bani'odi taimi.

*Faulo yana vona 'eba ve'a'ava.*

16 ✨ Auvea yada nuanua bikana lamuna, bega 'a vevelu'ui faifaimi 'ai'edi vita 'waimie 'alo 'eba sosoana, nuanuama tutuya fuedi nuanuananina bikana i na vevelema mia 'atumaina taiadi. Wata nuanuama tutuya matatabuna 'Auvea taunina 'ami labilabina.

17 ✨ Side bei yaku leta 'ana tokiluma a voneni 'eba kiluma i veleku tauniku a na ve'a'avai bani'odi yaku leta 'ifwaidi

✨ 3:5: Ibu 12:2 ✨ 3:6: 1 Tes 5:14 ✨ 3:7: 1 Tes 2:9 ✨ 3:12: 1 Tes 4:11

✨ 3:13: Gal 6:9; 1 Kol 15:58 ✨ 3:16: Ion 14:27 ✨ 3:17: 1 Kol 16:21

'waidie, bega yaku kilukiluma 'ana 'isa'isa 'wa na 'isa'inanai  
'wa na 'asetai mogitana yau a kilukiluma.

<sup>18</sup> Nuanuaku 'ada Toveimea Iesu Keliso ma yana nuaka-  
likali i na vevesauluya 'atumaina 'waimie.

'Asa'aiana bani'odi,  
Yau Faulo.

# 1 TIMOTI

## Faulo yana kiluma nagami Timoti 'waineye.

Timoti 'awalawa Eisia 'wainega. Tamana tomogo Guliki we'e inana vavine Diu. Faulo yana lau'agevuvua 'ana veluga 'waineye Timoti i venua'ivineni 'ana to'aivaita taiadi i na folofolova. (Folova 16:1-3) Mulieta Faulo tamu folova Timoti i veleni bega tovetumaganavo i miamiani Efeso i na 'i'isave'avinidi.

Leta de'e nageneye Faulo i matakia Timoti 'waineye tovevekavekali faifaidi i na nunago tovetumaganavo yadi vetumagana i na 'ivemweadi. Wata i velu'ase'asei tovetumaganavo yadi tafalolo faifaina. I 'a'avana sauluva 'atumaidi 'aitamogana 'aitamogana to'edakumetavo 'adi laubwaina i na 'i'idewadiga faifaidi i veifufu. Wata ava'ai sauluvaga Timoti 'ana laubwaina fai taunina Keliso yana tofolova tovetumaganavo 'awasasadie, faifaina Faulo i velu'ase'asei. De'e letanina 'ana 'idi side bani'odi.

Faulo yana vona-vekaiwa Timoti faifaina. 1:1-2

Ve tonovidi faifaidi. 1:3-20

Tafalolo 'ana sauluva. 2:1-15

Tovetumaganavo yadi to'edakumetavo yadi folova faifaina. 3:1-16

Timoti taunina 'ana 'isave'avina wata yana ve faifaidi. 4:1-16

Timoti yana folova wata yana veto'isave'avina tovetumaganavo 'waidie faifaina. 5:1-6:21.

<sup>1</sup> \*Yau Faulo a vekaiwa Timoti 'waimuye. Iesu Keliso faifaina a vetomata'aulelega, taunina wata Yaubada yadi nuanua 'wainega. Yaubada 'ada To'ita'ita'i, we'e Iesu Keliso yada vetumagana ta yatoi 'waineye bega ta nuani mogitana ava'ai basenadi i vona'awaufaufa 'waideye 'ada 'ita'ita'i faifaina i na 'idewai faifaida.

<sup>2</sup> \*Timoti, 'u vetumagana Iesu 'waineye, begaidi a ve'awanatuna 'waimuye. 'Omu mogitana bani'odi natuku, bega a vevelu'ui faifaimu nuanuaku Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimuye wata i na 'i'isanuakalikaliemu. Wata nuanuaku yadi nuanua bikana i na vevelemu mia 'atumaina taiadi.

*Ve-vekavekali faifaidi i matakia.*

<sup>3</sup> 'U na nuani basenadi a wai 'waimuye a veifufuna bega a mai Masidonia. Vonanidi a veifufuyediga wata a na

luvaituganidi. Nuanuaku 'u na miamia Efeso bega tove-vekevakekai bei i miamianiga 'u na talabodedi kebu wata i na veve. <sup>4</sup> \*Tovekalinidi yadi nuanua i tauyedi wata i vetumagana mogitana ifuifufu tubudiavo 'waidiega, wata wagava tubulelelegidi nuadi i 'ewadi, yadi nuanua i vo, Matatabuna ta na 'asetadiga, ta na ve'atumai Yaubada matan-eye." Nuanuaku naninidi 'u na talabodedi i na 'ailove, fai 'waidiega ve'alamagi'ai i sousouyeni, bega tomotoga kebu 'adi fata ma yadi vetumagana Yaubada yana nuanua i na 'i'idewadi. <sup>5</sup> Nuanuaku 'u na talabodedi, bega yadi nuanua 'waidie nuakalikali i na vebwaika. We'e nuakalikalinina i souyeni nani 'aitonu 'waidiega, nuanua tonovidi, venua'ivina-'atumai sauluva 'atumaide faifaidi, wata vetumagana Iesu Valana 'Atumaina 'waineye. Bani'odi i na vevesauluvediga, i na nunuakalikali mogitana. <sup>6</sup> Fai tovetumagana 'ifwaidi sauluvanidi i baila, nani-'avo'avovo 'aisedi faifaidi i veveifuifufu. <sup>7</sup> \*Igodi nuanuadi i na vetove Yaubada yana ve'etoboda faifaidi, siwe taunidi yadi ve wata yadi vona toketokedi 'adi 'asetai i bavuyedi.

*Ve'etoboda Yaubada 'wainega ta na ve'ililibuyedi.*

<sup>8</sup> 'Akonadi ta 'asetai ve'etobodanidi Yaubada i yatodiga nani 'atumaide, 'ai'edi tove i na veve tonovineamo wata tomotoga i na veve'ililibuyedi Yaubada yana nuanua bani'odi. <sup>9</sup> Wata ta 'asetai ve'etobodanidi kebu tomotoga yadi sauluva tonovidi faifaidi, mogitana tosakona faifaidi. Tosakananidi side kumanidiavo. Ve'etoboda 'adi togeu, tovedumwe'ai'ai, Yaubada yana nuanua 'adi tobaila, tomotoganidi nuanuadi sakona-vebogi, egavo kebu nuanuadi tafalolo, Yaubada yana nuanua 'adi to'vekokova, egavo tamadiavo 'alo inadiavo 'alo mali tomotoga i luvewafadiga, tomotoganidi faifaidi Yaubada ve'etobodanidi i yatodi. <sup>10-11</sup> Tove'avula-'avo'avovo, wata iaveta'ava 'alo vevine'ava i sakosakona, faifaidi. Egavo nuanuadi tamu tomogo i na vunugi bola enavo i na tuveobuya, tovekali, wata egavo nani-vekevakekai i veve'awamogitanediga, faifaidi. Yaubada ve'etoboda i yatodiga sauluvanidi faifaidi wata sauluva 'ifwaidi sakoidi faifaidi. Naninidi sakoidi matatabudi ve tonovidi i geugeudi. Venidi tonovidi i vesala Yaubada Valana Magemagetana taiadi, kumanina faifaina i venua'ivineku a vevetomata'aulele. Yaubadanina i lubwaineda ta na subisubiai.

*Faulo i sosoana Yaubada yana nuakalikali faifaina.*

<sup>12</sup> \*A vekaiwa bwaikina Iesu Keliso 'ada Toveimea 'waineye fai toketokena i veleku yana folova faifaina. Wata a vekaiwa 'waineye fai i vetumagana 'waikuye kebu a na baileni, 'aku

fata yana folovanina a na 'idewai. <sup>13</sup> ✧Avinodi nagami yau Keliso 'ana toawavesako, yana tomotoga a nikenikedi wata taunina a yagayagaia, siwe i 'isanuakalikalieku fai i 'asetaku kebu a da vetumagana 'waineye wata ava'ai a 'idewai 'waineye a bavuyeni. <sup>14</sup> 'Ada Toveimea yana nuakalikali 'waikuye kebu ta na vona, i vesauluva-'atumaieku fai vetumagana wata nuakalikali i veleku. Yau, 'omu taiadi ta vevetumagana wata ta nunuakalikali fai ta miave'itubama Iesu Keliso taiadi.

<sup>15</sup> ✧Vona de'e vona mogitana, i lubwaineda tomotoga matatabuda ta na tauyeda vonanina ta na vetumaganeni. Vonanina side bani'odi. Iesu Keliso i mai fwayefwayeye bega tosakona i na 'ita'ita'iedi. Tosakonani 'waidiega yau kumaniku sakona 'waineye a vetoketoke-'afo'afo. <sup>16</sup> Basenadi a sakosakona Iesu Keliso kebu i da logi i da vedumwe'ai'aieku, ma yana tokemaiga i vesauluva 'atumaina 'waikuye. Yau mogitana tosakonaotoga, tosakona 'ifwaidi kebu bani'odiga, siwe kebu i da logieku, nuanuana yau tomotoga fuedi yadi 'eba 'isa i na 'asetai kebu i na logi-matayo'oyedi 'adi fata i na vetumagana bega mia 'atumaina wata miamia-vagaina i na veluagai Iesu Keliso 'wainega.

<sup>17</sup> Nuanuaku tutuya matatabuna Yaubada yada Kini ta na veve'ililibuyeni wata ta na subisubiai. Taunina miamia-vagaina, i na veveimea-vagata. Kebu tamu aitoi 'ana fata i na 'iseniga, 'aiseotogina Yaubada mogitana, kebu wata tamu. Vona mogitana, yaku nuanua bani'odi.

### *Faulo Timoti i kiavefa'ali.*

<sup>18</sup> ✧Natuku Timoti, 'u na nuani basenadi Yaubada yana tolu'ivonavo nagami i vona-vagata yamu vetoketoke Yaubada 'waineye faifaina. Nuanuaku vonanidi 'u na nuanuanidi bega 'u na vevetoketoke, Yaubada 'ana gavia Seitani taiadi 'wa na vevetalaga. <sup>19</sup> Tutuyanina 'u na vevetalaga nuanuaku yamu vetumagana i na 'eno-vagata Iesu Keliso 'waineye, wata yamu sauluva i na tonova bega 'amu vebae 'waineye 'u na lutonovi kebu 'u da sakosakonaga. Tomotoga 'ifwaidi 'adi vebae 'waidiega i 'asetai i sakosakona siwe kebu faifaina i da nuanua, nuanuadi sakona-vebogi, begaidi yadi vetumagana Keliso 'waineye i mwesa-'afo'afo. <sup>20</sup> ✧Tovedumwe'ai'ainidi 'waidiega tomotoga 'adi 'ailuga Aiminio wata Alekisana 'akonadi a 'anivelenedi Seitani nimaneye vita i na veluagadi bega i na 'ailove kebu wata vona-awadamanayega i na sisi'wayo'wayoga Yaubada faifaina.



## 2

*Velu'ui faifaina.*

1 Nagami, a na velu'ase'ase mi, nuanuaku 'omi tovetu-maganavo tutuya fue di 'wa na vevelu'ui tomotoga fue di faifaidi. 'Wa na vevelu'ui bega Yaubada i na vevesauluva-atumaina 'waidie, we'e ava'ai i 'i'idewadiga faifaidi 'wa na vevekaiwa. 2 Siwe mogitana side kumanidiavo faifaidi 'wa na vevelu'ui. Kini wata 'ifwaidi toveimea bega yada velu'ui 'waidiega Yaubada i na 'ivaisedi yada mia i na ve'atumai, vetalaga kebu, wata tutuya fue di ta na vevesauluva tonovina Yaubada yana nuanua bani'odi. 3 I lubwainedi bani'odi ta na vevesauluvedi, Yaubada 'ada To'ita'ita'i 'ana 'eba ki-avesosoana. 4 ✨ na sosoanaga fai nuanuana tomotoga matatabudi i na 'ita'ita'iedi sakona 'wainega wata yana nuanua tonovidi i na 'asetadi. 5 Fai Yaubada 'aiseotogina i miamia, we'e tamu tomotogaotoga 'ana wagava Iesu Keliso 'aiseotogina 'wainega tomotoga 'adi fata i na veiana Yaubada taiadi. 6 Taunina yawaina i tauyeni bega tomotoga matatabuda i tuveobuda sakona 'wainega. Yaubada 'aisena Iesu yana souyagi 'ana tutuya i veimea, i maiga yada 'eba 'isa Yaubada nuanuana tomotoga matatabuda i na 'ita'ita'ieda. 7 ✨Fai Yaubada nuanuana tomotoga fue di i na 'ita'ita'ieda, begaidi yau i venuma'ivineku i vetuneku bega a na vetomata'aulele wata a na veve mali tomotoga taunidi kebu Diu 'waidie. Nuanuana a na lalau'age bega tomotoga i na vetumagana Yaubada yana nuanua tonovidi 'waidie. Mogitana i venuma'ivineku a na vevetomata'aulele, kebu a da vevekaliga.

*Iaveta wata vevine yadi sauluva tafalolo faifaina.*

8 Nuanuaku iaveta 'awalawa matatabuna 'waidie i na vevelu'ui. Yadi velu'ui 'waidie, nimadi i na silakaidi Yaubada 'waineye, siwe fai nimadinidi 'waidiega Yaubada i subisubiai, kebu i da lubwainedi 'waidiega i na sakosakona, bani'odi kebu i na nunuasakoga wata kebu i na veve'ikwayekwayega.

9-10 ✨Wata kebu nuanuaku vevine i na vaigavu-vebovebogi ma yadi vebaisa. Nuanuaku ma yadi nuaobu i na vaigavu ava'ai i lubwaineniga, bani'odi i na vaigavuyedi. Vevine totafalolo i lubwainedi yadi sauluva 'atumaide 'waidiega tomotoga i na subiadi. We'e kebu 'adi vaigavu 'waidiega 'adi subia i na veluagai, bani'odi 'odo'odo fue di, kileu 'aninamanamalidi, 'alo kaleko 'adi tutula bwaikidi. 11 Vevine i lubwainedi ma yadi nuaobu i na vavainenegamo bega ma

yadi 'aseta. <sup>12</sup> A talaboda kebu nuanuaku vevine i na ve iaveta 'waideye, wata kebu i na veimeyeda, i na ve'wadamo i na miamiani. <sup>13</sup> ✧ A ve'etobodaga fai ta 'asetai Yaubada nagami Adama i 'idewai, mulieta Ive. <sup>14</sup> ✧ Seitani kebu Adama i da vekalieni, Ive i vekaliedi, Yaubada yana ve'etoboda i geuya i sakona. <sup>15</sup> I sakonaga, begaidi venatuna 'waineye vevine veviga i veveluagai. Siwe 'ai'edi i na vevetumagana Yaubada 'waineye, i na nunuakalikali, wata ma yadi nuaobu i na vevesauluva 'atumaina mataneye, i na 'ita'ita'iedi.

### 3

#### *Tovetumagana 'adi to'edakumetavo faifaidi.*

<sup>1</sup> Vona de'e, vona mogitana. 'Ai'edi aitoi nuanuana i na veto'isave'avina Keliso yana 'Aila'a 'waideye yana nuanuanina 'atumaina." <sup>2</sup> ✧ Fai folovanina nani 'atumaiotogina i lubwaineni to'isave'avina yana sauluva i na tonova bega kebu i na awavesakoyeni. 'Ai'edi naginagina, yana vavine 'aitamogana taiadi i na miamia. Wata i lubwaineni kebu i na vemwasosoai-'avo'avovo yana nuanua i na 'i'isave'avinidi, ma 'ana ve'ililibu, wakawaka i na veve'isabodedi, wata Yaubada yana Vona i na veve 'atumaina. <sup>3</sup> Wata i lubwaineni ufa toketokena kebu i na toke i na yemu i na nunago nuana i na lugaugauya, kebu vetalaga i na sile'wedi, yana sauluva i na bikamo. Taunina toveiana wata kebu kukua nuana i na 'ewai matana i na fa'wana. <sup>4</sup> Wata 'ai'edi aitoi nuanuana i na veto'isave'avina taunina yana 'aila'a i na 'isave'avini 'atumaina yana veimea 'wainega, bega natunavo ma yadi ve'ililibu bonana i na vevematayakeyakeni. <sup>5</sup> I lubwaineni taunina yana 'aila'a i na 'isave'avina 'atumaidi, 'ai'edi yana 'aila'anina siaina kebu i na 'isave'avini 'atumaina, wata kebu 'ana fata Yaubada yana tomotoga fueidi i na 'isave'avinidi 'atumaina. <sup>6</sup> 'Ai'edi aitoi be'ama i vetumagana Iesu 'waineye, kebu i da lubwaineni i na veto'isave'avina i na nunago taunina i na awa'ai'aia nika Yaubada 'wainega vematavuloga i na veluagai, bani'odi basenadi Yaubada vematavuloga Seitani i veleni fai taunina i awa'ai'aia. <sup>7</sup> ✧ Wata to'isave'avinanina i lubwaineni yana sauluva 'atumaina, bega tomotoga kebu i da vetumaganaga i na ve'ililibuyeni. 'Ai'edi kebu 'atumainaga, tomotoganidi i na awavesakoyeni 'wa da vo Seitani yana kulie i da be'u.

#### *Tovetumagana 'adi to'aivaita faifaidi.*

<sup>8</sup> Wata bani'odi egavo i na veto'aivaita Keliso yana 'Aila'a 'waideye i lubwainedi yadi sauluva 'atumaidi, wata ma 'adi ve'ililibu. Kebu i da lubwainedi 'ai'edi i na luwanawana i

na vona tonovina wata i na vona sakoina bani'odi meadi lagalagadi, kebu i na toke ufa toketokena i na yemu bola nuadi i na lugaugaudi, wata kebu i na veumokai 'alo i na luve'ove'o'olagi. <sup>9</sup> Ava'ai nuanuaga tonovidi Yaubada i sivemagesedi 'waideye yada vetumagana Keliso faifaina, to'aivaitanidi naninidi i na nuave'avinidi wata 'adi vebae 'waidie i na lutonovi kebu i da vevekali yadi folova 'waidie. <sup>10</sup> Egavo nuanuadi i na veto'aivaita Keliso yana 'Aila'a 'waideye, nagami yadi folova wata yadi sauluva 'wa na 'isedi, 'ai'edi kebu tamu 'adi awavesako, 'ana fata 'wa na venua'ivinedi i na veto'aivaita. <sup>11</sup> \*Wata yadi vevinevo\* i lubwainedi yadi sauluva 'atumaidi ma 'adi ve'ililibu, kebu i na vebonaivoga, kebu i na vebaisa-'avo'avovo, wata nani matatabuna 'waidie yadi sauluva 'akonadi tonovidi. <sup>12</sup> 'Ai'edi to'aivaitanidi naginagidi, yadi vevinevo 'aitamogadi taiadi i na miamia, natudiavo wata yadi vanuga 'adi tomia matatabudi yadi veimea 'waidiega i na 'isave'avinidi 'atumaina. <sup>13</sup> 'Ai'edi to'aivaitanidi yadi folova 'ida Keliso yana 'Aila'a 'waideye 'atumaidi, ma 'adi ve'ililibu bega 'adi fata ma yadi venuafoufa'ala i na lulu'ivona yadi vetumagana Iesu Keliso 'waineye faifaina.

*Tamu nani givagivana Yaubada i sivemageseni.*

<sup>14</sup> Leta de'e a kilukiluma 'waimuye, siwe a nuani nu-anuaku sai'afoga a na wai a na 'isemu. <sup>15</sup> 'Ai'edi kebu a na wai-matayo'oga, veifufu de'e 'wainega 'u na 'asetai 'ida Yaubada yana 'Aila'a i lubwaineda ta na vevesauluva 'atumaina. 'Ida 'aila'anida Keliso 'ana tovetumaganavo Yaubada yana nuanua tonovidi i sivemagesedi 'waideye bega yana nuanuananidi ta 'i'isave'avinidi wata ta lulu'ivoneyedi. Yada Yaubadanina miamia-vagaina wata yawaida lamuna. <sup>16</sup> \*Vona mogitana, Yaubada yana nuanua nani bwaikina 'waideye, siwe basenadi kebu tamu aitoi i da 'asetai. 'Asiau nuanuananina ta 'asetai fai Yaubada i sivemageseni tomotoga 'waideye. Side kumanina,

Abamega i obuma i vetomotogaotoga,

'Anu'anunu 'Atumaina i lu'ivona 'waideye taunina yana sauluva tonovina.

Wata Yaubada yana anelose i 'iseni.

'Ifwaidi tomotoga valana i lu'ageyeni tomia fwayafwaya 'adi 'aila'a tulina tulina 'waidie,

'Ifwaidi tomotoga i vetumagana 'waineye.

Mulieta Yaubada i vagavaia i lakaveni yana 'ai'aiwabu magemagetana 'waineye.

✧ 3:11: Tai 2:3 \* 3:11: Wata tamu 'ana nuanua, to'aivaita vevinedi. ✧ 3:16: Ion 1:14; Mak 16:19

Side bani'odi yada 'aseta Iesu Keliso faifaina.

## 4

### *Tove-vekavekali i na souyedi.*

<sup>1</sup> ✧ Anu'anunu 'Atumaina kebu i da vekaliga, i vona mogitana i vo, 'Awaie 'ifwaidi tomotoga Keliso i na baileni, kebu wata i na vetumagana 'waineye. Yaiaina nuanua sakoidi i na yatoyatodi tomotoganidi yadi nuanua 'waidie, bega i na vematayakeyakedi, wata Seitani enavo sakoidi yadi vevekavekali Keliso 'ana tobailanidi i na vetutuyamedi.” <sup>2</sup> Vevekavekalinidi i sousouyedi tove-vekavekali 'waidiega, kumanidiavo 'awadi i tatalaboda nani fuedi faifaidi siwe wata i 'idewadi. I sakosakona i maiga 'adi vebae 'waidie kebu 'adi fata i na lutonovi yadi sauluva 'atumaidi 'alo i sakosakona. <sup>3</sup> ✧ Yadi ve igodi i talaboda kebu ta na nagiga, wata 'ani'ani 'ifwaidi kebu ta na 'anidiga. Yadi venidi vekali, Yaubada 'ani'ani matatabuna i 'idewadi yada 'eba 'ani. 'Ida tovetumagana, 'akonadi ta vetumagana Yaubada yana nuanua tonovidi 'waidie, i lubwaineda 'ana 'idewadewanidi faifaidi ta na vevekaiwa, mulieta ta na 'ani'ani. <sup>4</sup> ✧ Nani matatabuna Yaubada i 'idewadiga, 'atumai'avadi, kebu tamu ta na baileniga siwe ta na 'ewadiga ta na vekaiwa. <sup>5</sup> 'Ani'aninidi 'atumaidi Yaubada mataneyeye fai taunina yana vona 'wainega i awave'atumaiedi wata 'ida faifaidi ta vevekaiwa.

*Faulo nuanuana Timoti yana sauluva 'atumaina wata i na veve mogitana.*

<sup>6</sup> 'Ai'edi edavo tovetumaganavo 'waidie 'u na veve naninidi faifaidi, 'u na vetofolova 'atumaina Iesu Keliso faifaina. I lubwainemu bani'odi 'u na vevesauluvedi fai tutuya manamanawena 'aseta 'u 'ewa'ewai Yaubada yana nuanua tonovidi faifaidi, naninidi 'atumaidi 'akonadi 'u vevemataayakeyakedi. <sup>7</sup> ✧ Ifuifufu tubudavo 'waidiega kebu Yaubada 'wainega i da maiga, begaidi kebu faifaidi 'u na nuanua wata 'u na ve'awamogitana. Nuanuaku tutuya fuedi 'u na vewavawava bega yamu sauluva i na ve'atumai Yaubada yana nuanua bani'odi. <sup>8</sup> Side bani'odi, 'ai'edi tutuya fuedi ta na vewavawava 'wava faifaidi, tomogoda i na vetoketoke. De'e nani 'atumaina, we'e mogitana i lubwaineda naninidi Yaubada nuanuana 'waidie ta na vewavawava. 'Ai'edi yana nuanuananidi 'waidie ta na vewavawavaga 'atumaiotogina, side bei fwayefwayeye yada mia i na ve'atumai, wata 'awaie abame.

✧ 4:1: 2 Tim 3:1; 2 Fit 3:3; 1 Ion 2:18 ✧ 4:3: Nag 9:3; Lom 14:6 ✧ 4:4: Nag 1:31; Fol 10:15 ✧ 4:7: 1 Tim 6:20

<sup>9</sup> ✧ Vonanidi 'akonadi a voneyediga, vona mogitana, i lub-waineda fueda ta na ve-'awamogitana. <sup>10</sup> Faifainanina tutuya fuedi ta totokemaiga wata ta toke ta folofolova Yaubada faifaina, kumanina 'waineye yada vetumagana ta yato-vagaseni. Yada Yaubadanina miamia-vagaina, yawaida lamuna, wata tomia fwayafwaya matatabuda 'ada To'ita'ita'i, we'e mogitana egavo ma yadi vetumagana taunidi i tauyedi 'waineye 'adi To'ita'ita'i.

<sup>11</sup> Naninidi a voneyediga, faifaiddi 'u na veve tomotoga 'waidie, wata faifaiddi veimea fa'alidi 'u na yatoyatodi. <sup>12</sup> Timoti, 'omu tubuvauvaumu, begaidi yamu sauluva 'u na 'i'isave'avinidi bega tomotoga kebu 'adi fata i na awaobuobuyemu. Nuanuaku 'omu yadi 'eba 'isa, yamu vona tonovidi 'waidiega, yamu sauluva tonovidi 'waidiega, yamu nuakalikali 'wainega, wata yamu vetumagana 'wainega. Naninidi 'waidiega i na ve'ililibuyemu. <sup>13</sup> 'Awaie a na wai 'waimuye, we'e bola a na miamiaga, nuanuaku 'omu tutuya fuedi Yaubada yana Buki 'u na lulu'iawawai tomotoga 'waidie, 'u na lalau'age, wata 'u na veve. <sup>14</sup> ✧ Basenadi Yaubada yana tolu'ivonavo i vona-vagata faifaimu wata to'edakumeta 'au'auveadi nimadi i yatodi 'unu'unumuye i velu'ui faifaimu, nika bei tamu nuakalikali yamu folova faifaina Yaubada i velemu. 'Amu nuakalikalinina kebu 'u na baileni, tutuya fuedi 'u na foloveni. <sup>15</sup> 'Ai'edi taunimu 'u na tauyemu naninidi 'waidie, yamu sauluva wata yamu folova 'atumaidi tomotoga i na 'isedi i na ve-'awamogitana 'omu 'u vevetoketoke folovanina Yaubada i velemuga 'waineye.

<sup>16</sup> Tutuya fuedi yamu ve wata yamu sauluva 'u na 'i'isave'avinidi bega 'omu, wata tomotoganidi yamu vona i noganogaiga, taiadi 'ita'ita'i 'wa na veluagai Yaubada 'wainega.

## 5

### *'Isave'avina faifaina i awave'eda'eda.*

<sup>1</sup> ✧ 'Au'auveavo 'waidie kebu bonamu aya'ainega 'u na vonevoned, bikanega 'u na vonavona. Ma yamu ve'ililibu 'u na veve 'waidie 'u da vo tamamu 'waineye 'u da veve. 'U na vevesauluva 'atumaina tubuvauvau 'waidie 'u da vo taimwavo 'waidie bani'odi. <sup>2</sup> 'U na vevesauluva 'atumaina mo'amo'aivo 'waidie bani'odi inamu 'waidie, we'e ne'e'ela yamu sauluva 'atumai'avana 'waidie bani'odi novumwavo.

### *'Wabu'wabulavo 'adi 'isave'avina faifaina.*

<sup>3</sup> Nuanuaku 'omu, tovetumaganavo 'wabu'wabula kakalidi 'u na 'i'isave'avinidi fai kebu tamu aitoi 'adi to'isave'avinaga.

<sup>4</sup> 'Ai'edi 'wabu'wabulavo ma natudiavo 'alo ma tubudiavo, kwakwamanidi i lubwainedi yadi 'isave'avina i na tutuli. Yaubada nuanuana bani'odi kwakwamanidi yadi 'aila'avo i na 'i'ivaisedi, yana 'eba sosoana. <sup>5</sup> 'Wabu'wabulavonidi i vewekowekomaga, 'aise'avadi i miamiani, siwe kebu tamu 'eda i da 'eno'eno 'adi 'aivaita faifaina, bega 'aiata wata lovana i vevelu'ui Yaubada 'waineye, i vetumagana 'aivaita i na veluagai 'wainega. <sup>6</sup> We'e 'wabu'wabulavo 'ifwaidi i vevebaisa-'avo'avovo, ma yawaidie siwe 'anu'anunudi wafawafadi Yaubada mataneye. <sup>7</sup> Nuanuaku veimeanidi 'u na ve tovetumaganavo 'waidie bega kebu tamu aitoi i na awavesakoyedi yadi sauluva faifaina. <sup>8</sup> I lubwainedi ediavo i na 'i'isave'avinidi we'e egavo taunidi yadi 'aila'avo bani'odi inadiavo wata tamadiavo kebu i na 'i'isave'avinidiga, yadi sauluva 'waidiega ta na 'asetadi kebu i da vetumagana mogitana Keliso 'waineye. Egavo kebu i da vetumagana Keliso 'waineye, yadi sauluva sakoidi Yaubada mataneye, we'e kumanidiavo kebu yadi 'aila'a i da 'i'isave'avinidiga, yadi sauluva sakoitogidi mataneye.

<sup>9-10</sup> \*Vevinenidi i lubwainedi i na luku 'wabu'wabulavo 'adi 'aila'a nageneye side bani'odi. 'Akonadi 'adi malamala 60 i 'iaweniga, yadi lalamogavo 'aitamogadi 'waidiega i 'wabula, wata tomotoga fue di i 'asetadi taunidi to'aivaita. Vevinenidi nagami yadi 'isave'avina 'atumaina natudiavo 'waidie, wakawaka i veve'isabodedi 'atumaina, wata tomotoga taunidi i vetumagana Yaubada 'waineye 'ani'ieyega i le'wale'wai i 'i'isave'avinidi, bani'odi 'agedi i lekolekoadi. Wata vevinenidi egavo yadi mia vitadi i 'i'ivaisedi, wata taunidi i tauyedi folova 'atumaidi tulina tulina 'waidie. Kumanidiavo de'e bani'odi yadi sauluva, i lubwainedi i na luku 'wabu'wabulavo 'adi 'aila'a 'waineye.

<sup>11</sup> Kebu nuanuaku 'wabula tubuvauvaudi i na luku 'aila'anina 'waineye, fai 'awaie tamu tomogo 'atumaina i na 'iseni, nuanuadi i na nagi-vaitugana nika bei yadi vona'awaufaufa Keliso 'waineye i na geuya. <sup>12</sup> Nuanuadi i na luku 'aila'anina 'waineye nagami i na vona'awaufaufa Keliso 'waineye i na vetofolova faifaina, siwe i na bailaga i na nagi-vaitugana, begaidi vematavuloga i na veluagai. <sup>13</sup> \*Wata tamu a nuaniga 'wabu'wabulavo tubuvauvaudi kebu i na luku 'aila'anina 'waineye, tutuya fue di i mimia-maimaiga, wata i mimiayabavuvua vanuga fue di 'waidiamo. De'e kebu sauluva 'atumaina, siwe wata i vevesauluva sakoina bani'odi i vevebonaivo, i totolive'eda, wata naninidi kebu i da lubwainedi 'waidiega i na vonavona, faifaidi i vonavona. <sup>14</sup> \*Begaidi, nuanuaku 'wabu'wabulavo tubuvauvaudi i

na nagi-vaitugana, i na venatuna, bega natudiavo wata yadi 'aila'a wata yadi vanuga i na 'i'isave'avinidi. Wata nuanuaku yadi sauluva tonovidi bega 'ada gaviavo kebu i na vebonaivoyeda. <sup>15</sup> A vonaga fai 'ifwaidi 'wabu'wabulavo tubuvauvaudi Iesu Keliso i baileni kebu nuanuadi, Seitani 'waineye i vetovetutuyama.

<sup>16</sup> We'e 'ai'edi 'aila'a 'aitamogana 'wainega tamu vavine tovetumagana i na 'wabulaga, i lubwaineni ediavo tovetumagana 'aila'anina 'wainega i na 'i'isave'avinidi bega kebu Keliso yana 'Aila'a vita i na veveledi 'adi 'isave'avina faifaina. Keliso yana 'Aila'a i lubwainedi 'wabu'wabulavo 'aise'avadi i miamianiga, 'aisedi i na 'i'isave'avinidi.

*To'edakumeta 'au'auveadi faifaidi.*

<sup>17</sup> Ida tovetumaganavo i lubwaineda yada to'edakumetavo 'au'auveadi i folofolovaga 'atumaina, ta na ve'ililibuyedi bwaikina. Kumanidiavo i toke i folofolova, i veve wata i lalau'age, mogitana ta na veve'ililibuyedi. <sup>18</sup> ✧De'e yaku nuanua wata Yaubada yana Buki taiadi i vesala vonanina i vo,

'Ai'edi yamu 'aisaya i na 'i'ivaisemu yamu folova 'waineye, kebu 'ani'ani 'u na bodaiga, 'u na tauyeni i na 'ani."

Wata tamu vona i kilumi i vo,

I lubwaineni tofolova ma 'ana tutula."

<sup>19</sup> 'Ai'edi tamu tomogo i na mai i na vo, No'o to'edakumetanina, a 'asetai yana sauluva sakoina," kebu bonana 'u na nogai. We'e 'ai'edi 'adi 'ailuga 'alo 'adi 'aitonu yadi lu'ivona yana sauluva faifaina i na vesalaga, bonadi 'u na nogai. <sup>20</sup> ✧'Ai'edi to'edakumeta 'au'auveadi mogitana i na sakonaga, tovetumaganavo fuedi matadie 'u na tolimatanidi bega 'ifwaidi to'edakumetavo i na kololo kebu wata bani'odi i na vevesauluvedi.

<sup>21</sup> Iesu Keliso, Yaubada, wata yana anelose magemagetadi matadie a na vonemu. Nuanuaku yaku nuanua matatabuna 'u na vevematayakeyakedi. Yamu folova 'wainega, kebu tamu tomogo 'u na vieyeni, wata kebu tamu iamu tutuya fuedi 'aisena 'u na nuakalikaliene we'e 'ifwaidi 'u na bailedi.

<sup>22</sup> 'Ai'edi nuanuamu tamu aitoni i na veto'edakumeta Iesu yana 'Aila'a 'waidie, kebu 'u na 'abiwalowaloga. Nagami yana sauluva 'u na 'iseni, 'ai'edi 'atumaina 'amu fata ni-mamu 'u na yatoni 'unu'ununeye 'u na velu'ui faifaina mulieta i na veto'edakumeta. 'Ai'edi 'u na 'abiwalowaloga i na veto'edakumeta, i na sakosakonaga, 'omu 'amu vita. Nuanuaku yamu sauluva matatabuna tonovidi, kebu 'u na sakona.

<sup>23</sup> We'e tamu yaku nuanua siaina, basenadi wata 'asiau ufa'ava 'u yemuyemu. Fai tutuya fuedi 'u viviga nuanuaku

oine siaina siaina 'u na yemuyemu kamomu 'ana 'aivaita faifaina.

<sup>24</sup> Tomotoga 'ifwaidi yadi sakona mageseye, yada 'eba 'isa vematavuloga i na veluagai, 'ifwaidi tomotoga givagivayega i sakosakona, nagami ta na 'isadewadi, mulieta yadi sauluva sakoidi ta na 'asetadi. <sup>25</sup> Wata bani'odi 'ifwaidi tomotoga yadi sauluva 'atumaidi mageseye, we'e 'ifwaidi yadi sauluva 'atumaidi siwe givagivadi, bola ta na 'asetadi.

## 6

*Tofolova-maimaiga i na ve'ililibu 'adi toveimeavo 'waidie.*

<sup>1</sup> ✧ Tvetumaganavo 'ifwaidi i vetofolova-maimaiga mali tomotoga i veveimeyedi, i lubwainedi ma yadi dumwebika i na folofolova wata 'adi toveimeavo i na veve'ililibuyedi. 'Ai'edi i na dumwe'ai bola yada ve wata Yaubada 'ana wagava i na awavesakoyedi. <sup>2</sup> ✧ Tofolova-maimaiga wata 'adi toveimeavo ma fuedie i vetumaganaga Keliso 'waineye siwe tofolanidi kebu i na vo, Kebu 'a na toke a i folova, ma'inuama fai 'ama toveimeavo ma fuema 'a vetumagana bega kebu 'adi fata i na yagaima.” Kebu bani'odi i na nuanuayedi, i na folovamo toketokena bega ediavo toveimeavo ma fuedie i vetumagana Keliso 'waineye, yadi mia i na ve'atumi yadi folova 'waidiega.

Nuanuaku naninidi faifaidi 'u na ve, wata 'u na velu'ase'ase tomotoga 'waidie bega i na vematayakayaka.

*'Ai'aiwabu kebu ta na nuakalikalieniga.*

<sup>3-4</sup> ✧ 'Ai'edi aitoi ve-vekavekali faifaidi i na veve, siwe venidi kebu i da vesala 'ada Toveimea Iesu Keliso yana vona tonovidi wata Yaubada yana nuanua taiadi, taunina tobavu wata tonualaka. Tomotoganina nuanuana bwaikina nani-'avo'avovo wata nani siaidi faifaidi i na veve'ikwayekwayega, siwe ve'ikwayekwayeganidi 'waidiega veawamagi'ai i sousouyeni. Wata ve'ikwayekwayega 'wainega, ve'unumagigi, ve'idi'idi, manini, wata vevita-maimaiga i sousouyedi. <sup>5</sup> ✧ Tutuya fuedi i veve'ikwayekwayega tomotoga nuadi 'anigaugaudi taiadi, kumanidiavo Yaubada yana nuanua tonovidi kebu 'waidie i da 'eno'novi. Yadi nuanua igodi i vo, 'A na vetofolova tafalolo 'waineye bega mani bwaikina 'a na 'ewai 'a na ve'ai'aiwabu.

<sup>6</sup> ✧ 'Ai'aiwabu mogitana side bani'odi. 'Ai'edi yada sauluva 'atumaidi Yaubada mataneye, wata kebu ta na nuagiva kukua 'ifwaidi faifaidi, ta na sososoanamo naninidi i 'eno'noviga 'waideye faifaidi, 'asa'aiana 'ai'aiwabu



mogitana. <sup>7</sup> Kebu tamu kukua taiadi ta da tubuga, wata ta na wafaga, kebu tamu kukua ta na naweni. <sup>8</sup> ✨Fai kebu 'ada fata kukua ta na nawediga bega 'ai'edi ma 'ada kaleko wata ma 'ada'ada, siwe 'asa'aiana 'ada fata, wata ava'ai ta na lualeni. <sup>9</sup> ✨We'e egavo yadi nuanuana bwaikina 'ai'aiwabu, nuanuananidi i sisilubudi i yo'eyo'edi i lukuluku nani fuedi sakoidi 'waidie. Taunidi i tautauyedi 'ai'aiwabu nani-'avo'avovo 'waidie bega vita i na veluagadi. Yadi mia 'ana ve'amubwadodo mulieta wafa 'waineye vita bwaikaotogina i na veluagai. <sup>10</sup> ✨Side bani'odi, 'ai'edi 'ai'aiwabu ta na nuakalikalieniga, nika bei ta na velamu ta na lukuluku sakona tulina tulina 'waidie. Tomotoga 'ifwaidi yadi nuanua bwaikina 'ai'aiwabu, Keliso i baila yadi vetumagana i mwea-'afo'afo, begaidi yadi nuanuananina 'wainega taunidi vita fuedi i veledi.

*Faulo nuanuana Timoti i na vesauluva 'atumaina.*

<sup>11</sup> We'e Timoti, 'omu Yaubada yana tomotoga, naninidi sakoidi matatabuna 'u na degalovedi. Sauluva tonovidi 'waidie 'u na tokemaigemu, Yaubada 'u na vetumaganeni wata yana nuanua 'u na 'i'idewadi. 'U na nunuakalikali, 'ai'edi vita 'u na veluagaiga, ma yamu sosoana 'u na toke-maiga, wata nuanuaku yamu sauluva i na bika. <sup>12</sup> Yaubada faifaina 'u na tovoi fa'alina, 'u na vetalaga nani sakoidi 'waidie. Basenadi yamu vetumagana Keliso 'waineye 'u lu'ivoneyeni tomotoga fuedi matadie nika bei Yaubada i venua'ivinemu mia 'atumaina wata miamia-vagaina 'u velu-aga, faifainanina yamu sauluva 'u na 'i'isave'avini bega mi-anina 'atumaina kebu 'u na 'avalainaniga.

<sup>13</sup> ✨Yaubada, taunina nani matatabuna 'ida taiadi yawaida lamuna, wata Iesu Keliso, taunina basenadi i tovoi Fonitio Failato mataneyeye i lu'ivona tonovina, matadie a na velu'ase'asemu. <sup>14</sup> Ava'ai veimeaga Yaubada i velemuga, nu-anuaku tutuya fuedi 'u na vevematayakeyakedi, kebu tamu nani siaina 'u na baileni bega kebu tamu aitoi 'ana fata i na awavesakoyemu. Side bani'odi 'u na vevesauluva 'atumaina i na nagoga Iesu Keliso yana vila-vaitugana 'waineye. <sup>15</sup> ✨Yana souyagi 'ana tutuya Yaubada 'aisena i veimea bega ava'ai tutuyaga i lubwaineniga, 'waineye i na souyeni. Yaubadanina ma 'ana subia, 'aiseotogina Toveimea, kini wata gabe-mani matatabudi yadi Kini, wata toveimea fwayefwayeye 'aiseotogina 'adi Toveimea bwaikina. <sup>16</sup> ✨Yaubada 'aisena miamia-vagaina, yana 'eba mia mageta mataududulina nageneye, kebu tamu aitoi 'ana fata i na nago magetanina

✨ **6:8:** Voa 30:8 ✨ **6:9:** Voa 28:22 ✨ **6:10:** Efe 5:5 ✨ **6:13:** Ion 18:36-37, 19:11 ✨ **6:15:** Ve 17:14 ✨ **6:16:** Sou 33:20

lilivaneye. 'Ida tomia fwayafwaya, kebu tamu aitoi i da 'iseniga, wata kebu tamu aitoi 'ana fata i na 'iseniga. Nuanuaku fueda ta na veve'ililibuyeni, yana toketokena i na 'eno-vagata. 'Asa'aiana, bani'odi yaku nuanua.

*Tove'ai'aiwabu i lubwainedi i na vetumagana Yaubada 'waineye.*

17 ✨Egavo i ve'ai'aiwabu fwayafwaya 'ana kukua 'waidiega, nuanuaku 'u na vonedi kebu yadi kukuanidi faifaidi i na nualaka wata yadi vetumagana kebu i na yatoi yadi kukua 'waidie, fai naninidi yadi 'a'ava kebu i da 'asetadiga. I lubwainedi ma yadi vetumagana taunidi i na tauyedi Yaubada 'waineye, taunina ma yana nuakalikali nani matatabuna i veleveleda 'ada kiavesosoana faifaidi. 18 Wata nuanuaku 'u na vonedi yadi kukuanidi kebu i na veumokaiedi, siwe ma yadi nuakalikali wata ma yadi sosoana i na 'a'anivelena bega tomotoga i na 'i'ivaisedi. 19 ✨Ai'edi de'e bani'odi i na vevesauluvediga, 'ai'aiwabu mogitana abame i na lugalagal-adi tutuya mulina faifaina, 'ai'aiwabunidi 'waidie 'adi fata i na vetumagana fai kebu i na 'a'avaga. Ma yadi sosoana i na 'a'anivelenaga, 'awaie mia-vagata i na veluagai, mianina 'ivauna wata 'atumaina.

*Faulo nuanuana Timoti i na tovoi fa'alina.*

20 ✨Timoti, naninidi Yaubada i 'anivelenedi yamu 'isave'avina 'waineye kebu 'u na bailedi, 'u na 'i'isave'avinidi. Veifufu nani-'avo'avovo faifaidi wata ve'ikwayekwayega igodina 'Aseta faifaina 'u na bailedi. 21 ✨Tomotoga 'ifwaidi igodi i vo, Ma yada 'aseta," siwe Keliso yana 'eda'eda 'wainega i vuyo bega yadi vetumagana i mwea-'afo'afo.

A vevelu'ui faifaimi, nuanuaku Yaubada ma yana nuakalikali i na vevesauluva 'atumaina 'waimie.

'Asa'aiana bani'odi,  
Yau Faulo.

## 2 TIMOTI

### Faulo yana kiluma 'ana veluga Timoti 'waineye.

De'e Timoti yana leta 'ana veluga. Letanina Faulo i kilumi Loma 'wainega tutuyanina i miamia vanuga 'eba yogona nageneye. I yatoiga vanuga 'eba yogona 'waineye fai i lalau'age Iesu Keliso faifaina. Faulo i nuani sai'afoga i na luwewafai, bega tutuyanina 'waineye de'e leta i kilumi.

Timoti Faulo 'ana to'aivaita taiadi i folofolova wata taunina tovetumaganavo Efeso 'waineye 'adi to'isave'avina. Timoti wata Faulo ma fuedie i vetumagana Keliso 'waineye bega i ve'awa-natuneni. De'e letanina nageneye Faulo i veifufu yana nuakalikali Timoti 'waineye faifaina wata vitanidi Keliso 'ana tovedumwe'ai'ai 'waidiega, nuanuana 'waidie i na tokemaigeni. Wata Faulo nuanuana Timoti taunina i na tauyeni ve tonovidi 'waidie. Letanina 'ana 'idi side bani'odi.

Faulo yana vekaiwa Timoti 'waineye. 1:1-2

Faulo yana vekaiwa Timoti i vetumaganaga faifaina. 1:3-7  
Timoti i lubwaineni ma yana tokemaiga i na dumwebika  
yana folova 'waineye. 1:8-2:13

Tugusa i na veda ava'aibe bei mogitana Keliso yana to-  
folova. 2:14-26

Tutuya 'ana 'eba ve'a'ava 'waineye, tomotoga yadi sakona  
i na vebwaika-'afo'afo. 3:1-9

Faulo yana velu'ase'ase wata yana matakia Timoti yana  
folova faifaidi. 3:10-4:5

Faulo 'ana vebae wata yana nuanua. 4:6-18

Yana 'alanuai wata yana vekaiwa 'ifwaidi. 4:19-22

<sup>1</sup> Yau Faulo a vekaiwa Timoti 'waimuye. Yaubada nuanu-  
ana bega a vetomata'aulele Iesu Keliso faifaina. Basenadi i  
vona'awaufaufa egavo i na miave'itubama Iesu Keliso taiadi  
mia 'atumaina wata miamia-vagaina i na veluagai, faifainan-  
ina i vetuneku a lalau'age.

<sup>2</sup> ✧Timoti, a nuakalikaliemu wata a ve'awa-natunemu.  
'Omu mogitana bani'odi natuku, begaidi a velu'ui faifaimu  
nuanuaku Yaubada Tamada wata Iesu Keliso 'ada Toveimea  
ma yadi nuakalikali i na vevesauluva 'atumaina 'waimuye  
wata i na 'i'isanuakalikaliemu. Wata nuanuaku yadi nuanua  
bikana i na vevelemu, mia 'atumaina taiadi.

*Faulo i velu'ase'ase wata i vekaiwa.*

<sup>3</sup> ✧Timoti, tutuya fuedi, lovana wata 'aiata ma yaku  
vekaiwa faifaimu a velu'ui Yaubada 'waineye. Basenadi

tubukwavo i vetofolova Yaubada 'waineye yau wata 'asiau bega 'aku vebae 'wainega a lutonovi yaku sauluva tonovidi mataneye. <sup>4</sup> Yamu 'we'wela a nuanuani tutuyanina a 'iawemu bega nuanuaku bwaikina wata a na 'isemu a na sosoana. <sup>5</sup> ✨Yamu vetumagana mogitana Keliso 'waineye a nuanuani, bani'odi inamu Iunisi wata nagami inadi Losi yadi vetumagana. Bega a 'asetamu yamu vetumagananina i 'eno'eno fa'alina. <sup>6</sup> Basenadi nimaku a yatoi 'waimuye a velu'ui, Yaubada tamu nuakalikali i velemu yamu folova faifaina. Fai yamu vetumagana mogitana i 'eno'eno, nu-anuaku nuakalikalinina 'u na sisi'augi. <sup>7</sup> ✨'U na sisi'augiga fai 'Anu'anunu 'Atumaina Yaubada i veledaga kebu yada 'eba ve'awamayamayaga, yana 'aivaita 'wainega ta veve-toketoke, ta nunuakalikali wata taunida yada sauluva ta 'i'isave'avinidi.

<sup>8</sup> ✨Toketokena i velemuga, bega 'ada Toveimea Keliso 'ana vetolu'ivona faifaina kebu 'u na bunumayaga, wata yau Keliso faifaina vanuga 'eba yogona 'waineye a miamia, kebu 'u na bunumayageku. 'U na vevetolu'ivonaga Iesu Valana 'Atumaina faifaina, vita 'u na veveluagadi yau bani'odi, siwe kebu 'u na kolologa 'u na tokemaigemu fai Yaubada toketokena i na velemu, 'amu vita 'adi fata bani'odi. <sup>9-10</sup> ✨I 'ita'ita'ieda sakona 'waidiega i goleda bega yada sauluva i na ve'atumai mataneye. Kebu tamu yada folova 'atumaina faifaina i da venua'ivineda, fai taunina yana nuania wata yana nuakalikali 'waidiega. Bola fwayafwaya kebu i da 'idewaiga, nuakalikalinina i veleda Iesu Keliso 'wainega we'e 'asiau Iesu Keliso 'ada To'ita'ita'i yana mai 'wainega nuakalikalinina i vemageta. I vemagetaga fai wafa yana toketokena Keliso i ve'a'avai wata Valana 'Atumaina 'wainega mia 'atumaina wata miamia-vagaina i sivemageseni.

<sup>11</sup> ✨Yaubada yana venua'ivinayega i veimeyeku Valanina 'Atumaina faifaina a vetomata'aulele, a vevetolu'ivona wata a vetove. <sup>12</sup> A vetolu'ivonaga begaidi vita a veveluagadi a miamia vanuga 'eba yogona 'waineye, siwe kebu tamu sai'afu a da bunumayaga fai a nuani wata a 'asetai taunina 'waineye yaku vetumagana a yato-vagaseni. A 'asetai mogitana nani matatabuna a 'anivelenedi 'waineye i na 'i'isave'avinidi i na nagoga yana 'Aiata Bwaikina 'waineye i na vila-vaitugani.

<sup>13</sup> ✨Fai ta miave'itubama Iesu Keliso taiadi, ta nuakalikali wata ta vetumagana 'waineye, begaidi nuanuaku ve tonovidi 'waikuyega yamu 'eba 'isa, 'waidiega 'u na veve tomotoga 'waidie. <sup>14</sup> Naninidi 'atumaidi Yaubada i velemuga 'u na

'i'isave'avinidi 'ada labilabina 'Anu'anunu 'Atumaina yana toketokena 'wainega.

*Faulo enavo fuedi i degalovei.*

<sup>15</sup> ✱'Akonadi 'u 'asetai tutuyanina vanuga 'eba yogona 'waineye i yatoku tovetumagana matatabudi 'awalawa Eisia nageneye i degaloveku, tomotoganidi 'waidiega 'adi 'ailuga side 'adi wagava, Fisilasi wata Elimotini.

<sup>16</sup> We'e tamu, 'ana wagava Onesifolasi tutuyanina a miamia vanuga 'eba yogona 'waineye kebu i da bunumayageku. I viwai i fogefogeku wata i 'ivesosoaniku begaidi a vevelu'ui nuanuaku Yaubada i na vesauluva 'atumaina taunina wata yana 'aila'a 'waidie. <sup>17</sup> Tutuyanina i le'wa Loma, i lualeku i nagoga nika i veluagaku. <sup>18</sup>'Awaie Keliso yana vila-vaitugana 'waineye, nuanuaku 'Auvea i na nuakalikali. We'e tutuyanina 'a miamia Efeso yana 'aivaita 'waikuye 'akonadi 'u 'asetai'a'avadi.

## 2

*Vita 'waidie ta na tovoi fa'alina Keliso faifaina.*

<sup>1</sup> Natuku Timoti, a na vonemu. 'Ida ta miave'itubama Iesu Keliso taiadi, begaidi nuanuaku yana nuakalikali i velemuga 'wainega 'u na vetoketoke. <sup>2</sup> Basenadi a lalau'age tomotoga fuedi 'waidie bonaku 'u noganogai. Nuanuaku tomotoga 'ifwaidi ma 'adi vetumagana 'u na venua'ivinedi, yaku vonanidi 'u na ve 'waidie bega i na nagoi i na vetolau'age venidi faifaidi.

<sup>3</sup> 'Ida tovetumagana ta vetolugavia Iesu Keliso faifaina, vita ta na veveluagadi. Vitanidi 'waidie 'u na tovoi fa'alina Keliso faifaina 'u na lugavia 'atumaina. <sup>4</sup> Tolugaviavo matatabudi nuanuadi 'adi to'edakumeta i na kiavesosoani, begaidi lugavia 'atumaina 'aisena faifaina i nuanua kebu nani 'ifwaidi faifaidi i na nuanua. Wata 'omu bani'odi, 'u na vevetalaga 'atumaina bega 'amu to'edakumeta i na sosoana faifaimu.

<sup>5</sup> ✱'U na folofolova Keliso faifaina, yana veimea 'u na vematayakeyakedi bani'odi to'wawa 'ai'edi 'wawa 'ana veimea i na vematayakeyakediga bola i na kumeta tutula i na 'ewai.

<sup>6</sup> ✱'Omu 'u na vetoketoke Keliso faifaina bani'odi tobakula dumwena bikana, kumanina i lubwaineni 'ani'ani bwaikina i na veluagai yana folova 'ana tutula. <sup>7</sup> 'Eba 'isanidi 'aitonu a voneyediga faifaidi nuamu i na 'ivina nika 'Auvea yana 'aivaita 'wainega nuamu i na magetai 'u na 'asetai bani'odi 'u na vesauluvedi.

<sup>8</sup> ✱'U na nuani Iesu, Yaubada 'ana Venua'ivina Kini Dev-ida 'ana wauma 'wainega i souyeni, i wafa siwe Yaubada

i sivetovoia wafayega. Valana 'Atumaina kumanina yau a lulu'ageyeni. <sup>9-10</sup> ✧Valanina faifaina vita a veluagadi, i yogoniku bulava kainumu 'waidiega yau 'wa da vo tosakona. We'e Yaubada yana Vona kebu yogoyogoninaga begaidi a tokemaigeku vita matatabuna 'waidie bega tomotoganidi Yaubada i venua'ivinediga ma fuedeye 'ita'ita'i ta na veluagai. 'Ita'ita'inina Iesu Keliso 'wainega wata 'ai'aiwabu-vagata taiadi ta na veluagadi. <sup>11</sup> ✧Vona de'e vona mogitana,

'Ai'edi Keliso taiadi ta wafaga, bola taiadi ta na mia-vagata.

<sup>12</sup> ✧'Ai'edi vita 'waidie faifaina ta na tokemaigedaga, bola taiadi ta na veveimea.

'Ai'edi ta na vedumwe'ai'aieniga, bola i na vedumwe'ai'aieda.

<sup>13</sup> ✧'Ai'edi yada vetumagana i na mwea-'afo'afo, kebu i na bailedaga, fai kebu 'ana fata yana vona'awaufaufa 'waideye i na geudi.”

*Yaubada nuanuana yana tofolovavo side bani'odi i na folovedi.*

<sup>14</sup> ✧Naninidi Keliso faifaina a voneyediga, yamu tomotoga nuadi 'u na totolinuata'idi, wata Yaubada mataneye 'u na talabodedi bega vona nani-'avo'avovo faifaiddi kebu i na ve'ikwayekwayega. Ve'ikwayekwayega kebu tamu aitoi 'ana 'eba 'aivaita, tonogaya 'adi 'eba 'ivesako. <sup>15</sup> ✧Yamu folova 'waineye 'u na dumwebika bega bola Yaubada mataneye i na awave'atumaitem nika kebu 'u na bunumayaga. I lubwainemu Yaubada yana Vona Tonovididi 'u na 'asetat'atumaiddi bega 'waidiega 'amu fata tomotoga 'u na 'i'ivaiddi. <sup>16</sup> Ve'ikwayekwayega nani-'avo'avovo faifaiddi 'u na bailedi, i na nunago 'wainega tomotoga Yaubada i na mia'iaweni. <sup>17</sup> Tove'ikwayekwayega yadi vona bani'odi bonu sakoina i na vebwaika-'afo'afo nika 'wainega wafa i na souyeni. Tomotoganidi 'waidiega 'adi 'ailuga i veve-vekavekali, 'adi wagava Aiminio wata Filitasi. <sup>18</sup> Yaubada yana nuanua tonovididi 'ana 'eda'eda 'wainega i vuyo, tovetumaganavo i 'ivenuanalugadi yadi vetumagana i 'ivemweadi fai i vo, Ta vetumaganaga Iesu 'waineye 'akonadi ta yawasa-vaitugana, we'e 'awaie ta na wafaga kebu ta na tovoi wafayega.” <sup>19</sup> ✧Bani'odi i voneyediga siwe Yaubada yana Vona fa'alina i 'eno'eno kilu'wau'wauga bani'odi kebu 'ana fata tamu aitoi i na ketoi. Yana vonanina fa'alina side bani'odi.

'Auvea yana tomotoga 'akonadi i 'asetadi.”

Wata i vo,

✧ **2:9-10:** Fil 1:12-14; Kolos 1:24 ✧ **2:11:** 2 Kol 4:11 ✧ **2:12:** Mad 10:33

✧ **2:13:** Lom 3:3-4; Num 23:19; Tai 1:2 ✧ **2:14:** Tai 3:9 ✧ **2:15:** Tai 2:7-8

✧ **2:19:** Ion 10:14-15

Egavo i na vo, 'Ima 'Auvea yana tomotoga," i lubwainedi sauluva sakoidi i na vedumwe'ubu'ubusedi."

Fai de'e bani'odi Yaubada yana Buki i voneyediga, ta 'asetai yana Vona fa'alina, ve-vekavekali kebu 'ana fata i na fetoi.

<sup>20</sup> ✧ 'Ai'aiwabu yadi vanuga nagedie 'aivoe wata nau fuedi. 'Ifwaidi 'adi tutula bwaikidi we'e 'ifwaidi fwayafwaya wata welavi 'waidiega i 'idewadi. 'Adi tutula bwaikidi wakawaka faifaidi, we'e fwayafwaya wata welavi i 'idewadiga, 'aivoe-'avo'avovo wata laugaina. <sup>21</sup> 'Aivoenidi tomotoga bani'odi. 'Ai'edi aitoi sakona i na bailediga bani'odi 'aivoe tutulidi bwaikidi i yato'idiedi tomotoga bwaikidi faifaidi. Taunidi yadi sauluva i na ve'atumaiga Keliso 'ana fata i na folovedi yana nuanua 'atumaidi tulina tulina faifaidi.

<sup>22</sup> Tubuvauvau yadi sauluva tutuya fuedi bunu 'ana nuanua sakoidi faifaidi i nunuagiva, we'e 'omu Timoti kebu bani'odi 'u na munega, nuanuaku nuanuananidi 'u na degalovedi. We'e mogitana i lubwainemu 'u na tokemaiga sauluva 'atumaidi 'waidie, bani'odi sauluva tonovina, vetumagana toketokena Yaubada 'waineye, nuakalikali wata nuanua bikadi. 'Ai'edi bani'odi 'u na munega, tomotoganidi yadi sauluva tonovidi bega nuanuadi bwaikina Yaubada, yadi sauluvayega 'u na nunago. <sup>23</sup> Tomotoga 'ifwaidi igodi i vo, Ma yama 'asetai," nuanuadi i na veve'ikwayekwayega nani-'avo'avovo faifaidi, 'u na bailedi fai ve'ikwayekwayega 'waidiega ve'alamagi'ai i sousouyeni. <sup>24</sup> ✧ 'Auvea yana tofolova i na veve'alamagi'aiga kebu i da lubwaineni, we'e mogitana tomotoga matatabudi i na nuakalikali, Yaubada yana Vona i na veve 'atumaina wata yana tofolovavo taunidi tonuakalikali, tove 'atumaidi wata i na totokemaiga. <sup>25</sup> Vona bikadiega tovekali yadi nuanua i na kiavetonovidi bega voke Yaubada i na tauyedi i na nuaviladi yana nuanua tonovidi i na 'asetadi. <sup>26</sup> Tutuyanina i na nuaviladiga, yadi nuanua i na tonova-vaitugana, Seitani 'wainega i 'etodaba. Tovekalinidi Seitani yana nigole i dikwanidiga, yogoyogonidi i miamia bega yana nuanua i na 'i'idewadi.

### 3

#### *Tutuya vitadi faifaidi.*

<sup>1</sup> ✧ Nuanuaku 'u na 'asetai, Iesu yana vila-vaitugana i na velilivanaga tutuya vitadi i na souyedi. <sup>2</sup> ✧ Tutuyanina 'waineye tomotoga i na veveumokai, nuanuadi kukua fuedi wata taunidi i na kikialakaidi. Taunidi tonualaka, tomanini-'avo'avovo, tamadiavo wata inadiavo i na vevedumwe'ai'aiedi, kebu 'adi to'aivaita i na tutulidiga, wata

Yaubada i na vevedumwe'ai'aieni. <sup>3</sup> Kebu i na nuakalikaliga, kebu nuanuadi veiana, taunidi tovebonaivo wata kebu yadi sauluva i na 'i'isave'avinidiga. Taunidi tove'isakololo wata nani 'atumaidi matatabuna 'adi tovedumwe'ai'ai. <sup>4</sup> Tomotoganidi to'etogiluva, taunidi kebu nagami i da vevenua'ivina 'atumaina nika yadi sauluva 'waidiega ediavo vita i veveluagadi, i na vevebaisa, kebu nuanuadi Yaubada wata yadi nuanua bwaikina sosoana-'avo'avovo. <sup>5</sup> \*Tomotoga fueidi 'adi 'isa 'wainega 'wa da vo totafalolo siwe Yaubada wata yana toketokena i baila. Timoti, nuanuaku tomotoganidi sakoidi 'u na bailedi.

<sup>6</sup> Tomotoganidi 'ifwaidi i nunagoi mali tomotoga yadi vanuge vevine yadi vetumagana mweadi yadi ve-vekavekali 'waidiega nuadi i 'ewa'ewadi. Vevinenidi 'adi vebae 'waidie vita i lulutonovi yadi sakona faifaidi, siwe yadi nuanua bwaikina sakona tulina tulina. <sup>7</sup> Ve tulina tulina 'waidie i vevetumagana we'e Yaubada yana nuanua tonovidi kebu 'adi fata i na 'asetadi. <sup>8</sup> Tosakonanidi Yaubada yana nuanua tonovidi 'adi tovedumwe'ai'ai bani'odi basenadi Itifita 'waineye Ianisi wata Iamilisi Mosese taiadi i ve'ikwayekwayega me Isileli 'adi vagavai faifaina. Tosakonanidi wata tomotoganidi 'adi 'ailuga nuadi 'anigaugaudi i vevekali igodina Yaubada 'waineye i da vevetumagana. <sup>9</sup> Yadi vekalinidi kebu 'adi fata wata i na 'i'idewadi fai 'awaie tomotoga matatabudi yadi sauluva i na 'asetadi bani'odi Ianisi wata Iamilisi yadi sakona.

*Velu'ase'ase 'ana 'eba ve'a'ava.*

<sup>10-11</sup> \*We'e 'omu Timoti, yamu sauluva kebu bani'odi tosakonanidi. Yaku ve, yaku sauluva, wata yaku nuanua 'u vevetutuyamedi. Yaku vetumagana Keliso 'waineye, yaku tokemaiga, yaku nuakalicali 'u 'ise'isedi, wata tutuyanina tomotoga vita fueidi i veveleku a veveviga Yaubada faifaina a tokemaigekumo. Naninidi matatabuna i souyedi 'waikuye Anitioki, Ikoniami, wata Lisitala 'waidie 'akonadi 'u 'asetadi mogitana vita bwaikaotogidi a veluagadi Keliso faifaina tomotoga 'waidiega, siwe naninidi 'waidiega 'Auvea i 'ita'ita'ieku. <sup>12</sup> \*Egavo nuanuadi taunidi i na tauyedi Iesu Keliso 'waineye bega yadi sauluva tonovidi Yaubada mataneye, matatabudi vita bwaikina i na veveluagadi. <sup>13</sup> We'e tosakona wata tovekali 'eba velamuyega i na sakona i na nagoga i na vebwaika-'afo'afo, i na vevekali we'e tomotoga 'ifwaidi wata i na vevekaliedi. <sup>14</sup> \*We'e 'omu, naninidi tonovidi 'adi ve 'u 'ewadiga, ma yamu vetumagana 'u na 'i'idewadi fai 'amu tove ma 'adi 'aseta 'waimuye. <sup>15</sup> Basenadi siaimuye Yaubada yana Vona Magemagetadi i ve 'waimuye 'u 'asetadi, vonanidi



'waidiega 'ana fata 'aseta 'u na 'ewai 'ita'ita'i faifaina Iesu Keliso 'ana vetumagana 'wainega. <sup>16</sup> ✱Yaubada yana Vona kiluk-ilumidi matatabuna lamuna taunina yana nuanua 'wainega. 'Ada laubwaina nani tonovidi ta na 'asetadi, wata 'wainega vekali ta na talabodedi. I na ve 'waideye bani'odi ta na munega sakona ta na bailedi wata yada sauluva i na tonova Yaubada mataneyeye. <sup>17</sup> Yaubada yana Vonanidi 'waidiega 'ida yana tomotoga yada sauluva ta na 'isave'avinidi yana folova 'atumaidi 'aitamogana 'aitamogana faifaiddi.

## 4

*'Awaie tovetumagana 'ada tutula ta na 'ewa.*

<sup>1</sup> ✱'Awaie Keliso yana vila-vaitugana 'waineyeye egavo i wafaga wata egavo ma yawaidi i miamiaga i na von-ayavuga mataneyeye, wata yana 'Eba Veimea i na 'idewai, begaidi Yaubada wata Iesu Keliso matadie a na vonemu. <sup>2</sup> ✱Nuanuaku Iesu Valana 'Atumaina 'u na lulu'ageyeni. Tutuya fueidi 'u na lalau'agega, 'ai'edi safailina 'alo vitana 'waimuye, 'ai'edi tomotoga nuanuadi 'alo kebu. Ma yamu tokemaiga 'u na veve tomotoga 'waidie, 'u na kikiavetonovidi, 'u na lulumatanidi wata 'u na vevelu'ase'asedi. <sup>3</sup> ✱'U na veve fai 'awaie tomotoga fueidi i na baila kebu nuanuadi Yaubada yana Vona tonovina i na noganogai, taunidi yadi nuanua 'waidie i na nunago. Nuanuadi tove-vekavekali fueidi yadi ve bega naninidi 'adi nogaya 'eba nua'ewa i na noganogaidi. <sup>4</sup> We'e nani matatabuna tonovidi i na vedumwe'ai'aiedi, yadi nuanua bwaikina ifuifufu-'avo'avovo tubudiavo 'waidiega.

<sup>5</sup> We'e 'omu tutuya fueidi 'u na tovoi fa'alina. Vita 'u na veluagadiga tomotoga 'waidiega Keliso faifaina, 'waidie 'u na tokemaiga. Iesu Valana 'Atumaina 'u na lalau'age bega tomotoga taunidi i na tauyedi 'waineyeye, wata fai 'omu Yaubada yana tofolova, folovanidi i lubwainemu 'u na 'i'idewadi, tutuya fueidi 'u na folofolova 'waidie.

<sup>6</sup> 'Omu 'u na folofolova Keliso faifaina we'e yau 'akonadi a tauyeku sai'afoga a na wafa 'wa da vo a da 'aniveleneku Yaubada 'waineyeye velomu faifaina, a na 'iawemu a na laka abame. <sup>7</sup> Keliso faifaina a vetoketoke, folovanina i velekuga 'akonadi 'ana tugusa 'waineyeye a le'wa. <sup>8</sup> ✱A vetoketoke begaidi 'aku tutula i 'idewai i yatoi i 'eno'eno. Bola 'Auvea 'ada Toveimea, kumanina yana sauluva tonovina yana vila-vaitugana 'waineyeye i na veleku. Yaku sauluva matatabuna i na ve'atamai Yaubada mataneyeye, 'asa'aiana 'aku tutulanina.

✱ 3:16: 2 Fit 1:21 ✱ 4:1: Fol 10:42; Lom 14:9-10 ✱ 4:2: Fol 20:20,31 ✱ 4:3: 1 Tim 4:1 ✱ 4:8: Ve 2:10

Siwe kebu yau 'aisekuga, kumanidiavo i nunuakalikalienu wata i lulukamata yana souyagi faifaina, tutulanina i na veledi.

*Faulo i veifufu enavo 'ifwaidi faifaidi.*

<sup>9-10</sup> Nuanuaku 'u na vewavawava 'u na mai-matayo'o 'waikuye, fai fwayafwaya 'ana nuanua Dimasi nuana i 'ewai, i baileku i nago Tesalonaika. Kelesenisi i nago Galetia we'e Taito i nago Dalimetia. <sup>11-12</sup> ✧Tikiasa a voneni i nago Efeso, we'e Luke 'aisena taiadi 'a miamia. Nuanuaku Malika 'u na voneni taiadi 'wa na mai, fai kumanina 'ana fata i na 'ivaiseku folova fuedi 'waidie. <sup>13</sup> ✧Basenadi a miamia Tiloasi 'aku talauma a 'iaweni Kafo 'waineye, 'u na mimaiga 'u na mieni, wata 'ifwaidi buki kumanidiavo 'akonadi 'u 'asetadi we'e nuanuaku bwaikina bukinidi 'aisaya bunudiega i 'idewadi, taiadi 'u na miedi.

<sup>14</sup> ✧Alekisana, kumanina kainumu 'adi to'idewadewa nani sakoina wata bwaikina i 'idewai 'waikuye. Yana sauluvanina faifaina 'awaie 'Auvea i na tutuli 'ana 'isa'isa bani'odi. <sup>15</sup> Taunimu 'u na 'isave'avinimu tomogonina 'wainega fai ma yana nuasako yama vona i totolivedumwe'ai'aiedi.

<sup>16</sup> Yaku vonayavuga 'ana 'eba velamu 'waineye matatabudi i degaloveku, kebu tamu aitoi i da 'ivaiseku. Nuanuaku yadi sauluvanina faifaina Yaubada i na nuatavunidi. <sup>17-18</sup> ✧I degalovekuga siwe 'Auvea lilivakuye i miamia, toketokena i veleku bega 'aku fata Iesu Valana 'Atumaina matatabuna a na lu'ivona tomotoganidi kebu Diu 'waidie. Bei i 'ita'ita'ieku vita bwaikidi 'waidiega, wata a 'asetai 'awaie i na 'i'ita'ita'ieku nani sakoidi tulina tulina 'waidiega mulieta i na vagavaiku a na luku abame yana 'Eba Veimea 'waineye.

Yaubada miamia-vagaina wata magemagetana. I lub-waineda ta na subisubiai. Vona mogitana yaku nuanua bani'odi.

*Faulo yana 'alanuai.*

<sup>19</sup> ✧Filisila, Akwila wata Onesifolasi ma yana 'aila'avo, matatabudi 'u na vonedi yaku vona-vekaiwa 'waidie. <sup>20</sup> ✧Elasitasi i miamia Kolinita, we'e Tolofimo Milito 'waineye a 'iaweni fai i viga. <sup>21</sup> Nuanuaku 'u na vewavawava 'u na mai-matayo'o mulieta vekaukau 'ana tutuya i na souyeni.

Iubilasi, Fudeni, Laino, Kalodi wata 'ifwaidi tovetumaganavo taiadi yadi vona-vekaiwa i vetunei 'waimuye.

<sup>22</sup> Nuanuaku 'ada Toveimea Iesu Keliso 'anu'anunumu 'ana labilabina. Nuanuaku Yaubada ma yana nuakalikali i na vevesauluva 'atumaina 'waimie.

'Asa'aiana bani'odi,

Yau Paulo.

## TAITO

### Faulo yana kiluma Taito 'waineye.

Taito kebu tomogo Diu, Faulo yana lau'age 'wainega i vetumagana Iesu Keliso 'waineye. Faulo yana lau'agevuvua 'waineye Taito 'ana 'weabu taiadi i lalauvivila. Tomata'aulelevo yadi va'auta bwaikina 'waineye Taitonina Faulo taiadi i nago Ielusalema. (Folova 15:2) Faulo Taito i vetunei i nago Kolinita tutuya 'ailuga. (2 Kol. 7:6-7, 8:6,16) Mulieta Faulo Taito i voneni tovetumaganavo i na 'isave'avinidi Imula Kiliti 'waineye, (Taito 1:5).

Leta de'e nageneye i veifufu Taito 'waineye tovetumagana 'adi to'edakumetavo 'adi venua'ivina faifaina, i matakia tovevekavekali faifaidi, i awave'ede'edeni yana ve tovetumaganavo 'waidie faifaina wata i ve 'waineye ava'ai sauluvaga tovetumaganavo 'adi laubwaina. De'e letanina 'ana 'idi side bani'odi.

Faulo i vekaiwa Taito 'waineye. 1:1-4

Tovetumagana 'adi to'edakumetavo. 1:5-16

Ve tovetumaganavo 'aila'a tulina tulina faifaidi. 2:1-15

Sauluva 'atumaidi tulina tulina faifaidi. 3:1-11

Faulo yana vona 'ifwaidi wata yana 'alanuai. 3:12-15

<sup>1-2</sup> Yau Faulo, Yaubada yana tofolova wata Iesu Keliso yana tomata'aulele a vekaiwa Taito 'waimuye.

Basenadi Yaubada i venua'ivineku i vetuneku bega tomotoganidi i venua'ivinediga a na 'ivaisedi i na vetumagana Keliso 'waineye. Wata i venua'ivinekuga Yaubada yana nuanua tonovidi a na ve 'waidie bega yadi sauluva i na tonova Yaubada yana nuanua bani'odi, wata i na nuni mogitana i na vetumagana 'awaie mia 'atumaina wata miamia-vagaina i na veluagai. Mogitana miamia-vagaina i na veluagai fai basenadi Yaubada fwayafwaya kebu i da 'idewaiga, i vona'awaufaufa ta na veluagai, kebu i da vekaliedaga. <sup>3</sup>Valanina mia 'atumaina wata miamia-vagaina faifaina basenadi kebu tamu aitoi i da 'asetaigna, siwe tutuyanina Yaubada nuanuana, bei i sivemageseni Iesu Valana 'Atumaina 'wainega. Yaubada 'ada To'ita'ita'i i vetumaganeku Valanina i 'aniveleneni 'waikuye bega yana veimea 'wainega faifaina a lulu'ivona.

<sup>4</sup> ✧ Kilukiluma Taito 'waimuye, 'omu yau taiadi ta vetumagana Keliso 'waineye bega a ve'awa-natuna 'waimuye. A vevelu'ui faifaimu, nuanuaku Yaubada Tamada wata 'ada To'ita'ita'i Iesu Keliso ma yadi nuakalikali i na vevesauluva

'atumaina 'waimuye wata nuanua bikadi mia 'atumaina taiadi i na vevelemu.

*Taito yana folova Imula Kiliti 'waineye.*

<sup>5</sup> 'U na nuani ava'ai basenadi a vonemu tutuyanina Imula Kiliti 'waineye a valovemu. A vonemu folovanidi kebu a da ve'a'avadiga 'u na 'idewadi wata to'edakumeta 'u na venua'ivinedi tovetumagana 'adi 'aila'a 'atamana 'aitamogana 'aitamogana faifaiddi. <sup>6</sup> \*Ai'edi nuanuamu tamu tomogo i na veto'edakumeta Iesu yana 'Aila'a 'waidie, i lubwaineni yana sauluva 'atumai'avadi, 'ai'edi naginagina, yana vavine 'aitamogadi taiadi i na miamia. Natunavo i lubwainedi taunidi tovetumagana Keliso 'waineye, wata kebu tamu 'adi 'eba awavesako bani'odi bunu 'ana nuanua sakoidi, wata kebu tovemata'wana'wana. <sup>7</sup> \*Fai to'edakumetanina Yaubada yana folova i na 'i'isave'avini, i lubwaineni yana sauluva 'atumai'avadi, taunina kebu tonualaka, kebu i na nuasako-matayo'oga, kebu ufa toketokena i na toke i na yemuga, kebu i na vevetalagaga, wata kebu kukua 'adi nuanua 'waineye i na vebwaika. <sup>8</sup> We'e mogitana i lubwaineni wakawaka i na veve'isabodedi wata nani 'atumaidi i na nuakalikaliedi. Taunina tovenua'ivina 'atumaina, yana sauluva tonovidi wata magemagetadi Yaubada mataneyeye, wata taunina yana sauluva i na 'i'isave'avinidi 'atumaina. <sup>9</sup> Iesu Valana 'Atumaina 'waineye i na tovofovoi fa'alina, Valananina ta ve'awamogitaneni bega yada vetumagana ta yatoi 'waineye wata yada ve taiadi i vesala. Bani'odi i na vevesauluvediga tomotoga 'ifwaidi i na kiavefa'alidi wata i na kiavesosoanidi ve tonovidi 'waidiega wata venina 'ana tovedumwe'ai'ai yadi vekali i na sivemagesedi.

*Tove-vekavekali Taito i na talabodedi.*

<sup>10</sup> I lubwainemu to'edakumetavo 'atumaidi 'u na venua'ivinedi fai tomotoga fueidi tovemata'wana'wana wata to'abigeku tomotoga i vevekaliedi, we'e mogitana me Diu 'ifwaidi i vetumaganaga Keliso 'waineye yadi nuanua i vo, 'Ai'edi 'wa na luku Iesu yana 'Aila'a 'waineye, nagami 'ima me Diu yama veimea 'wa na vematayakeyakedi." <sup>11</sup> I lubwaineda ta na talabodedi fai tomotoga 'ifwaidi ma yadi 'aila'avo yadi vetumagana i 'ivemweadi yadi ve 'waidiega. Kebu i da lubwainediga bani'odi i na veve, nuanuadi mani bwaikina i na veluagai yadi venina 'wainega, 'eba bunumayaga. <sup>12</sup> Imula Kiliti 'waineye 'u miamiaga, tamu taunidi yadi tomotoga, taunina yadi tolu'ivona basenadi i vo, Me Kiliti tutuya matatabuna taunidi tovekali, 'aisaya kasikasisidi bani'odi nuanuadi tomotoga vita i na veveledi,

tovedumwe'ai'ai, 'awadi bwalabwalaidi.”<sup>13</sup> Ava'ai i voneyeniga, vona mogitana begaidi i lubwainemu 'u na toke 'u na talabodedi bega kebu i na 'ivemweamweadiga yadi vetumagana i na yatoi fa'alina.<sup>14</sup> Wata 'u na talabodedi bega kebu taunidi i na tauyedi ifuifufu-vekavekali 'waidie me Diu tubudiavo 'waidiega, wata veimeanidi i sousouyedi Yaubada yana nuanua tonovidi 'ana tovedumwe'ai'ai 'waidiega, kebu i na ve'awamogitanediga.<sup>15</sup> Egavo yadi nuanua magemagetadi, nani matatabuna 'waidie magemagetadi, we'e egavo yadi nuanua 'oka'okadi wata taunidi kebu tovetumaganaga, nani matatabuna 'waidie 'oka'okadi fai yadi nuanua 'akonadi i sako, kebu 'adi fata 'adi vebae 'waidie i na lutonovi i sakosakona 'alo kebu.<sup>16</sup> ✨I vonavona i vo, 'Ima Yaubada 'a 'asetai, taiadi 'a veiana,” siwe yadi sauluva 'waidiega ta 'asetadi i vevekali. Taunidi tovemata'wana'wana, kebu 'adi fata tamu nani 'atumaina i na 'idewaiga, i ve'eduogaogala.

*Ve 'au'auveadi wata mo'amo'aivo faifaidi.*

## 2

<sup>1</sup> We'e 'omu, sauluvanidi ve tonovidi taiadi i vesalaga, i lubwainemu faifaidi 'u na veve. <sup>2</sup> 'Au'auveadi 'u na vonedi kebu i na vemwasosoai-'avo'avovo we'e yadi sauluva i na 'i'isave'avinidi, yadi nuanua i na tonova bega ma 'adi ve'ililibu, wata i na vevenua'ivina 'atumaina. Kebu i na 'ivemweamweadi, yadi vetumagana i na yatodi fa'alina, yadi nuakalikali i na vebwaika wata i na tokemaigedi vita 'waidie.

<sup>3-4</sup> ✨Wata bani'odi mo'amo'aivo 'u na vonedi bega yadi sauluva matatabuna magemagetadi, kebu i na vebonaivo wata ufa toketokena kebu nuadi i na 'ewadi. I lubwainedi yadi ve 'atumaidi 'waidiega vevine tubuvauvau i na ifufudi bega yadi lalamogavo wata natudiavo i na nuakalikaliedi.

<sup>5</sup> 'Adi veifufu 'waidiega i na vevenua'ivina 'atumaina, kebu i na sakonaga, i na folofolova 'atumaina yadi vanuga nagedie, ma yadi nuakalikali i na ve'ivaivaita wata yadi lalamogavo i na vematayakeyakedi. 'Ai'edi bani'odi i na vevesauluvediga, kebu tamu aitoi Yaubada yana Vona i na awavesakoyeniga.

*Ve tubuau faifaidi.*

<sup>6</sup> Wata bani'odi iaveta tubuvauvau 'u na ifufudi bega yadi sauluva i na 'i'isave'avinidi. <sup>7</sup> ✨We'e 'omu taunimu yadi 'eba 'isa bega i lubwainemu nani matatabuna 'waidie yamu sauluva 'atumai'avadi. Kebu vekaliega 'u na ve, we'e yamu vona tonovidi 'waidiega tubuvauvaunidi i na ve'ililibuyemu. <sup>8</sup> ✨'Ai'edi yamu venidi 'adi nogaya tonovidi, kebu tamu

✨ 1:16: 2 Tim 3:5; 1 Ion 1:6, 2:4

✨ 2:3-4: Efe 5:22

✨ 2:7: 1 Fit 5:3

✨ 2:8:

1 Fit 2:15

aitoi 'ana fata i na 'amalakibuyemu, we'e 'amu gaviavo i na bunumayaga fai tomotoga i na 'asetadi i vevevita-maimaigida.

*Ve tofolova faifaidi.*

9-10 ✧ We'e tofolova-maimaiga i vetumaganaga i lubwainedi 'adi toveimeavo i na vevevatayakeyakedi wata yadi folova matatabuna 'waidiega i na kiavesosoanidi. Ava'ai i na vonediga kebu i na awaveugadiga wata kebu 'waidie i na vainago. Mogitana i lubwainedi yadi sauluva matatabuna 'waidiega tomotoga i na 'asetadi taunidi tomotoga 'atumaidi ma 'adi vetumagana wata todumwebika, nika 'wainega tomotoga venina Yaubada 'ada To'ita'ita'i faifaina i na awave'atumaieni.

*Iesu i yavuda bega ta na vevesauluva 'atumaina.*

11 I lubwaineda matatabuda yada sauluva i na ve'atumai fai Yaubada yana 'anivelena-maimaiga i sivemageseni 'waideye, nuakalikalina 'ita'ita'i miamia-vagaina tomotoga matatabuda faifaida. 12 ✧ Nuakalikalina i veda, Yaubada nuanuana bunu 'ana nuanua wata fwayafwaya 'ana nuanua sakoidi ta na bailedi, bega tutuyanina ta na miamia fwayefwayeye yada sauluva ta na 'i'isave'avinidi wata yada mia matatabuna tonovidi Yaubada yana nuanua bani'odi. 13 ✧ Mogitana yada sauluva i na tonova fai ta lulukamata ta nuani mogitana tamu 'aiata 'eba sosoana bwaikina i na souyeni 'waideye. 'Aiatanina 'waineye Yaubada Bwaikina, taunina 'asa'aiana 'ada To'ita'ita'i Iesu Keliso, ma yana 'ai'aiwabu mataududulina i na le'wa. 14 ✧ Taunina i tauyeni faifaida, yana wafa 'wainega i yavuda sakona matatabuna 'waidiega wata i 'ivevunavunagida bega 'ida taunina yana tomotoga mogitana, ma yada sosoana nuanuada nani 'atumai'avadi ta na 'i'idewadi.

15 ✧ Naninidi a veifufuyediga, nuanuaku faifaidi 'u na veve. Yamu veimea toketokena 'wainega tovetumaganavo 'u na kiavefa'alidi wata 'u na kiavesosoanidi, we'e tove-mata'wana'wana 'u na toke 'u na vonedi. Taunimu 'u na 'i'isave'avinimu nika kebu tamu aitoi i na awaobuobuyemu.

### 3

*Tovetumagana 'ada awave'eda'eda.*

1 ✧ Wata nuanuaku tovetumaganavo 'u na vonevonedidi bega kebu nuadi i na fani, i lubwainedi toveimea wata gabemani

bonadi i na noganogaidi, i na vematayakeyakedi wata folovanidi 'atumaidi 'waidie i na tauyedi. <sup>2</sup> ✨U na vonedi kebu tamu aitoi i na vebonaivoyeniga we'e mogitana yadi sauluva i na bika wata i na veveiana, tomotoga matatabudi matadie ma yadi nuaobu.

<sup>3</sup> ✨Basenadi kebu ta da vetumaganaga 'ida wata bani'odi nua'avada, tovemata'wana'wana wata tosakona. Bunu 'ana nuanua sakoidi wata sosoana-'avo'avovo nuada i 'ewadi 'wa da vo i da yogonida. Tutuya matatabuna ta to-tolive'eda nuanuada tomotoga vita i na veveluagadi, ta veve'unumagigi, 'ifwaidi tomotoga i veve'eduogaogaleda we'e 'ida ta vedumwe'ai'aiedi. <sup>4</sup> ✨Siwe tutuyanina Yaubada 'ada To'ita'ita'i yana nuakalikali wata yana 'anivelena i souyeni Iesu 'wainega, i 'ita'ita'ieda. <sup>5</sup> Ita'ita'inina ta velu-agaiga, kebu yada folova 'atumaidi ta 'idewadiga 'waidiega, siwe fai i 'isanuakalikaliieda. Yada sakona i lekoa-yavuledi bega ta tubuve'ivau, we'e 'Anu'anunu 'Atumaina 'wainega mia 'ivauna wata 'atumaina ta veluagai.

<sup>6-7</sup> ✨Fai Keliso i 'ita'ita'ieda Yaubada 'Anu'anununina i tauyaotogeni i ageda mogitana bega Keliso yana nuakalikali 'wainega yada sauluva i tonova Yaubada mataneyeye. Wata yana nuakalikalinina 'wainega mia 'atumaina wata miamia-vagaina ta na veluagai, naninina faifaina ma yada vetumaganaga ta lulukamata. <sup>8</sup> Vonanidi, vona mogitana.

Nuanuaku naninidi a veifufuyediga 'u na toke 'u na vonedi bega egavo i vetumaganaga Yaubada 'waineyeye yadi nuanua i na tauyedi tutuya fuedi folova 'atumaidi i na 'idewadi. Naninidi 'atumaidi, wata tomotoga matatabuda 'ada 'aivaita.

<sup>9</sup> Tomotoga fuedi i veveifufu nani-'avo'avovo faifaidi, i nuanua tubulelelegidi 'adi 'aseta faifaidi, i veve'ikwayekwayega, wata ve'etobodanidi i mai Mosese 'wainega, 'adi vematayakayaka faifaidi i veve'alamagi'ai. Ve'ikwayekwayeganidi kebu 'ada 'eba 'aivaitaga, 'waidiega vita i sousouyedi bega 'omu 'u na kekesedi. <sup>10</sup> ✨Ai'edi aitoi yana vona 'wainega tovetumaganavo i na ve'ikwayekwayega bega ve'idi'idi i na souyeniga, tutuya 'ailuga 'u na talabodeni, 'ai'edi kebu i na 'ailovega 'u na bailenimo. <sup>11</sup> ✨U na bailenimoga fai tomotoganidi bani'odi, nuadi 'oka'okadi, yadi sakona 'waidiega ta na 'asetadi taunidi tovekali.

*Faulo yana vona 'ana 'eba ve'a'ava.*

<sup>12</sup> ✨Sai'afoga Atimasi 'alo Tikiasa a na vetunei i na wai, i na le'waga 'omu 'u na vewavawava 'u na mai Nikofoli fai a nuanua nuanuaku kaukau 'ana tutuye a na wai bei ta na

✨ 3:2: 2 Tim 2:23-25 ✨ 3:3: Efe 5:8-9 ✨ 3:4: Ion 3:5-7 ✨ 3:6-7: Mad 25:34

✨ 3:10: Mad 18:15-17 ✨ 3:11: 1 Tim 6:3-5 ✨ 3:12: Efe 6:21-22



miamia. <sup>13</sup> ✧ Wata 'u na vewavawava Sinasi taunina veimea 'adi to'asete wata Afolosa 'u na 'ivaisedi bega i na tauya yadi nago faifaina. 'Ai'edi i na 'usa nani 'ifwaidi 'waidiega, tovetumaganavo 'u na vonedi i na 'ivaisedi. <sup>14</sup> ✧ I lubwainedi yada tomotoga i na vewavawava tutuya fueidi i na folofolova 'atumaina bega 'ai'edi taunidi 'alo tomotoga 'ifwaidi i na 'usaga, i na 'i'ivaisedi. Nuanuaku yadi mia ma vuagina.

<sup>15</sup> Tomotoganidi taiadi 'a miamianiga, matatabudi i vekaiwa 'waimuye. Yama vekaiwa 'u na lu'ivona edavo tovetumaganavo 'waidie.

A vevelu'ui faifaimi, nuanuaku Yaubada ma yana nuakalikali i na vevesauluva 'atumaina matatabumi 'waimie.

'Asa'aiana bani'odi,  
Yau Faulo.

## FILIMONI

### Faulo yana kiluma Filimoni 'waineye.

Filimoni tomogo 'ai'aiwabuna, wata taunina tovetumagana 'awalawa Kolose 'waineye. Filimoninina tamu tomogo i 'ewai yana tofolova-maimaiga 'ana wagava Onesimo mulieta i dega 'ana toveimeanina 'wainega. I dega i nunagoga Faulo i veluagai tutuyanina i miamia vanuga 'eba yogona 'waineye. Faulo yana veifufu 'wainega Onesimo i nuavilai Iesu Keliso 'waineye.

Faulo wata Onesimo taiadi i miamia nuanuana Onesimo i na vevilai bega de'e letanina i kilumi Filimoni faifaina. Letanina nageneye Faulo Filimoni i vonevoneni nuanuana Onesimo i na lu'uma'umaieni ma yana sosoana. I na lu'uma'umaieniga kebu yana tofolova-maimaiga faifaina siwe fai ma fuedie i vetumagana Iesu Keliso 'waineye faifaina. De'e letanina 'ana 'idi side bani'odi.

Faulo yana vekaiwa Filimoni 'waineye. 1:1-3

Faulo i vekaiwa Yaubada 'waineye Filimoni faifaina. 1:4-7

Faulo nuanuana Filimoni Onesimo i na sosoaneni. 1:8-22

Faulo yana 'alanuai. 1:23-25

<sup>1</sup> Yau Faulo iada Timoti taiadi, 'a vevekaiwa iama Filimoni 'waimuye. 'Omu wata 'ima ma fueda ta lulu'ivona Iesu Keliso Valana 'Atumaina faifaina, begaidi yau i yatoku a miamia vanuga 'eba yogona 'waineye. <sup>2</sup> Wata yama vekaiwa i viwai Iesu 'ana tovetumaganavo 'waidie, kumanidiavo taiadi 'wa mimiava'auta yamu vanuge, Afia kumanidi 'a awave-novunediga wata Akifasi. Taunina ma fueda ta vetolugavia Iesu Keliso faifaina. <sup>3</sup> 'A vevelu'ui faifaimi, nuanuaku Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie wata nuanua bikana mia 'atumaina taiadi i na vevelele mi.

*Filimoni yana nuakalikali wata yana vetumagana faifaidi.*

<sup>4-5</sup> ✧Valamu a nogai 'u vevetumagana 'ada Toveimea Iesu 'waineye wata Yaubada yana tomotoga 'u nunuakalikali edi, begaidi tutuyanina a vevelu'ui Yaubada 'waineye a nuanuanimu wata a vevekaiwa 'waineye faifaimu. <sup>6</sup> ✧A vevelu'ui faifaimu, nuanuaku Yaubada yana 'aivaita 'wainega tutuya fuedi yamu vetumagana Iesu Keliso 'waineye 'u na lulu'ivona tomotoga 'waidie, bega naninidi 'atumaidi ta veveluagadiga fai 'ida Keliso yana tomotoga, 'u na 'asetat'atumaidi. <sup>7</sup> Iaku, 'eba sosoana bwaikina wata 'eba 'aivaita mogitana 'waikuye fai 'u nunuakalikali bwaikina, we'e yamu

veifufu 'waidiega Yaubada yana tomotoga 'u kiavefa'alidi wata 'u kiavesosoanidi.

*Faulo yana velu'ase'ase Onesimo faifaina.*

8-9 Yaubada yana tomotoga 'u nunuakalikaliwediga begaidi a na vonemu. Yau Faulo, Iesu Keliso faifaina a vetomata'aulele a lulu'ivoneyeni vanuga 'eba yogona 'waineye i yatoku a miamia, ma yaku veimea Keliso 'wainega bega 'aku fata a da lukakademu yaku nuanua 'u da 'idewai, siwe fai 'omu iaku, nuakalikaliiega a na vonemumo bega ava'ai saulu-vaga 'atumaina, nuanuaku 'u na 'idewai. <sup>10</sup> ✧Nuanuaku a na vonemu Onesimo faifaina, de'e bei vanuga 'eba yogona 'waineye a miamia yaku veifufu 'wainega i vetumagana Keliso 'waineye bega a awave-natuna 'waineye. <sup>11</sup> Basenadi Onesimo yamu tofolova-maimaiga, 'omu 'aisemu 'u veimea-'ea'ea 'waineye, yana folova kebu 'atumainaga i dega 'waimuyega. I maiga a veluagai bega tutuya de'e tomogo 'atumaina 'waideye, 'omu wata yau 'ada to'aivaita.

<sup>12-13</sup> A nuakalikalieni bwaikina igodi a da ve'o'oleni. Yau a miamia vanuga 'eba yogona 'waineye fai Iesu Valana 'Atumaina a lalau'age, we'e Onesimo tutulimu i da 'i'ivaiseku, siwe 'omu yamu tofolova bega a voneni i na vilai i na wai. <sup>14</sup> ✧'Ai'edi 'u na vo, Onesimo a na vevilai i na nago Faulo i na 'i'ivaiseni," 'atumaina, siwe kebu a na lukakademuga, 'ai'edi nuanuamu taunimu yamu nuanuayega 'u na vetunei. 'Ai'edi kebu, 'asa'aiana.

<sup>15</sup> I 'iawemuga voke tutuya 'ale'usana faifaina, bega tutuya de'e taiadi 'wa na mia-vagata. <sup>16</sup> Mogitana yamu tofolova, siwe 'asiau kebu tofolova 'aisena, taunina tamu tomogo, fai ma fueda ta vetumagana Keliso 'waineye bega ta na awave-taineni. Yau a nuakalikalieniga, 'omu wata bani'odi 'u na nuakalikalieni bwaikina fai ma fuemie 'ada Toveimea Iesu yana tomotoga bega i na 'i'ivaisemu yamu folova 'waidie.

<sup>17</sup> 'Ai'edi 'omu 'aku 'au taiadi ta folofolova Iesu faifaina, 'u na nuanina bega Onesimo i na waiga 'waimuye ma yamu sosoana 'u na lu'uma'umaieni 'wa da vo yau a da le'wa 'waimuye 'u da lu'uma'umaieku. <sup>18</sup> We'e 'ai'edi tamu ava'ai sakoina basenadi i 'idewaiga 'waimuye, 'alo tamu nani i 'ewa-maimaigi 'u na voneku a na tutuli. <sup>19</sup> ✧Yau Faulo, de'e a kilukiluma nimakuyega, 'u na 'isa'inanai 'u na 'asetai mogitana yau, bega a vona'awaufaufa 'waimuye 'ai'edi ava'ai Onesimo i 'ewa-maimaigiga 'waimuyega, matatabuna yau a na tutulidi. Siwe 'u na nuani basenadi yaku vona 'wainega 'u vetumagana Keliso 'waineye mia 'atumaina wata miamia-vagaina 'u veluagai, 'ako 'u da vo, A na tutuli," kebu 'amu

fataga. <sup>20</sup> Begaidi nuanuaku 'u na vesauluva 'atumaina 'waikuye 'ada Toveimea Iesu faifaina. 'Omu bani'odi taiku fai ta vetumagana Keliso 'waineye bega 'ai'edi yaku nuanuananina 'u na 'idewaiga, 'u na kiavesosoaniku. <sup>21</sup> A 'asetai mogitana 'ai'edi ava'ai nuanuaku faifaina a na kiluma 'waimuye 'ana fata 'u na 'idewai, siwe kebu naninina 'aisena, nani 'ifwaidi wata 'atumaidi taiadi.

<sup>22</sup> ✧ Wata tamu yaku nuanua, nuanuaku yamu vanuge yaku 'eba 'eno 'u na 'idewai, fai a nuani mogitana yami velu'ui 'waidiega Yaubada bonami i na nogai bega i na 'etoyavuku vanuga 'eba yogona 'wainega a na wai.

*'Alanuai.*

<sup>23</sup> ✧ Efafila, taunina wata Iesu Keliso faifaina i lulu'ivona bega ma fuemeye 'a miamia vanuga 'eba yogona 'waineye, yana vekaiwa i vetunei 'waimie. <sup>24</sup> ✧ Wata 'ifwaidi tomotoga yadi vekaiwa 'waimie, taunidi 'aku to'aivaita taiadi 'a folofova, Malika, Alisitako, Dimasi wata Luke.

<sup>25</sup> A vevelu'ui faifaimi, nuanuaku 'ada Toveimea Iesu Keliso ma yana nuakalikali i na vevesauluva 'atumaina 'waimie. 'Asa'aiana bani'odi,  
Yau Faulo.

## IBELIU

### Leta de'e me Ibeliu faifaidi.

De'e letanina me Diu faifaidi kumanidiavo i vetumaganaga Iesu Keliso 'waineye. Bonadi 'ana wagava Ibeliu begaidi ta golegoledi ta vo, Me Ibeliu.” We'e de'e letanina 'ana tokiluma kebu ta da 'asetaigna aitoi i kilumi.

Fai me Ibeliu tovetumagana vita i veveluagadi Iesu 'ana tovedumwe'ai'ai 'waidiega nuanuadi i na viladi yadi tafalolo tuatuaina 'waineye. Begaidi de'e leta 'ana tokiluma i ve 'waidie i lubwainedi yadi tafalolo tuatuaina 'adi 'eda'eda i na bailedi, Iesu 'aiseotogina 'wainega i na ve'atumai Yaubada mataneye. Iesu taunina Yaubada Natuna bwaikaotogina we'e anelose, Yaubada yana tolu'ivonavo wata Mosese sai'afo. Wata i ve 'waidie tomotoga kebu 'adi fata i na ve'atumai Yaubada mataneye ve'etoboda 'adi vematayakayaka 'waidiega 'alo velomu tulina tulina 'waidiega. Iesu 'aiseotogina 'wainega Yaubada yada sakona i na 'u'umidi. Fai taunina yada Tovelomu Bwaikina faifaida i mia-vagata Yaubada 'ana 'atagiega, i lubwaineda yada sauluva tuatuaiddi ta na bailedi, yada vetumagana ta na yato-vagasedi Iesu 'waineye. De'e letanina 'ana 'idi side bani'odi.

Yaubada taunina i sivemageseni 'waideye Natuna 'wainega. 1:1-4

Keliso Yaubada yana anelose i vebwaika-'iawedi. 1:5-2:18

Keliso Mosese wata Iosua i vebwaika-'iawedi. 3:1-4:13

Keliso tovelomu i vebwaika-'iawedi. 4:14-7:28

Veakutagona 'Ivauna Keliso 'wainega Veakutagona Nagami i vebwaika-'iaweni. 8:1-9:28

Keliso dayagina 'aisaya dayagidi i vebwaika-'iawedi, 'eba velomunina 'ana fata yada sakona i na 'u'umidi. 10:1-39

Vetumagana 'aiseotogina 'wainega ta na ve'atumai. 11:1-40

Ma yada tokemaiga ta na vetumagana Keliso 'waineye wata ta na vematayakeyakeni. 12:1-13:19

Leta 'ana tokiluma yana 'alanuai. 13:20-25

*Yaubada yana nuanua 'waideye, 'ana tosivemageta Iesu.*

<sup>1</sup> Basenadiotoga Yaubada yana nuanua i veve tubudavo me Diu 'waidie. Tutuya fuedi 'eda'eda tulina tulina 'waidiega yana nuanua i sivemagesedi yana tolu'ivonavo 'waidie mulieta i lu'ivona tubudavo 'waidie. <sup>2</sup> \*Basenadi de'e bani'odi i veifufuyedi siwe 'asiau bega i na nagoga tutuya 'ana 'eba ve'a'ava 'waineye i veifufu 'waideye Natuna 'wainega. Natunanina 'wainega nani matatabuna i 'idewadi abame

wata fwayefwayeye, wata i venua'ivineni bega naninidi i 'idewadiga i na veveimeyedi. <sup>3</sup> ✨Yaubada yana 'ai'aiwabu mataududulina 'anununa 'ada fata ta na 'iseni Natuna 'wainega. Natunanina Yaubada i sala-'afo'afoi wata yana vona toketokena 'wainega nani matatabuna i kikiavefa'alidi wata i 'i'isave'avinidi. We'e yana wafa 'wainega tomotoga yada sakona i lekoa'a'avadi mulieta ma yana veimea i miabui abame, Yaubada Toketokeotogina 'ana 'atagiega. <sup>4</sup> ✨Ma yana veimea i miabui bega taunina bwaikaotogina we'e anelose sai'afo. We'e 'ana 'eba 'ainana Yaubada Natuna, wagavanina bwaikaotogina kebu anelose 'adi wagava bani'odi.

*Yaubada Natuna bwaikaotogina kebu anelose bani'odi.*

<sup>5</sup> ✨Vona mogitana ta 'asetai Yaubada Natuna bwaikaotogina fai basenadiotoga i kilumi Yaubada yana Buki 'waineye faifaina. Yaubada i vona Natuna 'waineye i vo,

'Omu Natuku,

'Asiau fai yau Tamamu veimea a velemu.”

We'e kebu tamu tutuya de'e bani'odi i da voneyedi anelose 'waidie. Wata tamu tutuya Yaubada i vona Natuna faifaina i vo,

Yau Tamana,

We'e taunina Natuku.”

<sup>6</sup> ✨Yaubada Natuna kumanina nani matatabuna 'adi to'edakumeta, sai'afoga i na vetunei i na mai fwayefwayeye, faifaina i vona i vo,

Yaku anelose matatabudi, i lubwainedi ma yadi subia i na 'odu'odu 'waineye.”

<sup>7</sup> ✨Ta 'asetai anelose tomotoga bwaikidi fai Yaubada i vona faifaidi i vo,

Yaku anelose a 'idewadi, yadi lilide kaukau bani'odi,

Taunidi yaku tofolovavo 'ai-'ala'alata bani'odi.”

<sup>8</sup> ✨We'e Natuna fai bwaikaotogina bega faifaina i vo,

'Omu Yaubada, yamu 'Eba Veimea kebu 'ana 'eba ve'a'avaga i na 'eno-vagata.

'U veveimea, veimea tonovidi 'waidiega.

<sup>9</sup> Sauluva tonovidi nuanuamu bwaikina, we'e sakona 'u vedumwe'ai'aieni.

Begaidi yau yamu Yaubada a venua'ivinemu a silakaimu, wata veimea bwaikina a velemu, 'amu kiavesosoana.

We'e emwavo 'adi ve'ililibu sai'afo.”

<sup>10</sup> ✨Wata Yaubada i vona Natuna 'waineye i vo,

'Omu Toveimea, 'eba velamu 'waineye fwayafwaya 'u 'idewai,

✨ **1:3:** 2 Kol 4:4; Kolos 1:15; Ibu 8:1-2 ✨ **1:4:** Fil 2:9 ✨ **1:5:** Same 2:7; Ibu 5:5

✨ **1:6:** Luk 2:13-14 ✨ **1:7:** Same 104:4 ✨ **1:8:** Same 45:6-7 ✨ **1:10:** Same

Wata nimamuyega nani matatabuna abame i souyedi.

<sup>11-12</sup> Naninidi 'a'a'avididi i na savovola, we'e 'omu 'u na mia-vagata.

I na venani-'avo'avovo kaleko tuatuaina bani'odi.

Tomotoga kaleko tuatuaina i na sakoga i na nunumi i na taweni, ma'itufa 'ivauna i na 'ewai.

Wata bani'odi fwayafwaya abama taiadi 'u na nunumidi we'e 'ivaudi i na souyedi.

We'e 'omu, 'asa'aiana 'amu 'isa'isanina, kebu 'u na vetuat-uaiga.”

<sup>13</sup>☆Wata tamu tutuya Yaubada i vona Natuna 'waineye i vo,

Veimea a velemuga bega 'u na miabui 'aku 'atagiega,

I na nagoga 'amu gaviavo a na leodi bega 'u na veveimeyedi.”

We'e kebu tamu tutuya de'e bani'odi i da voneyedi anelose 'waidie. <sup>14</sup>☆Vetuma anelose egavo? Taunidi 'anu'anunu, Yaubada yana tofolovavo i vevetunedi bega egavo 'ita'ita'i i na veluagaiga i 'i'ivaisedi.

## 2

*'Ada 'ita'ita'i kebu ta na baileniga.*

<sup>1</sup>Fai Yaubada i veifufu 'waideye Natuna 'wainega, 'ida yana vona ta nogaidiga i lubwaineda ta na nunuave'avinidi. We'e 'ai'edi kebu, yana vonanidi ta na baibaileidi bani'odi malolo ma'inuana waka i bewebeweni. <sup>2</sup>☆Basenadiotoga Yaubada yana veimea i 'anivelenedi Mosese 'waineye anelose 'waidiega, we'e tomotoga fuedi i 'asetai veimeanidi vona mogitana. Egavo i geugeudi kebu i da vematayakeyakediga vematavuloga i veluagai 'adi laubwaina. <sup>3</sup>Tutuya de'e 'ada Toveimea Iesu tauniotogina 'ita'ita'i 'ana 'eda'eda i lu'ivona tomotoga 'waidie. Tomotoga 'ifwaidi yana lu'ivonanina i nogai mulieta faifaina i ve 'waideye, bega ta 'asetai vona mogitana. 'Ita'ita'inina Iesu 'wainega nani bwaikaotogina begaidi 'ai'edi ta na baileniga kebu 'ada fata 'ada vematavuloga ta na degeni. <sup>4</sup>☆Tomotoganidi Iesu yana vona i nogaiga i lulu'ivona, wata yadi lu'ivonanina Yaubada i awavemogitaneni fai toketokena i veledi bega 'adi fata 'eba nuavogana wata 'eba nua'ewa tulina tulina, wata 'eba 'isa toketokedi i na 'i'idewadi. Wata bani'odi yana nuanuayega nuakalikali tulina tulina 'Anu'anunu 'Atumaina 'wainega i veutada. Nuakalikalinidi 'ida tovetumaganavo 'ada 'eba 'aivaita.

*Iesu nani matatabuna 'adi Toveimea.*

<sup>5</sup> Yaubada anelose kebu i da tauyedi bega i na vetoveimea fwayafwaya 'ivauna 'awaie i na souyeniga 'waineye. A vonavona tutuya mulina faifaina. <sup>6</sup> ✧Vona mogitana kebu anelose i da tauyediga we'e basenadiotoga tamu aitoi i kiluma Yaubada yana Buki 'waineye i vo,

Yaubada, 'ima tomia fwayafwaya nani-'avo'avovo, siwe 'u nuanuana.

'Ima tomotogaotoga siwe 'u 'i'isave'avinima.

<sup>7-8</sup> ✧Mogitana 'ima nani-'avo'avovo siwe 'u silakaima bega 'ima sai'afo nani bwaikina, we'e anelose bwaikidi.

'U silakaima kini bani'odi, 'ai'aiwabu 'u velema, ma 'ama ve'ililibu,

Wata 'u tauyema nani matatabuna 'a veveimeyedi.”

I vonaga Yaubada tomotoga i tauyedi nani matatabuna i veveimeyedi bega ta 'asetai kebu tamu nani i da ve'o'oleni. Siwe tutuya de'e kebu ta da 'iseni tomotoga nani matatabuna i da veveimeyediga. <sup>9</sup> ✧We'e mogitana tamu tomotoga ta 'iseni, taunina Iesu, nani matatabuna 'akonadi i veveimeyedi. Nagami bwaikaotogina, mulieta tutuya 'ale'usana faifaina Yaubada i kiaobuyeni bega i obuma mag'itufa anelose i kumeta. I obumaga Yaubada yana nuakalikali kebu nuana i da loloiga bega i wafa tomotoga matatabuda faifaيدا. Fai wafa 'ana veviga sakoina i veluagai faifaيدا, Yaubada i silakai i ve-Kini, 'ai'aiwabu magemagetana wata ve'ililibu i veleni bega 'asiau ta 'iseni nani matatabuna i veveimeyedi.

### *Tatada Iesu 'ana fata i na 'ivaiseda.*

<sup>10</sup> ✧Fai Yaubada nuanuana, bega nani matatabuna i 'idewadiga i 'i'isave'avinidi, wata nuanuana tomotoga fuedi 'ita'ita'i i na veluagai i na luku yana mageta mataududulina 'waineye. Bega Iesu i vetuneiga i lubwaineni, yana veviga wata yana wafa 'waidiega Yaubada Iesu yana veimea i 'imoso'ieni, bega taunina 'ada To'edakumeta 'atumai'avana, 'ana fataotoga i na 'ita'ita'ieda bega 'ida Yaubada natunavo. <sup>11</sup> ✧Iesu 'ida tomotoga i 'ive'atumaida Yaubada mataneyeye, bega 'ida wata taunina 'ada To'ive'atumai, ma fueda Tamada 'aitamogana. Avinodi taunina Yaubada Natuna bwaikaotogina siwe kebu i da bunumayageda fai i 'ive'atumaida i veve'awa-taikwavo 'waideye. <sup>12</sup> ✧Kebu i da bunumayagedaga begaidi Yaubada yana Buki 'waineye i vo,

Yaubada, faifaimu a na veifufu taikwavo 'waidie, Tutuyanina i na vava'autaga, matadie a na lei-subisubia 'waimuye.”

✧ 2:6: Same 8:4-6 ✧ 2:7-8: 1 Kol 15:24-26 ✧ 2:9: Fil 2:8-9 ✧ 2:10: Ibu 5:8-9 ✧ 2:11: Mak 3:35 ✧ 2:12: Same 22:22



13 ✨Wata i vo,

Yaku vetumagana a na yatoi Yaubada 'waineye.”

Wata tamu tutuya Iesu i vo,

Yau de'e, Yaubada natunavo taiadi, kumanidiavo i veleku.”

14 ✨Yaubada natunavonidi vigo wata dayaga 'waidiega ta tubuga begaidi wata Iesu i tubuga i vetomotogaotoga 'ida bani'odi. I vetomotogaotogaga bega 'ana fata i na wafa tomotoga faifaida. Yana wafanina 'wainega Seitani, taunina wafa 'ana toveimea, yana toketokena i venani-'avo'avovo. 15 Tomotoga fuedi yadi mia matatabuna 'waidie i kololo wafa faifaina, 'wa da vo yadi kololonina i da yogonidi, siwe Iesu i wafa wata i tovoi-vaitugana bega i yavudi kololonina 'wainega. 16 'Akonadi ta 'asetai Iesu kebu i da ve-anelose bega anelose i da 'ivaisedi, i vetomotogaotoga bega 'ida Ebelamo tubunavo i 'ivaiseda. 17 ✨Yaubada nuanuana i na 'ivaiseda bega Iesu i saladana nani matatabuna 'waidie i lubwaineni. Fai yana mia 'ida tainavo bani'odi, i veto-folova Yaubada 'waineye taunina yada Tovelomu Bwaikina, i 'i'isanuakalikaliada bega 'ada fata ta na vetumagana 'waineye kebu i na baileda. Yana folovanina 'wainega tomotoga yada sakona Yaubada i nuatavunidi wata yana nuasako 'waideye i ve'a'avadi. 18 Tutuyanina i miamia fwayefwayeye vita i veluagadi wata Seitani i silubuya nuanuana i na sakona siwe kebu i da be'uga, begaidi 'asiau 'ida vetalaimimila ta na veluagadiga, 'ana fata i na 'ivaiseda.

### 3

*Mosese sai'afo, we'e Iesu bwaikaotogina.*

1 ✨Ekwavo, 'omi wata Yaubada i venua'ivinemiga yami sauluva 'atumai'avadi mataneye bega 'ami fata 'wa na luku abame. Mogitana Iesu 'ana fata i na 'i'ivaiseda begaidi i lubwaineda ta na nunua'ivina faifaina. Yaubada i vetunei i mai i vetovelomu bwaikina faifaida yada sakona i 'u'umidi bega tutuya fuedi faifaina ta lulu'ivona. 2 ✨Tutuyanina i miamia fwayefwayeye ma yana dumwebika i folova Yaubada faifaina, kumanina i venua'ivineni i vetovelomu bwaikina. Basenadi wata bani'odi Mosese ma yana dumwebika i folova Yaubada yana 'aila'a 'waidie, 'wa da vo yana vanuga matatabuna nageneye i da folova. 3 Iesu yana folovanina faifaina Yaubada i silakai 'ai'aiwabu bwaikina i veleni we'e Mosese sai'afo, bani'odi to'aiyogona vanuga, taunina ta subisubiai we'e vanuga sai'afo. 4 Vanuga 'aitamogana 'aitamogana kebu taunidi i da tovoi, tomotoga i yogonidi. We'e Yaubada nani matatabuna 'adi to'idewadewa. 5 Mosese

taunina Yaubada yana tofolova, i dumwebika Yaubada yana vanuga matatabuna nageneye, wata ava'ai Yaubada i sivemagesediga tolu'ivonavo wata Keliso 'waidiega, faifaidi nagami i vona-vagata. <sup>6</sup> ✱We'e Keliso kebu tofolova, taunina Yaubada Natuna ma yana dumwebika Yaubada yana vanuga i veveimeyeni. 'Ida tovetumaganavo 'asa'aiana yana vanuganina. 'Ai'edi ma yada venuafoufa'ala ta na tokemaigeda Iesu faifaina, wata ma yada vetumagana ta na lulukamata naninidi Yaubada i vona'awaufaufa i na veledaga, mogitana 'ida Yaubada yana vanuga.

*Me Isileli Yaubada yana nuanua i vedumwe'ai'aieniga kebu ta na salad.*

<sup>7-9</sup> ✱Ma yada venuafoufa'ala ta na tokemaigedaga fai Yaubada yana Buki nageneye 'Anu'anunu 'Atumaina i vonevonedana i vo,

'Ai'edi 'asiau Yaubada yana vona 'wa na nogaiga, Kebu tanigami 'wa na 'ibodadi, 'wa na nogai 'wa na tononi. Tubumiavo kebu 'wa na salad.

Basenadi i yabayaba sali'avu'avuyeye tanigadi i 'ibodadi wata yau yadi Yaubada i vedumwe'ai'aieku.

Bei sali'avu'avuyeye malamala 40 nagedie 'eba 'isa toketokedi a 'lidewadi matadie i lubwainedi i da vematayakeyakeku, siwe yaku tokemaiga i silubuya yadi sauluva sakoidi 'waidiega,

<sup>10</sup> Fai i vedumwe'ai'aieku a nuasako 'waidie a vo,

Tutuya fuedi yadi nuanua tulidiamo i nunago, yau kebu nuanuadi."

<sup>11</sup> ✱Begaiddi ma yaku nuasako a vona'awaufaufa a vo, Kebu tamu sai'afo i na luku 'awalawanina a tauyeniga 'waineye bega i na veawai 'waikuye."

<sup>12</sup> Ekwavo, basenadiotoga tubumiavonidi tanigadi i 'ibodadi kebu i da luku mia 'atumaina 'waineye, we'e 'omi taunimi 'wa na 'i'isave'avinimi bega kebu nuanua sakoidi nuamie yami vetumagana i na 'ivesakodi i na nunago Yaubada Miamia-vagaina 'wa na vedumwe'ubu'ubuseni.

<sup>13</sup> Taunina tutuya i tauyeni tomotoga 'waideye bega bonana ta na nogai ta na vematayakeyakeni, begaiddi 'awasaanina i tauyeniga 'waideye 'aiata 'aitamogana 'aitamogana ma emiavo 'wa na ve'ivaivaita, 'wainega yami vetumagana i na vetoketoke. 'Ai'edi kebu, voke sakona nuami i na 'ewadi i na vekaliemi bola matami wata tanigami i na 'ive'uludi kebu bonana 'wa na nogai. <sup>14</sup> ✱Tutuyanina ta velamu taunida ta tauyeda Iesu 'waineye yada vetumagana toketokena, bega 'ai'edi ta na tokemaigedaga yada vetumagananina kebu i na

✱ 3:6: Ibu 3:14, 10:23 ✱ 3:7-9: Same 95:7-11; Sou 17:7; Num 20:2-5 ✱ 3:11: Num 14:21-23 ✱ 3:14: Ibu 3:6

mwea i na nagoga 'eba ve'a'ava 'waineye, nika naninidi 'atumaidi i 'eno'enovi Keliso 'waineye ta na veluagadi.  
 15 \*Ava'ai 'akonadi a voneyeniga 'wa na nuani a vo,  
 'Ai'edi 'asiau Yaubada yana vona 'wa na nogaiga,  
 Kebu tanigami 'wa na 'ibodadi, 'wa na nogai 'wa na tononi.  
 Tubumiavo kebu 'wa na saladai fai basenadi i yabayaba  
 sali'avu'avuye tanigadi i 'ibodadi wata yau yadi Yaubada i  
 vedumwe'ai'aieku.”

16 \*Egavo Yaubada yana vona i nogai i vedumwe'ai'aieni?  
 Tomotoganidi Mosese i 'edakumesedi 'awalawa Itifita  
 'wainega. 17 We'e malamala 40 nagedie, egavo 'waidie  
 Yaubada i nuasako? Tomotoganidi i sakona sali'avu'avuye  
 bega bei i ve'alawafawafa. 18 Tutuyanina Yaubada  
 i vona'awaufaufa i vo, Kebu tamu sai'afo i na luku  
 'awalawanina a tauyeniga 'waineye bega i na veawai  
 'waikuye,” egavo faifaidi i vonavona? 'Asa'aiana  
 tomotoganidi taunidi tovemata'wana'wana. 19 Bega ta 'asetai  
 kebu 'adi fata i na luku mia 'atumaina 'waineye fai kebu  
 mogitana ma yadi vetumagana taunidi i da tauyedi Yaubada  
 'waineye.

## 4

*Ta na vematayakayaka bega ta na veawai Yaubada yana  
 'eba mia 'waineye.*

1 Basenadiotoga Yaubada i vona'awaufaufa i vo, 'Ami fata  
 'wa na luku yaku 'eba mia 'waineye bei ta na veawai.” 'Eba  
 veawainina Yaubada i 'idewaiga tubudavo faifaidi, siwe kebu  
 'waineye i da luku. We'e yana vona'awaufaufanina veawai  
 faifaina bola i 'eno'eno, begaidi ma yada kololo taunida ta  
 na 'i'isave'avinida i na nunago tamu 'waimiega Yaubada i na  
 voneni i na vo, Kebu 'amu fata 'u na luku 'eba veawainina  
 'waineye.” 2 'Ida 'akonadi Valanina 'Atumaina ta nogai,  
 bani'odi basenadi tomotoganidi Mosese yana tutuye i nogai  
 siwe kebu i da 'ivaisedi fai nogaya'ava kebu i da vetuma-  
 ganeni. 3 \*We'e 'ida ta vetumagana Iesu 'waineye 'ada fata ta  
 na luku Yaubada taiadi ta na veawai. Yana Vona yana Buki  
 nageneye i 'eno'eno tomotoganidi kebu i da vetumaganaga  
 faifaidi i vo,

Ma yaku nuasako a vona'awaufaufa a vo,

Kebu tamu sai'afo i na luku 'awalawanina a tauyeniga  
 'waineye bega i na veawai 'waikuye.”

Bani'odi i vona tobailanidi faifaidi siwe fwayafwaya 'ana  
 'idewavau 'waineye yana folova i ve'a'avaina i lulukamata  
 nuanuana yana tomotoga taiadi i na veawai. 4 \*Ta 'asetai

i veveawai bega i lulukamata fai yana Buki nageneye tamu vona 'Aiata Veawai faifaina i vo,

Yaubada nani matatabuna i 'idewadi 'aiata 6 nagedie,  
'Ana ve-7 'wayneye i veawai.”

<sup>5</sup> Mogitana i vona veawai faifaina siwe mulieta wata i vona tomotoganidi i bailaga faifaidi i vo,

Kebu tamu sai'afo i na luku 'awalawanina a tauyeniga 'wayneye bega i na veawai 'waikuye.”

<sup>6</sup> Tomotoganidi nagami Valanina 'Atumaina i nogaiga kebu i da luku Yaubada 'wayneye taiadi i da veawai fai yana nu-anua kebu i da vematayakeyakediga. Kebu i da lukuga siwe Yaubada yana vona'awauaufanina veawai faifaina bola i 'eno'eno bega tomotoga 'ifwaidi taunidi i tauyediga Yaubada 'wayneye 'adi fata i na luku i na veawai. <sup>7</sup> \*Ta 'asetai 'adi fata i na luku fai Yaubada tamu tutuya i tauyeni, tutuyanina 'ana wagava 'Asiau. Malamala fuedi i 'a'avana wata Yaubada i veifufu tutuyanina faifaina Kini Devida 'wainega i vo,

'Ai'edi Yaubada yana vona 'wa na nogaiga, 'asiau,

Kebu tanigami 'wa na 'ibodadi, 'wa na nogai 'wa na tononi.”

<sup>8</sup> We'e bola Devida kebu i da tubugaga, Iosua taunina Mosese tutulina me Isileli i 'edakumesedi. 'Ai'edi tomotoganidi i da nawedi i da luku Yaubada yana 'eba veawai 'wayneye, 'ako Devida Yaubada yana vonanina kebu i da lu'ivoneyeni i da vo, Yaku vona 'wa na nogai 'asiau,” fai 'akonadi taiadi i da veveawai. <sup>9</sup> Siwe fai bani'odi i voneyedi, ta 'asetai tamu veawai i 'eno'eno Yaubada yana tomotoga faifaida, bani'odi Yaubada taunina i folova i 'a'avana mulieta i veawai-vagata. <sup>10</sup> \*Bega 'ai'edi aitoi i na luku i na veawai Yaubada 'wayneye taunina yana folova 'wainega, i ve-veawaiga bani'odi 'akonadi Yaubada i veveawai yana folova 'wainega. <sup>11</sup> Fai Yaubada yana 'eba veawai i 'idewa-vagaseni, ma yada tokemaiga taunida ta na tauyeda bega ta na luku Yaubada 'wayneye ta na veawai. Kebu nuanuaku tamu aitoi 'waimiega i na vemata'wana'wana tubudavo bani'odi bega kebu i da luku 'eba veawainina 'wayneye.

### *Yaubada yana Vona nigonigona.*

<sup>12</sup> \*Yaubada yana Vona kebu mweanaga, wata kebu i na venani-'avo'avovo 'waideye, fai vevetafewana wata toke-tokena. Vonanina nigonigo-otogina kebu bani'odi kefata kainumu nigonu ma vi'avi'aina. Kefatanina 'ana fata luda 'adi tubwa i na 'etofuadi tuyafa i na veluagadi. We'e Yaubada yana Vona 'ana fata i na vagaluku yada nuanua wata 'anu'anunuda i na veluagadi, bega yada nuanua givagivadi

matatabuna i na 'etovemagesedi. <sup>13</sup> ✧Kebu 'ada fata tamu nani ta na giveni Yaubada 'wainega. Abame wata fwayefwayeye nani matatabuna mageseye, mataneyeye i 'eno'enovu. Tomotoga matatabuda yada nuanua i 'ise'isedi wata i nuanuanidi, faifaidi 'awaie ta na vonayavuga mataneyeye.

*Yada Tovelomu 'ada vebae i 'asetadi.*

<sup>14</sup> ✧Fai 'awaie ta na vonayavuga Yaubada mataneyeye, yada vetumagana ta na yato-vagaseni Iesu Yaubada Natuna 'waineyeye, kumanina faifaina ta lulu'ivona. Iesunina 'ana fata i na 'ivaiseda vonayavuga 'waineyeye fai taunina yada Tovelomu Bwaikaotogina, i kumeta i luku abame, Yaubada 'waineyeye. <sup>15</sup> ✧Yada Tovelomunina 'eba sailubu tulina tulina i veluagadi Seitani 'wainega 'ida bani'odi siwe kebu i da sakonaga. Begaidi 'ana fata 'ada vebae i na 'asetadi wata 'ai'edi ta na be'uga sakona 'waineyeye 'alo vita ta na veluagadiga, 'ana fata i na 'ivaiseda. <sup>16</sup> ✧Faifainanina kebu ta na kolologa, ma yada venuafoufa'ala ta na vaganago Yaubada Bwaikaotogina 'waineyeye bega yada sakona faifaidi i na 'isanuakalikaleda wata tutuyanina nuanuada 'aivaita, kebu i na ve'ise'iseda, siwe ma yana nuakalikali i na vesauluva 'atumaina 'waideye.

## 5

*Iesu yada Tovelomu Bwaikina ma yana veimea.*

<sup>1</sup> Me Diu tovelomu 'aitamogana 'aitamogana taunidi tomotogaotoga ediavo bani'odi, kebu tulidiga siwe i vevenu'ivinedina ma yadi veimea tomotoga faifaidi i folofolova Yaubada 'waineyeye. Tovelomunidi tomotoga yadi nuakalikali i 'a'anivelenedi Yaubada 'waineyeye wata yadi 'aisaya i nikenikedi i kabukabunidi Yaubada mataneyeye bega dayagidiega yadi sakona i tavutavunidi. <sup>2</sup> ✧Tomotoganidi taunidi tovekali wata tobavu we'e tovelomunidi 'adi vebae i 'asetadi fai taunidi wata kebu toketokediga bega 'adi fata bonadi bikadiega i na 'ivaisedi. <sup>3</sup> ✧Fai tovelomunidi kebu toketokediga i sakosakona, taunidi wata faifaidi i vevelomu.

<sup>4</sup> ✧Kebu tamu aitoi 'ana fata taunina i na silakai bega ma 'ana ve'ililibu i na vetovelomu. We'e mogitana nagami Yaubada i na venua'ivineni i na goleni mulieta 'ana fata tovelomu yadi folova i na 'ewai, bani'odi basenadiotoga Eloni i venua'ivineni i goleni.

<sup>5</sup> ✧Wata bani'odi Keliso kebu taunina i da silakai bega ma 'ana ve'ililibu i da vetovelomu bwaikina. We'e mogitana nagami Yaubada i venua'ivineni i voneni i vo,

✧ 4:13: Lom 14:12 ✧ 4:14: Ibu 10:23 ✧ 4:15: Ibu 2:17 ✧ 4:16: Ibu 10:19

✧ 5:2: Ibu 4:15 ✧ 5:3: Vei 16:6,24 ✧ 5:4: Sou 28:1 ✧ 5:5: Same 2:7; Ibu

'Omu natuku,  
'Asiau fai yau Tamamu veimea a velemu.”

<sup>6</sup> ✧Wata tamu tutuya Yaubada i vona Keliso i na silakaiga faifaina i vo,

'Omu 'u na vetovelomu-vagata,  
Ebelamo yana tutuye Melekisadeki taunina tovelomu,  
'Omu wata bani'odi.”

<sup>7</sup> ✧Basenadi Iesu i miamia fwayefwayeye ma matageuna i velu'ui bonana bwaikinega Yaubada 'waineye, kumanina 'ana fata i na 'ita'ita'ieni wafa 'wainega. Fai Iesu taunina tonuaobu wata Yaubada yana nuanua i dumwebikedi bega bonana i nogai. <sup>8</sup> Avinodi taunina Yaubada Natuna siwe veviga wata 'we'wela i veluagadi, 'waidiega 'aseta i 'ewai ve-matayakayaka faifaina. <sup>9</sup> Veviganidi 'waidiega Yaubada Iesu yana veimea i 'imoso'ieni bega 'atumai'avana, 'ana fataotoga 'ida ta vevematayakeyakeniga i na 'ita'ita'ieda, 'ita'ita'inina miamia-vagaina. <sup>10</sup> Wata fai Iesu 'ita'ita'i 'ana 'eda i 'idewai, Yaubada i goleni i vo,

'Omu Tovelomu Bwaikimu,  
Melekisadeki bani'odi.”

*Ta na vewavawava ve vitadi ta na 'asetadi.*

<sup>11</sup> Nani 'ifwaidi i 'eno'enovi nuanuaku a da veifufuyedi 'waimie, Keliso yada Tovelomu Bwaikina faifaina. Siwe fai nuami kebu i da magetadi 'ami ve vitana 'waikuye. <sup>12-13</sup> ✧Basenadiotoga 'wa vetumagana Iesu 'waineye, i lub-wainemi 'asiau yami 'aseta i da vebwaika, emiavo 'ifwaidi 'waidie 'wa da veve. Nika 'omi bola bavubavumi Yaubada yana Vona faifaina. Nuanuami tamu aitoi i na veve 'waimie bega naninidi safailidi 'waidiega yami 'aseta i velamuga Iesu faifaina, 'wa na luluwaituganidi. 'Omi bani'odi kwak-wama mwedamwedaldi, nuanuadi susu'ava, 'ani'ani fa'alidi i baila. 'Ani'ani fa'alidi mogitana tulaidi faifaiddi. Wata kwak-wama bavubavudi, kebu i da 'asetai nani 'atumaidi wata sakoidi. <sup>14</sup> ✧Vonanidi Iesu faifaina 'adi 'aseta vitadi bani'odi 'ani'ani fa'alidi, 'ai'edi 'waidie 'wa na vewavawava 'omi 'akonadi bani'odi 'wa taulai nuanuami 'ani'aninidi fa'alidi, wata 'ami fata 'wa na nuani bega 'wa na 'asetai ava'aibe sakona wata ava'aibe sauluva 'atumaina.

## 6

*Egavo Iesu i na baileniga 'wa da vo wata i da tutufwaseni.*

<sup>1-2</sup> 'Omi fai bola 'wa vekwamana-siasiai ava'ai nagami 'wa 'asetai Keliso faifaina 'asa'aiana bei 'wa miamia,

✧ 5:6: Same 110:4; Ibu 7:1,16-17 ✧ 5:7: Luk 22:40-44 ✧ 5:12-13: 1 Kol 3:1-3

✧ 5:14: Lom 16:19

begaidi i lubwaineda venidi safailidi 'waidiega ta na vaganago bega ta na vewavawava ve vitadi ta na 'asetadi. 'Asa'aiana nuanuami ve safaila'avadi, bani'odi sauluvanidi sakoidi 'waidiega wafa i sousouyediga ta na bailedi bega ta na vetumagana Yaubada 'waineye, ve bafitaiso tulina tulina faifaidi, nimayato tomotoga 'unu'unudie bega toke-tokena i na veluagai 'Anu'anunu 'Atumaina 'wainega, ve tovi-vaitugana faifaina, wata tosakona 'adi vematavuloga-vagata Yaubada 'wainega faifaina. Venidi 'atumaidi, siwe basenadiotoga 'wa 'aseta'a'avadi kebu ta na luluwaituganidi. <sup>3</sup> I lubwaineda ta na vaganago ve 'adi 'aseta vitadi ta na 'ewadi, 'ai'edi Yaubada i na tauyeda.

<sup>4-5</sup> ✧Mogitana ta na vaganago yada 'aseta Keliso faifaina i na vebwaika bega kebu ta na vedumwe'ai'ai. Tomotoganidi Yaubada i 'ivaisedi nuadi i magetadi mulieta Natuna Iesu i na vedumwe'ai'aieniga, kebu wata tamu sai'afo 'adi fata i na nuaviladi. Taunidi wata Yaubada yana nuakalikali i vebaedi, 'Anu'anunu 'Atumaina i agedi toketokena i veledi, i 'asetai Yaubada yana Vona tomotoga 'ada 'eba 'aivaita, wata yana toketokena tutuya mulina faifaina i vebaedi. <sup>6</sup> Naninidi 'atumaidi i veluagadi mulieta i na vedumwe'ai'aiga, yadi sauluvanina 'wa da vo Yaubada Natuna i da tutufwatagivaituganeni 'ai lagalagana 'waineye, wata 'wa da vo tomotoga fuedi matadie i da sidibidibieni.

<sup>7</sup> Tovedumwe'ai'ainidi wata tovmatayakayaka faifaidi a na awatalatutula. 'Ai'edi tomotoga 'ani'ani i na bakulidi, tutuya fuedi i na 'wei'wei bega fwayefwayeye i na sususula, mulieta fwayafwayanina 'wainega tonibakula 'ani'ani 'atumaina i na veluagai. Wata bani'odi egavo Yaubada yana nuanua i vevematayakeyakedi vuagidi ta 'ise'isedi wata Yaubada yana nuakalikali i veveluagadi. <sup>8</sup> We'e tomotoganidi Yaubada i vedumwe'ai'aieni bani'odi fwayafwaya sakoina. 'Ani'ani i na bakulidiga siwe kebu i na taboga, nani sakoidi 'aisedi i na tabo bani'odi tauwafa wata ulaulawa. Bakulanina i na tunuya i na 'alai i na sako-vagata. Wata bani'odi tomotoganidi Yaubada i na vedumwe'ai'aieniga sako-vagata i na veluagai 'wainega.

<sup>9</sup> De'e a vonavonaga tomotoganidi Yaubada i vedumwe'ai'aieniga faifaidi, we'e 'omi ekwavo a 'asetami 'akonadi 'ita'ita'i 'wa veluagai Yaubada 'wainega wata a nuani mogitana Yaubada yana nuanua 'wa 'i'idewadi. <sup>10</sup> ✧'Omi 'wa folofolovaga Yaubada faifaina wata emiavo tovetumagana 'waidie 'wa 'a'aivaita-vebogi, yami nuakalikali Yaubada 'waineye 'ana 'eba 'isa. Yaubada yana

nuanua tonovidi, yami sauluvanidi 'atumaidi i nuanuanidi 'awaie 'ami tutula 'wa na veluagai 'wainega. <sup>11</sup> ✧Mogitana 'akonadi taunimi 'wa tauyemi Yaubada 'waineye, siwe nuanuaku bwaikina 'asa'aiana bani'odi i na nagoga 'eba ve'a'ava 'waineye bega naninidi 'wa nuaniga mogitana 'wa na veluagadi Yaubada 'wainega, i na velemi. <sup>12</sup> Kebu nuanuaku 'wa na dumwe'ai, nuanuaku tovetumagana toketokedi 'wa na saladi. Tomotoganidi ma yadi vetumagana wata ma yadi tokemaiga i lulukamata bega naninidi Yaubada i vona'awaufaufa i na velediga 'akonadi i veveluagadi.

*Yaubada yana vona'awaufaufa vona-vagata.*

<sup>13-14</sup> ✧Mogitana ta na vetumagana Yaubada yana vona'awaufaufa 'waidie bani'odi basenadi Ebelamo i vetumagana. Basenadiotoga Yaubada i vona'awaufaufa Ebelamo 'waineye, siwe kebu tamu aitoi 'ana wagava i da 'inanai bega yana vona'awaufaufanina i na vetoketoke. Fai kebu tamu aitoi bwaikaotogina taunina bani'odi bega taunina 'ana wagava i 'inanai i vo, Yau a vona'awaufaufa mogitana a na vesauluva 'atumaina 'waimuye wata 'amu wauma i na vebwaika.” <sup>15</sup> Vona'awaufaufanina 'waineye, Ebelamo i vetumagana-vagata i lulukamata mulieta vona'awaufaufanina 'ana mogitana i veluagai, natuna Aisake i tubuga, kumanina 'wainega i nagoga nika wauma i vebwaika.

<sup>16</sup> 'Ai'edi tamu tomogo nuanuana yana vona'awaufaufa i na kiavetoketokei tamu tomogo bwaikaotogina, kebu taunina bani'odi, 'ana wagava i na 'inanai bega tomotoga matatabudi i na 'asetai yana vona, vona mogitana bega kebu wata tamu aitoi i na kwayegeni. <sup>17</sup> Yaubada nuanuana tomotoganidi yana vona'awaufaufa 'ita'ita'i faifaina i na veluagaiga i na 'asetai-atumaia kebu wata yana nuana i na sivilai, bega taunina 'ana wagava i 'inanai, yana vona'awaufaufanina i kiavetoketokei. <sup>18</sup> ✧We'e yana vona'awaufaufa wata 'ana 'eba kiavetoketoke taunina 'ana wagava, naninidi 'adi 'ailuga kebu 'ana fata i na bailedi wata nuanua tulina i na souyeni. Kebu tamu sai'afo Yaubada i na vekali. Fai ta 'asetai kebu 'ana fata yana vona'awaufaufa 'waideye i na geuya, 'ida ta ve'ilabibina 'waineye nuafouda i kiavevatudi bega ta nuani mogitana veawai wata 'ita'ita'i ta na veluagadi. <sup>19-20</sup> ✧'Ai'edi kaukau waka i na bewebeweniga tomotoga lomu i na taweni waka i na sitagoni wata tomotoga nuafoudi i na vatu. 'Ida wata bani'odi, fai ta nuani mogitana Yaubada yana vona'awaufaufa 'ada 'ita'ita'i faifaina kebu i na geuyaga, 'wa da vo yada nuanua 'adi lomu



i luku Yaubada 'waineye, toketokena wata vitana nuafouda i vatu. Fwayefwayeye me Diu yadi tovelomu bwaikina Tutudaba Tabutabuotogina 'ana saiboda kaleko i sisibaleni i lukuluku Yaubada mataneye i vevelu'ui tomotoga faifaidi. Wata bani'odi Iesu faifaida 'akonadi i luku abame, Yaubada yana 'eba mia 'waineye. Taunina Tovelomu Melekisadeki bani'odi, i vetovelomu bwaikina i na mia-vagata, i kumeta Yaubada 'waineye i vevelu'ui faifaida.

## 7

### *Tovelomu Melekisadeki ifuifufuna.*

<sup>1</sup> \*De'e Melekisadeki a na veifufuyeni 'wa na 'asetai. Taunina 'atamana Salema 'ana Kini wata Yaubada Bwaikao-togina yana tovelomu. Basenadiotoga Ebelamo i lugavia Kini 4 ma yadi 'aila'avo taiadi i leodi, i vilai i mimaiga Melekisadeki taiadi i veluaga, Melekisadeki i velu'ui Yaubada 'waineye bega i na vesauluva 'atumaina Ebelamo 'waineye. <sup>2</sup> Kukuranidi Ebelamo i 'ewadiga vetalaga 'wainega i 'idewadi 'etokwau 10, 'aitamogana Melekisadeki i veleni. Melekisadeki 'ana saivila Veimea Tonovidi, bega taunina Veimea Tonovidi 'adi Kini. Yana 'atamana Salema 'ana saivila Mia 'Atumaina, bega taunina Mia 'Atumaina 'wainega i sousouyeni 'ana Kini. <sup>3</sup> \*Taunina kebu tamanaga, kebu inanaga, kebu tubunavoga, yana 'eba velamu kebu, wata yawaina 'ana 'eba ve'a'ava kebu.\* Yaubada Natuna taunina Tovelomu Miamia-vagaina, wata Melekisadeki bani'odi.

<sup>4</sup> 'Wa na nuani, tomogonina kebu tomogo-'avo'avovo, taunina bwaikaotogina. Ebelamo tomogo bwaikina ma 'ana ve'ililibu wata me Isileli matatabudi 'wainega i souyedi, siwe i 'asetai Melekisadeki bwaikaotogina begaidi kukuranidi lugaviayega i 'ewadiga, 'ifwaidi i veleni. <sup>5</sup> \*Mulieta Ebelamo i wafa tubuna tamu 'ana wagava Livai i tubuga, 'ana wauma 'wainega tomotoga 'ifwaidi i vetovelomu Yaubada yana veimea 'wainega. Wata Yaubada i tauyedi taunidi ediavo ma fuedie me Isileli 'waidiega 'anivelena-maimaiga i 'ewa'ewadi. Ediaonidi wata Ebelamo tubunavo siwe tutuya fuedi 'ani'ani wata kukua i 'i'idewadi 'etokwau 10, kwau 'aitamogana tovelomunidi i 'ewa'ewai. <sup>6</sup> Melekisadeki kebu tomogo Isileli 'alo Livai 'ana wauma 'wainega, siwe ta 'asetai ma yana veimea fai kwau 'aitamogana i 'ewai Ebelamo 'wainega. Ebelamo mogitana tomogo bwaikina fai vona'awaufaua i veluagai Yaubada 'wainega siwe Melekisadeki i velu'ui faifaina Yaubada i na vesauluva 'atumaina 'waineye. <sup>7</sup> 'Akonadi ta 'asetai tovonanuakalikali tomogo

\* 7:1: Nag 14:17-20    \* 7:3: Ibu 7:15-17    \* 7:3: 'Ana 'asetai voke kebu tamu aitoi faifaidi i da kilumaga.    \* 7:5: Num 18:21

bwaikina we'e nuakalikalina 'ana to'ewa sai'afo. Ebelamo tomogo bwaikina siwe fai Melekisadeki i vona nuakalikalina 'waineye, bega taunina tomogo bwaikaotogina. <sup>8</sup> Tovelomu tomotoga taunidi ediavo i vonevonedini 'ani'ani wata kukua i 'i'idewadi 'etokwau 10, kwau 'aitamogana i veveleledi mulieta i wafawafa. We'e Melekisadeki faifaina Yaubada yana Buki i vonaga kwau 'aitamogana i 'ewai Ebelamo 'wainega siwe bola ma yawaina i miamia.

<sup>9-10</sup> Tutuyanina Ebelamo Melekisadeki taiadi i veluaga kukua kwau 'aitamogana i veleni, Ebelamo aisena Livai, bola kebu i da tubuga siwe 'wa da vo 'akonadi i da miamia Ebelamo tolobwaneye. Fai Ebelamo tolobwaneye Livai i miamia siwe 'asa'aiana 'wa da vo Livai i da 'anivelena Melekisadeki 'waineye. Livai 'ana wauma taunidi tovelomu, kumanidiavo to'ewanidi kwau 'aitamogana 'etokwau 10 'waidiega, we'e Melekisadeki 'wa da vo i da 'ewai Livai 'wainega, begaidi ta 'asetai Melekisadeki bwaikaotogina kebu Livai 'ana wauma taiadi bani'odiga.

*Iesu taunina bani'odi Melekisadeki.*

<sup>11</sup> Basenadiotoga Mosese yana tutuye Yaubada veimea i 'anivelenedi me Isileli 'waidie we'e tovelomu kumanidiavo Livai 'ana wauma 'wainega, veimeanidi i folovidi. 'Ai'edi tomotoga ta da ve'atunai Yaubada mataneye tovelomunidi yadi folova 'waidiega 'ako kebu tamu tovelomu tulina i da mai. Fai kebu ta da ve'atumaiga bega tamu Tovelomu Bwaikina, taunina Keliso i mai, siwe kebu Livai tubuna Eloni bani'odiga, taunina mogitana Melekisadeki bani'odi. <sup>12-14</sup> ✧ Fai Yaubada tamu tovelomu i vetunei bega wata yana veimea tovelomu faifaidi i 'ive'ivaudi. Basenadi Mosese yana veimea 'wainega Livai 'ana wauma i vetovelomu we'e Iuda 'ana wauma 'wainega kebu i da tauyedi bega i na vetovelomu 'alo i na vetofolova Yaubada faifaina 'eba velomu 'waineye. Siwe 'akonadi ta 'asetai tovelomunina tamu, taunina 'ada Toveimea Keliso i souyeni Iuda 'ana wauma 'wainega, begaidi veimeanidi Yaubada i 'ive'ivaudi.

<sup>15</sup> A vonavonaga Tovelomu tamu wata veimea 'ivaudi faifaidi, 'akonadi 'wa nuani Tovelomunina Keliso, taunina bani'odi Melekisadeki, 'ana 'asetai safailina 'waimie. <sup>16</sup> ✧ Tomotoga 'ifwaidi i vetovelomu fai Livai 'ana wauma 'wainega, we'e Keliso i vetovelomu fai taunina toketokeotogina wata miamia-vagaina. <sup>17</sup> Ta 'asetai taunina miamia-vagaina, fai faifaina Yaubada yana Buki nageneye i vo,

'Omu 'u vetovelomu-vagata  
Melekisadeki bani'odi.”

18-19 ✨Veimeanina tuatuaina tovelomu faifaidi i 'ewayavuleni fai mweana wata i venani-'avo'avovo, veimeanina kebu 'ana fata i na 'ivaiseda bega ta na ve'atumai Yaubada mataneye. We'e 'eda'eda 'ivauna 'akonadi Yaubada i 'idewai 'atumaiotogina kebu tuatuaina bani'odi, 'waineye ta vetumagana fai ta nuani mogitana 'ada fata ta na vaganago Yaubada lilivaotogineye Keliso 'wainega.

*Yaubada yana vona'awaufaufa 'ada To'ita'ita'i faifaina kebu yana nuanua i na sivilai.*

20 ✨Tutuyanina Yaubada Iesu i silakai i na vetovelomu, kebu i da vonamo, nagami i vona'awaufaufa 'waineye i na vetovelomu-vagata. We'e tomotogaotoga i vetovelomuga, faifaidi kebu i da vona'awaufaufa. 21 Iesu i vetovelomuga faifaina Yaubada yana vona'awaufaufanina i kiavetoketokei taunina 'ana wagavayega i voneni i vo,

Yau 'Auvea Yaubada a vona'awaufaufa 'waimuye,  
Kebu wata yaku nuanua a na sivilai,  
Bega 'omu 'u vetovelomu-vagata.”

22 ✨Fai de'e bani'odi Yaubada i vona'awaufaufaga 'ada fata yada vetumagana ta na yato-vagaseni Yaubada yana Veakutagona 'Ivauna 'waineye fai Iesu, kumanina yada Tovelomu-vagata, i 'idewai faifaia. Veakutagonanina i 'idewaiga 'atumaiotogina, kebu bani'odi Veakutagona Nagami. 23 Basenadi tovelomu fue di siwe i veve'aueana i wafawafa wata 'ifwaidi i lukuluku i tutulidi. 24 We'e Iesu fai taunina miamia-vagaina, bega i vetovelomu-vagata kebu tutulinaga, 'asa'aiana 'aisena. 25 ✨Bega egavo nuanuadi 'waineamo i na nago Yaubada 'waineye Iesu 'ana fata i na 'ita'ita'iotogedi fai taunina miamia-vagaina bega tutuya fue di i vevelu'ui Yaubada 'waineye faifaidi.

26 ✨Iesu magemagetana, kebu yana sakonaga 'atumai'avana, kebu tosakona taiadi i da miamiani Yaubada i vemia'eni i silakai abama tabwaotogineye taiadi i miamia. Fai abame i miamia 'atumai'avana taunina mogitana yada tovelomu 'ana fata 'aivaita tulina tulina i na vevelede, kebu tamu tutuya i na 'ailove. 27 ✨Wata taunina tovelomu 'ifwaidi kebu bani'odiga. Tovelomu bwaikidi Livai 'ana wauma 'wainega 'aiata 'aitamogana 'aitamogana i lukuluku 'aisaya i nikenikedi i kabukabunidi Yaubada 'waineye, nagami taunidi yadi sakona faifaidi, mulieta yadi tomotoga faifaidi bega i na ve'atumai mataneye. We'e Iesu kebu bani'odi i da vesauluvediga, fai taunina 'atumai'avana bega kebu taunina faifaina i da velomu, 'ida 'aiseda faifaia

✨ 7:18-19: Gal 2:16; Lom 8:3-4 ✨ 7:20: Same 110:1 ✨ 7:22: Ibu 8:6 ✨ 7:25: Lom 8:34; 1 Ion 2:1 ✨ 7:26: Ibu 4:15 ✨ 7:27: Ibu 10:10; Efe 5:2

i velomu. Yana velomunina tutuya 'aitamogana siwe tutuya matatabuna faifaina, wata kebu 'aisayayega i da velomu, i velomuga taunina tomogona i 'aniveleneni wafa 'waineye yada sakona 'adi nuatavuna faifaidi. <sup>28</sup> \*Mosese yana veimea 'wainega tomotogaotoga Livai 'ana wauma 'wainega i vetovelomu bwaikidi siwe kebu toketokediga bega i be'ube'u sakona 'waidie. Tutuya manamanawena i nagoga mulieta Yaubada yana vona'awaufaufa toketokena 'wainega Natuna i venua'ivineni i silakai i vetovelomu bwaikina. I vetovelomuga, yana wafa 'wainega Yaubada Iesu yana veimea i 'imoso'ieni bega 'atumai'avana, 'ana fataotoga i na 'ita'ita'ieda, yana veimeanina miamia-vagaina.

## 8

### *Iesu taunina yada Tovelomu Bwaikina.*

<sup>1</sup> \*Ava'ai 'akonadi a veifufuyediga lamudi side. Mogitana 'ida ma yada Tovelomu Bwaikina bani'odi 'akonadi a vona. Taunina Iesu, i miamia abame, ma yana veimea Yaubada 'Ai'aiwabuotogina 'ana 'atagiege i miabui i miamia. <sup>2</sup> Basenadiotoga me Isileli vanuga 'eba velu'ui i 'idewai 'aisaya bunudiega, we'e abame tamu vanuga i 'eno-vagata, taunina 'Auvea 'ana 'a'aiyogona. Vanuganina vevetabuna, Yaubada yana vanuga mogitana, nageneye yada Tovelomu Bwaikina Iesu i folofolova faifaida.

<sup>3</sup> Fwayefwayeye tovelomu bwaikidi 'aitamogana 'aitamogana ma yadi veimea bega tomotoga yadi nuakalikali i 'a'anivelenedi Yaubada 'waineye wata 'aisaya i nikenikedi i vevelomuyedi 'waineye, tomotoga yadi sakona 'adi nuatavuna faifaidi. Begaidi yada Tovelomunina Iesu i lubwaineni tamu nani i na 'aniveleneni, naninina taunina tomogona. <sup>4</sup> We'e 'ai'edi Iesu i da miamia fwayefwayeye, 'ako kebu i da vetovelomuga, fai veimea i mai Mosese 'wainega 'aisedi Livai 'ana wauma i tauyedi i na vetovelomu, i vevelomuga yadi veimeanina 'waineamo. <sup>5</sup> \*Basenadiotoga Mosese i laka 'Oya Sainai Yaubada taiadi i veifufu. Bei i veni yana vanuga abame 'ana 'isa'isa, bega tutuyanina Mosese i velamu Yaubada yana vanuga 'eba velu'ui i na yogoni 'aisaya bunudiega i voneni i vo, 'U na 'a'aiyogonaga, nuanuaku vanuganina basenadi 'oyeye a vemuga 'u na vetutuyameni, nani matatabuna 'u 'isediga wata bani'odi 'u na 'idewadi." Tutuyanina i 'ivetabodai, vanuganina Yaubada yana vanuga abame 'anununa, bega tovelomu bei i lukuluku i folofolova Yaubada 'waineye. <sup>6</sup> \*Mogitana i folofolova Yaubada 'waineye, we'e Iesu folova bwaikaotogina i 'i'idewai

\* 7:28: Ibu 5:1-2,9    \* 8:1: Ibu 1:3, 10:12    \* 8:5: Sou 25:40; Kolos 2:17

\* 8:6: Ibu 7:22, 9:15

taunidi kebu bani'odiga. Wata bani'odi Yaubada yana Veakutagona 'Ivauna Iesu i 'idewai tomotoga 'waideye 'atumaiotogina, kebu bani'odi basenadi Mosese i 'idewai me Diu 'waidie. We'e Veakutagonanina 'Ivauna Yaubada i 'idewai vona'awaufaufa 'atumaiotogidi 'waidiega, kebu bani'odi yana Veakutagona Nagami 'ana vona'awaufaufa.

*Yaubada i vona'awaufaufa Veakutagona 'Ivauna i na 'idewai.*

<sup>7</sup> Veakutagonanina Nagami Mosese i 'idewaiga, 'wainega tomotoga kebu i da ve'atumi Yaubada mataneye fai yana veimea kebu i da vematayakeyakediga. 'Ai'edi 'atumai'avanaga, 'ako tamu kebu Iesu i da 'idewaiga. <sup>8</sup> \*Fai yana tomotoga kebu i da ve'atumaiga, bega Yaubada i awavesakoyedi i vo,

Yau 'Auvea a vona,

Sai'afoga, tamu tutuya 'waineye yaku Veakutagona 'Ivauna a na 'idewai me Isileli wata me Iuda 'waidie.

<sup>9</sup> Yaku Veakutagonanina 'Ivauna kebu bani'odi Veakutagona Nagami a 'idewaiga tubudiavo 'waidie.

Tutuyanina tubudiavo nimadie a 'abi a 'edakumesedi a miedi Itifita 'wainega, bei yaku Veakutagona a 'idewai 'waidie.

Yaku Veakutagonanina i vedumwe'ai'aieni i geuya, Begaidi a bailedi.”

<sup>10</sup> Wata 'Auvea Yaubada i vona i vo,

Tutuya mulina 'waineye yaku Veakutagona 'Ivauna a na 'idewai me Isileli 'waidie bega i na vematayakeyakeni.

Veakutagonanina side bani'odi.

Yaku veimea a na yatodi yadi nuanua 'waidie bega ava'ai nuanuaku i na 'idewadiga i na 'asetadi.

Wata nuadie a na kilumidi bega i na nuakalikaliedi.

We'e yau yadi Yaubada, taunidi yaku tomotoga.

<sup>11</sup> \*Kebu tamu aitoi iana wata enavo 'ifwaidi i na vonedi i na vo, 'Auvea Yaubada 'wa da 'asetai,”

Fai tomotoga matatabudi 'akonadi i na 'asetaku, tomotoga bwaikidi wata tomotoga siaidi.

<sup>12</sup> Yadi vekali faifaiddi a na 'isanuakalikaliedi,

We'e yadi sakona kebu wata a na nuanuanidiga.”

<sup>13</sup> Fai yana Veakutagonanina i goleni Veakutagona 'Ivauna, ma'itufa Veakutagona Nagami i venani-'avo'avovo. We'e fai 'akonadi i vetuatuai wata i venani-'avo'avovo sai'afoga i na savovola.

## 9

*Veakutagona Nagami 'ana veimea.*

<sup>1</sup> Basenadi Yaubada veimea i yatodi yana Veakutagona Nagami faifaina, bega me Isileli bani'odi i na tatafalolo, wata veimeanidi 'waidiega taunidi yadi 'eba velu'ui i 'idewai. Veimeanidi 'ifwaidi side bani'odi. <sup>2</sup> ✧Tomotoga vanuga i 'idewaiga Yaubada faifaina 'aisaya bunudiega, nageneye tutudaba 'ailuga. Tutudaba nagami 'ana wagava Tutudaba Tabu, nageneye mageta wata talalia, tabwaneye beledi Yaubada 'ana 'anivelena. <sup>3</sup> ✧I vaganagoga saiboda kaleko, tutudaba 'ana veluga faifaina. Tutudabanina 'ana wagava Tutudaba Tabutabuotogina. <sup>4</sup> Nageneye 'eba velomu golida bei vane i kabukabuni Yaubada 'waineye wata didiwaka tomogona matatabuna golida 'ana loi. We'e didiwakanina nageneye kileu bababadi 'ailuga, basenadi Veakutagona Nagami 'ana vona bei i kilumidi. Wata nageneye 'aivoe golida ma 'ani'aninina 'ana wagava mana, kumanina Yaubada me Isileli i veledi sali'avu'avuye, wata Eloni yana wautogana, wautogananina basenadi bwavuna siwe i veluilili. <sup>5</sup> Didiwakanina tabwaneye kumaea 'ailuga i dabidi anelose 'adi 'isa'isa, fafediega didiwaka tabwana i ve'i'wa'uya. Kumaeanidi 'adi wagava Selebimu, 'eba 'isa Yaubada magemagetana bei i miamia. Didiwakanina 'ana kudu 'waineye tovelomu dayaga i luluiतालनी bega Yaubada tomotoga yadi sakona i nunuatavunidi. Siwe 'asa'aiana kebu ta na veifufu-veduleyeni.

<sup>6</sup> ✧Tutuyanina Yaubada yana vanuga 'eba velu'ui 'ana kukua taiadi i 'idewa'a'avadi, 'aiata 'aitamogana 'aitamogana tovelomu i lukuluku tutudaba nagami 'waineye, yadi folova tulidi tulidi i 'i'idewadi Yaubada 'ana subia faifaina. <sup>7</sup> ✧We'e tutuya 'aitamogana malamala 'aitamogana 'aitamogana tovelomu bwaikina 'aiseotogina i lukuluku Tutudaba Tabutabuotogina 'waineye. I lukulukuga 'aisaya dayagidi i lukulukuvani Yaubada yana 'eba mia i luluiतालनी bega taunina wata tomotoga yadi sakona i bavuyediga 'adi nuatavuna faifaidi. <sup>8</sup> ✧Folovanina tovelomu bwaikina i 'idewaiga yada 'eba 'isa, 'wainega 'Anu'anunu 'Atumaina i vveda basenadi kebu tamu tomogo-'avo'avovo 'ana fata i na luku Yaubada 'waineye Tutudaba Tabutabuotogina nageneye fai Veakutagona Nagami, 'ana vanuga taiadi bola i 'eno'novi wata yada 'eba luku Yaubada 'waineye, bola Iesu kebu i da 'idewaiga. <sup>9</sup> ✧Fai tutuyanina 'waineye tomotoga kebu 'adi fata i na lukuluku Yaubada 'waineye, vona-awatabai 'ida tomotoga tutuya de'e faifaida, fai ta 'asetai avinodi yadi nuakalikali i 'a'anivelenedi Yaubada

'ana subia faifaina, wata 'aisaya i vevelomuyedi yadi sakona 'adi nuatavuna faifaidi siwe tosubianidi 'adi vebae 'waidie vita i lulutonovi yadi sakonanidi faifaidi, kebu 'ana fata matatabuna i na ve'a'avai. <sup>10</sup> Yadi nuakalikali wata yadi velomu i 'a'anivelenedi Yaubada 'waineye siwe 'waidiega tomogodi 'aisedi i ve'atumai. Veimeanidi 'ani'ani, 'aisaya, ufa wata 'ilekoa tulina tulina faifaidi Yaubada i yato-vagasedi i nagoga Keliso i mai, nika yana Veakutagona 'Ivauna i velamu.

*Veakutagona 'Ivauna Keliso 'wainega.*

<sup>11</sup> Mogitana 'akonadi Keliso i mai, taunina Tovelomu Bwaikina Yaubada yana Veakutagona 'Ivauna i 'idewai, 'wainega mia 'atumaina ta veveluagai. Fwayefwayeye, bei tovelomu i lukuluku i folofolovaga, vanuga 'eba velu'uinina tomotoga 'adi 'a'aiyogona. We'e Keliso kebu bei i da folofolovaga, i luku Yaubada yana 'eba mia 'atumaiotogina abame, bei i folofolova. 'Eba mianina kebu fwayafwaya 'ana nani, abame i 'eno'eno 'atumai'avana wata yana 'ai'aiwabu bwaikaotogina, vanuga 'eba velu'ui fwayefwayeye kebu bani'odiga. <sup>12</sup> ✧ Tutuyanina bei Iesu i lukuga, kebu 'aisaya goti wata bulumakau natudiavo dayagidi i da lukuveniga bega 'eba mianina i da luitaitali. We'e tutuya 'aitamogana, tutuya matatabuna faifaidi Iesu i wafa dayagina i ilolo 'ada tuveobu miamia-vagaina faifaina, 'wa da vo taunina dayagina i da lukuveni Tutudaba Tabutabuotogina 'waineye velomu faifaina. <sup>13</sup> ✧ Basenadiotoga Mosese veimea i yatodi tomotoga tomogodi i na 'ivevunavunagidi Yaubada mataneye faifaidi. Tamu side bani'odi. 'Ai'edi egavo towafa i na 'abitonovi 'akonadi i veyoke, bega tovelomu 'aisaya dayagidi wata bulumakau natudi i velomuyeniga 'aufafana 'waidiega i luitaitalidi nika i veve'atumai Yaubada mataneye. Sauluvanina tomotoga tomogodi 'adi 'ivevunavunaga faifaidi, we'e nuadi kebu. <sup>14</sup> ✧ Mogitana tomotoga tomogodi 'aisedi faifaidi 'aivaita i veluagadi 'aisaya dayagidiega, we'e Keliso dayagina kebu bani'odi 'aisaya dayagidi. Taunina 'atumai'avana kebu yana sakonaga siwe 'Anu'anunu Miamia-vagaina yana toke-tokena 'wainega taunina i tauyeni Yaubada 'waineye i wafa faifaيدا. Keliso dayagina kebu tomogoda 'aisedi faifaidi, we'e mogitana wata nuada i 'ivevunavunagidi Yaubada mataneye. Fai yada sakona 'adi tutula wafa, bega vita ta vevebaeda, siwe Keliso dayagina vitanidi i 'ewayavuledi wata nuada i 'ivevunavunagidi bega 'ada fata ta na vetofolova Yaubada Miamia-vagaina 'waineye.

*Keliso Veakutagona 'Ivauna i 'idewai taunina dayaginega.*

✧ 9:12: Efe 1:7-8 ✧ 9:13: Vei 16:3; Num 19:17-18; Ibu 10:4 ✧ 9:14: 1 Fit 1:18-19; 1 Ion 1:7

15 ✨Fai Keliso dayaginega nuada i 'ivevunavunagidi bega ta 'asetai 'asa'aiana taunina Veakutagona 'Ivauna 'ana to'idewadewa bega tomotoga i na veiana Yaubada taiadi. Egavo Veakutagona Nagami yana tutuye i sakona, 'wa da vo sakonanidi i da yogonidi siwe Keliso ma fueda i tuveobuda yana wafa 'wainega bega egavo Yaubada i venua'ivinediga 'adi veuveuta 'ai'aiwabu miamia-vagaina i na veluagadi yana vona'awaufaufa bani'odi.

16-17 Tamu yada sauluva side bani'odi. 'Ai'edi aitoi i na nuanua yana wafa faifaina, tamu lubulubu i na kilumi 'ana 'uyua 'ana to'ewa faifaidi. Ma yawaina i na miamiaga to'ewanidi 'adi wagava i kilumidiga kebu 'adi fata 'uyuanidi i na 'abitonovidi, nagami tomotoga fuedi i na 'aseta-'atumaia tomogonina i wafa, mulieta to'ewanidi 'adi veuveuta i na 'ewadi. 18 'Ada veuveuta Yaubada yana 'ai'aiwabu magemagetadi kebu ta da 'ewa-matayo'odi, nagami Iesu i wafa, wata bani'odi 'ai'edi 'aisaya kebu i da luwewafai bega dayaga i da ilolo, 'ako Yaubada yana Veakutagona Nagami kebu i da souyeniga. 19 ✨Tutuyanina 'waineye Mosese Yaubada yana veimea 'aitamogana 'aitamogana i lu'ivoneyedi tomotoga 'waidie, mulieta bulumakau natudiavo dayagidi wata ufa i 'ewa'ewadi, tomotoga wata veimeanidi 'adi buki i luitaitalidi. 'Eba luitaitala tamu welavi 'ana wagava Isofa i baia sifi vutuvutudi i fania, vutuvutunina nagami i lusabai yamoyamoinega. 20 I luluiitalidi bega i vonavona i vo, Dayaga de'e 'wainega Yaubada yana Veakutagona 'ana mogitana i velamu, nani matatabuna faifaidi i vona'awaufaufaga 'waimie i na 'idewadi, we'e 'omi yana veimeanidi i velemiga 'wa na vematayakeyakedi." 21 I 'a'avana, wata vanuga 'eba velu'ui 'ana kukua matatabuna taiadi i luitaitalidi. 22 ✨Vona mogitana, sai'afo nani matatabuna dayaga 'wainega i vevunavunaga Yaubada mataneye yana veimea bani'odi. Fai yada sakona 'adi tutula wafa, 'ai'edi dayaga kebu i da ilologa kebu 'ana fata nuatavuna ta da veluagai Yaubada 'wainega.

*Keliso dayaginega Yaubada yada sakona i nuatavunidi.*

23 Naninidi Mosese i 'idewadiga, tomotoga wata vanuga 'eba velu'ui 'ana kukua taiadi 'waidie, i 'ivevunavunagidi 'aisaya dayagidiega. Naninidi yada 'eba 'isa 'anunu bani'odi, we'e naninidi 'adi mogitana abame. 'Aisaya dayagidi kebu 'ana fata naninidi 'adi mogitana abame i na 'ivevunavunagidi, we'e fai Keliso dayagina nani 'atumaiotogina, 'wainega naninidi i 'ivevunavunagidi.



24 ✨Vanuga 'eba velu'ui fwayefwayeye tomotoga 'adi 'a'aiyogona Yaubada yana 'eba mia abame 'anununa. Tutuyanina Keliso i tovoi wafayega kebu i da luku tomotoga 'adi 'a'aiyogona 'waineye, we'e mogitana i luku abama nagefouneye, bei Yaubada mataneye i miamia faifaida. 25 Malamala 'aitamogana 'aitamogana me Diu yadi tovelomu bwaikina i lukuluku Tutudaba Tabutabuotogineye, siwe dayaganina i lukulukuveniga kebu taunina dayaginaga, 'aisaya dayagidi. We'e Keliso kebu tutuya fue di i da lukuluku abame, tutuya 'aitamogana taunina i velomuyeni Yaubada 'waineye. 26 'Ai'edi taunina i da vevelomuyeniga malamala 'aitamogana 'aitamogana, 'ana 'asete wata i da wafawafavebogi fwayafwaya 'ana 'idewavau 'wainega i da maiga 'asiau. We'e mogitana tutuya 'ana 'eba ve'a'ava 'waineye i souyenina wata i wafa-vetamogai tutuya matatabuna faifaina. Yana wafanina 'wainega taunina i velomuyeni faifaida bega sakona i 'ewayavuledi. 27 ✨Basenadiotoga Yaubada yana veimea i yatoi tomotoga matatabuda ta na wafa-vetamogada, mulieta ta na vonayavuga mataneye i na veimeyeda tutula faifaidi. 28 ✨Wata bani'odi Keliso i wafa-vetamogai, tomogona i velomuyeni bega tomotoga fue da yada sakona i ve'a'avadi. Bola wata i na souya-vaituganeni, kebu sakona 'ana 'ewayavula faifaina i na maiga, we'e mogitana i na souyeni bega 'ida ta lulukamataga faifaina, 'ita'ita'i ta na veluagai 'wainega.

## 10

*'Aisaya dayagidi kebu 'ana fata sakona i na 'ewayavuledi.*

1 ✨Awaie nani fue di 'atumaidi ta na veluagadi Iesu 'wainega, we'e Yaubada yana veimeanidi i maiga Mosese 'wainega kebu mogitana naniotogidi, 'anunudi. Fai veimeanidi 'adi wagava 'anunu, kebu 'ana fata velomu 'wainega sakona i na 'u'umidi. Tomotoga nuanuadi Yaubada i na subiai bega malamala 'aitamogana 'aitamogana 'aisaya i vevelomuyedi 'waineye kebu i da 'a'ailovega 'adi kwalakwala, siwe 'waidiega kebu i da ve'atumaiotoga Yaubada mataneye. 2 'Ai'edi Yaubada 'ana tosubianidi i da ve'atumai-vagata mataneye, vita i vevebaediga yadi sakona faifaidi i da 'a'ava wata velomu i da 'ailove. 3 Fai yadi sakona i vevebaedi bega malamala 'aitamogana 'aitamogana i vevelomu, 'waidiega i 'asetadi bola ma yadi sakona. 4 Yadi sakonanidi bola i 'eno'enovi fai 'aisaya goti wata bulumakau dayagidi kebu 'ana fata sakona i na 'ewayavuledi. 5-6 ✨Fai

✨ 9:24: 1 Ion 2:1 ✨ 9:27: Nag 3:19 ✨ 9:28: Ibu 10:10; 1 Fit 2:24; Fil 3:20

✨ 10:1: Kolos 2:17 ✨ 10:5-6: Same 40:6-8

'aisaya dayagidi kebu 'ana fata sakona i na 'ewayavulediga bega sai'afoga Keliso i na obuma fwayefwayeye, i vona Yaubada 'waineye, vonanina Yaubada yana Buki 'waineye i kilumi i vo,

Tomotoga i 'a'anivelena-maimaiga 'ani'ani tulina tulina 'waidiega wata 'aisaya i vevelomuyediga 'waimuye, siwe kebu nuanuamu.

Wata 'aisaya kabulagolagodi i 'a'anivelenediga 'waimuye 'eba velomu 'wainega, yadi sakona 'adi nuatavuna faifaidi, Siwe faifaidi kebu 'u da sosoanaga.

Begaidi tomogoku 'u 'idewai tomia fwayafwaya bani'odi bega a na 'aniveleneni yamu 'eba sosoana.

<sup>7</sup> Bega a vo, Yaubada, yau side,

Yamu nuanua matatabuna a na 'idewai,

Bani'odi basenadi i kilumi faifaiku yamu Buki 'waineye.”

<sup>8</sup> Yaubada yana veimea tulina tulina velomu faifaina i mai Mosese 'wainega siwe nagami Keliso i vo, Tomotoga i 'a'anivelena-maimaiga 'ani'ani tulina tulina 'waidiega wata 'aisaya i vevelomuyediga 'waimuye, wata 'aisaya kabulagolagodi i 'a'anivelenediga 'waimuye 'eba velomu 'wainega, yadi sakona 'adi nuatavuna faifaidi, siwe naninidi kebu nuanuamu wata faifaidi kebu 'u da sosoanaga.” <sup>9</sup> Mulieta Keliso i vo, Yaubada, yau side, yamu nuanua matatabuna a na 'idewadi.” Begaidi ta 'asetai velomu tuatuaina 'ana 'eda'eda Yaubada i 'ewayavuleni ma'itufa 'eda'eda 'ivauna i 'idewai, 'eda'edanina Keliso yana wafa faifaida. <sup>10</sup> ✧Iesu Keliso Yaubada yana nuanua matatabuna i 'idewai, tomogona i 'anivelena-maimaigeni i wafa faifaida. I wafa-vetamogai tutuya matatabuna faifaidi bega i 'ive'atumaida Yaubada mataneyeye.

*Keliso dayagina 'ana fata sakona i na 'u'umidi.*

<sup>11</sup> Tovelomu fueri 'aiata 'aitamogana 'aitamogana i tovo-tovoi i folofolova vanuga 'eba velu'ui nageneye. Tutuya fueri i vevelomuga, folovanina i 'i'idewa-vebogia siwe 'waidiega kebu tamu sai'afo sakona i da 'u'uma-yavuledi. <sup>12</sup> ✧We'e Keliso tutuya 'aitamogana i velomu sakonanidi faifaidi yana 'anivelenanina tutuya matatabuna faifaina 'ana fata, yana folovanina i 'a'avana i nago i miabui Yaubada 'ana 'atagiega. <sup>13</sup> ✧Bei ma yana veimea i lulukamata i na nagoga mulieta Yaubada 'ana gaviavo i na leodi i na 'a'avana Keliso i na veveimeyedi. <sup>14</sup> Yana velomunina 'aitamogana 'wainega 'ida 'atumai'avada Yaubada mataneyeye kebu tamu yada sakonaga, bega tutuya matatabuna 'ida Yaubada yana tomotoga magemagetada.

15 ✨Vona mogitana ta ve'atumai Yaubada mataneye, wata faifaina 'Anu'anunu 'Atumaina yana ve 'waideye ta 'iseni Yaubada yana Buki nageneye i vo,

16 'Auvea Yaubada i vona i vo,

Tutuya tuatuaina i na 'a'ava, mulieta yaku Veakutagona 'Ivauna a na 'idewai bega i na vematayaakeyakeni. Veakutagonanina side bani'odi.

Yaku veimea a na yatodi nuadie bega i na nuakalikali,

Wata yadi nuanua 'waidie a na kilumidi bega ava'ai nuanuaku i na 'idewadiga i na 'asetadi.”

17 Wata mulieta i vo,

Yadi sakona wata yadi vekali kebu wata a na nuanuanidiga.”

18 Fai yada sakonanidi 'akonadi Yaubada i nuatavunidi kebu wata i na nuanuanidiga, velomu sakona 'adi nuatavuna faifaina ma'itufa i 'a'ava.

*Ta na vaganago Yaubada lilivaotogineye.*

19 ✨Ekwavo, fai Iesu i wafa faifaida, 'ada fata ma yada sosoana wata ma yada venuafoufa'ala ta na luku Yaubada mataneye yana 'eba mia Tabutabuotogina nageneye.

20 ✨Basenadi Tutudaba Tabutabuotogina sisibodana kaleko 'wainega, tomotoga kebu 'adi fata 'waineamo i na lukulukuga, we'e 'asiau Yaubada yada 'eba luku 'ivauna wata miamia-vagina i 'idewai Iesu yana wafa 'wainega 'ana fata mataneye ta na luku. Tutuyanina Iesu tomogona i 'aniveleneni wafa 'waineye saibodanina vanuga 'eba velu'ui 'waineye i 'anilabu'i, yada 'eba 'isa Iesu 'waineamo 'ada fata ta na luku Yaubada 'waineye.

21 Wata Iesu yada Tovelomu Bwaikina, 'ida Yaubada yana 'Aila'a 'alo yana Vanuga 'ada To'isave'avina. 22 ✨Fai yada Tovelomu Bwaikina i miamia bega i lubwaineda ta na vaganago Yaubada lilivaotogineye. Iesu dayaginega nuada i lekoadi bega vita ta vevebaedaga yada sakona faifaiddi i 'ewayavuledi, wata tomogoda i lekoadi ufa vunavunagina 'wainega. Kebu ta na vuananaluga siwe ta na nuani mogitana wata ma yada vetumagana fa'alina ta na luku mataneye.

23 ✨'Akonadi Yaubada i vona'awaufaufa 'awaie 'ita'ita'i ta na veluagai 'wainega begaidi yada vetumagana ta yato-vagasedi vona'awafananina 'waineye, kumanina faifaina ta lulu'ivona. Fai kebu 'ana fata Yaubada yana vona'awafaufanina 'waideye i na geuya, ma yada tokemaiga ta na lulukamata. 24 Wata edavo ta na nuanuanidi wata i na nuanuanida, ma fueda ta na ve'ivaivaita, ta na vevesauluva 'atumaina wata ta na vevenuakalikali. 25 Tivetumagana 'ifwaidi i baibaila, kebu nuanuadi ma

fueda ta na vava'auta tafalolo faifaina, we'e 'ida kebu wata tafalolo ta na bailaga, i lubwaineda ta na vava'auta bega ma fueda ta na ve'ivaivaita. Mogitana ta na tokemaigeda fai ta 'iseni Iesu yana vila-vaitugana 'ana 'aiata sai'afoga.

*Yada sauluva ta na 'i'isave'avinidi i na nunago Iesu ta na vagavefwayafwayai.*

<sup>26</sup> ✧ 'Ai'edi Yaubada yana nuanua tonovidi ma 'adi 'aseta 'waideye bega ta vetumagana 'waidie mulieta sauluvanidi 'akonadi ta 'asetadi sakona, siwe ta na 'i'idewadiga, wata aitoi dayagina i na ilolo bega sakananidi Yaubada i na nu-  
atavunidi? Wata kebu tamu. <sup>27</sup> Vona mogitana kebu 'ana fata nuatavuna ta na veluagai, ta na kololo bwaikina ava'ai 'awaie i na souyediga 'waideye vonayavuga 'ana tutuye. Bei Yaubada 'ana tovedumwe'ai'ai vematavuloga i na veluagai 'ai-'ala'alata 'waineye i na 'alaogogodi. <sup>28</sup> ✧ Veimeanidi i maiga Mosese 'wainega, 'ai'edi aitoi i na vedumwe'ai'aiediga, tomotoga 'adi 'ailuga 'alo 'adi 'aitonu tomotoganina i na 'iseni i na lu'ivoneyeni, kebu tamu sai'afo i na 'isanuakalikalieni i na luvewafaimo. <sup>29</sup> ✧ We'e 'wa da nuaniga 'ai'edi tamu tomogo i na sakosakona bega Yaubada Natuna i na vagavefwayafwayaiga, 'ana vematavuloga bani'odi? Iesu dayagina Yaubada yana Veakutagona 'Ivauna 'wainega tomogonina yana sauluva i tonova Yaubada mataneye siwe i na venani-'avo'avovoga, bani'odi? Wata 'Anu'anunu 'Atumaina 'wainega nuakalikali i 'ewaiga siwe i awavesakoyeniga, bani'odi? Mogitana i lubwaineni vematavuloga bwaikao-  
togina i na veluagai Yaubada 'wainega. <sup>30</sup> ✧ Fai Yaubada ta 'asetai i vo,

Yau tomotoga 'adi vematavuloga a na veledi,

Yadi sakona faifaidi wata yau a na tutula.”

Wata i vo,

Yau 'Aueva yaku tomotoga a na veimeana vematavuloga i na veluagai.”

<sup>31</sup> Vona mogitana 'ai'edi Yaubada Miamia-vagaina ta na baileni 'ada vematavuloga ta na veluagai nimaneye, naninina faifaina ta na kololo-'afo'afo.

*Vita fuedi 'waidie ta na tovoi fa'alina.*

<sup>32</sup> Naninidi basenadi i souyediga 'waimie 'wa na nuanidi. Tutuyanina 'waineye Yaubada yami nuanua i kiavemagetadi Iesu 'ana 'aseta faifaina, vita tulina tulina 'wa veluagadi siwe kebu 'wa da be'uga 'wa tovtovoi fa'alina. <sup>33</sup> Tutuya 'ifwaidi 'aila'a matadie i awavesakoyemi wata i 'ivekokovimi, we'e tutuya 'ifwaidi emiavo 'ifwaidi tovetumagana vitanidi bani'odi

i veveluagadi 'wa 'isanuakalikaliedi 'wa 'i'ivaisedi 'omi 'adi 'auvo. <sup>34</sup> ✧Egavo i vetumagana begaidi i miamiani vanuga 'eba yogona 'waineye, ma yami nuakalicali 'wa fofogefedi. Wata to'ivekokovanidi ve'isakololo 'wainega yami vanuga wata yami kukua i lulueloelomiga, kebu 'wa da nunuasakoga 'wa sosoanamo fai 'wa 'asetai 'a'a'avididi we'e nani fuedi 'atumaiotogidi Yaubada 'wainega i 'eno-vagata 'waimie.

<sup>35</sup> Mogitana nagami 'wa vetoketoke vitanidi 'waidie bega tutuya de'e 'wa na totokemaiga bega tokemaiganina 'wainega tutula 'atumaiotogina 'wa na veluagai Yaubada 'wainega. <sup>36</sup> ✧I lubwainemi 'wa na vetoketoke bega 'ami fata Yaubada yana nuanua 'wa na 'i'idewadi, 'waidiega ava'ai i vona'awaufaufa i na velemiga 'wa na veluagadi. <sup>37</sup> ✧Ma yami tokemaiga 'wa na miamia fai Yaubada yana Buki nageneye i vo,

Kebu tutuya manamanawenaga kumanina i mimaiga sai'afoga i na le'wa,

Kebu i na 'ivogavogana.

<sup>38</sup> ✧'Ai'edi aitoi yana sauluva 'atumai'avana matakuye, yana vetumagana 'wainega i na miamia,

We'e 'ai'edi i na baila ma yana kololo i na vilaiga, faifaina kebu a na sosoanaga.”

<sup>39</sup> We'e 'ida kebu bani'odi, tomotoganidi i kololo i viladiga i na wafaotoga 'ai-'ala'alase. Mogitana 'ida ma yada vetumagana ta totokemaigeda bega 'ita'ita'i ta veluagai.

## 11

### *Vetumagana faifaina.*

<sup>1</sup> ✧Vetumagana side bani'odi. Naninidi nuanuada kebu ta da veluagadiga siwe ta 'asetai-'afo'afai 'awaie ta na veluagadi, wata ava'ai kebu ta da 'ise'isediga siwe ta nuani mogitana ta na veluagadi, yada nuanuanina 'ana wagava vetumagana. <sup>2</sup> Basenadiotoga 'ifwaidi tubudavo ma yadi vetumagana fa'alina, bega yadi vetumagananidi 'waidiega Yaubada i awave'atumaiedi.

<sup>3</sup> ✧Fai ta vetumagana Yaubada 'waineye ta 'asetai fwayafwaya, abama wata nani matatabuna i 'idewadi yana vona 'wainega, we'e ava'ai 'asiau ta 'ise'isediga, 'waidiega i 'idewadi kebu 'ada fata ta na 'isediga.

*Me Isileli tubudiavo Ebeli, Inoki wata Noa*

*yadi vetumagana ifufuna.*

4 ✧ Tomotoga 'ifwaidi ma yadi vetumagana side bani'odi. Basenadiotoga Ebeli i vetumagana Yaubada 'waineye begaidi yana 'anivelena-maimaiga 'aisaya sifi i velomuyeni Yaubada 'waineye, faifaina Yaubada i sosoana bega i awave'atumaieni. We'e tatana Keni yana 'anivelena-maimaiga 'ani'ani, bega Yaubada kebu i da sosoana wata i da awave'atumaieniga. Fai Ebeli tovetumagana, tutuyanina Yaubada i awave'atumaieniga wata i vo, Taunina tomogo yana sauluva tonovidi matakuye.” Avinodi Ebeli i wafa siwe yana vetumagana ifuifufuna i 'eno'eno 'asiau yada 'eba 'isa.

5 ✧ Wata Inoki i vetumagana Yaubada 'waineye bega kebu i da wafaga, Yaubada i vagavaiamo i naweni 'waineye, tomogona i luala-wayogeni. Bola kebu i da lakaga, faifaina Yaubada i awave'atumaieni i vo, A sosoana Inoki faifaina.” 6 'Ai'edi kebu ma yada vetumaganaga wata kebu 'ana fata Yaubada i na sosoana faifaيدا. 'Ai'edi aitoi nuanuana i na nago Yaubada 'waineye i lubwaineni i na vetumagana Yaubada i miamia, wata i lubwaineni i na vetumagana Yaubada i vevesauluva 'atumaina tomotoganidi i lulualeniga 'waidie.

7 ✧ Tamu wata tomogo 'ana wagava Noa i vetumagana Yaubada 'waineye bega ava'ai 'awaie i na souyediga faifaيدا i matakia 'waineye yana vona i ve'ililibuyeni, ma yana kololo waka i yogoni. 'Wei wata mwai bwaikina bola kebu i da souyediga siwe i vematayakayakamo. Wakanina 'wainega ma yana 'aila'a 'ita'ita'i i veluagai mwai bwaikaotogina 'wainega. Tomotoga 'ifwaidi kebu i da vetumagana bega Noa yana vetumaganayega yadi sauluva sakoidi i sivemagesedi we'e yana vetumagananina faifaina Yaubada i vo, Noa yana sauluva tonovidi matakuye.”

*Ebelamo yana vetumagana ifuifufuna.*

8 ✧ Basenadi Yaubada Ebelamo i goleni 'ana tuvada i na baileni i na nago 'ani'ie tamu 'awalawa 'waineye, 'awalawanina Yaubada i vona'awaufaufa Ebelamo i na veleni. Ebelamo Yaubada yana vona i vetumaganeni bega i vematayakayaka i tovoi i nago siwe bei i nunagoga kebu i da 'asetaigna. 9 Ma yana vetumagana i mia vona'awaufaufa 'awalawina 'waineye, siwe kebu yana vanugaga, vadavada i 'idewadi 'aisaya bunudiega, wakawaka bani'odi i miamia. We'e mulieta Yaubada vona'awaufaufanina i luvaitugani Ebelamo natuna Aisake wata tubuna Iakobo 'waidie, fwayafwayanina i na veledi, siwe taunidi Ebelamo bani'odi vadavada 'waidie i mia. 10 Ebelamo i miamia vadavada 'waidie, fai i lulukamata nuanuana i na luku abame Yaubada yana 'atamana miamia-vagaina 'waineye. 'Atamananina

nagami Yaubada yana nuanua 'waineye i venna'ivina-gaseni mulieta i 'idewai.

<sup>11</sup> ✧ Ebelamo ma yana vetumagana bega avinodi i ve'auvea wata Sela kakalidi, siwe Yaubada yana toketokena 'wainega i venatuna. I venatunaga fai Yaubada yana vona'awaufaufa Ebelamo yana 'aila'a i na vefue, vonanina Ebelamo i vetumaganeni, i nuani mogitana i na 'idewai. <sup>12</sup> ✧ Ebelamo i ve'auvea-'afo'afo sai'afoga i da wafa siwe fai i vetumagana, tomogonina 'aitamogana 'wainega 'aila'a bwaikaotogina i souyedi, lu'iawawa-wayoga wala'ai 'ana 'ilukulukuta bani'odi wata 'ubwana.

<sup>13</sup> Tomotoganidi faifaidi a vonavonaga, matatabudi ma yadi vetumagana i wafa. Bola ma yawaidie naninidi Yaubada i na velediga faifaidi i vona'awaufaufa, siwe kebu matatabuna i da veluagadi. Ma yadi vetumagana i nuani-dimo mogitana 'awaie i na souyediga faifaidi i sosoanamo. I vonavona mali tomotoga 'waidie, fwayefwayeye kebu yadi vanuga taunidi wakawaka wata toyaba. <sup>14</sup> Fai taunidi i fal-wakewakediga ta 'asetai taunidi yadi 'awalawa fwayefwayeye kebu faifaina i da nuanua we'e mogitana 'awalawa abame i nuaniuani, faifaina i lulukamata. <sup>15-16</sup> 'Ai'edi 'adi tuvada faifaina i da nuanuaga 'adi fata wata i da viladi siwe yadi nuanua bwaikina tamu 'awalawa 'atumaiotogina, 'awalawanina abame. Ebelamo ma yana 'aila'a nuanuadi Yaubada taiadi i na miamia, begaidi avinodi Yaubada bwaikaotogina siwe tutuyanina tomotoganidi i vo, 'Omu yama Yaubada," taunina kebu i da bunumayagediga fai 'akonadi tamu 'atamana i 'idewa-vagaseni faifaidi abame.

<sup>17-18</sup> ✧ Tamu tutuya Yaubada Ebelamo i silubuya nuanuana natuna i na velomuyeni 'waineye, Ebelamo kebu nuana i da loloi ma yana vetumagana i vematayakayaka. Avinodi Yaubada i vona'awaufaufa Ebelamo 'waineye yana 'aila'a i na vefue Aisake 'wainega, siwe Ebelamo igodi natuna yana tamogana i da luvewafai 'eba velomu 'waineye. <sup>19</sup> Ebelamo i nuani mogitana bega i vo, 'Ai'edi natuku a na luvewafai a na velomuyeni Yaubada 'waineye, 'ana fata wata i na sivetovoa wafayega." Sai'afoga i da luvewafai siwe Yaubada i talaboda bega 'wa da vo wafayega i da vevilai.

*Aisake, Iakobo wata Iosefa yadi vetumagana ifuifufuna.*

<sup>20</sup> ✧ Aisake i vetumagana Yaubada 'waineye bega i nuani mogitana tutuya mulina i na vesauluva 'atumaina natunavo 'waidie. Begaidi Iakobo wata Iso 'adi vona nuakalikali

'waineye, Aisake i velu'ui Yaubada 'waineye natunavonidi faifaiddi.

<sup>21</sup> ✧ Wata bani'odi Iakobo i vetumagana Yaubada 'waineye bega sai'afoga i na wafa yana wautoganayega i 'a'alive'avinana Yaubada i subisubiai, wata Iosefa natunavo 'adi vona nuakalikali faifaina i vevelu'ui bega Yaubada i na vesauluva 'atumaina 'waidie.

<sup>22</sup> ✧ Mulieta Iosefa i 'asetai sai'afoga i na wafa i vetumagana 'awaie Yaubada me Isileli i na viledi Itifita 'wainega, bega i vona-vagata i na tautauyaga luluna i na nawedi.

*Mosese yana vetumagana ifuifufuna.*

<sup>23</sup> ✧ Mosese tamana inana taiadi wata ma yadi vetumagana. Yadi tutuye Itifita 'ana kini yana veimea nuanuana kwakwama mwedamwedalidi iayetadi i na luluvewafadi siwe tutuyanina natudi i tubuga i 'iseni 'ana 'isa 'atumaiotogina bega kebu i da kolologa kini yana veimeanina faifaina. I vetumagana Yaubada i na 'ita'ita'ieni bega i giveni vanuge, bei i miamia weta'i 'aitonu.

<sup>24-25</sup> ✧ Mulieta me Itifita yadi kini natuna vevinena Mosese i veluagai i naweni yana vanuge i fayayeni. Mosese i taulai ma yana veimea wata yana 'ai'aiwabu fueidi fai taunina bani'odi kini tubuna. Siwe i vetumagana Yaubada 'waineye bega kebu nuanuana tutuya 'ale'usana nageneye taiadi i na miamia i na sosoana-'avo'avovo wata i na sakosakona, nuanuana enavo Yaubada yana tomotoga, kumanidiavo i vetofolova-maimaiga me Itifita 'waidie, taiadi 'adi vita i na vesala. <sup>26</sup> Awavesako wata sidibidibi faifaiddi kebu i da nuanua, i nuani 'ai'edi vita i na veluagai Yaubada 'ana Venua'ivina faifaina nani 'atumaina, fai i vetumagana 'awaie 'ana tutula miamia-vagaina i na veluagai Yaubada 'wainega, 'ai'aiwabunidi bwaikaotogidi me Itifita yadi 'ai'aiwabu kebu bani'odiga.

<sup>27</sup> ✧ Fai Mosese i vetumagana Yaubada 'waineye kebu i da kololo kini i na nuasakoga faifaina, i tovoi Itifita 'wainega i tauya i nago. Kebu i da vilai, ma yana tokemaiga i nago, Yaubada kumanina kebu tamu aitoi 'ana fata i na 'iseniga, 'wa da vo i da 'ise'iseni. <sup>28</sup> ✧ Wata fai i vetumagana Yaubada yana tomotoga me Isileli i na 'ita'ita'iedi, bega Yaubada yana vona i lu'ivoneyeni 'waidie, i vonedi 'aisaya sifi i na nikedidi yadi saiboda lilivadi i na luitaitalidi dayagidiega. I luitaitalidiga bega Yaubada yana anelose i uvi'agalatagonidi kebu i da nikedidi we'e me Itifita natudiavo tulaidi i luwewafadi.

*Me Isileli yadi souyagi ifuifufuna.*

✧ 11:21: Nag 48:15-16 ✧ 11:22: Nag 50:24-25 ✧ 11:23: Sou 1:22, 2:1-2

✧ 11:24-25: Sou 2:10 ✧ 11:27: Sou 12:51 ✧ 11:28: Sou 12:21-23



29 ✨Tutuyanina Mosese me Isileli i vagavaidi i souyedi Itifita 'wainega, me Itifita i tala'wavina mulidie. Fai me Isileli i vetumagana Yaubada 'waineye Eyaga Yamoyamoina i 'ivelalai, 'waineamo i damana 'wa da vo fwayafwaya lalaneamo, we'e me Itifita igodi i da damana i na 'ive'avinidiga faifaina, nika matatabudi i yemuwafa.

30 ✨Mulieta malamala fueidi i 'a'avana me Isileli i le'wai Kenani, 'awalawanina Yaubada i vona'awaufeufeniga 'waineye Yaubada yana veimea 'wainega nuanuadi 'atamana Ieliko i na kuali, bega Yaubada yana vonanina i vetumaganeni 'aiata 7 nagedie 'atamananina 'ana kali badubaduna wata manamanawena i luvivili. Fai ma yadi vetumagana lauvivila 'ana ve-7 'waineye kali i 'aniweali.

31 ✨Bola 'atamananina kebu i da leodiga tamu vavine toalagogona 'adi wagava Leabi me Isileli yadi tovetau'i'wala i 'ivaisedi i givedi yadi vanuge. Fai i vetumagana Yaubada 'waineye, tutuyanina i tala'avuidiga vavinenidi 'atumai'avadi i miamia, kebu i da wafa Yaubada 'ana tovedumwe'ai'ai taiadi.

32 Tovedumagana fueidi wata i miamiani siwe a nuani 'asa'aiana. 'Ai'edi wata nuanuaku, side tovetumagananidi a da veifufuyedi, Gidioni, Beleki, Samisoni, Iefeta, Devida, Samuela, wata Yaubada yana tolu'ivonavo.

33-34 ✨Tomotoganidi i vetumagana Yaubada 'waineye bega 'eba veimea 'ifwaidi taiadi i vetalaga i leodi, yadi veimea tonovidi, wata ava'ai Yaubada i vona'awaufaufaga 'waidie i veluagadi. Fai ma yadi vetumagana Yaubada 'waineye i 'ita'ita'iedi 'aisaya kasikasisidi laioni 'waidiega, 'ai-'ala'alata 'wainega, wata vetalaga 'waidie kebu tamu aitoi i da wafa kefata 'waidiega. Nagami kebu toketokediga siwe i vetoketoke i vemata'ai'ai vetalaga 'waidie bega mali tomotoga yadi tolugaviavo 'waidie i vetoketoke.

35 ✨We'e vevine 'ifwaidi yadi vetumagana 'wainega ediavo wafawafadi i yawasa.

We'e tomotoga 'ifwaidi i vetumagana Yaubada 'waineye siwe 'adi tovedumwe'ai'ai i 'ivekokovidi i wafa. Kebu nu-anuadi Yaubada i na baileni bega tovedumwe'ai'ainidi i na 'etoyavudi vita 'waidiega, ma yadi tokemaiga i tauyedi veviga wata wafa 'waidie. I vetumagana i 'asetai 'awaie mia 'atumaina wata miamia-vagaina i na veluagai, yadi mia fwayefwayeye kebu bani'odiga. 36 ✨Ifwaidi 'adi gaviavo i sidibidibiedi wata i fitalidi, we'e 'ifwaidi i yogonidi bulava kainumu 'waidiega i yatodi vanuga 'eba yogona 'waineye.

✨ 11:29: Sou 14:21-31 ✨ 11:30: Ios 6:12-21 ✨ 11:31: Ios 2:1-21, 6:25

✨ 11:33-34: Dan 6:22; Dan 3:23-27 ✨ 11:35: 1 Kin 17:17-24; 2 Kin 4:18-37

✨ 11:36: Iel 20:2, 37:15-16

<sup>37</sup> 'Ifwaidi fai i vetumagana Yaubada 'waineye kileuyega i tu-tuwafadi, 'ifwaidi soa 'wainega i bobolugedi, we'e 'ifwaidi i luwewafadi kefatayega. 'Ifwaidi i 'ivekokovidi wata vita i veledi, taunidi i vewekowekoma, i ve'wesena 'aisaya sifi wata goti bunudiega. <sup>38</sup> Taunidi tomotoga 'atumaotogidi, kebu i da lubwainedi tomia fwayafwaya 'ifwaidi sakoidi taiadi i na mi-amia. Kebu yadi vanuga, i mimiayaba-vuvua sali'avu'avuye wata 'oyeye, yadi 'eba mia ovuye wata watu'ai 'waidie.

<sup>39</sup> Tomotoganidi Yaubada i awave'atumaiedi yadi vetumagana fa'alidi faifaidi, we'e naninidi faifaidi i vona'awaufaufa i na velediga, fwayefwayeye kebu i da veluagadiga. <sup>40</sup> Kebu i da veluagadiga fai Yaubada nuanuana i na lukamata bega ma fuedeye yana nuanua 'atumaotogina ta na veluagai, bega matatabuda yada sauluva magemagetadi mataneye.

## 12

### *Iesu Keliso yada 'eba 'isa.*

<sup>1</sup> \*Tomotoganidi i vetumaganaga, 'aila'a bwaikina i tov-ififineda i 'ise'iseda begaidi ma yada vetumagana ta na vetafewa Yaubada faifaina. 'Ai'edi tomotoga nuanuadi i na ve'ililidega nagami naninidi i vevesitagonidiga bani'odi kaleko manamanawedi, i na 'a'idi bega 'adi fata yadi 'eba lilide matadie i 'eno'enova faifaina i na vetafewa. 'Ida wata ta na vetafewa, nuanuananidi i sisitagonidaga wata sakona 'eba be'u matatabuna ta na bailedi, bega sauluvanidi Yaubada nuanuana 'waidiamo ta na nunago. <sup>2</sup> \*Ta na nunagoiga matada ta na yato-vagasedi Iesu 'waineye, kumanina yada vetumagana lamuna wata yana 'aivaita 'wainega yada vetumagananina i na vetoketoke-'afo'afo. Wafa 'ai lagalagana 'waineye 'eba veviga wata 'eba bunumayaga siwe Iesu i nagona kebu i da 'ailove, ma yana tokemaiga taunina i tauyeni wafa 'waineye, 'ana bunumayaga faifaina kebu i da nuanuga fai i 'asetai 'awaie sosoana bwaikina i na veluagai. I wafana 'asiau ma yana sosoana wata ma yana veimea i miabui i miamia Yaubada 'ana 'atagiega.

<sup>3</sup> \*Vitanidi i veluagadiga 'wa na nuani. Tosakona i vedumwe'ai'aieni veviga i veleni siwe i tokemaigeni. Bega 'wa na nuanina 'ai'edi vita 'wa na velugaiga faifaina kebu 'wa na 'abiawa wata kebu 'wa na 'ailove. <sup>4</sup> Iesu veviga i veluagadi fai sakona taiadi i vetalaga, mulieta 'ana gaviavo i luwewafai. We'e 'omi 'wa vevetafewa sakona 'waidiega, yami veviga sai'afo, kebu wafa 'wa da veluagai Iesu bani'odi.

### *'Ida Yaubada natunavo.*

<sup>5</sup> ✧ Vona mogitana i lubwaineda ta na vevetafewa Yaubada faifaina 'alo voke nuami i fani tamu yana vona yana Buki nageneye? 'Ida natunavo i velu'ase'aseda i vo,

Natuku, 'ai'edi yamu 'Auvea vematavuloga i na velemuga tamu sauluva sakoina faifaina, 'u na nuave'avini.

I na lulumatanimuga, kebu yana vona faifaina 'u na logi.

<sup>6</sup> ✧ Egavo 'Auvea i nuakalikaliediga vematavuloga i veveledi bega yadi sauluva i na tonova.

Wata tomotoganidi 'waidie i ve'awa-natuna i nikenikedi."

<sup>7</sup> ✧ Fai Yaubada Tamami i nuakalicaliemi bega vematavuloga i vevelemi, vitanidi 'waidiega 'wa na 'asetai 'omi natunavo mogitana. Kwakwama fue di tamadiavo 'atumaidi siwe vematavuloga i veveledi yadi sauluva i na tonova faifaina, begaidi 'ai'edi vita 'wa na veluagadiga Yaubada Tamada 'wainega kebu 'wa na logi, 'ami 'aivaita. <sup>8</sup> Yaubada natunavo matatabudi vematavuloga i veveluagadi 'wainega, we'e 'ai'edi kebu, 'omi kebu natunavo mogitana, 'omi 'eda natudiavo. <sup>9</sup> Fwayefwayeye tamadavo vematavuloga i veveleleda begaidi ta veve'ililibuyedi, we'e mogitana Tamada 'anu'anunuda faifaidi ma yada ve'ililibu taunida ta na tauyeda 'waineye bega yada mia i na ve'atumai. <sup>10</sup> Wata fwayefwayeye tamadavonidi tutuya 'ale'usana 'waidie vematavuloga i veveleleda naninidi i nuanidiga 'atumaidi faifaidi, we'e Yaubada yana vematavuloga tonovidi 'ada 'eba 'aivaita bega yada sauluva i na tonova taunina yana sauluva magemagetadi bani'odi. <sup>11</sup> Tutuyanina vematavuloga ta veveluagadiga 'eba nuavita 'waideye kebu 'wainega sosoana ta da veveluagai. Siwe 'ai'edi venidi ta na nuanuanidiga 'awaie vuagina ta na veluagai, mia 'atumaina wata sauluva tonovidi.

<sup>12</sup> Fai Yaubada i kikiavetonovida vita wata 'we'wela 'waidiega bega kebu ta na 'ivemweamweadaga. Nimami 'wa na tauvefatotodi wata 'wa na tovoi fa'alina kebu 'agemi i na tatava. <sup>13</sup> Yaubada yana 'eda'eda tonovineamo 'wa na nunago kebu 'wa na baileniga bega 'ifwaidi yadi vetumagana mweadi 'wa da vo ve'agesako, kebu i na mwea-'afo'afo, yami 'aivaita 'wainega i na ve'atumai-vaitugana.

*Ve wata matakia.*

<sup>14</sup> ✧ 'Wa na vewavawava bega yami mia i na ve'atumai, kebu tamu aitoi taiadi 'wa na ve'ikwayekwayega. Wata 'wa na vewavawava yami sauluva i na tonovaotoga bega 'ami fata 'Auvea 'wa na 'iseni, we'e 'ai'edi aitoi yana sauluva kebu tonovidiga, kebu 'ana fata i na 'iseni. <sup>15</sup> ✧ Taunimi 'wa na 'i'isave'avinimi nika kebu tamu aitoi 'waimiega Yaubada

✧ 12:5: Voa 3:11-12 ✧ 12:6: Ve 3:19 ✧ 12:7: VeL 8:5 ✧ 12:14: Lom 12:18

✧ 12:15: Efe 4:31

yana nuakalikali i na 'ia'iaweniga. Wata 'wa na 'isa'isa kebu tamu sauluva sakoina i na vebwaika 'awasasamie, bani'odi viga sakoina yana damana tomotoga fueidi 'waidie, i na nunago matatabumi i na 'ivesakoimi. <sup>16</sup> ✨Wata taunimi 'wa na 'i'isave'avinimi kebu tamu aitoi 'waimiega i na lu'avo'avovo bunu 'ana nuanua sakoidi 'waidie. Wata taunimi 'wa na 'i'isave'avinimi Yaubada yana nuanua kebu 'wa na bailedi bani'odi Iso. Fai taunina tulaina, tamana yana wafa 'waineye 'ana veuveuta i da veluagadi wata Yaubada yana vona'awaufaufa tamana Aisake 'waineye i da damana 'waineye, siwe 'ani'ani siaina faifaina veuveutanina i vekimwaneyeni taina Iakobo 'waineye. Kebu Yaubada yana nuanua faifaina i da nuanua, 'ani'ani 'aisena faifaina i nuanua. <sup>17</sup> ✨Mulieta nuanuana veuveutanina 'ana vona'awaufaufa i na veluagai tamana yana vona nuakalikali 'wainega, siwe kebu 'ana fataga. 'Akonadi 'wa 'asetai ma matageuna tamana 'waineye i vevelu'ui igodi i na vevilai siwe kebu tamu 'eda i da 'eno'eno 'wainega 'ana veuveuta i na veluagai.

*Yaubada i veianeda Veakutagona 'Ivauna 'wainega.*

<sup>18</sup> ✨Yami nago Yaubada 'waineye kebu tubumiavo me Isileli bani'odiga. Basenadiotoga taunidi i nagoi 'Oya Sainai nani 'ifwaidi i 'isedi wata i nogaidi. Bei Yaubada i obuma, 'ai-'ala'alata, wawuwavulo bwaikina, wata dudubala i 'isedi. Kaukau bwaikina i nunuga, tomuyoana i kikianamali wata i dududuya. <sup>19</sup> Tomotoganidi evulega butu'aina wata bona bwaikina i nogaidi, i kololo-'afo'afo i velu'ui Yaubada 'waineye kebu nuanuadi bonananina i na noganogai. <sup>20</sup> Kebu 'adi fata i na tokemaigedi fai Yaubada i vonavona i vo, 'Ai'edi tamu aitoi 'alo 'aisaya de'e 'oyanina 'waineye i na maiga 'wa na tutuvewafai kileuyega. <sup>21</sup> 'Oyanina 'ana 'isa maigikolokololona bega Mosese i vo, Yau a kololo a tatatava.”

<sup>22</sup> ✨Omi kebu 'wa da nagoiga 'Oyanina Sainai Yaubada 'waineye we'e mogitana yami vetumagana 'wainega 'wa vaganagoi 'Oya Saioni, Yaubada Miamia-vagaina yana 'atamana. 'Atamananina abame i 'eno'eno 'ana wagava Ielusalema 'Ivauna, bei anelose fueotogidi ma yadi sosoana i va'auta i miamiani. <sup>23</sup> ✨Wata bei Yaubada natunavo i tubu'edakumetaga, kumanidiavo Keliso yana 'Aila'a, i vetumagana 'waineye bega 'adi wagava i kilumidi abame. Wata 'wa nagoi Yaubada 'waineye, taunina tomotoga matatabuda 'ada Toveimea vonayavuga faifaina. Wata bei towafa basenadi yadi sauluva tonovidi 'anu'anunudi

✨ **12:16:** Nag 25:33-34 ✨ **12:17:** Nag 27:32-40 ✨ **12:18:** Sou 19:12-13,16-20, 20:18-21 ✨ **12:22:** Ve 21:2, 5:11 ✨ **12:23:** Luk 10:20

i miamiani, 'akonadi 'atumai'avadi Yaubada mataneyeye. <sup>24</sup> ✧Wata 'wa nagoi Iesu 'waineyeye, taunina Yaubada yana Veakutagona 'Ivauna 'ana to'idewadewa bega 'wa veiana Yaubada taiadi. Wata bei Iesu dayagina i luitaitaleni, dayaganina 'wainega nuatavuna ta veluagai yada sakona 'waidiega, kebu bani'odi Ebeli dayagina. Tatana i luvewafaiga dayagina i vegole nuanuana mewa.

<sup>25</sup> ✧Begaiddi 'wa na 'isa'isa, Yaubada kumanina i vonavona 'waimie, kebu 'wa na bailaga, bonana 'wa na vematayakeyakeni. Basenadi Yaubada tomotoga i matakiaidi fwayefwayeye, mulieta egavo i baila kebu nuanuadi i na nogaiga kebu 'adi fata i na dega 'adi vematavuloga 'waidiega. We'e 'ida Yaubada yana Vona ta noganogai abamega begaiddi 'ai'edi kebu ta na vematayakeyakeniga kebu tamu sai'afo ta na dega 'ada vematavuloga 'wainega. <sup>26</sup> ✧Tutuyanina Yaubada i vona 'Oya Sainai 'wainega fwayafwaya i yue, siwe tutuya de'e 'akonadi i vona'awaufaufa i vo, Tamu tutuya wata fwayafwaya a na yuei, siwe kebu fwayafwaya 'aisenaga, wata abama a na yuei.” <sup>27</sup> Fai i vo, Tamu tutuya,” ta 'asetai Yaubada 'ana 'idewadewa matatabudi i na fetoga i na 'ewayavuledi, we'e naninidi kebu i na fetoga 'aisedi i na 'eno'enovii.

<sup>28</sup> Ta na vekaiwa Yaubada 'waineyeye fai 'ida ta luku yana 'Eba Veimea 'waineyeye, 'Eba Veimeanina kebu 'ana fata i na fetoi i na 'eno-vagata. Yaubada ta na kiavesosoani, ma yada ve'ililibu wata ma yada kololo ta na subisubiai. <sup>29</sup> ✧I lubwaineda bani'odi ta na subisubiai fai yada Yaubada taunina 'ai-'ala'alata, 'wainega nani matatabuna i na 'ala'a'avadi.

## 13

### *Naninidi 'waidiega Yaubada i na sosoana faifaida.*

<sup>1</sup> ✧Ma emiavo 'wa na vevenuakalikali fai matatabumi Keliso yana 'Aila'a. <sup>2</sup> ✧Kebu nuami i na fani 'wa na nuanuani bega tomotoganidi kebu 'wa da 'isa'inanadiga ma yami sosoana 'wa na goledi i na maia yami vanuge. Tomotoga 'ifwaidi bani'odi i munega anelose kebu i da 'isa'inanadiga siwe i goledi. <sup>3</sup> ✧'Ai'edi 'wa da miamiani vanuga 'eba yogona 'waineyeye nuanuami emiavo i da nuanuani i da fogefogemi, bega egavo vanuga 'eba yogona 'waineyeye i miamianiga 'wa na nuanuanidi 'wa da vo ma fuemie 'wa da luku. Wata bani'odi egavo vita i veveluagadiga tomotoga 'ifwaidi 'waidiega 'wa na nuanuanidi 'wa da vo 'omi wata vita 'wa da veveluagadi.

✧ 12:24: Ibu 8:6; Nag 4:10 ✧ 12:25: Ibu 2:1-3, 10:28-29 ✧ 12:26: Sou 19:18

✧ 12:29: VeL 4:24 ✧ 13:1: Ion 13:34 ✧ 13:2: 1 Fit 4:9 ✧ 13:3: Mad 25:36

4 I lubwaineda matatabuda nagi ta na ve'ililibuyeni. Iavetami kebu yami vevinevo 'wa na bailedi 'wa na lu'avo'avovo, wata bani'odi 'omi vevine yami lalamogavo 'wa na veve'ililibuyedi. Egavo taunidi i tauyedi bunu 'ana nuanua sakoidi wata ve'avula-'avo'avovo 'waidie Yaubada i na veimeyedi vematavuloga faifaina.

5 \*Taunimi 'wa na 'i'isave'avinimi bega mani 'ana nuakaliki kebu i na vebwaika 'waimie. Ava'ai 'akonadi 'waimie i 'eno'enoviga, siwe 'asa'aiana 'ami fata. Kebu fueidi faifaiddi 'wa na nuanua fai 'akonadi Yaubada i vo,

Kebu tamu tutuya a na bailemiga,

Kebu tamu sai'afo a na 'iawe-lovemiga.”

6 \*Fai kebu i na 'iawe-lovedaga kebu ta na kololo 'alo ta na venuanaluga ta na vonavonamo ta na vo,

'Auvea 'aku To'aivaita,

Kebu a na kolologa.

Naninidi sakoidi tomotoga i na 'idewadiga 'waikuye, kebu faifaiddi a na nuanua.”

*Yami to'edakumetavo bonadi 'wa na nogaidi.*

7 Yami to'edakumetavo nagami, 'wa na nuanuanidi, kumanidiavo Yaubada yana Vona i lu'ivona 'waimie. Basenadi yadi sauluva 'atumaidi wata yadi folova 'waidiega nani fueidi 'atumaidi i souyedi, naninidi 'wa na nuanuanidi wata yadi vetumagana 'wa na vetutuyamedidi. 8 \*Iesu Keliso kebu i na vetuli, bogi, 'asiau, wata tutuya matatabuna i na nagoga siwe 'asa'aiana 'ana 'isa'isanina.

9 \*Taunimi 'wa na 'i'isave'avinimi i na nunago vevavekali tulina tulina nuami i na 'ewadi i na vuyoyemi Yaubada yana 'eda'eda tonovina 'wainega. Yada nuanua Yaubada yana nuakaliki 'wainega i na kiavetoketokediga, i lubwaineni, we'e veimea 'adi ve'ililibu 'ani'ani faifaiddi 'waidiega kebu ta na vetoketokega. Egavo veimeanidi i veve'ililibuyediga kebu 'aivaita i na veluagai 'waidiega.

10 'Ida tovetumaganavo ma yada 'eba velomu, 'ai lagalagana bei Keliso i wafa siwe 'asa'aiana yada 'eba velomu. Egavo bola i folofolova vanuga 'eba velu'ui tuatuaina 'waineye kebu 'adi fata 'aivaita i na veluagai yada 'eba velomunina 'wainega. 11 \*Me Diu yadi tovelomu bwaikina 'aisaya dayagi'avadi i lukulukuedi Tutudaba Tabutabuotogina nageneye i 'a'anivelenedi Yaubada 'waineye tomotoga yadi sakona 'adi nuatavuna faifaina. We'e 'aisayadi i nunawedi mwalilige bei i kabukabunidi. 12 \*Begaiddi wata Iesu i wafa mwalilige bega tomotoga i

\* 13:5: Ios 1:5; 1 Tim 6:8-10 \* 13:6: Same 118:6 \* 13:8: Ve 1:17-18 \* 13:9: Lom 14:17; 1 Kol 8:8 \* 13:11: Vei 16:27 \* 13:12: Ion 19:17

'ivevunavunagidi yadi sakona 'waidiega taunina dayagina 'wainega. <sup>13</sup> ✧Fai i 'ivevunavunagida, sauluva tuatuaidi ta na bailedi 'wa da vo ta da nunagoi 'waineye mwalilige, bunumayaga wata saidibi ta na veluagai faifaina, taunina bani'odi i veluagai 'ai lagalagana 'waineye. <sup>14</sup> ✧Vitanidi ta na veluagadiga faifaina, kebu faifaidi ta na nuanua fai 'ida kebu tamu yada 'atamana miamia-vagaina i da 'eno'enoga fwayefwayeye, bola ta lalauala Yaubada yana 'atamana faifaina, 'atamananina 'awaie i na souyeni.

<sup>15</sup> ✧Begaidi Iesu 'wainega Yaubada ta na subisubiai kebu ta na 'ailove, yada subianina siwe 'asa'aiana yada 'anivelena-maimaiga 'waineye. Bonadega ta lulu'ivona faifaina bega subianina Yaubada 'waineye bonada vuagina.

<sup>16</sup> ✧Kebu nuami i na fani, tutuya fue di 'wa na vevesauluva 'atumaina wata ma emiavo 'wa na veve'ivaivaita. Sauluvanidi siwe 'asa'aiana yami 'anivelena-maimaiga Yaubada 'waineye, faifaidi i sososoana.

<sup>17</sup> ✧Yami to'edakumetavo 'wa na vematayakeyakedi wata taunimi 'wa na tauyemi yadi veimea 'waidie. Tutuya fue di i 'i'isave'avinimi kebu tamu tutuya i da 'ailove fai 'awaie yadi folovanina faifaina i na lu'ivona Yaubada 'waineye bega i na veimea tutula faifaina. 'Wa na vematayakeyakediga ma yadi sosoana i na folofolova, we'e 'ai'edi kebu, ma yadi nuavita i na folofolova siwe 'wainega kebu 'aivaita 'wa na veluagai.

<sup>18</sup> Nuanuaku 'wa na vevelu'ui faifaiku. 'Aku vebae 'waineye a lutonovi yaku folova wata yaku sauluva matatabuna tonovi'avadi, nuanuaku bani'odi i na 'enovagata. <sup>19</sup> ✧Nuanuaku bwaikina 'wa na toke 'wa na vevelu'ui faifaiku bega Yaubada i na vetune-matayo'oku a na wai 'waimie.

*Velu'ui tolu'iawawa faifaidi.*

<sup>20-21</sup> ✧A vevelu'ui faifaimi nuanuaku Yaubada, kumanina mia 'atumaina wata nuanua bikana 'adi to'anivelena, wata 'ada Toveimea Iesu Keliso 'ana tosivetovoi, i na kiavetoketokemi bega 'ami fata yana nuanua 'wa na 'i'idewadi. Yana wafa 'wainega Iesu i veto'isave'avina bwaikina, bega 'ida yana sifi i 'i'isave'avinida, wata yana wafanina 'waineye dayagina i ilolo, 'wainega Yaubada yana Veakutagona 'Ivauna wata miamia-vagaina i souyeni. Bega nuanuaku Iesu Keliso 'wainega Yaubada i na 'idewada nika yada sauluva matatabuna faifaidi i na sosoana. Iesu ma 'ana subia wata ma yana 'ai'aiwabu miamia-vagaina, kebu i na 'a'avaga. Vona mogitana, yaku nuanua bani'odi.

✧ **13:13:** 1 Fit 4:1,14 ✧ **13:14:** Ibu 11:16 ✧ **13:15:** Same 50:14,23 ✧ **13:16:** Fil 4:18 ✧ **13:17:** 1 Tes 5:12 ✧ **13:19:** Lom 15:30 ✧ **13:20-21:** Ion 10:11,18; 1 Tes 5:23; 1 Fit 5:10; Fil 2:13

*Vona 'ana 'eba ve'a'ava.*

<sup>22</sup> Ekwavo, nuanuaku bwaikina 'wa na tokemaigemi, yaku velu'ase'ase de'e 'wa na nogai fai leta de'e a kilumiga faifaimi kebu manamanawenaga. <sup>23</sup> Nuanuaku a na vonemi 'wa na 'asetai, iada Timoti 'akonadi i souyeni vanuga 'eba yogona 'wainega. 'Ai'edi i na le'wa-matayo'oga, taiadi 'a na wai 'a na fogemi.

<sup>24</sup> Yami to'edakumetavo 'waidie yaku vekaiwa 'wa na lu'ivona wata Yaubada yana tomotoga matatabudi 'waidie. Edavo 'awalawa Itali 'wainega yadi vekaiwa i vetunei 'waimie.

<sup>25</sup> Nuanuaku Yaubada ma yana nuakalikali i na vevesauluva 'atumaina 'waimie.

'Asa'aiana bani'odi.



## IEMESA

### Iemesa yana kiluma Yaubada yana 'Aila'a 'waidie.

De'e letanina 'ana tokiluma 'ana wagava Iemesa. To'aseta fuedi yadi nuanua Iemesanina kumanina Iesu taina. I kilumiga Yaubada yana 'Aila'a kumanidiavo taunidi i tauyedi Iesu Keliso 'waineye, faifaidi. 'Aila'anidi vita i veveluagadi Keliso 'ana tovedumwe'ai'ai 'waidiega begaidi i miave'eve'e'elagi fwayafwaya matatabuna 'waidie. 'Atamana fuedi 'waidie i miamiani bani'odi wakawaka we'e Iemesa, tovetumaganavo i miamianiga Ielusalema 'adi to'edakumeta bwaikina. (Folova 15:13, 21:18)

De'e letanina nageneye, sauluvanidi 'ida tovetumaganavo i lubwainedaga faifaidi i veifufu. Wata i tolinuata'i 'waideye bega yada sauluva 'waidiega yada vetumagana ta na sivemagesedi. Vetumagana ma 'ana 'eba 'isa, kebu vona'ava i lubwaineni wata folova taiadi. De'e letanina 'ana 'idi side bani'odi.

Vona-vekaiwa. 1:1

Vita 'waidie ta na sosoana wata ta na vetumagana fa'alina.

1:2-8

Vewekowekoma wata ve'ai'aiwabu faifaidi. 1:9-11

Vetoketoke 'eba sailubu 'waidie. 1:12-18

Kebu nogaya'ava wata vematayakayaka taiadi. 1:19-27

Kebu ta na lau'idi tomotoga 'adi 'isa 'waidiega. 2:1-13

Kebu vetumagana'ava, wata folova. 2:14-26

Meada ta na 'isave'avinidi. 3:1-18

Fwayafwaya 'ana nuanua sakoidi wata Seitani yana nuanua sakoidi ta na vetoketoke-'iawedi. 4:1-5:6

Yada tokemaiga wata yada vetumagana 'waidie ta na tovo-tovoi fa'alina 5:7-20

<sup>1</sup> Yau Iemesa, Yaubada wata Toveimea Iesu Keliso yadi tofolova, a na vekaiwa 'omi Yaubada yana 'Aila'a 'wa miave'eve'e'elagiga 'waimie, fwayafwaya matatabuna 'waineye.

*Vetumagana wata 'aseta faifaidi.*

<sup>2-3</sup> ✧Ekwavo, 'ai'edi vita wata sailubu tulidi tulidi i na souyedi 'waimie, i lubwainemi 'wa na sosoana bwaikina fai vitanidi yami vetumagana 'adi 'eba kiavefa'ala. I na fa'aliga 'ami fata 'wa na tokemaigemi vita 'ifwaidi 'waidie. <sup>4</sup> ✧Yami tokemaiganidi i na 'eno-vagata i na nagoga mulieta 'omi 'atumai'avami, yami nuanua kumagidi, kebu tamu ava'ai 'wainega 'wa na ve'ale'usa. <sup>5</sup> ✧We'e 'ai'edi aitoi 'waimiega

✧ 1:2-3: Lom 5:3-5; 1 Fit 4:13-14 ✧ 1:4: Mad 5:48 ✧ 1:5: 1 Kin 3:7,9-12; Mad 7:7

'asete 'wainega i na 'usaga, i lubwaineni i na velu'ui Yaubada 'waineye nika i na veleni bega 'ana fata ma yana 'asete i na vevenua'ivina-'atumai. I na veleniga fai taunina 'ani'anivelenina wata tonuakalikali tomotoga matatabuda 'waideye kebu nuana i da lololoi. <sup>6</sup> ✨Siwe tutuyanina 'wa na vevelu'uiga tamu nani faifaina kebu 'wa na venuanaluga, ma yami vetumagana fa'alina 'wa na nuani mogitana naninina 'wa na veluagai. Egavo i vevenuanaluga bani'odi yagina kaukau i bewebewedi wata i fetofetodi. <sup>7-8</sup> ✨Tomotoganidi bani'odi, yadi vetumagana mweadi kebu i da lubwainedi i na vo, Nani fuedi 'a na veluagadi 'Aueva 'wainega," fai i vevenuanaluga wata nuadi a'wadi, kebu tamu sai'afo ava'ai i na veluagai.

*Vewekowekoma wata ve'ai'aiwabu 'adi vona.*

<sup>9</sup> ✨Tovetumagana i vewekowekomaga i lubwaineni ma yana sosoana taunina i na awa'ai'aia fai Yaubada i silakai, i vagavaia i luku yana 'Aila'a 'waineye. <sup>10</sup> ✨We'e tovetumagana i ve'ai'aiwabuga i lubwaineni i na sosoana fai Yaubada i kiaobuyeni nika i nuani yana 'ai'aiwabunidi nani-'avo'avovo Yaubada mataneye. To'ai'aiwabu matatabudi 'awaie i na 'a'ava 'wa da vo welavi ididi i da avuta. <sup>11</sup> Inala i na lakalaka i na yayayata mosomoso ma idina i kukuve'awagi'ai i avuavuta, 'ana 'isa 'atumaina i 'ivesakoi. Wata bani'odi to'ai'aiwabu i na folofolova yana 'ai'aiwabu 'waidie tomogonina i na 'awagi'a nika i na 'a'ava.

*Vetoketoke 'eba sailubu 'waidie faifaina.*

<sup>12</sup> ✨'Ai'edi aitoi 'eba sailubu i na veluagai siwe kebu i na be'uga i na tovtovoi fa'alina 'eba sosoana 'waineye. I sitonovi nika i vetoketokega mia 'atumaina wata miamia-vagaina i na veluagai, 'asa'aiana 'ana tutula. Tutulanina basenadi Yaubada i vona'awaufaufa 'ida 'ana tonuakalikali matatabuda faifaia. <sup>13</sup> ✨'Ai'edi tamu tomogo 'eba sailubu i na veluagai i na sakonaga faifaina, kebu i na vo, Yaubada i sisilubuku," fai kebu 'ana fata Yaubada tamu sailubu i na veluagai sakona 'wainega, wata taunina kebu tamu aitoi i da silubuya bega i na sakona. <sup>14</sup> Sailubu side bani'odi. 'Ai'edi aitoi taunina yana nuanua sakoidi i na siloloi siwe 'asa'aiana taunina sailubu. <sup>15</sup> ✨Yana nuanuananidi sakoidi i na vetoketoke, taunina i na tauyeni 'waineye nika i na sakona. Sakonanina nuana i na 'ewai bei i na sakosakona, i na nagoga 'wainega tomogonina i na wafaotoga. <sup>16</sup> Ekwavo, taunimi 'wa na 'i'isave'avinimi i na nunago tamu aitoi i na vekaliemi.

✨ **1:6:** Ais 57:20 ✨ **1:7-8:** Iem 4:8; Luk 16:13 ✨ **1:9:** Iem 2:5; Iel 9:23-24; 2 Kol 6:10 ✨ **1:10:** 1 Tim 6:17; 1 Fit 5:5; Luk 12:16-21 ✨ **1:12:** Dan 6:1-28; Luk 6:22-23; Iem 5:11 ✨ **1:13:** 1 Fit 2:11; 1 Kol 10:13 ✨ **1:15:** Lom 6:23

17 ✧We'e naninidi 'atumaiotogidi 'ada 'aivaita faifaina ta veveluagadiga, matatabuna i mai abamega, 'ada nuakalikali. 'Ada tonuakalikalinina Yaubada, taunina abama 'adi mageta 'adi to'idewadewa, kebu i na vetuli. Inala i na lakaga nagami welavi 'wa'una bwaikina, we'e i na yayayataga 'wa'unanina i na vevesiai. Yaubada kebu bani'odi 'ai'wa'u, 'ana 'isa'isanina wata yana nuanua 'waideye 'asa'aiana bani'odi i na 'enovagata kebu i na vetuli. 18 ✧Fai nuanuana, mia 'ivauna wata 'atumaina i veleda yana Vona tonovina 'wainega bega 'ana 'idewadewa matatabuna 'waidiega 'ida ta kumeta.

*Yaubada yana Vona kebu nogaya'ava.*

19-20 ✧Ekwavo, a na vonemi 'wa na nuanuani. Kebu 'wa na veifufu-matamatayo'oga nagami 'wa na venuma'ivina, we'e tomotoga 'ifwaidi i na veveifufuga bonadi 'wa na nogaidi. Wata bani'odi kebu yami nuasako i na waloga fai kebu 'ana fata nuasako 'wainega yada sauluva i na tonova Yaubada mataneyeye, nuanuana yada sauluva 'atumai'avana. 21 ✧Fai nuanuana yada sauluva i na tonova, sakona tulina tulina wata bunu 'ana nuanua sakoidi 'wa na bailedi, ma yami nuaobu taunimi 'wa na tauyemi Yaubada 'waineyeye bega yana Vona i yatoiga nuamie 'wa na vematayakeyakeni, Vonanina 'ana fata i na 'ita'ita'iemi.

22 ✧'Ai'edi Yaubada yana Vona 'wa na nogaimo, taunimi 'wa na vevekalieimi, we'e mogitana ava'ai i vonemiga 'wa na 'i'idewadi. 23 'Wa na 'idewadiga fai 'ai'edi aitoi i na nogaimo we'e kebu i na foloviga taunina bani'odi tamu tomogo taunina maigina 'ana 'isa i na 'iseni nigo'ita 'waineyeye. 24 I na 'isenimo siwe kebu tamu ava'ai i na 'idewaiga i na nago nika 'ana 'isanina nuana i na fani. 25 We'e 'ai'edi aitoi Yaubada yana Vona i na 'i'isadewai, faifaina i na venuma'ivina nika kebu nuana i na fani i na 'i'idewai. I na 'i'idewaiga, nika wata Yaubada i na vevesauluva 'atumaina 'waineyeye. Yaubada yana Vonanina veimea tonovina, 'wainega i yavuda bega ma yada sosoana ta vevematayakeyakeni.

26 ✧'Ai'edi aitoi yana nuanua 'waineyeye i na vo, Yau totafalolo," siwe meana kebu i na 'isave'aviniga, yana tafalolo nani-'avo'avovo wata taunina i vevekalieni. 27 ✧'Ai'edi aitoi yana tafalolo tonovina wata 'atumaina Yaubada Tamada mataneyeye, side bani'odi i na vevesauluvedi. Fovafova wata 'wabu'wabulavo vita i veveluagadiga i na 'i'ivaisedi, wata taunina i na 'i'isave'avini bega sakona kebu i na damana 'waineyeye Yaubada 'ana tovedumwe'ai'ai 'waidiega.

✧ 1:17: 1 Ion 1:5 ✧ 1:18: 1 Fit 1:23; Ion 1:12-13 ✧ 1:19-20: Voa 10:19; Tol 7:9; Mad 5:22 ✧ 1:21: Kolos 3:8 ✧ 1:22: Lom 2:13 ✧ 1:26: Same 141:3 ✧ 1:27: Ais 58:6-7

## 2

*Kebu ta na vaie.*

<sup>1</sup> \*Ekwavo, fai 'omi 'wa vetumagana Iesu Keliso 'ada Toveimea Magemagetana 'waineye, bega kebu i da lub-wainemi tomotoga 'adi 'isa 'waidiega 'wa na vaie. <sup>2</sup> 'Ai'edi yami va'auta 'waineye tomotoga 'adi 'ailuga i na luku 'waimie, tamu, 'ai'aiwabuna, 'ana kaleko 'adi 'isa 'atumaidi wata ma 'ana didikumakuma 'ana tutula bwaikina, we'e tamu, wekowekoma, 'ana kaleko 'anilabulabu'ina wata yokeyokena, bani'odi 'wa na voneyedi 'adi 'ailuga 'waidie? <sup>3-4</sup> \*Voke 'ai'aiwabuna 'wa na ve'ililibuyeni 'wa na vo, Iama, side 'amu 'ivi 'atumaina, bei 'u na miabui," we'e tomogo i vewekowekomaga 'waineye 'wa na vo, Sino bei 'u na tovo-tovoi," 'alo 'wa na vo, Side bei 'efe'efeye 'u miabui," siwe 'asa'aiana 'akonadi 'wa vaie 'wa venua'ivina-sako.

<sup>5</sup> \*Ekwavo, a na vonemi, tomotoganidi i vewekowekomaga fwayefwayeye Yaubada i venua'ivinedi bega i na ve'ai'aiwabu yadi vetumagana toketokena 'wainega wata i na luku yana 'Eba Veimea 'waineye taiadi i na miamia. I na lukuga fai bani'odi basenadi Yaubada i vona'awaufaufa 'ana tonuakalikali 'waidie. <sup>6</sup> \*Wekowekoma Yaubada mataneye ma 'adi nuanua we'e 'omi 'wa vo 'ako, Nani-'avo'avovo," 'wa 'ivebunumayagidi. 'Wa da nuaniga, egavo ve'isakololoyega yami mani i eloelomi wata i nunawemi 'eba vonayavuga 'waidie? Wekowekoma 'alo 'ai'aiwabu? <sup>7</sup> To'ai'aiwabu mogitana, taunidi wata 'ami Toveimea Iesu Keliso 'ana wagava ma 'ana ve'ililibu i awavesakoyeni.

<sup>8</sup> I lubwaineda tomotoga matatabudi ta na veve'ililibuyedi bega 'ai'edi 'ada Toveimea Iesu yana veimea bwaikina 'wa na vematayakeyakeni, nani 'atumaina 'wa na 'i'idewai. Veimeanina i 'eno'eno Yaubada yana Buki 'waineye i vo, Emiavo 'wa na nunuakalikali taunimi 'ami nuakalikali bani'odi." <sup>9</sup> Siwe 'ai'edi 'wa na lau'idi tomotoga 'adi 'isa 'waidiega, tamu nuanuami, we'e tamu 'wa na vieyeni, siwe 'akonadi veimeanina 'wa geuya, 'wa sakona Yaubada mataneye. <sup>10</sup> 'Wa sakonaga fai 'ai'edi Yaubada yana veimea matatabuna ta na vevematayakeyakedi we'e veimeanidi 'waidiega tamu nani siaina ta na geuyaga, siwe 'asa'aiana matatabuna ta geudi. <sup>11</sup> \*Ta 'asetai ta geudi fai Yaubada i vo, Kebu 'wa na lu'avo'avovo bunu 'ana nuanua sakoidi 'waidie," kumanina wata i vo, Kebu 'wa na luvewafaga." 'Ai'edi kebu 'wa na lu'avo'avovoga bunu 'ana nuanua sakoidi 'waidie siwe 'wa na luvewafaga, 'omi veimea 'adi togeu.

12-13 \*'Awaie tomotoga matatabuda ta na vonayavuga

\* 2:1: Fol 10:34; 1 Tim 5:21; Iem 2:9    \* 2:3-4: Ion 7:24    \* 2:5: Mad 5:3

\* 2:6: Fol 16:19    \* 2:11: Sou 20:13-14    \* 2:12-13: Mad 5:7, 6:14-15

Yaubada mataneye, begaidi yada sauluva wata yada vona ta na 'i'isave'avinidi. Yana veimea 'adi togeu vematavuloga i na veluagai we'e egavo veimeanidi i vevematayakeyakediga yavuyavudi, Yaubada i na 'isanuakalikaliEDI. 'Ai'edi tomotoga 'ifwaidi 'wa na 'isanuakalikaliEDI fwayefwayeye Yaubada i na 'isanuakalikalimo kebu i na veimea 'ami vematavuloga faifaina, we'e 'ai'edi kebu 'wa na 'isanuakalikaliga, kebu tamu sai'afo Yaubada i na 'isanuakalikaliemi.

*Vetumagana ma 'ana 'eba 'isa.*

<sup>14</sup> Ekwavo, 'ai'edi aitoi i na vo, Ma yaku vetumagana Yaubada 'waineye,” siwe yana vetumagananina kebu ma 'ana 'eba 'isaga, ava'ai 'ana 'atumaina? Vetumagananina 'wainega 'ana fata 'ita'ita'i i na veluagai? A nuani kebu tamu sai'afo. <sup>15-16</sup> ✧ 'Ai'edi iamu tamu tovetumagana i na lase 'alo kebu 'ana kalekoga i na vekaukau, siwe 'waineye 'u na vo, Kaiwa iaku, Yaubada i na vesauluva 'atumaina 'waimuye, 'u miamia wata a nunago, 'u na 'ani'ani wata kebu 'u na vekaukau,” vona'ava, ava'ai 'ana 'atumaina? <sup>17</sup> Wata yada vetumagana bani'odi. 'Ai'edi vetumagana'ava kebu ma 'ana 'eba 'isaga, vetumagananina nani-'avo'avovo.

<sup>18</sup> Siwe tamu aitoi i na vo, Tomotoga 'ifwaidi i vevetumaganamo, we'e tomotoga 'ifwaidi i vevesauluva 'atumaina tomotoga 'waidie.” We'e yau a na tutuli a na vo, 'Ai'edi aitoi kebu i na 'a'aivaitaga tomotoga 'waidie kebu 'ana fata yana vetumagana i na veku. We'e yau a na vemu a vetumagana Yaubada 'waineye fai yana nuanua 'atumaIDI a 'i'idewadi. <sup>19</sup> 'Omu 'u vetumagana 'u vo, Yaubada i miamia, 'aiseotogina bwaikina, kebu wata tamu,” 'u vonaga mogitana, siwe wata bani'odi yaiaina i vetumagana, ma yadi kololo i tatatava fai i 'asetai 'awaie 'adi vematavuloga i na veluagai.

<sup>20</sup> 'Omu kebu nuamuga. A na vemu ta na vetumaganamo Yaubada 'waineye we'e yana nuanua kebu ta na vematayakeyakeniga, vetumagananina nani-'avo'avovo. <sup>21</sup> ✧ 'U na nuani tubuda Ebelamo, fai natuna Aisake i tauyeni i 'aniveleneni Yaubada 'waineye bega igodi i da velomuyeni, yana sauluva tonovidi Yaubada mataneye. <sup>22</sup> 'Wa 'iseni? Yana vetumagana wata ava'ai i 'idewaiga 'adi 'ailugana i folofofova, bega ava'ai i 'idewaiga 'wainega yana vetumagananina vetumagana mogitana. <sup>23</sup> Nika vonanina Yaubada yana Buki nageneye 'ana mogitana i souyeni i vo, Ebelamo i vetumagana Yaubada 'waineye bega i awave'atumaIDI i vo, Ebelamo yana sauluva tonovidi matakuye.” Wata tamu Ebelamo 'ana 'eba 'ainana, Yaubada iana. <sup>24</sup> Bega Ebelamo 'wainega

ta 'asetai yada sauluva i na tonova Yaubada mataneyeye kebu vetumagana 'aisena 'wainega, mogitana wata ava'ai ta na 'idewadiga 'waidiega.

<sup>25</sup> ✧ Wata bani'odi vavine toalagogona 'adi wagava Leabi. Ava'ai i 'idewaiga 'wainega yadi sauluva i tonova Yaubada mataneyeye. Basenadi me Isileli i le'wai Leabi yadi 'awalaweye vavinenidi i 'ivaisedi, yadi tovetau'i'wala i givedi yadi vanuge mulieta i vonedi tamu 'eda 'waineamo i viladi i nagoi ediavo 'waidie. <sup>26</sup> 'Ai'edi tamu tomotoga tomogo'avana kebu ma 'anu'anununaga, tomotoganina wafawafana, wata bani'odi 'ai'edi vetumagana'ava, kebu ma 'ana 'eba 'isa, vetumagananina wafawafana.

### 3

#### *Meada nani toketokena.*

<sup>1</sup> ✧ Ekwavo, 'ami 'aila'a 'wainega kebu nuanuaku fue di i na vetove Yaubada yana Vona faifaina. 'Akonadi 'wa 'asetai 'awaie tomotoga matatabuda ta na vonayavuga Yaubada mataneyeye i na veimeyeda, we'e 'ima tove 'ai'edi tomotoga 'a na vekaliedi yama vona 'waidiega Yaubada yana veimea toketokena i na yatoi 'waimeye vematavuloga faifaina. <sup>2</sup> Fueda tutuya fue di ta vevekali, naninidi kebu tonovidiga ta 'i'idewadi. Siwe 'ai'edi aitoi 'ana fata meana i na 'i'isave'avini bega kebu tamu tutuya i na vekali, tomogonina 'atumai'avana, wata yana sauluva matatabuna i na 'i'isave'avinidi.

<sup>3</sup> ✧ 'Ai'edi nuanuada 'aisaya osi ta na veimeyeni, 'awaneyeye kainumu ma bulavina ta na yatoi 'ana 'eba sivetovetonova, bega 'ana fata yada nuanua i na vematayakeyakeni. Kainumunina siaina, siwe 'ana fata 'wainega 'aisaya bwaikao-togina ta na veimeyeni. <sup>4</sup> Wata 'wa na nuani waka bwaikao-togina, kaukau bwaikina i 'ona'onai, siwe toniwaka wayaisi siaina 'wainega 'ana fata i na liavetovetonovi bega ava'aibe bei nuanuana i nunagoga, 'waineye i na nago. <sup>5</sup> ✧ Meada, wata bani'odi. Meada nani siaidi siwe 'waidiega 'ana fata sakona bwaikidi i na souyedi.

Wata 'wa na nuani 'ai-'ala'alata, meana siaina siwe 'wainega 'ana fata libi bwaikina i na 'alai. <sup>6</sup> ✧ We'e meada 'ai-'ala'alata bani'odi. Yadi 'eba mia 'awadeye, siwe sakona bwaikaotogina i sususula tomogoda matatabuna 'waidie. Meada 'wa da vo Seitani taunina i da luvetogali, bega meadanidi yadi 'ai toketokena 'wainega yada mia matatabuna i 'i'ivesakodi. <sup>7</sup> 'Aisaya matatabuna tomotoga

✧ 2:25: Ios 2:1-21, 6:17; Ibu 11:31 ✧ 3:1: Fol 20:28 ✧ 3:3: Same 32:9 ✧ 3:5: Voa 16:27; Same 73:8-9; Voa 26:20-21 ✧ 3:6: Mad 15:18-19

'ada fata ta na 'ivetomotomogodi, nika mogitana 'akonadi 'aisaya tulina tulina, daledaledi manuga taiadi wata igana ta 'ivetomotomogodi. <sup>8</sup> \*We'e meada, kebu tamu aitoi 'ana fata i na 'ivetomotomogoi, nani sakoina, kiavetonova-wayoga, 'wa da vo 'eba wafa tuva bani'odi nageneye i da 'eno'eno.

<sup>9</sup> Meada 'waidiega yada 'Auvea Tamada ta subisubiai, siwe wata meadanidi 'waidiega tomotoga Yaubada 'ana 'idewadewa taunina 'ana 'isa'isa bani'odi, ta yagayagaidi.

<sup>10</sup> \*Subia wata manini i sousouyedi 'awanina 'aitamogana 'wainega. Ekwavo, de'e bani'odi kebu i da lubwaineni.

<sup>11</sup> Kebu 'ana fata ufa-luluvuala 'aitamogana 'wainega ufa 'atumaina wata golana i na sousouyedi. <sup>12</sup> Ekwavo, wata kebu 'ana fata 'ala'ai i na vuaga kalibo vuagina i na souyeni, 'alo galaia i na vuaga, 'ala'ai vuagina i na souyeni, wata eyaga kebu 'ana fata i na veufaotoga. Bega kebu i da lubwaineni subia wata manini 'adi 'awa 'aitamogana 'wainega i na sousouyedi.

#### *'Aseta vevenua'ivinina Yaubada 'wainega.*

<sup>13</sup> \*Ai'edi 'waimiega tamu aitoi i na vo, Yaku 'aseta bwaikina a vevenua'ivina-'atumai," i lubwaineni ma yana nuaobu yana 'asetanina 'wainega i na vevesauluva-'atumai, 'wa na 'iseni nika 'wa na ve'awamogitana. <sup>14</sup> Siwe 'ai'edi yamu nuanua 'waineye ve'unumagigi golagolana i na 'eno'enoga wata 'aisemu 'amu wagava yana vebwaika faifaina 'u na nuanuaga, kebu 'u na vekali taunimu 'u na awa'ai'aimu 'u na vo, Yau to'aseta." <sup>15</sup> De'e nuanuananidi igodi 'wa vo, 'Aseta," siwe kebu i da obuma abamega, we'e mogitana fwayafwaya 'ana nuanua, wata bunu 'ana nuagiva, sauluvanidi yaiaina yadi sauluva bani'odi. <sup>16</sup> 'Ai'edi ve'unumagigi wata veumokai ta na 'isedi, bei wata ve'ikwayekwayega sakona tulina tulina taiadi ta na veluagadi.

<sup>17</sup> \*We'e 'ai'edi 'aseta vevenua'ivinina Yaubada i na veledaga, nagami yada sauluva 'atumai'avadi, mulieta ta na vevesauluva-bikana, mali tomotoga yadi nuanua ta na veve'ililibuyedi, ta na veveiana, ta na 'i'isanuakalikali mogitana wata 'asetanina vuagina ta na ve'ivaivaita, kebu ta na vaie wata kebu tamu aitoi ta na vekalieni. <sup>18</sup> \*Ai'edi sauluva bikanega ta na veveiana 'wa da vo tamu bila ta da bakuli, mulieta vuaga sauluva tonovina i na souyeni.

## 4

### *Taunimi 'wa na tauyemi Yaubada 'aiseotogina 'waineye.*

\* 3:8: Lom 3:13    \* 3:10: Efe 4:29    \* 3:13: Efe 4:1-2    \* 3:17: Iob 28:28

\* 3:18: Mad 5:9

1 ✧Awale 'ifwaimi tauni'avami 'wa veve'ikwayekwayega wata 'wa vevetalaga? Fai tomogomie nuanua sakoidi nuanuadi i na vetoketoke. 2 Nani 'ifwaidi nuanuami siwe kebu 'ami fata 'wa na veluagadi, begaidi nuanuami luvewafa. Mali tomotoga yadi kukua faifaidi 'wa nunuagiva siwe kebu 'ami fata 'wa na 'ewadi begaidi 'wa veve'ikwayekwayega wata 'wa vevetalaga. Nani fueidi nuanuami siwe kebu 'wa da veveluagadiga fai kebu faifaidi 'wa da vevelu'ui Yaubada 'waineye. 3 ✧Siwe 'ai'edi 'wa na velu'ui Yaubada kebu i na velemiga fai yami nuanua wata taunina yana nuanua kebu taiadi i da vesala, taunimi yami 'eba sosoana 'aisedi faifaidi 'wa vevelu'ui.

4 ✧'Omi yami sauluva 'wa da vo vavine yadi lamoga i da baileni i da nago 'ana gaviavo taiadi i da lulu'avo'avovo. I lubwainemi 'wa da 'asetai, 'ai'edi taunimi 'wa na tauyemi fwayafwaya 'ana nuanua sakoidi 'wa na veianediga, siwe 'asa'aiana 'wa vegavia Yaubada 'waineye. 'Ai'edi aitoi fwayafwaya 'ana nani nuana i na 'ewai, kebu 'ana fata i na veiana Yaubada taiadi, i na vegavienimo. 5 ✧Sauluvanina faifaina i kilumi Yaubada yana Buki 'waineye i vo,

'Anu'anunu Yaubada i veledaga nuanuana bwaikina taunida ta na tauyeda 'aiseotogina 'waineye i na 'i'isave'avinida.”

Vonanina kebu 'wa na vo 'ako, Nani-'avo'avovo.” 6 ✧Mogitana 'ai'edi taunida ta na tauyeda tamu nani 'waineye, Yaubada i na ve'unumagigi, siwe taunina to'anivelena bwaikina fai yana Buki 'waineye i vo,

Engavo taunidi i awa'ai'aidiga Yaubada i ve'idi'idiedi, we'e tonuaobu, ma yana nuakalikali i 'i'ivaisedi.”

7 ✧Fai tonuaobu i nunuakalikali, taunimi 'wa na tauyemi yana nuanua 'waidie. Seitani 'wa na veugeugeni nika i na dega. 8 'Wa na vaganago Yaubada lilivaneye wata taunina i na mai lilivamie. 'Omi 'wa sakosakonaga i lubwainemi yami sauluva 'waidiega 'wa na vevunavunaga. 'Omi 'wa vevenuanaluga Yaubada faifaina, 'wa na nuavilami 'aiseotogina faifaina 'wa na nuanua. 9 Yami sakona faifaidi i lubwainemi 'wa na nunuavita, 'wa na 'we'we'wela wata 'wa na tatainu'wanu'wa. 'Omi 'wa sososoana-'avo'avovoga wata 'wa namanamaga 'asa'aiana, 'wa na nunuavitamo 'wa na 'we'we'wela. 10 'Auvea mataneye taunimi 'wa na kiaobuyemi, mulieta i na kialakaimi.

11 ✧Ekwavo, kebu emiavo tovetumagana 'wa na awavesakoyedi. 'Ai'edi aitoi iana i na awavesakoyeni

✧ 4:1: Gal 5:17 ✧ 4:3: Mad 6:9-13 ✧ 4:4: 1 Ion 2:15 ✧ 4:5: Mad 6:24  
✧ 4:6: 1 Fit 5:5; Iob 22:29 ✧ 4:7: 1 Fit 5:8; Efe 6:11-12 ✧ 4:11: Lom 2:1, 14:4



'alo i na 'amalakibuyeni, siwe 'asa'aiana Yaubada yana veimea nuakalikali faifaina i na awavesakoyeni i na vo, Vekali.” 'Ai'edi veimeanina 'u na 'amalakibuyeniga, 'omu kebu tovmatayakayakaga, we'e mogitana 'wa da vo 'omu veimeanina yana toveimea. <sup>12</sup> Yaubada 'aiseotogina veimea 'ana to'anivelena, 'awaie ta na vonayavuga mataneye i na veimeyeda, bega taunina 'ana fata i na 'ita'ita'ieda 'alo i na veimea ta na wafaotoga. Emiavo 'wa 'amalakibuyediga, 'wa da nuani, 'omi Yaubada?

*Kebu taunida ta na awa'ai'aida.*

<sup>13</sup> ✱'Omi taunimi 'wa awa'ai'aimiga a na vonemi. 'Wa vonavona 'wa vo, 'Asiau 'alo 'awa'awai ta na nagoi tamu 'atamana bwaikina 'waineye yada sitoa ta na vetovoia bei malamala 'aitamogana ta na miamia bega mani bwaikina ta na veluagai.” <sup>14</sup> Siwe kebu 'wa da 'asetai ava'ai 'awa'awai i na souyeni 'waimie. Budibudi ta na 'iseni, kebu tutuya man-amanawenaga i na 'awa'u'umi. 'Omi wata bani'odi, yami mia fwayefwayeye 'ana vemanawe kebu 'wa da 'asetai. <sup>15</sup> ✱We'e mogitana side bani'odi 'wa da voneyedi 'wa da vo, 'Ai'edi 'Auvea i na tauyeda ma yawaida ta na miamia side naninidi wata naninidi ta na 'idewadi.” <sup>16</sup> We'e 'omi yami nuanua tulina, ma yami nualaka 'wa awa'ai'aimi taunimi yami nuanua faifaidi. 'Omi wata tomotoga matatabudi taiadi 'wa awa'ai'aimiga, 'wa sakona. <sup>17</sup> 'Ai'edi aitoi tamu sauluva 'atumaina i 'asetai i lubwaineni i da 'idewai, siwe i na bailaga, 'akonadi i sakona.

## 5

*Tove'ai'aiwabu 'adi vona.*

<sup>1</sup> ✱We'e 'omi 'wa ve'ai'aiwabuga a na vonemi. I lubwainemi 'wa na 'we'we'wela wata 'wa na tainu'wanu'wa fai veviga bwaikina sai'afoga i na souyedi 'waimie. <sup>2</sup> Yami 'ai'aiwabu i mwadabu we'e 'ami kaleko 'walu'walu i 'anidi. <sup>3</sup> Yami mani wata yami kukua 'akonadi i sako, yadi sakonina 'wainega i ve 'omi umokaimi, kebu 'waidiega 'wa da 'a'aivaitaga. 'Ai'aiwabunidi nuami i 'ewadiga yami 'eba 'isa, 'awaie vematavuloga 'wa na veluagai 'ai-'ala'alase. Vonayavuga 'ana 'Aiata 'akonadi i velilivana we'e 'omi 'ai'aiwabu 'wa 'e'etokwau. <sup>4</sup> Yami bakula 'adi tofolovavo kebu 'wa da tututulidiga tutulanidi i toke i vonevonemi, 'wa noganogai 'alo kebu? Yami to'aiala yadi 'we'wela 'akonadi 'Auvea Yaubada Bwaikaotogina i noganogaidi. <sup>5</sup> Yami mia fwayefwayeye 'asa'aiana nuanuami kukua bwaikaotogina, 'ani'ani 'iwana'avadi wata 'wa sososoanamo. Taunimi

✱ 4:13: Luk 12:18-21 ✱ 4:15: Fol 18:21 ✱ 5:1: 1 Tim 6:9-10; Mak 4:19; VeL 24:15; Mad 6:19-21

'wa veve'animi vonayavuga 'waineye i na 'ageyatoyemi.  
 6 Tomotoganidi yadi sauluva 'atumaidi 'wa vevevita-  
 maimaigidi toveimea matadie bega yadi veimea 'waidiega  
 'wa luluvewafadi, taunidi 'adi 'aivaita faifaina kebu 'adi fata  
 i na kwayegemi.

*Ma yada tokemaiga Iesu ta na lulukamaseni.*

7 ✨We'e 'omi ekwavo, i lubwainemi tutuya fuedi 'wa na  
 totokemaiga i na nagoga 'ada Toveimea Iesu i na vilai. To-  
 bakula yadi sauluva yada 'eba 'isa. I na tokemaiga nagami  
 i na tauvebika mulieta 'ana tutuya mogitana 'waineye i na  
 bakula. Wata ma yadi tokemaiga i na lulukamata nagami i na  
 kumaga mogitana mulieta i na 'aiala, bega yadi fwayafwaya  
 'wainega 'ani'ani 'atumaidi i na veluagadi. 8 ✨Omi wata  
 bani'odi 'wa na totokemaigemi, 'wa na tovoovoi fa'alina fai  
 'ada Toveimea Iesu yana vila-vaitugana sai'afoga.

9 ✨Kebu ma yami luvulewa emiavo 'wa na vebonavolu-  
 voluyedi. 'Ai'edi bani'odi 'wa na vesauluvediga Yaubada i  
 na veimea vematavuloga 'wa na veluagai. Toveimeanina i  
 le'wa-'afo'afo i na lukuma. 10 ✨Wa na nuani 'Auea yana  
 tolu'ivonavo, 'ana wagavayega i lu'ivona, taunidi yami 'eba  
 'isa, yadi tokemaiga vita 'waidie 'wa na vetutuyamedi. 11 ✨Fai  
 i vetoketoke vita 'waidie bega ta goledi tosooana. 'Akonadi  
 Iobi valana 'wa nogai basenadiotoga vita wata veviga 'waidie  
 i tokemaigeni, wata 'wa 'asetai ava'ai 'Auea i 'idewai 'eba  
 ve'a'ava 'waineye. Iobi 'aivaita bwaikina i veluagai fai  
 'Auea to'isanuakalikali mogitana, ma yana nuakalikali i  
 vevesauluva 'atumaina 'waideye.

12 ✨Ekwavo, wata tamu nani bwaikaotogina a na ve  
 'waimie. 'Ai'edi 'wa na vona'awaufaufaga kebu tamu ava'ai  
 'wa na 'inanai yami vona'awaufaufa 'ana kiavetoketoke  
 faifaina. Kebu abama 'wa na 'inanai, fwayafwaya 'alo wata  
 tamu nani. 'Ai'edi tamu nani mogitana 'wa na 'idewaiga 'wa  
 na vo, E'e," we'e 'ai'edi kebu, 'wa na vonamo 'wa na vo, Kebu."  
 Kebu yami vona i na vefuega bani'odi 'wa na vo, Tamada,"  
 nika kebu vematavuloga 'wa na veluagai Yaubada 'wainega.

*Velu'ui faifaina.*

13 ✨Ai'edi 'waimiega tamu aitoi vita i veveluagai, i lub-  
 waineni i na velu'ui Yaubada 'waineye. 'Ai'edi 'waimiega  
 tamu aitoi i sososoana, i lubwaineni i na lei-subisubia  
 Yaubada 'waineye. 14 'Ai'edi 'waimiega tamu aitoi i vi-  
 gaga, i lubwaineni tovetumagana 'adi to'edakumetavo i na  
 'iyoanidi, i na maia, faifaina i na velu'ui Yaubada 'waineye

✨ 5:7: Gal 6:9; Ibu 10:36-37 ✨ 5:8: 1 Tes 3:12-13; Fil 4:5 ✨ 5:9: 1 Kol 4:5

✨ 5:10: Mad 5:11-12 ✨ 5:11: Iob 42:10-13; 1 Fit 2:19 ✨ 5:12: Mad 12:36

✨ 5:13: Same 50:15; Kolos 3:16

wata bunama i na iwagi tovigana 'waineyeye 'ada Toveimeea Iesu 'ana wagavayega. <sup>15</sup> ☆Velu'uinina ma yadi vetumagana i na velu'ui tovigana i na ve'atumai, 'ada Toveimeea i na 'ive'atumaia. We'e 'ai'edi i sakonaga, nuatavuna i na veluagai. <sup>16</sup> ☆Begaidi 'aitamogana 'aitamogana yami sakona 'wa na lulu'ivoneyedi emiavo 'waidie, wata 'aitamogana 'aitamogana emiavo faifaidi 'wa na vevelu'ui bega Yaubada i na 'ive'atumaimi. Tomotoga yadi sauluva tonovidi Yaubada mataneyeye i na velu'uiga, yadi velu'ui kasikasisidi, ma 'adi tutula.

<sup>17</sup> ☆Ilaitia tomotoga 'ida bani'odi, i toke i velu'ui nuanuana 'wei i na tova Yaubada 'ana tovedumwe'ai'ai 'waidie, nika mogitana malamala 'aitonu wata sai'afo nagedie 'wei kebu. <sup>18</sup> Mulieta wata i velu'ui-vaitugana nuanuana i na 'wei, nika i 'wei bega fwayafwaya 'wainega mosomoso wata 'ani'ani i souyedi.

<sup>19-20</sup> ☆Ekwavo, de'e vonanina kebu nuami i na fani. 'Ai'edi aitoi 'waimiega Yaubada yana Vona Tonovina 'wainega i na vuyo, mulieta tamu aitoi i na 'ivaiseni bega i na nuavilai yana yogobalabala 'wainega, to'aivaitanina 'akonadi i 'ita'ita'ieni wafa 'wainega we'e tosakonanina nuatavuna i na veluagai sakona fuedi faifaidi.

'Asa'aiana bani'odi,  
Yau Iemesa.

# 1 FITA

## Fita yana kiluma nagami.

Leta de'e Fita i kilumi i nago tovetumagananidi i mi-ave'eve'e'elagiga 'waidie. Tovetumagananidi 'awalawa fueidi 'waidie i miamiani bani'odi wakawaka. (1 Fita 1:1) Tutuyanina Fita i miamia Loma, 'atamananina tamu 'ana wagava Babiloni, de'e letanina i kilumi.

Tovetumaganavo vita tulina tulina i veveluagadi Loma gabemani 'waidiega fai Iesu Keliso i vetutuyameni. Fita nuanuana i na kiavetoketokedi bega ma yadi sosoana i na tokemaigedi i na tovtovoi fa'alina. Wata Fita i tolinuata'i 'waidie 'adi 'ita'ita'i faifaina, Iesu yana tokemaiga vita tulina tulina 'waidie faifaina wata yana vila-vaitugana faifaina bega i na nuanuanidi nika i na vetoketoke. Wata mageta 'ana sauluva Iesu Keliso 'ana tovetumaganavo 'adi laubwaina faifaina wata i veifufu. De'e letanina 'ana 'idi side bani'odi.

Vona-vekaiwa. 1:1-2

Tolinuata'i bega i na 'asetai Yaubada yana 'ita'ita'i. 1:3-12

Mageta 'ana sauluva faifaina i veifufu. 1:13-2:10

Tovetumaganavo yadi vematayakayaka faifaina. 2:11-3:7

Vita ta na veluagadi Keliso 'ana vetutuyama faifaina. 3:8-4:19

Veifufu tulina tulina tovetumaganavo faifaiddi. 5:1-11

Yana 'alanuai 'ifwaidi. 5:12-14

<sup>1</sup> Yau Fita, Iesu Keliso 'ana tomata'aulele a vekaiwa 'omi tomotoganimi Yaubada i venua'ivinemiga 'waimie. 'Omi 'wa dega Iesu 'ana tovedumwe'ai'ai 'waidiega 'wa veyavuyavula mali 'awalawa 'waidie. Side 'awalawanidi 'waidie, Fonito, Galetia, Kafadosia, Eisia wata Batinia. <sup>2</sup> \*Basenadiotoga Yaubada Tamada i 'asetami i venua'ivinemi nuanuana 'omi yana tomotoga, wata 'Anu'anununa 'Atumaina 'wainega yami sauluva matatabuna i tonova mataneye. Wata Yaubada i venua'ivinemi Iesu Keliso 'wa na vematayakeyakeni, taunina dayaginega yami sakona i iwalekolekoadi bega 'atumai'avami Yaubada mataneye.

A vevelu'ui faifaيمي nuanuaku Yaubada ma yana nuakalikali i na vevesauluva 'atumaiotogina 'waimie wata nuanua bikana i na vevelemi wata yami mia i na ve'atumaiotoga.

*Iesu Keliso 'waineye vetumagana-vagata.*

<sup>3</sup> \*Ma yada vekaiwa Yaubada ta na subiai, taunina Iesu Keliso 'ada Toveimea Tamana. Fai i 'isanuakalikaliada

bwaikina mia 'ivauna wata 'atumaina ta veluagai Iesu Keliso yana tovi-vaitugana 'wainega, bega 'asiau ta vetumagana ta nuani mogitana mia 'atumaina wata miamia-vagaina ta na veluagai. <sup>4</sup> Mianina wata 'ai'aiwabu taiadi, faifaidi basenadi Tamada i vona'awaufaufa 'awaie i na veleda, abame i 'i'isave'avinidi bega kebu i na 'anikudadi, 'alo i na sako, 'alo i na 'watu. <sup>5</sup> ✨Omi yami vetumagana 'wa yato-vagasedi Yaubada 'waineye bega yana toketokena 'wainega i 'i'ibababalemi i na nagoga tutuya 'ana 'eba ve'a'ava 'waineye yana 'ita'ita'i nonogina 'wa na veluagai 'ai'aiwabunidi taiadi.

<sup>6</sup> ✨'Asiau vita tulina tulina 'wa veveluagadi Iesu 'ana tovedumwe'ai'ai 'waidiega bega 'wa nunuavita, siwe kebu i na 'eno-vagata. We'e 'wa na nuani naninidi 'atumaidi 'awaie 'wa na veluagadi Yaubada 'wainega begaidi 'wa na sososoanamo. <sup>7</sup> Yaubada vitanidi i tauyedi i sousouyedi 'waimie nuanuana i na 'asetai yami vetumagana toketokena 'alo kebu. 'Ai'edi tomotoga golida i na alai fwayafwayayega, nagami i na vetagovi golida i na 'awakoluya we'e yogo i na koiyavuleni bega i na 'asetai golida 'aisena i 'eno'eno 'atumai'avana, 'ana tutula bwaikina. Wata yada vetumagana bani'odi. Golida 'a'a'avina, nani siaina Yaubada mataneyeye, we'e yami vetumagana nani bwaikina 'waineye nuanuana i na sisitonovimi vita 'waidiega i na 'isemi yami vetumagana 'atumaina wata toketokena. 'Ai'edi yami vetumagana fa'alina vitanidi 'waidie, 'aiatanina Iesu Keliso i na souyeni, subia, 'ai'aiwabu wata ve'ililibu 'wa na veluagadi Yaubada 'wainega. <sup>8</sup> ✨Kebu tamu tutuya Kelisonina 'wa da 'iseniga, siwe 'wa nunuakalikali. 'Asiau wata kebu 'wa da 'ise'iseniga siwe ma yami vetumagana taunimi 'wa tauyemi 'waineye, begaidi yami sosoana bwaikaotogina kebu ta na vona. <sup>9</sup> Yami sosoananina, sosoana mogitana fai 'ita'ita'i 'wa veveluagai Yaubada 'wainega, kumanina faifaina 'wa vetumagana.

*Basenadiotoga Yaubada yana tolu'ivonavo i vona-vagata 'ada*

*'ita'ita'i faifaina.*

<sup>10</sup> ✨'Ita'ita'inina faifaina basenadiotoga Yaubada yana tolu'ivonavo i lauala-'atumai wata i velutolitoli nuanuadi i na 'asetai. Yadi 'asetai sai'afo siwe i lu'ivona i vona-vagata 'ita'ita'i Yaubada i na velemi 'ami nuakalikali. <sup>11</sup> ✨Keliso 'Anu'anununa i agedi i vonedi i vo, 'Awaie Keliso vita fueidi bwaikidi i na veluagadi we'e yana tovi-vaitugana 'waineye 'ai'aiwabu magemagetadi i na veluagadi abame." 'Ida ta

✨ **1:5:** Kolos 3:3-4; Fol 20:32; Ion 6:28 ✨ **1:6:** Ibu 12:11; 1 Fit 5:10; Iob 23:10; Iem 1:3 ✨ **1:8:** Ion 20:29 ✨ **1:10:** Ais 53:1-12 ✨ **1:11:** Luk 24:26-27

'asetadi naninidi i souyedi yada tutuye, we'e basenadiotoga tolu'ivonanidi igodi nuanuadi i na 'asetadi ava'ai tutuyaga, wata naninidi bani'odi i na munega i na souyedi. <sup>12</sup> ✨Wata Yaubada i vonedi i vo, 'Wa vetolu'ivonaga kebu taunimi 'ami 'aivaita faifaina, mali tomotoga faifaidi bola kebu i da tubuga.” Vona mogitana naninidi 'akonadi i souyedi yada tutuye, Iesu Valana 'Atumaina 'wainega 'wa nogai to-lau'age 'waidiega. Yaubada 'Anu'anunu 'Atumaina i ve-tunei abamega tolau'agenidi i agedi bega yana toketokena 'wainega Valana 'Atumaina i lu'ivoneyedi 'waimie. We'e Yaubada yana anelose, avinodi taiadi i miamia siwe igodi nuanuadi i da 'asetai 'ada 'ita'ita'i Iesu 'wainega.

*Yaubada nuanuana yada sauluva tonovidi.*

<sup>13</sup> ✨Omi 'akonadi Iesu Valana 'Atumaina 'wa 'asetai, begaidi i lubwainemi yami nuanua 'wa na 'idewadi, taunimi yami sauluva 'wa na 'i'isave'avinidi wata yami vetumagana 'wa na yato-vagasedi 'ami nuakalikali 'waineye, nuakalikalinina Yaubada i na velemi Iesu Keliso yana souyagi 'waineye. <sup>14</sup> ✨Basenadi Yaubada yana Vona kebu 'wa da 'asetadiga, bavubavumi nuanuami sakona-vebogi. We'e 'asiau 'akonadi 'wa 'asetai bega i lubwainemi Yaubada 'wa na vematayakeyakeni wata nuanuananidi sakoidi kebu i na veveimeyemiga. <sup>15</sup> ✨I lubwainemi yami sauluva matatabuna tonovidi fai Yaubada, kumanina i venua'ivinemiga, yana sauluva matatabuna tonovidi. <sup>16</sup> ✨Wata Yaubada yana Buki nageneye i vo, Yau magemagetaku kebu tamu yaku sakonaga, begaidi 'omi wata bani'odi i lubwainemi yami sauluva magemagetadi.

<sup>17</sup> ✨Tutuyanina 'wa vevelu'ui Yaubada 'waineye 'wa awave-Tamama, siwe Yaubadanina yana nuanua 'aitamogana 'wainega tomotoga matatabuda i na veimeyeda vonayavuga 'ana tutuye. 'Awaie yada sauluva 'adi tutula ta na 'ewadi, 'atumaidi, wata 'atumaidi we'e sakoidi, wata sakoidi, begaidi tutuyanina ta na miamia fwayefwayeye i lubwaineda ma yada kololo Yaubada ta na veve'ililibuyeni.

*Keliso i tuveobuda.*

<sup>18-19</sup> ✨Basenadi tubumiavo yadi sauluva kebu 'atumaidiga, yadi vetumagana i yatodi nani-'avo'avovo 'waidie, 'omi 'wa salad bega Seitani i yogonimi sauluvanidi 'waidiega. We'e 'akonadi 'wa 'asetai Yaubada i tuveobumi. Bega i tuveobumiga kebu nani 'a'a'avidu 'waidiega bani'odi mwali, nau'unu, bawe, 'alo mani, i tuveobumiga nani 'atumaotogina, Keliso

✨ **1:12:** Mad 13:16-17; Efe 3:10 ✨ **1:13:** Lom 12:2 ✨ **1:14:** Lom 6:19; Efe 4:17-18 ✨ **1:15:** 2 Kol 6:16-18, 7:1 ✨ **1:16:** Vei 19:2 ✨ **1:17:** VeL 10:17  
 ✨ **1:18-19:** 1 Kol 6:20; Ion 1:29

dayaginega. Taunina 'atumaiotogina wata magemagetana, yawaina i tauyeni faifaimi, tutulimi. Yana wafanina bani'odi me Diu sifi natudi i nikenikedi i vevelomuyedi Yaubada 'waineye yadi sakona 'adi 'u'uma faifaidi. <sup>20</sup> Basenadiotoga Yaubada bola fwayafwaya kebu i da 'idewaiga, nagami Kelisonina i venuma'ivinini yana wafa faifaina, we'e tutuya de'e bega i na nagoga 'ana 'eba ve'a'ava 'waineye i sivemageseni faifaimi. <sup>21</sup> Keliso 'wainega 'wa vetumagana Yaubada 'waineye, kumanina 'ana tosivetovoi wata yana 'ai'aiwabu 'ana to'anivelena, bega 'asiau yami vetumagana 'wa yato-vagasedi 'wa nuani mogitana 'awaie 'ita'ita'i 'wa na veluagai Yaubada 'wainega.

<sup>22</sup> ✧Akonadi Yaubada yana nuanua tonovidi 'wa veve-matayakeyakedi bega 'wa ve'atumai mataneye wata emi-avo tovetumagana 'wa nunuakalikaliedi mogitana, begaidi i lubwainemi 'wa na toke yami venuakalikalininina i na vebwaika-'afo'afo. <sup>23</sup> ✧Yami nuakalikalininina i na vebwaikaga fai 'akonadi 'wa tubeve'ivau, Yaubada yana Vona miamia-vagaina 'wainega, vonanina mia 'ivauna wata 'atumaina lamudi. Basenadi inamiavo wata tamamiavo i venatunemi siwe 'awaie i na wafa, we'e 'asiau yana Vonanina miamia-vagaina 'wainega 'wa tubeve'ivau. <sup>24-25</sup> ✧Ava'ai basenadiotoga i kilumi Yaubada yana Buki nageneye vonanina i voneyeniga, mogitana. I vo,

Tomotoga matatabudi bani'odi mosomoso,

We'e yadi 'ai'aiwabu wata 'adi subia bani'odi welavi ididi.

Mosomosonidi i 'a'awagi'adi wata ididi i avuavuta.

Vona mogitana tomotoga matatabuda ta na ve'alawafawafa we'e 'Auvea yana Vona i na 'eno-vagata kebu i na 'a'avaga.”

'Auvea yana Vonanina taunina Iesu Valana 'Atumaina, kumanina 'waimie i wai.

## 2

### *'Ida Keliso yana 'Aila'a.*

<sup>1</sup> ✧Omi Yaubada natunavo begaidi i lubwainemi sauluva sakoidi matatabudi 'wa na bailaotogedi. Kebu 'wa na vekaliga, 'ai'edi tamu sauluva 'wa na tatalabodeniga kebu wata 'wa na 'idewaiga, kebu 'wa na ve'unumagigi wata kebu 'wa na vebonaivo. <sup>2</sup> Nuanuaku kwakwama mwedamwedalidi tamu yadi sauluva 'wa na vetutuyameni. Tutuya fueidi yadi nuanua bwaikina susu, faifaina i 'we'we'wela. 'Omi Yaubada yana Vona nuami i da 'ewai. I lubwainemi tutuya fueidi 'wa na lulu'iawawa, faifaina 'wa na nuanua wata 'wa na

✧ 1:22: Ion 13:34 ✧ 1:23: Ion 1:13; 1 Fit 1:3 ✧ 1:24-25: Ais 40:6-8 ✧ 2:1: Efe 4:22; Iem 1:21

vevenua'ivina, 'waimie bani'odi susu bega 'wa na vetoketoke i na nagoga mulieta 'ita'ita'i 'wa na veluagai. <sup>3</sup>Vona mogitana, 'akonadi yada 'Auvea yana nuakalikali 'waimie 'wa lutonovi.

<sup>4-5</sup> ✧Keliso taunina tamu folova miamia-vagaina, 'wainega Yaubada yana vanuga 'eba velu'ui i 'i'idewai. Tomotoga folovanina i 'iseni i baileni i vo, Nani-'avo'avovo," siwe Yaubada i venua'ivineni i silakai, 'atumaiotogina mataneyeye. 'Omi wata bani'odi folova ma yawaimi, 'wa na vaganago 'ada Toveimeanina 'waineyeye, taunimi 'wa na tauyemi 'waineyeye bega 'omi yana 'aila'a mogitana, 'wa da vo 'omi folova Yaubada yana vanuga 'eba velu'ui nageneyeye. Bei 'wa na veto-folova faifaina, 'omi bani'odi tovelomu yadi sauluva tonovidi, Iesu Keliso yana 'aivaita 'wainega 'wa na vevesauluva 'atumaina, 'asa'aiana yami 'anivelena Yaubada 'waineyeye, yana nuanua bani'odi. <sup>6</sup> ✧Basenadiotoga Yaubada yana Buki nageneyeye side bani'odi Aisea i kiluma Iesu faifaina i vo,

Tamu folova, yaku nuanua bwaikina a venua'ivineni, 'Asiau a sisivetovoia yaku 'atamana Saioni 'waineyeye a na ve'unututuyeni.

Egavo yaku venua'ivinanina 'waineyeye yadi vetumagana i na yato-vagasedi, kebu a na vedumwe'ai'aiediga, 'aivaita i na veluagai."

<sup>7</sup> ✧'Omi Iesu 'wa vetumaganeniga, 'waimie folovanina nani 'atumaiotogina, we'e egavo i bailaga, taunidi bani'odi to'aiyogona sakoidi.

Folova tamu i baileni igodi i vo, Nani-'avo'avovo, ta na taweni."

Siwe mulieta folovanina folova kumekumetana, taunina 'unututu."

<sup>8</sup> ✧Wata tamu vona i kilumi Iesu faifaina Yaubada yana Buki 'waineyeye i vo,

Kileu de'e tomotoga i na tayaidi,

Wata 'waineyeye i na be'u."

'Waineyeye i na be'ube'uga fai Yaubada yana Vona kebu i da vematayakeyakedi, yadi vedumwe'ai'ainina basenadiotoga Yaubada i 'asetavagaseni bega i venua'ivinedi vematavuloga faifaina.

*'Ida Yaubada yana tomotoga vevenua'ivinida.*

<sup>9</sup> ✧We'e 'omi kebu bani'odiga. Yaubada taunina i venua'ivinemi, yana 'aila'a. 'Omi Keliso taunina Kini yana tovelomu wata Yaubada yana tomotoga mogitana, yami sauluva tonovidi wata magemagetadi mataneyeye. I venua'ivinemi dudubala 'wainega i miemi yana mageta 'atumaiotogina 'waineyeye bega ma yami subia 'wa na

✧ 2:4-5: 1 Kol 3:11; Lom 12:1 ✧ 2:6: Ais 28:16 ✧ 2:7: Same 118:22 ✧ 2:8: Ais 8:14 ✧ 2:9: Sou 19:5-6; Ais 9:2; Efe 5:8



awa'ai'aia tomotoga matadie. <sup>10</sup> ✨Nagami 'omi bani'odi nani-'avo'avovo, 'asiau Yaubada yana tomotoga mogitana. Wata nagami Yaubada yana 'isanuakalikali 'waimie 'wa bavuyeni, 'asiau yana 'isanuakalikalinina 'wa veveluagai i 'ita'ita'iemi.

*'Ida Yaubada yana tofolova-maimaiga.*

<sup>11</sup> ✨Ekwavo 'ida wakawaka de'e fwayefwayeye, yada 'atamana mogitana abame, begaidi a vevelu'ase'ase mi kebu taunimi 'wa na tauyemi bunu 'ana nuanua sakoidi 'waidie fai nuanuananidi 'anu'anunumi 'adi gaviavo nuanuadi i na vetoketoke 'waimie. <sup>12</sup> ✨I lubwainemi yami sauluva i na ve'atuma'i tomotoganidi kebu i da vetumaganaga Yaubada 'waineye matadie, bega tutuyanina i na awavesakoyemiga yami folova 'atumaidi i na 'isedi nika Yaubada i na subiai yana souyagi 'ana tutuya 'waineye.

<sup>13-14</sup> ✨'Omi 'Auvea yana tomotoga begaidi toveimea tulina tulina fwayafwaya de'e 'waineye yadi veimea 'wa na veve-matayakeyakedi. Yami toveimea gabemani bwaikaotogina yana toveimeavo taiadi 'wa na veve'ililibuyedi, kumanidiavo i vetunedi tosakona i na vematavulogidi we'e egavo yadi sauluva 'atumaidi i na subyadi. <sup>15</sup> ✨Tomotoga fuedi Yaubada wata Iesu Valana 'Atumaina i bavuyedi bega tutuya fuedi i awavesakoyemi. Yaubada nuanuana 'wa na vevesauluva 'atumaina wata toveimea 'wa na veve-matayakeyakedi bega toawavesakonidi yami sauluva i na 'isedi kebu 'adi fata wata i na vonavona 'waimie. <sup>16</sup> ✨Yaubada 'akonadi i 'etoyavumi sauluva tuatuidi 'waidiega, yavuyavumi 'wa na miamia, siwe kebu tamu yami sakona 'wa na velubwasabwasai yami sauluva 'ivauna 'wainega. We'e mogitana taunimi 'wa na tauyemi Yaubada 'waineye 'wa na vetofolova faifaina. <sup>17</sup> Tomotoga matatabudi 'wa na veve'ililibuyedi, emiavo tove-tumagana 'wa na nunuakalikaliadi, ma yami kololo Yaubada 'wa na veve-matayakeyakeni, wata yami toveimea bwaikaotogina 'wa na ve'ililibuyeni.

*Keliso yana tokemaiga vita 'waidie, yada 'eba 'isa.*

<sup>18</sup> ✨'Omi 'ifwaimi 'wa vetofolovaga mali tomotoga 'waidie i lubwainemi 'wa na veve-matayakeyakedi wata 'wa na veve'ililibuyedi. We'e tomotoganidi i nuakalikaliemiga wata i 'ivaisemiga kebu 'aise'avadi 'wa na veve'ililibuyedi, tomotoganidi yadi veimea fa'alidi 'waidiega vita 'wa veveluagadi wata 'wa na veve'ililibuyedi. <sup>19</sup> 'Ai'edi kebu tamu yami sakonaga vita 'wa na veluaga-maimaigidi, siwe Yaubada

✨ 2:10: Ose 1:10; Lom 9:25; 1 Fit 1:3 ✨ 2:11: Gal 5:16-17,24 ✨ 2:12: Mad 5:16

✨ 2:13-14: Lom 13:1-7 ✨ 2:15: 1 Fit 3:15-17 ✨ 2:16: Gal 5:13 ✨ 2:18: Efe

faifaina 'wa na nuanua bwaikina bega 'wa na totokemaigemi, taunina sauluva 'atumaina mataneyeye. <sup>20</sup> ✧ Siwe 'ai'edi 'wa na tokemaigemi 'ainike 'waidie yami sakona faifaidi, tutulina ava'ai? We'e 'ai'edi yami sauluva 'atumaidi faifaidi i na nikemi bega 'wa na tokemaiga, Yaubada ma yana nuakalikali i na vesauluva 'atumaina 'waimie. <sup>21</sup> ✧ I lubwainemi 'wa na tokemaiga vita 'waidie fai naninina faifaina Yaubada i venua'ivinemi. Keliso veviga i veluagadi faifaida yada 'eba 'isa, begaidi yana tokemaiga veviganidi 'waidie ta na vetutuyameni. <sup>22</sup> ✧ Kebu tamu yana sakonaga wata kebu tamu tutuya 'awanega vekali i da souyeni. <sup>23</sup> ✧ Tomotoga i awavesakoyeniga, kebu wata awavesakoyega bonadi i da tutuli, tomotoga vita i veleveleni siwe kebu i da ve'isakololo 'waidie, yana nuanua matatabuna i yatoi Yaubada nimaneye, taunina yana veimea tonovina vonayavuga 'waineye. <sup>24</sup> ✧ Keliso 'aiseotogina yada sakona i 'ewadi tomogoneye 'ai lagalagana 'waineye i ve'a'avadi, bega 'ada fata sauluva sakoidi ta na vedumwe'ai'aiedi 'wa da vo ta da wafa sauluvanidi 'waidiega. Tutuya de'e yada nuanua bwaikina ta na vevesauluva tonovina Yaubada mataneyeye. 'Ana kini'ona 'waidiega ta ve'atumai. <sup>25</sup> ✧ Omi basenadi 'wa mia 'ani'ie Yaubada 'wainega 'wa da vo bani'odi 'aisaya sifi i da vuyo, siwe 'asiau 'wa vilami 'ami To'isave'avina 'waineye, 'anu'anunumi i 'i'ita'ita'iedi Seitani yana toketokena 'wainega.

### 3

#### *Naginagidi 'adi veimea.*

<sup>1-2</sup> ✧ Iesu taunina i tauyeni Tamana yana nuanua 'waineye, 'omi vevine wata bani'odi taunimi 'wa na tauyemi yami lalamogavo 'waidie 'wa na vevematayakeyakedi. 'Ai'edi yami lalamogavo 'ifwaidi kebu i da vetumaganaga Yaubada yana Vona 'waineye, yami vematayakayaka i na 'isedi, yadi 'eba 'isa bega i na nuaviladi Yaubada 'waineye. Kebu yami vona 'waidiega i na nuaviladiga, yami ve'ililibu wata yami sauluva tonovidi i na 'isedi bega i na vetumagana. <sup>3</sup> ✧ Kebu vaigavu nuami i na 'ewadi 'ami 'isa 'atumaidi faifaidi bani'odi nava'au-'amola, bida 'aninamanamalidi, 'alo kaleko 'atumaidi 'adi tutula bwaikidi. <sup>4</sup> We'e mogitana yami nuanua 'wa na 'ivivigavudi nuanua bikana wata nuaobu 'waidiega, naninidi kebu i na 'watu, 'adi 'isa 'atumaidi Yaubada mataneyeye. <sup>5-6</sup> Basenadi vevine totafalolo, kumanidiavo yadi vetumagana i yato-vagasedi Yaubada 'waineye, de'e bani'odi i

✧ 2:20: 1 Fit 4:14 ✧ 2:21: Mad 16:24 ✧ 2:22: Ais 53:9 ✧ 2:23: Ais 53:7; Lom 12:19 ✧ 2:24: 2 Kol 5:21; Ais 53:5-6 ✧ 2:25: Ion 10:11 ✧ 3:1-2: Efe 5:22-24; 1 Kol 7:12-16; Tai 2:4-5 ✧ 3:3: 1 Tim 2:9-10

vigavuyedi. Yadi lalamogavo i vematayakeyakedi bani'odi Sela, Ebelamo i vematayakeyakeni wata i ve'ililibuyeni bani'odi 'adi toveimea. 'Ai'edi yadi sauluvanina 'wa na vetutuyameniga bega 'wa na vevesauluva 'atumaina wata kebu tamu nani faifaina 'wa na kolologa, 'omi Sela natudiavo mogitana.

<sup>7</sup> ✧ 'Omi iavetami yami vevinevo taiadi 'wa miamianiga 'wa na nuani taunidi kebu toketokediga bega ma yami ve'ililibu 'wa na 'i'isave'avinidi fai taunidi ma fuemie 'ami nuakalikali mia 'atumaina wata miamia-vagaina 'wa na veluagai Tamami Yaubada 'wainega. Vona mogitana ma yami ve'ililibu 'wa na 'i'isave'avinidi bega kebu tamu nani yami velu'ui i na veve'etobodedi.

*Matatabuda Tamada 'aitamogana, begaidi ma edavo ta na vevenuakalikali.*

<sup>8</sup> ✧ Sai'afoga a na 'ailove bega de'e tamu nani faifaina a na veifufu fuemi 'waimie. Matatabumi Tamami 'aitamogana Yaubada, bega i lubwainemi ma emiavo 'wa na vevenuakalikali, yami nuanua 'aitamogana, 'ami vebae 'aitamogana 'ai'edi sosoana 'alo nuavita 'waidie, wata ma yami nuaobu ma emiavo 'wa na vevesauluva 'atumaina. <sup>9</sup> 'Ai'edi tamu aitoi i na vesauluva sakoina 'waimie, kebu sauluva sakoinega 'wa na tutuli, wata i na yagaimiga kebu maniniega 'wa na tutuli. Kebu bani'odi 'wa na vesauluvedi we'e mogitana 'wa na velu'ui Yaubada 'waineye i na vesauluva 'atumaina 'waidie. Yaubada nuanuana bani'odi 'wa na vevesauluvedi bega yana nuakalikali i vona'awaufaufa 'awaie i na velemiga 'wa na veluagai. <sup>10</sup> ✧ De'e vonanina nagami i voneyeni Yaubada yana Buki 'waineye i vo,

'Ai'edi aitoi nuanuana tutuya fuedi ma yana sosoana i na miamia,

Vona sakoidi wata vekali kebu i na sousouyedi 'awanega.

<sup>11</sup> Sauluva sakoidi 'waidiega i na vedumwe'ubu'ubuta i na vevesauluva 'atumaina.

Ma yana tokemaiga i na vetafewa nuanua bikana wata veiana faifaidi.

<sup>12</sup> I lubwaineni bani'odi i na vesauluvedi fai egavo yadi sauluva tonovidi, Yaubada i 'ise'isedi wata i nuanuanidi,

Wata yadi velu'ui 'waidie bonadi i noganogaidi.

We'e tosakona i awamata'isedi ma yana nuasako.”

*Tutuya 'ifwaidi vita i na souyedi sauluva 'atumaina 'wainega.*

✧ 3:7: Efe 5:25-30; Kolos 3:19

✧ 3:8: Lom 12:16-18; Mad 5:44; 1 Tes 5:15; Efe

4:32 ✧ 3:10: Same 34:12-16

13 ✨ Ai'edi tutuya fuedi nuanuami sauluva 'atumaidi 'wa na 'i'idewadi, kebu tamu aitoi vita i na velemi. 14 ✨ We'e 'ai'edi vita 'wa na veluagadiga yami sauluva 'atumaidi faifaidi, 'asa'aiana 'wa na sosoanamo fai bola Yaubada 'ami tutula i na velemi. Kebu vita faifaidi 'wa na venuafouviga 'alo tomotoga 'wa na kololoyedi. 15-16 ✨ Mogitana kebu 'wa na kololo, siwe Keliso 'wa na nuanuani bega 'wa na ve'ililibuyeni, taunina 'ami Toveimea. 'Wa na venua'ivina-'atumai bega 'ai'edi tamu aitoi i na velutoliemiga i na vo, Awale 'wa vetumagana Iesu 'waineye," 'ami fata ma yami 'asete 'wa na veifufu 'waidie, siwe ma yami ve'ililibu bonami bikadiega 'wa na vonedi. 'Omi Keliso yana tomotoga i lubwainemi 'wa na vevesauluva 'atumaina bega 'ami vebae 'waidie 'wa na lulutonovi kebu 'wa da sakosakona. Egavo i yagayagaimi wata yami sauluvanidi i awavesakoyediga, i na 'isemi kebu tamu yami sakonaga nika i na bunumayaga. 17 ✨ Ai'edi vita 'wa na veluagaiga sauluva sakoina 'wainega, 'omi taunimi, we'e 'ai'edi Yaubada yana nuanua 'wainega vita 'wa na veluagaiga yami sauluva 'atumaidi faifaidi, i lubwaineni, nani 'atumaina.

18-19 ✨ Keliso wata vita i veluagadi sauluva 'atumaina faifaina, i wafa faifaida. Tutuya matatabuna faifaina, i wafa-vetamogai, yada sakona faifaidi. Taunina to'atumaina yana sauluva magemagetadi siwe i wafa 'ida tosakona faifaida bega i na vagavaida i na naweda Yaubada 'waineye. Tomogo'avana i luvewafai we'e 'Anu'anununa i vetoke-toke bega i nago i lu'ivona towafa yaluadi 'waidie, kumanidiavo yogoyogonidi Vatu'ai Manamanawena 'waineye. 20 ✨ Towafanidi basenadiotoga Noa yana tutuye kebu nuanuadi Yaubada 'waineye i na vematayakayaka. Tutuya manamanawena Yaubada i tokemaiga nuanuana i na nuaviladi siwe tutuyanina Noa yana waka i yogona'a'avai i veimea 'wei bwaikina i obu. Tomotoga kebu fuediga i ve'atumai wakeye, matatabudi 8, ufa i ulalakasedi bega 'wainega i ve'atumai. 21-22 ✨ Ufanina yada 'eba 'isa bafitaiso faifaina, 'wainega 'asiau 'ita'ita'i ta veveluagai. 'Ita'ita'inina bafitaiso 'wainega kebu yokeotoga 'ana 'ilekoa faifaina, we'e mogitana ta bafitaiso ta vona'awaufaufa Yaubada 'waineye ta nuavilada sakona 'waidiega. 'Ita'ita'i ta veluagai bafitaiso 'wainega fai Iesu Keliso i tovoi wafayega, we'e 'asiau i miamia abame, Yaubada veimea i veleni bega i miabui 'ana 'atagiega, anelose, toveimea, wata nani toketokedi matatabudi abame i veveimeyedi.

✨ 3:13: Mad 10:28; Voa 16:7; Lom 13:3 ✨ 3:14: Ibu 10:5-6 ✨ 3:15-16: Kolos 4:6; 1 Fit 2:15 ✨ 3:17: 1 Fit 2:20 ✨ 3:18-19: Efe 4:9-10; Fil 2:9-10 ✨ 3:20: Nag 7:7 ✨ 3:21-22: Lom 6:4; Tai 3:4-5; Ion 3:5; Efe 1:20-21

## 4

*Yaubada yana nuanua ta na vematayakeyakedi.*

1 \*<sup>1</sup>Wa na nuani tutuyanina Keliso i vetomotogaotoga taunina i tauyeni vita i veluagadi begaidi i lubwainemi yana nuanuanina 'wainega taunimi 'wa na kiavetoketokemi. Tau-nimi 'wa na tauyemi vita 'waidie, fai 'ai'edi aitoi mogitana taunina i tauyeniga Keliso 'waineye bega vita i na veluagadi faifaina, kebu nuanuana i na sakosakona. 2 \*<sup>2</sup>Begaidi tutuya de'e i na nagoga wafa 'ana 'etowava i lubwainemi bunu 'ana nuanua sakoidi kebu nuami i na 'ewadi, Yaubada yana nuanua 'aisena 'wa na vevematayakeyakedi. 3 \*<sup>3</sup>Yaubada 'ana tobavu nuanuadi sakona-vebogi 'omi wata basenadi bani'odi 'wa vesauluvedi, siwe 'akonadi 'wa 'ailove 'asa'aiana 'ami fata 'wa na 'ailove-vagata. Basenadi yami nuanua matatabuna 'wa tauyedi sauluva 'eba bunumayaga wata bunu 'ana nuanua sakoidi 'waidie, ufa toketokena 'wa toke 'wa yemu nuami i lugaugaudi, 'wa ve'avula-'avo'avovo, wata ma yami subia 'wa 'odu'odu yaubada-vekavekali 'waidie. 4 Sauluvanidi 'akonadi 'wa bailedi bega emiavo kebu i da vetumagana Yaubada 'waineye nuadi i voganidi fai kebu 'wa da luluve'auyedi sakonanidi 'waidie, begaidi ma yadi nuasako i sisidibidibiemi. 5 Tosakananidi 'awaie tomotoga ma yawaidi wata wafawafadi taiadi i na vonayavuga Yaubada mataneye, bei i na veimea 'adi vematavuloga i na veluagai. 6 \*<sup>6</sup>Mogitana tomotoga matatabuda ta na vonayavuga Yaubada mataneye, faifainanina basenadi Iesu Valana 'Atumaina i lu'ageyeni tomotoga 'akonadi i wafaga 'waidie. Yaubada i na veimea to-motoga vematavuloga i na veluagai yadi sakona fwayefway-eye faifaidi, siwe Valanina 'Atumaina 'wainega 'anu'anunudi 'adi fata i na miamia Yaubada i miamiaga bani'odi.

*Yaubada yana nuakalikali 'waideye, 'waidiega ta na 'aiyaita.*

7 \*<sup>7</sup>Fwayafwaya wata nani matatabudi sai'afoga i na 'a'ava, begaidi taunimi 'wa na 'i'isave'avinimi, kebu 'wa na mia-maimaiga 'wa na 'isa'isa bega 'ami fata 'wa na velu'ui. 8 Siwe tamu nani bwaikina 'wa na 'i'idewaiga, ma emiavo 'wa na vevenuakalikali mogitana bega kebu emiavo yadi sakona fuedi faifaidi 'wa na nuanua, 'wa na veveianamo. 9 Emiavo 'wa na tauyedi i na luku yami vanuge mia wata 'eno faifaidi, kebu ma yami luvulewa 'wa na mia'ubu'ubusedi. 10 \*<sup>10</sup>Ida 'aitamogana 'aitamogana 'akonadi Yaubada yana nuakalikali tulina tulina 'ada veuveuta i veleda. 'Ada veu-veutanidi ta na folovedi, 'waidiega edavo ta na 'i'ivaisedi

\* 4:1: 2 Kol 5:15    \* 4:2: 1 Ion 2:16-17    \* 4:3: Efe 2:2-3; Tai 3:3    \* 4:6: Lom 8:10    \* 4:7: Lom 12:9-13    \* 4:10: Lom 12:6-8; 1 Kol 12:4-7

nika 'ida Yaubada yana tofolova 'atumaida. <sup>11</sup> 'Aitamogana 'aitamogana 'akonadi ma 'ada veuveuta begaidi 'ai'edi aitoi i na lau'agega, i lubwaineni bonana 'ana nogaya mogitana Yaubada yana Vona. 'Ai'edi aitoi i vetofolovaga emiavo 'waidie, i lubwaineni Yaubada yana toketokena 'wainega i na folofolova. 'Ai'edi bani'odi 'wa na folovediga Iesu Keliso faifaina nani matatabudi 'waidie, tomotoga i na 'isedi Yaubada i na subiai. Taunina ma yana 'ai'aiwabu magemagetadi wata ma yana toketokena tutuya matatabuna 'waidie, kebu i na 'a'ava, i na 'eno-vagata. Vona mogitana, yaku nuanua 'asa'aiana bani'odi.

*'Ida Keliso yana tomotoga vita ta na veluagadi faifaina.*

<sup>12</sup> Ekwavo, vita 'akonadi 'wa veveluagadiga Keliso 'ana tovedumwe'ai'ai 'waidiega, faifaidi kebu nuami i na voganidi, i lubwaineni bani'odi ta na veveluagadi. <sup>13</sup> Siwe 'wa na sososoanamo fai basenadi Keliso vita i veluagadi faifaida, 'asiau 'omi wata bani'odi 'wa veveluagadi faifaina, bega tutuyanina yana 'ai'aiwabu magemagetadi i na souyediga, bei 'wa na sosoana mogitana. <sup>14</sup> ✧ 'Ai'edi tomotoga i na yagaya-gaimiga fai 'omi Keliso yana tomotoga, 'wa na sososoanamo, yami 'eba 'isa 'Anu'anunu Magemagetana, taunina Yaubada 'Anu'anununa, 'akonadi i agemi. <sup>15</sup> 'Ai'edi 'omi 'wa na vavainago, 'wa na luluviewafaga, 'wa na totolive'edaga, 'alo tamu sauluva sakoina 'wa na 'i'idewaiga, faifaidi vematavuloga 'wa na veveluagadi, 'ana nogaya 'waikuye kebu 'atumaina. <sup>16</sup> ✧ We'e 'ai'edi vita 'wa na veluagadiga fai 'omi Keliso yana tomotoga, kebu faifaidi 'wa na bunumayaga, siwe 'wa na vekaiwamo Yaubada 'waineye fai 'ami 'eba 'ainana i na vo, Keliso yana tomotoga.”

<sup>17</sup> Yaubada yana tutuya 'akonadi i velilivana, tomotoga matatabuda ta na vonayavuga mataneye i na veimeyeda vematavuloga faifaina. 'Ida Yaubada yana tomotoga, siwe ta na kumeta ta na vonayavuga mataneye, we'e tutuyanina tomotoganidi Yaubada yana Vona i vedumwe'ai'aiediga i na vonayavuga, mogitana vematavuloga bwaikina i na veluagai. <sup>18</sup> ✧ To'atumaina yadi luku abame kebu safailinaga, we'e tosakona wata Yaubada 'ana tovedumwe'ai'ai ava'ai i na souyeni 'waidie? <sup>19</sup> Mogitana to'atumaina yada luku abame kebu safailinaga begaidi egavo Yaubada i tauyedi bega vita i veveluagadi, i lubwainedi vitanidi 'waidie i na tokemaiga, i na vevesauluva 'atumaina wata taunidi i na tauyedi mogitana 'adi To'idewadewa 'waineye, kebu tamu sai'afo i na bailedi i na 'i'isave'avinidi.

## 5

*Yaubada yana tomotoga 'adi 'isave'avinina faifaina.*

<sup>1</sup> 'Omi 'au'auveavo, tovetumagana 'adi to'edakumetavo a na veifufu 'waimie. Yau wata bani'odi to'edakumeta, Keliso yana veviga matatabuna a 'isedi wata tutuyanina yana 'ai'aiwabu magemagetana i na sivemageseniga yau wata i na veleku. <sup>2</sup> ✱A na velu'ase'ase mi nuanuaku Yaubada yana tomotoga 'wa na 'i'isave'avinidi bani'odi 'aisaya sifi 'adi to'isave'avinavo i 'i'ita'ita'iedi wata i 'e'edakumesedi 'atumaina. Yaubada yana tomotoga i 'anivelenedi 'waimie bega 'wa na 'i'isave'avinidi, ma yami dumwebika 'wa na veve'isabodedi Yaubada yana nuanua bani'odi, kebu 'wa na 'abiawa. Taunimi 'wa na tauyemi mogitana 'wa na vetofolova faifaidi, kebu tutula faifaina 'wa na nuanua. <sup>3</sup> ✱Tomotoganidi i velemiga kebu 'wa na veveimeyedi veimea fa'alidi 'waidiega, yami sauluva 'atumaidi 'waidiega 'wa na 'e'edakumesedi, yadi 'eba 'isa. <sup>4</sup> Bega tutuyanina Iesu, taunina yami to'edakumeta bwaikina i na souyeni 'ami tutula i na vele mi, tutulanina 'ai'aiwabu magemagetana i na 'eno-vagata 'waimie.

*Tovetumaganavo i lubwainedi ma yadi nuaobu i na tovoi fa'alina.*

<sup>5</sup> ✱We'e 'omi tubuvauvau iavetami, wata bani'odi ma yami ve'ililibu tulaidi 'wa na vevematayakeyakedi. Matatabumi ma emiavo 'wa na veve'ivaivaita ma yami nuaobu fai Yaubada yana Buki i vo,

Taunidi i awa'ai'aidiga Yaubada i vegaviedi,

We'e tonuaobu ma yana nuakalikali i vevesauluva 'atumaina 'waidie."

<sup>6</sup> ✱Begaidi ma yami nuaobu taunimi 'wa na tauyemi Yaubada yana toketokena 'waineye, bega tutuyanina nuanuana, i na kialakaimi veimea i na vele mi. <sup>7</sup> ✱'Ami vita faifaidi 'wa vevenuafouviga, matatabudi 'wa na 'avalavedamanidi 'waineye fai i 'i'isanuakalikaliemi.

<sup>8</sup> ✱'Wa na 'isa'isa wata taunimi 'wa na 'i'isave'avinimi fai 'ada gavia Seitani i yabayaba nuanuana vita i na veveleleda wata yada vetumagana i na 'ivemweadi 'wa da vo bani'odi wayo'o i da bodaboda nuanuana 'aisaya tamu i na ovai.

<sup>9</sup> ✱Ma yami vetumagana 'wa na tovo-tovoi fa'alina wata Seitani 'wa na veugeugeni fai 'akonadi 'wa 'asetai emiavo tovetumagana 'awalawa matatabuna 'waidie vita i veveluagadi, 'omi wata bani'odi vitanidi 'wa veveluagadi.

✱ 5:2: Fol 20:28 ✱ 5:3: Fil 1:14; 1 Tim 4:12, 5:1; Ion 13:14-15 ✱ 5:5: Voa 3:34; Luk 22:26 ✱ 5:6: Fil 2:8-9 ✱ 5:7: Mad 6:25-26 ✱ 5:8: 2 Tim 4:17-18; Lom 8:18 ✱ 5:9: Efe 6:11-13; Iem 4:7

10 ✧Vitanidi 'wa veveluagadiga siwe kebu tutuya mana-manawenaga wata i na 'a'ava fai Yaubada tauniotogina i na 'ive'atumaimi, i na kiavefa'alimi wata i na kiavetoketokemi bega 'wa na mia 'atumaina. Yaubadanina yana sauluva matatabuna nuakalikali, i venua'ivinemi bega 'wa na luku yana 'ai'aiwabu miamia-vagaina 'waineye Keliso taiadi 'wa na miave'itubama. <sup>11</sup> Yana toketokena nani matatabuna 'waidie kebu i na 'a'avaga i na 'eno-vagata. Vona mogitana, yaku nuanua bani'odi.

*Fita yana vona 'ana 'eba ve'a'ava.*

12 ✧Yami leta de'e siaina Sailasa i 'ivaiseku 'a kilumi, taunina iaku tovetumagana yana sauluva matatabuna a 'asetadi ma 'ana vetumagana. Yaubada yana nuakalikali mogitana 'akonadi alu'ivona leta de'e nageneye, bega nuanu-aku 'wa na tovtovoi fa'alina yana nuakalikalinina 'waineye.

13 ✧Emiavo Keliso 'ana tovetumagana 'omi ma fuemie Yaubada i venua'ivinediga, side bei 'atamana Loma\* 'waineye yadi vekaiwa i vetunei 'waimie, wata Malika, kumanina a awave-natuna 'waineye. <sup>14</sup> Emiavo tovetumagana 'wa na veluagadiga, ma yami nuakalikali 'wa na 'avalamaigidi.

A vevelu'ui faifaimi, nuanuaku 'omi wata 'ifwaidi edavo Keliso taiadi 'wa miave'itubamaga, Yaubada nuanua bikana mia 'atumaina taiadi i na vevelemi.

'Asa'aiana bani'odi.  
Yau Fita.

---

✧ 5:10: 1 Tes 5:23-24 ✧ 5:12: Fol 15:22 ✧ 5:13: 2 Tim 4:11; Lom 1:7 \* 5:13: 'Ana mogitana 'atamana Babiloni, siwe tamu 'ana wagava.



## 2 FITA

### Fita yana kiluma 'ana veluga.

De'e Fita i kiluma-velugai tovetumagananidi i miave'eve'e'elagiga 'waidie. Tovetumagananidi 'awalawa fuedi 'waidie i miamiani de'e 'adi matakia, fai tove-vekavekali fuedi i sousouyedi. Tovenidi sauluva sakoidi i awave'atumaiedi wata i vonavona igodina Iesu kebu i na vilai i na mai.

Bega Fita i velu'ase'asedi 'aseta mogitana Iesu faifaina 'waineye i na tovtovoi fa'alina. Iesu yana 'ivogavogana lamuna fai Yaubada nuanuana tomotoga nagami i na nuaviladi mulieta i na mai. De'e letanina 'ana 'idi side bani'odi.

Vona-vekaiwa. 1:1-2

Yaubada i venua'ivinedaga nuanuana taunida ta na tauyeda 'waineye. 1:3-15

Yaubada yana tolu'ivonavo wata tomata'aulelevo yadi lu'ivona Iesu faifaina vona mogitana. 1:16-21

I matakia tove-vekavekali faifaidi. 2:1-22

Iesu yana vila-vaitugana faifaina. 3:1-18

<sup>1</sup> Yau Saimoni Fita, Iesu Keliso yana tofolova wata 'ana tomata'aulele a vekaiwa 'omi Iesu 'ana tovetumaganavo 'waimie. 'Ada To'ita'ita'i Iesu Keliso 'asa'aiana taunina yada Yaubada, vetumagana i velema yana veimea tonovina 'wainega, 'omi wata bani'odi vetumagananina i velema, naninina 'ai'aiwabu bwaikina 'waideye. <sup>2</sup> ✧A vevelu'ui faifaimi nuanuaku yami 'aseta Yaubada wata 'ada Toveimea Iesu faifaidi i na vevebwaika bega ma yadi nuakalikali i na vevesauluva 'atumaina 'waimie wata tutuya matatabuna nuanua bikana mia 'atumaina taiadi i na vevelema.

*Kebu ta na 'ivemweamweadaga.*

<sup>3</sup> ✧Yaubada yana toketokena 'wainega nani matatabuna 'akonadi i veleda 'ada fata bega yada mia wata yada sauluva i na ve'atumai yana nuanua bani'odi. Yana 'aivaitanina 'wainega taunina ta 'asetai, kumanina i venua'ivineda, bega yana 'ai'aiwabu magemagetadi wata yana 'atumaina i na veleda. <sup>4</sup> ✧Wata yana toketokenanina 'wainega 'ada nuakalikali bwaikidi wata 'atumaedi i veleda, kumanidivo faifaidi basenadi i vona'awaufaufa. Nuakalikalinidi 'waidiega taunina yana nuanua wata yana sauluva i veleda nika 'ada fata bunu 'ana nuanua sakoidi 'awasasadeye ta na degedi. <sup>5</sup> ✧Fai naninidi 'atumaedi ta veluagadi Yaubada 'wainega wata fai 'wa vetumagana Keliso 'waineye, begaidi

✧ 1:2: Kolos 1:9-10; Fil 3:10 ✧ 1:3: Efe 3:16-19 ✧ 1:4: Ion 1:12; Fol 17:28; 2 Kol 3:18 ✧ 1:5: Gal 5:22-23

i lubwainemi ma yami tokemaiga 'wa na vevewavawava yami sauluva i na ve'atumai. I na ve'atumaiga 'aseta 'wa na lalauala bega Yaubada yana nuanua 'wa na 'asetadi. <sup>6</sup> 'Akonadi 'wa na 'asetaga taunimi yami nuanua 'wa na 'isave'avinidi bega i na nagoga ma yami tokemaiga Yaubada yana nuanua 'wa na 'i'idewadi. <sup>7</sup> 'Akonadi yana nuanua 'wa na 'i'i'dewadiga 'ami fata 'wa na veiaiana tomotoga taiadi, i na nagoga nika 'wa na nuakalikaliedi mogitana. <sup>8</sup> 'Ai'edi sauluvanidi i na vevebwaika 'waimie 'ada Toveimea Iesu Keliso 'wa na 'asetai mogitana bega yami folova faifaina kebu nani-'avo'avovo, ma vuagina. <sup>9</sup> \*We'e egavo sauluvanidi kebu 'waidie i da 'eno'enoviga, 'ana 'isa Yaubada yana nuanua kebu i da 'isa'inanadi wata 'akonadi nuadi i fani yadi sauluva sakoidi basenadi i 'idewadiga Iesu i iwalekolekoadi.

<sup>10-11</sup> Ekwavo, 'akonadi 'wa 'asetai Yaubada i venua'ivinemi nuanua 'omi yana tomotoga, begaidi i lubwainemi 'wa na tokemaigemi sauluvanidi 'atumaidi 'waidie bega yana venua'ivananina i na 'eno-vagata. 'Ai'edi mogitana bani'odi 'wa na vesauluvediga, kebu 'ana fata Iesu 'wa na baileni wata kebu 'wa na be'u sakona 'waineye, we'e Yaubada ma yana sosoana i na tauyemi mogitana 'wa na luku Iesu Keliso yana 'Eba Veimea miamia-vagaina 'waineye, taunina 'ada Toveimea wata 'ada To'ita'ita'i.

*Tomata'aulele yadi lu'ivona Keliso faifaina vona mogitana.*

<sup>12</sup> Naninidi 'akonadi 'wa 'asetadi wata Yaubada yana Vona 'akonadi 'wa nogaidiga 'wa veveematayakeyakedi, siwe fai mogitana Yaubada i venua'ivinemiga begaidi tutuya fuedi a na totolinuata'i 'waimie. <sup>13-14</sup> \*Yau sai'afoga fwayafwaya de'e a na 'iaweni bani'odi basenadi 'ada Toveimea Iesu Keliso i voneku. I lubwaineku ma yawaikuye a na vonavona naninidi yami sauluva 'atumaidi faifaidi bega 'wa na nuanuanidi. <sup>15</sup> Begaidi nuanuaku bwaikina a na vewavawava tamu 'eda'eda a na 'idewai bega bola a na 'iawemiga, 'wainega tutuya fuedi naninidi 'wa na nunuave'avinidi.

<sup>16</sup> \*Tutuyanina 'a wai 'waimie 'ada Toveimea Iesu Keliso yana toketokena wata yana vila-vaitugana faifaidi 'a lau'age 'waimie. Yama lau'agenina kebu tomotogaotoga ma yana 'aseta 'ana ifuifufu bega i na vekalieda, Keliso yana 'ai'aiwabu mataududulina taunima matamega 'a 'iseni bega 'a lu'ivona 'waimie. <sup>17-18</sup> Basenadi Iesu taiadi 'a laka 'oya tabutabuna 'waineye 'a miamia nika Yaubada Tamada awa'ai'ai wata mageta mataududulina i veleni, wata bona 'a nogai Yaubada Magemagetana 'wainega i vo, De'e Natuku

nuafouku a nuakalikalieni bwaikina, faifaina a sosoana mogitana.” Vona mogitana 'ima taunima bonanina 'a nogai abamega.

*Tolu'ivonavo yadi lu'ivona Keliso faifaina vona mogitana.*

<sup>19</sup> ✧ Basenadiotoga Yaubada yana tolu'ivonavo i vona-vagata Keliso yana mai faifaina. Fai taunima 'a 'iseni 'ada fata ta na vetumagana ta na nuani mogitana tolu'ivonanidi yadi vona matatabuna vona mogitana. Begaidi i lubwainemi yadi vonanidi 'wa na nuanuanidi, 'waimie bani'odi mageta i magemagetai dudubala nageneye. 'Wa na nuanuanidi i na nagoga nika nuami i na magetadi bani'odi Kumauloku i lakalaka tutuya i kilikililia. <sup>20-21</sup> ✧ Vonanidi i maia Yaubada yana tolu'ivonavo 'waidiega kebu taunidi yadi nuanuayega, we'e mogitana 'Anu'anunu 'Atumaina yadi nu-anua i 'ona'onadi bega Yaubada yana Vona i lulu'ivoneyedi. Begaidi vona de'e kebu nuami i na fani 'wa na nuanuanidi. Side bani'odi, kebu tamu aitoi 'ana fata 'aise'avana tolu'ivonavo yadi vona Yaubada yana Buki nageneye i na kiavemagetadi, nagami 'Anu'anunu 'Atumaina i na 'ivaizeni.

## 2

*Tove-vekavekali faifaidi.*

<sup>1</sup> ✧ Vona mogitana 'asete ta veluagai Yaubada yana tolu'ivonavo 'waidiega, siwe wata basenadi tolu'ivonavekavekali i tovoi tomotoga i vekaliedi. Wata bani'odi 'awaie tove-vekavekali i na souyedi 'awasasamie, givagivayega yadi ve 'oka'okadi 'waidiega 'ifwaimi i na vekaliemi bega yami vetumagana i na 'ivesakodi. 'Ada Toveimea Iesu tovenidi i tuveobudiga siwe i na ve'eweni, begaidi 'adi vematavuloga i na veluaga-matayo'oi 'ai-'ala'alase. <sup>2</sup> Tovenidi i na vo, 'Wa vetumaganaga Iesu 'waineye, bunu 'ana nuanua 'waidie ta na sakosakonaga, kebu tamu ava'ai.” Yadi vekali 'waidiega fuedi yadi sauluva sakoidi i na vetutuyamedi, we'e tomotoga i na 'isedi, Keliso yana 'eda'eda i na awavesakoyeni. <sup>3</sup> ✧ Tovenidi, taunidi toluve'ove'o'olagi nuami i na 'ewadi ifuifufu-'avo'avovo taunidi i 'idewadiga 'waidiega, mani bwaikina 'wa na veleveledi. Basenadiotoga Yaubada 'adi vematavuloga i 'idewa-vagasedi, i lulukamata faifaidi.

<sup>4</sup> ✧ I lubwainedi 'adi vematavuloga i na veluagadi fai basenadiotoga Yaubada yana anelose i sakonaga kebu i da 'isedimo, i tawedi Vatu'ai Manamanawena 'waineye.

✧ **1:19:** Luk 1:76-79 ✧ **1:20-21:** 2 Tim 3:16; Fol 3:21 ✧ **2:1:** VeL 13:1-5; Mad 24:24; Iud 1:4-8,17-18 ✧ **2:3:** Lom 2:24, 16:18 ✧ **2:4:** Mad 25:41

Bei dudubala 'waineye i miamia 'adi vematavuloga i lukamasedi vonayavuga 'ana tutuya 'waineye i na veluagadi. <sup>5</sup> \*Wata bani'odi basenadiotoga Noa yana tutuye tomotoga fue di Yaubada i vedumwe'ai'aieni siwe kebu nana i da loloiga mwai bwaikaotogina 'wainega 'ana tovedumwe'ai'ainidi i leodi fwayafwaya taiadi. Noa ma enavo 7 'aisedi Yaubada i 'ita'ita'iedi fai taunina tolau'age sauluva tonovidi faifaina. <sup>6</sup> \*Mulieta wata 'atamana 'ailuga Sodoma wata Gomola 'waidie Yaubada tosakona fue di i 'isedi bega i veimea vematavuloga sakoiotogina i veluagai, i leodi 'ai-'ala'alata 'wainega i ve'aufafa. 'Atamananidi 'ailuga Yaubada 'ana tovedumwe'ai'ai yadi 'eba 'isa bega i na 'iseni ma yadi kololo Yaubada i na ve'ililibuyeni yadi sauluva i na ve'atumai. <sup>7-8</sup> Tomotoganidi 'waidiega Lota 'aisena yana sauluva 'atumaina bega nagami Yaubada i 'ita'ita'ieni. 'Aiata 'aitamogana 'aitamogana tomotoganidi yadi sauluva sakoidi Lota i 'ise'isedi wata yadi vona i noganogaidi. Kebu nuanuadi Yaubada i na vematayakeyakeni, nuanuadi bwaikina bunu 'ana nuanua sakoidi begaidi Lota ma yana ven-uafouviga i nunuavita. <sup>9</sup> \*Vona mogitana Yaubada Noa wata Lota i 'ita'ita'iedi bega ta 'asetai 'ana fata to'atumaina i na 'ita'ita'iedi vita 'waidiega we'e tosakona 'akonadi i veveimeyedi i na nagoga mulieta tutuyanina ta na vonayavuga Yaubada mataneye 'adi vematavuloga i na veluagai. <sup>10</sup> Tosakona matatabudi siwe mogitana egavo bunu 'ana nuanua sakoidi nuadi i 'ewadi, i veve'avula-'avo'avovo wata Yaubada yana veimea i sidibidibieni.

Tove-vekavekalinidi 'awasasamie i fwausa-'avo'avovo, taunidi i awa'ai'aidi we'e tomia abama kebu i da ve'ililibuyediga i awavesakoyedi. <sup>11</sup> \*Anelose abame toketokeotogidi ma yadi veimea, tovenidi kebu bani'odiga, siwe kebu ma yadi manini tovenidi i da vevevitadi 'Auvea mataneye yadi sauluva sakoidi faifaiddi. <sup>12</sup> Tove-vekavekalinidi kebu nuadiga naninidi i bavuyediga i sisidibidibiedi. We'e 'aisaya walawala'ai nua-'avo'avovodi, taunidi yadi nuanua i 'i'idewadi mulieta tomotoga i vunuvunugidi. Tove-vekavekalinidi 'aisaya bani'odi, wata taunidi yadi nuanua i 'i'idewadi, 'awaie 'adi vematavuloga i na veluagai i na wafaotoga.

<sup>13</sup> Tomotoga 'ifwaidi yadi vetumagana i 'ivesakodi, 'adi tutula 'awaie vita i na veluagai Yaubada 'wainega. Lovana 'aiata taiadi i sosoana-'avo'avovo tomotoga matadie i sakosakona. Taiadi 'wa 'ani'ani 'wa vo 'ako, Tomotoga 'atumaidi," siwe ma yadi sosoana i vevekaliemi. 'Omi

\* 2:5: Ibu 11:7; Nag 6:13,18    \* 2:6: Nag 19:12-13,24    \* 2:9: 1 Kol 10:13

\* 2:11: Iud 1:9-13

'atumaimi we'e 'awasasamie bani'odi yoke i na vedamanimi. <sup>14</sup> Nuanuadi bwaikina vevine taiadi i na vevematafou'isa. I sakosakona-vebogi siwe kebu 'anigodi i da toatoa. Tomotoga 'ifwaidi kebu yadi vetumagana fa'alinaga nuadi i 'ani'anidi i be'ube'u sakona 'waidie 'wa da vo i da 'e'edakumesedi kuli ma unana 'waineye. Tutuya fuedi i luluve'ove'o'olagi nuanuadi bwaikina kukua, ma yadi 'asetai mali tomotoga i vevekaliedi yadi mani i eloelodi. 'Akonadi Yaubada i veimea 'awaie 'adi tutula i na veluagadi. <sup>15</sup> ✧ Eda tonovina 'akonadi i 'iaweni i vuyo, Belami yana sauluva i 'ewai. Belaminina, taunina Beo natuna, tamu Yaubada yana tolu'ivona siwe mani 'ana nuakalikali 'waineye bwaikina, bega i sakona. Tamu toveimea nuanuana Belami i na 'ivaiseni me Isileli i na leodi siwe i nunago 'edeye yana 'aisaya doniki 'wainega, nago i baila. <sup>16</sup> 'Aisaya kebu 'adi fata i na vona, siwe tutuyanina 'waineye yana 'aisayanina 'awana i takai i vona Belami 'waineye, yana sauluva 'wa da vo 'wava'wava yadi sauluva, i talabodeni. Vona mogitana tovenidi sakoidi Belami bani'odi, toluve'ove'o'olagi.

<sup>17</sup> Tomotoganidi kebu tamu sai'afo 'waidiega 'aivaita i na souyeni, 'wa da vo bani'odi ufa-luluvuala i da lala. Yadi nuanua kebu fa'alidiga bani'odi waowa kaukau i bewebewedi. Yaubada yadi 'eba mia i 'idewa-vagaseni i 'eno'eno Vatu'ai Manamanawena wata dududubalina 'waineye. <sup>18</sup> Taunidi i awa'ai'aidi yadi veifufu 'adi nogaya nani-'avo'avovo faifaiddi, siwe 'waidiega tomotoga nuadi i 'ewadi. Tomotoga 'ifwaidi be'ama i vetumagana Iesu 'waineye i sousouyedi tosakona 'waidiega, siwe wata tovenidi i sisivemuliugadi bunu 'ana nuanua sakoidi 'waidiega. <sup>19</sup> ✧ I vonedi i vo, Yama ve 'wa na vetutuyamedi nika 'omi yavuyavumi, kebu tamu veimea 'wa na vematayakeyakeni." Bani'odi i voneyediga siwe sauluva sakoidi 'akonadi tovenidi i veveimeyedi. Vona mogitana, sauluva sakoidi tomotoga i 'i'idewadiga bani'odi 'adi toveimeavo, 'waidie i vevetofolova. <sup>20</sup> ✧ Egavo 'ada Toveimea Iesu Keliso taunina 'ada To'ita'ita'i Valana i 'asetai bega fwayafwaya 'ana nuanua sakoidi i degedi, siwe mulieta i na vila-vaituganidi, sakona i na 'ive'avinidi i na vetoketoke 'waidie, mogitana 'adi vematavuloga i na vebwaika-'afo'afo, kebu 'adi vematavuloga nagami bani'odi. <sup>21</sup> Nuakalikalidi. 'Ai'edi Iesu yana 'eda'eda tonovina kebu i da 'asetai yadi wafa 'waineye vita i da veluagai, siwe fai 'akonadi i 'asetai we'e Yaubada yana veimea magemagetadi nua'ubudie i yatodi bega vita bwaikaotogina i na veluagai. <sup>22</sup> ✧ Yada 'eba awatalatutula i 'eno'enovi tovedumwe'ai'ainidi yadi saulu-

✧ 2:15: Num 22:12,15-17,21,23,28-34 ✧ 2:19: Ion 8:34; Lom 6:16-17 ✧ 2:20: Mad 12:43-45; Ibu 6:4-6; Mad 26:24 ✧ 2:22: Voa 26:11

vanina faifaina. Ta vo, 'Ou'ou i na 'ovala, mulieta i na vilai, taunina 'ovalina i na 'ania.” Wata ta vo, 'Ai'edi tamu aitoi yana bawe i na vetoai, wata i na vilai i na nago i na ludobwadobwana.”

### 3

#### *Toveimea Iesu yana vila-vaitugana faifaina.*

<sup>1</sup> Ekwavo, de'e a kilukilumaga 'waimie, yaku leta 'ana veluaga. Letanidi 'ailuga 'waidie a kikiavenuave'avinimi, nu-anuaku nuanua tonovidi faifaidi 'wa na nuanua. <sup>2</sup> Vonanidi basenadiotoga Yaubada yana tolu'ivonavo magemagetadi i lu'ivoneyediga, wata Toveimea Iesu 'ada To'ita'ita'i yana veimea 'ima yami tomata'aulelevo 'a velemiga, nu-anuaku 'wa na nu-anuanidi.

<sup>3</sup> \*We'e tamu nani nu-anuaku nagami 'wa na 'asetai. Tutuya 'eba ve'a'ava sai'afoga i na velilivana, 'ifwaidi tomotoga i na tovoi, taunidi yadi nu-anua sakoidi i na 'idewadi wata i na sidibidibiemi. <sup>4</sup> I na vo, Basenadi Iesu i vona'awaufaufa i na vilai i na mai, siwe ava'aibe taunina? 'A nuani kebu tamu sai'afo i na mai. Fwayafwaya 'ana 'idewavau 'wainega i maiga 'asiau nani matatabuna 'asa'aiana 'adi 'isa'isanidi i 'eno'enovi. Tubumavo basenadiotoga i wafa i maiga 'asiau kebu tamu nani i da vetuli. We'e igodi 'wa vo, Iesu i na vilai i na mai vematavuloga faifaina.” <sup>5-6</sup> \*Siwe tomotoganidi kebu nu-anuadi i na nuani basenadiotoga tomotoga matatabudi Yaubada i leodi ufayega, 'adi vematavuloga. Side bani'odi. Basenadiotoga Yaubada i vona, abama i souyeni wata ufa 'wainega fwayafwaya i 'idewai, bega ufanina fwayafwaya i sififineni. Mulieta ufanina mwai 'wainega fwayafwaya i 'ivesakoi tomotoga i leodi. <sup>7</sup> \*We'e abama\* wata fwayafwaya 'asiau ta 'ise'isediga, 'akonadi Yaubada i vona 'awaie i na kabunidi i na 'alaidi siwe bola, i lulukamata bega tutuyanina tomotoga i na vonayavuga Yaubada mataneyeye, bei nani matatabuna i na leodi 'ana tovedumwe'ai'ai taiadi.

<sup>8-9</sup> \*Ekwavo, we'e tamu nani nu-anuaku 'wa na nuani. Tomotoga 'ifwaidi i vo, Basenadi 'ada Toveimea Iesu i vona'awaufaufa i na vilai i na mai, siwe awale i 'ivogavogana kebu i da mimai-matayo'o?” Kebu i da 'ivogavoganaga fai malamala 1000 tutuya manamanawena 'ida 'waideye, we'e Yaubada 'waineyeye 'wa da vo 'aiata 'aitamogana 'ana vem-anawe. 'Aiata wata malamala Yaubada kebu faifaidi i da

\* 3:3: 1 Tim 4:1; Iud 1:17-18 \* 3:5-6: Nag 1:2,6-9, 7:11,17,23 \* 3:7: 1

Kol 3:13 \* 3:7: Abamaotoga bei inala, weta'i wata 'ubwana i 'eno'enoviga i na kabunidi, we'e bei Yaubada i miamiaga kebu. \* 3:8-9: Same 90:4; Isi 18:23; 1 Tim 2:4

nuanua siwe ma yana tokemaiga i lulukamasemi, kebu nu-anuana tamu aitoi i na luku 'ai-'ala'alase, nuanuana nagami tomotoga matatabudi i na nuaviladi yadi sakona 'waidiega.

<sup>10</sup> ✧ Ada Toveimea Iesu yana vila-vaitugana 'ana 'aiata kebu i na lu'ivoneyeniga, ta na miamiamo nika i na souyeni tomotoga yawaidi i na lovoga. 'Aiatanina 'waineye, inala, weta'i wata 'ubwana i na toafwai butu'a'aidi bwaikidi nika ava'a'iamo i na nago, we'e nani matatabudi fwayafwaya taiadi i na 'ala'a'avadi.

<sup>11-12</sup> Vona mogitana nani matatabudi i na 'ala'a'avadi, we'e 'omi bani'odi? I lubwainemi tutuya de'e Yaubada yana 'aiatanina 'wa na lulukamaseniga, taunimi 'wa na tauyemi Yaubada 'waineye yami sauluva i na ve'atumai yana nu-anua bani'odi. 'Ai'edi Yaubada yana nuanua ta na ve-matayakeyakediga Iesu yana Vila-vaitugana 'ana 'Aiata ta na duduni i na vagamai. 'Aiatanina 'waineye yauyauta bwaikina inala, weta'i wata 'ubwana i na itana, nika nani matatabudi i na savovola. <sup>13</sup> ✧ Siwe 'akonadi Yaubada i vona'awaufaufa abama wata fwayafwaya 'ivaudi i na 'idewadi, bei sauluva 'atumai'avadi i na 'eno'enovi, naninidi faifaidi ta lulukamata.

<sup>14</sup> Ekwavo, vona mogitana Yaubada fwayafwaya 'ivauna i na 'idewai begaidi 'aiatanina faifaina 'wa na lulukamataga, nu-anuaku ma yami tokemaiga 'wa na vevevawawava yami sauluva 'atumai'avadi Yaubada mataneyeye wata taiadi 'wa na veveiana bega kebu tamu nani faifaina i na awavesakoyemi.

<sup>15</sup> ✧ Ada Toveimea kebu i da mimai-matayo'oga lamuna side bani'odi. Ma yana tokemaiga i lulukamata nuanuana nagami Valana 'Atumaina ta na lu'ivona tomotoga 'waidie bega 'ana fata 'wainega 'ita'ita'i i na veluagai. Iada Faulo yana nuanua wata bani'odi, ma yana 'asetai Yaubada 'wainega 'akonadi i lu'ivona 'waimie leta 'wainega. <sup>16</sup> ✧ Tutuya fuedi i kiluk-ilumaga Iesu yana vila-vaitugana faifaina, side bani'odi i kilukilumedi. We'e 'ana kilukiluma 'waidie nani 'ifwaidi 'adi 'asetai vitadi, naninidi tomotoga yadi nuanua mweadi wata bavubavudi taunidi yadi nu-anuayega i sisiviladi i 'ivesakodi. Faulo 'ana kilukiluma wata 'ifwaidi vona Yaubada yana Buki 'wainega wata bani'odi i 'ivesakodi bega taunidi i 'iveilagidi 'awaie i na wafaotoga.

<sup>17</sup> ✧ We'e ekwavo, 'omi 'akonadi 'wa 'asetai tove-vekavekali yadi nu-anua 'waidiega Yaubada yana Vona i 'i'ivesakoidi begaidi taunimi 'wa na 'i'isave'avinimi i na nunago Yaubada yana veimea 'ana tovedumwe'ai'ai i na silolomi yadi vekaliega nika 'wa na be'u yami 'eba mia toketokena 'wainega.

✧ **3:10:** Mad 24:35,43-44    ✧ **3:13:** Ais 65:17; Ve 21:1,27    ✧ **3:15:** Lom 2:4, 10:21    ✧ **3:16:** 2 Kol 4:3; Ibu 5:11    ✧ **3:17:** Ibu 2:1; 1 Kol 10:7-11

<sup>18</sup> Nuanuaku yami 'asetā 'ada Toveimea Iesu Keliso taunina 'ada To'ita'ita'i faifaina i na vevebwaika, wata 'wa na tovoi fa'alina 'waineye bega tutuya fuedi ma yana nuakalikali i na vevesauluva 'atumaina 'waimie. Taunina ma 'ana ve'ililibu yana 'ai'aiwabu magemagetadi kebu i na 'a'avaga, i na 'eno-vagata.

Vona mogitana yaku nuanua bani'odi,  
Yau Fita.



# 1 IONI

## Ioni yana kiluma nagami.

Tutuyanina Ioni i ve'auvea de'e leta nagami i kilumi tove-tumaganavo i miamianiga 'awalawa Eisia nageneye faifaidi. Tutuyanina 'waineyo Ioni i miamia Efeso.

Ioni yana nuanua 'ailuga. Tamu, Iesu 'ana tovetuma-ganavo i velu'ase'asedi bega Yaubada wata Natuna Iesu Keliso 'aisedi 'waidie i na tovoovoi fa'alina. 'Akonadi Yaubada i nuakalikalieniga wata i lubwainedi ediavo i na nuakalikaliyedi. Wata tamu yana nuanua, i matakia 'waidie tove-vekavekali faifaidi. Tovekalinidi igodi i vo, Tomogoda nani sakoina, begaidi kebu 'ana fata Keliso i na vetomotoga ma tomogona 'ida bani'odi. 'Ana 'isa'isa mogitana tomotoga, siwe tomogona kebu tomogoda bani'odi." Wata tovekalinidi yadi nuanua 'aseto nani 'atumaiotogina, we'e nuakalikali tamu nani-'avo'avovo, wata sauluva tonovidi kebu faifaidi i da nuanua. Tomotoganidi 'asa'aiana taunidi Keliso 'ana gavi-avo, begaidi Ioni nuanuana yadi vekalinidi i na sivemagesedi ve tonovidi 'waidiega. Letanina 'ana 'idi side bani'odi.

Letanina inagena 'ana nuanua mogitana. 1:1-4

Sauluva magemagetadi wata sauluva dudubala kebu taiadi i da vesala. 1:5-2:17

I matakia Keliso 'ana gaviavo faifaidi. 2:18-29

'Ada fata ta na venua'ivina egavo Yaubada natunavo we'e egavo Seitani natunavo. 3:1-4:6

Yaubada nuakalikali lamuna bega natunavo i lubwainedi i na venenuakalikali. 4:7-5:5

Iesu Keliso 'ana tolu'ivonavo 'aitonu, wata mia-vagata faifaidi. 5:6-21

*Keliso yada mia 'ivauna wata 'atumaina lamuna.*

<sup>1</sup> \*Ifwaidi Iesu yana tomata'aulelevo taiadi 'a miami-ani, bega a kiluma a na vonemi. Tutuyanina Yaubada fwayafwaya wata abama i 'idewadiga, yana Tokiavemageta taiadi i miamia, mulieta Tokiavemagetanina 'a 'iseni wata yana vona 'a nogai. Mogitana 'a 'isaotogi wata taunima 'a 'abitonovi. Taunina Yaubada yana nuanua matatabuna 'adi Tokiavemageta wata 'wainega mia 'ivauna wata 'atumaina ta veveluagai. <sup>2</sup> \*Tutuyanina mianina lamuna i souyeni, 'ima 'a 'iseni begaidi 'a kiluma 'a lulu'ivona 'waimie. Tokiavemagetanina 'a vonevoneyeniga, taunina Keliso, basena-diotoga Tamada taiadi i miamia, siwe i mai bega 'wainega mia 'atumaina wata miamia-vagaina ta na veluagai. <sup>3</sup> Ava'ai

'a 'iseni wata 'a nogai 'a lulu'ivona 'waimie bega yama veiana Tamada wata Natuna Iesu Keliso taiadi 'omi wata bani'odi 'wa na veiana nika yada sosoana 'aitamogana. <sup>4</sup> 'A kiluma 'a na vonemi, bega yami veiana Tamada 'waineye i na veb-waika, taiadi ta na sososoana mogitana.

*Yaubada magemagetana.*

<sup>5</sup> ✧Ava'ai basenadi 'a nogai Keliso 'wainega, 'a lulu'ivona 'waimie, vonanina side bani'odi. Yaubada Magemagetana, kebu tamu sai'afo dudubala i da 'eno'eno 'waineye. <sup>6</sup> ✧We'e 'ai'edi ta na vo, 'Ida Keliso enavo," siwe yada sauluva sakoidi, bani'odi ta miamiani dudubala 'waineye, yada vonanina vekali wata Yaubada yana nuanua tonovidi kebu ta da ve-matayakeyakedi. <sup>7</sup> Yaubada yana 'eba mia magemagetatogina nageneye, wata bani'odi 'ai'edi ta na miamiaga yana magetanina nageneye ma yada sosoana ta na veveiaiana, wata Natuna Iesu, yada sakona 'aitamogana 'aitamogana i lekolekoadi dayagina 'wainega bega ta veve'atumai Yaubada mataneye.

<sup>8</sup> 'Ai'edi ta na vo, 'Ida kebu tosakonaga," taunida ta vevekalieda wata Yaubada yana nuanua tonovidi kebu i da 'eno'enovi yada nuanua 'waidie. <sup>9</sup> We'e 'ai'edi yada sakona ta na lu'ivoneyediga Yaubada 'waineye, yada sakananidi i na nuatavunidi wata i na 'ivevunavunagida bega ta na ve'atumai sauluva sakoidi 'waidiega. 'Ada fata ta na vetumagana yada sakona i na nuatavunidi, fai yana nuanua matatabuna tonovidi wata bani'odi basenadi i vona'awaufa. <sup>10</sup> 'Akonadi Yaubada i vona i vo, Tomotoga 'aitamogana 'aitamogana tosakona," we'e 'ai'edi ta na vo, 'Ida kebu tosakonaga," 'ana nogaya Yaubada yana vona ta awave'eve'eweni wata yana vona kebu i da 'eno'eno yada nuanua 'waidie.

## 2

*Keliso taunina 'ada to'aivaita.*

<sup>1</sup> ✧Ekwavo, 'omi 'wa vetumagana Iesu 'waineye begaidi a ve'awa-natuna 'waimie wata a nuakalikaliemi. A vonevonemi bega kebu 'wa na sakonaga. We'e 'ai'edi tamu aitoi i na sakonaga, yada To'aivaita i miamia i vevelu'ui faifaida Tamada 'waineye, bega yada sakona i na nuatavunidi. To'aivaitanina Iesu Keliso, yana sauluva matatabuna tonovidi. <sup>2</sup> ✧Taunina, Yaubada yana nuasako 'waideye i tovibodeni bega ta veiana Yaubada taiadi wata 'wainega Yaubada yada sakona i nuatavunidi, siwe kebu 'aise'avadaga, wata tomia fwayafwaya matatabudi.

✧ 1:5: 1 Tim 6:16; Iem 1:17 ✧ 1:6: 1 Ion 2:4 ✧ 2:1: Ibu 9:24 ✧ 2:2: Lom 3:25; Ion 1:29, 11:52

<sup>3</sup> 'Ai'edi Yaubada yana veimea matatabuna ta na veve-matayakeyakediga, ta 'asetai mogitana 'ida Yaubada taiadi ta veiana. <sup>4</sup> \*'Ai'edi tamu tomogo i na vo, Yau Yaubada taiadi a veiana,” siwe yana veimea kebu i na vevematayakeyakediga, taunina tovekali wata Yaubada yana nuanua tonovidi kebu yana nuanua 'waineye i da 'eno'enovi. <sup>5-6</sup> \*We'e 'ai'edi aitoi Yaubada yana vona i na vevematayakeyakediga, yana nuakalikali Yaubada 'waineye, nuakalikali mogitana. 'Ai'edi aitoi i na vo, Yau a tauyeku Yaubada 'waineye a miamia,” i lubwaineni 'asa'aiana bani'odi Iesu Keliso yana sauluva i na vevetutuyamedi. 'Ai'edi i na vetutuyamediga, ta na 'asetai tomogonina mogitana Yaubada taiadi i miamia.

*Veimea 'ivauna.*

<sup>7</sup> \*Ekwavo a na vonemi. Veimea de'e kebu 'ivaunaga, tuatuaina, kumanina basenadi 'wa 'asetai tutuyanina Iesu Valana 'wa nogai. Side bani'odi, ma emiavo 'wa na ven-uakalikali. Veimeanina tuatuaina ma 'ana 'asetai 'waimie. <sup>8</sup> \*Siwe tutuya fuedi veimeanina bani'odi i veve'ivau wata ta 'asetai veimea mogitana fai Iesu Keliso i vematayakeyakeni, 'omi wata bani'odi. Veimeanina ta na vematayakeyakeni ma edavo ta na vevenuakalikaliga, sakona 'waideye bani'odi dudubala i mweamwea ma'itufa Keliso yana mageta mogitana i 'a'awaiia.

<sup>9</sup> \*Aitoi i na vo, Yau Keliso yana mageta nageneye a miamia,” we'e enavo ma fuedie Keliso 'waineye i miamiani i vedumwe'ai'aiediga, taunina bola dudubala 'waineye i miamia. <sup>10</sup> \*We'e aitoi enavo i nuakalikali, taunina Keliso yana mageta 'ana tomia, kebu 'ana fata tamu nani 'waineye i na be'u. <sup>11</sup> \*Aitoi enavo ma fuedie Keliso 'waineye i miamiani i na vedumwe'ai'aiediga, taunina dudubala 'ana tomia. Fai dudubalanina nuana i 'ivegaugauya bega ava'aibe bei i nun-aga kebu i da 'asetai.

<sup>12</sup> \*Natukwavo a vonevonemi fai Yaubada yami sakona i nuatavunidi Iesu Keliso yana wafa 'wainega.

<sup>13</sup> 'Omi tama a vonevonemiga fai kumanina 'eba velamuyega i mia-vagata 'akonadi 'wa 'asetai mogitana.

We'e 'omi tubuvauvau iavetami a vonevonemi fai Seitani taunina Tosakona 'wainega 'wa vetoketoke.

<sup>14</sup> Natukwavo, a vonevonemi fai Tamada 'wa 'asetai mogitana.

\* **2:4:** 1 Ion 1:6,8    \* **2:5-6:** Ion 14:21,23; 1 Ion 4:12,17, 5:3; Ion 13:15    \* **2:7:** 2 Ion 1:5-6    \* **2:8:** Ion 1:9; Lom 13:12    \* **2:9:** 1 Ion 3:10,15, 4:20    \* **2:10:** Lom 14:13    \* **2:11:** Ion 12:35    \* **2:12:** 1 Kol 6:11

We'e 'omi tama a vonevonemi fai kumanina 'eba vela-muyega i mia-vagata 'akonadi 'wa 'asetai mogitana.

'Omi tubuvauvau iavetami a vonevonemi fai 'omi toke-tokemi, wata fai Yaubada yana Vona nuamie i 'eno'enovi, wata fai Seitani taunina Tosakona 'wainega 'wa vetoketoke.

*Fwayafwaya 'ana nuanua kebu nuami i na 'ewadi.*

15 ✨Kebu nuanuaku 'ai'aiwabu nuami i na 'ewadiga, wata tomotoganidi fwayafwaya 'ana nuanua 'waidie bwaikina, yadi sauluva kebu 'wa na vetutuyamediga. 'Ai'edi aitoi fwayafwaya 'ana nani i na nuakalikaliwediga, Tamada 'ana nuakalikali kebu 'waineye i da 'eno'eno. 16 Nani fuedi fwayefwayeye kebu Tamada 'wainega i da maiga. Bani'odi bunu 'ana nuagiva sakoidi, naninidi i 'ise'isediga nuanuadi bwaikina, wata nualaka taunidi yadi 'ai'aiwabu faifaidi. Naninidi kebu i da maia Tamada 'wainega, i mai de'e fwayafwaya sakoina 'wainega. 17 ✨Fwayafwaya de'e sai'afoga i na 'a'ava, wata naninidi sakoidi tomotoga nuanuadi taiadi i na 'a'ava. Siwe egavo Yaubada yana nuanua i vevematayakeyakedi i na mia-vagata.

*Keliso 'ana Gavia.*

18 ✨Natukwavo, tutuya 'eba ve'a'ava sai'afoga i na souyeni. 'Akonadi 'wa 'asetai nagami Keliso 'ana Gavia i na mai, igodi i na vo, Yau tauniku Keliso," mulieta tutuya 'ana 'eba ve'a'ava. Tutuya de'e 'akonadi Keliso 'ana gaviavo i sousouyedi begaidi ta 'asetai fwayafwaya de'e sai'afoga i na 'a'ava. 19 ✨Keliso 'ana gavianidi basenadi 'ada 'aila'a nageneye i miamiani, siwe kebu mogitana Keliso i da nuakalikalieni begaidi i baileda. 'Ai'edi tomotoganidi Keliso i da nuakalikalieniga, taiadi ta da miamiani 'ada 'aila'a nageneye, siwe i baileda bega ta 'asetatumaia matatabudi kebu 'ada 'aila'aga.

20 Tobailanidi kebu nuanuadi Keliso, we'e 'omi Keliso yana 'anivelena 'Anu'anunu 'Atumaina 'akonadi i agemi, begaidi matatabumi Yaubada yana nuanua tonovidi 'wa 'asetadi. 21 Kebu 'wa da bavuyedi faifaina a da vonevonemi, fai 'wa 'asetadi Yaubada yana nuanua tonovidi begaidi a vonevonemi. Yana nuanuananidi 'waidiega kebu tamu vekali i da sousouyeni.

22 ✨Aitoi i vonaga i vo, Iesu kebu Yaubada 'ana Venua'ivinaga," taunina mogitana tovekali, wata Keliso 'ana gavia fai Tamada wata Natuna i vedumwe'ai'aiedi. 23 ✨Fai Yaubada Natuna i vedumwe'ubu'ubuseni, Tamada kebu i da

✨ 2:15: Lom 8:7; Iem 4:4 ✨ 2:17: Mad 7:21 ✨ 2:18: Mad 24:5,24; 2 Ion 1:7

✨ 2:19: Fol 20:30 ✨ 2:22: Mad 10:32-33; 1 Ion 4:3; 2 Ion 1:7 ✨ 2:23: Mad 10:32-33; Ion 5:23; 2 Ion 1:9

labilabini. We'e 'ai'edi aitoi ma yana vetumagana taunina i tauyeni Yaubada Natuna 'wayneye, Tamada i labilabini.

*'Anu'anunu 'Atumaina 'asa'aiana yada Tove.*

<sup>24</sup> Iesu Valana 'wa nogaiga 'eba velamuyega, bega i lubwainemi 'wa na nunuave'avini. 'Ai'edi Valanina 'wa na nunuave'aviniga, Tamada wata Natuna taiadi 'wa na miave'itubama. <sup>25</sup> ✧ Keliso taunina basenadi i vona'awaufaufa 'waideye tamu nani i na veleda. Naninina, mia 'atumaina wata miamia-vagaina.

<sup>26</sup> Keliso 'ana gaviavo igodi nuanuadi i na vekaliemi, begaidi de'e faifaiddi a kilukiluma 'waimie. <sup>27</sup> ✧ We'e 'omi kebu tovenidi bani'odi, basenadi 'Anu'anunu 'Atumaina i agemi, Keliso yana 'anivelena. Keliso 'Anu'anununa nagemie i na miamiaga, kebu 'wa na vo, Aitoi i da ve 'waideye?" 'Anu'anununina nani matatabuna i veve 'waimie, yana ve tonovidi kebu tamu sai'afo i na vekaliemiga. Fai yana ve matatabuna tonovidi, begaidi i lubwainemi 'wa na veve-matayakeyakedi Keliso taiadi 'wa na miave'itubama.

<sup>28</sup> ✧ Natukwavo, vona mogitana nuanuaku Keliso taiadi 'wa na miave'itubama, bega tutuyanina i na souyeniga, kebu ta na bunumayaga, ma yada venuafoufa'ala ta na tovoi mataneye. <sup>29</sup> ✧ Akonadi 'wa 'asetai Keliso yana sauluva tonovidi wata 'atumaidi. Begaidi i lubwainemi 'wa da 'asetai, egavo yadi sauluva tonovidi wata 'atumaidi, taunidi Yaubada natunavo.

### 3

*'Ida Yaubada natunavo.*

<sup>1</sup> ✧ 'Wa na nuani Tamada yana nuakalikali bwaikaotogina 'waideye, fai i vo, 'Omi natukwavo." Mogitana 'ida natunavo. Tomotoganidi fwayafwaya 'ana nuanua 'waidie bwaikina Yaubada i bavuyeni, begaidi kebu i da 'asetada 'ida Yaubada natunavo. <sup>2</sup> ✧ Omi ekwavo a nuakalikaliemi. Vona mogitana tutuya de'e 'ida 'akonadi Yaubada natunavo, siwe naninidi 'atumaiotogidi 'awaie i na souyediga 'waideye kebu ta da 'asetai-atumaidi. Siwe nani 'aitamogana ta 'asetai. Tutuyanina Keliso i na souyeni, ta na vetuli nika 'ida Keliso bani'odi, fai bei ta na 'isaotogi wata ta na 'asetai mogitana. <sup>3</sup> Egavo i vevetumagana 'awaie i na vetuli Keliso bani'odi, i totokemaigedi bega yadi sauluva 'atumai'avadi, Keliso yana sauluva bani'odi.

<sup>4</sup> Egavo i sakosakona, Yaubada yana veimea i geugeudi, fai sakona matatabuna Yaubada yana nuanua 'ana

✧ 2:25: Ion 3:15, 6:40 ✧ 2:27: Ion 14:26 ✧ 2:28: 1 Ion 4:17 ✧ 2:29: 1 Ion 3:10 ✧ 3:1: Ion 1:12-13, 16:3 ✧ 3:2: 2 Kol 3:18; Fil 3:21

togeu. <sup>5</sup> ✧We'e 'omi 'akonadi 'wa 'asetai Keliso kebu tamu sakona 'waineye, i mai bega yada sakona i 'ewayavuledi. <sup>6</sup> ✧I 'ewayavulediga, begaidi egavo Keliso taiadi i miave'itubamaga kebu wata i na sakosakona. We'e egavo i sakosakona kebu Keliso i da 'asetai mogitana 'alo i da veianeni.

<sup>7</sup> ✧Natukwavo, kebu nuanuaku tamu aitoi i na vekaliemiga. Egavo tutuya fuedi i vevesauluva 'atumaina wata tonovina, taunidi tomotoga 'atumaidi bani'odi Keliso. <sup>8</sup> ✧Egavo i sakosakona, taunidi Seitani natunavo fai 'eba velamuyega Seitani tosakona. Yaubada Natuna yana mai lamuna side bani'odi. I mai bega Seitani yana folova i na ve'a'avaotogidi.

<sup>9</sup> ✧Egavo i tubuve'ivau Yaubada yana 'aila'a faifaina kebu nuanuadi sakona-vebogi, fai Yaubada yana nuanua i 'eno'eno 'waidie. Kebu 'ana fata natunavonidi i na sakona-vebogi, fai i tubuve'ivau Yaubada 'wainega. <sup>10</sup> Bega Yaubada wata Seitani yadi 'aila'a 'ada fata ta na 'asetadi. Egavo nuanuadi sakona-vebogi wata kebu nuanuadi ediavo i na nuakalikaliediga, ta 'asetadi kebu Yaubada natunavoga, taunidi Seitani yana 'aila'avo.

### *Ma edavo ta na vevenuakalikali.*

<sup>11</sup> ✧Tutuyanina 'waineye Iesu Valana 'wa nogai i maiga 'asiau vonanina i 'eno'eno 'waimie, i vo, Ma edavo ta na vevenuakalikali.” <sup>12</sup> ✧Kebu Adama natuna Keni, yana sauluva ta na salai. Keni yana nuanua bani'odi Seitani yana nuanua sakoidi, begaidi taunina taina i luvewafai. I luvewafaga lamuna fai i 'asetai taina yana sauluva 'atumaidi we'e taunina yana sauluva sakoidi. <sup>13</sup> ✧Ekwavo, tomotoganidi fwayafwaya 'ana nuanua 'waidie bwaikina i vevedumwe'ai'aiemi, siwe kebu nuami i na voganidi fai tomotoganidi Keni yana sauluvayega i nunago. <sup>14</sup> ✧Basenadi ta nunagoi wafaotoga 'ana 'edeamo, siwe 'akonadi ta 'idili mia 'atumaina wata miamia-vagaina ta veluagai. Ta 'asetai ta veluagai fai edavo ma fuedeye Keliso 'waineye ta miave'itubamaga ta nuakalikaliedi. Egavo kebu i da nunuakalikaliga, bola i nunagoi wafaotoga 'ana 'edeamo. <sup>15</sup> ✧Egavo ediavo i na vevedumwe'ai'aiediga, siwe 'asa'aiana taunidi toluvewafa, we'e 'omi 'akonadi 'wa 'asetai kebu tamu toluvewafa 'waineye mia 'atumaina wata miamia-vagaina i da 'eno'eno.

✧ 3:5: 2 Kol 5:21; 1 Fit 2:22-24 ✧ 3:6: Lom 6:1-2,14 ✧ 3:7: 1 Ion 2:29 ✧ 3:8: Ion 8:44 ✧ 3:9: 1 Ion 5:18 ✧ 3:11: Ion 13:34-35 ✧ 3:12: Nag 4:8 ✧ 3:13: Ion 15:18-19; Mad 5:11-12 ✧ 3:14: 1 Ion 2:11 ✧ 3:15: Mad 5:21-22

16 ✧Nuakalikali mogitana 'akonadi Keliso i veda, taunina i tauyeni i wafa faifaida. Wata 'ida bani'odi, i lub-waineda taunida ta na tauyeda wafa 'waineye edavo tovetumagana faifaidi. 17 ✧'Ai'edi tamu tomogo 'ai'aiwabuna i na vo, Yaubada a nuakalikalieni," siwe umokaina iana i vewekowekomaga kebu i na 'ivaiseniga, 'ana 'isa kebu mogitana Yaubada i da nuakalikalieni. 18 Natukwavo, kebu ta na vonamoga ta na vo, Ekwavo a nuakalikaliemi," i lub-waineda ta na nunuakalikali mogitana, 'awada wata nimada 'waidiega.

*'Ai'edi ta na nuakalikali mogitana, Yaubada mataneye ta na sosoana.*

19-20 'Ai'edi ma yada nuakalikali ta na 'a'aivaita, ta na 'asetai 'ida mogitana Yaubada yana nuanua tonovidi 'adi tovetamatayakayaka. We'e 'ai'edi 'ada vebae 'waidie vita ta na lutonovi tamu yada sakona faifaina, siwe fai ta nunuakalikali mogitana nuafouda i na vatu Yaubada mataneye. Yaubada yana nuakalikali bwaikaotogina, 'ada vebaenidi kebu bani'odiga, wata nani matatabuna ta 'i'idewadiga i 'asetadi.

21-22 ✧Ekwavo, 'ai'edi ta na vetumagana Yaubada yana nuakalikalinina 'waineye, ta na sosoana wata ma yada venuafoufa'ala Yaubada mataneye, wata ava'ai nuanuada ta na velu'uiga i na veleda. I na veledaga, fai yana veimea ta vevematayakeyakedi wata yana nuanua ta 'i'idewadiga faifaidi i sososoana. 23 ✧Yana veimeanina side bani'odi. Nuanuana ta na vetumagana Natuna Iesu Keliso 'waineye wata ma edavo ta na vevenuakalikali. Veimeanina kebu tulina, bani'odi basenadi Keliso i voneda. 24 ✧Egavo Yaubada yana veimea i vevematayakeyakedi, taunidi Yaubada taiadi i miave'itubama, wata Yaubada i labilabinidi. Ta 'aseta Yaubada taiadi ta miave'itubama, fai Keliso yana 'anivelena 'Anu'anunu 'Atumaina i ageda.

## 4

*'Anu'anunu mogitana wata 'anu'anunu-vekavekali.*

1 ✧Ekwavo, tomotoga fuedi 'akonadi i tovoi i nagoi 'awalawa fuedi 'waidie i vonavona i vo, Yau Yaubada yana Vona 'ana tolu'ivona." Fai fuedi tolu'ivona-vekavekali, kebu yadi vona 'wa na vetumagana-matayo'oyedi, nagami 'wa na venua'ivina-'atumai, yadi vonanidi mogitana i maia 'Anu'anunu 'Atumaina 'wainega, 'alo taunidi yadi nuanuayega. 2 ✧Side bani'odi 'wa na venua'ivinedi 'ami

✧ 3:16: Ion 13:1; 1 Tes 2:8 ✧ 3:17: VeL 15:7; Iem 2:15-16 ✧ 3:21-22: Mad 21:22 ✧ 3:23: Ion 6:29, 13:34 ✧ 3:24: Lom 8:9 ✧ 4:1: Mad 24:11 ✧ 4:2: 1 Kol 12:3

fata 'wa na 'asetadi yadi vonanidi 'Anu'anunu 'Atumaina 'wainega, 'alo taunidi yadi nuanuayega. Egavo i na vonavonaga i na vo, Iesu taunina Yaubada 'ana Venua'ivina i vetomotogaotoga," yadi vona i mai Yaubada 'Anu'anunununa 'Atumaina 'wainega. <sup>3</sup> ✧We'e egavo i na vonavona i na vo, Iesu kebu Yaubada 'ana Venua'ivinaga, wata kebu i da vetomotogaotoga," tomotoganidi Yaubada 'Anu'anunununa kebu i da agediga, 'anu'anunu tulina i agedi. 'Anu'anununina i agediga Keliso 'ana Gavia, kumanina faifaina basenadi i vo, I na mai," nika mogitana 'akonadi i mai fwayefwayeye.

<sup>4</sup> We'e natukwavo, 'omi Yaubada yana tomotoga, 'wa vetoketoke tolu'ivona-vekavekalinidi 'waidie. 'Wa vetoke-tokega fai 'Anu'anunu 'Atumaina i agemi 'Anu'anununina toketokeotogina, 'anu'anunu sakoina fwayefwayeye kebu bani'odiga. <sup>5</sup> ✧Tomotoganidi fwayafwaya 'ana nuanua 'waidie bwaikina, tutuya fuedi naninidi nuadi i 'ewadiga faifaidi i vonavona. 'Ifwaidi tomotoga, tomotoganidi yadi nuanua bani'odi, yadi vona nuanuadi fai fwayafwaya 'ana nani nuanuadi. <sup>6</sup> ✧We'e 'ida Yaubada yana tomotoga. Egavo Yaubada i 'asetai mogitana bonada i noganogai, we'e egavo Yaubada i baila, wata yada vona i baila. Naninina 'wainega 'ada fata ta na 'asetai egavo 'Anu'anunununa Tonovina 'wainega i vonavona, wata egavo 'anu'anunu-vekavekali 'wainega i vonavona.

*Yaubada yana sauluva matatabuna nuakalikali.*

<sup>7</sup> Ekwavo, 'akonadi a nuakalikaliemi, nuanuaku matatabuda ta na vevenuakalikali fai nuakalikalinina Yaubada 'wainega. Egavo tutuya fuedi i vevenuakalikaliga, taunidi Yaubada natunavo wata i 'asetai. <sup>8</sup> Fai Yaubada nuakalikali lamuna, begaidi egavo kebu i da nunuakalikaliga Yaubada i bavuyeni. <sup>9</sup> ✧Yaubada i nuakalikaliiedaga 'ana 'eba 'isa side bani'odi. Natuna tubu'eana i vetunei tomia fwayafwaya sakoida 'waideye, bega yana wafa 'wainega mia 'atumaina wata miamia-vagaina ta veluagai. <sup>10</sup> ✧Yada nuakalikali Yaubada 'waineye, nuakalikali sai'afo. Nuakalikali mogitana lamuna side bani'odi. Fai Yaubada i nuakalikaliieda mogitana, Natuna i vetunei, i wafa faifaida bega Yaubada yana nuasako 'waideye i tovibodeni, wata yada sakona i nuatavunidi.

<sup>11</sup> ✧Ekwavo, fai de'e bani'odi Yaubada i nuakalikaliiedaga, begaidi i lubwaineda ma edavo ta na vevenuakalikali. <sup>12</sup> ✧Kebu tamu aitoi Yaubada i da 'iseniga, siwe 'ai'edi ma



edavo ta na vevenuakalikaliga, Yaubada taiadi ta na miave'itubama, wata yana nuakalikali i vevebwaika 'waideye bega nuakalikali mogitana.

<sup>13</sup> ✱Ta 'asetai 'akonadi Yaubada taiadi ta miave'itubama wata i labilabinida fai yana 'anivelena 'Anu'anununa i ageda. <sup>14</sup> ✱'Ima Yaubada Natuna 'a 'iseni bega 'a lulu'ivona 'a vo, Tamada Natuna i vetunei tomia fwayafwaya 'waideye, taunina 'ada To'ita'ita'i." <sup>15</sup> Egavo i vonavonaga i vo, Iesu Yaubada Natuna," taunidi Yaubada taiadi i miave'itubama, wata Yaubada i labilabinidi. <sup>16</sup> ✱Begaidi ta 'asetai Yaubada i nuakalikali, wata ma yada vetumagana ta tauyeda yana nuakalikalinina 'waineye.

Yaubada nuakalikali lamuna. Egavo i miamiani nuakalikalinina nageneye, 'asa'aiana Yaubada taiadi i miave'itubama wata Yaubada i labilabinidi. <sup>17</sup> Taiadi ta miave'itubamaga, yana nuakalikali i vevebwaika 'waideye, begaidi fwayafwaya 'ana 'eba ve'a'ava 'waineye ma yada venuafoufa'ala wata ma yada sosoana ta na tovoi mataneye. Kebu ta na kolologa, fai 'ida ta miamianiga fwayefwayeye Keliso bani'odi, yana nuakalikali mogitana 'waideye i 'eno'eno. <sup>18</sup> 'Ai'edi aitoi i na nuakalikali mogitana, kebu 'ada fata ta na kololoyeniga. Bani'odi Yaubada i nuakalikali mogitana, bega kebu ta na kololoyeni vematavuloga faifaina. 'Ai'edi egavo Yaubada i na kololoyeniga vematavuloga faifaina, taunidi 'waidie yana nuakalikali kebu i da vevebwaika.

<sup>19</sup> ✱Nagamidiotoga Yaubada i nuakalikali, begaidi 'ida ta nunuakalikali. <sup>20</sup> 'Ai'edi aitoi i na vo, Yaubada a nuakalikali," we'e iana tovetumagana i na vedumwe'ai'aieniga, yana vonanina, vekali. Iana i 'ise'iseni siwe kebu i da nuakalikali, begaidi kebu tamu sai'afu i na nuakalikali Yaubada, kumanina kebu 'ana fata i na 'iseniga 'waineye. <sup>21</sup> ✱We'e Yaubada taunina yana veimea i yatoi 'waideye i vo, Egavo Yaubada i nunuakalikali, i lubwainedi ediavo wata i na nuakalikali."

## 5

*Yada 'eba vetoketoke sauluva sakoidi faifaidi.*

<sup>1</sup> Egavo i na vetumagana Iesu taunina Keliso Yaubada 'ana Venua'ivina, taunidi Yaubada natunavo. Egavo Tamada i na nuakalikali, siwe 'asa'aiana 'akonadi Natuna i nuakalikali. <sup>2</sup> 'Ai'edi Yaubada ta na nuakalikali, wata yana vona ta na vevematayakeyakediga, ta 'asetai wata

natunavo ta nunuakalikaliedi. <sup>3-4</sup> ✧'Ai'edi Yaubada ta na nuakalikalieni mogitana, yana nuanua i vonedaga ta na 'i'idewadi. Yana nuanuanidi kebu vitadi 'waideye, fai Yaubada natunavo 'aitamogana 'aitamogana 'ana fata i na vetoketoke fwayafwaya 'ana nuanua sakoidi 'waidiega. Ta vevetoketokega fwayafwaya 'ana nuanua sakoidi 'waidie yada vetumagana 'wainega. <sup>5</sup> ✧Egavo i na vevetoketokega, tomotoganidi i vetumagana Iesu taunina Yaubada Natuna, 'aiseotogidi 'adi fata i na vetoketoke fwayafwaya 'ana nuanua sakoidi 'waidie.

*Nani 'aitonu i lu'ivona Iesu Keliso faifaina.*

<sup>6</sup> ✧Iesu Keliso kumanina i mai abamega, i miamia fwayefwayeye bafitaiso i 'ewai ufayega, mulieta yana wafa 'waineye dayagina i ilolo faifaida. Yada 'eba 'isa 'ailuga. Kebu ufa'ava 'aisena, siwe wata dayaga taiadi. Wata 'Anu'anunu 'Atumaina i lulu'ivona Iesu taunina Yaubada Natuna, 'Anu'anununina nani tonovidi matatabuna lamudi. <sup>7</sup> ✧Begaidi naninidi 'aitonu Iesu Keliso faifaina i lu'ivona. <sup>8</sup> Ufa, dayaga, wata 'Anu'anunu 'Atumaina, 'aitonunidi yadi nuanua 'aitamogana, Iesu taunina Yaubada Natuna. <sup>9</sup> ✧'Eba vonayavuga 'waineye, to'isa yadi vona faifaidi ta awavemogitana, we'e Yaubada yana lu'ivona toketokeogina, begaidi i lubwaineda ta na vetumagana Yaubada yana lu'ivonanina 'waineye, Natuna faifaina. <sup>10</sup> ✧Egavo i vevetumagana Yaubada Natuna 'waineye, Yaubada yana lu'ivonanina i 'eno'eno nuadie, yadi vetumagana i kiavefa'alidi. Egavo Yaubada yana vonanina Natuna faifaina kebu i da vetumaganeniga, yadi nuanua i vo, Yaubada i vevekali.” <sup>11</sup> Yaubada side bani'odi i voneyedi. Mia 'atumaina wata miamia-vagaina Yaubada i veleda, yada mianina 'atumaina ta veluagai Natuna 'wainega. <sup>12</sup> ✧Egavo Yaubada Natuna taiadi i miave'itubama, mia 'atumaina wata miamia-vagaina 'akonadi i veluagai, we'e egavo kebu taiadi i da miave'itubamaga, kebu 'adi fata i na veluagai.

*Mia 'atumaina wata miamia-vagaina faifaina.*

<sup>13</sup> ✧'Omi kumanimiavo 'wa vetumagana Yaubada Natuna 'waineye, de'e a vonevonemi bega 'wa na 'asete-'atumaia 'akonadi mia 'atumaina wata miamia-vagaina 'wa veluagai. <sup>14</sup> ✧'Ida kebu ta da kololo Yaubada mataneyeye, ta venu-afoufa'ala fai ta nuani mogitana 'ai'edi naninidi nuanuana faifaidi ta na velu'ui, yada velu'uinidi i na nogaidi. <sup>15</sup> Fai ta

✧ 5:3-4: Ion 14:15,23-24; Mad 11:30; Ion 16:33 ✧ 5:5: Lom 8:37 ✧ 5:6: Ion 1:29-34 ✧ 5:7: Ion 15:26 ✧ 5:9: Ion 5:32-37,8:18 ✧ 5:10: Gal 4:6 ✧ 5:12: Ion 3:36 ✧ 5:13: Ion 20:31 ✧ 5:14: Ion 14:13

'asetai yada velu'ui i noganogaidi, wata ta 'asetai naninidi faifaidi ta velu'uiga i na veleda.

<sup>16</sup> ☆Ai'edi aitoi iana tovetumagana i na 'iseni sauluva sakoina i na 'i'idewai, siwe sauluvanina 'wainega kebu wafaotoga i na souyeni, i lubwaineni faifaina i na velu'ui. Yana velu'uinina 'wainega tomogonina yana mia Yaubada i na 'ive'ivauya. Sakonanidi 'waidiega kebu wafaotoga i na souyeniga 'aisedi faifaidi a vonavona. We'e 'ai'edi aitoi tamu sakona bwaikina i na 'i'idewai, sakonanina 'wainega wafaotoga i na souyeni, kebu faifaina a da vonavona. <sup>17</sup> Sauluva matatabuna kebu tonovidiga 'asa'aiana sakona, siwe sauluvanina sakoidi 'ifwaidi 'waidiega wafaotoga kebu i na souyeniga.

<sup>18</sup> ☆Yaubada natunavo ta 'asetadi kebu tamu i da sakosakona fai Yaubada Natuna i 'i'ibababaledi bega Seitani kebu 'ana fata i na 'abitonovidi. <sup>19</sup> Ta 'asetai tomotoganidi fwayafwaya 'ana nuanua 'waidie bwaikina Seitani yana nuanua sakoidi i veveimeyedi, we'e 'ida Yaubada natunavo. <sup>20</sup> ☆Wata ta 'asetai Yaubada Natuna i mai nuada i kiavemagetadi bega Yaubada, kumanina nani matatabuna tonovidi lamudi ta 'asetadi. Bega 'asiau ta miave'itubama Yaubadanina taiadi fai ta miave'itubama Natuna Iesu Keliso taiadi. Yaubadanina 'aiseotogina i miamia, kebu tamu wata aitoi Yaubada mogitana bani'odi, wata taunina mia 'atumaina wata miamia-vagaina lamuna.

<sup>21</sup> ☆Ekwavo a nuakalikaliemi. Nuanuaku taunimi 'wa na 'i'isave'avinimi bega kebu tamu yaubada-vekavekali nuami i na 'ewadi.

'Asa'aiana bani'odi,  
Yau Ioni.

## 2 IONI

### Ioni yana kiluma 'ana veluga.

De'e letanina 'waineye, Ioni kebu i da vo, Yau Ioni 'waikuyega," 'asa'aiana i vo, 'Aueva tovetumaganavo 'adi To'edakumeta 'waikuyega." I kilumaga tamu vavine ma natudiavo 'waidie. Wata yana leta 'ana 'eba ve'a'ava 'waineye tamu vavine Ioni taiadi i miangiaga faifaidi i vona. To'asete i vonaga, kebu vevine mogitana faifaidi i da vonavona, we'e mogitana voke Ioni i awatabai tovetumagana 'aila'a 'ailuga faifaidi. Ioni i veifufu tamu Iesu yana 'aila'a 'waidie bega ma ediavo i na vevenuakalikali wata i matakia 'waidie tove-vekavekali faifaidi. De'e letanina 'ana 'idi side bani'odi.

Vona-vekaiwa. 1:1-3

Venuakalikali. 1:4-6

Matakia tove-vekavekali faifaidi. 1:7-11

'Alanuai. 1:12-13

<sup>1</sup> Yau 'aueva, yami to'edakumeta, a vekaiwa 'omi vavine vevenua'ivinimi ma natumiavo\* 'waimie. Basenadi Yaubada i venua'ivinemi 'wa vetumagana 'waineye, bega a nuakalikaliemi mogitana. Yau kebu 'aiseku a da nuakalikaliemiga, siwe wata tomotoga matatabudi Yaubada yana nuanua tonovidi i 'asetadiga, i nuakalikaliemi. <sup>2</sup> Tomotoganidi taiadi matatabuma 'a nuakalikaliemi fai Yaubada yana nuanua tonovidi tutuya matatabuna i 'eno'eno 'waimeye kebu i na 'a'ava.

<sup>3</sup> A vevelu'ui, nuanuaku Tamada Yaubada wata Natuna Iesu Keliso ma yadi nuakalikali i na vevesauluva 'atumaina 'waideye, i na 'i'isanuakalikaliwata wata nuanua bikadi mia 'atumaina taiadi i na vevelede. De'e naninidi 'waidiega matatabuda ta na veveiana, wata Yaubada yana nuanua tonovidi bani'odi ta na vesauluva.

#### *Venuakalikali mogitana kebu vekali.*

<sup>4</sup> Natumiavo 'ifwaidi faifaidi a soşoana bwaikina fai a 'isedi Yaubada yana nuanua tonovidi i vevematayakeyakedi ava'ai Tamada i voneyeniga 'waideye bani'odi. <sup>5</sup> Bega 'omi a nuakalikaliemiga a vonevonemi, nuanuaku ma edavo ta na vevenuakalikali. De'e veimeanina nuakalikali faifaina kebu veimea 'ivaunaga, basenadi 'eba velamuyega i 'eno'eno 'waideye. <sup>6</sup> Nuakalikalinina faifaina a vonavonaga side bani'odi. Ta na vevenuakalikali mogitana, Yaubada yana

\* **1:1:** Voke 'ana 'asete Ioni i kilukiluma tamu Keliso yana 'Aila'a 'waidie.

veimea ta vevematayakeyakedi. Yana veimeanina bwaikina basenadi 'wa 'asetai i vo, I lubwainemi 'aitamogana 'aitamogana 'wa na vevenuakalikali.”

<sup>7</sup> Nuanuaku 'wa na vevenuakalikali fai 'awalawa fuedi 'waidie tovekali i miamiani. Tomotoganidi yadi nuanua igodi i vo, Iesu Keliso kebu i da vetomotogaotoga 'ida bani'odi.” Tovekalinidi Keliso 'ana gaviavo, nuanuadi i na vekalieda.

<sup>8</sup> Taunimi 'wa na 'i'isave'avinimi bega kebu i na vekaliemi. 'Ai'edi bonadi 'wa na vetumaganediga, yami folova Yaubada faifaina 'ana tutula kebu 'wa na 'ewai 'wainega. Nuanuaku 'ama tutula matatabuna 'wa na veluagai. <sup>9</sup> Egavo Keliso yana ve i na 'iaweni i na damana tovekalinidi 'waidie, tomotoganidi kebu i da miave'itubama Yaubada taiadi. We'e egavo Keliso yana ve 'waideye, 'waineamo i na nunagoi, taunidi i miave'itubama Tamada wata Natuna taiadi. <sup>10</sup> ✨'Ai'edi aitoi i na wai 'waimie nuanuana i na ve 'waimie, siwe yana venina kebu Keliso yana vona bani'odiga, kebu 'wa na voneni i na wai yami vanuge, wata kebu tamu sai'afo 'wa na tolivileni. <sup>11</sup> ✨We'e 'ai'edi aitoi i na lu'uma'umaieniga, siwe 'asa'aiana 'akonadi 'ana 'au yana folova sakoina 'waineye.

*Yana vona 'ana 'eba ve'a'ava.*

<sup>12</sup> Nuanuaku 'waimie a na veifufu manamanawena, siwe kebu kiluma 'aisena 'wainega. A nuani tauniotogiku a na waimo a na veifufu 'waimie bega matatabuda ta na sosoana 'aitamogana.

<sup>13</sup> Taimi natudiavo† de'e bei i miamianiga, yadi vekaiwa i vetunei 'waimie. Taiminidi, wata Yaubada i venua'ivinedi.

'Asa'aiana bani'odi,  
Yau Ioni.

✨ **1:10:** Mad 10:13-14; Lom 16:17   ✨ **1:11:** 1 Tim 5:22   † **1:13:** Voke 'ana 'asetai Keliso yana 'Aila'a tamu, Ioni taiadi i miamia.

## 3 IONI

### Ioni yana kiluma 'ana vetonu.

Leta de'e 'ana vetonu Ioni i kilumi siwe kebu 'ana wagava i da yatoi, 'asa'aiana i vo, Yau 'auvea, yamu to'edakumeta 'waikuyega." Letanina i kilumi i nago tamu tovetumagana 'waineye, 'ana wagava Gaiasa. I kiluma i subiai yana 'isave'avina Yaubada yana toflovavo 'waidie faifaina. We'e tamu tovetumagana 'ana wagava Diotilifi yana sauluva i awavesakoyeni. De'e letanina 'ana 'idi side bani'odi.

Vona vekaiwa. 1:1-4

Gaiasa 'ana subia. 1:5-8

Diotilifi 'ana awavesako. 1:9-10

Dimitilasi 'ana awave'atumai. 1:11-12

Yana 'alanuai. 1:13-15

<sup>1</sup> \*Yau 'auvea, yamu to'edakumeta, a vekaiwa 'omu iaku Gaiasa 'waimuye, a nuakalikiemu mogitana. <sup>2</sup> Iaku, a vevelu'ui faifaimu bega kebu tamu vita i na sousouyeni 'waimuye, wata 'amu lautonova matatabuna 'atumaidi, bani'odi yamu folova wata yamu sauluva 'akonadi 'atumaidi Yaubada mataneye. <sup>3</sup> A 'asetai yamu folova wata yamu sauluva 'atumaidi Yaubada mataneye fai edavo tovetumagana 'ifwaidi i maia i lu'ivona 'waikuye ma yamu dumwebika Yaubada yana nuanua tonovidi 'u vevematayakeyakedi. Valamunina faifaina a sosoana bwaikina. <sup>4</sup> \*Nani fuei faifaidi a sosoana, siwe 'ai'edi a na nogai natukwavo Keliso yana 'aila'a, Yaubada yana nuanua tonovidi i vevematayakeyakedi, 'eba sosoana bwaikaotogina 'waikuye.

#### *Gaiasa 'ana subia.*

<sup>5</sup> \*Iaku, mogitana 'omu ma 'amu vetumagana 'u folofolova edavo tovetumagana 'waidie. Tove tumagananidi 'ifwaidi taunidi tolau'age-vuvua, 'ifwaidi 'u 'isa'inanadi 'ifwaidi 'u bavuyedi, siwe matatabudi 'u 'i'isave'avinidi. <sup>6</sup> \*I veifufu Keliso yana 'Aila'a 'waidie yamu 'aivaita wata yamu nuakaliki faifaidi. I na tautauyaga, nuanuaku 'u na 'ivaisedi wata 'adi 'ibua 'u na veveledi, nika Yaubada i na sososoana yamu folova faifaina. <sup>7-8</sup> \*Ida Keliso yana 'Aila'a i lubwaineda tomotoganidi ta na 'i'ivaisedi fai yadi 'atamana i 'iawedi i lalau'age-vuvua Keliso faifaina. I lalau'age-maimaiga, kebu tamu 'aivaita i da veveluagai Yaubada 'ana tobavu 'waidiega. Ta na 'i'isave'avinidiga, 'asa'aiana matatabuda ta ve'ivaivaita

\* 1:1: Fol 19:29    \* 1:4: 1 Kol 4:14-15    \* 1:5: Lom 12:13    \* 1:6: Fol 15:3

\* 1:7-8: Fol 20:33,35; Ibu 13:2

bega Yaubada yana nuanua tonovidi valana, i na vebwaika tomotoga 'waidie.

*Diotilifi wata Dimitilasi faifaidi.*

<sup>9</sup> ✧ Basenadi tamu yaku leta a kilumi tovetumaganavo taiadi 'wa miamianiga 'waidie, siwe Diotilifi, kumanina nuanuana i na veto'edakumeta 'waimie, yama nuanua i vedumwe'ai'aiedi. <sup>10</sup> Tutuyanina a na wai, yana sauluva sakoidi a na lu'ivoneyedi 'waimie. I vevebonaivoyema wata i awavesakoyema, siwe wata tamu sauluva sakoiotogina i 'i'idewai. Tutuyanina Yaubada yana tofolovavo i le'wale'wai i baibaila, wata 'ai'edi egavo nuanuadi i na lu'uma'umaiedi, i tatalabodedi, we'e i na lu'uma'umaiediga igodi nuanuana i na veugegedi Keliso yana 'Aila'a 'wainega.

<sup>11</sup> Iaku, a nuakalikiemu, sauluva sakoidi kebu 'u na vetutuyamediga, nuanuaku sauluva 'atumaidi 'u na vevetutuyamedi. Egavo i vevesauluva 'atumaina taunidi Yaubada natunavo, we'e egavo i vevesauluva sakoina taunidi kebu Yaubada i da 'asetai mogitana.

<sup>12</sup> Tomotoga fuedi i vo, Dimitilasi yana sauluva 'atumaidi." Bani'odi i voneyediga vona mogitana fai yana sauluva tonovidi. 'Ima wata bani'odi a awave'atumaieni, 'akonadi 'wa 'asetama ava'ai 'a na voneyediga tonovidiamo a na vona.

*Yana vona nuakalikali 'ana 'eba ve'a'ava.*

<sup>13</sup> Nuanuaku 'waimie a na veifufu manamanawena, siwe kebu kiluma 'aisena 'wainega. <sup>14</sup> A nuani 'awaie tauniotogiku a na waimo taiadi ta na veifufu.

<sup>15</sup> A vevelu'ui faifaimu, nuanuaku Yaubada nuanua bikadi i na vevelemu mia 'atumaina taiadi. Emwavo de'e bei yadi vekaiwa i vetunei 'waimuye. Nuanuaku edavo taiadi 'wa miamianiga, matatabudi 'waidie 'u na lu'ivona yaku vekaiwa.

'Asa'aiana bani'odi,  
Yau Ioni.

## IUDE Iude yana kiluma.

Iemesa taina 'ana wagava Iude leta de'e i kilumi. We'e Iemesanina, tovetumaganavo i miamianiga Ielusalema, taunina 'adi to'edakumeta bwaikina. To'aseta fuei yadi nuanua, Iudenina kumanina Iesu taina. (Malika 6:3)

Tovetumagananidi 'waidie i kilumaga, de'e leta nageneye Iude kebu i da lu'ivoneyeniga. I kilumaga igodi nuanuana i da veifufu 'ada 'ita'ita'i Yaubada 'wainega faifaina nika vala i nogai tove-vekavekali yadi ve 'waidiega tovetumaganavo i vevekaliedi, bega leta de'e 'wainega i matakia 'waidie. Wata i velu'ase'asedi ve mogitana Iesu faifaina 'adi 'ibababala. De'e letanina 'ana 'idi side bani'odi.

Vona-vekaiwa. 1:1-2

Tove-vekavekali yadi sauluva, yadi ve, wata yadi wafao-toga faifaidi. 1:3-16

I na tokemaigedi yadi vetumagana 'waidie. 1:17-23

Yaubada wata Iesu Keliso 'adi subia. 1:24-25

<sup>1</sup> Yau Iude, Iesu Keliso yana tofolova wata Iemesa taina, a vekaiwa 'omi tomotoganimi Iesu Keliso tutuya fuei i 'ibababalemiga 'waimie. Yaubada Tamada i venua'ivinemi wata i nunuakalikalielemi. <sup>2</sup> A vevelu'ui faifaimi nuanuaku Yaubada i na 'i'isanuakalikalielemi, nuanua bikana mia 'atumaina taiadi i na vevelelemi, wata tutuya fuei i na nunuakalikalielemi.

### *Tove-vekavekali faifaidi.*

<sup>3</sup> Ekwavo, nuanuaku a da kilukiluma 'waimie fueda 'ada 'ita'ita'i Yaubada 'wainega faifaina, siwe 'asiau a vebaeku mogitana a na kiluma 'waimie tamu nani faifaina. Nuanuaku Yaubada yana Vona Tonovidi 'wa na 'ibababaledi tove-vekavekali 'waidiega, Vonanidi basenadi i 'anivelena-tamogeni tutuya matatabuna faifaidi yana tomotoga 'waideye. <sup>4</sup> ☆Nuanuaku 'wa na 'ibababalediga fai Yaubada 'ana tovedumwe'ai'ai 'ifwaidi i yogosebaseba i vevekali 'waimie i vo, 'Wa vetumaganaga Iesu 'waineye begaidi Yaubada kebu vematavuloga i na velemiga i na nuakalikalielemimo, 'ami fata 'wa na sakosakona." Tovekalinidi faifaidi basenadiotoga i kilumi Yaubada yana Buki 'waineye, 'akonadi Yaubada i veimea 'adi vematavuloga i na veluagai fai 'Auvea Iesu Keliso, 'aiseotogina 'ada Toveimea i vedumwe'ai'aieni.

☆ 1:4: 2 Ion 1:9-10; Lom 6:15



5 ✧Vona mogitana tovedumwe'ai'ainidi vematavuloga i na veluagai Yaubada 'wainega bani'odi basenadi tosakona i veluagai. Nani de'e 'akonadi 'wa 'asetai siwe nuanuaku a na tolinuata'iemu nika 'wa na nuani. Basenadiotoga me Isileli matatabudi 'Auvea i 'ita'ita'iedi Itifita 'wainega i vagavaidi siwe mulieta 'ifwaidi i luwewafadi fai kebu nuanuadi i na vematayakayaka 'waineye. 6 ✧Wata 'wa na nuani basenadiotoga anelose ma yadi veimea siwe 'ifwaidi i baila nuanuadi sakona bega yadi 'eba mia i 'iaweni. Tobailanidi Yaubada i yogona-vagasedi i yatodi Vatu'ai Manamanawena 'waineye, dudubala nageneye, mulieta Vonayavuga 'ana 'Aiata 'waineye, i na veimea 'adi vematavuloga faifaina.

7 ✧Wata bani'odi 'atamana 'ailuga Sodoma wata Gomola 'ifwaidi 'atamana lilivadie taiadi. Basenadiotoga 'atamananidi 'adi tomotoga i veve'avula-'avo'avovo anelosenidi sakoidi bani'odi, wata iaveta'ava i sakosakona. 'Akonadi 'adi vematavuloga i veveluagai 'ai-'ala'alase kebu yana 'weuga 'waineye, tomotoga matatabuda yada 'eba 'isa bei tosakona vematavuloga i na veluagai.

8 Tomotoganidi i sakonaga wata bani'odi tove-vekavekali yami 'aila'a nageneye. Yadi 'enoneganega i vevekaliedi bega bunu 'ana nuanua 'waidiega i sakosakona. Yaubada yana veimea kebu nuanuadi i na vematayakeyakedi wata anelose magemagetadi abame, 'waidie i manimanini-'avo'avovo. 9 ✧I lubwainedi kebu i na manini-'avo'avovo. Basenadiotoga Mosese i wafa, Yaubada anelose 'adi to'edakumeta 'ana wagava Maikeli i vetunei 'ana ve'ufa faifaina, Seitani taiadi i ve'ikwayekwayegeni. Siwe Maikeli ma yana ve'ililibu Seitani i vonenimo kebu i da yagaia, i vo, 'Auvea taunina i na talabodemu." Maikeli toketokena ma yana veimea, siwe Seitani i ve'ililibuyeni, begaidi tovenidi, taunidi tomotoga-'avo'avovo i lubwainedi anelose magemagetadi i da ve'ililibuyedi. 10 Siwe naninidi i bavuyediga, 'waidie i manimanini-'avo'avovo. Taunidi yadi nuanua ava'ai i nuaniga 'aisedi i 'i'idewadi 'aisaya walawala'ai bani'odi, nuanuananidi sakoidi 'waidiega taunidi i 'iveilagidi 'awaie i na wafaotoga.

11 ✧Nuakalikalidi, Keni kumanina taunina taina i luwewafai, yana sauluva i 'ewai. Taunidi i tauyedi sakona 'waineye fai nuanuadi mani, bani'odi basenadiotoga Belami nuanuana mani bega i sakona. Tovenidi Yaubada yana veimea i vedumwe'ai'aiedi bega vematavuloga i na velua-

✧ 1:5: 1 Kol 10:5-10; Num 14:32-35 ✧ 1:6: Nag 6:1-2 ✧ 1:7: Nag 19:1-10,15-16,24-25; 2 Fit 2:6-9 ✧ 1:9: Dan 10:13; VeL 34:6; Ve 12:7-8 ✧ 1:11: Nag 4:8; 1 Ion 3:12; 2 Fit 2:15-16; Ve 2:14; Num 31:15-16, 16:1-3,16,19-21,25-33

gai bani'odi basenadiotoga Kola i veluagai fai Yaubada yana veimea i uvi'agali.

12 ✧Tutuyanina 'wa 'a'aniluvetubama Iesu 'ana nuave'avina faifaina tovekalinidi 'awaşaşamie bani'odi yoke, 'awadi bwalabwalaidi kebu yadi bunumayaga i sososoana-'avo'avovo, taunidi 'aisedi faifaidi i nuanua. Inala kabukabu 'ana tutuye waowa i na bweuya ta na sosoaneni siwe kaukau i na beweni 'aivaita kebu ta na veluagai. Tomotoganidi wata bani'odi, kebu tamu sai'afo 'waidiega 'aivaita ta na veluagai. Taunidi bani'odi welavi, vuaga 'ana tutuya 'waineye kebu i da vuavuaga 'wa da vo i da bwavu, we'e tomotoga i na talayavulediga nika i na bwavuotoga. 13 Yadi sauluva sakoidi 'eba bunumayaga tomotoga matadie, bani'odi yagina bwaikidi buobuodi. Wata taunidi bani'odi 'ibadibadi yadi sauluva 'wainega 'wa na vo 'ako, Magemagetadi”, siwe tutuya 'ale'usana wata i na 'a'ava, we'e yadi 'eba mia Yaubada i 'idewa-vagaseni dudubala 'weya'weyauotogina 'waineye, bei i na mia-vagata.

14-15 Tove-vekavekalinidi faifaidi basenadiotoga Inoki i vona-vagata. Inokinina 'adi ve-7 tubulelelegidi Adama 'wainega, yadi sauluva nagami i 'asetai i vo,

A na vonemi. Toveimea i na mai yana anelose magemagetadi taiadi, 'adi 'aila'a welavi 'adi 'ilukulukuta bani'odi, tomotoga matatabudi i na vonayavuga mataneyeye. 'Ana tove-dumwe'ai'ai sakoidi i na veimeyedi vematavuloga i na veluagai, yadi sauluva sakoidi wata yadi awavesako Yaubada 'waineye 'adi tutula.”

16 Tovenidi tutuya fueidi i vevebonavoluvolu wata 'ai'edi vita i na souyedi 'waidie, faifaidi mali tomotoga i vevevita-maimaigidi. Taunidi i awa'ai'aiddi, taunidi yadi nuanua sakoidi i 'i'idewadi wata tomotoga 'waidie i susubia-sebaseba bega naninidi nuanuadi, i na veledi.

*Matakia wata velu'ase'ase.*

17-18 ✧Ekwavo, 'wa na nuani basenadi 'ada Toveimea Iesu Keliso yana tomata'aulelevo nagami i vonemi i vo, Tutuya 'eba ve'a'ava sai'afoga i na velilivana tomotoga 'ifwaidi i na tovoi i na sisidibidibiemi wata taunidi yadi nuanua sakoidi i na 'i'idewadi.” 19 Vona mogitana tove-vekavekalinidi yadi sauluva bani'odi, yadi ve faifaidi tomotoga i veve'ikwayekwayega bega ve'idi'idi i sousouyedi. 'Anu'anunu 'Atumaina yana nuanua kebu nuanuadi i na vematayakeyakeni, we'e taunidi yadi nuanua bunu 'ana nuanua sakoidi faifaidi, 'aisedi i 'i'idewadi.

20-21 ✧We'e ekwavo 'omi kebu bani'odi 'wa na munega. 'Akonadi 'wa vetumagana Yaubada yana Vona magemage-tana 'waineye, siwe nuanuaku taunimi 'wa na kiavetoke-tokemi bega yami vetumagananina fa'alina i na 'eno'eno. 'Anu'anunu 'Atumaina yana toketokena 'wainega 'wa na vevelu'ui we'e tutuyanina 'ada Toveimea Iesu Keliso 'wa na lulukamaseniga, taunimi 'wa na 'i'isave'avinimi bega Yaubada yana nuakalikali 'waineye 'wa na miamiani. I na na-goga Iesu yana vila-vaitugana 'waineye ma yana nuakalikali mia 'atumaina wata miamia-vagaina i na vele mi.

22 ✧Egavo ve 'ailuga faifaidi i vevenuanaluga 'wa na 'isanuakalikali'edi 'wa na 'ivaisedi. <sup>23</sup>'Ifwaidi i sakona 'wa na kiavenuaviladi 'wa da vo tamu tomogo 'ai-'ala'alase i da be'u 'wa da 'ita'ita'ieni. We'e 'ifwaidi tomotoga i sakona-vebogiga 'wa na 'isanuakalikali'edi 'wa na 'ivaisedi i na nuaviladi Iesu 'waineye, siwe ma yami kololo 'wa na 'isa'isa i na nunago yadi sakona nuami i na 'ewadi nika 'omi wata 'wa na be'u. Mogitana 'wa na 'isanuakalikali'edi siwe yadi sakona 'wa na vedumwe'ai'aiedi.

*Subia wata velu'ui.*

24-25 ✧Kebu tamu wata aitoi Yaubada bani'odi, 'aiseotogina, i 'ita'ita'ieda sakona 'waidiega Iesu Keliso 'ada Toveimea 'wainega. I lubwaineda matatabuda ta na subisubiai, taunina magemagetana, ma yana toketokena nani matatabuna i veveimeyedi, basenadi, 'asiau wata 'awaie yana toketokenanidi kebu i na 'a'ava, i na 'eno-vagata. Begaidi Yaubada 'ana fata i na 'isave'avinimi bega kebu 'wa na be'ube'u sakona 'waidie, i na nagoga mulieta ma yami sosoana bwaikina i na miemi mataneye, yana 'ai'aiwabu magemagetana 'waineye. Bei ma yami sosoana 'wa na tovofovoi 'atumai'avami, kebu tamu yami sakonaga.

Vona mogitana, yaku nuanua bani'odi.

Yau Iude.

## VE

### Iesu Keliso yana ve Ioni 'waineyeye.

Tutuyanina Ioni i miamia Imula Fatimo, vanuga 'eba yogona 'waineyeye, buki de'e i kilumi. Iesu i wafa i laka abame, bani'odi malamala 35 i 'a'avana, mulieta de'e bukinina Ioni i kilumi. Buki de'e 'ana kiluma 'ana tutuye, Iesu 'ana tovetumaganavo veviga bwaikidi i veveluagadi Loma gabe-mani 'waidiega, siwe buki de'e 'wainega tovetumagananidi 'aivaita i veluagai, bega ma yadi venuafoufa'ala i vetoketoke.

Ioni, Iesu tauniotogina i 'iseni 'wa da vo i da 'enoneganega, 'enoneganeganina 'wainega Iesu yana vona tovetumaganavo 'aila'a 7 faifaidi i nogaidi, mulieta i kilumidi. Wata nani tulina tulina 'awaie i na souyediga i sivemagesedi 'waineyeye, bega Ioni i lu'ivoneyedi 'waideye bukinina 'wainega. Naninidi Iesu i ve Ioni 'waineyeye awatabai 'waidiega, bega 'adi 'aseta 'wa da vo ta da 'isa-ganuganunuyedi.

We'e buki de'e 'ana nuanua bwaikina mageseye, Yaubada yana vetoketoke Seitani wata yana 'aila'a yaiaina 'waidie faifaina. I na vetoketokega Keliso 'wainega, wata tomia fwayafwaya taunidi i tauyediga Seitani 'waineyeye i na leodi. I na leodi i na 'a'avana, abama wata fwayafwaya 'ivaudi i na 'idewadi, mulieta Yaubada yana 'Aila'a ma yadi sosoana i na mia-vagata Yaubada wata Iesu Keliso taiadi. Buki de'e 'ana 'idi side bani'odi.

Buki lamuna wata vekaiwa tovetumaganavo 'waidie. 1:1-8

Keliso i souyeni Ioni 'waineyeye 1:9-20

Keliso yana vona tovetumagana 'aila'a 7 'waidie. 2:1-3:22

Buki nunumina wata 'ana yogoyogona 7. 4:1-8:1

Anelose 7 yadi evulega 7 i yuvedi. 8:2-11:19

Tomotoga 'adi 'aitonu, 'aisaya kasikasisidi bani'odi. 12:1-13:18

'Ifwaidi ve. 14:1-15:8

Nani sakoiotogidi ma 'aivoedi 7. 16:1-21

Yaubada 'atamana Babiloni, tomotoga 'aisaya kasikasisidi bani'odi, wata Seitani i leodi. 17:1-20:10

Tomotoga matatabudi yadi vonayavuga Yaubada matan-eye. 20:11-15

Abama, fwayafwaya wata Ielusalema 'adi 'ive'ivau. 21:1-22:5

Iesu yana vila-vaitugana faifaina. 22:6-21

<sup>1</sup> Vonanidi buki de'e nageneyeye Yaubada yana 'anivelena Iesu Keliso 'waineyeye bega ava'ai sai'afoga i na souyediga, i sivemagesedi Yaubada yana tofolovavo 'waideye. Keliso yana anelose abamega i vetunei yau Ioni yana tofolova

'waikuye bega naninidi i veku. <sup>2</sup> Nani matatabuna a 'isediga a vonevonemi. De'e a lulu'ivonaga valanina i mai Yaubada 'wainega wata vonanidi tonovidi Iesu Keliso i lu'ivoneyedi 'waikuye. <sup>3</sup> Fai naninidi sai'afoga i na souyedi, egavo de'e Yaubada yana lu'ivonanina i na lu'iawawaiga i na sosoana, we'e egavo vonanidi i na nogaidi i na vematayakeyakediga wata ma yadi sosoana.

*Ioni yana vona nuakalikali tovetumagana 'waidie.*

<sup>4-6</sup> ✧ Yau Ioni a vekaiwa 'omi tovetumagana 'wa miamiani 'atamana <sup>7</sup> 'waidie, 'awalawa Eisia nageneye. Nuanuaku Yaubada, 'Anu'anununa wata Iesu Keliso, ma yadi nuakalikali i na vevesauluva 'atumaina 'waimie wata nuanua bikana mia 'atumaina taiadi i na vevelemi. Yaubadanina miamia-vagaina, 'asiau i miamia, basenadi i miamia wata boladiotoga i na miamia. Yaubada 'Anu'anununa <sup>7</sup> i miamiani yana 'eba miabui 'ai'aiwabuna mataneye, we'e Iesu Keliso taunina tolu'ivona tonovina ma 'ana vetumagana wata Yaubada Natuna, kumanina nagami i tovoi wafayega, toveimea fwayefwayeye taunina 'adi Toveimea bwaikao-togina.

Iesu Keliso ta na subisubiai fai i nuakalikalieda, yana wafa 'wainega i yavuda yada sakona 'waidiega, wata i silakaida bega yana 'Eba Veimea nageneye ta miamia wata ta vevetofolova yana Yaubada 'alo Tamana faifaina, 'asa'aiana 'ida yana tovelomu. Mogitana Iesu Keliso ta na subisubiai fai taunina magemagetana wata toketokeotogina, kebu i na 'a'avaga i na mia-vagata. Vona mogitana, yaku nuanua bani'odi.

<sup>7</sup> ✧ 'Wa 'isanawe sino waowa 'wainega i mimai. Tomotoga matatabudi i na 'iseni, 'ana to'aillovena taiadi. 'Awalawa 'aitamogana 'aitamogana 'ana tomia i na 'iseni i na mimai, taunidi faifaidi i na vemogai.

Ava'ai a voneyeniga, vona mogitana yaku nuanua bani'odi.

<sup>8</sup> Yaubada 'ada Toveimea toketokeotogina, 'asiau i miamia basenadi i miamia wata boladiotoga i na miamia. I vonaga i vo, Yau kumaniku lamukwaikwaituna wata kaluna, kebu 'aku 'eba velamuga wata kebu 'aku 'eba ve'a'avaga.”

*Keliso i souyeni Ioni 'waineye.*

<sup>9</sup> Yau tatami Ioni, ma fuedeye vita ta veveluagadi Iesu faifaina, fueda yana 'Eba Veimea nageneye ta miamiani, wata yana 'aivaita 'wainega ta totokemaigeda. Yaubada yana Vona a lulu'ageyeni wata Iesu faifaina a lulu'ivona begaidi i 'ive'aviniku i mieku imule yadi vanuga 'eba yogona 'waineye

'ana wagava Fatimo. <sup>10</sup> Tafaloloye, 'aiatanina 'Auvea yana 'Aiata, 'waineye 'Anu'anununa mogitana i ageku begaidi tamu bona mulikuye a nogai bani'odi evulega butu'aina bwaikina. <sup>11</sup> Bonananina i voneku i vo, Ava'ai 'u na 'iseniga 'u na kiluma i na nago tovetumagana 'adi 'aila'avo i miamiani 'atamana 7 'waidie i na 'iseni. 'Atamananidi side 'adi wagava. Efeso, Simena, Feligamo, Taiatala, Sadisi, Filadofia, Lodisia.”

<sup>12</sup> A sivilaku a na 'iseni aitoi kumanaga i vonavona, nika a 'iseni mageta 'adi 'eba yato golida matatabuna 7. <sup>13</sup> ✧Kamwadie tamu tomogo a 'iseni 'ana 'isa'isa kumanina i vetomotogaotoga, 'ana talauma manamanawena i obu 'ageneye i le'wa, we'e bulava golida 'afauneamo. <sup>14</sup> ✧Nava'auna 'ana lau'avu i kumeta bani'odi labia fwa'ena 'alo bunebune founa, matana 'aninamanamalidi bani'odi 'ai-'ala'alata. <sup>15</sup> 'Agena wata 'aninamanamalidi bani'odi tamu kainumu i luyauyauta 'ai-'ala'alata nageneye, bonana 'ana nogaya bani'odi kuvakuvala butu'aina. <sup>16</sup> ✧'Ana 'atagie 'ubwana 7 we'e 'awaneye kefata kainumu ma vi'avi'aina nigonigona. Maigina mataududulina 'wa da vo inala i da vulaoga.

<sup>17</sup> Tutuyanina a 'iseni a be'u 'ageneye 'wa da vo a da wafa. 'Ana 'atagi i yatoi tomogokuye i voneku i vo, Kebu 'u na kolologa. Yau 'eba velamu wata 'eba ve'a'ava. <sup>18</sup> Yau kumaniku tomia-vagata. Basenadi a wafa siwe a yawasa, tutuya matatabuna kebu a na 'a'avaga a na mia-vagata. Wafa wata wafawafadi yadi 'eba mia, yau 'adi Toveimea.

<sup>19</sup> Faifainanina nuanuaku naninidi 'u 'ise'isediga faifaidi 'u na kiluma. Naninidi 'akonadi i souyediga wata naninidi 'awaie i na souyedi. <sup>20</sup> 'Ubwananidi 7 'aku 'atagie, wata mageta 'adi 'eba yato golida 7 'adi nuanua givagivadi. 'Adi nuanua side bani'odi. 'Ubwananidi 7 taunidi Yaubada yana anelose 7, tovetumaganavo i miamiani 'atamana 7 'waidie 'adi to'isave'avina, we'e mageta 'adi 'eba yatonidi 7 taunidi tovetumaganavonidi 'adi 'aila'a 7.”

## 2

### *Keliso yana vona me Efeso faifaidi.*

<sup>1</sup> Keliso i voneku i vo, Nuanuaku 'u na kiluma i na nago 'atamana Efeso, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina 'ana 'atagie 'ubwana 7, wata mageta 'adi 'eba yato golida 7, 'waidiamo i nunago, yana vona. <sup>2</sup> ✧I vo,

✧ **1:13:** Dan 7:13-14, 10:6 ✧ **1:14:** Ve 2:18 ✧ **1:16:** Ibu 4:12; Ve 19:15,21

✧ **2:2:** 1 Ion 4:1; 2 Ion 1:7-11

Naninidi 'wa 'idewadiga 'akonadi a 'asetadi. Folova vitadi 'waidie yami dumwebika 'akonadi a 'iseni wata yami tokemaiga. A 'asetai kebu nuanuami tosakona taiadi 'wa na miamia wata tomotoganidi igodi i vo, 'Ima Iesu yana tomata'aulelevo," siwe 'wa sitonovidi 'wa 'asetadi i vevekali. <sup>3</sup> Faifaiku vita 'wa veluagadiga siwe 'wa tokemaigemi kebu 'wa da baila.

<sup>4</sup> Naninidi 'wa 'idewadiga 'atumaidi, siwe tamu nani faifaina a na awavesakoyemi. Basenadi 'wa nuakalikalieku bwaikina, we'e tutuya de'e kebu. <sup>5</sup> \*Yami nuakalikalinina nagami, 'wa na nuanuani bega 'wa na 'asetai ava'aiega 'wa be'u. Yami sakona 'wa na vedumwe'ubu'ubusedi, naninidi nagami 'wa 'idewadiga wata 'wa na 'i'idewadi. 'Ai'edi yami sakonanidi kebu 'wa na vedumwe'ubu'ubusediga, a na wai yami mageta 'ana 'eba yato a na elomi. <sup>6</sup> We'e tamu nani faifaina a sososoana, fai me Nikolaiti yadi sauluva sakoidi 'wa vedumwe'ai'aiedi yau wata bani'odi a vedumwe'ai'aiedi.

<sup>7</sup> \*Vona de'e 'wa nogaiga, nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetu-maganavo 'aila'a tulina tulina 'waimie.

Egavo i na vetoketokega faifaiku, welavi i tovtovoi Faladaisi, a na tauyedi vuagina i na 'ani. Faladaisi Yaubada yana 'eba mia 'atumaina wata miamia-vagina wata sosoana-vagata, we'e welavinina 'wainega mia 'atumaina wata miamia-vagina i na veluagai.

'Asa'aiana bani'odi."

*Keliso yana vona me Simena faifaidi.*

<sup>8</sup> Wata Keliso i voneku i vo, Nuanuaku 'u na kiluma i na nago 'atamana Simena, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina 'eba velamu wata 'eba ve'a'ava, i wafa wata i yawasa-vaitugana, yana vona. <sup>9</sup> \*I vo, 'Ami vita a 'asetadi, 'wa vewekowekomaga siwe 'ai'aiwabu 'waimie Yaubada mataneye. Me Diu 'ifwaidi tutuya fuedi i awavesakoyemi, kumanidiavo igodi i vo, 'Ima Yaubada yana tomotoga," siwe yadi sauluva sakoidi 'waidiega ta 'asetadi taunidi kebu Diu mogitana, taunidi Seitani yana 'aila'a. <sup>10</sup> \*Vita sai'afoga 'wa na veluagadi faifaiku siwe kebu 'wa na kolologa. A na vonemi. Seitani yana veimea 'wainega 'ifwaimi i na yatomi vanuga 'eba yogona 'waineye, bei yami vetumagana i na silubudi 'aiata 10\* nagedie. Nuanuaku ma yami vetumagana 'wa na tovoi fa'alina, bega 'ai'edi 'aku gaviavo nuanuadi i na

\* 2:5: Ve 3:3    \* 2:7: Ve 22:1-2,14    \* 2:9: 2 Kol 11:13-15    \* 2:10: 2 Tim 4:8; Iem 1:12; 1 Fit 3:14; Luk 22:31-32    \* 2:10: Tamu 'ana 'asetai, kebu tutuya manamanawenaga.

luvewafami, 'wa na vetumaganekumo, kebu 'wa na baileku. 'Ai'edi kebu 'wa na bailekuga, mia 'atumaina wata miamia-vagaina a na velemini, yami tokemaiga 'ana tutula.

<sup>11</sup> ✧ Vona de'e 'wa nogaiga, nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

Egavo i na vetoketokega faifaiku kebu i na wafa-vagata. Kebu tamu sai'afo vita i na veluagai tosakona yadi wafa 'ana veluga 'waineye.

'Asa'aiana bani'odi.”

*Keliso yana vona me Feligamo faifaidi.*

<sup>12</sup> ✧ Wata Keliso i voneku i vo, Nuanuaku 'u na kiluma i na nago 'atamana Feligamo, Yaubada yana anelose bei i miamiana 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina 'awaneye kefata kainumu nigona ma vi'avi'aina, yana vona. <sup>13</sup> I vo, Bei 'wa miamianiga a 'asetai, we'e Seitani yana 'eba veimea fai tomotoga fuei taunidi i tauyedi 'waineye. We'e 'omi yaku nuanua 'wa 'i'idewadi, yami vetumagana 'waikuye kebu i da mwea. Seitani yana 'eba veimeanina 'waineye, bei yaku tolu'ivona Anitifasi i tokemaiga faifaiku i luvewafai. 'Wa 'iseni siwe kebu 'wa da bailekuga.

<sup>14</sup> ✧ Mogitana 'wa tokemaigemi faifaiku, siwe nani 'ifwaidi faifaidi a na awavesakoyemi. Tomotoga 'ifwaidi taiadi 'wa miamiani Belami yana ve sakona faifaina i vevetutuyamedi. Basenadiotoga tamu toveimea bwaikina 'ana wagava Belaki nuanuana me Isileli i na leodi begaidi Belaminina, tamu 'eda Belaki i veni bani'odi i na munegidi. I vo, 'Ai'edi me Isileli i na sakona Yaubada mataneyeye kebu i na 'ivaisedi vetalaga 'waineye. Nuadi 'u na 'ewadi bega 'aisayanidi mali tomotoga i velomuyediga yaubada-vekavekali 'waidie i na 'ani'anidi wata i na veve'avula-'avo'avovo, 'amu fata 'u na vetoketoke 'waidie.” Fai me Isileli i sakona bani'odi, Yaubada kebu i da 'ivaisedi vetalaga 'waineye, Belaki ma 'ana 'aila'avo i vetoketoke me Isileli i leodi. <sup>15</sup> Wata bani'odi tomotoga 'ifwaidi taiadi 'wa miamiani me Nikolaiti yadi ve sakoidi i vevetutuyamedi. <sup>16</sup> ✧ Sauluvanidi yau kebu nuanuaku, begaidi yami sakona 'wa na vedumwe'ubu'ubusedi. 'Ai'edi kebu, sai'afoga a na wai toskonanidi a na veimeyedi yaku toketokena 'waidiega, 'wa da vo taiadi 'a na vetalaga kefanina 'awakuye 'wainega.

✧ 2:11: Ve 20:14, 21:8 ✧ 2:12: Ibu 4:12 ✧ 2:14: Num 25:1-9, 31:16 ✧ 2:16: Ve 19:15, 22:12



17 ☆Vona de'e 'wa nogaiga, nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetu-maganavo 'aila'a tulina tulina 'waimie.

Egavo i na vetoketoke faifaiku, 'ani'ani givagivana abamega a na veledi i na 'ani, 'ana wagava Mana. Wata kileu 'avu'avuna 'aitamogana 'aitamogana a na veledi, kileunidi 'waidie wagava 'ivaudi i kilumidi, siwe kebu tamu aitoi i da 'asetai, aitoi kumanina 'ana 'anivelena 'aisena i 'asetai.

'Asa'aiana bani'odi.”

*Keliso yana vona me Taiatala faifaidi.*

18 ☆Wata Keliso i voneku i vo, Nuanuaku 'u na kiluma i na nago 'atamana Taiatala, Yaubada yana anelose bei i miami-aga 'waineye, kumanina tovetumaganavo i 'i'save'avinidi. 'U na kilumaga side bani'odi 'u na voneyedi 'u na vo,

Yaubada Natuna, kumanina matana 'aninamanamalidi bani'odi 'ai-'ala'alata we'e 'agena 'aninamanamalidi bani'odi tamu kainumu yadayadalina, yana vona. 19 I vo, Naninidi 'wa 'i'idewadiga 'akonadi a 'asetadi. Yami folova, yami nuakaliki a 'asetadi wata ma yami vetumagana 'wa vevetoketoke faifaiku. Basenadi sai'afo, 'asiau 'akonadi i vevebwaika.

20 Naninidi 'wa 'idewadiga 'atumaidi, siwe tamu nani faifaina a na awavesakoyemi. Vavinenina 'ana wagava Iesibeli, taunina tosakona igodi i vo, Yau Yaubada yana tolu'ivona,” 'wa tauyeni yana ve 'wainega yaku tofolovavo i vevekaliedi i veve'avula-'avo'avovo. Wata yana vekalinina 'wainega, 'aisayanidi mali tomotoga i velomuyediga yaubada-vekavekali 'waidie i 'ani'anidi, yadi nuanua i vo 'ako, 'Atumaina Yaubada mataneye.” 21 Tutuya manamanawena a lukamata, nuanuaku Iesibeli i da nuavilai, siwe kebu nuanuana yana sauluva sakoidi i na bailedi. 22 Bega a na taweni 'ivie bei i na veveviga bwaikina, we'e enavo taiadi i veve'avulaga 'ai'edi kebu i na nuaviladi yadi sauluvanidi sakoidi 'waidiega, ma fuedie vita a na veledi i na toke i na veviga. 23 Tomotoganidi yana ve sakoidi nuanuadi, taunidi bani'odi natunavo wata a na nikedi i na wafa. Tovetu-maganavo matatabudi i miamiani 'atamana tulina tulina 'waidie valana i na nogai i na nuani Yau kumaniku tomotoga yadi nuanua wata naninidi nuanuadi, a 'asetai'avadi. 'Aitamogana 'aitamogana tutula a na velelemi, yami sauluva 'ana 'isa'isa bani'odi.

24-25 We'e 'ifwaimi 'wa miamiani Taiatala 'waineye a na vonemi fai yadi ve sakoidi kebu nuanuami wata vevevekalinidi igodi i goleni nuanua givagivana, siwe mogitana Seitani 'wainega, 'wa baila. Kebu tamu wata vita a na velelemi siwe nuanuaku ve wata sauluva 'atumaidi 'waimie

i 'eno'enoviga, 'waidie 'wa na tovoi fa'alina, i na nagoga tutuyanina a na vilaku.

<sup>26-27</sup> ✧ Egavo i na vetoketoke, yaku nuanua i na 'i'idewadiga i na nagoga 'eba ve'a'ava 'waineye veimea a na veledi. Veimeanina basenadi a 'ewai Tamaku 'wainega bega a na tauyedi 'awalawa 'aitamogana 'aitamogana 'adi tomia i na veveimeyedi. Yadi veimeanina toketokena, bani'odi fulumai kainumu nau i na nikei i na 'anivivia. <sup>28</sup> Wata tovetumaganavonidi a na veledi Kumauloku magetana bwaikina.

<sup>29</sup> Vona de'e 'wa nogaiga, nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

'Asa'aiana bani'odi.”

### 3

*Keliso yana vona me Sadisi faifaidi.*

<sup>1</sup> ✧ Wata Keliso i voneku i vo, Nuanuaku 'u na kiluma i na nago 'atamana Sadisi, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina Yaubada 'Anu'anununa 7 wata 'ubwana 7 ni-maneye, yana vona. Yami folova matatabuna a 'asetadi, 'ami 'isa 'wainega 'omi tovetumagana toketokemi, siwe mogitana 'omi wafawafami yami vetumagana mweadi. <sup>2</sup> I lubwainemi matami i na 'anialadi yami vetumagananidi mweadi 'wa na kiavetoketokedi, kebu nuanuaku i na mwea-vagata. A 'asetai folovanidi 'akonadi 'wa 'idewadiga bola kebu i da ve'atumaotoga yaku Yaubada mataneye. <sup>3</sup> Fai kebu i da ve'atumaiga ve 'wa 'ewaiga wata 'wa nogai kebu nuami i na fani, 'wa na nuanuanidi, yami sakona 'wa na vedumwe'ubu'ubusedi 'wa na vematayakayaka. 'Ai'edi kebu 'wa na 'isa'isa 'wa na sakosakona yau a na vaimwaimwa a na le'wa yawaimi i na lovoga.

<sup>4</sup> ✧ We'e 'ifwaimi me Sadisi yami sauluva tonovidi 'wa da vo bani'odi 'ami kaleko vunavunagidi, sakona 'waidiega kebu 'wa da 'iveyokemiga. Yami sauluva tonovidi begaidi 'ami fata ma 'ami kaleko 'avu'avudi taiadi ta na yabayaba. <sup>5</sup> ✧ Egavo 'wa na vetoketokega faifaiku, matatabumi 'wa na vekaleko 'avu'avudiega wata 'ami wagava kebu a na 'u'umidiga yaku buki 'wainega. Bukinina nageneye tomotoganidi mia 'atumaina wata miamia-vagaina i na veluagai bei 'adi wagava i 'eno'enovi. Tamaku mataneye wata yana anelose matadie a na vo, De'e tomotoganidi yaku tomotoga.”

✧ 2:26-27: Same 2:8-9; Ve 22:16 ✧ 3:1: 1 Tes 5:2 ✧ 3:4: Iud 1:22-23; Luk 10:20 ✧ 3:5: Mad 10:32

<sup>6</sup> Vona de'e 'wa nogaiga nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetu-maganavo 'aila'a tulina tulina 'waimie.

'Asa'aiana bani'odi.”

*Keliso yana vona me Filadofia faifaidi.*

<sup>7</sup> ✧Wata Keliso i voneku i vo, Nuanuaku 'u na kiluma i na nago 'atamana Filadofia, Yaubada yana anelose bei i miami-aga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina magemagetana wata yana sauluva matatabuna tonovidi, yana vona. Basenadiotoga Kini Devida 'atamana Ielusalema 'ana toveimea, tomotoga yadi luku i veveimeyeni. Yau wata ma yaku veimea, 'ai'edi saiboda a na sibaleniga, kebu tamu aitoi 'ana fata i na siboda-vaitugani, we'e 'ai'edi a na sibodaiga, kebu tamu aitoi 'ana fata i na sibaleniga. <sup>8</sup> Yami folova a 'asetadi wata a 'asetai yami vetoketokena siaina siwe yaku vona 'wa vematayakeyakedi wata yami vetumagana 'waikuye kebu 'wa da 'ivemweamweadiga. Matamie saiboda a sibaleni, kebu tamu aitoi 'ana fata i na siboda-vaitugani.

<sup>9</sup> ✧A na vonemi. Me Diu 'ifwaidi vita i vevelemiga siwe yadi sauluva sakoidi 'waidiega ta 'asetadi taunidi kebu Diu mogitana, Seitani yana 'aila'a. Yaku veimea 'wainega tovekalinidi i na mai 'waimie ma yadi ve'ililibu i na be'u 'agemie wata i na ve'awamogitana a nuakalikiemi faifaina. <sup>10</sup> Tokemaiga vonana basenadi a voneyeniga 'wa vematayakeyakeni begaidi tutuyanina vita bwaikidi i na souyedi tomia fwayafwaya matatabumi 'waimie i na silubumiga, yau a na 'ita'ita'iemi.

<sup>11</sup> ✧Sai'afoga a na wai 'waimie yami toketokenanina siaina 'wa na 'i'isave'avini, kebu nuanuaku tamu aitoi i na elomi yami tokemaiga 'ana tutula. <sup>12</sup> ✧Egavo i na vetoketoke faifaiku, a na silakaidi bega yaku Yaubada yana vanuga 'eba velu'ui nageneye i na vefolova, bei tutuya matatabuna i na miamia Yaubada mataneyeye. Tomotoganidi 'waidie wagava 'aitonu a na kilumidi. Yaku Yaubada 'ana wagava, Yaubada yana 'atamana bwaikina 'ana wagava Ielusalema 'Ivauna, kumanina 'awaie abamega i na obuma yaku Yaubada 'wainega, wata 'aku wagava 'ivauna.

<sup>13</sup> Vona de'e 'wa nogaiga nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetu-maganavo 'aila'a tulina tulina 'waimie.

'Asa'aiana bani'odi.”

*Keliso yana vona me Lodisia faifaidi.*

14 ✨Wata Keliso i voneku i vo, Nuanuaku 'u na kiluma i na nago 'atamana Lodisia, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina yana sauluva matatabuna tonovidi wata ma 'ana vetumagana i lulu'ivona mogitana Yaubada 'ana 'aseta faifaina, wata taunina Yaubada 'ana 'idewadewa matatabuna lamudi, yana vona. 15 ✨Yami folova 'akonadi a 'asetadi, kebu 'wa da bailekuga siwe wata kebu 'wa da vematayakeyakekuga. Nuanuaku 'wa na vevematayakeyakeku siwe fai kebu nuanuami, 'asa'aiana 'wa na bailamo. 16 'Omi bani'odi faleda ufana legalegana, tomotoga kebu nuanuadi. Ufa fayona 'atumaina 'omi kebu bani'odiga wata kebu bani'odi alu'ai yaulyugina. Fai 'omi legalegami a na 'alaiwagemi. 17 ✨'Omi yami nuanua 'wa vo 'ako, 'Ima a ve'ai'aiwabu yama kukua fuedi, 'akonadi 'ama fata." Siwe kebu 'wa da 'asetai 'omi mogitana 'wa vewekowekoma yami mia vitana. Nani 'atumaidi 'wa bavuyedi bani'odi matami i sako, wata 'omi bani'odi tomotoga konekoned. Kebu tamu nani 'atumaina 'waimie i da 'eno'eno, nua'avami. 18 ✨A vevelu'ase'ase mi nuanuaku nani 'atumaidi 'wa na kimwanedi 'waikuyega, bani'odi golida tomotoga i vevetagovi, golida 'atumai'avana i 'a'awakoluya, yoke i kokoiyavuleni. 'Wa na kimwanediga 'waikuyega 'wa na ve'ai'aiwabu mogitana. Wata kaleko 'avu'avudi wata vunavunagidi 'wa na kimwanedi 'waikuyega bega yami vekonekone 'ana bunumayaga i na 'a'ava. Wata mulamula 'waikuyega 'wa na kimwane matami 'wa na iwagidi bega 'ami fata nani 'atumaidi 'wa na 'isa'inanadi.

19 ✨Egavo a nuakalikaliedi yadi sakona faifaiddi a tatalabodedi wata a luluvematavulogidi bega yadi sauluva i na ve'atumai. Fai a nuakalikalie mi, 'ai'edi kebu 'wa na nuavilamiga vematavuloga a na vele mi. Nuanuaku 'wa na vetoketoke faifaiku, wata yami sakona 'waidiega 'wa na nuavilami, taunimi 'wa na tauyemi mogitana 'waikuye. 20 ✨A na vonemi. Tomotoga nuanuadi i na lukuga ediavo 'waidie nagami tanotanogayega i na velutoli, wata yau bani'odi lili-vamie a tovtovoi a vevelutoli nuanuaku a na luku yami nuanua 'waidie. 'Ai'edi aitoi bonaku i na nogai bega i na tauyeku, a na luku 'waineye a na veianeni wata i na veianeku.

21 ✨Fai a vetoketoke, Tamaku i tauyeku taiadi 'a miamia yana 'eba miabui 'ai'aiwabuna 'waineye, wata bani'odi egavo

✨ 3:14: Kolos 1:15; Ve 19:11 ✨ 3:15: Lom 12:11 ✨ 3:17: Luk 12:21; Iem 2:5

✨ 3:18: Ais 55:1 ✨ 3:19: Ibu 12:7 ✨ 3:20: Ion 14:23 ✨ 3:21: Mad 19:28

i na vetoketokega faifaiku a na tauyedi yaku 'eba miabui 'waineye taiadi 'a na miabui.

<sup>22</sup> Vona de'e 'wa nogaiga nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetu-maganavo 'aila'a tulina tulina 'waimie.

'Asa'aiana bani'odi.”

## 4

*Tomia abama yadi subia Yaubada 'waineye.*

<sup>1</sup> Keliso yana vona tovetumaganavo 'adi 'aila'a 7 faifaidi i 'a'ava, mulieta a 'isalaka, abame tamu saiboda i sibaleniga a 'iseni. Bonanina bani'odi evulega butu'aina nagami a nogaiga, wata i voneku i vo, 'U mai 'waikuye, naninidi 'ako i na souyediga a na vemu.” <sup>2</sup> \*I vona'a'avana nika mogitana 'Anu'anunu 'Atumaina i ageku. Abame tamu tomotoga a 'iseni 'eba miabui 'ai'aiwabuna 'waineye i miamia. <sup>3</sup> \*Tomotoganina 'aninamanamalina 'ana 'isa'isa bani'odi kilifou 'alo tamu kileu yamoyamoina 'ana wagava Kaneliani. 'Eba miabuinina 'waineye abavole i vetovoia 'ana 'isa'isa kileu 'ala'alawina 'ana wagava Emelodi. <sup>4</sup> Tomotoganina lilivaneye, wata a 'isedi 'eba miabui 'ai'aiwabudi 24 i yato-vivivili, 'eba miabuinidi 'waidie to'edakumetavo 'au'auveadi 24 i miabui, 'adi kaleko 'avu'avudi we'e 'unu'unudie kunabanaba golida i yatodi, i veveimea 'ana 'eba 'isa. <sup>5</sup> 'Eba miabuinina 'wainega mageta i kikianamali, butu'aina a nogai bani'odi bona bwaikidi, wata bani'odi tomuyoana i dududuya. Wata 'eba miabuinina maiginega dukala i magemagetadi matatabuna 7, magetanidi taunidi 'asa'aiana Yaubada 'Anu'anununa 7. <sup>6</sup> \*Wata i vagamaiga tamu nani a 'iseni 'wa da vo eyaga niwalova 'atumaiotogina, 'aninamanamalina kilifou bani'odi.

Wata 'eba miabui 'ai'aiwabuna lilivaneye nani ma yawaidi toketokedi 4 i tovififineni. <sup>7</sup> Naninidi tomogodi mata 'ana loi, tamu 'ana 'isa'isa sifu walawala'ai bwaikaotogina 'ana wagava laioni, tamu bulumakau 'ana 'isa'isa, tamu maigina 'wa da vo tomotoga maigina, wata tamu manubutu 'ana 'isa'isa, i yaveyavega. <sup>8</sup> \*Naninidi 'aitamogana 'aitamogana fafedi 6, nagedie wata tabwadie mata 'ana loi. Lovana, 'aiata yadi folova lei, kebu i da veveawaiga i vo,

Magemagetana,

Yaubada bwaikaotogina, yana veimea toketokena,

Magemagetana.

Basenadi i miamia, 'asiau i miamia, wata boladiotoga i na miamia.”

9-10 ✧Tutuya fue di naninidi 4 yadi lei-subisubia 'wainega kumanina miamia-vagaina i miabui 'eba miabui 'ai'aiwabuna 'waineye i awa'ai'aia, i veve'ililibu wata i vevekaiwa 'waineye. Tutuyanina i lei-subisubia wata to'edakumetavo 'au'auveadi 24 ma yadi ve'ililibu i be'ube'u kumanina miamia-vagaina yana 'eba miabui 'ai'aiwabuna mataneye i subisubiai. Yadi vetoveimea 'ana 'eba 'isa kunabanaba i tawetawedi mataneye i lelei i vo,

11 'Omu yama Yaubada wata 'ama Toveimea,

Subia, ve'ililibu wata toketokena 'amu laubwaina 'u na veveluagadi, fai 'omu nani matatabuna 'u 'idewadi,

Taunimu yamu nuanua 'wainega i souyedi bega 'asiau ma yawaidi i 'eno'enovi.”

## 5

*Iesu taunina 'asa'aiana Yaubada yana Sifi Siaina.*

1 Yadi lei i 'a'ava, mulieta kumanina i miabui 'eba miabui 'ai'aiwabuna 'waineye 'ana 'atagie tamu lubulubu nunumina a 'iseni. Lubulubunina ma vi'avi'aina i kilumi, i nunumina i 'iyogoyogoni matatabuna 7, siwe veve'etobodana. 2 Tamu anelose toketokena a 'iseni i toke i vegole i vo, Aitoi ma yana veimea bega 'ana fata yogoyogonanidi i na yavudi lubulubu i na siyawayawagi i na lu'iawawai?” 3 'Ana yavu wata 'ana lu'iawawa faifaidi i lauala siwe kebu tamu aitoi i da veluagai abame, fwayefwayeye wata towafa 'waidiega. 4 Begaidi a nuavita bwaikina a 'we'wela fai kebu tamu aitoi ma yana veimea bega 'ana fata i na yavuya wata i na lu'iawawai. 5 A 'we'we'wela nika tamu to'edakumeta 'au'auveana i voneku i vo, 'U ve'wada 'u 'isanago. Tamu Kini Devida tubuna bwaikina, Iuda 'ana wauma 'wainega i vetoketoke. Taunina toke-tokeotogina bani'odi sifu walawala'ai bwaikaotogina 'ana wagava laioni, ma yana veimea bega 'ana fata yogoyogonanidi 7 i na kiadabadi wata i na siyawayawagi.”

6 ✧Tomogonina toketokena a 'isadabeni nika Yaubada yana Sifi Siaina\* a 'iseni i tovoivoi Yaubada yana 'eba miabui 'ai'aiwabuna kamwaneye, we'e nani ma yawaidi toketokedi 4, to'edakumetavo 'au'auveadi 24 taiadi i tovi-fifineni. Sifinina Siaina ma 'ana bwaya, 'ana 'isa'isa basenadi i wafa siwe i tovoi-vaitugana. 'Edu'eduneye alana 7,† we'e matana 7, matananidi 'asa'aiana Yaubada 'Anu'anununa 7 kumanidiavo i vetunedi 'awalawa matatabuna 'waidie. 7-8 ✧Sifinina Siaina i nago lubulubunina i 'ewai Yaubada 'ana 'atagiega nika bei nani ma yawaidi toketokedi 4 wata

✧ 4:9-10: Dan 6:26 ✧ 5:6: Sek 4:10; Ion 1:29 \* 5:6: Yaubada yana Sifi

Siaina 'asa'aiana taunina Iesu. † 5:6: Ala 'adi nuanua veimea wata toketokena.

✧ 5:7-8: Ve 8:3-4, 15:2; Same 141:2

to'edakumeta 'au'auveadi 24 taiadi ma yadi ve'ililibu i be'u mataneye. 'Aitamogana 'aitamogana ma yadi 'eba lauinava gita wata 'aivo'e 'atumaidi nimadie, golidi 'wainega i 'idewadi. 'Aivoenidi nagedie tamu vane i veadagidi i na kabuniga magaina 'atumaina, 'ana 'asete Iesu yana tomotoga yadi velu'ui Yaubada 'waineye. <sup>9</sup> ✧ Tamu lei 'ivauna i leieni Keliso 'waineye i vo,

Vona mogitana 'omu ma yamu veimea, bega lubulubu nunumina 'u 'ewai,

'Ana yogoyogona 'u na kiadabadi.

I lubwainemu, fai i luvewafamu bega dayagimu 'wainega tomotoga fuedi 'u tuveobudi Yaubada faifaina.

Tomotoganidi i maia 'aila'a 'aitamogana 'aitamogana 'waidiega, mali bonana 'waidiega, tomotoga tulidi tulidi, 'awalawa 'aitamogana 'aitamogana 'waidiega.

<sup>10</sup> ✧ Tomotoganidi 'u tuveobudiga, i luku Yaubada yana 'Eba Veimea nageneye i na vetofolova faifaina 'asa'aiana yana tovelomu, bega tomia fwayafwaya i na veimeyedi.”

### *Tomotoga matatabudi Iesu i subiai.*

<sup>11</sup> ✧ Leinina i 'a'ava, wata a 'isadaba nika anelose a 'isedi, 'adi 'aila'a fueotogidi kebu tamu aitoi 'ana fata i na lu'iaawadi. Yaubada yana 'eba miabui 'ai'aiwabuna, nani ma yawaidi toketokedi 4, to'edakumeta 'au'auveadi 24, matatabudi nageneye, we'e anelosenidi fueotogidi i tovi-finedi. <sup>12</sup> Bonadi bwaikinega a nogai i leilei i vo,

Yaubada yana Sifi Siaina i wafa,

Veimea, 'ai'aiwabu, 'asete wata toketokena 'ana laubwaina i na veveluagadi.

I lubwaineda ta na veve'ililibuyeni, ta na awa'ai'aia wata ta na subisubiai.”

<sup>13</sup> Anelose fueotogidi abame i lei'a'ava, nika wata Yaubada 'ana 'idewadewa matatabudi i velamu i lei. 'Ana 'idewadewanidi abame i miamiani, fwayefwayeye, towafa yadi 'eba mia 'waineye, eyage, wata 'awalawa matatabuna 'waidie, i leilei i vo,

Taunina yana 'eba miabui 'ai'aiwabuna 'waineye i miami-aga, wata yana Sifi Siaina taiadi, i lubwainedi subia, ve'ililibu, 'ai'aiwabu wata toketokena i na veveluagadi.

Kebu i na 'a'ava, i na 'eno-vagata.”

<sup>14</sup> I lei'a'ava, mulieta nani ma yawaidi toketokedi 4 bonadi i tutuli i vo, Vona mogitana, 'ima wata yama nuanua bani'odi,” we'e to'edakumeta 'au'auveadi ma yadi ve'ililibu i be'u matadie i subiadi.

## 6

*Yogoyogonanidi 7 i kiadabadi.*

<sup>1</sup> ✧ Leinidi i 'a'ava mulieta Yaubada yana Sifi Siaina a 'iseni yogoyogonanidi 'waidiega tamu i kiadabai nika nani ma yawaidi toketokedi 4 tamu iadi bonana a nogai. Bonananina bwaikina 'wa da vo tomuyoana i da duduya i voneku i vo, 'U mai." <sup>2</sup> A 'isanago 'aisaya osi 'avu'avuna a 'iseni, kwavuneye tamu tomogo ma yana tufu, 'unu'ununeye kunabanaba 'ai'aiwabuna i yatoi, toveimea 'adi vaigavu, i tauya i nunago i na vetalaga i na vetoketoke.

<sup>3</sup> Sifinina Siaina yogoyogonanidi 'ana veluga i kiadabai nika nani ma yawaina toketokena 'ana veluga bonana a nogai i vo, 'U mai." <sup>4</sup> A 'isanago tamu osi i souyeni siwe yamoyamoina. Osinina kwavuneye tamu tomotoga ma yana veimea bega tomotoga fue di fwayefwayeye tauni'avadi i na vevetalaga wata tauni'avadi i na luluvewafadi. Kefata bwaikina i 'idewaiga kainumu 'wainega i veleni.

<sup>5</sup> I 'a'avana mulieta Sifinina Siaina yogoyogonanidi 'ana vetonu i kiadabai nika nani ma yawaina toketokena 'ana vetonu bonana a nogai i vo, 'U mai." A 'isanago tamu osi 'wau'waukina i souyeni, kwavuneye tamu tomogo, kukua 'adi vita 'adi 'eba 'etowava nimaneye. <sup>6</sup> Bona a nogai 'wa da vo tamu tomogo i da vegole, nani ma yawaidi toketokedi 4 'awwasadiega i vo,

Tomotoga fue di i na folofolova, we'e 'aiata 'aitamogana 'ana tutula i na 'ewai, tutulanina matatabuna 'wainega 'ana fata 'ani'ani siaina i na kimwanei bani'odi 'uvi 'aitamogana 'alo tafioko 'aitonu. We'e welavi 'atumaidi kebu 'u na 'ivesakodi bega bunama wata oine i na 'eno'enovi."

<sup>7</sup> I vona'a'ava, mulieta Sifinina Siaina yogoyogonanidi 'ana ve-4 i kiadabai, nika nani ma yawaina toketokena 'ana ve-4 bonana a nogai i vo, 'U mai." <sup>8</sup> ✧ A 'isanago tamu osi a 'iseni tomogona 'adalina, kwavuneye tamu tomogo 'ana wagava Wafa, we'e mulineye tamu osi 'ana tomotoga 'ana wagava Towafa-yadi-'eba-mia.\* Tomotoganidi 'adi 'ailuga ma 'adi veimea i tauyedi 'adi fata tomia fwayafwaya fue di i na luvewafadi. I na vo, 'A na nikedi side bani'odi, 'ifwaidi tauni'avadi i na vetalaga i na wafa, 'ifwaidi lokayega i na wafa, 'ifwaidi viga sakoidi 'waidiega i na wafa, we'e 'ifwaidi 'aisaya walawala'ai i na ovadi i na wafa." Tomotoganidi i na wafaga side bani'odi 'adi 'aila'a. Tomia fwayafwaya matatabudi ta da 'idiaga 'aila'a 4, 'aila'a 'aitamogana bani'odi taunidi towafa.

<sup>9</sup> ✧ To'ainikenidi 'adi 'ailuga i nagoi, mulieta Sifinina Siaina



yogoyogonanidi 'ana ve-5 i kiadabai nika Yaubada yana 'eba velomu a 'iseni. 'Eba velomunina dibuneye Yaubada yana Vona 'ana tolu'ivonavo 'anu'anunudi a 'isedi, kumani-diavo basenadi tosakona i luwewafadi yadi tokemaiga Iesu 'waineye faifaina. <sup>10</sup> ✧ Towafanidi matatabudi i toke i vegole bonadi bwaikinega i vo, 'Ama Toveimea toketokemu wata magemagetamu, yamu sauluva matatabuna tonovidi. Ma'avia tomia fwayafwaya i na vonayavuga bega 'u na veimea tomotoganidi i luwewafamaga vematavuloga i na veluagai?" <sup>11</sup> ✧ Aitamogana 'aitamogana kaleko 'avu'avudi i veledina i vonedi i vo, Sai'afo 'wa na lulukamata, nagami emiavo taunidi Iesu yana tofолоvavo 'ifwaidi i na luwewafadi, mulieta 'ami 'aila'anina nuanuaku i na veluagai nika bei vematavuloga i na souyeni."

<sup>12</sup> ✧ I vona'a'ava, matakuye Sifinina Siaina yogoyogonanidi 'ana ve-6 i kiadabai nika yoyoyo bwaikina i yue. Inala i lu'waugi igovala bani'odi, weta'i vivivilina i yamota 'wa da vo dayaga. <sup>13</sup> 'Ubwana fuedi i avuta 'wa da vo kaukau bwaikina i da nunuga welavi ididi i da avuta. <sup>14</sup> Abama ava'aiamo i nago 'wa da vo 'ile i da nunumi we'e 'oya wata imula matatabudi i fetu wata i ve'ani'idi'idi.

<sup>15</sup> ✧ Tutuyanina naninidi i souyedi a 'isedi, tomia fwayafwaya yadi kini, toveimeavo, gavia 'ana to'edakumetavo, tove'ai'aiwabu, tovetoketoke, tofолоva-maimaiga wata tomotoga yavuyavudi, matatabudi i dega i ve'alagivagiva vatu'aie wata ovuye. <sup>16</sup> I vegolegole 'oya wata kileu 'waidie i vo, 'Wa 'anita'imi 'wa tavunima, nika kumanina 'eba miabui 'ai'aiwabuna 'waineye i miamiaga kebu 'ana fata i na 'isema, wata yana Sifi Siaina yana nuasako kebu i na sousouyeni 'waimeye. <sup>17</sup> 'Wa na givema fai yadi 'aiata bwaikina 'akonadi i souyeni, ma yadi nuasako i na vematavulogima. Kebu tamu aitoi 'ana fata i na vetoketoke 'adi 'ailuga yadi nuasako 'waidiega."

## 7

### *Me Isileli 'ifwaidi tugusa i na 'ewadi Yaubada 'wainega.*

<sup>1</sup> Yaubada yana nuasako i souyeni a 'iseni mulieta anelose 4 a 'isedi fwayafwaya i toviffineni kaukau matatabudi i tata-labodedi bega kebu i na nunuga eyage wata fwayefwayeye wata welavi lukudi kebu i na fetu. <sup>2</sup> Wata tamu anelose a 'iseni inala yana 'eba lakayega i souyeni, nimaneye Yaubada Miamia-vagaina yana tugusa yana tomotoga faifaiddi. I toke i vegole anelosenidi 4 'waidie, kumanidiavo Yaubada toketokena i veledi bega fwayafwaya wata eyaga i na 'ivesakodi. <sup>3</sup> ✧ I

vegole 'waidie i vo, Fwayafwaya, eyaga wata welavi kebu 'wa na 'ivesakodiga, 'wa na lulukamata nagami yada Yaubada yana tofolovavo 'adi tugusa 'a na yatodi debadie.”<sup>4-8</sup> Tugusa i yatodi i 'a'ava mulieta i voneku 'adi 'aivia tomotoga 'waidie Yaubada yana tugusa i yatodi debadie. Me Isileli tomotoga wauma 'aitamogana 'aitamogana tugusa i 'ewadiga, 'adi lu-vetubama 144,000.

Iuda 'ana wauma 'wainega tomotoga 12,000 'waidie tugusa i yatodi.

Lubeni 'ana wauma 'wainega tomotoga 12,000 'waidie tugusa i yatodi.

Gada 'ana wauma 'wainega tomotoga 12,000 'waidie tugusa i yatodi.

Asa 'ana wauma 'wainega tomotoga 12,000 'waidie tugusa i yatodi.

Nafitalai 'ana wauma 'wainega tomotoga 12,000 'waidie tugusa i yatodi.

Manasa 'ana wauma 'wainega tomotoga 12,000 'waidie tugusa i yatodi.

Simioni 'ana wauma 'wainega tomotoga 12,000 'waidie tugusa i yatodi.

Livai 'ana wauma 'wainega tomotoga 12,000 'waidie tugusa i yatodi.

Isaka 'ana wauma 'wainega tomotoga 12,000 'waidie tugusa i yatodi.

Sebuloni 'ana wauma 'wainega tomotoga 12,000 'waidie tugusa i yatodi.

Iosefa 'ana wauma 'wainega tomotoga 12,000 'waidie tugusa i yatodi.

Beniamina 'ana wauma 'wainega tomotoga 12,000 'waidie tugusa i yatodi.

Side waumanidi 'waidiega me Isileli matatabudi 144,000 'waidie Yaubada yana tugusa i yatodi.

*'Aila'a fueotogidi Yaubada i subisubiai.*

<sup>9</sup> \*Me Isileli 'adi tugusa i yatodi i 'a'avana, nika wata a 'isedi 'aila'a fueotogidi, lu'iawawa-wayoga. Tomotoganidi i maia 'aila'a 'aitamogana 'aitamogana 'waidiega, mali bonana 'waidiega, tomotoga tulidi tulidi, 'awalawa 'aitamogana 'aitamogana 'waidiega. Matatabudi 'adi kaleko vunavunagidi wata 'avu'avudi i ve'wesenedi wata nimadie saisai lukudi, i tovofovoi Yaubada yana 'eba miabui 'ai'aiwabuna wata yana Sifi Siaina matadie. <sup>10</sup> Tomotoganidi i toke i vegole i vo,

Yaubada, kumanina 'eba miabui 'ai'aiwabuna 'waineye i miamiaga, wata yana Sifi Siaina 'akonadi i 'ita'ita'ieda sakona 'waidiega.”

11-12 Anelose matatabudi, to'edakumeta 'au'auveadi, wata nani ma yawaidi toketokedi 4, 'eba miabuina 'ai'aiwabuna i tovififineni. Matatabudi i lumata'afufu Yaubada mataneye i subisubiai i vo,

Vona mogitana yada nuanua side bani'odi.

Yaubada i lubwaineni subia, 'ai'aiwabu, 'aseta, vekaiwa, ve'ililibu, veimea wata toketokena i na veveluagadi,

Kebu i na 'a'ava, i na 'eno-vagata.

'Asa'aiana yada nuanua bani'odi.”

13 ✧Tamu to'edakumeta 'au'auveana i velutolieku i vo, Kumanidiavo 'adi kaleko vunavunagidi wata 'avu'avudi 'u da 'asetadi egavo wata ava'aiega i maia?” 14-15 ✧Bonana a tutuli a vo, 'Auvea, yau kebu a da 'asetadiga, 'u da voneku.” Wata i voneku i vo,

Tomotoganidi i maia vita bwaikidi i souyediga fwayefway-eye, 'waidiega. Iesu yana wafa 'wainega i ve'atunaiotoga 'wa da vo 'adi kaleko Sifi Siaina dayaginega i da lekoadi bega i da vevunavunaga, faifainanina abame 'aiata wata lovana Yaubada yana vanuga 'eba velu'ui nageneye, Yaubada mataneye i tovotovoi i folofolova faifaina. Kumanina 'eba miabui 'ai'aiwabuna 'waineye i miamiaga, taunina yana toketokena 'wainega i na 'i'ita'ita'iedi. 16 Kebu tamu tutuya wata i na lase 'alo 'anigodi i na lala, inala 'alo yauyauta bwaikina 'waidiega kebu i na veviga. 17 ✧Kebu tamu sai'afo vita i na veluagai fai Sifinina Siaina, kumanina 'eba miabui 'ai'aiwabuna kamwaneye i miamiaga, i na 'i'isave'avinidi bani'odi to'isave'avina sifi yana 'aisaya i 'i'isave'avinidi. I na nunawedi ufa luluvuala 'waidie, ufanina 'wainega mia 'atumaina wata 'ivauna i sousouyeni, wata Yaubada nuadi i na 'iveololodi nika kebu tamu tutuya i na 'we'welaga.

## 8

*Yogoyogonani 'ana ve-7 i kiadabai.*

1 Wata a 'isanago a 'iseni Yaubada yana Sifi Siaina lubulubu nunumina yogoyogona 'ana ve-7 i kiadabai, nika abame nani matatabuna kulukulu i lovogi bani'odi 'awasasa sai'afo.

2 I 'a'avana mulieta Yaubada yana anelose 7, kumanidiavo mataneye i tovotovoi a 'isedi, 'aitamogana 'aitamogana yadi evulega i veledi.

3-4 ✨We'e tamu anelose ma yana 'aivoe golida vane faifaina, i maiga 'eba velomu lilivaneye i tovoi. Yaubada vane bwaikina i 'ewai anelosenina i veleni i na kabuni 'eba velomu golida 'waineye, 'eba velomunina i tovtovoi Yaubada yana 'eba miabui 'ai'aiwabuna mataneye. Vanenina i kabuniga Yaubada yana tomotoga yadi velu'ui 'ana 'imoso'i, lufwa magaina 'atumaina i laka velu'uinidi taiadi Yaubada mataneye anelose nimaneamo. <sup>5</sup> Anelosenina 'ai 'ala'alaina i 'ewadi 'eba velomu 'wainega i vedodogi vane 'ana 'eba vedodoga 'waineye. I vedodogidi i 'a'avana i toke i taweni i obu fwayefwayeye nika tomuyoana i kianamali wata i duduya, butu'ai bwaikidi wata yoyoyo i yue.

### *Evulega 7 i yuvedi.*

<sup>6</sup> 'Ai 'ala'alaina i taweni i obu fwayefwayeye i 'a'ava mulieta anelosenidi 7 yadi evulega nimadie a 'isedi i na yuvedi.

<sup>7</sup> ✨Nagami, tamu yana evulega i yuveiga, 'ai 'ala'alaina, dayaga, wata 'wei mwadodoudi bani'odi aisi i avuta fwayefwayeye. Fwayafwaya vi'ai 'aitonu, vi'ai 'ailuga 'atumaidi we'e vi'ai 'aitamogana i 'alai, wata bani'odi welavi wata mosomoso.

<sup>8-9</sup> ✨Anelose 'ana veluga yana evulega i yuveiga, tamu nani 'ana 'isa'isa bani'odi 'oya bwaikina i lubeanunuga malaveseye i taweni. Eyaga vi'ai 'aitonu, vi'ai 'ailuga 'atumaidi we'e vi'ai 'aitamogana i yamota bani'odi dayaga, bega vi'ainina nageneye igana matatabudi i wafa wata waka i 'aniweawealidi.

<sup>10-11</sup> Anelose 'ana vetonu yana evulega i yuveiga, tamu 'ubwana bwaikina i 'alata dukala bani'odi abamega i 'anita'ia ufa bwaikidi wata ufa-luluvuala 'ifwaidi 'waidie. Ufa vi'ai 'aitonu, vi'ai 'ailuga 'atumaidi we'e vi'ai 'aitamogana i vegolagola bani'odi 'alu bega tomotoga fueotogidi i yemuga i ve'alawafawafa. 'Ubwananina i 'anita'iga 'ana wagava Gola.

<sup>12</sup> Anelose 'ana ve-4 yana evulega i yuveiga, inala, weta'i wata 'ubwana i 'isamata'weu'weu. Inala vi'ai 'aitonu, vi'ai 'ailuga 'atumaidi we'e vi'ai 'aitamogana i dudubali. Wata bani'odi weta'i wata 'ubwana bega fwayefwayeye lovana wata 'aiata yadi mageta i vesiai.

<sup>13</sup> ✨I 'a'avana a 'i'isadabaga nika a nogai manubutu butu'aina. Tabwaotogineye i luluvivila i toke i vegole i vo, Ieu, 'omi tomia fwayafwaya nuakalikalimi. Tutuyanina anelose 'adi 'aitonu 'aitamogana 'aitamogana yana evulega i na yuveiga, vita bwaikaotogidi tulina tulina i na sousouyedi 'waimie."

## 9

*Evulega 'ana ve-5 i yuvei.*

<sup>1</sup> Manubutu i tauya i nago, mulieta anelose 'ana ve-5 yana evulega i yuvei, tamu tomotoga 'aninamanamalina i obu fwayefwayeye 'wa da vo 'ana 'isa bani'odi 'ubwana i da 'anita'ia abamega. I obuga, Vatu'ai Manamanawena, yaiaina yadi 'eba mia 'ana 'eba yavu i 'ewai i mieni i yavuya. <sup>2</sup> I yavuya nika lufwa bwaikina i souyeni 'wa da vo libi domwa-tuaina lufwana bega inala matana i umai yana mageta i 'awaduguli, abama 'ana 'isa'isa bani'odi igovala. <sup>3</sup> \*Lufwanina 'wainega limwana fuedi i obu tanotanoge i vetuli yadi 'aiova i vekasikasisi bwa'o'o'o bani'odi. <sup>4</sup> \*Limwananidi tatalabodadi kebu 'adi fata 'ani'ani i na 'ivesakoidi wata bani'odi mosomoso 'alo welavi. Tomotoga fuedi i na ovadi, we'e tomotoganidi Yaubada yana tugusa debadie i yatodiga, kebu i na ovadiga.” <sup>5</sup> I vonedi i na ovadimo we'e 'ivewafa faifaina kebu i da tauyediga. Weta'i 5 nagedie i na ovaovadi bega i na veveviga bwaikina bani'odi bwa'o'o'o yadi 'aiova. <sup>6</sup> Veviganina faifaina tomotoga i na vo, 'A da wafa, veviga 'a baila,” siwe Yaubada kebu i na tauyedi i na wafaga.

<sup>7</sup> Limwananidi 'adi 'isa'isa 'wa da vo 'aisaya osi kaleko kainumu 'wainega i da 'ivivigavudi vetalaga faifaina. Ma 'adi veimea bega debadie 'adi vaigavu golida i yatodi, maigidi 'wa da vo tomotoga maigidi. <sup>8</sup> Nava'audi manamanawedi, nigodi manamanawedi wata nigonigodi bani'odi 'aisaya laioni nigodi. <sup>9</sup> Nuafoudie 'adi vaigavu 'ana 'isa'isa kaleko kainumu, fafedi butu'aidi bwaikaotogidi 'wa da vo 'aisaya osi waka fwayafwaya fuedi i da luluyo'edi vetalaga faifaina. <sup>10</sup> We'e giudi bani'odi bwa'o'o'o giudi, 'waidiega tomotoga i na lovelovenidi weta'i 5 nagedie. <sup>11</sup> Vatu'ai Manamanawena 'ana to'isave'avina kumanina wata limwananidi 'adi toveimea. 'Ana wagava me Diu bonadiega Abadoni, we'e me Guliki bonadiega Afoloni 'ana saivila To'ivesako. <sup>12</sup> \*De'e vitanina i 'a'ava, vita 'ailuga wata sai'afoga i na souyedi.

*Evulega 'ana ve-6 i yuvei.*

<sup>13</sup> Anelose 'ana ve-6 yana evulega i yuveiga, bona a nogai i mai 'eba velomu kamwanega. 'Eba velomunina golida 'wainega i 'idewai Yaubada mataneye i tovofovi.

<sup>14</sup> Bonananina a nogaiga, i vonavona anelose 'ana ve-6 'waineye i vo, Anelosenidi 4, basenadi i yogonidi i yatodi ufa bwaikina 'ana wagava Iufiletisi 'waineye, 'u na

yavudi i na nagoi.” <sup>15</sup> ☆Anelosenidi 4 i yavudiga base-nadi i 'idewadi i yatodi bega 'awasasanina, 'aitanina, weta'inina wata malamalanina i venua'ivineniga 'waineye i na souyedi tomotoga fueidi i na luwewafadi. Tomia fwayafwaya 'adi 'aila'a vi'ai 'aitonu. 'Ailuga 'atumaidi we'e vi'ai 'aitamogana i na luwewafadi. <sup>16</sup> Anelosenidi 4 tovetalaga fueotogidi i 'edakumesedi, 'adi 'aila'a i lu'ivoneyeni 'waikuye, matatabudi 200 milioni (200,000,000).

<sup>17-18</sup> Wata a 'iseni 'wa da vo a da 'enotalailoilyedi tovetala-ganidi osi kwavudie i laka i nunagoi. Nuafoudie 'adi kaleko kainumu, 'ifwaidi yamoyamoidi 'wa da vo 'ai-'ala'alata, 'ifwaidi 'ala'alawidi 'wa da vo malaveta, 'ifwaidi 'ovu'ovudi 'wa da vo manufagila. Osi 'unu'unudi 'wa da vo 'aisaya laioni 'unu'unudi, we'e 'awadiega 'ai meana, lufwa wata manufagila 'ala'alaina i sousouyedi, 'waidiega tomotoga vi'ai 'aitamogana i luwewafadi, vi'ai 'ailuga 'atumaidi. <sup>19</sup> Osinidi yadi toketokena bega i na luluwewafadiga, 'awadie wata giudie fai giudi 'wa da vo 'o'olo 'unu'unudi bega tomotoga i nikenikedi.

<sup>20</sup> ☆Vitanidi i 'a'ava, tomotoga 'ifwaidi i miamianiga bola i baibaila, kebu nuanuadi taunidi i na tauyedi Yaubada i na subisubiai. Nuanuadi Seitani enavo bani'odi yaiaina i na subisubiadi, wata kumaea i dabidi golida, siliba, kofa, kileu, wata welavi 'waidiega, i 'odu'odu 'waidie. Naninidi tomotogaotoga 'adi 'idewadewa kebu 'adi fata i na 'isa, i na nogaya, wata i na fetu siwe i subisubiadi.” <sup>21</sup> Wata kebu nuanuadi i na nuaviladi bega i na 'ailove luwewafa, ve'avula-'avo'avovo, vainago, wata 'adi 'afo'a i na bailedi.

## 10

### *Tamu anelose ma yana lubulubu.*

<sup>1</sup> Wata a 'isanago, tamu anelose toketokeotogina a 'iseni i obuobuma abamega. Waowa i 'avui i mimaieni, 'unu'ununeye abavole i vetovoia, maigina mataududulina inala bani'odi, we'e 'agena 'wa da vo bani'odi 'ai i da lu'aogi. <sup>2-3</sup> Nimaneye lubulubu nunumina siaina siwe i luyawagi. 'Agena 'ana 'atagi i ba eyage, 'ana wama 'avale, i toke i vegole 'wa da vo kuvakuvala butu'aina. I vegole'a'avana, nika tomuyoana 7 i dududi 'asa'aiana bonana i tutuli. <sup>4</sup> Tutuyanina i dududi i 'a'avana igodi yadi vona a da kilumidi siwe tamu bona a nogai abamega i voneku i vo, Naninidi tomuyoana 7 i voneyediga nuamuye i na 'eno'eno, kebu 'u na kilumidi.”

5-6 Anelosenina, kumanina i ba eyage wata 'avale nimana 'ana 'atagi i silakai i vegole i vo, A vona mogitana Yaubada 'ana wagavayega, kumanina miamia-vagina, abama, fwayafwaya, eyaga i 'idewadi wata nani matatabuna. Kebu wata 'a na lulukamata. <sup>7</sup> Tutuyanina anelose 'ana ve-7 yana evulega i na yuvei, Yaubada yana nuanua givagivadi i na ve'a'ava-vagasedi, bani'odi basenadiotoga i voneyedi yana tofolovavo 'waidie, kumanidiavo i vetolu'ivona faifaina.”

<sup>8</sup> Bonananina a nogaiga abamega wata i vona-vaitugana 'waikuye i vo, 'U na nago anelosenina i бага eyage wata 'avale, nimanega lubulubu luyawagina 'u na 'ewai.”

<sup>9</sup> I vona'a'ava, a nago 'waineye a voneni a vo, Lubulubunina siaina nuanuaku 'u na veleku.” I voneku i vo, 'U na 'ewai 'u na 'ania, 'awamuye 'u na 'alatonoviga dibidibina bani'odi mai'awa, we'e bola kamomuye yuyuna.” <sup>10</sup> Bega a nago lubulubunina a 'ewai nimanega, a si'auleni a 'alatonovi dibidibina 'wa da vo mai'awa. Siwe tutuyanina a tononi kamoku i 'aiova. <sup>11</sup> A 'ani'a'avai wata i voneku i vo, 'U na nago 'u na lu'ivona-vaitugana Yaubada yana Vona wata ava'ai sai'afoga i na souyediga tomotoga yadi toveimea taiadi 'waidie. Tomotoganidi bonadi tulina tulina i miamiani 'awalawa 'aitamogana 'aitamogana 'waidie.

## 11

### *Yaubada yana tolu'ivonavo 'adi 'ailuga.*

<sup>1</sup> Mulieta 'eba 'etowava bani'odi wautogana i veleku i voneku i vo, 'U na tovoi 'u na nago Yaubada yana vanuga 'eba velu'ui wata 'eba velomu 'u na 'etowavadi. I na 'a'avana, tomotoganidi nageneye i subisubiaga 'u na lu'iawawadi. <sup>2</sup> ✧Vanuganina kalikalina, inagenanotanoga kebu 'u na 'etowavaiga fai Yaubada i tauyeni mali tomotoga taunidi kebu Diu 'waidie. 'Atamananina Magemagetana 'waineye tomotoganidi i na veveimea wata nani fuedi i na 'i'ivesakoidi weta'i 42 nagedie. <sup>3</sup> Yaku tolu'ivonavo 'adi 'ailuga veimea a na veledi a na vetunedi Yaubada yana Vona i na lalau'age weta'inidi 42 nagedie 'alo 'aiata 1,260. 'Adi kaleko sakoidi niula 'adi baiki bani'odi, tomotoga yadi 'eba 'isa i nunuavita faifaiddi.”

<sup>4</sup> ✧Tolu'ivonanidi 'adi 'ailuga bani'odi welavi Olive 'ailuga, wata bani'odi mageta 'eba yato 'ailuga i tovtovoi 'Auvea mataneyeye, kumanina tomia fwayafwaya 'adi Toveimea. <sup>5</sup> 'Ai'edi egavo i na vo, Tolu'ivonanidi 'a na nikedi,” vita i na velugadi fai tolu'ivonanidi 'awadiega 'ai 'ala'alaidi i na

souyedi 'adi gaviavo i na 'alaidi i na wafa. <sup>6</sup> Ma yadi veimea weta'inidi 42 nagedie Yaubada yana Vona i na lalau'age, i na vona 'wei i na tova. Wata 'adi fata i na veimea ufa i na vedayaga wata 'ai'edi nuanuadi tutuya fuei viga sakoidi tulidi tulidi i na sousouyedi tomia fwayafwaya 'waidie.

<sup>7</sup> \*Tutuyanina yadi lau'age i na 'a'ava, Vatu'ai Mana-manawena 'wainega tamu tomotoga 'aisaya kasikasisina bani'odi i na souyeni, i na vetoketoke 'waidie i na luve-wafadi. <sup>8</sup> Tomogodi 'atamane i na 'eno'eno, 'atamananina 'ana wagava Ielusalema, bei basenadi 'adi Toveimea tomotoga i tutufwaseni 'ai lagalagana 'waineye. 'Atamananina faifaina 'ana 'eba ve'ifiofio Sodoma 'alo Itifita, i awatalatutulediga fai Yaubada 'ana tovedumwe'ai'ai fuei bei i miamiani. <sup>9</sup> Towafanidi kebu tamu aitoi i na tauyedi i na tavunidi i na 'eno'enovi bega tomotoga fuei 'aila'a 'aitamogana 'aitamogana 'waidiega, mali bonana 'waidiega, tomotoga tulina tulina 'awalawa 'aitamogana 'aitamogana 'waidiega i na mimaia 'aiata 'aitonu wata sai'afo nagedie i na 'ise'isedi. <sup>10</sup> Tolu'ivonanidi 'adi 'ailuga yadi wafa faifaina tomia fwayafwaya i na sosoana, i na sakasakali wata i na ve'i'une'une. I na sosoanaga fai tolu'ivonanidi ma yawaidie vita fuei tomia fwayafwaya i veveleledi.

<sup>11</sup> Yau naninidi a 'ise'isedi 'wa da vo bani'odi a da 'enoneganega. Tomotoganidi towafa, a 'ise'isedi 'aiata 'aitonu wata sai'afo 'atamane i 'eno'enovi, mulieta Yaubada yawaina i sivedamani 'waidie nika i yawasa. Tomotoga matatabudi i 'isedi i tovoiga, i kololo bwaikina. <sup>12</sup> \*Tolu'ivonanidi 'adi 'ailuga i yawasana tamu bona i nogai i toke i vegole abamega i vo, 'Wa lakama." 'Adi gaviavo i 'isa'isa 'adi 'ailuga i lakalaka waowa 'waineamo i luku abame.

<sup>13</sup> I luku abame nika yoyoyo bwaikina i toke i yue tomotoga 7,000 i wafa. 'Atamananina nageneye tutu'ai 10, yoyoyo i yuega 9 'atumaidi, 'aitamogana 'wainega vanuga i 'anigeudi. Tomotoganidi ma yawaidi i miamianiga i 'iseni i kololo bwaikina begaidi Yaubada abame i subisubiai yana toketokena faifaina.

*Anelose 'ana ve-7 yana evulega i yuvei.*

14-15 \*Vita bwaikina 'ana veluga a 'iseni i 'a'ava, 'ana vetonu sai'afoga i na souyeni fai anelose 'ana ve-7 yana evulega i na yuvei. I yuvei i 'a'avana abamega bona bwaikidi a nogaidi i vonavona i vo,

Tutuya de'e i velamu i na nagoga 'Auvea Yaubada wata 'ana Venua'ivina Keliso fwayafwaya wata 'ana tomotoga taiadi i

\* 11:7: Ve 13:1 ☆ 11:12: 2 Kin 2:11 ☆ 11:14-15: Ve 9:12; 1 Kol 15:24-25; Ve 19:6; Dan 7:13-14



na veveimeyedi, yadi veimeanina kebu i na 'a'ava, i na 'eno-vagata.”

<sup>16</sup> ✨I vona'a'ava, nika to'edakumeta 'au'auveadi 24, kumanidiavo Yaubada mataneyeye 'eba miabui 'ai'aiwabuna 'waidie i miamiani, ma yadi ve'ililibu i lumata'afufu Yaubada i subiai i vo,

<sup>17</sup> ✨Yama 'Auvea Yaubada Toketokeotogimu, basenadiotoga wata 'asiau 'u miamia.

'A vekaiwa bwaikina 'waimuye fai yamu toketokena 'wainega 'u velamu tomia fwayafwaya 'u na veveimeyedi.

<sup>18</sup> Basenadi tomia fwayafwaya 'awalawa tulina tulina 'waidie i nuasako 'waimuye, siwe tutuya de'e yamu nuasako i na souyeni 'waidie, towafa 'u na veimeyedi 'adi tutula 'u na veledi.

We'e yamu tofолоvavo, yamu tolu'ivonavo, yamu tomotoga bwaikidi wata siadi, matatabudi i veve'ililibuyemuga tutula 'atumaidi 'u na veledi.

Wata tutuya de'e 'waineyeye fwayafwaya 'ana to'ivesako 'u na leodi.”

<sup>19</sup> Wata a 'isanago abame, matakuye Yaubada yana vanuga 'eba velu'ui 'ana saiboda i sibaleni, nageneyeye tamu didiwaka a 'iseni. Didiwakanina nageneyeye Yaubada yana Veakutagona tomotoga 'waidie 'ana buki i 'eno'eno. Bola a 'i'isanago nika tomuyoana i kikianamali wata i dududuya, butu'ai bwaikidi a nogaidi, yoyoyo i yue wata 'wei mwadodoudi bani'odi aisi i avuta.

## 12

### *Vavine wata wayo'o kasikasisina.*

<sup>1</sup> Wata a 'isanago abame tamu 'eba 'isa i souyeni nuaku i 'ewai. A 'iseni tamu vavine, 'adi kaleko mataududulina bani'odi inala, 'unu'unudie kunabanaba 'ubwana 12 taiadi, yadi veimea 'ana 'eba 'isa, wata weta'i tabwaneyeye i tovofovoi.

<sup>2</sup> A 'isedi sai'afoga i na venatuna bega i 'we'we'wela bwaikina fai i veveviga.

<sup>3</sup> Wata abame tamu 'eba 'isa i souyeni. Tamu tomotoga a 'iseni bani'odi wayo'o yamoyamoina, bwaikina wata kasikasisina. 'Unu'ununa 7 'waidie kunabanaba 7 toveimea 'adi vaigavu, we'e alana 10 'edu'edudie. <sup>4</sup> Giunega 'ubwana fuedi i sita'idi i obu fwayefwayeye. 'Ubwana vi'ai 'ailuga 'atumaidi i 'eno'enovi, vi'ai 'aitamogana i nikedi. Vavinenidi sai'afo i na venatunaga lilivadie wayo'onina i tovofovoi nu-anuana natudi i na 'ani-matayo'oi. <sup>5</sup> I venatuna kwamana iavetana i tubuga, kumanina ma yana toketokena tomotoga 'adi 'aila'a tulina tulina i na veveimeyedi. Wayo'onina igodi

kwamananina i da ovai nika tamu tomotoga i sieloeloi i vagavaia i naweni Yaubada 'waineye, kumanina yana 'eba miabui 'ai'aiwabuna 'waineye i miamia. <sup>6</sup> Vavine i dega i nago sali'avu'avuye fai bei Yaubada yadi 'eba mia basenadi i 'idewai. Bei i na miamia i na 'i'isave'avinidi 'aiata 1,260 nagedie.

<sup>7</sup> ✧Vavinenidi i dega i nago, mulieta gavia i velamu abame. Tamu anelose bwaikina 'ana wagava Maikeli ma yana anelose, wata tomotoganina bani'odi wayo'o kasikasisina ma yana 'aila'a\* taiadi i vetalaga. <sup>8-9</sup> ✧Maikeli ma yana anelose i vetoketoke we'e wayo'onina ma yana 'aila'a Yaubada kebu i da tauyedi bega i na miamia abame, begaidi i sogiedi i obuma fwayefwayeye. Wayo'onina kumanina basenadi 'o'olo tuat-uaina, 'ana wagava Diabolo 'alo Seitani, tomia fwayafwaya matatabudi i vevekaliedi.

<sup>10</sup> ✧A 'iseni i obu fwayefwayeye, nika bona bwaikina a nogai abamega i vonavona i vo,

'Asiau Yaubada nani matatabuna 'waidie i vetoketoke, i 'ita'ita'i, wata i veveimea. Yaubada 'ana Venua'ivina yana toketokena i veleni taiadi i veveimea. I vetoketokega fai Seitani i sogieni abamega. Kumanina i tovofovoi Yaubada mataneyeye lovana wata 'aiata edavo tovetumagana i vevevitadi sakona faifaidi. <sup>11</sup> Edavonidi Seitani 'waineye i vetoketoke Keliso dayaginega, taunina Yaubada yana Sifi Siaina, yawaina i tauyeni i wafa tomotoga faifaidi. Wata edavo i vetoketoke fai Yaubada yana Vona tonovina i lu'ivona tomotoga 'waidie, kebu yawaidi faifaidi i da nuanua, taunidi i tauyedi wafa 'waineye. <sup>12</sup> 'Omi tomia abama 'wa na sosoana fai Yaubada i vetoketoke, we'e 'omi fwayafwaya wata eyaga 'adi tomia, nuakalikalimi vita 'wa na veluagadi fai Seitani i obuwa nuanuana vita bwaikina i na velemini. I nuasako'afo'afo fai i 'asetai yana tutuya 'ale'usana."

<sup>13</sup> Tomotoganina wayo'o bani'odi i obuma fwayefwayeye i 'asetai Yaubada i vetoketoke begaidi vavine i sogiedi, kumanidi kwamana iavetana i venatuneni. <sup>14</sup> Igoti i da 'ive'avinidi siwe Yaubada manubutu bwaikina fafena 'adi 'ailuga vavine i veledi bega i dega i nago yadi 'eba mia nonogineye sali'avu'avu 'waineye, bei malamala 'aitonu wata sai'afo nagedie i na 'ita'ita'iedi wayo'o 'wainega wata i na 'i'isave'avinidi. <sup>15</sup> Wayo'o 'awana i o'ei ufa bwaikina i souyeni nuanuana vavine i na bewedi i na wafa. <sup>16</sup> Igoti i da luvewafadi siwe fwayafwaya vavine i 'ivaisedi i 'anifuai ufanina matatabuna i susula. <sup>17</sup> ✧Wayo'onina i nuasako

✧ 12:7: Iud 1:9 \* 12:7: 'Ana mogitana wayo'o kasikasisina ma yana anelose.

✧ 12:8-9: Nag 3:1; Ve 20:2-3 ✧ 12:10: Iob 1:9-11; Sek 3:1 ✧ 12:17: 1 Fit 5:8

bwaikina vavine 'waidie bega i nago natudiavo 'ifwaidi taiadi i na vetalaga, kumanidiavo Yaubada yana Vona i veve-matayakeyakediga wata Iesu faifaina i lulu'ivona. <sup>18</sup> Bega wayo'o i nago balebaleye bei i tovoovoi i lulukamata.

## 13

### *'Aisaya kasikasisina malavetayega.*

<sup>1</sup> ✧Tomotoga wayo'o bani'odi i tovi-vagata i tovoovoi a 'i'isanago nika tamu tomotoga a 'iseni 'aisaya kasikasisina bani'odi, malavetayega i lakama. A 'iseniga 'unu'ununa 7, alana 'edu'edudie 10, we'e alanidi 'aitamogana 'aitamogana 'waidie kunabanaba toveimea 'adi vaigavu. 'Unu'ununidi 'aitamogana 'aitamogana 'waidie wagava sakoidi i kilumidi, wagavanidi Yaubada i awavesakoyeni. <sup>2</sup> Tomotoganina 'ana 'isa'isa sifu walawala'ai kasikasisina 'ana wagava lefadi, 'ageni 'wa da vo tamu 'aisaya sakoina 'ana wagava bea, we'e 'awana bwaikina laioni 'awana bani'odi. Tomotoga bani'odi wayo'o yana toketokena, yana veimea wata yana 'eba miabui 'ai'aiwabuna i 'anivelenedi tomotoganina malavetayega 'waineye. <sup>3</sup> We'e tamu 'unu'ununa 'waineye bwaya a 'iseni 'wa da vo basenadi i da wafa wata i da yawasa. Tomia fwayafwaya matatabuna nuadi i voganidi yana yawasa-vaitugana faifaina begaidi yana nuanua i ve-matayakeyakedi. <sup>4</sup> Wata tomotoga fuedi ma yadi subia i 'odu'odu wayo'o 'waineye fai yana veimea i 'anivelenedi tomotoganina malavetayega 'waineye. Siwe wata tomotoganina malavetayega 'waineye i 'odu'odu i vonavona i vo, Tomogo de'e toketokeotogina, kebu tamu aitoi 'ana fata taiadi i na vetalaga bega i na vetoketoke.”

<sup>5</sup> Weta'i 42 nagedie tomotoganina ma yana veimea taunina i awa'ai'aia we'e Yaubada 'waineye i awadamana siwe Yaubada kebu i da talabodeniga i tauyeni. <sup>6</sup> Nuanuana Yaubada i na uvi'agali bega ma yana nuasako i vovona-awadamana Yaubada 'waineye, yana 'eba mia faifaina i vona, wata tomotoganidi taiadi i miamianiga abame, 'waidie i vovona-awadamana. <sup>7</sup> ✧Yaubada i tauyeni Iesu yana tomotoga taiadi i vetalaga 'waidie i vetoketoke, wata ma yana veimea tomotoga i miamiani 'awalawa 'aitamogana 'aitamogana 'waidie, bonadi tulina tulina, i veveimeyedi. <sup>8</sup> ✧Tomotoga fuedi i na 'odu'odu tomotoganina malavetayega 'waineye, we'e Iesu yana tomotoga mogitana i na baila. Basenadi Yaubada fwayafwaya kebu i da 'idewaiga, Iesu yana tomotoganidi 'adi wagava i kilumidi yana buki 'waineye bega

mia 'atumaina wata miamia-vagaina i na veluagai, we'e kumanidiavo i na 'odu'oduga 'adi wagava kebu i da kilumidiga. Bukinina Yaubada yana Sifi Siaina yana buki, kumanina basenadi tomotoga i luwewafai.

<sup>9</sup> Ekwavo a na vonemi, nuami i na 'ivina-'atumi bega de'e vonanina 'wa na 'asetai. <sup>10</sup> \*'Ai'edi aitoi Yaubada i na tauyeni bega i na luku vanuga 'eba yogona 'waineye Keliso faifaina, mogitana i na luku, wata 'ai'edi aitoi Yaubada i na tauyeni bega Keliso faifaina i na luwewafai kefatayega, mogitana i na wafa. Begaidi 'omi Iesu yana tomotoga, 'wa na tokemaigemi, ma yami vetumagana 'wa na tovtovoi fa'alina vitanidi 'waidie.

*'Aisaya kasikasisina fwayafwayayega.*

<sup>11</sup> Wata a 'isanago nika tamu tomotoga a 'iseni fwayafwayayega i souyeni 'aisaya kasikasisina bani'odi. 'Edu'eduneye alana 'ailuga siaidi bani'odi sifi natudi alana, we'e bonana kasikasisina wayo'o bani'odi. <sup>12</sup> Tomotoganina malavetayega 'aisaya kasikasisina bani'odi, kumanina basenadi i wafa wata i yawasa, yana veimea matatabuna i 'anivelenedi tomotoga fwayafwayayega 'waineye i vo, Nuanuaku 'u na veimea bega tomia fwayafwaya matatabudi i na 'odu'odu 'waikuye." <sup>13</sup> \*Tomotoganina fwayafwayayega 'eba nua'ewa wata 'eba nuavogana i 'idewadi tomotoga matadie, wata i vona 'ai-'ala'alata i obuma abamega. <sup>14</sup> Tomotoga fwayafwayayega tugusanidi toketokedi i 'idewadi tomotoga malavetayega 'ana wagavayega, naninidi 'waidiega tomia fwayafwaya i vekaliedi. Wata tomotoga i vonedi i vo, Kumaea 'wa na 'idewai tomotoga malavetayega 'ana 'isa'isa bani'odi, kumanina basenadi i wafa i yawasa, ma yami ve'ililibu 'waineye 'wa na 'odu'odu." <sup>15</sup> Kumaeana i 'idewa'a'avaina tomotoganina fwayafwayayega ma yana veimea i vona nika kumaea yawaina i souyeni. Kumaeana 'ana fata i na welava, we'e egavo i baila, kebu nuanuadi i na 'odu'odu 'waineye i luwewafadi. <sup>16</sup> Tomotoganina fwayafwayayega tomotoga matatabudi i lukakadedi 'adi tugusa i na 'ewadi, i na yatodi 'adi 'atagie 'alo debadie, tomotoga bwaikidi wata tomotoga siaidi, 'ai'aiwabu wata wekowekoma, tofolova-maimaiga wata 'adi toveimeavo, matatabudi tugusa i 'ewa. <sup>17</sup> \*'Ai'edi egavo kebu ma 'adi tugusaga kebu 'adi fata kukua wata 'ani'ani i na kimwane 'alo i na vekimwane. Tugusanina tomotoga 'aisaya kasikasisina bani'odi 'ana wagava 'alo 'ana wagava 'ana naba.

<sup>18</sup> Ekwavo, ma yami 'asetai 'wa na vena'ivina. Tomotoganina 'aisaya kasikasisina bani'odi, 'ana wagava 'ana naba

fio bani'odi, side nabanina 666. Egavo ma yadi 'asetai 'adi fata fionina i na nua'ivineni nika wagavaotoga i na veluagai, wagavanina 'aisayanina 'ana wagava siwe 'ana nogaya 'wa da vo tamu tomogo 'ana wagava.

## 14

*Tomotoganidi 'ita'ita'i 'akonadi i veluagai yadi lei.*

<sup>1</sup> ✨Wata a 'isanago, Yaubada yana Sifi Siaina a 'iseni tomotoga 144,000 taiadi i tovtovoi 'Oya Saioni tabwaneye. Tomotoganidi debadie Sifinina 'ana wagava wata Tamana 'ana wagava i kilumidi. <sup>2</sup> ✨Bona bwaikina a nogai abamega kuvakuvala 'alo tomuyoana butu'aina bani'odi. Bonanina 'ana nogaya wata bani'odi 'aila'a bwaikina yadi gita i lalauinava. <sup>3</sup> ✨Tomotoganidi 144,000 i tovoi maigidi i nago 'eba miabui 'ai'aiwabuna 'waineye, nani ma yawaidi toketokedi <sup>4</sup> wata to'edakumeta 'au'auveadi 'waidie, tamu lei 'ivauna 'ana nogaya 'atumaina i leieni. Leinina kebu tamu aitoi 'ana fata i na 'asetai, 'aisedi tomotoga 144,000 i 'asetai. Kumanidiavo 'akonadi Yaubada i tuveobudi i maia fwayafwaya 'ana sakona 'wainega. <sup>4-5</sup> ✨Tomotoganidi yadi sauluva 'atumai'avadi Yaubada mataneye, kebu i da baileni bega i da 'odu'odu yaubada-vekavekali 'waidie, yadi sauluvanina 'wa da vo tomotoga yadi vevinevo kebu i da bailedi bega i da ve'avula-'avo'avovo. Ava'aibe bei Yaubada yana Sifi Siaina i nunagoga, tomotoganidi i yoyogo'wai'waili. Tomia fwayafwaya 'waidiega tomotoganidi Yaubada i tuveobudi bani'odi 'ayavau, Yaubada wata yana Sifi Siaina 'adi 'anivelena. Kebu tamu tutuya 'awadiega vekali i da souyedi wata kebu tamu 'adi awavesako.

*Anelose 'adi 'aitonu.*

<sup>6</sup> Wata a 'isanago tamu anelose a 'iseni Iesu Valana 'Atumaina wata Miamia-vagaina, tabwaneamo i yavegeni i mimaieni. I yavegeni i mimaieniga tomia fwayafwaya matatabudi 'waidie i na lu'ivoneyeni. Tomotoganidi 'awalawa 'aitamogana 'aitamogana 'waidie, bonadi wata 'adi 'aila'a tulina tulina. <sup>7</sup> Anelosenina i toke i vegole i vo, Yaubada toketokena 'wa na kololoyeni wata 'wa na subisubiai, fai yana tutuya 'akonadi i souyeni bega tomotoga i na veimeyedi vematavuloga i na veluagai. I lubwainemi 'wa na 'odu'odu 'waineye, taunina abama, fwayafwaya, eyaga wata ufa-luluvuala 'adi to'idewadewa.”

<sup>8</sup> ✨Wata tamu anelose 'ana veluga i mai i vegole i vo, Babiloni 'atamana bwaikina i da kual i kual. 'Atamananina 'ana sauluva sakoidi wata bunu 'ana nuanua sakoidi

✨ 14:1: Ve 3:12 ✨ 14:2: Ve 1:15 ✨ 14:3: Ve 7:4 ✨ 14:4-5: Iem 1:18

✨ 14:8: Ve 18:2-3

'waidiega tomotoga 'adi 'aila'a tulina tulina nuadi i 'ewadi i yo'edi i luku. I lukuga i sakona bani'odi tamu vavine nuanuadi tamu tomogo, nagami oine toketokena i na veyemuya mulieta nuana i na lugaugauya nika taiadi i na sakona.”

<sup>9</sup> ✨Wata tamu anelose 'ana vetonu i mai i toke i vegole i vo, 'Ai'edi egavo i na 'odu'odu tomotoga malavetayega 'alo 'ana kumaea 'waidie wata 'adi tugusa debadie 'alo nimadie, Yaubada yana nuasako bwaikina i na veluagai.

<sup>10</sup> Yana nuasakanina kebu sidibidibiga, nuasako mogitana tomotoganidi i 'odu'oduga i na veluagai, 'wa da vo bani'odi Yaubada yana oine toketokena ma vedina tosakonanidi i da veyemudi i da nikedi. Tomotoganidi i 'odu'oduga veviga bwaikina i na veluagai manufagila wata 'ai-'ala'alata nagedie anelose magemagetadi wata Yaubada yana Sifi Siaina matadie. <sup>11</sup> 'Ainina 'wainega veviga i veveluagai lufwana i tovi-vagata, bega egavo tomotoga malavetayega wata 'ana kumaea 'waidie i 'odu'oduga, wata 'ana wagava 'ana tugusa 'waidie, kebu tamu sai'afu 'aivaita i na veluagai, lovana wata 'aiata bei i na veveviga.”

<sup>12</sup> ✨Ekwavo, 'omi Yaubada yana tomotoga, yana Vona 'wa vevematayakeyakedi wata yami vetumagana 'wa yato-vagaseni Iesu 'waineye. Mogitana veviganidi i na souyedi siwe i lubwainemi ma yami tokemaiga 'wa na tovoi fa'alina naninidi sakoidi 'waidiega.

<sup>13</sup> ✨Anelosenidi yadi vona i 'a'ava, mulieta abamega tamu bona a nogai i vonavona i vo, Side bani'odi 'u na kilumedi 'u na vo, Tutuya de'e i na nagoga egavo i na folofolova 'Auvea faifaina i na wafaga 'eba sosoana 'waidie.” 'Anu'anunu 'Atumaina wata yana nuanua bani'odi i vesala i vo, Vona mogitana, i na sosoanaga, folova vitadi 'waidiega i na veawai fai abame tomotoga fueidi yadi folovanidi i na 'asetadi wata 'adi tutula i na veluagadi Yaubada 'wainega.”

*Anelose tomia fwayafwaya i nawedi Yaubada 'waineye.*

<sup>14</sup> ✨Wata a 'isanago waowa 'avu'avuna a 'iseni. Waowanina tabwaneye tamu tomotoga i miabui 'ana 'isa'isa kumanina i vetomotogaotoga,\* 'unu'ununeye toveimea 'adi vaigavu golida, we'e nimaneye 'ilama lu'obwana wata nigonigona. <sup>15</sup> ✨Abame tamu anelose i souyeni vanuga 'eba velu'ui 'wainega i toke i vegole tomotoganina waowa tabwaneye i miabuiga 'waineye i vo, Yamu 'ilamanina lu'obwana 'wainega nani fueidi fwayefwayeye 'akonadi i kumaga 'u

✨ **14:9:** Ve 13:11-17, 19:20, 20:10,15, 21:8 ✨ **14:12:** Ve 13:10 ✨ **14:13:** Ibu 4:10 ✨ **14:14:** Dan 3:17; Ve 1:13 ✨ **14:14:** Tomotoganina 'asa'aiana Iesu Keliso. ✨ **14:15:** Mad 13:36-40

na kinidabadi fai 'ana tutuya i souyeni.” <sup>16</sup> Tomotoganina waowa tabwaneye i miabuiga i mai tomotoga fueidi i vavavai 'wa da vo bani'odi i da kumaga yana 'ilamayega i da kinidabadi.

<sup>17</sup> Wata abame tamu anelose a 'iseni vanuga 'eba velu'ui 'wainega i souyeni, taunina wata ma yana 'ilama lu'obwana wata nigonigona.

<sup>18</sup> Wata tamu anelose a 'iseni 'eba velomu 'wainega i souyeni, kumanina 'eba velomunina 'ana 'ai-'ala'alata 'ana to'isave'avina. I toke i vegole tomotoganina ma yana 'ilama nigonigona 'waineye i vo, Fwayefwayeye kalefa 'akonadi i kumaga, 'u na kinikadidi oine faifaina.” <sup>19</sup> \*Bega tomotoganina ma yana 'ilama kalefa i kinikadidi i 'ewadi i nawedi 'eba vatanitani nageneye i vedodogidi. 'Eba vatanitaninina vona-awatabai Yaubada yana nuasako faifaina, tomia fwayafwaya i na vematavulogidi. <sup>20</sup> 'Eba vatanitaninina 'atamana bwaikina lilivaneye bei kalefa i vatanitanidi nika dayaga i sousouyeni 'wa da vo ufa nununagona, i taina i nago manamanaweotogina me Guliki yadi 'etowava 1,600 sitedia, † 'ana veawana igodi ta simwanuda.

## 15

### *Anelose 7 vita i 'ewadi i na tawedi fwayefwayeye.*

<sup>1</sup> \*Dayaga a 'iseni i 'a'avana, mulieta 'awaie ava'ai i na souyeniga 'ana 'isa'isa i veku, 'ana 'isa'isanina 'eba nuavogana wata nani bwaikina. Anelose 7 nimadie nani sakoidi 7 a 'isedi 'waidiega tomia fwayafwaya vematavuloga i na veluagai. Tutuyanina naninidi sakoidi i na obu fwayefwayeye tomotoga i na nikedina bei Yaubada yana nuasako 'ana 'eba ve'a'ava, kebu wata tamu nani sakoina i na sousouyeni.

<sup>2</sup> Wata a 'isanago eyaga niwalova 'atumaiotogina a 'iseni, 'aninamanamalina kilifou bani'odi, nageneye 'ai-'ala'alata. Eyaganina lilivaneye tomotoga fueidi a 'isedi i tovofovo, kumanidiavo i vetoketoke tomotoga malavetayega, 'ana kumaea, wata tomotoganina 'ana wagava 'ana naba fio 'waidie. Tomotoganidi nimadie ma yadi 'eba lauinava gita Yaubada i veledi. <sup>3</sup> \*Matatabudi i leilei, leinina Yaubada yana tofolova Mosese wata Yaubada yana Sifi Siaina 'waidiega. Leinina side bani'odi.

'Auvea Yaubada, 'omu toketokeotogimu,

Naninidi 'u 'i'idewadiga bwaikidi wata 'eba nuavogana.

'Awalawa 'aitamogana 'aitamogana 'u veveimeyedi,

Yamu sauluva 'atumaidi wata tonovidi.

\* 14:19: Ve 19:15 † 14:20: 'Ana vemanawe bani'odi 300 kilomita. \* 15:1: Ve 15:6-7 \* 15:3: VeL 32:3-4; Ve 16:7

<sup>4</sup> Tomotoga matatabudi ma yadi kololo i na ve'ililibuyemu,  
Ma yadi subia yamu toketokena i na lulu'ivoneyeni,  
Fai 'omu 'aiseotogimu magemagetamu.

Tomotoga 'aila'a tulina tulina i na maia i na 'odu'odu  
'waimuye,

Fai tomotoga fueidi yamu veimea tonovidi i 'isedi.

<sup>5</sup> \*Lei i 'a'avana a 'isanago nika Yaubada yana vanuga  
abame i sibaleni, nageneye tutudaba tabutabuna a 'iseni,  
Yaubada yana 'eba mia. <sup>6</sup> We'e anelose <sup>7</sup> vanuganina  
'wainega i souyedi, nani sakoidi <sup>7</sup> i mimaiedi, naninidi tomia  
fwayafwaya 'adi 'eba vematavuloga. 'Adi kaleko mataududu-  
lidi wata vunavunagidi, 'afaudiamo bulava golida i nago.  
<sup>7</sup> Nani ma yawaidi toketokedi <sup>4</sup>, 'waidiega tamu iadi 'aivoe  
<sup>7</sup> i 'ewadi, anelose 'adi <sup>7</sup> i veledi. 'Aivoenidi golida, nagedie  
Yaubada miamia-vagaina yana nuasako i veadagidi. <sup>8</sup> I veled-  
ina nika Yaubada yana toketokena wata yana mageta vanuga  
'eba velu'ui i susuli bani'odi lufwa bega kebu tamu aitoi 'ana  
fata i na luku, nagami anelose <sup>7</sup> vita sakoidi <sup>7</sup> i na tawedi i na  
obu fwayefwayeye mulieta i na luku.

## 16

*Yaubada yana nuasako ma 'aivoedi 7.*

<sup>1</sup> \*Yaubada yana toketokena wata yana mageta vanuga 'eba  
velu'ui matatabuna i susuli i 'a'avana, mulieta bona bwaikina  
a nogai vanuga 'eba velu'uinina 'wainega i toke i vonavona  
anelose <sup>7</sup> 'waidie i vo, 'Wa na nagoi nani sakoidi ma 'aivoedi  
<sup>7</sup> 'wa na 'iveiwagedi bega Yaubada yana nuasako i na souyeni  
tomia fwayafwaya 'waidie.”

<sup>2</sup> \*Tamu anelose nani sakoina ma 'aivoena i 'iveiwageni  
fwayefwayeye bonu sakoiotogidi i souyedi tomotoga fueidi  
'waidie i veveviga bwaikina, tomotoganidi kumanidiavo ni-  
madie 'alo debadie tomotoga malavetayega 'ana tugusa, wata  
tomotoganidi 'ana kumaea 'waineye i 'odu'oduga 'waidie.

<sup>3</sup> \*I 'a'avana anelose 'ana veluga nani sakoina ma 'aivoena  
i 'iveiwageni eyage, eyaga matatabuna 'wa da vo tomotoga  
wafawafana dayagina ufaufana, begaidi 'aisaya eyage wata  
naninidi bei i 'eno'enoviga matatabudi i ve'alawafawafa.

<sup>4</sup> Anelose 'ana vetonu nani sakoina ma 'aivoena i  
'iveiwageni ufa'ai wata ufa-luluvuala i vedayaga. <sup>5</sup> Anelose  
tamu, ufa matatabuna 'adi to'isave'avina i vona i vo,

Yaubada 'omu magemagetamu 'omu basenadi wata 'asiau  
'u miamia.

'U veimea tomia fwayafwaya vematavuloga i veluagai,  
veimeanina tonovina wata i lubwaineni bani'odi.

☆ 15:5: Ibu 9:3 ☆ 16:1: Ve 16:17; Sef 3:8 ☆ 16:2: Sou 9:10; Ve 13:11-17

☆ 16:3: Sou 7:17-21



6 ✨ Taunidi yamu tomotoga wata yamu tolu'ivonavo i nikedi i 'ivedayagidi we'e 'omu ufa i vedayaga to'ainikenidi 'u veledi i na yemu.

I lubwaineni yadi sakona 'ana tutula.”

7 ✨ Wata tamu bona a nogai 'eba velomuyega i vonavona i vo,

'Auvea Yaubada toketokeotogimu, vona mogitana yamu veimea 'atumaidi wata tonovidi.”

8 I vona'a'ava, mulieta anelose 'ana ve-4 nani sakoina ma 'aivoena i 'iveiwageni inala 'waineye, bega Yaubada inala yana toketokena i 'imoso'ieni tomotoga i 'alakualidi.

9 ✨ Yauyautanina tomotoga i 'alaidiga i 'alavekamogaogalidi Yaubada i awavesakoyeni fai i 'asetai vitanidi i souyedi yana veimea 'wainega. I 'asetai 'adi vematavuloga siwe kebu i da vo, 'A na nuavilama Yaubada toketokena 'a na subiai.”

10 ✨ Anelose 'ana ve-5 nani sakoina ma 'aivoena i 'iveiwageni tomotoga kasikasisina malavetayega yana 'eba miabui 'ai'aiwabuna 'waineye, nika yana 'eba veimea matatabuna i dudubali. Tomotoga maigidi i yuyudi fai veviga bwaikina i veluagai. 11 Yaubada abame i awavesakoyeni yadi veviga wata yadi bonu sakoiotogidi faifaidi siwe wata kebu yadi sauluva sakoidi i da bailediga.

12 Anelose 'ana ve-6 nani sakoina ma 'aivoena i 'iveiwageni ufa bwaikina 'ana wagava Iufiletisi 'waineye i lala. I lalaga bega 'ana fata toveimea bwaikidi ma yadi tolugaviavo inala yana 'eba laka 'wainega i na maia. 13 ✨ A 'isanago yaiaina sakoidi 'adi 'aitonu talatala bani'odi a 'isedi. Yaiaina tamu i souyeni malaveta 'ana tomotoga sakoina 'awanega, tamu, tolu'ivona-vekavekali\* 'awanega, wata tamu i souyeni tomotoga kasikasisina 'awanega, kumanina wayo'o 'ana 'isa'isa bani'odi. 14 ✨ Yaiainanidi 'adi 'aitonu i souyedi 'eba nuavogana wata 'eba nua'ewa i 'i'idewadi toveimea bwaikidi matadie. Toveimeanidi 'awalawa 'aitamogana 'aitamogana 'waidiega nuadi i 'ewadi bega i na va'auta 'Auvea taiadi i na vetalaga 'aiatanina Yaubada toketokena i venuma'ivineniga 'waineye.

15 ✨ Yau Iesu a na vonemi. 'Wa na 'isa'isa 'akonadi a viwai. Yaku wainina a na vaimwaimwamo a na souyeku kebu nuanuaku a na veyawailovogimi. Egavo i na 'isa'isa wata i na lulukamata 'eba sosoana 'waidie. I lubwainedi yadi sauluva 'atumaidi i na 'i'isave'avinidi 'wa da vo 'adi kaleko vunavunagidi i da si'i'idi bega kebu i na vekonekone wata i na bunumayaga tomotoga matadie.”

✨ 16:6: Ve 17:6, 18:24 ✨ 16:7: Ve 19:2 ✨ 16:9: Ve 9:20-21 ✨ 16:10: Sou 10:22 ✨ 16:13: Ve 13:11-15; Ve 19:20 \* 16:13: Tolu'ivona-vekavekali taunina tomotoga sakoina i souyeni fwayafwaya 'wainega. ✨ 16:14: 1 Tim 4:1; Ve 19:19 ✨ 16:15: 1 Tes 5:2; Ve 3:3; Luk 12:37-40

16 We'e yaiananidi toveimea bwaikidi i vonedi i va'auta tamu 'awalawa 'waineye me Diu bonadiega 'ana wagava Amagedoni.

17 ✨I va'autana mulieta anelose 'ana ve-7 nani sakoina ma 'aivoena i 'iveiwageni 'awasasa'aveye.† Bona bwaikina a nogai 'eba miabui 'ai'aiwabuna 'wainega. 'Eba mi-abuinina abame, vanuga 'eba velu'ui nageneye, i vona i vo, 'Asa'aiana, 'akonadi i 'a'ava.” 18 ✨I vona'a'ava nika mageta i kikianamali, bona bwaikidi, tomuyoana i dududuya, wata yoyoyo bwaikaotogina i yue. Tomotoga 'ana 'idewavau 'wainega i maiga 'asiau kebu tamu yoyoyo bani'odi i da yue. 19 ✨Atamana bwaikina i si'idi-tonuyeni wata 'atamana matatabudi 'awalawa 'aitamogana 'aitamogana 'waidie i 'ivesakodi. Naninidi sakoidi 'atamana bwaikina Babiloni 'ana tomia i 'idewadiga Yaubada kebu nuana i da fani, ma yana nuasako bwaikina vita bwaikina i veledi, 'wa da vo yana oine toketokena 'wainega i da veyemudi bega i da nikedi. 20 Imula matatabudi i savovola, 'oya i velaube'u. 21 ✨Wei mwadodoudi bani'odi aisi, 'adi vita 'wa da vo maidoga 'aitamogana 'ana vita‡ i 'anita'idi tomotoga i nikedi. Vitanidi faifaidi tomotoga Yaubada i awavesakoyeni fai sakoitogidi.

## 17

*Vavine toalagogona 'aisaya yamoyamoina kwavuneye.*

1 Vita 'ana ve-7 i 'a'avana, mulieta anelose 7, kumanidiavo nani sakoidi yadi 'aivoeyega i 'iveiwagediga fwayefwayeye, 'waidiega tamu i mai 'waikuye i voneku i vo, 'U mai ta na nago a na vemu tamu 'atamana bwaikina ufa fuedi lilivadie, 'awaie vita i na veluagai yana sakona faifaidi. 'Atamananina bani'odi tamu vavine toalagogona ma 'ana 'asete, tomotoga fuedi nuadi i 'ewadi bega taiadi i sakosakona. 2 ✨Toveimea fuedi kini bani'odi toalagogonanina taiadi i sakosakona, we'e tomia fwayafwaya fuedi nuadi i 'ewadi yana sauluva sakoidi 'waidiega 'wa da vo bani'odi ufa toketokena i da veyemudi nuadi i da lugaugaudi.”

3 ✨Anu'anunu 'Atumaina mogitana i ageku bega anelose i naweku sali'avu'avuye. Bei tamu vavine a 'iseni 'aisaya yamoyamoina kwavuneye i miabui i miamia. 'Aisayanina 'unu'ununa 7 wata 'edu'edudie alana 10, we'e tomogona matatabuna wagava 'ana loi, wagavanidi Yaubada 'ana awavesako. 4 Vavinenina 'ana kaleko yamoyamoina wata

✨ 16:17: Ve 16:1 † 16:17: Me Diu yadi 'asete, yaiana yadi 'eba mia 'awasasa'aveye. ✨ 16:18: Ve 8:5 ✨ 16:19: Ve 14:8-10 ✨ 16:21: Sou 9:24; Ve 16:9,11 † 16:21: 'Ana mogitana 'ana vita bani'odi 50 kilogalamu. ✨ 17:2: Ve 18:3 ✨ 17:3: Ve 13:1

bakabakana 'ai'aiwabu 'adi kaleko bani'odi, 'ana vaigavu golida, kileu wata bida 'aninamanamalidi 'adi tutula bwaikidi. Nimaneye tamu vedi golida, vedinina nageneye nani sakoidi fue di faifa idi Yaubada i nunuasako, bani'odi yana sauluva sakoidi iaveta taiadi. <sup>5</sup> Debaneye 'ana wagava i kilumi 'ana 'asetai vitana bani'odi yana fio. Wagavanina side bani'odi,

Babiloni 'atamana bwaikina.

Kumanina vevine toalagogona fue di wata nani sakoidi matatabudi fwayefwayeye inadi.

<sup>6</sup> \*Vavinenina a 'iseniga 'ana 'isa'isa ufa toketokena i yemu nuana i lugaugauya. Ufanina Yaubada yana tomotoga wata tomotoganidi i tokemaiga Iesu faifaina dayagidi. Vavinenina a 'iseni nuaku i vogana-'afo'afo. <sup>7</sup> Anelose i velutolieku i vo, Awale nuamu i vogani? Vavinenina wata 'aisayanina 'unu'ununa <sup>7</sup> wata alana 'edu'edudie <sup>10</sup>, kwavuneye i miabuiga, 'adi 'asetai fio bani'odi a na veifufuyedi 'u na nogai. <sup>8</sup> \*Aisayanina yamoyamoina tamu tomotoga, basenadi ma yawaina siwe 'akonadi i wafa, sai'afoga i na souyeni Vatu'aiega yaiaina yadi 'eba mia 'wainega, tomotoga fue di i na 'iseni mulieta i na wafaga wafa-vagata. Basenadi Yaubada kebu fwayafwaya i da 'idewaiga tomotoga 'ifwaidi 'adi wagava i kilumidi mia-vagata 'ana buki 'waineye. We'e kumanidiavo kebu 'adi wagava i da kilumidiga, tutuyanina tomotoganina Vatu'aiega i na souyeni nuadi i na voganidi fai i na 'asetai nagami ma yawaina, siwe i wafa wata i yawasa.

<sup>9</sup> 'Ai'edi aitoi ma yana 'asetai, fio de'e i na 'asetai. 'Unu'ununa <sup>7</sup> 'ana 'asetai 'oya <sup>7</sup> tabwadie 'atamana 'aitamogana i 'idewai, 'wa da vo vavinenina bei i da miabui. Wata 'unu'ununanidi <sup>7</sup> tamu 'ana 'asetai, toveimea bwaikidi <sup>7</sup>. <sup>10</sup> Toveimeanidi 'waidiega 'akonadi <sup>5</sup> yadi veimea i 'a'ava, 'ana ve-6 'asiau i veveimea, 'ana ve-7 sai'afoga i na souyeni siwe kebu tutuya manamanawenaga wata i na 'a'ava. <sup>11</sup> Tomotoganina 'aisaya yamoyamoina bani'odi <sup>7</sup>-nidi 'waidiega, i be'u wata i na tovoi-vaitugana nika toveimea bwaikina 'ana ve-8. Taunina kumanina tomotoga fue di i na 'iseni, mulieta i na wafaotoga.

<sup>12</sup> Ala <sup>10</sup> 'u 'isediga 'ifwaidi toveimea bwaikidi matatabudi <sup>10</sup> bola kebu yadi veimea i da velamu. 'Awaie i na veveimea 'aisaya yamoyamoina taiadi siwe kebu tutuya manamanawenaga. <sup>13</sup> Toveimeanidi <sup>10</sup> matatabudi yadi nuanua i vesala, yadi toketokena wata yadi veimea i na 'anivelenedi tomotoganina 'aisaya yamoyamoina bani'odi 'waineye. <sup>14</sup> \*Matatabudi Yaubada yana Sifi Siaina taiadi

i na vetalaga siwe Sifi Siaina wata yana tomotoga i na vetoketoke i na leodi fai taunina to'edakumetavo matatabudi yadi To'edakumeta Bwaikina wata toveimea bwaikidi 'adi Toveimea. Yana tomotoganidi basenadi i venuma'ivinediga i goledi i nagoi 'waineye, taunidi totokemaiga vita fueidi 'waidie."

<sup>15</sup> Wata anelose i voneku i vo, Ufanidi 'u 'isediga bei vavine i miabuiga 'adi 'aseto tomotoga matatabudi bonadi tulina tulina 'awalawa 'aitamogana 'aitamogana 'waidiega. <sup>16</sup> ✧Ala 10 'u 'isediga, kumanidiavo toveimea bwaikidi 10 wata tomotoganina 'aisaya bani'odi, matatabudi vavine toalagogona i na vedumwe'ai'aieni taiadi i na vetalaga nani matatabuna 'waineye i 'eno'enoviga i na eloi we'e konekonena i na miamia. I na eloina mulieta tomogona i na 'ania we'e luluna i na kabunidi 'aie. <sup>17</sup> Vavinenina i na 'ivekokoviga fai Yaubada nuanuananina i veledi, bega yadi nuanua 'aitamogana 'wainega toveimeanidi 10 yadi toketokena i na 'anivelenedi tomotoganina 'aisaya yamoyamoina bani'odi 'waineye, bega i na veveimea i na nagoga nika Yaubada yana vona 'adi mogitana i na souyedi.

<sup>18</sup> Side bani'odi. Vavine 'u 'iseniga 'ana 'aseto 'atamananina bwaikina toveimea bwaikidi matatabudi i veveimeyedi."

## 18

### *Yaubada me Babiloni i leodi.*

<sup>1</sup> Vavine a 'iseni 'ana 'aseto kumanina 'atamana Babiloni, mulieta wata a 'isanago tamu anelose a 'iseni abamega i obuobuma. Basenadi Yaubada veimea bwaikina i veleni bega i 'awaiaia fwayafwaya matatabuna i magetai. <sup>2</sup> I toke i vegole ava'ai 'awaie i na souyeniga faifaina i vo,

Babiloni 'atamana bwaikina i da kualo i kualo.

Nani sakoidi i luvili bani'odi yaiaina, yalua maigikokololodi wata manuga sakoidi.

<sup>3</sup> I kualiga fai fwayafwaya 'ana toveimea bwaikidi yadi tomotoga fueidi taiadi nuadi i 'ewadi i nagoi 'waineye, i vevesauluva sakoina wata yaubada-vekavekali 'waidie i 'odu'odu, 'wa da vo bani'odi vavine ufa toketokena i da veledi taiadi i da sakona.

We'e fwayafwaya 'ana nuanua 'waineye bwaikina nuanua kukua fueidi, begaidi tomotoga fueidi yadi kukua i vevekimwaneyedi 'waineye bega mani bwaikina i veveluagadi."

<sup>4</sup> ✧Wata tamu bona a nogai abamega i vonavona 'atamananina faifaina i vo,

Yaku tomotoga, 'wa na souyemi 'atamananina 'wainega, vavinenina 'wa na baileni kebu 'wa na sakosakona taunina bani'odi.

Kebu nuanuaku 'ana vematavulogayega 'omi wata a na luvematavulogimi.

<sup>5</sup> Mogitana vematavuloga i na veluagai fai yana sakona fueotogidi i 'udili i laka abame, Yaubada i nuanuanidi.”

<sup>6</sup> \*Wata yana anelose i vona i vo,

'Atamana Babiloni vavine toalagogona bani'odi i vesauluva-sakoina yaku tomotoga 'waidie, 'omi wata bani'odi 'wa na vesauluva sakoina 'waineye.

Sakona 'aitamogana 'aitamogana i 'idewadiga, wata 'omi 'wa na tutula 'ailuga 'ailuga.

Nani sakoidi bani'odi ufa toketokena ma vedina i 'idewai yaku tomotoga faifaidi, 'omi wata bani'odi vedi 'ailuga 'wa na 'idewadi 'wa na veleni i na yemu, 'ana vematavuloga.

<sup>7</sup> Yana 'ai'aiwabu faifaidi ma yana vebaisa taunina i awa'ai'aia, 'omi vita wata nuavita 'wa na veleni yana 'ai'aiwabunidi bwaikidi 'adi fata bani'odi.

I lubwaineni vitanidi i na veluagadi fai tutuya fuedi taunina i awa'ai'aia i vo, Yau kwini toketokeku, kebu vita wata nuavita a na veluagadiga 'wabu'wabulavo i veveluagadiga bani'odi.”

<sup>8</sup> \*Yana vonanina faifaina vita fuedi i na veluagadi 'aiata 'aitamogana nageneye, bani'odi viga sakoina, vemogai wata loka.

'Auvea Yaubada toketokeotogina, i na veimea vematavuloga i na veluagai 'ai i na 'ala'a'avai.”

<sup>9</sup> \*Fwayafwaya 'ana toveimea bwaikidi, kumanidiavo vavinenina taiadi i sakosakona wata i sosoana-'avo'avovo yana 'ai'aiwabu faifaidi, lufwana i na 'iseni, faifaina nuadi i na vita i na 'we'wela. <sup>10</sup> Ana vematavuloga faifaina i na kololo 'ani'ie i na tovoi bega i na vona i na vo,

Ieu, nuakalikalina 'atamana bwaikina wata toketokena.

'Atamana Babiloni tutuya 'ale'usaotogina nageneye vematavuloga i veluagai i 'a'ava-matayo'o.”

<sup>11</sup> Tomotoganidi yadi kukua i vevekimwaneyedi bega mani bwaikina i veveluagadi wata i na nuavita i na 'we'wela i na vo, 'Atamananina bwaikina 'akonadi i 'a'ava. Kebu tamu aitoi yada kukua i na kimwanedi bola ta na vewekowekoma.

<sup>12</sup> Yada kukuanidi bani'odi golida, siliba, kileu wata bida 'adi tutula bwaikidi, kaleko 'avu'avudi, bakabakadi, wata yamoyamoidi 'ai'aiwabu faifaidi, welavi magaidi 'atumaidi, tomotoga 'adi dabidabi 'adi tutula bwaikidi bani'odi kavi, kofa, kainumu, kilifou wata 'aisaya bwaikidi aladi. <sup>13</sup> Wata

yada kukua 'ifwaidi bani'odi kavu, naia, vane, bunama magaidi 'atumaidi, oine, falawa, witi, bulumakau, sifi, osi ma yadi waka fwayafwaya, wata tomotoga ta vevekimwaneyedi bega tomotoganidi i na vetofolova-maimaiga mali tomotoga faifaidi.”<sup>14</sup> Wata tovekimwanenidi 'ani'ieyega i na vonamo vavinenina 'waineye i na vo, Kukuanidi basenadi yamu nuanua bwaikina 'akonadi i 'a'ava, yamu 'ai'aiwabu, 'amu vaigavu wata 'amu subia matatabuna i 'a'avaotoga, kebu 'ana fata wata 'u na veluaga-vaituganidi.”<sup>15-16</sup> Tomotoganidi kukua i vekimwaneyedi 'atamana Babiloni 'waineye bega mani bwaikina i veluagadi, 'ana vematavuloga faifaina i na kololo 'ani'ie i na tovoi bega i na 'we'wela i na vo,

Ieu, nuakalikalina 'atamana bwaikina.

Taunina i 'i'ivivigavuya kaleko 'avu'avudiega, bakabakadiega, yamoyamoidiega, golida 'wainega, kileu wata bida 'adi tutula bwaikidi 'waidiega.

<sup>17-18</sup> Tutuya 'ale'usana yana 'ai'aiwabunidi matatabuna i 'a'ava-matayo'o.”

Wata toniwaka matatabudi, waka 'ana tofolovavo wata tomotoga i dodoga wakanidi 'waidie toyaubani taiadi 'ani'ieyega lufwana i na 'iseni ma yadi nuavita i na 'we'wela i na vo, No'o 'atamananina bwaikina, kebu tamu 'atamana bani'odiga.”<sup>19</sup> Taunidi fwayafwayayega i na ivudi, i na vemogai wata i na tainuanuai i na vo,

Ieu nuakalikalina, 'atamananina vita bwaikina i veluagai.

Toniwaka matatabudi 'atamananina 'wainega 'ai'aiwabu bwaikina i veluagadi, siwe i simatayo'oimo yana 'ai'aiwabu i 'a'ava i sako-vagata.

<sup>20</sup> ☆ We'e 'omi tomia abama 'wa na sosoana vematavuloga i veleniga faifaina.

'Omi Yaubada yana tomotoga, yana tomata'aulelevo wata yana tolu'ivonavo, 'wa na sosoana fai 'atamananina 'wainega vita 'wa veluagai siwe 'akonadi Yaubada vematavuloga i veleni 'ami vita 'adi tutula.”

<sup>21</sup> I 'a'avana mulieta tamu anelose toketokena kileu bwaikaotogina i silakai i toke i taweni malaveseye i vona i vo,

De'e kileunina a taweniga kebu 'wa da 'ise'iseni, wata bani'odi Babiloni 'atamana bwaikina i na toke i na leodi i na 'a'ava, kebu wata tamu aitoi i na 'ise'iseniga.

<sup>22</sup> 'Atamananina yana sosoana i na 'a'ava kebu wata tamu ava'ai bonana ta na noganogai bani'odi lauinava gitayega, 'umo wata evulega.

Wata tofolova kebu tamu ava'ai i na 'idewaiga nageneye, wata kebu 'ana fata sakoli butu'aidi ta na noganogaidi.

<sup>23</sup> Kebu tamu mageta bei ta na 'ise'iseni, wata nagi 'ana bonabonana i na 'a'ava.

Vona mogitana 'atamananina 'ana tovekimwane matatabudi i 'edakumetaotoga tomia fwayafwaya matatabudi 'waidiega, wata 'afo'a 'wainega tomotoga fue di i vekaliedi, siwe 'akonadi toketokenanidi matatabuna i 'a'ava.

<sup>24</sup> 'Atamananina Babiloni vematavuloga i veluagai fai base-nadi bei Yaubada yana tomotoga wata yana tolu'ivonavo i lu-vewafadi. Vona mogitana, tomotoga matatabudi i tokemaiga Yaubada faifaina i wafa 'atamana fue di 'waidie siwe dayagidi 'wa da vo i da iloilolo 'atamananina 'waineye.”

## 19

### *Lei-subisubia Yaubada faifaina.*

<sup>1</sup> Vavine toalagogona, kumanina 'asa'aiana 'atamana Ba-biloni, yana be'u a 'iseni i 'a'ava, mulieta tamu bona a nogai. Bonanina a nogaiga 'wa da vo 'aila'a bwaikaotogina bonadi, i toke i vonavona abamega i vo,

Yaubada ta na subiai, taunina 'ada to'ita'ita'i, magemage-tana wata toketokena.

<sup>2</sup> \*Yana veimea tonovidi wata 'atumaidi 'waidiega vavine toalagogona vematavuloga i veleni. I veleniga fai tomia fwayafwaya nuadi i 'ewadi bega i sakosakona, wata Yaubada yana tomotoga fue di i luvewafadi.”

<sup>3</sup> \*Wata i toke i vona i vo,

Yaubada ta na subiai.

'Atamananina bwaikina lufwana i tovi-vagata kebu i na 'a'avaga.”

<sup>4</sup> \*To'edakumetavo 'au'auveadi 24 wata nani ma yawaidi toketokedi 4 ma yadi ve'ililibu i be'u, Yaubada yana 'eba miabui 'waineye i miamiaga i subiai i vo, Vona mogitana, yada nuanua bani'odi, ta na subiai.”

### *Yaubada yana Sifi Siaina yana nagi 'ana sakali.*

<sup>5</sup> Wata tamu bona a nogai Yaubada yana 'eba miabui 'ai'aiwabuna 'wainega i vonavona i vo,

'Omi Yaubada yana tofolovavo, tomotoga bwaikimi wata tomotoga-'avo'avovo, matatabumi 'wa veve'ililibuyeniga, yada Yaubada ta na subiai.”

<sup>6</sup> \*Wata a nogai 'aila'a bwaikaotogina bonadi, 'wa da vo ku-vakuvala butu'aina 'alo tomuyoana i da duduya, i vonavona i vo,

Yaubada toketokena ta na subiai fai taunina 'ada Toveimea wata yada Kini.

<sup>7-8</sup> \*Ma yada sosoana yana toketokena ta na subisubiai fai

yana Sifi Siaina yana nagi 'ana tutuya 'akonadi i souyeni, we'e vavinenina taiadi i na nagiga, taunina Iesu 'ana tovetumaganavo matatabudi, 'akonadi taunina i 'ivivigavuya.

Yaubada kaleko 'atumaina wata 'avu'avuna i veleni, vuvunavunagina wata 'aninamanamalina, 'wainega taunina i 'ivivigavuya."

We'e kalekonina 'ana 'aseta Yaubada yana tomotoga yadi sauluva tonovidi.

<sup>9</sup> ✧ Anelose wata i voneku i vo, Side vonanina 'u na kilumi 'u na vo, Egavo Yaubada i tayegidiga yana Sifi Siaina yana nagi 'ana sakali 'waineye 'eba sosoana 'waidie. Vona de'e Yaubada yana vona, vona mogitana." <sup>10</sup> ✧ Yana vona a nogai nika ma yaku ve'ililibu a be'u mataneye siwe i voneku i vo, Kebu 'u na 'odu 'waikuye, 'ida 'ada 'ailuga wata emwavo yana vona tonovidi i nunuave'avinidi, matatabuda ta vetofolova Iesu faifaina. Yaubada 'aisena 'waineye 'u na 'odu'odu. Basenadi Yaubada yana Vona Tonovidi Iesu i sivemagesedi, we'e tutuya de'e 'Anu'anununa yana 'aivaita 'wainega yana tomotoga Vonanidi i lulu'ivoneyedi mali tomotoga 'waidie."

*'Aisaya osi 'avu'avuna 'ana tomotoga.*

<sup>11</sup> Anelose i vona'a'ava, mulieta abama 'ana saiboda i sibaleni. A 'isanago osi 'avu'avuna a 'iseni kwavuneye tamu tomotoga a 'iseni 'ana wagava, YANA SAULUVA TONOVIDI MA 'ANA VETUMAGANA. Yana veimea tonovidi 'waidiega i lulugavia wata i luluvematavuloga. <sup>12</sup> ✧ Matana 'ai-'ala'alata bani'odi we'e 'unu'ununeye kunabanaba 'ai'aiwabudi fuedi, toveimea bwaikidi 'adi vaigavu. Tamu 'ana wagava i kilumiga tomogoneye kebu tamu aitoi i da 'isa'inanaiga, taunina 'aisena i 'asetai. <sup>13</sup> ✧ Ana talauma i veageiga dayadayagina we'e wagava tamu 'ana 'eba 'ainana Yaubada yana Tokiavemageta. <sup>14</sup> Tokiavemagetanina taunina Keliso, i kumeta we'e Yaubada yana tolugaviavo 'aila'a bwaikina abamega osi 'avu'avudi kwavudie i dodoga mulineye i deli, ma 'adi kaleko 'avu'avudi wata vuvunavunagidi. <sup>15</sup> ✧ Kelisonina 'awaneye kefata kainumu nigonigona, 'wainega tomia fwayafwaya 'aila'a tulina tulina i na nikedi. Yana veimea fa'alina 'wainega i na veimeyedi, wata Yaubada Bwaikaotogina yana nuasako bwaikina 'wainega i na vematavulogidi. <sup>16</sup> ✧ We'e 'ana talauma 'waineye wata 'ageneye tamu wagava i kilumi i vo,

**KINI MATATABUDI 'AISENA YADI KINI, WATA TOVEIMEA BWAIKIDI 'AISENA 'ADI TOVEIMEA.**

<sup>17</sup> Wata a 'isanago tamu anelose a 'iseni i tovoivoi inala 'waineye. I toke i vegole manuga matatabudi i yaveyavega 'waidie i vo, 'Wa va'auta Yaubada yana sakali

✧ 19:9: Luk 14:15 ✧ 19:10: Ve 22:8-9 ✧ 19:12: Ve 1:14 ✧ 19:13: Ion 1:1,14 ✧ 19:15: Ve 1:16 ✧ 19:16: Ve 17:14



bwaikina faifaina. <sup>18</sup> Sakalinina 'waineye tomotoga fue di i wafaga tomogodi 'wa na 'anidi, kini, tolugaviavo ma yadi to'edakumetavo, osi wata 'adi tomotogavo, wata tomotoga 'ifwaidi, bwaikidi wata siaidi, tofолоva-maimaiga wata yavuyavudi.”

<sup>19</sup> ✨I 'a'avana mulieta wata a 'isanago tomotoga sakoina 'aisaya kasikasisina bani'odi a 'iseni. Tomia fwayafwaya yadi toveimeavo bwaikidi i vonedi i va'auta yadi tolugaviavo taiadi, bega Keliso ma yana tolugaviavo taiadi i na vetalaga. <sup>20</sup> ✨Keliso ma yana 'aila'avo i vetoketoke tomotoga kasikasisina wata yana tolu'ivona-vekavekali taiadi i 'ive'avinidi. Tolu'ivonanina kumanina 'eba nuavogana wata 'eba nua'ewa i 'idewadi tomotoga kasikasisina 'ana wagavayega, bega tomotoga fue di i vevekaliedi. Tomotoganidi i vekaliediga kumanidiavo tomotoga kasikasisina yana tugusa debadie wata 'ana kumaea 'waineye i 'odu'odu. I 'ive'avinidiga ma yawaidi i tawedi i obu muna bwaikina 'waineye. <sup>21</sup> ✨We'e tomogonina osi kwavuneye i laka, 'awaneye kefata, yana kefatanina 'wainega 'ana gaviavo i luwewafadi, mulieta manuga fue di i maia tomogodi i 'aniwayogedi.

## 20

*Yaubada Seitani i yogoni i na miamia malamala 1,000 nagedie.*

<sup>1</sup> ✨Vetalaga i 'a'ava, mulieta tamu anelose a 'iseni abamega i obuobuma, nimaneye Vatu'ai Manamanawena 'ana 'eba yavu wata bulava kainumu i 'ive'avinidi. <sup>2</sup> ✨I obuma wayo'o kasikasisina i 'ive'avini i yogoni bega malamala 1,000 nagedie yogoyogonina i na miamia. Wayo'onina kasikasisina kumanina 'o'olo tuatuaina, 'ana wagava Diabolo 'alo Seitani. <sup>3</sup> I 'ive'avini i 'a'avana i taweni i obu Vatu'aie i sibodeni bega kebu tamu aitoi 'ana fata i na yavuya, wata kebu tomia fwayafwaya i na vevekaliediga. Malamala 1,000 i na 'a'ava, Yaubada i na tauyeni i na souyeni tutuya 'ale'usana faifaina.

<sup>4</sup> ✨Wata a 'isanago 'eba miabui 'ai'aiwabudi a 'isedi, 'eba miabuini 'waidie tomotoga ma yadi veimea Yaubada 'wainega, 'adi fata i na veveimea vematavuloga faifaina. Wata tomotoga 'ifwaidi 'anu'anunudi a 'isedi kumanidiavo basenadi i luwewafadi Iesu Valana 'Atumaina wata Yaubada yana Vona 'adi lu'ivona faifaiddi. Wata tomotoganidi kebu i da 'odu'oduga tomotoga kasikasisina malavetayega 'ana kumaea 'alo taunina 'waidie, wata 'ana tugusa kebu

✨ 19:19: Same 2:2 ✨ 19:20: Ve 13:11-17, 20:10 ✨ 19:21: Ve 19:17-18

✨ 20:1: Ve 9:1 ✨ 20:2: Ve 12:9; Iud 1:6 ✨ 20:4: 1 Kol 6:2; Ve 6:9, 13:16-17;

Dan 7:27

i da 'ewai nimadie 'alo debadie. I wafa siwe i yawasa bega Keliso taiadi i na veveimea malamala 1,000 nagedie. <sup>5</sup> Yadi yawasa 'asa'aiana tovi-vaitugana kumekumetana, we'e towafa 'ifwaidi malamala 1,000 i na 'a'ava, mulieta i na tovoi-vaitugana. <sup>6</sup> \*Egavo nagami i tovoiga Yaubada yana tomotoga magemagetadi, ma yadi sosoana taiadi i na miamia, bega tutuyanina tosakona i na luku 'ai-'ala'alase i na wafaotoga, tomotoganidi kebu tamu vita i na veluagai. Malamala 1,000 nagedie i na vevetofolova Yaubada wata Keliso faifaidi, 'asa'aiana yadi tovelomu, wata ma fuedie i na veveimea.

*Yaubada i vetoketoke Seitani ma yana 'aila'avo i leodi.*

<sup>7</sup> Malamala 1,000 i na 'a'ava, mulieta Yaubada i na tauyeni Seitani i na 'etoyavuya yana 'eba yogona Vatu'ai Manamanawena 'wainega. <sup>8</sup> I na souyeniga i na nago 'awalawa 'aitamogana 'aitamogana 'waidie, tomotoga 'aila'a tulina tulina, kumanidiavo i goledi Gogi wata Megogi i na vevekaliedi. Seitani yana veimea 'wainega, tomotoganidi 'awalawa matatabuna 'waidiega i na va'augidi vetalaga faifaina, 'adi 'aila'a lu'iawawa-wayoga wala'ai 'ana 'ilukulukuta bani'odi. <sup>9</sup> Tomotoganidi fwayafwaya matatabuna 'waidie i na nagoi, Yaubada yana tomotoga wata 'atamananina i nuakalikalieniga i na toviiffinedi. Nuanuadi i na leodi siwe 'ai-'ala'alata i na 'anita'ia abamega i na 'alaidi matatabudi i na wafa. <sup>10</sup> \*We'e Seitani, kumanina tomotoga i vekaliediga, Yaubada yana veimea 'wainega i na 'ive'avini i na taweni i na obu muna bwaikina 'waineye, basenadi tomotoga kasikasisina wata yana tolu'ivona-vekavekali, wata bei i tawedi. 'Ainina 'waineye i na veveviga lovana wata 'aiata kebu tamu sai'afo i na 'a'ava, i na 'eno-vagata.

*Vonayavuga 'ana 'eba ve'a'ava.*

<sup>11</sup> Mulieta wata a 'isanago 'eba miabui 'ai'aiwabuna a 'iseni, bwaikina wata 'avu'avuna, 'ana tomotoga taiadi a 'isedi. Tomotoganina 'eba miabui 'waineye, bwaikaotogina wata magemagetana begaidi nani matatabuna abame wata fwayefwayeye i ve'aladegadega, i nagoi 'ani'ie siwe kebu tamu 'awasasa i da 'eno'eno bei i na giva tomotoganina 'wainega. <sup>12</sup> \*'Eba miabuina mataneye towafa fuedi i tovo-tovoi, bwaikidi wata siadi, bega buki 'ifwaidi i luyawagidi. Bukinidi nagedie towafanidi matatabudi yadi sauluva i lu'ivoneyedi bega Yaubada i na veimeyedi vematavuloga faifaina. We'e tamu buki i luyawagi, egavo 'adi wagava bei i kilumidiga, taunidi mia 'atumaina wata miamia-vagaina

i na veluagai. <sup>13</sup> ✨Egavo basenadi i wafaga malaveseye wata 'avale, wata towafa Vatu'ai Manamanawena 'waineye, matatabudi i souyedi i maia i vonayavuga yadi sauluva fwayefwayeye faifaidi. <sup>14-15</sup> ✨Wafa wata towafa yadi 'eba mia Yaubada i tawedi muna bwaikina 'waineye matatabudi i 'a'ava. Egavo kebu 'adi wagava i da kilumidiga Yawai-vagata 'ana Buki 'waineye, Yaubada i veimea i na wafaotoga, i tawedi muna bwaikina 'waineye, wafa 'ana veluga i veluagai.

## 21

*Abama wata fwayafwaya 'ivaudi.*

<sup>1</sup> ✨Abama tuatuaina wata fwayafwaya tuatuaina eyaga taiadi i 'a'ava, mulieta a 'isanago abama wata fwayafwaya 'ivaudi a 'isedi. <sup>2</sup> ✨Wata Yaubada yana 'atamana magemage-tana a 'iseni, taunina Ielusalema 'Ivauna i obuobuma abamega Yaubada 'wainega. 'Ana 'isa'isa 'atumaiotogina 'wa da vo vavine i da 'ivivigavuya bega yana lamoga taiadi i na veluga nagi faifaina. <sup>3</sup> Bona a nogai 'eba miabui 'ai'aiwabuna 'wainega i toke i vonavona i vo,

Tutuya de'e i na nagoga Yaubada i na miamia tomotoga taiadi.

I na miave'itubama bega taunidi yana tomotoga.

Yaubada taunina 'adi 'weabu wata yadi Yaubada.

<sup>4</sup> ✨Taunina nuadi i na 'iveololodi nika kebu tamu tutuya i na 'we'welaga, wata bei kebu wafa, nuavita, 'alo veviga.

Naninidi sakoidi wata nani matatabudi fwayefwayeye nagami, i 'a'avaotoga.”

<sup>5</sup> Tomotoganina 'eba miabui 'ai'aiwabuna 'waineye i mi-amiaga i vona i vo, A na vonemu, nani matatabudi a 'i'ive'ivaudi.” Wata i vo, Ava'ai a vonevonemuga matatabuna 'u na kilumidi, fai vona mogitana wata vona tonovidi, tomotoga 'adi fata i na vetumagana vonanidi 'waidie.”

<sup>6</sup> ✨Wata i voneku i vo, Yaku nuanua matatabuna 'akonadi a ve'a'avadi. Yau kumaniku lamukwaikwaituna wata kaluna, kebu 'aku 'eba velamuga wata kebu 'aku 'eba ve'a'avaga. Egavo nuanuadi bwaikina mia 'ivauna wata 'atumaina bani'odi 'anigodi i lala, i lubwainedi i na maia 'waikuye ufa-luluvuala nonogina a na veledi i na yemu. Ufanina 'wainega mia 'ivauna wata 'atumaina i na veluagai, 'waidie i na 'eno-vagata. <sup>7</sup> ✨Egavo i na vetoketokega faifaiku, naninidi 'atumaide a na veledi, we'e yau yadi Yaubada wata taunidi natukwavo. <sup>8</sup> We'e egavo kebu i da vetoketoke faifaiku,

✨ **20:13:** Lom 2:6; Ve 22:12 ✨ **20:14-15:** 1 Kol 15:24-26,54-55; Mad 25:41

✨ **21:1:** 2 Fit 3:13 ✨ **21:2:** Ibu 11:16; Ve 3:12 ✨ **21:4:** Ve 7:17; 1 Kol 15:24-26

✨ **21:6:** Ve 1:8, 22:13,17; Ais 55:1; Ion 7:37 ✨ **21:7:** Lom 8:14-17

bani'odi fwa'ofwa'o'odi, vona'awaufaufa 'adi togeu, egavo i veve'avula-'avo'avovo, toluwewafa, egavo nuanuadi sakona-vebogi, tolu'afo'a, tobalau, tobwalata, egavo i 'odu'odu yaubada-vekavekali 'waidie, wata tovekali matatabudi vita bwaikina i na veluagai. Vitanina i na tawedi muna bwaikina 'waineye, bei wafa 'ana veluga i na veluagai."

*'Atamana Ielusalema 'Ivauna.*

<sup>9</sup> ✱ Anelose 7, kumanidiavo nani sakoidi yadi 'aivoeyega i 'iveiwagediga fwayefwayeye, 'waidiega tamu i mai i voneku i vo, 'U mai ta na nago Yaubada yana Sifi Siaina yana vavine a na vemu." <sup>10</sup> I vona'a'ava nika 'Anu'anunu 'Atumaina i ageku mogitana nika anelosenina i naweku tamu 'oya bwaikina tabwaneye. Bei Ielusalema 'Ivauna a 'iseni, 'atamananina magemagetana i obuobuma abamega Yaubada 'wainega. <sup>11</sup> 'Atamananina i 'aninamanamali Yaubada yana mageta mataududulina 'wainega, 'ana 'isa'isa kileu 'atumaiotogina kilifou bani'odi, siwe 'ana tutula bwaikaotogina. <sup>12</sup> 'Ana kali kileu 'waidiega i 'idewai bababana wata i laka manamanawena, 'ana 'eba luku matatabuna 12, 'waidie anelose 12 i tovofovo i 'i'isave'avinidi. Saiboda 'aitamogana 'aitamogana 'waidie wata wagava 'aitamogana 'aitamogana i kilumidi, wagavanidi me Isileli wauma 12 'adi wagava. <sup>13</sup> Inala yana 'eba lakayega 'awa 'aitonu, wata yana 'eba inivayega 'aitonu, bolimanayega 'aitonu wata yavalatayega 'aitonu. <sup>14</sup> Kalinina 'ana bawe'unu kileu bababadi 12, 'waidie bei Yaubada yana Sifi Siaina yana tomata'aulelevo 12 'ama wagava i kilumidi.

<sup>15</sup> Anelosenina i vonaga 'waikuye ma yana 'eba 'etowava golida wautogana bani'odi, 'eba 'etowavanina 'wainega 'atamana wata 'ana kali, 'ana saiboda taiadi i na 'etowavadi. <sup>16</sup> I 'etowavaiga, 'atamananina 'ana vemanawe, 'ana bababa, 'ana laka i vesala, me Guliki yadi 'etowava 12,000 site-dia.\* <sup>17</sup> Wata 'ana kali 'ana laka i 'etowavai me Diu yama 'etowavayega 144 kiubiti.† <sup>18</sup> 'Atamananina golida 'wainega i 'idewai, 'aninamanamalina kelasi bani'odi. 'Ana kali kileu 'atumaiotogidi 'waidiega i 'idewai, bani'odi kilifou. <sup>19-20</sup> 'Ana bawe'unu i 'ivivigavuya kileu 'adi tutula bwaikidi 'waidiega, kileunidi 'adi wagava side.

Bawe'unu nagami Diasifa 'wainega i 'ivivigavuya, 'ana 'isa'isa kilifou bani'odi.

'Ana veluga Safaia, 'ala'alawina tailikelike bani'odi,  
'ana vetonu Agate, 'ala'alawina mosomoso bani'odi,  
'ana ve-4 Emelodi, 'ala'alawina siwe sai'afo wayana.

✱ 21:9: Ve 15:1, 21:2; Efe 5:27      \* 21:16: 'Ana vemanawe 2,800 kilomita bani'odi.      † 21:17: 'Ana vemanawe 64 mita bani'odi.

'Ana ve-5 Onikisi, yamoyamoina 'avu'avuna taiadi,  
 'ana ve-6 Kaneliani, yamoyamoina,  
 'ana ve-7 Kilisolaiti, 'ovu'ovuna,  
 'ana ve-8 Beleli, 'ala'alawina malaveta bani'odi,  
 'ana ve-9 Tofasi, 'ana 'ovu'ovu magemagetana,  
 'ana ve-10 Kalisedoni, 'ana 'ala'alawa magemagetana,  
 'ana ve-11 Tekoisi, bakabakana,  
 'ana ve-12 Ametisi, bakabakana siwe sai'afo magemage-  
 tana.

<sup>21</sup> 'Atamananina 'ana saiboda 12, saibodanidi 'aitamogana  
 'aitamogana 'waidie bida 'aitamogana 'aitamogana i ya-  
 todi, bidanidi 'aninamanamalidi wata 'adi tutula bwaikidi.  
 'Atamananina 'ana 'eda i 'idewai golida 'wainega, 'ana 'isa'isa  
 'atumaiotogina kelasi bani'odi.

<sup>22</sup> 'Atamananina nageneye vanuga 'eba velu'ui kebu a  
 da 'iseniga, fai 'Auvea Yaubada toketokeotogina wata yana  
 Sifi Siaina 'asa'aiana taunidi tomotoga yadi vanuga 'eba  
 velu'ui. <sup>23</sup> ✧ Yaubada magetana 'atamananina i 'i'ivemagetai  
 wata yana Sifi Siaina taunina 'asa'aiana 'atamananina 'ana  
 mageta, bega inala kebu wata weta'i kebu. <sup>24</sup> Magetanina,  
 wata tomia fwayafwaya matatabudi yadi mageta, 'waineye  
 i na miamia wata yadi toveimeavo bwaikidi yadi 'ai'aiwabu i  
 na mimaiedi 'atamananina 'waineye. <sup>25</sup> Tutuya matatabuna  
 'awa i sibala-vagasedi, kebu tamu tutuya i na sibodadi  
 fai 'aiata luvedavedamanina. <sup>26</sup> Tomotoga 'aila'a tulina  
 tulina ma yadi ve'ililibu yadi 'ai'aiwabu i na mimaiedi  
 'atamananina 'waineye. <sup>27</sup> ✧ Kebu tamu sai'afo ava'ai sakoina  
 i na luku 'atamananina 'waineye, sauluva 'eba bunumayaga  
 'adi to'idewadewa wata tovekali kebu 'adi fata i na luku.  
 Tomotoganidi 'adi wagava i kilumidiga Sifi Siaina yana buki  
 nageneye bega yawai-vagata i veluagai, kumanidiavo 'aisedi  
 'adi fata i na luku Yaubada yana 'atamananina 'waineye.

## 22

*Tamu ufa mia 'atumaina wata miamia-vagaina faifaina.*

<sup>1-2</sup> ✧ Wata anelose tamu ufa i veku, matana  
 lumasi'ataotogina i sousouyeni Yaubada wata yana Sifi  
 Siaina yadi 'eba miabui 'ai'aiwabuna 'wainega. Ufanina  
 'wainega tomotoga mia 'atumaina wata miamia-vagaina i  
 veveluagai, i sousouyeni 'atamana 'ana 'eda kamwaneamo  
 i ivoivo. Ufanina dolena ma vi'ainana Welavi Yawai i  
 veve'alatovoi, weta'i 'aitamogana 'aitamogana i vuavuaga,  
 malamala 'aitamogana 'aitamogana nagedie. Egavo vuagidi  
 i na 'anidiga mia 'atumaina wata miamia-vagaina i na

veluagai, we'e lukudi tomotoga 'adi 'aila'a tulina tulina yadi mulamula, 'adi 'eba 'ive'atumai faifaina. <sup>3</sup> ✧Kebu tamu nani Yaubada i da 'alatabutabuya 'atamananina nageneye.

'Atamananina nageneye Yaubada wata yana Sifi Siaina yadi 'eba miabui 'ai'aiwabuna 'waineye i miabui i miamia, we'e yana tofolovavo ma yadi subia i na 'odu'odu 'waineye. <sup>4</sup> ✧Debadie Yaubada 'ana wagava i kilumidi, wata maigina i na 'ise'iseni. <sup>5</sup> ✧'Auvea Yaubada taunina yadi mageta nonogina, bega lovana kebu, wata inala yana mageta 'alo dukala faifaidi kebu i na nuanua. Tomotoganidi 'atamananina nageneye Yaubada taiadi i na veveimeavagata.

### *Iesu yana mai faifaina.*

<sup>6</sup> Wata anelose i voneku i vo, Vonanidi 'akonadi 'u kilumidiga vona mogitana i na souyedi. 'Amu fata 'u na vetumagana 'waidie. Basenadi 'Auvea Yaubada 'Anu'anununa yana tolu'ivonavo i agedi bega yana vona i lulu'ivoneyedi. Wata bani'odi 'asiau yana anelose i vetunei abamega bega naninidi sai'afoga i na souyediga i sivemagesedi yana tofolovavo 'waidie.”

<sup>7</sup> ✧We'e Iesu i vonavona i vo, A na vonemi. Yau sai'afoga a na wai. Vonanidi a voneyediga buki de'e nageneye a vonavagata 'awaie i na souyedi, begaidi egavo i na lu'iawawadi i na vematayakeyakedi 'eba sosoana 'waidie.”

<sup>8</sup> We'e yau Ioni naninidi matatabuna a 'isedi wata a no-gaidi, i 'a'avana ma yaku ve'ililibu a be'u a lumata'afufu anelose 'ageneye, kumanina naninidi matatabuna i veku, igodi a da subiai. <sup>9</sup> Siwe i talabodeku i vo, Kebu 'u na 'odu 'waikuye. 'Ida 'ada 'ailuga, emwavo Yaubada yana tolu'ivonavo, wata tomotoganidi buki de'e yana vona i veve-matayakeyakediga, matatabuda Yaubada yana tofolovavo. Yaubada 'aisena 'waineye 'u na 'odu'odu.”

<sup>10</sup> Wata i voneku i vo, Vonanidi faifaidi Yaubada i vona-vagata de'e buki nagenega kebu 'u na givediga. Naninidi sai'afoga i na souyedi bega 'u na lulu'ivona.

<sup>11</sup> Fai Iesu i na souye-matayo'oyeni egavo 'asiau i vevekali, tutuyanina 'waineye wata i na vevekali. Egavo 'asiau i sakosakona, tutuyanina 'waineye wata i na sakosakona. We'e egavo 'asiau yadi sauluva 'atumaidi, tutuyanina 'waineye wata i na vevesauluva 'atumaidi. Egavo 'asiau yadi sauluva magemagetadi, tutuyanina 'waineye yadi sauluva magemagetadi Yaubada mataneye.”

12 ✨Wata Iesu i vo, A na vonemi, sai'afoga a na wai. Tutula a na viwedi, tomotoga 'aitamogana 'aitamogana 'adi tutula a na veledi yadi folova 'adi 'isa'isa bani'odi. 13 ✨Yau kumaniku lamukwaikwaituna wata kaluna, kebu 'aku 'eba velamuga wata kebu 'aku 'eba ve'a'avaga.

14 ✨Egavo Iesu yana wafa 'wainega i ve'atumaiotoga, 'wa da vo 'adi kaleko i da lekolekoadi dayaginega, 'eba sosoana 'waidie bega 'adi fata i na luku Yaubada yana 'atamana 'waineye, wata Yaubada i tauyedi 'adi fata Welavi Yawai vuagina i na 'ania. 15 ✨We'e 'atamananina tanotanoge tosakona fuedi, bani'odi tobalau, tolu'afo'a, tobwalata, tove'avula-'avo'avovo, toluwewafa, egavo i 'odu'odu yaubada-vekavekali 'waidie, wata tomotoga 'ifwaidi i vevekaliga yadi sauluvayega 'alo yadi vonayega.

16 ✨Yau Iesu yaku anelose a vetunei naninidi i lu'ivoneyedi 'omi tovetumaganavo 'waimie 'wa miamiani 'awalawa tulina tulina 'waidie. We'e yau Kini Devida 'ana wauma 'wainega a tubuga wata yau Kumauloku magemagetaku."

17 ✨'Anu'anunu 'Atumaina wata Yaubada yana Sifi Siaina yana vavine i vonavona i vo, 'Wa maia." Vonanina de'e egavo i na nogaiga i lubwainedi wata i na vo, 'Wa maia."

Egavo nuanuadi bwaikina mia 'ivauna wata 'atumaina bani'odi 'anigodi i lala, i lubwainedi i na maia ufa nonogina i na yemu, ufanina 'wainega mia 'atumaina wata miamia-vagaina i na veluagai."

### *Ioni yana vona 'eba ve'a'ava.*

18 ✨Yau Ioni a na vonemi. De'e vonanidi 'akonadi a lu'ivoneyediga Yaubada yana Vona i vona-vagata ava'ai sai'afoga i na souyedi faifaidi. Begaidi a velu'ase'ase, 'ai'edi aitoi yana nuanuayega vonanidi i na 'imoso'iedi, wata Yaubada 'ana vematavuloga i na 'imoso'iedi viganidi sakoidi a lu'ivoneyediga de'e buki nageneye, 'waidiega. 19 ✨Wata bani'odi 'ai'edi aitoi Yaubada yana Vona 'ifwaidi de'e bukinina nageneye i na ve'o'oleniga, wata 'ana 'anivelena Welavi Yawai vuagina Yaubada i na ve'o'oleni, we'e yana 'eba mia 'atamananina magemagetana a voneyeniga de'e buki nageneye wata i na ve'o'oleni.

20 ✨Yaku vona de'e buki nageneye Iesu i ve'awamogitanedi i vo, 'Asa'aiana bani'odi mogitana. Sai'afoga a na wai."

Toveimea Iesu, 'u mimaiga 'ima wata yama nuanua.

✨ 22:12: 2 Kol 5:10 ✨ 22:13: Ve 1:8, 21:6 ✨ 22:14: Ve 22:1-2 ✨ 22:15: Ve 21:27 ✨ 22:16: Lom 1:3-4; Ve 1:1 ✨ 22:17: Ve 21:6; Ais 55:1 ✨ 22:18: Ve 4:2; Ve 15:1 ✨ 22:19: Ve 22:2 ✨ 22:20: Ve 3:11; 1 Kol 16:22

<sup>21</sup> Nuanuaku 'ada Toveimea Iesu ma yana nuakalikali  
i na vevesauluva 'atumaina 'omi Yaubada yana tomotoga  
matatabumi 'waimie.  
'Asa'aiana bani'odi,  
Yau Ioni.